


Konda: కండ బసదు  
నశగొకబరొ



Konda Dora New Testament which was published in 2006

**Konda: కొండ బాసడు నెగ్గి కబ్బు**  
**Konda Dora New Testament which was published in 2006**

copyright © 2006 Wycliffe Bible Translators, Inc.

Language: Konda-Dora

Contributor: SIL International (in Asia)

All rights reserved.

2025-05-06

---

PDF generated using Haiola and XeLaTeX on 6 May 2025 from source files dated 7 May 2025  
840896da-3a66-5e43-9018-4a95a349d60c

## Contents

మత్తయి . . . . .	1
మార్కు . . . . .	49
లూకా . . . . .	79
యోహాను . . . . .	127
అపొస్తలు . . . . .	164
రోమ . . . . .	213
1కొరింథి . . . . .	237
2కొరింథి . . . . .	259
గలతీ . . . . .	272
ఎఫెసీ . . . . .	280
పిల్లిప్పీ . . . . .	288
కొలోసి . . . . .	294
1దెస్స . . . . .	300
2దెస్స . . . . .	305
1తిమోతి . . . . .	308
2తిమోతి . . . . .	314
తీతు . . . . .	318
పిల్లోమో . . . . .	321
ఎబ్రి . . . . .	323
యాకోబు . . . . .	340
1పేతురు . . . . .	346
2పేతురు . . . . .	352
1యోహాను . . . . .	356
2యోహాను . . . . .	362
3యోహాను . . . . .	363
యూదా . . . . .	364
ప్రకటన . . . . .	366

## మత్తయి రాస్తి సువార్త

నెల్లొ కిబిసినిక

దేవుణు మాటెజ్ రాస్తిమన్ని పుస్తకమాతి బయ్బిలుదు పడాయ్ ఒపుమానం, కొత్త ఒపుమానం ఇజి రుండి ముక్కెజ్ మన్నె. పడాయ్ ఒపుమానమ్దు యేసుప్రబు వందిజ్ వెప్తిమన్ని సజతిజ్, ఎలాగ పూర్తి ఆతె ఇజి కొత్త ఒపుమానం జాగర్త సద్విజి సుడెతిజి నెస్తిజానాద్. కొత్త ఒపుమానమ్దు మన్ని మొదొహి పుస్తకమ్నె మత్తయి రాస్తి సువార్త. యేసు ప్రబు సిసుర్ లోఇ మన్ని పన్ను పెర్నికానాతి మహి మత్తయి ఇనికాండ్రె ఇక్క రాస్తమనాన్. (మత్తయి 9:9-13) యేసు ప్రబుజ్ సిలువ పొక్తి వెనుక, ఇంజుముంజు 25-35 వంటెజ్ వెనుక ఇక రాసె ఆత మనాద్. ఇజి యా సజతిజ్ వందిజ్ నెస్తికార్ వెప్పినార్. దేవుణు వన్ని ప్రవక్తరు వెట వర్గితిమహి క్రిస్తు ఇనికాన్ యేసుప్రబునె ఇజి యూదుర్ ఆతికార్ నెస్తిజ్ ఇజినె ఇక్క రాస్త మనాద్. యేసుప్రబు పుట్టి వందిజ్, మరి దని వెనుక జర్గితి సజతిజ్ వందిజ్ దేవుణు ముజాల వన్ని ప్రవక్తరు వెట వర్గితిక ఎలాగ అయాలెకెండెన్ పూర్తి ఆతె ఇజి పడాయ్ ఒపుమానమ్దాన్ దన్ని వందిజ్ మన్ని మాటెజ్ లాగ్గి రుజుప్ కిజి తొరిసినాన్. దేవుణు ప్రవక్తరు వెట వర్గితి సజతిజ్ యేసుప్రబు బత్తుదు అయాలెకెండెన్ పూర్తి ఆతె (మత్తయి 1:23, 2:6, 14, 18, 23) ఇస్రాఏలు లోకుర్ రాజు ఆతిమహి దావీదు తెగాదు పుట్టికాన్ ఇజి రుజుప్ కిదెజ్, వన్ని తెగాదు పుట్టివరి పేరుకుబా మజి తొరిసినాన్. మరి దేవుణు ఏలుబడిః కిని వందిజ్ యా పుస్తకమ్దు నండొ సుట్కు రాస్త మనాద్. దేవుణు ఏలుబడిః కిని వందిజ్ యేసుప్రబు లోకురిజ్ నెస్తిన్ కతెజ్ యా పుస్తకమ్దు 13-14 అద్యయమ్కాజ్ రాస్త మనాద్. యేసు, దేవుణు మరిసి ఆతికాండ్రె ఇజి యా సువార్తదాన్ డటం వెప్పినాన్.

యాక యేసు తెగ

- 1 అబ్రహాం తెగాదికాతి దావీదు రాజు\* తెగదు పుట్టి యేసు క్రిస్తు తెగ యాక.
- 2 అబ్రాహాము మరిసి ఇస్సాకు, ఇస్సాకు మరిసి యాకోబు, యాకోబు మరిసిర్ యూదాని వన్ని దాద్నిర్, తంబేర్సిర్.
- 3 యూదా మరిసిర్ పెరెసుని జెరహు, వరి యాయ పేరు తామారు. పెరెసు మరిసి ఎస్రోము, ఎస్రోము మరిసి అరాము,
- 4 అరాము మరిసి అమ్మినాదాబు, అమ్మినాదాబు మరిసి నయస్సోను, నయస్సోను మరిసి సాల్మాను.
- 5 సాల్మాను మరిసి బోయజు, బోయజు యాయ పేరు రాహబు, బోయజు మరిసి ఓబేదు, ఓబేదు యాయ పేరు రూతు. ఓబేదు మరిసి యెసయ.
- 6 యెసయ మరిసి రాజు ఆతి దావీదు. దావీదు రాజు మరిసి సొలోమోను, సొలోమోను అయ్సి, ముజాల ఊరియెజ్\* ఆల్ని ఆతి మహికాద్.
- 7 సొలోమోను మరిసి రెహబాము. రెహబాము మరిసి అబీయా, అబీయా మరిసి ఆసా.
- 8 ఆసా మరిసి యెహోసఫాతు. యెహోసఫాతు మరిసి యెహోరాము, యెహోరాము మరిసి ఉజ్జియా.
- 9 ఉజ్జియా మరిసి యోతాము, యోతాము మరిసి ఆహజు, ఆహజు మరిసి హిజ్కీయా.
- 10 హిజ్కీయా మరిసి మనసె, మనసె మరిసి ఆమోను, ఆమోను మరిసి యోసీయా.
- 11 యోసీయా మరిసిర్ యెకొనియని వన్ని దాద్నిర్, తంబేర్సిర్. వరి కాలమ్దు బబులోను దేసెమ్ది రాజు యూదురిజ్ వెట్టిపణి కినివరిలెకెండె అసి తొప్తా ఒత్తాన్.
- 12 బబులోను దేసెమ్దు సొహి వెనుక అబె యెకొనియెజ్ మరిన్ పుట్టాన్. వన్ని పేరు సయల్తియెలు, సయల్తియెలు మరిసి జెరుబాబెలు.
- 13 జెరుబాబెలు మరిసి అబీహూదు, అబీహూదు మరిసి ఎలియాకీము, ఎలియాకీము మరిసి అజోరు.
- 14 అజోరు మరిసి సాదోకు, సాదోకు మరిసి ఆకీము, ఆకీము మరిసి ఎలిహూదు.
- 15 ఎలిహూదు మరిసి ఎలియాజరు, ఎలియాజరు మరిసి మత్తాను, మత్తాను మరిసి యాకోబు.
- 16 యాకోబు మరిసి యోసేపు, వన్ని ఆల్ని ఆతి మరియ పొటాదు క్రిస్తు ఇజి కూకె ఆతి యేసు పుట్టాన్.
- 17 యా లెకెండె అబ్రాహాము బాణిజ్ అసి దావీదు రాజు దాక మొతం పద్నాల్లి తరమ్కు, దావీదు రాజు బాణిజ్ అసి యూదురిజ్ బబులోను దేసెమ్దు వెట్టి పణి కిని వరిలెకెండె తొప్పిబతి కాలమ్దాక పద్నాల్లి తరమ్కు. యూదురు బబులోను దేసెమ్దు సొహి బాణిజ్ అసి యేసు క్రిస్తు దాక పద్నాల్లి తరమ్కు.

\* 1:1 1:1 దావీదు ఇస్రాయేలు లోకుర్ వందిజ్ దేవుణు ఏర్పాటు కితి రాజు. వాండ్రు ఇస్రాయేలుది రుండి రాజు వన్ని ముజాల సవులు ఇనికాన్ ఏలుబడిః కిజి మహాన్. \* 1:6 1:6 2సము 11:1-27.

యా లెకెండ్ యేసు క్రీస్తు పుట్టాన్. కసెలిజాణిజ్

18 యేసు క్రీస్తు యా లెకెండ్ పుట్టాన్. వన్ని అయ్సి ఆతి మరియెజ్ యోసేపు వందిజ్ వెన్బాత మహాద్. గాని వారు రిపెర్ ఉండ్రె బానె గూర్వండ ముందాలై అది దేవుణు అత్తు సత్తుదాన్ పాత డిస్తాద్.

19 గాని దనిజ్ పేరు కితికాన్ ఆతి యోసేపు దేవుణు రూలుజ్ లోజిజి మనికాన్ కక, విజేరిజ్ ఎద్రు సిగు కిబిన్వండ, ఎయెర్బా నెన్వండ, దన్నిజ్ డిసి సీదెజ్ ఇజి ఒడెబితాన్.

20 యోసేపు యా సజతిజి వందిజ్ ఆలోసనం కిజి మహివలె దేవుణు దూత కలాదు వన్నిజ్ తోరె ఆజి ఈహు వెహ్తాన, “దావీదు రాజు తెగ్గాతికాన్ ఆతి యోసేపు, నిజి పేరుకితి మని మరియెజ్ డగ్రుకిదెజ్ అనుమానం ఆమ. ఎందనిజ్ ఇహిజి దేవుణు అత్తు సత్తుదాన్ అది పాత డిస్తాద్ మనాద్.

21 అది ఒరెన్ కొడెః ఇడనాద్లె. వన్ని లోకాజ్ వరి పాపమ్కాణిజ్ వాండ్రు రక్సిస్సాన్లె. అందెజె వన్నిజ్ యేసు† ఇజి పేరు ఇడదెజ్వలె”,

22-23 “ఉండ్రె విడిః బోదెలి పాత డిసి ఒరెన్ మరిన్ ఇడ్నాద్లె. వాండ్రు ఇమ్మానుయెలు ఇజి కూకె ఆనాన్లె✱”, ఇమ్మానుయెలు ఇహిజి దేవుణు మా వెట తోడుః మనాన్ ఇజి అర్దం. ముందాల దేవుణు ప్రవక్త వెట వర్గితి యా మాటెజ్ నిజం పూర్తి ఆదిజ్ యాకెజ్ విజి యా లెకెండ్ జర్గితె.

24 యోసేపు నిద్రదాన్ తెలిఆతిజ్ దేవుణు దూత వన్నిజ్ వెహ్తా వజనె మరియెజ్ అల్పి లెకెండ్ వన్ని ఇండ్రొ కూక్త ఒతాన్.

25 గాని మరియ మరిన్ ఇడ్నిదాక వాండ్రు దని డగ్రు సాన్వేతాన్. మరిన్ పుట్టిజ్ వాండ్రు వన్నిజ్ యేసు ఇజి పేరు ఇట్టాన్.

## 2

తూర్పుదాన్ గ్నానురు వాజినార్

1 హేరోదు రాజు ఏలుబడిః కిజి మహివలె యూదయ దేసమ్దుమని బెత్తెహెము ఇని నాటో యేసు పుట్టాన్. వాండ్రు పుట్టి వెన్కా తూర్పు దరోటాన్ గ్నానురు\* యెరూసలేం ఇని పట్టుమ్దు వాతార్

2 పట్టుమ్దు వాతారె, “యూదురిజ్ రాజు ఆదెజ్ ఇజి పట్టి కొడెః ఎంబె మనాన్? వాండ్రు పుట్టిదన్నిజ్ గుర్తు తోరిసిని సుక్క, మాపు తూర్పుదరోటు సుడతాప్. వన్నిజ్ పొగ్డిఃజి మాడిఃస్తెజ్ ఇజి వాత మనాప్”, ఇజి వెహ్తార్.

3 యా మాటెజ్ విహారె హేరోదు రాజుని వన్నివెట యెరూసలేమ్దికార్ విజేరె నండో గాబ్ర ఆతార్.

4 హేరోదు రాజు, పెరి పుజెరిజ్ విజెరిజ్ని యూదురి రూలుజ్ నెస్సిస్సి వరిజ్ విజేరిజ్ కూకెపిస్తాండ్రె, “క్రీస్తు ఆతికాన్ ఎంబె పుట్టాన్?”, ఇజి వెన్బాతాన్.

5 “యూదయ దేసమ్దుమని బెత్తెహెముదు”, ఇజి వారు వెహ్తార్, “ఎందనిజ్ ఇహిజి, యా లెకెండ్ దేవుణు ముజాల ఒరెన్ ప్రవక్త వెట వర్గిత మహాన్.”

6 “యూదయ దేసమ్దు మని బెత్తెహెమా, నీను యూదయ నాహ్కాజ్ లోఇ ఇజిరికి ఆఇ. ఎందనిజ్ ఇహిజి, నీ లోఇహాన్ ఒరెన్ రాజు లెకెండ్† ఏలుబడిః కినికాన్ పుట్టాన్లె. వాండ్రు నా లోకుర్ ఆతి ఇస్రాయేలు లోకురిజ్ గవుడువెన్ లెకెండ్ మంజిన్నాన్లె.”

7 నస్తివలె హేరోదు రాజు, మరి ఎయెర్బా నెన్వండ గ్నానురుజ్ కూకెపిస్తాండ్రె సుక్క తోరె ఆత్తి సరియాతి టయం వరిజ్ వెన్బాజి నెస్సాన్.

8 వరిజ్ బెత్తెహెమ్దు పొక్తాండ్రె, “మీరు సొన్ని నెగ్రెండ అయా కొడెఃదిజ్ రెబాజి సుడఃజి వాండ్రు ఎంబె మనాన్ ఇజి నజిబా కబ్బురు తగ్అ. అయావలె నానుబా సొన్ని వన్నిజ్ పొగ్డిఃజి మాడిఃస్సు”, ఇజి వరిజ్ వెహ్తాన్.

9 వారు రాజు వెహ్తా మాట విహారె సొతార్. సొన్ని మహివలె, వారు తూర్పు దరోటు సుడఃతిమహి సుక్క, వరి ముందాల నడిఃజి మహాద్. కొడెః మహి బాడ్డి ముస్సు అందితిజ్ అయా సుక్క అబ్బె నిహాద్.

10 సుక్క సుడఃతిజ్ వారు గొప్ప సర్ద ఆతార్.

11 ఇండ్రొ సొహారె అయ్సి ఆత్తి మరియ వెట మన్ని కొడెఃదిజ్ సుడిఃతారె ముణుకుజ్ ఊర్జి వన్నిజ్ పొగ్డిఃజి మాడిఃస్తార్. నస్తివలె వారు ఒత్తిమహి పెటెజ్ రేతారె బజారం, సాంబ్రాణి, బోలాం‡ ఇనికెజ్ వన్నిజ్ నొండిత సితార్.

12 “హేరోదు రాజు డగ్రు మర్జి సొన్మాట్”, ఇజి దేవుణు దూత కలాదు వరిజ్ వెహ్తా వజ, వారు మరి ఉండ్రె సరిదాన్ వరి దేసెం సొహార్.

† 1:21 1:21 యేసు ఇని మాటదిజ్ అర్దం, యెహోవ దేవుణు రక్సిస్సాన్ సిల్లిజి సాయం కిజినాన్. ✱ 1:22-23 1:22-23 యెసయ 7:14. \* 2:1 2:1 సుక్కెజి వందిజ్ సదువు నస్తికార్. † 2:6 2:6 మికా 5:2. ‡ 2:11 2:11 సాంబ్రాణిసాంబ్రాణి ఇని మరాన్దాన్ దోహ్క్సి నెగ్గి వాసనం మన్ని గొప్ప విలువాతి ఒస్తు బోలంబోలం ఇని మరాన్దాన్ నెగ్గి వాసనం మన్ని ఒస్తు మాయమ్కు లెకెండ్బా పణి కినాద్.

### అయ్యగుప్తు దేసమ్దు సొన్నినార్

13 గ్వానురు మర్జి సొహి వెనుక ఒరెన్ దేవుణు దూత యోసేపుజ్ కలాదు తోరె ఆజి, “నీను నిజ్అ, హేరోదు రాజు కొడోడిజ్ సప్తెజ్ సుడోజినాన్. అందెజె వెటనె కొడోడిజ్ని అయ్యసిజ్ అసి అయ్యగుప్తు దేసమ్దు సొన్అ. మరి ఇనిక కిదెజ్ ఇజి నాను నిజి వెప్పొదాక అబెనె మన్అ”, ఇజి వెప్తాన్.

14 నస్తీవలె వాండ్రు నిజితండ్రె, కొడోడిజ్ని అయ్యసిజ్ అస్తాండ్రె అయా పొదొయ్నె అయ్యగుప్తు దేసమ్దు సొండ్రెజ్ సొత్తాన్.

15 హేరోదు సొనిదాక అబెనె మహాన్. “అయ్యగుప్తు దేసమ్దాన్ నా మరిసిజ్ నాను కూక్త”, ఇజి దేవుణు ముందాల ప్రవక్త వెట\* వర్గితి మాట యా లెకెండ్రె పూర్తి ఆతాద్.

16 గ్వానురు వన్పిజ్మోసం కితార్ ఇజి నెస్తాండ్రె హేరోదు రాజు నండ్రె కోపం ఆతాన్. వారు వెప్తొ టయమ్దిజ్లెక కితాండ్రె బేత్తెహేమ్దుని, మరి డగ్గు మని ప్రాంతమ్కాజ్ మన్నినాహ్కాజ్ మన్ని రుండి పంటజ్ని దన్నె అడిగి వయ్యసు మని కొడోడిజ్ విజెరిజ్ సప్తెజ్ ఆడ్ర సితాన్.

17-18 “రామా నారుదాన్ ఉండ్రె పెరి జాటు వెహద్. గుండ్రె కొత్తె ఆజి అడోబాజిని జాటునె. రాహేలుసీ దన్నె కొడోడిజ్ వందిజ్ అడోబజినాద్. కొడోడిజ్ సాతిజ్ అది ఓరిస్తెజ్ అట్వితాద్.” యిరిమ్మ్య ప్రవక్తవెట దేవుణు ముజాల వర్గితిమహి యా మాట యాలెకెండ్రె పూర్తి ఆతాద్.

### నజరేతుదు మర్జి వాజినార్

19 హేరోదు సాతి వెనుక అయ్యగుప్తు దేసమ్దు మహి యోసేపుజ్ ఒరెన్ దేవుణు దూత కలాదు తోరె ఆతాండ్రె,

20 “నీను నిజ్అ, కొడోడిజ్ని అయ్యసిజ్ అసి ఇస్తాయేలు దేసమ్దు సొన్అ. ఎందనిజ్ ఇహిజ, కొడోడిజ్ సప్తెజ్ సుడోజి మహికార్ సాత సొహార్”, ఇజి వెప్తాన్.

21 అందెజె యోసేపు నిజితాండ్రె కొడోడిజ్ని అయ్యసిజ్ అస్తాండ్రె ఇస్తాయేలు దేసమ్దు మర్జి సొండ్రెజ్ సొత్తాన్.

22 గాని హేరోదు సాతి వెనుక వన్ని మరిసి ఆతి అర్కెలాయు యూదయ దేసమ్దు ఏలుబడి కిజినాన్ ఇజి నెస్తాండ్రె అబ్బె సొండ్రెజ్ తియెలాతాన్. కలాదు వెప్తొ లెకెండ్రె యూదయ దేసం సొన్వండ గలీలయ ముటాదు సొహాన్.

23 అబ్బె నజరేతు ఇని పట్టుమ్దు సొహాండ్రె బత్తితాన్. “నజరేతుదికాన్ ఇజి వాండ్రు కూకె ఆనాన్లె”, ఇజి దేవుణు ప్రవక్తరు వెట క్రీస్తు వందిజ్ వర్గితిమహి మాటెజ్ యా లెకెండ్రె పూర్తి ఆతె.

## 3

### బాప్తీసం సీని యోహాను యేసువందిజ్ సరి తయార్ కిజినాన్.

1-2 అయ దినమ్కాజ్ బాప్తీసం సీని యోహాను వాతండ్రె, “దేవుణు ఏలుబడి కిని కాలం డగ్గు ఆత మనాద్. అందెజె మీరు పాపమ్కు ఒప్పుకొడిజి డిసి సీదు”, ఇజి యూదయ బిడిజ్ బూమి ప్రాంతమ్కాజ్ సాటిసి మహాన్.

3 “ప్రబు లోకుడగ్గు వాదెజ్ సరి తయార్ కిదు, వన్ని వందిజ్ సరి తినాజ్ కిదు”, ఇజి బిడిజ్ బూమిదాన్ ఒరెన్ డేల్పి వెప్పొని కంటం వాజినాద్\* ఇజి యెసయ ప్రవక్త వెట దేవుణు ముందాల వర్గితిక విని వందిజె.

4 యోహాను ఒంటె బులుస్కాణిజ్ తయార్ కితి సొకెజ్ తోడిగితాండ్రె, నడుముదు తోలు బెల్లు తొహా ఆజి మహాన్. వాండ్రు మేపిలెక్ని అడివి తేనె, తింజి బత్తిజి మహాన్.

5 యెరుసలేమ్దికార్ని, యూదయ దేసమ్దికార్ విజెరె, మరి యొర్దాను గడ్డ డగ్గు మని నాహ్కాణికార్ విజెరె సొత్తారె యోహాను వెప్పొకెజ్ వెండ్రెజ్ వన్నిడగ్గు వాతార్.

6 వారు, కితి పాపమ్కు ఒప్పుకొడిజి యొర్దాను గడ్డదు వన్ని కియుదాన్ బాప్తీసం లాగె ఆజి మహార్.

7 పరిసయరు, మరి సదుకయరు నండ్రెండ్రె యోహాను బాప్తీసం సీజి మహిబాన్ వాతార్. వరిజ్ సుడోజి వాండ్రు ఈహు వెప్తాన్, “మీరు వినం మన్ని సరాస్ లెకెండ్రె మన్నికిరెర్. దేవుణుబాణిజ్ కోపం వాజినాద్ ఇజి నమ్మిజి మీరు వాతిదెరా? సిల్లెద్. వన్ని కోపమ్దాన్ తప్తె ఆదెజ్ ఇజి మీరు వాతిదెరా? నిజెమె అయలెకెండ్రె ఇజి నాను ఒడిదెజ్ సిల్లెద్.

8 మీ పాపమ్కు ఒప్పుకొడిజి డిసి సీజి దనిజ్ తగితి పణిజ్కిజి తోరిస్తు.

9 ‘మాపు అబ్రాహము తెగ్గాతికాప్, అందెజె మాపు సిక్నదాన్ తప్తె ఆనాప్లె’ ఇజి మీ మన్నుదు మీరు ఒడిబిమాట్. ఎందనిజ్ ఇహిజ, యా పణకాణిజ్ అబహముజ్ కొడోడిజ్ పుటిస్తెజ్ దేవుణు అట్టికాన్ ఇజి నాను మిజి వెప్పొన.

\* 2:15 2:15 హోసయ 11:1. § 2:17-18 2:17-18 ఇస్తాయేలు (యూదురి) లోకురిజ్ అనిగోగో ఆతి ఇస్సాకు మరిసియాతి యాకోబు ఆల్పినె రాహేలు. నెబుక్కదనెసర్ బబులోనుదు ఏలుబడి కిజి మహివలె ఎప్తయెన్ది యూదురిజ్ అస్త ఒత్తాన్. వరి లొఇ నండ్రెండ్రె బానె సప్తె ఆతార్. ✱ 3:3 3:3 యెసయ 40:3.

10 దేవుణు మరెక మొదోల్ కత్తి వినీదెజ్ కియుదు గొడెలి అస్తి వన్నిజ్ పోలిత మనాన్. నెగ్గి పట్టు అన్ఱ మరెకాజ్ విజు కత్తి సిసుద్ వినీర్పాన్లె.

11 మీరు పాపమ్కు ఒప్పుకొడెఱి డిఱిస్తి సీతి వందిజ్. నాను మిజి ఏరుదాన్ బాప్తిసం సీజిన. నా వెనుక వానికాన్ నజి మిస్తి అతికారం మనికాన్. వన్ని జోడ్కు పిందెజ్బా నాను తగ్గిక ఆవ. వాండ్రు దేవుణు ఆత్మదాన్ని, సిసుదాన్ మిజి బాప్తిసం సీనాన్లె.

12 వాండ్రు గాలి ఇడ్డి సేహి కీదు అస్తి వన్నిజ్ పోలిత మనాన్. వాండ్రు వన్ని కలమ్దిజ్ సుబారం కిజి గాలి ఇట్టి కూలిజ్ కొటు ఇండ్రొ ఒసి వాక్పాన్లె. పొటుదిజ్ నంబిణ సిసుదు సుర్నాన్లె.”

యేసు బాప్తిసం లాగె ఆజినాన్.

13 నస్తివలె యోహాను కీదాన్ బాప్తిసం లాగె ఆదెజ్, గలిలయదాన్ యేసు యొర్దాను గడ్డదు వాతాన్.

14 “నీ కియుదాన్ బాప్తిసం లాగె ఆదెజ్, నజి అవ్సరం గాని నీను బాప్తిసం లాగె ఆదెజ్ నా డగ్రు వాతిదా?”, ఇజి యోహాను వన్నిజ్ అడ్డు కిదెజ్ సుడతాన్.

15 “ఏలు యా లెకెండ్ జర్గిపిద్. విజు యా లెకెండ్ దేవుణుదిజ్ ఇస్టమాతివజ పూర్తి కినిక మజి తగ్గి”, ఇజి యేసు వెప్తాన్. నస్తివలె యోహాను ఒప్పుకొటాన్.

16 బాప్తిసం లాగె ఆతి వెటనె యేసు ఏరుదాన్ వెల్లి వాతాన్. అయావలెనె ఆగాసం రే ఆతాద్. దేవుణు ఆత్మ పావురపొటి లెకెండ్ యేసు ముస్కు డిగ్జి వానిక యోహాను సుడతాన్.

17 “వీండ్రు నా ఇస్టమాతి మరిన్, విని ముస్కు నాను నండొ సర్ద ఆజిన”, ఇజి దేవుణు మంజిని బాడిఱాన్ వెప్పిని ఉండ్రొ జాటు వాతాద్.

## 4

యేసుజ్ సయ్యాన్ పరిస కిత్తిక.

1 వెనుక దేవుణు ఆత్మ యేసుజ్ బిడిఱెజ్ బూమి ప్రాంతమ్దు నడఱిపిస్తాన్. అబె సయ్యాన్ యేసుజ్ తపు కిబిస్తెజ్ పరిస కిజి సుడతాన్.

2 నలవయి రోస్కు రెయు పొకల్ఉపాస్మహి వెనుక వన్నిజ్బజ కట్టాద్.

3 సయ్యాన్ వన్ని డగ్రు వాతండ్రె, “నీను దేవుణు మరిసి ఇహిజ, యా పణకుజ తిండి ఆఅ ఇజి వెహాఅ”, ఇజి వెప్తాన్.

4 నస్తివలె యేసు “లోకు బత్తిజనిక తిండిదానె ఆవద్, గాని దేవుణు వెయుదాన్వాని విజు మాటెజాణిజ్బా బత్తిజినాన్ ఇజి దేవుణు మాటదు రాస్త మనాద్”\*, ఇజి వన్నిజ్ వెప్తాన్.

5 వెనుక సయ్తాను యేసుజ్ దేవుణు పట్ను ఆతి యెరూసలేముదు కూక్త ఒతండ్రె, అబె మని దేవుణు గుడిఱె కొసాదు నిల్వ్తాన్.

6 అబె నిల్వ్తాండ్ర “నీను దేవుణు మరిసి ఇహిజ, ఇబ్బెణిజ్ అడిఱిగి డాట్అ. ‘నీ వందిజ్ వన్ని దూతరిజ్ దేవుణు ఆడ్ర సీనాన్. నీ కాల్కు పణకుజ తగ్లివిండ వారు నిజి పరి కికాణిజ్ పెర్న అస్సార్’ \* ఇజి దేవుణు మాటదు రాస్త మనాద్”, ఇజి వెప్తాన్.

7 యేసు వన్నిజ్, “ ‘నీ ప్రబు ఆతి దేవుణుదిజ్ పరిస కిదెజ్ ఆవద్’\* ఇజిబా రాస్త మనాద్”, ఇజి వెప్తాన్.

8 మరి ఉండ్రొ సుటు, సయ్తాను యేసుజ్ నండొ ఎత్తు మని ఉండ్రొ గొరోన్ ముస్కు ఎక్కిస్తాండ్రె యా లోకమ్దు మని విజు దేసెమ్కాజ్, మరి వన్కాజ్ ముస్కు ఏలుబడిఱె కినివరి అతికారమ్ని పరిజ్ కలిగితి మనికెజ్ విజు తోరిస్తాన్.

9 అక్కెజ్ తోరిస్తాండ్రె, “నీను నా ఎద్రు ముణుకుజ్ ఊర్జి నజి పొగ్డిఱెజి మాడిఱెజి యాకెజ్ విజు నాను నిజి సీన”, ఇజి వెప్తాన్.

10 యేసు వన్ని వెట, సయ్తానా, నా బాణిజ్ సాన్అ, “నీ ప్రబు ఆతి దేవుణుదిజ్ పొగ్డిఱెజి మాడిఱెజి, వన్నిజ్ సేవ కిదెజ్ ఇజి దేవుణు మాటదు రాస్త మనాద్”, ఇజి వెప్తాన్.

11 అయావలె సయ్తాను వన్నిజ్ డిఱిసి సాహాన్. దేవుణు దూతార్ వాజి వన్నిజ్ నెగెణ్ సుడతాన్.

యేసు సువార్త సాటిస్తెజ్ మొదొల్పినాన్

12 యోహాను కయ్ది మహాన్ ఇజి విహండ్రె యేసు గలిలయదు మని నజరేతు ఇని పట్నమ్దు మర్జి వాతాన్.

13 వెనుక యేసు నజరేతు పట్నం డిసి జెబులూను, నష్టాలి ప్రాంతమ్కాజ్ డగ్రు, గలిలయ సందారం పడకాదు మని కపెర్నహమ ఇని పట్నమ్దు వాతండ్రె బత్కితాన్.

14-16 “జెబులూను ప్రాంతమా, నష్టాలి ప్రాంతమా, యోర్దాన్ అతాహ పడక సమ్దరం డగ్రు మని యూదురు ఆఇకార్ బత్కిజిని గలిలయ ప్రాంతమా, సీకటిదు బత్కిజి మహికార్ గొప్ప జాయ్ సుడతాత్. సాపు ఉండ్రి నీడ లెకెండ్ మని దేసమ్దు బత్కిజి మహి లోకుర్ ముస్సు జాయ్పుట్టాద్”\*. ఇజి దేవుణు ముజాల యెసయ ప్రవక్త వెట వర్గితి మాట యా లెకెండ్ యేసు వాతిజ్ పూర్తి ఆతాద్.

17 అయా వలెహాన్ అసి యేసు, “దేవుణు ఏలుబడికి కిని కాలం డగ్రు ఆత మనాద్. అందెజె మీ పాపమ్కు ఒప్పుకొడిజి డిసి సీదు”, ఇజి సాటిస్తాజ్ మొదోల్స్తాన్.

### యేసు సిసూరిజ్ కూక్కినాన్

18 యేసు గలిలయ సమ్దరం ఒడుదాన్నడిసి మహివలె, పేతురు ఇజి కూకె ఆతిసీమోనుజ్ని, మరి వన్ని తంబెర్సి ఆతి అంద్రెయెజ్ సుడతాన్. వారు జాలెరిజు. వీరు రివర్ సమ్దరమ్దు వల పొక్కి మొయెజ్అసి మహార్.

19 “నా వెట రదు. నా వెట వాదెజ్ లోకురిజ్ నెస్సిస్సివరి లెకెండ్ నాను మిజి తయార్ కినాలె”, ఇజి యేసు వరిజ్ వెప్తాన్.

20 వారు వెటనె వరి వలెజ్డిస్తారె వన్ని వెనుక సాహార్.

21 అబెణిజ్ సాన్సి మహిజ్యేసు జెబెదాయి మరిసి ఆతి యాకోబుజ్ని, వన్ని తంబెర్సి ఆతి యోహానుజ్ సుడతాన్. వారు రివెర్వరి బుబ్బు ఆతి జెబెదాయి వెట డోణిదు వలెజ్ నెగెణ్కిజి మహివలె యేసు వరిజ్ కూక్తాన్.

22 వెటనె వారు వరి డోణిని వరి బుబ్బెజ్డిస్తారె వన్ని వెనుక సాహార్.

### యేసు జబ్బుది వరిజ్ నెగెండ్ కిజినాన్.

23 యేసు గలిలయ దేసెం విజు బూలాజి యూదురు మీటిజ్ కిజిని ఇల్కాజ్ వరిజ్ నెస్సిసి, దేవుణు ఏలుబడికి కిని కాలం వందిజ్ సువార్త సాటిసి మహాన్. విజు రకమ్ది జబుది వరిజ్ని బాదదాన్ఇజ్ మహివరిజ్ నెగెండ్ కితాన్.

24 యేసు పేరు సిరియ దేసమ్దు విజు సారితాద్. రకరకమ్ది జబుదివరిజ్లోకుర్వన్ని డగ్రు తతార్. నండో నొపిదాన్బాద ఆజి మహి వరిజ్, దెయం అస్తి వరిజ్, మూర్స జబు మహి వరిజ్, కిక్కుకాల్కు సాతివరిజ్వన్ని డగ్రు తతిజ్వాండ్రు వరిజ్ నెగెండ్ కితాన్.

25 గలిలయ, దెకపొలి\*, యెరూసలేము, యూదయ, యొర్దాను అతాహి పడకదాన్ మంద లోకుర్ వాజి వన్ని వెట సాహార్.

## 5

### గొరొన్ ముస్సు కిత్తి బోద.

1 యేసు మంద లోకురిజ్ సుడతాండ్రె ఉండ్రి గొరొత్ ఎక్తాన్. అబె బసిమహిజ్, వన్ని సిసూర్ వన్ని డగ్రు వాతార్.

2 అయావలె వాండ్రు వరిజ్ యా లెకెండ్ వెప్సి బోదిస్తాజ్ మొదోల్స్తాన్.

3 “దేవుణుదిజ్ సెందితిలెకెండ్ బత్కిజి దన్నిలోఇ మాపు తకుదికాప్” ఇజి నెసి మజి మరి మండ్రెజ్ ఎయెర్బా ఇజి కోరిజినరో, దేవుణు సీజిని దీవనమ్కు మంజినె. ఎందనిజ్ ఇహిజు, వారు దేవుణు కిని ఏలుబడిడు మంజినార్.

4 ఏలు దుకమ్దాన్ అడకబాజి మన్నికార్ దేవుణు సీని దీవనమ్కు మంజినికార్ ఆనార్లె, ఎందనిజ్ ఇహిజు దేవుణు వరిజ్ ఓదరిస్తాన్.

5 నిసాతి గుణం మనికార్ దేవుణు సీని దీవనంకు మంజినికార్ ఆనార్లె ఎందనిజ్ ఇహిజు యా లోకం విజు వరి సొంతం ఆనాద్.

6 దేవుణు వెప్సి వజ నీతినిజాయిదాన్ మండ్రెజ్ ఇజి నండో ఆస మనికార్ దేవుణు సీని దీవనమ్కు మంజినికార్ ఆనార్లె, ఎందనిజ్ ఇహిజు వరి మన్ను నిండ్రు ఆనిలెకెండ్ వరి ఆసెజ్ దేవుణు తీరిస్తాన్లె.

7 కనికారం తోరిస్సికార్ దేవుణు సీని దీవనమ్కు మంజినికార్ ఆనార్లె, ఎందనిజ్ ఇహిజు దేవుణు వరి ముస్సు కనికారం తోరిస్తాన్లె.

8 నెగ్గి మన్ను మనికార్ దేవుణు సీని దీవనమ్కు మంజినికార్ ఆనార్లె, ఎందనిజ్ ఇహిజు వారు దేవుణుదిజ్ సూణార్లె.

9 లోకుర్ సమాదనమ్దాన్ మండ్రెజ్ ఇజి పణి కినికార్ దేవుణు సీని దీవనమ్కు మంజినికార్ ఆనార్లె, ఎందనిజ్ ఇహిజు వారు దేవుణు కొడోర్ ఇజి కూకె ఆనార్లె.

\* 4:14-16 4:14-16 యెసయ 9:1-2. \* 4:25 4:25 దెక్కపొలి ఇహిజు పది పట్నమ్కు ఇక్కెజ్ గలిలయ సమ్దరం అతాహ పడక మహి.



10 దేవుణు వెప్పై వజ నాయం వందిజ్ మల్లెజజ్ ఓరిస్సికార్ దేవుణు సీని దీవనమ్కు మంజనికార్ ఆనార్లె, ఎందనిజ్ ఇహిజ వారు దేవుణు కిని ఏలుబడిఃదు మంజినార్లె.

11 నా ముస్కు నమకం ఇట్టి వందిజ్ లోకుర్ మీ ముస్కు నిందెజ్ మోప్పి మిజి మల్లెజ్ కిజి, మరి మీ ముస్కు అబద్ధమాతి సెఇ మాటెజ్ విజు వెప్పై వెలె మీరు దేవుణు సీని దీవనమ్కు మంజనికార్.

12 అయాలె నండొ సర్ద ఆజి మండ్రు. ఎందనిజ్ ఇహిజ పరలోకామ్దు\* మిజి నండొ పలం దొహ్కాద్లె. మీ ముందాల బత్తిజి మహి దేవుణు ప్రవక్తరుజ వెటబా వారు యాలెకెండ్ మల్లెజ్ కితార్.

### సోరు - జాయ్

13 మీరు యా లోకమ్దు సోరు ననికిదెర్. గాని, సోరుదిజ్† రుసి సోహిజ, ఎలాగ దనిజ్ రుసి మర్జి తపిస్తెజ్ ఆనాద్? అక వెల్లి విసీరిజి లోకుర్ మల్లెజ్ నె ఆఎండ మరి ఇని పణిదిజ్ బా రఇక.

14 మీరు యా లోకమ్దు మనివరిజ్ జాయ్ ననికిదెర్. గొరొన్ ముస్కు మని పట్టుం డాజ్ జి మండ్రెజ్ అట్ ఏద్.

15 ఎయెర్ బా ఉండ్రీ దీవ కసిసి తూముదాన్ ముసి ఇడెవర్. గాని ఇండ్రొణివరిజ్ విజేరిజ్ జాయ్ సీనివజ దీవ కంతూదునె ఇడ్వార్.

16 అయాలెకెండ్ నె, మీ బత్తు విజేరిజ్ జాయి సీనివజ మండ్రెజ్. నస్తవలె మీరు కిని నెగ్గి పణిజ సుడఃజి లోకుర్ విజెర్ దేవుణు మంజని బాడిఃదు మని మీ బుబాతి దేవుణుదిజ్ పొగిడిఃనార్.

### దేవుణు సీతి రూలుజ వందిజ్

17 దేవుణు సీతి రూలుజ్ గాని, దేవుణు ప్రవక్తరు వెప్పై మాటెజ్ గాని డెయ్ జి పొక్తెజ్ నాను వాత మన్న ఇజి మీరు ఒడబిమాట్. వనకాజ్ డెయ్ జి పొక్తెజ్ ఇజి సిల్లెద్, గాని అయాలెకెండ్ నె పూర్తి కిదెజ్ నె నాను వాత మన్న.

18 ఏలుహాన్ అసి బూమి ఆగాసం సిల్లెండ ఆతిజ్ బా దేవుణు మాటదు మని ఉండ్రీ ఇజిరి అక్కరం గాని, సున్న గాని, రాస్తి మని లెకెండ్ పూర్తి ఆవండ సోన్ ఉ ఇజి నాను మిజి నిజం వెప్పిన.

19 ఎయెర్ బా దేవుణు మాటదు మని ఇజిరి ఆగ్నెజ్ లోఇ ఉండ్రీ దనిజ్ లోజిజి మన్ ఏండ, అయాలెకెండ్ లోజి ఏండ మండ్రెజ్ ఇజి లోకురిజ్ నెస్పిస్తెజి వన్నిజ్, దేవుణు ఏలుబడిః కినివరి లోఇ లావ్ ఇజిరికాన్ లెకెండ్ వాండ్రు ఇడ్వార్లె. గాని ఎయెర్ బా దేవుణు మాటదు రాస్తిమని లెకెండ్ లోకురిజ్ నెస్పిసి అయాలెకెండ్ నె కిజి మహిజ దేవుణు ఏలుబడిః కినివరి లోఇ వారు గొప్ప పెరికార్ ఆనార్లె.

20 మీరు కిని పణిజ్, పరిసయరుజుని యూదురి రూలుజ్ నెస్పిస్సికార్ కిని పణిజ ముస్కు, దేవుణు ముందాల ఒదె సరి ఆతికెజ్ ఇహిజనె, మీరు దేవుణు కిని ఏలుబడిఃదు మంజనిదెర్లె ఇజి నాను మిజి వెప్పిన.

### సప్పిక ఆవద్

21 “లోకాజ్ సప్తెజ్ ఆవద్”\* ఎయెర్ బా ఒరెన్ వన్నిజ్ సప్తిజ, వన్నిజ్ తవ్ ఏండ తీర్పు వానాద్లె ఇజి ముందాహాన్ అసి వెప్పై మని మాట మీరు వెహిమనిదెర్ గదె?

22 గాని ఏలు నాను మిజి వెప్పొక ఇనిక ఇహిజ ఎయెర్ బా, మరి ఒరెన్ వన్ని ముస్కు కోపం ఆతిజ వన్నిజ్ తీర్పు వానాద్. ఎయెర్ బా మరి ఒరెన్ వన్నిజ్ “పణిదిజ్ రెఇకి”, ఇజి వెప్పొజి వాండ్రు సన్ హద్రి సజం ఎద్రు దన్ని వందిజ్ సమాదనం వెప్తాజ్ వలె. ఎయెర్ బా మరి ఒరెన్ వన్నిజ్ “బుద్ది సీలికి”, ఇజి వెప్పొజి, వాండ్రు ఎలాకాలం సిను కసి మంజని బాడిఃదు అర్పు మంజినాన్.

23-24 సీను దేవుణుదిజ్ సంద సుర్ని మాలి పీటాదు సంద సిదెజ్ సొనివెలె, మరి ఒరెన్ వన్నిజ్ నీ ముస్కు ఇనికాదొ కోపం మనాద్ ఇజి అబె నిజి ఎతు వాతిజ, సంద సిదెజ్ తతి వన్నాజ్ అబె ఇడఃజి వెటనె సంద సుర్ని మాలిపీట డిఃసి సొన్ని, ముందాల సీను వనివెట రాజినం ఆఅ. వెనుక మర్జి వాజి దేవుణుదిజ్ సంద సుర్ని సీఅ.

25 నిజి కోర్టు కిదెజ్ అకు మని వన్ని వెట బేగి రాజినం ఆఅ. టయం మనివెలెనె అక కిఅ. సీలిజి వాండ్రు నిజి తీర్పు కిని వరిజ్ ఒపజెప్పాన్. తీర్పు కినికార్ నిజి జెలిదు ఇడెదెజ్ అతికారిజ్ ఒపజెప్పార్. వాండ్రు నిజి జెలిదు ఇడ్వార్.

26 ఉండ్రీ పయ్యబా సిల్లెండ అపు మనిక విజు సీనిదాక సీను వెల్లి వాదెజ్ అట్ ఇ, ఇజి నాను నిజి నిజం వెప్పిన.

27 “రంకు బూలాదెజ్ ఆవద్” ఇజి వెప్పొ మనిక మీరు వెహి మనిదెర్ గదె.

\* 5:12 5:12 దేవుణు మంజనిమబాడ్డి † 5:13 5:13 యేసుప్రబు కాలమ్దు ఏలు దొహ్కొ లెకెండ్ మన్ని సోరు సిల్లెతాద్. అయాలెలె సోరువెట తెల్లని ఇస్కూబా కూడిత మహా తడి కిత్తిజి సోరు విజు కరిగిజి సానాద్, ఇస్కూ మిగిలినాద్. అయాలెలె లోకుర్ సోరు రుసి సీల్లిక ఇజి వెప్పొ మహార్. ✱ 5:21 5:21 నిర్గమ 20:13.

28 గాని నాను మిజి వెప్పొక ఇనిక ఇహిజ ఎయెన్బా మన్నుదు సెఇ ఆసదాన్ ఉండ్రీ అయ్లి కొడొడిదిజ్ బేస్తజి వాండ్రు అయావలెనె దనివెట వన్ని మన్నుదు పాపం కితికాన్ ఆజినాన్.

29 నీ ఉణెర్ కణక నిజి తపు కిబిస్తజి దనిజ్ లాగ్గి విసీర్అ. నీనె ఎల్ల కాలం సిను మంజిని బాడిడు సొన్ని అర్ఎండ, మీ ఒడొల్దాన్ ఉండ్రీ ముక సొహిజ అక్కాదె నెగెద్.

30 మరి నీ ఉణెర్ కియు నిజి తపు కిబిస్తజి, దనిజ్ కత్తి విసీర్అ. నీనె ఎలాకాలం సిను మంజిని బాడిడు సొన్ని అర్ఎండ, నీ ఒడొల్దాన్ ఉండ్రీ ముక సొనికదె నెగెద్.

31 ఎయెన్బా వన్ని ఆల్సిజ్ డిసి సీదెజ్ ఇహిజ ఇబ్బొణిజ్ అసి నీను నా ఆల్సి ఆవద్ ఇజి దనిజ్ ఉండ్రీ విడిఃఆకు రాసి సీదెజ్ ఇజి వెప్పొక మీరు వెహి మనిదెర్గదె?

32 గాని నాను మీ వెట వెప్పొక ఇనిక ఇహిజ, రంకు బూలాఇదనిజ్ మాసి డిఃస్తి సితిజ, వాండ్రు దనిజ్రంకు బాలాదెజ్కిబిస్సికాన్ ఆజినాన్. మరి ఎయెన్బా దనిజ్పెండొలి కితిజ వాండ్రు దనివెట రంకు బూలానికాన్ ఆజినాన్.

### ప్రమాణమ్కాజ్ వందిజ్

33 మరి ఇనిక ఇహిజ, “ ‘నీను కితి ఒట్టు పొక్తిక అయాలెకెండొ కివిండ తప్పెజ్ ఆవద్, దేవుణు ముందాల కితి ఒట్టుదిజ్ అయావజనె కిదెజ్’ ఇజి వెప్పొక ముందాహాన్ అసి మీరు వెహిమనిదెర్ గదె.

34 నాను మీ వెట వెప్పొక ఇనిక ఇహిజ ఇనిదనిజ్బా ప్రమాణం కిమాట్. ఆకాసం తోడుః ఇజి వెహ్మాట్, అక దేవుణు బసిని సింహాసనం.

35 సిలిజ బూమి తోడుః ఇజి వెహ్మాట్, అక దేవుణు వన్ని కాల్కు ఇడ్డి పీట. మరి యెరూసలేం తోడుః ఇజి వెహ్మాట్, రాజు ఆతి దేవుణుదిజ్ సెందితి పట్నం.

36 నీ బుర్ర తోడుః ఇజిబా వెహ్మా, ఎందనిజ్ ఇహిజ నీ బుర్రది కొప్పవెంటి ఉండ్రీబా తెలాజ్ గాని కరిజ్ గాని కిదెజ్ నీను అట్ఇ.

37 మీ మాటెజ్ ‘ఒఒ ఇహిజ ఒఒ’, ఇజి మండ్రెజ్. ‘ఆవద్ ఇహిజ ఆవద్’, ఇజినె మండ్రెజ్. వనకాజ్ మిస్తికెజ్ సెఇ వన్నిబాణిజ్ వానికెజ్”.

### కణకాదిజ్ బదులు కణక.

38 “ ‘కణకాదిజ్ బదులు కణక, పలుదిజ్ బదులు పలు’ ఇజి దేవుణు మోసేజ్ సిత్తి మన్ని రూలుదు వెప్పొ మహిక మీరు వెహిమనిదెర్ గదె?

39 నాను మిజి వెప్పొన, సెఇ పణిజ్ కిని వరిజ్ అడ్డు కిమ. మరి నీను వన్ని మున్ను కొపమాజి వాండ్రు నిజి కిత్తిదన్నిజ్ మరజి కిదెజ్ ఆవద్. ఎయెన్బా ఉణెర్ లెపాదు డెయ్లిజ, డేబ్ర లెపబా వన్నిజ్ తోరిన్అ.

40 ఎయెన్బా నిజి కోర్టు కిజి నీ సొక లాగ్దెజ్ సుడొతిజ, నీ కండువాబా వన్నిజ్ సీజి మన్అ.

41 మరి, ఒరెన్ రోమ సయనమ్దికాన్ వన్ని ఒస్తజ్ పిండిజి వన్ని వెట ‘ఉండ్రీ మయిలు దూరం రఅ’ ఇజి నిజి బలవంతం కితిజ వన్నివెట రుండి మయిలుజ్ దూరం ఇడ్డి సొన్అ.

42 నిజి లొస్సివన్నిజ్ సిఅ, మరి నిజి అపు లొస్సివరిబాణిజ్ మొకొ మహ్మా”.

### నీ పగ్గతి వరిజ్ ప్రేమిన్అ.

43 “ ‘నీ పడకాతి వన్నిజ్ ప్రేమిన్అ, పగాతి వరిజ్ ఇస్టం ఆవిండ మన్అ. మున్ను కొపమాదాన్ మన్అ’, ఇజి వెప్పొమహిక మీరు వెహిమనిదెర్ గదె?

44 గాని నాను మిజి వెప్పొక ఇనిక ఇహిజ, మీ పగ్గతి వరిజ్ ప్రేమిస్తు, మిజి హిమ్స కిజిని వరి వందిజ్ పార్దనం కిదు.

45 అహిజ మీరు పరలోకామ్దు మన్ని మీ బుబ్బొతి దేవుణుది నిజమాతి కొడొర్ ఇజి తోరె ఆనిదెర్లె. దేవుణు సెఇవరి మున్నుబా నెగ్గివరి మున్నుబా వన్ని పొదు జాయ్ సిబిసినాన్. నాయం మని వరి మున్నుబా నాయం సిలివరి మున్నుబా పిరు పొక్కినాన్.

46 మిజి ప్రేమిస్సివరిజె మీరు ప్రేమిస్తిజ దేవుణు మిజి పలం సీనాన్ ఇజి మీరు ఒడిఃబిజినిదెరా? పను పెర్నికార్బా ఆహె కిజినార్ గదె?

47 మీరు మీ కూల వరిజె మీరు మాడిఃసినిదెర్ ఇహిజ మీరు ఆఇకార్ కినిదనిజ్ ఇంక మిస్తిక ఇనిక కిజినిదెర్? యూదురు ఆఇకార్బా అయాలెకెండొ కిజినార్ గదె?

48 పరలోకామ్దు మన్ని మీ బుబాతి దేవుణు ఇని కల్తి సిలికాన్. అందెజె మీరుబా అయాలెకెండొనె మండ్రు.”

## 6

## జాగ్రత్త మండ్రు

1 మీరు కిని నెగ్గి పణిజ్ లోకుర్ సుడెదెజ్ ఇజి వరి ముందాల కివిండ జాగ్రత్త మండ్రు. ఎందనిజ్ ఇహిజ ఆహె కితిజ పరలోకామ్దు మని బుబ్బాతి దేవుణు బాణిజ్ మిజి ఇని పలంబా దొహ్కావద్.

2 అందెజె అవ్సరం మని వరిజ్ ఇనికబా సితిజ, వేసం కినికార్ కిని లెకెండ అక విజేరిజ్ తెలిని లెకెండ జోడుబాంక ఊకపిసి డేల్ని వెహ్మాట్. విజెరి ముందాల మజి గొప్ప పేరు వాదెజ్ ఇని ఆసదాన్ వారు యూదురు మీటిజ్ కిని ఇల్కాజ్, మరి సర్దు ఆహె కిబిస్సార్. వరిజ్ అయావలెనె పూర్తి పలం దొహ్కా మనాద్ ఇజి నాను మిజి నిజం వెహ్సిన.

3 గాని నీను అవ్సరమ్దు మనివరిజ్ సాయం కినివెలె, నీ ఉణెర్ కియు కినిక నీ డేబ్బ కియు నెస్తెజ్ ఆవద్.

4 అహిజ నీను సితిక ఎయెర్బా నెన్ఎండ మంజినాద్. అయావలె ఎయెర్బా నెన్ఎండ నీను కితిక సుడెజిని నీ బుబ్బాతి దేవుణు నిజి పలం సీనాన్.

5 మీరు పార్దనం కినివెలె వేసం కిని వరి లెకెండ మన్మాట్. లోకుర్ విజేరె సూణి లెకెండ యూదురు మీటిజ్ కిని ఇల్కాజ్, మరి సర్దు నిల్ని పార్దనం కిదెజ్ వరిజ్ ఇస్టం. వరిజ్ పూర్తి పలం దొహ్కా మనాద్ ఇజి నాను మిజి నిజం వెహ్సిన.

6 గాని నీను పార్దనం కినివెలె. నీను గదిదు సొన్ని సేష్టా కెప్పా, ఎయెర్బా తొఇ నీ బుబ్బాతి దేవుణు వెట పార్దనం కితి. అహిజ ఎయెర్బా నెన్ఎండ నీను కితిక సుడెజిని ఎయెరిజ్బా తొఇ ఆఇ నీ బుబ్బాతి దేవుణు నిజి పలం సీనాన్.

7 మరి మీరు పార్దనం కినివెలె యూదురు ఆఇ వరి లెకెండ పణిదిజ్ రెఇ మాటెజ్ వెహ్మాట్. అయాలెకెండ లావ్ వర్గితిజానె దేవుణు వినాన్ ఇజి వారు ఒడెబిజినార్.

8 మీరు వరిలెకెండ మండ్రెజ్ ఆవద్. ఎందనిజ్ ఇహిజ మిజి అవ్సరం ఆతిక ఇనిక ఇజి మీరు లొన్ని ముందాలై మీ బుబ్బాతి దేవుణు నెసినాన్.

9 “అందెజె మీరు యా లెకెండ పార్దనం కిదెజ్. ‘పరలోకామ్దు మని మా బుబ్బాతి దేవుణు, లోకుర్ విజెరె నీ పేరు గొప్ప నెగ్గిక ఇజి గవ్తం సిపిర్.

10 నీ ఏలుబడి: లోకుర్ విజెరి మున్కు మనీద్. పరలోకామ్దు నిజి ఇస్టమాతికెజ్ జర్గిని లెకెండెనె బూమి మున్కుబా జర్గిపిద్.

11 రోజురోజుదిజ్ మజి కావాలిస్తి తిండి అయ రోజు మజి సీజి మన్అ.

12 వేరెదికార్ మా వెట కితి తపుజ్ మాపు వరిజ్ సెమిస్తి లెకెండెనె, మాపు కితి తపుజ్ మజిబా సెమిన్అ.

13 పాపం కిబిస్సి సెఇ ఆనెజ్ మా లొఇ రెవిండ, సయ్నాను బాణిజ్ మజి తప్సిన్అ’.

14 లోకుర్ మిజి కిని తపుజ్ మీరు వరిజ్ సెమిస్తిజ, పరలోకామ్దు మన్ని మీ బుబ్బాతి దేవుణుబా మీరు కిని తపుజ్ మిజి సెమిస్సాన్.

15 గాని, మీరు లోకుర్ మీ వెట కిని తపుజ్ మీరు వరిజ్ సెమిన్ఎండ మహిజ, పరలోకామ్దు మన్ని మీ బుబ్బాతి దేవుణుబా మీరు కిని తపుజ్ మిజి సెమిన్ఎన్.”

## ఉపాస్

16 “మీరు ఉపాస్ కినివలె, వేసం కిని వరిలెకెండ మండ్రెజ్ ఆవద్. ‘మాప్ ఉపాస్ మంజినాప్’ ఇజి విజేరె నెస్తెజ్ ఇజి వారు మొకొ నీర్నం కిజి మంజినార్. అయావలెనె వరిజ్ పూర్తి పలం దొహ్కా మనాద్ ఇజి నాను మిజి నిజం వెహ్సిన.

17-18 గాని మీరు ఉపాస్ కినివెలె బురాదు నూనె రాసె ఆజి మొకొ ఊర్పాజి మండ్రు. అహిజ మీరు ఉపాస్ కినిక లోకుర్ ఎయెర్బా నెన్ఎర్. గాని ఎయెర్బా తొఇ మీ బుబ్బాతి దేవుణు ఒరెండె నెస్సాన్. ఎయెర్బా నెన్ఎండ మీరు కినిక సుడెజిని మీ బుబ్బాతి దేవుణు మిజి పలం సీనాన్.”

## సమ్సారం

19 డొజారి డుగ్గెజి ఒతెజ్ అక్కు మని, మరి సెదని కరి తిండ్రెజ్ అకుమని యా బూమి మున్కు మీ వందిజ్ సమ్సారం గణాన్మాట్.

20 గాని డొజారిబు డుగ్గెజి ఒతెజ్ అట్ఇ, మరి సెద గాని కరి గాని పాడె కిదెజ్ అట్ఇ దేవుణు మంజిని బాడిదు మీ వందిజ్ సమ్సారం గణాన్.

21 ఎందనిజ్ ఇహిజ నీ సమ్సారం ఎంబె మనాదొ అబెనె నీ మన్కుబా మంజినాద్.

22 కణక ఒడెల్దిజ్ దీవ లెకెండెనె మనాద్. నీ కణక నెగ్గిక ఇహిజ నీ ఒడెల్దిజ్ విజు నెగ్గికెజ్ తసి మంజినాద్.

23 నీ సెఇ ఉదెసమ్దాన్ నీ కణుకెజాణిజ్ సుడిజి మహిజ, నీ మన్కు విజు సీకటి మంజినాద్. నీ ఒడెల్ విజుబా సీకటి ఆజి మంజినాద్. నిజి మనాద్ ఇజినీను ఒడెబిజిని జాయ్ సీకటి ఆతిజ, అయ సీకటి ఎసొనో సీకటి.

24 ఎయెన్బా రిఎర్ ఎజుమానిరు వందిజ్ ఉండ్రె లెకెండ్ పణి కిదెజ్ అట్ఎన్. ఒరెన్ వన్నిజ్ ప్రేమిసి మరి ఒరెన్ ముస్సు ఇస్టం సిల్లెండ మంజినాన్. సిల్లిజ ఒరెన్ వన్నిజ్ లోజిజి నమ్మకమాతి వనిలెకెండ్ మంజినాన్. మహివన్ని ముస్సు సెఇ మాటెజ్ వర్గిజి మంజినాన్. అయలెకెండ్నె దేవుణుదిజ్ని డబ్బుదిజ్ ఉండ్రె లెకెండ్ ప్రేమిస్తెజ్ మీరు అట్ఇదెర్.

### విసారిన్మాట్

25 అందెజె నాను మిజి వెహ్విక ఇనిక ఇహిజు, ఇనిక తినాప్లె, ఇనిక ఉణాప్లె ఇజి మీ బత్తు వందిజ్విసారం ఆమాట్. మరి మా ఒడొల్వందిజ్ ఇనిక పొర్పానాప్లె ఇజి ఒడిబిమాట్. మీ పాణం తిండిదిజ్మిస్తిక ఆఎదా? మీ ఒడొల్ సొక్క పాతెజ మిస్తిక ఆఎదా?

26 ఆగాసమ్దు ఎగ్రిజిని పొటిజి సుడొదు. అవి విత్ఉ, కొయ్ఉ, ఒసి కొటుదు వాక్ఉ గాని పరలోకామ్దు మని మీ బుబ్బాతి దేవుణు వనకాజ్ పొస కిజినాన్. మీరు వన్యా మిస్తి విలువ మనికిదెర్ ఆఇదెరా?

27 మీ లోఇ ఎయెన్బా విసారిస వన్ని బత్తుదిజ్ ఉండ్రె గంట కుడుపైజ్ అట్నాండ్రా?

28 మరి ఎందనిజ్ సొకెజి వందిజ్ మీరు విసారిసినిదెర్? మడిజు మని పూజు సుడొదు, అవి కస్టబాడ్ఉ, సొక కిదెజ్ నూలుజ్ తయూర్ కిఉ.

29 అహిజ్బా విజు ఆస్తి కలిగితి మన్ని సొలోమోను రాజు యా ఉండ్రె పూజు లకెండ్ సొకు మన్ని ఉండ్రె సొక్క తొడిగివతాన్, ఇజి నాను మిజి వెహ్విసాన్.

30 నేద్రు మంజి విగెహిజ్ సిసుద్ సురె ఆని మడిజు మని యా గడిదిజ్ దేవుణు యా లెకెండ్ సొకు సిత్తాన్. అహిజు, ఇజిరి నమకం మనికిదెరా మరి ఒదె నగెండ్మిజి సొకెజ్ తొడిగివతాండ్రా?

31 అందెజె మీరు, “ఇనిక తినావ్లె, మరి ఇనిక ఉణావ్లె, సిలిజ ఇనిక పొర్పానావ్లె”, ఇజి ఒడిబిజి బాద ఆమాట్.

32 ఎందనిజ్ ఇహిజు దేవుణుదిజ్ నెన్ఇకారెన్ వినక వందిజ్ రెబాజినార్. యాకెజ్ విజు మిజి అవ్సరం ఇజి పరలోకామ్దు మని మీ బుబ్బాతి దేవుణు నెసినాన్.

33 గాని విజు దనిజ్ ఇంక దేవుణు ఏలుబడి కిని వందిజ్ని మరి వన్ని ఎద్రు మీరు నీతినిజయ్తూదాన్ మండ్రెజ్ ఇజి ఆస ఆజి మండ్రు. నస్తివలె మిజి కావాలిస్తికెజ్ విజు మిజి దొహ్కె.

34 విగెహిజ్ వందిజ్ విసారిస్తాట్. విగెహిజ్ జర్గిని వన్యా వందిజ్ విగెహిజ్ విసారిస్తు. ఎమేణి రోజుదిజ్ తగితి కస్టం అయ రోజుదు మంజినె.

## 7

### తీర్పు కిమాట్

1 “మహి వరి ముస్సు తీర్పు కిమాట్. అహిజు దేవుణు మిజిబా తీర్పు కినాన్లె.

2 మీరు మహివరిజ్ ఎలాగ తీర్పు కినిదెరో అయలెకెండ్నె దేవుణు మిజిబా తీర్పు వానాద్లె. మీరు ఇని కొల్తదానె దేవుణు మిజిబా తీర్పు సీనాన్లె.

3 నీ కణకాదు ఉండ్రె తూలం ననిక మహివలె, దనిజ్ సుడొవిండ, నీను, నీ తంబెరి కణకాదు మని ఇజిరి కసరాదిజ్ ఎందనిజ్ బేసిని?

4 ‘నీ కణకాదు తూలం ననిక మనివెలె అక లాగ్ఎండ, నీ తంబెరి కణకాదు మని ఇజిరి కసరాదిజ్ నాను లాగ్గి విసీర్పు’ ఇజి నీను ఎలాగ వెహ్విసాన్?

5 వేసం కినికిదెరా, ముందాల నీ కణకాదు మని తూలం ననిక లాగ్అ. అయావలె నీ తంబెరి కణకాదు మని ఇజిరి కసరాదిజ్ నెగెండ్ సుడొజి లాగ్దెజ్ అట్టి.

6 దేవుణుదిజ్ సెందితి నజతిజ్ అక్కెజ్ ఇస్టం కిఇ వరిజ్ నెస్పిస్తెజ్ ఇజి సుడొమట్. అయలెకెండ్ కితిజు, వారు తిండి సిని వరిజ్ కట్టి సెఇ నుకుడిజ్ లెకెండ్ వారు కొపం ఆజి మరీజి మీ ముస్సు వాజి అర్పార్. గొప్ప విలువ మనికెజ్ పండ్రెజ్ ముందాల ఇట్టిజ అక్కెజ్ వన్యాజ్ కాల్యాణిజ్ మట్టి లెకెండ్ వారుబా కిసార్లె.

7 మీరు ఇనిక లొస్సిదెరో అక మిజి దేవును సీనాన్. ఇనిక మీరు రెబాజినిదెరో అక దేవుణు మిజి సీనాన్. కొతు మీ వందిజ్ దేవుణు సెహ్లా రే ఆనాన్లె.

8 లొస్సివరిజ్ విజెరిజ్ దొహ్కె, రెబానివన్నిజ్ తోరె ఆజినాద్. కొత్తిని వన్నివందిజ్ సేహ్లా రే ఆనాద్.

9 మీ మరిన్ మిజి తిండి లొస్తిజ, మీరు ఎయిదెర్బా వన్నిజ్ పణుకు సీనిదెరా?

10 మరి వాండ్రు మొయ లొస్తిజ, సరాస్సీనిదెరా?

11 మీరు సెఇకిదెర్ ఆతిజ్బా మీ కొణ్ణొరిజ్ నెగ్గి ఇనామ్కునె సీదెజ్ ఇజి నెస్సిదెర్. అహిజ పరలోకామ్దు మని మీ బుబ్బాతి దేవుణు, వన్నిజ్ లొస్సివరిజ్ దినిజ్ ఇంక మరి ఒదె నెగ్గి ఇనామ్కు సివ్ంత్తా?

12 అందెజె విజు సజతిజ లోఇ, మహికార్ మిజి ఇనిక కిదెజ్ ఇజి మీరు కోరిజినిదెరో అయలెకెండెనె మీరు వరిజ్ కిదు. దేవుణు మోసెజ్ సీతి రూలుజ్ని దేవుణు ప్రవక్తరు వర్గితి మాటెజ అర్లం యాకాదె.”

### ఒసార్ సరిని ఇహ్కు సరి

13 ఇహ్కు సరి గవ్నిదాన్ సొండ్రు. ఎందనిజ్ ఇహిజ నాసనమ్దు సొని సరి ఒసార్దిక. అయ గవునిబా ఒసార్దిక. అయ సర్లు సొనికార్ నండ్రిందార్ మనార్.

14 ఎలాకాలం మంజిని బత్కు సీని సరి ఇహ్కుదికాదె, దని గవునిబా ఇహ్కుదిక. అయ సరిదాన్ నడినికార్ కొకొండారె.

### మరాన్ని దని పట్టు

15 నెగ్గికాప్ ఇజి నాటిసినికార్ గాని తపు నెస్సిస్సి ప్రవక్తరు వందిజ్ జాగర్త మండ్రు. వారు ప్రమాదమాతి మూర్కతం మని కార్నుకుడిజ్ లెకెండె మనికార్. గాని వెల్లిహన్ గొరె లెకెండె ప్రమాదం సిలికార్ ఇజి తోరె ఆజినార్.

16 వరి పణిజాణిజ్ మీరు వరిజ్ నెస్సిదెర్లె. ఎయెర్బా సాప్పుతుపెజాణిజ్ ద్రాసపట్టు కొయ్విర్. సాప్పు మరెకాజ్ బొడె పట్టు కొయ్విర్.

17 అయలెకెండెనె విజు నెగ్గి మరెకాజ్, నెగ్గి పట్కునె అస్సె, మరి సెఇ మరాతు సెఇ పట్కునె అస్సె.

18 ఉండ్రి నెగ్గి మరాతు సెఇ పట్టు అస్ఉ, మరి సెఇ మరాతు నెగ్గి పట్టు అస్ఉ.

19 నెగ్గి పట్టు అస్ఇ మరెక్ విజు కత్తి సిసుద్ విసీరె ఆనెలె.

20 అయలెకెండెనె వరి పణిజాణిజ్ మీరు వరిజ్ నెస్సిదెర్.

21 ప్రబువా, ప్రబువా ఇజి నజి కూక్కికార్ విజెరె దేవుణు ఏలుబడిఁదు మన్విర్, గాని పరలోకామ్దు మని నా బుబెజ్ ఇన్లమాతి వజ కినికాండె దేవుణు ఏలుబడిఁదు మంజినాన్.

22 తీర్పు తీరిసిని దినమ్దు నండ్రిందార్ నా డగ్రు వాజి, “ప్రబువా, ప్రబువా మాపు నీ పేరుదాన్ దేవుణు ప్రవక్తరు వజ వర్గిఎతాపా? నీ పేరుదాన్ దెయ్మకాజ్ పెర్వతాపా? నీ పేరుదాన్ నండ్రి బమ్మాతి పణిజ్ కిఎతాపా?”, ఇజి వెహ్నార్.

23 అయావలె, “నాను మిజి ఎసెజ్బా నెస్ఎత. సెఇ పణిజ్ కినికిదెరా, నా డగ్రుహన్ సొండ్రు ఇజి వరిజ్ తినాజ్ వెహ్నా.

### బుద్ది మనికాన్ని బుద్ది సిలికాన్

24 అందెజె, యా నా మాటెజ్ వెంజి అయా వజ కినికాన్ ఎయెన్బా, సటు మున్కు వన్ని ఇలు తొహ్తి బుద్ది మనివన్నిజ్ పొలిత మనాన్.

25 పిరు వాతాద్. గడ్డెజ్ నిండ్రిజి సొహె. గాలి వాజి అయ ఇలు మున్కు డెతూద్ గాని అయ ఇలు పునాది సటు మున్కు మనిజ్ అర్ఎతాద్.

26 గాని యా నా మాటెజ్ వెంజి వన్కా లెకెండె కిఇకార్ ఎయెన్బా ఇన్కు మున్కు వన్ని ఇలు తొహ్తి బుద్ది సిలి వన్నిజ్ పొలిత మనాన్.

27 పిరు వాతాద్. గడ్డెజ్ నిండ్రిజి సొహె. గాలి వాజి అయ ఇలు మున్కు డెయ్తాద్. అయావలె అయ ఇలు నండ్రి జాటుదాన్ అడిఁగి అర్తాద్.”

28 యేసు యా మాటెజ్ వెహ్తి వీజితిజ్ లోకుర్ విజెరె వన్ని బోదదిజ్ బమ్మ ఆతార్.

29 ఎందనిజ్ ఇహిజ వాండ్రు, యూదురి రూలుజ్ నెస్సిస్సి వరి లెకెండె ఆఎండ, అతికారం మనివన్ని లెకెండెనె వాండ్రు బోద్దిస్తాన్.

## 8

1 యేసు అయ గొరొన్డిఁగిజి వాతివలె మంద లోకుర్ వన్ని వెనుక వాతార్.

2 కున్లు రోగం\* మనికాన్ ఒరెన్ వాతండ్రె వన్ని ముందాల ముణుకుజ్ ఊరిజి, “ప్రబువా, నాను నెగెణ్ ఆదెజ్ ఇజి నిజి మన్కు మహిజ, నజి నెగెణ్ కిదెజ్ అట్టి”, ఇజి వెహ్నాన్.

3 అందెజె వాండ్రు కియు సాప్పి వన్నిజ్ముట్టాండ్రె, “నజి మన్కు మనాద్, నీను నెగెణ్ ఆఅ”, ఇజి వెహ్నాన్. వెటనె వన్నిజ్మహి పెరి జబు డిఁస్త సొహాద్.

\* 8:2 8:2 కున్లు రోగం ఇహిజ పెరిజబ్బు అయ జబ్బు వాతిజ కిక్కు కాల్కు మన్ని డెస్సెజ్ తెవ్జి సొనాదెలె జబ్బు మన్నిబాన్ ముట్టిజ నెన్విద్

4 నస్తవలె యేసు వన్నివెట, “యాక ఎయెరిజ్ బా ఇనికబా వెహామ. నీను తీనాజ్ సొన్ని నీ ఒణోల్ పుజేరిజ తోరిన్ అ. నీను నెగెన్ ఆతి దనిజ్ వరిజ్ రుజుప్ లెకెండ్ మోసె ముజలె ఆడ్ర సితి వజ దేవుణుదిజ్ సంత సిఅ”, ఇజి వెహ్తాన్.

**ఒరెన్ సదాతిపతి ఆతి వన్ని నమకం**

5-6 యేసు కపెర్నహము ఇని పట్టమీదు వాతివెలె సదాతిపతి† ఒరెన్ వన్ని డగ్రు వాతండ్రె, “ప్రబువా, నా పణిమన్ని ఒరెన్ కికు కాల్కు సొని జబుదాన్ నండో బాద ఆజి నా ఇండ్రో గూర్త మనాన్”, ఇజి వెహ్సి బతిమాలితాన్.

7 “నాను సొన్ని వన్నిజ్ నెగెన్ కిన”, ఇజి యేసు వెహ్తాన్.

8 నస్తవలె అయ సయనమ్ ది అతికారి ఈహు వెహ్తాన్, “ప్రబువా, నీను నా ఇండ్రో వాదెజ్ నాను తగ్గిక ఆవ. గాని నీను ఉండ్రీ మాట వెహ్సిజ ఆనాద్, నా పణిమన్ని నెగెన్ ఆనాన్.

9 నీను అయాలెకెండ్ కిదెజ్ అట్టిఇజి నాను నెసిన. ఎండనిజ్ ఇహిజ నా ముస్కు అతికారం మన్నికార్ మనార్. నా అడిగి సయనమ్ దికార్ మనార్. నాను ఒరెన్ వన్నిజ్ ‘సొన్ అ’ ఇహిజ సొనాన్. మరి ఒరెన్ వన్నిజ్ ‘రఅ’ ఇహిజ వానాన్. నాను నా పణి మనిసిదిజ్ ‘అయ పణి కిఅ’ ఇహిజ వాండ్రు ఆక కినాన్.”

10 యేసు యా మాట వెంజి బమ్మ ఆతాండ్రె వన్ని వెనుక వానివరిజ్ సుడేజి, “వన్నిజ్ మన్ని లెకెండ్ దేవుణు ముస్కు నిసా పెరి నమకం మని ఎయెరిజ్ బా ఇస్రాయేలు లోకుర్ నడిమి, నాను సుడేదెజ్ సిల్లె ఇజి నాను మిజి నిజం వెహ్సిన్.

11 నాను మిజి వెహ్సిక ఇనిక ఇహిజ, దేవుణు కిని ఏలుబడిజి వానివలె, తూర్పుదాన్ పడమరదాన్ నండో లోకుర్ వాజి అనిగొగొర్ ఆతి అబ్రాహము, ఇస్సాకు, యాకోబు ఇని వరివెట పరలోకామ్ దు విందుదు బస్సార్.

12 గాని దేవుణు కిని ఏలుబడిజి తప్ ఎండ మంజినాప్ లె ఇజి ఒడేబిజిని వరిజ్ వెల్లి సికటిదు విసీర్ నాన్. అబె లోకుర్ అడేబాజి పల్కు కొహ్ క్వి మంజినార్.”

13 యేసు అయా సదాతిపతిజ్, “సొన్ అ, నీను నమ్మితి వజనె జర్గినాద్”, ఇజి వెహ్తాన్. అయ గడియారునె వన్ని పణిమనిసి నెగెండ్ ఆతాన్.

**యేసు నండో లోకురిజ్ నెగెండ్ కిజినాన్.**

14 వెనుక యేసు పేతురు ఇండ్రో వాతాన్. వన్ని మీమ్ సి నోబుదాన్ గూర్తిమనిక సుడేతాన్.

15 వాండ్రు దని కియుదు ముట్టిజ్ సరి దనిజ్ మహి నోబు డిస్త సొహద్. అది నిజితాదె వన్నిజ్ నెగెండ్ సుడేదెజ్ మొదోల్ స్తాద్.

16 పొదు ఆతివలె, దెయమ్ కు అస్తి వరిజ్ నండొండారిజ్, లోకుర్ వన్ని డగ్రు తతార్. వాండ్రు ఉండ్రీ మాటదానె దెయమ్ కాజ్ పెర్తాన్, మరి జబుది వరిజ్ విజేరిజ్ నెగెన్ కితాన్.

17 “వాండ్రు మా నీర్ సమ్ కు లాగితాన్, మరి మా జబుజ్ వాండ్రు పిండితాన్”\* ఇజి యెసయ ప్రవక్త వెట దేవుణు ముజాల వర్గితి మాటెజ్ పూర్తి ఆదెజ్ యాక జర్గితాద్.

**యేసు వెట సొండ్రెజ్ ఇహిజ ఇనిక కిదెజ్**

18 యేసు వన్ని డగ్రు మని మంద లోకురిజ్ సుడేజి సమ్ దరం అతాహ పడక సొండ్రెజ్ ఇజి వన్ని సిసూరిజ్ వెహ్తాన్.

19 నస్తవలె, యూదురి రూలుజ్ నెస్పిస్సికాన్ ఒరెన్ వన్ని డగ్రు వాతండ్రె, “బోద కనికి, నీను ఎంబె సొహిజ్ బా నీ వెట నానుబా వాన”, ఇజి వన్నిజ్ వెహ్తాన్.

20 నస్తవలె యేసు, “నకెజి బోరోజ్ మనె, ఆగాసమ్ దు ఎగ్రిజిని పొటిజి గూడుకు మనె, గాని లోకు మరిసి ఆతి నజి బుర్ల డుట్టి మండ్రెజ్ బా బాడిజి సిల్లెద్”, ఇజి వెహ్తాన్.

21 సిసూర్ లొఇ ఒరెన్ వాతండ్రె, “ప్రబువా నాను ముందాల సొన్ని నా బుబ్బ సాతి పిన్ గు పెర్ జి పొక్కి వాన”, ఇజి వెహ్తాన్.

22 నస్తవలె యేసు, “సాతికార‡ వరి సాతి వరిజ్ పెర్ జి పొక్కిర్, నీను నావెట రఅ”, ఇజి వన్నిజ్ వెహ్తాన్.

**యేసు తుపాన్ దిజ్ ఆలెప్పిసినాన్**

23 యేసుని వన్ని సిసూర్ డోణి ఎక్టారె అబ్బెణిజ్ సోత సొహార్.

24 వారు సొన్ని మహిజ్ యేసు డోణిదు నిద్ర కిజి మహాన్. వెటనె అయ సమ్ దరమ్ దు గాలితూపాన్ రేజితాద్. ఉల్కెజ్ వాజి అయ డోణి ముస్కు అర్తె.

† 8:5-6 8:5-6 సదాతిపతి ఇహిజ రోమనయ్యమ్ దు మన్ని వందమణిసిర్ సయ్యమ్ ది వరిజ్ అతికారి. \* 8:17 8:17 యెసయ 53:4. ‡ 8:22 8:22 అయాలెకెండ్ వెహ్సివలె దేవుణువెట ఇని పొత్తు సిల్లి అత్తుదిజ్ సెందితి సజతిజి వందిజ్ యేసు వెహ్సికాన్. నిజం సాతివరి వందిజ్ అవిద్. యా మాటెజ్ దేవుణు ఏలుబడిజి అడిగి మన్ ఇ వరి వందిజ్ వెహ్సికాన్. యా మాటెజ్ యాలెకెండ్ నె లూక 15:24,32, మరి ఎపెసు 2:1 బాన్ బా రాస్త మనాద్.

25 సినూరు సొన్ని వన్నిజ్ నిక్తారె, “ప్రబువా, సాన సొనాఫ్లె, మజి రక్సిన్అ”, ఇజి వన్నిజ్ నిక్తారె.

26 అయావలె యేసు వరిజ్, “ఎందనిజ్ మీరు నిసా తకు నమకం మనికిదెర్ ఆజినిదెర్?” ఇజి వెప్తాండ్రె నిజ్జి గాలిదిజ్ ఉల్కెజి అలెజి మన్అ ఇహాన్. ఆకెజ్ పూర్తి పలక్ ఆతె.

27 వారు బమ్మ ఆతారె, “వీండ్రు ఎలాగ మర్తికాండ్రో? గాలిని ఉల్కెజ్ బా వన్నిజ్ లోజిజిన”, ఇజి వర్గితారె.

**దెయం అస్తి రిఎరిజ్ నెగెండ్ కిజినాన్**

28 యేసు సమ్దరం అతహి పడక మని గదరెను ఇని నారు అందితిజ్, దెయం అస్తికార్ రిఎర్, యూదురు వరి సాతివరిజ్ సమాది కిని సాలమ్కాణిజ్ సోతారె వన్ని ఎద్దు వాతారె. వారు జంతు నని మూర్కతం మనికార్కక ఎయెర్బా అయ సరి సొన్వర్.

29 “ఓ దేవుణు మరిసి, మా వెట మిజి ఇని పణి? కాలం వాని ముజాల మజి బాద కిదెజ్ ఇబ్బె వాతిదా?”, ఇజి డేడిస్సారె.

30 వరి ఎద్దు కండెక్ దూరమ్దు పండ్రెజ్ మంద మెయ్జి మహె.

31 అయ దెయమ్కు వన్నిజ్ “నీను మజి ఉల్పిని లెకెండ్ ఇహిజ, అయ పండ్రెజ్ లోఇ మజి పోక్అ”, ఇజి బతిమాల్తె.

32 వాండ్రు వన్కాజ్ “సొండ్రు” ఇజి వెప్తాజ్ అయ దయమ్కు వరిజ్ డిస్సెనె పండ్రెజ్ లోఇ సొహె. అయ మంద పండ్రెజ్ విజు గొరొన్ ముస్సుహాన్ ఉహ్కె సొహెనె సమ్దరమ్దు అర్తె సాతె.

33 పండ్రెజ్ మేప్పికార్ ఉహ్కె సొన్ని పట్టుమ్దివరిజ్ జర్గితికెజ్ విజు వెప్తారె. దెయం అస్తి మహివరిజ్ జర్గితికబా వెప్తారె.

34 నస్తివలె అయ పట్టుమ్దికార్ విజెరె సొసి యేసుజ్ సుడెడెజ్ వన్ని ఎద్దు వాతారె. వన్నిజ్ సుడెతిజ్, వరి నారు డిసి సొన్అ ఇజి వన్నిజ్ బతిమాల్తారె.

## 9

**యేసు కిక్కుకాల్కు అర్తి వన్నిజ్ నెగెండ్ కిజినాన్**

1 యేసు డోణి ఎక్తాండ్రె సెరు డాట్టి కపెర్నహము ఇని వన్ని సొంత పట్టుమ్దు వాతాన్.

2 అయావలె సెగెండార్ కికు కాల్కు అర్తి మంసమ్దు గూర్జిమహి ఒరెన్ వన్నిజ్ యేసు డగ్రు తతారె. దేవుణు ముస్సు వరి నమకం యేసు సుడెతాండ్రె, “మరిన్, దయ్ రమ్దాన్ మన్అ, నీ పాపమ్కు సెమిస్త మన”, ఇజి కికు కాల్కు అర్తి వన్నిజ్ వెప్తాన్.

3 యూదురి రూలుజ్ నెస్పిస్పికార్ సెగెండార్ “వీండ్రు దేవుణుదిజ్ దూసిస్సాన్”, ఇజి వరి లోఇ వారె వర్గితారె.

4 యేసు వరి మన్గుదు మనికెజ్ నెస్తాండ్రె ఈహు వెప్తాన్ “మీరు ఎందనిజ్ మీ మన్గుదు సెఇకెజ్ ఒడెజినిదెర్?”.

5 “నీ పాపమ్కు సెమిస్తమన ఇజి వెహ్నిక సులునా? నీను నిజ్జి నడిఅ ఇజి వెహ్నిక సులునా?”.

6 “లోకు మరిసి ఆతి నజి బూమి ముస్సు పాపమ్కు సెమిస్తెజ్ అతికారం మనాద్ ఇజి మీరు నెస్టెజ్ వెలె.” వెనుక కికు కాల్కు అర్తివన్ని వెట, “నిజ్అ నీ మన్సం అసి ఇండ్రో సొన్అ”, ఇజి యేసు వెప్తాన్.

7 వాండ్రు నిజెతండ్రె ఇండ్రో సొహాన్.

8 లోకుర్ విజెరె అక సుడెజి బమ్మ ఆతారె. లోకురిజ్ యా లెకెండ్ అతికారం సితి దేవుణుదిజ్ పొగిడితారె.

**యేసు మత్తాయిజ్ కూక్సినాన్**

9 యేసు అబెణిజ్ సొన్ని మహిజ్, పన్ను పెర్నికాన్ మత్తయి ఇనికాన్ వన్ని బాడిడు బస్త మహాన్. యేసు వన్నిజ్ సుడెజి, “నా వెట రఅ”, ఇజి వెప్తాజ్, వాండ్రు నిజెతాండ్రె యేసు వెట సొహాన్.

10 వెనుక యేసు మత్తాయి ఇండ్రో బోజనం కిదెజ్ బస్తి మహిజ్, నండెండార్ పన్ను పెర్నికార్ ని\* పాపం కినికార్ ఇజి పరిసయెరు వహ్పికార్ వాతారె వన్ని వెటని వన్ని సిసూర్ వెట బోజనమ్దిజ్ బస్తారె.

11 పరిసయెరు అక సుడెజి, “ఎందనిజ్ మిజి నేర్పిస్పికాన్ పన్ను పెర్నివరి వెట, పాపం కినివరి వెట బోజనం కిజినాన్”, ఇజి వన్ని సిసూర్జ వెన్బాతారె.

12 యేసు అయ మాట విహండ్రె, “జబు మనివరిజె డాక్టర్ అవ్సరం, నెగెన్ మని వరిజ్ డాక్టర్ అవ్సరం సిల్లెద్”, ఇజి వెప్తాన్.

13 “మీరు మహి వరి ముస్సు కనికారం తోరిస్టెజ్ ఇజినె నాను కోరిజిన గాని కత్తి పూజెజు నాను కోరివ్\*, ఇజి దేవుణు

§ 8:28 8:28 యేసుప్రబు కాలమ్దు నుట్టు బొరొకిజి సాలమ్లెకెండ్ తయార్ కిజి సాతి వరిజ్ సమాది కిజి మహాన్. పీనుగు సాలమ్లోఇ ఇడ్డి పణుకుదాన్ సాలమ్దిజ్ మూసి మహాన్. \* 9:10 9:10 పన్ను పెర్నివరిజ్ యూదురు ఇస్టం కివితారె. యూదురు పన్ను పెర్నివరిజ్ తక్కుదికార్ మరి గొప్ప పాపం కినికార్ ఇజి ఒడెబిజి మహాన్. వారు రోమ ప్రబుత్వం వందిజ్ పన్ను పెర్ని మహాన్. అక్క యూదురి రులుదిజ్ పడిఎండ మహాన్. వారు కిని పణిదాన్ వారు ఆజవరివెట కూడెజి మహిజ్ వారు నుబ్బరం సిల్లికార్ ఇజి వరివందిజ్ ఒడెబిజి మహాన్. ✨ 9:13 9:13 హోసెయ 6:6.

వెళ్లి మాటది అర్థం ఇనికాదో ఇజ మీరు సొన్ని నెస్తు. పాపం కిని వరిజ్ కూక్కెజె నాను వాత మన, నెగెణ్ మనికాప్ ఇజి ఒండేబిని వరిజ్ ఆవద్”, ఇజి వెప్టాన్.

**యెసుజ్ ఉపాస్ వందిజ్ వెన్ బాజినార్.**

14 నస్తవలె యోహాను సిసూరు వన్ని డగ్రు వాజి, “మాపుని పరిసయరు డిన్ ఏండ ఉపాస్ మంజినాప్, గాని నీ సిసూర్ ఎండనిజ్ ఉపాస్ మన్ ఏర్?”, ఇజి వెన్ బాతార్.

15 దనిజ్ యేసు ఈహు వెప్టాన్, “పెండ్లి దజడాఁయెన్, పెండ్లి కూలెజ వెట మని వెలె వారు దుకమ్ దాన్ మంజినారా? పెండ్లి దజడాఁయెన్ వరిబాణిజ్ కూకె ఆతి వెనుక వారు ఉపాస్ మంజినార్.”

16 “ఎయెర్ బా పడాయ్ పాతదు కొత పాత ముక కుడుఁప్పి గుత్ ఏర్. ఆహె కితిజ కొత పాత ముక కేట ఆజి కిజినిక మరి లావ్ ఆనాద్.

17 ఎయెర్ బా పడాయ్ తోలు సన్నిదు కొత ద్రాక్కు కల్లు వాక్ ఏర్. ఆహె కితిజ కొత ద్రాక్కు కల్లు పులాజ్ ఆనివెలె తోలు సంసి పెడెల్ నాద్, ద్రాక్కు కల్లు వెల్లి సోనాద్. మరి సంసి పాడానాద్. కొత ద్రాక్కు కల్లు కొత తోలు సన్నిదునె వాక్ జె. అయావలె రుండిబా పాడఁ ఆఉ.”

**సాతి అయ్ లిని జబు మని బోదిలి**

18 యేసు యా మాటెజ్ పరి వెట వెప్పి మహివలె, యూదురి మిటిజ్ కిని ఇండ్రోణి ఒరెన్ అతికారి వాతండ్రె వన్ని ఎద్రు ముణుకుజ్ ఉర్ జి, “నా గాలు యెలె సాతాద్. నీను వాజి నీ కియు దని మున్కు ఇడఁఆ. అది బత్కినాద్”, ఇజి వెప్టాన్.

19 యేసు నిజెతండ్రె వన్ని వెట సాహాన్. వన్ని సిసూర్ బా సాహార్.

20-21 నస్తవలె పనెండు పంటెజాణిజ్ వెల్లి ఆని జబుదాన్ బాద ఆజిమహి ఉండ్రె బోదెలి, “యేసు తోడిఁగితిమని నీరి సొక్కదు ముట్టిజ సరి నాను నెగెండ్ ఆన”, ఇజి దని మన్నుదు ఒండేబితాదె వన్ని వెనుక వాతాదె వన్ని పాత సెంగుదు ముట్టాద్.

22 యేసు వెనుక మర్జి దనిజ్ సుడఁజి, “ఓ బయి దయ్ రమ్ దాన్ మన్ అ. నీను నా మున్కు ఇట్టి మని నమకమ్ నె నిజి నెగెణ్ కిత మనాద్”, ఇజి వెప్టాన్. అయావలెనె అయ బోదెలి నెగెండ్ ఆతాద్.

23-24 నస్తవలె యేసు అతికారి ఇండ్రె వాతిజ్, పిరుడిఁ ఉక్కివరిజ్ గగోల్ ఆని వరిజ్ సుడఁజి, “ఇబ్బెణిజ్ సొండ్రు, యా ఇజిరి బయి నిద్ర కిజినాద్ గాని సావద్”, ఇజి వెప్టాన్. వారు వన్నిజ్ వెక్కిసి సిక్టార్.

25 అబె నిండ్రెతి మహి లోకురిజ్ విజెరిజ్ వెల్లి పొక్తి వెనుక, యేసు ఇండ్రె డుఁగితాండ్రె అయ్ లి కిదు అస్తిజ్ అది నిజెతాద్.

26 యా కబ్బురు అయ ప్రాంతం విజు సారితాద్.

**యేసు గుడ్డిదివరిజ్ ని గుల్లవన్నిజ్ నెగెండ్ కిజినాన్.**

27 యేసు అబెణిజ్ సొన్ని మహివలె రిఎర్ గుడ్డిఁవారు వన్ని వెనుక వాతారె, “ఓ దావీదు మరిసి, మా మున్కు కనికారం తోర్స్ ఆ”, ఇజి డెల్లి వెప్టాన్.

28 యేసు ఇండ్రె డుఁగితి వెనుక వారు వన్ని డగ్రు వాతార్. వాండ్రు వరిజ్ ఈహు వెన్ బాతాన్. “ ‘యాక కిదెజ్ నాను అట్టు’, ఇజి మీరు నమిజినిదెరా?”, “ప్రబువా మాప్ నమ్మిజినాప్”, ఇజి వారు వెప్టాన్.

29-30 నస్తవలె యేసు వరి కణకెజ ముట్టి ఈహు వెప్టాన్. “మిరు నమ్మితివజనె యాక మిజి జర్గిపద్”, ఇజి వెప్టా వెటనె వరి కణకు బేస్తార్. “ఎయెర్ బా యాక నెస్టెజ్ ఆవద్”, ఇజి యేసు వరిజ్ గట్టిజ వెప్టాన్.

31 గాని వారు సొహారె అయ ప్రాంతం విజు వన్ని వందిజ్ సాట్టార్.

32 యేసుని వన్ని సిసూర్ అబెణిజ్ సొన్ని మహిజ్ దెయం అస్తి ఒరెన్ గులవన్నిజ్ వన్ని డగ్రుతతార్.

33 యేసు దెయమ్ దిజ్ ఉల్ ప్పి వెటనె అయ గుల్ల వాండ్రు వర్గిదెజ్ మొదోల్ స్టాన్. అక సుడఁజి లోకుర్ విజెరె బమ్మ ఆతారె, “ఎసెజ్ బా ఇస్రాయేలు దేసమ్ దు యా లెకెండ్ ఇనికబా జర్గివితాద్”, ఇజి వర్గితార్.

34 గాని పరిసయరు ఈహు వెప్టాన్, “దెయమ్ కాజ్ నెయ్యి సాయమ్ దానె వీండ్రు దెయమ్ కాజ్ పేర్ జినాన్”.

**పణిమస్సిర్ తక్కు**

35 యేసు విజు పట్టుమ్ కాజ్, విజు నాహ్మజ్ బూలాజి యూదురు మిటిజ్ కిని ఇల్కాజ్ వరిజ్ నేర్ పిసి, దేవుణు ఏలుబడిఁ కిని వందిజ్ సువార్త వెప్పి విజు రకమ్ ది జబుది వరిజ్, బాదదాన్ మని వరిజ్ నెగెండ్ కితాన్.

36 యేసు మంద లోకాజ్ సుడఁజి, వన్ని పాణం నొతాద్. ఎండనిజ్ ఇహిజ వారు గవుడుఎన్ సిల్లెండ సద్రితి గొరెజ్ లెకెండ్, ఇనిక కిదెజ్ ఇజి నెస్ ఇ వరి లెకెండ్ మహార్.



37-38 నస్తవలె యేసు వన్నిసిసురిజ్, “కొయ్దెజ్ మన్ని పంటలెకెండ్ లోకుర్ నండొండార్ మన్నె. గాని కొయ్నికార్ తకునె. అందెజె వన్ని పంట కొయ్ని వందిజ్ పణికిని వరిజ్ పోకొ అ ఇజి కోత యజుమానిజ్ బతిమాల్దు”, ఇజి వెహ్హన్.

## 10

యేసు పన్నెండు మణిసి సిసురిజ్ కూక్కినాన్

1 యేసు వన్ని పనెండు మన్ని సిసురిజ్ డగ్గు కూక్కాండ్రె దెయ్మకాజ్ పేర్దెజ్, మరి విజు రకమ్ది జబుది వరిజ్ని బాదదాన్ మని వరిజ్ నెగెండ్ కిదెజ్ వరిజ్ అతికారం సితాన్.

2 అయ పనెండు మన్ని అపోస్తుడురి పేరుకు ఇకెజ్. మొదోహికాన్ సీమోసు, (పేతురు ఇజి వాండ్రు కూకె ఆతాన్) వన్ని తంబెర్సి ఆతి అంద్రెయ, జెబదయి పొటాదికార్ యాకోబుని యోహాను,

3 పిలిపుని బర్తొలోమాయి, తోమని పన్ను పెర్జి మహికాన్ మతాయి, అలపయి పొటాదికార్ యాకోబు, తదాయి

4 యూదయ దేసం వందిజ్ ఉసారాఆజిని సీమోసు\*, యెసుజ్ మోసెం కిజి ఒపజెప్పికాన్ ఆతి ఇస్కరియోతు యూద.

5 యేసు అయ పనెండు మన్ని సిసురిజ్ పోక్కివలె ఈహు వెహ్హన్. “యూదురు ఆఇవరి నడిమి మీరు సొన్నాట్. సమరియదివరి పట్టుమ్కాజ్ బా సొన్నాట్.

6 గాని మీరు ఇస్రాయేలుది మురుతి గొర్రెజ్జెకెండ్ మనివరి నడిమి సొండ్రు.

7 మీరు సొన్ని, ‘దేవుణు ఏలుబడిః కినిక డగ్గు ఆత మనాద్’ ఇజి సొట్టు.

8 జబుదివరిజ్ నెగెండ్ కిదు, సాతి వరిజ్ నిక్తు, పెరి కస్టమ్ది వరిజ్ నెగెణ్ కిదు, దెయ్మకాజ్ పేర్దు. యా పణిజ్ కిదెజ్ అతికారం సెడ్డిః మిజి దోహ్క మనాద్. అందెజె మీరు ఎయెర్ బాణిజ్ బా ఇనికబా లొన్ ఎండ ఇకెజ్ నడిః కిదు.

9 మీరు సొనివెలె బజారం, రుపాయ్ గాని వెండి, రుపాయ్ గాని రాగి రుపాయ్ గాని మీ సన్నిదు ఒమాట్.

10 పయ్ నం కినివెలె సన్ని ఒమాట్. రుండి సొక్కెజ్, జోడ్కు, డుడు ఇనికబా ఒమాట్. ఎండనిజ్ ఇహిజు పణికినికాన్ వన్నిజ్ కావాస్తికెజ్ దోహ్కెజ్ తగ్గికాన్.

11 మీరు ఎమేణి పట్టుమ్దు సొహిజ్ బా అబె ఒరెన్ నెగ్గివన్నిజ్ రెబాజి వన్ని ఇండ్రొనె అబెణిజ్ సొని దాక మండ్రు.

12 మీరు అయ ఇండ్రొ డుఃగితిజ సరి, ‘మిజి సమాదనం మనిద్’ ఇజి వెహ్హు.

13 అయ ఇండ్రొణికార్ మిజి డగ్గు కిఃతిజ, నస్తవెలె మీరు వెహ్హిలెకెండ్ వరిజ్ దీవనమ్కు మంజినె. వారు తగిఇకార్ ఇహిజు అయాలెకెండ్ వరిజ్ జర్గివద్.

14 మీరు ఉండ్రె పట్టుమ్దు గాని, ఉండ్రె ఇండ్రొ గాని అందితిజ, వారు మిజి డగ్గు కివండ మరి మీ మాటెజ్ డగ్గు కివండ మహిజ, వరి ముస్కు వారె దేవుణు బాణిజ్ సిక్కు అప్పె ఆజినార్ ఇనిదన్నిజ్ గుర్తు లెకెండ్, మీరు అయ పట్టుమ్నో ఇల్లునో డిఃసి సొనివెలె మీ పాదమ్కాణి దుల్లి దూల్ప్పి సొండ్రు.

15 దేవుణు తీర్పు తీరిస్సి రోజుదు అయ పట్టుమ్దు మని వరిజ్ ఒద్దె లావ్ సిక్కు సీనాన్లె ఇజి నాను మిజి నిజం వెహ్హిన. సోదోమ గొమోర పట్టుమ్కాజ్ మహివరిజ్ సొన్ని సిక్కు మన్వద్.

16 కార్నుకుడిఃజు నడిఃమి గొర్రెజ్జెకెండ్ నాను మిజి లోకుర్ నడిఃమి పోక్కిన. అందెజె మీరు సరాస్కు లెకెండ్ బుది మనికిదెర్, పావుర పొటిజ లెకెండ్ నెఇకెజ్ ఇనికెజ్ సిలికిదెర్ ఆజి మండ్రు.

17 లోకుర్ వందిజ్ జాగర్త మండ్రు. వారు మిజి కోర్దురు ఒపజెప్పి, మరి యూదురు మీటిజ్ కిని ఇల్కాజ్ మిజి కొర్డెజ్ జణిజ్ డెఃయ్యునార్లె.

18 రాజురిజు ముందాల, అదికారిజు ముందాల నా ముస్కు నమకం ఇట్టి వందిజ్ మజి అసి తొహ్పి ఒనార్లె. వరి ముందాలని యూదురు ఆఇ వరి ముందాల నా వందిజ్ మీరు వరిజ్ సువార్త వెహ్హిదెర్లె.

19 గాని వారు మిజి తొహ్పి ఒనివెలె ఇనిక వెహ్హెజ్, అక ఎలాగ వెహ్హెజ్ ఇజి మీరు బెజు ఆమాట్. అయావలెనె వర్గిదెజ్ సరి ఆతి మాటెజ్ మిజి దోహ్కెలె.

20 ఎండనిజ్ ఇహిజు అయావలె వర్గినిక మీరు ఆఇదెర్. మీ బుబ్బు ఆతి దేవుణు ఆత్మ మీ లొఇహాన్ వర్గినాన్లె.

21 దాద్ది తంబేరిజ్, తంబెరి దాద్దిజ్, అపోసి మరిసిజ్ సప్తెజ్ ఒపజెప్పార్లె. కొడోః అయ్సి అప్పొసిర్ ముస్కు గొడబు ఆజి వరిజ్ సపిస్సార్లె.

22 నా ముస్కు నమకం ఇట్టి వందిజ్ విజేరె మీ ముస్కు పగదాన్ మంజినార్లె. గాని ఆకార్ దాక ఒరిస్సి వన్నిజ్ దేవుణు రక్కిస్సాన్లె.

\* **10:4 10:4** కనాయదికాన్ సీమోసు - తెలుగు రోమది ఏలుబడిఃదాన్ యూదురు దేసమ్దిజ్ విడుదల కిదెజ్ ఉసార్దాన్ సుడిఃజిని యూదురు సజం మనాద్ అయా సజమ్దికాన్ ఒరెన్ సీమోసు.

23 ఉండ్రీ నాటో మిజీ హిమ్స కితిజ, మరి ఉండ్రీ పట్నమ్దు ఉహ్కీ సొండ్రు. లోకు మరిసి వాని ముందాల సువార్త సాటనిని పణి పూర్తి వీణెండ ఆనాద్, ఇజి నాను మిజీ నిజం వెహ్సిన.

24 సద్వినికాన్ నెస్పిస్సివన్ని మున్సు పెరికాన్ ఆవన్. పణిమన్ని యెజుమాని మున్సు పెరికాన్ ఆవన్.

25 సద్వినికాన్ నెస్పిస్సివన్ని లెకెండ్ ఆతిజ ఆనాద్. పణిమన్ని యెజుమాని లెకెండ్ ఆతిజ ఆనాద్. ఇండ్రోణి యెజుమానిజ్ వారు బయిల్జెబులు† ఇజి కూక్కి మోసం వెహ్టోర్ ఇహిజ ఇండ్రోణికార్ ఆతి మీ వందిజ్ మరి ఎసోనో సెజ మాటెజ్ వెహ్టోర్లె.

26 అందెజె వరిజ్ మీరు తియెల్ ఆమాట్. డాప్తి మనికెజ్ విజు తోరె ఆనెలె. నెన్ఎండ మూస్తి మనికెజ్ విజు నెసె ఆనెలె.

27 మీ వెట నాను సీకటిదు వెహ్టి మాటెజ్, మీరు జాయ్దు వెహ్టు. మీ గిబిజ వెహ్టి మాటెజ్ విజెరె వినిలెకెండ్ మిద్దెజ మున్సుహన్ మీరు డటం వెహ్టు.

28 ఆత్మదిజ్ సహ్జె అట్ఎండ ఒడోల్దిజ్నె సహ్జె అట్టి వరిజ్ మీరు తియెల్ ఆమాట్. గాని ఆత్మని ఒడోల్దిజ్ సిసు మంజిని బాడిడు పోక్కి నాసనం కిదెజ్ అతికారం మని దేవుణుదిజ్నె తియెల్ ఆజి మండ్రు.

29 ఉండ్రీ కాసుదిజ్ రుండి ఇజి పంట పొటిజ్పారె ఆజినెగదె. అహిజ్బా నీ బుబ్బాతి దేవుణు నెన్ఎండ దన్ని లోఇ ఉండ్రీబా అడ్డి బూమిదు సాదెజ్ ఇజి డిసి సీవన్.

30 నీ బుర్రది కొపు విజుబా లెక కిబె ఆత మనాన్.

31 అందెజె మీరు తియెల్ ఆమాట్. మీరు యా ఇజిరి పంట పొటిజ మిస్తి విలువ మనికిదెర్.

32 లోకుర్ ముందాల నజి ఒపుకొణి, విజెరిజ్ నానుబా వరివందిజ్ పరలోకామ్దు మని నా బుబ్బాతి దేవుణు ఎద్రు ఒపు కొణా.

33 గాని ఎయెన్బా లోకుర్ముందాల నజి నెన్ఎ ఇజి వెహ్టిజ, పరలోకామ్దు మని నా బుబ్బాతి దేవుణు ముందాల నానుబా వన్నిజ్ నెన్ఎ ఇజి వెహ్టోర్లె.

34 బూమి మున్సు సమాదనం తపిస్టెజ్ నాను వాత మన ఇజి మీరు ఒడోబిమాట్. పగ తపిస్టెజ్నె వాత, సమాదనం ఆవద్.

35 ఎండనిజ్ ఇహిజ, మరిసిజ్ వన్ని అప్సాసి మున్సు, గాడ్ఫిజ్ దని అయ్సి మున్సు, కొడియెసిజ్ దని మీమ్సి మున్సు, పగ కిబిస్టెజ్నె నాను వాత మన.

36 నా మున్సు నమకం ఇట్టి వందిజ్ ఒరెన్ వన్ని మున్సు వన్ని సొంత ఇండ్రోణికారె పగాతికార్ ఆనార్.\*

37 బుబెజ్బా యాయెజ్బా నజి మిస్తి ప్రేమిస్సికాన్ నజి తగ్గికాన్ ఆవన్. మరిసిజ్బా గాల్పిజ్బా నజి మిస్తి ప్రేమిస్సికాన్ నజి తగ్గికాన్ ఆవన్.

38 కష్టమ్కు ఓరిస్టెజ్ మన్సు సిల్లికాన్, మరి నా వెట సాదెజ్ ఇజిబా మన్సు సిల్లికాన్, ఎయెన్బా నజి తగ్గికాన్ ఆవన్.

39 వన్ని పాణమ్దిజ్ కాపాడెదెజ్ ఇజి సుడితిజ వాండ్రు దన్నిజ్ సొపిస్సాన్. నా వందిజ్ వన్ని పాణం సొన్పిస్సికాన్ దనిజ్ కాపాడ్సాన్.

40 నిజి డగ్రు కినికాన్ నజినె డగ్రు కిజినాన్. నజి డగ్రు కినికాన్ నజి పోక్తివన్నిజ్బా డగ్రు కిజినాన్.

41 ఒరెన్ దేవుణు ప్రవక్తెజ్, వాండ్రు దేవుణు ప్రవక్త ఇజి నెసి ఎయెన్బా వన్నిజ్డగ్రు కితిజ, దేవుణు ప్రవక్తెజ్ దోహ్కీ లెకెండ్ వన్నిజ్బా పలం దోహ్కాద్లె. ఒరెన్ నీతి నిజాయితి మని వన్నిజ్ వాండ్రు నీతి నిజాయితిదికాన్ ఇజి నెసి ఎయెన్బా వన్నిజ్ డగ్రు కితిజ, నీతి నిజాయితి మని వన్నిజ్ దోహ్కీ లెకెండ్ వన్నిజ్బా పలం దోహ్కాద్లె.

42 యా నా సిసూర్ లోఇ ఇజిరి ఒరెన్ వన్నిజ్ వాండ్రు నా సిసూర్ ఇజి నెసి ఎయెర్బా ఉండ్రీ గలన్ ఏరు సితిజ, దనిజ్ తగితి పలం తవ్వెండ వన్నిజ్ దోహ్కాద్ ఇజి నాను మిజి నిజం వెహ్సిన.”

## 11

యేసుని బాప్తినం సీని యోహాను

1 యేసు వన్ని పనెండు మన్ని సిసూర్జ బోదిసి వీజితి వెనుక, అబెణిజ్ సోసి గలిలయ దేసమ్దు మని పట్నమ్కాజ్, నాహ్కాజ్ సువార్త సాట్టెజ్, బోదిస్టెజ్ సోహాన్.

2-3 జెలిదు మని యోహాను క్రీస్తు కిని పణిజ వందిజ్ వెంజి, “వానికి నీనెనా? సిలిజ మరి ఒరెన్ వన్నిజ్ మాపు ఎద్రు సుడిజి మండ్రెజ్నా?”, ఇజి వెన్బాదెజ్ వన్ని సిసూర్జ యేసు డగ్రు పోక్తాన్.

† 10:25 10:25 దేవుణుదిజ్ పోగ్డిజి మాడిన్ఇ యూదురు ఆఇకార్ మాడిసి మహి, ఉండ్రీ బొమ్మనె బెయల్జెబ్బులు. యూదురు అయ బొమ్మదిజ్ “పొర్లిజ్ మాడిస్సి బొమ్మ”, ఇజి వెక్రిసి వహ్సా మహర్. అందెజె వారు యేసుప్రబుజ్ బెయల్జెబ్బులు ఇజి కూక్కివెలె వన్నిజ్ నండో మోసం వెహ్టో మహర్. \* 10:36 10:36 మికా 7:6.

4-5 యేసు వరిజ్ ఈహు వెప్తూన్, “గుడ్డిదికార్ సుడేజినార్, సాటాదికార్ నడిజినార్, పెరి జబు మనికార్ నెగెణ్ ఆజినార్, బోయ్ రాదికార్ వెంజినార్, సాతికర్ నిజె ఆజినార్, బీదాతి వరిజ్ సువార్త వెహె ఆజినాద్, ఇజి యా లెకెండ, మీరు సుడేజినికెజ్, వెంజినికెజ్ మర్జి సొన్ని, యోహానుజ్ వెప్తూ.

6 గాని నా ముస్సు మన్ని నమకం డిసి సెఇకాన్ దేవుణు సీని దీవెనమ్కు మంజినికాన్ ఆనాన్తె.”

7 యోహాను సీసూర్ మర్జి సొన్నిమహిజ్ యేసు యోహాను వందిజ్ ఈహు వర్గిదెజ్ మొదోల్స్తాన్. “ఇనిక సుడేదెజ్ మీరు బిడిమ్ బూమి ప్రాతమ్దు సొహిమహిదెర్? గాలిదిజ్ దూజ్జిని గడిదిజ్ పోలితి ఒరెన్ వన్నిజ్ సుడేదెజ్నా?

8 సిల్లిజ మరి ఇనిక సుడేదెజ్ మీరు సొహి మహిదెర్? నెగ్గి సొక్కెజ్ తోడిగితి మని ఒరెన్ వన్నిజ్ సుడేదెజ్నా? నూనాజ్ మని నెగ్గి సొక్కెజ్ తోడిగితి మంజినికార్ రాజురి ఇల్కాజ్ మంజినార్ గదె?

9 సిల్లిజ మరి ఇనిక సుడేదెజ్ మీరు సొహిమహిదెర్? ఒరెన్ దేవుణు ప్రవక్తెజ్ సుడేదెజ్నా? నిజమె, దేవుణు ప్రవక్తెజ్ ఇంక పెరివన్నిజ్నె ఇజి నాను మిజి వెప్పిన.

10 ‘నాను నా కాబు తనివన్నిజ్ నిజి ఇంక ముజాల పొక్కు. వాండ్రు నీ ముజాల నీ సరి నెగెండ కిన్’\* ఇజి వన్ని వందిజె దేవుణు మాటదు రాస్త మనాద్.

11 బోదెక పొటాదు పుట్టివరి లోఇ యోహాను ఇంక మిస్తికాన్ ఎయెన్బా సిలెన్. గాని దేవుణు ఏలుబడి కినిదని లోఇ ఇజిరికాన్ ఆతికాన్, యోహానుజ్ ఇంక పెరికాన్ ఇజి నాను మిజి నిజం వెప్పిన.

12 బాప్తిసం సీని యోహాను కాలమ్దాన్ ఏలుదాక దేవుణు ఏలుబడి కినిక బలవందమ్దాన్ ముజాల వాజినాద్. మరి గొప్ప సత్తు మనికార్ దనిజ్ అడ్డు కిదెజ్ సుడేజినార్.

13 మోసి సీతి రూలుజ్ని దేవుణు ప్రవక్తరు విజెరెబా దేవుణు ఏలుబడి కినివందిజె యోహాను కాలమ్దాక వర్గిజి మహార్.

14 నమిదెజ్ మిజి ఇస్టం మహిజ, ఏలియ వానాన్లె ఇజి ముజాల వెప్తాక విని వందిజెనె.

15 మి గిబ్బిజ్జాణిజ్ నెగెండ వెంజి అయా వజ నడిజి మండ్రు.

16-17 ‘యా తరమ్ది వరిజ్ ఇనిదనిజ్ సమానం వెప్తాజ్? వారు సతాదు బసి, మహివరిజ్ డేల్నిని కొణ్ణోర్ లెకెండె మనార్.’ ‘మాపు మీ వందిజ్ పిరుడి: ఉహ్క్తమ్ గాని డాట్ఇతిదెర్, సాతి ఇండ్రో పాటెజ్ పార్తాప్ గాని మీరు గుండె కొతె ఆజి మీరు అడెబ ఇతిదెర్’.

18 యోహాను వాతివెలె వాండ్రు తిండి వందిజ్ లావ్ ఒడేబివండ రోజు ఉపాస్ కిజి మహాన్. వాండ్రు అయాలెకెండె తిన్ఎండ, ఉణెఎండ మన్నిజ్ వన్నిజ్ దెయం అస్తాద్ ఇజి వారు వెప్పినార్.

19 లోకు మరిసి ఆతి నాను తింజి, ఉణిజి వాతాన్కాక ‘వీండ్రు తిండి కకూర్తికాన్’ మరి ఉణిజి సొస్సికాన్, పన్ను పెర్నివరిజ్ని పాపం కిజిని వరిజ్ కూలాయెన్ ఇజి వారు వెప్పినార్. గాని దేవుణు బాణిజ్ వాని గెణం మన్నికార్ వారు కిజిని నెగ్గి పణిజాణిజ్ అయ గెణం సరియాతిక ఇజి రుజుప్ కిజినాద్.”

### నమకం సిల్లికార్ మన్ని పట్టమ్కు

20 మరి యేసు ఎమేణి పట్టమ్కాజ్ నండో బమ్మ ఆతి పణిజ్ కితిజ్బా వారు వరి మన్ను మారిన్ఎతారో, అయ పట్టమ్కాజ్ ముస్సు కోపం అజి వర్గితాన్.

21 అబయా! కోరజిన పట్టమ్దు మనికిదెరా మిజి అస్సా గొప్ప కస్టమ్కు, వానెనో, అబయా! బెత్సెయ్దుపట్టమ్దు మన్నికిదెరా మిజిబా ఎస్సా గొప్ప కస్టమ్కు వానెనో. ఎండనిజ్ ఇహిజ నాను మీ నడిమి కితి మహి బమ్మాతి పణిజ్ తూరుని సీదోను పట్టమ్కాజ్ కిని మంజినిక ఇహిజ వారు ఎస్సా ముజాలె బస్త సొక్కెజ్ తోడిగిజి ఒడోదు నీరు రాసె ఆజి ఉపాస్ కిజి వరి పాపమ్కు ఒప్పకొడేజి డిసి సీజి మన్ను మారిసి అయాలెకెండె మినికార్ ఇజి తోరోస్తార్ మరి.

22 అందెజె నాను నిజి వెప్పిక ఇనిక ఇహిజ తీర్పు తీరిస్సి రోజుదు తూరుని సీదోను పట్టమ్దివరిజ్ మిస్తి సిక్కు మిజి వానాద్లె.

23 ఓ కపెర్నహమా, “ఆగాసమ్దు మనికిదెరా, మీరు ఆగాసమ్దాక అందిజిని గొప్ప వారు ఇజి మీరు ఒడేబిజినిదెరా? గాని దేవుణు అయా లోకమ్దు విసిర్లె. మీ నడిమి కితి మహి బమ్మాతి పణిజ్ నాణు సొదోము పట్టమ్దు కిని మంజినిక ఇహిజ అయ సొదోము పట్టమ్దికార్ వరి అలవాటుజ్ డిసి సీజి అయ పట్టమ్దిజ్ దేవుణు సిక్కు సివండ ఏలుదాక మహాద్ మరి.

24 అందెజె నాను నిజి వెప్పిన తీర్పు తీరిస్సి రోజుదు సొదోము పట్టమ్దు మహివరిజ్ వాని దన్నిజ్ మిస్తి సిక్కు మీ లోకురి ముస్సు వానాద్లె.”

వందితివరిజ్ కూక్కినిక.

25 వెనుక యేసు ఈహు వెహ్లాన్, “పరలోకామ్దిజ్ని బూమిదిజ్ ప్రబువాతి నా బుబ్బా, నాను నిజి పొగ్డిజిన. ఎందనిజ్ ఇహిజ గెణం మన్ని వరిజ్ని సదువు మన్ని వరిజ్ యా సజతిజ్ తెలియ కివిండ యా సదువు సిల్లి వరిజ్ తెలియ కిత్తి.

26 నిజమె బుబ్బ, ఈహు కినికాదె నిజి ఇస్టం ఆతాద్.

27 బుబ్బ విజు సజతిజ్ నా కీదు ఒవజెప్త మనాన్. బుబ్బ ఆవిండ మరి ఎయెర్బా మరిసిజ్ నెన్వీర్. మరిసిని, మరిసి వన్నిజ్ తెలివి కిదెజ్ ఎర్లికారె బుబ్బెజ్ నెస్సార్. మరి ఎయెర్బా నెన్వీర్.

28 క్షబాడేజి బరు పిండజి వందితి విజిదెరె, మీరు నా డగ్గు రదు. నాను మిజి రొంబిన్సు.

29 నాను సార్లిదికాన్. నాను మెతని మన్ను మనికాన్. నా వెట కూడేజి ఉండ్రె పూండు మీ మెడః మున్ను పొకె అజి మాటు కూడేజి పణికినాట్, మీరు నా అడ్రెజ్ లోజిజి నా బాణిజ్ నెస్సు. నస్తివలె మీ పాణమ్కాజ్ నిమాలం కలగినాద్.

30 ఎందనిజ్ ఇహిజ నా కూడేజి నా పూండు అడిగి పణి కిత్తిజ పణి సూలు మంజినాద్, బరుబా సుల్కానిక మంజినాద్.”

## 12

యేసు విస్రాంతిదినమ్దు ప్రబు.

1 అయావలె యూదురి విస్రాంతిదినమ్దు యేసు పంట గుడ్డెదాన్ సొన్ని మహివలె, వన్ని సిసూరిజ్ బజ కట్టిజ్, వారు సెరెక్ తెప్పి నూల్లి తింజి మహార్.

2 అయాక పరిసయ్రు సుడేతారె, “ఇదిలో, మోసె సిత్తి రులువజ విస్రాంతిదినమ్దు కిదెజ్ ఆఇ పణి, నీ సిసూర్ కిజినార్”, ఇజి యేసుజ్ వెహ్లాన్.

3 వాండ్రు వరివెట ఈహు వెహ్లాన్, “దావీదు రాజుని వన్నివెట మహివరిజ్ బజ కట్టిజ్, వాండ్రు ఇనిక కిత్తాండ్రో ఇజి మీరు దేవుణు మాటదు ఎసెజ్బా సద్విఇతిదెరా?\*

4 వాండ్రు ఇనిక కిత్తాన్ ఇహిజ, గుడారమ్దు† సొన్ని, దేవుణు ముజాల ఇడ్డిమహి రొట్టెజ్ లాగితాన్. వాండ్రుని వన్నివెట మహికార్ విజెరె తిహార్. అయాక పుజేరిజునె తప్ప మరి ఎయెర్బా తిండ్రెజ్ ఆవిద్ ఇజి మోసె సిత్తి రూలుదు వెహ్లా మనాద్.

5 దేవుణు గుడిడు మన్ని పుజేరిజు విస్రాంతిదినమ్దు పణి కిజినార్ గాని అక తప్ప ఆవిద్ ఇజి దేవుణు మాటదు రాస్తి మన్నిక మీరు ఎసెజ్బా సద్విఇతిదెరా?

6 దేవుణు గుడిడిజ్ ఇంక మిస్తికాన్ ఇబ్బె మనాన్ ఇజి నాను మిజి వెహ్లాన్.

7 ‘మీరు మహివరి మున్ను కనికారం తొరిస్తెజ్ ఇజినె నాను కోరిజిన గాని కత్తి సీజిని పూజెజ నాను కోర్వీ\* ఇని మాటదిజ్ అర్థం మీరు నెసిమంజినిక ఇహిజ, ఇని తప్పబా కిఇవరి మున్ను తప్పు మాటెజ్ వెహ్లాత్తార్ మరి.

8 ఎందానిజ్ నాను యాలెకెండ్ వెహ్లానిక ఇహిజ, లోకుమరిసి ఆతి నజి విజు దన్నిజ్ అతికారం మనాద్. విస్రాంతి దినమ్దు లోకుర్ ఇనిక కిదెజ్వలె ఇజి వెహ్లాజ్బా నజి మనాద్.

9 అబ్బెణిజ్ సొన్ని మహివలె, వాండ్రు యూదురు మీటిజ్ కిని ఉండ్రె ఇండ్రో సొహాన్.”

10 వహ్లా అర్తి ఉండ్రె కియు మన్నికాన్ ఒరెన్ అబ్బె మహాన్. యేసు మున్ను తప్పు మొప్పెజ్ ఇనికాదో ఉండ్రె సజతివందిజ్ సుడిజి వారు వన్నిజ్ ఈహు వెన్బాతార్, “విస్రాంతిదినమ్దు ఎయెరిజ్బా నెగెండ్ కినిక దేవుణు రూలుదిజ్ తగ్నాదా?”.

11 యేసు వరిజ్ ఈహు వెహ్లాన్, “మీ లొఇ ఎయెరిజ్బా ఉండ్రె గొరె మహిజ, విస్రాంతిదినమ్దు అక్క ఉండ్రె గాందదు అర్తిజ, మీరు దనిజ్వెల్లి లాగ్ఇదెరా?

12 మెండగొరెదిజ్ మున్ను లోకు ఎస్సానో విలువ మన్నికాన్. అందెజి విస్రాంతిదినమ్దు మేలు కినిక దేవుణు మోసెజ్ సిత్తి రూలుదిజ్ తగ్నాద్.”

13 అయావలె వాండ్రు వహ్లా కియు అర్తి వన్నిజ్ “నీ కియు సవ్అ”, ఇజి వెహ్లాన్. వాండ్రు కియు సాహ్లాన్. అయావలె అక నెగెండ్ మన్ని మరి ఉండ్రె కియు లెకెండ్ ఆతాద్.

14 గాని పరిసయ్రు వెల్లి సొహారె యేసుజ్ ఎలాగ సప్తెజ్ ఇజి వన్నిజ్ పడిఃఎండ ఆలోసనం కిత్తార్.

దేవుణు ఏర్పాటు కితికాన్

\* 12:3 12:3 దావీదు రాజు కిత్తిక సముయేలు ప్రవక్త పుస్తకమ్దు రాస్త మనాద్. 21:1-6. † 12:4 12:4 గుడారమ్దు విజు విస్రాంతి దినమ్దు దేవుణుదిజ్ పూజ సిత్తిలెకెండ్ 12 కొత్త రొట్టెజ్, సమాజ గుడారమ్దు మన్ని బల్లాదు ఇడ్డి మంజినె కొత్త రొట్టెజ్ ఇడ్డి బాణిజ్ లాగితి పడాయ రొట్టెజ్ పుజెరిజు తినార్. లేవి 24:5-9 అయకాలమ్దు యెరుసల్లెమ్దు మన్ని దేవుణు గుడిః సిల్లెతాద్. దావీదు రాజు మరియాతి సొలొమెను కాలమ్దునె యెరుసల్లెమ్దు మన్ని దేవుణు గుడిః వాండ్రు తొహిస్తాన్. \* 12:7 12:7 హోసెయ 6:6.

15 యేసు అయా సజతి నెస్తాండ్రె అబెణిజ్ సాహాన్. నండొండార్ వన్ని వెనుక సాహార్. వాండ్రు వరి జబ్బుది వరిజ్ విజేరిజ్ నెగెండ కిత్తాన్.

16 నా వందిజ్ ఎయెరిజ్ బా వెహ్మాట్ ఇజి వరిజ్ వెహ్మాన్.

17 యెసయ ప్రవక్త వెట దేవుణు ముజాల వర్గితి యా మాటెజ్ పూర్తి ఆదెజ్ ఇజి యా లెకెండ జర్గితాద్.

18 “ఇదిలో, నాను ఏర్పాటు కితి నా పణి మన్ని వీండ్రె, నాను వన్నిజ్ ప్రేమిసిన, వన్ని మున్ను సర్ద ఆజిన. నాను వన్ని మున్ను నా ఆత్మదిజ్ పొక్కు. వీండ్రు విజు జాతిది వరిజ్ నాయం తీరిస్నాన్లె.

19 వీండ్రు జటిజ్ ఆవన్, డేల్స్ ఏవన్, విన్ని కంటం వీదిజు ఎయెరిజ్ వినపిన్ ఎవన్.

20 సలిగితి గడిదిజ్ వాండ్రు తెప్పి వినీర్ ఏవన్, నమని దీవదిజ్ వాండ్రు నవ్ ఎవన్ †. వాండ్రు నాయమదిజ్ గెల్పిసినాన్.

21 లోకుర్ విజేరె వన్నిజె ఆసదాన్ ఎదు సుడిజి మంజినార్. వాండ్రు విజు జాతిజు వరిజ్ నాయం తీరిస్నాన్.”\*  
 † 12:20 12:20 అయ మాటదిజ్ అర్థం ఇనిక ఇహిజు, లోకుర్ దేవుణు మున్ను మన్ని నమకమదిజ్ కండెక్ వెనుక అతిజ్ నొ దయరం సిల్లెండ ఆతజ్ నొ యేసు వన్నిజ్ డిసి సివన్ మొకొ మహ్ ఏవన్. \* 12:21 12:21 యెసయ 42:1-4.

### యేసుని బయిల్ జెబ్బులు

22 అయావలె సెగొండార్, దెయం అస్తిమహిజ్ వర్గిదెజ్ అట్ ఇ గుల్ల ఆతి ఒరెన్ వన్నిజ్ యేసు డగ్రు తతార్. యేసు వన్నిజ్ నెగెండ కిత్తాన్. వాండ్రు సుడిదెజ్, వర్గిదెజ్ అట్టాన్.

23 లోకుర్ విజేరె బమ్మ ఆజి, “మాప్ ఎదు సుడిజి కాప్ కిజి మంజిని దావీదు రాజు తెగ్గదికాన్ వీండ్రు ఆవెండ్రా?”, ఇజి వర్గిజి మహార్.

24 పరిసయరు అయ మాట విహారె, “విజు దెయమ్ కాజ్ నెయ్యి ఆతి బయిల్ జెబ్బులు సాయమ్ దాన్ వీండ్రు దెయమ్ కాజ్ పెర్ జినాన్”, ఇజి వెహ్మాన్.

25 యేసు వరి ఆలోసనమకు నెసి వరిజ్ ఈహు వెహ్మాన్. “ఎమేణి దేసెమ్ దికార్ బ వ రిజ్ వారె పగ ఆజి ఎర్లిజి మహిజు అయ దేసెం పాడానాద్. అయాలెకెండ ఎమేణి పట్టుమ్ దికార్ గాని ఇండ్రొణికార్ గాని, వరిజ్ వారె, పగ ఆజి ఎర్లిజి మహిజు నీ ఎమేణి పట్టుం గాని ఇల్లు గాని ఏలుబా లావ్ రొస్సు నిల్పి మన్ ఏవద్.

26 సయ్యూను అడిగి మన్నికార్ ఉండ్రె జటుదికార్, మరి ఉండ్రె జటుదివరివెట పగ ఆజి ఎర్లె ఆజి విదెం కిజి మహిజు, వన్ని ఏలుబడి: ఎలాగ లావ్ రొస్సు నిల్పి మంజినాద్.”

27 బయిల్ జెబ్బులు సాయమ్ దాన్ నాను దెయమ్ కాజ్ పేర్లిజు, మీ లోకుర్ ఎలాగ దెయమ్ కాజ్ పేర్లినార్? అందెజె నా వందిజ్ మీరు వెప్పికెజ్ తపు ఇజి వారె రుజుప్ కిజినార్.

28 గాని దేవుణు ఆత్మ సత్తుదాన్ నాను దెయమ్ కాజ్ పేర్లిజు ఇహిజు, నిజమె దేవుణు ఏలుబడి: కినిక మీ నడిమి వాత మనాద్.

29 సుడి:దు, ఒరెన్ సత్తుమని వన్నిజ్ ముజాల తొహ్ ఏండ, వన్ని ఇండ్రొ డు:గ్ జి ఇండ్రొణి సామనమ్ కు ఎయెరిజ్ బా ఒతెజ్ అట్టాన్? ముజాల వన్నిజ్ అసి తొహ్ జినె డొజు కిదెజ్ అట్టాన్.

30 నా వెట కూడ్డి మన్ ఇకాన్ ఎయెస్ బా నజి పగాతికాన్ ఆనాన్. లోకురిజ్ దేవుణు డగ్రు తత్తెజ్ నా వెట కూడ్:జి మన్ ఇకాన్ లోకాజ్ సెద్రిస్పికాన్ ఆజినాన్.

31 మరి నాను మిజి వెహ్మానిక ఇనిక ఇహిజు, లోకుర్ కిని విజు పాపమ్ కాజ్, దూసణదిజ్ దేవుణు సెమిస్నాన్, గాని దేవుణు ఆత్మదిజ్ దూసిని వెహ్మాజు ఆకెజ్ ఎసెజ్ బా సెమిస్ ఎవన్.

32 లోకు మరిసి ఆతి నజి పడి:ఏండ ఇనికబా వర్గితిజు దేవుణు వన్నిజ్ సెమిస్నాన్. గాని దేవుణు ఆత్మదిజ్ పడి:ఏండ వర్గిని వన్నిజ్ యా లోకమ్ దుబా, వాని లోకమ్ దుబా దేవుణు సెమిస్ ఎవన్.

33 మరాన్ నెగ్గిక ఇహిజు దని పండుబా నెగ్గికదె. సిలిజు, మరాన్ నెగ్గిక ఆవెండ మహిజు దని పండుబా నెగ్గిక ఆవెద్. మరాతి పండుదానె మరాన్ ఎలాగ మర్తికాదొ ఇజి నెస్టెజ్ ఆనాద్.

34 విసం మన్నిసరాన్ నన్నికిదెరా, సెఇకిదెరాతి మీరు నెగ్గి మాటెజ్ ఎలాగ వర్గిదెజ్ అట్టిదెర్? మీ మన్నుదు మీరు ఒడి:బిని దన్నిజ్ తగితి లెకెండెనె మీ వెయు వర్గిజినాద్.

35 నెగ్గి మన్ను మన్ని వన్నిజ్ కూలిజ్ కొట్టుకిత్తి మన్నిలెకెండ, వని మన్నుదు నెగ్గికెజె మంజినె. అందెజె వన్ని వెయుదాన్ నెగ్గి మాటెజె వానె సెఇ మన్ను మనివన్నిజ్ సెఇకెజె మంజినె. అందెజె వన్ని వెయుదాన్ సెఇ మాటెజె వానె.

36 గాని నాను మిజి వెహ్మానిక ఇనిక ఇహిజు, దేవుణు తీర్పు తీరిస్పి రొజుదు, లోకుర్ వర్గితి మహి విజు మాటెజు వందిజ్ లెక్క సిదెజ్ వలె.

† 12:20 12:20 అయ మాటదిజ్ అర్థం ఇనిక ఇహిజు, లోకుర్ దేవుణు మున్ను మన్ని నమకమదిజ్ కండెక్ వెనుక అతిజ్ నొ దయరం సిల్లెండ ఆతజ్ నొ యేసు వన్నిజ్ డిసి సివన్ మొకొ మహ్ ఏవన్. \* 12:21 12:21 యెసయ 42:1-4.

37 అహిజ మీ మాటెజాణిజె మీరు సిక్కుదాన్ తప్రె ఆనిదెర్, సిల్లిజ మీ మాటెజాణిజె మీరు మీ ముస్సు సిక్కు తపె ఆనిదెర్.

### ఓన ఉండ్రీ గుర్తు

38 నస్తివలె సెగొండార్ పరిసయరుని యూదురి రూలుజ్ నెస్పిస్సికార్ యేసు డగ్రు వాజి వన్నిజ్, “బోదకినికి, నీను దెవుణుబాణిజ్ వాతికాన్ ఇనిదన్నిజ్ గుర్తు లెకెండ్ నీను తోరిసిని ఉండ్రీ బమ్మాతి పణి సుడుఁదెజ్ ఇజి కోరిజినాప్”, ఇజి వెహ్సార్.

39 వాండ్రు వరిజ్ “యా తరమ్దికిదెర్ అతి మీరు సెఇకిదెర్. దేవుణుదిజ్ నెన్ఇకిదెర్నె, గుర్తు లెకెండ్ ఉండ్రీ బమ్మాతి పణి కిజి తోరిన్అ ఇజి వెహ్సాదెర్. గాని దేవుణు ప్రవక్త అతి ఓనెజ్కో జర్గితిక తప్ప మరి ఇని గుర్తుబా ఎయెరిజ్బా తోర్ఎద్.

40 ఓన మూండ్రీ రోస్సు పెరి మొయ పొటాదు ఎలాగ మహండ్రొ, అయలెకెండ్నె, లోకుమరిసి అతి నానుబా మూండ్రీ రోస్సు బూమి లోఇ మంజినలె.

41 ఓన వెహ్సా మాటెజ్ విహారె నినివెదికార్ వరి పాపమ్కు ఒప్పు కొడిఁజి డిస్త సితార్. అందెజె తీర్పు తీరిసిని దినమ్దు వారు యా తరమ్ది వరి వెట నిల్పి విరిముస్సు తీర్పు తీరిస్సార్లె. ఇదిలో, ఓనెజ్ మిస్సికాన్ ఒరెన్ ఇబ్బె మనాన్ ఇజి నాను వెహ్సాన.

42 ఆక్కరి దినమ్కాజ్ తీర్పు తీరిసినివలె, దసిణ దేసెమ్ది రాణి ఉండ్రీ సాసిలెకెండ్ బాన్ మంజినాద్లె. ఎందనిజ్ ఇహిజ సాలోమోను వర్గిని గెణంమన్ని మాటెజ్ వెండ్రెజ్ నండో దూరం మన్ని దన్ని దేసెమ్దాన్ వాతాద్. ఇదిలో, సాలోమోనుజ్ మిస్సికాన్ ఒరెన్ ఇబ్బె మనాన్. గాని యా తరమ్దికార్ వన్ని మాటెజ్ గిబ్బిజ్ ఒడఁజి వెన్ఎర్, అందెజె యా తరమ్ది వరిజ్ తీర్పు మంజినాద్లె.

43 ఉండ్రీ దెయం ఒరెన్ వన్నిజ్ డిఁసి వెల్లి వాతి వెనుక, మండ్రెజ్బాడ్డి వందిజ్ రెబాజి బిడిఁమ్బూమిదు బూలాజినాద్. గాని ఎంబెబా దనిజ్బాడ్డి దోహ్కావతాద్.

44 నస్తివలె ‘నాను డిఁస్తి వాతి నా ఇండ్రొ మర్జి సానాలె’, ఇజి దనిజ్ అదినె వెహ్సాద్. మర్జి వాతిజ్ అది డిఁస్తి సిత్తికాన్, నెగెండ్ సిపాజి సుబరం కిజి ఎయెర్బా మన్ఇ ఇల్లు లెకెండ్ మన్నక సూణాద్.

45 నస్తివలె అది మర్జి సాన్సి, దన్నిజ్ ఇంక సెఇకెజ్ అతి మరి ఏడు దెయమ్కాజ్ దన్నివెట కూక్కు తనాద్. అవిక్ వని లోఇ సాన్సి అబెనె బస కినె. అయావలె వన్ని గతి ముందాహి దనిజ్ ముస్సు కస్టం ఆనాద్. అయలెకెండ్నె యా తరమ్ది వరిజ్ గతిబా మంజినాద్.”

### యేసు అయ్సిని తంబెరిజు

46 యేసు మంద లోకుర్ వెట వర్గిజి మహివలె, వన్ని అయ్సిని తంబెరిజు వన్నివెట వర్గిదెజ్ ఇజి వెల్లి నిహ మహార్.

47 అయావలె ఒరెన్, “ఇదిలో నీ యాయని నీ తంబెరిజు నీ వెట వర్గిదెజ్ ఇజి వెల్లి నిహ మనార్”, ఇజి వన్నిజ్ వెహ్సాన్.

48 అందెజె వెహ్సావన్నిజ్ సుడఁజి, “ఎయెద్ నా యాయ? ఎయెరు నా తంబెరిజు?”, ఇజి వెన్బాతాన్.

49 వన్ని సిసూర్జి కియు తోరిసి, “ఇదిలో నా యాయని నా తంబెరిజు.

50 పరలోకామ్దు మన్ని నా బుబ్బెజ్ ఇస్టం ఆతివజ కినికాండ్రె నా తంబెరి, నా తజి, నా యాయ”, ఇజి వెహ్సాన్.

## 13

### విత్తు విత్తివన్ని కత.

1 అయ దినమ్దునె, యేసు ఇండ్రొణిజ్ వెల్లి సాన్సి సమ్దరం పడఁకాదు బస్తాన్.

2 మంద లోకుర్ వన్ని డగ్రు వాతిజ్ వాండ్రు ఉండ్రీ డోణిదు ఎక్త బస్తాన్. లోకుర్ విజెరె సమ్దరం పడఁకాదు నిహార్.

3 అయావలె వాండ్రు వరిజ్ సుడఁజి నండో సజతిజ్ కత వజి వరిజ్ వెహ్సాన్ “ఒరెన్ రయ్యు వాండ్రు విత్తు విత్తెజ్ సాహాన్.

4 వాండ్రు విత్తి మహిజ్ సెగం విత్తు సరి పడఁకాదు అరె. పొటిజ్ వాజి వన్కాజ్ తిహె.

5 సెగం విత్తు సటు ముస్సు మని లావ్లోతు సిలి డుల్లిదు అరె. డుల్లి లోతు లావ్ సిల్లితిజ్ అవి వెటనె నేరె.

6 గాని డుల్లి తకు మహిజ్ వెలెజ్ లోఇ సాన్ఇతిజ్, పొదు సాసి ఎండ తాక్తిజ్ అవి సాతె.

7 సెగం విత్తు సాప్పుతుపెజి అరె. సాప్పు తపుజ్ పెరిసి వన్కాజ్ అణసు తిగితె.

8 మరి సెగం విత్తు నెగ్గి బూమిదు అరె. అబ్బె విత్తి విత్తుదిజ్ వంద వంతుజ్, అరువయ్వంతుజ్, ముపయ్వంతుజ్ లెక్క పండితె.

§ 12:39 12:39 పడాయ్ ఒప్పుమాసమ్దు ఓన వందిజ్ రాస్త మనాద్ వాండ్రు పయనం కిజి మహి ఒడదాన్ సమ్దరమ్దు వినిరె అతిజ్ ఉండ్రీ పెరి మొయ, దేవుణు వెహ్సా వజి వన్నిజ్ డిఁజితాద్ మూండ్రీ రోస్సు వెనుక వన్నిజ్ సమ్దరం ఒడ్డుదు పాణమ్దాన్ కక్రాద్ ఓన గుర్తు వందిజ్ మూస ఆని వందిజ్ మరి మూండ్రీ వాండ్రు సాతి వరి బాణిజ్ మరి మర్జి నిజిజె వెహ్సాన్.

9 గిబ్బిళ్ల ఒడఃజి వెంజి అయాలెకెండ్ నడిఃజి మండ్రు.

10 వన్ని సిసూర్ వాతారె, “ఎందనిజ్ నీను కత వజ వరిజ్ వెహ్నిని”, ఇజి వన్నిజ్ వెన్బాతార్.

11 వాండ్రు వరిజ్ ఈహు వెహ్నాన్. “దేవుణు ఏలుబడిః కిని వందిజ్ డాఃజితి మని సజతిజ్ దేవుణు మిజి తెలివి కిత మనాన్, గాని విరిజ్ తెలివి కివన్.

12 దేవుణు ఏలుబడి కిని వందిజ్ నెస్తి మని వన్నిజ్ మరి తెలివి కినాన్. వన్నిజ్ మరి నండో నెస్తిస్నాన్. ఇనికబా అర్థం ఆఇ వన్నిబాణిజ్ వాండ్రు నెస్తిమనికబా లాగె ఆనాద్.

13 ఎందనిజ్ నాను కత వజ వరిజ్ వెహ్నిన ఇహిజ, వారు సుడఃజినార్ గాని సుడఃజితిక వరిజ్ తోర్వద్. వెంజినార్ గాని నెగెండ్ వినవర్, అర్థంబా కివర్.

14-15 మీరు ఎస్తివలెబా వెంజినిదెర్ గాని అర్థం కిదెజ్ అట్ఇదెర్. ఎస్తివలెబా సుడఃజినిదెర్ గాని ఇనిక ఇజి నెన్ఇదెర్. వారు వరి కణకాణిజ్ సుడఃజి, గిబిజాణిజ్ వెంజి మన్నుదాన్ అర్థం కిజి నా దరోట్ మహ్తిజ, నాను వరిజ్ నెగెన్ కిత మరి. గాని అయ లెకెండ్ జర్గివిండ వరి మన్ను కొడుఃవుదాన్ నిండ్రిత మనాద్. వరి గిబిజిజ్ మందజ్ ఆతె. వారు వరి కణ్కు మూక్త మనార్.\* యా లెకెండ్ ఎసయ ప్రవక్తవెట దేవుణు ముజాల వర్గితి మాట వరి మున్ను పూర్తి ఆతె.

16 మీ సుడఃజినికెజ్, వెంజినికెజ్, మీరు అర్థం కిజినిదెర్. అందెజ్ మీరు దేవుణు సీజిని దీవనమ్కు మన్నుకిదెర్.

17 నండోండార్ ప్రవక్తరుని నీతి నిజాయి మన్నికార్ మీరు సుడఃజిని వన్నాజ్ సుడఃదెజ్ ఆస ఆతార్, గాని సుడఃదెజ్ అట్ఎతార్. మీరు వెంజిని వన్నాజ్ విండ్రెజ్ ఆస ఆతార్ గాని విండ్రెజ్ అట్ఎతార్.

18 విత్కు విత్తివన్ని కతదిజ్ అర్థం మీరు జాగర్త వెండ్రు.

19 ఎయెన్బా దేవుణు ఏలుబడిః కిని వందిజ్ వెహ్ని మాటెజ్ వెంజి దనిజ్ అర్థం అట్విండ మహిజ, సర్వూన్ వాజి వన్ని మన్నుదు వితి దనిజ్ పెర్న ఒనాన్. యాకాదె మడిఃజి నడిఃమిహాన్ సొని సర్దు అర్తి మన్నివిత్కు.

20 సెగొండార్ సట్టు మున్ను మని లోతు సిల్లి డుల్లి నన్నికార్. సెగం విత్కు అయా డుల్లిదు అర్తె, గాని వారు దేవుణు మాట వెంజి సర్దదాన్ దనిజ్ వెటనె మన్నుదు ఇడ్వార్.

21 వారు కండెక్ కాలం దేవుణుమున్ను నమకమ్దాన్ నిల్వార్. గాని కస్టమ్కు, స్రమెజ్ వానివలె వెటనె దేవుణు మున్ను మన్ని నమకం వారు డిఃసి సీజినార్.

22 మరి ఒరెన్ విత్కు అర్తి మన్ని సాప్పుతుపెజ్ నేర్ని బూమి నన్నికాన్. వాండ్రు దేవుణు మాట వెంజినాన్ గాని యా లోకమ్ది బత్కు వందిజ్ విసారం ఆజి మరి డబ్బు వందిజ్ సెఇ ఆస ఆజి, వనిజ్ అణసు తిగ్జి మంజినె. వన్ని బత్కుదు పలం సిలి నన్నికాన్ ఆనాన్.

23 మరి ఒరెన్ విత్కు అర్తి మన్ని నెగ్గి బూమిలెకెండ్ మనాన్. వాండ్రు దేవుణు మాట వెంజి దనిజ్ అర్దం కిజినాన్. వాండ్రు, విత్తి విత్తుదిజ్ వంద వంతుజ్, అరువయ్ వంతుజ్, మువయ్ వంతుజ్ పలం సీనాన్.

### కారు మొక్కెజ్

24 యేసు మరి ఉండ్రె నజతి కత వజ వరిజ్ వెహ్నాన్. “దేవుణు ఏలుబడిః ఇహిజ, వన్ని మడిఃజి నెగ్గి విత్కు విత్తి వన్నిజ్ పోలిత మనాద్.

25 గాని విజెరె నిద్ర కిజి మహివలె, వన్ని పగాతికాన్ వాతాండ్రె, కూలిజ నడిఃమి కారు విత్కు వితాండ్రె సొహాన్.

26 కూలిజ్ నేర్జి పిరితెనె, సెరెక్ పొక్తివలె, నెగ్గి కూలిజ్లెకెండ్ మన్ని కారుబా తోరితాద్.

27 వన్ని పణి మసిర్ మడిఃజి యాజుమాని డగ్గు వాతారె, “ఓ బాబు, నీను నీ మడిఃజి నెగ్గి విత్కునె వితిగదె? మరి ఎమేణి యా కారు మొక్కెజ్ వాతె?”, ఇజి వెన్బాతార్.

28 “ఒరెన్ పగాతికాన్ యాక కితాన్”, ఇజి వాండ్రు వెహ్నాన్. అయ పణి మనిసిర్ మాపు సొన్ని వనకాజ్ లాగ్జి కొటు కిదెజ్ నిజి ఇస్టమ్నా? ఇజి వెన్బాతార్.

29 అయావలె వాండ్రు, “ఏలు పోని, నెగ్గి కూలిజ్లెకెండ్ మన్ని కారు మొక్కెజ్ మీరు లాగ్గివలె వనకవెట ఒకవేల కూలిజ్బా తెప్పిదెర్సు.

30 కొయ్ని కాలం వానిదాక రుండిబా కూడఃజి పిరిపిద్. కొయ్ని కాలమ్దు, నెగ్గి కూలిజ్ లెకెండ్ మన్నికారు మొక్కెజ ముజాల కొయ్జి కటెజ్ తోహ్ని సుర్దు, వెనుక కూలిజ్ కొయ్జి తసి నా కొటుదు వాక్తు’, ఇజి కొయ్ని వరిజ్ వెహ్నాన్.

### సర్దుగిడ కత

\* 13:14-15 13:14-15 యెసయ 6:9,10.

31 యేసు మరి ఉండ్రీ సజతి కత వజ వరిజ్ వెహ్లాన్. “దేవుణు ఏలుబడిః ఇహిజ, సర్పు మొక్కెజ్ విత్కుదిజ్ పొలిత మనాద్. ఒరెన్, అక్క వన్ని మడిఃజ విత్లాన్.

32 అయాక విజు విత్కు లోణ ఇజరికాదె, గాని పిరితిజ కున మొక్కెజు విజు వనకాజ్లోణ పెరిక ఆజి మరాన్ లెకెండ్ ఆనాద్. ఆగసమ్దు ఎగ్రిజని పొటిజ్ వాజి దన్ని కొమెజు గూడు తోప్పి బస్సె.

33 యేసు మరి ఉండ్రీ సజతి కత వజ వరిజ్ వెహ్లాన్. “దేవుణు ఏలుబడిః ఉండ్రీ బోదెలి నండో నెగ్గి దూరుదు కలప్తిమన్ని పులాజ్ మన్ని కండెక్ దూరుదిజ్ పొలిత మనాద్. అయాక కలప్తి మన్ని దూరుదిజ్ విజు పులాజ్ కినిదాక పణి కినాద్.”

34 యేసు కత వజనె విజు మాటెజ్ లోకురిజ్ వెహ్లాన్. కత వజ ఆవిండ ఇనికబా వరిజ్ వెహ్లాన్.

35 “నాను కత వజనె వెయ్దాన్ వెహ్లాన్. లోకం పుట్టి బాణిజ్ అసి డాఃజితిమన్ని సజతిజ్ నాను తెలివి కిన”\*, ఇజి ప్రవక్త వెట దేవుణు ముజాల వర్గితి మాటెజ్ పూర్తి ఆతాద్.

36 నన్దివలె వాండ్రు లోకురిజ్ డిఃసి ఇండ్రో సాహాన్. వన్ని సిసూర్ వన్ని డగ్రు వాజి, “మడిఃజ మన్నినెగ్గి కూలిజ్లెకెండ్ మన్ని కారు మొక్కెజు వందిజ్ వెహ్లాన్ కతదిజ్ అర్దం మజి వెహ్లాన్”, ఇజి వెహ్లాన్.

37 అందెజె వాండ్రు ఈహు వెహ్లాన్. “నెగ్గి విత్కు విత్తికాన్ లోకు మరిసి ఆతి నాను.

38 మడిఃజ యా లోకం. నెగ్గి విత్కు దేవుణు ముస్కు నమకం ఇడ్డి మన్ని దేవుణు కొడోః నెగ్గి కూలిజ్లెకెండ్ మన్ని కారు మొక్కెజ్, సయ్లాను కొడోః.

39 వనకాజ్ విత్తికాన్ పగాతికాన్ అతి సయ్లాను. కోత్త కొయ్నిక యా లోకమ్దిజ్ ఆక్కర్దినం. కొయ్నికార్ దేవుణు దూతార్.

40 నెగ్గి కూలిజ్ లెకెండ్ మన్ని కారుదిజ్ లాగ్గి కొట్టుకిజి సుర్ని లెకెండ్నె యా లోకమ్ది ఆకర్దినమ్బా వానాద్.

41-42 నెగ్గి కూలిజ్ లెకెండ్ మన్ని కారుదిజ్ లాగ్గి కొట్టు కిజి సనుద్ సుర్ని లెకెండ్, పాపం కిజిని వరిజ్, మరి పాపం కిబిస్సి విజు దన్నిజ్ నా ఏలుబడిఃదాన్ వెల్లి పోక్తెజ్ ఇజి, లోకుమరిసి ఆతి నాను నా దూతారిజ్ పోక్నాలె. వారు వరిజ్ సిసుద్ విసిర్నాలె. అబ్బె వారు అడఃబాజి, పల్కు కొప్పి మంజినార్.

43 నీతి నిజాయి మనికార్ వరి బుబ్బాతి దేవుణు కిని ఏలుబడిఃదు పొద్దు లెకెండ్ జాయ్ సీజి మంజినార్. మీరు గిబ్బిజ్ ఒడఃజి వెంజి అయావజ నడిఃజి మండ్రు.

#### దేవుణు ఏలుబడిః

44 “దేవుణు ఏలుబడిః కినిక, మడిఃజదు డాప్తిమన్ని ఏలువాతి ఆస్తిదిజ్ పొలిత మనాద్. ఒరెన్ ఆ ఏలువాతి ఆస్తిదిజ్ సుడఃతిజ్, ఎయెర్బా నెన్వండ మరి డాప్పి, గొప్ప సర్దదాన్ సొన్ని వన్నిజ్ మనికెజ్ విజు పొర్ని అయ మడిఃజ కొటాన్.

45 మరి నాను మిజి వెహ్లాన్, దేవుణు ఏలుబడిః కినిక ఇహిజ, ఒరెన్ ముజెలు సవుకారి రెబాజిని గొప్ప విలువ మన్ని ముజెలు లెకెండ్నె.

46 వాండ్రు రెబాజినిలెకెండ్ మన్ని, ఉండ్రీ ఏలువాతి ముజెలుదిజ్ సుడఃతాండ్రె, సొన్ని వన్నిజ్ కల్గితి మనికెజ్ విజు పొర్ని అయ ముజెలు కొటాన్.

47 మరి నాణు మిజి వెహ్లాన్, దేవుణు ఏలుబడిః కినిక ఇహిజ, సమ్దరమ్దు పొక్కిని రకరకమ్ది మొయెజ్ అస్సి వలాదిజ్ పొలిత మనాద్.

48 అయ వల నిండ్రీతిజ్ మొయెజ్ అస్సికార్, వల పడకాదు లాగ్గి బసి, నెగ్గి మొయెజు గంపాదు ఇడ్వార్. సెణ మొయెజు విసిర్నార్.

49 యా లెకెండ్నె యా తరమ్ది ఆక్కర్ దినంబా వానాద్. దేవుణు దూతార్ వాజి నీతి నిజాయి మన్ని వరిబాణిజ్, సెణవరిజ్ ఎర్లిస్వార్.

50 వారు వరిజ్ గొప్ప పెరి సిసు బాడ్డిదు అర్పవార్. అబె అడఃబాజి, పల్కు కొహ్కీ మంజినార్.”

51 “యా విజు సజతిజు వందిజ్ మిజి అర్దం ఆతాదా?”, ఇజి యేసు వరిజ్ వెన్బాతాన్. “ఒబ”, ఇజి వారు మర్జి వెహ్లాన్.

52 “దేవుణు ఏలుబడిః కిని వందిజ్ నెస్తి మన్ని యూదురి రూలుజ్ నెస్సిస్సికార్ విజెరె, వన్ని ఆస్తి ఇడ్డి మన్ని గదిదాన్ పడాయికెజ్, కొత్తకెజ్ ఉండ్రె లెకెండ్ వెల్లి తని ఇండ్రోణి ఎజుమానిజ్ లెకెండ్ మనాన్”, ఇజి వాండ్రు వరిజ్ వెహ్లాన్.

53 యేసు యా కతెజ్ వెహ్లాన్ వీజితి వెనుక, అబెణిజ్ సాహాన్.

54 వన్ని సొంత పట్టమ్దు వాతాండ్రె, వాండ్రు యూదురు మీటిజ్ కిని ఇల్కాజ్ లోకురిజ్ నెస్సిసి మహాన్. “విన్నిజ్ యా గెణం, యా బమ్మాతి పణిజ్ కిని సత్తు ఎంబెణిజ్ వాతాద్”, ఇజి వారు బమ్మ ఆజి వర్గితార్.

\* 13:35 13:35 కీర్తన 78:2.



55 “వీండ్లు కంసెల్ వాండ్లు మరిసి ఆఎండ్రా? విన్ని అయ్సి పేరు మరియ గదె? యాకోబు, యోసేపు, సీమోను, యూద ఇనికార్ విన్ని తంబెరిసిర్ గదె?

56 విన్ని తజిసిక్ మా వెట మనెగదె? యాకెజ్ విజు వినిజ్ ఎంబెణిజ్ వాతె?

57 వారు వన్ని ముస్సు కోపం ఆజి మహార్. గాని యేసు వరిజ్ “ఒరెన్ ప్రవక్త, వన్ని సొంత ఇండ్రొనె గవ్ రవం సిల్లికాన్ ఆజినాన్”, ఇజి వెహ్లాన్.

58 వన్ని ముస్సు వరిజ్ నమకం సిల్లితిజ్ వాండ్లు అబ్బె లావ్ బమ్మాతి పణిజ్ కివితాన్.

## 14

### యోహాను బుర కత్తినార్

1-2 నస్తవలె హేరోదురాజు యేసు వందిజ్ మాటెజ్ విహండ్రె, “వీండ్లు సాతి వరిబాణిజ్ మర్జి నిజితి బాప్తినం సీని యోహాను. అందెజె యా బమ్మాతి పణికిని సత్తు వన్ని లోఇ మనాద్”, ఇజి వన్ని పణి మన్నిరిజ్ వెహ్లాన్.

3 వన్ని తంబెరిసి ఆతి పిలిపు ఆల్పి హేరోదియ వందిజ్ హేరోదురాజు ఆడ్ర సిత్తిలెకెండె యోహానుజ్ అసి గొలుసుదాన్ తొప్పి జెలిదు ఇడ్ర మహార్.

4 ఎందనిజ్ ఇపాజ, “దనిజ్ నీ వందిజ్ అల్పి లెకెండె ఇడె ఆతిక దేవుణు మోసెజ్ సిత్తి రూలుదిజ్ పడివద్”, ఇజి యోహాను వన్నిజ్ వెహ్లా మహాన్.

5 యోహానుజ్ సప్తెజ్ ఇజి హేరోదు రాజు ఒడిఃబితాన్, గాని లోకుర్ విజేరె వీండ్లు ఒరెన్ దేవుణు ప్రవక్త ఇజి వెప్పి మహిజ్ విన్నిజ్ సప్తెజ్ తియెలాత మహాన్.

6 హేరోదు రాజు పుట్టి రోజు వాతిజ్, హేరోదియ గాల్పి వాజి వరి వందిజ్ డాట్టి కర్జతాద్. హేరోదు రాజుజ్ గొప్ప సర్ద ఆతాన్.

7 అందెజె అది ఇనిక లొస్తిజ్ బా సీన ఇజి వాండ్లు దనివెట ఉండ్రె ఒట్టు పొక్కి దన్నిజ్ ఉండ్రె మాట సిత్తాన్.

8 అయ్సి దనిజ్ సుత్తిస్తి లెకెండెనె అది సొహదె, “బాప్తినం సీని యోహాను బుర కత్తి ఉండ్రె పలెందు సిద్”, ఇజి లొస్తాద్.

9 రాజు గొప్ప బాద ఆతాన్. గాని వాండ్లు కితి ప్రమాణం వందిజ్, వన్ని వెట విందుదిజ్ బస్తిమిహి కూలెజ్ వందిజ్ అది లొస్తిక సిదెజ్ ఇజి ఆడ్ర సితాన్.

10 జెలిదు మహి యోహాను బుర కత్పిస్తన్.

11 వన్ని బుర ఉండ్రె పలెమ్దు ఇడ్డి తపిసి దనిజ్ సిబిస్తాన్. అది అయాక దని అయ్సి డగ్రు ఒత సితాద్.

12 యోహాను సిసూర్ వాజి వన్ని పినుగు పెర్లి ఒసి నమాది కితార్. నస్తవలె వారు యేసు డగ్రు వాతారె వెహ్లాన్.

### అయ్దు వేలుజ్ లోకాజ్ బోజనం సీనిక

13 జర్గితి నజతిజ్ విజు విహండ్రె యేసు ఉండ్రె డోణి ఎక్కి ఎయెర్ బా మన్ ఇ ఉండ్రె బాడ్డిదు ఒరెండ్రె సొహాన్. వాండ్లు సొహి సజతి వెంజి అయ పట్టుమ్దికార్ నండ్రెండ్రె నడిఃసి వన్ని వెనుక సొహార్.

14 వాండ్లు అతాహ పడక జోరె అందితిజ్, డోణిదాన్ డిగితాన్ అయా మంద లోకురిజ్ సుడఃతాండ్రె వరి ముస్సు కనికారం ఆతాన్. వరి జబ్బుదివరిజ్ నెగెండ్రె కిత్తాన్.

15 పొద్దు ఆతివెలె వన్ని సిసూర్ వన్ని డగ్రు వాజి, “అక్క ఎయెర్ మన్ ఇ బాడ్డి, ఏలునె పొద్దు ఆతాద్. యా లోకుర్ నాహ్కాజ్ సొన్సి వారె వరిజ్ బోజనమ్కు కొండెజ్ వరిజ్ పోక్ అ”, ఇజి వెహ్లాన్.

16 “వారు సొండ్రెజ్ అక్కర్ సిల్లెద్. మీరె వరిజ్ తిండ్రెజ్ ఇనికబా సీదు”, ఇజి యేసు వరిజ్ వెహ్లాన్.

17 “ఇదిలో, మా వెట అయ్దు రొటెజ్ ని రుండి మొయెజ్ నె మనె”, ఇజి వారు వెహ్లాన్.

18 “అయకెజ్ నా డగ్రు తగాట్”, ఇజి యేసు వెహ్లాన్.

19 వెనుక లోకాజ్ పసి గడ్డి ముస్సు బస్తు ఇజి వెహ్లాండ్రె అయ్దు రొటెజ్ ని రుండి మొయెజ్ కిదు అస్తాండ్రె ఆగాసం దరిజ్ సుడఃజి దేవుణుదిజ్ వందనమ్కు వెప్పి రొటెజ్ రుక్కి సిసూరిజ్ సితాన్. సిసూర్ అక లోకాజ్ సీబాత సితాన్.

20 వారు విజేరె పొట పంజు తిహార్. వెనుక మిగిలిత్తి ముక్యెజ్ పన్నెండు గంపెజ్ సిసూర్ వెహ్లాన్.

21 బోదెక్ని కొడోర్ అవండ తిహికార్ అయ్దువేలు మన్ని మొగకొడోర్ మహార్.

### యేసు ఏరు ముస్సు నడిసినాన్.

22 లోకురిజ్ పొక్తి వెటనె యేసు వన్ని సిసూర్ జ వెటనె ఉండ్రె డోణి ఎక్కి, వన్నిజ్ ఇంక ముజాల అతాహ పడక సొండ్రు ఇజి వరిజ్ పొక్తాన్.

- 23 వరిజ్ పోక్తి వెనుక, వాండ్రు ఒరేండ్రె పార్లనం కిదెజ్ ఉండ్రె గొరొత్ ఎక్టాన్. పొదు ఆతివెలె వాండ్రు ఒరేండ్రె అబ్బె మహాన్.
- 24 గాని డోణి ఒడ్డుదాన్ నండో దూరం సొహాద్ గొప్పు గాలి కిజి మహిజ్ ఉల్కెజాణిజ్ డోణి ఇతల్ అతాల్ దూజ్జి మహాద్.
- 25 కోడిజామ్దు యేసు సందారమ్దు ఏరు ముస్సు నడిజి వరి డగ్రు సొహాన్.
- 26 వాండ్రు సమ్దరమ్దు ఏరు ముస్సు నడిసినిక సిసూర్ సుడెతారె తియెల్ అతార్. “అబయా యాక ఉండ్రె దూబ”, ఇజి వారు తియెల్ ఆజి డెల్స్తార్.
- 27 వెటనె యేసు, “దయ్ రమ్దాన్ మండ్రు, ఇక నానె, తియెల్ ఆమాట్”, ఇజి వెహ్లాన్.
- 28 పేతురు, “ప్రబువా, నీనె ఇహిజ, నాను ఏరు ముస్సు నడిజి నీ డగ్రు వాదెజ్ సెలవ సిద్అ”, ఇజి వెహ్లాన్.
- 29 “రఅ”, ఇజి యేసు వెహ్లాన్. నస్తివలె పేతురు డోణి డిగ్జి యేసు దరోట్ ఏరు ముస్సు నడిత వాతాన్.
- 30 గాని గాలిదిజ్ నిజిత్తి ఉల్కెజి సుడెజి తియెలాజి వాండ్రు ముడుగ్జి మహాన్. “ప్రబువా నజి రసిన్అ”, ఇజి డెల్స్తార్.
- 31 వెటనె యేసు వన్ని కియు సాప్పి వన్నిజ్ అస్తాన్. “ఇజిరి నమకం మనికి, ఎందనిజ్ నీను అనుమానం ఆతి?”, ఇజి వెహ్లాన్.
- 32 వారు డోణి ఎక్తిజ్ గాలి అలెతాద్.
- 33 నస్తివలె డోణిదు మనికార్ వాజి, “నిజమె, నీను దేవుణు మరిసినె”, ఇజి వెహ్లాన్ వన్నిజ్ పొగ్డిజి మాడిస్తార్.
- 34 వారు అతాహ పడక సొన్ని గెనెసెరెతు నాటో అందితార్.
- 35 అబ్బెణి లోకుర్ వన్నిజ్ గుర్తు అస్తారె డగ్రు మని నాహ్కాజ్ కబ్రు పొక్తార్. లోకుర్ వరి కస్టమ్దు మన్ని వరిజ్ విజేరిజ్ వన్ని డగ్రు తత్తార్.
- 36 జబ్బు మన్నికార్ వన్ని సొక్క సెంగుబా ముట్టెజ్ బతిమాలజి సెలవ లొస్తార్. ముట్టికార్ విజేరె నెగెండ్రె అతార్.

## 15

### నెగ్గిక్కెజ్ సెఇక్కెజ్

- 1-2 సెగెండ్రార్ పరిసయ్రుని యూదురిజ్ రూలుజ్ నెస్పిస్సికార్ యెరూసలేమ్దాన్ వాతారె యేసుజ్, “ఎందనిజ్ నీ సిసూర్ బోజెనమ్దిజ్ ముందాల కికు నొరబావర్, పెద్దెల్జ అలవాటుజ నెక్కి పొక్కినార్?”, ఇజి వెన్బాతార్.
- 3 యేసు వరిజ్ ఈహు మర్జి వెహ్లాన్, “మీరు ఎందనిజ్ మీ అలవాటుజ వందిజ్ దేవుణు ఆడెజి నెక్కి పొక్కినిదెర్?”
- 4 మీ యాయ బుబ్బరిజ్ గవరం సీదు, మరి ఎయెర్బా అయసి అప్పొసిరిజ్\* దూసిసి వెహ్లాజి వన్నిజ్ తప్తెజ్వలె\* ఇజి దేవుణు రూలుదు వెహ్లా మనాద్.
- 5-6 గాని మీరు నెస్పిసిని దన్ని లొఇ తేడ మనాద్ మీరు నెస్పిసినిక ఇనిక ఇహిజ ఎయెన్బా, “నాను మిజి ఇనికబా ఉండ్రె సాయం లెకెండ్రె కిన ఇజి ఇట్టి మనిక, దేవుణుదిజ్ సంత సిత్త మన్ను’ ఇజి అయసి అప్పొసిరిజ్ వెహ్లాజి, వాండ్రు మరి గవరమ్దాన్ నెగెండ్రె సుడెదెజ్ అక్కర్ సిల్లెద్. ఇజి అయాలెకెండ్రె మీ అలవాటు వందిజ్ మీరు దేవుణు మాటదిజ్ సిలి లెకెండ్రె కిజినిదెర్.
- 7-9 వేసం కినికిదెరా, “యా లోకుర్ వరి బెద్వెజాణిజ్ నజి పొగ్గిజినార్ గాని వరి మన్ను నా బాణిజ్ దూరం మనాద్. వారు పణిదిజ్ రెవండ్రె నజి పొగ్డిజినార్. వారు నెస్పిస్సికెజ్ విజు లోకురి రూలుజ్నె, ✱ ఇజి యెసయ ప్రవక్త వెట దేవుణు ముజాల మీ వందిజ్ వర్గితిక నిజమె”, ఇజి వెహ్లాన్.
- 10 యేసు అయ మంద లోకురిజ్ డగ్రు కూక్తాండ్రె ఈహు వెహ్లాన్, “మీరు జాగర్త వెంజి నెగెండ్రె అర్లం కిదు.
- 11 వెయుదాన్ లొఇ సొనిక ఇనికబా ఎయెరిజ్బా ఇనిక ఆవద్. గాని లొఇహాన్ వెయుదాన్ వెల్లివాని మాటెజ్నె ఒరెన్ వన్నిజ్ సెఇక కినె.”
- 12 నస్తివలె వన్ని సిసూర్ వాతారె, “యా మాటెజ్వెంజి పరిసయ్రు నండో కోపం ఆతిక నీను నెస్పిదా?”, ఇజి వెహ్లాన్.
- 13 వాండ్రు సిసూరిజ్, “పరలోకామ్దు మన్ని నా బుబ్బాత్తి దేవుణు ఉణున్ఇ విజు మొకెజ్ వేలెజాణిజ్ తెరె ఆనె వారబా అయ మొకెజ్ లెకెండ్రెనె.
- 14 వరిజ్ డిసి సీదు. వారు గుడ్డిదివరిజ్ సరి తోరిస్సి గుడ్డిదికార్. ఒరెన్ గుడ్డిదికాన్ మరి ఒరెన్ గుడ్డి వన్నిజ్ సరి తోరిస్తిజి వారు రిఎర్బా గాంతదు అర్నార్”, ఇజి వెహ్లాన్.
- 15 అందెజె పేతురు, “యా కత వందిజ్ మజి అర్లం ఆనిలెకెండ్రె వెహ్లాన్”, ఇజి వెహ్లాన్.
- 16 యేసు వరిజ్, “ఏలుబా మీరు మహివరిలెకెండ్రె మనిదెరా? ఏలుబా నిన్ని మాటెజ్ అర్లం కిదెజ్ మిజి బుద్ధి సిల్లెదా?”

✱ 15:4 15:4 నిర్లమ 21:17; తేవి 20:9. \* 15:4 15:4 నిర్లమ 20:12 ద్వితి 5:16. ✱ 15:7-9 15:7-9 యెసయ 29:13.

17 వెయూదాన్లో ఇ సానిక, పొటాదు సొన్ని మరి అయాక మీరు బయలు బన్నివలె బూమిదు సొన్నినాద్, ఇక మీరు నెన్ ఇదెరా?

18 గాని వెయూదాన్ వెల్లి వాని మాటెజ్ మన్నుదాన్ వాజినె. ఆకెజె లోకుదిజ్ సెఇక కిజినె.

19 సెఇ ఆలోసనమ్కు, సప్పికెజ్, రంకు బూలానిక, కేలార్బూలానిక, డోజ కినిక, అబద్ధం వెప్పికెజ్, దేవుణుదిజ్ దూసిప్పికెజ్ యాకెజ్ విజు మన్నుదానె వాజినె.

20 యాకెజె ఒరెన్ వన్నిజ్ సెఇక కిజినె. కికు నొరబావిండ ఉటిజ అక ఒరెన్ వన్నిజ్ సెఇక కిపి.”

### కనానియది బోదెలిజ్ మన్ని నమకం

21 యేసు అబ్బెణిజ్ నండో దూరం సొన్ని ఉండ్రీ గొరొన్ ఎక్కి డిగితాండ్రె తూరు, సీదోను ఇని పట్టుమ్కాజ్ సెందితి ప్రాంతమ్కాజ్ సొహాన్.

22 వాండ్రు అబ్బె అందితిజ్ అబ్బెణిజ్, కానాన దేసెమ్ది ఉండ్రీ బోదెలి వాతాదె, “ప్రబువా, దావీదు మరిసి నజీ కనికారం తోరిన్అ. నా గాల్పిజ్ దెయం అస్తిజ్ గొప్ప బాద ఆజినాద్”, ఇజి డేల్ని వెహ్తాద్.

23 యేసు దనిజ్ ఉండ్రీ మాటబా వెహ్తాన్. అందెజె వన్ని సిసూర్ వాజి, “ఇది మా వెట గగోల్ ఆజి వాజినాద్, దనిజ్ పోక్అ”, ఇజి బతిమాల్తార్.

24 వాండ్రు వరిజ్, “మురుతి మెండగొరెజ్ లెకెండ దేవుణుబానిజ్ దూరం ఆతి ఇస్రాయేలు లోకుర్ డగ్రు నాను పోకె ఆత మన్ను”, ఇజి వెహ్తాన్.

25 అది వన్ని ముజాల వాజి ముణుకుజ్ ఉఱిజి, “ప్రబువా, నజీ సాయం కిఅ”, ఇజి వెహ్తాద్.

26 వాండ్రు దనిజ్, “కొడోర్ తిండ్రెజ్ మని రొటెజ్ లాగ్గి నుకుడిజ్ సీనిక నాయం ఆవద్”, ఇజి వెహ్తాన్.

27 అది, “నిజమె ప్రబువా, గాని ఎజమాని తింజిమహిజ్ బల్లదాన్ అర్ని ముక్కెజ్ నుకుడుజ్ తింజినె గదె?”, ఇజి వెహ్తాద్.

28 నస్తవలె యేసు, “బయి, నా ముస్కు మని నీ నమకం గొప్ప పెరిక. నీను కొరితి లెకెండనె నిజీ ఆపిద్”, ఇజి దనిజ్ వెహ్తాన్. అయ గడియాదునె దని గాల్పి నెగెండ ఆతాద్.

### నాల్లి వెయిజ్ లోకాజ్ బోజనం సీనిక

29 యేసు అబెణిజ్ సొన్ని గలీలయ సమ్దారం పడకాదాన్ వాజి అబె ఉండ్రీ గొరొత్ ఎక్కాండ్రె బస్తాన్.

30 సొటావరిజ్, గుడ్డివరిజ్, గుల్లవరిజ్, కికు కాల్కు అర్తివరిజ్ మరి ఆజ జబ్బుదివరిజ్ నండోడారిజ్ అసి మంద లోకుర్ వన్ని డగ్రు వాతారె వరిజ్ వన్ని కాల్కు అడ్డి ఇట్టార్. వాండ్రు వరిజ్ నెగెండ కిత్తాన్.

31 గుల్లవరిజ్ వరిగిదెజ్ వాతాద్. కికు కాల్కు అర్తికార్ నెగెమ్డ ఆతార్. సొటాదికార్ నడితార్, గుడ్డిదికార్ నుడెదెజ్ అట్టార్. యాకెజ్ నుడెజి లోకుర్ విజెరె బమ్మ ఆతారె ఇస్రాయేలురి దేవుణుదిజ్ పొగిడితార్.

32 యేసు వన్ని సిసూర్జి కూక్కాండ్రె వరిజ్, “యా లోకుర్ నావెట మంజి మూండ్రీ దినమ్కు ఆతె. విరిజ్ తిండ్రెజ్బా ఇనికబా సిల్లెద్. నజీ వరి ముస్కు కనికారం ఆజిన. వరిజ్ బజదావ్ పొక్కెజ్ మజి మన్ను రెవి. వారు కణ్కు త్రివిజి సర్దు అర్నారసు”, ఇజి వెహ్తాన్.

33 సిసూర్ వన్నిజ్, “నిసా మంద లోకురిజ్ తీప్పిజ్ బిడిఃమ్బూమి ప్రామతమ్దు ఇనిక దొమ్మొనె?”, ఇజి వెహ్తార్.

34 యేసు వరిజ్, “మీ బాన్ఎసొడు రొటెజ్ మన్నె?”, ఇజి వెన్బాతాన్. వారు, “ఏడు రొటెజ్ని సెగం ఇజిరి మొయెజ్ మనె”, ఇజి వన్నిజ్ వెహ్తార్.

35 లోకురిజ్ బూమిదు బస్తు ఇజి యేసు వెహ్తాన్.

36 వెనుక అయ ఏడు రొటెజ్ని మొయెజ్ కీదు అస్తాండ్రె దేవుణుదిజ్ వందనమ్కు వెప్పి అయాకెజ్ రుక్కి వన్ని సిసూర్జి సితాన్. వారు లోకాజ్ సీబాజి సితార్.

37 లోకుర్ విజెరె పొట పంజు తిహి వెనుక మిగిలితి ముక్కెజ్ ఏడు గంపెజ్ నిండ్రు వన్ని సిసూర్ పెహ్తార్.

38 బోదెక్ని కొడోర్ ఆవిండ తిహి మొగకొడోర్ నాల్లివెయిజ్ మహార్.

39 అయ మంద లోకురిజ్ పొక్కి వెనుక యేసు డోణి ఎక్కాండ్రె మగదాన్ ఇని నాటో సొహాన్.

## 16

1 నస్తవలె పరిసయరుని సదుకయరు యేసుజ్ డగ్రు పరిక్కి కిదెజ్, వన్ని మాటెజాణిజ్ వన్నిజ్ ఆస్తెజ్ ఇజి డగ్రు వాతార్. దేవుణునె వన్నిజ్ పొక్కాన్ ఇనిదన్నిజ్ రుజుప్ లెకెండ ఆగాసమ్దాన్ ఉండ్రీ బమ్మాతి పణి కిజి మజి తోరిన్అ, ఇజి వెహ్తార్.

2 వాండ్రు వరిజ్, “పొద్దు ఆనివెలె ఆగసం ఎర్రజ్ మహిజి నేండ్రు నెగెణ్ మంజినాద్ ఇజి మీరు వెప్పినిదెర్.

3 మరి, పెందల ఆగసం ఎర్రజ్ ఆజి మొసాఫ్ మహిజ, నేంఱు గాలి పిరు వానాద్, ఇజి మీరు వెప్పినిదెర్. ఆగసం నుడేజి అయ రోజు ఎలాగ మంజినాద్ ఇజి వెహైజ్ మీరు నెస్సిదెర్, గాని జర్గినికెజ్ నుడేజి కాలమ్దిజ్ గుర్తు అస్తైజ్ అట్ ఇదెర్.

4 యా తరమ్దికార్, సెఇకార్ ఆతికారె దేవుణు వందిజ్ వరిజ్ మన్ను సిల్లెద్ గుర్తు లెకెండ్ ఉంఱ్రి బమ్మాతి పణి వందిజ్ వెన్ బజినార్, గాని దేవుణు ప్రవక్త ఆతి ఓనెజ్ జర్గితిక తప్ప మరి ఇనికబా ఉంఱ్రి గుర్తు మరి తోరెద్”, ఇజి వెహైజ్.

5 వెనుక యేసు వరిజ్ డిఃసి అబ్బెణిజ్ సాహాన్.

6 వారు డోణి ఎక్తారె సమ్దరం అతాహ పడక సొన్ని మహివలె, వన్ని సిసూర్ రొట్టెజ్ ఒత్తెజ్ పోస్త మహార్. నస్తవలె యేసు, “పరిసయ్ రుది మరి సదుకయ్ రుది పులాజ్ కిని దూరువందిజ్ మీరు గొప్ప జాగర్త మంఱు”, ఇజి వెహైజ్.

7 “మాప్ రొట్టెజ్ తెఇతి వందిజె యా మాట వెహైజ్”, ఇజి ఒరెన్ వెట ఒరెన్ వర్గిజి మహార్.

8 యేసు అక నెస్తాంఱె, ఎందానిజ్ మీరు నమకం తక్కు మనికిదెర్ ఆజినిదెర్! మీ బాన్ రొట్టెజ్ సిల్లితిజ్ మీరు ఎందనిజ్ ఒరెన్ మరి ఒరెన్ వెట వర్గిజినిదెర్?

9 ఏలుబా మీరు అర్దం కిజి నెస్తైజ్ అట్ ఇదెరా? అయ్దు రొట్టెజ్ మహివలె అయ్దు వెయిజ్ లోకాజ్ తిప్పిస్తైజ్ మిగిలితికెజ్ ఎసోడు గంపెజ్ పెహైదెరో?

10 మరి ఏడు రొట్టెజ్ మహివలె నాల్లి వెయిజ్ లోకాజ్ తిప్పిస్తైజ్ మిగిలితికెజ్ ఎసోడు గంపెజ్ పెహైదెరో? వినుకాజ్ బా మీరు ఎతు కిఇదెరా?

11 నాను వర్గితిక రొట్టెజ్ వందిజ్ ఆవద్ ఇజి ఎందనిజ్ మీరు అర్దం కిజి నెన్ ఇదెర్? గాని పరిసయ్ రుని సదుకయ్ రుది పులాని దూరు వందిజ్ మీరు జాగర్త మంఱు ఇజి నాను వెహైజ్”, ఇజి వెహైజ్.

12 నస్తవలె వాంఱు జాగర్త మంఱు ఇజి వెహైజ్ రొటె తయార్ కిని పులాని దురు వందిజ్ ఆవద్ గాని పరిసయ్ రుని సదుకయ్ రుది పులాని దూరు నని బోద వందిజ్ జాగర్త ఆజి మంఱు ఇజి వెహైజ్, ఇజి వారు అర్దం కిజి నెస్తాన్.

13 యేసు పిలిపుది ఆతి కయసెరియ పట్టుమ్దిజ్ డగ్గు మన్ని నాహ్కాజ్ వాతిజ్ “లోకు మరిసి ఆతి నా వందిజ్, నాను ఎయెన్ ఇజి లోకుర్ వెహె ఆజినార్?”, ఇజి వన్ని సిసూర్ జ వెన్ బాతాన్.

14 “సెగొండార్ బాప్తినం సీని యోహాను ఇజినార్, సెగొండార్ ఏలియ ఇజినార్, మరి సెగొండార్ యిరిమ్య ఇజినార్, సిల్లె ప్రవక్తజి లోఇ ఒరెన్ ఇజి సెగొండార్ వెహె ఆజినార్”, ఇజి వారు వెహైజ్.

15 అందెజె యేసు, “గాని నాను ఎయెన్ ఇజి మీరు వెప్పినిదెర్?”, ఇజి వెన్ బాతాన్.

16 పేతురు ఆతి సీమోను, “నీను బత్కిజిని దేవుణు మరిసి ఆతి క్రిస్తు\*”, ఇజి వెహైజ్.

17 యేసు, వన్నిజ్, “యోన మరిసి ఆతి సీమోను, నీను దేవుణు సీజిని దీవనమ్ కు మంజినికాన్. యాక నిజి తెలియకిత్తిక లోకుర్ ఎయెర్ బా ఆవద్ గాని పరలోకమ్దు మని నా బుబ్బాతి దేవుణునె.

18 గాని నాను నిజి వెహైజ్ ఇనిక ఇహిజ నీను పేతురు, నీ పేరుదిజ్ తర్దం సట్టు ఇజి నాను యా సుటు మున్ను నా సజమ్దిజ్ తొహ్న. అయా లోకమ్ది సత్తుజ్ దనిజ్ గెలిస్తైజ్ అట్ వద్.

19 దేవుణు ఏలుబడిః కిజిని పరలోకమ్దిజ్ సెందితి ఆతికారం నాను నిజి సీన†, యా లోకమ్దు నీను ఇనిక తొప్పిదొ, అయాక పరలోకమ్దుబా తొహె అనాద్. యా లోకమ్దు నీను ఇనిక కుత్తిదొ, అయాక పరలోకమ్దుబా కుతె అనాద్”, ఇజి వెహైజ్.

20 వెనుక యేసు, వాంఱు క్రిస్తు ఆతికాన్ ఇజి ఎయెరిజ్ బా మీరు వెహైజ్ ఆవద్ ఇజి వన్ని సిసూరిజ్ కసితం వెహైజ్.

21 అయ వెలెహాన్ అసి యేసు, నాను యెరూసలేమ్దు సొంఱైజ్ వెలె, మరి అబె పెదెలుజ, పెరి పుజెరిజుని యూదురి రూలుజ్ నెస్సిన్సి పరి కిదాన్ నంఱొ ఇమ్ సెజ్ ఓరిస్నాలె, లోకుర్ నజి సప్పార్లె సాతి మూంఱ్రి రోజుదు దేవుణు నజి మరి మర్జి నిక్కినాలె ఇజి నంఱొ సజతిజ్ వన్ని సిసూరు వెట వెప్పి మహాన్.

22 పేతురు యేసుజ్ ఉంఱ్రి వడెకాదు కూక్ అతంఱె, “ప్రబువా, నిజి యా లెకెండ్ జర్గిదెజ్ ఆవద్”, ఇజి గటిజ వెహైజ్ మొదొల్స్తాన్.

23 అహిజ, వాంఱు పేతురు దరిజ్ మర్జి బేసి, “ఓ సయ్ తానా! నీను నజి ఉంఱ్రి అడ్డు లెకెండ్ మని. నీ మన్నుదు మని సజతిజ్ దేవుణుబాణిజ్ వాతిక ఆవద్, లోకుర్ ఒడెబినికెజె”, ఇజి వెహైజ్.

24 నస్తవలె యేసు వన్ని సిసూరిజ్ నుడేజి, “ఎయెన్ బా నా వెనుక వాదెజ్ ఇహిజ, వాంఱు వన్ని సొంత ఆసెజ్ విజు డిఃసి సీజి వన్నిజ్ వాజిని కస్టంకు విజు ఓరిస్నైజ్ తయారాజి పిండేజి నా వెట సాదెజ్ బా తయారాజి నా వెనుక వాదెజ్ లె.

\* 16:16 16:16 క్రిస్తు ఇని మాటదిజ్ అర్దం దేవుణు ఏర్పాటు కిత్తి పోక్తికాన్ † 16:19 16:19 పరలోకమ్ది తాలం కిక్కు ఇజి తెలుగుదు రాస్త మనాద్.

25 ఎయెన్బా వన్ని పాణమ్దిజ్ వాండ్రె కాపాడఃదెజ్ ఇజి నుడఃతిజి వన్నిజ్ ఎలాకాలం మంజిని బత్కు మన్వద్. నా వందిజ్ ఎయెరిజ్బా వన్ని పాణం నస్తం ఆతిజి, వాండ్రు ఎలాకాలం మంజిని బత్కుదు సొనాన్లె.

26 ఎయెన్బా వాండ్రు కొరిజినిక్కెజ్ దోహ్కీ యా లోకమ్ది ఆస్తిని సర్ల విజు దోహ్కీ వెనుక దేవుణువెట ఎలాకాలం మంజిని బత్కుదు సొన్వండ మహిజ ఇని లబం మనాద్? దేవుణువెట ఎలాకాలం మంజిని బత్కుదిజ్ బదులు మరి ఇనిక సీదెజ్ అట్నాన్?

27 లోకు మరిసి ఆతి నాను, నా బుబ్బతి దేవుణు గొప్పు జాయ్దాన్, వన్ని విజు దూతరిజ్ తోడుః అసి రాజు లెకెండ్ వానాలె. వెనుక ఒరెన్ వన్నిజ్ వన్ని పణిదిజ్ తగితి లెకెండ్ పలం సీనాలె.

28 లోకుమరిసి ఆతి నాను రాజు లెకెండ్ ఏలుబడిః కినిక నూణిదాక, ఏలు నిహిమన్ని వరిలోఇ సెగొండార్ సావీర్ ఇజి నాను మిజి నిజం వెహ్సాన్”, ఇజి వెహ్సాన్.

## 17

### యేసు, మోసెని ఏలియ

1 ఆరు రోస్కు వెనుక యేసు, పేతురుని యాకోబు, యాకోబు తంబెరిసి ఆతి యోహానుజ్బా కూక్రాండ్రె వన్నివెట ఒతాన్. వారు నండొ ఎత్తుమని ఉండ్రీ గొరోన్ ముస్కు ఎక్ సాహార్.

2 అబ్బె వరి ముందాల వన్ని రూపు మారితాద్. వన్ని మొకొం పొద్దు లెకెండ్ ఆతాద్. వన్ని సొకెజ్ మెర్నిని జాయ్లెకెండ్ తెలాజ్ ఆతె.

3 ఇదిలో, నస్తవలె అబ్బె మోసెని ఏలియ యేసు వెట వర్గిజి మంజినిక వరిజ్ తోరె ఆతాద్.

4 నస్తవలె పేతురు, “ప్రబువా, మాటు ఇబ్బె మహిజ నెగెద్. నిజి ఇస్తం ఇహిజ, ఇబ్బె నిజి ఉండ్రీ, మోసెజ్ ఉండ్రీ, ఏలియెజ్ ఉండ్రీ, ఆహె మూండ్రీ గుడుఃసెజ్ తోహ్సా”, ఇజి వెహ్సాన్.

5 వాండ్రు వర్గిజి మహివలె నండొ జాయ్మని ఉండ్రీ మొసాప్ వరిజ్ వ్డగ్తాద్. “ఇదిలోన్ వీండ్రు నజి ఇస్తమాతి నా మరిన్. విన్ని ముస్కు నాను సర్ల ఆత మన్న. విన్ని మాటెజ్ నెగెండ్ వెండ్రు”, ఇజి ఉండ్రీ జాటు అయ మొసోపుదాన్ వాతాద్.

6 సీసూర్ యా మాట విహారె నండొ తియెల్ ఆజి పడఃగ్గి అర్తార్.

7 యేసు వరి డగ్రు వాజి వరిజ్ ముట్టి, “నిజ్దు, తియెల్ ఆమాట్”, ఇజి వెహ్సాన్.

8 వారు కణ్బు పెర్జి బేస్తిజ్ యేసుజ్ తప్ప మరి ఎయెరిజ్బా తోవితార్.

9 వారు గొరోన్ డిగ్జి వాజి మహివలె, “లోకు మరిసి ఆతి నాను, సాతి వరిబాణిజ్ మర్జి నిజ్నిదాక, మిజి తోరె ఆతి యా సజతిజ్ వందిజ్ ఎయెరిజ్బా వెహ్సాట్”, ఇజి యేసు వరిజ్ వెహ్సాన్.

10 నస్తవలె వన్ని సీసూర్, “ఏలియ\* ముజాల వాదెజ్ ఇజి ఎందనిజ్ యూదురి రూలుజ్ నెస్సిస్సికార్ వెహ్సాన్?”, ఇజి వన్నిజ్ వెన్బాతార్.

11 అందెజె వాండ్రు, ఏలియానె ముజాల వాజి మండ్రెజ్, యాక నిజమె. వాండ్రు వాజి విజు నెగెణ్ తయార్ కినాన్.

12 అహిజ ఏలియ ముజాల వాత మహాన్, గాని వారు వన్నిజ్ గుర్తు అస్తెజ్అట్ఎండ వరిజ్ ఇస్తమాతి లెకెండ్ వన్నిజ్ పడిఃఎండ కితార్. లోకుమరిసి ఆతి నానుబా అయాలెకెండ్ వరి కిదాన్ స్రమెజ్ ఒరిస్సాలె”, ఇజి వరిజ్ వెహ్సాన్.

13 బాప్తిసం సీని యోహాను వందిజ్ వాండ్రు వరివెట వర్గిజినాన్ ఇజి వారు అర్లం కితార్.

### దెయం అస్తి కొణొదిజ్ నెగెణ్ కిజినాన్

14 వారు మంద లోకుర్డగ్రు వాతివలె ఒరెన్ వన్ని డగ్రు వాజి వన్ని ముందాల ముణ్బు ఊర్జి,

15 “ప్రబువా నా మరిన్ ముస్కు నీ కనికారం తోరిన్అ వాండ్రు మూర్స పెహ్తాజ్ నండొ బాద ఆజినాన్. వాండ్రు ఎసెజ్ ఎసెజ్ సీసుద్ సిలిజి ఏరుదు అర్పి మంజినాన్.

16 నాను నీ సీసూర్ డగ్రు వన్నిజ్ తత్త గాని వారు వన్నిజ్ నెగెండ్ కిదెజ్ అట్ఎతార్”, ఇజి వెహ్సాన్.

17 అందెజె యేసు, “యా తరమ్దికిదెర్ ఆతి మీరు మహికార్ మిజి నెస్సిస్సి తప్ప సరిదాన్ నడిఃసి మన్నదెర్. మీరు నాముస్కు నమకం సిల్లికిదెర్. నాను ఎస్సొ కాలమ్కు దాక నాను మిజి ఒరిసి మండ్రెజ్ వలె వన్నిజ్ నా డగ్రు త్గాట్”, ఇజి వెహ్సాన్.

\* 17:10 17:10 పాడయి ఒపుమానమ్దు మన్ని మలాకి ప్రవక్త పుస్తకమ్దు రస్త్రమన్నిలెకెండ్ ఇహిజ, ఏలియ ముజాల వాదెజ్ ఇజి యూదురు నమ్మిజినార్. మలాకి 3:1, 4:5-6.

18 నస్తవలె యేసు అయ దెయమ్దిజ్ ఉండ్రీ ఆడ్ర సితీజ్ అక్క వన్నిజ్ డిస్తతాద్. అయ గడియారునె ఆ ఇజిరికాన్ నెగెండ్ ఆతాన్.

19 దని వెనుక వన్ని సిసూర్వాండ్రు ఒరేండ్రె మహివలె యేసు డగ్రు వాతారె, “మాపు ఎందనిజ్అయ దెయమ్దిజ్ సొన్పిస్తజ్ అట్వితాప్?”, ఇజి వెన్బాతార్.

20-21 ఉండ్రీ సర్పుగిడ నస్తు నమకం మహిజ యా గొరొన్దిజ్ సుడేజి, “ఇబ్బెణిజ్ అబ్బె సొన్అ’ ఇజి వెప్తిజ అది అబ్బె సొనాద్. మీరు కిడెజ్ అట్ఇక ఇనికబా మన్ఎద్, ఇజి నాను మిజి నిజం వెహ్సిన”, ఇజి వెప్తాన్. మిజి నస్సా నమకం సిల్లెద్, అందెజె మీరు కిడెజ్ అట్ఇదెర్.

22 వారు గలీలయ దేసమ్దు వాతివెలె యేసు, “లోకు మరిసి ఆతి నాను లోకుర్ కియుదు ఒపజెపె ఆనాలె.

23 వారు నజి సప్పార్, మరి మూండ్రీ దినమ్దు నాను మర్జి నిజెఆనాలె”, ఇజి వరిజ్ వెప్తిజ్ వారు నండో దుకం ఆతార్.

24 యేసుని వన్ని సిసూర్ కపెర్నహముదు వాతివెలె, సెగం సెకల్† లెక్క పన్ను పెర్నికార్ పేతురు, డగ్రు వాతారె, “మిజి బోద కినికాన్ దేవుణు గుడిడిది పన్ను సివండ్రా?”, ఇజి వెన్బాతార్.

25 “ఒఒ వాండ్రు సీనాన్”, ఇజి వాండ్రు వెప్తాన్. పేతురు ఇండ్రొ వాతిజ్, వాండ్రు వర్గివిండ ముజాల యేసు వర్గితాన్. “సీమోను, యా లోకమ్ది రాజుర్ ఎయెర్బాణిజ్ సిస్తుని పన్నుజ్ ఒసూలు కిజినార్ వరి సొంత దేసెమ్ది వరిబాణిజ్నా, సిల్లిజ అయదేసెమ్దు మన్ని ఆఇ దేసెమ్దివరి బాణిజ్నా? నీను ఇనిక ఒడేబిజిని?”, ఇజి వన్నిజ్ వెన్బాతాన్.

26 “వారు విద్దెం కిజి గెలిస్తి దేసెమ్దివరిబాణిజ్జె”, ఇజి పేతురు వెప్తాన్. యేసు వన్నిజ్, “అహిజ సొంత దేసెమ్దికార్ సివిండ తప్రె ఆజినార్.

27 మాటు వరిజ్ అడ్డు మంజిని వరిజ్లెకెండ్ మండ్రెజ్ ఆవెద్. నీను సేరుదు సొన్ని గాలం పొక్కి ముందాల దొహ్కాని మొయదిజ్ అసి దని వేయు రెక్కి సుడేతిజ, ఉండ్రీ సెకెల్ కాసు దని వెయ్దు మంజినాద్. అయాక లాగ్గి నీ వందిజ్ని నా వందిజ్ పన్ను సిత”, ఇజి వెప్తాన్.

## 18

దేవును కిని ఏలుబడిడు పెరికాన్

1 నస్తవలె సిసూర్ యేసు డగ్రు వాజి, “దేవుణు కిని ఏలుబడి: కినివలె మాలొఇ ఎయెన్ అబ్బె పెరికాన్ మంజినాన్?”, ఇజి వన్నిజ్ వెన్బాతార్.

2 వాండ్రు ఒరెన్ ఇజిరి కొడోడిజ్ కూక్కి వరి నడిమి నిల్వ్తాన్.

3 మరి వాండ్రు ఈహు వెప్తాన్, “మీరు ఇజిరి కొడోర్ లెకెండ మన్ను మరిసి, వరి లెకెండ ఆఎండ మహిజ, మీరు ఎసెజ్బా దేవుణు కిని ఏలుబడిడు సొండ్రెజ్ అట్ఇదెర్, ఇజి నాను మిజి నిజం వెహ్సిన.

4 అందెజె యా ఇజిరి కొడోర్ లెకెండ తగె ఆనికాన్ ఎయెండ్రొ, వాండ్రె దేవుణు కిని ఏలుబడిడు పెరికాన్ ఆనాన్.

5 మరి ఎయెర్బా నా ముస్కు మన్ని నమ్మకమ్దు యా ఇజిరి కొడోర్ లెకెండ ఆతికాన్ ఇజి ఒడేబినాండ్రొ ననివన్నిజ్ డగ్రు కినికాన్, నజి డగ్రు కిజినాన్.

6 గాని, నా ముస్కు నమకం ఇట్టి మని యా కొడోర్ నన్ని ఒరెన్ వన్నిజ్, ఎయెర్బా పాపం కిబిస్తిజ, వాండ్రు వన్ని మెడదు ఉండ్రీ పెరి జత్తపణుకు తోహా ఆజి సమ్దరం అడ్డి ముడుగుజి సొనిక వన్నిజ్ ఒద్దె నెగెద్.

7 ఎందానిజ్ ఇహిజ, లోకురిజ్ పాపం కిబిస్తి సజతిజ వందిజ్ యా లోకమ్ది వరిజ్ స్రమెజ్ తప్ఉ. యాకెజ్ తప్ఎండ వాదెజ్వెలె. గాని యాకెజ్ ఎయెన్వెట వానెనో వన్నిజ్ వెప్తాజ్ అట్ఇ నని కస్టమ్కు మంజినె.

8 నీ కియుబా, నీ కాల్యుబా నిజి పాపం కిబిస్తిజ, దనిజ్కత్తి విసీరఅ. రుండి కికు కాల్యు మంజి ఎలాకాలం మంజిని సిసుబాడిడు అర్ని దనిజ్ ఇంక, కికు కాల్యు సిల్లెండ ఆజి ఎలాకాలం దేవుణు వెట మంజిని బత్కుదు సొనిక నెగెద్.

9 మరి నీ కణక నిజి పాపం కిబిస్తిజ దనిజ్లాగ్జి విసీరఅ. రుండి కణ్యు మంజి ఎలాకాలం మంజిని సిసుబాడిడు అర్ని దనిజ్ ఇంక, ఉండ్రె కణక మంజి ఎలాకాలం దేవుణు వెట మంజిని బత్కుదు సొనిక నెగెద్.

10 యా ఇజిరి వరి లొఇ ఎయెర్బాజ్ మిరు ఇజిరి కణక సుడేమాట్. ఎందానిజ్ ఇహిజ పరలోకామ్దు నా బుబ్బ డగ్రు మంజిని దూతార్ ఎస్తివలెబా వరిజ్ సుడేజి మంజినార్.

మరుతి గొరె కత.

† 17:24 17:24 యెరుసల్లెమ్దు మన్ని దేవుణు గుడిడిజ్ అవనరమ్మాతికెజ్ కిజి నెగెండ్ సుడిడిజ్ ఒరెనొరెన్వన్నిబాణిజ్, సెగం సెకెల్ పన్నులెకెండ్ పెర్జి మహార్. యూదురు ఆతి మొగవారు 20 వయ్యుడాట్టిమహికార్ విజెరె గుడి: పన్ను సీడెజ్ ఇజి దేవుణుమాటదు రాస్త మనాద్. అక్క రుండి రొస్కు కూలిదిజ్ సమాసం మహాద్. నిర్గమ 30:13-16. 2దిసరు 24:9-14, నెహమ్మ్య 10:32.

11 గొర్రెళ్ల లెకెండ్ మురుతి సొహి లోకురిళ్ల రెబాజి రక్సిస్తెళ్ల ఇజినె లోకుమరిసి\* ఆతి నాను ఇబ్బె వాత మన్న†.

12 ఒరెన్ వన్నిళ్ల వంద గొర్రెళ్ల మంజి వన్యాళ్ల లోఇ ఉండ్రీ మురుతిజ, మహి తొబయ్ తొమ్మిది గొర్రెజ డిసి, మురుతి గొరెదిళ్ల రెబాజి సొన్ఎండ్రా? మీరు ఇనిక ఒడ్డెబిజినెదెర్?

13 దనిళ్ల దొహ్కాతిజ, వన్ని మురుఎండ మని తొబయ్ తొమ్మిది గొర్రెజ మున్ను. యా మురుతి ఉండ్రీ గొర్రె వందిళ్ల వాండ్రు గొప్ప సర్ల ఆనాన్, ఇజి నాను మిజీ నిజం వెహ్సిన.

14 అయలెకెండ్నె యా ఇజిరి వరిలోఇ ఒరెన్బా పాడాఃజి సొండ్రెళ్ల దేవుణు మంజిని బాడిఃదు మని మీ బుబాతి దేవుణుదిళ్ల ఇస్టం సిల్లెద్.

15 మరి నీ తంబెరిజ లోఇ ఒరెన్ నిజీ తపు పణిళ్ల కతిజ, మరి ఎయెర్బా నెన్ఎండ వాండ్రుని నీను మనివెలె వాండ్రు కితి తపు పణిళ్ల తోరిన్అ. వాండ్రు నీ మాట వెహిజ నీను వన్నిళ్ల మర్జి నీ వెట కూడఃజి మంజిని వన్నిలెకెండ్ కిత్తి.

16 గాని వాండ్రు నీ మాట వినవండ మహిజ, ఒరెన్ వన్నిళ్లనో, రివిరిళ్లనో నీ వెట తోడుః అసి వన్ని డగ్రు సొన్అ. అహిజ దేవుణు మాటదు మని లెకెండ్ రిఎర్ మువీర్ది సాసిరి మాటెజవెట విజు సజతిళ్ల నిజమాతికెళ్ల ఇజి రుజుప్ కిదెళ్ల వలె‡.

17 వాండ్రు వరి మాటబా వినవండ మహిజ, అయ సజతి దేవుణు సజమ్దిళ్ల తెలియ కిఅ. సజమ్ది వరి మాటబా వాండ్రు వినవండ మహిజ వన్నిళ్ల ఆఇ వన్ని ననికాన్, సిల్లిజ పన్ను పెర్నికాన్‡ ఇజి సుడఃఅ.

18 యా బూమి మున్ను మీరు ఇనిక తొహ్పిదెరో, అయాకెళ్ల దేవుణు మంజిని బాడ్డిదుబా తొహ్ ఆనెలె. మరి యా బూమి మున్ను మీరు ఇనిక కుత్తిదెరో, అయాకెళ్ల పరలోకామ్లు దేవుణుబా అడ్డు కినాలె. మరి యా బూమి మున్ను ఇనిదన్నిళ్ల సెలవ సీనిదెరో పరలోకామ్దాన్ దేవుణుబా దన్నిళ్ల సెలవ సీనాలె ఇజి నాను మిజీ నిజం వెహ్సిన.

19 మరి ఎయెర్బా రిఎర్కూడఃజి, ఉండ్రె మన్ను కల్లిజ ఇనికబా లొస్తిళ్లబా, పరలోకామ్దు మన్ని నా బుబాతి దేవుణు, మీరు కోరిజిని లెకెండ్ మీ వందిళ్ల కినాన్లె.

20 అహిజ ఎంబె రిఎర్నో, మువీర్నో నా పేరుదాన్ కూడఃజి వాజి మహిజ, అబ్బె వరివెట నాను మంజినలె.”

### కనికారం తోరిన్ఇ పణిమనిసి

21 నస్తవలె పేతురు యేసు డగ్రు వాతండ్రె, “నా తబేరి ఒరెన్ నా వెట తపు కితిజ నాను ఎసోడు సుట్టు. వన్నిళ్ల సెమిస్తెళ్ల? ఎడుః సుట్టు సెమిస్తెళ్ల ఆనాదా?”, ఇజి వెన్బాతాన్.

22 యేసు వన్నిళ్ల, “ఎడు సుట్టు ఆవద్. డబయ్, సుట్టు ఏడు\* ఇజి నాను నిజీ వెహ్సిన”, ఇజి వెహ్సాన్.

23 ఎండానిళ్ల ఇహిజ దేవుణు ఏలుబడిః కినిక ఇహిజ, వన్ని పణిమనిర్వెట వారు వన్ని బాణిళ్ల లొస్తిమన్ని అపుదిళ్ల లెక్క సూణి ఒరెన్రాజుళ్ల పొలిత మనాద్.

24 లెక్క సుడఃదెళ్ల మొదోల్స్తి వలె, పది వెయుళ్ల తాలందుళ్ల† అప్ప లొస్తిక మర్జి సీదెళ్ల మన్ని ఒరెన్ వన్నిళ్ల, వన్ని డగ్రు తత్తార్.

25 వన్నిళ్ల అప్ప తీరిస్తెళ్ల అట్ఇతిళ్ల, వన్నిళ్లని వన్ని ఆల్పిళ్ల, కొడోరిళ్ల, మరి వన్నిళ్ల కల్లితి మనికెళ్ల విజు పొర్ని అప్ప తీరిన్అ ఇజి యాజుమాని ఆడ్ర సిత్తాన్.

26 అయ పణిమణిసి వన్ని ఎద్రు ముణుకుళ్ల ఊర్జి మాడిఃస్తాండ్రె, “నజీ సెమిన్అ నజి మరి కండెక్ సమయం సిదా నాను అప్ప విజు మర్జి సీన’ ఇజి బతిమాల్తాన్.

27 అయ ఎజుమాని పణిమనిసి మున్ను కనికారం ఆజి, నీ అప్ప విజు తెవితాద్ ఇజి వన్నిళ్ల సొండ్రెళ్ల సెలవ సిత్తాన్.

28 గాని అయ పణిమనిసి వెల్లి వాజి సొన్ని మహివలె, వన్నిళ్ల వంద దినారమ్కు‡ అప్ప మని, వన్నివెట కూడఃజి పణికిజిని ఒరెన్ వన్నిళ్ల సుడఃతాన్. వన్నిళ్లఅస్తాండ్రె గొతిక పడిఃసి, “నీను నజీ అప్ప మన్ని డబ్బు మర్జి సిదా’, ఇజి బలవంతం కిత్తాన్.

29 వన్నివెట కూడఃజి పణికినికాన్ఆతి అయ పణిమనిసి వన్ని ఎద్రు ముణుకుళ్ల ఊర్జి, “నజీ సెమిన్అ, నిజీ మరి కండెక్ సమయం సిదా? నిజీ సీదెళ్ల మన్ని అప్ప విజు నాను మర్జి సీన’, ఇజి బతిమాల్తాన్.

\* 18:11 18:11 లోకుమరిసి ఇని మాట అరామియ బాసదాన్, “నాను” సిల్లిజ “నజీ,నాది”, ఇజి అర్థమానిలెకెండ్ యూదురు వెహ్పి మహార్. యేసుప్రబుబా వన్ని వందిళ్ల వెహ్పాళ్ల యాలెకెండ్ వెహ్పి మహాన్. యాలెకెండ్ వెహ్పిమహివలె నానె క్రీస్తు ఇజి వాండ్రు తినాళ్ల వెహ్ఎండ వన్ని వందిళ్ల వెహ్పి మహాన్. దానియేలు ప్రవక్త పుస్తకమ్దు రాస్తి మన్ని దన్నిళ్ల తగితిలెకెండ్, వాండ్రు యా పేరు వన్ని వందిళ్ల వెహ్పి మహాన్. దానియేలు 7:13-14. యేసుళ్ల పగాతికార్ వాండ్రు మాముల్గ వన్ని వందిళ్ల ఆహ వెహ్పివాన్ ఇజి ఒడ్డెబితార్. గాని వన్నిళ్ల నమ్మిత్తికార్ వాండ్రె క్రీస్తు ఇజి వెహ్పి మహాన్ ఇజి అర్థం కిత్తార్. † 18:11 18:11 గ్రీక్కు బానాదు రాస్తిమన్ని ముకెలమాతి పుస్తకమ్కాళ్ల యా మాట మన్నె గాని నెగం పుస్తకమ్కాళ్ల సిల్లెద్ ‡ 18:16 18:16 ద్వితి కాండం 19:15 § 18:17 18:17 యూదురు ఆతికార్ ఇనిదన్ని వందిళ్లబా పన్ను పెర్నివరివెట కూడఃజి మన్వర్ \* 18:22 18:22 నాల్గి వంద తొబయ్ సుట్టు ఇహిజ ఎస్తివలెబా సెమిసి మండ్రెళ్ల ఇజి అర్థం. † 18:24 18:24 ఉండ్రీ వెయి తాలందు ఇహిజ వెయి లక్క రూపాయ్దిళ్ల లావ్ మన్నె ‡ 18:28 18:28 వంద దినారమ్కు ఇహిజ అయ కాలమ్దు పది రొస్సా, పణికిని కాలిదిళ్ల సమానం మహాద్.

30 గాని వాండ్లు అక ఒప్పుకొండేవండ, అప్పు విజు మర్జి సీనిదాక వన్నిజ్జేలుదు ఇడిస్తాన్.

31 వరివెట కూడేజి పణికినికార్ సెగొండార్, యా జర్గితక విజు సుడేతారె నండో బాద ఆతార్. వారు సొన్ని జర్గితక విజు ఎజుమానిజ్జే వెహ్తార్.

32-33 నస్తవలె అయ ఎజుమాని వన్నిజ్జే కూక్పిస్తాండ్రె, “మూర్కం మని పణిమనిసి, నీను నజీ బతిమాల్తిజ్జే నాను కనికారం ఆజి నిజీ సెమిసి, నీ అప్పు విజు తెవితాద్ ఇజి నిజీ వెహ్తారెకెండ నీ వెట కూడేజి పణి కిని వన్నిజ్జే నీనుబా సెమిసి వన్ని ముస్సు కనికారం తోరెస్తాజ్ గదె?”, ఇజి వెన్బాతాన్.

34 నస్తవలె అయ ఎజుమాని వన్ని ముస్సు కోపం ఆతాండ్రె వాండ్లు అప్పు విజు మర్జి సీనిదాక వన్నిజ్జే హిమ్స కినివరిజ్జే ఒపజెస్తాండ్రె జెలిదు ఇడిస్తాన్.

35 మీరు మీ మన్సుదాన్ మీ తంబెరిజవెట సెమిన్వండ మహిజ పరలోకామ్దు మన్ని నా బుబ్బతి దేవుణుబా యా లెకెండెనె మీ లోఇ ఒరెన్ వెట కినాన్.

## 19

### అల్సిజ్జే డి:స్సి సీని వందిజ్జే

1 యా మాటేజ్జేవెహ్తా వీజితి వెనుక యేసు గలిలయ డి:సి, యోర్దాన్గడ్డ అతాహ పడక మని యూదయ నాహ్కాజ్ సొహ్సాన్.

2 మంద లోకుర్ వన్ని వెనుక సొహార్. వాండ్లు అబ్బె వరి జబ్బుది వరిజ్జే నెగెండే కిత్తాన్.

3 సెగొండార్ పరిసయరు, వన్ని మాటేజాణిజ్జే వన్నిజ్జే తప్ప అస్తాజ్ ఇజి వన్ని డగ్రు వాతారె, “ఇని తప్పబా తోవండ ఒరెన్ వన్ని ఆల్సిజ్జే డి:సి సీనిక దేవుణు మోసెజ్జే సిత్తి రూలుజ్జే వజ నాయమ్నా?”, ఇజి వెన్బాతాన్.

4 వాండ్లు వరిజ్జే, “ముజాహాన్ దేవుణు లోకురిజ్జే తయార్ కితివలె వరిజ్జే మొగ్గ కొడొని బోదెలి లెకెండే తయార్ కిత్తాన్\*.

5 అందెజె మొగ్గ కొడొని వన్ని అయ్సి అప్పొసిరిజ్జే డి:సి వన్ని ఆల్సి వెట కూడేజినాన్. వారు రిపిర్ ఉండ్రె ఒడొల్ ఆనార్.\*

6 అందెజె అబ్బెణిజ్జే అసి వారు రిపిర్ ఆవిండ ఉండ్రె ఒడొల్ ఆన మంజినార్. అందెజె దేవుణు జత కుడుప్పి వరిజ్జే లోకుర్ కేట కిదెజ్జే ఆవిడ ఇజి దేవుణు మాటదు రాస్తి మన్నిక మీరు ఎసెజబా సద్దిఇతిదెరా?”, ఇజి వరిజ్జే వెన్బాతాన్.

7 వారు వన్నిజ్జే, అక్క అయాలెకెండే మహిజ, ఒరెన్ వన్ని ఆల్సిజ్జే డి:స్సెజ్ ఇహిజ, ఉండ్రె విడ్డి: ఆకు రాసి సీజి దనిజ్జే డి:స్సెజ్జే ఆనాద్ ఇజి మోసె ఎందనిజ్జే ఆడ్ర సిత్తాన్?”, ఇజి వెన్బాతాన్.

8 యేసు వరిజ్జే, “మిజి నస్సా కటిసమతి మన్సు మహిజ్, మోసె అయ లెకెండే సెలవ సిత్తాన్ గాని ముజాహాన్ అసి అయ లెకెండే జర్గివితాద్.

9 రంకు బూలాతిజానె తప్ప మరి ఇనిదని వందిజ్జేబా ఒరెన్ వన్ని ఆల్సిజ్జే డి:సి మరి ఉండ్రె దనిజ్జే ఇడె ఆతిజ వాండ్లు దనివెట రంకు బూలానికాన్ ఆజినాన్ ఇజి నాను మిజి వెహ్సాన్”, ఇజి వెహ్సాన్.

10 వన్ని సినూర్ వన్నిజ్జే, “ఆల్సి మాసీర్ నడి:మి సజతిజ్జే యాలెకెండే మనాద్ ఇహిజ, పెండ్లి ఆవిండ మంజనికాదె నెగెద్”, ఇజి వన్నిజ్జే వెహ్తార్.

11 యేసు వరిజ్జే, “మీరు వెహ్తా మాట విజెరె అస్తాజ్ అట్వెర్, గాని దేవుణు ఎయెరిజ్జే అయ లెకెండే సితాండ్రె వారె కిదెజ్జే అట్నాన్.

12 సెగొండార్ ఆండెరెజ్జే\* లెకెండెనె అయ్సి పొటాదాన్ పుట్నాన్. సెగొండారిజ్జే లోకుర్ ఆండెరెజ్జే లెకెండే కిజినార్. మరి సెగొండార్ దేవుణు ఏలుబడి: వందిజ్జే పెండ్లి ఆవిండ వరిజ్జే వారె ఆండెరెజ్జే ఆజి మంజినార్.

13 నస్తవలె యేసు కికు ఇడ్డి పార్దనం కదెజ్ ఇజి సెగొండార్ ఇజిరి కొడొరిజ్జే వన్ని డగ్రు తత్తార్. వన్ని సినూర్ కొడొరిజ్జే తత్తి వరిజ్జే జటిజ్జే ఆజి గోల కిత్తార్.

14 గాని యేసు, “యా ఇజిరి కొడొరిజ్జే నా డగ్రు రపిర్, వరిజ్జే అడ్డు కిమాట్. దేవుణు ఏలుబడి: కినిక నినివరిదినె”, ఇజి వరిజ్జే వెహ్సాన్.

15 వరి ముస్సు కికు ఇడ్డి పార్దనం కితి వెనుక వాండ్లు అబ్బెణిజ్జే సొహాన్.

### ఆస్తి మని దజడా:యెన్.

16 ఇదిలో, ఒరెన్యేసు డగ్రు వాతండ్రె, “ఒ బోదకినికి, దేవుణు వెట ఎలాకాలం మంజిని బత్కుదు నాను మండ్రెజ్ ఇహిజ నాను ఇని నెగ్గి పణిజ్జేకిదెజ్”, ఇజి వన్నిజ్జే వెన్బాతాన్.

\* 19:4 19:4 ఆది 1:27. \* 19:5 19:5 ఆది 2:24. \* 19:12 19:12 అండెర ఇహిజ వాండ్లు కొడొని ఇడ్డిజ్జే అట్ఇకాన్.



17 యేసు వచ్చి, “నెగ్గి పణిజ వందిజ్ ఎందనిజ్ నీను నజి వెన్బాజిని? నెగ్గికాన్ దేవుణు ఒరెండ్రె మనాన్. దేవుణు ఎలాకాలం మంజిని బత్తుదు నీను మండ్రెజ్ ఇహిజ, దేవుణు సితి ఆడ్రెజ్ లోజిజి మన్అ”, ఇజి వెహ్లాన్.

18 వాండ్రు, “ఇని ఆడ్రెజ్?”, ఇజి వచ్చి వెన్బాతిజ్ యేసు వచ్చి, “సప్తెజ్ ఆఎద్, రంకు బూలాదెజ్ ఆఎద్, డోజి కిమా, అబద్దమ్దిజ్ సాస్యం వెహ్లాన్.

19 అయ్సి అప్పొసిరిజ్ గవ్ రమ్దాన్ నెగెణ్ సుడెఃఅ. ✱ మరి నీను నిజి ప్రేమిసినిలెకెండ్రె మహివరిజ్ ప్రేమిన్అ” ✱, ఇజి వెహ్లాన్.

20 అందెజె అయ దజడాయెన్, “యాకెజ్ విజు నాను కిజినె మంజిన. మరి ఇనిక నజి తకు మనాద్?”, ఇజి వెహ్లాన్.

21 యేసు వచ్చి, “నీను పూర్తి నెగ్గికి ఆదెజ్ కోరితిజ, నీను సొన్ని నిజి కల్లితి మనికెజ్ విజు పొర్ని, బీదాతివరిజ్ సీబాజి సిఅ. ఆహె కితిజ పరలోకామ్దు నిజి ఆస్తి కల్లిజి మంజినాద్. వెనుక నావెట రఅ”, ఇజి వెహ్లాన్.

22 అయ దజడాయెన్ నండ్రె ఆస్తి కల్లిజి మనికాన్ కాక అయ మాట విహండ్రె ఇజిరి మొకొం అతాండ్రె సొహాన్.

23 నస్తివలె వచ్చి సిసూర్జ సుడెఃజి, యేసు”, ఆస్తి మచ్చికాన్ దేవుణు కిని ఏలు బడిఃదు సొండ్రెజ్ గొప్ప కస్టం ఇజి నాను మిజి నిజం వెహ్లాన్.

24 మరి నాను మిజి వెహ్లాక ఇనిక ఇహిజ, ఆస్తి మనికాన్ దేవుణు ఏలుబడిఃదు సొని దనిజ్ ఇంక, ఒంటె దొపానం బొరొదాన్ డుఃగ్నిక సులు ఆనాద్”, ఇజి వెహ్లాన్.

25 సిసూర్ యా మాట విహారం నండ్రె బమ్మ అతారె, “దేవుణు రక్కిస్తి లెకెండ్రె ఎయెన్ మండ్రెజ్ అట్నార?”, ఇజి వెహ్లాన్.

26 యేసు వరిజ్ సుడెఃజి, “యాక లోకాజ్ అట్ఇకాదె, గాని దేవుణు విజు కిదెజ్ అట్నాన్”, ఇజి వెహ్లాన్.

27 పేతురు వచ్చి సుడెఃజి, “ఇదిలో మాపు విజు డిఃస్తాపె నీ వెట వాజినాప్, మజి ఇనిక దొహ్కాద్లు?”, ఇజి వెన్బాతాన్.

28 యేసు వరిజ్, “యా లోకం మరి కొత్తాక ఆనివెలె లోకు మరిసి ఆతి నాను గొప్ప జాయ్మని గొప్ప సింహాసనమ్దు బసి ఇస్రాయేలుది పన్నెండు తెగ్గతివరిజ్ తీర్పు తీరిస్సివెలె, నా వెనుక వాతి మీరుబా, నావెట పన్నెండు గొప్ప సింహాసనమ్కాజ్ బసి వరిజ్ తీర్పు కినిదెర్లె.

29 మరి ఎయెర్బా నా వందిజ్ వరి ఇల్లుజొల్లు, అన్నతంబెరిజబ, బీబి తజిసికజ్బా, అయ్సి అప్పొసిరిజ్బా, బూమిపుట, కొడెఃకొక్రరిజ్బా డిఃస్తి సితిజ నినివరిజ్ యాకెజ్ వంద వందుజ్ దొహ్కాన్. దన్నివెట ఎలాకాలం మంజినిబత్తుబా దొహ్కాన్.

30 గాని మొదొహ్కార్ ఇజి ఒడెఃబిని నండ్రెండ్రె కడెఃవెర్దికార్ ఆనార్. కడెఃవెర్దికార్ ఇజి ఒడెఃబిని నండ్రెండ్రె మొదొహ్కార్ ఆనార్లె.

## 20

### ద్రాసటోటాదు పణికినికార్

1 “దేవుణు ఏలుబడిః కినిక ఇహిజ, వచ్చి ద్రాసటోటాదు పణికిదెజ్ పణికిని వరిజ్ కూకెజ్ పెందాల నిజ్జి వెల్లి సొన్ని మహి ఉండ్రె టోట యెజమానిజ్ పోలిత మనాద్.

2 ఉండ్రె రోజు పణిదిజ్ ఉండ్రె దినారం\* కూలి సీన ఇజి ఒప్పకొటాండ్రె, వచ్చి ద్రాక్కు టోటాదు పణి కిదెజ్వరిజ్ పొక్తాన్.

3 వెనుక అంబెలి వేలాదు వాండ్రు వెల్లి సొహివలె నత్తాదు ఇని పణి సిల్లెండ్రె నిహిమని సెగొండ్రెజ్ సుడెఃతాన్.

4 వాండ్రు వరిజ్, “మీరుబా నా ద్రాక్కుటోటాదు పణిదిజ్ సొండ్రు, మిజి సరియాని కూలి సీన”, ఇజి వెహ్లాన్.

5 వారు సొహార్. మరి వాండ్రు పన్నెండు గంటెజ, మూండ్రె గంటెజబా ఆహె కితాన్.

6 మరి అయ్దు గంటెజ సొహిజ్ మరి సెగొండ్రెకాలి నిహిమనివరిజ్సుడెఃతాన్. వాండ్రు వరిజ్, “యా దినం విజు ఎందనిజ్ మీరు ఇబ్బె సెడ్డిఃనె నిహిమహిదెర్?”, ఇజి వెన్బాతాన్.

7 వారు వచ్చి, “ఎయెర్బా ఇని పణిదిజ్బా మజి కూక్వితార్, అందెజె”, ఇజి వెహ్లాన్. వాండ్రు వరిజ్ “మీరుబా నా ద్రాస టోటాదు పణిదిజ్ సొండ్రు”, ఇజి వెహ్లాన్.

8 పొదు ఆతివెలె అయ ద్రాస టోట ఎజుమాని పణి సూణి వచ్చి కూక్తాండ్రె, “పణికినివరిజ్కూక్కి, కడెఃవేరి వాతివరిబాణిజ్ మొదొల్ని ముందాల వాతికార్ డాక వరిజ్ కూలి సిఅ”, ఇజి వెహ్లాన్.

9 పొద్దు డిగ్గివలె పణిదిజ్ వాతివరిజ్ ఒరెన్ ఒరెన్ వచ్చి ఉండ్రె దినారం కూలి దొహ్కాన్.

✱ 19:19 19:19 నిర్గమ 20:12-16; ద్విత్తి 5:16-20.

✱ 19:19 19:19 లేవి 19:18.

\* 20:2 20:2 అయ కాలమ్దు ఉండ్రె రోజు పణిదిజ్ కూలి

ఉండ్రె దినారం మహాద్.

10 ముందాల వాతికార్ మజీ లావ్ దోహ్కె, ఇజి ఒడేబితార్ గాని వరిజ్బా ప్రతి ఒరెన్ వన్నిజ్ ఉండ్రీ దినారమ్నె కూలి దోహ్కె.

11 అయాక దోహ్కెవెలె వారు టోట ఎజుమానిజ్ ఎద్రు మొరొ ఆతార్.

12 వారు, “కడేవెరిదు వాతికార్ ఉండ్రీ గంటనె పణి కిత్తార్ గాని వెలార్ కష్టబడేజి విజు పణి కితిమని మజీ ఎందనిజ్ నీను వరిజ్ సమానం కితి?”, ఇజి వెన్బాతార్.

13 వాండ్రు వరి లోక ఒరెన్ వన్నిజ్, “బయి, నాను మిజీ ఇని అనెయం కివిత. ఉండ్రీ దినారమ్దిజ్ పణి కిన ఇజి మీరు ఒప్పుకొటిదెర్ గదె?”

14 మీ కూలి అసి మీరు సొండ్రు. మిజీ సితీ లెకెండ కడేవెరిదు వాతివన్నిజ్బా సీదెజ్ నజీ ఇస్టం ఆతార్.

15 నా డబుదాన్ నజీ ఇస్టమాతి లెకెండ కిదెజ్ నజీ అక్కు సితీదా? నాను వరిజ్ ఒదరిసి సితీ వందిజ్ నీను గోస ఆజినిదెర్?”, ఇజి వెన్బాతాన్.

16 అయా లెకెండేనె కడేవెరిదికార్ ఇజి ఒడేబిజినికార్ మొదోహికార్ ఆనార్, ముందాహికార్ ఇజి ఒడేబినికార్ కడేవెరిదికార్ ఆనార్.”

యేసు వన్ని సాపు వందిజ్ మరి వెప్పినాన్.

17 యేసు యెరూసలేమ్దు సొన్ని మహివలె, వాండ్రు వన్ని పన్నెండు మణిసిర్ సిసురిజ్ ఉండ్రీ పడకాదు కూక్త ఒతాండ్రె వరిజ్ ఈహు వెప్తాన్.

18 ఇదిలో మాటు యెరూసలేమ్దు సొన్నినాట్. అబ్బె లోకుమరిసి ఆతి నాను పెరి పుజెరిజ, యూదురి రూలుజ్ నెస్పిస్సి వరిజ్ ఒపజెపె ఆనాలె. వారు నజీ సాపుదిజ్ సిక్స సీనార్లె.

19 మరి వారు నజీ వెక్సె, కొరడేజాణిజ్ డెయ్జి, సిలువ పొక్తెక్ యూదురు ఆఇ వరిజ్ ఒపజెప్పార్లె. మూండ్రీ రోస్కాజ్ నాను మర్జి నిక్నాన్లె.”

20 నస్తివలె జెబెదెయి మరిసిర్ అయ్సి వరి వెట యేసు డగ్రు వాతాదె ముణుకుజ్ ఊర్జి మాడిసి, “సాయం కిఅ”, ఇజి వెప్తాన్.

21 “నీను ఇనిక కోరిజిని?”, ఇజి వాండ్రు వెప్తాన్. అందెజె అది, “నీను రాజు వజి ఏలుబడికి కినివెలె, యా నా రిఎర్మరిసిర్ ఒరెన్ నీ ఉణెర్ పడకాదుని ఒరెన్ నీ డేబ్రు పడకాదు బసి మండ్రెజ్ ఇజి నాను కోరిజిన”, ఇజి వెప్తాన్.

22 యేసు, “నీను ఇనిక వెన్బాజినాదొ ఇజి నిజీ తెలివద్”, ఇజి వెప్తాండ్రె వరిజ్, “నాను ఉండ్రెజ్మని గినాదిక ఉండ్రెజ్మీరు అట్నిదెరా?”, ఇజి వెప్తాన్. వారు, “మాప్ ఉండ్రెజ్ అట్నాప్”, ఇజి వెప్తాన్.

23 యేసు వరిజ్, “తవ్విండ నాను ఉణి గినాదిక మీరు ఉణిదెర్, గాని నా ఉణెర్ పడకాదుని డేబ్రు పడకాదు బసి కిబిస్సిక నా కీదు సిల్లెద్, నా బుబ్బు కియుదాన్ ఎయేరిజ్ తయార్ కిత మనాండ్రొ వరిజ్ అక్కెజ్ దోహ్కె”, ఇజి వెప్తాన్.

24 మహి పది మస్సెర్ సిసూర్ వరి అయ్సి యేసుజ్ లొస్తి అయ మాట విహారె రిఎర్ ముస్సు కోపం ఆతార్.

25 యేసు వరిజ్ విజెరిజ్ కూక్తాండ్రె వరిజ్, “యూదురు ఆఇవరి రాజర్ వరి లోకుర్ ముస్సు అతికారమ్దాన్ మంజినార్. వరి పెరి అదికారిజు వరిజ్ మని అతికారమ్దాన్ లోకురిజ్ అణును తిగిజినార్ ఇజి మీరు నెస్పిదెర్ గదె?”

26 గాని మీరు వారు లెకెండే మండ్రెజ్ ఆవెద్. గాని మీ లొక ఎయెర్బా పెరికాన్ ఆదెజ్ ఇహిజ, వాండ్రు మిజీ పణిమన్ని ఆదెజ్వెలె.

27 మరి ఎయెన్బా విజెరె ముస్సు పెరికాన్ఆదెజ్ ఇజి కోరిజినికాన్, వాండ్రు మిజీ విజెరిజ్ వెటి పణికి వనిలెకెండే ఆజి మండ్రెజ్.

28 ఎలాగ ఇహిజ లోకు మరిసి ఆతి నాను, విజెరె నజీ పణి కిపిర్ఇజి నాను రెవతా, గాని పణి కిదెజె వాత మన్న. మరి నండొండారిజ్ బత్కిస్సెజ్, వరిజ్ విడుడల కిదెజ్ వరి వందిజ్ నా పాణం సీదెజె నాను వాత మన”, ఇజి వెప్తాన్.

గుడిదికార్ సుడేజినార్

29 యేసుని వన్ని సిసూర్యెరికో పట్టుమ్దాన్సొన్ని మహిజ్, నండొ లోకుర్ వన్ని వెనుక సాహార్.

30 ఇదిలో సరిపడకాదు బస్తిమని రిఎర్ గుడ్డిదికార్, యేసు అయా సరిదాన్ సొన్నినాన్ ఇజి వెహారె, “ప్రబువా, దావీదు మరిసి, మా ముస్సు కనికారం తోరిన్అ”, ఇజి డేల్సి వెప్తాన్.

31 లోకుర్ వరిజ్ ‘పలక్ మండ్రు’ ఇజి గోల కిత్తార్. గాని వారు, “ప్రబువా, దావీదు మరిసి మా ముస్సు కనికారం ఆఅ”, ఇజి మరి ఒదె డేల్సి వెప్తాన్.

32 యేసు నిహండ్రె వరిజ్ కూక్తాన్. “నాను మిజీ ఇనిక కిదెజ్ ఇజి మీరు కోరిజినిదెర్?”, ఇజి వరిజ్ వెన్బాతాన్.

33 “ప్రబువా మా కణ్ణు సూణి లెకెండేకిఅ”, ఇజి వారు వెప్తాన్.

34 యేసు వరి మున్ను కనికారం ఆతాండ్రె వరి కణకాజ్ ముట్టాన్. వెటనె వారు సుడేదెజ్ అట్టారె వన్ని వెట సాహార్.

## 21

### ఓసన్న

1-2 వారు యెరూసలేము అందిని ముంజాల, ఒలివ మరెక్ మని గొరొన్ మున్ను మని బెత్పాగె ఇని నాటో వాతార్. వాతిజ్ యేసు వన్ని సిసూర్ రివెరిజ్ కూక్తాండ్రె ఈహు వెప్తాన్. “మీ ఎద్దు మని నాటో సాండ్రు. అందితిజ సరి, తొప్తొ మన్ని ఉండ్రె గాడేదెజ్ని దనివెట మని గాడేదె పిలాదిజ్బా మీరు సూణిదెర్. వనకాజ్ కుత్తి నా డగ్రు పేర్జి తగాట్.

3 ఎయెన్బా మిజి ఇనికబా వెన్బాతిజ వన్కాజ్ ప్రబుజ్ కావాలి ఇజి వన్నిజ్ వెప్తు. వెటనె వాండ్రు వనకాజ్ మీ వెట పొక్కార్.”

4-5 “ఇదిలోన్ గాడేదె మున్ను ఎక్సి, సార్లిదాన్ నీ రాజు వాజినాన్. గాడేదె పిల్ల ఆతి ఇజిరి గాడేదె మున్ను ఎక్తాండ్రె, నీ డగ్రు వాజినాన్ ఇజి సీయోను గాల్సి\* ఆతి దనిజ్ వెప్తు”, ఇజి దేవుణు ప్రవక్తవెట\* దేవుణు ముజాల వర్గితి మాటెజ్ పూర్తి ఆదెజ్ యాకెజ్ జర్గితె.

6 యేసు వరిజ్ వెప్తొ వజనె సిసూర్ సాహారె కిత్తార్.

7 వారు గాడేదెని దని పిలదిజ్ తత్తార్. వన్కాజ్ మున్ను వరి సాల్వెజ్ పప్తిజ్, యేసు దని మున్ను బస్తాన్.

8 నండొండార్ వరి సాల్వెజ్ సరి అందు పప్తార్. మరి నండొండార్ మరెకాణి కొమెజ్ కత్తి సరి అందు పప్తార్.

9 మంద లోకుర్ వన్ని ముందాల సొన్ని మహికార్, వన్ని వెనుక వాజి మహికార్, “దావీదు మరిసిజ్ ఓసన్న†! ప్రబు సిత్తి ఆతికారమ్దాన్ వాజినికాన్ పొగడె: ఆనికాన్ పరలోకామ్దు దేవుణుదిజ్ ఓసన”, ఇజి వారు డెల్సి మహార్.

10 యేసు యెరూసలేం పట్టుమ్దు వాతిజ్, లోకుర్ విజెరె “వాండ్రు ఎయెన్?”, ఇజి బమ్మ ఆతారె ఒరెన్ మరి ఒరెన్ వెట వర్గిజి మహార్.

11 “వీండ్రు గలీలయదు మన్ని నజరేతు ఇని నాటోణి ప్రవక్త ఆతి యేసు”, ఇజి వన్ని వెట మహి అయ మంద లోకుర్ వెప్తార్.

### యేసు దేవుణు గుడిఃదు సొన్నినాన్.

12 యేసు దేవుణు గుడి: లోఱ సాహండ్రె, అబ్బె గుడి: అరబుదు మహి కొణి వరిజ్ పొర్ని వరిజ్ విజెరిజ్ వెల్లి పొక్తాన్. డబ్బు మరిసిని వరి బల్లెజ్ని పావుర పొటిజ పొర్నివరి పీటెజ్ మప్తా విసీరతాన్.

13 వాండ్రు వరిజ్, “నా ఇలు పార్దనం కిని ఇలు ఇజి కూకె ఆనాద్లె,† ఇజి దేవుణు మాటదు రాస్త మనాద్ గాని మీరు దనిజ్ డొజారిజ సాలం\* లెకెండె కితి మనిదెర్”, ఇజి వెప్తాన్.

14 గుడ్డిదికార్, సాటాదికార్ దేవుణు గుడిఃదు వన్ని డగ్రు వాతిజ్ వాండ్రు వరిజ్ నెగెండె కిత్తాన్.

15 గాని వాండ్రు కితి బమ్మాతి పణిజ సుడేజి, దేవుణు గుడి: అరబుదు మని కొడొర్, “దావీదు మరిసిజ్ ఓసన్న”, ఇజి డెల్సినిక విహారె, పెరి పుజెరిజుని, యూదురి రూలుజ్ నెస్పిన్సికార్ నండొ కొంప ఆతార్.

16 వారు వన్నిజ్, “యా కొడొర్వెప్పొనిక ఇనిక ఇజి నీను వెంజినిదా?”, ఇజి వెన్బాతార్. యేసు వరిజ్, “ఓ వెంజిన, కొడొర్ని ఇజిరి కొడొర్ని వెయుదాన్ నీను పొగడిజిని మాటెజ్ తయార్ కితి మన్ని\* ఇజి దేవుణు మాటదు రాస్తి మనిక మీరు ఎసెజ్బా సద్విఇతిదెరా?”, ఇజి వెప్తాన్.

17 వాండ్రు వరిజ్డిసి పట్టుమ్దాన్ వెల్లి సాహండ్రె బెతానియ ఇని నాటో సొన్ని అయ రయ్తు అబ్బె మహాన్.

### బొడెమరాన్ వప్పొనాద్

18 పెందల వాండ్రు మరేజి పట్టుమ్దు సొన్ని మహిజ్ వన్నిజ్ బజ కట్టాద్.

19 సరి పడకాదు మని ఉండ్రె బొడెమరాన్ సుడేజి, మరాన్ డగ్రు వాతండ్రె సుడేతిజ్ ఆకుజ్ తప్ప మరి ఇనికెజ్ తోరఉతె. వాండ్రు దనిజ్ సుడేజి, “మరి ఎసెజ్బా నీను కాయెజ్ అస్ఇలె”, ఇజి వెప్తాన్. వెటనె బొడెమరాన్ వప్తా సాహాద్.

20 సిసూర్ అక్క సుడేతారె బమ్మ ఆతార్, “నిస్సొ బేగి బొడెమరాన్ ఎలాగ వప్తా సాహాద్?”, ఇజి వారు వర్గితార్.

\* 21:4-5 21:4-5 యెరూసలేం పట్టుమ్దిజ్ సియోను పట్టుం ఇజిబా పేరు మహాద్ ఎందానిజ్ ఇహిజ అయ పట్టుం సియోను గొరొన్ మున్ను తొప్తొ మహాద్. అమదెజి సియోను గాల్సి ఇజి వెప్పొవలె యెరూసలేం పట్టుమ్ది వరిజ్ గుర్తు కిజి వెప్పొమహార్ వారు ఇహిజ ఇస్రాయేలు లోకుర్ గుర్తు. † 21:4-5 21:4-5 జీకరి 9:9. † 21:9 21:9 అరామియ బాసాదు ఓసన్న ఇని మాటదిజ్ మజి ఏలు రక్సిన్అ ఇజి అర్దం మనాద్. గాని లోకుర్ పొగడిదెజ్ మరి ఎయెన్బా వెరికాన్ వానివలె వరిజ్ కూక్సి ఒనిలెకెండెబా వెప్పొమహార్. † 21:13 21:13 యెసయ 56:7. † 21:13 21:13 యిర్మీయా 7:11. † 21:16 21:16 కీర్తన 8:2.

21 యేసు వరిజ్, “నాను మిజి నిజం వెప్పొన, మిజి నమకం మంజి, మీ లొఇ అనుమానం సిల్లెండ మహిజ, యా బొడెమరాన్దిజ్ కితికదె ఆఎండ, యా గొరొతిజ్ సుడఃజి”, నీను ఇబ్బాణిజ్ పెరె ఆజి సమ్దారమ్దు సొన్ని అర్అ’ ఇజి వెప్పొజి అయవజనె జర్గినాదలె.

22 మిజి నమకం మహిజ మీరు పార్లనం కిజి ఇనిక లొస్సిదెరొ, అయాక మిజి దొహ్కాద్లె”, ఇజి వెప్టాన్.

23 యేసు దేవుణు గుడిఃదు సొహండ్రె గుడిః అర్బుదు బొదకిజి మహివలె, పెరి పుజెరిబుని లోకుర్ పెద్దెల్జి వన్ని డగ్రు వాతారె, “ఇని అతికారమ్దాన్ నీను యా పణిజ్ కిజిని? ఎయెర్ నిజి యా అతికారం సిత మనార్?”, ఇజి వన్నిజ్ వన్బాతార్.

24 యేసు వరిజ్, “నానుబా మిజి ఉండ్రె మాట వెన్బాన. అయాక మీరు నజి వెప్పొజి ఇని అతికారమ్దాన్ నాను యా పణిజ్ కిజిన ఇజి నానుబా మిజి వెప్పొ.

25 బాప్తినం సీని యోహానుజ్, బాప్తినం సీదెజ్ మని అతికారం ఎంబెణిజ్ వాతాద్ దేవుణుబాణిజ్నా, సిల్లిజి లోకుర్ బాణిజ్నా?”, ఇజి యేసు వరిజ్ వెన్బాతాన్. “దేవుణుబాణిజ్ వాతాద్’ ఇజి మాటు వెప్పొజి, మరి ఎందానిజ్ మీరు వన్నిజ్ నమ్మిఇతిదెర్? ఇజి మజి వెన్బానాన్.

26 గాని, యోహాను ఒరెన్ దేవుణు ప్రవక్త ఇజి లోకుర్ విజెరె నమిజినార్. అందెజె లోకుర్ బాణిజ్ వాతాద్’ ఇజి వెప్పొజి మజి తియెల్నె, ఇజి వరి లొఇ వారె వర్గితార్.

27 అందెజె వారు, “మజి తెలివద్”, ఇజి యేసుజ్ మర్జి వెప్టాన్. నస్తివలె వాండ్రు, “ఇని అతికారమ్దాన్ యా పణిజ్ కిజిన ఇజి నానుబా మిజి వెహ్ఎ”, ఇజి వరిజ్ వెప్టాన్.

### రిఎర్ మరిసిర్ కత

28 “దిన్నివందిజ్ మీరు ఇనిక ఒడఃబిజినిదెర్? ఒరెన్వన్నిజ్ రిఎర్ మరిసిర్ మహార్. వాండ్రు పెరివన్ని డగ్రు సొహండ్రె, “మరిన్, నేండ్రు నీను ద్రాక్కు టోటాదు సొన్ని పణి కిఅ”, ఇజి వెప్టాన్.

29 వాండ్రు, “నాను సొన్ఎ, ఇజి మర్జి వెప్టాన్. గాని వెనుక మన్ను మారిస్తాండ్రె సొహాన్.

30 నస్తివలె అప్పొసి, కొగ్రిమరిసి డగ్రు సొహండ్రె అయా వజనె వెప్టాన్. వాండ్రు, ఒబా, నాను సొన”, ఇజి వెప్టాన్ గాని సొన్వితాన్.

31 “యా రిఎర్ మరిసిర్ లొఇ అప్పొసి వెప్పొ వజి కితికాన్ ఎయెన్?”, ఇజి యేసు వరిజ్ వెన్బాతాన్. వారు, “పెరికాండ్రె”, ఇజి వెప్టాన్. యేసు వరిజ్ “పన్ను పెర్నికార్ని సానిదికెజ్ మిజి ఇంక ముజాల దేవుణు కిని ఏలుబడిఃదు సొనారలె ఇజి నాను మిజి నిజం వెప్పొన.

32 ఎందనిజ్ ఇహిజి యోహాను వాతాండ్రె, నీతి నిజాయిద్దాన్ బత్తిదెజ్ ఇజి మిజి సరి తోరిస్తాన్ గాని మీరు వన్నిజ్ నమిఇతిదెర్. పన్ను పెర్నికార్ని సానిదికెజ్ వన్నిజ్ నమ్మితార్. అయాకెజ్ సుడఃతిజ్బా మీరు మన్ను మరిసి మీరు కితి తపుజ్ ఒప్పకొడిఃజి డిసి సీజి వన్నిజ్ నమిఇతిదెర్”, ఇజి వెప్టాన్.

### పాలి సితి టోట కత

33 “మరి ఉండ్రె కత విండ్రు. బూమి మనికాన్ ఒరెన్ ఉండ్రె ద్రాసటోట ఉణుస్తాన్. దని సుటులం కోట తొప్టాన్. ద్రాక్కు పట్టు రసం లాగ్దెజ్ ఉండ్రె గానుగు తయార్ కిబిస్తాన్. కాప్కిదెజ్ ఉండ్రె ఎత్తుమని ఇలుబా తయార్ కితాన్. వెనుక అయ ద్రాక్కు టోట సెగొండార్ రయ్తురిజ్ పాలిదిజ్ సితాండ్రె పయనం కిజి మరి ఉండ్రె దేసెం సొహాన్.

34 పట్టు పండ్లి కాలమ్దు వన్ని వంతుజ్ లొస్తాజ్ ఇజి వన్ని పణి మన్నిరిజ్ పాలి అస్తి మని వరి డగ్రు పొక్తాన్.

35 పాలి అస్తిమనికార్ వన్ని పణి మన్నిరిజ్ అస్తారె ఒరెన్ వన్నిజ్ డెయ్తార్, ఒరెన్ వన్నిజ్ సప్టార్, మరి ఒరెన్ వన్నిజ్ పణికాణిజ్ డెయ్తార్.

36 మరి, వాండ్రు ముజాల పొక్తివరిజ్ ఇంక నండొండార్ పణిమన్నిరిజ్ పొక్తాన్. వరిజ్బా పాలి అస్తిమనికార్ అయావజనె కితార్.

37 “నా మరినిజ్ పొక్తిజి వన్నిజ్ వారు గవరం సీనారలె”, ఇజి వెప్టాండ్రె కడఃవెరిదు వన్ని మరిసిజ్ వరి డగ్రు పొక్తాన్.

38-39 గాని పాలి అస్తిమనికార్ మరిసిజ్ సుడఃతారె, “వీండ్రు యా తోటాదిజ్ అకు మనికాన్, రదు, మాటు వినిజ్సప్పి యా టోట మా సొంతదిక కినాట్”, ఇజి వన్నిజ్ అసి ద్రాక్కు తోటదిజ్ వెల్లి విసిర్తారె వన్నిజ్ సప్టార్.

40 అందెజె అయా ద్రాస టోట ఎజుమాని వానివలె అయ పాలి అస్తిమనివరిజ్ ఇనిక కినాన్? ఇజి వెన్బాతాన్.

41 “అయా సెఇవరిజ్ నండొ కటినమతి సావుదాన్ సప్పాన్. మరి పట్టు పండ్లి కాలమ్దు వన్నిజ్ సరియాతి వందుజ్ సీని రెయ్తురిజ్ ద్రాస టోట పాలిదిజ్ సీనాన్”, ఇజి వారు వెప్టాన్.

42 యేసు వరిజ్, “ ‘ఇలు తొప్పికార్ నెక్తి పొక్తి పణుకునె, మూలాదిజ్ బుర్ర పణకు ఆత మనాద్. యాక దేవుణు కీదాన్ జర్గితక. యాక మా కణకెజ బమ్మాతిక’, ఇజి దేవుణు మాటుదు రాస్తి మనిక మీరు ఎసెజ్బా సద్విఇతిదెరా?”.

43 అందెజె దేవుణు ఏలుబడిః కినిక మీ నడిఃమిహాన్ లాగ్గి దనిజ్ తగితి పట్టు సీని వరిజ్ సీనాన్”, ఇజి నాను మిజి వెహ్నన.

44 ఎయెన్బా యా పణుకు ముస్సు అర్తిజ వాండ్రు ముకెజ్ ఆనాన్. యా పణుకు ఎయెన్ ముస్సు అర్నాదొ వాండ్రు గుండ ఆనాన్”, ఇజి యేసు కత వెహ్ని వీజితాన్.

45 యేసు వెహ్ని కతెజ్ విహారె పెరి పుజెరిబుని పరిసయరు, వరి వందిజె వాండ్రు వెహ్ని మనాన్ ఇజి అర్దం కితార్.

46 వారు వన్నిజ్ కయదు కెదెజ్ ఉండ్రె ఉపాయ్ సుడఃతార్ గాని లోకుర్ విజెరె వన్నిజ్ ఒరెన్ ప్రవక్త ఇజి నమ్మితి వందిజ్ లోకురిజ్ తియెలాతార్.

## 22

### పెండ్లివిందు

1 యేసు మరి కతవజ వరిజ్ వెహ్నాన్

2 “దేవుణు కిని ఏలుబడిః ఇహిజ వన్ని మరిసి పెండ్లిదిజ్ విందు తయార్ కితిమని ఒరెన్ రాజుజ్ పోలిత మనాద్.

3 పెండ్లి విందుదిజ్ రదు ఇజి ముజుల వెహ్ని మహివరిజ్ కూక్కి తగాల్ ఇజి వాండ్రు వన్ని పణిమన్నిరిజ్ వరి డగ్రు పొక్తాన్. గాని వాదెజ్ ఒప్వితార్.

4 నస్తవలె వాండ్రు మరి సెగొండార్ పణిమన్నిరిజ్బా పొక్తాండ్రె, “పెండ్లి విందుదిజ్ రదు”, ఇజి ముజుల వెహ్నిమహివరిజ్, “నాను కోడ్డిజ్, బలస్తి పడెజ్ ఒహ్పిసి విజు తయార్ కిత మన. పెండ్లి విందుదిజ్ మీరు రదు ఇజి వరిజ్ వెహ్నాన్”, ఇజి వరిజ్ వెహ్నాన్.

5 వారు పణిమన్నిరిజ్ వెహ్ని మాటుదిజ్ కండెక్బా లస్యం కివిండ, ఒరెన్ వన్ని మడిఃజ సాహాన్ మరి ఒరెన్ వన్ని బేరమ్దిజ్ సాహాన్.

6 మహికార్ వన్ని పణిమన్నిరిజ్ అస్తారె మర్యాద లాగ్గి నస్తార్.

7 అయ రాజు నండొ కోపం ఆతాండ్రె వన్ని సయన్మద్దిజ్ పొక్కి వన్ని పణిమన్నిరిజ్ సప్తివరిజ్ కతిస్తాండ్రె, వరి పట్టుమ్దిజ్ సినుదాన్ ముటిస్తాన్.

8 వెనుక వాండ్రు పెండ్లి విందు తయార్ అత మనాద్, వన్ని పణి మన్నిరిజ్, “గాని ముజుల పెండ్లి విందుదిజ్ కూకెఆతి మహికార్ విందుదిజ్ వాదెజ్ తగ్గికార్ ఆవర్.

9 మీరు రస్త నహ్కాజ్ సొన్ని మిజి తోరినివరిజ్ విజెరిజ్” విందుదిజ్ రదు’ ఇజి కూక్తు”, ఇజి వెహ్నాన్.

10 అయ పణిమన్నిరిజ్ రస్త నహ్కాజ్ సాహారె వరిజ్ తోరితి నెగ్గివరిజ్, సెఇవరిజ్ కుడుఃప్పి, వరిజ్ తత్తెజ్ అట్టివరిజ్ విజెరిజ్ తత్తార్. పెండ్లి విందు సమ్డ నిండ్రెతార్.

11 నస్తవలె పెండ్లి విందుదిజ్ వాతివరిజ్ సుడఃదెజ్ రాజు వాతాన్. పెండ్లిసొక్క తొడుగివిండ పెండ్లి విందుదిజ్ అబ్బె బస్తమని ఒరెన్ వన్నిజ్ సుడఃతాన్.

12 రాజు వన్నిజ్, “ఓ, కూలాయెన్, పెండ్లిసొక్క తొడుగివిండ నీను ఎలాగ లొఇ వాతి?”, ఇజివెన్బాతాన్. వాండ్రు వర్గివిండ అలేత మహాన్.

13 నస్తవలె రాజు, “వినిజ్ కిక్కుకాల్కు తొహ్ని వెల్లి దూరమ మన్ని సీకటి బాడిఃదు విసీర్దు. అబ్బె వాండ్రు ఎలాకాలం అడఃబాజి, పల్కు కొహ్కొక్కిక మంజినాన్”, ఇజి వన్ని పణి మన్నిరిజ్ వెహ్నాన్.

14 “కూకె ఆతికార్ నండొండార్ గాని, ఎర్రె ఆతికార్ కొకొండారె.”

### కయనరిజ్ పను సీని వందిజ్

15 నస్తవలె పరిసయరు వెల్లి సొన్ని వాండ్రువర్గిని మాటుదాన్ యేసుజ్ తప్ప అస్తెజ్ ఇజి కుట్ర ఆజి మహార్.

16 వారు వరి సిసూరిజ్, హేరోదియరు\* జటుదివరివెట యేసు డగ్రు పొక్తార్. వారు సొన్ని, “బోద్ కినికి, నీను, మన్ను కద్దివిండ దేవుణు సరివందిజ్ నిజమ్దాన్ బోదినిని నెగ్గికి ఇజి మాపు నెన్నాప్. నీను లోకురి ఎలాగ మర్తికార్ ఇజి మొకొం సుడఃజి వరిజ్ సర్ల కిబిస్తెజ్ ఇజి వర్గినికి ఆఇ.

17 అహిజ కయనరుజ్ పను సీనిక నాయమా? నీను ఇనిక ఒడఃబిజిని? మజి వెహ్నాన్”, ఇజి వన్నిజ్ వెహ్నాన్.

\* 22:16 22:16 హేరోదియరు జటుదికార్ రోమదికార్ యూదురు ముస్సు కిని ఏలుబడిఃదిజ్ ఇస్టం కిత్తి యూదురు ఆతికార్. పరిసయరిజ్ని హేరోదియరిజ్ ఇని పొత్తు సిల్లెద్. గాని లోకుర్ యేసుప్రబుజ్ ఇస్టమానిదన్నిజ్ తియెలాజి మహార్.

- 18 యేసు వరి సెజ బుద్ధిదిజ్ నెస్తాండ్రె, “వేసం కినికిదేరా! ఎందనిజ్ నాను వహ్ని మాటదాన్ నజి అస్తెజ్ సుడేజినిదెర్?  
 19 పన్ను సీని ఉండ్రీ కాసు నజి తోరిస్తు”, వారు ఉండ్రీ దినారం వన్ని డగ్రు తతార్.  
 20 “దిని ముస్కు మని బొమ్మ ఎయెర్ది? రాస్తిమని రాంత ఎయెర్ది?”, ఇజి వాండ్రు వరిజ్, వెన్బాతాన్.  
 21 వారు, “కయిసురుది”, ఇజి వెహ్తార్. నస్తివలె వాండ్రు, “కయిసురుది కయిసురుజ్ సీదు, దేవుణుది దేవుణుదిజ్ సీదు”, ఇజి వరిజ్ వెహ్తాన్.  
 22 యా మాట వెంజి బమ్మ ఆతారె వారు వన్నిజ్ డిస్త సాహార్.  
 23 సాతికార్ మర్జి నిజ్నిక సిల్లెద్ ఇజి నదుకయరు వెహ్నినార్. వారు అయా రోజుదునె వన్నిడగ్రు వాజి ఈహు వెన్బాతాన్.  
 24 “బోదకినికి, ఒరెన్ కొణ్డోర్ సిల్లెండ సాతిజ వన్ని తంబెరి సాతివన్ని ఆల్నిజ్ పెండ్లి ఆజి సాతివన్ని వందిజ్ కొణ్డోర్ పుటిస్తెజ్ వలె ఇజి మోసె రాస్తి సీతి రూలుదు మనాద్.  
 25 మా నడిమి ఏడు గురు తంబేర్జు మహార్. పెరికాన్ పెండ్లి ఆతాండ్రె సాతాన్. వన్నిజ్ కొణ్డోర్ సిల్లెర్ కక వన్ని తంబెరి సాతివన్ని ఆల్నిజ్ ఇడె: ఆతాన్.  
 26 నడిమి వాండ్రుని కొగ్రి నడిమి, అయా లెకెండెన్ వీన్ కొణ్డోదాక విజేరె దనిజ్ పెండ్లి ఆజి సాతాన్.  
 27 కడెవేరిదు అయా బోదెల్ బా సాతాద్.  
 28 అహిజ సాతి వరిబాణిజ్ మర్జి నిజ్ని వెలె యా ఏడుగురు లోఇ ఎయెరిజ్ అది ఆల్ని ఆనాద్ లె? ఇనిక ఇహిజ బత్తిజిమహివలె అది ఏడుగురుదిజ్ బా ఆల్ని ఆత మహాద్ గదె?”, ఇజి వెన్బాతాన్.  
 29 యేసు వరిజ్, “దేవుణు మాట ఇజి, మీరు నెన్ ఇదెర్ దేవుణు సత్తు ఎస్సా ఇజి మీరు నెన్ ఇదెర్ అందెజె అర్లం కివండ మీరు నండో తప్పమాటెజ్ వెహ్నినిదెర్.  
 30 ఎందనిజ్ ఇహిజ, సాతి విరబాణిజ్ మర్జి నిజ్ని వెలె ఎయెర్ బా పెండ్లి ఆవర్, పెండ్లిదిజ్ సివర్. వారు పరలోకామ్ ది దేవుణుదూతెజ్ లెకెండ మంజినార్.  
 31-32 సాతికార్ మర్జి నిజ్ని వందిజ్ దేవుణు మిజి వెహ్ని మనిక మీరు ఎసెజ్ బా సద్విఇతిదెరా? నాను అబ్రాహము దేవుణు, ఇస్సాకు దేవుణు, యాకోబురి దేవుణు ఇజి వాండ్రు సాతి వరి దేవుణు ఆవన్, బత్తిజిని వరి దేవుణునె”\*, ఇజి వెహ్తాన్.  
 33 అయ మాట విహారె వన్ని బోద వందిజ్ లోకుర్ బమ్మ ఆతార్.  
**పెరి ఆడ్ర**  
 34 యేసు నదుకయరు వెయ్ కు మూక్తాన్ ఇజి విహారె పరిసయరు కూడేజి వాతార్.  
 35-36 వరి లోఇ ఒరెన్ దేవుణు రూలుజ్ నెగెండె నెస్తికాన్, “ఓ బోదకినికి దేవుణు సీతి ఆడ్రెజి లోఇ పెరి ఆడ్ర ఇనిక?”, ఇజి వన్నిజ్ పరికృ కిదెజ్ వెన్బాతాన్.  
 37 యేసు వన్నిజ్, “నీ పూర్తి మన్నుదాన్, నీ పూర్తి ఆత్మదాన్, నీ పూర్తి పాణమ్ దాన్ నీ ప్రబు ఆతి దేవుణుదిజ్ ప్రేమిస్తెజ్.\*  
 38 యాకాదె గొప్ప ముక్కెలమతికని, మరి మొదోహి ఆడ్ర.  
 39 రుండి ఆడ్ర ఇనిక ఇహిజ, “నీను నిజి ప్రేమిస్తి లెకెండ మహి వరిజ్ బా ప్రేమిన్ అ.\*  
 40 దేవుణు సీతి రూలుజ్ ని ప్రవక్తరు వర్గితి మాటెజి పునాది ఆతిక యా రుండి ఆడ్రెజ్”, ఇజి వరిజ్ వెహ్తాన్.  
 41-42 పరిసయరు కూడితి మనివెలె యేసు వరిజ్ సుడేజి, క్రీస్తు వందిజ్ మీరు ఇనిక ఒడేబిజినిదెర్? వాండ్రు ఎయెర్ ది కుటుమ్ దికాన్ ఆనాన్? ఇజి వెన్బాతాన్. “వాండ్రు దావీదు రాజు తెగ్గదికాండ్రె”, ఇజి వారు వెహ్తార్.  
 43-44 అయాలెకెండ మహిజ మీరు నిజం వెహ్నినిదెర్. “నాను నీ పగాతి వరిజ్ నీ పాదమ్ క అడిగి ఇడ్మిదాక నీను నా ఉణెర్ పడకాదు బసి మన్ అ. ఇజి ప్రబు నా ప్రబు వెట వెహ్తాన్.\* యా లెకెండ దేవుణు ఆత్మదాన్ దావీదు వర్గితివలె వన్నిజ్ ఎలాగ ప్రబు ఇజి కూక్కినాన్?  
 45 దావీదు వన్నిజ్ ప్రబు ఇజి కూక్కిజ్, వాండ్రు ఎలాగ వన్ని మరిసి ఆనాన్?”, ఇజి వాండ్రు వరిజ్ వెన్బాతాన్.  
 46 ఎయెర్ బా మర్జి ఉండ్రీ మాటబా వెహ్తాజ్ అట్ ఏతార్. అయా రోజుదాన్ వన్నిజ్ ఇనికబా వెన్బాదెజ్ ఎయెరిజ్ బా దయరం సాల్ ఏతాద్.

## 23

### ఏడు కస్టమ్ కు

\* 22:31-32 22:31-32 నిర్గమ 3:6. \* 22:37 22:37 ద్విత్తి 6:5. \* 22:39 22:39 లేవి 19:18. \* 22:43-44 22:43-44 కీర్తన 110:1.

1 నన్నివలె యేసు లోకురిజ్‌ని వన్ని సినుర్‌జ ఈహు వెహ్లాన్.

2 యూదురి రూలుజ్ నెస్పిస్పికార్‌ని పరిసెయరుజ్, ముందాల మోసెజ్ మహి లెకెండ్ అతికారమ్‌దాన్ దేవుణు సీతి రూలుజ్ నెస్పిస్పెజ్ అక్కు మనికార్.

3 అందెజె వారు మిజి వెహ్లా విజు వనకాజ్ లోజిజి అయాలెకెండ్ కిదెజ్‌వెలె. గాని వరి పణిజ సుడేజి, వరి లెకెండ్ కిమాట్. ఎందనిజ్ ఇహిజ వారు వెహ్లా గాని అయ లెకెండ్ కివీర్.

4 లోకుర్ గుజమ్‌దు పిండెజ్ అట్‌ఇ నని బరుజ్ తోహ్ని ఇడ్ని లెకెండ్ మని పెరి పణిజ్ కిదెజ్ ఇజి బలవంతం కినార్ గాని ఉండ్రె డెస్కుదాన్ కడ్లెస్పెజ్ అట్టి సుల్‌కాని బరు లెకెండ్‌మన్ని ఇజిరి సాయమ్‌బా వారు కివీర్.

5 లోకుర్‌సూణి వందిజె వారు విజు పణిజ్ కిజినార్. దేవుణు మాటెజ్‌రాస్తి ఇట్టి ఇజిరి పెట్టెదిజ్\* పెరిక కిజినార్. మరి వరి సొకెజాణి† అన్నజ్ పెరికెజ్ కిజినార్.

6 విందుదు వారు ముకెలమాతి బాడిజ్ కోరిజినార్. యూదురు మీటిజ్ కిని ఇల్కాజ్ బస్తెజ్ ఇజి వారు ముకెలమాతి బాడిజ్ కోరిజినార్.

7 సతెజ నడిజిమి వారు లోకుర్ వెల మాడిజె ఆదెజ్, బోదకినికార్ ఇజి కూకె ఆదెజ్ కోరిజినార్.

8 గాని మీరు ఇహిజ, 'బోదకినికి' ఇజి కూకె ఆమాట్. ఎందనిజ్ ఇహిజ దేవుణు ఒరేండ్రె మి బోదకినికాన్ మీరు విజిదెరి అన్నతంబేర్‌జు.

9 బూమి ముస్కు ఎయెరిజ్‌బా బుబ్బ ఇజి పేరు ఇడేమాట్. దేవుణు ఒరేండ్రె మీ బుబ్బ. వాండ్రు పరలోకామ్‌దు మనాన్.

10 మీరు ఎయిదెర్‌బా నెస్పిస్పికి ఇజి కూకె ఆమాట్. ఎందనిజ్ ఇహిజ క్రిస్తు ఒరేండ్రె మిజి నెస్పిస్పికాన్.

11 మీ లొఇ విజేరిజ్ ఇంక పెరికాన్, విజేరిజ్ పణిమన్ని ఆదెజ్‌వెలె.

12 ఎయెర్‌బా వన్నిజ్ వాండ్రె పెరికాన్ కితిజ వాండ్రు ఇజిరికాన్ ఆనాన్. ఎయెన్‌బా వన్నిజ్ వాండ్రె తగె ఆతి మహిజ వాండ్రు పెరికాన్ ఆనాన్.

13 వేసం కినికిదెరాతి పరిసయరుజ్‌ని ఊదురు రూలుజ్ నెస్పిసినికిదెరా! అబయా, మిజి ఎసొనొ కస్టమ్‌కు వానె. ఎందనిజ్ ఇహిజ లోకుర్ దేవుణు ఏలుబడిజు సొన్‌ఎండ వరి ఎద్రు సేప్లాజ్ కెహ్ని పొక్కినిదెర్. మీరె సొన్‌ఇతిదెర్. సొండ్రెజ్ సుడేజి మహి వరిజ్ సరి సిఇతిదెర్.

14 వేసం కినికిదెరాతి పరిసయరుజ్‌ని యూదురు రూలుజ్ నెస్పిసినికిదెరా, అబయా, మిజి ఎసొనొ కస్టమ్‌కు వానె. మీరు సిగు సిల్లెండ రాండి బోదెకాజ్ మొసెం కిజి మిజి లాబం తప్పిసినిదెర్ మీరు ఎలాగమర్తికార్ ఇజి సస్తెజ్ ఆవద్ ఇజి మీరు లోకుర్ ఎద్రు లావ్ నీరిండ్ మన్ని పార్లనం కిజినిదెర్. దన్నివందిజ్ మిజి పెరి సిక్కు వానాద్దె.

15 వేసం కినికిదెరాతి పరిసయరుజ్‌ని యూదురి రూలుజ్ నెస్పిసినికిదెరా, అబయా! మిజి ఎసొనొ కస్టమ్‌కు వానె. ఒరెన్ వన్నిజ్ మీవెట కుడుపైజ్ మీరు నమ్‌దరం డాట్టి బూమి విజు బూలాజినిదెర్. ఒరెన్ మీ వెట కూడిజితిజ, వన్నిజ్ ఎల్లకాలం సిసు మంజిని బాడిజు సొండ్రెజ్, మిజి ఇంక రుండి వంతుజ్ తగ్గి ననికాన్ తయార్ కిజినిదెర్.

16 యూదురు రూలుజ్ నెస్పిసినికెదెర్ ఆతి మీరు లోకురిజ్ నెగ్గిసరి తోరిస్టెజ్ మన్నికిదెర్, గాని మీరు మహివరిజ్ సరి తోరిసిని గుడ్డిదికార్ లెకెండ్ మన్నిదెర్ అబయా! మిజి ఎసొనొ కస్టమ్‌కు వానె. ఒరెన్ దేవుణు గుడి: తోడు: ఇజి పరవణం కితిజ, అయ పరవణమ్‌దాన్ వాండ్రు తప్పె ఆదెజ్ ఆనాద్. గాని దేవుణు గుడి: లొఇ మని బజారం తోడు: ఇజి ప్రమాణం కితిజ వాండ్రు అయ ఒపుమానమ్‌దాన్ తప్పె ఆదెజ్ అట్‌వన్ ఇజి మీరు నెస్పిసినిదెర్.

17 గుడ్డియాతి బుద్ది సిలికిదెరా! ఎమేణిక పెరిక? దేవుణు గుడి:దు మని బజారమ్‌నా, సిలిజ బజారమ్‌దిజ్ దేవుణు వందిజ్ కేట కిత్తక ఇజి కిజిని దేవుణుగుడి:నా?

18 మరి ఎయెన్‌బా సంద సుర్ని మాలి పీట తోడు: ఇజి ప్రమాణం కితిజ, వాండ్రు అయ ప్రమాణమ్‌దాన్ తప్పె ఆదెజ్ అట్టాన్. గాని దని ముస్కు మని పూజ సితి వనకాజ్ తోడు అసి ప్రమాణం కితిజ వాండ్రు అయ ప్రమాణమ్‌దాన్ తప్పె ఆదెజ్ అట్‌వన్ ఇజి మీరు నెస్పిసినిదెర్.

19 యూదురు రూలుజ్ నెస్పిసిని గుడ్డిదికార్ లెకెండ్ మన్నికిదెరా! ఎమేణిక పెరిక? పూజ సితికాదా? సిల్లిజ పూజ సితిదన్నిజ్ దేవుణు వందిజ్ కేట కిత్తిలెకెండ్ కిజిని సంత సుర్ని మాలి పీటనా?

\* 23:5 23:5 యా ఇజిరి పెట్టెజ్ తొలుదాన్ తయార్ కిత్తికెజ్ దన్ని లొఇ వడా:య ఒపుమానమ్‌దు మన్ని సగం మాటెజ్ రాసి ఇడ్డి మంజినార్. నిర్గమ 13:1-10, 13:11-16. ద్వితి 6:4-9, 11:13-21. దేవుణు మాటదు రాస్తి మన్నికెజ్ ద్వితి 6:8, 11:18. యా లెకెండ్ లోజిజి మంజినావ్ ఇజి తోరిస్టెజ్ 12 వయుస్సు డాట్టి మొగ్గకొణొర్ యాపెటి ఉండ్రె వరి నొద్రుదని మరి ఉండ్రె పెటి డేబ్ర కియుదుబా తొహ్ ఆజి మహార్. ముకెలం పార్లనం కినివలె ఆహె కిజి మహార్. † 23:5 23:5 యూదురు అతికార్ దేవుణు పణికినికార్ ఇజి తోరిఆదెజ్, మరి దేవుణు సిత్తి ఆడ్రెజ్ ఎత్తు కిబిస్తిలెకెండ్ ఉండ్రె నీలి రంగు సొల్వ నన్నిక పొర్పాజి మహార్. యాక పొర్పాదెజ్ ఇజి వరిజ్ ఆడ్రె సిత్త మహాన్ సంక్య 15:37-41, ద్వితి 22:12. గాని యూదురిజ్ రూలుజ్ నెస్పిసినికార్‌ని పరిసయరుజ్ వారు గొప్ప నెగెండ్ దేవుణుదిజ్ లోజిజినికార్ ఇజి తోరిస్టెజ్ అక్కిజ్ గొప్ప పెరిక పొర్పాజి మహార్.

20 అందెజె సంత సుర్ని మాలి పీట తోడుః అసి ప్రమాణం కినికాన్ సంద సుర్ని మాలి పీటదిజ్ మరి దని ముస్కు మన్ని విజు వనకాజ్ తోడు అసి ప్రమాణం కిజినాన్.

21 మరి దేవుణు గుడిః తోడు అసి ప్రమాణం కినికాన్, దేవుణు గుడిఃదిజ్ని దని లొఇ మంజిని విజు వనకాజ్ని బాన్మంజిని దేవుణుదిజ్ తోడు అసి ప్రమాణం కిజినాన్.

22 పరలోకం తోడు ఇజి ప్రమాణం కినికాన్, దేవుణు బస్సి సింహాసనమ్దిజ్ని దని ముస్కు బసి మంజిని దేవుణుదిజ్బా తోడు అసి ప్రమాణం కిజినాన్.

23 వేసం కినికిదెరాతి పరిసయరుజ్ని యూదురి రూలుజ్ నెస్సిస్సికిదెరా, అబయా మిజి ఎసోనొ కస్టమ్కు వానె. మీరు పొదిన కుసాదాన్, సోపుదాన్, జలకారదాన్‡ దేవుణుదిజ్ దసమ్బాగం<sup>†</sup> సీజినిదెర్. గాని నాయం, కనికారం, దేవుణు ముస్కు మని నమకం నన్ని దేవుణు సిత్తి రూలుదుమన్ని ముకెలమతి మాటెజ్ మీరు నెక్కి పొక్కినిదెర్. రుండిబా ఉండ్రె లెకెండ్ కిజి మంజినిక ఇహిజ ఒదె నెగెండ్ మహాద్ మరి.

24 సరి తోరిస్సి గుడ్డిదికిదెరా! ఉణిదని లొఇ డోమెజ్ అర్తి మహిజ మీరు జాలిస్సిదెర్. గాని ఒంటె ననికెజ్ అర్తిజ అక్క నెస్సెజ్ సిల్లెద్ ఇజి అయాలెకండ్నె డిజ్నికిదెర్ మీరె.

25 వేసం కిజినిదెర్ ఆతి, యూదురి రూలుజ్ నెస్సిస్సికిదెరా, పరిసయరుజాండె, లోకుర్ ముస్కుహాన్ మిడిఃస్తి ఇడ్డిగిన్నెజ్ని కుడుకెజ్ లెకెండ్ మన్నికిదెర్. మీరు మీరుబా వెల్లిహాన్ సుడిఃతిజ నెగ్గివరిలెకెండ్ తోరె ఆజినిదెర్. గాని మీ మన్ను నిండ్రు సెఇ బుద్దిజ్ని సెఇఉదెసమ్కు, మరి నాను గణస్తెజ్ విజు నజినె ఇజి ఒడిఃబిని వరిలెకెండ్నె.

26 గుడ్డి ఆతి పరిసయ వాండ్రు ముజాల మీరు మన్ను నెగెండ్ కిదు, అయావెలె మీరు లొఇని వెల్లి మిడిస్తి మని కుడుకెజ్ని గినెజ్లెకెండ్ ఆనిదెర్.

27 వేసం కినికిదెరాతి, యూదురి రూలుజ్ నెస్సిస్సికిదెరా, పరిసయరుజాండె, వెల్లిదాన్ సుడిఃతిజ మీరు గొప్ప సోకుమని సున్నం డెయ్తి మని దూకి ననికిదెరె! దూకి లొఇ సాతి వరి డుమ్ము మరి విజు సెఇకెజ్ మన్నిలెకెండ్ మీరుబా మన్నిదెర్.

28 అయా లెకెండ్నె మీరు వెల్లి సుడిఃతిజ నాయం మనికిదెర్ ఇజి తోరె ఆజి నిదెర్. గాని లొఇ మీరు బక్తి మనికాప్ ఇజి పొజిజి నికిదెర్, సెఇ బుద్దిదాన్ నిండ్రెతి మన్నికిదెర్.

29 వేసం కినికిదెరాతి యూదురి రూలుజ్ నెస్సిస్సికిదెరా, పరిసయరుజాండె, మిజి ఎసోనొ కస్టమ్కు వానె. మీరు దేవుణు ప్రవక్తరు దూకిజ ముస్కు సమాది తొహ్ని, నీతినిజాయి మన్ని వరి సమాది ముస్కు సోకు కిజినిదెర్.

30 అనిగొగొర్ కాలమ్దు మాపు మంజినిక ఇహిజ, వారు దేవుణు ప్రవక్తరిజ్ సప్తి మహివలె వరివెట మాపు కూడ్ఃఎతాప్ మరి ఇజి మీరు వెహ్ని మంజినిదెర్.

31 అందెజె దేవుణు ప్రవక్తరిజ్ సప్తి మహి వరి మరిసీర్ ఇజి మీ మాటదానె మిజి మీరె సాసెం వెహె ఆజినిదెర్.

32 అందెజె మీ అనిగొగొర్ కితి పాపమ్దు తకు మనిక మీరు పూర్తి కిదు.

33 సరాన్ ననికిదెరా! సరాస్కు కొణొఃర్నని మీరు ఎలాగ ఎలాకాలం సిను మంజిని బాడ్డిదాన్ తప్పె ఆనిదెర్.

34 అందెజె నాను, ప్రవక్తరుజ్ని బుద్దిమని వరిజ్, బోద కిని వరిజ్ మీ నడిఃమి పొక్కిన. సెగొండారిజ్ మీరు సప్పిదెర్, మరి సెగొండారిజ్ మీరు సిలువ పొక్కిదెర్, మరి సెగొండారిజ్ యూదురు మీటిజ్ కిని ఇల్కాణిజ్ కొర్డెజిణిజ్ డెయ్తిజి ఉండ్రె పట్టుమ్దాన్ మరి ఉండ్రె పట్టుమ్దు ఉల్పిదెర్.

35 నీతి నిజాయి మనికాన్ ఆతి ఏబెలు నలదాన్ మొదోల్సి, దేవుణు గుడిఃదిజ్ని సంత సుర్ని మాలి పీటదిజ్ నడిఃమి మీరు సప్తి మహి బెరాకియ మరిసి ఆతి జెకరియదాక, నీతి నిజాయి మన్నికారాతి విజేరిజ్ సప్పివరి నల బూమి కారిస్తి మన్ని వందిజ్ సిక్కి మీ ముస్కునె వానెలె.

36 యా సిక్సెజ్ విజు యా తరమ్ది వరి ముస్కునె వానె ఇజి నాను మిజి నిజం వెహ్నిన.

37 ఒ యెరూసలేమా, యెరూసలేమా నీను ప్రవక్తరుజ్ సప్పికి, నీ డగ్రు పొక్తివరిజ్ పణకాణిజ్ డెయ్నికి, ఉండ్రె కొరు దని పిలెకాజ్ కుడుఃప్పి దని రెకెజి అడ్డి ఇడ్డి లెకెండ్, నీ కొణొఃరిజ్ కుడుఃప్తెజ్ ఇజి నాను ఎసొడు సుట్కునో ఆస్స ఆత మన్ను, గాని నిజి ఇస్టం సిల్లెండ మహాద్.

38 ఇదిలో దేవుణు వన్నిగుడిః డిఃసి సినానె, అందెజె అక్క కాలి మంజినాద్.

39 ప్రబు సిత్తి అతికారమ్దాన్ ఆనికాన్”\* ఇజి నీను వెహ్నిదాక నజి నీను మరి సుడిఃఇ, ఇజి నాను నిజి నిజం వెహ్నిన.”

‡ 23:23 23:23 పొదిన, సోపు, జలకార ఇక్సెజ్ విజు కరిదికెజ్ ఆఉ ఇక్క తిండిదిజ్ రుసి కూడుఃజ్ ఇజి వంట కినివలె కలప్పికెజ్. § 23:23 23:23 అబ్రహామునె తొలిత దసమ్బాగం సిత్తిలెకెండ్ పడాఃయ ఒప్పమాసమ్దు రాస్స మనాద్. ఆది 14:20. వెనుక ఇస్రాయెలు లోకుర్ వరిజ్ దొహ్క్కి వనక లొఇ దసంబాగం సీదిజ్ ఇజి దేవుణు ఆడ్రె నిజ్తాన్. దసంబాగం ఇహిజ పది లొఇ ఉండ్రె. \* 23:39 23:39 కీర్తన 118:26.



## 24

## తరమదిజ్ ఆక్కర్దిజ్ గుర్తు.

1-2 యేసు దేవుణు గుడిదాన్ సోతాండ్రె దూరం సొన్ని మహిజ్, సిసూర్ వన్ని డగ్రు వాతారె, దేవుణు గుడి వందిజ్ కూక్కుసాప్పి గొప్పజ వర్గిజి మహార్. వాండ్రు వరిజ్, “మీరు యాకెజ్ విజు సుడేతిదెర్. గాని ఇక్క ఉండ్రీ పణకు ముస్సు మరి ఉండ్రీ పణకు నిల్పి మన్విండ ఆహె ఆనాద్లె, ఇజి నాను మిజి నిజు వెహ్సిన”, ఇజి వెహ్సాన్.

3 యేసు ఒలివ మరెక్ మని గొరొన్ముస్సు బస్తి మహివలె, మరి ఎయెర్ డగ్రుసిల్లెండ మహివలె, సిసూర్ వన్ని డగ్రు వాతారె, “యాకెజ్ ఎసెజ్ జర్గినె? నీను మర్జి వానిదనిజ్, మరి యా తరమదిజ్ ఆకర్దిజ్ గుర్తుజ్ ఇనికెజ్? మజి వెహ్సాన్”, ఇజి వెన్బాతారె.

4 యేసు వరిజ్ ఈహు వెహ్సాన్. “ఎయెన్బా నిజి మోసెం కివిండ జాగర్త సుడేజి మండ్రు.

5 ఎందానిజ్ ఇహిజ నండొండార్ వాజి, నా పేరు ఇడె ఆజి, “నానె క్రీస్తు” ఇజి వెహ్సాన్ నండొండారిజ్ మోసెం కినార్.

6 మీరు విదెమ్కు వందిజ్ వెనిదెర్లె. మరి విదెమ్కు వానెలె ఇజి సాటిస్సికబా వినిదెర్లె. అయావలె తియెల్ ఆవిండ మండ్రు. యాకెజ్ విజు జర్గిదెజ్వెలె. గాని యాక ఆక్కర్ ఆవిద్.

7 లోకుర్ ముస్సు లోకుర్ని దేసెమ్కాజ్ ముస్సు దేసెమ్కు పగ ఆజి మంజినె. అబ్బె ఇబ్బె నండొ నాహ్కాజ్ కరు, బూమి కర్గినికెజ్ వానెలె.

8 యాకెజ్ విజు ఉండ్రీ బోదెలి కీదు అసైజ్ ముజాల వాని నొప్పి మొదోల్స్తి లెకెండె.

9 నస్తివలె లోకుర్ మిజి అసి తోహ్సా హిమ్మెజ్ కిజి సప్తెజ్ ఒపజెప్పార్లె. నా ముస్సు నమకం ఇట్టి వందిజ్ లోకామ్దు మన్ని విజు జాతిదికార్ మిజి ఇన్లం కివిండ ఆనార్.

10 నండొండార్ వరి నమకం డిన్న సీనార్లె. ఒరెన్ మరి ఒరెన్ వన్నిజ్ మోసెం కినాన్. ఒరెన్ మరి ఒరెన్ వన్నివెట పడివిండ ఆనాన్.

11 నండొండార్ డొజ ప్రవక్తరు వాజి తప్ప బోదెజ్ నెస్సిసి లోకురిజ్ తప్ప సర్దు నడిపిసి, నండొండారిజ్ మోసెం కినార్.

12 దేసెమ్ది రూలుజ్ లోజివిండ బత్తిజినికార్. ఆజినిజ్ లోకుర్ ప్రేమ సిల్లికార్ ఆనార్. మహివరిజ్ ప్రేమిస్సి ప్రేమ సిల్లెండొజి మంజినార్.

13 గాని ఆక్కర్దాక కస్టమ్కు ఓరిసిని వన్నిజ్ దేవుణు రక్కిస్సాన్లె.

14 దేవుణు ఏలుబడి కిని వందిజ్ సువార్త బూమి ముస్సు మని లోకాజ్ విజు ఉండ్రీ సాక్సెం లెకెండె వెహె అనాద్లె. నస్తివలె యా తరమదిజ్ ఆక్కర్ వానాద్.

15 ప్రవక్త ఆతి దానియెలువెట దేవుణు ముజాల వర్గితి మహి లెకెండె, “నాసనం కిని సెఇక ఆతిక”\* దేవుణు గుడిదు నెగ్గి బాడిదు నిల్పి మంజనిక సూణివెలె (యాక సద్వినికాన్ నెసి అర్దం కిదెజ్) అయ గడియ వానాద్లె.

16 నస్తివలె యూదయ దేసెమ్దు మంజనికార్ గొరొకాజ్ ఉహ్కెజ్ వలె.

17 మిదె ముస్సు మంజనికాన్ ఇండ్రొణిజ్ ఇనికబా వెల్లి ఒతెజ్ ఇజి డిగ్గెజ్ ఆవిద్.

18 మడిజ మంజనికాన్ వన్ని సాల్వెజ్ ఒత్తెజ్ ఇజి ఇండ్రొ వాదెజ్ ఆవిద్.

19 అయ దినమ్కు కొండొరిజ్ పాలు ఉట్టిస్సి అయ్సికాజ్, పొటాదు మన్ని బోదెకాజ్ ఎస్సానొ కస్టమ్కు మన్నికెజె.

20-21 అయాకెజ్ ఉండ్రీ పినికాలమ్దునో, రోమ్ని దినమ్దునో రెవిండ ఆపిద్ ఇజి పార్దనం కిజి మండ్రు. ఎందానిజ్ ఇహిజ, లోకం మొదోల్స్తి బాణిజ్అసి ఏలుదాక రెజ నని కస్టమ్కు వానె. అందెజి అయా కస్టమ్కాణిజ్ తప్తె ఆదెజ్ ఇజి మీరు ఉహ్కాక్కి సొనిక ఉండ్రీ పిన్నికాలమ్దునో, విస్రాంతిదినమ్దునో\* ఆవిండ మండ్రెజ్ ఇజి పార్దనం కిజి మండ్రు.

22 అయా కస్టమ్కు మన్ని దినమ్కు తక్కు కిదెజ్ ఇజి దేవుణు ఒడేబిఎండ మహిజ బూమి ముస్సు మన్నకాన్ ఎయెన్బా తప్తె ఆదెజ్ అట్ఎన్. గాని దేవుణు ఎర్లిస్తి మన్ని వరి వందిజ్ అయా దినమ్కు తక్కు కినాన్లె.

23 అయా కాలమ్దు ఎయెన్బా మిజి, “ఇదిలో క్రీస్తు ఇబ్బె మనాన్”, సిల్లిజ, “వాండ్రు అబ్బె మనాన్” ఇజి వెహ్సాజి వరి మాటెజ్ అస్సాట్.

24 నస్తివలె డొజక్రీస్తుర్, డొజ ప్రవక్తరు వాజి నండొ బమ్మాతి పణిజ్, ముజాల ఎసెజ్బా తోణ నని బమ్మాతి పణిజ్ కిజి, అట్టిజ దేవుణు ఎర్లిస్తి మన్నివరిజ్బా మోసెం కిదెజ్ సూణార్.

25 జాగర్త మండ్రు! ఏలె అక్కెజ్ ఇనిక్కెజ్బా జర్గినె ముజాలె నాను మిజి వెహ్సా మన.

\* 24:15 24:15 దాని 9:27; 11:31; 12:11. \* 24:20-21 24:20-21 పిన్నికాలమ్దు గొప్ప పెరి పిరు వాజి మహాద్. అందెజి విజుబాన్ గడ్డెజ్ నిండ్రెజి మన్నిజ్ పిన్నిదిజ్ పయనం కిదెజ్ గొప్ప కస్టమాజి మంజినాద్ మండ్రెజ్ బాడ్డి దొహ్కెజ్నో, తిండి దొహ్కెజ్నో గొప్ప కస్టమాజినాద్ యూదురి రూలుజ్ వజి విస్రాంతిదినమ్దు మూడు నాలేగి మయిలుదిజ్ లావ్ దూరం పయనం కిదెజ్ ఆవిద్ ఇజి మహాద్.

26 అందెజె ఎయెస్బా, “ఇవిలోన్ వాండ్రు అబ్బె బిడిఃమ్బూమిదు ప్రాంతమ్దు మనాన్’ ఇజి వెహ్టిజ్బా మీరు సొన్మాట్. సిల్లిజ, “ఇవిలోన్ వాండ్రు ఇబ్బె గొనె మనాన్’ ఇజి వెహ్టిజ్బా నమ్మిమాట్.

27 ఎందానిజ్ ఇహిజ, మిర్పినిక ఎలాగ తూర్పుదాన్ పడమర దాక తోరె ఆజినాదొ, అయలెకెండెన్ లోకు మరిసి ఆతి నాను వానివలెబా మంజినాద్,

28 డేగెజ్ వానివలె పినుగుజ్ మంజినె ఇజి గుర్తు కిదెజ్ అట్టిలెకెండెన్ యేసు వానిదన్నిజ్బా టెటాజ్ తోర్పి గుర్తుజ్ మంజినె.

29 అయా కస్టమ్కు మని దినమ్కు వీజితివెటనె, “పొద్దు సీకటి ఆనాద్, నెల జాయ్ సివద్, ఆగాసమ్దు మని సుక్కెజ్ రాల్తై. ఆగాసమ్దు మన్నిలావరకమ్ది సత్తు మన్నికెజ్ కద్దినె.✱

30 నస్తవలె లోకుమరిసి ఆతి నాను వానిదనిజ్ గుర్తు ఆగాసమ్దు తొర్నాద్. బూమి ముస్కు మని నండొ తెగ్గెజాణికార్ గుండె కొత్తె ఆజి అడఃబనార్. నస్తవలె లోకుమరిసి ఆతి నాను గొప్ప సత్తుదాన్ దేవుణు జాయ్దాన్ ఆగాసమ్దు మని మొసాపు ముస్కు వానిక వారు సూణార్లె.

31 జోడుబంకెజి జాటుదాన్ నాను నా దూతెజ్ పొక్కు. వారు ఆగాసమ్దు యా కొసాదాన్ అయా కొసాదాక నాల్గి దిక్కుజాణిజ్ దేవుణు ఎర్లిస్తి మన్ని వరిజ్ ఉండ్రెబాన్ కినార్.

32 ఇదిలో బొడె మరాన్దిజ్ సుడఃజి యాక మీరు నెస్తు. బొడె మరాన్ ఆకు రాల్లి సిగ్రిస్సివెలె, ఎండ కాలం డగ్రు ఆతాద్ ఇజి మీరు నెసినిద్దెర్.

33 అయలెకెండెన్ మీరు యాకెజ్ విజు జర్గినిక సూణివెలె, నాను దారబంద్రమ్దునె మన్న ఇజి మీరు నెస్తు.

34 యాకెజ్ జర్గినిదాక యా తరమ్దికార్ తవ్విండ బత్తిజినె మంజినార్ ఇజి నాను మిజి నిజం వెప్పిన.

35 ఆగాసమ్ని బూమిబా సిల్లెండ ఆనె, గాని నా మాటెజ్ఎసెజ్బా అయలెకెండెన్ సొన్ఉ.

36 అయ దినం వందిజ్అయ గడియ వందిజ్ ఎయెర్బా నెన్వర్. పరలోకామ్దు మన్ని బుబ్బాతి దేవుణు ఆవిండ దేవుణు దూతార్ గాని మరిసిబా నెన్వన్.

37 నోవాహు కాలమ్దు ఎలాగ మనెనొ, అయలెకెండెన్ లోకుమరిసి ఆతి నాను వానికబా మంజినాద్.

38 గడ్డ నిండ్రిని ముజాల నోవాహు ఓడః లొఱ డుఃగితిమహి దినమ్ దాక లోకుర్ ఉణిజి, తింజి, పెండ్లి ఆజి, పెండ్లిదిజ్ సీజి మహార్†.

39 బూమి విజు ముడిఃగ్గిని లెకెండె గడ్డ నిండ్రిజి విజేరిజ్ పేర్ది ఒతిదాక, ఇనిక జర్గినాద్లె ఇజి వారు నెన్విండ మహార్. అయా లెకెండెన్ లోకుమరిసి ఆతి నాను వానివలెబా మంజినాద్.

40 రిఎర్మడిఃజి మంజినార్. ఒరెన్ వన్నిజ్ డిఃసి ఒరెన్వన్నిజ్ కూక్కు ఒనాన్.

41 రుండి బోదెక్ ఉండ్రె జెత్త పణకుదు నూర్ది మంజినె. ఉండ్రె దనిజ్డిఃసి ఉండ్రె దనిజ్ కూక్కు ఒనాన్.

42 ఎమేణి దినమ్దు మీ ప్రబు వానాండ్రొ ఇజి మిజి తెలివద్. అందెజె మీరు జాగర్తదాన్ ఎద్రు సుడఃజి మండ్రు.

43 యాక మీరు అర్దం కిజి నెస్తు. ఎమేణి గడియాదు డొఃజారి వానాన్ఇజి ఇండ్రొణి ఎజుమాని నెస్తిజ, డొఃజారి ఇండ్రొ డుఃగ్గెడెనరి సివిండ తెలి మంజి సుణాన్.

44 మీరు నా వందిజ్ ఒడఃబిఱ గడియాదు, లోకు మరిసి ఆతి నాను వాన. అందెజె మీరు ఎస్తివలెబా తయార్ ఆజి మండ్రెజ్ వెలె.

45 బుద్దిమని నమిదెజ్ అట్టిమని పణిమన్ని ఎయెన్? ఇండ్రొణి వరిజ్ విజేరిజ్ నెగెణ్ సుడఃజి సరి ఆతి వేలాదు, వరిజ్ సరి ఆతి బోజనం సీదెజ్ ఇజి ఇండ్రొణి ఎజుమాని ఒపజెప్తి లెకెండె మన్నికాండ్రె బుద్ది మన్ని పణిమనిసి.

46 అయ ఎజుమాని మర్జి వానివలె, వన్నిజ్ ఒపజెప్తి లెకెండెఅయా పణిమన్ని కిజి మంజినిక ఇహిజ అయ ఎజుమాని సుడఃతిజి అయ పణిమన్నిజ్ నెగెద్.

47 అయ ఎజుమాని వన్నిజ్ కల్గితిమని విజు దనిజ్ సూణికాన్ లెకెండె అయ పణిమనిసి కినాన్ ఇజి నాను మిజి నిజం వెప్పిన.

48-49 “గాని అయ పణిమనిసి సెఇకాన్ ఆజి నా ఎజుమాని వాదెజ్ నండొ ఆలస్యం ఆనాద్”, ఇజి అయ సెఇ పణిమన్ని వన్ని మన్నుదు ఆలోసనం కిజి వన్నివెట పణికిని వరిజ్ డెయ్జి, మరి ఉణివరివెట కూడఃజి ఉణిజి తింజి మంజినాన్.

50 వాండ్రు తొఱ దినమ్దు ఒడఃబిఱ గడియాదు వన్ని ఎజుమాని వానాన్.

51 అయ ఎజుమాని వన్నిజ్కత్తి, బక్తి మనికాప్ ఇజి పొజిజిని వరివెట వరివందిజ్ తయార్ కిత్తిమన్ని బాడిఃదు పొక్వాన్. అబ్బె పల్కు కొహ్క్కి, అడఃబాజి మంజినార్.

✱ 24:29 24:29 యెసయ 13:10; 34:4. † 24:38 24:38 దేవుణు బూమి విజు ముడుఃగ్గి సిని లెకెండె పేరు రపిసి గడ్డ నిండ్రిని ముజాల ఉండ్రె ఓడ తాయార్ కిదెజ్ ఇజి నోవాహుజ్ వెహ్టాన్. అయా ఓడ 300 మూరెజ్ సాంపు 50 మూరెజ్ వెడల్పు 30 మూరెజ్ ఎత్తు మన్నిక. నోవాహుని వన్ని ఇండ్రొణికార్ విజేరె, మరి విజు జంతుజ్ పొట్టిజ్ పొట్టిజ్ అండు పొత్తు జత్త లెక్క ఓడాదు డుఃగ్గి ఏడు రొన్ను వెనుక పిరు వాదెజ్ మొదొల్పిదాక లోకుర్ వరిజ్ అలవాటుజ్ లెకెండె బత్తిజి మహార్.

## 25

## పదిమణిని విడిచి బోదెక్

1 మరి దేవుణు ఏలుబడిః కినిక ఇహిజ వరి నూనెజాణి దీవెజ్ అసి పెండ్లి దజడః వన్నిజ్ ఎద్రు సుడఃదెజ్ సొహిమహి పదిమన్ని విడిచి బోదెకాజ్ పొలిత మనాద్.

2 వినకాజ్ లొఇ అయ్దుగురు బోదెక్ బుద్ది సిలికెజ్, అయ్దుగురు బోదెక్ బుద్ది మనికెజ్.

3 అయ బుద్ది సిలికెజ్ వనక దీవెజ్అస్తి గాని నూనెజ్ ఒఱుజె.

4 బుద్ది మనికెజ్ వనక దీవెజవెట సీసెజ నూనెబా ఒతె.

5 పెండ్లి దజడఃయెన్ వాదెజ్ ఆలస్యం ఆతిజ్ అవిక్ విజు కొహొజి నిద్ర కిజి మహె.

6 మదరెయ్యు, “ఇవిలోన్ పెండ్లి దజడఃయెన్, వన్నిజ్ ఎద్రు సుడఃదెజ్ వాతి బోదెకాండె వెల్లి రదు”, ఇజి ఉండ్రీ గగోలిదాన్జాటు వాతాద్.

7 నస్తివలె బోదెక్ విజుండెక్ నిజ్జి వన్కా, నూనెజాణి దీవెజ్ సొడిఃతిజ్ ఎకిసి నెగెండె కిత్తి.

8 గాని అయ బుద్ది సిలికెజ్, “మా దీవెజ్ నమ్జి సొన్నినె. అందెజె మీ నూనె లొఇ కండెక్ మజిబా సిదాట్”, ఇజి బుద్ది మని వనకాజ్ లొస్తి.

9 అయావలె బుద్దిమని బోదెజ్, “సిల్లె, సిత్తిజ మజిని మిజి సాల్ఎండె ఆనాద్. అందెజె మీరు పొర్నివరిబాన్ సొన్ని కొండు”, ఇజి వెహె.

10 అవి నూనె కొండెజ్ సొన్ని మహిజ్ పెండ్లి దజడః వాతాన్. నస్తివలె తయార్ ఆతి మనికెజ్ వన్నివెట పెండ్లి విందుదిజ్ లొఇ సొహె. దని వెనుక సేహాలెజ్ కెహెపె ఆతె.

11 దన్ని వెనుక, మహి బుద్దిసిల్లి బోదెక్ వాజి, “బాబు, బాబు మజి సెహ్లా రెఅ”, ఇజి కూకె.

12 వాండ్రు వరిజ్, “నాను మిజి నిజం వెహిసిన, నాను మిజి నెస్ఎ”, ఇజి వెహ్లాన్.

13 నాను వాజిని రొజు గాని అయ గడిఃయబా మీరు నెస్ఇతిదెర్, అందెజె మీరు తెలి ఆజి మండ్రు.

## మూవర్ పణిమణిసిర్

14 మరి దేవుణు ఏలుబడిః కినిక ఇహిజ ఒరెన్ దేసం సొండ్రెజ్ ఇజి వన్ని పణిమన్నిరిజ్ కూక్కి, వన్ని ఆస్తి వరిజ్ ఒపజెప్తి వన్ని లెకెండె మనాద్.

15 వండ్రు ఒరెన్ పణిమన్నిజ్ అయ్దు తాలంతుజ్\*. మరి ఒరెన్ వన్నిజ్ రుండి, తాలంతుజ్ మరి ఒరెన్ వన్నిజ్ ఉండ్రీ తాలంతుజ్ యాలెకెండె ఒరెన్ ఒరెన్ దన్ని వెట పణికిదెజ్ అట్టి లెకెండె వరిజ్ సితాన్. వెనుక వాండ్రు పయనం కిజి దేసం సొహాన్.

16 అయ్దు తాలంతుజ్ లొస్తికాన్ వెటనె సొన్ని వనకవెట బేరం కిజి మరి అయ్దు తాలంతుజ్ గణస్తాన్.

17 రుండి తాలంతుజ్ లొస్తికాన్బా అయా లెకెండెనె కిజి మరి రుండి గణస్తాన్.

18 గాని ఉండ్రీ తాలంతు లొస్తికాన్ సొహొండ్రె బూమిదు గాంద కారిసి వన్ని ఎజుమాని డబ్బు మూస్తాన్.

19 లావ్కాలం సొహి వెనుక వరి ఎజుమాని మర్జి వాతండ్రె వరి సిత్తి డబ్బుజాణిజ్ వారు ఇనిక కిత్త మనార్ ఇజి సుడఃతాన్.

20 నస్తివలె అయ్దు తాలంతు లొస్తికాన్, మరి అయ్దు తాలంతుజ్ తతాండ్రె, “బాబు నీను నజి అయ్దు తాలంతుజ్ ఒపజెప్తి గదె, ఇదిలో అకెజె ఆవిండె మరి అయ్దుబా నాను కుడుప్త”, ఇజి వెహ్లాన్.

21 వన్ని ఎజుమాని వన్నిజ్, “నమకం ఇడదెజ్ అట్టి నెగ్గి పణిమన్ని, నీను నెగెండె కిత్తి. యా కండెక్బాన్ నిజి నమిదెజ్ అట్టి నని పణి నీను కిత్తి. అందెజె నండో వనకాజ్ నాను నిజి ఒపజెప్పాలె. నీను వాజి నీ ఎజుమానివెట సర్ల ఆజి మన్అ”, ఇజి వెహ్లాన్.

22 రుండి తాలంతుజ్ లొస్తికాన్ వాతాండ్రె, “ఎజుమాని నీను నజి రుండి తాలంతుజ్ ఒపజెప్తి గదె, ఇదిలో అకెజె ఆవిండె మరి రుండి తాలంతుజ్గణస్తా”, ఇజి వన్నిజ్ వెహ్లాన్.

23 ఎజుమాని వన్నిజ్, “నమకం ఇడదెజ్ అట్టి నెగ్గి పణిమనిసి, నీను నెగెండె కిత్తి. యా కండెక్బాన్ నీను నమిదెజ్ అట్టి నని పణి నీను కిత్తి. అందెజె నిజి నండో వన్కాజ్ ఒపజెప్ప. నీను వాజి నీ ఎజుమాని వెట సర్ల ఆజి మన్అ”, ఇజి వెహ్లాన్.

24 నస్తివలె ఉండ్రీ తాలంతు లొస్తికాన్ వాతాండ్రె, “బాబు నీను విత్ఇ బాడిదాన్ కొయ్నికి, మరి ఉణున్ఇ బాడిదాన్ పంట కొయ్ని మూర్కతం మనికి ఇజి నాను నెస్త.

\* 25:15 25:15 ఉండ్రీ తాలంతు ఇహిజ దినారమకు అయాలెకెండె ఇహిజ ఆరు వెయిజ్ రొస్కు పణికితిజ దొహొక్కి కూలిదిజ్ సరియాతి డబ్బుజ్ నేహి లెక్కదిజ్ సుడఃజి ఇంసు మింసు ఆరు లెక్కెజ్ రూపాయ్ మంజినె.

25 అందెజె నాను తియెల్ ఆజి బూమిదు గాంద కార్తి నీ డబ్బు డాప్త. ఇదిలో నీది, నీను లోన్అ”, ఇజి వెహ్లాన్.

26 అందెజె వన్నిజ్ సుడఃజి అయ ఎజుమాని, “బదకమాతి సెజ పణిమన్ని, నాను విత్తణ బాడిదాన్ కొయ్నికాన్, ఉణున్ఱ బాడిదాన్ పంట కొయ్నికాన్ ఇజి నీను నెస్తి?

27 అహిజ నా డబ్బు వడ్డి సీని సవ్కారిజబాన్ నీను సీని మంజినిక ఇహిజ నాను వాతివెలె వడ్డి కుడుఃప్పి నా డబ్బు నజి దోహ్కార్తాద్ మరి.

28 అయ ఉండ్రీ తాలంతు వన్నిబాణిజ్ లాగ్జి పది తాలందుజ్ మనివన్నిజ్ సిఅ.

29 నమిదెజ్ అట్టికాన్ ఎయెండ్రో, వన్నిజ్ మరి లావ్ దోహ్కార్తె. వరిజ్ మరి నండో కల్లిజి మంజినె. నమ్మిదెజ్ అట్ఱణ వన్ని బాణిజ్, వన్నిజ్ కల్లితిమన్ని ఇజిరికబా లాగె ఆనాద్.

30 పణిదిజ్ రెజ యా పణిమన్నిజ్ వెల్లి సీకటుదు విసీర్దు. అబ్బె పల్కు కొహ్కార్తిఅడఃబాజి మంజినాద్.

### మెండ గొర్రెజ్ని ఎలెటి గొర్రెజ్

31 నస్తివలె యేసు ఈహు వెహ్లాన్. “లోకుమరిసి ఆతి నాను నా గొప్ప గవ్ఠమ్దాన్, నా విజు దూతెజ తోడుః అసి వన్నివెలె, రాజు వజ ఏలుబడిః కిదెజ్ దేవుణు మంజిని బాడిఃదు మంజిని గొప్ప జాయ్దాన్, విజు దూతారిజ్ నావెట తోడు అసి వానివలె, రాజువజ ఏలుబడిః కిదెజ్ పరలోకమ్దు మంజిని గొప్ప జాయ్ మన్ని నా సింహాసనమ్దు బసి మంజిన.

32 నస్తివలె బూమి ముస్కు మని లోకుర్ విజెరె నా ఎద్దు కూడఃజి వానార్. గొర్రెజ్ మేప్పి గవుడుఃయెన్ ఎలిటి గొర్రెజాణిజ్ మెండ గొర్రెజ్ ఎర్లిసినిలెకెండ నాను లోకాజ్ ఒరెన్ ఒరెన్ వన్నిజ్ ఎర్లిస్సాలె.

33 నాను ఉణెర్పడఃక మెండ గొర్రెజ్, డేబపడఃక ఎలిటి గొర్రెజ్ నిల్స్సాలె.

34 రాజు ఆతి నాను నా ఉణెర్ పడఃక మని వరిజ్ సుడఃజి, “నా బుబ్బాతి దేవుణు సిజిని దీవనమ్కు మంజి వన్నిజ్ సెందితికిదెరా, లోకం పుట్టి బాణిజ్ అసి దేవుణు మీ వందిజ్ తయార్ కితిమన్ని దేసం మీ సొంత కిజి మండ్రు.

35 ఎందానిజ్ ఇహిజ, నజి బజ కట్టిజ్ మీరు బోజనం సితిదెర్, ఏహ్కా కట్టిజ్ ఏరు సితిదెర్, నాను ఆఇకాన్ ఆతిమహిజ్ నజి డగ్రు కితిదెర్.

36 నాను డుమ్డ ఆతిమహిజ్ నజి సొక్కెజ్ సితిదెర్. జబుదాన్ మహిజ్ నజి నెగెండ సుడఃతిదెర్, నాను జెలిదు మహివలె సుడఃదెజ్ వాతిదెర్, ఇజి వెహ్లాన్.

37 నస్తివలె దేవుణుదిజ్ లోజితిమహి నీతినిజాయిమన్నికార్ ఆతి వారు, “ప్రబువా, ఎస్తివలె నిజి బజదాన్ సుడఃతిజ్ నిజి బోజనం సితాప్? ఎస్తివలె ఏహ్కా కట్టిజ్ మాపు నిజి ఏరు సితాప్?

38 ఎస్తివలె ఆఇకి ఆతిమహిజ్ సుడఃజి నిజి డగ్రు కితాప్? ఎస్తివలె డుమ్డ ఆతి మహిక సుడఃజి నిజి సొక్కెజ్ సితాప్?

39 ఎస్తివలె నీను జబుదాన్ మహిక, జెలిదు మహిక సుడఃజి నీ డగ్రు వాతాప్?”, ఇజి వన్నిజ్ వెన్బానార్లె.

40 నస్తివలె రాజుఆతి నాను, “నా తంబెరిజ ఆతివరి లోఇ ఇజిరికాన్ ఆతి ఒరెన్వన్నిజ్ మీరు ఇనిక కితిదెరో, అయాక మీరు నజి కిత్తిదెర్, ఇజి నాను నిజి నిజం వెహ్లాన్”, ఇజి వరిజ్ వెహ్లాన్.

41 నస్తివలె వాండ్రు డేబ్ర పడఃకారు మని వరిజ్ సుడఃజి, “సయెప్ పొందితికిదెరా, నా డగ్రహాన్ సొండ్రు, సయితానుజ్ని వన్ని దూతర్ వందిజ్ తయార్ కితి మని ఎలాకాలం సిను మంజిని బాడిఃదు సొండ్రు.

42 ఎందనిజ్ ఇహిజ, నాను బజ సాత, గాని మీరు నజి బోజనం సితిదెర్. ఏహ్కా కట్టిజ్ ఉండెజ్ ఇనిక సితిదెర్.

43 ఆఇకానాతి మహిజ్ మీరు నజి డగ్రు కితిదెర్. డుమ్డ ఆతిమహిజ్ మీరు నజి సొక్కెజ్ సితిదెర్. జబ్బుదాన్ మహివలె జెలిదు మహివలె మీరు నజి సుడఃదెజ్ రెఇతిదెర్”, ఇజి వెహ్లాన్.

44 వారుబా వన్నిజ్, “ప్రబువా ఎస్తివలె నీను బజదాన్మహిక, ఏహ్కాదాన్మహిక, ఆఇకి ఆతి మహిక, డుమ్డ మహిక, జబుదాన్మహిక, కయ్దు మహిక సుడఃజి నిజి సాయం కివితాప్?”, ఇజి వెన్బానార్.

45 నస్తివలె నాను, “యా ఇజిరి వరి లోఇ ఒరెన్ వన్నిజ్ ఇనిక మీరు కితిదెరో, అయాక నజిబా మీరు కితిదెరో”, ఇజి వరిజ్ వెహ్లాన్.

46 నస్తివలె వారు ఎలాకాలం మంజిని సికాదు సొనార్లె, గాని దేవుణుదిజ్ లోజితికార్ ఎల్లకాలం మంజిని బత్తుదు సొనార్.”

1-2 యేసు యాకెజ్ విజు వెప్తి వీజితి వెనుక వన్ని సిసూర్జ సుడఃజి, “రుండి రోస్సు వెనుక పస్సు పండోయ్\* వాజినాద్ ఇజి మీరు నెస్సిదెర్. నస్తివలె లోకు మరిసి ఆతి నాను సిలువ పోకె ఆదెజ్ ఇజి ఒపజెపె ఆనాలె”, ఇజి వరిజ్ వెప్తాన్.

3 నస్తివలె పెరి పుజెరిజుని లోకురి వెద్దెల్జ విజేరె, విజేరె విజు పుజెరిజు ముస్సు పెరి పుజెరి ఆతి కయప ఇండ్రో కూడఃజి వాతార్.

4 యేసుజ్ ఎలాగబా ఉపాయ్ కిజి అసి నప్పెజ్ ఇజి అబ్బె వారు ఉండ్రి ఆలోసనం కితార్.

5 “మాపు ఏలు వన్నిజ్ అస్తిజి లోకుర్ వెట గొడఃబ కినార్లె, అందెజె యా పండోయ్దు పోని”, ఇజి వారు వర్గితార్.

ఉండ్రి బోదెలె యేసు బురాదు వాసనం మన్ని నూనె వక్కినాద్.

6-7 యేసు బెతానియ ఇని నాటో ముజాల కుస్టురోగమ్దాన్ మహి సీమోసు ఇండ్రో వాతిజ్, అబ్బె వాండ్రు బోజనమ్దిజ్ బస్తాన్. నస్తివలె ఉండ్రి బోదెలి నూన్నాజ్ పణుకుదాన్ తయార్ కిత్తి ఉండ్రి సీసాదు†, నండో విలువమని, నండో వాసనం మని నూనె ఉండ్రి పెరి సీస తత్తాదె వన్ని బుర్త ముస్సు వాక్తాద్.

8-9 సిసూర్ అక్క సుడఃజి కోపం ఆతారె, “ఎందనిజ్ యా ణిదిజ్కెరెణి? యాక నండో డబ్బుదిజ్ పోర్సి, అయ డబ్బు బీదవరిజ్ సీదెజ్ ఆనాద్ గదె?”, ఇజి వెప్తాన్.

10 యేసు అక్క నెస్సాండ్రె, “యా బోదెలి నా వందిజ్ ఉండ్రి నెగ్గి పణి కితాద్ మీరు ఎందనిజ్ దన్నిజ్ అర్ల కిజినిదెర్?”

11 బీదాదికార్ మీవెట ఎస్తివలెబా మంజినార్. గాని నాను ఎలాకాలం మీ వెట మన్ఎ.

12 నజి మూస్సి వందిజ్ తయార్ కిత్తి లెకెండె యా బోదెలి యా నూనె నా ఒడోల్ ముస్సు వాక్తాద్.

13 యా బూమి ముస్సు ఎంబెబా యా దేవుణు ఏలుబడిః కిని వందిజ్ సువార్త సాటిస్సివెలె అది కితి యా పణి దన్నిజ్ ఎత్తుకిత్తి లెకెండె సాటిసి మంజినాద్లె”, ఇజి వెప్తాన్.

14-15 నస్తివలె పన్నెండు మణిసిర్ సిసూర్ లోక ఒరెన్ ఇస్కరియోతు యూద ఇనికాన్ పెరి పుజెరిజు డగ్రు సాహాండ్రె, “నాను యేసుజ్ మిజి ఒపజెప్పెజి నజి ఇనిక సీనిదెర్?”, ఇజి వెన్బాతాన్. అందెజె వారు ముప్పయ్ వెండి రూపయ్జు తూస్తారె వన్నిజ్ సితార్.

16 అబ్బెణిజ్ అసి యూద యేసుజ్ వరిజ్ ఒపజెప్పెజ్ ఉండ్రి అవ్కాసం సుడఃజి మహాన్.

ప్రబు ఏర్పాటు కిత్తి బోజనం

17 పులాజ్ సిల్లి రొట్టెజ్ తయార్ కిని పస్సు పండోయ్ది మొదోహి దినమ్దు వన్ని సిసూర్ యేసు డగ్రు వాతారె, “పస్సు ఉండెజ్ నీ వందిజ్ మాపు ఎంబె తయార్ కిదెజ్, ఇజి నీను కోరిజిని?”, ఇజి వన్నిజ్ వెన్బాతార్.

18 వాండ్రు వరిజ్, “మీరు పట్టుమ్దు పలానివన్నిబాన్ సొస్సి, నా సమయం డగ్రు ఆతాద్. నా సిసూర్ వెట కూడఃజి నీ ఇండ్రో పస్సు పండోయ్ కిదెజ్ ఇజి బోదకినికాన్ వెస్సినాన్, ఇజి వన్నిజ్ వెప్తాన్”, ఇజి వరిజ్ వెప్తాన్.

19 వన్ని సిసూర్ సొస్సి యేసు వరిజ్ వెప్తి లెకెండెనె పస్సు పండోయ్దిజ్ తయార్ కితార్.

20 పొద్దు ఆతివెలె వన్ని పన్నెండు మస్సి సిసూర్ వెట బోజనమ్దిజ్ బస్తాన్.

21 వారు బోజనం కిజి మహివలె వాండ్రు, “మీ లోక ఒరెన్ నజి ఆఇవరి కీదు ఒపజెప్పాన్లె, ఇజి నాను మిజి నిజం వెప్పాన్”, ఇజి వెప్తాన్.

22 వారు విజేరె నండో దుకం ఆజి ప్రతి ఒరెన్ ఒరెన్, “ప్రబువా, నిజమె నాను ఆవ గదె?”, ఇజి వన్నిజ్ వెన్బాతార్.

23 యేసు, “నావెట గినెదు కియు ముడుఃక్కికాన్ ఎయెండ్రో వాండ్రె నజి ఒపజెప్పికాన్.

24 లోకుమరిసి ఆతి నా వందిజ్ దేవుణు మాటదు రాస్తిమహి లెకెండె నాను సొనాలె, గాని లోకు మరిసి ఆతి నజి ఎయెన్ ఒపజెప్పాండ్రో వన్నిజ్ కస్టమ్నె. వాండ్రు పుట్వంండ మంజినిక ఇహిజి వన్నిజ్ ఎస్సానో బాగ మహాద్ మరి”, ఇజి వెప్తాన్.

25 వన్నిజ్ ఒపజెప్పి యూద, “బోదకినిక నాను ఆవ గదె?”, ఇజి వెన్బాతాన్. యేసు, “ఒఒ నీనె”, ఇజి మర్జి వెప్తాన్.

యేసుజ్ ఒపజెప్పెజ్ యూద ఒపు కొడ్డినాన్.

\* 26:1-2 26:1-2 యూదురు వరి అని గొగొరిజ్ దేవుణు అయగుప్తు దేసమ్దు వెటిపణి కిజి మహిబాణిజ్ నండో పంటెజ్ ముజాల డిప్పిసి తత్తి దన్నిజ్ ఎత్తు కిజినికాదె పస్సు పండోయ్ పస్సు ఇహిజి డాట్టి సొహిక ఇహిజి సప్పికానాతి దేవుణు దూత, మెండగొరెది నల దారబంద్రమ్కాజ్ రాసె ఆతి మన్ని ఇల్కాజ్ డట్టి సొహి సమయమ్దిజ్ గుర్తిసినాద్. అయ ఇల్కా పుట్టి పెరి వన్నిజ్ దేవుణు దూత సవ్పెతాన్ గాని మెండ గొరెది నల దారబంద్రమ్కాజ్ రాసె అయగుప్తు దేసమ్ది వరి విజు ఇల్కాజ్ పుట్టి పెరి వరిజ్ విజెరిజ్ దేవుణు దూత సప్తాన్. యా పండోయ్ విజు సమయమ్దిజ్ కినార్ యూదురు విజు దేసమ్కాజ్ పండోయ్ కిదెజ్ ఇజి యెరుసల్లేమ్దు కూడఃజి వానార్ నిర్గమ 12. † 26:6-7 26:6-7 యా నూన్నాజ్ పణుకు పేరు అలబాస్టరు ఇజి, యా పణుకు నండోకరిదిక తెల్లాజ్ మంజినాద్ యాక గీసి లోకుర్ పుస్సెజ్ తయార్కిజినార్

26 వారు బోజనం కిజి మహిజ్ యేసు ఉండ్రీ రొట్టె అస్తాండ్రె దేవుణుదిజ్ వందనమ్కు వెహ్ని, అయాక రుక్కి, వన్ని సిసూర్జి సితాండ్రె, “మీరు యాక లోసి తిండ్రు, యాక నా ఒడోల్”, ఇజి వరిజ్ వెహ్లాన్.

27 మరి వాండ్రు గిన్న అసి దేవుణుదిజ్ వందనమ్కు వెహ్ని, అయాక వరిజ్ సీజి, “దిన్ని లోఇ మనిక విజేరె ఉండ్రు.

28 యా గిన్నాదు మన్నిక నా నల, నండోండారిజ్ వరి పాపమ్కు సెమిస్తైజ్ ఇజి కారిసిని నా నల. ఇక్కడ దేవుణు నా నలదాన్ కిజిని ఒప్పుమానం.

29 నా బుబ్బాతి దేవుణు కిని ఏలుబడిడు మరి మీ వెట కొత్తాజ్ ఉణిదాక ద్రాక్కు పట్టు రసం మరి ఎసెజ్బా నాను ఉణ్వెలె, ఇజి నాను మిజి వెహ్నిన్”, ఇజి వెహ్లాన్

30 మరి, ఉండ్రీ పాట‡ పార్టారె వారు ఒలివ మరెక్ మని గొరొన్ మున్సు. సాహార్.

పేతురు వన్నిజ్ నెన్ఎ ఇజి వెహ్లాన్లె ఇజి యేసు మూజాల వెహ్నినాన్.

31 నస్తవలె యేసు వరిజ్ సుడోజి, “గొరైజ్ అడినివన్నిజ్ నాను కత్తాలె, గొరైజ్ మంద సెదరినె సానెలె\*, ఇజి దేవుణు మాటదు రాస్తి లెకెండ్ర, యా పొదోయ్నె నా వందిజ్ నిల్దెజ్ అట్వండ్ర మీరు విజిదెరె నజి డిసి సానిదెరెలె.

32 గాని దేవుణు నజి మర్జి బత్కుదు నిక్తి వెనుక, మిజి ఇంక ముజాల గలీలయదు సానాలె”, ఇజి వెహ్లాన్.

33 అందెజె పేతురు, “విజేరె మీ వందిజ్ నిల్దెజ్ అట్వండ్ర డిస్తి సాహిజ్బా, నాను ఎసెజ్బా నిజి డిసి సాన్ఎ”, ఇజి వన్నిజ్ వెహ్లాన్.

34 యేసు వన్నిజ్, “యా పొదోయ్నె కొర్తు కెరెని ముజాల నీను, నజి నెన్ఎ ఇజి మూండ్రీ సుట్టు నీను వెహ్నిలె, ఇజి నాను నిజి నిజం వెహ్నిన్”, ఇజి మర్జి వెహ్లాన్.

35 పేతురు వన్నిజ్, “నాను నీ వెట సాదెజ్ ఇహిజ్బా గాని నిజి నెన్ఎ ఇజి ఎసెజ్బా వెహ్ఎ”, ఇజి వెహ్లాన్. మహి సిసూర్బా అయాలెకెండ్ర వెహ్లాన్.

గెత్సెమని టోట

36 నస్తవలె యేసు వన్ని సిసూర్వెట గెత్సెమిని ఇని టోటాదు సాహాన్. వాండ్రు వరిజ్, “నాను అబె సాన్ని పార్దనం కిజి మర్జి వానిదాక ఇబ్బె బసి మండ్రు”, ఇజి వెహ్లాన్.

37 పేతురుని జెబెదయి మరిసిరిజ్వన్నివెట ఒతాన్. వాండ్రు నండో దుకం ఆజి బాద ఆదెజ్ మొదోల్స్తాన్.

38 వాండ్రు వరిజ్, “నాను సాదెజ్ డగ్రు ఆతిలెకెండ్ర మన్ను ఓరిస్తైజ్ అట్ఇ నసా బాద నజి కల్లిజనాద్. మీరు ఇబ్బెనె బసి నావెట తెలి మండ్రు”, ఇజి వెహ్లాన్.

39 యేసు అబ్బెణిజ్ కండెక్ దూరం సాహండ్రె ముణుకుజ్ ఉణ్రిజి, “నా బుబ్బ, నీను అట్టిజి యా కస్టమ్కు నా బాణిజ్ లాగ్అ. గాని నా ఇస్టం వజి ఆవద్, నీ ఇస్టం వజినె జర్గిపిద్”, ఇజి పార్దనం కితాన్.

40 వెనుక వాండ్రు సిసూర్ డగ్రు మర్జి వాతివెలె వారు నిద్ర కినిక సుడోజి, “ఉండ్రీ గంటబా నా వెట తెలి ఆజి మండ్రెజ్ మీరు అట్ఇతిదెరా? ఇజి పేతుజ్ వెన్బాతాన్.

41 “సయ్నాను మిజి పరిస కిజి తప్పదు సాన్వండ్ర పార్దనం కిజి తెలి మండ్రు. అత్తు తయార్నె గాని ఒడోల్ సత్తు సిల్లెండ్ర ఆజినాద్.”

42 మరి రుండి సుట్టు సాన్ని, “నా బుబ్బ, యా కస్టమ్కు నాబాణిజ్ లాగ్గెజ్ ఆవద్, నాను ఓరిస్తైజ్వలె ఇహిజి నీను ఇస్టం ఆతి లెకెండ్ర, అయావజినె జర్గిపిద్”, ఇజి పార్దనం కితాన్.

43 మరి వాండ్రు మర్జి వాతివెలె, వరి కణక రెపెజ్ బరుదాన్ మూగ్గి మహిజ్ వారు మరి నిద్ర కిజినిక సుడోజాన్.

44 వాండ్రు మర్జి సాహండ్రె మూండ్రీ సుట్టుబ అయా మాటెజ్నె వెహ్ని పార్దనం కితాన్.

45 వెనుక వాండ్రు వన్ని సిసూర్ డగ్రు వాత్తాండ్రె వరిజ్ సుడోజి, “ఏలుబా మీరు నిద్ర కిజి రోమ్జినిదెరా? ఇదిలో లోకుమరిసి ఆతి నజి సెఇవరి కియుదు ఒపజెప్పి గడియం డగ్రు ఆతాద్.

46 ఇదిలో నజి ఒపజెప్పికాన్ వాజినాన్, లెదు మాటు వరి వెట దసూల్ ఆదెజ్ సానాట్”, ఇజి వెహ్లాన్.

యేసుజ్ అసి తోనాహ్నినార్

47 వాండ్రు వర్గిజి మహివలె, పన్నెండ్రు మణిసి సిసూర్ లోఇ ఒరెన్ యూద వాతాన్. పెరి పుజెరిజు, లోకురి పెద్దెల్జి పొక్తిమని మంద లోకుర్ కూడమ్కు, డుడ్డు అస్తారె వన్ని వెట వాతార్.

‡ 26:30 26:30 మాములుగ కీర్తన 113-114. పన్ను పండోయ్దిజ్ బోజనం కిదెజ్ మొదోల్నిని వెలె పార్వార్. 115-118 బోజనం కిత్తి వీజితిజి పార్జి మహార్.

\* 26:31 26:31 జేకరి 13:7.

48 యేసుజ్జ ఒపజెప్పికాన్, “నాను ఎయెరిజ్ముదు కిజిననో, వన్నిజ్అస్తు”, ఇజి ఉండ్రీ గుర్తు లెకెండముజాల వరిజ్ వెహ్టా మహాన్.

49 యూద వెటనె యేసు డగ్రు వాతండ్రె, “బోదకినికి”, ఇజి వెహ్టండ్రె పొమ్జి వన్నిజ్ ముదు కితాన్.

50 యేసు వన్నిజ్, “కూలాయెన్, నీను ఇనిక కిదెజ్ వాతిదో అక్క కిత”, ఇజి వెహ్టాన్. నస్తవలె లోకుర్ ముజాల్ వాజి వన్ని ముస్కు అర్సి వన్నిజ్ అస్తారె తోహ్టార్.

51 అయావలెనె యేసు వెట మహికాన్ ఒరెన్ వన్ని కియు సాప్పి కుర్ల లాగితాండ్రె పెరి పుజెరిజ్ పణిమన్ని గిబ్బి తెవు కత్తాన్.

52 యేసు వన్నిజ్, “నీ కూడం మర్జి ఒరాదు ఇడెఅ, కుర్ల అస్సికార్ విజెరె కుర్లదానె సానార్.

53 నాను ఏలు నా బుబ్బెజ్ సాయం లొస్తిజ, నా బుబ్బు వన్నెండు గుంపుజ్ సయనమ్ది వరిజ్ ఇంక లావ్దూతెజ నా వందిజ్ పోక్విండ్రా? మీరు ఇనిక ఒడెబిజినిదెర్?

54 గాని నాను అయలెకెండ లొస్తిజ, యాలెకెండె ఇకెజ్ జర్గిదెజ్ ఇజి దేవుణు మాటదు రాస్తి మహిక ఎలాగ పూర్తి అనాద్?

55 అయావలె యేసు మంద లోకురిజ్ సుడెజి, “నాను ఒరెన్ డోజ కినికాండ్రా? మీరు కుర్లజాణిజ్, కొణెజాణిజ్ నజీ అస్తెజ్ వాతిదెరా? విజి రోస్కు నాను దేవుణు గుడిడు బసి బోదిసి మహాగదె. అయావలె మీరు నజీ అన్ఇతిదెర్.

56 ఎండనిజ్ ఇహిజ ముజాల దేవుణు వర్గితి మాటెజ్ ప్రవక్తరు రాస్తి మహికెజ్ అయాలెకెండ పూర్తి ఆదెజ్ యాకెజ్ విజు జర్గితె”, ఇజి వెహ్టాన్. నస్తవలె వన్ని సిసూర్ విజెరె వన్నిజ్ డిస్తారె ఉహ్క సాహార్.

### యేసు యూదురి కొర్లుదు

57 యేసుజ్ అస్తికార్ వన్నిజ్ విజు పుజెరిజ ముస్కు పెరి పుజెరి ఆతి కయప ఇండ్రె తత్తార్. అబ్బె పెరి పుజెరిజు లోకురి పెదలుజు కూడిత వాత మహాన్.

58 దినిజ్ అక్కర్ ఇనిక అనాదో ఇజి నెస్తెజ్, పేతురు కండెక్ దూరమ్దాన్ వన్ని వెనుక సాస్తి విజు పుజెరిజ ముస్కు పెరి పుజెరి ఇలు అర్జుదు కాప్కిని వరి వెట బస్తాన్.

59 పెరి పుజెరిజు, సన్హెద్రి సజంసో ఇజి యూదురి కోర్టుదికార్ విజెరె యేసుజ్ సప్తెజ్ తగితి రుజుప్ వందిజ్ వన్ని ఎద్రు అబద్దం సాక్యం వెహ్పివరిజ్ రెబాజి మహాన్.

60 వన్ని ఎద్రు అబద్దం సాక్యం వెహ్పికార్ నండొండార్ వాతార్ గాని వన్నిజ్ సప్తెజ్ తగ్గి ఇనికబా దోహ్కావితాద్.

61 కడెవేరిదు రిఎర్ ముజాల వాజి, “నాను దేవుణు గుడిదిజ్ అర్ప్పి మరి మూండ్రె రోస్కాజ్ లోఇ దనిజ్మర్జి తోహ్టాజ్ అట్టు ఇజి వాండ్రు వెహ్టాన్”, ఇజి వారు వెహ్టార్.

62 నస్తవలె విజు పుజెరిజ ముస్కు పెరి పుజెరి ఆతికాన్ నిజెత్తాండ్రె యేసుజ్, “నీను ఇనికబా మర్జి వెహ్ఇదా? వీరు మీ ముస్కు వెహ్పిని యా మాటెజ్ ఇనికెజ్?”, ఇజి వెహ్టాన్.

63 గాని యేసు ఇనికబా వర్గివిండ జమ్న మహాన్. అందెజె విజు పుజెరిజ ముస్కు పెరి పుజెరి ఆతికాన్ వన్నిజ్ సుడెజి, “బత్తిజిని దేవుణుదిజ్ తోడు అసి నీ వెట ప్రమాణం కిజి నాను నిజీ వెన్బాజిన, “నీను క్రీస్తు నా, దేవుణు మరిసినా? అహిజ నజీ వెహ్అ”, ఇజి వెహ్టాన్.

64 యేసు వన్నిజ్, “నీను వెహ్కా నిజమె. గాని లోకుమరిసి ఆతి నాను, వాని గొప్ప అతికారం మన్ని కాలమ్దు దేవుణు ఉణెర్ పడెకాదు బసిమంజి ఆగాసమ్దాన్ మొసోపు ముస్కు వానిక మీరు సూణిదెర్ ఇజి నాను మిజి విజెరిజ్ నిజం వెహ్పిన”, ఇజి వెహ్టాన్.

65 నస్తవలె విజు పుజెరిజ ముస్కు పెరి పుజెరి ఆతికాన్ నండొ కోపం ఆతండ్రె, వన్ని సాక్కెజ్ కిసి ఆజి, “వాండ్రు దేవుణుదిజ్ దూసిసి వర్గితాన్! మరి ఇంక సాక్కిరిజు అవ్సరం సిల్లెద్. ఇదిలో వాండ్రు దేవుణుదిజ్ దూసిసి వర్గితిక మీరె వెహ్దెర్.

66 మీరు ఇనిక ఒడెబిజినిదెర్?”, ఇజి వరిజ్ వెహ్టాన్. అందెజె వారు”, వీండ్రు సావుదిజ్ తగ్గికాన్”, ఇజి వెహ్టార్.

67-68 నస్తవలె వారు వన్ని మొకొమ్దు పూసి, ముటి అసి గుదితార్. సెగొండార్ కియుదాన్ డెయ్జి, “క్రీస్తు నిజీ డెయ్తికాన్ ఎయెండ్రె ఇజి మజి వెహ్అ, నీను దేవుణు ప్రవక్తగదె?”, ఇజి వెహ్టార్.

§ 26:59 26:59 సినహద్రిం సజం ఇహిజ 71 లోకుర్ మంజిని యూదురి పెరి కోర్టులెకెండ మహాద్ విజెరె పుజెరిజ ముస్కు పెరిపుజెరిఆతికాన్ మరి పెరి పుజెరి ఇనికాన్ ఇజిరి సజతిజ వందిజ్ తీర్పు తీరిసి మహాన్. సనహద్రిం సజమ్దు అయ సమయమ్ది పెరి పుజెరి వన్ని ఇండ్రెణి మొగవారు, మహి ముకెలమాతి పుజెరి ఇండ్రెణికార్ దేవుణు గుడి కాప్ కినివరి నెయ్పు ముజాల పెరి పుజెరిలెకెండ మహికార్ మంజినార్. యెరూసల్లెమ్దు మన్ని సనహద్రిం సజమ్దిజ్నె పెరి సజతిజ వందిజ్ తీర్పు తీర్పెజ్ అతికారం మనాద్.

పేతురు యేసుజీనెన్వ ఇజి మూండ్రి సుటు వెహ్నినాన్.

69 అయావలె వెల్లి అరజుదు పేతురు బస్తి మహిజ్ పణిమన్ని ఆతి ఉండ్రి బోదెలి వాతాదె, “నీనుబా గలీలయాదికాన్ యేసు వెట మహికి”, ఇజి వెహ్నాన్.

70 పేతురు, “నీను ఇనిక వర్గిజనిదొ నజి తెలివద్”, ఇజి బాన్మహి విజేరె ఎద్రు వెహ్నాన్.

71 వాండ్రు అబ్బెణిజ్ వెల్లిహి గవుని డగ్రు సోహిజ్, మరి ఉండ్రి పణిమన్ని ఆతి బోదెలి వన్నిజ్ సుడేజి, “వీండ్రు నజరేతుదికాన్ ఆతి యేసు వెట మహాన్”, ఇజి అబె మహివరిజ్ వెహ్నాన్.

72 వాండ్రు నాను వన్నివెట మండ్రెజ్ సిల్లెద్ ఇజి ప్రమాణం కిజి, “నాను వన్నిజ్ నెన్ఎ”, ఇజి వెహ్నాన్.

73 కండెకీటయం ఆతి వెనుక అబ్బె నిహిమహికార్ పేతురు డగ్రు వాజి, “నిజమె, నీనుబా వన్నివెట మహికి. నీను వర్గిని మాట విహిజానె తెలిజినాన్”, ఇజి వెహ్నాన్.

74 నస్తివలె వన్నిజ్ వాండ్రె సయిప్సీబె ఆజి ప్రమాణం కిజి, “నాను వన్నిజ్ నెన్ఎ”, ఇజి వరిజ్ వెహ్నాన్. వెటనె కొరు కెరెతాన్.

75 నస్తివలె, “కొరు కెరెని ముజాల నజి నెన్ఎ ఇజి మూండ్రి సుట్కు నీను వెహ్నిలె”, ఇజి యేసు వన్నిజ్ వెహ్ని మాట ఎతు కితాండ్రె పేతురు వెల్లి సోహండ్రె గుండె కొతె ఆజి డటం అడేబతాన్.

## 27

యాద, వన్నిజ్ వాండ్రె ఉరి ఆజినాన్

1 పెందాల, పెరి పుజెరిజుని లోకురి పెద్దెల్జ విజేరె యేసుజ్ సపిస్తెజ్ ఇజి ఉండ్రి నిర్ణెం కిబిస్తెజ్ ఇజి ఉండ్రె కుట్ర ఆతార్.

2 వారు వన్నిజ్ తొహ్తరె, రోమఅతికారి ఆతి పీలాతు డగ్రు తత్తారె వన్నిజ్ ఒపజెహ్తార్.

3 నస్తివలె వన్నిజ్ ఒపజెహ్తి యూద, వారు యేసుజ్ సపైజ్ ఇజి తీర్పు కితార్ ఇజి నెస్తాండ్రె, మన్నుదు నండో దుకం ఆజి అయ ముపయ్యెండి రుపయెజు పెరి పుజెరిజుని పెద్దెల్జ ఎద్రు మహ్తా తత్తాన్.

4 “ఇని తప్పు సిలివన్నిజ్ ఒపజెహ్తానె నాను పాపం కిత”, ఇజి వాండ్రు వెహ్నాన్. “దనిజ్ నజి ఇని పొతు సిల్లెద్. అయాక నీ బాజిత”, ఇజి వారు వెహ్నాన్.

5 అందెజె యూద అయ వెండి రుపయెజ్ దేవుణుగుడి లోఇ విసిర్తాండ్రె సోహాన్. వెనుక సొన్ని వన్నిజ్ వాండ్రె ఉరి లాగె ఆతాన్.

6 పెరి పుజెరిజు అయ వెండి రూపయెజు పెహ్తారె, “ఇకెజ్ ఒరెన్ వన్నిజ్ సప్పివందిజ్ సిత్తి డబ్బుజ్, అందెజె నంద పెటెదు అర్ప్పిక దేవుణు రూలుదిజ్ పడివద్”, ఇజి వర్గితార్.

7 వారు అయ డబుదాన్ ఆఇ దేసెమ్ది వరిజ్ మూస్తెజ్, కుమెరివన్ని మడిజ్ కొణాట్ ఇజి ఉండ్రి నిర్ణెం కితార్.

8 అందెజె ఏలుదాక అయ మడిజ్, “నల మడిజ్” ఇజి కూకె ఆజినాన్.

9-10 “దేవుణు నజి ఆడ్ర సిత్తిలెకెండ, ఇస్తాయెలు లోకుర్ వన్ని వందిజ్ విలువ లెకెండ సిత్తి ముప్పయ్యె వెండి రూపయెజ్ వారు లాగితారె కుమెరి వన్ని బూమి కొండెజ్ సితార్”\*. ఇజి దేవుణు ముజాల ప్రవక్త ఆతి యిరిమ్మ్యె వెట వర్గితక యా లెకెండ పూర్తి ఆతాన్.

యేసు పీలాతు ఎద్రు నిల్పినాన్

11 యాకెజ్ జరిగిజి మహివలె యేసు పెరి అతికారి ఆతి పీలాతు ఎద్రు నిల్పి మహాన్. నస్తివలె అతికారి ఆతి పీలాతు, “యూదురిజ్ రాజు ఆతికి నీనెనా?”, ఇజి వన్నిజ్ వెన్బాతాన్. “నిజమె, నీను వెహ్ని లెకెండెనె”, ఇజి యేసు మర్జి వెహ్నాన్.

12 పెరి పుజెరిజు, పెద్దెల్జ వన్ని మున్ను తప్పుజ్ మోప్పివెలె వాండ్రు ఇనికబా మర్జి వెహ్వితాన్.

13 నస్తివలె పీలాతు, “వీరు నీ మున్ను ఎసో తప్పుజ్ మోప్పినార్, యాకెజ్ విన్ఇతిదా?”, ఇజి వన్నిజ్ వెన్బాతాన్.

14 వాండ్రు వారు వెహ్ని మాటెజ్ఉండ్రి దనిజ్బా మర్జి ఇనికబా వెహ్వితాన్. అందెజె అతికారి నండో బమ్మ ఆతాన్.

15 పన్నువండోయ్దిజ్ జెలిదు మన్నివరి లోఇ, లోకుర్ కోరజిని ఒరెన్ వన్నిజ్ విడుదల కిని అలవాటు అతికారిజ్ మనాన్.

16 అయావలె బరాబ ఇని ఒరెన్ మూర్కతం మన్ని అన్నయ వాండ్రుననికాన్ ఒరెన్ జెలిదు మహాన్.

17 అందెజె లోకుర్ విజెరె కూడేజి వాతివెలె పీలాతు, “నాను ఎయెరిజ్ విడుదల కిదెజ్ ఇజి మీరు కోరిజినిదెర్? బరబ్బెనా, సిల్లిజ క్రిస్తూ ఇజి కూకె ఆజిని యేసుజా?”, ఇజి వరిజ్ వెన్బాతాన్.

18 వారు యేసు మున్ను గోస ఆతారె వన్నిజ్ ఒపజెహ్త మనార్ ఇజి వాండ్రు నెస్త మనాన్.

\* 27:9-10 27:9-10 జెకరి 11:12,13; యిర్మీయా 19:1-13; 32:6-9.



19 పిలాతు నాయం తీరిన్ని బాడిడు బస్తి మహివలె వన్ని ఆల్ని, “ఇని తప్పబా సిల్లి అయా నెగ్గివన్నిజ్ ఇనికబా కిదెజ్ నీను కూడెదెజ్ ఆవిద్. వన్ని వందిజ్ నేండ్రు ఉండ్రి కలాదు నాను నండొ బాద కల్లిత మన”, ఇజి వన్నిజ్ కబురు పోక్టాద్.

20 పెరి పుజెరిజుని పెద్దెల్జ, బరబ్బెజ్ డిసి సీజి యేసుజ్ సప్తెజ్ ఇజి అతికారి ఒప్పిలెకెండె వెహైజ్ ఇజి లోకురిజ్ రేప్పి మహార్.

21 “యా రిఎర్ లోఇ ఎయెరిజ్ నాను డిస్టెజ్ ఇజి మీరు కోరిజినిదెర్?”, ఇజి అతికారి వరిజ్ వెన్బాతిజ్, “బరబ్బెజ్ నె”, ఇజి వారు మర్జి వెహైజ్.

22 “అహిజి క్రిస్తు ఇజి కూకె ఆజిని యేసుజ్ నాను ఇనిక కిదెజ్?”, ఇజి వరిజ్ వెన్బాతిజ్ “వన్నిజ్ సిలువ పోక్అ”, ఇజి విజెరె వెహైజ్.

23 “ఎందానిజ్ వన్నిజ్ సిలువ పోక్తెజ్, వాండ్రు ఇని తపు పణి కిత్తాన్?”, ఇజి పిలాతు వరిజ్ వెహైజ్, “వన్నిజ్ సిలువ పోక్అ”, ఇజి మరి ఒదె వారు డేల్ని వెహైజ్.

24 గగోలిసె లావ్ఆజినిక ఆవిండ మరి ఇనికబా కిదెజ్ అట్విన్ ఇజి నెస్తాండ్రె పిలాతు, లోకుర్ విజెరె ఎద్రు ఏరు లోసి వన్ని కికు నొరబజి, “ఇని తప్పసిల్లి వన్ని నలదిజ్ నజి ఇని సమందం సిల్లె, మిజినె సమందం మనాద్”, ఇజి వెహైజ్.

25 అందెజె లోకుర్ విజెరె, “వన్ని నల మా ముస్సుని మా కొడోర్ ముస్సు మనీద్\*”, ఇజి మర్జి వెహైజ్.

26 నస్తివలె వారు కోరితి లెకెండెనె వాండ్రు బరాబెజ్వరి వందిజ్డిస్టె సీతాన్. గాని యేసుజ్ కొండెజాణిజ్ డెయ్జి సిలువ పోక్తెజ్ ఒపజెప్తాన్.

### సయ్నమ్దికార్ యేసుజ్ వెక్కిసినార్.

27 నస్తివలె అతికారి సయ్నమ్దికార్ యేసుజ్ వారు బత్తిజిని ప్రిటోరియం ఇని ఇండ్రొ ఒతారె, సయ్నమ్దికార్ విజెరె వన్ని సుటులం కూడితారె.

28 వారు వన్ని నీరి సొకెజ్ లాగితారె మరి ఉండ్రి ఎరాని నీరి సొక వన్నిజ్ తొడుగిస్తాతారె.

29 వారు సాక్కెణిజ్ అటారె ఉండ్రి టోపి తయార్ కిజి వన్ని బురాదు ఇట్టారె. ఉండ్రి డుడు వన్ని ఉణిర్కియుదు అస్సిస్తారె వన్ని ఎద్రు మూణుకుజ్ ఉణిర్జి, “యూదురిజ్ రాజు ఆతికి గెలిస్అ”, ఇజి వెహైజ్ వన్నిజ్ వెక్కిస్తారె.

30 వన్ని ముస్సు పూసి, అయ డుడు లాగ్గి వన్ని బురాదు మరి మరి డెయ్తారె.

31 వన్నిజ్ వెక్కిసి వీజితి వెనుక వన్నిజ్ తొడుగిస్తి మహి నీరి సొక్క లాగితారె, వన్ని నీరి సొక్కెజ్ తొడిగిస్తారె సిలువ పోక్తెజ్ వారు వన్నిజ్ ఒత్తారె.

### యేసు సిలువ పోకె ఆజినాన్

32 వారు సొన్ని మహివలె కురెనియ ఇని పట్టుమ్దికాన్ సీమోను ఇని ఒరెన్ వన్నిజ్ సుడెతారె, సిలువ పిండెదెజ్ వన్నిజ్ బలవంతం కిత్తారె.

33 బుర్ర పెణకి ఇని అర్లం ఆని పేరుమని గొల్గొత్త ఇని బాడిడు వాతారె.

34 అబె సేందు కలప్తి ద్రాస కడు వన్నిజ్ ఉండెజ్ సీత్తారె గాని వాండ్రు కెవతాన్,

35 వన్నిజ్ సిలువ పోక్తి వెనుక వన్ని సొక్కెజ్ ఎయెరిజ్ దోహ్కె ఇజి నెస్తెజ్ సీటిజ్ పోక్తారె వన్ని సొక్కెజ్ నీబె ఆతారె.

36 దన్ని వెనుక వారు అబ్బె బసి వన్నిజ్ కావ్కిజి మహార్.

37 “వీండ్రు యూదురిజ్ రాజు ఆతి యేసు”, ఇజి వాండ్రు కితి తపు రాసి వన్ని బురాదిజ్ ముస్సు ఇట్టారె.

38 వన్ని ఉణెర్ పడకాదు ఒరెన్ వన్నిజ్, వన్ని డేబ్ర పడకాదు ఒరెన్ వన్నిజ్ రిఎర్ డొజారిజి వన్ని వెట సిలువ పోక్తారె.

39-40 అయ నర్దు సొనికార్ విజెరె బుర్ర దుక్కి, “దేవుణు గుడిదిజ్ అర్ప్పి మూండ్రి దినమ్కాజ్ మర్జి తొప్పికి, నీను దేవుణు మరిసి ఇహిజి నిజి నీనె రక్కిన్అ, సిలువదాన్ డిగ్జి రఅ”, ఇజి వన్నిజ్ పడిఎండ సెఇ మటెజ్ వెహైజ్ మహార్.

41 అయ లెకెండెనె, పెరి పుజెరిజు, లోకురి పెద్దెల్జ, దేవుణు మోసెజ్ సీతి రూలుజ్ నెస్పిస్సికార్ విజెరె వన్నిజ్ వెక్కిస్తారె.

42 “వీండ్రు మహి వరిజ్ తప్తిస్తాన్, గాని వన్నిజ్ వాండ్రె తప్తె ఆదెజ్ అట్వితాన్. వాండ్రు ఇస్త్రాయేలుది రాజు ఇహాన్. ఏలు వాండ్రు సిలువ ముస్సుహాన్ డిగితిజి వన్నిజ్ మాపు నమినాప్.

43 వాండ్రు దేవుణు ముస్సు నమకం ఇట్టారె. “నాను దేవుణు మరిసి” ఇజి వెహైజ్. అందెజె దేవుణుదిజ్ వన్నిజ్ సిలువదాన్ రక్కిస్తాండ్రా, ఇజి మాటు నూణాట్ దేవుణు వన్నిజ్ తప్తిసీన్ ఇజి వారు వెహైజ్.

44 అయా లెకెండెనె వన్నివెట సిలువ పోకె ఆతి మని డొజారిజ్బా వన్నిజ్ వెక్కిస్తారె.

### యేసు సిలువారు సాజినాన్

\* 27:25 27:25 వన్ని నల మా ముస్సుని మా కొడోర్ ముస్సు రపిద్ - తెలుగు

45 మదెనమ్దాన్ మూండ్రి గంటెజ్దాక దేసిం విజు సీకటి ఆతాద్.

46 డగ్రు మూండ్రి గంటెజ్అతివెలె యేసు, “ఏలి, ఏలి లమ సబక్తాని”, ఇజి నండొ డేల్నివెహ్తాన్. “నా దేవుణు, నా దేవుణు నజి ఎండనిజ్కీయు డిఃస్తి?”, ✱ ఇజి యా మాటదిజ్ అర్దం.

47 అబ్బె నిహి మహికార్ సెగొండార్ యా మాట విహారె, “వాండ్రు ఏలియెజ్ కూక్కినాన్”, ఇజి వెహ్తార్.

48 వెటనె వరి లొఇ ఒరెన్ ఉహ్కీ సొన్ని దూది తత్తాండ్రె పులాని రసమ్దు ముడుక్కి యేసుజ్ ఉండెజ్ ఉండ్రె డుడుదాన్ వన్ని వెయ్దు అందిస్తాన్.

49 మహికార్”, ఇనిక కిమ, ఏలియ వాజి వన్నిజ్ తప్రిస్తాన్సు, నూణాట్”, ఇజి వెహ్తార్.

50 యేసు మరి డటం డేల్స్తాండ్రె పాణం డిఃస్తాన్.

51 అయ గడియోదునె దేవుణు గుడిఃదు మని తెర ముస్కుహాన్ అడ్లి దాక కింజితాదె రుండి ముకెజ్ ఆతె. బూమి కద్దితాద్. సటుజ్బదెజ్ ఆతె.

52 దూకిజ్ రే ఆతెనె ముజాల సాతి మహి నీతి నిజాయితి మనికార్ నండొండార్ ఒడొల్దాన్ మర్జి నీజితార్.

53 వారు దూకిజాణిజ్ వెల్లి వాజి, యేసు సాతి వరిబాణిజ్ మర్జి నిజితి వెనుక దేవుణు వన్నివందిజ్ కేట కిత్తి పట్టుమ్దు† సొన్ని నండొండారిజ్ తోరె ఆతార్.

54 సదాతిపతి‡ వెటయేసుజ్ కాప్కిజి మహికార్ బూమి కద్దినిక, మరి జర్గితికెజ్ విజు సుడొజి నండొ తియెల్ ఆతార్. “వీండ్రు, నిజమె దేవుణు మరిసినె”, ఇజి వెహ్తార్.

55 నండొండెక్ బోదెక్ కండెక్ దూరమ్దాన్ సుడొజి మహె. వారు యేసుజ్ అవసరం ఆతికెజ్ కిజి గలీలయదాన్ వన్నివెట వాతికెజ్.

56 వన్నా లొఇ మగ్దలెనె మరియాని, యాకోబు, యోసె ఇని వరి అయ్సి ఆతి మరియుని జెబెదాయి మరిసిరిజ్ అయ్సి బానె మహార్.

### యేసుజ్ మూస్సిక

57-58 యేసుజ్ లొజిజి మనికానాతి అరిమతా ఇని పట్టుమ్దికాన్ యోసేపు ఇని ఒరెన్ ఆస్తి మన్నికాన్. షొద్దు ఆతివెలె, వాండ్రు పిలాతు డగ్రు సొహండ్రె యేసు ఒడొల్ లొస్తాన్. యేసు ఒడొల్ వన్నిజ్ సీదెజ్ ఇజి పిలాతు ఆడ్ర సితాన్.

59 యోసేపు అయ ఒడొల్ లొస్తాండ్రె నెగ్గి తెలాని పాతెజాణిజ్ సుటిసి, సటుదిజ్ దొల్పిస్తి, వన్ని వందిజ్ తయార్ కితి మహి కొత్త దూకిదు ఇడొతాన్.

60 ఉండ్రె గుండ్రాని సెప్ట పణకు సడిపిసి దూకిదిజ్ అడు కితాండ్రె సొహాన్.

61 మగ్దలెనె మరియాని మరి ఉండ్రె మరియు అబ్బె దూకిదిజ్ ఎద్రు బస్తెమహె.

### దూకిదిజ్ కాప్ కిజినార్.

62-63 మర్సనాండిజ్, ఇహిజి విస్త్రాంతిదినం వందిజ్ తయార్ అని దినం వెనుక, పెరి పుజెరిబుని, పరిసయ్రు పిలాతు డగ్రు కూడొజి వాతారె, “బాబు, అయ అబద్దం వెహ్సి మొసెం కితికాన్ బత్కితి మహివలె, “మూండ్రి దినమ్కు ఆతి వెనుక నాను మర్జి నీజ్నాలె” ఇజి వెహ్తి మహిక మజి ఎతు మనాద్.

64 అందెజె మూండ్రి దినమ్కుదాక దూకిదిజ్ నెగెండ సుడొదెజ్ ఆడ్ర సిత. సిల్లిజి వన్ని సిసూర్ వాజి వన్నిజ్ పెర్జి ఒసి, వాండ్రు సాతి వరి బాణిజ్ మర్జి నిజితాన్, ఇజి లోకురిజ్ వెహ్నార్. ఆహె కితిజి కడెవెరిదిక మొదొహిదనిజ్ ఇంక మరి ఒదె మోసెం ఆనాద్”, ఇజి వెహ్తార్.

65 అందెజె పిలాతు, “కాప్ కినివరిజ్ ఒసి మీరు కియుదాన్ కిదెజ్అట్టి లెకెండ దూకిదిజ్ జాగర్త కాప్కిదు”, ఇజి వరిజ్ వెహ్తాన్.

66 వారు సొన్ని అయ దూకిదిజ్సీలు షొకిస్తారె, జాగర్త సుడొదెజ్ కాప్ కిని వరిజ్బ ఇడొతార్.

## 28

### యేసు మర్జి నిజిజినాన్

1 విస్త్రాంతిదినం గడస్తి సొహి వెనుక, వారమ్దిజ్ మొదొహి దినమ్దు జాయ్అజి మహివలె, మగ్దలెనె మరియాని మరి ఉండ్రె మరియు దూకిదు సుడొదెజ్ సొహార్.

✱ 27:46 27:46 క్రిస్త 22:1. † 27:53 27:53 యెరూసలేం. ‡ 27:54 27:54 సయ్నమ్ది వంద మణిసిరిజ్ నడిపిసికాన్. § 27:59 27:59 ఉండ్రె రకం గొప్ప విలువాతి సునాజ్ మన్ని పాతెజ్.

2 వెటనె బూమి కద్దితాద్. ఎందనిజ్ ఇహిజ పరలోకమ్దాన్ ఒరెన్ దేవుణు దూత డిగిత వాత్తాండ్రె అడు మహి పణుకు ఎర్లిసి దని ముస్సు బస్త మహాన్.

3 అయ దూత ఒడోల్ మిర్సిని జాయ్లెకెండ్ మహాద్. వన్ని సొక్కెజ్ గాండులెకెండ్ తెలాజ్ మహె.

4 వన్నిజ్ సుడోజి కాప్ కినికార్ తియెల్ ఆతారె వణక్కి వరి పాణం సొహి లెకెండ్ఆత మహార్.

5 దేవుణు దూత అయ బోదెకాజ్ సుడోజి, “మీరు తియెల్ ఆమాట్. సిలువ పొకె ఆతిమన్ని యేసుజ్ మీరు రెబాజినిదెర్ ఇజి నాను నెసిన్.

6 వాండ్రు ఇబ్బె సిల్లెన్. వాండ్రు వెప్తి లెకెండ్నె మర్జి నిజితాన్. రదు, వాండ్రు గూర్తిమహి బాడిః సుడోదు.

7 మీరు బేగి సొన్ని వాండ్రు సాతి వరిబాణిజ్ మర్జి నిక్తాన్. వాండ్రు మిజి ఇంక ముజాల గలీలయ సొన్నినాన్. మీరు అబ్బె వన్నిజ్ దనూల్ ఆనిదెర్, ఇజి వన్ని సిసూరిజ్ వెప్తు. ఇదిలో యాక ఏలు నాను మిజి వెప్సిన ఇజి వరిజ్ వెప్తాన్.

8 అందెజె అవిక్ తియెల్ ఆజి గొప్ప సర్దదాన్ వన్ని సిసూరిజ్ యా మాటెజ్ వెప్తాజ్ ఉహ్క్కి సాహె.

9 వెటనె యేసు వన్నా ఎర్దు తొరె ఆతాండ్రె, “మిజి నెగెండ్ మనిద్”, ఇజి వెప్తాన్. అవిక్ వన్ని డగ్రు వాజి పాదమ్కు అసి వన్నిజ్ పడ్గి మాడిస్తె.

10 నస్తివలె యేసు, “మీరు తియెల్ ఆమాట్. మీరు సొన్ని నా కూలెజ వెట గలీలయదు సొండ్రు ఇజి వెప్తు. వారు అబె నజి దనూల్ ఆనార్లె”, ఇజి వనకాజ్ వెప్తాన్.

11 అవిక్ సొన్నిమహిజ్, దూకిదిజ్ కాప్కిజి మహికార్ సెగొండార్ పట్టుమ్దు సొహారె, జర్గితి నజతిజ్ విజు పెరి పుజెరిజ వెట వెప్తార్.

12-13 అందెజె వారు లోకురి పెద్దెల్జ వెట కూడోజి వాతారె ఉండ్రె ఆలోసనం కితార్. వారు అయ సయ్నమ్ది వరిజ్ నండె డబ్బుజ్ సితారె, “మాపు నిర్ద కిజి మహివలె వన్ని సిసూర్ మదరెతు వాతారె వన్నిజ్ పెప్తా ఒతార్ ఇజి మీరు వెప్తు.

14 యా మాట అతికారి గిబ్బిదు సొహిజ మాపు వన్నివెట వర్గిజి మిజి ఇనికబా రెవిండ నూణావ్లె”, ఇజి వరిజ్ వెప్తార్.

15 అందెజె అయ సయ్నమ్దికార్ డబ్బు అస్తారె వరిజ్ వెప్తావజనె కితార్. యా డోజకత ఏలుబా యూదురి లోఇ సాటె ఆజినె మంజినాద్.

16 పదకొండు మన్ని సిసూర్ యేసు వరిజ్ వెప్తి మన్ని గలీలయాది గొరోత్ సాహార్.

17 వారు వన్నిజ్ సుడోతిజ్ వన్నిజ్ పొగ్డిజి మాడిస్తార్. గాని సెగొండార్ అనుమానం ఆతార్.

18 నస్తివలె యేసు వరి డగ్రు వాతండ్రె, “పరలోకమ్దుని బూమి ముస్సు విజు అతికారమ్కు దేవుణు నజి సిత మనాన్.

19 అందెజె మీరు సొన్ని విజు జాతిజాణి వరిజ్ నా సిసూర్ కిదు. బుబ్బు పేరుదాన్, మరిన్ పేరుదాన్, దేవుణు ఆత్మ పేరుదాన్ వరిజ్ బాప్తినం సిదు.

20 మరి నాను మిజి అగ్గు సితెలెకెండ్, నాను మిజి నెస్పిస్తి విజు వనకాజ్లోజిజి మండ్రెజ్ ఇజి వరిజ్ నెస్పిస్తు. ఇదిలో నాను యా లోకమ్ది ఆక్కర్ దాక ఎలాకాలం తవ్విండ మీవెట మంజిన”, ఇజి వరిజ్ వెప్తాన్.

## మార్కు రాస్తి సువార్త

నెల్వ కిబిసినిక

యా పుస్తకం రాస్తికాన్ మార్కు. వీండ్రు బర్నబెజ్ దడ్రుదికాన్. విన్నిజ్ మరి ఉండ్రి పేరు యోహాను ఇజిబా కూక్వార్. బర్నబని పవులు నెల్వదాన్ పేతురువెట కూడఃజి క్రీస్తు సేవపణి కిదెజ్ మార్కుజ్ అవ్కాసం దోహ్కాద్. యా సువార్త రాస్తిజ్ పేతురుబాణిజ్ నెస్టాండ్రె రాస్టాన్ ఇజి అర్థమాజినాద్. రాస్తి కాలం క్రీస్తు యా లోకమ్దు వాజి సాజి మర్రి నిజీతివెనుక సెగం పంటిజ్ గడఃస్తివెనుక రాస్టాన్. ముకెలమతిక, క్రీస్తు గొప్ప పెరి బమ్మాతి పణిజ్ కిత్తి దేవుణు మరిసి ఇజి, దేవుణుదిజ్ సేవ కితికాన్ ఇజి, మార్కు రాసి తోరిస్టాన్. క్రీస్తు వెప్తా బోదదిజ్ ఇంక క్రీస్తు కిత్తి బమ్మాతి గొప్ప పెరి పణిజి వందిజ్ లావు వెప్పి రాస్త మనాన్. క్రీస్తు కిత్తి గొప్ప పెరి బమ్మాతి పణిజ్ పద్దెనిమితి రాస్త మనాన్. నాలిగినె కతెజ్పజ రాస్టాన్.

యోహాను దేవుణు మాటసాటిసినాన్

- 1 దేవుణు మరిసి ఆతి యేసు క్రీస్తు\* వందిజ్ సువార్త ఇబ్బె మొదోలసినాద్.
- 2 పూర్బ దినమ్కాజ్ ముజాల్ దేవుణు వన్ని మరిసిజ్ వెప్తా మాటెజ్ యెనయ ప్రవక్త ఈహు రాస్త మహాన్. “ఇదిలో, నాను నా కబ్బు తన్నివన్నిజ్ నీ ముజాల పొక్కిన. లోకు నిజి ధ్రు కిదెజ్ ఇజి వాండ్రు నీ ముందల నీ సరి నెగెండ్ కినాన్†.
- 3 బిడిఃమ్బూమిదాన్ వాండ్రు ఈహు డేల్పి వెప్పినాన్ ప్రబుజ్ లోకుడగ్రు వాదెజ్ సరి తయర్కిదు. ప్రబుజ్ లోకుడగ్రు వాదెజ్సరి తినాజ్ కిదు‡”.
- 4 యెనయ ప్రవక్త వెప్తావజ యోహాను బిడిఃజ్ బూమిదు వాతాన్. “లోకుర్ పాపమ్కు డిఃసిసిజి బాప్తినం లాగె ఆదు. దేవుణు పాపమ్కు సెమిస్సాన్ ఇజి వెప్పి యోహాను బానె లోకాజ్ బాప్తినం సీజి మహాన్.

యేసు బాప్తినం లాగె ఆజినాన్

- 5 యూదయ దేసెమ్దికార్ విజెరె, యెరూసలేం పట్టుమ్దికార్ విజెరె సోత్తారె యోహాను డగ్రు వాతార్. వారు పాపమ్కు ఒప్ప కొటార్. యోహాను వరిజ్ యెర్దాన్ గడ్డాదు బాప్తినం సితాన్.
- 6 యోహాను ఒంటె బులుస్కాణిజ్ తయార్ కిత్తి సొక్క పొర్పాజి, నడఃముదు తోలు బెల్లు తొప్తా మహాన్. వాండ్రు మెపిలెక్కి అడిఃవి తేనె తింజి మహాన్.
- 7 యోహాను లోకాజ్ ఈహు వెప్పి వెప్తాన్, “నా వెనుక ఒరెన్ వానాన్లె. వాండ్రు నజి మిస్తి నండో పెరికాన్. వన్ని జోడు బెల్టు కూతెజ్బా నాను ఏపటితికాన్ అవ్.
- 8 నాను మిజి ఏరుదు బాప్తినం సీజిన. నా వెనుక వానికాన్ దేవుణు ఆత్మదాన్ బాప్తినం సినాన్లె”.
- 9 ఆ దినమ్కాజ్ ఒర్పెండు యేసు గలీలయదు మన్ని నజరేతుదాన్ యెర్దాన్ గడ్డాదు వాతాన్. అబ్బె యోహాను యేసుజ్ యెర్దాను గడ్డాదు బాప్తినం సితాన్.
- 10 గడ్డాదాన్ వెల్లి వాజిమహిజ్ ఆగాసం రే ఆతాదె దేవుణు ఆత్మ పావరపొటి లెకెండ్ వన్ని ముస్కు వానిక యేసు సుడఃతాన్.
- 11 “నీను నాను ప్రేమిసిని నా మరిన్. నీ వందిజ్ నాను నండో సర్ద ఆజిన”, ఇజి పరలోకమ్దాన్ ఉండ్రి కంటం వాతాద్.
- 12 వెటనె దేవుణు ఆత్మ యేసుజ్ బిడిఃమ్ బూమిదు పొక్తాన్.
- 13 వాండ్రు అబ్బె నలపయ్ రోస్కు రెయుపొగల్ మహాన్. సయ్యాన్ యేసుజ్ తప్ప కిబిస్తిజ్ పరిస కిజి సుడఃతాన్. అబ్బె అడిఃవి జంతుజ్వెట మహాన్. దేవుణుదూతార్ వన్నిజ్ నెగెండ్ సుడఃతార్.

యేసు సిసూరిజ్ కూక్కినాన్.

- 14 హేరోదు రాజు యోహానుజ్ జెలిదు ఇడిఃతివెనుక యేసు గలీలయదు సొహండ్రె దేవుణుసువార్త బోదిస్టాన్.
- 15 “దేవుణు ముజాల్పె ఏర్పాటు కిత్తి టయం ఏలు వాతాద్. దేవుణు ఏలుబడిః కిని గడిఃయ డగ్రు ఆత మనాద్. మీ పాపమ్కు ఒప్పకొడఃజి డిఃసిసిదు, నాను వెప్పి సువార్త నమ్మిదు”, ఇజి యేసు వరిజ్ బోదిస్టాన్.
- 16 యేసు గలీలయ సమ్దరం ఒడ్డుదాన్ సొన్నిమహిజ్ సీమోనుజ్ని వన్నితంబెరసియాతి అంద్రెయెజ్ సుడఃతాన్ వారు సమ్దరమ్దు వల పొక్కి మొయేజ్ అసి మహార్. ఎందానిజ్ ఇహిజి వారు జాలెరిజు.
- 17 “నా వెట రదు. లోకాజ్ ఎలాగ నా సిసూర్ కిదెజ్ ఇజి నెస్పిస్సాలె”, ఇజి యేసు వరిజ్ వెప్తాన్.

\* 1:1 1:1 లోకాజ్ రక్కిస్తిజ్ దేవుణు ఏర్పాటు పొక్కికాన్. † 1:2 1:2 మలాకి 3:1. ‡ 1:3 1:3 యెనయ 40:3.

18 వారు వెటనె వలేజ్ డిసి వన్నివెట సొహార్.

19 యేసు కండెక్ దూరం నడిజి సొహిజ్ జెబెదెయ మరిసి యాకోబుని, యాకోబు తంబెర్ని యోహాను, పరిడోణిదు బసి వలేజ్ నెగెండ్ కిజి మహిక సుడెతాన్.

20 యేసు పరిజ్ సుడెతివెటనె కూక్తాన్. వారు అప్పొసిజ్, వన్నివెట కూడెజి పణికినివరిజ్ డోణిదు డిసి యేసువెట సొహార్.

**యేసు దెయమ్దిజ్ ఉల్ఫ్సినాన్**

21 యేసుని వన్నిసిసూర్, కపెర్నహము ఇని పట్నమ్దు సొహార్. విస్త్రాంతిదినమ్దు యేసు యూదురి మీటిజ్ ఇండ్రో సొహాండ్రె నేర్పిస్తెజ్ మొదొల్స్తాన్.

22 యేసు నెస్పిక్ విహారె లోకుర్ నండొ బమ్మ ఆతార్. ఎందానిజ్ ఇహిజి యూదురి రూలు నెస్పిన్విరి లెకెండ్ ఆఎండ నండొ అతికారమ్దాన్ మన్ని వన్నలెకెండ్ నెన్పిస్తాన్.

23 నస్తివలె వరి మీటిజ్ ఇండ్రో దెయం అస్తి మహికాన్ ఒరెన్ మహాన్.

24 వాండ్రు “నజరేతుదికి యేసు, మా వెట నిజి ఇని పణి? మా పణి విజు అడు కిదెజ్ వాతిదా? నీను ఎయెండ్రో ఇజి నాను నెసిన్. నీను దేవుణు బాణిజ్ వాతి నెగ్గి వాండ్రు”, ఇజి డటం గగోలాజి వెహ్తాన్.

25 అందెజె యేసు, “అల్లెజి మన్అ. విన్నిజ్ డిసి వెల్లి రఅ”, ఇజి ఆ దెయమ్దిజ్ కోపం దాన్ వెహ్తాన్.

26 అయవలె అయ దెయం అది అస్తిమహివన్నిజ్ దూక్కి డట్టం డేల్స్తాదె డిస్తె సొహాద్.

27 అబ్బె మనికార్ విజేరె ఇక సుడెతారె నండొ బమ్మ ఆతార్. “ఇక ఇనిక? వీండ్రు కొత్త నజతిజ్ నెర్పిసినాన్. దేవుణు సత్తు దాన్ అతికారమ్దాన్ వీండ్రు సోన్అ ఇజి దెయమ్కాజ్ వెహ్సినాన్. అవి డిసి సొన్సినె”, ఇజి ఒరెన్ వెట ఒరెన్ వర్గితార్.

28 వన్ని వందిజ్ మాటెజ్ అయా గలీలయ ప్రాంతం సుటుల విజు వెటనె సెద్రితె.

**యేసు నండొండారిజ్ నెగెండ్ కిజినాన్.**

29 వారు మీటిజ్ కిని ఇండ్రోణాజ్ సొన్ని యాకోబు, యోహానువెట, కూడితారె సీమోను, అంద్రెయ ఇని వరి ఇండ్రో సొహార్.

30 సీమోను మీమ్మి నోబు అస్తి మహాద్. వారు వెటనె దని వందిజ్ యేసు వెట వెహ్తార్.

31 యేసు దని డగ్రు వాజి కీదిజ్అసి దనిజ్నిక్తాన్. నస్తివలె నోబు డిస్తాద్. నోబు డిస్తెజ్ అది వరిజ్ ఉండెజ్ సితాద్.

32 పొద్దు సొహి అతివలె లోకుర్ నండొ నండొ రకమ్కాణిజ్ బాద ఆజి మహివరిజ్ దెయమ్కు అస్తివరిజ్ విజెరిజ్ యేసు డగ్రు తత్తార్.

33 పటనమ్దికార్ విజేరె ఆ ఇల్లు ముజాల్ కూడిత మహార్.

34 యేసు నండొ రకమ్కాణి జబ్బుమహి నండొండారిజ్ నెగెండ్ కిత్తాన్. దెయం అస్తివరిబాణిజ్ వన్కాజ్ ఉల్ఫ్తాన్. వీండ్రు దేవుణు మరిసి ఇజి దెయమ్కు నెస్తి మహి అందెజె వాండ్రు వన్కాజ్ వర్గిఎండ కిత్తాన్.

**యేసు గలీలయదు సాటిసినాన్**

35 మర్న నాండిజ్ యేసు సీకటి మంబునె నిజ్జి పెందల ఎయెర్ సిల్లి ఉండ్రెబాడ్డిదు సొహాండ్రె పార్దనం కితాన్.

36 సీమోను, వన్ని వెట మహికార్, యేసుజ్రెబాజి మహార్.

37-38 యేసుజ్ సుడెతారె, “విజేరె నిజి రెబాజినార్”, ఇజి వెహ్తాజ్ యేసు, “డగ్రు మని మరి పట్నమ్కాజ్బా సొనాట్. నాను అబెబా దేవుణు మాటెజ్ సాటిస్తెజ్వలె. దన్ని వందిజె నాను వాత మన్న”, ఇజి వెహ్తాన్.

39 యేసు గలీలయ విజు బూలాజి యూదురు మీటిజ్ కిని ఇల్కాజ్ బోదిస్తాన్. దెయం అస్తి వరిబాణిజ్ వన్కాజ్ ఉల్ఫ్తాన్.

**యేసుప కుస్తు రోగం అతివన్నిజ్నెగెండ్ కిజినాన్.**

40 ఒరెన్ కుస్తు రోగం మనికాన్ యేసు డగ్రు వాజి ముణుకుజ్ ఊర్జి, “నిజి ఇస్టం మహిజి నజి నెగెండ్ కిదెజ్ అట్ని”, ఇజి బతిమాలితాన్.

41 యేసు వన్ని ముస్సు కనికారం ఆజి కియు సాప్పి వన్నిజ్ ముట్టి, “నజి ఇస్టమనె, నీను నగెండ్ ఆఅ”, ఇజి వెహ్తాన్.

42 వెటనె వన్నిజ్ మహి జబ్బు డిస్తాద్. వాండ్రు నెగెండ్ ఆతాన్.

43-44 అయవలె యేసు, “ఎయెవెటబా ఇనికబా వెహ్కా. నీను తినాజ్ సొన్ని నీ ఒడోల్యూద పుజేరిజ్ తోరిన్అ. నీను నెగెండ్అతి వందిజ్ మోసె ముజాల్ ఆడ్ర సతివజి దేవుణుదిజ్నంత సిఅ” అహా నీను నెగెండ్ అతి ఇజి లోకురిజ్ తోరిన్అ”, ఇజి కసితం వెహ్సి పొక్తాన్.

45 గాని ఆ నెగెండ్ ఆతికాన్ సొన్ని వాండ్రు నెగెండ్ ఆతిక విజేరిజ్ మరి ఒద్దె వెహ్తాన్. అహిజ్ బా విజుబాణిజ్ నండో లోకుర్ యేసుబాన్ వాతార్.

## 2

యేసు కిక్కు కాల్కు అర్తివన్నిజ్ నగెండ్ కిజినాన్

- 1 సెగం రోస్సు అతి వెనుక యేసు మరి కపెర్నహముదు వాతాన్. వాండ్రు ఇండ్రో వాతాన్ ఇని విజెరె వెహార్.
- 2 నండో లోకుర్ బాన్ కూడిజి వాతార్. అస్టెజ్ అట్ ఇ లోకుర్ వాతార్. అందెజె ఇల్లు లోఇబా అర్ జుదుబా బాడ్డి సిల్లెండ ఆతాద్, యేసు వరిజ్ దేవుణు మాటెజ్ బోదిస్తాన్.
- 3 కిక్కు కాల్కు అర్తి వన్నిజ్\* నాల్ ఏర్ పిండిత తతారె సెగెండార్ యేసుబాన్ వాతార్.
- 4 అబ్బె నండో లోకుర్ మహిజ్ వన్నిజ్ యేసు డగ్రు ఒతెజ్ అట్ ఏండ ఆతార్. అందెజె యేసు నిహిమహి జాగముస్సు మెడదిజ్ బోరోకితారె ఆ జబ్బు ఆతివన్నిజ్ సాపదాన్ యేసు నిల్నిమహిబాన్ డిప్తార్†.
- 5 వన్నిముస్సు మని వరి నమకం సుడెతాండ్రె, యేసు జబ్బు ఆతివన్నివెట కూలయెజ్ నీ పాపమ్ కు సెమి ఆతె మన్నె”, ఇజి వెహ్తాన్.
- 6 అబ్బె సెగెండార్ యూదురి రూలు నేర్పిస్సికార్ బస్త మహార్. వారు మనుస్సుదు.
- 7 వీండ్రు ఎందానిజ్ ఈహు వెహ్తాన్. వీండ్రు దేవుణువెట సమానం ఆతికాన్ ఇజి దేవుణుదిజ్ దూసిసినాన్. దేవుణు ఒరెండ్రె పాపమ్ కు సెమిస్సికాన్ గదె”, ఇజి వారు ఒడిబితార్.
- 8 వారు ఈహు ఒడిబిజినిక యేసుజ్ వెటనె తెలితాద్. యేసు వరిజ్ వెహ్తాన్, “ఎందానిజ్ మీరు మీ మనుస్సుదు అహి ఒడిబిజినెదెర్?
- 9 యా జబ్బుది వన్నిజ్ నీ పాపమ్ కు సెమ ఆతె మన్నె ఇజి వెహ్తాన్ సులునా? నీను నిజ్ జి సాప పెర్డి నడిఅ ఇజి వెహ్తాన్ సులునా?
- 10-11 లోకు మరిసి ఆతి నజి లోకురి పాపమ్ కు సెమిస్టెజ్ బూమి ముస్సు అతికారం మనాద్. ఇజి మీరు నెస్టెజ్ వలె ఇజి వెహ్తాండ్రె కిక్కు కాల్కు అర్తి వన్నిజ్ “నాను నిజి వెహ్తాన్, నిజ్ అ, నీ సాప అసి ఇండ్రో సొన్ అ”, ఇజి వెహ్తాన్.
- 12 వెటనె ఆ కిక్కు కాల్కు అర్తికాన్ నిజ్ జి వన్ని సాప అసి వారు విజేరె సుడెజి మహిజ్ నడిజి సాహాన్. అక్క సుడితారె వారు విజేరె బమ్మ ఆతార్. “నిన్ని పణి మాట్ ఎసెజ్ బా తోపిట్” ఇహారె దేవుణుదిజ్ స్తుతి కితార్.

పను పెర్పికాన్ లేవిజ్ యేసు కూక్కినాన్

- 13 యేసు మరి గలిలయ సమ్ దరం గట్టుదు సాహాన్. లోకుర్ వన్ని డగ్రు వాతిజ్ వరిజ్ దేవుణు మాటెజ్ నెస్పిస్తాన్.
- 14 యేసు నడిజి సొన్ని మహిజ్ అల్ పయ్ ఇని వన్ని మరిసి లేవి‡ ఇని పను పెర్పికాన్ ఒరెన్ వన్ని ఆపిసుదు బస్తమహిక సుడెతాన్. యేసు వన్నిజ్ “నీను నా సిసుడు ఆఅ. నా వెట రఅ”, ఇజి వెహ్తాన్. లేవి నిజిత్తాండ్రె యేసువెట సాహాన్.
- 15 వెనుక యేసు లేవి ఇండ్రో బోజెనమ్ దిజ్ బస్తాన్. సెఇ పణి కినికార్ అబ్బె మహార్. పను పెర్పికార్ వారు యూదురు వెహ్తా రూలు వజ నడిఇకార్. ఎసాండ్రో లోకుర్ యేసువెట మహార్. వారుబా యేసు, వన్ని సిసూర్ వెట బోజెనమ్ దిజ్ బస్తార్.
- 16 పరిసయ్ రు లోఇ మన్ని యూదురి రూలుజ్ నెన్ పిస్ నికార్ వనిజ్ సుడెజి “ఎందనిజ్ వీండ్రు పన్నువెర్పివరివెటని పాపం కినివరివెట ఉణిజినాన్”, ఇజి సిసూరిజ్ వెన్ బాతార్.
- 17 యేసు ఆ మాట వెంజి “నెగెండ్ సిల్లివరిజ్ డాక్టరు కావాలి. నెగెండ్ మన్నివరిజ్ ఎందానిజ్ లు మరి డాక్టరు. నీతి నిజమాతి మన్నివరిజ్ అవిద్. పాపం కితివరిజ్ కూక్ కైజె నాను వాత మన్నె, ఇహాన్.

ఉపాస్ వందిజ్ యేసుజ్ వెన్ బాతార్

- 18 అయవలె బాప్తిసం సీని యోహాను సిసూరిని, పరిసయ్ రు, యూదురి రూలువజ ఉపాస్ కిజి మహార్. సెగెండార్ లోకుర్ వాజి యేసుజ్ వెన్ బాతార్, “యోహాను సిసూర్ ఉపాస్ కిజినార్, పరిసయ్ రి సిసూర్ ఉపాస్ కిజినార్, ఎందానిజ్ నీ సిసూర్ ఉపాస్ కివెర్?”.
- 19 యేసు ఈహు వెహ్తాన్, “పెండ్లి కూలెజ్ పెండ్లిదజ్ డెవెట మన్నివెట ఉపాస్ మండ్రెజ్ అట్పూరా? పెండ్లిదజ్ డెవెట మన్నివలె వారు ఉపాస్ మండ్రెజ్ అట్ ఏర్.
- 20 పెండ్లిదజ్ డెజ్ వరి నడిమిహాన్ ఒని దినం వానాద్ లె. అయ రోజు వారు ఉపాస్ మంజినార్.

\* 2:3 2:3 పక్వవయ్యు ఇనిజబ్బుదాన్ నడిదెజ్ అట్ నాన్ † 2:4 2:4 అయ దేసంతు మెడడెజ్ ఎలాగ తయార్ కినార్ ఇహిజి పట్టిజ్ పప్పి దన్నిముస్సు డుల్లిదాన్ పణుకుడెదాన్ మెడ పొక్కార్. మెడ ముస్సు ఎక్తెజ్ ఇహిజి పాపన్నుజ్ మన్నె ‡ 2:14 2:14 విన్నిజ్ మరి ఉండ్రె పేరు మత్తయి విన్ని పణి పన్నువెర్పికాదె.

21 యేసు మరి వెహ్తాన్: “ఎయెర్బా పాడాయ్ పాతదు కొత్త ముక్క కూడేప్పి గుత్వర్. ఆహె కితిజ అయకొత్త పాత ముక్క పడాయి పాతదిజ్ లాగ్గాదె బొరో ఒద్దె లావు ఆనాద్.

22 “ఎయెన్బా పడాయ్ తోలుసన్నిదు కొత్త ద్రాక్సకలు వాక్వన్. అహె కిత్తిజ కొత్త ద్రాక్సకలు పొజు వాజి అయ సన్ని పెడెల్నాద్. ద్రాక్సకలు విజు వాజ్న సొనాద్. సన్ని పాడునాద్. అందెజె కొత్త ద్రాక్సకలు కొత్త తోలు సన్నిదునె వాక్వెజ్”.

### యేసు విజు వన్నాజ్ ముస్సు ప్రబు

23 ఉండ్రీ విస్రాంతి దినమ్దు యేసుని సిసూర్ పంట గుడ్డెదాన్ నడిసి సొన్ని మహార్. అయవలె సిసూర్ సెరేక్ తెప్పి మహార్.

24 పరిసయ్యరు అయక సుడేతారె, “ఇదిలో ఎందానిజ్ వారు విస్రాంతి దినమ్దు రూలుదిజ్ తప్పినార్. ఇజి వన్నిజ్ వెహ్తార్.

25 అయవలె యేసు వెహ్తాన్, “దావీదురాజు, వన్నివెట మహి లోకుర్ బజ కట్టిజ్ వాండ్రు ఇనిక కిత్తాండ్రో ఇజి మీరు ఎసెజ్బా నద్విఇదెరా?

26 అబ్యాతారు ఇనికాన్. విజెరె పుజెరిజ ముస్సు పెరి పుజెరి మహివలె దావీదురాజు సమాజ గుడారమ్దు డుగితాండ్రె, దేవుణు ఎద్దు ఇడ్డి రొట్టెజ్ లాగితాండ్రె తిహాన్. అక్క పుజెరి తప మరి ఎయరర్బా తిండ్రెజ్ ఆవిద్ గాని తిహాండ్రె వన్నివెట మహివరిజ్బా సిత్తాన్.

27 వెనుక యేసు వరిజ్ వెహ్తాన్, “ముజుల్ దేవుణు లోకుదిజ్ విస్రాంతిదినం ఏర్పాటు కిత్తాన్. గాని విస్రాంతి దినమ్వందిజ్ లోకుదిజ్ ఏర్పాటు కివన్.

28 లోకుమరిసి ఆతి పిట్టి నజి విజు వన్నాజ్ ముస్సు అతికారం మనాద్. మరి, విస్రాంతి దినమ్దు ఇనిక కిదెజ్ ఇజి లోకాజ్ వెహ్తాజ్బా అతికారం మనాద్.

## 3

### యేసు కియు అర్తివన్నిజ్ నెగెండ్ కిజినాన్

1 మరి యేసు యూదురి మీటిజ్ ఇండ్రో సొహాన్. అబె ఉండ్రీ కియు అర్తికాన్ ఒరెన్ మహాన్.

2 అబ్బె మహికార్ నెగెండార్ యేసు యా జబ్బుదివన్నిజ్ విస్రాంతిదినమ్దు నెగెండ్ కినాండ్రో ఇజి బాగ సుడిజి మహార్. ఎందనిజ్ ఇహాజ విస్రాంతిదినమ్దు ఇని పణిబా కిదెజ్ ఆవిద్ కాక యేసుజ్ ఇని దన్నిజ్బా తప్ప మొప్పెజ్ ఇజి సుడిజి మహార్.

3 యేసు కియు అర్తివన్నిజ్, “విజెరి ముజుల వాజి నిల్అ”, ఇజి వెహ్తాన్.

4 నస్తివలె యేసు, “దేవుణు మోసెజ్ సితీ రూలువజ విస్రాంతి దినమ్దు నెగ్గి పణి కిదెజా, సెఇ పణి కిదెజా? పాణం అర్పెజ్నా? ఇజి వరిజ్ వెన్బాతాన్. గాని వారు అలెతార్.

5 వరి మన్ను గ్రాజిమహిజ్ యేసు నండొ దుకం ఆతాన్. కోపం దాన్వరిజ్ సుడేతాన్. అయ కియు అర్తివన్నివెట, “నీ కియు సవ్అ”, ఇజి వెహ్తాన్. వాండ్రు కియు సాప్టిజ్ ఆ కియు నెగెణ్ ఆతాన్.

6 నస్తివలె పరిసయ్యరు వెల్లి సొహి వెటనె హెరోది ఇని వరివెట కూడేజి యేసుజ్ ఎలాగ్సపైజ్ ఇజి ఆలోసనం కితార్.

### యేసువెట మంద లోకుర్ సొన్నినార్

7 అందెజె యేసు వన్ని సిసూర్వెట గలీలయ సమ్దరంబాన్ సొహాన్. మందలోకుర్ గలీలయదాన్ వరివెనుక సొహార్.

8 యేసు కిత్తి గొప్ప పణిజ వెంజి యూదయ దేసెమ్దు మన్ని విజు నాహ్కాణికార్, యెరూసలేందాన్, సమ్దరం పడకాద్ తూరు సీదోను ఇని పట్టుమి ప్రాంతమ్కాజ్ వాతి నండొ లోకుర్ వన్నిబాన్ వాతార్.

9 నండొ లోకుర్ వాజి మహిజ్ నిల్పిమండ్రెజ్ ఇహ్కు ఆజి దన్ని ముస్సు ఆఎండ మండ్రెజ్ ఉండ్రీ ఇజి డోణి తసి బానె ఇడ్దు ఇజి సిసూర్ వెట యేసు వెహ్తాన్.

10 ఎందానిజ్ ఇహిజ నండొండారిజ్ యేసు నెగెణ్కితాన్. అందెజె జబ్బు అతిమహికార్ విజెరె యేసుజ్ ముత్తెజ్ ఇజి నెక్కె ఆజి సొహార్.

11 దెయం అస్సికార్ యేసుజ్ సుడేతివెటనె వన్ని ముజుల్ ముణుకుజ్ ఊర్జి, పడగ్జి మాడిస్తారె “నీను దేవుణు మరిసి”, ఇజి గగోలాతార్.

12 “నాను ఎయెన్ ఇజి ఎయెర్వెట వెహ్టాట్”, ఇజి యేసు వరివెట కసితం ఆడ్ర సిత్తాన్.

యేసు పన్నెండు మణిసిరిజ్ అపొస్తరువజ ఏర్పాటు కిజినాన్.

13 వెనుక యేసు ఉండ్రీ గొర్రోత్ ఎక్కి సాహంత్రై వన్నివెట ఒతెజ్ వాండ్రు కోరితివరిజ్ వన్ని డగ్రు కూక్తాన్. వారు వన్నిబాన్ సాహార్.

14 యేసు పన్నెండు మనిసిరిజ్ వన్నిబాన్ మండ్రెజ్ ఇజి, దేవుణు మాట విజేరిజ్ వెప్పివందిజ్ పోక్తెజ్ ఇజి ఏర్పాటు కిత్తాన్. (విరిజె అపొస్తురు ఇజి కూక్తాన్)

15 దెయమ్కాజ్ ఉల్పైజ్ అతికారం వరిజ్ సితాన్.

16-19 యా పన్నెండు మణిసిర్ ఎయెర్ ఎయెర్ ఇహిజ సీమోను (యేసు వన్నిజ్ పేతురు ఇని పేరు సితాన్) జెబెదయ మరిసిర్ యాకోబు, వన్ని తంబెర్సి యోహాను ఇనికార్ (యేసు వరిజ్ బొయనర్గసున్ ఇని పేరు సితాన్. దన్ని అర్థం ఇనిక ఇహిజ దీడెజినికార్ ఇజి) అంద్రెయ, పిలిప్ప, బర్తోలోమయ, మత్తయి, తోమా, అల్పయ మరిసి యాకోబు, తద్దయి, యుదయ దేసెంవందిజ్ ఉసారాజిని సీమోను\*, యేసుజ్ యూదురు అతికారిజ కిదు ఒపజెప్పికానాతి ఇస్కరియోతు యూద.

యేసు బయల్జెబ్బులు ఇని దెయం సాయందాన్ దెయమ్కాజ్ ఉల్ప్పినాన్ ఇహార్.

20 యేసు ఉండ్రీ ఇండ్రో వాతిజ్ మరి నండో లోకుర్ అబ్బె కూడితార్. అందెజె యేసుజ్ని సిసూరిజ్, బోజనం కిదెజ్బా కాలి సిల్లెతాద్.

21 యేసు ఇండ్రోణికార్ యా సజతి విహారె వన్నిజ్ మత్తి నెద్రితాద్ ఇజి వెప్పి వన్నిజ్ అసైజ్ సాహార్.

22 యెరూసలేమ్దాన్ వాతి యూదురి రూలుజ్ నెస్పిస్సికార్ వెహ్తార్, “దెయమ్కాజ్ నెయ్కి ఆతి బయల్జెబ్బులు† విన్నిజ్ అస్తాన్. వన్ని సత్తుదాన్ వీండ్రు దెయమ్కాజ్ పేర్జినాన్”, ఇజి వెహ్తార్.

23 సన్తివలె యేసు వరిజ్ కూక్కి వరిజ్ అర్దమాదెజ్ కత వజ ఈహు వెహ్తాన్, “సయ్తాన్ సయ్తానుజ్ ఎలాగ ఉల్పాన్.

24 ఉండ్రీ దేసమ్దికార్ వరిజ్ వారె జటిజాజి ఎర్లిజి మహిజ అయ దేసెం పాడానాద్.

25 ఉండ్రీ ఇండ్రోణికార్ వరిజ్ వారె జటిజాజి ఎర్లిజి మహిజ ఆ కుటం పాడానాద్.

26 సయ్తాన్ వన్ని గుంపుదు మన్నివరివెట జటిజాజి కేట ఆతిజ నండో కాలం వరిముస్సు ఏలుబడి కిదెజ్ అట్ఏవ్.

27 ఒరెన్ సత్తుమన్ని వన్నిజ్ ముజాల తోహ్విండ, ఎయెర్బా వన్ని ఇండ్రో డుగ్గిజి సామనమ్కు ఒత్తెజ్ అట్ఏవ్. ముజాల వన్నిజ్ తోహ్విజానె డోజ కిదెజ్ అట్పూర్‡.

28 నాను నిజం వెప్పిన, లోకుర్ కినివిజు పాపమ్కాజ్ని, దూసిసిని మాటెజ్ దేవుణు సెమిస్సాన్.

29 గాని దేవుణు ఆత్మదిజ్ దూసిస్తిజి వన్ని పాపం ఎసెజ్బా సెమిస్ఏవ్. వన్ని పాపం ఎలా కాలం మంజినాద్”.

30 యేసు ఈహు ఎందానిజ్ వెహ్తాన్ ఇహిజ సయ్తాన్ సాయమ్దాన్ యేసు దెయమ్కాజ్ ఉల్ప్పినాన్ ఇజి యూదురి రూలుజ్ నేస్పిసినికార్ వెహ్తార్.

యేసు అయ్సి తంబెర్సిర్

31 యేసు అయ్సిని తంబెర్సిర్ వాండ్రు మన్ని ఇల్లుముజాల వాతారె యేసుజ్ కూక్కి తగ్అ ఇజి ఒరెన్వన్నిజ్ ఇండ్రో పోక్తార్.

32 అయ ఇండ్రో యేసు సురుల నండో లోకుర్ బస్త మహార్. వారు వెహ్తార్, “నీ యాయ తంబెర్సిర్ వెల్లి నిహారె నిజి కూక్కినార్”.

33-34 దనిజ్ యేసు, “నా యాయ? నా తంబెర్సిర్ ఎయెర్ ఇజి నాను వెహ్నా”. అబ్బె సురుల బస్తిమనివరిజ్ సుడెజి యేసు వెహ్తాన్, “ఇదిలో నా యాయని, నా తంబెర్సిర్”.

35 “ఎందనిజ్ ఇహిజ దేవుణుదిజ్ ఇస్టమాతివజ కినికాండ్రై నా తంబెరి, నా తజి, నా యాయ ఇజి వెహ్తాన్.

## 4

విత్కు విత్తివన్ని కత

1 యేసు మరి ఒర్పు గలీలయ సమ్దరం పడకాదు నెన్పిస్సెజ్ మొదోల్స్తాన్. మందలోకుర్ వన్ని డగ్రు వాతిజ్ సమ్దరమ్దు ఉండ్రీ డోణిదు ఎక్కి బస్తాన్. లోకుర్ విజెరె సమ్దరం పడకాదు నిహార్.

2 అయవలె వాండ్రు నండో సజతిజ కతవజ వరిజ్ నెస్పిస్తాన్. వాండ్రు ఉండ్రీ సజతి కత వజ ఈహు వెహ్తాన్.

3 సుడెడు, ఒరెన్ రయ్తు వాండ్రు విత్కు విత్తెజ్ సాహాన్.

\* 3:16-19 3:16-19 రోమాది ఏలుబడిదాన్ యూదురు దేసమ్దిజ్ విడుదల కిదెజ్ ఉసార్దాన్ సుడెజిని యూదురు సజం మనాద్. అయా సజమ్దికాన్ ఒరెన్ సీమోను † 3:22 3:22 యాక సయ్తానుజ్ మరి ఉండ్రీ పేరు ‡ 3:27 3:27 సత్తుమన్నికాన్ ఇజి యేసు సయ్తాన్ వందిజ్ వెప్పినాన్. సయ్తాన్ ముస్సు యేసుజ్ సత్తు మనాద్ ఇజి వెప్పినాన్.



4 వాండ్లు విత్తి మహిజ్ సెగం విత్తు సరి పడకాదు అర్తె. ఆ పొటిజ్ వనకాజ్ పెహ్లా తిహె.

5-6 మరి సెగం విత్తు సటు ముస్సు లావ్ డుల్లి సిల్లిబాన్ అర్తె. డుల్లి లావు సిల్లితిజ్ అవి వెటనె నేర్తెగాని వెల లొఇ సాన్ఇజ్ పొద్దు సొసి ఎండ తాక్తివలె అవి సాతె సాహె.

7 మరి సెగం విత్తు సాప్పు తుపెజ్ లొఇ అర్తె. సాప్పు తుప్పెజ్ పిరిజి వనకాజ్ తిగితె. అందెజె పంట పండవితాద్.

8 మరి సెగం నెగ్గి బూమిదు అర్తె. అక్కెజ్ నేర్జి పిరితెనె విత్తి విత్తుదిజ్ ముప్పయ్ వంతుజ్ లెక్క పండితె.

9 యేసు మరి వెహ్లాన్, “గిబ్బిజ్ ఒడఃజి వెంజి అయావజ నడిఃజి మండ్రు”.

10 యేసు ఒరెండ్రె మహిజ్ వన్నెండు మణిసీర్ సిసూర్ని మరి సెగొండార్, “నీను కత వజ నెన్పిస్తి మాటెజ అర్దం ఇనిక?”, ఇజి వన్నిజ్ వెన్బాతార్.

11-12 అందెజె యేసు, “దేవుణు కిని ఏలుబడిః వందిజ్ డాజితిమహి గొప్ప సజతిజ్ దేవుణు మిజి తెలివి కిత్త మనాన్. గాని మహివరిజ్ విజుబా కతవజ నెన్పిస్తిజ్ ఎందానిజ్ కతవజ వెహ్లా ఇహిజ “వారు సుడిఃనార్ గాని తొవర్. వెండ్రెజ్ ఇహిజ వెంజినార్ గాని అర్దం కిదెజ్ అట్వర్. ఎందానిజ్ ఇహిజ వారు అర్దం కిజి వరి పాపమ్కు సెమిస్నాన్\*” ఇహాన్.

13 యేసు వరివెట వెహ్లాన్, “రర్దువువన్ని వందిజ్ నాను కతవజ వెహ్లాక మిజి అర్దం ఆవిదా? అహిజ నాను కతవజ వెహ్లాకెజ్ విజు మిజి ఎలాగ తెలినాద్?”

14 విత్తికాన్ దేవుణు మాట వెహ్లాకాన్.

15 సెగొండార్ విత్తు అర్తి సరి పడకనన్నికార్. వారు వెహివెటనె సర్దువాన్ వాజి ఆ మాటెజ్ లాగ్గి ఒసినాన్.

16 మరి సెగొండార్ విత్తు అర్తి సటువణుకు ముస్సు మన్ని ఇస్కా నన్నికార్. వారు దేవుణుమాట వెహివెటనె సర్దదాన్ మన్నుదు ఇడ్వార్.

17 గానివెల లొఇ సాన్ఇలెకెండ్ దేవుణుమాట వరి మన్ను లొఇ సాన్వద్. వారు కండెక్ కాలం నమ్మిజి మంజినార్. దేవుణుమాట నమ్మితి వందిజ్ కన్యమ్కు మాలెజ్, వానెవెలె దేవుణు ముస్సు మన్ని వరి నమకం వెటనె డిస్స సీనార్.

18-19 మరి సెగొండార్ విత్తు అర్తి సాప్పు తుపెజ్ నేర్పి బూమివజ మనార్. గాని ఎలాగ బత్తిదెజ్ ఇని వందిజ్ మన్ని విసారం, డబ్బు గణిసిని వందిజ్ మన్ని ఆస విజు కూడిఃజి వారు దేవుణుదిజ్ నమ్మిఎండ కిదెజ్ వారు వెహి మాటదిజ్ అణసు తిగ్జినె. పంట పండవండ ఆతిలెకెండ్ వారుబా ఆజినార్.

20 సెగొండార్ అర్తి విత్తునెగ్గి బూమిదువజ మనార్. వారు దేవుణుమాట వెంజి అర్దం కిజి దేవుణు ముస్సు నమకం ఇడ్వార్. నెగ్గి బూమిదు అర్తి విత్తు బస్తెణిదిజ్ ముప్పయ్ బస్తెజ్ అర్వయ్ బస్తెజ్ వంద బస్తెజ్ పండ్లివజ వారు మంజినార్.”

### దీవ జాయ్ సీనివజ కంతుద్ ఇడ్డెజ్

21 యేసు వరివెట ఈహు వెహ్లాన్, “దీవ కసిసి అబల మూక్సినో మన్నం అడిఃగినో ఎయెరుబా ఇడ్వర్. జాయ్ సీనివజ దీవ కంతూదు ఇడ్వార్.

22 ఎందానిజ్ ఇహిజ ఏలు డాఃజితి మన్నికెజ్ విజు ఒర్పెండ్ తోరె ఆనె.

23 మీరు గిబ్బిజ్ ఒడఃజి వెంజి అయావజ నడిఃజి మండ్రు”.

24 యేసు మరి వెహ్లాన్, “మీరు వెహిక జాగర్త అర్దం కిదెజ్వలె. మీరు నెగ్రెండ అర్దం కిజిమహిజ, దేవుణు వన్ని మాటెజ్ అర్దం కిబిస్నాన్లె. ఒబ మరి ఒద్దె అర్దం కిబిస్నాన్లె.

25 నాబాణిజ్ వెంజి అర్దం కిజినివన్నిజ్ దేవుణు మరి తెలివి కినాన్. గాని వెంజి అర్దం కిఇవన్నిబాణిజ్ వాండ్రు అర్దం కిత్తి మన్నికెజ్బా లాగ్నాన్”.

### నెర్జి పిరిసిని విత్తువందిజ్ కత

26 యేసు మరి వెహ్లాన్, “దేవుణు ఏలుబడిః ఈహు మనాద్. ఒరెన్ రర్దువు వాండ్రు విత్తు బూమిదు విత్సినాన్.

27 వాండ్రు రెయ్యాజ్నిద్ర కిజి పెందల నిజ్జి మంజినాన్. వన్నిజ్ తెలివండ ఆ విత్తు నేర్జి పిరిసినె.

28 ముజాల ఆకు, దన్ని వెనుక సెరెన్, దన్ని వెనుక సెరెన్దు గింజ ఇక విజు బూమినె పుటిసినాద్.

29 పంట పండూద్. కొయ్నికాలం వాతిజ్ వాండ్రు కొడుఃవేలి అసి కొయ్జినాన్”.

### సర్పుగింజ వందిజ్ కత

30 మరి యేసు ఈహు వెహ్లాన్, “దేవుణు వన్నిలోకురిజ్ కినిఏలుబడిః ఇని దనివెట పోలిస్తిజ్ ఆనాద్? మాటు ఎమేణి కతవజ అయాక నెన్పిస్తిజ్ అట్వాట్?”

\* 4:11-12 4:11-12 యెసయ 6:9,10.

- 31 అయాక సర్ను గింజదిజ్ పొలిత మనాద్. అక్క బూమిదు విత్తివలె లోకమ్దు మన్ని విజు విత్కాజ్ లొఇ ఇజిరికాద్.
- 32 ఆహిజ్ అక్క విత్తివలె నేరిజి పిరిసి విజు కున మొక్కెజులొఇ పెరిక ఆనాద్. దన్ని కొమెజ్ పెరికెజ్ ఆనె. ఆగనమ్దు ఎగ్రిజిని పొటిజ్ వాజి దన్ని నీడెదు గూడుక్ తొప్పినె”.
- 33 వారు అర్దం కిదెజ్ అట్టి నసా దేవుణు మాటెజ్ ముజుల్ వెప్తి లెకెండ్ కత వజి యేసు నండొ వెప్తాన్.
- 34 కత వజి ఆఎండ యేసు వరిజ్ ఇనికబా నెన్పిన్వతాన్. అహిజి యేసు వన్ని సిసూర్ వెట ఒరెండ్రె మహివలె విజు వన్కాజ్ అర్దం కిజి వెప్తాన్.

### యేసు తుపాన్దిజ్ నిల్ప్పినాన్

- 35 ఆ పొదొయ్నమ్దరం అతాహా పడక సానాట్ ఇజి యేసు సిసూర్ వెట వెప్తాన్.
- 36 లోకాజ్ డిసి యేసు మహి డోణిదు ఎక్సి సిసూరు వన్నిజ్ ఒతార్. మరి నెగం డోణిజ్ బా వరి వెట మహె.
- 37 వారు సాన్ని మహిజ్ పెరి తుపాన్ వాతాద్. ఉల్కెణ్ విజు డోణిదు డెయ్తె ఏరుడోణిదు నిండ్రెతె.
- 38 యేసు డోణి వెనుకపడక బుర్రగడిః ముస్కు నిద్ర కిజి మహాన్. సిసూరు వన్నిజ్ నిక్సి, “బోదకినికి, మాటు విజు ముడఃగిజినాట్. నిజి విసారం సెలెదా?”, ఇజి వన్నిజ్ వెప్తార్.
- 39 యేసు నిజ్జి గాలిదిజ్ ఉల్కెజు, పల్లక్ ఆదు ఇజి వెప్తాన్ పెరి గాలి అణస్తాద్ విజు అలెతాద్.
- 40 నస్తివలె వాండ్రు, “మీరు ఎందనిజ్ తియెల్ ఆజినిదెర్? మిజి నా ముస్కు నమకం సెలెదా?”, ఇజి సిసూర్ వెట వెప్తాన్.
- 41 వారు గొప్ప తియెలాతారె, “వీండ్రు ఎలాగ మప్తాకాండ్రొ గాని, గాలి సమ్దరమ్బా విన్ని మాటదిజ్ లొజితై”, ఇజి ఒరెన్వెట మరి ఒరెన్ వర్గితార్.

## 5

### యేసు దెయం అస్తిమహివన్నిజ్ నెగెణ్ కిజినాన్

- 1 యేసుని సిసూర్ సమ్దరం అతాహా పడక గెరసేను ఇని లోకురి ప్రాంతమ్దు వాతార్.
- 2 యేసు డోణి డిగితి వెటనె దెయం అస్తికాన్ ఒరెన్ దూకిజాణ్ ఎద్రు వాతాన్.
- 3 వాండ్రు దూకిజాణిజ్ బత్తిజి మహాన్\* వన్నిజ్ గొల్కుదాన్ బా తొప్తాజ్ ఎయెర్ బా అట్ ఏర్.
- 4 నండొ సుట్టు వన్ని కాల్యాజ్ కిక్కాజ్ గొల్స్కాణిజ్ తొప్తాజ్ బా వాండ్రు గొల్స్కు తెప్పి ముక్కెజ్ కిత్తాన్. ఎయెరుబా వన్నిజ్ సాదిస్తెజ్ అట్ ఏతార్.
- 5 వాండ్రు రెయుబా వెడెకబా దూకిజాణ్ గొరొకాణ్ గగోలాజి వన్నిజ్ వాండ్రె పణుకుజాణ్ డెయె ఆజి మహాన్.
- 6 వాండ్రు దూరమ్దాన్ యేసుజ్ సుడఃతాండ్రె ఉహ్ కివాజి ముణుకుజ్ ఊర్ జి మాడిస్తాన్.
- 7 విజు దన్నిజ్ అతికారం ఆతి దేవుణు మరిసియాతి, యేసువా, నా వెట నిజి ఇని పణి? నజి బాద కిపి ఇజి దేవుణు పేరు అసి నీను ఒట్టు కిఅ”, ఇజి డేల్లి వెప్తాన్.
- 8 ఎందానిజ్ ఇహిజి యేసు, ఓ దెయం, విన్నిజ్ డిసి వెల్లి సాన్ అ”, ఇజి వెప్పి మహాన్.
- 9 యేసు, “నీ పేరు ఇనిక? ఇజి వెన్ బాతాన్. వెన్ బాతిజ్, నా పేరు సేన, ఇహిజి మాపు నండొండార్ ఇజి వెప్తాన్.
- 10 మజి యా దేసెమ్దాన్ ఉల్పొ ఇజి దెయం అస్తికాన్ యేసుజ్ మరి మరి బతిమాలితాన్.
- 11 అయావలె పండ్రెజ్ మంద గొరొన్ సెల్కుదు మెయెజి మహె.
- 12 ఆ దెయమ్కు, మజి పండ్రెజు లొఇబా పోక్ అ. వనకలొఇ సాండ్రెజ్ మజి సెలువ సిదా”, ఇజి యేసుజ్ బతిమాలితె.
- 13 అందెజె వాండ్రు వన్కాజ్ సెలవ సిత్తాన్ అయావలె దెయమ్కు వన్నిజ్ డిసినె పండ్రెజులొఇ సాహె. అయపండ్రెజ్ మంద విజు గొరొతాణ్ ఉహ్ కి వాజి ఒడ్డుదాన్ సమ్దరమ్దు అర్తినె సాతె. అక్కెజ్ డగ్గు రుండి వెయిజ్ పండ్రెజ్ మహె.
- 14 పండ్రెజ్ మేప్పికార్ ఉహ్ కి సాన్ని పట్టుమది వరిజ్ పట్టుమది వల్సెజు మన్నివరిజ్ జర్గిత్తిక్కెజ్ వెప్తార్. లోకుర్ జర్గిత్తిక సుడఃదెజ్ సాహార్.
- 15 వారు యేసు డగ్గు వాతిజ్ నండొ దెయమ్కు అస్తిమహికాన్ సొక్కెజ్ తొడిగిజి నెగ్గి బుదిదాన్ అబ్బెబన్తిమహిక సుడఃతార్. సుడఃతారె తియెలాతార్.
- 16 యాక సుడఃతికార్ దెయమ్కు అస్తివన్నిజ్ ఇనిక జర్గితాద్, పండ్రెజు ఇనిక జర్గితాద్ ఇజి విజు లోకాజ్ వెప్తార్.
- 17 అయవలె లోకుర్ యేసుజ్, “మా ప్రాంతం డిసి సాన్ అ”, ఇజి బతిమాలితార్.
- 18 యేసు డోణి ఎక్కిజ్ దెయమ్కు అస్తిమహికాన్ వన్ని డగ్గు వాతాండ్రె, నీ వెట నానుబా వాన ఇజి బతిమాలితాన్.

\* 5:3 5:3 అయ దేసెమ్దికార్, నట్టుబొరొకిజి సాలమ్లెకెండ్రె తయార్ కిజి సాతివరిజ్ నమాది కిజి మహార్. పీనుగు సాలమ్లొఇ ఇడ్డి పణకుదాన్ సాలమ్దిజ్ మూసి మహార్. యా దెయం అస్తిమహికాన్ బానె మహాన్.

19 గానియేసు సరి సివతాన్, నీను ఇండ్రో సొన్ని ప్రబు నీ వందిజ్ కిత్తి గొప్ప పణివందిజ్ వాండ్రు నీ ముస్సు ఎలాగ కనికారం తోరిస్తాన్ ఇనివందిజ్ వరిజ్ వెహా ఇజి వెహ్లాన్.

20 వాండ్రు సొహండ్రె యేసు వన్ని వందిజ్ కిత్తి గొప్ప పణిదెకపాలీదు వెహ్లాజ్ మొదోల్స్తాన్. అక్క వెంజి విజేరె బమ్మ ఆతార్.

యేసు సాతి అయ్లిజ్ నిక్కినాన్, జబ్బు ఆతిమహి అయ్లికొడొడిజ్ నెగెండ్ కిజినాన్

21 యేసు డోణిదు ఎక్కి సమ్దరం అతాహ పడక మరి సొహాన్. నస్తవలె నండో లోకుర్ వన్ని డగ్రు వాతార్. యేసు సమ్దరం ఒడ్డుదు నిహ మహాన్.

22-23 నస్తవెలె ఉండ్రె యూదురి మీటిజ్ ఇండ్రోణి అతికారి యాయారు ఇని ఒరెనబానె వాతాన్. వాండ్రు యేసు డగ్రు వాజి వన్ని పాదమ్కాజ్ మాడిస్తాండ్రె, నా ఇజ్రి గాలు సాజినాద్, దయకిజి నీను వాజి అది బత్కిని వజ దని ముస్సు కిక్కు ఇడొజి నెగెణ్ కిఅ, ఇజి బతిమాలితాన్.

24 యేసు వన్నివెట సొహాన్. సేన లోకుర్ నెక్కె ఆజి యేసువెట సొహార్.

25 వరిలోఇ ఉండ్రె అయ్లి కొడొడి మహాద్. అది పన్నెండు పండెజాణ్ వెల్లి ఆని జబ్బుదాన్ బాద ఆజి మహాద్.

26 అది సేన డాక్టరుజాబాన్ నెగెణ్ అదెజ్ సొహాద్ గాని ఆ జబ్బు సొన్ ఏతాద్. అకాదె అవండ దనిజ్ మని డబ్బు విజు కర్పు ఆతిజ్ బా ఆ జబ్బు సొన్ ఏండ మరి నండో ఆతాద్.

27-28 అది యేసువందిజ్ వెహా మహాద్. యేసు అయ సరిదాన్ వాజినాన్ ఇజి వెంజి యేసు తొడిగితి మన్ని నిర్రి సొక్క† సెంగుదు ముట్టిజసరి నెగెణ్ ఆన ఇజి ఒడొబితాద్. అది లోకుర్ వెట సొన్ని యేసు వెనుక వాతాదె వన్ని నీరిసొక్కది సెంగుదిజ్ ముట్టాద్.

29 వెటనె వెల్లి సొనిక నిహాద్. దనిజ్ మహి జబ్బు డొస్తాద్ ఇజి అది నెస్తాద్.

30 వన్నిలోఇహాన్ దేవుణు సత్తు వెల్లి సొహాద్ ఇజి యేసుజ్ తెలితాద్. వెటనె వాండ్రు లోకురిజ్ మర్జి సుడొజి, ఎయెర్ నా సొక్కదు ముట్టాన్? ఇజి వెన్ బాతాన్.

31 దన్ని సిసూర్, సేన లోకుర్ నెకె ఆజి నిజి ముట్టినార్ గదె. ఆహా ఆతిజ్ బా నజి ఎయెరో ముట్టార్ ఇజి ఎండనిజ్ వెహ్లాని? ఇజి యేసుజ్ వెహ్లాన్.

32 నజి ముట్టికాన్ ఎయెండ్రొ ఇజి వరివందిజ్ యేసు సురుల సుడొజి మహాన్.

33 అయవలె అయ బోదెలి అది నెగెణ్ ఆతిక సెని నండో తియెల్ ఆజి వన్నిపాదమ్కుజ్ మూడికుజ్ ఊర్జి వజితాద్. దన్నిజ్ జర్గితిక విజు వెహ్లాద్.

34 యేసు దనిజ్, బయి నీను నా ముస్సు నమకం ఇడ్తి అందెజె నీను నెగెణ్ ఆతి. సమదనమ్దాన్ సొన్ అ. నీను నెగెండ్ ఆతి ఇహాన్.

35 యేసు వర్జిజిమహిజ్ యాయారు ఇండ్రోణిజ్ సెగెండార్ వాజి, నీ గాలు సాతాద్. బోదకిని వన్నిజ్ యేలు బాద కిదెజ్ అక్కర్ సిల్లెద్ ఇజి యాయారుజ్ వెహ్లాన్.

36 వారు వెహ్లాక వెన్ ఇవజ యేసు అయ అతికారిజ్, తియెల్ ఆమ, నా ముస్సు నమకం ఉండ్రె ఇడొఅ ఇజి వెహ్లాన్.

37 యేసు పేతురు, యాకోబు, యాకోబు తంబెర్ని యోహాను మరి ఎయెజ్ బా వన్నివెట ఒవితాన్.

38 వారు యూదురి మీటిజ్ ఇల్లు ఆతికారి ఇండ్రొ సొహార్. అయావలె అబ్బె లోకుర్ గగోలాజి అడొబాజి మహిక సుడొతార్.

39 యేసు ఇలు లోఇ సొన్ని వరిజ్ వెహ్లాన్, మీరు ఎండనిజ్ గగోలాజి అడొబాజినిదెర్? యా ఇజ్రికాద్ సావద్ ఇది నిద్ర కిజినాద్.

40 వారు యేసుజ్ వెక్కిసి కిత్తార్. యేసు అడొబాజి మహి లోకాజ్ విజేరిజ్ వెల్లి పొక్తాన్. వెల్లి పొక్కి, అయ్సి అపొసిరిజ్, వన్నివెట మహి సిసూరిజ్ అసి యేసు ఆ ఇజ్రికాద్ మహి గదిదు సొహాన్.

41 ఆ ఇజ్రిదన్నిజ్ కీదు అస్తాండ్రె, తలీత కుమి ఇజి వెహ్లాన్. అయ మాటదిజ్ అర్లం ఇనిక ఇహిజ ఇజ్రి అయ్లి నిజ్ అ ఇజి నాను నీ వెట వెహ్లాన ఇజి,

42 అయ్లి వెటనె నిజ్ జి నడితాద్. దనిజ్ పన్నెండు పండెజ్ వయసు. అబ్బె జర్గితిక సుడొతారె అయ్సి అపొసీరు, సిసూరు బమ్మ ఆతార్.

43 జర్గితిక ఎయెజ్ బా వెహ్లాట్ ఇజి యేసు వరిజ్ కనితం ఆడ్ర సితాన్. దన్నిజ్ బోజనం సీదు ఇజి అయ్సి అపొసిరిజ్ వెహ్లాన్.

† 5:27-28 5:27-28 అయ కాలమ్దు అయ దేనమ్ది మొగవారు నీరి సొక్క తొడిగి మముల్ సొక్కని బెల్లు తొడిగిజి మహార్.

## 6

యేసుజ్ సొంతనాటో గవరం సిఎతార్

1 యేసు అబ్బెణాన్ వన్ని సొంత పట్టుమాతి నజరేతు సొహాన్. సిసూర్బా వన్ని వెట సొహాన్.

2-3 విస్త్రాంతి దినమ్దు వాండ్రు యూదురి మీటిజ్ ఇండ్రో నేర్పిస్తాజ్ మొదొల్స్తాన్. అక్క వెహికార్ నండొండార్ బమ్మ ఆజి, వీండ్రు ఎమేణిజ్ నెస్తాన్? విన్నిజ్ నిన్ని గెణం ఎమేణిజ్ దొహ్కాద్? వీండ్రు బమ్మాని పణిజ్ కిజిన్. వీండ్రు మాపు నెసిని కంసెల్ వాండ్రు గదె. వీండ్రు మరియమ్మ మరిసిగదె. యాకోబు, యోసె, యూద, సీమోను, విని తంబెర్నిర్ గదె. విన్ని తజిసిక్ మా వెట మన్నెగదె. ఇజి వెహార్. వారు వన్నిముస్సు కోపమాజి మహార్.

4 దన్నిజ్ యేసు ఇనిక ఇజి వెహ్లాన్ ఇహిజ, ఒరెన్ ప్రవక్తజ్ సొంత పట్టుమ్దు, సొంత ఇండ్రో, సొంత కుటుమ్దివరిబాన్ గవరం సిల్లెద్. మరి ఎంబె సొహిజ్బా వన్నిజ్ గవరం మనాద్.

5 సెగొండార్ జబ్బు ఆతివరిజ్ కియుదాన్ ముట్టి నెగెణ్ కిత్తాన్ గాని అబ్బె నండొ బమ్మాతి పణికిదెజ్ యేసు అట్వితాన్.

6 వన్ని ముస్సు వరిజ్ నమకం సిల్లిదిజ్ వాండ్రు బమ్మ ఆతాన్. యేసు సురుల మన్ని నాహ్కాజ్ బూలాజి నేర్పిస్తాన్.

యేసు పన్నెండు మణిసిర్ సిసూరిజ్ పొక్కినాన్

7 యేసు పన్నెండు మణిసిర్ సిసూరిజ్ వన్ని డగ్రు కూక్తాండ్రె రిఎరిజ్ రిఎరిజ్ పొక్తాన్. వరిజ్ దెయమ్కాజ్ పేర్దెజ్ అతికారం సిత్తాన్.

8-9 మీరు ప్రయనం కినివెలె కియుదు ఉండ్రె డుడ్డునె ఒత్తెజ్. బోజనం గాని సన్ని గాని డబ్బు గాని ఒత్తెజ్ ఆవద్. సొండ్రెజ్ కాల్యాజ్ జోడ్డు ఒత్తగాని, పొర్పాదెజ్ రుండి సొక్కెజ్ ఒమాట్”, ఇజి యేసు వెహ్లాన్.

10 మీరు ఎయె ఇండ్రో సొనిదెరో, అయ పట్టుం డిస్సిదాక బానె మండ్రు.

11 ఎంబెబా మిజి లోకుర్ డగ్రు కివిండ మహిజ మీ మాట వెండ్రెజ్ కెఇతిజ, అబ్బెణిజ్ మీరు డిసి సొనివెలె మీ పాదమ్క డుల్లి దులుపు. వరిముస్సు వారె దేవుణుబాణిజ్ సిక్కి తప్పె ఆజినార్ ఇన్నిదన్నిజ్ గుర్తులెకెండ్ ఆపా డుల్లి దులుపు”.

12 సిసూర్సొన్ని లోకాజ్, పాపమ్కు డిస్టు ఇజి బోద్నిస్తార్.

13 లోకురిజ్ అస్తి నండొ దెయమ్కాజ్ పేర్జి, జబ్బు ఆతి నండొండారిజ్ నూనె రాసి నెగెండ్ కిత్తార్.

బాప్తినం సీని యోహానుజ్ రాజు సప్తాన్

14 యేసు పేరు విజుబాన్ సార్త సొహాద్. అందెజె యేసు కిత్తి గొప్ప పణిజవందిజ్ హేరోదురాజు వెహాన్. సెగొండార్ ఇనిక వెహ్లాన్ ఇహిజ “వీండ్రు సాతివరిబాణిజ్ మర్జి నిజితి బాప్తినం సీని యోహాను అందెజె యా బమ్మాతి పణిజ్ కిదెజ్ సత్తు వన్నిలోఇ మంజినాద్” ఇహార్.

15 సెగొండార్ వీండ్రు ఏలియ ప్రవక్త ఇహార్. మరి సెగొండార్ వీండ్రు ముజల్ మహి దేవుణు ప్రవక్తలోఇ ఒరెన్ ప్రవక్త వజ మనాన్ ఇజి వెహ్లాన్.

16 హేరోదురాజు యాక విజు వెంజి నాను బుర డెయిస్తి యోహాను నిజ్జి బత్తితికాండ్రె యేసు ఇజి వెహ్లాన్.

17-18 హేరోదురాజు ఎందానిజ్ ఈహు వెహ్లాన్ ఇహిజ, వాండ్రు వన్ని తంబెర్సియాతి పిలిపు ఆలేసి హేరోదియెజ్ తతాన్. యోహాను హేరోదుజ్, నీ తంబెర్ని ఆల్సిజ్ నీవందిజ్ ఇడె ఆతిక దేవుణు మోసెజ్ సిత్తి రూలుదిజ్ పడివిద్ ఇజి వెహ్లాన్. అందెజె దన్ని వందిజ్ వాండ్రు యోహానుజ్ అసి తొవ్తాండ్రె జెలిదు ఇడిస్తాన్.

19 అందెజె హేరోదియ యోహాను ముస్సు పగదాన్ మహాద్. వన్నిజ్ సపిస్తెజ్ సుడెతాద్ గాని అట్వితాద్.

20 ఎందానిజ్ ఇహిజ హేరోదు యోహానుజ్ తియెలాతాన్. వాండ్రు ఒరెన్ నీతి నిజాయితి మన్నికాన్ ఇజి దేవుణు కేటాకాన్ ఇజి, హేరోదు రాజు నెస్తాన్. అందెజె జెలిదు ఇడ్డి కాపాడజి మహాన్. యోహాను వెహ్లా మాటెజ్ వెహివలె హేరోదురాజు అర్దం కిదెజ్ అట్వితాన్ గాని సర్దదాన్ వెంజి మహాన్.

21 అహిజ యోహానుజ్ సపిస్తెజ్ హేరోదియెజ్ ఉండ్రె అవ్కానం వాతాద్. అక్క ఎలాగ ఇహిజ హేరోదురాజు వాండ్రు పుట్టిరోజు గుర్తు కిదెజ్ అయానాండిజ్ ఉండ్రె పెరి విందు కితాన్. వాండ్రు గవరుమెంటు అదికారిజ, సయ్యమ్ది వరిలోఇ పెరి అతికారి గలీలయ దేసెమ్ది పెద్దెల్జ విజేరిజ్ విందుదిజ్ కూక్తాన్.

22-23 నస్తివలె హేరోదియ గాలసి విందుదిజ్ వాతి వరిజ్ సర్ద కిబిస్తెజ్ వరి ముజాల డాట్టి కర్జితాద్. అక్క సుడితారె విజేరె సర్ద ఆతార్. సర్ద ఆతిజ్ హేరోదురాజు, నిజి ఇస్సమాతిక ఇనికబా నజి లోన్అ, అక్క నాను నిజి సీన, ఇజి దనివెట ఒట్టు కితాన్.

24 అది సొన్ని అయ్యేవెట, నాను రాజుజ్ ఇనిక లొస్తాజ్ ఇజి వెన్బాతాన్. అయ్యేసి, బాప్తిసం సీని యోహాను బుర లొన్అ ఇజి వెప్తాన్.

25 వెటనె అది రాజు డగ్రు సొన్ని బాప్తిసం సీని యోహాను బుర కత్తి ఉండ్రీ పల్లెమ్దు ఇడేజి ఏలె నజీ తసిసిదా ఇజి వెప్తాన్.

26 అక్క వెహండ్రె హేరోదురాజు గొప్ప బాద ఆతాన్ గాని, వాండ్రు కిత్తి ఒట్టువందిజ్ వన్నివెట బోజనమ్దిజ్ బస్తిమహి కూలెజి వందిజ్ దన్నివెట కిత్తి మాట తప్పెజ్ కెవతాన్, ఇజి వెప్తాజ్ అట్వతాన్.

27-28 వెటనె రాజు యోహాను బుర కత్తి తగ్అ ఇజి జమానుజ్ ఆడ్ర సీజి పోక్తాన్. జమాను జెలిదు సొన్ని యోహాను బుర కతాండ్రె ఉండ్రీ పల్లెమ్దు ఇడేజి తత్తాండ్రె అయ్యేలిదిజ్ సితాన్. అది ఆ బుర అయ్యేసిజ్ సితాన్.

29 జర్రితిక వెంజి యోహాను సిసూర్ వాజి ఆ పీనుగుదిజ్ పెర్జి ఒసి సమాది కిత్తార్.

**యేసు అయ్యేదు వెయిజ్మణిసిరిజ్ బోజనం సీజినాన్**

30 అపోస్తురు మర్జివాతాజి వారు కిత్తి పణిజ్ విజు, బోదిస్తి వన్కాజ్వందిజ్ విజు యేసుజ్ వెప్తార్.

31 నస్తివలె యేసు “ఎయెరు సిల్లిబాన్ మాటె సొన్ని నణెం రోమ్నాట్, ఇజి సిసూర్వెట వెప్తాన్. ఎందానిజ్ ఇహిజ నండొ లోకుర్ వాదెజ్ సొండ్రెజ్ ఆతార్. బోజనం కిదెజ్బా కాలి సిల్లెండ ఆతాన్.

32 అందెజి వారు ఉండ్రీ డోణి ఎక్కి ఎయెర్బా మన్ఇ బాడ్డిదు వారె సొహార్.

33 యేసుని, సిసూర్ సొన్నిమహిజ్ నండొ లోకుర్వరిజ్ సుడేతారె వరిజ్గుర్తు అసి విజు పట్టుమ్కాణ్ ఉహ్కీ వరిజ్ ఇంక ముజాల బాన్ సొహారె అందితార్.

34 యేసు డోణిదాన్ డిగితివలె మహి నండొ లోకాజ్సుడేజి వన్ని పాణం నొత్తాన్. ఎందానిజ్ ఇహిజ వారు గవ్డుయెన్ సిల్లి సెద్రితి గొర్రెజ్కెండ్రె మహార్. అందెజి యేసు వరిజ్ నండొ సజతిజ్ నెన్పిస్తాన్.

35-36 యేసు నెర్పిసి మహిజ్ పొద్దుఆజి మహాద్. సిసూర్ వన్నిడగ్రు వాజి యాక ఎయెరు మన్ఇ బాడ్డి. ఏలె పొద్దు ఆజినాద్. పడకాద్ మన్ని నాహ్మజ్ వల్సెజి సొన్ని బోజనం కొండ్రెజ్ విరిజ్ పోకఅ. ఇహార్.

37 గాని యేసు సిసూరిజ్ మీరె వరిజ్ తిండ్రెజ్ ఇనికబా సీదు”, ఇజి వెప్తాన్. దన్నిజ్ వారు మాపు సొన్ని రుండి వంద దెనారిదిజ్\* రొట్టెజ్ కొడేజి తత్తెజ్బా నిసొని లోకురిజ్ సాల్వద్ ఇజి వెప్తార్.

38 మీబాన్ ఎస్సొడు రొట్టెజ్ మన్నె? సొన్ని సుడేదు”, ఇజి యేసు సిసూరిజ్ వెప్తాన్. వారు సొన్ని సుడేతారె అయ్యేదు రొట్టెజ్ రుండి మొయెజ్ మన్నె ఇజి వెప్తార్.

39 విజేరిజ్ పసిగడ్డి మన్నిబాన్ గుంపుజ్కెండ్రె బసెకిదు ఇజి యేసు సిసూరిజ్ వెప్తాన్.

40 లోకుర్ యావయ్ మనిసిర్, గుంపుజ్ వంద మనిసిర్ గుంపుజ్ బస్తార్.

41 అయవలె యేసు అయ్యేదు రొట్టెజ్, రుండి మొయెజ్ అసి, ఆగసం దరోట్ సుడేజి వనకవందిజ్ దేవుణుదిజ్ వందనమ్కు వెప్తాన్. వెప్తాండ్రె రొట్టెజ్ రుక్కి లోకురిజ్ సీబాజి సీదు ఇజి వెప్తాన్ సిసూర్జ్ సితాన్. అయ మొయెజ్బా విజేరిజ్ సీబాజి సీదు ఇజి సితాన్.

42 వారు విజేరె పొట పంజు తిహార్.

43 మిగిలిత్తి రొట్టె ముక్కెజ్, మరి మొయెజ్ ముక్కెజ్ పన్నెండు గంపెజ్ సిసూర్ కెప్తార్.

44 రొట్టెజ్ తిహికార్ మొగవారె అయ్యేదువెయిజ్ లోకుర్ మహార్.

**యేసు సమ్దరం మున్ను నడిజినాన్**

45 యేసు లోకాజ్ పొక్కి వెనుక వెటనె సిసూరిజ్ డోణిదు ఎకిసి అతాహపడక బేత్సయిద ఇని నాటొ వన్నిజ్ ఇంక ముజాల్ సొండ్రు ఇజి వెప్తాన్ పోక్తాన్.

46 వరిజ్ పొక్కి యేసు పార్దనం కిదెజ్ గొరొత్ ఒరెండ్రె మహాన్.

47 పొద్దు ఆతివలె డోణి సమ్దరం నడిమి మహాద్, యేసు గొరొత్ ఒరెండ్రె మహాన్.

48 గాలి ఎద్దు డెయిజ్ డోణి నడేపిస్తెజ్ సిసూరిజ్ గొప్ప కస్టం ఆత్తాన్. అక్క యేసు సుడేతాన్. కొడిజం ఆజిమహిజ్ యేసు సమ్దరం మున్ను నడిజి వాతాండ్రె సిసూర్మన్ని డోణి డాట్టిసొండ్రెజ్ నడిసి వాతాన్.

49 యేసు సమ్దరం మున్ను నడిజినిక సిసూర్సుడేతారె అక ఉండ్రీ దూబ ఇజి ఒడిబితార్. వారు డటం గగోల్ ఆతార్.

\* 6:37 6:37 రోమది వరి కాలమ్దు మన్ని డబ్బు ఇక్క అయకాలమ్దు ఉండ్రీ దినారి ఉండ్రీ రోజుది కూలి.

50 అక్క దూబను ఇజి వారు నండో తియెలాతార్. వెటనె యేసు వరివెట, “నమ్దరమ్దాన్ మండ్రు ఇక్క నానె తియెలామ”, ఇజి వరిజ్ వెహ్లాన్.

51 నస్తవలె యేసు వరివెట డోణిదు ఎక్తాన్. గాలి విజు అణస్తాద్. వారు నండో బమ్మ ఆతార్.

52 యేసు అయ్దు రొట్టెజ్ రుండి మొయెజాణ్ అయ్దువెయిజ్ లోకాజ్ బోజనం సత్తిక సుడెతిజ్బ యేసు కిత్తి అయా బమ్మాతి పణివందిజ్ అర్దం కివితార్. ఎందానిజ్ ఇహిజ వరి మన్ను గట్టిజ్ మహాద్.

యేసు గెనేసెరెతు ఇనిబాన్ లోకాజ్ నెగెండ్ కిజినాన్

53 వారు సమ్దరం డాట్టి గెనేసెరెతు ఇనిబాన్వతారె డోణి అబ్బె తొహ్తార్.

54 వారు డోణి డిఃగితిజ్ సరి లోకుర్ యేసుజ్ గుర్తు అస్తార్.

55 వెటనె ఆ దేసెమ్ది నాహ్కాణికార్ విజేరె సొన్ని జబ్బు ఆతివరిజ్ యేసు మనాన్ ఇజి వెహి బాడిదు సాపాదు పిండ్డి తత్తెజ్ మొదో లస్తార్.

56 యేసు నాహ్కాజ్ పట్టుమ్కాజ్ ఎంబె సాహిజ్బా లోకుర్ జబ్బు ఆతివరిజ్ యేసు వాని సర్దు తత్త ఇడెతార్. యా జబ్బుఆతికార్ నీ సొక్క సెంగుదుబా ముట్టెజ్ సెల్వ సిదా ఇజి బతిమాలజి యేసుజ్ మరి మరి వెహ్తార్. ఎస్సాండార్ వన్ని సొక్కదిజ్ ముట్టితారో వారు విజేరె నెగెండ్ ఆతార్.

## 7

యూదపెదెలుజు రూలుజ్ దేవుణు రూలుదిజ్తేడః వాతాద్

1-2 యెరూసలేమ్దాన్ వాతి పరిసయ్రుని, యూదురి రూలు నెస్సినికార్ సెంగొండార్ యేసుబాన్ కూడెజి వాతార్. యేసు సిసూర్ యూదురుజ రూలుదు వెహ్తాలెకెండ్ కిక్కు నొరబవిండ బోజనం ఉణిజి మహిక వారు అబ్బె సుడెతార్. అక్క పరిసయ్రు సుడిఃతిజ తప్ప.

3 పరిసయ్రు, యూదురు, విజేరె, పూర్బమ్దికార్ వెహ్తారూలు వజ కిక్కు నొరబాతి వెన్కనె ఉణణార్.

4 వారు సత్తదాన్ వాతిజ, రూలువజ ఏరు లొంజె ఆవిండ ఇనికబా ఉణ్విర్. ఇక్కాదె ఆవిండ గిన్నెజ్ కుండెజ్ మరి కంసు బిందెజ్ ఎలాగ మిడిఃస్తిజ్ ఇజి నండో రూలుజ్ వరిజ్ మన్నె. ఆ రూలుజ్వజ వారు కిజినార్.

5 అందెజె పరిసయ్రుని, యూదుర్ రూలుజ్ నెస్పినికార్, “ఎందానిజ్ నీ సిసూర్ పూర్బమ్దికార్ వెహ్తా రూలువజ నడిఃవిండాజినార్ ఎందానిజ్ వారు కిక్కు నొరబవిండ బోజనం కిజినార్”, ఇజి యేసుజ్ వెన్బాతార్.

6-7 యేసు వరిజ్, “వేసం కినికారాతి మీ వందిజ్ యెసయ ప్రవక్త ఎహ్తాక నిజమె. యా లోకుర్ నజి వెయుదాన్ గవ్ఠం సీజినార్ గాని వరి మన్ను నాబాణిజ్ దూరం మనాద్. వారు నజి పొగ్డిఃజి మాడిఃసినార్ గాని అక్క పణిదిజ్ రెవిద్. ఎందానిజ్ ఇహిజ వారు లోకుర్ వెహ్తా రూలు దేవుణు మాట ఇజి లోకాజ్ నెస్సినినార్\*.

8 దేవుణు వెహ్తా రూలు డిఃసిసిజి, మీరు పూర్బమ్దికార్ వెహ్తా రూలువజ నడిఃజినిదెర్”, ఇజి వెహ్లాన్.

9 యేసు వరిజ్ మరి వెహ్లాన్, “పూర్బమ్దికార్ వెహ్తావజ నడిఃదెజ్, ఇజి దేవుణు ఆడ్రెజ్ పడఃకారు నెక్తెజ్ మిజి బాగ తెలినాద్.

10 ఎలాగ ఇహిజ మీ యాయ బుబ్బరిజ్ గవ్ఠం సీజి బాగ సుడెదెజ్ ఇజి యాయెజ్ గాని బుబ్బెజ్ గాని దూసిస్తిజి వన్నిజ్ సప్తెజ్ ఇజి దేవుణు మొసెజ్ సత్తి రూలు మనాద్.

11-12 గాని ఒరెన్ వన్ని అయ్సి అపొసిరిజ్, నాను మిజి ఇనికబా ఉండ్రె సాయమ్లెకెండ్ కిన ఇజి ఇడ్డిమన్నిక కొరబాన్ ఇజి వెహ్తాజ నాండిజ్ అసి వాండ్రు అయ్సి అప్పొసిరిజ్ ఇనికబా సాయం కిదెజ్ అవ్నరం సిల్లెద్ ఇజి మీరు నెస్పినినిదెర్. (కొరబాన్ ఇహిజ దేవుణుదిజ్ సీన ఇజి ఒట్టు కినిక ఇజి అర్దం)

13 ఈహు మీ పూర్బమ్దికార్ వెహ్తావజ నడిఃజి మీరు దేవుణు వెహ్తా రూలుదిజి విలువ సిల్లెండ కిజినిదెర్. నిన్ని సజతిజ్ నండో మీరు కిజినిదెర్”.

14 యేసు లోకాజ్ మరి వన్నిడగు కూక్తాండ్రె “నాను వెహ్పొనిక మీరు విజిదెరె జాగర్తవెంజి నెగెండ్ అర్దం కిదు.

15-16 వెయుదాన్ లొఇ సొనికెజ్ ఇనికబా లోకాజ్ మయ్లు కిదెజ్ అట్విద్. గాని మన్ను లొఇహాన్ వెల్లి వానికదె లోకాజ్ సెప్పెన్ కిజినాద్”.

17 యేసు లోకాజ్ డిఃసి ఇండ్రె వాతివెనుక వన్ని సిసూర్, కతవజ వెహ్తా దన్నిజ్ అర్దం వెన్బాతార్.

18-19 యేసు వరిజ్ ఈహు వెహ్లాన్ “మీరుబా ఆఇవరిలెకెండ్ అర్దం కిదెజ్ ఆట్ఇదెరా? వెల్లిహాన్ పొటాలొఇ సొని ఇని బోజనమ్బా లోకాజ్ మయ్లు కివిద్. ఎందనిజ్ ఇహిజ అక్క మన్నుదు సొన్విండ వన్ని పొటాదునె సొన్నినాద్. అక్క

\* 7:6-7 7:6-7 యెసయ 29:13

పొటదాన్ బయలు బస్సివలె వెళ్లి సొన్నినాద్. ఇజి మీరు నెన్ నిదెర్”. (ఇబ్బె సుడెఃతి ఇని బోజెనమ్ బా ఉండెజ్ ఆనాద్ ఇజి యేసు సెలవ సిత్తాన్)

20 మరి యేసు వెహ్తాన్, ఒరెన్ వన్ని మన్సులోఇహాన్ వెళ్లి వానికదె వన్నిజ్ మయ్లు కిజినాద్.

21-22 మన్సులోఇహాన్ వానిక ఇనికెజ్ ఇహిజ, సెఇ ఆలోసనమ్ కు, కెలార్ బూలానిక, లోకాజ్ సప్పికెజ్, రంకు బూలానిక, ఆఇవరిజ్ మన్నికెజ్ దోహ్ కెజ్ ఇజి ఆస, సెఇ పణి కినిక, మొసెం కినిక, మన్సుదు అనసె ఆజి మండ్రెజ్ అట్ ఇక, గోస దూసిసినిక, నానె పెరికాన్ ఇజి గర్త ఆనిక, అర్దం కిఇ మన్సు మన్నిక.

23 యాక్కెజ్ విజు లోకుర్ మన్సులోఇహాన్ వెళ్లి వాజి ఒరెన్ వన్నిజ్ మయ్లు కినె.

**ఉండ్రి కనానియది అయ్లి కొడెః యేసు మున్సు ఇడ్రి నమకం**

24 యేసు అబెణిజ్ నండె దూరం సొన్ని ఉండ్రి గొరెన్ ఎక్కి డిఃగితాండ్రె తూరు సీదోను ఇని పట్టుమ్ కాజ్ డగ్రు మన్ని ముటజి సొహాన్. బానెఉండ్రి ఇండ్రె సొన్ని ఎయెజ్ బా తెలివండ మంజిన ఇజి మన్సుదు ఒడెఃబితాన్. గాని వాండ్రు అట్ ఏత్తాన్.

25-26 యూదురు ఆఇ జాతిదు పుట్టి సురోపెకొనియదికాద్ ఉండ్రి అయ్లి కొడెః యేసు అబ్బె మనాన్ ఇజి వెంజి వెటనె అబ్బె వాతాదె యేసు పాదమ్ కాజ్ అర్తాదె మాడిఃస్తాద్. దన్ని గాల్పిజ్ దెయం అస్త మహాద్. “నా గాలుజ్ అస్తిమన్ని దెయమ్ దిజ్ ఉల్ ప్ అ”, ఇజి యేసుజ్ బతిమాలితాద్.

27 దన్నిజ్ యేసు, “ముజాల్ కొడెఃరిజ్ పొట పంజు బోజనం తీపిస్తెజ్. కొడెఃరి తిండ్రెజ్ మన్ని రొట్టెజ్ లాగ్ జి నుకుడిఃజ్ సీనిక తగ్ వద్”, ఇజి వెహ్తాన్†.

28 అది, “ప్రబు, నీను వెహ్తా క నిజమె. గాని నుకుడిఃజ్ బా కొడెఃరి ఉణిజి బల్ల అడిఃగి అర్పిక ఉణిజినె గదె ఇజి వెహ్తాద్.

29 యేసు, నీను బాగ వెహ్తా. నీను ఇండ్రె సొన్ అ. ఆ దెయం నీ గాలుజ్ డిఃస్త సొహాద్ ఇహాన్.

30 అది ఇండ్రె సొన్ని సుడెఃతిజ్ గాల్పి మన్సం మున్సు. గూర్త మహాద్. దెయెం దనిజ్ డిఃస్త సొహాద్.

**యేసు బోయ్ ర నతి ఆతివన్నిజ్ నెగెండ్ కిజినాన్**

31 యేసు తూరు ప్రాంతం డిఃసి, సీదోను, దెకపొలి ప్రాంతమ్ దాన్ గలీలయ సమ్ దరం డగ్రు వాతాన్.

32 నస్తివలె బోయ్ ర నతియాతి ఒరెన్ వన్నిజ్ నెగెండ్ యేసు బాన్ తత్తార్. “విన్ని మున్సు కియు ఇడెఃజి నెగెండ్ కి అ”, ఇజి బతిమాలజి వెహ్తార్.

33 యేసు లోకుర్ బాణిజ్ వన్నిజ్ అజ ఒసి, డెస్కెజ్ వన్ని గిబ్బిదు ఇత్తాన్. వన్ని సొంత డెస్కెజ్ పూస్తాండ్రె గుల్ల వన్నిజ్ నాలికాదు ముట్టాన్.

34 ముట్టాండ్రె ఆగసం దరోట్ దేవుణుదిజ్ సుడెఃజి ఉసుర్ గొటాండ్రె బాదఆజి ఎపాత ఇజి వెహ్తాన్. దని అర్దం ఇనిక ఇహిజ రే ఆదెజ్ ఇజి.

35 వెటనె వన్నిగిబ్బిజ్ వెండ్రెజ్, వన్ని నాలిక వర్దిదెజ్ వాతాద్. వాండ్రు బాగ వర్దిదెజ్ మొదొల్స్తాన్.

36 “ఎయెవెట వెహ్మాట్”, ఇజి యేసువరిజ్ కసితం వెహ్తాన్. నా వందిజ్ వెహ్మాట్ ఇజి నండె వెహ్మాజ్ బా అలెవండ వారు యేసువందిజ్ మరి నండె వెహ్తార్.

37 యేసు విజు బాగ కిత్తాన్. బోయ్ ర వన్నిజ్ బా వెనివజ, గుల్లవన్నిజ్ బా వర్దినివజ కిజినాన్ ఇజి వారు వెహ్తారె బమ్మ అత్తార్.

## 8

**యేసునాల్లివెయిజ్ మణిసిరిజ్ బోజనం సీజినాన్.**

1-2 ఆ దినమ్ కాజ్ మరి ఒర్పు నండె లోకుర్ కూడ్డి వాతార్. వరిజ్ ఉండెజ్ బోజనం ఇనికబా సిలిజ్ యేసు వన్ని సిసూర్ జ కూక్తాండ్రె వెహ్తాన్, నజి యా లోకుర్ నావెట వాజి మూండ్రె రొస్సు ఆతె. వరిజ్ తిండ్రెజ్ ఇనికబా సిల్లెద్. అందెజె విరి వందిజ్ నా పాణం నోజిన.

3 విరిజ్ నాను బోజనం సివిండ ఇల్కాజ్ పొక్కిజి కణుకు తర్వజి సర్దు అర్పార్. ఎందనిజ్ ఇహిజ వరిలోఇ నెగెండ్ ఱండె దూరమ్ దాన్ వాత మనార్”, ఇజి వెహ్తాన్.

4 అయవలె వన్ని సిసూర్ వెహ్తార్, బిడిఃమ్ బూమిదు విరిజ్ విజేరిజ్ బోజనం సీదెజ్ ఎమెణిజ్ తతెజ్?

5 మీ బాన్ ఏసాడు రొట్టెజ్ మన్నె? ఇజి యేసు సిసూరిజ్ వెన్ బాతాన్. మా బాన్ ఏడు మన్నె ఇజి సిసూర్ వెహ్తార్.

† 7:27 7:27 యేసు వెహ్తా దన్ని అర్దం ఇనిక ఇహిజ ముజాల వన్నిసొంత లోకురాతి యూదురిజ్ వాండ్రు నెగెండ్ కిదెజ్ వలె వరిజ్ వానికెజ్ ఆఇవరిజ్ సీదెజ్ అవద్ ఇజి

6 అయవలె యేసు లోకాజ్ బూమిదు బస్తు ఇజి వెహ్లాన్. ఆ ఏడు రొట్టెజ్ అసి దేవుణుదిజ్ వందనమ్కు కితాండ్రె. వన్కాజ్ రుక్కి లోకాజ్ సీబాజి సీదెజ్ సిసూరిజ్ సిత్తాన్. వారు లోకాజ్ సీబాజి సిత్తాన్.

7 పరిబాన్ సెగం ఇజ్జి మొయెజ్ బా మహా. యేసు వన్కాజ్ బా వందనమ్కు వెహ్లాన్ సీబాజి సీదు ఇజి సిసూరిజ్ సిత్తాన్.

8 లోకుర్ విజెరె పొట పంజు తిహార్. వెనుక సిసూర్ మిగ్గితి రొట్టె ముక్కెజ్ ఏడుః గపెజ్ కెహ్లాన్.

9-10 డగ్గు నాల్లి వెయిజ్ లోకుర్ అబ్బె మహార్. లోకాజ్ విజెరిజ్ పొక్కి యేసు సిసూర్ వెట ఉండ్రె డోణి ఎక్తాండ్రె దల్యనుత ఇని ప్రాంతం సాహాన్.

11 సెగొండార్ పరిసయరు వాతారె యేసు వెట తర్కిసెజ్ మొదొల్స్తార్. దేవుణునె వన్నిజ్ పొక్తాన్ ఇనిదన్నిజ్ రుజువలెకెండ్రె ఆగనమ్దాన్ ఉండ్రె బమ్మాతి పణికిజి మజి తోరిన్ అ ఇజి వెహ్లాన్.

12 యేసు మన్నుదు గొప్పు బాదఅజి ఉసుర్ కొటాండ్రె యా లోకుర్ ఎందనిజ్ బమ్మ అని పణి తోరిన్ అ ఇజి వెహ్లాన్. యా లోకాజ్ గుర్తులెకెండ్రె ఇని బమ్మమాని పణిబా దేవుణు తోరిన్ ఏన్ నిజమెఇజి వెహ్లాన్.

13 నస్తివలె యేసు వరిజ్ డిస్తాండ్రె డోణి ఎక్కి నమ్దరం డాట్టి అతాహా పడఃక సాహాన్.

**యేసు పరిసయరువందిజ్ హేరోదువందిజ్ వెహ్లాన్**

14 అపిజి సిసూర్ రొట్టెజ్ తత్తెజ్ పొస్తార్. పరిబాన్ డోణిదు ఉండ్రె రొటె మహాద్.

15 యేసు సిసూరిజ్ వెహ్లాన్. పరిసయరుది పులాజ్ కిని దూరు\* వందిజ్, మరి హేరోదురాజుది పులాజ్ దూరు వందిజ్ మీరు జాగర్త మండ్రు.

16 మాటు రొట్టెజ్ తెఇతిజ్ యేసు ఈహు వెహ్లాన్, ఇజి వారు ఒరెన్ వెట ఒరెన్ వర్గితార్.

17 వారు వెహ్లానిక యేసు నెసి ఎందనిజ్ మీరు రొట్టెజ్ సిల్లితివందిజ్ వర్గిజినిదెర్? ఏలుబా అర్దం కిజి నెస్తెజ్ అట్ ఇదెరా? మీ మన్ను గట్టి ఆత మనాదా?

18 మిజి కణుకు మంజిబ తోఇదెరా? గిబిజ్ మంజిబా వెన్ ఇదెరా? ఇనికబా ఒడఃబిఇదెరా?

19 అయ్దు రొట్టెజ్ ముక్కెజ్ కిజి అయ్దు వెయిజ్ లోకాజ్ సీబాతి సిత్తిజ్ మిగ్గితిక్కెజ్ ఎసాడుః గంపెజ్ మీరు కెహ్లాన్? ఇజి యేసు సిసూరిజ్ వెన్ బాతాన్. అందెజి సిసూర్ పన్నెండ్రె గంపెజ్ కెహ్లాన్ ఇహార్.

20 యేసు మరి వెన్ బాతాన్, ఏడు రొట్టె ముక్కెజ్ కిజి నాల్లి వెయిజ్ లోకాజ్ సీతి వెనుక మిగ్గితికెజ్ ఎసాడు గంపెజ్ కెహ్లాన్? ఏడు గంపెజ్ ఇజి వారు వెహ్లాన్.

21 యేసు సిసూరిజ్ వెహ్లాన్, మీరు ఏలుబా నాను కితి బమ్మాతి పణిజి వందిజ్ అర్దం కిదెజ్ నెన్ ఇదెరా?

**యేసు బేత్ సెయ్దు పట్నమ్దు ఒరెన్ గుడ్డివన్నిజ్ నెగెండ్రె కిజినాన్**

22 యేసుని, వన్ని సిసూర్ బేత్ సెయ్దు ఇని నాటో వాతార్. అయవలె సెగొండార్ ఒరెన్ గుడివన్నిజ్ యేసుబాన్ తత్తార్. యేసు, నీను విన్నిజ్ ముట్ అ”, ఇజి వాండ్రు నెగెండ్రె ఆనివందిజ్ బతిమాలితార్.

23 యేసు అయ గుడివన్నిజ్ కీదు అస్తాండ్రె నారు డాటిసి ఒత్తాన్. అయ గుడివన్ని కణుకాజ్ పూసి డెస్కెజాణ్ ముట్టి “నిజి ఇనికబా తోర్జినాదా”, ఇజి వెన్ బాతాన్.

24 వాండ్రు కణుకు పెర్జి, నెడిఃబా తోర్జినాద్, గాని లోకు మరెక్ నడిఃజిని వజ తోర్జినాద్ ఇజి వెహ్లాన్.

25 మరి ఒర్పు యేసు వన్ని కణుకెజి ముట్టాన్. నస్తివలె వన్ని కణుకు నెగెండ్రె ఆతిజ్ విజు నెగెండ్రె సుడఃతాన్.

26 యేసు వన్నిజ్ బేత్ సెయ్దు మర్జి సాన్యా ఇజి వెహ్లాన్ వన్ని ఇండ్రె పొక్తాన్.

**యేసు ఎయెన్ ఇజి పేతురు వెహ్లాన్**

27 యేసుని, వన్ని సిసూర్ పిలిపుది ఆతి కయసరయ పట్నమ్దిజ్ డగ్గు మన్ని నాహ్కాజ్ పయనం కిజి మహార్. సాన్ని మహిజ్ సర్దు యేసు వరిజ్ వెన్ బాతాన్, నాను ఎయెన్? ఇజి లోకుర్ వర్గిజినార్?

28 దన్నిజ్ సిసూర్, సెగొండార్ నీను బాప్తిసం సీని యోహాను ఇజినార్. మరి సెగొండార్ నీను పూర్ బమ్దాన్ మహి ఏలియ ప్రవక్త ఇజినార్. మరి సెగొండార్ నీను పూర్ బమ్దుమహి ప్రవక్తలోఇ ఒరెన్ ఇజి వెహ్లాన్, ఇహార్.

29 అపిజి మీరు నజి ఎయెన్ ఇజి వెహ్లానిదెర్? ఇజి యేసు సిసూరిజ్ వెన్ బాతాన్. నస్తివలె పేతురు, నీను క్రీస్తు ఇహిజ దేవుణు ఏర్పాటు కితి పొక్తాన్”, ఇజి వెహ్లాన్.

30 యాక ఎయెర్ వెటబా వెహ్లాట్ ఇజి కసితంవరిజ్ ఆడ్ర సిత్తాన్.

\* 8:15 8:15 హేరోదురాజు కితి తప్ప పణిజ్ పరిసయరు నెస్తి తప్ప బోదెజ్ పులాజ్ దూరు పులాజ్ కినికెండ్రె లోకాజ్ నెజ్ కిజినాద్ ఇజి యేసు వెహ్లాన్.



యేసు వన్ని సాపువందిజ్ వెప్పినాన్

31 యేసు వరిజ్ నెన్పిస్తెజ్ మొదొల్స్తాన్, లోకుమరిసి ఆతి నాను నండొ మాలెజ్ ఓరిస్తెజ్వలె. యూద పెద్దెల్జ, పెరి పుజెరిజు, యూదురి రూలుజ్ నెన్పిస్సికార్ నజి నెక్కుపొక్కార్ లోకుర్ నజి సప్పార్లె. సాజి మూండ్రి దినమ్కాజ్ దేవుణు నజి మర్జి నిక్కాన్లె.

32 యేసు యాకెజ్ విజు డాప్ఎండ వెప్తాజ్ పేతురు యేసుజ్ ఉండ్రిపడకాదు ఒసి, ప్రబువ నిజి యలెకెండ్ జర్గిదెజ్ ఆవద్ ఇజి గటిజ వెప్తాజ్ మొదొల్స్తాన్.

33 యేసు సిసూర్దరోట్ మర్జి సుడఃజి కోపమ్దాన్ పేతురుజ్ వెప్తాన్. “ఓ సయ్యనా నాబాణిజ్ డిఃసి సాన్అ. నీ మన్నుదు మన్ని ఆలోసనమ్కు దేవుణుబాణిజ్ వాతికెజ్ ఆఉ. లోకుబాణిజ్ వాతికదె నీను ఆలోసనం కిజిని”.

34 నస్తవలె యేసు లోకాజ్ విజెరిజ్, సిసూర్జ వన్నిబాన్ కూక్కి ఈహు వెప్తాన్. ఎయెన్బా నావెట వాదెజ్ ఇహిజ వాండ్రు వన్ని సొంత ఇస్టమ్కు నజి నమ్మితివందిజ్ వన్నిజ్ వాని ఇని మాలెజ్బా ఓరిస్తెజ్ తయారాజి నావెట వాదెజ్†.

35 ఎయెరుబా వన్ని పాణదిజ్ కాపాడెదెజ్ సుడఃతిజి వన్నిజ్ ఎలాకాలం దేవుణువెట బత్కిని బత్కు దొహ్కొవద్. గాని ఎయెన్బా నా వందిజ్, సువార్త వందిజ్ వన్ని పాణం సితీజి వన్నిజ్ ఎలాకాలం దేవుణువెట బత్కిని బత్కు దొహ్కొనాద్.

36 ఒరెన్ వాండ్రు కొరితివజి యా లోకమ్ది ఆస్తిసుకం విజు దొహ్కొఆజి వన్నిజ్ ఎలాకాలం దేవుణువెట బత్కిని బత్కు దొహ్కొవండా మహిజ, ఇని లాబం ఇని లాబంబా సిల్లెద్.

37 ఎందానిజ్ ఇహిజ ఎలాకాలం బత్కిని పాణమ్దిజ్ బదులు ఇనికబా సీదెజ్ లోకఅట్వన్.

38 యా తరమ్దికార్ నండొ సెఇకార్ దేవుణువందిజ్ మన్ను సిల్లెండ మన్నికార్. నా బుబ్బు ఆతి దేవుణుజాయ్దాన్ దేవుణు దూతెజి వెట వానివలె, నా వందిజ్ నామాటెజివందిజ్ సిగు ఆనివరివందిజ్ లోకుమారిసియాతి నానుబా సిగు ఆన్”.

## 9

1 యేసు వరిజ్ ఈహు వెప్తాన్, “నాను నిజం వెప్పిన. ఇబ్బె నిహిమహి వరిలోఇ సెగొండార్ దేవుణు గొప్పనత్తుదాన్ వన్ని లోకురిజ్ ఏలుబడిః కిజినిక సూణిదాక సావర్”.

యేసుప్రబుజ్ మూర్తి మారిసినాద్.

2 ఆరు రొస్సుసాహివెనుక యేసు పేతురు, యాకోబు, యోహానుజ్ వన్నివెట ఉండ్రి పెరి గొరొత్ కూక్త ఒత్తాన్. ఆ నాల్వెరతప్ప అబ్బె మరి ఎయెర్బా సిల్లెర్. అబ్బె వరిఎద్రు వన్నిమూర్తి మారితాద్.

3 యేసు పొర్పాతి మహి సొక్క జిగిజిగి మెరిసిని తెల్లానిజాయ్ వజి ఆతాద్. యా లోకమ్దు నసా తెల్లాజ్ నొర్బానికార్ ఎయెర్ సిల్లెర్.

4 మోసెని, ఏలియ వరిజ్ తోరె ఆతార్. వారు యేసువెట వర్గిజి మహార్.

5-6 అక్కు సుడఃజి సిసూర్ తియెలాతార్. అందెజె పేతురు ఇనిక వెప్తాజొ నెన్ఎండ, “ప్రబు, మాటు ఇబ్బె మహిజనెగెద్. అందెజె మూండ్రి గుడుఃసెజ్ తొహ్పిట్. నిజి ఉండ్రి, మోసెజ్ ఉండ్రి, ఎలియెజ్ ఉండ్రి” ఇహాన్.

7 అయవలె ఉండ్రి మొసాప్ వరిజ్ పిడఃగితాద్. అయవలె అయ మొసాప్ లోఇహాన్, “వీండ్రు నా ఇస్టమాతి నా మరిన్. విన్నిమాట వెండ్రు”, ఇజి ఉండ్రి కంటం వాతాద్.

8 వెటనె వారు సురుల సుడఃతిజ్ వరివెట యేసు తప్ప ఎయెర్బా తొర్వెతార్.

9 వారు గొరొన్ డిఃగ్జివాజి మహివలె, “లోకుమరిసియాతి నాను సాతివరిబాణిజ్ మర్జి నిజినిదాక మీరు సుడఃతిక మహిక ఎయెజ్బా వెహ్మట్”, ఇజి యేసు వరిజ్ కసితం వెప్తాన్.

10 యేసు వెప్తావజి వారు ఎయెజ్ వెహ్ఎండ వరిమన్నుదు ఇడఃజి వరిలోఇ వారె వర్గితార్, “సాజి నిజ్నిక ఇహిజ అర్థం ఇనిక?”.

11 నస్తవలె వారు యేసుజ్ వెన్బాతార్, “ఏలియ ముజాల్ వాదెజ్వెలె ఇజి యూదురి రూలు నెన్పిస్సికార్ ఎందానిజ్ వెప్పినార్?”

12 యేసు ఎలియ ముజాల్ వానాన్ ఇజి వెప్తాక నిజమె. వాండ్రు వాజి విజు కొత్తజ్ కినాన్లె\*. గాని లోకుమరిసియాతికాన్ నండొ కస్టమ్కు ఓరిసి మాలెజ్ ఆజి లోకువన్నిజ్ నెక్కిపొక్కార్లె ఇజి రాస్తి దనిజ్ అర్థం మిజి తెలినాదా?

13 గాని నాను మిజి వెప్పిన, ఏలియ వాతాన్. వన్ని వందిజ్ రాస్తి లెకెండ్ వరిజ్ ఇస్టం ఆతి వజి వారు వన్నిజ్ కితార్. ఇజి వెప్తాన్.

† 8:34 8:34 \* 9:12 9:12 పడాయ్ ప్రమాణమ్దు మన్ని మలాకి ప్రవక్త రాసి పుస్తకమ్దు రాస్తిమన్నిలెకెండ్ ఇహజి ఏలియ ముజాల వాదెజ్ ఇజి యూదురి నమ్మిజనార్. మలాకి 3:1; 4:5-6.

దెయం అస్తికొడొడిదిజ్ యేసు నెగెండ కిజినాన్

14 యేసుని, సిసూర్, మహి సిసూర్ మహిబాన్ వాతిజ్ సిసూర్ సురుల నండొ లోకుర్ కూడతి మహిక సుడుఃతార్. యూదురి రూలు నెస్పిస్నికార్ సిసూర్వెట వాదిసి మహార్.

15 అబ్బె మహి లోకుర్ విజెరె యేసుజ్ సుడొఃతారె నండొ బమ్మ ఆజి వెటనె వన్నిబాన్ ఉహ్కీవాజి వన్నిజ్ మాడిస్తార్.

16 నస్తివలె యేసు, “మీరు ఇనిదన్నిజ్ సిసూర్వెట వాదిసి మహిదెర్? ఇజి వెన్బాతాన్.

17 ఆ జనమ్లోఇ ఒరెన్ ఈహు వెహ్తాన్, “మేస్టర్, నా మరిసిజ్ నీ డగ్రు తత్త. వన్నిజ్ ఉండ్రీ దెయం అస్తాదె వన్నిజ్ వర్గింండ కితాద్.

18 ఆ దెయం నా మరిన్అస్తి వేడొదు అబ్బెనె వన్నిజ్ అర్ప్పినాద్. నస్తివలె వాండ్రు వెయుదాన్ పెంపులు కక్కి పల్కు కొహ్సినాన్. వాండ్రు డుడ్డువజ డజ్ న ఆజినాన్. ఆ దెయమ్దిజ్ ఉల్పు ఇజి నీ సిసూర్ వెట నాను వెహ్తా గాని సిసూర్ అట్వెతార్.

19 యేసు వెహ్తాన్, “నమకం సిల్లి యా తరమ్దికిదెరా, నాను ఎస్సాకాలం మీవెట మంజిన? మీరు కిజినికెజ్ ఎస్తా ఓరిస్తెజ్? వన్నిజ్ నా డగ్రు తగ్అ”.

20 నస్తివలె వారు ఆ కొడొడిదిజ్ యేసుడగ్రు తత్తార్. ఆ దెయం యేసుజ్ సుడొఃతిజ్సరి వన్నిబడొఃల్ విజు వణకిసి బూమిద్ అర్ప్తాద్. అర్ప్తాదె వాండ్రు సుడొఃబాజి పొబు కక్తాన్.

21 నస్తివలె యేసు, “వన్నిజ్ దెయం అసి ఎస్సా కాలం ఆతాద్?”, ఇజి అపొసిజ్ వెన్బాతాన్. “ఇజ్జి వెలెహనె”, ఇజి అప్పొసి వెహ్తాన్.

22 “ఆ దెయం కొడొడిదిజ్ సప్తెజ్ ఇజి నండొసుట్టు సిసూద్, సిల్లిజి ఏరుదు అర్ప్పి మహాద్. నీను ఇనికబా కిదెజ్ అట్టి ఇహిజి మా ముస్సు కనికారం ఆజి మజి సాయం కిఅ”, ఇజి అప్పొసి యేసుజ్ వెహ్తాన్.

23 యేసు వెహ్తాన్, “నీను ఇనికబా కిదెజ్ అట్టిజి ఇజి మీరు నజి వెహ్పొదెరా? ఎయెన్బా దేవుణు ముస్సు నమకం ఇడ్డిజి వన్నిజ్ దేవుణు ఇనికబా కిదెజ్ అట్నాన్”.

24 వెటనె ఆ ఇజ్జి వన్ని అప్పొసి, “నాను నమిజిన. అనుమానం సిల్లెండ నమినివజి నాను నిజి నమ్మిదెజ్ సాయం కిఅ”, ఇజి డటం వెహ్తాన్.

25 అబ్బె లోకుకూడొఃజి ఉహ్కీ వానిక యేసు సుడొఃజి ఆ దెయమ్దిజ్ “ఓ గుల్లబొయ్ ర దెయం, యా కొడొడిదిజ్ డిసి వెల్లి సాన్అ ఇజి నాను ఆడ్ర సీజిన. ఎసెజ్బా మర్జి వన్ని లోఇ రమ”, ఇజి డటిసి వెహ్తాన్.

26 నస్తివలె ఆ దెయం గగొలాజి వన్నిజ్ గొప్ప వణకిసి డిస్త సాహాద్. ఆ కొడొడిదిజ్ సుడొఃతిజి సాతివన్నివజి మహాన్. అక్క సుడొఃజి నండొండార్ “యా కొడొః సాత సాహాన్” ఇహార్.

27 గాని యేసు వన్ని కీదు అసి నిక్తిజ్ వాండ్రు నిహాన్.

28 యేసు ఉండ్రీ ఇండ్రొ సాహివెనుక, యేసు అజి మహిజ్ వన్నిసిసూర్, “మాపు ఎందానిజ్ఆ దెయమ్దిజ్ ఉల్పైజ్ అట్వెతాప్? ఇజి వెన్బాతాన్.

29 అందెజె యేసు, “యా రకం దెయమ్కు పార్దనం వెలెనె గాని మరి ఇనిదనివెలెబా సాన్ఉ”, ఇజి వెహ్తాన్.

యేసు వన్ని సాపువందిజ్ మరి వెహ్పొనాన్

30 వారు అబెణిజ్ సొన్ని గలీలయదాన్ సొన్ని మహార్. వారు ఎంబె మంజినారొ ఇజి ఎయెజ్బా తెలిదెజ్ యేసుజ్ ఇస్టం సిల్లెతాద్.

31 ఎందానిజ్ ఇహిజి, యేసు వన్ని సిసూర్జి నెస్పిసి మహాన్. ఇనిక ఇహిజి, “లోకుమరిసియాతి నజి లోకాజ్ ఒవజెప్పార్లె. వారు నజి సప్పార్. మూండ్రీ రోస్కాజ్ నాను బత్తిజి నిజ్నాలె.

32 గాని యేసు వెహ్తామాట సిసూర్ అర్దం కివెతార్. ఆ మాటెజి వందిజ్ వన్నిజ్ వెన్బాదెజ్ వారు తియెలాతార్.

విజేరిజ్ ముస్సు పెరికాన్ ఎయెన్?

33 వారు కపెర్నహము ఇని పట్టమ్దు వాతార్. వారు ఇండ్రొ వాతిజ్ యేసు మీరు సర్దు ఒరెన్వెట ఒరెన్ ఇనిదని వందిజ్ వాదిసి మహిదెర్. ఇజి వెన్బాతాన్.

34 గాని వారు ఇనిక వర్గింండ అలెతార్. ఎందానిజ్ ఇహిజి వానివలె సర్దు ‘మా లోఇఎయెన్ పెరికాన్’ ఇజి ఒరెన్వన్నివెట మరిఒరెన్ వాదిసి మహార్.

35 నస్తివలె యేసు బస్తాండ్రె పన్నెండు మణిసిర్ సిసూరిజ్ కూక్కి ఈహు వెహ్తాన్, ఎయెన్ మహి పరిముస్సు పెరికాన్ ఆనాండ్రొ, వాండ్రు విజెరి ఇంక అగిజి మండ్రెజ్. వాండ్రు విజేరిజ్ సేవ కిదెజ్.

36-37 వెనుక యేసు ఒరెన్ ఇబ్రీ కొణ్ణొదిజ్ తసి వరినడిమి నిల్వ్తాన్. మరి ఆ కొణ్ణొదిజ్ ఎతాండ్రె ఈమా వెప్తాన్, “ఒరెన్ ఇబ్రీ కొణ్ణొదిజ్ ఎయేర్ నా పేరు అసి వరిఇండ్రె డగ్రు కినారొ వారు నజీ డగ్రు కినార్. ఎయేర్ నజీ డగ్రు కినారొ నజీ ఆఎండ నజీ పొక్తివన్నిజ్ డగ్రు కినార్.

మా ముస్కు పగసిల్లికాన్ మా పడకాదు మన్నికాండ్రె

38 యోహాను వెప్తాన్, “మేస్టర్, ఒరెన్ నీ పేరు అసి దెయమ్కాజ్ ఉల్పిక్ మాప్సుడకాతాప్. వాండ్రు మాలోఇ మనికాన్ ఆవన్. అందెజె మాపు వన్నిజ్ అడ్డు కిత్తాప్.

39 యేసు వెప్తాన్, “వన్నిజ్ మీరు అడ్డు కిమాట్. నా పేరు అసి యేలు బమ్మాతి పణికినికాన్ వెటనె నా వందిజ్ సెఇక వెహ్వాన్.

40 మా ముస్కు పగ సిల్లికాన్ మా పడకాదు మనికాండ్రె.

41 నాను నిజం వెహ్సాన్, ఎయేర్బా మీరు క్రిస్తు వారుఇజ వెహ్సా, నా పేరు అసి గినాడు ఏరుఉండెజ్ మిజి సితీజ దేవుణు వరిజ్నిజం ఇనాయం సీనాన్.

తప్పకిబిసినివన్నిజ్ నండొ సిక్కి వానాద్

42 నాముస్కు నమ్మకం ఇడ్డి యా ఇజిరి కొణ్ణొనన్ని వరిలోఇ ఒరెన్వన్నిజ్ ఎయేర్బా తప్పకిదెజ్, సరి తోరిస్తిజ వాండ్రు మెడకాదు పెరి జతపణుకు తోహా ఆజి సమ్దరమ్దు అడకెగి ముడిగి సొనొక వన్నిజ్ నెగెద్. ఎందానిజ్ ఇహిజ తప్పకిబిసినివన్నిజ్ ఒద్దె సిక్కి వాన్ద్.

43 నీ కియు నిజి తప్ప కిబిస్తిజ దనిజ్ కత్తి విసీర్అ.

44 రుండి కికు మంజి ఎలాకాలం సిసు మంజినిబాన్ సొన్ఏండ ఉండ్రె కియు మంజి ఎలాకాలం బత్కిదెజ్ దేవుణుబాన్ సొనిక నెగెద్.

45-46 నీ కాలు తప్పకిబిస్తిజ దన్నిజ్ కత్తి విసీర్అ. రుండి కాల్కు మంజి ఎలాకాలం సిసు మంజినిబాన్ దేవుణు నిజి అర్వేఏండ, సొట వాండ్రు ఆజి ఎల్ల కాలం బత్కిదెజ్ దేవుణు బాన్ సొనిక నెగెద్.

47 నీ కణుక తప్పకిబిస్తిజ దన్నిజ్ లాగ్గి విసీర్అ. రుండి కణుకు మంజి దేవుణు నిజి సరకమ్దు అర్పెఎండ ఉండ్రె కణక మంజి దేవుణు ఏలుబడికాదు మంజినిక నెగెద్.

48 బానె వరి పిడుకకు† సాఉ. సిసు నమ్వద్”.

49 సొరుదాన్ ఇడ్డివజ దేవుణుదిజ్ నమ్మిని వన్నిజ్ సిసు నని కన్ఠందాన్ ఇత్తాన్.

50 సొరు, నెగికాదె గాని దన్నిజ్మని రుసి సొహిజ ఎలాగ మరి దన్నిజ్ రుసి తపిస్తెజ్ ఆనాద్? మీరుబా సొరు రుసి సీనివజ ఒరెన్వెట ఒరెన్ సమనం కల్లిజ మండ్రెజ్”.

## 10

అల్నిజ్డిస్టెజ్నాయమ్నా ఇజి యేసు నెన్పిసినాన్

1 యేసు, వాండ్రు మహిబాణిజ్ డిసి యూదయ ప్రాంతమ్దు వాజి యొర్దాన్ గడ్డ డాట్టాన్. మరి వన్నిబాన్ నండొ లోకుర్ వాతార్. ఎసెజ్బా నెన్పిసినిలెకెండ యేసు వరిజ్ నెన్పిస్తాన్.

2 సెగొండార్ పరిసయేరు యేసుడగ్రు వాజి వన్నిమాటెజ తప్ప అస్తెజ్ సుడకాతార్. వారు యేసుజ్ వెన్బాతార్, మోసె సితీ రూలువజ ఒరెన్ వన్నిఅల్నిజ్ డిస్టెజ్ తగితి రూలుమనాదా?

3 అందెజె యేసు, మోసె ఇని రూలు మిజి సితాన్? ఇజి వరిజ్ వెన్బాతాన్.

4 ఒరెన్ వన్ని అల్నిజ్ డిస్టెజ్ ఇహిజ ఉండ్రె ఆక్కు రాసిసిజి దన్నిజ్ డిస్టెజ్ ఆనాద్. ఇజి మోసె సితీ రూలుదు మనాద్, వారు వెప్తార్.

5 యేసు వెప్తాన్, మీ మన్సుజ్ నస్సా గర్ర ఆతిజ్నె యా ఆడ్ర రాసి సితాన్.

6 గాని దేవుణు లోకాజ్ పుటిస్తివలె మొగకొణ్ణొ అయ్లి కొణ్ణొలెకెండ వరిజ్ పుటిస్తాన్.

7 అందెజె మొగవాండ్రు వన్ని అయ్సి అపొసిజ్ డిసి వన్ని అల్నివెట కూడకెజి మంజినాన్.

8 రిఎర్ ఉండ్రె ఒణ్ణొల్వజ ఆజిమంజినార్. అందెజె మరి ఎసెజ్బా వారు రిఎర్ ఆఎండ ఉండ్రె లోకునె.

9 అందెజె దేవుణు జత్తకూడిప్పివరిజ్ లోకు అజ కినిక ఆవద్.

10 వారు ఇండ్రె మహివలె సిసూర్ యా సజతి వందిజ్ యేసుజ్ మరి వెన్బాతార్.

11 యేసు వెప్తాన్, “ఒరెన్ అల్నిజ్ డిసి మరిఉండ్రె దనిజ్ ఇడ్డెఆతిజ వాండ్రు రంకు బూలాజినాన్.

† 9:48 9:48 సబ్బిసానిదన్నిజ్ లోఇమన్ని పిడుకకుజ్

12 అయి లెకెండ్ అయిలొకొడోః మాసిజ్డిసి మరి ఒరెన్వన్నిజ్ ఇడ్డెఅతిజ అది రంకుబూలాజినాద్”.

యేసు ఇజిరి కొడోరిజ్ దీవినినాన్

13 లోకుర్, వరిఇజిరి కొడోరిజ్” వరిముస్కు వన్ని కిక్కు ఇడ్డెదెజ్ ఇజి యేసుబాన్ తత్తార్. అక్కు సుడోతారె సిసూర్ వరిజ్ జట్టిజ్ ఆతార్.

14 గాని యేసు అక్కు సుడోతాండ్రె సిసూర్ముస్కు కోపం ఆతాన్. “యా ఇజిరి కొడోరిజ్ నా డగ్రు రపిర్. వరిజ్ అడ్డు కిమాట్. ఎందానిజ్ ఇహిజ యాలెకెండ్ మన్నికారె దేవుణు ఏలుబడిదు మంజినార్.

15 నాను వెహ్తిక నిజమె. ఇజిరి కొడోరిజ్ నమకం ఇడ్డివజ దేవుణుముస్కు నమకం ఇడ్డికారె దేవుణు ఏలుబడిదు మంజినార్. సిల్లికార్ సోన్వర్”, ఇజి యేసు వెహ్తాన్.

16 నస్తవలె యేసు అయి ఇజిరి కొడోరిజ్ ఎత్తి, వరి ముస్కు కిక్కు ఇడ్డిజ్పామ్జి దీవిస్తాన్.

ఆస్తి మనికాన్ యేసుడగ్రు వాజినాన్

17 యేసు అబ్బెణాన్ సొండ్రెజ్ సొత్తిజ్ ఒరెన్ ఉహ్కొ వాజి వన్ని ముజూల్ ముణుకుజ్ ఊర్జి మాడిస్తాన్, “ఓ నెగ్గి బోదకినికి, దేవుణువెట ఎలాకాలం మంజిని బత్తుదు మండ్రెజ్ ఇహిజ నాను ఇనిక కిదెజ్”, ఇజి యేసుజ్ వెన్బాతాన్.

18 “నీను ఎందానిజ్ నజి నెగ్గికి ఇజి వెహ్సిని? దేవుణు ఒరెండ్రె నెగ్గికాన్. మరి ఎయెన్బా నెగ్గికాన్ ఆవన్.

19 దేవుణు వెహ్తి రూలువిజు నిజి తెలినాద్. లోకాజ్ నస్తజ్ ఆవద్, రంకు బూలాదెజ్ ఆవద్, డోజ కిమా, అబద్దమ్దిజ్ సాస్య వెహ్తి, ఎయెజ్బా మోసం కినిక ఆవద్, యాయ బుబ్బరిజ్ గవర్మదాన్ నెగ్గెండ్ సుడిదెజ్”, ఇజి యేసు వన్నిజ్ వెహ్తాన్.

20 వెహ్తాజ్ “బోదకినికి, ఇజిరి వెలెహాన్ అసి యా విజువనకాజ్ లోజిజినె నాను మంజిన”, ఇజి వాండ్రు వెహ్తాన్.

21 యేసు వన్నిజ్ సుడోజి వన్నిజ్ ప్రేమిస్తాన్. “నీను ఉండ్రె కిదెజ్ మనాద్. అక్కు ఇనిక ఇహిజ నీను సొన్ని నిజి కల్లితిమనిక విజు పొర్ని అయి డబ్బుజ్ బీదాతివరిజ్ సిఅ. అయవలె పరలోకమ్దు నిజి ఆస్తి దోహ్కాద్. వెనుక వాజి నా సిసూ ఆఅ”, ఇజి యేసు వెహ్తాన్.

22 యామాట వెహ్తాండ్రె వాండ్రు మొకొం ఊతాండ్రె మన్నుదు దుకమాజి సొహాన్. ఎందానిజ్ ఇహిజ వాండ్రు నండో ఆస్తి మన్నికాన్.

23 నస్తవలె యేసు సురుల సుడోజి సిసూర్జ వెహ్తాన్. “ఆస్తి మన్నికాన్ దేవుణు ఏలుబడి అడిగి మండ్రెజ్ ఎస్సానొ కస్టం.

24 యేసు వెహ్తి మాటెజ్ సిసూర్ వెహరె బమ్మ ఆతార్. యేసు మరి వెహ్తాన్, “కొడోరాండె దేవుణు ఏలుబడి అడిగి మండ్రెజ్ ఎస్సానొ కస్టం.

25 ఆస్తిమన్నికాన్ దేవుణుకిని ఏలుబడిదిజ్ లోజిజి మండ్రెజ్ ఇహిజ కస్టం. ఉండ్రె ఒంటి బోబానం బోరొదాన్ డుగ్గినిక దన్నిజ్ ఇంక సులునె”.

26 యాక వెంజి సిసూర్ మరి ఒద్దె బమ్మ ఆతార్. అహిజ దేవుణు రక్కిస్తిలెకెండ్ ఎయెన్ మండ్రెజ్ అట్వాన్? ఇజి వారు ఒరెన్వెట మరి ఒరెన్ వెహ్తాన్.

27 నస్తవలె యేసు వరిజ్ సుడోజి, అయా లోకాజ్ అట్ఇకాదె గాని దేవుణు విజు కిదెజ్ ట్వాన్”, ఇజి వెహ్తాన్.

28 నస్తవలె పేతురు, మాపు విజు డిస్తాపె నీవెట వాతాప్ ఇజి యేసుజ్ వెహ్తాన్.

29-30 యేసు మరి వెహ్తాన్, నాను వెహ్తిక ఇనిక ఇహిజ, నా వందిజ్, సువార్త వెహ్తి వందిజ్, ఇలుజొల్లు నా దాదతంబేరిజు, తజిబీబికాజ్, కొడోరిజ్, అయ్సిఅపొసిరిజ్, బూమిజ్ డిస్తివన్నిజ్ యా లోకమ్దునె వంద వందుజ్ ఇల్కు, దాదతంబేరిజ్, బీబితజికు, కొడోరిజ్, అయ్సిఅపొసిరి, బూమి, కల్లినాద్. అక్కాదె ఆవిండ దేవుణుదిజ్ నమ్మితివరిజ్ యా లోకమ్దు కస్టమ్కుబా వానె. గాని దేవుణు రాజువజ వానివలె వాండ్రు ఎలాకాలం దేవుణువెట బత్కినాన్.

31 అయిలెకెండ్నె కడెవెర్దికార్ ఇజి ఒడిబినికార్ మొదోహికార్ ఆనార్. ముందహికార్ ఇజి ఒడిబినికార్ కడెవెర్దికార్ ఆనార్.

యేసు మరిఉండ్రె సుటు వన్నిసాపు వందిజ్ వెహ్తాన్

32 యేసుని, సిసూర్ యెరూసలేమ్దు సొన్ని మహార్. లోకుర్బా వరివెట సొన్ని మహార్. యేసు వరి ముజూల్నడితాన్. యేసు యెరూసలేమ్దు సొన్నిని వందిజ్ సిసూర్ బమ్మఆతార్. లోకుర్ తియెలాతార్. యేసు పన్నెండు మణిసిర్ సిసూర్ వన్నిడగ్రు కూక్కి, వన్నిజ్ జర్గినిక వరిజ్ వెహ్తాన్.

33 “ఇదిలో మాటు యెరూసలేమ్ దు సొన్నినాట్. లోకుమరిసియాతి నాను పెరి పుజెరిజ, యూదురి రూలువెప్పి వరిజ్ ఒపజెప్పారలె. వారు నజి సాపుదిజ్ సిక్కి సీజి యూదురు ఆఇవరిజ్ నజి ఒపజెప్పారలె.

34 వారు నజి వెక్రిసి, నా ముస్కు పూసి, కొర్దదాన్ డెయ్ జి నప్పారలె. ముండ్రొ రోస్కాణిజ్ మర్జి నిజ్ నాలె”, ఇజి వెప్తాన్.

**యాకోబుని యోహాను యేసువెట ఉండ్రొమాట వెహ్ సినార్**

35 నస్తవలె జెబెదయ మరిసిరాతి యాకోబు యోహాను ఇనికార్ యేసుడగ్రు వాతారె, “ఓ బోదకినికి, మాపు ఇనికబా లోస్తిజి అక్క మజి సీదెజ్ వెలె” ఇహార్.

36 యేసు వరిజ్ “నాను మీ వందిజ్ ఇనిక కిదెజ్?”, ఇజి వెన్ బాతాన్.

37 వారు, “నీను రాజువజి ఏలుబడిః కినివలె మజి ఒరెన్ వన్నిజ్ నీ ఉణెర్ పడఃకాదు ఒరెన్ వన్నిజ్ నీ డేబ్రు పడఃకాదు బసె కితి ఇజి కోరిజనాప్”, ఇజి వెప్తాన్.

38-39 యేసు వరిజ్ “మీరు ఇనిక లోసినిదెరో మీరు నెన్ ఇదెర్. నాను ఒరిస్సెజ్ మన్ని నండొ బాదెజ్ మీరు ఒరిస్సెజ్ అట్టిదెరా? నాను పొందిని బాప్తిసం పొందిదెజ్ అట్టిదెరా?”, ఇజి వరిజ్ వెన్ బాతిజ్ వారు, “మాప్ అట్వాప్ ఇహార్. దనిజ్ యేసు నాను ఒరిస్సి నండొబాదెజ్ మీరు ఒరిస్సిదెర్. నాను పొందిని బాప్తిసం మీరు పొందిదెజ్.

40 గాని నా ఉణెర్ పడఃకాద్ డేబ్రు పడఃకాద్ ఎయెర్ బస్తెజ్ ఇజి తీర్మనం కితిక నాను ఆవి. దన్ని వందిజ్ దేవుణు తీర్మనం కిత్త మనాన్. వాండ్రు తీర్మనం కితివరిజ్ అక్క సీనాన్.

41 మహి పది మన్ని సిసూర్ యా మాట వెహారె యాకోబుని యోహాను ముస్కు కోపమాతార్.

42 యేసు సిసూరిజ్ విజేరిజ్ కూక్కి ఈహు వెప్తాన్, “యూదురు ఆఇవరిలోఇ ఏలుబడిః కిదెజ్ అతికారం మన్నికార్ వరిముస్కు అతికారం తోరిస్సార్ వరిలోఇ పెరికార్ వరిజ్ మన్ని అతికారమ్ దాన్ లోకురిజ్ అణసు తిగ్ జినార్ ఇజి మీరు నెన్ నిదెర్.

43 మీరు వరిలెకెండ్ మండ్రెజ్ ఆవిద్. గాని మీ లోఇ ఎయెన్ బా పెరికానాదెజ్ ఇహిజి వాండ్రు మిజి పణిమణిసిర్ లెకెండ్ ఆదెజ్ వలె.

44 మరి ఎయెన్ బా మిజి విజేరె ముస్కు నెయ్ కి ఆదెజ్ ఇహిజి వాండ్రు మిజి విజేరిజ్ వెటిపణిమణిసిలెకెండ్ ఆదెజ్ వలె.

45 ఎందానిజ్ ఇహిజి లోకు మరిసిఆతి నానుబా లోకాజ్ సేవ కిదెజ్ వాత గాని సేవ కిబె ఆదెజ్ రెవత. మరి నండొండారిజ్ పరి పాపమ్ కాణ్ విడుఃదల కిదెజ్ నా పాణం సీదెజ్ వాత మన్ను”.

**యేసు గుడ్డిఆతి బర్తిమయిజ్ నెగెండ్ కిజినాన్**

46 యేసుని సిసూర్ యెరికొపట్టమ్ దు వాతార్. వారు నండొ లోకుర్ వెట పట్టమ్ దాన్ సొన్ని మహిజ్ తిమాయి మరిసి ఆతి బర్తిమయి ఇని గుడ్డివాండ్రు సరి పడఃకాదు లోస్ పాదెజ్ బస్త మహాన్.

47 సరి దాన్ వాజినికాన్ నజరేతువాండ్రు యేసు ఇజి వెంజి, “ఓ యేసు, దావీదుమరిసి నా ముస్కు కనికరం తోరిస్ అ”, ఇజి డటం గగోల్ ఆతాన్.

48 సేన లోకువన్నిజ్ “పలాక్ మండ్రు ఇజి గోల కిత్తార్. గాని వాండ్రు “ఓ “దావీదుమరిసి, నా ముస్కు కనికారం తోరిస్ అ”. మరి ఒద్దె డట్టం డేల్ స్తాన్.

49 యేసు నిహండ్రె, “వన్నిజ్ కూక్ అ”, ఇజి వెప్తాన్. వెప్తిజ్ వారు ఆ గుడ్డివన్నిజ్ కూక్కి, “దయరం మన్ అ, యేసు నిజి కూక్కినాన్, నిజ్ అ”, ఇజి వెప్తాన్.

50 వెటనె వాండ్రు వన్ని నీరి సొక్క విసీర్తాండ్రె నిజ్ జి యేసు బాన్ వాతాన్.

51 యేసు వన్నివెట, “నాను నిజి ఇనిక కిదెజ్ ఇజి నీను కోరిజిని?”, ఇజి వెన్ బాతాన్. నస్తవలె వాండ్రు, “యేసు, నాను బేస్టెజ్ ఆపిద్”, ఇజి వెప్తాన్.

52 యేసు, “నీను నా ముస్కు నమకం ఇడ్డి అందెజె నీను నెగెండ్ ఆతి నీను ఇండ్రొ సొన్ అ” ఇహాన్. వెటనె సుడుఃదెజ్ అట్టాన్. వాండ్రు యేసువెట సొహాన్.

## 11

**యేసుజ్ రాజువజి మర్యాద సీజినార్**

1-2 యేసుని, వన్నిసిసూర్ యెరూసలేం డగ్రుమన్ని బెత్ పాగె బేతానియ ఇని నాహ్కాజ్ వాతార్. యా నాహ్కా ఒలివ గొరొన్ డగ్రు మన్నె. అబ్బె వాతిజ్ యేసు సిసూర్ రివిరిజ్ కూక్కి, “మీరు ఎద్దు మని నాటో సొండ్రు. అబ్బె సొహిజనరి తోప్తి మని ఉండ్రె పెరి గాడఃదె పిల్ల మీరు సూణిదెర్ దని ముస్కు ఎయెర్ బా ఎసెజ్ బా బన్ ఏతారె. దనిజ్ కుత్తి నాబాన్ పేరిజి తగాట్”.

3 “మీరు ఎందా కుత్సినదెర్ ఇజి ఎయెర్బా వెప్తాజ, యాక ప్రబుజ్ కావాలి. మరి వెటనె దన్నిజ్ మర్జి పోక్సాన్ ఇజి వెప్తు” ఇహాన్.

4-5 వారు సొన్ని ఇల్లుముజాల్ వీదిదు తొప్తా మని ఉండ్రి గాడెదె పిల్లదిజ్ సుడ్తార్. వారు దనిజ్కుత్సి మహిజ్, అబ్బె మనికార్, “ఎందానిజ్ మీరు యా గాడెదె పిల్లదిజ్ కుత్సినదెర్”, ఇజి వెన్బాతార్.

6 యేసు వరిజ్ వెప్తా వజనె సిసూర్ వెప్తార్. అబ్బె మహికార్ వరిజ్ సరిసిత్తార్.

7 వారు గాడెదె పిల్లదిజ్ యేసుబాన్ తత్తార్. దన్నిముస్కు బస్తెజ్ వరి పాతెజ్ పప్తాజ్ యేసు దన్నిముస్కు ఎక్కి యెరూసలేమ్దు సొండ్రిజ్ సోతాన్.

8 సొహిజ్ సిన లోకు వరి నీరి సొక్కెజ్ సర్దు పప్తార్. మరి సెగొండార్గుడ్డెదు మని మరెకాణి కొమ్మెజ్ తతారె సర్దు పప్తార్. ఆహె కిజి వారు యేసుజ్ మర్యాద కిత్తార్.

9-10 ముజాల్ సొన్ని మహికార్, వెనుక వాజి మహికార్, “ఓనన్న! ప్రబు సిత్తి అతికారమ్దాన్ వాజినికాన్ పొగ్డె: ఆనికాన్\*. మా అని గొగొతి దావీదు రాజువజి ఎలుబడి: కిదెజ్ వాని ప్రబు గొప్ప వాండ్రు పరలోకమ్దు మన్ని దేవుణుదిజ్ ఓనన్న!”, ఇజి డేల్స్తార్.

11 యేసు యెరూసలేమ్దు వాజి దేవుణు గుడి:దు సొహాన్. అబ్బె మహి విజుదనిజ్ యేసు సుడ్తాన్. గాని పొద్దు ఆతిజ్ పన్నెండు మణిసిర్ సిసూర్వెట బేతానియ నాటో సొహాన్.

### పట్టు సిల్లి బొడెమరాన్

12 మర్న నాండిజ్ యేసు, వన్ని సిసూరు బేతానియదాన్ సొన్నిమహిజ్ యేసుజ్ బజి కట్టాద్.

13 యేసు దూరమ్దాన్ ఉండ్రి బొడెమరాన్ సుడ్తాన్. పట్టు కాలం ఆఇజ్బా మరాతు ఆకుజ్ మహె. మరాత్పట్టు మంజినె ఇజి డగ్రు సొహండ్రి సుడ్తాన్. గాని ఆకు తప పట్టు సిల్లు.

14 యేసు ఆ మరాతిజ్” నీ పట్టు మరి ఎసెజ్బా లోకుర్తిన్విండ ఆపిర్’ ఇజి వెప్తాన్. వాండ్రు వెప్తాక సిసూర్ విహర్.

### యేసు యెరూసలేమ్దు మన్ని పెరిదేవుణుగుడి:దు సొహాన్

15 యేసుని వన్ని సిసూర్ యెరూసలేమ్దు వాతిజ్, యేసు అబ్బెమహి యూదురి దేవుణు గుడి:దు సొహాన్. అబ్బెగుడి: అర్బుదు మహి కొణి వరిజ్ పొర్నివరిజ్ విజేరిజ్ వెల్లి పోక్తాన్. డబ్బు మారిన్ని వరి బల్లెజ్ని పావురపొటిజి పొర్నిని వరి పిటెజ్ మప్తా విసీర్తాన్.

16 ఇని సామానమ్బా ఎయెర్బా దేవుణు గుడి: బాడి:దాన్ బరు మోస్తెజ్ యేసు సరి సివీతాన్.

17 యేసు వరిజ్ నెన్పిసినివెలె ఈహు వెప్తాన్, “నా గుడి: విజెరి లోకాజ్ పార్దనం కిని గుడి: ఇజి కూకె ఆనాద్లె†, ఇజి దేవుణు మాటదు రాస్త మనాద్. గాని మీరు దన్నిజ్ డొజారిజి సాలం‡ లెకిండ్ కిత్తి మన్నిదెర్”.

18 యేసు వెప్తాక లోకుర్ విజేరె వెంజి బమ్మ ఆతార్. అబ్బె మహి పెరిపుజెరిబు, యూదురి రూలుజ్ నెన్పిసినికార్ అక్క సుడ్తాజి తియెలాతార్. యేసుజ్ ఎలాగ సప్తెజ్ ఇజి ఆలోసనం కిత్తార్.

19 పొద్దు ఆతివలె యేసుని, వన్ని సిసూర్ ఆ పట్టుమ్దాన్ సొహార్.

### పట్టు సిల్లి బొడెమరాన్ వందిజ్ యేసు వెహిసాన్

20 పెందాల్నె వారు సొన్నిమహిజ్ యేసు పట్టు రెబాతి బొడెమరాన్ వెలెజాణిజ్ మరాన్ విజు సాతిక వారు సుడు:తార్.

21 పేతురు యేసు వెప్తాక గుర్తు కిత్తాన్. “ప్రబు నీను సయప్ సిత్తి బొడెమరాన్ సాత మనాద్”, ఇజి వెప్తాన్.

22-23 యేసు వరివెట ఈహు వెప్తాన్, “మీరు దేవుణు ముస్కు నమకం ఇడు:దు. నాను నిజం వెహిసాన్. ఎయెర్బా యా గొరోణ్దిజ్” పెర ఆజి సమ్దరమ్దు అర్అ’ ఇజి వన్ని మన్నుదు అనుమానం సిల్లెండ నమిజి వెప్తాజి ఆ వజనె జర్గినాద్”.

24 అందెజె నాను వెహిసాన్, మీరు పార్దనం కినివెలె మీరు ఇనికెజ్ లొసినిదెరో అక్కెజ్ దొహ్కెండ్ ముజాలె అక్కెజ్ దొహ్కాద్ ఇజి నమ్మిదు. నస్తివలె అక్కెజ్ విజు మిజి కల్గినె.

25 మీరు ఎసెజ్బా పార్దనం కినివెలె ఎయెన్బా మీ ముస్కు తప్పకిత్త మనాన్ ఇహిజి వన్నిజ్ సెమిస్తెజ్.

26 నస్తివలె పరలోకమ్దు మన్ని నీ బుబ్బాతి దేవుణు మీ తప్పజ్బా సెమిస్తాన్.

### యేసుజ్ ఎయెన్ అతికారం సితాన్ఇజి వెన్బాజినార్

\* 11:9-10 11:9-10 కిర్తన 118:26. † 11:17 11:17 యెసయ 56:7. ‡ 11:17 11:17 యిర్మీయ 7:11

27 యేసుని, వన్నిసిసూర్, మరి యెరూసలేమ్‌డు వాతార్. యేసు అబ్బె దేవుణుగుడిః నడిఃజి మహిజ్ పెరిపుజెరిజు యూదురి రూలుజ్ నెన్‌పిసినికార్ యూదపెద్దెల్‌జ వన్నిబాన్ వాతార్.

28 వారు యేసుజ్ వెన్‌బాతార్, “నీను ఇని అతికారమ్‌దాన్ యా పణిజ్‌కిజిని? యాపణిజ్ విజికిదెజ్ ఎయెన్ నిజి అతికారం సితాన్?”

29 యేసు వెప్తాన్, “నాను మిజి ఉండ్రిమాట వెన్‌బాన. నజి జబాబ్ వెప్తు. అయవలె యా పణిజ్ ఎమేణి అతికారమ్‌దాన్ కిజిన ఇజి నాను మిజి వెప్తు.

30 యోహానుజ్ బాప్తిసం సీదెజ్ అతికారం ఎంబెణిజ్ వాతాద్? దేవుణు బాణిజ్‌నా, లోకుర్‌బాణిజ్‌నా? నజి వెప్తు.

31-32 యేసు వెప్తామాట వెంజి పరిలోఇ వారె ఒడిఃబితార్. దేవుణుబాణిజ్ వాతాద్ ఇజి వెప్తాజ అయవలె ఎందనిజ్ మీరు వన్నిజ్ నమ్మిఇతిదెర్ ఇజి వెన్‌బానాన్. లోకుర్ బాణిజ్ వాతాద్ ఇజి వెప్తాజ వారు లోకాజ్ తియెల్ ఆతార్. ఎందనిజ్ ఇహిజి యోహాను దేవుణు మాట వెప్తి ప్రవక్త ఇజి లోకుర్ నమ్మితార్.

33 అందెజె వారు, “మజి తెలివెద్”, ఇజి మర్జి వెప్తార్. అయవలె యేసు, “అహిజ, యా ఎంమేణి అతికారమ్‌దాన్ యా పణిజ్ కిజిన ఇజి మిజి నానుబా వెహా”, ఇజి వెప్తాన్.

## 12

### పాలిసిత్తి టోటకత

1 యేసు వరిజ్ కతవజ ఈహు వెప్తాన్. “ఒరెన్‌వన్నిజ్ కండెక్ బూమి మహాద్. వాండ్రు ఆ బూమిదు ద్రాసమొకెజ్ ఉణుస్తాన్. దన్ని సురుల కోటి తోహిస్తాన్. దన్నిలోఇ ద్రాక్వపట్టురసం పీర్దెజ్ వణుకుదు ఉండ్రి గనుగు తయార్ కిబిస్తాన్. టోట కాప్‌కిదెజ్ ఉండ్రి ఎత్తుమన్ని ఇల్లుబా తయార్ కిత్తాన్. వెనుక ద్రాసటోట సెగొండార్ రెయ్యుతురిజ్ పాలిదిజ్ సితాండ్రె పయనం కిజి మరి ఉండ్రి దేసెం సొహాన్.

2 పట్టు పంట్‌ని కాలమ్‌దు ఆ టోట ఎజమాని వన్నిజ్ వానివంతు లోసి తగ్‌అ ఇజి ఒరెన్ పణిమన్నిజ్ పాలి అస్తిమన్నివరిడగ్రు పోక్తాన్.

3 గాని పాలి అస్తిమన్నికార్ వన్నిజ్ డెయ్యూరె వహి కీదాన్ మర్జి పోక్తార్.

4 అయవలె ఆ టోట ఎజమాని మరి ఒరెన్ పణిమణిసిజ్ వరిడగ్రు పోక్తాన్. వారు వన్నిజ్‌బురాదు గాయం ఆనివజ డెయ్యెజి సిగు కిజి పోక్తార్.

5 యజమాని, వెనుక, మరి ఒరెన్‌వన్నిజ్ వరిబాన్ పోక్తాన్. వన్నిజ్ వారు డెయ్యె సప్తార్. అయవజనె ఎజమాని వన్ని పణిమణిసిర్ సేన లోకురిజ్ పోక్తాన్. సెగొండారిజ్ వారు డెయ్యెతార్. మహిపరిజ్ సప్తార్.

6 ఆక్కర్‌దిజ్ అయ ఎజమానిజ్ వాండ్రు ప్రేమ కిత్తి ఒరెండ్రెమహి మరిసి మిగిలిత్తాన్. అందెజె వన్నిజ్ పోక్తాన్. ఆ పాలి అస్తిమన్నికార్ నా మరిసిజ్ గవరం సీనారె ఇజి వరిబాన్ పోక్తాన్.

7 ఆ పాలి అస్తిమన్నికార్ ఎజమాని మరిసిజ్ సుడెఃతారె వీండ్రు యా టోటదిజ్ అక్కుమన్నకాన్ రద్దు మాటు విన్నిజ్ సప్పి యా టోట మాది కినాట్”, ఇజి వారు కూడిఃజి వర్గితార్.

8 అందెజె వారు మున్ను అర్తాండ్రె వన్నిజ్ సప్తార్. సప్తారె టోట వెల్లి విసిర్తార్.

9 ఆ టోట ఎజమాని వరిజ్ ఇనిక కినాన్? వాండ్రు వాజి ఆ అస్తిమహివరిజ్ సప్తాండ్రె ఆ టోట ఆఇ రెయ్యురిజ్ పాలిదిజ్ సీనాన్.

10-11 యేసు మరి వెప్తాన్. “ఇల్లు తోహికార్ నెక్కిపాక్తి పణుకునె మూలదిజ్ ములపణుకు ఆతాద్. యాక దేవుణు కియుదాన్ జర్గితిక. యక మా కణుకెజ బమ్మాతిక\* ఇజి దేవుణు మాట రాస్తి మన్నిక మీరు సద్‌విఇదెరా?

12 యేసు యా కతవజ నెన్‌పిసిక వెహారె ‘మా వందిజ్ వెప్తాన్’ ఇజి పెద్దెలుజు నెస్తారె యేసుజ్ అస్తెజ్ ఇజి సుడెఃతార్. గాని మందలోకురిజ్ తియెలాతారె వన్నిజ్ డిఃస్తారె సొహార్.

### పన్ను సీదెజా పోనినా ఇజి వెన్‌బాజినార్

13 వెనుక వారు పరిసయ్యరుజ్‌ని హెరోదురాజు పార్తిలోఇ సెగొండారిజ్ యేసుమాటదు తపు అస్తెజ్ వన్నిబాన్ పోక్తార్.

14 వారు వన్ని డగ్రు వాజి, ఓ బోదకినికి, నీను నిజం వెహికి ఇజి మాప్‌నెస్తాప్. నీను ఇజిరికార్ ఇజి పెరికార్ ఇజి తేడ తొఇకి వరిజ్ ఇస్టమాతిలెకెండ్ వర్గినికి ఆఇ దేవుణు సరి వందిజ్ నిజమ్‌దాన్ నెన్‌పిసినికి. కయ్యసరుజ్ పన్ను సీనిక నాయమ్‌నా ఆవదా?

\* 12:10-11 12:10-11 కీర్తన 118:22,23.

15 యూదురు ఆతి మాపు అక్కనీదెజా పొనినా? ఇజి యేసుజ్ వెన్బాతార్. వారు వేసం కినికార్ ఇజి నెసి “వీరు నా మాటదు ఎండానిజ్ తపు అస్తెజ్ సుడేజినిదెర్? ఇజి యేసు వెన్బాతాన్. యేసు మరి వెహ్తాన్, ఉండ్రీ దినారి కాసు తసి నజీ తోరిస్తు”.

16 వారు తసి వన్నిజ్ తోరిస్తార్. నస్తవలె వాండ్రు, దిన్నిముస్సు మన్ని బొమ్మ ఎయెది, దని ముస్సు రాస్తి రాంత ఎయెది? ఇజి వెన్బాతాన్. “కయ్నరుది”, ఇజి వారు వెహ్తార్.

17 అయవలె యేసు కయ్నరుజ్ సెందితికెజ్ కయ్నరుజ్ సీదు. దేవుణుదిజ్ సెందితికెజ్ దేవుణుదిజ్ సీదు ఇజి వెహ్తాన్. యేసు వెహ్తాక వారు వెంజి బమ్మ ఆతార్.

### సాతి వెనుక బత్తిఎర్ఇజి సెగొండార్ వెహ్సినార్

18 నస్తవలె సాతివెనుక మర్జి నిజినిక సిల్లెద్ ఇజి నెన్పిసిని సదుకయ్రు ఇనివరి లొఇ సెగొండార్ యేసుడగ్రు వాతార్. వారు యేసుజ్ ఉండ్రీ ప్రస్తు వెన్బాతార్.

19 “ఓ బోదకిసికి, ఒరెన్ పెండ్రీ ఆతి వెనుక కొడోర్ సిల్లెండ సాతిజ వన్ని తంబెర్సి ఒన్నిసిజ్ ఇడె ఆజి కొడోర్ ఇడిదెజ్. అహె సాతివరి వందిజ్ కొడోర్ పుట్టిస్తెజ్వలె ఇజి మోసె సిత్తి రూలుదు మనాద్.

20 ఏలు సుడేఅ ఉండ్రీ కాలమ్దు ఏడుగురు తంబెరిజు మహార్. తోల్సుర్దికాన్ ఉండ్రీ బోదెలిదిజ్ పెండ్రీ ఆతాన్. కొడోర్ సిల్లెండ సాతాన్.

21 సాతిజ్ నడిపి వాండ్రు ఒనిసిజ్ పెండ్రీ ఆతాన్. వాండ్రుబా కొడోర్ సిల్లెండ సాతాన్. వెనుక కొగ్రి నడిపి దన్నిజ్ ఇడె ఆతాన్.

22 అహె ఏడుగురుబా దన్నిజ్ పెండ్రీ ఆజి కొడోర్ సిల్లెండ సాత సాహార్. కడెవెరిదు అయ బోదెలిబా సాతాద్.

23 అహెజి సాతివరిబాణిజ్ మర్జి నిజినివెలె అ బోదెలి అయా ఏడు గురు లొఇ ఎయెజ్ ఆల్పి ఆనాద్? ఏడుగురుదిజ్బా ఆది ఆల్పి ఆత మహాద్గదె?

24 యేసు వరిజ్ ఈహు వెహ్తాన్. “దేవుణు మాటెజ్ మీరు నెన్ఇదెర్. దేవుణుసత్తు ఎస్సా ఇజి మిజి నెన్ఇదెర్. అందెజె మీరు తపు వెహ్సినెదెర్.

25 సాతి వరిబాణిజ్ మర్జి నిజినివలె ఎయెర్బా పెండ్రీ ఆవర్. పెండ్రీదిజ్ సివర్ వారు పరలోకమ్దు మన్ని దేవుణు దూతెజలెకెండ్ ముంజినార్.

26 సతి వరిజ్ దేవుణు మర్జి నిక్కివందిజ్ మోసె రాస్తి పుస్తకమ్దు, వెయ్జి మహి తువెజా డగ్రుహాన్ దేవుణు మోసెజ్ వర్గితి మాట మీరు నద్విజదెరా? నాను, అబ్రాహం దేవుణు, ఇస్సాకు దేవుణు, యాకోబురిదేవుణు, ఇజి దేవుణు అయవలె వెహ్తాన్

27 అందెజె వాండ్రు సాతిసాహికార్ మాడిసిని దేవుణు ఆవన్ బత్తిజి మన్నికార్ మాడిసిని దేవుణునె ఇజిమాటు సుడిజినాట్. సాతికార్బత్తిఎర్ ఇజి మీరు వెహ్తాక గొప్ప తప్ప†.

### విజు రూలుదు లొఇ ముకెలమాతి రూలు ఎమేణిక?

28 యూదురిజ్ రూలు నెన్పిస్సివరి లొఇ ఒరెన్బానె వాజి యేసు సదుకయ్రుజవెట వాదిసినిక వెహ్తాన్. వారు మర్జి వెహ్తాజ్ అట్ఇవజి యేసువరిజ్ జబాబ్ సిత్తాన్ ఇజి సుడేజి వాండ్రు వెన్బాతాన్ దేవుణు సిత్తి విజు రూలుజలొఇ ముకెలమాతిక ఎమేణిక?”.

29 దన్నిజ్ యేసు వెహ్తాన్, “విజు వన్మాజ్ లొఇ ముకెలమాతిక యాకదె, “ఓ ఇస్రాయేలుదికిదెరా, మీరు వెండ్రు. ప్రబువాతి మా దేవుణు ఒరెండ్రె.

30 నీను నీ పూర్తి మన్నుదాన్, పూర్తి పాణమ్దాన్, పూర్తి బుద్ధిదాన్, పూర్తి సత్తుదాన్ ప్రబువాతి దేవుణుదిజ్ ప్రేమిస్తెజ్” .‡

31 దిన్నీ వెనుక ముకెలమాతి రూలు ఇనిక ఇహెజ, “నీను నిజెనె ప్రేమిస్సిలెకెండ్ మహివరిజ్ విజేరిజ్ ప్రేమిన్అ”, § యా రుండి రూలుజ మిస్తిక రూలుజ్ మరి ఎమేణికబా సిల్లెద్.

32 నస్తవలె అయ మణిసి వెహ్తాన్. ఓ బోదకిసికి నీను బాగ వెహ్తా. “దేవుణు ఒరెండ్రె. వాండ్రు తప్ప మరి ఎయెన్ దేవుణు సిలెన్”, ఇజి నీను వెహ్తాక నిజమె.

33 నీ పూర్తి పాణమ్దాన్, పూర్తి బుద్ధదాన్ పూర్తి సత్తుదాన్ నీ దేవుణుఆతి ప్రబుజ్ ప్రేమిస్తెజ్, నిజి నీనె ప్రేమిస్సివజి మహివరిజ్ ప్రేమిస్సిక, దేవుణుదిజ్ సీజిని విజు పూజెజ ముస్సు, దేవుణుదిజ్ కిజిని దూపమ్కాజ్ ముస్సు నండ్రె ముకెలమాతిక”.

† 12:27 12:27 అబ్రహము, ఇస్సాకు, యాకోబు ఇనికార్ యూదురు వెరి అనిగొరు వారు నండ్రె పంటెజ ముందాల సాతసాహార్. గాని వారు ఏలు దేవుణుబాణిజ్ బత్తిజి వన్నిజ్ మాడిసి ముంజినార్. ‡ 12:30 12:30 ద్వితీ 6:4,5. § 12:31 12:31 లేవీ 19:18.



34 యేసు వెహ్తాక వాండ్రు నెగ్రిండ అర్దం కిజి జబాబ్ వెహ్తాన్ ఇజి సుడేజి యేసు ఈహు వెహ్తాన్. “నీను దేవుణుదిజ్ ఏలుబడిః అడిగి మండ్రేజ్ డగ్రు ఆతి. అబ్బెణాన్ ఎయెర్బా యేసుజ్ ఇనికబా వెన్బాదెజ్ దయరం సిల్లెద్.

35 ఒర్పు యేసు దేవుణుగుడిఃదు నెస్పిసి మహిజ్ ఈహు వెన్బాతాన్. రాజువజి వాని క్రీస్తు పూర్వమ్దు మహి దావీదురాజు కుటుమ్దు పుట్నాన్ ఇజి యూదురిజ్ రూలుజ్ నెస్పిసికార్ ఎండనిజ్ వెహ్తాన్?

36 దావీదురాజు దేవుణుఆత్మదాన్ ఈహు వెహ్తాన్: “నాను నీ పగ వరిజ్ నీ పాదం అడ్డి ఇడ్డిదాక నీను నా ఉణెర్ పడక బసి మన్అ ఇజి ప్రబు నా ప్రబువెట వెహ్తాన్\*.

37 దావీదురాజు క్రీస్తుజ్ ప్రబుఇజి కూక్సినాన్. అహిజి ఎలాగ క్రీస్తు వన్ని మరిసి ఆనాన్?”. యేసు వెహ్తాక వెంజి లోకుర్విజేరె నండొ సర్ల ఆతార్.

38 యేసు లోకాజ్ నెస్పిసినివెలె ఈహు వెహ్తాన్. “యూదురి రూలుజ్ నెస్పిసినివరి వందిజ్ జాగర్ల మండ్రు. వారు నండొ దరది నీరి సొక్క† తోడిగిజి బూలాదెజ్ కొరిజినార్. సత్తెజి నడిఃమి పెరికార్ ఇజి మాడిఃసి ఆదెజ్ కొరిజినార్.

39 యూదురి మీటిజ్ ఇండ్రొ సొహిజి ముకెలమాతి బాడ్డిదు బస్తెజ్, విందుదు సొహిజి బస్తెజ్ ముకెలమాతి బాడ్డిదు వారు కోర్జినార్.

40 ఇనిక సిల్లి ముండమణిసిజ్ మొసెం కిజి వన్కాజ్ కల్లితిక వారు ఒనార్. లోకుర్ విజేరె విరిజ్సుడేజి గొప్ప నెగ్గికార్ ఇజి వెహ్తావజి వారు నండొ పార్దనం కిజినార్. నిని లోకాజ్ గొప్ప సిక్కు వానాద్”.

### ముండ మన్ని అర్ప్తి నంద

41 యేసు దేవుణుగుడిఃదు సంత సీనిపెటె ఎద్రుబస్తాన్. దేవుణుగుడిఃదు వాతికార్ సంత పెటెదు డబ్బు అర్ప్తిమహిక వాండ్రు సుడేజి మహాన్. ఆస్తిమన్నుకార్ నండొండార్ నండొ డబ్బుజ్ ఆ పెటెదు అర్ప్తార్.

42 నస్తివలె ఉండ్రీ బీద ముండ మన్ని వాజి రుండి కాణిజ్ అర్ప్తార్.

43 యేసు సిసూరిజ్ వన్నిడగ్రు కూక్సినాన్, “నాను నిజం వెహ్తాన్, దేవుణు సుడేతిజ్ యా ఇనిక సిల్లి రాండి బోదెలి మహివిజేరిజ్ మున్ను లాపు అర్ప్తార్.

44 ఆస్తిమన్నుకార్ వరిజ్ కల్లితి ఆస్తిబాణిజ్ అర్ప్తార్. గాని అది దన్నిజ్ సిల్లిబాణిజ్ దన్నిజ్ బత్కిదెజ్ మన్నికెజ్ విజు సంత పెట్టెదు అర్ప్తార్”, ఇజి వెహ్తాన్.

## 13

### యేసు గుడిఃవందిజ్ వెహ్తాన్

1 యేసు దేవుణుగుడిఃదాన్ సొన్ని మహిజ్ వన్ని సిసూర్ లొఇ ఒరెన్, “ప్రబు యా పణుకుజ్ ఎస్సా గొప్పవి యా మేడెజ్ ఎస్సా గొప్పవి”, ఇజి వెహ్తాన్.

2 పన్నిజ్ యేసు వెహ్తాన్, “మీరు ఏలు సుడేజిని యా గొప్ప నెగెండ తోర్జిని మేడెజ్ ఉండ్రీ పణుకు మున్ను మరి ఉండ్రీ పణుకు నిల్లిమన్ఏండ లోకుర్ వనకాజ్ లాగ్గు అర్ప్తారె పూర్తి నాసనం కినార్లె”.

3 యేసు దేవుణుగుడిః ఎద్రు ఒలివ గొరొత్, బస్తి మహిజ్ పేతురు, యాకోబు, యోహాను, అంద్రెయ ఇనికార్ మరి ఎయెర్బా వెన్ఎండ యేసుజ్ వెన్బాతార్.

4 “యాకెజ్ ఎసెజ్ జర్గినెలె? ఇక్కెజ్ విజు జర్గినెజ్ డగ్రు ఆతాద్. ఇజి తోరిసిని గుర్తు ఇనిక? మజి వెహ్తాన్.

5 యేసు వరిజ్ వెహ్తాన్, “ఎయెర్బా మిజి మోసెం కిఎండ జాగర్ల సుడేదు మండ్రు.

6 నండొ లోకుర్ నా పేరు ఇడేఃఇజి వానారెలె. “దేవుణు ఏర్పాటు కిత్తి పొక్తి క్రీస్తు నానె”, ఇజి వెహ్తాన్ నండొండారిజ్ మోసెం కినార్లె.

7 మీరు విద్దెమ్కు వందిజ్ వినిదెర్లె. మరి విద్దెమ్కు వానెలె ఇజి సాటిసినిక వెనిదెర్లె. అయవలె తియెలామ. అక్కెజ్ విజు జర్గినెజ్వెలె. గాని యాక ఆక్కర్ ఆవద్.

8 లోకుర్మున్ను లోకుర్ని దేసమ్కాజ్ మున్ను దేసమ్కు విద్దెం ఆనాలె. అబ్బె ఇబ్బె నండొబాన్ బూమి కద్దినాద్లె. కరు వానాద్లె. యాక్కెజ్ విజు ఉండ్రీ బోదెలి కియుదు అస్తెజ్ ముజుల వానినొపిజ్ మొదొల్స్తెలెకెమడ్ ఇక్కెజ్ విజు జర్గిజి మహిజి ఆక్కర్ దినమ్కు వాజినాద్ ఇజి నెస్తిజానాద్.

\* 12:36 12:36 కీర్తన 110:1. † 12:38 12:38 యా నండొ దరది నీరి సిక్కు వెరి లోకు తోడిగిజి మహాన్.

9 మీరు జాగ్రత్త మండ్రెజ్. లోకుర్ మిజి కొర్టుదు ఒపజెప్పార్లె. యూదురి మీటిజ్ ఇల్కాజ్ మిజి కొరెడెజాణిజ్ డెయ్నార్లె. రాజుర్జ ముందాల అదికారిజ ముందాల, నా ముస్కు నమకం ఇట్టివందిజ్ మిజి నిల్ప్పార్లె. అయావెలె నా వందిజ్ సువార్త వెప్పిదెర్లె.

10 దేవుణు సువార్త బూమిముస్కు మని విజేరిజ్ ఆక్కర్ దినమ్కాజ్ ముజల వెప్తాజ్వలె.

11 వారు మిజి తొప్పి ఒసి కోర్టుదు ఒప్పజెప్పివెలె మీరు అబ్బె ఇనిక వెప్తాజ్ ఇజి బెజ ఆమాట్. అయవలె దొహ్కెలె. వెప్పికిదెర్ మీరు ఆఇదెర్ దేవుణు ఆత్మ మిజి వెప్పికాదె మీరు వెప్పిదెర్”.

12 యేసు మరి వెప్తాన్. “దాద్ది తంబేర్నిజ్ తంబెర్సి దాద్దిజ్ అప్పొసి మరిసిజ్ సప్తెజ్ ఒపజెప్పాన్లె. కొణొర్ అయ్సి అపోసిర్ ముస్కు గొడఃబఅజి వరిజ్ నప్పార్లె.

13 మీరు నా ముస్కు నమకం ఇట్టివందిజ్ విజెరి మీ ముస్కు పగదాన్ మంజినార్లె. ఆక్కర్దాక ఓరిస్సి వన్నిజ్ దేవుణు రక్కినార్లె.

**దేవుణుగుడిః లోఇ నండొతియెల్అనిక ఉండ్రీ వానాదె**

14 దేవుణుగుడిః లోఇ మండ్రెజ్ ఆఇ నాసనం కిని సెఇక ఆతిక ఉండ్రీ\* దేవుణు గుడిఃదు నెగ్గి బాడ్డిదు నిల్పి మంజనిక సూణివలె (యాక సద్వినికాన్ అర్థం కిదెజ్వలె) యూదయ దేసెమ్దు మంజనికార్ గొరొకాజ్ ఉప్తాజ్ వెలె.

15 ఇల్లు ముస్కు మన్నికార్ ఇనికబా సామానం తత్తెజ్ ఇజి మర్జి ఇండ్రొ సొన్మాట్.

16 గుడెదు పణి కిజి మహికార్ వరి పాత తత్తెజ్ ఇజి మర్జి ఇండ్రొ సొనిక ఆవద్.

17 ఆ దినమ్కాజ్ పొటద్ మన్ని వన్కాజ్ పాలు ఊట్పిసిని వనకాజ్ గొప్ప కస్టం.

18 ఇక పినికాలమ్దు రెవిండ పార్దనం కిదు.

19 ఎందానిజ్ ఇహిజ దేవుణు యా లోకం పుటిస్తెబాణిజ్ అసి ఏలుదాక రెఇనిన్ని గొప్ప కస్టమ్కు వానె. నిన్నికెజ్ మరి ఎసెజ్బా రెఉ.

20 దేవుణు ఆ కస్టం ఆతి రోస్కుతకు కివిండ మహిజ ఎయెన్బా తపై ఆదెజ్ అఅట్వన్. గాని దేవుణు ఎర్లిస్తివరి వందిజ్ ఆ రోస్కుకు దేవుణు తక్కు కిత్తాన్.

21 ఆ రొస్కాజ్ ఎయెర్బా ఇదిలో క్రీస్తు అబ్బె మనాన్, సిల్లిజి క్రీస్తు ఇబ్బె మనాన్, ఇజి వెప్తాజి వరి మాట నమ్మిమాట్.

22 ఆ కాలమ్దు నానె క్రీస్తు ఇజి అబద్దం వెప్పికార్, నానె దేవుణు పొక్తి ప్రవక్త ఇజి అబద్దం వెప్పికార్ వానార్. వారు నండొ బమ్మాతి పణిజ్ ముజాల ఎసెజ్బా తొఇ నన్ని బమ్మాతి పణిజ్కిజి మోసం కిదెజ్ సూణార్. అట్టిజి దేవుణు ఎర్లిస్తి మన్ని వరిజ్బా మొసం కిదెజ్ సూణార్.

23 అందెజె మీరు జాగ్రత్త మండ్రెజ్. నాను ముజాలె విజు మిజి వెప్తా మన్న.

**లోకుమరిసి దేవుణుజాయ్దాన్ వానిరోజు**

24-25 ఆ కస్టమాతి రోస్కుసాహి వెనుక పొదు సీకటి ఆనాద్. నెల జాయ్ సివిద్. సుక్కెజ్ ఆగసమ్దాన్ రాల్పె. ఆగాసమ్దు మన్నికెజ్ కడ్లెనె.

26 నస్తివలె లోకు మరిసియాతి నండొ సత్తుదాన్ గొప్ప జాయ్దాన్ కూడిఃతి సొకుదాన్ మొసాప్ ముస్కువానిక లోకుర్ సూణార్లె.

27 నాను నా దూతరిజ్ పొక్కానె యా లోకమ్ది కొసెజదాన్ ఆగసమ్ది కొసెజదాక నాల్లి మూలెజాణిజ్ దేవుణు ఎర్లిస్తి వరిజ్ ఉండ్రెబాన్ తప్పిన్న.

**బొడెమరాన్ది సజతి**

28 బొడెమరాన్దిజ్ సుడఃజి యాక మీరు నెస్తు. దన్ని ఆక్కెజ్ రాలజి సిగ్రిసినివలె ఎండకాలం డగ్రు ఆతాద్ ఇజి మీరు నెస్సిదెర్.

29 ఆయలెకెండెనె మీరు యాక్కెజ్ విజు జర్గిజినిక సుణివలె నాను మర్జి వాదెజ్ డగ్రు ఆతాద్ ఇజి నెస్సినిదెర్లె.

30 యా సజతిజ్ విజు జార్గిని ముందాల య తరమ్దికార్ సావిర్ ఇజి నాను మిజి నిజం వెప్పిన.

31 ఆగసం బూమి సిల్లెండ ఆనె. గాని నా మాటెజ్ ఎలాకాలం మంజినె.

**ఎయెన్ నెన్ఇ రోజు, ఎయెన్ నెన్ఇ గడిఃయ**

\* 13:14 13:14 యా సెఇక ఇనికిజి వెప్తాజ్ సిల్లెద్ ఆఇ దేయమ్క మాలిపిట వందిజ్ నొ క్రీస్తుజ్ ఎర్లిస్తిని వన్ని వందినొ వెప్పినాన్. దిన్ని వందిజ్ దానియెల్ ప్రవక్త రాస్త మహాన్ 9:27; 11:31; 12:11.

32 నాను మరణి వాని రోజువమదిజ్, గడియవందిజ్ ఎయెజ్ నెన్వర్. బుబ్బునె ఆవిండ పరలోకమ్దు మన్ని దూతార్బా మరిసిబా నెన్వర్.

33 యేసు మరి వెహ్లాన్, “మీరు పార్లనం కిజి జాగర్ల మండ్రు. ఆ రోజు ఎసెజ్ వానాదొ మిజి తెలివద్.

34 ఎలాగ ఇహిజ ఒరెన్, ఎజుమాని వన్ని ఇల్లు వన్ని పణిమన్నిరిజ్ ఒవజెప్పి, వరివరిపణిజ్ వరి వరిజ్ తోరిసి, ఇల్లు కాపుదిజ్ ఒరెన్ వన్నిజ్ ఇడ్డి దేసం సొండ్రెజ్ సొహి వజనె.

35 అందెజె మీరు జాగర్ల ఎద్రుసుడిజి మండ్రు. ఎందనిజ్ ఇహిజ ఇల్లు ఎజుమాని పొద్దు ఆతివెలె వానానొ, మదరెయ్యు వానానొ, కొరు కెరిని వెలె వానానొ, సిల్లిజి జాయ్ ఆతిజి వానానొ మిజి తెలివద్.

36 ఎజుమాని వందిజ్ ఎద్రు సుడిజి గడియదు వెటనె వాతిజి మీరు నిద్ర కిజి మనికవాండ్రు సుడుడెజ్ ఆవద్.

37 నాను మిజి వెహ్లాకదె విజేరిజ్ బా వెహ్లాన్. జాగర్ల కాప్ కిదు”.

## 14

1 పస్కు పండోయ్ని, పులాజ్ ఆఇ రొట్టెజ్\* పండోయ్ వాదెజ్ రుండి రోస్కు మనాద్. పెరిపుజెరిజుని, యూదుర్ రూలు నెన్పిసినికార్ యేసుజ్ ఎలాగబా ఉపాయ్ కిజి అసి సప్తెజ్ సుడిజినార్.

2 “పండోయ్ లోఇ వన్నిజ్ తొహ్తిజి లోకు గొడెబ కినార్ అందెజె పండోయచ లోఇ పోని ఇజి వారు వెహ్లాన్.

**ఉండ్రి అయ్ లికోడో: యేసు బురాదు వాసనం నూనె వాక్తాద్**

3 యేసు బేతనియ ఇనినాటో సీమోను ఇన్ని వన్ని ఇండ్రో బోజనమ్ దిజ్ బస్తాన్. విండ్రు కుస్తురోగం ఆస్తిమహిజ్ యేసు నెగెండ్ కిత్త మహాన్ నస్తివలె ఉండ్రి బోదెలి నూనజ్ పణుకుదాన్ తయార్ కిత్తి ఉండ్రి సీసాదు† నండో విలువమన్ని జటమామ్మి ఇని నెగ్గి వాసనం మన్ని నూనె తత్తాదె మూతడగ్గు రెక్కి యేసు బురాదు వాక్తాద్.

4-5 అబ్బె మహికార్ సెగొండార్ యాక సుడిజి కోపమాజి వరిలోఇ వారె వెహ్లాన్, “ఎందానిజ్ యా నూనె పాడు కిజినాద్? యా నూనె మూండ్రి వందెజ్ దినారమ్జ్ ముస్కు డబ్బుదిజ్ పొర్ని అయ డబ్బు బీదది వరిజ్ సీదెజ్ ఆనాద్ గదె”, ఇజి దన్నిజ్ గోల‡ కిత్తార్.

6 నస్తివలె యేసు, “దన్నిజ్ ఉండ్రి డిస్తు ఎందనిజ్ దన్నిజ్ అర్ల కిబిసినిదెర్? అది నజి నెగ్గి పణి కిత్తాద్.

7 బీదదికార్ ఎస్తివలెబా మీవెట మంజినార్. వరిజ్ ఎసెజ్ బా మీరు సాయం కిదెజానాద్. గాని నాను ఎలాకాలం మీవెట మన్వ.

8 అది కిదెజ్ అట్టిపణి విజు కిత్తాద్. నజి సమాది కిని ముజాల పీనుగు తయార్ కిని అలవాటువజి నా ఒడోల్ దిజ్ వాసనం నూనె వాక్కి అది నజి తయార్ కిత్తాద్.

9 నాను మీవెట నిజం వెహ్లాన్, యా బూమి ముస్కు ఎంబెబా దేవుణు సువార్ల అది ఏలుబడి: వందిజ్ సువార్ల సాటిసినివలె అది కిత్తి యా నెగ్గిపణి దన్నిజ్ ఎత్తు కినిలెకెండ్ సాటిసి మంజినాదెలె”.

10 నస్తివలె పన్నెండు మణిసిర్ సిసూర్ లోఇ ఒరెన్ ఇస్కరియోతు యూద ఇనికాన్ యూదురి పెరిపుజెరిజుబాన్ సొన్ని యేసుజ్ ఒవజెప్తెజ్ తోడు: కిన ఇజి వెహ్లాన్.

11 యూదవెహ్లాక వెంజి పెరిపుజెరిజు సర్ల ఆతార్. వన్నిజ్ డబుజ్ సీనాప్ ఇజి వారు ఒట్టు కిత్తార్. అందెజె యేసుజ్ ఒవజెప్తెజ్ యూద ఉండ్రి అవ్ కాసం సుడిజి మహాన్.

**యేసు సిసూర్ వెట పస్కు బోజనం ఉణిజినాన్**

12 పులాజ్ సిల్లి రొట్టెజ్ తయార్ కిని పస్కు పండోయ్ ది మొదోహి దినం వాతాద్. అయ దినం దేవుణుదిజ్ మెండ గొర్రె పిల్లాదిజ్ పూజ కినిక యూదురి అలవాట్. యేసు సిసూర్ వన్ని డగ్గు వాజి, పస్కు బోజనం ఉండెజ్ నీవందిజ్ మాపుఎంబె సొన్ని తయార్ కిదెజ్ నీను కొరిజిని? ఇజి వెన్ బ్ తార్.

13 యేసు రిఎర్ సిసూర్ కి కూక్కి, “మీరు పట్టుమ్దు సొండ్రు. అబ్బె ఒరెన్, కుండాదు ఏరు పిండెజి మీ ఎద్రు వానాన్. మీరు వన్నివెట సొండ్రు.

14 వాండ్రు సొహి ఇండ్రోణి ఎజుమానిజ్, “నా సిసూర్ వెట పస్కు బోజనం కిదెజ్ ఎంబె గది మనాద్ ఇజి బోదకినికాన్ నిజి వెన్ బాజినాన్”, ఇజి వెహ్లాన్.

\* 14:1 14:1 వినకపందిజ్ ముకెలమాతి మాటజి అర్లం వెహ్లాని బుకుదు పండోయ్ మాట రాస్తిబాన్ సుడుడు † 14:3 14:3 యా నూనాజ్ పణుకు పేరు అలబాస్టరు ఇజి యా పణుకు నండో కరిదితిక తెల్లాజ్ మంజినాద్. యక గిసి లోకుర్ పుసెజ్ తయార్ కిజినార్ ‡ 14:4-5 14:4-5 అయాకాలమ్దు ఉండ్రి దినారి ఉండ్రి రోజుది కూలి

- 15 నస్తవలె ఆ ఇల్లు ఎజుమాని విజు తయార్ఆతి మేడమున్ను మని పెరి గది ఉండ్రీ తోరిస్సాన్. అబ్బె మజి పన్ను బోజనం తయార్కిదు”, ఇజి వెహ్లాండ్రై పొక్తాన్.
- 16 సిసూర్పట్టుమ్దు సాహారె యేసు వెహ్లాండ్రెనే విజు సుడెఃతార్. వారు పన్ను బోజనం తయార్ కితార్.
- 17 పొద్దు ఆతిజ్ఱేయేసు పన్నెండు మంది సిసూర్వెట అబ్బె వాతాన్.
- 18 వారు బోజనం కినివెలె యేసు వెహ్లాన్, “మీ లోఇ ఒరెన్ నజి పగాతివరి కియుదు ఒపజెప్పాన్లె ఇజి నాను నిజం వెహ్లాన్”.
- 19 అక్క వెంజి వారు నండోదుకం ఆజి ఒరెన్ వెనుక ఒరెన్ “నాను ఆవగదె? ఇజి వన్నిజ్ వెన్బాతార్.
- 20 యేసు వెహ్లాన్, “మీరు పనెండు మనిసిర్లోఇ ఒరెన్, నావెట గినెదు రొట్టె ముడెక్కికాండ్రెక్కి.
- 21 లోకుమరిసి నా వందిజ్ దేవుణు మాటదు రాస్తి మహిలెకెండ్ నాను సానాన్లె. గాని లోకు మరిసియాతి నజి ఒపజెప్పి వన్నిజ్ గొప్ప కన్టం. వాండ్రు పుట్వండ మంజినిక ఇహిజ వన్నిజ్ ఎస్సానో బాగ మహాద్ మరి”.

### యేసుజ్ గుర్తుకిని బోజనం

- 22 వారు బోజనం కిజిమహిజ్ఱేయేసు ఉండ్రెరొట్టె అస్తాండ్రై దేవుణుదిజ్ వందనమ్కు వెహ్లా ముకెజ్ కిజి సిసూరిజ్ సితాన్. “మీరు యక లోసితిండ్రు, ఇక నా ఒడెల్”, ఇజి వరిజ్ వెహ్లాన్.
- 23 వెనుక యేసు ద్రాక్కు కల్లు మన్ను గిన అసి దేవుణుదిజ్ వందనమ్కు కిజి వరిజ్ సితాన్. వారు విజెరె ఆ గినదిక ఉటార్.
- 24 యేసు మరి వెహ్లాన్. “ఇక్క నా నల, నండెండారిజ్ వరి పాపమ్కు సెమిస్టెజ్ ఇజి కారిసిని. నా నల ఇక్కాదె దేవుణు నా నలదాన్ కిజిని ఒపుమానం.
- 25 నాను నిజం వెహ్లాన్, దేవుణు కినిఎలుబడిదు నాను కొతాజ్ ఉణి దినం దాక మరి ఎసెజ్బా ద్రాక్కు కల్లు ఉణెవ”.
- 26 మరి ఉండ్రీ పాట\* పార్తారె ఒలివ మరెక్ మన్ని గొరెన్ మున్ను సాతార్.

### పేతురు యేసుజ్ నెన్ఎ ఇజి వెహ్లాన్లె ఇజి ముజాల వెహ్లానాన్

- 27 వారు సానివెలె యేసు వరిజ్ వెహ్లాన్. మీరు విజెరె నజి డిసి సానిదెరె. ఎందనిజ్ఇహిజ దేవుణు మాటదు యాలెకెండ్ రాస్త మనాద్. “గొరెజ్ అడినివన్నిజ్ నాను కత్పాలె. గొరెజ్ మంద సెద్రినె సానెలె”.†
- 28 గాని దేవుణు నజి మర్జి బత్తుదు నిక్కివెనుక మిజి ఇంక ముజల గలీలయదు సానాలె. ఇహాన్.
- 29 నస్తవలె పేతురు, “విజెరె మీ వందిజ్ నిల్లెజ్ అట్వండ డిసి సాహిజ్బా నాను నిజి డిస్ సాన్ఎ”.
- 30 యేసు వెహ్లాన్, “ఓ పేతురు, నాను నిజి నిజం వెహ్లాన్, యా పొదొయ్ కొరు రిజకెరెని ముజల నీను నజి నెన్ఎ ఇజి ముసార్ వెహ్లాన్”.
- 31 గాని పేతురు ఒపుకొడెవండ ఒద్దె డట్టం వెహ్లాన్, “నాను నీ వెట సాతిజ సాన. నాను నిజి నెన్ఎ ఇజి వెహ్లాన్”. అయ వజనె వారు విజెరె వెహ్లాన్.

### యేసు గెత్తేమనె టోటదు పార్దనం కిజినాన్

- 32 నస్తవలె యేసు, వన్నిసిసూర్వెట గెత్తేమనె ఇని టోటదు సాహార్. యేసు సిసూరిజ్, “నాను సాన్ని పార్దనం కిజి మర్జివాని దాక మీరు ఇబ్బె మండ్రు”, ఇజి వెహ్లాన్.
- 33 యేసు పేత్రుజ్, యాకోబుజ్, యోహానుజ్ వన్ని వెట ఒతాన్. వాండ్రు నండో దుకం ఆజి బాద ఆదెజ్ మొదోల్స్తాన్.
- 34 వాండ్రు వరిజ్ వెహ్లాన్, “సాదెజ్ డగ్రు ఆతిలెకెండ్ మన్ను బరిస్టెజ్ అట్ఇ నస్సా బాదనజి కల్లిజినాద్. మీరు ఇబ్బెనె బసి నా వెటె తెల్లి మండ్రు.
- 35 యేసు అబ్బెణిజ్ సెగం దూరం సాహాండ్రై పడిగ్జి అర్తాండ్రై “ఓబా, నిజి ఇస్టమాతివజ యా కస్టమ్కాణ్ నజి తప్రిన్అ”, ఇజి పార్దనం కితాన్.
- 36 యేసు దేవుణుదిజ్ ఈహు వెహ్లాన్, “ఓ బా నీను విజు కిడెజ్అట్టి. యా కస్టమ్కు నా బాణిజ్లాగ్అ. గాని నా ఇస్టమ్వజ ఆవెద్, నీ ఇస్టంవజనె ఆవెద్”.
- 37 పార్దనం కితివెనుక యేసు సిసూర్డగ్రు సాహిజ్ వారు నిద్ర కిజి మహార్, “ఓ సీమోను, నీను నిద్ర కిజినిదా? ఉండ్రీ గంటబా తెలి ఆజి మండ్రెజ్ మీరు అట్ఇదెరా?”, ఇజి పేతురుజ్ వెన్బాతాన్.

§ 14:20 14:20 యేసుని వన్నిసిసూర్ బోజనం కితివెలె ఉండ్రై గినాది పట్టురసమ్మ రొట్టె ముడుకెక్తార్ డగ్రుమన్ని కులెజ్నె ఈహు గిన్నదాన్ తినార్ \* 14:26 14:26 క్రిస్తన 115-118 బోజనం కిత్తి పిజత్తిజ పార్జి మహార్ † 14:27 14:27 జెకరియ 13:7.

38 సయ్యును మిజి పరిస కిజి తప్పదు అన్ ఏండ ఇహిజ పార్దనం కిజి తెలి ఆజి మండ్రు ఆత్మ తయార్ నె, గాని ఒడొల్ దిజ్ సత్తు సిల్లెండ ఆజినాద్.

39 యేసు మరి ఒర్పు సొన్ని ముజుల్ వెప్టి మాటెజ్ నె వెప్టి పార్దనం కితాన్.

40 యేసు మర్జివాజి సుడొ:తిజ్ సిసూర్ మరి నిద్ర కిజి మహార్. ఎందానిజ్ ఇహిజ వరి కణుకు రెప్పెజ్ బరుదాన్ ముగ్జి మహె. నస్తివలె వారు యేసుజ్ ఇనిక వెప్టెజొ తెలివితాద్.

41 యేసు ముసారి వాజి సిసూర్ నిద్ర కిజి మహిక సుడొ:జి వరిజ్ వెప్టాన్, “ఏలుబ మీరు నిద్ర కిజి రోమ్ జనిదెరా? ఏలు ఆనాద్. ఇదిలో, లోకుమరిసియాతి నజి సెఇవరికియుదు ఒపజెప్పి గడియ డగ్రు వాతాద్.

42 లెదు, ఏలు మాట్ వరివెట. దసూలాదెజ్ సొనాట్ ఇదిలో నజి ఒపజెప్పికాన్ వాజినాన్”.

### యేసుజ్ అరెస్టి కిజినార్

43 యేసు యా మాటెజ్ వెప్టి మహిజ్ వన్నెండు మనిసిర్ సిసూర్ లొఇ ఒరెనాతి ఇన్కరి యోతు యూద ఇనికాన్ అబ్బె వాతాన్. పెరిపుజెరిజు లోకురి పెద్దలుజు పొక్తిమన్ని మందలోకుర్ కూర్జెజ్, కోణెజ్ అస్తారె వన్నివెట వాతర్.

44 యేసుజ్ ఒపజెప్పికాన్, “నాను ఎయెరిజ్ ముద్దు కినానొ వన్నిజ్ మీరు తోహసి జాగర్త ఒతు”, ఇజి ముజల వరిజ్ ఉండ్రె గుర్తులెకెండ వెప్టె మహాన్.

45 యూద వెటనె యేసుడగ్రు వాతాండ్రె, “ఒ బోదకినికి’ ఇజి వెప్టి వన్నిజ్ పొంబితాండ్రె ముదు కితాన్.

46 నస్తివలె వన్నివెట వతిమహిలోకుర్ యేసుజ్ అస్తారె తొప్టార్.

47 వెటనె యేసుడగ్రు మహిసిసూర్ లొఇ ఒరెన్, వన్ని కూర్ద లాగ్గి విజెరి ముస్కు పెరిపుజెరిజ ముస్కు మన్ని పణిమనిసి ఆతి వని గిబ్బి తెవు కతాన్.

48 యేసు వెప్టాన్, “నాను డొజవాండ్రునా? నజి అస్తెజ్ కూర్జెజ్ కోణెజ్ అసి ఎందనిజ్ మీరు వాతిదెర్?

49 రోజు నాను మీ వెటనె మంజి దేవుణుగుడిదు నెన్ పిస్న గదె. అయవలె మీరు నజి ఎందనిజ్ అన్ ఇతిదెర్? గాని దేవుణు మాటదు రాస్తివజ ఇక విజు ఈహు జర్గిదెజ్ వెలె”.

50 నస్తివలె వన్ని సిసూర్ విజెరి వన్నిజ్ డి:స్తారె ఉహ్క సాహార్.

51-52 ఒరెన్ దజడా:యెన్, యేసు వెనుక, లోకుర్ వెట సొన్ని మహాన్. వాండ్రు సొక్క తొడ్గివిండ ఉండ్రె పాతనె పిడ్గిత మహాన్. వారు వన్నిజ్ అస్తిజ్ వాండ్రు పిడిగితిమన్ని పాతడి:సి డుమ్డ ఆతాండ్రె ఉహ్కాన్.

### యేసుజ్ సన్ హద్రి సజంఇని యూదురి కొర్టునడి:మి నిల్ ప్టార్.

53 యేసుజ్ తొప్పి ఒతికార్ వన్నిజ్ విజెరిపుజెరిజ ముస్కు పెరిపుజెరిబాన్ తత్తార్. పెరిపుజెరిజ్ విజెరి, పెద్దెల్ జు, యూదురి రూలుజ్ నెన్ పిసినికార్ అబ్బె కూడ్డి వాత మహార్.

54 యేసుజ్ విజెరి ముస్కు పెరిపుజెరిజ ఇండ్రె ఒసిమహిజ్, పేతురు వెనుక దూరమ్ దాన్ సొన్ని డేవ దాక వాతాన్. వాండ్రు అబ్బె కాపకినివరివెట బస్తాండ్రె సిను కాయ్ జి మహాన్.

55 పెరిపుజెరిజు విజెరి, అబ్బె కూడ్డి వాతి సన్ హద్రిం సజం విజు యేసుజ్ సప్టెజ్ తగితి రుజుప్ వందిజ్ వన్ని ఎద్రు అబద్దం వెప్పివరిజ్ రెబాజి మహార్. గాని వన్నిజ్ సప్టెజ్ అగితి రుజుప్ వెప్పి ఎయెర్ బా దొహ్కవ్ తార్.

56 నండొండార్ వన్నిముస్కు అబద్దం సాసెమ్ కు వెప్టార్. గాని ఒరెన్ వెప్టిక మరి ఒరెన్ వెప్టి దనిజ్ తేడ: మహాద్.

57 నస్తివలె సెగొండార్ వన్నిముస్కు ఈహు అబద్దం సాసెమ్ కు వెప్టార్.

58 “లోకు తొప్పి యా దేవుణుగుడి:దిజ్ నాను అర్ ప్పి విసిర్ జి, మూండ్రె రొస్కాజ్ లోకు కిదు పణి ఆఎండ మరి ఉండ్రె దేవుణుగుడి: తొప్పి ఇజి వాండ్రు వెప్టిక మాప్ వెహప్”, ఇజి వారు వెప్టార్.

59 గాని వారు వెప్టి సాస్యమ్ బా ఒరెన్ వెప్టిక మరి ఒరెన్ వెప్టి దనిజ్ తేడ: ఆతాద్.

60 నస్తివలె విజెరి ముస్కు పెరిపుజెరి నిజితాండ్రె యేసుజ్ వెన్ బాతాన్, “నీను ఇనికబా మర్జి వెహ్ ఇదా? మీరు నీ ముస్కు వెప్పిని యా మాటెజ్ ఇనికెజ్?”.

61 గాని యేసు ఇనికబా మర్జి వెహ్ ఏండ అలెతాన్. విజెరి పుజెరిజ ముస్కు పెరిపుజెరి యేసుజ్ మరి వెన్ బాతాన్, “నీను దేవుణు మరిసి ఆతి క్రిస్తునా?”.

62 యేసు వెప్టాన్, “నానె, లోకుమరిసియాతి నాను గొప్ప అతికారం మన్ని దేవుణు ఉణెర్ పడ:కాదు బసిమంజినిక, సయణిదెర్ మరి ఆగసమ్ దు దాన్ మొసాప్ ముస్కు నాను వానిక మీరు సూణిదెర్”.

63-64 విజెరి పెరిపుజెరి ముస్కు పెరి పుజేరి యేసు వెహ్తిక వెంజి వన్ని సొక వాండ్రె కిసె ఆతాండ్రె‡. వెహ్తాన్, “మరి ఇంక సాసిరిజ్ అవ్వవరం సిల్లెద్. వాండ్రు వెహ్తిక మీరు వెహిదెర్. వాండ్రు దేవుణు దూసిసి వర్గితిక మీరు వెహిదెర్ దన్నివందిజ్ మీరు ఇనిక వెహ్నినిదెర్? యేసు దేవుణుదిజ్ దూసిస్తి వందిజ్ సిక్కు కిజి సప్తెజి ఇజి విజేరె ఒప్పుకొటార్.

65 నస్తివలె సెగొండార్ యేసు ముస్కు పూస్తార్. వారు గరండదాన్ వన్ని కణుకేజి తొప్పి కణుకేజ్ మూక్తారె వన్నిజ్ గుతార్. నిజి ఎయెర్ గుతార్ ఇజి తొవండ వెహ్అ”, ఇజి వన్నివెట వెహ్తార్. జమానుజుబా యేసుజ్ కికాణిజ్ డెయ్తారె ఒత్తార్.

యేసుజ్ నానునెన్ఎ ఇజి పేతురు వెహ్నినాన్

66 పేతురు విజెరి ముస్కు పెరి పుజెరి అర్జుదు మహివలె అయ ఇండ్రొణి పణి మన్ని ఉండ్రె అబ్బె వాతాద్.

67 పేతురు సిను కాయ్జిమహిక సుడేజి వాండ్రు ఎయెన్ ఇజి నెస్టెజ్ అది నెగ్రెండ సుడితాద్. “నీనుబా నజరేతు వాండ్రు ఆతి యేసువెట మహికి”, ఇజి అది వెహ్తార్.

68 అందెజె పేతురు, “నీను ఇనిక వర్గిజినిదొ నజి తెలివద్”, ఇజి వెహ్ని వెల్లి గవునిడగు సొహాన్. నస్తివలె కొరు కెరెతాద్.

69 అయ పణికినికాద్ పేత్రుజ్ గవునిడగు సుడేజి అబ్బె నిహిమహి వరివెట మరి వెహ్తార్, “వీండ్రు వరిలోఇమహ్కాన్ ఒరేన్”.

70 గాని పేతురు మరి, “నాను ఆవి ఇజి వెహ్తాన్. నణెం సొహివెనుక పేతురు డగు నిహిమహికార్, “నీను గలీలయదికి, నిజం నీనుబా వరిలోఇ ఒరేన్”, ఇజి వెహ్తార్.

71 నస్తివలె పేతురు, “మీరు వెహ్సిని వన్నిజ్ నజి నెన్ఎ ఇజి వెహ్ని వన్నిజ్ వాండ్రె నయివ్ సీబెఆజి ఒట్టు కితాన్.

72 వెటనె రిజ ఒర్పు కొరు కెరెతాద్. నస్తివలె పేతురు, యేసు వన్నివెట, “కొరు రిజ కెరెని ముజల నీను నజి నెన్ఎ ఇజి ముసార్ వెహ్నిలె”, ఇజి వెహ్తిమాట ఎత్తు కితాండ్రె నండొ దుకమాజి అడేబతాన్.

## 15

యేసుజ్ తొప్పిపిలాతుజ్ ఒపజెప్పినార్

1 పెండాల సీకటి మన్బునె, పెరిపుజెరిబు, యూదపెదెలుబు, యూదురి రూలుజ్ నెన్పిసినికార్, సన్హద్రిం సజమ్దికార్ విజేరె కూడ్డి యేసుజ్ ఎలాగ సప్తెజ్ ఇజి ఆలోసనం కితార్. వారు వన్నిజ్ తొప్పి ఒత్తారె రోమ దేసెమ్ది అతికారిఆతి పిలాతుజ్ ఒపజెప్తార్.

2 “నీను యూదురి రాజునా?”, ఇజి పిలాతు యేసుజ్ వెన్బాతాన్. నస్తివలె యేసు, “ఒబ నీను వెహ్తిలెకెండెనె”, ఇజి వెహ్తాన్.

3 పెరిపుజెరిబు యేసుముస్కు నండొ తప్పజ్ మొప్తార్.

4 నస్తివలె పిలాతు యేసుజ్ మరి వెన్బాతాన్, “నీను మర్జి ఇనికబా వెహ్నిదా? వీరు నీ ముస్కు ఎస్సా తప్పజ్ మొప్పినార్ గదె”.

5 అహ వెహ్తితిజ్బా యేసు ఇని మాటబా మర్జి వెహ్ఎతాన్. అక్క సుడేజి పిలాతు బమ్మ ఆతాన్.

6 ఏంటు ఏంటు కిని పన్న పండొల్లిజ్ లోకుర్ కోరిజిని ఒరెన్ కయ్దువన్నిజ్ విడుదల సీదేజ్ పిలాతుజ్ అలవాటు.

7 అయవలె బరబ్బుఇనికాన్ ఒరెన్ అన్నయవాండ్రు నన్నికాన్ జెలిదు మహాన్. వాండ్రు, వన్నివెట మహికార్, ఏలుబడికి కినివరిజ్ ఎద్రిస్తారె సెండొరిజ్ సప్త మహాన్. అందెజె వరిజ్జలిదు ఇట్త మహాన్.

8 లోకుర్ పిలాతుబాన్ వాజి, “నీను కిని ఆలవాటువజ ఒరెన్వన్నిజ్ డిసి సిఅ”, ఇజి వెహ్తార్.

9-10 పెరిపుజెరిబు గోస ఆతారె యేసుజ్ నజి ఒపజెప్తార్ ఇజి పిలాతు నెస్తాన్. అందెజె వాండ్రు “యూదురిరాజుజ్ నాను మిజి డిసి సీదేజ్ కొరిజినిదెరా? ఇజి వెన్బాతాన్.

11 గాని పెరిపుజెరిబు బరబ్బేజ్ డిసి సీజి యేసుజ్ సప్తెజ్ ఇజి ఆతికారి ఒప్పిలెకెండ వెహ్తాన్ ఇజి లోకురిజ్ రేప్పి మహాన్.

12 నస్తివలె పిలాతు, “యూదురిరాజు ఇని మీరు వెహ్సినివన్నిజ్ నాను ఇనిక కిదెజ్?”, ఇజి వెన్బాతాన్.

13 వారు, “వన్నిజ్ సిలువ పొక్అ”, ఇజి నండొ డేల్స్తార్.

14 అందెజె పిలాతు, “ఎందనిజ్ వన్నిజ్ సిలువ పొక్తెజ్? వాండ్రు ఇని తప్పపణి కివన్”, ఇజి వెహ్తాన్. గాని వారు, “వన్నిజ్ సిలువ డెయ్జి సవ్అ”, ఇజి నండొ డేల్స్తార్.

15 పిలాతు లొకాజ్నర్ల కిబిస్టేజ్ బరబ్బేజ్ విడుదల కితాన్, యేసుజ్ కొర్డెజిజ్ డెయ్బిసి. సిలువ పొక్తెజ్ ఒపజెప్తాన్.

‡ 14:63-64 14:63-64 నండొ కోపం ఆతాద్ ఇజి తొన్తెజ్ సొక్క కిస్తార్. గాని విజెరె పుజెరి ముస్కు మన్ని పెరి పుజెరి వన్ని సొక్కకిస్టెజ్ ఆవద్ ఇజి లేవి. 21:10 దు రాస్త మనాద్.

**సయనమ్దికార్యేసుజ్ వెక్రిస్తార్**

16 నస్తవలె సయనమ్దికార్ యేసుజ్ ప్రెటోరియం ఇని పిలాతుని పెరిఇండ్రొ ఒతారె అబ్బె మహి సయనమ్ది వరిజ్ విజేరిజ్ కూడుప్తార్.

17 వారు యేసుజ్ ఎరాని రంగుది నీరి సొక్క పొర్పిసి సొప్పాణిజ్ అటారె ఉండ్రీ టోపి తయార్ కిజి బురాదు ఇడేతార్.

18 “యూదురి రాజు గెల్నిఅ? ఇజి వెహ్ని వారు యేసుజ్ వెక్రిస్తార్.

19 వారు మరి మరి డుడుదాన్ వన్ని బురాదు డెయ్యారె వన్నిముస్కు పూస్తార్. వెనుక ముణుకుజ్ ఊర్జి వన్నిజ్ మాడిసి వెక్రిస్తార్.

20 వారు వెక్రిసి విజితి వెనుక వన్నిజ్ తోడిగిసి మహి ఎరాని సొక్క లాగ్గి వన్ని నీరి సొక్క తోడిగిస్తారె సిలువ పొక్కెజ్ వన్నిజ్ ఒత్తార్.

**యేసుజ్ సిలువదు డెయ్జినార్**

21 కురేనియాదికాన్ సీమోను ఇని ఒరెన్ ఉండ్రీ నాటోహన్ అయసరి వాజి మహాన్. నస్తవలె యేసువందిజ్ సిలువ పిండదెజ్ సయనమ్దికార్ సీమోనుజ్ బలవంతం కిత్తార్. సీమోను, అలెక్సందరుని, రూపుఇని వరి అప్పొసి.

22 వారు గొల్లొతఇని బాడ్డిదు యేసుజ్ తత్తర్. గొల్లొత ఇహిజ బుర్ల పిణికి బాడ్డిఇజి అర్లం.

23 అబె యేసుజ్ ఉండ్రెజ్ ద్రాక్సకలుదు బోలం\* ఇని సేందుమాయం కల్పి సిత్తర్. గాని వాండ్రు కెవితాన్.

24 సయనమ్దికార్ యేసుజ్ సిలువదు డెయ్యార్. వెనుక వన్ని సొక్కెజ్ ఎయెజ్ దోహ్కె ఇజి నెస్తెజ్ సీటిజ్ పొక్కారె వని సొక్కెజ్ సీబె ఆతార్.

25 పెందాల తొమ్మిది గంటెజ్ యేసుజ్ సిలువ డెయ్తార్.

26 “యూదురిజ్ రాజు”, ఇజి యేసుముస్కు మోప్తి నేరం బోర్డుదు రాసి సిలువదు ఇత్తార్.

27-28 యేసువెట రిఎర్ డొజారిజ్ సిలువదు పొక్కార్. ఒరెన్ వన్నిజ్ ఉణెర్ పడకాదు ఉండ్రీ సిలువదు, మరి ఒరెన్ వన్నిజ్ డేబ్ర పడకాదు ఉండ్రీ సిలువదు.

29-30 నస్తవలె అయ సరిదాన్ సొన్నిమహికార్ వరి బురదూక్కి యేసుజ్ దూసిస్తార్, “ఒహో దేవుణుగుడిదిజ్ అర్పి విసీరిజి మూండ్రీ రోస్కాజ్ నాను తొహ్కె నిజి నీనె రక్కిసి. సిలువదాన్ డిగ్జి రఅ” ఇహార్.

31-32 అయవజనె పెరిపుజెరిజుని యూదురి రూలునెన్పిసినికార్, “వీండ్రు మహివరిజ్ రక్కిస్తాన్. గాని వీండ్రు వినిజె రక్కిస్తెజ్ అట్ఎన్. ఇస్తాయేలురాజు ఆతి క్రిస్తు ఏలు సిలువదాన్ డిగ్జి వాతిజి అక్క సూణాపె మాపు నమినాప్”, ఇజి ఒరెన్ వెట ఒరెన్ వెహ్ని వన్నిజ్ వెక్రిస్తార్. యేసువెట సిలువ డెయెఆతి డొజారుజుబా వన్నిజ్ వెక్రిస్తార్.

**యేసు సిలువముస్కు పాణం డిస్తాన్**

33 వేడె పన్నెండు గంటెజాణిజ్ మూండ్రీ గంటెజ్ దాక దేసం విజు సీకటి ఆతాద్.

34 మూండ్రీ గంటెజ్ యేసు, “ఎలోయ, ఎలోయ లమ సబక్తాని”, ఇజి డటం డేల్ని వెహ్తాన్. దని అర్లం ఇనిక ఇహిజ, “నా దేవుణు, నా దేవుణు నజి ఎందనిజ్ నీను డిస్తాన్” ఇజి.

35 బానె నిహికార్ సెగొండార్ యామాట వెహారె, “ఇదిలో వీండ్రు ఎలియెజ్ కూక్కినాన్” ఇహార్.

36 ఒరెన్ ఉహ్కె సొన్ని దూతి తత్తాండ్రె సెందు ద్రాక్స కలుదు ముడెక్కి ఉండ్రీ డుడ్డుదాన్ యేసుజ్ ఉండ్రెజ్ వెయ్యు అందిస్తాన్. “సణెం మండ్రు. ఏలియ వాజి వినిజ్ డిప్పొండ్రొ సీలెనొ సూణాట్”, ఇజి వాండ్రు వెహ్తాన్.

37 నస్తవలె యేసు డటం డేల్స్తాండ్రె పాణం డిస్తాన్.

38 అయవలె యెరూసలేమ్దు మహి దేవుణు గుడిడు మహి తెర ముస్కుహాన్ అడిగిదాక కింజితాదె రుండి ముక్కెజ్ ఆతె.

39 సిలువ డెయ్యిబాన్ నిహిమహి సయనమ్ది మంద మణిసిరిజ్, యేసు ఈమా డేల్స్తాండ్రె పాణం డిస్తాన్ సుడెజి, “వీండ్రు నిజం దేవుణు మరిసినె”, ఇజి వెహ్తాన్.

40 సెగొండెక్ అయ్లికొడొక్ దూరం నిల్చి సుడెజిమహె. వన్కాజ్ లొఇ మగ్గలేనె మరియు, ఇజిరి యాకోబు, యోసె ఇనివరి అయ్సిఆతి మరియు, సలోమి ఇనికెజ్మహె.

41 యేసు గలిలయదు మహివలె ఇవిక్వన్నివెట సొన్ని వన్నిజ్ అవ్సరమాతికెజ్ కిజిమహె. ఇవిక్అఎండ యెరూసలేమ్దు యేసువెట వాతి నండొ అయ్లికొడొక్బా అబ్బె మహె.

**యేసు పినుగు సమాదిదు ఇత్తార్**

\* 15:23 15:23 బోలం కల్పతిజ నొప్పి నెన్వండ ఆనాద్

42-43 అరిమతయి ఇని పట్టుమదికాన్ యోసేపుఇని ఒరెన్ అబ్బె మహాన్. వాండ్రు సన్హద్రిం సజమ్దు మన్నివరిలోఇ పెరికాన్ ఒరెన్. దేవుణు ఏలుబడిః వందిజ్ వాండ్రు ఎర్దు సుడఃజి మహాన్. వీండ్రు సొన్ని, దయ్ రమ్దాన్, యేసు పినుగు సిలువ ముస్కుహాన్ జాయ్ మనుబునె డిప్టెజ్ పిలాతుబాన్ సెలవలోస్తాన్. అయ దినం విస్త్రాంతిదినం ముజాల మహి తయార్ కినిదినం. అందెజె అయ తయార్ కినిదినం పొదొయ్నె యోసేపు పిలాతుబాన్ సెలవ లొస్తాజ్ సాహాన్.

44 యేసు ఎస్కాండె సాతాన్ ఇజి వెంజి పిలాతు బమ్మ ఆతాన్. సయ్ నమ్ది వరిఅతికారిజ్ కూక్కి వెన్ బాతిజ్ యేసు ఎస్కాండె సాతాన్ ఇజి నెస్తాన్.

45 యేసు సాతాన్ ఇజి సయ్ నమ్ది వరిఅతికారి వెహి మాట పిలాతు వెంజి యోసేపుజ్ యేసుజ్ పినుగు ఒపజెప్తాన్.

46 యోసేపు నెగ్గి తెల్లాని పాత కొడఃజితసి, పినుగు సిలువదాన్ డిఃప్పి అయ పాతెజాణ్ పినుగుదిజ్ సుటిసి సటుదిజ్ దొల్స్తొ దూకిదు ఇత్తాన్. ఉండ్రి గుండ్రని సెప్ట పణుకు సడిపిసి దూకిదిజ్ అడ్డు కిత్తాండ్రె మూక్తాన్.

47 మగ్దలేనె మరియు, యోసె అయ్ సితతి మరియు యేసు పినుగుదిజ్ ఇడ్డిబాడ్డి సుడఃతె.

## 16

### యేసు మర్రి నిజితాన్

1 విస్త్రాంతిదినం గడిఃస్తిసాహివెనుక, మగ్దలేని మరియు, యాకోబు అయ్ సి మరియు, సలోమి, ఇనికెజ్ యేసు పినుగుదిజ్ రాస్తాజ్ వాసనం నూనె కొడఃజి తత్తె.

2 వారమ్దిజ్ మొదొహి దినమ్దు పెందాల్నె నిజ్జి పొద్దు సోసి మహివలె అవిక్ సమాది డగ్రు సాహె.

3 సమాది డగ్రు సొన్ని మహిజ్ అవిక్ “సమాది మూక్తి పణుకు మా వందిజ్ ఎయెర్ గూర్ ప్పార్?” ఇహె.

4 నస్తవలె అవిక్ సుడఃతిజ్ ఎయెరో అయ పెరిపణుకు సమాదిదాన్ గూర్ ప్పిలెకెండ్ తోరితాద్. అది ఒద్దె పెరిక

5 నస్తవలె అవిక్ అయ సమాది లొఇ వజ్జి సాహిజ్ నీరి తెల్లాని సొక్క పొర్ పాజి ఉణెర్ పడఃకాద్ బస్తి మహి ఒరెన్ దజ్డాఃయెనుజ్ సుడఃతె. వన్నిజ్ సుడఃజి అవిక్ నండ్ తియెల్ ఆతె.

6 అయ దజ్డాఃయెన్ వరివెట, “తియెల్ ఆమాట్, సిలువ పొకె ఆతి మన్ని నజరేతు వాండ్రు ఆతి యేసుజ్ మీరు రెబాజినిదెరా? వాండ్రు ఇబ్బె సిల్లెన్. వాండ్రు బత్తిజి నిజిత మనాన్. వన్నిజ్ ఇడ్డి బాడ్డి సుడఃదు.

7 వాండ్రు మిజి ఇంక ముజాల గలీలయ మీరు సొన్నినాన్ వాండ్రు మిజి వెప్తావజ మీరు అబ్బెవన్నిజ్ నూణిదెర్లె ఇజి సిసురిజ్ మరి పేతురుజ్ వెప్తు”, ఇజి వెప్తాన్.

8 అక్క వెహెనె అవిక్ వణక్కి బమ్మ ఆజి సమాదిదాన్ వెల్లి వాజి బాణిజ్ ఉహ్ క్కి సాహె. అవిక్ తియెల్ ఆతెనె ఎయెర్ వెటబా ఇనికబా వెహ్ ఉతె.

### యేసు మగ్దలేని మరియుజ్ తోరె ఆతాన్

9 యేసు ఆదివారం పెందాల్నె సమాదిదాన్ బత్తిజినిజ్జి మగ్దలేనె మరియుజ్ తోరె ఆతాన్. యా మరియు ఎయెర్ ఇహిజ యేసు ఏడు దెయమ్కాజ్ ఉల్ ప్పి నెగెండ్ కిత్తి అయ్ లి కొడః.

10 యేసువెట మహికార్ యేసు సాతిజ్ దుకమ్దాన్ ఒడఃబిజి అడఃబాజి మహిజ్, అది సాహదె విజు సజతిజ్ వరిజ్ వెప్తాద్.

11 యేసు బత్తిజి నిజితాండ్రె నజి తోరె ఆతాన్ ఇజి అది వెప్తి మాట వారు నమ్మివతార్.

### యేసు రివర్ సిసూరిజ్ తోరె ఆతాన్

12 వెనుక రివర్ సిసూర్ ఉండ్రి నాటొ నడిఃసి సొన్నిమహిజ్ యేసు వరిజ్ తోరె ఆతాన్. గాని ఆఇ మూర్తి వజ తోరె ఆతాన్.

13 వారు సొన్ని, మహి సిసూరిజ్ యా సజతి వెప్తార్. గాని వారు యా రివర్ మాటేజబా నమ్మివతార్.

### యేసు పదకొండు మణిసి సిసూరిజ్ తోరె ఆతాన్

14 మరి ఒర్పుపదకొండు మణిసి సిసూర్ బోజనం కిజిమహివలె యేసువరిజ్ తోరె ఆతాన్. యేసు నిజితి వెనుక వన్నిజ్ సుడఃతివరి మాట నమివండాతివందిజ్, వరి అనుమానమ్దిజ్ యేసు వరిజ్ గటిజ వెప్తాన్.

15 యేసు వరివెట, “మీరు లోకం ముస్కు మని విజు దేసమ్కాజ్ సొన్ని దేవుణు సువార్త విజిరిజ్ వెప్తు.

16 ఎయెర్ బా నా ముస్కు నమకం ఇడఃజి బాప్తిసం లాగెఆతిజి వరిజ్ దేవుణు రక్కిస్తాన్. గాని నా ముస్కు నమకం ఇడఃజితి వరిజ్ సిక్కు వానాద్.

17 ఎయెర్ నజి నమ్మివారొ వారు యా బమ్మాతి పణిజ్ కిడిజ్ అట్పార్. అక్కెజ్ ఇనికెజ్ ఇహిజ నా పేరుదాన్ వారు దెయమ్కాజ్ ఉల్ ప్పార్. వారు కొత్తబాసెజ్ వర్గినార్.



18 సారాస్కాజ్ అస్తిజ్బా అవిక్ కట్టిజ్బా సావీర్. ఇనికబా గొప్ప విసమాతిక ఉటిజ్బా సావీర్. జబ్బు ఆతివరి ముస్కు కికు ఇట్టిజ వారు నెగెండ్ ఆనార్”, ఇజి వెహ్లాన్.

దేవుణు యేసుజ్ పరలోకమ్దు ఒత్తాన్

19 యేసు యాకెజ్ విజు వెహ్లావెనుక దేవుణు యేసుజ్ పరలోకమ్దు ఒత్తాన్. యేసు అబ్బె దేవుణు ఉణెర్ పడఃకాద్ బస్తాన్.

20 యేసు సిసూర్ విజుబాన్ సొన్ని దేవుణు సువార్త వెహ్లార్. వారు కిత్తి విజు పణిదిజ్ దేవుణు సాయం కితాన్. వారు కిత్తి బమ్మాతి పణిజాణ్ వారువెహ్లా మాట నిజం ఇజి దేవుణు తోరిస్తాన్.

## లూక రాస్తి సువార్త

నెల్వ కిబిసినిక

యా సువార్త లూక ఇని ఒరెన్ డాక్టరు, దెయొపిలెజ్ రాస్తికాదె. యేసు యా లోకమ్దు బత్తిత్తివలె జర్గితి దన్నివందిజ్ కత వజ రాస్త మనాన్. యేసు పుడుగు వందిజ్ మహి సువార్త ఇంక లావు వెప్తా మనాన్. మరి యేసు కిత్తి నండో బమ్మాని పణిజ వందిజ్, నండొండార్ జబ్బుదాన్ మహి వరిజ్ నెగెణ్ కిత్తిదన్ని వందిజ్ వెప్పినాన్. యేసు దేవుణు మరిసి ఇహిజ్బా లోకు వజ పుట్టి, లోకురి పావమ్కాజ్ వందిజ్ సాజి, మరి దేవుణువెట ఎలాకాలం బత్తిని బత్కుదు నడిపిసినాన్ ఇజి యా సువార్తదు వెప్పినాన్.

1-4 లూక తియెపిలెజ్ రాసినాన్. మా నడిమి జర్గితి సజతిజ వందిజ్ కతవజ రాస్తెజ్ నండొండార్ సుడేతార్. మొదోహనె, యా సజతిజ సుడేతి సాసిర్, మరి, సువార్త బోద్దిస్తాకర్ మజి వెప్తార్. వారు మజి వెప్తా వజనె, వీరు రాస్తార్. నాను యా సజతిజ్ విజు మొదోహనె బాగ నెస్త మహ. అందెజె అయాకెజ్ నీ వందిజ్ వరస రాస్తిజ బాగ మంజినాద్ ఇజి నాను ఒడేబిత. ఎందానిజ్ ఇహిజ, అయావలె నిజి నెస్పిస్తి విజు వన్కాజ్ పూర్తి అర్థం నిజి నెస్తజానాద్.

బాప్తినం సీని యోహాను పుడగు వందిజ్ వెప్పినాన్.

5 హెరోదురాజు యూదయ దేసెం ఏలుబడి కిజి మహివలె, జెకరియ ఇని ఒరెన్ పుజెరి మహాన్. వీండ్రు అబియ పుజెరి జట్టుదు మహికాన్. విన్ని అల్పి ఎలిసబెతు. అది అహరోసు పుజెరి కుటుమ్దికాద్నె.

6 వీరు రిఎర్బా, నింద సిల్లెండ ప్రబు సితి ఆడ్రెజ, రూలుజ విజు లోజిజి, దేవుణు ముందాల నీతినిజాయితిదాన్ మహార్.

7 ఎలిసబెతు గొడ్డు బోదెలి. అందెజె వరిజ్ కొడొకర్ సిల్లెర్. వారు రిఎర్బా నండో డొక్ర ఆతార్.

8 ఉండ్రీ నట్టు జెకరియ జట్టుజ్ పుజెరి పణికిదెజ్ వంతు వాతాద్. అయావలె జెకరియ దేవుణు ముందాల పుజెరి పణి కిజినాన్.

9 పుజెరిజ మన్ని అలవాటు లెకెండ, సీటి పోక్తార్, జెక్రయెజ్ ఏర్పాటు కితార్. దేవుణు గుడిడు సొన్ని దూపం సురుదెజ్ వన్నిజ్ ఏర్పాటు కితార్.

10 దూపం సురుదెజ్ వేల ఆతాద్. నస్తివలె అబ్బె కూడితిమహి మందలోకుర్ విజెరె వెల్లి మంజి పార్దనం కిజి మహార్.

11 నస్తివలె, దేవుణుదిజ్ దూపం సుర్పి మాలి పిటి ఉణెర్పడకాద్ దేవుణు దూత నిహాన్. నిహండ్రె వన్నిజ్ తోరె ఆతాన్.

12 జెకరియ, దేవుణు దూతెజ్ సుడేతాండ్రె, గజిబిజి ఆజి నండో తియెల్ ఆతాన్.

13 అయావలె దేవుణు దూత వన్నిజ్, “జెకరియ, నీను తియెల్ ఆమ. నీ పార్దనం దేవుణు వెహాన్. నీ ఆలు ఎలిసబెతు ఒరెన్ కొడొకె ఇడ్పాల్లె. వన్నిజ్ యోహాను ఇజి పేరు ఇడదెజ్.

14-17 వాండ్రు ప్రబు ఎద్రు పెరికాన్ ఆనాన్. ద్రాక్కు కలుని మరి సోస్తిక ఇనికబా వాండ్రు ఉణ్ఎన్. అయిసి పొటలోఇ పిండం ఆతి బాణిజ్ మొదోల్పి దేవుణు ఆత్మ వన్నిజ్ నడిపిస్సాన్. ఇస్రాయేలు దేసెమ్ది లోకురిజ్ నండొండారిజ్ వరి దేవుణు ఆతి ప్రబు దరోట్ మహి తనాన్. వీలియ ప్రవక్త లెకెండ నండో గొప్ప సత్తుదాన్ వాండ్రు ప్రబు ముజాల సొనాన్. ఎందానిజ్ ఇహిజ, అప్పొసి మరిసిరిజ్ కూడుఃపైజ్. నాయం మన్నికార్ బుద్దిదాన్ నడినివజ, విరి సరిదు దేవుణుమాట వెన్ఇవరిజ్, నడిపిస్తెజ్ ప్రబు వానివలె, వన్నిజ్ ఎద్రు సుడేదెజ్ లోకాజ్ తయార్ కినివందిజ్ యా లెకెండ కినాన్లె. అందెజె వాండ్రు పుట్టివెలె మిజి గొప్ప సర్ద కినాన్లె. మరి, నండొండారిజ్ సర్ద కిబిస్సాన్లె”, ఇజి వెప్తాన్.

18 నస్తివలె జెకరియ దేవుణు దూతెజ్ వెన్బాతాన్, “యాక ఎలాగ నాను నెస్తెజ్? నాను డొక్ర. నా బోదెల్బా డొక్రి ఆతాద్”, ఇజి.

19 అందెజె దేవుణు దూత, “నాను గబ్రియెలు. దేవుణు పడకాద్ నిల్పి మంజినికాన్. నీ వెట వర్గిజి, నిజి యా నెగ్గి కబ్రు వెప్తాజ్ దేవుణు నజి పొక్త మనాన్.

20 గాని నాను వెప్తా మాటెజ్ నీను నమిఇతి. అందెజె యాకెజ్ జర్గినిదాక, నీను గుల్ల ఆజి మంజినిలె. నాను వెప్తాకెజ్ జర్గిదెజ్ దేవుణు ఏర్పాటు కితి కాలమ్దు, పూర్తి ఆనెలె”, ఇజి వెప్తాన్.

21 నస్తివలె లోకుర్ జెక్రయెజ్ కాప్ కిజి మహార్. వీండ్రు ఎందనిజ్ దేవుణు గుడిడు నిసా ఆల్సెం ఆతాన్ ఇజి బమ్మ ఆజి మహార్.

22 వాండ్రు వెల్లి వాతివెలె, వరి వెట వర్గిదెజ్ అట్ఎతాన్. అయావలె దేవుణు గుడిఃదు వినిజ్ దేవుణు ఇనికదో ఉండ్రీ దర్సనం\* తోరిస్తాన్ ఇజి నెస్తార్. వెయు రఇతిజ్, వాండ్రు వరిజ్ కియు నయన కితాన్. వాండ్రు గుల్ల ఆజి మహాన్.

23 వన్ని పణి కాలం వీజితిజ్ వాండ్రు వన్ని ఇండ్రో సోహాన్.

24 సెగం రోస్కు సోహి వెన్యా, వన్ని ఆల్ని ఎలిసబెతు పాత డిస్తాద్. అయ్దు నెలదాక అది ఇండ్రోనె మహాద్.

25 “ప్రబునె నా వందిజ్ యాక కితాన్. ఏలు నా ముస్కు కణక పెహ్తా బస్తాండ్రె లోకుర్ ఎద్రు నజీ మహి సిగుసేట్టు లాగితాన్”, ఇజి వెహ్తాన్.

**యేసు పుడుఃగు వందిజ్ వెహ్సినాన్**

26 ఎలిసబెతు పాత డిఃసి ఆరునెలాదు, దేవుణు గబ్రియెలు దూతెజ్, గలిలయ ప్రాంతమ్దు మన్ని నజరేతు ఇని పట్టుమ్దు పోక్తాన్.

27 యోసేపు ఇన్ని ఒరెన్ వన్నిజ్ వెన్బాతి ఉండ్రీ విడ్డి బోదెలిబాన్ దేవుణు దూత సోహాన్. అయ విడ్డి బోదెలి పేరు మరియ. యోసేపు దావీదు కుటుమ్దికాన్.

28 దేవుణు దూత లోఇసోహండ్రె, మరియామ్మోజ్ సుడఃజి, “వందనం, ప్రబు నీ వెట మనాన్. నిజీ నెగెండ దీవిస్త మనాన్”, ఇజి వెహ్తాన్.

29 అయ మాటెజ్ వెహదె, మరియ నండో బాద ఆతాద్. వన్ని మాటెజిదిజ్ అర్దం ఇనికదో ఇజి దన్ని గర్బమ్దు బమ్మ ఆతాద్.

30 అయావలె దేవుణు దూత దన్నిజ్, “మరియ నీను తియెల్ ఆమ. దేవుణు నీ ముస్కు కనికారం తోరిస్త మనాన్.

31 నీను పాత డిఃస్తిదె, ఒరెన్ కొడోదిజ్ ఇడ్డిలె. వన్నిజ్ యేసు ఇజి పేరు ఇడఃఅ.

32 వాండ్రు పెరికాన్ ఆనాన్. విజుదనిజ్ అతికారం మని దేవుణు మరిసి ఇజి కూకె ఆనాన్లె. వన్ని అనిగోగోర్ ఆతి దావీదు రాజు ఆతివజ, దేవుణుఆతి ప్రబు వన్నిజ్ రాజు కినాన్లె.

33 వాండ్రు, యాకోబుజ్ తెగ్గతివరిజ్ ఎలాకాలం ఏలుబడిః కినాన్లె. ఏలుబడిః కిదెజ్ అతికారం వన్నిజ్ ఎలాకాలం మంజినాద్లె”, ఇజి వెహ్తాన్.

34 అయావలె అది, “నాను ఎసెజ్బా మొగకొడోః వెట కూడఃఎనె. యాక ఎలాగ జర్గినాద్?”, ఇజి దేవుణు దూతెజ్ వెన్బాతాన్.

35 అందెజె దేవుణు దూత, “దేవుణు ఆత్మ నీ ముస్కు వానాన్లె. మొసాప్ కితిజి నీడ పిడఃక్వాద్. అయలెకెండ, విజు దన్నిజ్ అతికారం మన్ని దేవుణు సత్తు నిజీ పిడఃక్వాద్. అందెజె పుట్టికాన్ దేవుణు బాణిజ్ వానికాన్. వాండ్రు దేవుణు మరిసి ఇజి కూకె ఆనాన్లె.

36 నీ డగ్రుహి లోకుఆతి ఎలిసబెతు డోక్రి కాలమ్దు ఒరెన్ బయిజ్ పాత డిఃస్త మనాద్. గొడ్డు బోదెలి ఇజి కూకె ఆతిదనిజ్ ఏలు ఆరు నెలెజ్.

37 విజు కిదెజ్ దేవుణు అట్టికాన్”, ఇజి వెహ్తాన్.

38 అయావలె మరియ, “ఇదిలో, నాను దేవుణు పణిమణిసి. నీను వెహ్తా లెకెండె నజీ జర్గిపిద్”, ఇజి వెహ్తాద్. అకవెహండ్రె దేవుణు దూత దని బాణిజ్ సోహాన్.

**మరియ ఎలిసబెతుబాన్ ససాన్సినాద్**

39 అయావలెనె, మరియ తయార్ ఆతాద్. ఆతాదె, యూదయ దేసెమ్ది గోరోణ్ ప్రాంతమ్దు మని ఉండ్రీ పట్టుమ్దు బేగి సోహాద్.

40 అబ్బె మని జెకరియ ఇండ్రో సోహదె, ఎలిసబెతుజ్ దసూల్ఆతాదె, నమొస్తె వెహ్తాద్.

41-42 మరియ వెహ్తా వందనం ఎలిసబెతు వెహివెలె, దన్ని పొటాద్ మన్ని పిండం సర్దదాన్ కద్దితాద్. ఎలిసబెతు దేవుణు ఆత్మ దాన్ నిండ్రీజి సర్ద ఆజి ఈహు డటం వెహ్తాద్. “అబ! బోదెకా లోఇ, దేవుణు నిజీనె నెగెండ దీవిస్తాన్. నీ పొటాద్ మన్ని కొడోదిజ్బా దీవిస్తాన్.

43 నా ప్రబుజ్ అయ్సీ నా డగ్రు వాదెజ్ నాను ఏపటిదిక ఆవ.

44 ఇదిలో నీ వందనం నా గిబ్బిదు అర్తిజ్, నా పొటాద్ మన్ని పిండం సర్దదాన్ కద్దితాద్.

45 ప్రబు దనిజ్ వెహ్తా మాటెజ్ జర్గినాద్ ఇజి నమకం ఇట్టికాద్ గొప్పది.

**మరియ దేవుణుదిజ్ పొగిడిఃజి పార్జినాద్.**

46 అయావలె మరియ ఈహు వెహ్తాద్. “నా పాణం ప్రబు గొప్ప పెరికాన్ ఇజి వెహ్సినాద్.

\* 1:22 1:22 దర్సనం ఇహిజ ఇనికాదో ఉండ్రీ నజతి కల లెకెండ టెటాజ్ తోరె అనికాదె అయాక దేవుణు సత్ఉదాన్ తోరె ఆజినాద్

47-49 వాండ్రు వన్ని పణిమణిసిఆతి నా ఇజ్జి బత్కుదిజ్ నుండేతాన్. అందెజె నా పాణం నజీ రక్సిన్ని దేవుణు బానె సర్ద ఆజినాద్. గొప్పు సత్తు మన్ని దేవుణు నా వందిజ్ గొప్పు పణిజ్ కితాన్. అందెజె ఎలుదాన్ లోకుర్ విజేరె నా వందిజ్, దేవుణు దీవిస్తికాద్ ఇజి వెహ్వార్లె. వాండ్రె నెగ్గి దేవుణు.

50 వన్నిజ్ తియెల్ ఆనివరి ముస్సు వన్ని కనికారం తర తరం మంజినాద్.

51 వాండ్రు వన్ని సత్తుదాన్ గొప్పు పణిజ్ కితాండ్రె తోరిస్తాన్. నానె పెరికాన్ ఇజి వరి లోఇ ఒండేబిజి గర్త ఆతి వరిజ్ వాండ్రు సెద్దిస్తాన్.

52 గర్త మని అతికారిజ, అతికారం దాన్ డిష్టాండ్రె ఇజిరి వరిజ్ పెరికార్ కితాన్.

53 బజాతివరిజ్ నెగ్గి టిండి సీజి సర్ద కిబిస్తాన్. మని వరిజ్ వహి కిదానె పొక్తాన్.

54-55 మా అనిరిజ్ 'కనికారం తోరిస్తు' ఇజి ఒట్టు కితి వజి వాండ్రు కితాన్. వన్నిజ్ సేవ కిని ఇస్తాయేలు లోకాజ్ కనికారం ఆజి సాయం కితాన్. అబహస్తుజ్ వన్ని కుటుమ్ది వరిజ్ విజేరిజ్ ఎలాకాలం కనికారం తోరిస్తు ఇజి ఒట్టు కితాన్. అయాక వాండ్రు ఒడిబితాన్", ఇజి మరియ వెహ్వార్.

56 అది డగ్గు మూండ్రె నెలెజ్ దాక ఎలిసబెతు బాన్ మహదె దని ఇండ్రె మర్జి సాహద్.

**బాప్తిసం సీని యోహాను పుట్టినాన్.**

57 నెలెజ్ నిండ్రెతివలె, ఎలిసబెతుజ్ ఒరెన్ కొడోః పుట్టాన్.

58 ప్రబు దన్నిముస్సు కణక పెహ్తా బేస్తాన్ ఇజి పడకాదికార్ని కూలెజ్ వెహరె, దన్నివెట నండో సర్ద ఆతార్.

59 కొడోః పుట్టి ఎనిమిది దినమ్దు వన్నిజ్ సునతి కిదెజ్ కూడితార్. కొడోఃదిజ్ అప్పొసి పేరు నన్నిక ఇడదెజ్ వారు ఒండేబితార్.

60 నస్తవలె అయ్సి, "అహు పొని! వన్నిజ్ యోహాను ఇజి పేరు ఇడదెజ్", ఇజి వెహ్వార్.

61 అందెజె వారు, "మీ కూలెజి లోఇ ఎయెరిజబా నిన్ని పేరు సిల్లెద్", ఇజి దనిజ్ వెహ్వార్.

62 వినిజ్ ఇన్ని పేరు ఇడదెజ్ అప్పొసి కొరిజినాన్ ఇజి నెస్తెజ్ వారు కియు సయ్న కిజి జెక్రయెజ్ వెన్బాతాన్.

63 నస్తవలె వాండ్రు ఉండ్రె రాసిని బల్ల లొస్తాండ్రె, "విన్ని పేరు యోహాను", ఇజి రాస్తాన్. వారు విజెరె నండో బమ్మ ఆతార్.

64 వెటనె, వన్నిజ్ వర్గిదెజ్ వెయు వాతాద్. దేవుణుదిజ్ పొగిడిజి వర్గిదెజ్ మొదోల్స్తాన్.

65 పడకాదికార్ విజేరె గొప్పు తియెల్ ఆతార్. యూదయ దేనిమ్ది గొరోణ్ ప్రాంతం విజు లోకుర్ విజేరె యా జర్గితి సజతిజి వందిజ్ వర్గిజి మహార్.

66 యాక వెహికార్ విజెరెబా దని వందిజ్ ఒడిబిజి, "యా కొడోః ఎలాగ మహ్తాకాన్ ఆనాన్లెనొ", ఇజి వెహ్వార్. ప్రబు సత్తు వన్నివెట మహాద్ ఇజి వారు నెస్తార్.

**జెకరియ పొగిడిజి పార్జినాన్**

67 నస్తవలె వన్ని అప్పొసి జెకరియ, దేవుణు ఆత్మదాన్ నిండ్రెజి, దేవుణు వెహ్వెజ్ మని సజతిజి వందిజ్ ఈహు వెహ్వార్.

68 "ఇస్తాయేలు లోకురి దేవుణుదిజ్ పొగిడిజినాల్. ఎండనిజ్ ఇహిజ, వాండ్రు వన్ని లోకురిజ్ డిబిస్తి వందిజ్ వాత మనాన్.

69 ఒరెన్ సత్తు మని మజి గొప్పుజ రక్సిన్నివన్నిజ్ మా వందిజ్ సిత మనాన్. అయ వాండ్రు వన్ని పణి మణిసి ఆతి దావీదు కుటుమ్దు మనికాండ్రె.

70-71 సీన దినమ్కాజ్ ముజాలె, దేవుణు వన్ని బాణిజ్ వాతి ప్రవక్తెజవెట ఒట్టు కిత మనాన్. ఒట్టు ఇనిక ఇహిజ, "మా పగాతివరి బాణిజ్ మజి రక్సిన్నుఇజి. "మజి దూసిన్ని వరిబాణిజ్ రక్సిన్ను", ఇజి. అయా ఒట్టువజనె, మజి రక్సిన్ని వన్నిజ్ సితాన్.

72 మరి వాండ్రు వెహ్వార్, "మా అనిరిజ్ ఒట్టు కితి వజి కనికారం తోరిస్తు ఇజి. వన్ని వందిజ్ కేట ఆతి ఒపుమానం ఒండేబిన ఇజి.

73-74 మా బుబ్బు ఆతి అబ్రాహము వెట ఒట్టు కితాన్, మా పగ ఆతివరి బాణిజ్ మజి తప్రిస్తు ఇజి, తియెల్ సిల్లెండ వన్నిజ్సేవ కిదెజ్ మజి సాయం కిన ఇజి.

75 మరి, మాటు దేవుణుదిజ్ కేట ఆతి లోకుర్ వజి నీతి నిజాయితిదాన్ మా బత్కు విజు వన్ని ఎద్దు మండ్రెజ్ మజి తయార్ కిన ఇజి", వెహ్వార్.

76 మరి, నా కొడోః నీను విజు దన్నిజ్ అతికారం మన్ని దేవుణు ప్రవక్త ఇజి కూకెఆనిలె. ఎందానిజ్ ఇహిజ, నీను ముజాలె సొన్సి ప్రబుజ్ లోకుడగ్గు వాదెజ్ సరి నెగెణ్ కినిలె.

77 నీ వన్ని లోకాజ్ వెహ్వాలె, "దేవుణు వరి పాపమ్కు సెమిసి వరిజ్ రక్సిన్నాన్లె", ఇజి.

78 మా దేవుణు నండో కనికారం మనికాన్. వాండ్రు దేవుణు మంజిని బాడ్డిదాన్ పొద్దు సోని లెకెండ్ రక్సిన్ని వన్నిజ్ తపిస్సాన్లె.

79 ఎందానిజ్ ఇహిజ, సీకటిదు మని వరిజ్ సావు బత్కుదు మని వరిజ్ జాయ్ సీదెజ్. మజి సమాదనం దాన్ నడిపిస్తెజ్. దిని వందిజె వాండ్రు రక్సిన్ని వన్నిజ్ తపిస్సాన్లె”, ఇజి జెకరియ వెహ్లాన్.

80 కొడోః పిరితాన్. దేవుణు ఆత్మ సత్తు దాన్ పిరితాన్. వాండ్రు ఇస్రాయేలు లోకురిజ్ తోర్ని దాక యెరూసలేమ్దిజ్ వెల్లి బీడిఃమ్ బూమిదు ఒరేండ్రె బత్కితాన్.

## 2

1 అయ కాలమ్దు రోమ గవర్నెంటు అడిఃగి మన్నివిజు లోకురిజ్ జమబంది లెకెజ్ రాస్తాజ్ ఇజి కయినరు అయుగుస్తు ఉండ్రి ఆడ్ర సితాన్.

2 కురెనియ ఇని ఒరెన్ సిరియ రాస్తందిజ్ సుడఃజి మహివలె యా మొదోహి జమబంది లెకెజ్ రాస్తార్.

3 విజేరె వరి వరి పట్టుమ్కాజ్ పేర్కు రాసె ఆదెజ్ సాహార్.

4 అయలెకెండ్ యోసేపు ఇనికాన్ ఒరెన్బా సాహాన్. వీండ్రు దావీదు కుటుమ్దికాన్. దావీదు పట్టుం బేత్లెహేము. అందెజె వాండ్రు గలిలయ ఇని ప్రాంతమ్ది నజరేతు ఇని పట్టుం దాన్, యూదయ ప్రాంతమ్దు మని బేత్లెహేము ఇని పట్టుమ్దు సాహాన్.

5 వన్నిజ్ వెన్బాతి మహి మరియు వెట జమబంది రాసె ఆదెజ్ సాహాన్. అయావలె దన్నిజ్ నెలెజ్ నిండ్రితె మహె.

6 వారు అబె ముహివలె దనిజ్ నోపిజ్ వాతె.

7 అది దని తోల్సుర కొడోఃదిజ్ ఏరుకాబాతాద్. వరిజ్ మండ్రెజ్ లార్జి ఇలు దోహకెతాద్. దోహ్కాఇతిజ్ పుట్టి కొడోఃదిజ్ కనెలిజాణిజ్ సుటిస్తారె, కొడ్డిఃజ సాలాది డోణిద్ త్రెప్తార్.

### గొరెజ్ గవుడుఃజ దేవుణు దూత నెగ్గికబ్బు వెహ్సాన్

8 నస్తవలె, అయ ప్రాంతమ్దు సెగొండార్ గొరెజ్ గవ్డుఃజ్ వరి గొరెజు, మడిఃజ మంద కితారె రెయ్తు కాపుకిజి మహార్.

9 అయావలె ఒరెన్ దేవుణు దూత వరిజ్ తోరె ఆతాన్. ప్రబు జాయ్ వరి సుటులం వాతాద్. వారు నండొతియెల్ ఆతార్.

10 అయావలె దూత వరిజ్, “మీరు తియెల్ ఆమాట్. లోకురిజ్ విజేరిజ్ నండొ సర్ద కిబిన్ని నెగ్గి కబ్బు నాను వెహ్సా.

11 నేండ్రు దావీదు పట్టుమ్దు మిజి రక్సిన్నికాన్ ఒరెన్ పుట్ట మనాన్. వాండ్రు ప్రబు ఆతి క్రిస్తు.

12 యాకదె నాను మీజి వెహ్సాదనిజ్ గుర్తు “ఒరెన్ బయిదిజ్ కనెలిజాణిజ్ సుటిస్తారె, సాలాది డోణిద్ త్రెప్తి మనిక నూణిదెర్”, ఇజి వెహ్సాన్.

13-14 వెటనె, దేవుణు మంజిని బాడిది నండొ దూతెజ్ అయ దూతవెట కూడిఃతె. కూడిఃతారె, “విజు దన్నిజ్ అతికారం మన్ని దేవుణుదిజ్ పొగిడిఃజి నాట్. యా లోకమ్దు వాండ్రు ఇస్టం కిని లోకురిజ్ సమాదనం మనీద్” ఇజి దేవుణుదిజ్ పొగిడిఃజి మహార్.

15 దూతెజ్ వరిజ్ డిఃస్తారె, దేవుణు మంజిని బాడిఃదు సాహార్. సోహి వెనుక గొరెజ్ గవ్డుఃజ్, “మాటు బేత్లెహేముదు సొన్ని, ప్రబు మజి వెహ్సాపిస్తె యా జర్గితి సజతిజ నూణాట్”, ఇజి ఒరెన్దిజ్ ఒరెన్ వర్గితార్.

16 వారు బేగి సాహారె, మరియుమ్మోజ్, యోసేపుజ్, డోణిదు త్రెప్తి మని కొడోఃదిజ్ సుడఃతార్.

17 వారు వన్నిజ్ సుడఃతారె, యా కొడోః వందిజ్ వరిజ్ వెహ్సా మాటెజ్ విజేరిజ్ వెహ్సార్.

18 గొరెజ్ గవుడుఃజ్ వెహ్సాకెజ్ వెహికార్ విజేరె నండొ బమ్మ ఆతార్.

19 గాని మరియు జర్గితి సజతిజ విజు గర్బమ్దు ఇడ్డి దన్నివందిజ్ ఎత్తుకిజి మహాద్.

20 గవుడుఃజ్ వరిజ్ వెహ్సాకెజ్, వారు సుడఃతికెజ్ విజు వన్నా వందిజ్ దేవుణుదిజ్ గవ్దం సీజి వన్నిజ్ నండొ పొగిడిఃజి మహ్సా సాహార్. దేవుణు దూత వరిజ్ వెహ్సా వజనె విజు జర్గితె.

21 పుట్టి ఎనిమిది రోస్కు ఆతిజ్, బయిజ్ సునతి కితార్. అయావలె వారు వన్నిజ్ యేసు ఇజి పేరు ఇట్టార్. పాత డిఃస్ఎండ ముజాలె దేవుణు దూత వెహ్సా పేరునె ఇట్టార్.

22 దేవుణు మోసాజ్ సీతి రూలుజ్దు మన్నివజ సుబ్రరమ్వందిజ్ పూజెజ్ కిదెజ్ దినం ఆతాద్. అయావలె యోసేపుని మరియు బయిజ్ దేవుణుదిజ్ ఒపజెపైజ్, యెరూసలేమ్దు ఒత్తార్.

23 ఎందానిజ్ ఇహిజ, మోసె రాస్తాజ్ ప్రబు వెహ్సా రూలుదు మనాద్, “విజు తొలిత పుట్టి కొడోఃదిజ్ దేవుణు వందిజ్ కెట ఇడ్ఃదెజ్\*.

24 మరి, మోసె రాస్తాజ్ ప్రబు వెహ్సా రూలుదు మని వజ, “జత గువండెజ్నో రుండి పార పొటి పిలెకుజ్నో పూజ సీదెజ్†”,

\* 2:23 2:23 నిర్లమ 13:2,12. † 2:24 2:24 తేవి 12:8.

ఇజి. అయావజ ఒత్తార్.

25 అయావలె, సుమెయోను ఇనికాన్ ఒరెన్ యెరూసలేమ్దు మహాన్. వీండ్రు నీతి నిజయ్తి మనికాన్. దేవుణుదిజ్ తియెల్ ఆతికాన్. ఇస్రాయేలు లోకాజ్ రక్సిస్సి వన్ని వందిజ్ ఎర్దు సుడేజి మహాన్. దేవుణు ఆత్మ వన్ని వెట మహాన్.

26 ప్రబు ఏర్పాటు కితి పొక్తి క్రిస్తుజ్ తొవిండ, నీను సాఇలె', ఇజి దేవుణు ఆత్మ వన్నిజ్ వెప్తా మహాన్.

27 దేవుణు వన్నిజ్ నడిపిస్తివజ వీండ్రు దేవుణు గుడిడు సాహాన్. నస్తివలె, దేవుణు మోసెజ్ సిత్తి రూలుదు మని లెకెండ కిదెజ్ అయ్సి అపోసిర్ కొడో: ఆతి యేసుజ్ తత్తార్.

28 అయావలె సుమెయోను కొడో:దిజ్ కికాణిజ్ పెప్తాండ్రె దేవుణుదిజ్ పొగిడిజి ఈహు వెప్తాన్.

29 “ప్రబువా, నీను వెప్తా మాటెజ్ వజ నాను వన్నిజ్ సుడేత. అందెజి నీ పణి మణిసి ఆతి నజి ఏలు సమాదనం దాన్ కూక్సి ఒఅ.

30-31 ఎందానిజ్ ఇహిజ, లోకుర్ విజెరె సుడేదెజ్ నీను తయార్ కితి రక్సిస్సివన్నిజ్నా కణకాణిజ్ నాను సుడేత మన్న.

32 వాండ్రు ఇస్రాయేలు ఆఇ వరిజ్ దేవుణు సరిదు నడపిస్తిజ్ జాయ్లెకెండ ఆనాన్లె. నీ ఇస్రాయేలు లోకాజ్ గొప్ప గవరం వాండ్రు కల్లిస్సాన్లె.

33 అయావలె వాండ్రు కొడో: వందిజ్ వెప్తా మాటెజ్ వెహారె అయ్సి అపోసిర్ నండొ బమ్మ ఆత్తార్.

34-35 సుమెయోను వరిజ్ దీవిస్తాండ్రె, వన్ని అయ్సి ఆతి మరియెజ్, “ఇస్రాయేలు లోకుర్ నండొండార్ నాసనం ఆనివందిజ్, నండొండార్ బత్కిని వందిజ్ దేవుణు వినిజె ఏర్పాటు కితాన్. వీండ్రు దేవుణు ఏర్పాటు కితి ఉండ్రీ గుర్దు. లోకుర్ అయాక నెక్కు పొక్పార్. ఆహె, వారు మన్నుదు విని వందిజ్ ఒడేబితికెజ్ వెల్లి ఆనె. అయాక నీను సూణివెలె కూడం గుత్తి సాహి లెకెండ నీ మన్నుదు దుకం వానాద్లె”, ఇజి వెప్తాన్.

36-37 నస్తివలె పనుయెలు గాడ్సి ఆతి అన్న ఇని ఉండ్రీ ప్రవక్త మహాద్. అది ఆసిరు ఇని జాతిదు మనికాద్. అది పెండ్లి ఆజి ఏడు పంటెజ్ మాసి వెట బత్కితాద్. ఎనబయ్నాల్లి పంటెజ్ దాక ముండ మొప్త మహాద్. అది నండొ డొక్ర ఆతాద్. దేవుణు గుడి: దాన్ ఎసెజ్బా డిన్ఎండ, రెయు పొగాల్ ఉపాన్దాన్ పార్దనమ్దాన్ దేవుణుదిజ్ పొగిడిజి మాడిసి మహాద్.

38 ఆ గడియెదునె, అది దేవుణు గుడిడు యోసేపు, మరియ, యేసుబాన్ సాహదె దేవుణుదిజ్ పొగిడితాద్. యెరూసలేమ్ది లోకుర్ రోమ అతికారిజ అడిగి మహార్. వారు వరిజ్ డిబిస్సి ఒరెన్ వన్నిజ్ ఎర్దు సుడేజి మహార్. ఆహె ఎర్దు సుడేజి మహి వరివెట కొడో:వందిజ్ వెప్తాన్.

39 యోసేపుని మరియ మోసె రాస్తెజ్ ప్రబు వెప్తా రూలుజ్దు కిదెజ్ వెప్తా మనికెజ్ విజు కితార్. కితి వెనుక, మప్తారె గలీలయదు మని నజరేతు ఇని వరి పట్టుమ్దు సాహార్.

40 కొడో: సత్తు దాన్ పిరితాన్. వన్నిజ్ నండొ బుద్ది మనాద్. దేవుణు వన్నిజ్ దీవిసి నె మహాన్.

యేసు పెద్దలిజవెట వర్గిజినాన్.

41 ఏంటు ఏంటు యేసు అయ్సి అపోసిర్ యెరూసలేమ్దు పస్క\* పండొయ్దిజ్ సొన్ని మహార్.

42 వారు ఏంటు సొన్ని మహి అలవాటువజ, యేసుజ్ పన్నెండ్రు పంటెజ్ మహివలె పండొయ్దిజ్ సాహార్.

43 పండొయ్ వీజితిజ్, వారు మర్జి వాజి మహార్. గాని కొడో: ఆతి యేసు యెరూసలేమ్దు నిహాన్. వన్ని అయ్సి అప్పొసిర్ అయాక నెన్ఎత్తార్.

44 వీండ్రు మంద లోఇ మనాన్ ఇజి ఒడేబిజి, ఉండ్రీ రోజు వారు నడిజి వాతార్. వెనుక వారు వరి కూలెజబాన్ నెల్గు ఆతి వరిబాన్ వన్నిజ్ రెబాజినార్.

45 వాండ్రు తోరెఇతిజ్, వన్నిజ్ రెబాజి యెరూసలేమ్దు మర్జి వాతార్.

46 మూండ్రీ దినమ్కు వెనుక, వాండ్రు, దేవుణు గుడిడు బోద కినివరి నడిమి బస్తిక సుడేతార్. వాండ్రు వరి మాటెజ్ వెంజి, వరిజ్ మరి వెన్బాజి మహాన్.

47 వన్ని మాటెజ్ వెహికార్ విజెరె, వాండ్రు మహి వెప్తా మాటెజ్ వందిజ్, వన్ని బుద్ది వందిజ్ నండొ బమ్మ ఆత్తార్.

48 వన్ని అయ్సి అపోసిర్ వన్నిజ్ సుడేతిజ్ నండొ బమ్మ ఆత్తార్. వన్ని అయ్సి ఈహు వెప్తాద్ “నా మరిన్, నీను ఎందనిజ్ మజి ఈహు కితి? ఇదిలో నీ బుబ్బని నాను నండొ బాద ఆజి నిజి రెబాజి వాతాప్”, ఇజి వెప్తాద్.

49 దనిజ్ వాండ్రు, “మీరు నజి ఎందనిజ్ రెబాతిదెర్. నాను నా బుబ్బ పణిదు మండ్రెజ్వలె ఇజి మీరు నెన్ఇదెరా?”, ఇజి వెప్తాన్.

50 గాని వాండ్రు వరిజ్ వెహి మాటెజ్ వారు అర్దం కిఎత్తార్.

\* 2:41 2:41 పులాజ్ సిల్లి కొట్టతయార్ కిజి తిని పండొయ్నె పస్క పండొయ్

51 వెనుక వాండ్లు పరివెట సోతాండ్రై నజరేతు వాతాన్. అబ్బై వరిజ్ లోజిజి మహాన్. వన్ని అయ్సి యా జర్గిజిని విజు సజతిజ్ దని మన్నుదు ఇడ్డి మహాద్.

52 యేసు బుద్దిదు, వయుసుదు పిరితాన్. దేవుణు, లోకుర్ మరి మరి వన్నిజ్ ప్రేమిసి మహార్. వన్ని ముస్కు సర్ద ఆజి మహార్.

### 3

1 పొంతి పిలాతు ఇనికాన్యూదయ రాస్త్రం ఏలుబడిః కిజి మహాన్. హేరోదు గలిలయ రాస్త్ర మ్మదిజ్ అతికారి. హేరోదుజ్ తంబెర్సిఆతి పిలుప్పు ఇతూరియని త్రకోనీతి రాస్త్ర మ్మకాజ్ అతికారి. అబిలేనే రాస్త్ర మ్మకాజ్ లుసానియ అతికారి. అయావలె తిబెరియ కయసరు ఇనికానె విరిజ్ విజేరె ముస్కు రాజు. వాండ్లు వదిహేను పంటెజాణిజ్ విరిజ్ ఏలుబడిః కిజి నె వాజినాన్.

2 అయావలె, అన్నని కయప పుజెరిజి ముస్కు పెరి పుజెరి. అయావలె బీడిమ్ బూమిదు, జెకరియ మరిసి ఆతి యోహాను వెట దేవుణు వర్గితాన్.

3 అందెజె వాండ్లు, “మీరు పాపమ్కు డిసి బాప్తిసం లాగె ఆదు. దేవుణు మీ పాపమ్కు సెమిస్నాన్”, ఇజి యొర్దాను గడ్డ పడఃకాదు మన్ని ప్రాంతం విజు సొన్నిబోదిసి మహాన్.

4 యెసయ ప్రవక్త రాస్త్రైవెలె విన్నివందిజ్ ఈహు వెప్సానాన్. “బీడిమ్ బూమిదు ఒరెన్ ఈహు డేల్ని వెప్సానాన్. “ప్రబుజ్ లోకుడగు వాడెజ్ సరినెగెణ్ కిఅ. వన్నిజ్ నడిఃదెజ్ సరితినాజ్ కిదు.

5 విజు గాతెజ్ నిండ్రినా. విజు గొరొకని మెటెజ్ బయలు కిఅ. వెకొ సరిజ్ తినానికెజ్ కిఅ. కరుకు సరిజ్ నున్నజ్తికెజ్ కిఅ.

6 అయావలె విజేరె, దేవుణు వరిజ్ రక్సిన్ని దన్నివందిజ్ సూణార్లె\*”, ఇజి. అపా రాస్త్రమహి లెకెండ్ యోహాను బోదిస్తాన్.

7 యోహాను వన్నిడగు బాప్తిసం లాగెఅదెజ్ వాజిని మంద లోకురిజ్ ఈహు వెప్సాన్ “మీరు విసం మన్నిసరాన్ లెకెండ్ మన్నికిదెర్, దేవుణుబాణిజ్ కోపం వాజినాద్ ఇజి నమ్మిజి మీరు వాతిదెరా? సిల్లెద్. వన్ని కొపమ్దాన్ తప్రెఅదెజ్ ఇజి మీరు వాతిదెరా? నిజమే అయలెకెండ్ ఇజి నాను ఒడిఃబిదెజ్ సిల్లెద్.

8 మీ పాపమ్కు ఒప్పుకొడొఃజి డిసి సీజి దన్నిజ్ తగితి పణిజ్ కిజి తోరిస్తు. “మాపు అబ్రాహము తెగ్గాతికాప్”, ఇజి మీరు మీ మన్నుదు వర్గిమాట్. ఎందానిజ్ ఇహిజ, యా పణుకుజాణిజ్ అబహమ్ముజ్ కొడొఃరిజ్ తయార్ కిదెజ్ దేవుణు అట్నాన్”, ఇజి నాను మిజి వెప్సాన్.

9 దేవుణు మరెక మొదొల్కత్తి విసిర్దెజ్ కియుదు గొడెలి అస్తి వన్నిజ్ పోలిత మనాన్. నెగ్గి పట్టు అన్ఇ మరెకాజ్ విజు కత్తి సిసుద్ విసిర్నాన్”, ఇజి వెప్సాన్.

10 అయావలె లోకుర్ విజేరె, “అహిజ మాపు ఇనిక కిదెజ్?”, ఇజి వెన్బాతార్.

11 యోహాను వెప్సాన్, “రుండి సొకెజ్ మన్నికాన్ ఉండ్రై సిలివన్నిజ్ సీదెజ్. అయలెకెండ్ టిండి మన్నికాన్ సిల్లివన్నిజ్ సీదెజ్”, ఇజి.

12 వన్ను పెర్నికార్బా బాప్తిసం లాగె అదెజ్ వాతార్. వారు, “ఓ బోదకినికి, మాపు ఇనిక కిదెజ్?”, ఇజి వెన్బాతార్.

13 దనిజ్ వాండ్లు, “మిజి ఎసా లొస్తాజ్ ఆడ్ర సిత మనాదొ, నసా లొస్తు. నండొ లొస్తాట్”, ఇజి వెప్సాన్.

14 నస్తివలె సెగొండార్ ఉద్దం కినికార్, “మాపు ఇనిక కిదెజ్?”, ఇజి వెన్బాతార్. అందెజె వాండ్లు, “బెద్రిసి ఎయెబాన్ డబ్బు డిబిస్తాట్. అనయం వెప్సా డబ్బు లొస్తాట్. మీ జితం దానె సర్దు ఆదు”, ఇజి వెప్సాన్.

15 వీండ్లు క్రీస్తును ఇజి యోహాను వందిజ్ లోకుర్ విజెరె వరి మన్నుదు ఒడఃబితార్. వారు ఆస దాన్ క్రీస్తుజ్ ఎద్రు సుడఃజి మహార్.

16 అయావలె యోహాను వరిజ్ విజెరిజ్ వెప్సాన్, “నాను మిజి ఏరుదాన్ బాప్తిసం సీజిన. నజి మిస్సి నండొ పెరికాన్ మరి ఒరెన్ వాజినాన్. వన్ని జోడ్డు బేల్టు కుతెజ్ నాను ఏపటితికాన్ ఆవ. వాండ్లు మిజి దేవుణు ఆత్మదాన్ సిసుదాన్ బాప్తిసం సినాన్లె.

17 వాండ్లు గాలి ఇడ్ని సేహి కీదు అస్త మనాద్. వాండ్లు వన్నికలమ్దిజ్ సుబ్బరం కిజి, గింజెజ్ కొటు కిజి గాలి ఇడఃజినాన్. గింజెజ్ గాదిద్ ఇడ్నాన్. పొటుదిజ్ నమ్మిఇ సిసుదు సుర్నాన్.

18 యా మాటెజ్ అవండ, మరి నండొ సజతిజ్ వెప్సా లోకురిజ్ పణిసి వెప్సాన్. సువార్త బోదిసి వెప్సాన్.

\* 3:6 3:6 యెసయ 40:3-5.

19 వాండ్రు హేరోదు ఇని అతికారిజ్ వెహ్తాన్, వన్ని కొడెసిసి హేరోదియవెట హేరోదు పాపం కిత్తాన్ ఇజి. మరి, హేరోదు కితి విజు తప్పుజబా వెహ్తాన్.

20 అందెజె వాండ్రు యోహానుజ్ జెలిదు ఇట్టాన్. ఆహె హేరోదు కిత్తి విజు తప్పుజవెట యోహానుజ్ జెలిదు ఇడిస్తి తప్పబా కూడితాద్.

**యేసు బాప్తిసం లాగెఆజినాన్**

21 యోహానుజ్ జెలిదు ఇడ్ని ముజాల, ఉండ్రీ రోజు లోకుర్ విజెరె బాప్తిసం లాగె ఆతార్. అయావలె యేసు బా బాప్తిసం లాగె ఆతాన్.

22 వాండ్రు పార్దనం కిజి మహివలె, ఆగాసం రెయ్ ఆతాదె దేవుణు ఆత్మ ఉండ్రీ పార పొటిజ్ మూర్తి లెకెండ డింగ్జి వన్ని ముస్కు వాతాద్. అయావలె, “నీనె నాను ప్రేమిన్ని నా మరిన్. నీ వందిజ్ నాను నండొ సర్ద ఆజిన”, ఇజి పరలోమ్దాన్ ఉండ్రీ జాటు వాతాద్.

23 యేసు వన్ని సేవపణి మొదొల్నివెలె వన్నిజ్ డగ్రుదిజ్ ముప్పుయ్ పంటిజ్ వయ్సు మహాన్. వీండ్రు యోసేపు మరీన్నె ఇజి ఒడిబిజి మహార్. యోసేపు హెలి మరిసి

24 హెలి మత్తతు మరిసి మత్తతు లేవి మరిసి లేవి మెల్కి మరిసి మెల్కి యన్న మరిసి యన్న యోసేపు మరిసి

25 యోసేపు మత్తతియ మరిసి మత్తతియ ఆమోసు మరిసి ఆమోసు నాహోము మరిసి నాహోము ఎస్లికి మరిసి ఎస్లికి నగ్గయ మరిసి

26 నగ్గయ మయతు మరిసి మయతు మత్తతియ మరిసి మత్తతియ సిమియ మరిసి సిమియ యేసెక మరిసి యేసెక యోదా మరిసి

27 యోదా యోహాన మరిసి యోహాన రేపా మరిసి రేపా జెరుబాబెలు మరిసి జెరుబాబెలు సయిల్తీయెలు మరిసి సయిల్తీయెలు నేరి మరిసి

28 నేరి మెల్కి మరిసి మెల్కి అది మరిసి అది కోసాము మరిసి కోసాము ఎల్కదాము మరిసి ఎల్కదాము ఏరు మరిసి

29 ఏరు యోహానవ మరిసి యోహానవ ఎలియెజెరు మరిసి ఎలియెజరు యోరియ మరిసి యోరియ మత్తతు మరిసి మత్తతు లేవి మరిసి

30 లేవి సిమొను మరిసి సిమొను యూద మరిసి యూద యోసేపు మరిసి యోసేపు యోనాము మరిసి యోనాము ఎల్యాకిము మరిసి

31 ఎల్యాకిము మెలెయా మరిసి మెలెయా మేన్నా మరిసి మేన్నా మత్తత మరిసి మత్తత నాతాను మరిసి నాతాను దావీదు మరిసి

32 దావీదు, యెసయ మరిసి. యెసయ ఓబెదు మరిసి ఓబెదు బోయసు మరిసి బోయసు సల్కను మరిసి సల్కను నయస్సోసు మరిసి

33 నయస్సోసు అమ్మినాదబు మరిసి అమ్మినదాబు అరాము మరిసి అరాము ఎస్రోము మరిసి ఎస్రోము పెరెసు మరిసి పెరెసు యూదా మరిసి

34 యూదా యాకోబు మరిసి యాకోబు ఇసాకు మరిసి ఇసాకు అబ్రాహాము మరిసి అబ్రాహాము తేరహు మరిసి తేరహు నాహోరు మరిసి

35 నాహోరు సేరుగు మరిసి సేరుగు రయూకు మరిసి రయూకు పెలెగు మరిసి పెలెగు హెబెరు మరిసి హెబెరు సేలహు మరిసి

36 సేలహు కెయినాను మరిసి కెయినాను అర్పక్నదు మరిసి అర్పక్నదు సేము మరిసి సేము నోవహు మరిసి నోవహు లెమెకు మరిసి

37 లెమెకు మెతుసెలె మరిసి మెతుసెలె హానోకు మరిసి హానోకు యెరుదు మరిసి యెరుదు మహాలెలు మరిసి మహాలెలు కేయినాను మరిసి

38 కేయినాను ఎసోసు మరిసి ఎసోసు సేతు మరిసి సేతు ఆదాము మరిసి ఆదాము దేవుణు మరిసి.

**4**

**యేసుజ్ పరిస కిజినాన్**

1 యేసు దేవుణు ఆత్మదాన్ పూర్తి నిండ్రితాండ్రె, యోర్దాన్ గడ్డదాన్ మర్జి వాతాన్.

2 నలపయ్ రోస్కు దేవుణు ఆత్మ వన్నిజ్ బీడిమ్ బూమిదు నడిపిస్తాన్. అబె, సయ్తాను వన్నిజ్ పరిస కిదెజ్ సుడెతాన్. వాండ్రు అయా రోస్కాజ్ ఇనికబా ఉణెఎండ మహాన్, కడెవెరిదు వన్నిజ్ బజ కట్టాద్.

3 అయావలె సయ్తాన్, “నీను దేవుణు మరిసి ఇహిజ, యా పణుకు టిండి ఆని లెకెండ వెహ్తా”, ఇజి వెహ్తాన్.

4 అందెజె యేసు, “లోకు బత్తిజనిక టిండిదానె ఆవద్\*”, ఇజి దేవుణు మాటదు రాస్త మనాద్”, ఇహాన్.

\* 4:4 4:4 ద్విత్తి 8:3.



5-6 అయావలె సయ్తాన్ వన్నిజ్ ఎత్తు మని బాన్ ఒతంద్రె, లోకమ్దు మని విజు దేసెమ్కు జామె తోరిస్తాన్. “యా లోకమ్ది అతికారం సంసారం, విజు నాను నిజి సీన. ఎందనిజ్ ఇహాజి అయాకెజ్ విజు నజెనె దేవుణు ఒపజెప్తు మనాన్. నజి ఇన్టం ఆతి ఎయెరిజ్బా సీదెజ్ నజి అక్కు మనాద్.

7 అందెజె నీను నజి పోగిడిజి మాడిస్తిజ, యాకెజ్ విజు నీవి ఆనె”, ఇహాన్.

8 నస్తివలె యేసు, “నీను నీ దేవుణు ఆతి ప్రబుజ్నె పోగిడిజి మాడిసి, వన్నిజె సేవకిదెజ్† ఇజి దేవుణు మాటదు రాస్త మనాద్”, ఇజి మర్జి వెప్తాన్.

9 వెన్కా వన్నిజ్ యెరూసలెమ్దు కూక్త ఒత్తాంద్రె, దేవుణుగుడిః కోసాదు నిల్వ్తాంద్రె, “నీను దేవుణు మరిసి ఇహిజ ఇబ్బెణిజ్ అడిగి డాట్అ.

10-11 ఎందానిజ్ ఇహిజ, “నిజి నెగ్రెండ కాపాడెదెజ్ నీ వందిజ్ వన్ని దూతారిజ్ దేవుణు ఆడ్ర సీనాన్. నీ పాదం పణుకుదు తగ్గిఎండ వారు నిజి వరి కికాణిజ్ పెర్న అస్సార్‡, ఇజి దేవుణు మాటదు రాస్త మనాద్”, ఇజి వన్నిజ్ వెప్తాన్

12 అందెజె యేసు, “నీ దేవుణుఆతి ప్రబుజ్, పరిస కిదెజ్ ఆవీద్‡”, ఇజి దేవుణు మాటదు రాస్త మనాద్”, ఇజి మర్జి వెప్తాన్.

13 సయ్తాన్ విజు పరిసెజ్ వీస్తాంద్రె సెగం కాలం వన్నిజ్ డిఃస్తసాహ మహాన్.

యేసు గలీలయదు వన్ని సేవపణి మొదొల్సినాన్

14 యేసు దేవుణు ఆత్మ నత్తుదాన్ గలీలయ ప్రాంతమ్దు మర్జి సాహాన్. అయా ప్రాంతం విజు వన్ని వందిజ్ మాటెజ్ సెద్రితె.

15 వాండ్రు యూదురి మీటిజ్ ఇల్కాజ్ నేరపిస్తాన్. విజెరె వన్నిజ్ పోగిడిఃతార్.

యేసుజ్ నజరేతుదాన్ పేర్జినార్

16 వెనుక, వాండ్రు పిరితి వన్ని పట్నమ్దు సాహాన్. అయాక నజరెతు. వన్ని అలవాటు వజ విస్తాంతి దినమ్దు యూదురి మీటిజ్ ఇండ్రో సాహాంద్రె దేవుణు మాట సద్విదెజ్ ఇజి నిహాన్.

17 మీటిజ్ ఇండ్రోణి పణిమణిసి వన్నిజ్ యెసయ ప్రవక్త రాస్తి పుస్తకం సితాన్. వాండ్రు అయాక రెక్కిజ్ ఈహు రాస్తి మనికెజ్ వన్నిజ్ దొహ్కాద్.

18-19 “ప్రబు పోక్తి దేవుణు ఆత్మ నావెట మనాన్. అందెజె వాండ్రు బీద ఆతి వరిజ్ సువార్త వెప్తాజ్ నజి ఏరపాటు కితాన్. తోహా ఆతి వరిజ్, “మిజి విడుఃదల వాతాద్”, ఇజి వెప్తాజ్, గుడ్డి వరిజ్, “మీ కణుకుజ్ తోరెనె”, ఇజి వెప్తాజ్, నల్లితి వరిజ్ డిఃసపిస్తెజ్, దేవుణు వన్ని లోకురిజ్ రక్సిస్సికాలం వాతాద్ ఇజి వెప్తాజ్ వాండ్రు నజి పోక్త మనాన్\*”, ఇజి రాస్తి మనికెజ్ వన్నిజ్ దొహ్కాద్.

20 యాకెజ్ సద్విజి, పుస్తకం మూక్తాంద్రె పణిమణిసిజ్ మహ్తా సితంద్రె బస్తాన్. మీటిజ్ ఇండ్రో మహికార్ విజెరె వన్నిజ్ డిట బేస్తార్.

21 వాండ్రు వరిజ్, “ఏలు నాను సద్వితి దేవుణు మాటెజ్ మీరు వెహివెలెనె అయాక పూర్తి ఆతె”, ఇజి వెప్తాన్.

22 వారు విజెరె వన్ని వందిజ్ నెగ్గికెజ్ వెప్తార్. వన్ని వెయెదాన్ వాతి నెగ్గి మాటెజి బమ్మ ఆజి, “వీండ్రు యోసేపు మరిసి గదె?”, ఇజి వెప్తార్.

23 యేసు వరిజ్ వెప్తాన్, “ఓ గురు, నిజి సీనె నెగెణ్ కిబ్బె ఆఅ’, ఇని బుద్ది మాట మీరు తవ్వెండ నజి వెహ్నాదెర్. మరి, మీరు నజి, ‘నీను కపర్నహోము ఇని పట్నమ్దు కిత్తి పణిజ్ మాపు వెహాప్. అయా పణిజ్ ఇబ్బె నీ సొంత పట్నమ్దుబా కిఅ’, ఇజి వెహ్నాదెర్.

24 ఎమేణి ప్రవక్తెజ్ బా సొంత పట్నమ్దు లోకుర్ గవరం సిఎర్, ఇజి నిజం నాను మీ వెట వెహ్సిన.

25 వెండ్రు, ఏలియ దినమ్కాజ్, ఇస్రాయేలు దేసమ్దు మూండ్రె పంటెజ్ ఆరు నెలెజ్ దాక పిరు రఎండ మహాద్. గొప్ప కరు వాతివలె, అబె నండ్రె రాండి బోదెక్ మహె ఇనిక నిజమ్నె.

26 గాని, దేవుణు ఏలియెజ్ వరి ఎయెర్బాన్బా పోక్ఎతాన్. సీదొను ప్రాంతమ్ది సారెపాతు ఇని నాటొణి రాండి బోదెలిబానె పోక్తాన్.

27 అయాలెకెండ, ఏలీసా ప్రవక్త కాలమ్దు, ఇస్రాయేలు దేసమ్దు నండ్రెండ్రె పెరికన్టం దాన్ మహార్. గాని వారు ఎయెర్బా నెగెణ్ ఆవెతార్. సిరియ దేసమ్దు మని నయమాన్ ఒరెండ్రె నెగెణ్ ఆతాన్”, ఇజి నాను మిజి వెహ్సిన. ఇజి యేసు వెప్తాన్.

† 4:8 4:8 ద్వితీ 6:13. ‡ 4:10-11 4:10-11 కీర్తన 91:11-12. § 4:12 4:12 ద్వితీ 6:16. \* 4:18-19 4:18-19 యెసయ 61:1-2.

28 యా మాటెజ్ వెహివలె, యూదురి మీటిజ్ ఇండ్రొ మహికార్ విజెరె వెరి కోపం ఆతార్

29 వారు నిహరె, పట్టుమ్దాన్ వన్నిజ్ పేర్తార్. వారు వన్నిజ్ మెటుదు ఒతార్. వరి పట్టుం అయా మెటుద్నె తయార్ కిత మనాద్. గడియ బుర్ర కిజి వన్నిజ్ అర్పైజ్ ఇజి ఒతార్.

30 గాని మంది నడిఃమిజానె, వన్నిసరి వాండ్రు సోహాన్.

**యేసు దెయమ్దిజ్ పేర్జినాన్**

31 వెన్కా వాండ్రు గలిలియతి కపెర్నహుము ఇని పట్టుమ్దు వాతాన్. విస్త్రాంతి దినమ్దు యూదురి మీటిజ్ ఇండ్రొ బస్త్రాండ్రె లోకురిజ్ నేర్పిసి మహాన్.

32 వాండ్రు నెస్పిన్తి మాటెజ్ వెహరె, లోకుర్ నండొ బమ్మ ఆతార్. ఎందనిజ్ ఇహిజ, నండొ అతికారం దాన్ వాండ్రు వెప్తాన్.

33-34 యూదురి మీటిజ్ ఇండ్రొ, ఒరెన్ దెయం అస్తికాన్ మహాన్. వాండ్రు, “నజరెతు వాండ్రు ఆతి యేసువా, మా వెట నిజి ఇని పణి? మజి నాసనం కిదెజ్ వాతిదా? నీను ఎయిదొ ఇజి నాను నెన్ను. నీను దేవుణు బాణిజ్ వాతి నెగ్గి వాండ్రు”, ఇజి డటం గగొల్ ఆజి వెప్తాన్.

35 అందెజె యేసు, “అలెజి మన్అ. వినిజ్ డిసి వెల్లి రఅ”, ఇజి డటం అయా దెయమ్దిజ్ వెప్తాన్. నస్తివలె అయా దెయం, అది అస్తి వన్నిజ్, వరి విజెరె నడిఃమి అర్పైదె వన్నిజ్ ఇని నస్టం కిఎండ డిస్త సోహాద్.

36 అయావలె లోకుర్ విజెరె నండొ బమ్మ ఆతార్. “అబ్బు, యాక ఎసోహి మాట. వీండ్రు దేవుణు సత్తుదాన్, అతికారమ్దాన్ సోన్అ ఇజి దెయమ్కాజ్ వెహినాన్. అవి డిసి సొస్సినె”, ఇజి ఒరెన్దిజ్ ఒరెన్ వర్గితార్.

37 వన్ని వందిజ్ మాటెజ్ అయా ప్రాంతమ్దు విజు సెద్రితె.

**యేసు నండొండారిజ్ నెగెండ కిజినాన్**

38 యేసు యూదురి మీటిజ్ ఇండ్రొణాజ్ నిజితండ్రె, సిమొను వన్ని ఇండ్రొ సోహాన్. అయావలె వన్ని మీమ్సి నండొ నోబు దాన్ మహాద్. దనిజ్ నెగెణ్ కిఅ ఇజి వారు బతిమార్తార్.

39 అందెజె వాండ్రు దని డగ్రు సోహండ్రె, “నోబు సోన్అ”, ఇజి డటం వెప్తాన్. డటం వెప్తాజ్ నోబు దనిజ్ డిస్త సోహాద్. వెటనె అది నిజితాదె, వరిజ్ మర్యాద కితాద్.

40 పొదు అర్పి మహాద్. అయావలె లోకుర్ నండొ రకమ్కాణిజ్ బాద ఆజి మహి వరిజ్ విజెరిజ్ వన్ని డగ్రు తతార్. క్లమ్దాన్ మహి వరి విజెరె మున్ను కికు ఇడ్డి వరిజ్ నెగెణ్ కితాన్.

41 యాకదె ఆవిండ, నండొ దెయమ్కు, నీనె దేవుణు మరిసి, ఇజి గగొల్ ఆజి నండొండారిజ్ డిస్త సోహె. వాండ్రు అలెజి మండ్రు ఇజి వన్కాజ్ డటం వెప్తాన్. వాండ్రు క్రిస్తు ఇజి దెయమ్కు నెస్త మహె. అందెజె వాండ్రు వన్కాజ్ వర్గివిండ కితాన్.

42 పెందాల్నె వాండ్రు సోతాండ్రె బీడిమ్ బూమిదు సోహాన్. లోకుర్ వన్నిజ్ రెబాజి వాతార్. వన్నిజ్ సుడఃతిజ్ వాండ్రు వరిజ్ డిసి సోన్ఎండ, వన్నిజ్ ఆప్ కిదెజ్ సుడఃతార్.

43 గాని వాండ్రు, “నాను మహి పట్టుమ్కాజ్ బా దేవుణు ఏలుబడిః కిని కాలం వందిజ్ సువార్త వెప్తాజ్వలె. దిని వందిజ్ దేవుణు నజి పోక్తాన్”, ఇజి వరిజ్ వెప్తాన్.

44 వెన్కా వాండ్రు యూదయ దేసమ్దు మని యూదురి మీటిజ్ ఇల్కాజ్ బోదిసి మహాన్.

**5**

**యేసు సిసూరిజ్ కూక్సినాన్**

1 ఉండ్రె రోజు, యేసు గనెసరెతు సెరుడగ్రు నిహమహాన్. నండొ లోకుర్ దేవుణు మాటెజ్ వెండ్రెజ్ నెకెఆజి వన్ని మున్ను అర్పి మహార్.

2 నస్తివలె జాలెరిజు సెరు దరిద్ డిస్తి మహి రుండి డోణిజ్ వాండ్రు సుడఃతాన్. అయా జాలెరిజు వరి వల్లెజ్ నోర్జి మహార్.

3 వాండ్రు దని లోఇ ఉండ్రె డోణిద్ ఎక్తాన్. ఆక సిమొనుతి. ఎక్తాండ్రె దరిదాన్ కండెక్ నెక్తు ఇజి వన్నిజ్ వెప్తాన్. వాండ్రు డోణిద్ బస్త్రాండ్రె నండొ లోకాజ్ నెస్పిసి మహాన్.

4 వాండ్రు వెహిన్తి వీజితివలె, సిమోనుజ్, “ఏరు నిరీ మని బాన్ డోణి నడిఃపిన్అ. మొయెజ్ అస్తాజ్ మీ వల్లెజ్ విసీర్తు”, ఇహాన్.

5 అందెజె సిమొను, “ఓ బోదకినికి, రెయు విజు మాపు అరల ఆతాప్. గాని మజి ఇనికబా దోహ్కాతె. అహిజ్బా నీను వెహిన్తి మాట వజి వల్లెజ్ పోక్తాన్”, ఇజి వన్నిజ్ వెప్తాన్.

6 వారు అయాలెకెండ్ కిత్తార్. నండొ మొయెజ్ అస్తార్. పరివల్లెజ్ కింజిని వజ ఆతె.

7 అయావలె వారు వేరి డోణిద్ మని, పరి జత్త కూడఃజి పణికిని పరిజ్, “వాజి మజి తోడుః కిదు”, ఇజి కియు సయ్న కిత్తార్. వారు వాతారె, రుండి డోణిజ్ మొయెజ్ నివ్తార్. డోణిజ్ ముడుగ్గులెకెండ్ ఆతె.

8 సీమోను ఇని పేతురు యాక సుడఃతాండ్రె, యేసు కాల్కు ఎద్రు ముణుకుజ్ ఊరితండ్రె, “ప్రబువా, నజి డిసి సొన్అ, నాను పాపం కితికాన్”, ఇజి వెప్తాన్.

9 ఎందానిజ్ ఇహిజ, వాండ్రుని వన్నివెట మనికార్ విజెరె వారు అస్తి యా మొయెజ్ కొట్టు సుడఃతారె నండొ బమ్మ ఆతారె.

10 అయలెకెండ్నె, సీమోనువెట కూడఃజి పణి కిని యాకోబు ని యోహానుబా బమ్మ ఆతారె. వారు జెబదయి మరిసిర్. అందెజె యేసు, “తియెల్అమా. నిసా కాలం నీను మొయెజ్ అస్తి పణికితి. ఏలు లోకాజ్ నా సిసూర్కిదెజ్ నెన్పిస్సాలె”, ఇజి సిమోనుజ్ వెప్తాన్.

11 వారు పరి డోణిజ్ సెరు ఒడ్డుదు తత్తారె, విజు డిస్తార్. వన్నివెట సొహార్.

**కుస్తురోగం ఆతివన్నిజ్ నెగెండ్ కిజినాన్**

12 యేసు ఉండ్రీ పట్టుమ్దు మహివలె కస్తురోగం\* ఇనిపెరి జబ్బు లావుఆతి ఒరెన్ అబ్బె మహాన్. వాండ్రు యేసుజ్ సుడఃతివెలె ముణుకుజ్ ఊర్జి మాడిస్తాండ్రె, “ప్రబువా, నాను నెగెండ్ ఆదెజ్ ఇజి నిజి మన్ను మహిజ నజి నెగెణ్ కిదెజ్ అట్టి”, ఇజి బతిమాలతాన్.

13 అందెజె యేసు వన్నికియు సాప్పి వన్నిజ్ ముట్టి, “నజి మన్ను మనాద్, నీను నెగెణ్ ఆఅ”, ఇజి వెప్తాన్. వెటనె వన్నిజ్ మహి అయా కస్తురోగం వన్నిజ్ డిస్తాద్.

14 యేసు వన్నిజ్, “ఎయె వెటబా ఇనికబా వెప్మా. గాని నీను తినాజ్ సొన్ని నీ ఒడోల్ పుజెరిజ్ తోరిన్అ. నీను నెగెణ్ ఆతి వందిజ్ మోసె ముజాలె ఆడ్రసితి వజ దేవుణుదిజ్ సంత సిఅ. అహె నీను నెగెణ్ ఆతి ఇజి లోకురిజ్తోరిన్అ”, ఇజి కసితం వెప్తా పోక్తాన్.

15 గాని వన్ని వందిజ్ మాటెజ్ మరి ఒదె, నాహ్కాజ్ విజు సెద్రితె. అందెజె నండొ లోకుర్ వన్నిమాటెజ్ వెండ్రెజ్, పరి కస్తుమ్కాణిజ్ నెగెణ్ ఆదెజ్ ఇజి వన్నిడగ్రు కూడఃజి వాజి మహార్.

16 గాని వాండ్రు, నడిఃమి నడిఃమి పార్దనం కెదెజ్ ఇజి ఎయెర్ సిల్లి బాడిఃదు సొన్ని మనాన్.

**కిక్కు కాల్కు అర్తివన్నిజ్ నెగెండ్ కిజినాన్.**

17 ఉండ్రీ నాండిజ్, యేసు ఉండ్రీ ఇండ్రొబసి బోదిసి మహాన్. గలీలయ, యూద దేసమ్దు మన్ని విజు నాహ్కాణిజ్, యెరూసలెమ్దాన్ వాతి పరిసయ్రుని యూదురి రూలు నెస్పిస్సికార్ అబ్బె బసి వెంజి మహార్. కస్తుమ్దు మన్నిపరిజ్ నెగెణ్ కిదెజ్ దేవుణుసిత్తి సత్తు వన్నివెట మనాద్.

18 నస్తవలె, కిక్కు కాల్కు అర్తి పక్కవాయు ఇని జబ్బుది వన్నిజ్, సెగొండార్ ఉండ్రీ సాపాద్ పిండిత తత్తారె. లొఇబసి యేసు ఎద్రు ఇడదెజ్ నండొ అర్ల ఆజి మహార్.

19 అబ్బె మందలోకుర్ మహిజ్, వన్నిజ్ యేసు డగ్రు ఒతెజ్ అట్ఎతారె. అందెజె వారు వన్నిజ్ ఇల్లు ముస్కు ఒతారె. ఒతారె, రేకం బొరొ కితారె సాపదాన్ మంద నడిఃమి యేసు ఎద్రు డిప్తార్.

20 యేసు వన్నిముస్కు మన్ని పరి నమకం సుడఃతాండ్రె, “కూలాయెన్, నీ పాపమ్కు నాను సెమిస్త మన్ను”, ఇజి వన్నిజ్ వెప్తాన్.

21 అయావలె పరిసయ్రు ని యూదురి రూలుజ్ నెస్పిస్సికార్ పరి లొఇ ఈహు వర్గితారె. “పిండ్రు ఎయెన్? నాను నీ పాపమ్కు సెమిస్త మన్ను ఇజి వెప్పి దేవుణు వెట సమానం ఆజి దేవుణుదిజ్ దూసిస్సాన్. దేవుణు ఒరెండ్రె పాపమ్కు సెమిస్సికాన్ గదె”, ఇజి.

22 వారు ఒడఃబితిక యేసుజ్ తెలితాద్. వాండ్రు పరిజ్, “ఎందనిజ్ మీరు అహు మీ మన్నుదు ఒడఃబిజినిదెర్?

23 యా జబ్బుది వన్నిజ్ నీ పాపమ్కు నాను సెమిస్త మన్ను ఇజి వెప్పిక సులునా? నీను నిజ్జి నడిఃయ ఇజి వెప్పిక సులునా?

24 లోకు మరిసి ఆతి నజి లోకు పాపమ్కు సెమిస్తాజ్ బూమి ముస్కు అతికారం మనాద్ ఇజి మీరు నెస్టెజ్వలె ఇజి వెప్తాండ్రె, అయా కికు కాల్కు అర్తి పక్కవాయు వన్నిజ్, “నాను నిజి వెప్పిన, నిజ్జి సాప అసి ఇండ్రొ సొన్అ”, ఇజి వెప్తాన్.

\* 5:12 5:12 కిక్కుజ్ పాదమ్కాజ్ డెస్కెజ్ తెవ్జి సాని పెరిజబ్బునె ముజాల కుస్తురోగం జబ్బు వాతిబాన్ ముట్టిజ వారు నెన్వర్ ముజాల కుస్తురోగం మన్నికార్ నాటో మండ్రెజ్ అక్కుసిల్లెద్ వారు పట్టుం వెల్లి మండ్రెజ్ వారు సుబ్బరం ఆఇకార్ మటిల ఆతికార్ ఇజినె ఒడిఃబినార్ అందెజె, వారుపుజెరిజ డగ్రు సొన్నినెగెండ్ ఆతారె ఇజి పుజెరిజు వెప్తాజానె నాటో వాదెజ్ ఆనాద్. అయవలె వారు సుబ్బరం అతమనార్ ఇజినె నమకం

25 వెటనె వాండ్రు విజెరె ముజాలె నిజీతండ్రె, వాండ్రు గూర్తి మని సాప నిక్తాండ్రె దేవుణుదిజ్ పొగ్డిజి ఇండ్రొ సాహాన్.

26 వారు విజెరె నండొ బమ్మ అతారె, దేవుణుదిజ్ పొగిడితారె. వారు దేవుణుదిజ్ నండొ తియెల్ ఆజి, “అబ్బ! మాటు నేండ్రు నండొ బమ్మఅతి పణిజ్ సుడతాట్”, ఇజి వెహ్తార్.

**లేవి ఇన్ని ఒరెన్ వన్నిజ్ కూక్చినాన్**

27 యాక కిత్తి వెన్కా, యేసు సోతాండ్రె, లేవి ఇని ఒరెన్ పన్ను పెర్నివన్నిజ్ సుడతాన్. వాండ్రు పన్ను పెర్ని వరి ఆపిసుదు బస్త మహాన్. యేసు వన్నిజ్, “నీను నా సిసూడు ఆఅ. నా వెట రఅ”, ఇజి వెహ్తార్.

28 లేవి విజు డిస్తాండ్రె, నిజ్జి వన్ని వెట సాహాన్.

29 వెనుక లేవి యేసు వందిజ్ వన్ని ఇండ్రొ ఉండ్రె పెరి విందు కితాన్. పన్ను పెర్నికార్ని మరి నండొండార్ వరి వెట ఉండ్రెజ్ బస్తార్.

30 అయావలె పరిసయ్యరు ని వరి జటుద్ మని యూదురి రూలుజ్ నెస్పిస్పికార్ యేసు సిసూరిజ్, “ఎందనిజ్ మీరు పన్నుపెర్నివరివెట, మరి సెఇ వరివెట ఉణిజి తింజినిదెర్”, ఇజి మొరొ ఆతారె.

31 అందెజె యేసు వరిజ్, “నెగెండ సిల్లి వరిజె డాక్టరు కావాలి. నెగెండ మన్నివరిజ్ ఎందనిజ్లు మరి డాక్టరు.

32 నాను పాపం కిజిని వరిజ్ కూక్చి, వరి పాపమకు వారు ఒప్పుకొడిజి డిన్ పిసిని వందిజ్ వాత మన్ను. మాపు నీతినిజాయితి మనికాప్ ఇజి ఒడతాట్ వరిజ్ కూక్తెజ్ రవ”, ఇజి వెహ్తార్.

**ఉపాస్ వందిజ్ యేసుజ్ వెన్ బాజినార్**

33 అయావలె, పరిసయ్యరుని వరి జటుద్ మని యూదురి రూలు నెస్పిస్పికార్ వన్నిజ్, “యోహాను సిసూర్ డిసిడిన్ ఎండ ఉపాస్ కిజి పార్లనం కిజినార్. అయలెకెండెనె పరిసయ్యరు సిసూర్ బా. గాని నీ సిసూర్ ఉణిజి తింజి మంజినార్”, ఇజి వెహ్తార్.

34 అందెజె యేసు, “పెండ్లి దజడః పెండ్లి కాలెజవెట మన్నివెలె వారు ఉపాస్ కిజినారా?

35 పెండ్లి దజడెజ్ వరి నడిమిహాన్ ఒని రోస్కు వానెలె. అయావలె వారు ఉపాస్ అయా రోస్కాజ్ మంజినార్”, ఇజి వెహ్తార్.

36 వాండ్రు వరిజ్ కతవజ ఉండ్రె నెస్పిస్పాన్. “ఎయెన్ బా కొత్త సొక్కదాన్ ఉండ్రె ముక్క కిసి పడాయి దనిజ్ పొక్ ఎన్. అయలెకెండె కితిజ, వాండ్రు కొత్త సొక్క కిన్ పిస్సాన్. కింజితి కొత్త ముక్క పడాయి దనిజ్ తగ్ ఏద్.

37 మరి, ఎయెన్ బా కొత్త ద్రాక్కకల్లు పడాయి తోలు సన్నిదు వాక్ ఏన్. అయలెకెండె వాండ్రు వాక్కి కొత్త ద్రాక్కకల్లు పొజువాజి అయా తోలుసన్ని పెడెల్ నాద్. ద్రాక్కకల్లు విజు వాజ్ న సానాద్. సన్నిపాడానాద్.

38 అందెజె కొత్త ద్రాక్కకల్లు కొత్త తోలు సన్నిదు వాక్తెవెలె.

39 ఎయెన్ బా పడాయి ద్రాక్కకల్లు ఉటివెనుక కొత్తక కోరిఎన్. ఎందనిజ్ ఇహిజ, ‘పడాయిక నెగ్గి’, ఇజి వెహ్తార్”.

**6**

1 ఉండ్రె విస్తాంతి దినమ్దు యేసుని వన్ని సిసూర్ వంట గుడ్డెదాన్ సొన్ని మహార్. అయావలె వన్ని సిసూర్ సెరెక్ తెస్తారె, వరికిదాన్ నులుసి, తింజి మహార్.

2 సస్తివలె సెగెండార్ పరిసయ్యరు, “ఎందనిజ్ మీరు దేవుణు మోసెజ్ సీతి రూలుజ్ తప్పినిపణి విస్తాంతి దినమ్దు కిజినిదెర్?”, ఇజి వెన్ బాతారె.

3 అయావలె యేసు, “దావీదురాజుని వన్నివెట మహికార్, బజ కట్టివెలె, ఇనిక కితాండ్రొ ఇజి మీరు దేవుణుమాటదు ఎసెజ్ బా సద్ విఇతిదెరా?

4 వాండ్రు ఇనిక కితాన్ ఇహిజ, దేవుణుగుడిదు డుగితాండ్రె దేవుణు ఎద్దు ఇడ్డి రొట్టెజ్ లాగితండ్రె తిహాన్. పుజెరిజ్ తప్ప మరి ఎయెర్ బా అయాకెజ్ తిండ్రెజ్ ఆవిద్. గాని వాండ్రు తిహండ్రె వన్నివెట మన్నివరిజ్ బా సిత్తాన్.

5 అందెజె లోకుమరిసి ఆతి నజి విజు వన్కాజ్ ముస్కు అతికారం మనాద్. మరి, విస్తాంతి దినమ్దు ఇనిక కిడెజ్ ఇజి లోకాజ్ వెహ్తెజ్ బా అతికారం మనాద్”, ఇజి వరిజ్ వెహ్తార్.

6 ఉండ్రె నాండిజ్ విస్తాంతి దినమ్దు, యూదురి మీటిజ్ కిని ఇండ్రొ సాహండ్రె, నెస్పిసి మహాన్. అబ్బె ఉణెర్ కియు అర్దికాన్ ఒరెన్ మహాన్.

7 పరిసయ్యరు ని యూదురి రూలుజ్ నెస్పిస్పికార్, యేసుజ్ ఇన్ని దనిజ్ బా నేరం మొప్పెజ్ ఇజి సుడతాట్ మహార్. అందెజె, యేసు యా జబుది వన్నిజ్ విస్తాంతి దినమ్దు నెగెణ్ కినాండ్రొ ఇజి బాగ సుడతాట్ మహార్.

8 అహిజ, యేసు వారు ఒడఁబిజినిక నెస్తాండ్రె, కియు అర్తి వన్నిజ్, “నీను వాజి విజెరె నడిఁమి నిల్అ”, ఇజి వెహ్తాన్. అయావలె వాండ్రు నిజితండ్రె అబ్బెనిహాన్.

9 అయావలె యేసు వరిజ్”, నాను మిజి వెన్బాజిన, దేవుణు మోసెజ్ సీతి రూలుజ్ వజ, విస్త్రాంతి దినమ్దు నెగ్గి పణిజ్ కిదెజా, సెఇ పణిజ్పణి కిదెజా? పాణమ్దిజ్ నిల్పైజా, పాణమ్దిజ్ అర్పైజా?”, ఇజి వెన్బాతాన్.

10 వెన్బాతాండ్రె వరిజ్ విజెరిజ్ బస్తాండ్రె, అయా కియు అర్తి వన్నిజ్, “నీ కియు సప్అ”, ఇజి వెహ్తాన్. వాండ్రు ఆహె కితాన్. వన్ని కియు నెగెణ్ ఆతాద్.

11 అయావలె వారు వెర్రి కోపమ్దాన్ నిండ్రితారె, యేసుజ్ ఇనిక కిదెజ్ ఆనాద్ ఇజి ఒరెన్దిజ్ ఒరెన్ వర్గితార్.

**పన్నెండు మణిసిర్ సిసూర్**

12 ఆ దినమ్కాజ్ ఉండ్రె నాండిజ్ యేసు పార్దనం కిదెజ్ ఇజి గొరొత్ సాహాన్. సాహాండ్రె ఆ రెయ్తూ విజు దేవుణుదిజ్ పార్దనం కితాన్.

13 పెందాల్ ఆతివెలె వాండ్రు వన్ని సిసూర్జ కూక్తాండ్రె, వరిలోఇ పన్నెండు మణిరిజ్ ఏర్పాటు కితాన్. వరిజ్ అపొస్తుడు ఇజి కూక్తాన్.

14-16 వీరు ఎయెర్ ఇహిజ, వేతురు ఇజి వాండ్రు వేరు ఇడ్డిసిమెను, వన్ని తంబెర్చి ఆతి ఆంద్రెయ, యాకోబు, యోహాను, పిలిపు, బర్తలోమాయి, మత్తాయి, తోమా, అల్పాయి మరిసి ఆతి యాకోబు, యూదయ దేసెం వందిజ్ ఉసార్ ఆజిని సిమోను\*, యాకోబుజ్ మరిసి ఆతి యూద, ఇస్కరియెతు యూద. యా ఇస్కరియెతు యుదనె, వెస్కా యేసుజ్ యూదురు అతికారిజ కిదు ఒపజెప్పికాన్.

17 వాండ్రు యా పన్నెండు మణిసిర్ సిసూర్వెట డిఁగిజి వాతండ్రె, ఉండ్రె బయిలుదు నిహాన్. వన్ని సిసూరు నండ్రెండార్, యూదయ దేసమ్దు మని విజు నాహ్కాణికార్, యెరూసలెమ్దాన్, సమ్దరం పడఁకాద్మని తూరు, సీదోను పట్టుమ ప్రాంతమ్కాజ్వాతి నండ్రె లోకుర్ అబె మహార్. వారు వన్ని మాటజ్ వెండ్రెజ్, వరిజ్ మన్ని కస్టమ్కు సాన్వె ఆదెజ్ ఇజి వాతార్.

18 దెయమ్కు అస్తి నండ్రె బాద ఆజి మహికార్ నెగెణ్ ఆతార్.

19 దేవుణు సత్తు వన్నిబాణిజ్ వాజి విజెరె నెగెణ్ ఆజి మహార్. అందెజె లోకు విజెరె వన్నిజ్ ముట్టెజ్ ఇజి ఆస ఆతార్.

20 అయావలె వాండ్రు వన్ని సిసూర్జ సుడఁతాండ్రె, ఈహు వెహ్నినాన్. “బీదదికార్ ఆతి మీరు గొప్ప వారు. ఎందనిజ్ ఇహిజ, దేవుణు మిజి ఏలుబడిః కిజినాన్.

21 ఏలు బజ సాజిని మీరు గొప్ప వారు. ఎందనిజ్ ఇహిజ, దేవుణు మిజి కావాలస్తికెజ్ మీ మన్సు నిండ్రు సీనాన్. యేలు అడఁబాజిని మీరు గొప్ప వారు. ఎందనిజ్ ఇహిజ, మీరు సిక్కిదెర్లె.

22 లోకు మరిసి ఆతి నజి నమ్మితి వందిజ్ లోకుర్ మిజి దూసిసి కేట కినార్. నిందెజ్మొప్పి నీను సెఇక ఇజి వెహ్ని నెక్కు పొక్కార్. అయావలె మీరు గొప్ప వారు.

23 నిన్ని కస్టమ్కు వానివలె సర్ద ఆజి డాట్తు. ఎందనిజ్ ఇహిజ, దేవుణు మంజిని బాడిఁదు మిజి మన్ని పలితమ్కు గొప్ప నండ్రె మనె. యా లెకెండెనె, మిజి బాద కిజిని విరి అనిసిర్, వరి కాలమ్దు మహి ప్రవక్తెజ బాద్ద కితార్.

24 గాని, ఓ అస్తిమనికిదెరా, అబాయా మిజి ఎసా గొప్ప బాదెజ్ వానెలె. ఎందనిజ్ ఇహిజ, మిజి విజు సుకం దొహ్క మనాద్.

25 ఏలు పొట పంజు ఉణిజినికిదెరె, అబాయా మిజి ఎసా గొప్ప బాదెజ్ వానెలె. మీరు బజ సానిదెర్లె. యేలు సిక్కినికిదెరె. అబాయా మిజి ఎసా గొప్ప బాదెజ్ వానెలె. మీరు దుకం కిజి అడఁబానిదెర్లె.

26 లోకు విజెరె మీ వందిజ్ నెగ్గికెజ్ వెహ్ని వెలె, అబాయా మిజి ఎసా గొప్ప బాదెజ్ వానెలె. ఎందనిజ్ అయలెకెండెనె వరి అనిసిర్ అబద్దం వర్గిని ప్రవక్తెజబా కితార్.

**ప్రేమ వందిజ్ వెహ్నినాన్**

27 నా మాటెజ్ వెంజిని మిజి నాను వెహ్నిన, మీ పగాతివరిజ్ ప్రేమిస్తు. మిజి దూసిన్నివరిజ్ నెగ్గికెజ్ కిదు.

28 మిజి సాయెప్ సీని వరిజ్, “దేవుణు మిజి నెగ్గికెజ్ సిపిన్”, ఇజి దీవిస్తు. మిజి బాదెజ్ కిని వరి వందిజ్ పార్దనం కిదు.

29 ఎయెన్బా మిజి ఉండ్రె లెపాద్ డెఁయితిజ, మరి ఉండ్రె లెప బా తోర్తిస్తు. ఎయెన్బా మీరు వ్డఁగితి మని సాల్వ ఒతిజ, వన్నిజ్ మీ సొక్కబా సిఅ.

30 మిజి లొస్సివరిజ్ విజెరిజ్ సీదు. మీ సొంతతిక పెర్జి ఒసిని వరిజ్ ఆక మరి లొస్మాట్.

\* **6:14-16 6:14-16** లోమది ఏలుబడిఁదాన్ యూదయ దేసమ్దిజ్ విడుదల కిదెజ్ ఉసార్దాన్ సుడిఁజిని యూదయ సజం మనాద్. అయాసజమ్దికాన్ ఒరెనె సీమోను

31 లోకుర్ మిజి ఎలాగ కిదెజ్ ఇజ మీరు కోరిజనిదెరో అయాలెకెండ్ మీరు వరిజ్ కిదు.

32 మిజి ప్రేమిస్సివరిజె మీరు ప్రేమిస్తిజ, దేవుణు మిజి ఇనాయం సీనాన్ ఇజ ఒడిబిజినిదెరా? పాపం కినికార్బా వరిజ్ ప్రేమిస్సి వరిజ్ ప్రేమిస్సార్.

33 మిజి నెగ్గికెజ్ కినివరిజె మీరు నెగ్గికెజ్ కితిజ, దేవుణు మిజి ఇనాయం సీనాన్ ఇజ ఒడిబిజినిదెరా? పాపం కినికార్బా ఆహె కిజినార్.

34 అప్పు మర్జి సీనార్ ఇజ నెస్సివరిజె మీరు సితీజ, దేవుణు మిజి ఇనాయం సీనాన్ ఇజ ఒడిబిజినిదెరా? పాపం కినికార్బా ఆహె కిజినార్. వారు సితీకెజ్ విజు మర్జి సీనార్ ఇజ ఒడిబిజి పాపం కిజిని వరిజ్ సీజినార్.

35 గాని మీరు మీ పగ్ ఆతి వరిజ్ ప్రేమిస్తు. వరిజ్ నెగ్గికెజ్ కిదు. మర్జి సీనార్ ఇజ ఆస సిల్లెండ, అప్పు సీదు. అయావలె మిజి నండొ ఇనాయమ్కు ఆనెలె. మీరు విజు దనిజ్ అతికారం మని దేవుణు మరిసిర్ ఆనిదెర్. ఇహిజ, మీరు వాండ్రు కినిలెకెండ్ కినిదెర్. ఎందనిజ్ ఇహిజ, దేవుణు మేలుదిజ్ నెస్ ఇవరిజ్ బా సెఇ పణిజ్ కిని వరిజ్ బా దయ తోరిస్సాన్.

36 మీ బుబ్బు ఆతి దేవుణు ఎలాగ కనికారం ఆతికాండ్రొ అయావజ మీరుబా మండ్రు.

### తీర్పు కిదెజ్ ఆవద్

37 ఒరెన్ వన్ని ముస్సు వెహ్లాట్. అయ లెకెండ్ దేవుణు మీ ముస్సు వెహ్ఎన్. లోకు కిని వన్కాజ్ మీరు తీర్పు కిమాట్. అయాలెకెండ్ మీ ముస్సు దేవుణు తీర్పు కివెన్. లోకుర్ మిజి బాదెజ్ కితిజ, మీరు మర్జి కివెండ వరిజ్ డిస్టు. అయాలెకెండ్ దేవుణు మిజి డిస్సాన్లె.

38 మహి వరిజ్ సీదు. దేవుణు మిజి సీనాన్లె. మిజి నండొ సీనాన్లె. తిగ్జి, కుదిలిసి, వజ్జి సాని లెకెండ్ మీ ఒడిబ్ సీనాన్లె. మీరు కొలిజి సితీవజనె మిజి దోహ్కాద్లె.

39 నస్తివలె వాండ్రు కత వజ యాక నెస్పిస్తాన్. అయాక ఇనిక ఇహిజ, “ఒరెన్ గుడ్డి వన్నిజ్ మరి ఒరెన్ గుడ్డి వాండ్రు సరి తోరిస్టెజ్ అట్నాండ్రా? తోరిస్తిజ, వారు రిఎర్బా గాతదు అర్నార్గదె?

40 సద్దొనికాన్ నెస్పిస్ని వన్నిముస్సు వెరికాన్ ఆవెన్. గాని సదు పూర్తి నెస్తికాన్ ఎయెన్బా వన్నిజ్ నెస్పిస్తి వన్నివజ మంజినాన్.

41 మీ కణకాదు మన్ని తూలం నన్నిక సుడేవిండ మీ తంబెరిజ కణకాద్ మన్ని కాసరాదిజ్ ఎందానిజ్ బేసిని?

42 నీ కణకాదు మన్ని తూలం నన్నిక లాగ్ఎండ, మీ తంబెరిజ్, ‘ఓ తంబెరి నీ కణకాదు మన్ని కసరాదిజ్ లాగ్న’, ఇజి ఎలాగ వెహ్లాజ్ ఆనాద్. వేసం కినికిదెరె, మీ సాంత కణకాదు మన్ని తూలం ననిక ముజాలె లాగ్దు. అయావలె మీ తంబెరిజ కణకాద్ మన్ని ఇజిరి కసరాదిజ్ నెగెండ్ సుడిజి లాగ్దెజ్ అట్టి.

43 నెగ్గి మరాత్ సెఇ పట్టు అస్ఉ. అయాలెకెండ్ సెఇ మరాత్ నెగ్గి పట్టు అస్ఉ.

44 విజు మరెకాజ్ బా పట్టు సుడేజి నెస్తిజ్ ఆనాద్. ఎయెర్బా బొడె: పట్టు సాప్పు తువెజాణిజ్ కొయిఎర్. అయాలెకెండ్ ద్రాక్కు పట్టు బా సాప్పు లటదాన్ కొయిఎర్.

45 నెగ్గి మన్ను మన్నివన్నిజ్ కూలిజ్ కొట్టు కిత్తి మన్నిలెకెండ్ వన్ని మన్నుదు నెగ్గికెజె మంజినె. అందెజె వన్ని వెయుదాన్ నెగ్గి మాటెజ్ వానె. సెఇ మన్ను మన్నివన్నిజ్ సెఇకెజె మంజినె. అందెజె వన్ని వెయుదాన్ సెఇ మాటెజ్ వానె.

46 నాను వెహ్లా మాటెజ్ వజ మీరు కివెండ మరి మీరు ఎందనిజ్ ప్రబువా, ప్రబువా ఇజి నజి కూక్కినిదెర్?

47 నా డగ్రువాజి నా మాటెజ్ వెంజి అయావజ కినికాన్ ఎయెరిజ్ పోలిత మనాండ్రొ ఇజి నాను నెస్పిస్ని.

48 వాండ్రు పునాది నిరీడ్ కార్సి సట్టుముస్సు పునాది కితాండ్రె ఇల్లు తోహ్ని వన్ని లెకెండ్ మనాన్. పెరి గడ్డ వాతాద్. ఇల్లుదిజ్ పెరి గడ్డ డెయితిజ్ బా అది అర్ఎతాద్. ఎందనిజ్ ఇహిజ, అది నెగ్గెండ తోహ్ ఆత మనాద్.

49 గాని నా మాటెజ్ వెంజిబా అయావజ కిఇకాన్, బూమి ముస్సు పునాది పొక్ఎండ ఇల్లు తోహ్ని వన్ని లెకెండ్ మనాన్. పెరిగడ్డ డెయితిజ్ సణమె అయా ఇల్లు అర్తాద్. ఇల్లు పూర్తి పాడా:తాద్.

## 7

1 వాండ్రు వెహ్లాజ్ మన్నిమాటెజ్ విజు లోకురిజ్ వెన్పిసి వీస్తాండ్రె, కపెర్నూము ఇన్ని పట్టుమీదు వాతాన్.

2 అబ్బె రోమ సయినమ్దిజ్ సదాతిపతి\* ఒరెన్ మహాన్. అతికారిజ్ నండొ ఇస్టం ఆతి ఒరెన్ వెట్టిపణి కినికాన్ వన్నిజ్ మహాన్. వాండ్రు జబు లావు ఆతాదె సాదెజ్ డగ్రు ఆత మహాన్.

3 అయా అతికారి యేసు వందిజ్ వెహ్ండ్రె, సెగెండార్ యూదుర్ పెద్దెల్జ వన్ని డగ్రు పోక్కార్. ఎందనిజ్ ఇహిజ, వాండ్రు వాజి వన్ని వెటి పణి కిని వన్నిజ్ నెగెణ్ కిదెజ్ ఇజి.

\* 7:2 7:2 వంద విధెం కినివరిజ్ నడిపిసికాన్.

4-5 వారు వన్ని డగ్రు వాతారె, “యా అతికారి మా లోకాజ్ నండో ప్రేమిస్తాండ్రె మజీ మీటిజ్ కిదెజ్ ఇజి ఇల్లు తోహిస్త సితాన్. అందెజె నీను వాజి వన్ని వెటి పణిమణిసిజ్ నెగెణ్ కిదెజ్ వాండ్రు తగ్గికాన్”, ఇజి మరి మరి బతిమాల్తార.

6 అందెజె యేసు వరివెట సాహాన్. వాండ్రు ఇల్లు డగ్రు వాతాన్. అయావలె సతాదిప కూలెజ, “మీరు యేసు బాన్ సాన్ని ఈహు వెప్తు, “ప్రబువా, నీను వందమా. నా ఇండ్రో నీను వాదెజ్ నాను ఏపటితికాన్ ఆవ.

7 గాని నెగెణ్ ఆల ఇన్ని నీ మాటదాన్ నా వెట్టిపణి మణిసి నెగెండ ఆనాన్లె, ఇజి నాను నెసిన.

8 ఎందానిజ్ ఇహిజ, నా ముస్కు అతికారం మనికార్ మనార్. నా అడిగి ఉద్దం కినికార్ మనార్. నాను ఒరెన్ వన్నిజ్ సాన్ల ఇహిజ సానాన్. మరి ఒరెన్ వన్నిజ్ రల ఇహిజ, వానాన్. నా పణిమణిసిజ్ యాక కితి ఇహిజ కినాన్”, ఇజి వెప్తుండ్రె పోక్తాన్.

9 యేసు యా మాటెజ్ వెహండ్రె, వన్ని వందిజ్ బమ్మ ఆతాన్. వాండ్రు వన్ని వెట వాతిమన్ని లోకుదరిజ్ మప్తుండ్రె, “అబ్బ, ఇస్తాయేలు లోకుర్ లోఇబా విన్నిజ్ మన్ని నమకం లెకెండ, నమకం మని ఒరెన్ వన్నిజ్ బా నాను సుడెఁత ఇజి మీ వెట నాను వెహిన్”, ఇజి వెప్తున్.

10 వన్నిబాన్ వాతివరిజ్ యేసు మప్తు పోక్తాన్. వారు ఇండ్రో సాహారె, నెగెణ్ అతి వెటిపణి మణిసిజ్ సుడెఁతార.

**సాతి వన్నిజ్ బత్కిస్నాన్**

11 యాక కితి వెన్కా, యేసు నాయి ఇని పట్టుమదు సాన్ని మహాన్. వన్ని సిసూర్ని మంద లోకు వన్నివెట కూడెజి సాన్ని మహార్.

12 వాండ్రు పట్టుం వెల్గు డగ్రు వాతివెలె సాతికాన్ ఒరెన్ వన్నిజ్ సోప్తారె, నెగెండార్ పిండిజి ఒసి మహార్. సాతికాన్ అయ్సిజ్ ఒరెండ్రె మరిసి. అది ముండ బోదెలి. పట్టుమది మంద లోకుర్ దన్నివెట మహార్.

13 ప్రబు ముండ బోదెల్దిజ్ సుడెఁతివెలె, వన్ని పాణం నోతాద్. అడెబామా, ఇజి దన్నిజ్ వెప్తున్.

14 వాండ్రు డగ్రు వాతండ్రె, జజుద్ ముట్టిజ్, పిండిజి ఒసి మహికార్ నిహార్. యేసు సాతి వన్నిజ్, “ఓ దజడః, నాను నిజి వెహిన్, నిజ్ల ఇజి”, ఇజి వెప్తున్.

15 అయావలె సాతికాన్ నిజ్జి బస్తాండ్రె, వర్దిజ్ మొదొల్స్తాన్. యేసు, వన్నిజ్ అయ్సిజ్ ఒపజెప్తాన్.

16 వారు విజెరె బమ్మ ఆజి తియెల్ ఆతార. “ఒరెన్ పెరి ప్రవక్త మా నడిఁమి వాతాన్. వన్ని లోకురిజ్ సాయం కిదెజ్ దేవుణు వాతాన్”, ఇజి వెప్తురె దేవుణుదిజ్ పొగిడిఁతార.

17 యేసు వందిజ్ యా మాటెజ్ యూదయ దేసెం ని డగ్రు మని ప్రాంతమకాజ్ విజు సెద్రితె.

**యేసుని యోహాను సిసూరు వర్దిజినార్.**

18-19 బాప్తినం సీని యోహానుజ్ సిసూర్ యా జర్దితి పణిజి వందిజ్ యోహానుజ్ వెప్తుర్. నస్తవలె వాండ్రు వరి లోఇహాన్ రిఎర్ సిసూర్జ కూక్తాండ్రె, “వానికి నీనెనా? సిలిజ, మాపు మరి ఒరెన్ వందిజ్ ఎద్రు సుడెఁదెజా?”, ఇజి ప్రబుజ్ వెన్బాదెజ్ యేసుడగ్రు పోక్తాన్.

20 వారు యేసుడగ్రు వాతారె, “నీనెనా వాజినికి? సిలిజ మాపు మరి ఒరెన్ వన్నిజ్ ఎద్రు సుడెఁదెజా? ఇజి వెన్బాదెజ్ బాప్తినం సీని యోహాను మజి నీ డగ్రు పోక్తాన్”, ఇహార్.

21 అయావలెనె, యేసు జబ్బుదివరిజ్ బాదదాన్ మన్ని వరిజ్, దెయమ్కు అస్తి వరిజ్ నండొండారిజ్ నెగెణ్ కితాన్. నండొ గుడ్డిది వరిజ్ సూణిలెకెండ కిత్తాన్.

22 అందెజె వాండ్రు వన్నిడగ్రు వాతివరిజ్, “గుడ్డిదికార్ సుడెఁ ఆజినార్. సాటదికార్ నడిఁజినార్. కస్తమ్దికార్ ఇని పెరిజబ్బు మన్నికార్ నెగెణ్ ఆజినార్. బొయిరదికార్ వెంజినార్. సాతికార్ నికెఆజినార్. బీదాతివరిజ్ సువార్త వెహెఅజినాద్. ఇజి యాలెకెండ మీరు సుడెఁతికెజ్, వెంజినికెజ్ మర్ది సాన్ని యోహానుజ్ వెప్తు.

23 నా ముస్కు నమకం డిన్ఎండ మంజినికాన్ దేవుణు సీని దీవనమ్కు మంజినికాన్ ఆనాలె”, ఇజి వరిజ్ వెప్తున్.

24 యోహాను సిసూర్ సాహి వెనుక, యేసు యోహాను వందిజ్ మంద లోకు వెట ఈహు వెప్తుజ్ మొదొల్స్తాన్. “ఇనిక సుడెఁదెజ్ మీరు బీడిమ్బూమి ప్రాంతమదు సాహిదెర్? గాలిదిజ్ కర్దిజిని గడ్డిదిజ్ సుడెఁదెజా?

25 సిల్లిజ, మరి ఇనిక సుడెఁదెజ్ సాహిదెర్? మెతాని సాక్కాజ్ తొడిగితి మని ఒరెన్ వన్నిజ్ సుడెఁదెజా? సిల్లె, నండొ దర మన్ని సాక్కాజ్ తొడిగిజి, సుకం బత్కినికార్ రాజురి ఇల్కాజ్ మంజినార్.

26 అహిజ, మీరు ఇనిక సుడెఁదెజ్ సాహిదెర్? ఒరెన్ ప్రవక్తనా? ఒబ, ఒరెన్ ప్రవక్త ముస్కు పెరివన్నిజ్ సుడెఁదెజ్ సాహిదెర్ ఇజి నాను మిజి వెహిన్

27 విన్నివందిజ్ దేవుణు మాటదు ఈహు రాస్త మనాద్, “ఇదిలో, నాను నా కబ్బుతనివన్నిజ్ నీ ముజాల పొక్కిన వాండ్రు నీ ముజాల నీ సరి నెగెజ్ కినాన్†”.

28 బోదెకాజ్ పుట్టి వరిలో ఇ యోహాను ఇంక పెరికాన్ మరి ఎయెన్ బా సిలెన్. గాని దేవుణు ఏలుబడిః కిని లోకుర్ లో ఇ తగిసి కొటికాన్ యోహాను ముస్సు పెరికాన్ ఇజి నాను మిజి వెప్పిన”.

29 యేసు వెప్టాకెజ్ వెహారె లోకుర్ విజెరె పన్ను పెర్నికార్ బా దేవుణు కిజినిక విజు నాయమ్ దానె కిజినాన్ ఇజి లోకుర్ ఎర్దు ఒప్పుకొటార్. ఎందనిజ్ ఇహిజ, వారు యోహాను బాణిజ్ బాప్తినం లాగె ఆత మహార్.

30 గాని పరిసయ్యరుని యూదురి రూలు నెస్పిస్సికార్ యోహాను సీని బాప్తినం లాగె ఆవతార్. వారు వరి వందిజ్ దేవుణు ఎతు కితి సజతి నెక్త పొక్టార్.

31 యా తరమ్ది లోకాజ్ నాను ఇన్ని దని దనటాన్ పోల్సి వెప్టాజ్? వారు ఇని దనిజ్ పోలిత మనార్?

32 వారు, సతాదు బసి మంజి పెండ్లి ఇండ్రో ని సాతి ఇండ్రో జర్గిజిని దని వందిజ్ ఎత్తు కిజి కర్జిజిని కొడోరిజ్ పోలిత మనాద్. అయా కొడోరిః ఒరెన్ దిజ్ ఒరెన్ కూకె ఆజి ఈహు కర్జిజినార్. “మాపు పిరుడిః ఊహ్ క్వాప్ గాని మీరు కర్జిఇతిదెర్. మాపు సాతి ఇండ్రోణి పాటెజ్ పార్టాప్ గాని మీరు అడఃబాఇతిదెర్”.

33 ఎందనిజ్ ఇహిజ, బాప్తినం సీని యోహాను మాముల్ బోజనం ఉణిజి, ద్రాక్కు కడు ఉణెఎండ వాతాన్. అందెజె మీరు, “వినిజ్ దెయం అస్తాద్”, ఇజి వెప్పినిదెర్.

34 లోకు మరిసిఆతి నాను ఉణిజి తింజి వాజినాన్. అందెజె మీరు ఇదిలో వీండ్రు టిండి కకుర్ తికాన్, సోస్సికాన్, పన్ను పెర్నివరిజ్ పాపం కినివరిజ్ కూలాయెన్ ఇజి వెప్పినిదెర్.

35 గాని దేవుణు బాణిజ్ వాతి గెణం మనికార్ అయా గెణం నిజమాతిక ఇజి వరి విజు నెగ్గి పణిజాణిజ్ రుజుప్ కిజినార్.

**పాపం కితి బోదెల్ దిజ్ సెమిసినాన్**

36 పరిసయ్యరు లో ఇ ఒరెన్ వన్నివెట బోజనం కిదెజ్ యేసుజ్ కూక్టాన్. అందెజె యేసు పరిసయ్యరు ఇండ్రో సాహండ్రె, వన్ని వెట బోజెనమ్ దిజ్ బస్త మహాన్.

37 ఆ నాటో పాపం కిజి మహి ఉండ్రె బోదెలి మహాద్. యేసు పరిసయ్యరు ఇండ్రో బోజెనమ్ దిజ్ బస్త మహాన్ ఇజి నెస్తాదె, నూనాజ్ పణుకుదాన్ ‡ తయార్ కితి ఉండ్రె సీసాదు నెగ్గి వాసనం సీని నూనె తత్తాద్.

38 యేసు, కాల్కు వెన్కా మువ్తాండ్రె బస్త మహాన్ కాక అది వెనక వన్ని పాదమ్ క డగ్గు నిహాద్. నిహాదె అడఃబాజి మహాద్. అది దన్ని కణెర్ దాన్ వన్ని పాదమ్ కాజ్ ఊత్తాదె దని కొపుదాన్ తెల్తాద్. వన్ని పాదమ్ కాజ్ ముదు కితాదె వాసనం సీని జటమామ్ సీ నూనె రాస్తాద్.

39 వన్నిజ్ కూక్తి పరీసయ్య వాండ్రు యాక సుడఃతాండ్రె, వీండ్రు నిజం ఇక ఒరెన్ ప్రవక్త ఇహిజ, వినిజ్ ముట్టి బోదెలి ఎయిదో ఎలాగ మర్తికాదో ఇజి నెస్తాన్ మరి. ఎందనిజ్ ఇహిజ, ఇది పాపం కినికాద్, ఇజి మన్నుదు ఒడిఃబితాన్.

40 అందెజె యేసు, “ఓ సిమోను నీవెట ఉండ్రె మాట వెప్టాజ్ మనాద్”, ఇజి వన్ని వెట వెప్టాజ్, “బోదకినికి వెహాఅ”, ఇహాన్.

41 అయావలె యేసు”, ఒరెన్ అప్పు సీతి వన్నిజ్ రిఎర్ అప్పు లోస్తికార్ మహార్. వరి లో ఇ ఒరెన్ అయ్దు వందెజ్ వెండి రుపాయిజు మరి ఒరెన్ యాబయి వెండి రుపాయిజు సీదెజ్ మనాద్.

42 అప్పు తిర్ సైజ్ వరిజ్ డబ్బు సిల్లెద్. అందెజె వరిజ్ రిఎరిజ్ బా డబ్బు లోన్ ఎండ డిఃస్తాన్. ఏలు, విరి లో ఇ ఎయెన్ వన్నిజ్ నండో ప్రేమిస్తాన్? ఇజి వెన్ బాతాన్.

43 అందెజె సిమోను, “వాండ్రు ఎయెరిజ్ నండో సితండ్రె, లోన్ ఎండ డిఃస్త సితాండ్రె వాండ్రె నండో ప్రేమిస్తాన్, ఇజి నాను ఒడిఃబిజిన”, ఇహాన్. అందెజె యేసు, “నీను నెగెండ ఎత్తు కితిదె వెప్టా”, ఇహాన్.

44 ఇహండ్రె, ఆ బోదెల్ దరొట్ సుడఃజి సిమోనుజ్ ఈహు వెప్టాన్. “యా బోదెల్ దిజ్ నీను సుడఃజిని గదె. నాను నీ ఇండ్రో వాత. నీను నా పాదమ్ కు ఊర్ పాదెజ్ ఏరు సిఇతి. గాని ఇది దని కణెర్ దాన్ నా పాదమ్ కు ఊత్తాదె, దని కొపుదాన్ తేలితాద్.

45 నీను నజి ముదు కిజి డగ్గు కిఇతి. గాని ఇది నాను వాతి బాణిజ్ అసి నా పాదమ్ కు ముదు కిజినె మనాద్.

46 నీను నా బురాదు నూనె రాస్ ఇతి. గాని ఇది నా పాదమ్ కాజ్ వాసనం సీని నూనె రాస్తాద్.

47 అది నండో ప్రేమిస్తాద్. అందెజె దని నండో పాపమ్ కు దేవుణు సెమిస్తాన్, ఇజి నాను నీ వెట వెప్పిన. ఎయెరిజ్ దేవుణు తక్కు సెమిస్త మనాండ్రె, వాండ్రు తక్కునె ప్రేమిస్తాన్”.

48 మరి యేసుదనిజ్, “దేవుణు నీ పాపమ్ కు సెమిస్త మనాన్”, ఇజి వెప్టాన్.

† 7:27 7:27 మలాకి 3:1. ‡ 7:37 7:37 యా నూనాజ్ పణుకు పేరు అలబాష్టరు ఇజి యా పణుకు నండో కరీదితిక తెల్లాజ్ మంజినాద్ యాక గిసి లోకుర్ పుసెజ్ తయార్ కిజినార్.



49 వన్ని వెట ఉండెజ్ బస్త మహికార్, “పాపమ్కు సెమిస్త మన్న ఇజి వెహైజ్ వీంత్రు ఎయెన్?”, ఇజి ఒరెన్దిజ్ ఒరెన్ వర్గిజి మహార్.

50 అందెజె యేసు, “నీను నా ముస్కు నమకం ఇడ్డి. అందెజె నీ పాపమ్కాణిజ్ దేవుణు రక్సిస్తాన్ ఇజి ఆ బోదెల్దిజ్ వెహైన్.

## 8

### యేసు విత్తు వందిజ్ వెహ్నిని కత

1 సెగం రోస్కు సాహి వెనుక, యేసు, దేవుణు కిని ఏలుబడి: వందిజ్ సువార్త పట్టుమ్కాజ్ నాహ్కాజ్ బోదిసి వెహ్ని వాజి మహాన్.

2-3 పన్నెండు మణిసి సిసూరు వన్ని వెట మహార్. దెయం బాణిజ్, కస్తమ్కాణిజ్ నెగెణ్ ఆతి సెగొండెక్ బోదెక్బా వన్ని వెట మహా. వన్కా లోఇ ఏడు దెయమ్కాణిజ్ యేసు డిసేపిస్తి మగ్దలనె ఇని మరియ, హెరోద్ ఇండ్రో ఏజమాని పణి కిజి మహి కూజ ఇని వన్ని ఆల్ని యోహాన, సుననయ, మరి నండో బోదెక్బా మహా. వన్కాజ్ కల్లితి మన్ని లోఇ అవికు, యేసువన్ని సిసూర్ వందిజ్ కర్పు కిజి మహార్.

4 విజు పట్టుమ్కాణిజ్ లోకుర్ యేసుడగ్రు వాజి మంద ఆతివెలె, వాండ్రు ఉండ్రి కత వజ ఈహు నెస్పిస్తాన్.

5 “ఒరెన్ రయేతు వాండ్రు విత్తు వితెజ్ సాహాన్. వాండ్రు విత్తు విత్తి మహిజ్ సెగం సరి పడెకాద్ అర్తె. అర్తి విత్కాజ్ మట్టి సొన్ని మహార్. ఆగాసమ్ది పొటిజ్బా వాతెనె పెహ్తా తిహా.

6 మరి సెగం సటు ముస్కు మన్ని డులిదు అర్తె. నేరితె గాని తడి: సిల్లెండ ఆతిజ్ సాతె.

7 మరి సెగం సాప్పు తపుజ్ నడి:మి అర్తె. సాప్పు తుపెజ్వెట పిరితె గాని వన్కాజ్ తిగితె.

8 మరి సెగం నెగ్గి బూమిదు అర్తె. ఆకెజ్ పిరితెనె పంట నెగెండ పండితాద్. నండో జణి ఆతాద్. విత్తి విత్తుదిజ్వంత పంతుజ్లెకెండ ఆతె. యేసు యా మాటెజ్ వెహ్ని, ‘రుండి గిబిజాణిజ్ వెంజి అయావజ నడి:దు’ ”, ఇజి వెహ్తాన్.

9 వెనుక వన్నిసిసూర్ యా కతవజ నెస్పిస్తి దనిజ్ అర్దం ఇనిక ఇజి వెన్బాతార్.

10 వెన్బాతిజ్ వాండ్రు, “దేవుణు కిని ఏలుబడి: వందిజ్ డాజితి మహి సజతిజ్ దేవుణు మిజి తెలివి కిత మనాన్. గాని మహికార్ దేవుణు మాటదు వెహ్తి లెకెండ, ‘సుడె:జినార్ గాని తోవెర్, వెంజినార్ గాని అర్దం కివో\*’. అందెజె వరిజ్ కతవజ నాను నెస్పిస్తి.

11 యా కతవజ నెస్పిస్తి దనిజ్ అర్దం ఇనిక ఇహిజ, విత్తు ఇహిజ దేవుణు మాట.

12 విత్తు అర్తిసరి పడెకాద్ పొలితికార్ ఎయెర్ ఇహిజ, దేవుణు మాట వెనికార్. గాని వారు దేవుణుదిజ్ నమిజి, వాండ్రు వరిజ్ రక్సిన్ఎండ మంజిని వందిజ్ సయేతాను వాజి వరి మన్నుదు మన్ని దేవుణు మాట పెర్డి ఒనాన్.

13 విత్తు అర్తి సట్టుముస్కు మని డుల్లిదిజ్ పొలితికార్ ఎయెర్ ఇహిజ, దేవుణు మాట వెనివెలె సర్దదాన్ మన్నుదు ఇడ్డికార్. గాని వెల్ల లోఇ సొని లెకెండ దేవుణు మాట వరి మన్ను లోఇ సొన్ఎద్. వారు సెగం కాలం నమినార్ గాని కస్తం వానివలె డి:సాన్.

14 విత్తు అర్తి సాప్పు తపుజ్ నడి:మి పొలితికార్ ఎయెర్ ఇహిజ, దేవుణు మాట వెంజి నమకం బా ఇడ్నార్. గాని వారు ఆహె బత్తిజి సొనివలె బత్తువందిజ్ మన్ని విసారం, సంసారం, సుకం వందిజ్ ఒడె:బినార్. యాకెజ్ వరి నమకం తిగ్జి పొక్కినె. వరి బత్తుదాన్ ఇన్ని లాబంబా సిల్లెద్.

15 విత్తు అర్తి నెగ్గి బూమిదిజ్ పొలితికార్ ఎయెర్ ఇహిజ, దేవుణు మాట వెనికార్. వారు వరిజ్ తగ్గి నెగ్గి మన్నుదు దేవుణు మాట ఇడ్నార్. కస్తమ్కు వాతిజ, వారు అయాకెజ్ ఒరిసి నమకమ్దాన్ పిరినార్.

### దీవ వందిజ్ వెహ్నినాన్.

16 ఎయెన్బా దీవ కసిసి వెన్కా తబల మూక్కినొ, మంసం అడ్డినొ ఇడ్ఎన్. గాని లోఇ వానివరిజ్ జాయి తోరెదెజ్ ఇజి దీవ కంతూదునె ఇడ్నార్.

17 డా:జితిక ఇనికబా వెల్లి ఆనాద్. ముస్తిక ఇనికబా తోరెఆజి వెల్లితనె.

18 అందెజె మీరు వెంజినికెజ్ అర్దం కిజి మండ్రు. ఎందనిజ్ ఇహిజ, నా బాణిజ్వెంజి అర్దం కిజిని వన్నిజ్ దేవుణు మరి తెలివి కినాన్. గాని వెంజి అర్దం కిఇవన్నిజ్వాండ్రు అర్దం కిత మన ఇజి ఒడె:బితికెజ్బా లాగ్నాన్.

19 నస్తివలె యేసు అయ్సిని తంబెరసిర్ వన్నిజ్ సుడె:దెజ్ వాతార్. గాని లోకుర్ నండో మహిజ్ వన్ని డగ్రు సొండ్రెజ్ అట్ఎతార్.

\* 8:10 8:10 యెసయ 6:9.

20 అయావలె ఒరెన్, “నీ యాయ ని తంబెరిబు నిజి సుడేదెజ్ కోరిజి వెల్లి నిహ మనార్”, ఇజి వన్నిజ్ వెహ్లాన్.

21 వెహ్లాజ్ యేసు, “దేవుణు మాటేజ్ వెంజి అయావజ నడినికారె నా యాయ నా తంబెరిబు”, ఇజి వెహ్లాన్.

**యేసు పెరిగాలి తుపాన్దిజ్ ఆవ్కిజినాన్**

22 నస్తివలె ఉండ్రి నాండిజ్ యేసు వన్నిసినూర్జ, “గనెసరెతు ఇన్నిసెరు అతాహ పడక సానాట్”, ఇజి వెహ్లాన్. అందెజె వారు ఉండ్రి డోణిదు ఎక్తారె సాహార్.

23 వారు సొన్ని మహిజ్, యేసు నిద్ర కితాన్. అయావలె పెరి గాలి తుపాన్సెర్దు ముస్కు వాతాదె, డోణిదు ఏరు నిండ్రిజినాద్. వారు పెరి ప్రమాదమ్దు మనార్.

24 అయావలె సినూరు వన్ని డగ్రు సాహారె, “ప్రబువా, ప్రబువా మాపు సానా సానాట్”, ఇజి వన్నిజ్ నిక్టార్. వాండ్రు నిజితండ్రె పెరిగాలి ఉల్లాలుబుదిజ్, “పలక్ ఆదు”, ఇజి డటం వెహ్లాన్. పెరిగాలి అణస్తాద్. విజు అలెతె.

25 అయావలె వాండ్రు, “ఎందనిజ్ మిజి నా ముస్కు నమకం సిల్లెద్?”, ఇజి వరిజ్ వెన్బాతాన్. వారు బమ్మఅజి తియెల్దాన్, “వీండ్రు గాలిదిజ్ ఏరుదిజ్ అణస్తు ఇజి ఆడ్ర వెహ్లాజ్ అవి లోజిజినె. వీండ్రు ఎయెండ్రో”, ఇజి ఒరెన్వెట ఒరెన్ వర్గితార్.

**దెయమ్కు అస్తివన్నిజ్ నెగెండ్ కిజినాన్.**

26 వారు గరసినయ ఇని లోకురి ప్రాంతమ్దు వాతార్. అయా ప్రాంతం గలిలయ ప్రాంతమ్దిజ్ ఎద్రు మనాద్.

27 వాండ్రు సెరుగటుద్ డిగితివెలె, ఆ పట్టుమ్దికాన్ ఒరెన్ యేసుడగ్రు వాతాన్. వాండ్రు దెయమ్కు అస్తికాన్. నండో కాలమ్కాణిజ్ సొక్కెజ్ తోడిగిఎండ, ఇండ్రో మన్ఎండ, దూకిజాజ్† మహాన్.

28 వాండ్రు యేసుజ్ సుడేతాండ్రె డటం డేల్ని వన్ని పాదమ్క ఎద్రు ముణుకుజ్ ఊరితాన్. ఊరితండ్రె, “విజు దనిజ్ అతికారం మన్ని దేవుణు మరిసి ఆతి యేసు, నా వెట నిజి ఇన్ని పణి, నజి బాద కిమ ఇజి నిజి బతిమాల్జిన”, ఇజి డేల్ని వెహ్లాన్.

29 ఎందానిజ్ ఇహిజ, యేసు, వినిజ్ డిసి వెల్లి సాన్అ ఇజి ఆ దెయమ్దిజ్ ఆడ్ర సిత మహాన్. అది వన్నిజ్ నండో సుట్టు అసి మహాద్. అందెజె వన్నిజ్ గొలుస్కాణిజ్ కాల్యాజ్ కికాజ్ తోహి కాప్ కిని వరిజ్ ఇట్టాద్. గాని వాండ్రు గొలుస్కాజ్ తెప్పి, దెయమ్కు వన్నిజ్ బీడిమ్బూమిదు ఉలుప్పి మహా.

30 యేసు వన్నిజ్, “నీ పేరు ఇనిక?”, ఇజి వెన్బాతాన్. నండో దెయమ్కు వన్ని లోఇ మహిజ్ వాండ్రు, “సేన”, ఇజి వెహ్లాన్.

31 మజి దర్లిదు పోక్మా ఇజి మరి మరి బతిమాల్తె.

32 నస్తివలె నండో పండ్రిజ్ మంద గొరొణ్ సెల్కాదు మెయిజి మహా. అందెజె వన్కా లోఇ సాండ్రెజ్ మజి సెల్వ సిదా”, ఇజి వన్నిజ్ బతిమాల్తె. అందెజె వాండ్రు సెల్వ సితాన్.

33 అయావలె దెయమ్కు వన్నిజ్ డిసైనె పండ్రిజి లోఇ సాహా. ఆ పండ్రిజ్ మంద గొరొణ్దాన్ ఉహ్కీ వాజి సెర్దు అర్తెనె సాతె.

34 పండ్రిజ్మేప్పి మహికార్ జర్గితి దనిజ్ సుడేతారె ఉహ్కీ సొన్ని ఆ పట్టుమ్ది వరిజ్, పట్టుమ్ది వల్సెజ మని వరిజ్ జర్గితికెజ్ వెహ్లాన్.

35 లోకుర్ యా జర్గితికెజ్ సుడేదెజ్ సాహార్. వారు యేసు డగ్రు వాతిజ్ దెయమ్కు డిస్తి సాహికాన్ సొక్కెజ్ తోడిగిజి నెగ్గి బుద్దిదాన్ యేసు పాదమ్క అడిగి బస్తి మహి సుడేతారె. సుడేతారె తియెల్ ఆతారె.

36 యాక సుడేతికార్ దెయం అస్తికాన్ ఎలాగ నెగెణ్ ఆతాన్ ఇజి మరి లోకురిజ్ వెహ్లాన్.

37-38 అయావలె గరసినయ లోకురి ప్రాంతమ్దు మన్ని లోకుర్ విజెరె, నండో తియెల్ ఆతారె. అందెజె, “మజి డిసి సాన్అ”, ఇజి యేసుజ్ వెహ్లాన్. అందెజె యేసు డోణి ఎక్తారె మరజి సొన్ని మహిజ్, దెయమ్కు డిస్తి సాహికాన్, “నాను బా నీ వెట వానా”, ఇజి బతిమాల్తాన్.

39 గాని యేసు, “నీను మరజి ఇండ్రో సాన్అ. దేవుణు నీ వందిజ్ కిత్తి గొప్ప పణి విజు వెహ్అ”, ఇజి వెహ్లాండ్రె పోక్టాన్. వాండ్రు సాహండ్రె యేసు వన్నివందిజ్ కిత్తి గొప్ప పణి పట్నం విజు వెహ్లాన్.

**యేసు సాతి అయిలిజ్ నిక్సినాన్, జబ్బుఅతి మహిబోదెల్దిజ్ నెగెణ్ కిజినాన్**

40 యేసు మరజి వాతివెలె, నండో లోకుర్ వన్నిజ్ ఎద్రు సుడేజి మహాన్. అందెజె వారు వన్నిజ్ డగ్రు కిత్రార్.

† 8:27 8:27 అయ కాలమ్దు మొడః సట్టు పణుకుదు దొలుస్తి సాలమ్దు ఇడేజి పెరి పణుకయదాన్ మూక్కి మహాన్.

41-42 నస్తవలె, యూదురి మీటిజ్ ఇండ్రోణి అతికారి యాయిరు ఇనికాన్ యేసు పాదం ముస్కు అర్తాండ్రె, “నజీ ఒరెదె గాలు. అది సాదెజ్ డగ్రు ఆత మనాద్. దనిజ్ డగ్రు పనెండు పంటెజ్. అందెజె నీను నా ఇండ్రో రఅ”, ఇజి బతిమాల్తాన్. వాండ్రు సొన్ని మహిజ్ నండొ లోకుర్ వన్ని ముస్కు నెకె ఆజి అర్ని మహార్.

43 అయావలె ఉండ్రె బోదెలి పనెండు పంటెజాణిజ్ వెల్లి ఆని జబుదాన్ బాద ఆజి మహాద్. ఎయెర్బా దనిజ్ నెగెణ్ కిదెజ్ అట్ఎతార్.

44 యేసు వెస్కాజ్ వాతాదె, వాండ్రు తొడిఃగితిమన్ని వన్నినిరి సొక్కది సెంగుదిజ్ ముట్టాద్. ముట్టి వెటనె దనిజ్ వాజి మహి నల అణస్తాద్.

45 యేసు, “నజీ ముట్టికాన్ ఎయెన?”, ఇజి వెన్బాతాన్. విజెరె, “మాపు నెన్ఎప్”, ఇజి వెప్టార్. అయావలె పేతురు, “బోదకినికిదా, నండొ లోకుర్ కూడిఃతారె నీ ముస్కు అర్నినార్ గదె”, ఇజి వెప్టాన్.

46 గాని యేసు, “నజీ ఎయెండ్రో ముట్టాన్. నా లోఇదాన్ దేవుణు సత్తు వెల్లి సోసి సొని లెకెండ్ నజీ తెలిజినాద్”, ఇజి వెప్టాన్.

47 అయావలె అది యేసుజ్ డాజ్జి సొండ్రెజ్ అట్ఎ ఇజి నెస్తాదె వణక్కి వాతాదె వన్ని పాదం ఎద్రు ముణుకుజ్ ఊర్జి వజితాద్. నాను ఎందనిజ్ వన్నిజ్ ముట్ట ఎలాగ వెటనె నెగెణ్ ఆత ఇనిక విజెరె ఎద్రు అది వెప్టాద్.

48 అందెజె యేసు”, గాలు, నీను నా ముస్కు నమకం ఇడ్డి. అందెజె నీను నెగెన్ఆతి. సమాదనమ్దాన్ సొన్అ”, ఇజి దనిజ్ వెప్టాన్.

49 యేసువర్గిజి మహివలెనె, యాయెరు ఇండ్రోణికాన్ ఒరెన్ వాతండ్రె, “నీ గాలు సాతాద్. బోదకినివన్నిజ్ మరి వందిస్సు”, ఇజి వన్నిజ్ వెప్టాన్.

50 యేసు అయా మాట వెహండ్రె, “తియెల్ ఆమ. నా ముస్కు నమకం ఉండ్రె ఇడఃఅ. అది నెగెణ్ ఆనాద్”, ఇజి యాయిరుజ్ వెప్టాన్.

51 యాయిరు ఇండ్రో వాతివెలె, పేతురు, యాకోబు, యోహాను ఇని వరిజ్ ని ఇజ్రి దని అయిసి అప్పొసిరిజ్బా లోఇ ఒతాన్. గాని మహివరిజ్ లోఇ సొండ్రెజ్ సరి సివితాన్.

52 విజెరె దన్ని వందిజ్ గుండెజి డెయ్ఎ ఆజి, అడఃబాజి మహార్. యేసు వరిజ్, “అడఃబామాట్, అది నిద్ర కిజినాద్ గాని సాఎద్”, ఇజి వెప్టాన్.

53 అది సాతాద్ ఇజి వారు నెస్త మహార్. అందెజె యేసుజ్ సెకాల్ కిత్తార్.

54 అహిజ, యేసు దన్నికిదు అస్తాండ్రె, “ఇజ్రి బయి నిజ్అ”, ఇజి వెప్టాన్.

55 దనిజ్ పాణం మర్జి వాతిజ్ అది నిజితాద్. అయావలె వాండ్రు దనిజ్ బోజనం సీదు ఇజి ఆడ్ర సితాన్.

56 దని అయ్సి అపొసిర్ నండొ బమ్మ ఆతార్. గాని వాండ్రు యాక ఎయెరిజ్బా వెహ్మాట్ ఇజి వరిజ్ ఆడ్ర సితాన్.

## 9

### సిసూరిజ్ పణి ఒపజెప్పినాన్

1 యేసు పన్నెండు మణిసి సిసూరిజ్ కూక్కి కుడుఃప్తాండ్రె విజు దెయమ్కాజ్ పేర్దెజ్, కస్టమ్కాజ్ నెగెణ్ కిదెజ్ వరిజ్ సత్తుని అతికారం సిత్తాన్.

2 వాండ్రు, “దేవుణు ఎలుబడిః కినాన్ ఇజి సువార్త బోదిస్తెజ్, కస్టమ్కాణిజ్ మహి వరిజ్ నెగెణ్ కిదెజ్”, ఇజి వరిజ్ పోక్తాన్.

3 మరి వాండ్రు వెప్టాన్, “మీరు పయాణం వందిజ్ కీదు డుడ్డు గాని, సన్ని గాని రొట్టె గాని, డబ్బు గాని రుండి సొక్కెజ్ గాని ఇనికబా ఒత్తెజ్ ఆవద్.

4 మీరు ఎయె ఇండ్రో సొనిదెరొ, అయా పట్ను డిఃస్సిదాక బానె మండ్రు.

5 మిజి ఎయెర్ డగ్రు కివిండ మహిజ ఆ పట్నుమ్దాన్ డిఃసి సొనివలె మీ పాదమ్కాణి డుల్లిబాన్ దుల్ప్పు. దేవుణు మాట వారు నెక్క పొక్కిజ్ దేవుణు వరిజ్ కోపం ఆతాన్ ఇజి తోరిస్తెజ్ ఆహె డుల్లి దులుప్పు”, ఇజి వరిజ్ వెప్టాన్.

6 అందెజె వారు సొతారె, నాహ్కాజ్ విజు బూలాజి, సువార్త బోదిసి, ఎంబెబా కస్టమ్దాన్ మహి వరిజ్ నెగెణ్ కిజి మహార్.

7-8 గలీలయ ముటదిజ్ రాజు ఆతి హేరోదు యేసుని వన్నిసిసూరు కిత్తి పణిజ్ వందిజ్ వెహివెలె అనల అర్దం ఆఎండ మహాన్. ఎందనిజ్ ఇహిజ, సెగొండార్ యోహాను సాతండ్రె మర్జి నిజితాన్ ఇజి, సెగొండార్ ఏలియ ప్రవక్త తోరె ఆతాన్ ఇజి మరి సెగొండార్ పూర్బా కాలమ్దు మహి ఒరెన్ ప్రవక్త నిజిత వాతాన్ ఇజి యేసు వందిజ్ వర్గిజి మహార్.

9 అయావలె హేరోదు, “నాను యోహాను బుర్ర డెయిస్త గదె. మరి ఎయి వందిజ్ యా సజతిజ్ నాను వెంజిన? వాండ్రు ఎయెన్?”, ఇజి వన్నిజ్ సుడెడెజ్ ఆస ఆతాన్.

అయ్దు వేలు లోకాజ్ బజ తిర్చినాన్.

10 అపొస్తుడు మర్జి వాతారె, వారు కితి పణిజ్ విజు యేసుజ్ వెహ్తారె. వాండ్రు వరిజ్ వెట కూక్తాండ్రె, బత్సయుద ఇని పట్టుమదు కేట సాహార్.

11 గాని మంద లోకుర్ ఆక నెస్తారె, వన్ని వెన్కా వాజి మహార్. వాండ్రు వరిజ్ డగ్రు కితాండ్రె దేవుణు ఏలుబడిః వందిజ్ వరిజ్ వెహ్తారె. కస్టమ్దు మహి వరిజ్ నెగెణ్ కితాన్.

12 పొద్దు డిగ్జి మహివలె, పన్నెండు మణిసి సిసూర్ వాతారె, “మాటు ఎయెర్ మన్ఇ బాడిద్ మనాట్. అందెజె యా లోకురిజ్ మండ్రెజ్ బాడిః, ఉండెజ్ టిండి, దొహ్కీని వజ పడెకాద్ మన్ని నాహ్కాజ్ వల్సెజ పోక్త”, ఇహార్.

13 యాక వెహండ్రె, యేసు, “మీరె వరిజ్ తిండ్రెజ్ ఇనికబా సీదు”, ఇజి వెహ్తాన్. వెహ్తాజ్ వారు, “మాబాన్ అయ్దు రొట్టెజ్, రుండి మొయెజ్ మనె. నిసా మంద లోకుదిజ్ బోజనం కొండెజ్ మాపు అట్నాపా?”, ఇజి వెహ్తారె.

14 (వాతి మని లోకుర్ లొఇ మొగకొండెర్నె డగ్రు అయ్దు వేలుజ్ మనార్) వాండ్రు, “యాబయి మణిసిర్ యాబయి మణిసిర్ వర్స బసె కిదు”, ఇజి వన్ని సిసూర్జ వెహ్తాన్.

15 వారు ఆహె కిజి విజెరిజ్ బసె కితాన్.

16 నస్తివలె వాండ్రు అయ్దు రొట్టెజ్ని రుండి మొయెజ్ అస్తాండ్రె, ఆగసం దరోట్ బేసి, వన్కాజ్ వందిజ్ దేవుణుదిజ్ వందనం వెహ్తాన్. అయాకెజ్ ముకెజ్ కితాండ్రె లోకురిజ్ సీబాజి సీదు ఇజి వన్ని సిసూర్జ సిత్తాన్.

17 వారు విజెరి పొట పంజు తిహార్. తిహి వెనుక మిగిలితి ముకెజ్ పనెండు గంపెజ్ సిసూరు కెహ్తారె.

18 ఉండ్రె నాండిజ్ యేసు ఒరెండ్రె పార్లనం కిజి మహాన్. వన్ని సిసూర్ వన్ని డగ్రు మహార్. అయావలె వాండ్రు, “నాను ఎయెన్ ఇజి లోకుర్ వర్గిజినార్?”, ఇజి వరిజ్ వెన్బాతాన్.

19 వారు, “బాప్తినం సీని యోహాను ఇజి సెగొండార్ వెహ్తాన్. సెగొండార్ ఏలియ ప్రవక్త ఇజినార్. మరి సెగొండార్ పూర్బా కాలమ్దు సాతి ప్రవక్తెజ్ లొఇ ఒరెన్ మర్జి నిజితాన్ ఇజి వర్గిజినార్”, ఇజి వన్నిజ్ వెహ్తారె.

20 “అహిజ, మీరు నాను ఎయెన్ ఇజి వెహ్తానిదెర్?”, ఇజి వరిజ్ వెన్బాతిజ్, పేతురు, “దేవుణు ఏర్పాటు కితి పోక్తి క్రిస్తు”, ఇజి వెహ్తాన్.

21 యాక ఎయెవెట వెహ్కాట్ ఇజి కసితం వరిజ్ ఆడ్ర సితాన్.

22 మరి, “లోకు మరిసి ఆతి నాను నండొ కస్టమ్కు ఓరిస్టెజ్వలె. యూద పెద్దెల్జ, పెరి పుజెరిజు, యూదురి రూలు నెస్పిస్సికార్ నజి వెల్లి కినార్. లోకుర్ నజి సప్పార్లె. సాజి మూండ్రె దినమ్కాజ్ దేవుణు నజి నిక్నాన్లె”, ఇజి వెహ్తాన్.

23 మరి వాండ్రు వరిజ్ విజెరిజ్ ఈహు వెహ్తాన్. “ఎయెన్బా నా వెట వాదెజ్ ఇహిజ, వాండ్రు వన్ని సొంత ఇస్టమ్కు డిఃసి, వన్నిజ్ వాని కస్టమ్కు రోజు ఓరిసి సాదెజ్బా తయార్ ఆజి నా వెట వాదెజ్.

24 ఎయెన్బా వన్ని సొంత పాణమ్దిజ్ కాపాడెజ్ సుడెతిజ, వన్నిజ్ ఎల్లకాలం దేవుణు వెట బత్కిని బత్కు దొహ్కెద్. గాని ఎయెన్బా నా వందిజ్ వన్ని పాణం సితిజ, వన్నిజ్ ఎల్లకాలం దేవుణు వెట బత్కిని బత్కు దొహ్కాద్.

25 ఒరెన్ వాండ్రు, వాండ్రు కోరితి విజు, యా లోకమ్ది సంసారం సుకం విజు దొహ్కె ఆజి, వన్నిజ్ ఎలాకాలం దేవుణు వెట బత్కిని బత్కు దొహ్కెండ మహిజ, ఇన్ని లాబం?

26 నా వందిజ్ నా మాట వందిజ్ సిగు ఆని ఎంబె వన్నిజ్బా నాను నెన్న ఇజి వెహ్తాజ్ లోకు మరిసి ఆతి నానుబా సిగు ఆన. నాను దేవుణు జాయ్దు ఒడెబిదెజ్ అట్ఇ నని సోకుదాన్ వానా. అయావలె నా బుబ్బుదిని, దూతెజిది జాయ్ ఒడెబిదెజ్ అట్ఇ సోకుబా నా వెట మంజినాద్. అయావలె నా వందిజ్ నా మాట వందిజ్ సిగు ఆతి వన్ని వందిజ్ నానుబా సిగు ఆన.

27 నాను మిజి నిజం వెహ్తాన్, “ఇబ్బె నిహి మన్ని వరి లొఇ సెగొండార్, దేవుణు వన్ని లోకురిజ్ ఏలుబడిః కిజినిక సూణిదాక సావెర్”.

యేసుజ్ మూర్తి మారిసినాద్.

28 యా మాటెజ్ వెహ్తా డగ్రు ఉండ్రె వారం వెన్కా వాండ్రు, పేతురు, యాకోబు, యోహాను ఇన్ని వరిజ్ వెట్ట కూక్తాండ్రె, పార్లనం కిదెజ్ ఉండ్రె గొరొత్ ఎక్తారె.

29 వాండ్రు పార్లనం కిజి మహివలె వన్ని మొకమ్ది మూర్తి మారితాద్. వన్ని సాకెజ్ తెలాజ్ అతె, జిగి జిగి మెరిసి మహె.

30-31 అయావలె, దేవుణు మంజిని బాడ్డిదాన్ రిఎర్ వన్ని వెట వర్రిజి మహార్. దేవుణు బాణిజ్ వాతి జాయ్ వరి సుటులం మహార్. వారు మోసె, ఏలియ ఇనికార్. యేసు యెరూసలెమ్దు సాజి, ఆహె దేవుణు ఎతు కితిక బేగి పూర్తి కిని వందిజ్ వర్రితార్.

32 పేతురు ని వన్ని వెట మహికార్ బాగ నిద్ర కితార్. తెలి ఆతి మహిజ్ వారు యేసుజ్ మని దేవుణు జాయ్దిజ్ వన్ని వెట నిహి మని రిఎర్దిజ్ బా సుడెఃతార్.

33 ఆ రిఎర్ వన్ని బణిజ్ సొన్ని మహిజ్, పేతురు యేసుజ్, “బాబు, మాటు ఇబ్బె మనిక గొప్ప నెగెద్. అందెజె నిజి ఉండ్రి మోసెజ్ ఉండ్రి ఏలియెజ్ ఉండ్రి ముండ్రి మూండ్రి గుడుఃసెజ్ తోహ్నావ్.\*

34 వాండ్రు ఆహె వర్రిజి మహిజ్ మొసాప్ వాతాదె వరిజ్ పిడెఃగ్తాద్. వారు మొసాప్ లొఇ సాహివలె సిసూరు తియెల్ ఆతార్.

35 అయావలె, “వీండ్రు నాను ఏర్పాటు కితి నా మరిను. విని మాటెజ్ వెండ్రు”, ఇజి ఉండ్రి జాటు మొసాప్దాన్ వాతాద్.

36 అయా జాటు వాతి వెనుక యేసుజ్ నె తోరితాద్. సిసూరు సుడెఃతి వన్యాజ్ ఉండ్రి దనిజ్ బా అయా దినమ్కాజ్ మహి ఎయెరిజ్ బా వెహ్ ఎండ అల్లెత మహార్.

### దెయం అస్తి ఒరెన్ కొడెఃదిజ్ నెగెణ్ కిజినాన్

37 మహ్సా నాండిజ్, వారు ఆ గొరొణ్ డిఃగ్జి వాతివలె నండొ లోకుర్ వన్నిజ్ ఎర్దు వాతార్.

38 అయావలె ఆ మంద లోకు లొఇ ఒరెన్, “ఓ బోదకినికి, నా మరిసిజ్ కనికారం తోరిన్ అ ఇజి నాను నిజి బతిమాల్జిన. వాండ్రు నజి ఒరెండె మరిసి.

39 ఉండ్రి దెయం వన్నిజ్ అస్సాద్. వెటనె వాండ్రు డెడిఃస్సాన్. వెయ్దాన్ పంపుల్ వాజి అది వన్నిజ్ గజగజి వణికిసి అర్పాద్. వన్నిజ్ నండొ బాద కిజి వందిసినె డిఃస్సాద్.

40 దనిజ్ సాన్పిస్సెజ్ నీ సిసూర్జి బతిమాల్త గాని వారు కిదెజ్ అట్ ఎతార్”, ఇజి మొరొ కిత్తాన్.

41 అందెజె యేసు, “యా తరమ్దు మనికిదెరా, మీరు తప్పు సరిదు నడఃవె ఆజినికిదెర్. నమకం సిలికిదెర్. ఎసోడ్ రొస్కు మీవెట మంజిన? మీరు కినికెజ్ ఎసా ఓరిస్సెజ్?”, ఇజి వెప్తాండ్రె, “నీ మరిసిజ్ ఇబ్బె తగ్ అ”, ఇజి వన్నిజ్ వెప్తాన్.

42 ఆ కొడెః వాజిమహివలె వన్నిజ్ అసి మహి దెయం వన్నిజ్ అర్పాదె గజ గజి వణకిస్తాద్. అయావలె యేసు ఆ దెయమ్దిజ్ సాన్ అ ఇజి డటిసి వెప్తాన్. కొడెఃదిజ్ నెగెణ్ కితాండ్రె అపొసిజ్ ఒపజెప్తాన్.

43 లోకుర్ యా జర్రితిక సుడెఃతారె, దేవుణు గొప్ప సత్తు మనికాన్ ఇజి నండొ బమ్మ ఆతార్.

44 యేసు కితి పణి వందిజ్ లోకుర్ విజెరె బమ్మ ఆజి మహివలె, వాండ్రు ఈహు వన్ని సిసూరిజ్ వెప్తాన్. “నాను యేలు వెహ్నిని మాటెజ్ బాగ వెంజి పోన్ ఎండ మండ్రు. లోకు మరిసి ఆతి నాను లోకు కీదు ఒపజెవె ఆనాలె”, ఇజి.

45 గాని వాండ్రు వెప్తా మాటెజ్ వరిజ్ అర్దం ఆవతాద్. దేవుణు ఆక డాప్తాన్. ఎందనిజ్ ఇహిజి వారు అర్దం కిఎండ మండ్రిజ్. ఆ మాట వందిజ్ వన్నిజ్ వెన్ బాదెజ్ వారు తియెల్ ఆతార్.

### పెరికాన్ ఎయెన్ ఇజి గొడఃబ రేప్పినార్

46 సిసూరు లొఇ ఎయెన్ పెరికాండ్రొ ఇజి ఉండ్రి ఇజి గొడబ వాతాద్.

47 యేసు వరి మన్నుదు మన్ని ఆలోసన నెస్తాండ్రె ఒరెన్ ఇజి కొడెఃదిజ్ అస్తాండ్రె వన్ని పడఃకాద్ నిల్ ప్తాన్.

48 నిల్ ప్తి వెన్యా వాండ్రు వరిజ్, “ఎయెన్ బా యా ఇజి కొడెఃదిజ్ నా ముస్కు నమకం ఇడ్డికాన్ ఇజి ఒడిఃబిజి డగ్రు కితిజి, నజి డగ్రు కితి వజి. నజి డగ్రు కితికాన్ నజి పొక్తి దేవుణు డగ్రు కితి వజి. మీ లొఇ ఎయెన్ తగిజి మంజి నాండ్రొ వాండ్రె పెరికాన్”, ఇజి వెప్తాన్.

49 అయావలె యోహాసు, “బోదకినికి, నీ సత్తుదాన్ దెయమ్కాజ్ పొక్తి మహి ఒరెన్ వన్నిజ్ మాపు సుడెఃతాప్. వాండ్రు మా వెట మనికాన్ అవెన్. అందెజె మాపు వన్నిజ్ అడ్డు కితాప్”, ఇజి వెప్తాన్.

50 అందెజె యేసు, “వన్నిజ్ అడ్డు కిమాట్. ఎందనిజ్ ఇహిజి, మీ ముస్కు పగ సిలికాన్ మీ దరిజ్ మనికానె”, ఇజి వన్నిజ్ వెప్తాన్.

### యెరూసలెమ్దు ప్రయాణం కిజినాన్

51 యేసు పరలోకమ్దు సాండ్రెజ్ దినమ్కుడగ్రు ఆతివెలె వాండ్రు మన్ను పూర్తి నమకం కిజి యెరూసలెమ్దు సాండ్రెజ్ సోతాన్.

52 వాండ్రు వన్నిజ్ మండ్రిజ్ బాడ్డిః తయార్ కిదెజ్ ఇజి సెగొండారిజ్ ముజాల్ పొక్తాన్. వారు దని వందిజ్ సమరియ ఇనన్ని దేసెమ్ది ఉండ్రి నాటొ వాతార్.

\* 9:33 9:33 వాండ్రు వెప్తిక ఇనికడొ వన్నిజె తెలివద్

- 53 గాని నాటోణికార్ వన్నిజ్ డగ్రు కిఎతార్. ఎందనిజ్ ఇహిజ వాండ్రు యెరూసలెమ్దు మన్ని దేవుణు గుడిఃదు సొని ఒరెన్ యూద వాండ్రు.
- 54 సిసూర్జ లొఇ యాకోబు, యోహాను ఇనికార్ యాక సుడఃతారె, “ప్రబువా, యా లోకురిజ్ నాసనం కిదెజ్ ఆగాసం దాన్ మాపు సిను తపిస్తెజ్ నిజి ఇస్టమ్నెనా?”, ఇజి వెన్బాతార్.
- 55 యేసు వరి దరొట్ మహ్తాండ్రె వరిజ్ గటిజ వెహ్తాన్.
- 56 నస్తివలె వారు మరి ఉండ్రీ నాటో సొహార్.
- 57 వారు సరిదాన్ సొన్ని మహివలె, ఒరెన్, “నీను ఎంబె సొహిజ్బా నాను నీ వెట వానా”, ఇజి వన్ని వెట వెహ్తాన్.
- 58 అందెజె యేసు, “నక్కెజ మండ్రెజ్ బొరొజ్మన్నె. ఆగాసమ్ది పొటిజ మండ్రెజ్ గూడుఃకు మనె. గాని లోకు మరిసి ఆతి నజి బుర్ర అడ్డు కిదెజ్బాడి సిల్లెద్”, ఇజి మర్జి వెహ్తాన్.
- 59 వాండ్రు మరి ఒరెన్ వన్నిజ్, “నా వెట రఅ”, ఇజి వెహ్తాన్. అయావలె అయా వాండ్రు, “ప్రబువా, ముజాల నాను సొన్ని నా బుబ్బెజ్ ముసి వానా”, ఇజి వెహ్తాన్.
- 60 అందెజె యేసు, “సాతికారె వరి సాతివరిజ్ముస్తెజ్. గాని నీను సొన్ని దేవుణు ఏలుబడిః వందిజ్ బోదెన్అ”, ఇజి వెహ్తాన్.
- 61 మరి ఒరెన్, “ప్రబువా, నీ వెట నాను వానా. గాని నాను ముజాల మర్జి సొన్ని నా ఇండ్రొణి వరిజ్ వెహ్తాన్ వాన”, ఇజి వెహ్తాన్.
- 62 అందెజె యేసు, “మేడిః ముస్కు కియు ఇడ్డి వెన్కా మర్జి బేస్సికాన్ ఎయెన్బా దేవుణు ఏలుబడిః కినివరి లొఇ ఎందనిజ్ పణిదిజ్ రఇకాన్”, ఇజి వెహ్తాన్.

## 10

డబయ్ మణిసి సిసూరిజ్ సువార్త వందిజ్ పొక్కినాన్.

- 1 యాక జర్గితి వెనుక, ప్రబు మరి డబయ్ మణిసి సిసూరిజ్ ఏర్పాటు కితాన్. వాండ్రు సొని విజు పట్టుమ్కాజ్ విజు బాడిఃదు వన్ని ముజల రిఎరిజ్ రిఎరిజ్ పొక్తాన్.
- 2 పొక్కి, వాండ్రు వరిజ్ ఈహు వెహ్తాన్, “కొయ్దెజ్ మన్నిపంట లెకెండ్ లోకుర్ నండొండార్ మన్నె. గాని తక్కునె కొయ్నికార్ తక్కునె అందెజె వన్ని పంట కొయ్నివందిజ్ పణికిని వరిజ్ పొక్అ, ఇజి కోత్త ఏజుమానిజ్ బతిమాల్దు ఇజి వెహ్తాన్.
- 3 మీరు సొండ్రు! ఇదిలో, కార్నుకుడిఃజ నడిఃమి గొరె పిల్లెకాజ్ పొక్తిలెకెండ్ నాను మిజి పొక్కిన.
- 4 మీరు సన్ని గాని, డబ్బుజ్ ఇడ్డిసన్ని గాని, సన్నిదు మరి ఉండ్రీ జత జోడఃకు గాని ఒతెజ్ ఆవెద్. మీరు సర్దు ఎయెరిజ్ నెగెణ్ మనిదా ఇజి నిల్పి వర్గిజి, సమయం పాడు కిమ.
- 5 మీరు ఎయె ఇండ్రొ బా సొనివలె, “యా ఇండ్రొ మంజిని వరిజ్ సమాదనం కల్లిపిద్ ఇజి ముజాల వెహ్తాన్.
- 6 సమాదనం కోరిజినికాన్ ఒరెన్ బాన్ మహిజ, మీ సమాదనం వన్ని ముస్కు మంజినాద్. సిలిజ, మర్జి మీ బానె వానాద్.
- 7 వారు ఇనిక సితిజ్బా ఉణిజి తింజి బానె మండ్రు. ఎందనిజ్ ఇహిజ, పణి కిని వన్నిజ్వన్నిజ్కావాలస్సికెజ్దొహ్కెజ్తగ్గికాన్. ఇల్కు ఇల్కు బూలమాట్.
- 8 మరి మీరు ఎమేణి పట్టుమ్దు సొనివలె వారు మిజి డగ్రు కిజి ఇనిక సితిజ ఆకదె ఉండు.
- 9 బాన్ మని కస్టమ్ది వరిజ్ నెగెణ్ కిదు. దేవుణు ఏలుబడిః కిని కాలం మీ డగ్రు వాత మనాద్ ఇజి వరిజ్ వెహ్తాన్.
- 10-11 గాని మీరు ఎమేణి పట్టుమ్దుబా సొనివెలె వారు మిజి డగ్రు కిఏండ మహిజ, అయా పట్టుమ్ది వీదిజ సొన్ని, “మా పాదమ్కాజ్ కస్తి మన్ని మీ పట్టుమ్ది డుల్లిబా ఇబ్బె దుల్పి సొన్సినాప్. ఎందనిజ్ ఇహిజ, దేవుణు మీ ముస్కు కోపం ఆత మనాన్ ఇజి తోరిస్తెజ్. గాని ఒడఃబిదు ఏలుబడిః కిని కాలం డగ్రు ఆత మనాద్ ఇజి తవ్ఏండ నెస్తు”, ఇజి వెహ్తాన్.
- 12 నాను మిజి వెహ్తాన, దేవుణు తీర్పు కిని దినమ్దు యా పట్టుమ్ది వరిజ్ సిక్కి మరి నండొ మంజినాద్. సొదొమ పట్టుమ్దు మహి లోకురిజ్ నసా మన్వెద్.
- 13 ఓ కొరాజి పట్టుమ్దు మనికిదెరా, అబాయా మిజి ఎసొ పెరి కస్టమ్కు వానెలె. ఓ బెత్సెయుద పట్టుమ్దు మనికిదెరా, అబాయా మిజి ఎసొ గొప్ప పెరి కస్టమ్కు వానెలె. ఎందనిజ్ ఇహిజ, మీ నడిఃమి కితి బమ్మాతి గొప్ప పణిజ్ తూరు సీదొను

ఇని పట్టుమకాజ్ కినిక ఇహిజ, వారు పూర్బమ్మదునె బస్త గరండెజ్ తొహ ఆజి, నీరు వాకె అజి, పాపమ్కు డిస్తాప్ ఇజి తోరిస్తార్ మరి.

14 దేవుణు తీర్పు కినివలె మీ పట్టుమకాజ్ సిక్కు, తూరు సిదోను పట్టుమకాజ్ నండో మంజినాదలె.

15 కపర్నూహము పట్టుమదు మనికిదెరా, ఆగాసం దాక గొప్ప పెరికాప్ ఇజి ఒడిబిజినిదెరా? సిల్లె, దేవుణు మిజి వాండ్రు మంజిని బాడిదాన్ అర్పాన్లె. ఇహిజ, దేవుణు మిజి నాసనం కినాన్లె.

16 మరి యేసు వన్ని సిసూరిజ్, “మీ మాట వెనికాన్ నా మాట వెనాన్. మీ మాటదిజ్ నెక్కు పొక్కికాన్, నా మాటదిజ్ నెక్కు పొక్కికాన్. నా మాటదిజ్ నెక్కి పొక్కికాన్, నజి పొక్కి వన్నిజ్ నెక్కు పొక్కికాన్”, ఇజి వెప్తాన్.

17 డబయ్ మణిసి సిసూరు సర్దాన్ మర్జి వాతారె, “ప్రబువా, దెయమ్కుబా, నీ అతికారం దాన్ సొండ్రు ఇజి మాపు ఆడ్ర సీజినివలె మజి లోబడిజినె”, ఇజి వెప్తాన్.

18 నస్తివలె యేసు, “ఒఒ, సయ్తాను మిరిస్తి లెకెండ వన్ని అతికారం సిల్లెండ ఆగాసమ్దాన్ అర్దిక నాను సుడఃత

19 సారన్కాజ్ సోర్కుపిజ మట్టెజ్ మిజి అతికారం సిత మన్ను. సయ్తాను సత్తుదిజ్ గెలిస్తిజ్ మిజి అతికారం సిత్ర మన్ను. సయ్తాను మిజి ఇనికబా కిదెజ్ అట్ఎన్.

20 దెయమ్కు మిజి లోబడిజినె ఇజి సర్ద లావు ఆమ. గాని దేవుణు మీ పేరు వాండ్రు మంజిని బాడిదు రాస్త మనాన్ ఇజి నండో సర్ద ఆదు”, ఇజి వెప్తాన్

21 అయావలె యేసు, దేవుణు ఆత్మదాన్ నండో సర్ద ఆజి, “ఓ బా, నీనె ఆగాసమ్దిజ్ బూమిదిజ్ ప్రబు. నాను నిజి పొగిడిజిన. ఎందనిజ్ ఇహిజ, గెణం మని వరిజ్, సదు మని వరిజ్, యా నిజమాతి సజతి డాప్తిదె, ఇజి కొడో లెకెండ మని వరిజ్ తోరిస్తి. ఒఒ బా, అయ లెకెండ కిదెజె నిజి ఇస్టం ఆతాద్.

22 నా బుబ్బు నజి విజు సజతిజ్ నా కీదు ఒవజెప్త మనాన్. మరిసి ఎయెండ్రో ఇజి అప్పొసిని నెస్నాన్. మరి ఎయెన్బా నెన్ఎన్. అప్పొసి ఎయెండ్రో ఇజి మరిసి ని అప్పొసిజ్ తెలివి కిదెజ్ మరిసి ఎర్లితికారె నెస్నార్. మరి ఎయెన్బా నెన్ఎన్”, ఇజి వెప్తాన్.

23-24 వాండ్రు సిసూర్ దరోట్ మప్తాండ్రె, “దేవుణు వందిజ్ వాండ్రు కిని ఏలుబడిః వందిజ్ మీరు సుడఃతి గొప్ప సజతిజ్ సుడఃదెజ్ అట్టి మీరు అంతు సిల్లి సర్ద మంజినికార్. ఎందనిజ్ ఇహిజ, నండో ప్రవక్తరు, రాజురుజు మీరు సుడఃజినికెజ్, సుడఃదెజ్ ఇజి ఆస ఆతార్ గాని సుడఃదెజ్ అట్ఎతార్. మీరు వెహికెజ్ వెండ్రెజ్ ఇజి ఆస ఆతార్ గాని అట్ఎతార్”, ఇజి వన్ని సిసూరిజ్ నె వెప్తాన్.

**పడఃకాదికాన్ ఎయెన్ ఇనివందిజ్ యేసు వెప్పినాన్**

25 ఉండ్రీ నాండిజ్, యూదురు రూలు నెన్పిస్నాన్ ఒరెన్ నిజ్జి, “ఓ బోదకినికి, ఎలాకాలం దేవుణు వెట బత్కిని బత్కు దోహక నాను ఇనిక కిదెజ్?”, ఇజి యేసుజ్ పరిక్కు కిజి వెన్బాతాన్.

26 అందెజె వాండ్రు, యూదురి రూలుదు ఇనిక రాస్త మనాద్. బాన్ ఇనిక సద్విజిని?”, ఇజి వెప్తాన్.

27 వాండ్రు, “నీ ప్రబుఆతి దేవుణుదిజ్ నీ పూర్తి మన్నుదాన్, నీ పూర్తి పాణమ్దాన్, నీ పూర్తి సత్తుదాన్, నీ పూర్తి బుద్ధిదాన్ ప్రేమిస్తిజ్”. మరి, “నిజి నీను ప్రేమిసిని లెకెండ మహివరిజ్ ప్రేమిస్అ ఇజి రాస్త మనాద్”, ఇజి వెప్తాన్.

28 అందెజె యేసు, “నీను నెగెణ్ వెప్తి. ఆహె కిఅ. అయావలె నీను ఎలాకాలం దేవుణు వెట బత్కినిలె”, ఇజి వన్ని వెట వెప్తాన్.

29 అయావలె అయా యూదురి రూలు నెన్పిస్నాన్ నీతి నిజాయితి మనికాన్ నాను ఇజి తోరె ఆదెజ్ ఈహు వెన్బాతాన్, “నా పడఃకాదికాన్ ఎయెన్?”, ఇజి.

30 అందెజె యేసు ఈహు మప్పి వెప్తాన్. “ఒరెన్ యెరూసలెమ్దాన్ డిఃగిజి యెరికొ పట్టుమదు సొనివెలె సెగొండార్ డోజారి వన్నిజ్ అస్తార్. అస్తారె, వాండ్రు తోడిఃగితి మహికెజ్ లాగితార్. వన్నిజ్ ఇజి పాణం ఇట్టారె డెఃయితారె డిఃస్త సొహార్.

31 యావలె ఒరెన్ యూదురి పుజెరి ఆ సరిదాన్ సొండ్రెజ్ పణి తాక్తాద్. వాండ్రు వన్నిజ్ సుడఃతాండ్రె పడఃకదాన్ సొహాన్.

32 అయా లెకెండె, లేవి\* ఒరెన్ ఆ సరిదాన్ సొహాన్. గాని వాండ్రుబా సుడఃతాండ్రె పడఃకదాన్ ఎర్లిజి సొహాన్.

33-34 అయా సరిదాన్ ఒరెన్ సమరియ వాండ్రు పయాణం కిజి మహాన్. వాండ్రు అర్ది మని వన్నిజ్ సుడఃతాండ్రె వన్ని పాణం నొతాద్. వన్ని డగ్రు సొహండ్రె ఒలివ ఇని నూనె, ద్రాక్కుకల్లు వాక్తాండ్రె వన్ని గాయమ్కాజ్ తోహ్కాన్. వాండ్రు వన్ని సొంత గాడఃదె మున్ను ఎకిస్తాండ్రె ఉండ్రీ లార్జి ఇండ్రో సొహాన్. వన్నిజ్ నెగెణ్ సుడఃతాన్.

\* 10:32 10:32 దేవుణుగుడిఃదు రోజు సేవ కిని లేవి జాతిదు మన్నికాండ్రె లేవి ఇనికాన్.

35 మహ్న నాండిజ్ వాండ్రు రుండి వెండి రుపాయుజ్ లాగితండ్రె లార్జి సవ్కారిజ్ సితాన్. సితండ్రె, “వినిజ్ నెగ్రిండ్రె సుడోం. వినివందిజ్ మరి కర్పు ఆతి మహిజ నాను మర్జి వానివలె అయా డబ్బు నిజి సీన”, ఇజి వన్ని వెట వెహ్తాండ్రె సోహాన్.

36 యా కత వెహ్తా వీస్తి వెనుక, యేసు వన్నిజ్, “ఱొజారి అస్తి వన్నిజ్ యా మువెర్ లోఇ ఎయెన్ పడఃకాదికాన్ ఆనాన్, ఇజి నీను వెహ్తా”, ఇజి వెన్బాతాన్.

37 యూదురి రూలు నెన్పిస్సాన్, “వన్ని ముస్కు పాణం నొత్తికాండ్రె, వన్ని పడఃకాదికాన్”, ఇహాన్. అందెజె యేసు, “నీను సొన్సి యా లెకెండెనె కిఅ”, ఇజి వెహ్తాన్.

**మార్త మరియు**

38 యేసు ని వన్ని సిసురు పయనం కిజి సొన్సి మహార్. ఉండ్రె నాటొ సోహార్. అబ్బె మార్త ఇన్ని ఉండ్రె బోదెలి దన్ని ఇండ్రె వన్నిజ్ డగ్రు కిత్తాద్.

39 దనిజ్ మరియు ఇన్ని ఉండ్రె తజిసి మనాద్. అది ప్రబు పాదమ్క డగ్రు బస్తాదె వన్ని బోద వెంజి మహాద్.

40 మార్త విజు పణి వందిజ్ నండొ బాద ఆజి వన్ని డగ్రు వాతాద్. వాతాదె, “ప్రబువా, నాను ఒరెనె పణి కిదెజ్ నా తజి డిస్త మనాద్. నిజి బాద సిల్లెదా? నజి తోడుః కిఅ ఇజి దనిజ్ వెహ్తా”, ఇజి వెహ్తాద్.

41-42 అందెజె యేసు, “మార్త, నీను నండొ పణిజ వందిజ్ విసారిసి బాద ఆజిని. గాని ముకెలమతిక ఉండ్రె. మరియు అయా నెగ్గి దనిజ్ కోరితాద్. దన్నిబాణిజ్ ఎయెన్బా అయాక లాగ్గి ఒతెజ్ అట్వెన్”, ఇజి వెహ్తాన్.

**11**

**యేసు పార్లనం నెన్పిస్సాన్**

1 ఉండ్రె నాండిజ్ యేసు ఉండ్రె బాడిడు పార్లనం కిజి మహాన్. వాండ్రు పార్లనం వీస్తి వెన్కా. వన్ని సిసూర్ లోఇ ఒరెన్, “ప్రబువా, యోహాను వన్ని సిసూరిజ్ పార్లనం నెన్పిస్తాన్. అయాలెకెండ మజిబా పార్లనం నెస్సొన్అ”, ఇజి వన్నిజ్ వెహ్తాన్.

2 అందెజె యేసు వరిజ్, మీరు పార్లనం కినివెలె ఈహు వెహ్తా. “ముస్కు మన్ని మా బుబ్బు, లోకుర్ విజెరె నీ పేరు గొప్ప నెగ్గిక ఇజి గవ్ఠం సిపిర్. నీను లోకుర్ విజెరిజ్ ఎలుబడిః కిపిన్.

3 రోజు రోజు కావాలిస్తి టిండి మజి సిదా.

4 మజి పాపమ్కు కితి వరిజ్ మాపు నెమిస్తి వజి నీను మా పాపం నెమిన్అ. తప్ప కిబిస్సిసెఇ అసెజ్ మాలోఇ రెవ్ండ మజి ఇడఃఅ”, ఇజి వెహ్తాన్.

5-6 మరి యేసు వరివెట ఈహు వెహ్తాన్. “మీ లోఇ ఒరెన్ వన్నిజ్ ఒరెన్ కూలాయెన్ మనాన్. నీను మదరెయతు వన్నిబాన్ సొన్సి, ‘ఓ కూలవాండ్రు, నజి మూండ్రె రొట్టెజ్ బదలు సిదా. ఎందనిజ్ ఇహిజ, మరి ఒరెన్ కూలాయెన్ పయాణం కిజిని సరిదాన్ నా బాన్ వాత మనాన్. వన్నిజ్ సీదెజ్ నాబాన్ ఇనికబా సిల్లెద్”, ఇజి వెహ్తాన్.

7 అయాలె వాండ్రు లోఇహాన్, “నజి బాద కిమ. నెహ్ల కెహ్తా మనాద్. నా ఇజ్రి కొడోర్ నా వెట నిద్ర కిజినార్. నిజ్జి సీదెజ్ నాను అట్వె”, ఇజి వెహ్తాండ్రా?

8 నాను మిజి వెహ్తాన్, వన్నిజ్ నిజ్జి సీదెజ్ ఇస్టం సిలిజ్బా వాండ్రు నిజ్జి సీనాన్. ఎందనిజ్ ఇహిజ, వాండ్రు కూలాయెన్ ఇజి ఒడిఃబిజి అహు కిపిన్. గాని సిగు డిస్తాండ్రె ఏక ఏక లోసినాన్ ఇజి ఒడిఃబిజి నిజి కావలస్తిక విజు సీనాన్.

9 అందెజె నాను మిజి వెహ్తాన్, మీరు ఇనిక లోస్సిదెరో, అక్క దేవుణు మిజి సీనాన్. ఇనిక మీరు రెబాజినిదెరో అక దేవుణు మిజి సీనాన్. కొత్తు, మీ వందిజ్ దేవుణు సేహ్లా రెనాన్లె.

10 ఎందానిజ్ ఇహిజ, లోస్సి విజెరిజ్ దోహ్కె. రెబాని వన్నిజ్ తోరె ఆజినాద్, కొత్తిని వన్నివందిజ్ సేహ్లా రే ఆనాద్.

11 మీ లోఇ అప్పొసి ఆతికాన్ ఎయెన్బా, వన్ని మరిసి మొయ లోస్సిజ, సరాన్ సీనాండ్రా?

12 కొరు గుడ్డు లోస్సిజ, సోర్కుప్పి సీనాండ్రా?

13 అహిజ, మీరు నెఇకిదెర్ ఆతిజ్బా, మీ కొడోరిజ్ నెగ్గి ఇనాయమ్కు సీదెజ్ నెస్సిదెర్. అహిజ, ముస్కు మన్ని మీ బుబ్బు వన్నిజ్ లోస్సి వరిజ్ ఎసానో దేవుణు ఆత్మ సీనాన్”.

**యేసు బయిల్జెబెలు**

14 యేసు ఒరెన్ వన్ని బాణిజ్ గుల్ల దెయమ్దిజ్ పేర్జి మహాన్. ఆ దెయం డిస్తి సోహి వెన్కా గుల్ల ఆతి మహికాన్ వర్గితాన్. ఆక సుడఃతారె లోకుర్ విజెరె బమ్మ ఆతార్.



15 గాని వరి లోక సెగొండార్, “దెయమ్కాజ్ నెయ్కి ఆతి బయిల్బెబెలు సత్తుదాన్ వీండ్రు దెయమ్కాజ్ పేర్జినాన్ ఇజి వర్గితార్.

16 మరి సెగొండార్ వన్నిజ్ పరిస కిదెజ్ నుడెఃతార్. దేవుణునె వినిజ్పోక్త మనాన్ ఇజి రుజుప్ కిదెజ్ ఉండ్రి గుర్తు లెకెండ్ ఉండ్రి బమ్మ అని పణికిజి తోరిన్అ ఇజి వెహ్తార్.

17 వాండ్రు వరి ఆలోసన నెస్తాండ్రె వరి వెట ఈహు వెహ్తాన్, “ఎమేణి దేసెమ్దికార్బా వరిజ్ వారె జటిజ్ ఆజి కేట ఆతిజి పాడాఃనాద్. ఆహె, ఉండ్రి కుటుమ్దికార్బా వరిజ్ వారె జటిజ్ ఆజి కేటఆతిజి, ఆ కుటుం నిల్వద్.

18 అయాలెకెండ్ సయ్తాను దెయమ్కుబా వరిజ్ వారె జటిజ్ఆజి కేట ఆతిజి, సయ్తాను వరి ముస్సు. కిని ఏలుబడిః ఎలాగ నిల్నాద్? సయ్తాను సత్తుదాన్ నాను దెయమ్కాజ్ పేర్జిన ఇజి మీరు వెహ్నినిదెర్ గదె.

19 అహిజ, మీ సొంత లోకుర్ ఇన్ని దని దనటాన్ దెయమ్కాజ్ పేర్జినార్. అందెజె మీ సొంత లోకుర్నె మీరు తప్పిదెర్ ఇజి రుజుప్కిజినార్.

20 నాను దేవుణు సత్తుదాన్ దెయమ్కాజ్ పేర్త మన్నఇహిజ దేవుణు ఏలుబడిః కినిక మీడగ్రు వాతమనాన్ ఇజి రుజుప్ ఆజినాద్.

21 విజు అయుదమ్కు తొడిఃగిజి ఒరెన్ సత్తుమనికాన్ వన్నిఇల్లు అస్తి విజు కాప్ కితిజి, ఇనికబా సొరిసొన్వద్.

22 గాని వినిజ్ మిస్తి నండె సత్తు మనికాన్ ఒరెన్ వినిజ్ అస్తాండ్రె విని ముస్సు. గెలిస్తిజి, వీండ్రు నమ్మితి అయుదమ్కు విజు వాండ్రు లాగ్గి, విని అస్తి సీబాన సీనాన్.

23 నా దరిజ్ మన్ఇకాన్ నజి పగాతికాన్. నా వెట మంద కిఇకాన్, సెద్రిస్సాన్.

24 ఉండ్రి దెయం ఒరెన్ వన్నిజ్ డిఃస్తి సొహి వెనుక, దనిజ్ మండ్రెజ్ బాడ్డి రెబాజి బయిలుదు బూలాజినాద్. గాని ఎంబెబా దనిజ్ బాడ్డి దొహ్కఇతిజ్, “నాను డిఃస్తి వాతి నా ఇండ్రొ మర్జి సొనాలె”, ఇజి వెహ్నాద్.

25 మర్జి వాతిజ్ అది డిఃస్తివాతికాన్ నెగెండ్ సిపాజి నుబ్బరం కిజి ఇల్లు లెకెండ్, నెగెణ్ మనాన్ ఇజి నెస్తాద్.

26 నస్తివలె అది మర్లి సొన్ని దనిజ్ ఇంక సెఇకెజ్ ఆతి మరి ఏడు దెయమ్కాజ్ కూక్కు తనాద్, అవిక్ వన్ని లోక సొన్ని అబ్బి కినె. అయవలె వన్ని గతి ముందాహి దన్నిజ్ ముస్సు క్లస్ట మానాద్.

27 యేసు యా మాటెజ్ వెహ్ని మహివలె, ఆ మంద లోక మన్ని ఉండ్రి బోదెలి, “నిజి కాస్తి పొసకితి నీ యాయ అంతు సిల్లి సర్ద మంజినికాద్”, ఇజి డటం వెహ్నాద్.

28 అయావలె వాండ్రు, “నిజమనె, గాని దేవుణు మాట వెంజి అయావజ నడిఃని విజెరెబా అంతు సిల్లి సర్ద మంజినికార్”, ఇజి వెహ్నాన్.

29 లోకుర్ మరి నండె కూడిఃతి మహివలె, వాండ్రు ఈహు వెహ్తాన్. “యా తరమ్దికార్ నండె సెఇకార్. వారు ఉండ్రి గుర్తు లెకెండ్ ఉండ్రి బమ్మ అని పణి కితి ఇజి వెన్బాజినార్. గాని దేవుణు ప్రవక్త ఆతి ఓనెజ్ జర్గిదిక ఆఎండ, మరి ఇన్ని గుర్తుబా వరిజ్ తోర్వద్.

30 నినవె పట్టుమ్దివరిజ్ ఓన ఎలాగ ఉండ్రి గుర్తు మహండ్రె అయాలెకెండ్ లోకు మరిసిఆతి నాను యా తరమ్దివరిజ్ ఉండ్రి గుర్తు మనాన్.

31 అక్కరి దినమది తీర్పుదు, దసిణ్ దేసెమ్ది రాణి యా తరమ్ది లోకుర్ వెట నిజ్నాదె వరి ముస్సు నేరం మొప్పాద్. ఎందనిజ్ ఇహిజ, సొలోమోను వెహ్నిని గెణం మన్ని మాటెజ్ వెండ్రెజ్ బూమి కొసాదు మన్ని దని దేసెమ్దాన్ అది వాతాద్. ఏలు సొలోమొనుజ్ మిస్తి పెరికాన్ ఇబ్బె మనాన్.

32 కడెఃవేరి దినమది తీర్పు, ననివె పట్టుమ్ది లోకుర్ యా తరమ్ది లోకుర్ వెట నిల్నారె, వరి ముస్సు నేరం మొప్పాద్. ఎందనిజ్ ఇహిజ, ఓన వెహ్ని బోద వెహారె, వారు పాపమ్కు డిఃసి ఒప్పుకొటార్. ఏలు ఓనెజ్ మిస్తి పెరికాన్ ఇబ్బె మనాన్.

**ఒడొల్ది దీవవందిజ్ వెహ్నినాన్**

33 ఎయెర్బా దీవ కసిసి వెనుక డాఃప్పినొ, తూము ముసిన్ ఇడ్వెర్. గాని లోక వానివరిజ్ జాయి తోర్దెజ్ ఇజి దీవ కంతూదుద్నె ముస్సునె ఇడ్నార్.

34 నీ ఒడొల్ది దీవ లెకెండ్ నీ కణుకు. నీ కణుకు నెగ్రెండ మనివలె, నిజి విజు నుడెఃదెజ్ ఆనాద్. అయాకెజ్ సెఇకెజ్ ఆతిజి, నిజి నుడెఃదెజ్ అట్ఇ.

35 అందెజె సీకటు మన్ఎండ, నాను నెస్తిస్తి నిజమాతి సజతిజ్ ఆతి జాయి మీ మన్నుదు మండ్రెజ్ నుడెఃదు.

36 అందెజె మన్ను పూర్తి అయా జాయిదాన్ నిత్రింతి మహిజ, అయాక నాను నెన్పిస్తి వజ, నెగ్రెండ మీరు బత్తిజినిదెర్ ఇజి తోర్నాద్. ఉండ్రి పెరి జాయి నీ ముస్సు డెఃయితిజి ఎలాగ మంజినాదొ, అయాలెకెండ్ అయా జాయి నాను నెన్పిస్తి వజ మీరు బత్తిజినిదెర్ ఇజి తోర్నాద్.

37 యేసు వర్గిజి వీస్తి వెనుక ఒరెన్ పరిసయు వాండ్రు, వన్ని వెట ఉండెజ్ రఅ, ఇజి కూక్తాన్. అందెజె వాండ్రు లోఇ సోహాండ్రె ఉండెజ్ బస్తాన్.

38 ఉణి ముజాల వాండ్రు యూదురిజ్ మన్ని అలవాటు వజ కియు నోరబావితాన్ ఇజి నెస్తాండ్రె, ఆ పరిసయు వాండ్రు బమ్మఅతాన్.

39 అందెజె ప్రబు ఈహు వెహ్తాన్, “పరిసయురుజాండె, లోకుర్ ముస్కుహాన్ మిడిఃస్తి ఇడ్డి గిన్నెజ్ని సాడువెజ్ లెకెండ మన్నికిదెర్? మీరు మిజిబా వెల్లిహాన్ సుడిఃజ నెగ్గివరి లెకెండ తోరె ఆజినిదెర్. గాని మీ మన్ను సెఇ బుద్దిజాణిజ్, కకుర్తిదాన్ కూడిఃతి ఆసదాన్ నిండ్రితె మన్నె.

40 బుద్ది సిలికిదెరా, ఒడోల్ తయార్ కిత్తి దేవుణునె మీ మన్నుదు మన్ని ఆలోసనమ్కు నెసినికాన్

41 మీరు కనికారం ఆజి, మిజి కల్గితి మన్ని లోఇహాన్ సిల్లి వరిజ్ దాన సిదు. అయావలె దేవుణు ఎద్దు నెగ్గికిదెర్ ఆనిదెర్.

42 పరిసయురుజాండె, అబాయా, మిజి ఎసానో కస్టమ్కు వానెలె. ఎందానిజ్ ఇహిజు, పుదిన, నదాప, విజు కుసెజ్, విజు దనిజ్బా దసం బాగం సిజినిదెర్. గాని మీరు లోకురిజ్ నాయం కిఇదెర్. దేవుణుదిజ్ ప్రేమిన్ఇదెర్. రుండిబా ఉండ్రెలెకెండ కిజి మంజినిక ఇహిజు ఒద్దె నెగ్గెండ మహాద్ మరి.

43 పరిసయురుజాండె, అబాయా మిజి ఎసానో కస్టమ్కు వానెలె. ఎందానిజ్ ఇహిజు, యూదురి మీటిజ్ ఇల్కాజ్ ముకెలమాతి బాడిఃదు బస్తెజ్ మీరు ఆస ఆనిదెర్. సతజ నడిఃమి పెరికార్ ఇజి మాడెఃసె ఆదెజ్ కోరిజినిదెర్.

44 పరిసయురుజాండె, అబాయా, మిజి ఎసానో కస్టమ్కు వానెలె. ఎందానిజ్ ఇహిజు, మీరు తోరెఇ దూకిలెకెండ మంజినిదెర్. లోకుర్ దూకి ఇజి నెన్ఎండ వన్నా ముస్కు నడిఃజినార్.

45 అయావలె యూదురి రూలు నెన్పిస్సాన్ ఒరెన్, “బోదకినికి, నీను యా లెకెండ వెహ్ని మజిబా దుసలాడిఃజిని”, ఇజి వెహ్తాన్.

46 అందెజె యేసు, యూదురు రూలు నెస్పిస్సికిదెరా, అబాయా మిజి ఎసానో కస్టమ్కు వానెలె. ఎందానిజ్ ఇహిజు, లోకుర్ కిదెజ్ సనా కస్టం మన్ని యూదురి రూలుజ్, అలవాటుజ్ వారు కిదెజ్ ఇజి వెహ్నినిదెర్. గాని మీరు వరిజ్ ఉండ్రె డఃడఃస్కు దాన్బా తోడుః కిఇదెర్.

47 యూదురి రూలు నెస్పిస్సికిదెరా, అబాయా మిజి ఎసానో కస్టమ్కు వానెలె. ఎందానిజ్ ఇహిజు, మీ అనిరిజ్ సప్తి ప్రవక్తరి, దూకిజ్ ముస్కు మీరు గుండమ్కు పెర్జిన్దెర్.

48 అయావలె వారు కితిపణివెట మీరు కూడిఃతి మనిదెర్ ఇజి రుజుప్ కిజినిదెర్. సాక్సిర్లెకెండ మనిదెర్ వారు ప్రవక్తరిజ్ సప్తార్. మీరు వరి గుండమ్కు పెర్జినిదెర్.

49 అందెజె, దేవుణు వన్ని గెణమ్దాన్, ‘నాను వరి నడిఃమి ప్రవక్తెజు, అపొస్తుడుజు పొక్కు. వరి లోఇ సెగొండారిజ్ వారు సప్తార్లె. మరి సెగొండారిజ్ మాలెజ్ కినార్లె.

50-51 యా లోకం పుట్టి బాణిజ్ మొదొల్ని లోకుర్ సప్తి విజు ప్రవక్తరి నల్ల వందిజ్ యా తరమ్ది లోకురిజ్ సిక్కు వానాద్. ఇహిజు, ఏబేలు నల దాన్ మొదొల్ని జెకరియ నల దాక. జెక్యెజ్ సంద సుర్ని మాలి పీటని దేవుణు వందిజ్ కేటఅతి గది, దినిజ్ నడిఃమినె సప్తార్. వరిజ్ విజెరిజ్ సప్తికెజ్ విజు యా తరమ్దివరి పణినె ఇజి నాను నిజం మీవెట వెహ్నిన.

52 యూదురి రూలు నెస్పిస్సికిదెరా, అబాయా, మిజి ఎసానో కస్టమ్కు వానెలె. ఎందానిజ్ ఇహిజు, దేవుణు వందిజ్ మన్ని గెణమ్దు నడిఃపిసిని సేహాలది తాలం మీరు అసినిదెర్. మీరు దేవుణుదిజ్ టెటాజ్ నెన్ఇదెర్. దేవుణుదిజ్ నెస్తెజ్ ఆస మన్ని వరిజ్ మీరు అడ్డు కిజినిదెర్.

53-54 వాండ్రు అబెదాన్ సోహి వెనుక, పరిసయిరు యూదురి రూలు నెస్పిస్సికార్ నండో కోపమ్దాన్ వన్నిముస్కు నేరం మొప్తార్. వన్ని వెయ్దాన్ వాని మాటెజు లోఇ తపుజ్ అస్తెజ్ ఇజి నండో సజతిజు వందిజ్ ప్రస్సెజ్ వెనబాజి మహార్.

## 12

1 సస్తివలె వెయుజ్వెయుజ్ లోకుర్ కూడఃజి వాతార్. ఒరెన్దిజ్ ఒరెన్ మట్టె ఆజి మహార్. అయావలె యేసు ముజాలె వన్ని సిసూర్ వెట ఈహు వర్గిదెజ్ మొదొల్స్తాన్. “మాపు నెగ్గికాప్ ఇజి పరిసయిరు తోరె ఆని వేసం, పులాని దూరు లెకెండ మనాద్. అందెజె జాగర్త మండ్రు.

2 డాఃప్తిక మన్నికెజ్ విజు తోరెఆనెలె. నెన్ఎండ ముస్కు మన్నికెజ్ విజు నెసె ఆనెలె.

3 అందెజె మీరు సికటుదు వర్గితికెజ్ జాయిదు వెనార్. ఇహిజు, డాఃజెజు వర్గితికెజ్ విజెరె వెనార్లె. మీరు గదిజు, గిబ్బిదు వర్గితిక మెడెఃజు ముస్కు సాట్నార్లె.

4 నా కూలెజాతి మీ వెట వెహ్నిన, ఒడోల్దిజ్ సప్తి వెనుక మరి ఇనికబా కిదెజ్ అట్ఇ వరిజ్ తియెల్ ఆమాట్.

5 గాని మీరు ఎయెరిజ్ తియెల్ ఆదెజ్ ఇజి నాను నెన్పిన్సు. ఒడొల్దెజ్ సప్తి వెనుక, ఎలాకాలం మంజిని బాడిడు పొక్కెజ్ అతికారం మన్ని వన్నిజ్ తియెల్ ఆదు. నిజమె నాను వెహ్సిన, వన్నిజ్ తియెలాదు.

6 అయ్దు పంట పొటిజ రుండి కాసుదిజ్ పోర్నార్ గదె? గాని వన్కాలోఇ ఉండ్రె దనిజ్బా దేవుణు పోస్ఎన్.

7 మీ బురాది కొప్పు విజుబా దేవుణు లెకిన్త మనాన్. తియెలామాట్. మీరు నండొ పంట పొటిజ మిన్సి విలువ మన్నికిదెర్.

8 నాను మిజి వెహ్సిన, లోకుర్ ముజాలెనజి ఒప్పుకొణి ఎయెవన్నిజ్బా లోకుమరిసి ఆతి నాను దేవుణు దూతెజ ఎద్రు ఒప్పుకొణా.

9 గాని లోకుర్ ఎద్రు నజి నెన్ఎ ఇన్ని వన్నిజ్ దేవుణు దూతెజ్ ఎద్రు నాను బా నెన్ఎ ఇజి వెహ్సా.

10 లోకుమరిసిఆతి నా మున్సు. ఎయెన్బా పడొక మాట వర్గితిజ, దేవుణు వన్నిజ్ సెమిస్సాన్. గాని దేవుణు ఆత్మదిజ్ దూసిన్సి ఎయెరిజ్బా దేవుణు సెమిస్ఎన్.

11 వారు మిజి యూదురి మీటిజ్ ఇల్కాణిజ్ యూదురి అతికారిజ ఎద్రునొ, పెద్దల్జ ఎద్రునొ ఒనార్. అయావలె ఎలాగ మర్జి వెహ్సాజ్, ఇనిక వెహ్సాజ్, ఇనిక వర్గిదిజ్ ఇజి బెజఆమాట్.

12 ఎందానిజ్ ఇహిజ, మీరు వర్గిదిజ్ మనిక అయా గడొయద్నె దేవుణు ఆత్మ మిజి నెన్పిస్సాన్.

### ఆస్తివన్ని బుద్ధిసిల్లి వన్నివందిజ్ నెన్పిసిని కత

13 అయావలె ఆ మందలోఇ ఒరెన్, “బోదకినికిదా, నా బుబ్బ గణస్తి దనిజ్ నజి వానివంతు సీబాజి సీఅ ఇజి నా అన్నెజ్ వెహ్సా”, ఇజి వెహ్సాన్.

14 అయావలె యేసు, “ఒరె, మీ మున్సు. తీర్పు కిని వన్ని వజనొ, సీబాజి సీని వన్ని వజనొ నజి ఎయెన్ నిల్ప్తాన్?”, ఇజి వెహ్సాన్.

15 మరి వరిజ్ వెహ్సాన్, “జాగర్త మండ్రు. ఇని దనిజ్బా లావుఆసెజ్ ఆమాట్. ఎందనిజ్ ఇహిజ, ఎసా ఆస్తిమన్నికాన్ ఆతిజ్బా, వన్ని ఆస్తిలోఇ వన్ని బత్తు ఆవద్. ఇహిజ ఆస్తివన్నిజ్ నిజమాతి బత్తు సివద్.

16 మరి వాండ్రు వరిజ్ కతవజ ఈహు నెన్పిస్సాన్. “ఒరెన్ ఆస్తి మనివన్నిజ్ బూమిదు నండొ పంట పండితాద్.

17 అయావలె వాండ్రు, ‘నా గింజ ఇడెదెజ్ నజి బాడ్డి సాల్వద్. అందెజ్ ఇనిక కిదెజ్?’, ఇజి వన్నిమన్సుదు వాండ్రు ఒడిబితాన్.

18 ఒడిబితాండ్రె, ‘నాను ఈహుకిన. నా గాదిజ్ లాగ్గి పెరికెజ్ కిన్. అబె నా గింజెజ్, మహి సామానమ్కుజ్ విజు ఇడ్జు’, ఇజి వెహ్సాన్.

19 మరి నాను, నా వెట ఈహు వెహ్సా, ‘నజి నండొ పంటెజ్ వందిజ్ నండొ ఆస్తి కుడుంప్త మన్ను. సుకం ఆఅ. ఉణఅ, తిన్అ, సర్ద ఆజి మన్అ’, ఇజి.

20 గాని దేవుణు వన్నిజ్, ఓ బుద్ధి సిలికి, యా రెయునె నీ పాణం లోసిన్. అయావలె నీ వందిజ్ ఇడ్డి మనికెజ్ ఎయెరిజ్ ఆనెలె? ఇజి

21 సొంత బత్తు వందిజ్ ఆస్తి కుడుంప్తి ఎయెరిజ్బా యా లెకెండ్ వానాద్. గాని, దేవుణు ఎద్రు, దేవుణుదిజ్ ఇన్టం ఆనివజ వాండ్రు ఆస్తిమనికాన్ ఆవన్”.

### ఇని దనిజ్బా విసారిస్మాట్.

22 మరి, యేసు వన్ని సిసూర్వెట ఈహు వెహ్సాన్, “అందెజె, నాను మిజి వెహ్సిన, మీరు ఇనిక ఉండెజ్ ఇజి పాణం వందిజ్ విసారిస్మాట్. ఇనిక తొడొగిదెజ్ ఇజి ఒడొల్దెవందిజ్ విసారిస్మాట్.

23 ఎందానిజ్ ఇహిజ, టిండి మున్సు. పాణం ముకెలమతిక. సొక్కెజ్ మున్సు. ఒడొల్ ముకెలమతిక.

24 కాకిజవందిజ్ సుడొదు. అవి విత్ఉ, కొయిఉ, వన్కాజ్ గాదినొ గప్పెజ్నొ సిల్లు. గాని దేవుణు వన్కాజ్ తిండి సీజినాన్. అహిజ పొటిజ మున్సు మీరు ఎసా విలువ మనికిదెర్.

25-26 మీ లోఇ ఎయెన్బా విసారిసి వన్ని బత్తుదిజ్ ఉండ్రె గంటబా కుడుంప్తి మీ వయ్సు పిరిప్తెజ్ అట్నిదెరా? అట్ఇదెర్. యా ఇజ్రి పణికిదెజ్ మీరు అట్ఇదెర్ ఇహిజ మరి ఎందనిజ్ మహి పెరి సజతిజ వందిజ్ విసారిస్సిదెర్.

27 పూజదిజ్ సుడొదు. అవి కన్తబడిఉ. సొక కిదెజ్ నూలుజ్ తయార్ కిఉ. ఆజ్బ విజు ఆస్తి కలిగితి మన్ని సొలోమొన్రొజు యా ఉండ్రె పూజలెకెండ్ సొకు మన్ని ఉండ్రె సొక్కె తొడిగివితాన్ ఇజి నాను మిజి వెహ్సిన.

28 నేండ్రు మంజి విగెహ్జ్ సిసూదు విసిర్ని మడిజు మంజిని గడ్డిదిజ్ యా లెకెండ్ దేవుణు సొకు సితాన్, ఇహిజ ఇజిరి నమకం మన్నికిదెరా మరి ఒద్దె నెగెండ సొకెజ్ మిజిసొక్కెజ్ తొడిగిన్పివెండ్రా?

29 ఇనిక ఉండెజ్, ఇనిక తిండ్రెజ్ ఇన్ని దనిజ్ ఎత్తు కిజి విసారిస్మాట్.

30 ఎందనిజ్ ఇహిజ, దేవుణుదిజ్ నెన్ ఇకార్ నె విన్కు వందిజ్ రెబాజినార్. మిజి యాకెజ్ కావాలె ఇజి మీ బుబ్బాతి దేవుణు నెస్సాన్.

31 గాని దేవుణు మిజి ఏలుబడిః కినాన్ ఇజి ఆసఆదు. అయావలె దేవుణు మిజి కావాలిస్తికెజ్ విజు సీనాన్.

32 ఇజిరిమంద తియెల్ ఆమాట్. దేవుణు, వన్నిబత్తుడు రాజులెకెండ్ ఇట్టి వరిజ్ నెగ్గికెజ్ సిదెజ్ మీ బుబ్బు ఇస్టంఆత మనాన్.

33 మిజి కల్గితి మనికెజ్ పొర్ని బీదవరిజ్ సీదు. అయావలె మీరు దేవుణు మంజిని బాడిఃదు మీ వందిజ్ ఆస్తిగణస్సిదెర్. అబ్బై డొజారి రవన్. కరి తిన్ ఏద్. అందెజె మీ ఆస్తితకు ఆవద్.

34 ఎందనిజ్ ఇహిజ, మీ ఆస్తిఎంబె మనాదొ, అబెనె మీ మన్సుబా మంజినాద్.

35-36 ఎస్తివలెబా పణికిదెజ్ నడుఃము తొహ ఆజి, తయార్ ఆజి మండ్రు. మీ దీవెజ్ ఎస్తివలెబా కసిసి మండ్రు. పెండ్లి విందుదాన్ ఇండ్రొ వాజిని ఎజుమానిజ్ ఎద్రు సుడఃజి మంజిని పణిమణిసిర్ పోలిసి మండ్రు. ఎజుమాని విందుదాన్ వాజి సేప్లా కొత్తివెలె వెటనె సేప్లా వాండ్రు రేనాన్. నన్నివరిజ్ పోలిసి మండ్రు.

37 ఎజుమాని వాతివెలె, వన్ని వందిజ్ తెలి మంజి ఎద్రు సుడఃజి మంజిని పణిమణిసిరిజ్ నెగెద్. నిజమె నాను వెప్పిన, ఎజుమాని, నడుఃము తొహ ఆజి, బోజెనమ్ దిజ్ వాతి వరిజ్ బసె కిజి వరిజ్ తిండి సీనాన్.

38 మదరెయతునొ కోడిఃజామ్ నొ ఎజుమాని వాతివెలె, వన్నివందిజ్ ఎద్రు సుడఃజి తెలి మంజిని వన్నిజ్ నెగెద్.

39 ఎమేణి గడిఃయదు డొజారి వానాన్ ఇజి ఇండ్రొణి ఏజుమాని నెస్తిజ వాండ్రు తెలిమంజి వన్నిఇల్లు బొరో కివిండ సుణాన్ ఇజి మీరు నెస్టు.

40 మీరు నా వందిజ్ ఎద్రు సుడఃజి గడ్డిఃయాదు, లోకు మరిసి ఆతి నాను వాన. అందెజె మీరు బా తయార్ ఆజి మండ్రెజ్ వెలె.

41 అయావలె పేతురు, “ప్రబువా, యా కతవజ మజినె నెన్ పిస్సిదా, విజెరిజ్ నెన్ పిస్సిదా?”, ఇజి యేసుజ్ వెన్ బాతాన్.

42 అందెజె యేసు, “నమకం మని, బుద్దిమని గొత్తి మణిసి ఎయెన్? ఎయెన్ ఇహిజ, ఇండ్రొణి మహి గొత్తియారిజ్ సరిఆతి గడ్డిఃయా సుడఃజి వరి కార్డువజ వరిజ్ దోహక మన్ని తిండి సామనమ్ కు సీదెజ్ ఇజి ఎజుమాని వరిముస్సు. ఏర్పాటు కిత్తికాండ్రె.

43 ఎజుమాని మరజి వానివలె వెప్తివజ పణికితి వన్నిజ్ నెగెద్.

44 అయ ఎజుమాని వన్నిజ్ కల్గితి మన్ని విజు దనిముస్సు. అతికారం మని వన్నిలెకెండ్ వన్నిజ్ కినాన్, ఇజి నాను నిజం వెప్పిన.

45-46 గాని, ఉండ్రీ వేల యా గొతియయెన్, ‘నా ఎజుమాని వాదెజ్ ఆల్ సెం ఆజినాన్’ ఇజి వన్నిముస్సుదు ఒడిఃబిజి, మహి గొతియారిజ్ గొతియాణికాజ్ డెఃయిజినాన్. వాండ్రు ఉణిజి, తింజి సోస్త మహాన్. ఆహా మహిజ్, వాండ్రు ఎద్రు సుడఃజి దినమ్ దు నెన్ ఇ గడిఃయాదు వన్ని ఎజుమాని వానాన్. అయావలె వాండ్రు వన్నిజ్ కత్తి దేవుణుదిజ్ నమ్ ఇ వరివెట వరి వందిజ్ తయార్ కిత్తిమన్ని బాడ్డిదు పొక్కాన్.

47 ఎజుమాని ఇస్టమ్ కు నెసిబా అయావజ కివిండ తయారాజి మన్ ఎండ మన్ని గొతియ వన్నిజ్ నండొ సిక్ససీనాన్.

48 ఎజుమాని ఇస్టమ్ కు నెన్ ఎండ, సిక్సదిజ్ తగితి పణిజ్ కితి వరిజ్ కండెక్ సిక్సనె సీనాన్. ఎయెరిజ్ దేవుణు నండొ సిత్త మనాండ్రొ వన్నిబాణిజ్ నండొ లొస్సాన్. ఎయెన్ బాన్ దేవుణు మరి నండొ ఒపజెప్త మనాండ్రొ, వన్నిబాణిజ్ నండొనె లొస్సాన్.

49 సిసు లెకెండ్ మన్ని దేవుణు సీని సిక్స యా లోకమ్ దు తత్తెజ్ నాను వాతమన. ఆక విజెరిజ్ సుర్ నాద్. ఏలునె సురుదెజ్ మొదొల్ స్తిజ బాగ మంజినాద్, ఇజి ఆస ఆజిన.

50 కస్టం ఇని ఉండ్రీ బాప్తినంబా లాగె ఆదెజ్ మనాద్. ఆక్క పూర్తి కినిదాక నజీ నండొ విసారం మంజినాద్ లె.

51 యా లోకమ్ దు సమాదనం తతెజ్ నాను వాతమన్న ఇజి మీరు ఒడిఃబిజినిదెరా? సిల్లె, కేటకిదెజ్ నె వాత మన్న.

52 ఏలుదాన్ అయ్ దుగురు మంజిని ఉండ్రీ కుటుం వరిజ్ వారి కేట ఆనార్ లె. మువీర్ ఉండ్రీ పడఃకాద్ రివీర్ మరి ఉండ్రీ పడఃకాద్.

53 వారు కేట ఆనార్ లె. అప్పొసి మరిసిజ్ ని, మరిసి అప్పొసి జ్ ని, అయిసి గాల్పిజ్ ని, గాడ్డి దని అయ్ సిజ్ ని, మీమ్ సి దన్ని కొడిఃసిజ్ ని, కొడిఃసి దన్ని మీమ్ సిజ్ ని పడిఃవిండ మంజినాద్ లె.

54 అయావలె వాండ్రు మందలోకుదిజ్ ఈహు వెప్తాన్, “పడఃమటదాన్ మొసాప్ వాతిక సుడఃతిజ పిర్లు వానాద్ లె, ఇజి మీరు వెప్పిదెర్. ఆహా జర్గినాద్.

55 దనిణదాన్ గాలి వాతిజ గొప్ప ఎండ కినాద్ ఇజి వెప్పిదెర్. ఆహా జర్గినాద్.

56 వేసం కినికిదెరా, మీరు బూమిదు ఆగాసమ్దు జర్గినికెజ్ సుడేజి గుర్తు అస్తైజ్ నెస్సిదెర్. మరి ఎందానిజ్ యా కాలమ్దు జర్గినికెజ్ గుర్తు అస్తైజ్ మీరు అట్వండ మంజినిదెర్?

57 ఎవేణిక నాయం ఇజి మిజి మీరె తర్పు కిదెజ్ అట్ఇదెరా?

58 మీ ముస్సు నేరం మొప్తివన్నివెట లాయిరి కోర్టుదు సొన్ని మహివలె నర్దు వన్ని వెట రాజినం ఆదెజ్ సుడేదు. సిలిజ, వాండ్రు మిజి తీర్పు కిని వన్ని డగ్రు ఈడిసి ఒనాన్. తీర్పు కినికాన్ జమాన్జ ఒపజెప్పాన్. వాండ్రు మిజి జెలిదు ఇడ్వాన్.

59 తీర్పు కినికాన్ లొస్సి డబ్బు విజు సీనిదాక జెలిదాన్ వెల్లి వాదెజ్ అట్ఇదెర్ ఇజి నాను మిజి వెప్పిన.

### 13

#### పాపం డిసిసిదు, సిల్లిజ నాసనం వానాద్

1 అయావలె బాన్ మహికార్ సెగొండార్ యేసుజ్, గలీలియాతి సెగొండార్ వరిజ్ వెహ్తార్. ఇనిక వెహ్తార్ ఇహిజ, గలీలియాతికార్ పూజ కిజి మహివలె, పిలాతు వరిజ్ సప్పిస్తాన్. అయావలె పూజసిత్తి నలని లోకుర్నల కూడితాద్.

2 అందెజె యేసు వరిజ్, “వరిజ్ సప్తారె యా లెకెండ్ నండో బాదెజ్ కితార్. అందెజె వారు మహి గలీలియాతి వరి విజెరె ఇంక నండో పాపం కితికార్ ఇజి మీరు ఒడేబిజినిదెరా?

3 సిల్లెద్ ఇజి మీవెట వెప్పిన. గాని మీరు పాపమ్కు డిసిసిదు. సిల్లిజ, మీరు విజెరెబా అయాలెకెండ్ నాసనం ఆనిదెర్.

4 మరి సుడేదు, సిలొయెము ఇని పట్టుమ్దు నిరిండ్ తొహ్తిమన్ని గుడిః ఆర్తిజ్, యెరూసలెమ్దు బత్తిజి మహికార్ పద్వనిమితి మణిసి సాతార్. వారు బత్తిజిని వరి ఇంక నండో సెఇకార్ ఇజి మీరు ఒడేబిజినిదెరా?

5 సిల్లె ఇజి నాను మీ వెట వెప్పిన. గాని మీరు పాపం డిసి సిదు. సిలిజ, మీరుబా అయాలెకెండ్ నాసనం ఆనిదెర్.

6 మరి వాండ్రు కతవజ ఈహు నెస్పిస్తాన్. ఒరెన్ వన్నిజ్ ద్రాక్స టోట మనాద్. అబ్బె వాండ్రు బొడెమరాన్ ఉండ్రి ఉణుస్తాన్. వాండ్రు దన్నిపట్టు రెబాతివెలె ఇనికబా దొహ్కెవతాద్.

7 అందెజె వాండ్రు, ‘ఇదిలో నాను మూండ్రి పంటెజాణిజ్ యా మరాతి పట్టుజ్ రెబాజి వాజిన. గాని ఇనిక బా దొహ్కెవతాద్. దినిజ్ కత్తి విసిర్అ. దిన్నిదనాట్ యా బూమి ఎందనిజ్ పాడాదెజ్?’, ఇజి టోట కావ్ కిని వన్నివెట వెహ్తాన్.

8 అందెజె వాండ్రు, “బాబు యా ఉండ్రి ఏంటు మనిద్. నాను సుటులం కార్సి గతం పొక్కి సూణాట్.

9 అక్కపట్టు అస్తిజ నెగెద్, అన్ఇజ కత్తి విసిర్అ”, ఇజి వెహ్తాన్.

#### విస్త్రాంతిదినమ్దు నడుఃము వజితి ఉండ్రి బోదెలిదిజ్ నెగెణ్ కిజినాన్

10 ఉండ్రి విస్త్రాంతిదినమ్దు, యేసు ఉండ్రి యూదురి మీటిజ్ ఇండ్రో బోద కిజి మహాన్.

11 అబె పద్వనిమితి పంటెజాణిజ్ నడుఃము వక్సి దెయం అస్తి ఉండ్రి బోదెలి మహాద్. దన్ని నడుఃము వజితిజ్, అసల నెగెణ్ నిల్దెజ్ అట్వెద్.

12 యేసు దనిజ్ సుడేతాండ్రె, “రఅ”, ఇజి డగ్రు కూక్తాన్. మరి, “బీబి, నిజి మన్ని కస్టమ్కాణిజ్ నాను డిస్పిన్న”, ఇజి దనిజ్ వెహ్తాన్.

13 మరి దనిముస్సు వన్ని కికు ఇట్టాన్. వెటనె అది నెగెణ్ నిహదె, దేవుణుదిజ్ పొగిడితాద్.

14 విస్త్రాంతి దినమ్దు యేసు నెగెణ్ కితిజ్, యూదురి మీటిజ్ ఇండ్రోణి అతికారి నండో కోపం ఆతాన్. ఆతాండ్రె, లోకురిజ్ పణి కిదెజ్ ఆరు దినమ్కు మనె. అందెజె మీరు ఆ దినమ్కు లొఇ వాజి నెగెణ్ ఆదు. విస్త్రాంతి దినమ్దు రమాట్”, ఇజి వెహ్తాన్.

15 అందెజె యేసు, “ఓ వేసం కినికిదెరా, మీ లొఇ విజెరెబా మీ డాఃనుదిజ్, మీ గాడేదెదిజ్ విస్త్రాంతి దినమ్దు సాలాదాన్, డిసి ఒసి ఏరు సీజినిదెర్ గదె?

16 అహిజ, అబ్రాహముజ్ తెగ్గతి యా బోదెలిదిజ్ పద్వనిమితి పంటెజ్ సయ్తాను తొహ్త ఇట్టా మనాన్. విస్త్రాంతి దినమ్దు దనిజ్ తొహ్కె బాణిజ్ డిస్పిస్తైజ్ కూడేదా?”, ఇజి వరిజ్ వెహ్తాన్.

17 వాండ్రు యా మాటెజ్ వెహ్తెవలె వన్ని పగాతికార్ విజెరె సిగు ఆతారె, మొకొం డిప్తార్. గాని లోకుర్ విజెరె వాండ్రు కితి గొప్ప పెరిపణిజ వందిజ్ సర్ద ఆతార్.

18 మరి యేసు వన్ని లోకురిజ్, “దేవుణు వన్ని లోకురిజ్ కిని ఏలుబడిః ఇన్ని దనిజ్ పొలిత మనాద్. ఇనిదనివెట నాను పొలిన్న?

19 అక్కసర్ను గింజదిజ్ పోలిత మనాద్. ఒరెన్ ఆక ఒతండ్రె వన్ని టోటాదు ఉణుస్తాన్. ఆక పిరిసి మరాన్ ఆతాద్. ఆగాసం ముస్సు ఎగ్రిజిని పొటిజ్ దనికొమెజ ముస్సు గూడుక్ తోహ్కాక్”, ఇజి వెహ్తాన్.

20 మరి వెహ్సినాన్, “దేవుణు వన్ని లోకురిజ్ కిని ఏలుబడిః ఇని దని వెట పోలిత మనాద్?

21 అక్క పులాని దూరుదిజ్ పోలిత మనాద్. ఉండ్రె బోదెలి అక్కబతాదె మరి నండో దూరు వెట కలప్తాద్. వాక్తి దూరుదిజ్బా పులాజ్ కితాద్.

**ఇహ్కూ సరి**

22 యేసు యెరూసలెమ్దు సొండ్రెజ్ ఇజి పయాణం కిజి మహివలె సరి పడఃకాద్ మన్ని నాహ్కాజ్ పట్టుమ్కాజ్ బోదిసి మహాన్.

23 అయావలె ఒరెన్, “ప్రబువా, సెగొండారె దేవుణు సిక్కుదాన్ తప్తె ఆనారా?”, ఇజి వెన్బాతాన్.

24 అందెజె వాండ్రు వరిజ్, “ఇహ్కూ దార్బందరం దాన్ డుగ్దెజ్ నండో కస్టబడిఃదు. ఎందనిజ్ ఇహిజ, నండొండారె సొండ్రెజ్ సుడఃజినార. గాని వారు సొండ్రెజ్ అట్ఎర్ ఇజి మీ వెట వెహ్సిన.

25 ఇండ్రెణి ఎజుమాని నిజ్జి సేహ్లా కెహ్తి వెన్కా మీరు వెల్లినిల్లి, సేహ్లా కొత్తి “బాబు, మజి సేహ్లా రేఅ”, ఇజి వెహ్సినెదెర్. అయావలె వాండ్రు, “మీరు ఎమేణికిదెరో నాను మిజి నెన్ఎ”, ఇజి వెహ్సిన.

26 అందెజె మీరు, “ని వెట మాపు ఉణిజి, తింజి మహాప్. నీను మా వీదిజ బోదిస్తిగదె”, ఇజి వెహ్సినెదెర్.

27 గాని వాండ్రు, “మీరు ఎమేణికిదెరో, మిజి నాను నెన్ఎ. సెఇపణి కిని మీరు విజిదెరె, నా బాణిజ్డిఃసి సొండ్రు”, ఇజి వెహ్సిన”, ఇజి వెహ్తాన్.

28 మరి వాండ్రు, “అబ్రాహము, ఇస్సాకు, యాకొబురిజ్ విజెరె ప్రవక్తరు దేవుణు మంజిని బాడిఃదు వాండ్రు ఏలుబడిః కినివెలె మంజినిక సుడఃజినెదెర్. గాని వాండ్రు మిజి వెల్లి కినాన్. అయావలె, మీరు అడఃబాజి, పల్కు కొహ్కాక్కి ఎలాకాలం సిసు మంజిని బాడ్డిదు మంజినెదెర్.

29 మరి, దేవుణు మంజిని బాడిఃదు వాండ్రు ఏలుబడిః కినివలె, తూర్పుదాన్ పడఃమటదాన్, ఉస్సన్దాన్, దసిణదాన్ నండో యూదురు ఆఇకార్ వాజి వింతుదు బస్సార్.

30 ఇదిలో, పెరికాప్ ఇజి ఒడఃబితికార్ ఇజ్రికార్ ఆనార్. తగిజి మహికార్ ముజాల్ ఆనార్”, ఇజి వెహ్తాన్.

**యేసుయెరుసలెంవందిజ్ దూకమాజినాన్**

31 అయావలెనె, సెగొండారె పరిసయరు వాతారె, “నీను ఇబ్బెణిజ్ సోసి సొన్అ. హెరొదు నిజి సప్తెజ్ సుడఃజినాన్”, ఇజి యేసుజ్ వెహ్తార్.

32 అందెజె వాండ్రు, “మీరు సొన్ని ఆ పాడు కిని నక్కవెట ఈహు వెహ్తు. “నాను నేండ్రు, విగెహిజ్, దెయమ్కాజ్ పేర్జి, కస్టమ్దివరిజ్ నెగెణ్ కిజి, ముఎహి, దినమ్దు పూర్తి కిన.

33 గాని నాను నేండ్రు, విగెహిజ్, ముఎహిజ్ నా సరిదు నాను సొండ్రెజ్వెలె. ఎందానిజ్ ఇహిజ, ప్రవక్త యెరుసలెమ్దిజ్ వెల్లి సాదెజ్ ఆఎన్.

34 ఒ యెరుసలెమ్దు మనికిదెరా, మీరు ప్రవక్తరిజ్ సప్తిదెర్. మీ డగ్రు దేవుణు పొక్తి వరిజ్ పణకాణిజ్ డెయితిదెర్. కొరు దన్నిపిల్లెకాజ్ దన్నిరిక్కెజ్ అడిఃగి ఎలాగ ఇడ్నాదో, అయావజ మిజి డగ్రు కిదెజ్ ఎసోడ్ సుట్కు. నాను ఆస ఆత, గాని నిజి ఇస్టం సిల్లెండ మహాద్.

35 ఇదిలో, దేవుణు వన్ని గుడిఃడిఃసి సొనాన్లె. ప్రబు సెత్తి అతికారమ్దాన్ వాతికాన్ పొగ్డిఃఆనికాన్\* ఇజి మీరు వెహ్సినాక మీరు నజి తోఇదెర్ ఇజి మీ వెట వెహ్సిన.

**14**

**యేసు పరిసయ ఇండ్రె బోజెనమ్దిజ్ సొన్సినాన్**

1 ఉండ్రె విస్త్రాంతి దినమ్దు, యేసు పరిసయరు అతికారిజ ఒరెన్ వన్ని ఇండ్రె బోజెనమ్దిజ్ సొహాన్. అయావలె యేసు ఇనిక కినాండ్రె ఇజి వారు బాగసుడఃజి మహార్.

2 నస్తివలె కిక్కుకాల్కు వాసికాన్ ఒరెన్ వన్ని ఎద్రు మహాన్.

3 యేసు”, విస్త్రాంతి దినమ్దు నెగెణ్ కినిక మీ యూదురిజ్ రూలుజ్ తప్పికాదా సిలికాదా?”, ఇజి పరిసయరుజని యూదురి రూలు నెన్పిస్సివరిజ్ వెన్బాతాన్.

4 గాని వారు అలెత మహార్. అందెజె యేసు అయా జబుది వన్నిజ్ డగ్రు కూక్తాండ్రె, నెగెణ్ కితాండ్రె పొక్తాన్.

\* 13:35 13:35 కీర్తన 118:26.

5 వెనుక వాండ్రు వరిజ్, “మీ లోక ఎయెది బా గాడఁదె గాని కోడిఁ గాని విస్త్రాంతి దినమ్దు గుటాద్ అర్తిజ, దన్నిజ్ వెటనె వెల్లి లాగ్ ఇదెరా?”, ఇజి వెన్ బాతాన్.

6 యా మాటెజ్ వారు మర్జి వెహైజ్ అట్ ఏతార్.

7 వాతి కూలెజ్, విందుదు ముకెలమాతి బాడిఁజ్ సుడఁజి బాన్ బస్తిక సుడఁతాన్. సుడఁతాండ్రె కతవజి ఈహు నెన్ పిస్తాన్.

8-9 ఎయెన్ బా పెండ్లి విందుదిజ్ మిజి కూక్కివెలె, పెరికార్ బస్సిబాడిదు బస్సాట్. ఉండ్రె వేలా మిజి ఇంక పెరివన్నిజ్ వాండ్రు కూక్తాన్సు. వాండ్రు వాతిజ, మీ రిఎరిజ్ కూక్తికాన్ వాజి నిజి, “ఇదిలో, నీ బాడ్డిఁ వినిజ్ సిఅ”, ఇజి వెహ్సాన్. నస్తివలె మీరు సిగు ఆజి వెన్కాహి బాడిఁదు బస్సెజ్ సొనిదెర్.

10 అందెజె మిజి ఎయెన్ బా కూక్తిజ, మీరు సొన్ని వెన్కాహి బాడిఁదు బస్సు. అయావలె మిజి కూక్తికాన్ వాజి, “కూలాయెన్ నీను పెరికార్ బస్సి బాడిఁదు సొన్ని బన్ అ”, ఇజి వెహ్సాన్. అయావలె నీ వెట బస్తివరి ఎద్రు నిజి గొప్ప గవ్వరం వానాద్.

11 వన్నిజ్ వాండ్రె పెరికాన్ ఇజి ఒడఁబిని ఎయె వన్నిజ్ బా దేవుణు ఇజ్రికాన్ కినాన్. వన్నిజ్ వాండ్రె ఇజ్రికాన్ ఇజి తగిజి ఒడఁబిని ఎయె వన్నిజ్ బా దేవుణు పెరికాన్ కినాన్.

12 మరి, యేసు వన్నిజ్ విందుదిజ్ కూక్తి వన్నివెట, “నీను విందు కిదెజ్ ఇహిజ, నీ కూలెజనొ, నీ అన్నారిజ్నొ, నీ నేస్తమ్ కాజ్నొ, నీ పడఁకాద్ మన్ని సంసారిజనొ కూక్తు. ఎందనిజ్ ఇహిజ, ఉండ్రె వేలా వారు నిజి మర్జి కూక్తార్. అయావలె నీను కిత్తిదన్నిజ్ వారు మర్జి కిజినార్.

13 అందెజె నీను విందు కినివెలె, బీదాతి వరిజ్, నీర్ సమ్ దివరిజ్, సొటవరిజ్, గుడ్డివరిజ్ కూక్ అ.

14 ఎందనిజ్ ఇహిజ, మిజి మర్జి సీదెజ్ వారు అట్ ఎర్. అందెజె దేవుణు మిజి దీవిస్తాన్లె. దేవుణు తీర్పు కిని దినమ్దు నీతి మన్ని విజు లోకురివెట నీను సాజి మర్జి నిజ్ ని వెలె, నీను కితి నెగ్గి పణి వందిజ్ దేవుణు మిజి మర్జి సీనాన్.

**పెరివిందు వందిజ్ వెహ్సాన్**

15 వన్ని వెట ఉండెజ్ బస్తిమహి వరిలోక ఒరెన్ యాక విహండ్రె, యేసుజ్, “దేవుణు ఏలుబడిఁ కినిక టెటాజ్ సూణివెలె, విందుద్ ఉణికాన్ అంతు సిల్లి నరద మంజినికాన్ ఆనాన్లె”, ఇజి వెహ్సాన్.

16-17 అందెజె యేసు ఈహు వెహ్సాన్. “ఒరెన్ విందు కిదెజ్ ఇజి వన్ని నండొ కూలెజి కబ్బుజ్ పొక్తార్. విందు తయార్ ఆతిజ్, వన్ని పణిమణిసిజ్ కూక్తాండ్రె, “ఉండెజ్ రదు. విజు తయార్ ఆతె ఇజి కబ్బు కిత్తివరిజ్ సొన్ని వెహ్ అ”, ఇజి పొక్తాన్.

18 గాని కూలెజ్ ఉండ్రె లెకెండొ పణిజ్ వెహ్సి తప్రె ఆతార్. మొదొహికాన్, “నాను ఉండ్రె మడిఁజ్ కొట మన్ను. నాను అయక సొన్ని సుడఁదెజ్ వెలె, నజి సెమిన్ అ ఇజి బతిమార్ జిన”, ఇజి వెహ్సాన్.

19 మరి ఒరెన్, “నాను అయదు సెర్కు డాను కొట మన్ను. ఆకెజ్ నెగెణ్ మనెనొ సిలెనొ ఇజి సుడఁదెజ్ సొన్నిన. నజి సెమిన్ అ, ఇజి బతిమార్ జిన”, ఇజి వెహ్సాన్.

20 మరి ఒరెన్, “నాను ఏలు పెండ్లి ఆత మన్ను. అందెజె వాదెజ్ అట్ ఏ”, ఇజి వెహ్సాన్.

21-22 పణిమణిసి మర్జి వాతండ్రె, యా మాటెజ్ వన్ని ఎజుమానిజ్ వెహ్సాన్. అయావలె అయా ఇండ్రొ ఎజుమాని కొపం ఆతండ్రె, “నీను పట్టమ్ క వీదిజ, సందిజి బేగి సొన్ని బీదాతి వరిజ్, నీర్ సమ్ ది వరిజ్, సొటాది వరిజ్, గుడ్డి వరిజ్ కూక్తి తగ్ అ”, ఇజి పణి మణిసిజ్ వెహ్సాన్. వాండ్రు, “బాబు నీను వెహ్సి లెకెండొ కిత. గాని మరి నండొ బాడ్డి మనాద్”, ఇజి వెహ్సాన్.

23 అయావలె ఎజుమాని, “నా ఇల్లు నిండ్రెదెజ్, నీను నాహ్కా వీదిజ సందిజి సొన్ని లోకురిజ్ ఈడిఁసి తగ్ అ”, ఇజి వన్ని పణిమణిసిజ్ వెహ్సాన్.

24 ఎందానిజ్ ఇహిజ, కూక్తి అయా కూలెజి లోక ఒరెన్ బా ఆ టిండి రుసి నెన్ ఎన్”, ఇజి మీ వెట వెహ్సాన్.

**సిసుడు ఆనికాన్ ఎలాగ మండ్రెజ్ ఇజి వెహ్సాన్**

25 మంద లోకు వన్ని వెట సొన్ని మహివలె వరిదరిజ్ సుడఁజి వాండ్రు ఈహు వెహ్సాన్.

26 “ఎయెన్ బా నా సిసుడుఁ ఆదెజ్ ఇహిజ, నజి ఇంక, వన్ని అయిసి అపొసిజ్ వన్ని ఆలు ని కొడొరిజ్, వన్ని అన్న తంబెరిజ్, వన్ని తజి బీబిజ్ మరి వన్ని సొంత పాణమ్ దిజ్ బా నండొ ప్రేమిస్తెజ్ ఆవద్. వాండ్రు నండొ ప్రేమిస్తెజి, నా సిసుడుఁ ఆదెజ్ అట్ ఏన్.

27 ఎయెన్ బా కస్త్ మకు ఒరిసి సాదెజ్ బా ఇస్టం ఆజి నా వెట వాతిజనె నా సిసుడుఁ ఆనాన్.

- 28 మీ లోక ఎయెన్బా ఉండ్రీ నిరీ గుడిః తోహ్తెజ్ ఆస వాతిజ, వాండ్రు ముజాల బసి, దనిజ్ కర్సు ఎసా ఆనాద్ ఇజి లెక్కసుణాన్. పణి పూర్తి కిదెజ్ వన్ని కీదు మనిక ఆనాదొ, సాల్ఎదొ ఇజి సూణాన్ గదె?
- 29-30 అయక తొవిండ వాండ్రు పునాది పొక్కి, పూర్తి తోహ్తెజ్ అట్ఇతిజ, అక్కసూణికార్ విజెరె, “వీండ్రు తోహ్తెజ్ మొదొల్స్తాన్ గాని పూర్తి కిదెజ్ అట్ఎతాన్”, ఇజి వన్నిజ్ కరాయి ఇనార్.
- 31 ఒరెన్ రాజు మరి ఒరెన్ రాజువెట ఉద్దం కిదెజ్ సొండ్రెజ్ ఇహిజ, వాండ్రు ముజాలె బస్తాండ్రె సుణాన్, ఇరువయ్ వేలుజ్ లోకుర్వెట అయా రాజు వాజినాన్. వన్ని ముస్కు ఉద్దం కిదెజ్ నా పది వెయుజ్ లోకుర్ వెట నాను అట్నానా, సిలెనా ఇజి.
- 32 అట్ఇజ, అయా రాజు దూరం మనివెలెనె సల్వణిజ్ పొక్కి సమాదనం కిదెజ్ వాండ్రు సుణాన్.
- 33 అయలెకెండె, మీ లోక ఎయెన్బా వన్నిజ్ కల్లితికెజ్ డిసెండ మహిజ, నా సిసూడుః ఆవన్.
- 34 సోరు నెగ్గికదె, గాని దనిజ్ మన్ని రుసి సొహిజ, ఎలాగ మరి రుసి తప్పిస్తెజ్ ఆనాద్?
- 35 అయాక బూమిదిజ్ బా గాని గత్తమ్దిజ్ బా గాని పణిదిజ్ రవెద్. అందెజె అయాక వెల్లి విసిర్నార్. గిబ్బిజ్ ఒడఃజి వెండ్రు. అయావజ నడిఃజి మండ్రు”, ఇజి వెహ్నాన్.

## 15

### మురుతి గొర్రె దొహ్క్కినాద్

- 1 ఉండ్రీ నాండిజ్ పన్ను పెర్నికార్ని పాపం కిజినికార్ ఇజి యూదురు సుడఃతికార్ విజెరె వన్ని బోద వెండ్రెజ్ వన్ని డగ్రు కూడిఃత మహార్.
- 2 పరిసయరు ని యూదురి రూలుజ్ నెస్పిస్సికార్, “వీండ్రు పాపం కిజిని వరిజ్ డగ్రు కిజి వరివెట కూడఃజి బోజనం కిజినాన్”, ఇజి సణిజిజ్ తార్.
- 3 అందెజె వాండ్రు వరిజ్ కతవజ నెస్పిస్సాన్.
- 4 “ఉండ్రీ వేల మీ లోక ఒరెన్ వన్నిజ్ వంద గొర్రెజ్ మనె. వన్కాలోక ఉండ్రీ గొర్రె మురుతిజ, వాండ్రు అయా తొమ్బయి తొమెది గొర్రెజ, అడిఃవిదు డిసి మురుతి మని గొర్రెదొహ్క్కిదాక రెబానాన్ గదె?
- 5-6 అది దొహ్క్కివలె సర్ద ఆజి వన్ని గుంజమ్దు పిండిజి ఇండ్రొ తనాన్. మరి వన్ని కూలెజ పడఃకాతి వరిజ్ కూక్కి, “మురుతి మహి నా గొర్రె దొహ్క్కి. అందెజె నా వెట సర్ద ఆదు”, ఇజి వెహ్నాన్.
- 7 అయా వజనె, తొమ్బయి తొమెది మణిసిర్ పాపం ఒప్పుకొండెజ్ అవుసరం సిలి నీతి నిజాయితిదికార్ మనార్. పరి వందిజ్ కల్లిని సర్ద ముస్కు పాపమ్కు డిసి సితి వన్ని వందిజ్ దేవుణు మంజిని బాడిఃదు నండొ సర్ద కల్లినాద్, ఇజి నాను మీ వెట వెహ్నాన్”.

### మురుతి రుపయి దొహ్క్కినాద్.

- 8 “మరి, ఉండ్రీ బోదెల్దిజ్ పది వెండి రుపాయి మహె. వన్కాలోక ఉండ్రీ రుపాయి మురుతిజ, అది దీవ కసిసి, ఇల్లు సిపాజి, అది దొహ్క్కిదాక నెగెండ రెబావదా?
- 9 అక్కదొహ్క్కివెలె దన్ని కూలెజాణిజ్, పడఃకాతి వన్కాజ్ కూక్కి, “నా మురుతి మహి రుపాయి దొహ్క్కిదా. అందెజె నా వెట సర్ద ఆదు”, ఇజి వెహ్నాద్.
- 10 అయావజనె పాపమ్కు డిసి సితి వన్ని వందిజ్ దేవుణు వన్ని దూతెజ ఎద్రు సర్ద ఆజినాన్ ఇజి నాను మీ వెట వెహ్నాన్”.

### తప్పి సొహి మరిసి మర్జి వాజినాన్

- 11 మరి వాండ్రు ఉండ్రీ వెహ్నాన్, “ఒరెన్ వన్నిజ్ రివర్ మరిసిర్ మహార్.
- 12 కొగ్రి మరిసి, “ఓ బా, నీను గణస్తి దన్నిలోక నజి వానివంతు సిదా”, ఇజి అపొసిజ్ లొస్తాన్. అందెజె అపొసి వన్ని ఆస్తి వరిజ్ సీబాత సిత్తాన్.
- 13 సెగం రొస్కు సొహి వెనుక, కొగ్రి మరిసి వన్నిజ్ కల్లితికెజ్ విజు కుడుఃప్పి, నండొ దూరం మన్ని దేసమ్దు సొహాన్. అబ్బె వాండ్రు సెఇ అలవాటుజ ఆతాండ్రె వన్ని ఆస్తివిజు పాడు కిత్తాన్.
- 14 విజు కర్సు కిత్తివెనుక, ఆ దేసమ్దు గొప్ప కరు వాతాద్. వన్నిజ్ ఇనిక బా దొహ్క్ఎతాద్.
- 15 అందెజె వాండ్రు ఆ దేసమ్ది ఒరెన్ వన్ని డగ్రు పణికిదెజ్ సొహాన్. వాండ్రు పండ్రెజ్ మెప్తెజ్ వన్ని మడిఃజి వన్నిజ్ పొక్కిన్.
- 16 పండ్రెజ్ తిని పొడుః తింజి బజ సొన్పిస్తెజ్ ఇజి ఆస ఆతాన్. గాని ఎయెర్బా వన్నిజ్ ఇనికబా సివెతార్.



17 వన్నిజ్ బుద్ధి వాతివెలె వాండ్రు ఈహు ఒడిఃబితాన్, “నా బుబ్బు డగ్రు ఎసాండాలో పణిమణిసిర్ మనార్. వరిజ్ ఉండెజ్ అట్తణ నసానా జావ దొహ్కానాద్. ఇబ్బె నాను బజ సాజిన.

18 నాను ఇబ్బె డిఃసి నా బుబ్బు డగ్రు సొన్ని, ‘ఓ బా, నాను దేవుణుదిజ్ పడఃణ పణి కిత. నీ ఎద్దు పాపం కిత.

19 నీ మరిన్ ఇజి కూకె ఆదెజ్ నాను ఏపటితికాన్ ఆవ. నీ పణిమణిసి ఒరెన్ వన్నిలెకెండె నజీ సుడఃఅ’, ఇజి నాను వెహ్నా”, ఇజి ఒడిఃబితాండ్రె అబెణిజ్ డిస్తాండ్రె వాజినాన్.

20 వాండ్రు దూరం మహివలెనె అప్పొసి వన్నిజ్ సుడఃతాన్. వన్ని పాణం నొతాండ్రె ఉహ్కానీ సొన్ని పొంబితాండ్రె ముదు కిత్తాన్.

21 నస్తివలె వాండ్రు అప్పొసిజ్, “ఓ బా, నాను దేవుణుదిజ్ పడఃణ పణి కిత. నీ ఎద్దు పాపం కిత. నీ మరిన్ ఇజి కూకె ఆదెజ్ నాను ఏపటితికాన్ ఆవ”, ఇజి వెహ్నాన్.

22 గాని అప్పొసి వన్ని పణిమణిసిర్ కూక్తాండ్రె, “సొక్క బేగి తగ్ అ. వినిజ్ తొడిఃగిస్తు. బొందు ఇడఃకిస్తు. పాదమ్కాజ్జోడఃకు తొడిఃగిస్తు.

23 బలిస్తీ దూడః తసి ఓహ్కా. మాటు తింజి సర్ల ఆనాట్.

24 ఎందానిజ్ ఇహిజ, యా నా మరిన్ సాతి లెకెండె మహాన్. మరి ఏలు బత్తితాన్. మురుతి లెకెండె మహాన్. మరి యేలు దొహ్కాన్”, ఇజి వెహ్నాన్. వారు సర్ల ఆజి మహార్.

25 అయావలె పెరిమరిసి మడిఃజ సాహ మహాన్. వాండ్రు మడిఃజాణిజ్ వాజి ఇల్లు డగ్రు వాతివెలె, బాజెజ్ డెఃయిజినిక, కర్జిజినిక వెహ్నాన్.

26 అందెజె వాండ్రు పణిమణిసిర్ లొణ ఒరెన్ వన్నిజ్ కూక్తాండ్రె, ఇనిక జర్గిజినాద్, ఇజి వెన్బాతాన్.

27 అయా పణిమణిసి, “నీ తంబెరి వాతాన్. వాండ్రు నెగ్రెండె మర్జి వాతివందిజ్ నీ బుబ్బు బలస్తి దూడః ఓహ్కాన్”, ఇజి వెహ్నాన్.

28 పెరి మరిసి కోపం ఆతండ్రె, లొణ సాండ్రెజ్ కెవతాన్. అందెజె అప్పొసి వెల్లి వాతండ్రె, లొణ రఅ, ఇజి వన్నిజ్ బతిమార్తాన్.

29 అయావలె వాండ్రు వన్ని అప్పొసి వెట, “ఇదిలో నిసాడు పంటజాణిజ్ ఒరెన్ గొతియయెన్ లెకెండె పణి కిత. ఎసెజ్బా, నీ మాటెజ్ నాను లొజిఎండె మన్విత. నా కూలెజ్వెట సర్ల ఆదెజ్ నీను నజీ ఉండ్రె గొర్రె పిల్లబా సిఇతి.

30 గాని సాని బూలాని వరిజ్ సీజి నీ ఆస్తి విజు పాడు కిత్తి యా మరిసి వాతిజ్ బలస్తి దూడః ఓహ్కా”, ఇజి వెహ్నాన్.

31 అందెజె అప్పొసి, “నా మర్రిన్, నీను ఎస్తివలెబా నా వెటనె మన్ని. నజీ మనికెజ్ విజు నీవి.

32 మాటు విందు కిజి సర్ద ఆనిక నెగెద్. ఎందానిజ్ ఇహిజ, నీ యా తంబెరి సాతి లెకెండె మహాండ్రె, మర్జి నిజితాన్. మురుతి లెకెండె మహాండ్రె దొహ్కాన్”, ఇజి వన్ని వెట వెహ్నాన్.

## 16

### తెలివి మన్ని పెరిగొత్తియవన్ని కత

1 మరి, యేసు వన్ని సిసూర్జ ఈహు వెహ్నాన్. ఒరెన్ సంసారం మన్ని వన్ని ఇండ్రొణి నజతిజ నూణి పెరి గొతియయెన్ ఒరెన్ మహాన్. యా గొతియయెన్ సామనమ్కు పాడు కిజినాన్ ఇజి నేరం మొప్పిక వెహ్నాన్.

2 అందెజె వన్నిజ్ కూక్పిస్తాండ్రె, “నీ వందిజ్ నాను వెంజిని యా మాట ఇనిక? ఇండ్రొణి పణిజ లెక్క తోరిన్ అ. ఎందానిజ్ ఇహిజ, నీను ఏలుదాన్ నా గొతియయెన్ ఆణ”, ఇజి వన్నిజ్ వెహ్నాన్.

3 యాక వెహ్ండ్రె వాండ్రు ఈహు ఒడిఃబితాన్. “నా ఎజుమాని యా పణిదాన్ నజీ లాగ్జినాన్. అందెజె నాను ఇనిక కిడెజ్? కార్తెజ్ అట్ అ. లొసి ఉండెజ్ సిగు వాజినాద్.

4 యా పణిదాన్ లాగ్నివెలె, లొకుర్ నజీ డగ్రు కినిలెకెండె ఇనిక కిడెజ్ ఇజి నాను నెసిన.

5 అందెజె వాండ్రు వన్ని ఎజుమాని బాన్ అప్పు ఒతివరిజ్ ఒరెన్ ఒరెన్ వన్నిజ్ కూక్పిస్తాన్. “నీను నా ఎజుమాని బాణిజ్ ఎసా ఒతిమన్ని?”, ఇజి మొదొహి వన్నిజ్ వెన్బాతాన్.

6 వాండ్రు, “వంద కాయెజ్ నూనె”, ఇజి వెహ్నాన్. అందెజె వాండ్రు, “ఇదిలో నీ సీటి. బేగి బసి యాబయి కాయెజ్ ఇజి రాన్ అ”, ఇజి వెహ్నాన్.

7 వెన్కాహివన్నిజ్, “నీను ఎసా ఒతిమన్ని?”, ఇజి వెన్బాతాన్. వాండ్రు, “వంద తూముజ్ గోదము”, ఇజి వెహ్నాన్. అయావలె వాండ్రు, “ఇదిలో నీ సీటి. ఎనబయి తూముజ్ ఇజి రాన్ అ”, ఇజి వెహ్నాన్.

8 అనెయం కిత్తి యా పెరి గొత్తియయెన్ తెలివందిజ్ ఎజుమాని పొగిడిఃతాన్. ఎందానిజ్ ఇహిజు, వానికాలమ్ది వన్ని బత్సు, వందిజ్ వాండ్రు యా లెకెండ్ కితాన్. అందెజె యేసు, వెస్సినాన్, “దేవుణుదిజ్ నమిజి వాండ్రు వెహ్తి వజ నడిఃనివరి మున్సు, అయా పెరి గొత్తియయెన్ లెకెండ్, యా లోకమ్ది సజతిజ వందిజె ఒడఃబినికారె తెలిమనికార్. వారు వరిలెకెండ్ మన్ని వరివెట కూడఃజి పాడిఃజి మండ్రెజ్ తెలిమనికార్.

9 మీరు యా లోకమ్దు బత్తి.జిని మనివలె ఇబ్బె మిజి మనికెజ్ విజు దని వెట మీరు నెగ్రెండ తెలిదాన్ మండ్రెజ్ సుడఃదు. ఎందనిజ్ ఇహిజు, మీరు మీ బత్సు ఇబ్బె డిఃస్సివలె దేవుణు మిజి వాండ్రు మంజిని బాడిఃదు ఎలాకాలం మండ్రెజ్ డగ్రు కినాన్లె.

10 తక్కు దన్నిమున్సు నమకం మంజినికాన్ లావు దన్నిమున్సుబా నమకమ్దాన్ మంజినాన్. తక్కు దన్నిమున్సు నమకం సిలికాన్, లావు దన్నిమున్సుబా నమకం మన్ఎన్.

11 అందెజె, మిజి మన్ని ఆస్తి నమకమ్దాన్ తొవండ మహిజు, నిజమాతి ఆస్తి ఎయెర్ మిజి ఒపజెప్పార్.

12 పడఃకాతి వరి దన్నిమున్సు నమకమ్దాన్ తొవండ మహిజు, నీ సొంతదిక ఆతి నిజమాతి ఆస్తి ఎయెన్ మిజి సీనాన్.

13 ఎమేణి గొత్తియయెన్బా రిఎర్ యజమానరిజ వందిజ్ఉండ్రె లెకెండ్పణి కిదెజ్ అట్ఎన్. వాండ్రు ఒరెన్ వన్నిజ్ ఇన్ఠం కిఎండ మరి ఒరెన్ వన్నిజ్ ప్రేమిస్సాన్. సిలిజు, ఒరెన్ వన్ని మాట వెంజి నమకమ్దాన్ మంజినాన్. మరి ఒరెన్ వన్నిజ్ దుసలాడఃనాన్. అయలెకెండ్నె దేవుణుదిజ్ ని డబ్బుదిజ్ ఉండ్రె లెకెండ్నె సేవకిదెజ్ మీరు అట్ఇదెర్”, ఇజి వెహ్తాన్.

14 డబ్బు ఆస మన్ని పరిసయరు యా మాటెజ్ విజు వెహరె, వన్నిజ్ వెక్రిస్తార్.

15 వాండ్రు వరిజ్ ఈహు వెహ్తాన్, “లోకుర్ ముజుల మీరు నీతి నిజాయితి మనికిదెర్ ఇజి తొరిస్సిదెర్. గాని దేవుణు మీ మన్సుదికెజ్ నెస్సాన్. లోకుర్ ఎద్రు గొప్ప విలువ మనిక దేవుణుదిజ్ ఇన్ఠం సిల్లికాదె.

16 దేవుణు మోసెజ్ సిత్తి రూలుజ్ని ప్రవక్తరు రాస్తికెజ్ బాప్తిసం సీని యోహాను కాలం దాక బోదిసి మహార్. అబెణిజ్ అసి దేవుణు, వన్నిలోకురిజ్ కిని ఏలుబడిః వందిజ్ సువార్త వెహె ఆజి మహాద్. దేవుణు కిని ఏలుబడిఃదు మండ్రెజ్లోకుర్నండ్రె కన్ఠబడిఃజినార్.

17 ఆగసం బూమి సిల్లెండ ఆదెజ్సులునె, గాని దేవుణు సితి రూలుజది ఉండ్రె గీతబా తప్పి సొన్ఎద్.

18 ఎయెన్బా వన్ని ఆల్లిజ్ డిఃసి మరి ఉండ్రె బోదెల్దిజ్ ఇడ్డెః ఆతిజు, దని వెట వాండ్రు రంకు బూలాజినాన్. మాసిజ్ డిఃస్సి దనిజ్ ఒరెన్ఇడెః ఆతిజు, వాండ్రు రంకు బూలాజినాన్.

**ఆస్తిమన్నికాన్ని లొసిఉణి లాజరు**

19 ఒరెన్ ఆస్తిమన్నికాన్ మహాన్. వాండ్రు నండ్రె కరిది సొక్కెజ్ తొడఃగిజి విజు దినమ్కు సుకం మున్సు మహాన్.

20 లాజరు ఇని లొసిఉణికాన్ ఒరెన్ మహాన్. వన్ని ఒడఃల్కండి విజు పుట్టు మహె. ఆస్తిమన్ని వన్ని ఇండ్రొణి డేవాద్ వన్నిజ్ ఇట్టా మహార్.

21 వన్ని బల్లదాన్ అర్తి జావ పరెజ్ ఉణిజి బజు సొన్పిస్తెజ్ ఆసఆజి మహాన్. నుకుడిఃజ్బా వాజి వన్ని పుట్టు నాక్కి మహె.

22 లొస్సి ఉణికాన్ సాతాన్. దేవుణు దూతెజ్ వన్నిజ్ దేవుణు మంజిని బాడిఃదు అబ్రాహం పడఃకాదు ఒతాన్. ఆస్తిమన్నికాన్బా సాతాన్. వన్నిజ్ ముస్తార్.

23 వాండ్రు అయా లోకమ్దు బాదఆజినె, బుర్ర పెర్జి మున్సు బేస్తాన్. దూరం మన్ని అబ్రాహముజ్ని వన్నిపడఃకాద్ మన్ని లాజరుజ్ సుడఃతాన్.

24 అందెజె వాండ్రు, “బుబ్బి ఆతి అబ్రాహము, నా మున్సు కనికారం తొరిన్అ. నాను యా సిసుదు నండ్రె బాద ఆజిన. అందెజె లాజరు వాజి వన్ని డెఃస్కు ఏరుదు ముడుక్కి నా నాలిక సలెజ్ కిదెజ్ వన్నిజ్ పోక్అ”, ఇజి డేల్లి వెహ్తాన్.

25 అందెజె అబ్రాహము, “మరిన్ నీను బత్తి.తి కాలమ్దు సుకం మున్సు మహి. గాని లాజరు కన్ఠమ్దు మహాన్. ఏలు వాండ్రు ఇబ్బె సుకం దాన్ మనాన్. నీను కన్ఠమ్దు మన్ని.

26 యాకదె ఆవండ, ఇబ్బెణికార్ అబ్బె వాదెజ్ అట్ఎండ, అబెణికార్ ఇబ్బె వాదెజ్ అట్ఎండ మజి నిజి నడిఃమి పెరిజోరె ఇట్టా మనాద్”, ఇజి వెహ్తాన్.

27-28 అయావలె వాండ్రు, “అహిజు, ఓ బా, నజి అయదుగురు దాదార్ మనార్. వారు బా యా కన్ఠమ్కు మన్నిబాడిఃదు రవండ మండ్రెజ్ నా బుబ్బి ఇండ్రె లాజరుజ్ పోక్అ. వాండ్రు సొన్ని వరిజ్ వెహ్తాన్, ఇజి నాను నిజి బతిమాల్జిన”, ఇహాన్.

29 అందెజె అబ్రాహము, “వరి డగ్రు మోసె రాస్తికెజ్, ప్రవక్తరు రాస్తికెజ్ మనె. వారు అయాకెజ్ వెంజి మండ్రెజ్”, ఇజి వన్నిజ్ వెహ్తాన్.

30 వాండ్రు, “బుబ్బాతి అబ్రాహాము, ఆహా వారు కివర్. సాతికాన్ ఒరెన్ వరి డగ్రు సొన్ని వెప్టిజనె, వారు పాపమ్కు డిసి సీనార్”, ఇజి వెప్టాన్.

31 అందెజె వాండ్రు, “మోసె రాస్తి మనికెజ్ ప్రవక్తరు రాస్తికెజ్ వారు వెన్ఎండ మహిజ, సాతికాన్ మర్జి నిజ్జి సొన్ని వెప్టిజ్బా వారు నమ్మివర్”, ఇజి వెప్టాన్.

## 17

1 యేసు వన్ని సిసూర్జి ఈహు వెప్టాన్. “తప్పజ్ కిబిన్ని నజతిజ్ తవ్ఎండ వానెలె. గాని యా నజతిజ్ ఎయెవెట వానెనొ వన్నిజ్ అబాయా, నండో బాద.

2 ఎయెన్బా నా ముస్కు నమకం ఇడ్డి మన్ని యా కొడోః నన్ని ఒరెన్వన్నిజ్ తప్పకిబిస్తెజ్ సుడఃతిజ పెరిసిక్కు వానాద్. దిన్నిముస్కు ఇజిరిసిక్కునె వన్ని మెడఃదు జత్త పణుకు తొప్పొ సందారమ్దు విసీర్నిక. ఆకదె వన్నిజ్ నెగెద్.

3 అందెజె మీ వందిజ్ మీరె జాగర్త మండ్రు. నీ తంబెరినొ, ఎయెన్బా నిజి తప్పు కితిజ, వన్నిజ్ డటం బుద్ది వెహ్అ. వాండ్రు తప్పడిసి ఒప్పకొటిజ వన్నిజ్ సెమిన్అ.

4 ఉండ్రీ దినమ్దు ఏడు సుట్కు వాండ్రు నిజి తప్పజ్ కిజి, ఏడు సుట్కు నీ డగ్రు వాజి ‘నాను తప్పడిసి ఒప్పకొడిఃజిన’, ఇజి వెప్టిజ నీను వన్నిజ్ సెమిన్అ”.

5 నస్తవలె పన్నెండు మణిసి అపొస్తుడుజ, మజి నండో నమకం సిదా”, ఇజి ప్రబుజ్ లొస్తార్.

6 అందెజె వాండ్రు, “మిజి సర్కుగింజ నస్తు నమకం మహిజ, యా మలబరి మరాతిజ్ సుడఃజి, “వెలెజాణిజ్ పెరె ఆజి సందారమ్దు ఉణుసె ఆఅ”, ఇజి వెప్పొ వెలె అది మిజి లొజీనాద్.

7-8 ఉండ్రీ వేల, మీలొఇ ఒరెన్వన్నిజ్ డూదెజ్నొ గొరెజ మేప్టెజ్నొ వెట్టిపణి కినికాన్ ఒరెన్ మనాన్. వాండ్రు మడిఃజదాన్ వాతిజ, “బేగి రఅ, వాజి ఉణఅ”, ఇజి వెప్పొదెరా? సిల్లె, గాని, ‘నుబ్బరం ఆజి వర్అ, నజి బాట సీజి ఉణితిని దాక మన్అ. వెనుక నీను ఉణఅ’, ఇజి వెప్పొదెర్.

9 వన్నిజ్ ఒపజెప్టి పణి కితిజ్ ఎజుమాని వన్నిజ్ వందనమ్కు వెహ్నండ్రా?

10 అందెజె మీరు బా మిజి ఒపజెప్టి పణిజ్ విజు కితి వెనుక, “మాటు పణిమణిసీర్. వందనమ్కు వెహె ఆదెజ్ అవ్నరం సిల్లెద్. మాటు కిదెజ్ మన్ని పణిసె కితాట్”, ఇజి వెప్టాజ్.

### పది మణిసీర్ కుస్తురోగం మన్నికార్ నెగెణ్ ఆజినార్

11 యేసు యెరూసలెమ్దు సొన్ని మహివలె, సమరియ గలిలయ ముట్ట సరిఅద్దుదాన్ సొన్ని మహాన్.

12-13 వాండ్రు ఉండ్రీ నాటొ సొన్ని మహివలె పది మణిసి కుస్తురోగం మనికార్ వన్నిజ్ ఎద్రు వాతార్. వారు దూరం నిహరె, “యేసు ఎజుమాని, మా ముస్కు కనికారం తోరిన్అ”, ఇజి డెడిఃస్తార్.

14 వాండ్రు వరిజ్ సుడఃతాండ్రె, “సొన్ని, మీరు నెగెణ్ ఆతిదెర్ ఇజి పుజెరిజ తోరె ఆదు”, ఇజి వెప్టాన్. వారు సొన్ని మహిజ్ నెగెణ్ ఆతార్.

15 వరిలొఇ ఒరెన్, నెగెణ్ ఆత ఇజి నెస్తాన్. వాండ్రు డటం దేవుణుదిజ్ పొగిడిఃజి మర్జి వాతాన్.

16 వాతాండ్రె యేసుజ్ పాదమ్క ముస్కు ముణుకుజ్ ఊర్జి మాడిఃస్తాండ్రె, వందనమ్కు వెప్టాన్. వాండ్రు సమరియదికాన్.

17 అందెజె యేసు, “పది మణిసీర్ నెగెణ్ ఆతార్ గదె. ఆ తొమెది మణిసీర్ ఎంబె మనార్?

18-19 ఎందానిజ్ వీండ్రు ఒరెండ్రె దేవుణుదిజ్ పొగిడిఃజ్ మర్జి వాతాన్. వీండ్రు యూదురిజ్ సెంద్ఇకాన్. ఇస్తాయెలుదికార్ ఎందనిజ్ తోరె ఆవెతార్?”, ఇజి వెప్టాన్. వెప్టాండ్రె, “నీను నిజ్జి సొన్అ. నీను నా ముస్కు నమకం ఇడ్డి అందెజె నెగెణ్ ఆతి”, ఇజి వన్నిజ్ వెప్టాన్.

### దేవుణు రాజుపజ వానివందిజ్ వెప్పొనాన్

20 ఒర్నెండు, దేవుణు ఏలుబడిః కినిక లోకుర్ ఎసెజ్ సూణార్ ఇజి పరిసయిరు వన్నిజ్ వెన్బాతార్. అందెజె వాండ్రు, “దేవుణు రాజుపజ వాని ముజాల్ తొర్ని గుర్తు ఇనిక సిల్లెద్.

21 దేవుణు మిజి ఏలుబడిః కినిక ఇయేలె మొదొల్స్త మనాన్. అందెజె, ఇదిలో ఇబ్బె మనాద్, అదిలో అబ్బె మనాద్ ఇజి లోకుర్ వెప్పొ గుర్తు ఇనిక సిల్లెద్”, ఇజి వరిజ్ వెప్టాన్.

22 మరి వాండ్రు వన్ని సిసూర్జి వెప్టాన్, “లోకు మరిసి ఆతి నాను గొప్ప అతికారం దాన్ సొకుదాన్ మంజినిక కండెక్ టయం బా సుడఃదెజ్ ఇజి మీరు కోరిజన రొస్కు వానెలె. గాని ఆ రొస్కు లొఇ ఉండ్రీ రోజుబా మీరు తొఇదెర్.

- 23 లోకుర్ మిజి, “ఇదిలో ఇబ్బె మనాన్, అదిలో అబ్బె మనాన్”, ఇజి వెహ్నార్. గాని వరి వెట సొన్మాట్. వరి మాట అస్మాట్.
- 24 ఎందానిజ్ ఇహిజ, ఆగసమ్దు మెరిస్సివెలె ఉండ్రి పడకదాన్ మరి ఉండ్రి పడకాద్ జాయి తోర్నివజనె లోకు మరిసి ఆతి నాను వానివలె మంజినాద్.
- 25 గాని ముజాల యా తరమ్దికార్ నజి నెక్కిపొక్కినార్. వాండ్రు నండో ఇమ్సెజ్ ఒరిస్సెజ్ వెలె.
- 26 నోవాహు కాలమ్దు మహిలెకెండెనె లోకు మరిసి ఆతి నాను వాని ముజాల మంజినాద్.
- 27 నోవాహు ఒడఁదు సొనిదాక లోకుర్ ఉణిజి తింజి మహార్. పెండ్లి ఆజి పెండ్లిదిజ్ సీజి మహార్. నస్తివలె గడ్డ నిండ్రిజి, వరిజ్ విజెరిజ్ నాసనం కిత్తాద్.
- 28 లోతు కాలమ్దు మహిలెకెండెనె, నాను వాని ముజాల మంజినాద్. లోకుర్ ఉణిజి, తింజి, కొడుజి పొర్ని మహార్. పల వాక్కి, ఉణుసి, ఇల్లు తొప్పా మహార్.
- 29 లోతు సొదొమ్ డిఁస్తి సొహి నాండిజ్, ఆగసమ్దాన్ సిను రంజికం పిరు లెకెండె వాజి వరిజ్ విజెరిజ్ నాసనం కిత్తాద్.
- 30 యా లెకెండెనె, లోకు మరిసి ఆతి నాను వాని దినమ్దు జర్గిజి మంజినాద్.
- 31 నాను వాని దినమ్దు, మీద్దె ముస్సు మంజనికాన్ ఇండ్రో మన్ని వన్ని సామనమ్కు ఒతెజ్ డిగ్దెజ్ ఆవద్.
- అయలెకెండెనె మడిఁజ మంజనికాన్ ఇనికబా ఒతెజ్ మర్జి వాదెజ్ ఆవద్.
- 32 లోతు ఆల్సిజ్ ఒడఁబిదు. అది దేవుణు వెహ్తి మాట వెన్ ఇతిజ్ సాతాద్.
- 33 ఎయెన్బా వన్ని సొంత పాణమ్దిజె కాపాడఁదెజ్ సుడఁతిజి వన్నిజ్ ఎలాకాలం దేవుణు వెట బత్కిని బత్కు దొహ్కెవద్. ఎయెన్బా నా వందిజ్ వన్ని పాణం సితిజి, వాండ్రు ఎలాకాలం దేవుణు వెట బత్కిని బత్కు దొహ్కాద్.
- 34 నాను మీ వెట వెహ్సిన, అయా పొదొయి రిఎర్ ఉండ్రి మన్సమ్దు గూర్పార్. ఒరెన్ వన్నిజ్ దేవుణు ఒనాన్. ఒరెన్ వన్నిజ్ డిఁస్సు సొనాన్.
- 35 రుండి బోదెక్ కూడఁజి నూర్జి మంజినె. ఉండ్రి దనిజ్ దేవుణు ఒనాన్. ఉండ్రి దనిజ్ డిఁస్సు సొనాన్.
- 36 రిఎర్ మడిఁజ మంజినార్. ఒరెన్ వన్నిజ్ దేవుణు ఒనాన్. ఒరెన్ వన్నిజ్ డిఁస్సు సొనాన్.
- 37 అయావలె సిసూరు, “ప్రబువా, ఎంబె యాక జర్గినాద్?”, ఇజి వెనబాతార్. వెనబాతిజ్ వాండ్రు, “పీనుగు ఎంబె మంజినాద్ ఇజి నెస్సెజ్ డేగిజ్ ఉండ్రి గుర్తు ఆనిలెకెండె, యేసు వానిక నెస్సెజ్ టెటాజ్ గుర్తుజ్ మన్నె.

## 18

### డిఁస్ఎండ వాతి రాండిబోదెలి కత

- 1 వన్నిసిసూర్ డిఁస్ఎండ ఎస్తివలెబా పార్దన కిజి మండ్రెజ్ ఇజి నేర్పిస్సెజ్ యేసు వరిజ్ కతవజి ఈహు నెస్పిస్తాన్.
- 2 అక్క ఇనిక ఇహిజ, ఉండ్రి పట్నమ్దు ఒరెన్ నాయం కినికాన్ మహాన్. వాండ్రు దేవుణుదిజ్ తియెల్ ఆఇకాన్. లోకాజ్ లసెం కిఇకాన్.
- 3 ఆ పట్నమ్దు ఉండ్రి రాండి బోదెల్ మహాద్. అది వన్ని డగ్రు డిఁస్ఎండ వాజి, “నా ముస్సు పగ ఆతికాన్ ఒరెన్ మనాన్. వాండ్రు నజి సిదెజ్ మనిక సినిలెకెండె నీను నాయం తీరిన్ ఆ”, ఇజి బతిమాలజి మహాద్.
- 4-5 వాండ్రు సెగం కాలం కెవెతాన్. వెనుక వాండ్రు, “నాను దేవుణుదిజ్ తియెల్ ఆఇకాన్. లోకాజ్ లసెం కిఇకాన్. గాని యా ముండ బోదెలి డిఁస్ఎండ వాజి నజి ఏక ఏక లోసినాద్. అందెజె అది మరి మరి వాజి బాద కల్గిన్ఎండ దన్నిజ్ నాయం తీర్స్సు”, ఇజి వన్నిజ్ వాండ్రె వెహ్తాన్.
- 6 మరి యేసు వెహ్తాన్, “విండ్రు, యా నీతి నిజాయితి సిలి నాయం కినికాన్ ఇనిక వెహ్తాన్ ఇజి.
- 7 అహిజ, నీతి నిజాయితి మన్ని దేవుణు, వాండ్రు ఏర్పాటు కితి వన్ని లోకుర్ రెయు పొకాల్ వన్నిజ్ పార్దనం కితిజి, వాండ్రు వరిజ్ నాయం తీర్స్ఎండ మంజినాండ్రా? వాండ్రు ఆల్సెం కినాండ్రా?
- 8 నాను మీ వెట వెహ్సిన, వాండ్రు బేగి నాయం తీర్స్సాన్. గాని లోకు మరిసి ఆతి నాను మర్జి వానివలె, నా ముస్సు నమకం దాన్ మన్ని వరిజ్ సుణానా?

### పరిసయుని పన్నుపెర్ని వన్ని కత

- 9 నెగొండార్ మాపు నీతి మనికాప్ ఇజి వరిజ్ వారె గర్త ఆజి మహివరిజ్ దుసలాడఁతికార్ మహార్. నన్నివరిజ్ వాండ్రు కతవజి నెస్పిస్తాన్.
- 10 “రిఎర్ లోకుర్ పార్దనం కిదెజ్ ఇజి దేవుణు గుడిఁదు సొహార్. ఒరెన్ పరిసయి వాండ్రు ఒరెన్ పన్ను పెర్నికాన్.

11 పరిసయు వాండ్రు సాహాండ్రె, వన్నిలోఇ వాండ్రు ఈహు పార్దనం కితాన్, “ఓ దేవుణు, నాను మహి లోకుర్ లెకెండ్ ఆవ. అసగొటుజు లెకెండ్, అనయం కిని వరిలెకెండ్, రంకు బూలాని వరి లెకెండ్ ఆవ. యా పన్ను పెర్ని వన్ని లెకెండ్బా ఆవ. అందెజె నిజి వందనమ్కు.

12 నాను వారమ్దిజ్ రుండి నుట్టు ఉపాస్ మంజిన. నజి వాజిని విజు దన్నిలోఇబా నిజి దెసం బాగం సీజిన”, ఇజి పార్దనం కితాన్.

13 గాని పన్ను పెర్నికాన్ దూరం నిహన్. వాండ్రు ఆగాసం దరొట్బా బేస్ఎండ, వన్ని గుండె కొత్తె ఆజి, “ఓ దేవుణు, నాను పాపం కితిక. నజి కనికారం తోరిన్అ”, ఇజి వెప్తాన్.

14 నాను మీ వెట వెహ్సిన, పరిసయు వన్ని మున్ను విని పాపమ్కునె దేవుణు సెమిస్తాన్. వీండ్రు దేవుణు ముజాల నీతి నిజాయితి మనికాన్ ఇజి తీర్సె ఆతండ్రె ఇండ్రొ సాహాన్. వన్నిజ్ వాండ్రె పెరికాన్ ఇజి ఒండేబినికాన్ ఎయెన్బా ఇజ్రికాన్ ఆనాన్. వన్నిజ్ వాండ్రె తగిజి ఇజ్రికాన్ ఇజి ఒండేబినికాన్ ఎయెన్బా పెరికాన్ ఆనాన్.

**ఇజిరికొడొరిజ్ యేసుడగ్రు కిజినాన్**

15 సెగొండార్, యేసుడగ్రు ఇజిరి బయిరిజ్బా తసి మహార్. వరిమున్ను వన్నికికు ఇడ్దెజ్ ఇజి తత్తార్. అక్క నుండేతారె సిసూర్ వరిజ్ జటిజ్ ఆతార్.

16 గాని యేసు, కొడొరిజ్ వన్ని డగ్రు కూక్తాన్. కూక్తాండ్రె, “యా ఇజ్రి కొడొరిజ్ నా డగ్రు రపిర్. వరిజ్అడు కిమాట్. ఎందానిజ్ ఇహిజు, యా కొడొరిజ్ లెకెండ్ మనికారె దేవుణు ఏలుబడిః కినివెలె మంజినార్.

17 నిజమె, మీ వెట వెహ్సిన, ఇజ్రి కొడొరిజ్ నమ్మిని వజ, దేవుణుదిజ్ నమినికార్ దేవుణు ఏలుబడిఃదు మజినార్. నమ్మిఇకార్ మండ్రెజ్ అట్ఎర్”.

**ఒరెన్ అస్తిమన్నికాన్ యేసువెట వర్గిజినాన్**

18 ఒరెన్ అతికారి యేసుజ్ నుండేజి, “ఓ నెగ్గి బోదకినికి, ఎలాకాలం దేవుణువెట బత్కిని బత్కు దొహ్కిద్ఇహిజు, నాను ఇనిక కిదెజ్?”, ఇజి వెన్బాతాన్.

19 అందెజె యేసు, “నాను నెగ్గికాన్ ఇజి ఎందనిజ్ నీను వెహ్సిన దేవుణు ఒరెండ్రె నెగ్గికాన్. మరి ఎయెన్బా నెగ్గికాన్ ఆవెన్”, ఇజి వెప్తాన్.

20 మరి వన్నిజ్, “రంకు బూలామా. లోకుదిజ్ సవ్మా. డొజు కిమ. అబద సాక్కి వెహ్మా. నీ యాయ బుబ్బెజ్ గవ్ఠమ్దాన్ నెగెండ నుండేఅ\* ఇని మోసె సిత్తి ఆడ్రెజ్ నెసినిగదె”, ఇజి వెప్తాన్.

21 వెప్తాజ్ వాండ్రు, “ఇజ్రివెలెహాన్ అసి యా విజు వన్మాజ్ లొజీజిన వాజిన”, ఇజి వెప్తాన్.

22 యేసు యాక వెహాండ్రె వన్నిజ్, “మరి ఉండ్రి బా నీన్ కిదెజ్ మనాద్. నిజి కల్గితిమనికెజ్ విజు పొర్ని అయా డబ్బుజ్ బీద వరిజ్సిఅ. అయావలె దేవుణు మంజిని బాడిఃదు నిజి సంసారం మంజినాద్. మరి, నీను వాజి నా సిసూడుః ఆఅ”, ఇజి వెప్తాన్.

23 యా మాటెజ్ వెహిజ్, వన్ని మొకొం ఇజ్రిక ఆతాద్. ఎందనిజ్ ఇహిజు, వాండ్రు నండ్ ఆస్తిమనికాన్.

24 యేసు వన్నిజ్ నుండేజి, “ఆస్తిమనికార్ దేవుణు కిని ఏలుబడిఃదిజ్ అడిఃగి మండ్రెజ్ ఎసొనొ కస్టం.

25 ఒరెన్ సంసారం మనికాన్ దేవుణు కిని ఏలుబడిఃదిజ్ అడిఃగి మన్ని దని మున్ను ఉండ్రి ఒంటె దొబానం బొరొదాన్డుఃగ్దెజ్ సూలు ఆనాద్”, ఇజి వెప్తాన్.

26 అయావలె యా మాటెజ్ వెహికార్, “అహిజు, దేవుణు రక్కిస్తి లెకెండ్ ఎయెర్ మండ్రెజ్ అట్వార్?”, ఇజి వెన్బాతాన్.

27 అందెజె యేసు, “లోకు కిదెజ్ అట్ఇక దేవుణు కిదెజ్ అట్వాన్”, ఇజి వెప్తాన్.

28 నస్తివలె పేతురు, “ఇదిలో, మాపు మజి కల్గితి మనికెజ్ విజు డిఃస్తాపె నీ వెట వాతాప్”, ఇజి వెప్తాన్.

29-30 అందెజె యేసు, “ఒరెన్ వన్ని మున్ను దేవుణు ఏలుబడిః కిదెజ్ ఇజి ఇల్లుదిజ్బా ఆల్పిజ్బా, దాద తంబెరిజ్బా అయిసి అప్పొసిరిజ్బా కొడొరికొదాదిజ్బా, డిఃస్తికాన్ ఎయెండ్రొ వన్నిజ్ యేలు మరి నండ్ కల్గినాద్. వాని కాలమ్దు వన్నిజ్ ఎలాకాలం దేవుణు వెట బత్కిని బత్కుదు బా మంజినాద్, ఇజి కసితం నాను మీ వెట వెహ్సిన”, ఇజి వెప్తాన్.

**యేసు వన్ని సాపువందిజ్ సిసూరిజ్ వెహ్సినాన్**

31 యేసు వన్ని పన్నెండు మణిసిర్ సిసూరిజ్ కూక్కి వరిజ్ ఈహు వెప్తాన్. “ఇదిలో మాటు యెరూసలెమ్దు సొన్నినాట్. లోకు మరిసి ఆతి నా వందిజ్ ప్రవక్తరు రాస్తి విజు మాటెజ్ అబ్బె పూర్తి ఆనాద్.

\* 18:20 18:20 నిర్గమ 20:12-16, ద్విత్తి 5:16-20.

32-33 యూదురు ఆఇ వరి కీదు నాను ఒపజెపె ఆన. వారు నజీ వెక్రిసి సిగు లాగ్లి, నా ముస్కు పూసి కొరెడెజాణిజ్ డెయిజి సప్పార్. మూండ్రి దినమ్కాజ్ నాను మర్జి నిక్పె ఆనాలె.

34 గాని సిసూరిజ్ యా మాటెజ లొఇ ఉండ్రిబా అర్దం ఆవతార్. దిన్ని అర్దం వరిజ్ డాజెతాద్. వాండ్రు వెప్తి సజతిజ్ వారు నెన్వితార్.

**గుడ్డి వాండ్రు బేస్తెజ్ అట్సినాన్**

- 35 యేసు యెరికొ పట్టుమ్దిజ్ డగ్రు వాతివెలె, ఒరెన్ గుడ్డి వాండ్రు సరి పడెకాద్ బసి లొసి మహాన్.
- 36 సేన లోకుర్ అయా సరిదాన్ సొన్ని మహిక, వెహండ్రి, ఇనిక జర్గిజినాద్ ఇజి వెనబాతాన్.
- 37 వారు వన్నిజ్, “నజరతు వాండ్రు ఆతి యేసు, సొన్సినాన్”, ఇజి వెప్తార్.
- 38 వాండ్రు, “ఓ దావీదు మరిసి ఆతి యేసువా, నా ముస్కు కనికారం తోరిన్అ”, ఇజి డటం డేల్స్తాన్.
- 39 ముజాలె సొన్ని మహికార్, “అలెఅ”, ఇజి వన్నిజ్ కనితం వెప్తార్. గాని వాండ్రు మరి నండ్రి దావీదు మరిసి, నా ముస్కు కనికారం ఆఅ”, ఇజి మరి ఒదె డటం డేల్స్తాన్.
- 40-41 యాక వెహండ్రి యేసు అబ్బె నిహాన్. “అయా గుడ్డి వన్నిజ్ నా డగ్రు తగ్అ”, ఇజి వరిజ్ డటం వెప్తాన్. వాండ్రు వాతిజ్, నాను నిజి ఇనిక కిదెజ్ ఇజి కోరిజి?”, ఇజి వన్నిజ్ వెన్బాతాన్. దనిజ్ వాండ్రు, “ప్రబువా, నాను బేస్తెజ్ ఇజి ఆస ఆజిన”, ఇజి వెప్తాన్.
- 42 అందెజె యేసు, “ఇదిలో నీను సూణిలె. నీను నా ముస్కు నమకం ఇడ్డి. అందెజె నెగెణ్ ఆతి”, ఇజి వెప్తాన్.
- 43 వెటనె వాండ్రు బేస్తెజ్ అట్టాన్. వాండ్రు దేవుణుదిజ్ పొగిడిజి యేసువెట సొహాన్. యాక సుడెతిజ్ లోకుర్ విజెరెబా దేవుణుదిజ్ పొగిడితార్.

**19**

**జకయ ఇని పన్ను పెర్ని వన్నిజ్కూక్కినాన్**

- 1 యేసు నడిజి యెరికొ పట్టుమ్దు వాతండ్రి అయా సరిదాన్ సొన్ని మహాన్.
- 2 జెకయ ఇన్ని ఒరెన్ అబ్బె మహాన్. వాండ్రు పన్ను పెర్ని వరిజ్ నెయ్కి. వాండ్రు గొప్ప ఆస్తిమన్నికాన్.
- 3 యేసుజ్ సుడెదెజ్ ఇజి వాండ్రు కోరితాన్. గాని నండ్రి లోకుర్ మహిజ్ వన్నిజ్ సుడెదెజ్ అట్వెతాన్. ఎందనిజ్ ఇహిజ, వాండ్రు కురికాన్.
- 4 యేసు అయా సరిదాన్ వాజి మహిజ్, వాండ్రు ముజాల్ ఉహ్కీ సొన్ని ఉండ్రి బొడ్డె మరాత్ ఎక్తాన్.
- 5 యేసు మరాన్ అడిగి వాతివెలె, ముస్కు బేసి, “జెకయ, బేగి డిగ్జి రఅ. నేండ్రు నాను నీ ఇండ్రి మండ్రిజ్ వెలె”, ఇజి వన్నిజ్ వెప్తాన్.
- 6 అందెజె వాండ్రు గజిబిజి డిగితాండ్రి వన్ని ఇండ్రి కూక్ ఒతండ్రి సర్దదాన్ డగ్రు కిత్తాన్.
- 7 యాక సుడెతారె, లోకుర్ విజెరె సణిజెతార్. “వీండ్రు, పాపం కిని వన్ని ఇండ్రి కూల సొహాన్”, ఇజి.
- 8 అయావలె జెకయ నిజెతండ్రి, యేసుజ్ ఈహు వెప్తాన్. “ఇదిలో ప్రబువా, యేలు నా ఆస్తి లొఇ సగం బీదవరిజ్ సీజిన. అనయమ్దాన్ ఎయె బాన్బా ఇనిక లొస్తిజ, నాను దని నాల్లి వంతు మర్జి సీన”, ఇజి వెప్తాన్.
- 9 యేసు వన్నిజ్, “నేండ్రు యా ఇండ్రిణి వరి పాపమ్కు దేవుణు సెమిస్త మనాన్. ఎందానిజ్ ఇహిజ, విన్ని అనిసిఆతి అబ్రాహము దేవుణు ముస్కు నమకం ఇడ్డి వజ, వీండ్రుబా నమకం ఇట్టాన్.
- 10 లోకు మరిసి ఆతి నాను పాడాజి సొని వరిజ్ రెబాజి రక్సిస్తెజ్ వాత”, ఇజి వెప్తాన్.

**పణిమణిసిర్ కత్త**

- 11 లోకుర్ యాకెజ్ వెంజి మహార్. వాండ్రు యెరూసలెం డగ్రు ఆతాన్. దేవుణు రాజు వజ వెటనె వానాన్లె ఇజి లోకుర్బా ఒడెజెతార్. అందెజె వాండ్రు కత్త వజ వరిజ్ ఈహు నెన్పిస్తాన్.
- 12 ఒరెన్ రాజు వజ కుటుమ్దికాన్ వన్ని దేసమ్దు రాజు ఆదెజ్ ఇజి ఉండ్రి దూరం మని దేసెం సొహాన్. మరి, మర్జి వాదెజ్ ఇజి సొహాన్.
- 13 సొని ముజాల, వన్ని పణిమణిసిర్ లొఇ పది మణిసిర్ కూక్కి ఒరెన్ ఒరెన్ వన్నిజ్ ఉండ్రి మీనా\* సిత్తాన్. సితాండ్రి, “నాను మర్జి వాని దాక బేరం కిజి మండ్రు”, ఇజి వరిజ్ వెప్తాన్.
- 14 గాని వన్ని పట్టుమ్దికార్ వన్నిజ్ ఇస్టం సిలెతాద్. అందెజె వారు, “వీండ్రు మజి ఏలుబడికి కిదెజ్ మజి ఇస్టం సిల్లెద్”, ఇజి వన్ని వెనుక పెరి రాజుజ్ కబ్బు పొక్తార్.

\* 19:13 19:13 ఉండ్రి మీనా మూండ్రి నెలెజ పణిదిజ్ కూలి

15 అహిజ్బా, వాండ్రు రాజు ఆతాన్. మర్జి వాతివెలె, వాండ్రు డబ్బు సిత్తి మణిసిర్, అయా డబుదాన్ బేరం కిజి ఇనిక గణస్తార్ ఇజి నెస్తిజ్ వరిజ్ కూక్పిస్తాన్.

16 వరిలో ఇ మొదోహికాన్ వన్ని డగ్రు వాజి, “బాబు, నీను సితి యాబయి రుపాయుజాణిజ్, అయ్దు వందెజ్ రుపయిజు వాతె”, ఇజి వెహ్తాన్.

17 వాండ్రు, “నెగ్గి పణిమణిసి నీను నెగెండ కితి. నీను ఇజ్రి పణిదు నమకం దాన్మహి. అందెజె పది పట్టుమ్క ముస్సు అతికారి ఆఅ”, ఇజి వెహ్తాన్.

18 అయావలె మరి ఒరెన్ వాజి, “బాబు, నీను సితి యాబయి రుపాయుజాణిజ్ రుండి వందెజ్ యాబయి రుపాయ్జు వాతె”, ఇజి వెహ్తాన్.

19 నీను బా అయ్దు పట్టుమ్క ముస్సు అతికారి ఆఅ”, ఇజి వెహ్తాన్.

20-21 అయావలె మరి ఒరెన్ వాజి, “బాబు, ఇదిలో నీ డబ్బు. నీను నీది ఆఇక ఒనికి. నీను విత్ఇకెజ్ కొయ్జి ఒనికి. నీను గటి పాణం మనికి. అందెజె నిజి తియెల్ ఆజి యా డబ్బు రుమాలదు మూట తోహక్త ఇల్తా మహా”, ఇజి వెహ్తాన్.

22-23 అందెజె వాండ్రు వన్నిజ్ వెహ్తాన్, “పణిదిజ్ రఇ పణిమణిసి, నీ వెయిది సొంత మాటదిజ్నె, నాను నిజి తీర్పు తీర్సిన. నాను నాది ఆఇదనిజ్ పెర్ని ఒనికాన్ ఇజి, నాను విత్ఇకెజ్ కొయ్జి ఒనికాన్ ఇజి నీను నెస్సి గదె. నాను గటి పణం మనికాన్ ఇజి నీను నెస్సి. మరి ఎందనిజ్ నా డబ్బు బెంకుదు ఇడెఇతి? అహు ఇడ్డిక ఇహిజ, నాను మర్జి వాతివెలె వడ్డిదాన్ దోహక్తాద్ మరి.

24 విన్నిబాన్ మన్నిడబ్బు లాగి పది పట్టుమ్కాజ్ అతికారి ఆతి మొదోహివన్నిజ్ సీదు”, ఇజి పడకాద్ నిహి మహి వరిజ్ వెహ్తాన్.

25 వారు, “బాబు, వన్నిజ్ అయ్దు వందెజ్ రుపాయ్జు మనె గదె”, ఇజి వెహ్తాన్.

26 వెహ్తాజ్ వాండ్రు, “నమిదెజ్ తగ్గి వన్నిజ్ మరి నండొ కల్గినాద్లె. గాని నమిదెజ్ తగ్గి వన్నిజ్ కల్గితి మన్ని కండెక్బా లగ్నాన్, ఇజి నాను మీ వెట వెహ్సిన.

27 మరి, నాను వరి ముస్సు ఏలుబడిః కిదెజ్ ఇస్టం సిల్లి నా పగ ఆతి వరిజ్ ఇబ్బె తగ్గి. వరిజ్ నా ఎద్రు కత్తు”, ఇజి వెహ్తాన్.

28 యేసు యా మాటెజ్ వెహ్తా వెనుక, యెరుసలం సొండ్రెజ్ వరి ముజాల సొన్సినాన్.

29-30 ఒలివ గొరొణ్ డగ్రు మన్ని బెత్సెగె, బెతానియ ఇని నాహ్కాజ్ డగ్రు వాతాన్. వాతివెలె వన్ని సిసూర్ లొఇ రిఎరిజ్ కూక్పి, “మీ ఎద్రు మన్ని నాటొ సొండ్రు. అబె సొహిజ సరి, తోహక్త మని గాడఃదె పిల్ల తోర్నాద్. దన్నిముస్సు ఎనెజ్బా ఎయెర్బా బన్ఎరె. దనిజ్ కుత్సి పేర్జి తగాట్.

31 ఎయెన్బా, “మీరు ఎందనిజ్ దనిజ్ కుత్సినెదెర్, ఇజి వెన్బాతిజ, యాకెజ్ ప్రబుజ్ కావాలి, ఇజి వరిజ్ వెహ్తాన్”, ఇజి వెహ్తాండ్రె పోక్తాన్.

32 పోక్తి మనికార్ సొన్సి వాండ్రు వరిజ్ వెహ్తా లెకెండెనె సుడఃతార్.

33 వారు ఆ గాడఃదె పిల్లదిజ్ కుత్సి మహిజ్, దన్ని ఎజుమాసుర్, “మీరు ఎందనిజ్ గాడఃదె పిల్లదిజ్ కుత్సినెదెర్”, ఇజి వెన్బాతార్.

34 అందెజె వారు, “యాక ప్రబుజ్ కావాలి”, ఇజి వెహ్తాన్.

35 వారు యేసుడగ్రు తత్తార్. తత్తారె, దన్నిముస్సు వరి పాతెజ్ పహ్తార్. యేసుజ్ దని ముస్సు ఎకిస్తార్.

36 వాండ్రు సొన్సి మహిజ్, వరి పాతెజ్ సొన్సినె సర్దు పహ్తార్.

37 ఒలివ గొరొణ్ డిఃగ్ని వాని సర్దు వాతివెలె, వన్ని సిసూర్ ని వన్ని వెట మన్ని మంద లోకుర్ విజెరె దేవుణుదిజ్ పొగిడిఃతార్. వారు సుడఃతి విజు గొప్ప పణిజ వందిజ్ సర్దాన్ దేవుణుదిజ్ డటం పొగిడిఃతార్. వారు ఈహు పొగిడిఃతార్.

38 “దేవుణు సితి అతికారమ్దాన్ వాజిని రాజుజ్ పొగ్గెః ఆనికాన్†. పరలోమ్దు సమాదనం మనాద్. ముస్సు మన్ని దేవుణు గొప్ప పెరికాన్”,

39 నస్తివలె ఆ మంద లొఇ మన్ని సెగొండార్ పరిసయ్రుజు, “ఓ బోదకినికి, నీ మంద సిసూర్ విజెరిజ్ అలెజి మండ్రు ఇజి డటం వెహ్అ”, ఇజి వెహ్తాన్.

40 అందెజె వాండ్రు, “వీరు అల్లెత మహిజ, యా పణుకుజ్ డటం డేల్సి పొగిడిఃజినె ఇజి నాను మీ వెట వెహ్సిన”, ఇజి వెహ్తాన్.

† 19:38 19:38 కీర్తన 118:26.

41-42 వాండ్లు యెరూసలెం పట్నం డగ్గు వాతండ్రె, పట్నమ్దిజ్ సుడఃజి అబ్బె మన్ని లోకుర్ వందిజ్ అడఃబతాన్. అడఃబతాండ్రె ఈహు వెహ్లాన్, “మీరు యా దినమ్దు బా సమాదనం ఆని సజతిజ నెస్తిజ మిజి ఎసానో మేలు మంజినాద్. గాని యేలు యాకెజ్ మీ కణకాజ్ తోర్ఎండ డాజిత మనె.

43-44 దేవుణు మిజి రక్సిస్తెజ్ మీ డగ్గు వాతి కాలం మీరు నెన్ఇదెర్. అందెజె మీ పగ్ఆతికార్ మీ సుటులం కోట తోహ్కీ వెల్లి సాన్ఎండ, లావు అడ్డుజ్ కినార్. వారు మిజి, మీ పట్నమ్దిజ్ పూర్తి నాసనం కినార్. వారు పణుకు ముస్సు పణుకు మన్ఎండ పట్నం పూర్తి నాసనం కిని కాలం వానాద్లె.

**యేసు గుడిదాన్ సవ్కారిజ పేర్జినాన్**

45-46 యాకెజ్ వెహ్లాండ్రె, వాండ్లు దేవుణు గుడిదు సాహాన్. అయావలె అబ్బె సవ్కారిజు పొర్తి మహార్. వరిజ్, “నా గుడిః పార్దనం కిదెజ్ ఇడ్డి గుడిః‡ ఇజి దేవుణు మటదు రాస్త మనాద్. గాని మీరు డొజారి మంజిని సాలంకీ లెకెండ్ దనిజ్ కితిదెర్”, ఇజి వెహ్లాండ్రె వరిజ్ పేర్దాన్.

47 యేసు రోజు, గుడిదు బోదకిజి మహాన్. పెరిపుజెరిజు, యూదురి రూలుజ్ నెస్పిస్పికార్, లోకుర్ లొఇ మన్ని పెద్దెల్జు వన్నిజ్ సప్తెజ్ సుడఃజి మహార్.

48 గాని లోకుర్ విజెరె వన్ని మాటెజ్ బాగ వెంజి వన్ని సుటులం మహిజ్, వన్నిజ్ సప్తెజ్ అట్ఎతార్.

**20**

**యేసు అతికారం వందిజ్ వెన్బాజినార్**

1 అయా దినమ్కలొఇ ఉండ్రి నాండిజ్, వాండ్లు దేవుణు గుడిదు లోకాజ్ నేర్పిసి, సువార్త బోదిసి మహాన్. అయావలె పెరి పుజెరిజు ని యూదురి రూలుజ్ నెస్పిస్పికార్, పెద్దెల్జు వెట కూడఃజి వన్ని ముస్సు వాతాద్.

2 నీను ఇనిఅతికారమ్దాన్ యా పణిజ్ కిజిని? ఎయెన్ నిజి యా అతికారం సితాన్? మజి వెహ్అ”, ఇజి వన్నిజ్ వెన్బాతార్.

3 అందెజె వాండ్లు, “నాను బా మిజి ఉండ్రి మాట వెన్బానా.

4 బాప్తిసం సీదెజ్ అతికారం యోహానుజ్ ఎయె బాణిజ్ వాతాద్ దేవుణు బాణిజ్నా లోకు బాణిజ్నా నజి యేలు వెహ్లా? ఇజి వెహ్లాన్.

5 వరిలొఇ వారు ఈహు వర్గితార్. దేవుణు బాణిజ్ వాతాద్ ఇజి మాటు వెహ్తిజు, ఎందనిజ్ మీరు వన్నిజ్ నమ్ఇతిదెర్ ఇజి వాండ్లు వెన్బానాన్.

6 లోకురి బాణిజ్ ఇజి మాటు వెహ్తిజు, లోకుర్ విజెరె మజి పణకాణిజ్ డెయినార్. ఎందనిజ్ఇహిజు, యోహాను, ఒరెన్ దేవుణు ప్రవక్త ఇజి విజెరె పూర్తి నమ్మిజినార్.

7 అందెజె వారు, “అయాక ఎంబెణిజ్ వాతాదొ మజి తెలిఎద్”, ఇజి వారు మర్జి వెహ్లార్.

8 అహిజు, ఎంబెణి అతికారమ్దాన్ నాను యా పణిజ్ కిజిని ఇజి నాను బా వెహ్ఎ”, ఇజి యేసు వరిజ్ వెహ్లాన్.

**రయుజు కత**

9 మరి, వాండ్లు ఉండ్రి కత వజు లోకురిజ్ నెన్పిస్తాన్. “ఒరెన్ లోకు ద్రాక్కు టోట ఉణుస్తాన్. ఆ టోట సెగొండార్ రయ్తూజు తనక సితాన్. సితండ్రె నండ్ కాలం మండ్రెజ్ ఉండ్రి దూరం దేసెం సాహాన్.

10 పంట కొయ్ని కాలమ్దు వన్నిజ్ వాని పట్కుజు వంతు లొసి తగ్అ ఇజి ఒరెన్ గొతియ వన్నిజ్ రయ్తూజు డగ్గు పొక్తాన్. అయా రయ్తూజు వన్నిజ్ డెయితారె వహి కిదాన్ మర్జి పొక్తార్.

11 వాండ్లు మరి ఒరెన్ గొతియవన్నిజ్ పొక్తాన్. వారు వన్నిజ్బా డెయిజి, సిగు కితారె వహి కిదాన్ పొక్తార్.

12 మరి బా, ఒరెన్ వన్నిజ్ పొక్తాన్. వారు వన్నిజ్ గాయమ్కు ఆని లెకెండ్ డెయితారె వెల్లి విసిర్తార్.

13 అయావలె ద్రాక్కు టోట ఎజుమాని, “నాను ఇనిక కిదెజ్? నాను లావు ప్రేమిస్పి నా సొంత మరిసిజ్ పొక్కు. వారు వన్నిజ్ గవ్రం సీనార్లెను”, ఇజి ఒడఃబితాండ్రె పొక్తాన్.

14 గాని పాలి ఆస్తి మన్నికార్ వన్నిజ్ సుడఃతారె, “వీండ్లు యా టోటాదిజ్ అక్కు మనికాన్. యా టోట మాది అదెజ్ వన్నిజ్ సప్పాట్. రదు”, ఇజి వరి లొఇ వారు వర్గితార్.

15 అందెజె వారు వన్నిజ్ ద్రాక్కు టోటదాన్ వెల్లి పొక్తారె సప్తార్. అహిజు, ద్రాక్కు టోట ఎజుమాని వరిజ్ ఇనిక కినాన్?

16 వాండ్లు వాజి, అయా రయ్తూజు సప్పి మహి వరిజ్ టోట ఒవజెప్పాన్. లోకుర్ యాక వెహరె, “ఆ లెకెండ్ కిదెజ్ ఆఎద్”, ఇజి వెహ్లార్.

‡ 19:45-46 19:45-46 యెసయ 56:7. § 19:45-46 19:45-46 యిర్మీయ 7:11.



17 యేసు వరిజ్ డిటం బేసి ఈహు వెన్బాతాన్, “అహిజ, ఇల్లు తొప్పికార్ నెక్తి పొక్తి పణుకు మూలదిజ్ మూల పణుకు ఆతాద్\* ఇజి దేవుణు మాటదు రాస్తి మన్ని దన్ని అరదం ఇనిక?

18 అయా పణుకు ముస్కు అర్పి విజెరె ముకెజ్ ఆనార్. అయా పణుకు ఎయెన్ ముస్కు అర్తిజ, వాండ్రు సింద్సింద ఆనాన్”.

19 యూదురి రూలుజ్ నెస్పిస్పికార్, పెరి పుజెరిజు, మా వందిజ్నె వీండ్రు కత వజ వెహ్తాన్ ఇజి నెస్తారె, వెటనె వన్నిజ్ అస్టెజ్ నుడెఃతార్. గాని లోకురిజ్ తియెల్ ఆతారె, అన్ఎతార్.

20 అందెజె వారు వన్నిజ్ బాగ గురి కిజి మహార్. ఎందానిజ్ఇహిజ, వాండ్రు వెహ్పిని మాట లొఇ ఇని దనిజ్బా తపు అసి వన్నిజ్ తొప్పి అతికారిజ బాన్బవజెపైజె. దిని వందిజ్ వారు నండొండారిజ్ పొక్సినార్. యా సెగొండార్ మాపు నీతి నిజాయితి మనికాప్ ఇజి వేసం కినికార్. నని వరిజ్ వన్ని డగ్రు పొక్తార్. వీరు సొన్ని వన్ని మాటెజలొఇ తపు అస్టెజ్ ఇజి.

21 వారు వాతారె వన్నిజ్, “ఓ బోదకినికి, నీను నిజమతిక వెహ్పి బోదిసిని ఇజి మాపు నెస్నాప్. నీను ఇజ్రికార్ పెరికార్ ఇజి తేడ తొఇకి. దేవుణుదిజ్ ఇస్టం ఆతి నిజమతి బత్కు వందిజ్ నీను నిజం నెస్పిస్పి ఇజి మాపు నెస్నాప్.

22 మాపు కయ్సరుజ్ పన్ను సీనికెజ్ నాయమ్నా? అనయమ్నా?”, ఇజి వన్నిజ్ వెన్బాతాన్.

23-24 వాండ్రు పరి సెఇ బుద్దిదిజ్ నెస్తాండ్రె వరిజ్, “ఉండ్రె దినారి కాసు తోరిస్తు. దిని ముస్కు మన్ని బొమ్మ ఎయెది? రాస్తి మన్ని రాంత ఎయెది?”, ఇజి వెన్బాతాన్. “కయ్సరవి”, ఇహార్ వారు.

25 అందెజె వాండ్రు, “కయ్సరుది, కయ్సరుజ్ సీదు. దేవుణుది దేవుణుదిజ్ సీదు”, ఇజి వెహ్తాన్.

26 వారు అబ్బె మంద ఎద్రు వాండ్రు వెహ్పి మాటదు తపు అస్టెజ్ అట్ఎతార్. వాండ్రు మర్జి వెహ్పి మాటదిజ్ నండొ బమ్మ ఆతారె అలెతార్.

27 నస్తివలె సెగొండార్ సదుకయ్రు యేసు డగ్రు వాతార్. సాతి వెనుక మర్జి నిజ్నిక సిల్లెద్ ఇజి వారు వెహ్పినార్. వారు వాతారె ఈహు వెన్బాతాన్.

28 ఓ బోదకినికి, ఒరెన్ కొడొఃర్ సిల్లెండ సాతిజ. వన్ని తంబెర్పి ఒన్నిజ్ ఇడ్డెః అజి కొడొఃర్ ఇడెఃదెజ్. ఆహె సాతి వన్ని వందిజ్ కుటుం నిల్పెజ్, ఇజి మోసె మజి రాస్తి సత్తమనాన్.

29-31 యేలు నుడెఃఅ, ఉండ్రె కాలమ్దు, దాదతంబెర్సిన్, ఏడు గురు మహార్. తొల్సుర్దికాన్ ఉండ్రె బోదెల్దిజ్ పెండ్లి ఆతాన్. కొడొఃర్ సిల్లెండ సాతాన్. సాతిజ్, నడిపి వాండ్రు దనిజ్ ఇడ్డెః ఆతాన్. కొడొఃర్ సిల్లెండ సాతాన్. వెనుక కొగ్రి నడిపి దనిజ్ ఇడ్డెః ఆతాన్. కొడొఃర్ సిల్లెండ వాండ్రుబ సాతాన్. ఆహె ఏడు గురు బా కొడొఃర్ సిల్లెండ సాతార్.

32 కడివేరిదు ఆ బోదెల్బా సాతాద్.

33 అందెజె సాతి వరిబాణిజ్ మర్జి నిజ్ని వెలె, ఆ బోదెల్ ఎయెరిజ్ ఆల్పి ఆనాద్? ఆ ఏడు గురుదిజ్బా అది ఆల్పి ఆత మహాద్ గదె?”, ఇజి వెన్బాతాన్.

34 అందెజె యేసు వరిజ్ ఈహు వెహ్తాన్, “యా లోకమది లోకుర్ పెండ్లి ఆజినార్. పెండ్లిదిజ్ సీజినార్.

35 గాని సాతి వరిబాణిజ్ మర్జి నిజ్జి పరలోకమ్దు మండ్రెజ్ తగ్గికార్ పెండ్లి ఆవిర్. పెండ్లిదిజ్ సివిర్.

36 ఎంఆనిజ్ ఇహిజ, వారు మరి సావిర్. వారు దేవుణు దూతెజ పొలితికార్. వారు సావుదాన్ మర్జి నిజ్నార్. అందెజె వారు దేవుణు కొడొఃర్.

37-38 సాతికార్ నిజ్నార్ ఇజి మోసె నెగ్రిండ రుజుప్ కిజినాన్. లట కస్పి బాన్ మోసె సాహాన్. అబ్బె, ‘అబ్రాహము దేవుణు, ఇస్సాకు దేవుణు, యాకోబు దేవుణు ఇజి వాండ్రు దేవుణు ఆతి ప్రబు వందిజ్ వెహ్పినాన్. అయావలె అబ్రాహము, ఇస్సాకు, యాకోబు బత్కిజినార్ ఇజి తోర్నాద్. వాండ్రు బత్కితి మన్ని వరిజ్నె దేవుణు. సాతి వరిజ్ దేవుణు ఆఎన్. ఎండనిజ్ ఇహిజ, వన్ని వెట కూడితి మనికార్ విజెరె బత్కిజినార్.

39 సెగొండార్, యూదురి రూలుజ్ నెస్పిస్పికార్, “బోదకినికి, నీను నెగెండ వెహ్పి”, ఇజి వన్నిజ్ వెహ్తార్.

40 వెనుక వారు వన్నిజ్ ఇనికబా వెన్బాదెజ్ ఎయెరిజ్బా దయ్రం సాల్ఎతార్.

41 యేసు వరివెట ఈహు వెహ్తాన్. “క్రీస్తు దావీదు తెగ్గాతికాన్ ఇజి ఎలాగ వారు వెహ్పినార్?

42-43 ‘నాను నీ పగాతి వరిజ్ నీ పాదమ్క అడిగి ఇడ్పిదాక, నీను నా ఉణెరె పడెకాదు బన్అ”, ఇజి ప్రబు నా ప్రబు వెట వెహ్తాన్”, ఇజి కీర్తన పుస్తకమ్దు దావిదునె వెహ్పినాన్.

44 దావిదునె వన్నిజ్, “ప్రబు” ఇజి కూక్సినాన్. అయావలె వాండ్రు ఎలాగ దావీదు మరిసి ఆనాన్.

45-46 లోకుర్ విజెరె వెంజి మహివలె, యేసు వన్ని సినూరిజ్ వెహ్తాన్, “మీరు యూదురి రూలుజ్ నెస్పిస్పివరి వందిజ్ జాగర్త మండ్రు వారు నిరీ సొక తొడెఃగిజి బూలాదెజ్ ఇస్టం ఆతికార్. సత నడిపి పెరికార్ ఇజి మాడెః ఆదెజ్ కోరిజినార్. యూదురి మీటిజ్ ఇండ్రె పెరికార్ బస్పి బాడిదు బస్తెజ్, విందుద్ నెగ్రి బాడిదు బస్తెజ్ కోరిజినార్.

\* 20:17 20:17 కీర్తన 118:22. † 20:42-43 20:42-43 కీర్తన 110:1.

47 వారు రాండి బోదెక్ ఇల్కాణికెజ్ అనయమ్దాన్ లాగ్జినార్. మహి వరి ఇంక నెగ్గికాప్ ఇజి తోరె ఆదెజ్ నిరీ పార్దనం కిజినార్. దేవుణు వరిజ్ నండో సిక్కు సీనాన్”.

## 21

1 యేసు దేవుణు గుడిఁదు బస్తాండ్రె, సుటులం బేస్తాన్. అయావలె ఆస్తిమన్నికార్ సంత పెట్టెదు పెరి సంత అర్పసినిక సుడఁతాన్.

2 ఇనిక సిల్లి ఉండ్రె రాండి బోదెలి సంత అర్పస్సిక బా సుడఁతాన్. అది రుండి పయిసెజ్ అర్ప్తాద్.

3 వాండ్రు వరిజ్, “నాను నిజం మీ వెట వెప్పిన, యా ఇనిక సిలి రాండి బోదెలి మహి విజెరె ముస్సు లావు అర్ప్తాద్.

4 వారు విజెరె వరిజ్ కల్లితి మన్ని సంసారం బాణిజ్ అర్ప్తాద్. గాని అది దనిజ్ సిల్లి బాణిజ్ దనిజ్ బత్తిదెజ్ మనికెజ్ అర్ప్తాద్”, ఇజి వెప్తాన్.

5 అయావలె వన్ని సీసూర్లోఇ సెగొండార్, అయా దేవుణు గుడిఁ వందిజ్ వర్గిజి మహూర్. నెగ్గి పణుకుదాన్ తోహక్కిక యా గుడిఁ ఇజి వర్గితార్. సంద సత్తి నెగ్గి ఇనాయమ్కు ఇబ్బె ఇడ్డె మనె. గొప్ప సోకు మనాద్”, ఇజి వర్గితార్.

6 అయావలె యేసు, “మీరు సుడఁతికెజ్ పణుకు ముస్సు పణుకు మన్విండ అరె ఆని దినమ్కు వానెలె”, ఇజి వెప్తాన్.

7 అయావలె వారు, “ఓ బోదకినికి, యాకెజ్ ఎసెజ్ జర్గిజి? యాక జర్గిని కాలం డగ్గు ఆతాద్ ఇజి తోరిస్సి గుర్తు ఇనిక?”, ఇజి వెన్బాతార్.

8 అందెజె వాండ్రు వెప్తాన్, “మీరు మొసెం కిబె ఆఎండ జాగర్త మండ్రు. ఎందనిజ్ ఇహిజ నండొండార్ నా పేరు అసి వానారలె. వారు, “నానె దేవుణు పొక్కి క్రిస్తు ఇజి, కాలం డగ్గు ఆతాద్ ఇజి వెప్పి వానార్. వరి వెట సొన్మాట్.

9 మీరు విదెమ్కు వందిజ్, జటిజ్ వందిజ్ వెనివెలె తియెల్ ఆమాట్. యాక ముజాలె జర్గిదెజ్వెలె. గాని అక్కర్ రోజు వెటనె రెఱ్.

10 మరి వాండ్రు వరిజ్ వెప్తాన్, “లోకుర్ ముస్సు లోకుర్, రాజెం ముస్సు రాజెం జటిజ్దిజ్ నిజ్నార్లె.

11 అబ్బె ఇబ్బె బూమి గొప్ప కర్ణినికెజ్ వానెలె. నండొ దేసమ్దు కర్తుజ్, నండొ లోకురిజ్ సెద్రిజి అస్సి కస్టమ్కు వానెలె. గొప్ప తియెల్ కల్లిస్సి గుర్తుజ్ ఆగాసమ్దు పుట్టెలె.

12 గాని యాకెజ్ జర్గిని ముజాల, వారు మిజి అస్సారె, ఇమ్సెజ్ కినార్. వారు మిజి యూదురి మీటిజ్ ఇండ్రొని, జెలిదు ఒపజెప్పార్. రాజుజ ముజాల, మహి అతికారిజ ముజాల మిజి తనార్. యాకెజ్ విజు నా ముస్సు నమకం ఇడ్డి వందిజె జర్గినె.

13 అయావలె, యాకదె మీరు నా వందిజ్ సువార్త వెప్తాజ్ నెగ్గి సమయం.

14 వారు వెన్బానివెలె, వరిజ్ ఎలాగ మర్జి వెప్తాజ్ ఇజి ఒడఁబిజి ముజాల బాద ఆవి ఇజి తిరుమానం కిజి మన్అ.

15 ఎందనిజ్ ఇహిజ, మీ పగాతికార్ ఎయెర్బా మిజి ఎద్రిన్ఎండ మంజిని వజి మీరు వెప్తాజ్మాటెజ్, గెణం నాను మిజి సీన.

16 మిజి మీ అయిసి అపోసీర్బా దాదతంబెర్సిర్బా కూలెజ్బా అతికారిజబాన్ సిక్కు సిబిస్టెజ్ ఒపజెప్పార్. మీ లోఇ సెగొండారిజ్ వారు సప్పార్.

17 నా ముస్సు నమకం ఇడ్డి వందిజ్ విజెరె మీ ముస్సు పగదాన్మంజినార్.

18 గాని మీరు ఎలాకాలం బత్తినార్.

19 కస్టమ్కు ఓరిసి మండ్రు. అయావలె మీజి ఎలాకాలం దేవుణు వెట బత్తిని బత్తు దొహక్కిదెర్.

20 యెరూసలెం పట్నం సుటులం ఉద్దం కినికార్ కూడఁజి మహిక, మీరు సుడఁతిజ, దన్ని నాసనం డగ్గు ఆతాద్ ఇజి మీరు నెస్టెజ్వెలె.

21 అయావలె నాసనం ఆవిండ మండ్రెజ్ యూదయ దేసమ్దు మన్నికార్ గొరొకాజ్ ఉహ్కెజ్వెలె. యెరూసలెం పట్నం నడిఁమి మనికార్ వెల్లి ఉహ్కెజ్వెలె. యెరూసలెం పట్నం వెల్లి మనికార్ లోఇ సాండ్రెజ్ అవిద్.

22 ముజాలె రాస్తి మనికెజ్ పూర్తి అదెజె యా సిక్కు దినమ్కు.

23 ఆ దినమ్కాజ్ పొటాద్ మన్ని వన్కాజ్, పాలు ఉట్పిస్సి వన్కాజ్ గొప్ప కస్టం. ఎందనిజ్ ఇహిజ, యూదయ దేసెం ముస్సు నండొ కస్టమ్కు వానెలె. దేవుణు కోపం యా లోకుర్ ముస్సు వానాద్లె.

24 వారు కూర్దెజాణిజ్ సానారలె. సెగొండారిజ్ తోహక్కి పయ్ దేసెమ్కాజ్ విజు ఒనారలె. దేవుణుదిజ్ నెన్ఇకార్ యెరూసలెమ్దిజ్ ఏలుబడిఁ కినారలె. వరి ఏలుబడిఁ అబ్బె పూర్తి ఆని కాలమ్దాక యెరూసలెం వరి అడిఁగి ఆనాద్.

25 పొద్దుదు, నెలదు, సుక్కెజదు బమ్మకిని గుర్తుజ్ తోరెనెలె. సమ్దరమ్ది ఉల్కాజ్ గొప్ప గగల్ కిజి వరిజ్ తియెల్ కల్లిస్సి. ఆహా బూమిద్ మన్ని లోకుర్ విజెరె ఇనిక కిదెజ్ ఇజి అర్దం కివిండ మంజినార్.

- 26 ఆగసమ్మదు మన్ని నండొ రకమ్కాణికెక్ కద్లినె. అందెజె లోకమ్దు జర్గిని వన్కాజ్ వందిజ్ ఎత్తు కిజి తియెల్ ఆజి లోకుర్ సానార్.
- 27 అయావలె లోకు మరిసి ఆతి నాను మొసొపుదు వానిక వారు సూణార్. గొప్ప అతికారం దాన్ గొప్ప జాయ్దాన్ కూడిఃతి సొక్కుదాన్ మొసొపుదు వానిక వారు సూణార్.
- 28 యాకెజ్ జర్గిదెజ్ మొదొల్స్సివెలె నిల్సి బుర్త పెర్దు. ఎందానిజ్ ఇహిజు, మీ కస్టమ్కాణికెక్ విడుఃదల డగ్రు ఆజినాద్.
- 29 వాండ్రు వరిజ్ కతవజ నెస్పిస్తాన్. బొడెమరాతిజ్ని విజు మరెకాజ్ సుడెఃదు.
- 30 ఆకెజ్ సెగ్రిసినివెలె, జేట కాలం డగ్రు ఆతాద్ ఇజి మీరె సుడెఃజి నెసినిదెర్.
- 31 అయా లెకెండెనె, మీరు యా సజతిజ్ జర్గినిక సూణివెలె, దేవుణు యా లోకమ్దిజ్ ఏలుబడిః కిజినిక డగ్రు ఆతాద్ ఇజి నెసినిదెర్.
- 32 యా సజతిజ్ జర్గినిదాక, యా తరమ్దికార్ సావిర్, ఇజి నాను మీ వెట కసితం వెప్పిన.
- 33 ఆగాసం బూమి సిల్లెండ ఆనాద్. గాని నా మాటెజ్ ఎసెజ్బా అయాలెకెండె సొన్ఉ.
- 34 మీరు ఉణిజి తింజి మత్తుదాన్ మన్ఏండ యా లోకమ్ది బత్తు వందిజ్ విసారిన్ఏండ జాగర్త మండ్రు. సిల్లిజు, లోకుమరిసిఆతి నాను వాని దినం ఉరి వాతి లెకెండె వెటనె వానాద్. అందెజె జాగర్త మండ్రు.
- 35 యా లోకమ్దు బత్తిజిని లోకుర్ విజెరె ముస్సు అయా దినం నెస్ఏండ వానాద్.
- 36 యా జర్గిదెజ్ మన్ని విజు వన్కాజ్ ఓరిసి మంజిని సత్తు వందిజ్, లోకు మరిసి ఆతి నా ముజాలె నిల్ని సత్తు వందిజ్ ఎస్తివలె బా పార్దనం కిజి జగర్త మండ్రు.
- 37 యేసు రోజు దేవుణు గుడిఃదు వేడెఃక నెస్పిసి మహాన్. రెయ్క బలివ గొరొత్ మండ్రెజ్ సొన్ని మహాన్.
- 38 లోకుర్ విజెరె పెందాల్నె, వన్ని మాటెజ్ వెండ్రెజ్ దేవుణు గుడిఃదు వాజి మహాన్.

## 22

### యేసుజ్ ఒపజెప్తెజ్ యూద ఒప్పుకొటాన్

- 1 పస్కు ఇని పులాజ్ సిల్లి రొట్టెజ్ తయార్కిని పండొయి డగ్రు ఆతాద్.
- 2 నస్తివలె పెరిపుజెరిజు, యూదురి రూలుజ్ నెస్పిస్సికార్ యేసుజ్ ఎలాగ సప్తెజ్ ఇజి ఉపాయి సుడెఃజి మహాన్. ఎందానిజ్ ఇహిజు, వారు లోకురిజ్ తియెల్ ఆజి మహాన్.
- 3 అయావలె, పన్నెండు మణిసి సిసూర్ లొఇ మన్ని ఇస్కరియొతు ఇని యూదెజ్ నయ్యూను అస్తాన్.
- 4 వాండ్రు పెరి పుజెరిజు, అతికారిజు బాన్ సొహండ్రె ఎలాగ వన్నిజ్ వరికిదు ఒపజెప్తెజ్, ఇజి వరివెట వర్గితార్.
- 5 అందెజె వారు సర్ద ఆతారె, వన్నిజ్ డబ్బు సీనాప్ ఇజి ఒప్పుకొటార్.
- 6 వాండ్రు దనిజ్ ఒప్పుకొటాన్. మంద లోకుర్ సిల్లివెలె వన్నిజ్ వరిజ్ ఒపజెప్తెజ్ తవ్కాసం సుడెఃజి మహాన్.
- 7 పులాజ్ సిల్లి రొట్టెజ్ తయార్కిని పండొయి కిని దినం వాతాద్. ఆ దినమ్దు మెండ గొరై పిల్లెజ్ పూజ సిజి పస్కు బోజనం కిదెజ్.
- 8 అందెజె యేసు పేతురుజ్, యోహానుజ్, “మీరు సొన్ని, మాటు పస్కు బోజనం ఉండెజ్ తయార్ కిదు”, ఇజి వెహండ్రె వరిజ్ పొక్కినాన్.
- 9 వారు, “మాపు ఎంబె తయార్ కిదెజ్ ఇజి నీను కోరిజిని?”, ఇజి వన్నిజ్ వెన్బాతార్.
- 10-11 అందెజె యేసు వరిజ్ ఈహు వెహ్లాన్. “మీరు పట్టుమ్దు సొనివెలె, కుండారు ఏరు పిణ్జి బరెన్ మీ ఎద్రు వానాన్. వాండ్రు సొని ఇండ్రొ వన్ని వెట సొండ్రు. సొన్ని ఆ ఇండ్రొణి యజమానిజ్, ఈహు వెహ్లా, ‘నాను నా సిసూర్ వెట పస్కుబోజనం కిదెజ్ గది ఎంబె మనాద్ ఇజి బోదిస్సికాన్ నిజి వెన్బాజినాన్’, ఇజి.
- 12 అయావలె ఆ ఎజుమాని విజు తయార్ కితి మేడః ముస్సు మన్ని పెరి గది ఉండ్రె తోరిస్సాన్. అబ్బె మీరు తయార్ కిదు”, ఇజి వెహ్లాన్.
- 13 వారు పట్టుమ్దు సొహారె, యేసు వరిజ్ వెహ్తివజ విజు సుడెఃతార్. వారు పస్కుబోజనం తయార్ కితార్.
- 14 పస్కుబోజనం కిదెజ్ టయం ఆతివెలె, వాండ్రు వన్ని పన్నెండు మణిసిర్ అపొస్సులు వెట బోజెనమ్దిజ్ బస్తార్.
- 15 అయావలె వాండ్రు వరిజ్, “నజి సప్పి ముజాల మీ వెట కూడెఃజి యా పస్కు బోజనం ఉండెజ్ నండొ ఆస ఆత.
- 16 ఎందానిజ్ ఇహిజు, యా పస్కు బోజెనమ్దిజ్ గుర్తు దేవుణు రాజెమ్దు పూర్తి ఆనిదాక నాను మరి ఎసెజ్బా ఉణెవి.
- 17 యేసు ద్రాక్కుకల్లు మన్ని గిన్న అసి దేవుణుదిజ్ వందనం కితాన్. కితాండ్రె, “లొసి, మీరు సీబాజి ఉండ్రు.
- 18 ఎందానిజ్ ఇహిజు, ఏలుదాన్ దేవుణు లోకురిజ్ ఏలుబడిః కినిక సూణిదాక నాను మరి ద్రాక్కు పట్టు రసం ఉణెఎ ఇజి నాను మీ వెట వెప్పిన”, ఇజి వెహ్లాన్.

19 మరి వాండ్రు రొట్టెఅసి దేవుణుదిజ్ వందనం వెప్పి దనిజ్ ముకెజ్ కిజి వరిజ్ సితాన్. “ఇక మీ వందిజ్ సీజిని నా ఒడొల్దిజ్ గుర్తు. నజీ ఎత్తు కిదెజ్ యాక కిజి మండ్రు”, ఇజి వెప్తాన్.

20 అయలెకెండెనె, బోజనం ఆతి వెన్కా వాండ్రు వరిజ్ ద్రాక్కుకల్లు మన్ని గిన్న సితాన్. ‘యా గినెదు మనికెజ్ మీ పాపమ్క వందిజ్ వాక్కిని నా నలదిజ్ గుర్తు. యాకదె నా నలదాన్ దేవుణు ఇడ్డి కొత్త ఒపుమానం.

21 గాని నజీ ఒపజెప్పికాన్ నావెట బోజెనమ్దిజ్ బస్త మనాన్.

22 దేవుణు ఏర్పాటు కితి వజ, లోకు మరిసి ఆతి నాను సానాలె. గాని నజీ ఒపజెప్పి వన్నిజ్ అబాయా గొప్ప కస్టం”, ఇజి వెప్తాన్.

23 వారు యా పణిజ్ వరి లొఇ ఎయెన్ కినాన్ ఇజి వరి లొఇ వారె వర్గితార్.

24 మరి, వరిలొఇ ఎయెన్ పెరికాన్ ఇజి ఉండ్రీ ఇజ్జి గొడజిబ వాతాద్.

25 అందెజె యేసు వరిజ్, “దేవుణుదిజ్ నెన్ఇ వరి రాజూర్ వరి మున్కు. నండొ అతికారం కిజినార్. వరి మున్కు అతికారమ్దు మనికార్, ‘మాపు లోకురిజ్ కూలెజ్’, ఇజి అనువె ఆజినార్.

26 గాని మీరు అయ లెకెండె మన్మాట్. మీలొఇ పెరికాన్ అతికాన్తగిసి ఇజ్జి వన్నిలెకెండె ఆదెజ్. నెయ్కి సేవ కిని వన్ని లెకెండె ఆదెజ్.

27 సుడెదు, ఎయెన్ పెరికాన్. విందుదు బస్సికాండ్రా, బాట కిజి సీనికాండ్రా? విందుదు బస్సికాండ్రె గదె? గాని నాను మీ నడిమి, సేవ కిని వన్ని లెకెండె మన్న.

28 నా కస్టమ్దు మీరె నా వెట నమ్మకమ్దాన్ నిహి మహికిదెర్.

29 నా బుబ్బు వన్ని లోకురిజ్ ఏలుబడి: కిదెజ్ అతికారం నజీ ఒపజెప్పి వజ, నాను మిజి అయా అతికారం ఒపజెప్పిన.

30 అందెజె నాను ఏలుబడి: కినివెలె నా విందుదు నా వెట ఉణిజి తినిదెర్. మీరు రాజూర్ బసి మంజిని సింహాననమ్కాజ్ బసి ఇస్రాయేలురి వన్నెండు తెగ్గాతి వరిజ్ ఏలుబడి: కినిదెర్.

**పేతురు యేసుజ్ నెన్ఇజి వెప్తాన్ ఇజి యేసు వెప్పినాన్.**

31 “ఓ సిమోన్, సిమోన్, ఇదిలో రయ్తు వాండ్రు గింజెజి జలిన్ని వజ, నీ లొఇ మన్ని నెగ్గికెజ్ నెస్తెజ్ సయ్యాను నిజి పరిస కినాన్. దిన్నివందిజ్ సెల్వ దొహ్క మనాద్.

32 గాని సిమోన్, నీను నమకం డిన్ఎండ మండ్రెజ్ నాను నీ వందిజ్ పార్దనం కిత మన్న. నీను మర్జి నా దరిజ్ వానివలె, మహి సిసూరిజ్ వరి నమకం పిరిప్అ”, ఇజి వెప్తాన్.

33 అయావలె సిమోను, “ప్రబువా, నీ వెట జెలిదు వాదెజ్, నీ వెట సాదెజ్బా నాను తయార్నె”, ఇజి వెప్తాన్.

34 దన్నిజ్ యేసు, “పేతురు నాను వెప్పిన, నేండ్రు కొరు కెరెయెండ ముజాల నీను నజీ నెన్ఇ ఇజి ముసార్ వెప్పాలె”, ఇజి వెప్తాన్.

35 మరి, వాండ్రు వరిజ్ వెన్బాతాన్, “డబ్బు ఇడ్డి ససి, మరి ఉండ్రీ ససి, జోడ్కు సిల్లెండ నాను మిజి పొక్తివెలె, మిజి ఇనికబా తక్కు ఆతాదా?”, “సిల్లె”, ఇజి వారు వెప్తార్.

36 “అహిజ, ఏలు, మిజి డబ్బు ఇడ్డి ససి మహిజ, ఆక ఒతెజ్. అయలెకెండెనె, మరి ఉండ్రీ ససి బా ఒతెజ్. మిజి ఉండ్రీ కూడం సిలిజ, మీ సొక పొర్ని ఉండ్రీ కూడం కొండెజ్.

37 ఎందానిజ్ ఇహిజ, ‘జెలిదు మన్ని వరి వెట వన్నిజ్ కుడుఃప్తార్\*’, ఇజి దేవుణు మాటదు రాస్త మనాద్. నాను వెప్పిన, అయా మాట నావెట పూర్తి ఆదెజ్వెలె. నిజమె నా వందిజ్ రాస్త మనికెజ్ పూర్తి ఆజినాద్”, ఇజి వరిజ్ వెప్తాన్.

38 అయావలె సిసూర్, “ప్రబువా, ఇదిలో ఇబ్బె రుండి కూణమ్కు మనె”, ఇజి వెప్తాన్. దనిజ్ వాండ్రు, “ఆకెజ్ ఆనె”, ఇజి వెప్తాన్.

**యేసు ఒలివ గొరొత్ పార్దనం కిజినాన్**

39 యేసు పట్నం డిస్తాండ్రె వన్నిజ్ మన్ని అలవాటు లెకెండె ఒలివ గొరొత్ సాహాన్. వన్ని సిసూర్ వన్ని వెట సాహార్.

40 అబ్బె సాహిజ్, వాండ్రు వరిజ్, “సయ్తాన్ సికుదు అర్పెండ పార్దనం కిదు”, ఇజి వెప్తాన్.

41 వాండ్రు వరి బాణిజ్ పణుకు విసీర్ని నసా దూరం సాహాండ్రె, ముణుకుజ్ ఊర్జి పార్దనం కిజినాన్.

42 “ఓ బా, నిజి ఇస్టం ఆతిజ యా కస్టమ్కు నా బణిజ్ లాగ్అ. అహిజ్బా నా ఇస్టం ఆవెద్, నీ ఇస్టమ్నె ఆపిద్”, ఇజి.

43 అయావలె దేవుణు మంజిని బాడ్డి: దాన్ ఉండ్రీ దేవుణు దూత వన్నిజ్ తోరె ఆతండ్రె, వన్నిజ్ ఓదరిస్తాన్.

\* 22:37 22:37 యెసయ 53:12.

44 వాండ్రు ఓరిస్తైజ్ అట్ ఇ గొప్ప దుకమ్ దు మహిజ్, మరి నండో పార్దనం కితాన్. వన్ని రూణు నల బొటుజ్ లెకెండ్ బూమిదు అరై.

45 వాండ్రు పార్దనం కితి నిజితండ్రె, వెనుక సిసూర్ డగ్రు సొహాన్. సొహిజ్ వారు దుకం దాన్ నిద్ర కిజనిక సుండేతాన్.

46 అందెజె వాండ్రు వరిజ్, “ఎందనిజ్ మీరు నిద్ర కిజనిదెర్? నిజ్జి, సయ్యూను మిజి పరిస కిజి తప్పదు అర్వేవండ పార్దనం కిదు”, ఇజి వెహ్తాన్.

**యేసుజ్ అరెస్టు కిజినార్**

47 యేసు యా మాటెజ్ వెహ్పి మహిజ్, నండో జెనం వాతాద్. పనెండు సిసూర్ లొ ఇ మన్ని యూద ఇనికానె వరి ముజాల సొహాన్. వాండ్రు యేసుజ్ ముదు కిదెజ్ వన్ని డగ్రు వాతాన్.

48 అయావలె యేసు, “ఓ యూద, ముదు కిజినె, నీను లోకు మరిసి ఆతి నజి ఒపజెప్పిదా?”, ఇజి వన్నిజ్ వెన్బాతాన్.

49 యేసు వెట మహి సిసూర్ జర్గినికెజ్ సుండేతిజ్, వారు, “ప్రబువా, మాపు కూర్దదాన్ వరిజ్ కత్తెజ్?”, ఇజి వెన్బాతార్.

50 వరి లొ ఇ ఒరెన్ విజు పుజెరిజ మున్ను పెరి పుజెరి పణిమణిసిజ్ ఉణెర్ గిబ్బి తెవు కత్తాన్.

51 గాని యేసు, “అలె కిదు”, ఇజి వెహ్తండ్రె, అయా పణిమణిసిజ్ గిబ్బిదిజ్ ముట్టాండ్రె వన్నిజ్ నెగెండ్ కితాన్.

52 యేసు వన్నిజ్ అస్తైజ్ వాతి పెరి పుజెరిజు, దేవుణు గుడిః అతికారిజు పెద్దెల్జ వెట, “నాను డొజి వాండ్రునా? నజి అస్తైజ్ పెరి కూడేమ్ కు కొణెజ్ అసి మీరు వాతిదెర్?

53 రోజు నాను మీ వెటనె మంజి గుడిఃదు నేర్పిస్త గదె. అయావలె మీరు నజి తోహ్ ఇతిదెర్. యాకదె నజి తోహ్ కైజ్ దేవుణు మిజి సిత్తి సమయం. ఏలు సయ్యూన్ అతికారమ్ దు మనాన్”, ఇజి వరిజ్ వెహ్తాన్.

**యేసుజ్ నెన్ ఏ ఇజి పేతురు వెహ్పినాన్**

54 వారు వన్నిజ్ తోహ్ క్కారె, విజు పుజెరిజ మున్ను మన్ని పెరి పుజెరి ఆతి వన్ని ఇండ్రో ఒతాన్. పేతురు దూరం దాన్ వెన్కా సొన్ని మహాన్.

55 వారు డేవ నడిఃమి, సిసు ఎరెసి కూడేజి బసి మహివలె, పేతురు వరి వెట బస్తాన్.

56 అయా ఇండ్రోణి పణిమణిసి ఉండ్రె, పేతురు సిసు డగ్ర బస్తిక సుండేతాద్. వాండ్రు ఎయెన్ ఇజి నెస్తైజ్ వన్నిజ్ డిటాజ్ బేస్తాద్. బేస్తాదె, “వీండ్రు బా వన్ని వెట మహాన్”, ఇజి అది వెహ్తాద్.

57 అందెజె పేతురు, “ఓ బీ, నాను వన్నిజ్ నెన్ ఏ”, ఇజి వెహ్తాన్.

58 సణెం వెనుక మరి ఒరెన్ వన్నిజ్ సుండేతాన్. “నీను బా వరి వెట మహికిదె”, ఇజి వెహ్తాజ్, “బాబు, నాను వన్నిజ్ నెన్ ఏ”, ఇహాన్.

59 డగ్రు ఉండ్రె గంట వెన్కా మరి ఒరెన్ కసితం వెహ్తాన్, “నిజమె, వీండ్రు బా వన్ని వెట మహాన్. ఎందనిజ్ ఇహిజు, వీండ్రు గలిలియదికానె”, ఇజి.

60 దన్నిజ్ పేతురు, “ఓ బాబు, నీను వెహ్పిక్ నజి తెలివెద్”, ఇజి వెహ్తాన్. వాండ్రు వెహ్పిమహివలె వెటనె కొరు కెరెతాద్.

61 యేసు వెనుక మహ్తండ్రె పేతురుజ్ డిటాజ్ బేస్తాన్. అయావలె ప్రబు వన్నిజ్, నేండ్రు కొరు కెరెని ముజాల నీను నజి నెన్ ఏ ఇజి ముసార్ వెహ్పాల ఇజి”, వెహ్తా మాట పేతురు ఒడేబితాన్.

62 వీండ్రు వెల్లి సొహండ్రె నండో దుకం ఆజి అడేబతాన్.

**కాప్ కినికార్ యేసుజ్ వెక్రిసినార్**

63 యేసుజ్ కాప్ కిజి మహికార్ వన్నిజ్ వెక్రిసి డెయిదెజ్ మొదొల్స్తాన్.

64 వారు ని కణకెజు కసెల్ దాన్ తోహ్ క్కారె, “ఓ ప్రవక్త, వెహ్ అ, ఎయెన్ నిజి డెయితాన్ ఇజి”, ఇజి వెన్బాతార్.

65 వారు వన్నిజ్ దూసిన్ని మరి నండో మాటెజ్ వన్నిజ్ వెహ్తార్.

**యేసుజ్ పిలాతుని హెరోదుజ్ ముజాల నిల్వార్.**

66 పెందాల్ ఆతివెలె, యూదురి పెద్దలుజ్, పెరి పుజెరిజు, యూదురి రూలుజ్ నెస్పిస్పికార్ విజెరె కూడితార్. యేసుజ్ వరి ముజాల నిల్వార్.

67-68 వారు వన్నిజ్, “నీను క్రిస్తు నా, మజి వెహ్ అ”, ఇజి వెన్బాతార్. అందెజె యేసు వరిజ్, “క్రిస్తు ఇజి నాను వెహ్తాజు, మీరు నమిఇదెర్. నాను మిజి వెన్బాతిజ మీరు మర్జి వెహ్ ఇదెర్.

69 గాని ఏలుదాన్, లోకుమరిసి ఆతి నాను గొప్ప అతికారం మని దేవుణు ఉణెర్ పడేకాదు బన్నులె”, ఇజి వెహ్తాన్.

70 అయావలె వారు విజెరె, “అహిజు, నీను దేవుణు మరిసినా?”, ఇజి వన్నిజ్ వెన్బాతార్. వెన్బాతిజ్ వాండ్రు, “మీరు వెహ్తా లెకెండ్ నె, నానె దేవుణు మరిసి”, ఇజి వెహ్తాన్.

71 అందెజె వారు, “ఎందానిజ్ మజి మరి రుజుప్ వెప్పికార్. వన్ని వెయదానె మాట వెహట్”, ఇజి వెహ్తార్.

### 23

1 అయావలె, యూదురు అతికారిజు విజెరె నిహరె, యూదయ దేసెం సుడఃజిని రోమ అతికారి ఆతి పిలాతు బాన్ వన్నిజ్ ఒత్తార్.

2 వారు, “వీండ్రు మా లోకుర్ నడిఃమి గొడఃబ రేప్పినాన్. రోమ రాజు ఆతి కయ్సరుజ్ పన్ను సీమాట్ ఇజి వెప్పినాన్. నాన్ క్రీస్తు అహిజ రాజు ఇజి వెప్పినాన్”, ఇజి వన్ని ముస్కు నేరం మొహ్తార్.

3 అందెజె పిలాతు యేసుజ్, “నీను యూదురిజ్ రాజునా?”, ఇజి వెన్బాతాన్. వెన్బాతిజ్, “ఒఒ, నీను వెహ్తా వజనె”, ఇజి మర్జి వెహ్తాన్.

4 పిలాతు పెరి పుజెరిజు వెట మంద లోకుర్ వెట, “విని ముస్కు నజి, ఇని తప్పు బా తోర్ఎద్”, ఇజి వెహ్తాన్.

5 గాని వారు, “ఏక ఏక వెహ్తార్, “వీండ్రు యూదయ దేసెమ్ది లోకుర్ విజెరిజ్ వన్ని మాట నెస్సిసి గొడబ రేప్పినాన్. యా పణి గలిలయదు మొదొల్లి ఇబ్బె దాక వాతాన్”, ఇజి.

6 యాక వెంజి, “వీండ్రు గలిలయదికాండ్రా”, ఇజి పిలాతు వెన్బాతాన్.

7 యేసు హేరోదు ఏలుబడిః కిని గలిలయ ముటదికాన్ ఇజి పిలాతు నెస్తాన్. అందెజె వాండ్రు వన్నిజ్ హెరోద్బాన్ పోక్తాన్. అయావలె హెరోదు బా యెరూసలెమ్దు మహాన్.

8 హేరోదు యేసుజ్ సుడఃతివెలె నండొ సర్ద ఆతాన్. ఎందనిజ్ ఇహిజ, యేసు వందిజ్ నండొ వెహ మహాన్. నండొ కాలమ్దాన్ వన్నిజ్ సుడఃదెజ్ ఆస ఆజి మహాన్. యేసు కిని బమ్మ అని పణిజ సుడఃదెజ్ కోరితాన్.

9 అందెజె వాండ్రు నండొ మాటెజ్ వెన్బాతాన్. గాని యేసు ఇనికబా మర్జి వెహ్ఎతాన్.

10 పెరి పుజెరిజు, యూదురి రూలుజ్ నెస్సిస్సికార్ బాన్ నిల్లి, వన్ని ముస్కు డటిసి నేరం మొప్పి మహార్.

11 హేరోదుని వన్ని సయ్నమ్దికార్ వన్నిజ్ వెక్కిసి సెకాల్ కితార్. నండొ దర మన్ని గొప్ప ఉండ్రీ సొక తొడఃగిన్పిస్తాండ్రె పిలాతు డగ్రు మర్జి పోక్తాన్.

12 అయా రోజునె పిలాతుని హేరోదు కూలెజ్ ఆతార్. దిని ముజాలె వారు పగ్దాన్ మహార్.

13-14 అయావలె పిలాతు, పెరి పుజెరిజు, అతికారిజు, లోకాజ్ కూక్పిస్తాండ్రె వరిజ్, “లోకుర్ నడిఃమి గొడబ రేప్పినాన్ ఇజి వెప్పి వినిజ్ మీరు నా బాన్ తతిదెర్. మీ ఎద్రు నాను వినిజ్ వెన్బాత. గాని మీరు వెహ్తా నేరం ఇనికబా విని లొఇ నజి తోర్ఎత్.

15 అయలెకెండెనె, హెరోదుజ్బా తోర్ఎతాన్. వాండ్రు వినిజ్ మా డగ్రు మర్జి పోక్తాన్. ఇదిలో వీండ్రు సావుదిజ్ తగితి ఇన్ని పణి బా కిఎన్.

16 అందెజె నాను వినిజ్ సిక్స సీజి డిస్సు సీన”, ఇజి వెహ్తాన్.

17 (ఏంటు ఏంటు కిని పన్ను పండొయిదిజ్ లోకు కోరిపాతి ఒరెన్ జెలిదు మన్ని వన్నిజ్ డిసి సీదెజ్ పిలాతుజ్ అలవాటు).

18 గాని లోకుర్ విజెరె, “నవ్అ వన్నిజ్ బరబెజ్ మజి డిసి సీదా”, ఇజి ఉండ్రె లెకెండె డటం డేడిఃస్తార్.

19 బరబ్బు పట్టుమ్దు గొడఃబ రేప్పిస్తాండ్రె, నెగొండారిజ్ సప్తాన్. అందెజె వన్నిజ్ జెలిదు ఇట్టా మహార్.

20 యేసుజ్ డిస్సెజ్ కోరిజి పిలాతు మరి లోకురిజ్ నాను వన్నిజ్ డిస్సెజా? ఇజి వెన్బాజినాన్.

21 గాని వారు, “వినిజ్ సిలువాదు కుటిజాణిజ్ డెయిజి సవ్అ, సిలువాదు కుటిజాణిజ్ డెయిజి సవ్అ”, ఇజి నండొ గగొల్ ఆతార్.

22 ముసార్దిజ్ వాండ్రు వరిజ్, “ఎందానిజ్? ఇన్ని తప్పు వీండ్రు కితాన్? సావుదిజ్ తగితి ఇన్ని తప్పు బా నాను విని లొఇ తొవిత. అందెజె నాను వినిజ్ సిక్స సీజి డిస్సు సీన”, ఇజి వెహ్తాన్

23 గాని వారు, “వినిజ్ సప్తెజ్వెలె”, ఇజి మరి మరి డటం డేడిఃస్తార్”. ఆహె వరి గగొల్ గెలిస్తాద్.

24 అందెజె పిలాతు వారు వెహ్తా వజ జర్గిపిద్ ఇజి తీర్పు సిత్తాన్.

25 పిలాతు వారు లొస్తి వన్నిజ్ డిస్సె సితాన్. అయా వాండ్రు పట్టుమ్దు గొడఃబ రేవ్తి వందిజ్ నెగొండారిజ్ సప్తి వందిజ్ జెలిదు మహాన్. యేసుజ్ వారు కోరితివజ కిదెజ్ వరి కీదు ఒపజెహ్తాన్.

#### యేసుజ్ సిలువాదు కుటిజాణిజ్ డెయిజినార్

26 వారు వన్నిజ్ ఒసి మహార్. అయావలె, మరి ఉండ్రీ దేసెమ్ది కురెనియ పట్టుమ్దికాన్ ఆతి సిమోన్ ఇనికాన్ ఒరెన్ యెరూసలెం పట్నం వెల్లిదాన్ అయా సరి యెరూసలెం పట్టుమ్దు వాజి మహాన్. వారు వన్నిజ్ అస్తారె, యేసువెట, వన్ని వందిజ్ సిలువ పిండిదెజ్ వన్నిజ్ సితార్.

27 మంద లోకుర్ వన్ని వెన్కా వాజి మహార్. వరిలొఇ బోదెక్ వన్ని వందిజ్ గుండె కొత్తె ఆజి అడఃబాజి వాజి మహె.

28 యేసు వరిదరిజ్ మర్జి, “యెరుసలెమ్ది బీబికండె, మీరు నా వందిజ్ అడఃబామాట్. మీ వందిజ్ని మీ కొడోర్ వందిజ్ అడఃబాదు.

29 ఎందానిజ్ ఇహిజి వారు, “గొడ్డు బోదెకాజ్ బా పాలు ఉట్పిన్ఇ వన్కాజ్ గొప్ప నెగెద్”, ఇజి వెప్పి దినమ్కు వానెలె.

30 అయావలె వారు, “మా ముస్సు అర్అ”, ఇజి గొరొకాజ్ వెట, మజి పడఃగ్అ”, ఇజి మెటెజ వెట వెహ్నార్లె.

31 ఎందానిజ్ ఇహిజ, “మరాన్\* పసీజ్ మనివెలె నిసా బాదెజ్ కితిజ మరాన్ వహ్తాజ మరి ఎసా బాద కినారొ”, ఇజి వెహ్నాన్.

32 మరి రిఎర్ డొజారిజబా వన్నివెట సహ్తెజ్ ఒసి మహార్.

33 వారు బుర్ల పిణికి ఇజి కూక్కి బాడిఃదు వాతార్. అబ్బె యేసుజ్ సిలువాదు కుటిజాణిజ్ డెయ్తార్. ఒరెన్ వన్నిజ్ ఉణెర్ పడఃకాద్, మహి వన్నిజ్ డేబర పడఃకాద్. సిలువ పొక్తార్.

34 అయావలె యేసు, “ఓ బా, వీరు కిజినిక ఇనిక ఇజి విరిజ్ తెలివిద్. అందెజె విరిజ్ సెమిన్అ”, ఇజి పార్లనం కితాన్. వారు వన్ని సొక్కెజ్ సీబె ఆదెజ్ సీటిజ్ పొక్తార్.

35 లోకుర్ నిహారె సుడఃజి మహివలె, అతికారమ్దు మనికార్, “వీండ్రు మహి వరిజ్ రక్సిస్తాన్. వీండ్రు క్రిస్తు ఇహిజ, వినిజ్ వీండ్రె రక్సిసె ఆపిన్”, ఇజి వెప్పి వెక్సిస్తార్.

36-37 సయనమ్దికార్బా వాతారె, వన్నిజ్ సెకాల్ కితార్. వారు వన్నిజ్ సేందుదిక ఉండ్రి ఉండెజ్ సితారె, “నీను యూదురి రాజు ఇహిజ, నిజి నీనె రక్సిసె ఆఅ”, ఇజి వెప్పి సెకాల్ కితార్.

38 “వీండ్రు యూదురిజ్ రాజు’ ఇజి వన్ని ముస్సు మొప్తి నేరం బోర్డుదు రాసి సిలువాదు ఇట్టార్.

39 సిలువాదు డెయితి డొజారిజ లొఇ ఒరెన్, “నీను క్రిస్తుగదె. నిజి నీనె రక్సిసె ఆపిన్. మజి బా రక్సిన్అ”, ఇజి వన్నిజ్ దూసిస్తాన్.

40-41 గాని మహికాన్, “నీను దేవుణుదిజ్ తియెల్ ఆఇదా? వన్నిజ్ దొహ్కొక్కి సిక్సెని నిజి బా దొహ్కొక్ మనాద్. నాయం దానె మజి సిక్సిస్తార్. ఎందనిజ్ఇహిజ, మాటు కితి మని పణిదిజ్ తగితి సిక్సె సితార్. గాని వీండ్రు ఇని తప్పు బా కిఎన్”, ఇజి వన్నిజ్ గోల కితాన్.

42 మరి, “యేసు, నీను రాజు ఆజి మర్జి వానివలె, నజి ఒడఃబిఅ”, ఇజి వెహ్నాన్.

43 అందెజె యేసు, “నిజమె నాను నీ వెట వెప్పిన, నేండ్రు నీను నా వెట పరలోకమ్దు మంజినిలె”, ఇజి వెహ్నాన్.

**యేసుసిలువ ముస్సు పాణం డిఃస్తాన్.**

44-45 అయావలె సమయం వేడః పన్నెండు గంటెజ ఆతాద్. మూండ్రు గంటెజదాక లోకం విజు సీకటి వాతాద్. పొదు జాయి సిఎతాద్. యెరుసలెం గుడిః తెర మహి పాత ముస్సుహాన్ అడ్లి దాక నడిఃమిహాన్ రుండి ముకెజ్ కింజితాద్.

46 యేసు, “ఓ బా, నా పాణం నీ కీదు ఒపజెప్పిన”, ఇజి వెహ్నాన్. యా లెకెండ్ వెహ్నాండ్రె వాండ్రు పాణం డిఃస్తాన్.

47 అయావలె సయనమ్దివరి అతికారి, జర్గితిక సుడఃతండ్రె, “నిజమె వీండ్రు నీతినిజయిదికాండ్రె”, ఇజి వెప్పి దేవుణుదిజ్ పొగిడిఃతాన్.

48 సుడఃదెజ్ కూడిఃతి వాతి లోకుర్ విజెరె జర్గితికెజ్ సుడఃజి, గుండె కొత్తె ఆజి మర్జి ఇండ్రొ సాహాన్.

49 గాని వన్నిజ్ నెల్వ అతికార్ విజెరె, నెలవాతివరి లొఇ గలిలయదాన్ వన్ని వెట వాతి బోదెకు, దూరం నిల్పి యాకెజ్ సుడఃజి మహార్.

**యేసుజ్ సమాది కిజినార్**

50-51 అయావలె యోసేపు ఇనికాన్ ఒరెన్ మహాన్. వాండ్రు యూదయ దేసెమ్ది అరిమతియ ఇన్ని పట్టుమ్దికాన్ వాండ్రు సన్హద్రి సజమ్దు మన్ని వరిలోఇ పెరికాన్ ఒరెన్. వాండ్రు నీతి నిజాయితి మనికాన్. యేసుజ్ సిలువాదు డెయిజి సహ్తెజ్ యూద పెద్దల్జ కితి తిరుమానం ఒప్పకొడఃవతాన్. దేవుణు ఏలుబడిః తోరె ఆనివందిజ్ వాండ్రు ఎద్రు సుడఃజి మహాన్.

52 వాండ్రు పిలాతు డగ్రు సాహాండ్రె యేసు పినుగు లొస్తాన్.

53 వాండ్రు, అయా పీన్గు సిలువ ముస్సుహాన్ డిఃహ్తాండ్రె తెల్లాని పాతదాన్ సుటిసి నటు పణుకుదిజ్ దొల్స్తె దూకిదు ఇట్టాన్. అయా దూకిదు, ముజాలె ఎయెరిజ్బా ఇడ్విరె.

54 అయా రోజు, విస్తాంతి దినం ముజాల మన్ని తయార్ కిని రోజు. విస్తాంతిదినం మొదొల్స్తెజ్ టయం డగ్రు ఆజినాద్.

55 యేసు వెట గలిలయదాన్ వాతి బోదెకు యోసేపు వెట సాహనె, దూకి ని వన్నిజ్ ఇట్టిక సుడఃతె.

\* 23:31 23:31 యాక యూదురి ఉండ్రి మాట. దిని అరదం ఇనిక ఇహిజ తప్పకెతి నజి వారు సిక్సె సితిజ నండ్రి సెఇవరిజ్ దేవుణు ఎస్సా సిక్సె సీనాన్.

56 వాండ్లు ఇండ్రో మహారె, పీన్ గుదిజ్ రాస్తెజ్ వాసనం నూనె తయార్ కితార్. విస్త్రాంతి దినం మొదోల్స్తెజ్ యూదురి రూలుజ్ నమ్మిజి అవిక్ రొబితార్.

## 24

### యేసు మర్జి నిజ్జినాన్

- 1 వారమ్దిజ్ మొదోహి రోజు కోడిజామ్నె, బోదెకు అవి తయార్ కితి వాసనం నూనెజ్ అస్తెనె దూకిదు సోహె.
- 2-3 అవిక్ అబ్బె వాతిజ్, దూకి మూక్తి పెరిపణుకు గూర్బాతి మహిక సుడేతె. అవిక్ లోఇ డుగితిజ్ యేసు పీనుగు తోర్వితాద్.
- 4 దిన్ని వందిజ్ బమ్మ ఆజి నిహి మహివలె, మిరిస్సివజ తెలాని సొక్కెజ్ తోడేగితి రిఎర్ మొగవారు వన్కా డగ్రు నిహార్.
- 5 అవిక్ నండో తియెల్ ఆజి ముణుకుజ్ ఊర్జి మాడిస్తె.
- 6 అయావలె అయా మొగవారు వన్కాజ్, “ఎందనిజ్ మీరు బత్తితి మన్నివన్నిజ్ సాతివరిబాన్ రెబాజిన్దెర్? వాండ్లు ఇబ్బె సితెన్. నిజిత మనాన్. మీ వెట గలిలయదు మహివలె వాండ్లు ఇనిక వెహ్లాన్ ఇజి ఎత్తు కిదు.
- 7 ఇనిక వెహ్లాన్ ఇహిజ, ‘లోకుమరిసి సెఇవరి కీదు ఒపజెవె ఆదెజ్వెలె. సిలువాదు పొకె ఆజి, వాండ్లు సాజి మూండ్రి రోస్కాజ్ నిజ్నాన్లె’, ఇజి”, ఇజి వెహ్లాన్.
- 8 అయావలె అవిక్ యేసువెహ్లా మాట ఒడేబితె.
- 9 దూకిదాన్ మహ్లానె, అబె సుడేతికెజ్ విజు పదకొండు మణిసి సిసూరిజ్ని మహి వరిజ్ విజెరిజ్ వెహ్లా\*.
- 10 అవిక్ ఎయెక్ ఇహిజ, మగ్దలెనె మరి, యోసన, యాకోబుజ్ అయిసి ఆతి మరియ, వన్కావరివెట మహి మరి సెగొండెక్ బోదెక్ ఇవిక్నె జర్గితికెజ్ అపొస్తుడురిజ్ వెహ్లాకెజ్†.
- 11 గాని వారు బోదెక్ వెహ్లా మాటెజ్ నమిఎతార్. ఎందానిజ్ ఇహిజ, ఆకెజ్ పంబర మాటెజ్ లెకెండ్ వారు ఒడేబితార్.
- 12 అహిజ్బా, పేతురు నిజితండ్రె, దూకిదు ఊహ్కాక్కి సోహాన్. వజితి సుడేతిజ్ పీన్ గు సుటిన్తి తెల్లాని పాతెజ్ అర్తి మహికదె సుడేతాన్. వాండ్లు జర్గితికెజ్ వందిజ్ బమ్మ అజి ఇండ్రో మర్జి సోహాన్.

### యేసు రిఎర్ సిసూరిజ్ తోరె ఆజినాన్

- 13 అయా రోజునె, సిసూరిలోఇ రిఎర్ ఎమాయుఇని ఉండ్రి నాటో సొన్ని మహార్. ఎమాయు యెరూసలెమ్దాన్ పదకొండు కిలో మీటర్ దూరం మనాద్.
- 14 వారు రిఎర్ జర్గితి విజు వందిజ్ వర్గిజి మహార్.
- 15-16 వారు ఆహె వర్గిజి మహిజ్ యేసు వాండ్రె వాజి వరి వెట నడితాన్. వారు వన్నిజ్ సుడేతార్, గాని వన్నిజ్ గుర్తు అస్తెజ్ అట్వితార్.
- 17 నస్తివలె యేసు, “మీరు నడిజి వర్గిజిని యా మాటెజ్ ఇనికెజ్”, ఇజి వరిజ్ వెన్బాతాన్. వారు దుకందాన్ మొకొం డిస్తారె, కద్దిఎండ నిహార్.
- 18 వెనుక వరిలోఇ క్లెయిపా ఇనికాన్ ఒరెన్ యేసుజ్, “యెరూసలెమ్దు కూల వాతి వరి లోఇ మంజి, సోహి రోస్కాజ్ జర్గితికెజ్ నెన్ఇతికి నీను ఒరిదె”, ఇజి వెహ్లాన్.
- 19 “ఇనికెజ్ జర్గితె?” ఇజి వాండ్లు వెన్బాతాన్. దనిజ్ వారు ఈహు వెహ్లాన్. “నజరెతుదికాన్ యేసుజ్ జర్గితి నజతిజు వందిజ్ వర్గిజినాప్. వాండ్లు ఒరెన్ ప్రవక్త. వాండ్లు కితి గొప్ప పణిజాణిజ్ వెహ్లా గొప్ప నజతిజాణిజ్ దేవుణు వన్నిజ్ ఇన్టం ఆతాన్. లోకుర్ విజెరె బా వన్నిజ్ ఇన్టం ఆతారె నమ్మితార్.
- 20 మా పెరి పుజెరిజు, అతికారిజు, రోమ అతికారి కిదు సావుదిజ్ సిక్స సీదెజ్ వన్నిజ్ ఒపజెహ్లాన్. వారు వన్నిజ్ సిలువాదు కుటిజాణిజ్ డెయిజి సహ్లాన్.
- 21 వీండ్లునె ఇస్తాయేలు లోకాజ్ డిస్పిస్సికాన్ ఇజి మాపు ఎద్రు సుడేజి మహాప్. యాకదె ఆఎండ, యా నజతి జర్గిజి నేహాన్ మూండ్రి దినమ్కు ఆతె.
- 22-23 మరి. మా లోఇ మన్ని సెగొండెక్ బోదెక్ మజి నండో బమ్మ కిబిన్తి. ఎలాగ ఇహిజ, కోడిజామ్నె దూకిదు సోహి గాని వన్కాజ్ వన్ని పీన్ గు తోర్వితాద్. అవీకు మర్జి వాతెనె మజి ఈహు వెహ్లా. దూతార్ వన్కాజ్ తోరె ఆతారె, యేసు బత్తిత మనాన్ ఇజి వెహ్లాన్ ఇజి.

\* 24:9 24:9 యా పన్నుపెర్కార్ యూదురి దేనమ్దిజ్ బాదకిజిని రోమ ప్రభుత్వం వందిజ్ పణికినికార్ విరు యూదురిజ్ పడేఇకార్ అకాదె ఆఎండ వీరు నండో పన్ను లోసి యూదురిజ్ బాద కినార్. ఆహె అనయమ్దాన్బా వారు ఆన్సి గణిస్సినార్. వారు యూదురి రూలుజ్ లోజివిర్ అందెజె యూదురు వరిజ్ పాపం కినికార్ ఇజి వెహ్లాన్. † 24:10 24:10 యాక యూదురి ఉండ్రి మాట దిన్ని అరదం ఇనిక ఇహిజ తప్పకిఇతి నజి వారు సిక్సనితిజు నండో సెఇవరిజ్ దేవుణు ఎస్సా సిక్స సీనాన్ ఇజి.



24 మా వెట మనికార్ సెగొండార్ దూకిదు సాహరె, బోదెక్ వెప్తా వజనె సుడేతార్. వన్నిజ్ వారు సుడేవితార్.

25-26 అయావలె వాండ్రు వరిజ్, “బుద్ది సిలికిదెర్, ప్రవక్తరు వెప్తా మాటెజ్ విజు నమిదెజ్ మిజి నండొ కన్ఱం ఆజినాద్. క్రీస్తు యా లెకెండ మాల్లెజ్ఓరిసి, దేవుణు మంజిని బాడిడు వన్నివెట అతికారమ్దు మండ్రెజ్గదె?”, ఇజి వెప్తాన్.

27 వాండ్రు దేవుణు మాటదు వన్ని వందిజ్ రాస్తి మన్ని దని అర్థం వరిజ్ వెప్తాన్. మోసి రాస్తి పుస్తకమ్దాన్ మొదొల్ని ప్రవక్తరు విజెరె రాస్తి పుస్తకమ్ దాక మన్ని మటెజ వెప్తాన్ వాతాన్.

28 వారు సొన్నిని నారు డగ్రు ఆతిజ్, వాండ్రు వరిజ్ డిసి మరి దూరం సొన్నిని లెకెండ నడితాన్.

29 గాని వారు, “మా వెట మన్అ. పొద్దుఆజినాద్. సీకాట్ ఆతాద్”, ఇజి వెప్తాన్ వన్నిజ్ మరి మరి వెప్తాన్. అందెజె వాండ్రు వరి వెట మండ్రెజ్ సాహాన్.

30 వాండ్రు వరి వెట ఉండెజ్ బస్తివెలె, రొటె అస్తాండ్రె దేవుణుదిజ్ వందనమ్కు వెప్తాన్ దనిజ్ రుక్కి వరిజ్ సితాన్

31 వెటనె వారు వీండ్రు యేసు ఇజి గుర్తు అస్తార్. గాని వాండ్రు వరిజ్ తోర్విండ ఆతాన్.

32 అయావలె వారు రిఎర్, “వాండ్రు సర్దు, మా వెట వర్గిజి, దేవుణు మాటెజ్ మజి నెన్పిస్తివెలె, మా మన్నుదు నండొ సర్ద వాతి లెకెండ ఆతాద్ గదె”, ఇజి ఒరెన్ వెట ఒరెన్ వర్గితాన్.

33-34 వెటనె వారు నిజితారె, యెరూసలెమ్దు సాహార్. అబె, వారు పదకొండు మణిసిర్ సినూర్ని వరి వెట మహికార్ కూడేజి, “నిజమె, యేసు మర్జి నిజితాన్. సిమొనుజ్తోరె ఆతాన్ ఇజి వర్గిజి మహిక సుడేతాన్.

35 అయావలె వారు రిఎర్, సర్దు జర్గితికెజ్ యేసు రొటె రుక్కివెలె వారు ఎలాగ గుర్తు అస్తారొ దన్నివందిజ్ వెప్తాన్.

**సినూర్ కూడితివెలె వరిజ్ తోరె ఆజినాన్**

36 వారు వర్గిజి మహివలెనె యేసు వాండ్రె వరి నడిమి నిహండ్రె, “సమాదనం కల్లిపిద్”, ఇజి వెప్తాన్.

37 దూబ తోరితాద్ ఇజి ఒడిబిజి వారు నండొ తియెల్ ఆతార్.

38 నస్తివలె వాండ్రు, “ఎందానిజ్ మీరు తియెల్ ఆజిన్దెర్? ఎందనిజ్ అనుమానమ్కు మీ మన్నుద్ వాజినె?

39 నానె వాండ్రు ఇజి నమిదెజ్ నా కిక్కాజ్ కాల్యాజ్ సుడేదు. ఎందానిజ్ ఇహిజ, నజి మన్ని లెకెండ దూబదిజ్ ఒడోల్ మన్ఉ.

40 యా మటెజ్ వెప్తాన్ వాండ్రు వరిజ్ వన్ని కిక్కు కాల్కు తోరిస్తాన్.

41-43 అపొజ్బా వారు సర్దదాన్ బమ్మదాన్ ఇంక నమ్మిఎండ మహార్. అందెజె వాండ్రు వరిజ్, “తిండ్రెజ్ ఇనికబా మనాదా?”, ఇజి వెన్బాతిజ్, వారు ఉండ్రె సుప్తా మొయ ముకెజ్ సితార్. వాండ్రు లొస్తాండ్రె వరి ఎద్దు తిహాన్.

44 మరి వాండ్రు వరిజ్, “నాను మీ వెట మహివలె యాకెజెన్ మీ వెట వెప్తా. ఇనిక ఇహిజ, మోసి రాస్తి పుస్తకమ్దు, ప్రవక్తరు రాస్తి పుస్తకమ్దు, కిర్తన పుస్తకమ్దు నా వందిజ్ రాస్తి మనికెజ్ విజు పూర్తి ఆదెజ్వెలె”, ఇజి.

45 వాండ్రు దేవుణు మాటెజ్ అర్థం కిదెజ్ వరిజ్ సాయం కిత్తాన్.

46-47 వాండ్రు వరిజ్ ఈహు వెప్తాన్. “యా మాటెజ్ రాస్త మనాద్. అయాక ఇనిక ఇహిజ, క్రీస్తు మాలెజ్ ఓరిసి, సాజి మూండ్రె రొస్కాణిజ్ సావుదాన్ నిజ్నాన్లె. యెరూసలెమ్దు మొదొల్ని లోకాజ్ విజెరిజ్ వన్ని అతికారమ్దాన్ ‘పాపమ్కు ఒప్పుకోడేఅ’, దేవుణు సెమిస్తాన్”, ఇని మాట వెవో ఆనాద్లె.

48 మీరు సుడేతికెజ్ లోకాజ్ వెప్తాజ్.

49 నా బుబ్బ ఒట్టు కితి దేవుణు ఆత్మదిజ్ నాను మిజి పొక్కు. గాని మున్నుహాన్ సత్తు మీ మున్ను వానిదాక మీరు యెరూసలెం పట్టమదునె మండ్రు.

**దేవుణు యేసుజ్ పలోకమ్దు ఒసినాన్**

50 పట్టుం వెల్లి బెతానియ నారు డగ్రు దాక వాండ్రు వరిజ్ ఒతాన్. వాండ్రు కికు పెప్తాండె, వరిజ్ దీవిస్తాన్.

51 దీవిసి మహివలె వాండ్రు వరిజ్ డిస్తాన్. దేవుణు వన్నిజ్ వాండ్రు మంజిని బాడిడు ఒత్తాన్.

52-53 వారు వన్నిజ్ మాడిస్తారె, నండొ సర్దదాన్ యెరూసలెమ్దు మర్జి వాతార్. వారు డిన్విండ గుడిడు మంజి, దేవుణుదిజ్ పొగిడిజి మహార్.

## యోహాను రాస్తి సువార్త

నెల్వ కిబిసినిక

పన్నెండు మణిసిర్ సిసూర్ లో ఇ ఒరెనాతి యోహాను రాస్తి పుస్తకమ్ నె యాక. యేసు యా లోకమ్ దు బత్కిజి మహివలె జర్గితి దన్నివందిజ్ కతవజి వాండ్రు వహ్సినాన్. యేసు ఎయెన్? వాండ్రు దేవుణు మరిసి, దేవుణు వెట మహికాన్, గాని వాండ్రు దేవుణునె. తయార్ కితిక ఇనికబా వాండ్రు సిల్లెండ కల్గివితాద్. వాండ్రె దేవుణు మాట, లోకురి విజేరి పాపమ్ కు సాన్ పిస్తెజ్ పూజ ఆతి మెండ గొరె పిల్ల లెకెండె వాండ్రు. ఎలాకాలం బత్కిని బత్కు సీని టిండి లెకెండె వాండ్రు. లోకమ్ దిజ్ జాయి లెకెండె మనాన్. నెగ్గి గవుడుఎన్ లెకెండె మనాన్, సావుడాన్ మర్జి నిజిత్తి బత్కు సీనికానె వాండ్రు ఇజి యేసు వందిజ్ యా పుస్తకమ్ దు వెహ్సినాన్. యా సువార్త రాసి మహివలె, రోమ గవర్ మెంటుదు మన్నికార్ దేవుణుదిజ్ నమ్మితి వరిజ్ నండో మాలెజ్ కిజి మహర్. అందెజె నమ్మితి వరిజ్ దయిరం సీదెజ్ యోహాను రాస్తికాదె యా పుస్తకం.

యేసు క్రీస్తు దేవుణు వాక్యం

1 లోకం పుటిన్ ఏండ ముజాలె, దేవుణు వందిజ్ వెహ్సినాని వాక్యం ఇనికాన్ ఒరెన్ మహాన్. వాండ్రు దేవుణు వెట మహాన్. వాండ్రె దేవుణు.

2 వాండ్రు లోకం పుటిన్ ఏండ ముజాలె, దేవుణు వెట మహాన్.

3 విజు వన్నివెట దేవుణు తయార్ కితాన్. కల్గితి మన్నిక ఇనికబా వాండ్రు సిల్లెండ కల్గివితాద్.

4 జీవు వన్నిబాన్ మనాద్. అయా జీవు లోకురిజ్ జాయి ఆత మనాద్.

5 జాయ్ సీకటిదు జాయ్ సీజినాద్. గాని సీకటిదు మన్నికార్ జాయ్ దిజ్ నెన్ ఏతార్.

6 దేవుణు బాణిజ్ పొక్కి ఒరెన్ మణిసి వాతాన్. వన్ని పేరు యోహాను.

7 వాండ్రు అయా జాయ్ వందిజ్ సాస్యం వెహ్సెజ్ ఒరెన్ సాసిలెకెండె వాతాన్. ఎందానిజ్ ఇహిజ, విన్నిబోద వెంజి లోకుర్ విజెరె అయా జాయ్ దిజ్ నమ్మిదెజ్ వాతాన్.

8 యోహాను అయా జాయ్ ఆవెన్. గాని అయా జాయ్ వందిజ్ సాక్సం వెహ్సెజ్ వాతాన్.

9 అయా జాయ్ నె నిజమాతి జాయ్. నిజమాతి జాయ్ లోకమ్ దు వాజి లోకురిజ్ విజెరిజ్ జాయ్ సీజినాన్. వాక్యం నె నిజమాతి జాయ్.

10 వాండ్రు లోకమ్ దు మహాన్. లోకమ్ దు మనికెజ్ విజు వన్నివెటనె దేవుణు తయార్ కితాన్. గాని లోకుర్ వన్నిజ్ పొలిస్తెజ్ అట్ ఏతార్.

11 వాండ్రు వన్ని సొంత దేసమ్ దు సొహాన్. గాని వన్ని సొంత యూదురి లోకుర్ వన్నిజ్ డగ్రు కివితార్.

12 వన్నిజ్ ఎసాండార్ డగ్రు కిత్తారొ, వారె వన్నిముస్కు నమకం ఇట్టికార్. నన్నివరిజ్ వన్నికొడెర్ ఆదెజ్ వాండ్రు అతికారం సిత్తాన్.

13 వారు అప్పొసి వెట పుట్టికార్ ఆవెర్. ఒడెల్ ఆసదాన్ పుట్టికార్ ఆవెర్. వారు ఎత్తు కితివజి పుట్టికార్ ఆవెర్. దేవుణునె వరిజ్ వన్ని కొడెర్ ఇజి ఇట్టాన్.

14 వాక్యం ఇనికాన్ లోకు ఆతాండ్రె మా నడిఃమి బత్కితాన్. వాండ్రు మా ముస్కు వన్నిదయాదర్మం పూర్తి తోరిస్తాన్. వాండ్రు దేవుణు వందిజ్ నిజమాతికెజ్ పూర్తి తోరిస్తాన్. వాండ్రు ఎసా గొప్పపెరికాన్ ఇజి మాపు సుడెతాప్. బుబ్బ బాణిజ్ వాతి ఒరెండ్రె మరిసి ఆతి గొప్ప పెరివన్నిజ్ సుడెతాప్.

15 యోహాను వన్నివందిజ్ సాక్సం వెహ్సినాన్. వాండ్రు లోకురిజ్, “నా వెన్కా వానికాన్ నజి మిస్తికాన్. ఎందానిజ్ ఇహిజ, వాండ్రు నాను పుట్ ఏండ ముజాలె మన్నికాన్ ఇజి నాను వెహ్సెకాన్ వీండ్రె”, ఇజి డటం డేల్లి వెహ్సెన్.

16 వన్ని పూర్తి దయాదర్ మందాన్ వాండ్రు మజి విజెరిజ్ దీవిస్తాన్. కాలమ్ కు గడెప్పి మహిజ్ బా వాండ్రు మజి దీవిసి నె మంజినాన్.

17 యూదురిజ్, రూలుజ్ మోసెవెట దేవుణు సితాన్. వన్ని దయా దర్మం ని వన్ని వందిజ్ నిజమాతి సజతిజ్ యేసు క్రీస్తు వెట వాతె.

18 ఎయెన్ బా ఎసెజ్ బా దేవుణుదిజ్ తోవెన్. గాని అప్పొసి పడెకాద్ మన్ని, దేవుణు వెట సమానం ఆతి, ఒరెండ్రె మరిసి నె దేవుణు ఎయెన్ ఇజి మజి తెలివి కిబిస్తాన్.

యోహాను యేసు వందిజ్ వెహ్నిని సాస్యం

19-20 యెరూసలేమ్ దాన్ యూదురి పెద్దలిజు, యోహాను డగ్రు పుజెరిజు ని లేవి జాతిదు మన్ని వరిజ్ పోక్తార్. “నీను ఎయెన్ ఇజి వెహ్ ఆజిని?”, ఇజి వెన్ బాదెజ్ వరిజ్ పోక్తార్. నస్తివలె యోహాను ఈహు వరిజ్ సాక్సి వెహ్తాన్. “నాను క్రిస్తు ఆవ”, ఇజి నెగ్రెండ వెహ్తాన్.

21 అయావలె వారు, మరి నీను ఎయి? నీను ఏలియ ప్రవక్తనా? ఇజి వెన్ బాతార్. “ఆవ”, ఇహాన్. “నీను మాపు ఎద్రు సూణి ప్రవక్తనా?”, ఇజి వెన్ బాతిజ్, “ఆవ”, ఇహాన్.

22 అందెజె వారు, “నీను ఎయెన్? మజి పోక్తివరిజ్ మర్జి వెహ్తాజ్ నీను ఉండ్రీ జబాబు సిదా. నీ వందిజ్ నీను ఇన్నిక ఇజి వెహ్ ఆజిని?”, ఇజి వెన్ బాతార్.

23 దన్నిజ్ యోహాను యెసయ ప్రవక్త వెహ్తావజ వెహ్తాన్. “ప్రబు వందిజ్ సరితినాజ్ కిదు, ఇజి బిడిమ్ బూమిదు డేల్ సినివన్ని లెకెండ్\* మన్ను నాను”.

24-25 వన్ని డగ్రు వాతికార్ పరిసయరు పోక్తికార్. అయావలె, అయా పరిసయరుజు లొఇ సెగెండార్ వన్నిజ్, “నీను క్రిస్తు ఆఇజ, ఏలియ ప్రవక్త ఆఇజ, మాపు ఎద్రు సూణి ప్రవక్త ఆఇజ, మరి ఎందనిజ్ నీను బాప్తినం సీజిని?”, ఇజి వెన్ బాతార్.

26 దన్నిజ్ వాండ్రు, “నాను ఏరుదాన్ బాప్తినం సీజిన్. గాని మరి ఒరెన్ మనాన్. వాండ్రు మీ నడిమి మనాన్. వన్నిజ్ మీరు పోలిన్ ఇదెర్.

27 వాండ్రె నా వెన్కా వాజినికాన్. వన్ని జోడెకు బేల్లు కూతెజ్ బా నాను ఏపటికాన్ ఆవ”, ఇజి వెహ్తాన్.

28 యెర్దాను ఇన్ని గడ్డ అతాహ పడెకాద్ మన్ని బెతానియ ఇన్ని పట్టుమ్దు యాకెజ్ విజు జర్గితె. బానె యోహాను బాప్తినం సీజి మహాన్.

29 మర్సనాండిజ్, యేసు వన్ని డగ్రు వాజినిక యోహాను సుడెతాన్. సుడెతండ్రె వాండ్రు, “ఇదిలో లోకురి పాపమ్ క వందిజ్ పూజ ఆదెజ్ దేవుణు పోక్తి వన్ని మెండ గొరె పిల్ల. వాండ్రు లోకురి పాపమ్ కు సాన్నిస్నాన్”, ఇజి వెహ్తాన్.

30 “నా వెన్కా ఒరెన్ వాజినాన్, వాండ్రు నజి ఇంక మిస్తికాన్. ఎందనిజ్ ఇహిజ, వాండ్రు నాను పుట్టెండ ముజాల మన్నికాన్ ఇజి నాను ఎయె వందిజ్ వెహ్తానొ వాండ్రె వీండ్రు’.

31 వీండ్రు ఎయెన్ ఇజి నానె నెన్ ఎత. గాని ఇస్రాయేలు లోకురిజ్ వీండ్రు ఎయెన్ ఇజి తెలివి కిని వందిజె నాను ఏరుదాన్ బాప్తినం సీజి వాత”, ఇజి వెహ్తాన్.

32 మరి వాండ్రు నెస్తిక ఈహు సాక్సి వెహ్తాన్: “దేవుణు ఆత్మ ఉండ్రీ పారపోటి లెకెండ్ ఆగాసమ్ దాన్ డిగ్జి వాజి వన్నిమున్ను మంజినిక నాను సుడెత.

33 నానుబా వన్నిజ్ నెన్ ఎండ మహా. గాని ఏరుదాన్ బాప్తినం సీజి ఇజి నజి వెహ్తా పోక్తి దేవుణునె నజి వెహ్తాన్, ‘దేవుణు ఆత్మ డిగ్జి ఎయెర్ మున్ను మంజినిక నీను సూణిదొ వాండ్రె దేవుణు ఆత్మదాన్ బాప్తినం సీనాన్’, ఇజి.

34 వెహ్తా లెకెండ్ వినిజ్ జర్గితక నాను సుడెత. అందెజె నాను వెహ్నిన, ‘వీండ్రె దేవుణు మరిసి ఇజి’.

యేసు మొదొహి సిసూర్

35 మర్సనాండిజ్, మరి, యోహాను వన్ని రిఎర్ సిసూర్ వెట నిహ మహాన్.

36 అయావలె యేసు అయా సరి సాన్ని మహిజ్, వన్నిజ్ డిటం సుడెజి, ‘ఇదిలో, పూజ ఆదెజ్ దేవుణు పోక్తి వన్ని మెండ గొరె పిల్ల’, ఇజి వెహ్తాన్.

37 అయా రిఎర్ సిసూర్ వాండ్రు వెహ్తిక వెహరె, యేసు వెన్కా సాహర్.

38 యేసు మహ్తాండ్రె, వారు వెన్కా వాజినిక సుడెతాన్. సుడెతాండ్రె వరిజ్, “మీరు ఇనిక రెబాజినిదెర్?”, ఇజి వెన్ బాతాన్. వారు వన్నిజ్, “రబ్బి, ఇహిజ బోదిస్సికాన్, నీను ఎంబె మంజిని?”, ఇజి వెన్ బాతాన్.

39 వాండ్రు, “రదు, వాజి సుడెదు”, ఇహాన్. అందెజె వారు సాహరె, వాండ్రు మంజినిబాన్ సుడెతార్. అయా రోజు వారు వన్నివెట మహర్. అయావలె రమారమి పొగల్ నాల్గి గంటెజ్ ఆత మహద్.

40 సిమోన్ పేతురు తంబెర్ని ఆతి ఆంద్రెయ ఇన్నికానె యోహాను వెహ్తిక వెంజి యేసువెట సాహి రిఎర్ లొఇ ఒరెన్.

41 వాండ్రు వెటనె, వన్నిఅన్నసి సిమోనుజ్ రెబాతాండ్రె, “మాపు మెసయెజ్† సుడెతాప్”, ఇజి వెహ్తాన్.

42 వెహ్తాండ్రె వన్నిజ్ యేసు డగ్రు తతాన్. యేసు సిమోనుజ్ సుడెజి, “నీను యోహాను మరిసి ఆతి సిమెను. నీను కేవ ఇజి కూకె ఆనిలె”, ఇజి వెహ్తాన్. (గ్రికు బాసదు అయా మాట పేతురు ఇజి రాస్త మనాద్. దని అర్థం ఇన్నిక ఇహిజ సటు ఇజి).

\* 1:23 1:23 యెసయ 40:3. † 1:41 1:41 మెసయ ఇహిజ దేవుణు వన్ని లోకురిజ్ రక్సిన్తెజ్ ఏర్పాటు కిత్తి పోక్తికాన్. ఇది ఏబ్రి బాస

యేసుపిలిపుజ్ నతనయేలుజ్ కూక్సినాన్

43 మహ్సా నాండిజ్, గలీలయ ముటదు సొండ్రెజ్ ఇజి యేసు ఒడఃబితాన్. అయావలె, వాండ్రు పిలిపుజ్ దసూల్ ఆతాతాండ్రె వన్నిజ్, “నా వెట వాజి నా సిసూడుః ఆఅ”, ఇజి వెహ్తాన్.

44 పిలిపు బెత్సెయ్ ఇని పట్టుమ్దికాన్. పిలిపు, ఆంద్రెయ, పేతురు వీరు ఉండ్రె పట్టుమ్దికార్.

45 పిలిపు నతనయేలు ఇని వన్నిజ్ రెబాతాండ్రె వన్నిజ్, “మోసె రాస్తి సీతి రూలుదు వాండ్రు రాస్తి మన్ని వన్నిజ్, ప్రవక్తరు బా రాస్తి మన్ని వన్నిజ్ మాపు దసూల్ ఆతావ్. వాండ్రు నజరెతుదికాన్ ఆతి యేసు. యోసేపు మరిసి”, ఇజి వెహ్తాన్.

46 అందెజె నతనయేలు వన్నిజ్, “నెగ్గెకెజ్ ఇనికబా నజరెతుదాన్ వానాదా?”, ఇజి వెన్బాతాన్. వన్నిజ్ పిలిపు, “వాజి సుడఃఅ”, ఇహాన్.

47 యేసు నతనయేలు వన్ని డగ్రు వాజినిక సుడఃతండ్రె, “ఇవిలోన్ నిజమాతి ఇస్రాయేలుదికాన్ వాజినాన్. విని లోఇ ఇన్ని సెకెజ్బా సిల్లు”, ఇజి వన్ని వందిజ్ వెహ్తాన్.

48 అయావలె నతనయేలు వన్నిజ్, “నీను ఎలాగ నజీ నెస్సి?”, ఇజి వెన్బాతిజ్ యేసు, “పిలిపు నిజీ కూక్ఏండ ముజాలె, నీను బొడెమరాన్ అడిగి మనిక నాను సుడఃత”, ఇహాన్.

49 నతనయేలు, “బోదిస్సికి, నీను దేవుణు మరిసి. నీను ఇస్రాయేలు లోకురి రాజు”, ఇహాన్.

50 అందెజె యేసు వన్నిజ్, “నీను బొడెమరాన్ అడిగి మంజినిక నాను సుడఃత ఇజి నాను వెహ్తాజె నీను నమిజిని. దినిజ్ ఇంక మిస్తి నండ్రె పెరి పణిజ్ నీను సూణిలె”, ఇజి వెహ్తాన్.

51 వాండ్రు వన్నిజ్, “నాను నిజం వెహ్సిన, ఆగాసం రెయ్ ఆజి దేవుణు దూతెజ్ లోకుమరిసిఆతి నా డగ్రు ఎక్సి సొనిక డిగ్జి వానిక నీను సూణిలె”, ఇజి వెహ్తాన్.

## 2

యేసు కితి మొదొహి బమ్మ ఆతి పణి

1 రుండి దినమ్కు సొహి వెన్కా, గలీలయ ముటది కానా ఇని పట్టుమ్దు ఉండ్రె పెండ్రె జర్గితాద్.

2 యేసు అయ్సిబాన్ మహాద్. యేసుజ్ని వన్ని సిసూర్జబా ఆ పెండ్రెదు కూక్కార్.

3 ద్రాక్కుకల్లు వీజితివెలె, యేసు అయ్సి వన్నిజ్, “ద్రాక్కుకల్లు వీజితాద్”, ఇజి వెహ్తాద్.

4 అయావలె యేసు, “ఓ యా, దిని వందిజ్ నీను నజీ ఎందనిజ్ పణిసిని? నాను ఎయెన్ ఇజి తోరె ఆదెజ్ దేవుణు నా వందిజ్ ఏర్పాటు కితి వేలా ఇంక రెవె”, ఇజి వెహ్తాన్.

5 యేసు అయ్సి పణికినివరిజ్, “వాండ్రు మిజి ఇన్నిక వెహ్తాజ్బా మీరు కిదు”, ఇజి వెహ్తాద్.

6 దేవుణుదిజ్ ఇస్సం ఆత్తివజ మండ్రెజ్ యూదురు సుబ్బరం ఆనార్. సుబ్బరం ఆనివందిజ్ వారు నొర్బానార్. అయాక వరి ఉండ్రె ఆసారం. ఆహె నొర్బాని దన్నివందిజ్ పణుకుదాన్ తయార్ కితి గోలమ్కు మహె. డగ్రు తొబయ్దాన్ నూటి ముపయ్ లీటర్ ఏరు అస్సె. నన్ని గోలమ్కు ఆరుబాన్ మహె.

7 యేసు, “అయా గోలమ్కాజ్ ఏరు నిహతు”, ఇజి పణికిని వరిజ్ వెహ్తాన్. వారు నిండ్రు నిహ్తార్.

8 అయావలె వాండ్రు వరిజ్, “ముడుక్సి నవ్దెరి బాన్ ఒతు”, ఇజి వెహ్తాన్. వారు అయా లెకెండ్రె కితార్.

9 నవ్దెరి యెలు ద్రాక్కు కడు ఆతి ఏరు రుసి సుడఃతాన్. అయా ద్రాక్కుకల్లు ఎమేణిజ్ వాతాదొ ఇజి ఆ ఏరు ముడుక్తి ఒతి పణికిని వరిజె తెలినా ద్గాని నవ్దెరిజ్ తెలివెద్. వాండ్రు పెండ్రె మరిసిజ్ కూక్కాన్.

10 కూక్కాండ్రె వన్నిజ్, “విజెరె కూలెజ నెగ్గె ద్రాక్కుకల్లు ముందాలె సీనార్. లావు ఉటి వెన్కా అడ్డెబెడ్డెదిక సీనార్. గాని నీను ఏలుదాక నెగ్గె ద్రాక్కుకల్లునె ఇడ్డి మన్ని”, ఇజి వెహ్తాన్.

11 యాకాదె యేసు కితి మొదొహి బమ్మ ఆతి పణి. యాక గలీలయ ముటది కానా ఇన్ని పట్టుమ్దు జర్గితాద్. అయా లెకెండ్రె కిజి, యేసు వాండ్రు గొప్పపెరికాన్ ఇజి తోరిస్సాన్. వన్ని సిసూర్ వన్ని ముస్సు నమకం ఇట్టార్.

12 దిని వెన్కా వాండ్రు వన్ని అయిసి, తంబెర్సిర్, సిసూర్ వెట కపర్నహొముదు సొహాన్. అబ్బె సెగం దినమ్కు మహార్.

యేసు దేవుణుగుడిఃదాన్ బేరం కినివరిజ్ వెల్లి పొక్సినాన్

13 యూదురి పన్సు పండ్రెయి కిదెజ్ కాలం డగ్రు ఆతాద్. అందెజె యేసు యెరూసలెమ్దు సొహాన్.

14 బాన్ దేవుణుగుడిఃది అరుజుదు బేరం కిజిని వరిజ్ వాండ్రు సుడఃతాన్. కోడ్డిజ్, గొర్రెజ్, పూజ కిని వందిజ్ పారపొటిజ్ పొర్ని వరిజ్ సుడఃతాన్. పయు దేసెమ్ది డబ్బుజ్ మరిసి యూదురి కాసుజ్ సీజిని బేరం కిని వరిజ్బా సుడఃతాన్.

15 అయావలె వాండ్రు నానుదాన్ కొండ కితాండ్రె, కొడ్డిజ, గొర్రెజ వెట వరిజ్ విజెరిజ్ అరుబుదాన్ పేర్తాన్. డబ్బుమరిసి బేరం కినివరి డబ్బు విజు సెద్దిస్తాండ్రె, వరిబల్లెజ్ మహ్తాన్.

16 పార పొటిజ్ పొర్ని వరివెట, “విన్కాజ్ ఇబ్బెణిజ్ ఒతు. నా బుబ్బ ఇల్లు సత్తలెకెండ కిమాట్”, ఇజి వెహ్తాన్.

17 నస్తవలె వన్నిసిసూర్, “ఓ దేవుణు, నీ ఇల్లువందిజ్ నజీమన్ని గొప్ప ఆస, ఉండ్రె సినులెకెండ నా లోఇ కన్నాద్\*”, ఇజి దేవుణు మాటదు రాస్తి మనిక వారు ఒడ్డిబితార్.

18 అయావలె యూదురు, యా పణిజ్ కిదెజ్ నిజి ఇని అతికారం మనాద్? ఉండ్రె బమ్మ అని పణికిజి మజి తోరిసి అయాక రుజుప్ కిత, ఇజి వన్నిజ్ వెహ్తాన్.

19 “యా గుడి: డెయిజి అర్పు. మూండ్రె రోస్కాజ్ నాను మరి తొహ్నా”, ఇజి యేసు వరిజ్ వెహ్తాన్.

20 దన్నిజ్ యూదురు, “యా గుడి: తొహ్తాజ్ నలవయ్ ఆరు పంటజ్ ఆతాద్. నీను మూండ్రె రోస్కాణిజ్ తొహ్నాదా?”, ఇహ్తాన్.

21 గాని దేవుణుగుడి: వందిజ్ వెహ్తావలె వన్ని ఒడ్డిల్ వందిజె వెహ్తాన్.

22 వాండ్రు సాతాండ్రె మర్జి నిజీతివెనుక, యా లెకెండ మాట వాండ్రు వెహ్తాన్ ఇజి సిసూరు ఒడ్డిబితార్. అందెజె దేవుణు మాట వారు నమ్మితార్. యేసు వెహ్తా మాటబా నమ్మితార్.

23 యేసు పస్కపండ్రెయిదిజ్ యెరూసలెమ్దు మహివలె, వాండ్రు కితి బమ్మ అతి పణిజ్ సుడ్డితారె, నండ్రెండార్ వన్నిజ్ నమ్మితార్.

24 గాని వాండ్రు వరిజ్ వన్నిజె ఒపజెప్ ఎతాన్. ఎందనిజ్ ఇహిజ, వాండ్రు విజెరిజ్ నెస్సాన్.

25 ఎయెర్బా వన్నిజ్ లోకుర్ వందిజ్ వెహ్తాజ్ అవసరం సిల్లెద్. ఎందానిజ్ ఇహిజ, వరి మన్నుదు మన్ని ఆలోసనమ్కు వాండ్రు నెసిసాన్.

### 3

#### యేసు నికొదిముజ్ నెన్పిస్సాన్

1 యుదురిజ్ అతికారి ఆతి నికొదెము ఇనికాన్ ఒరెన్ మహాన్. వాండ్రు పరిసయిరుజు లోఇ ఒరెన్.

2 వాండ్రు ఉండ్రె పొదోయ్, యేసుడగ్గు వాతాన్. వాతాండ్రె, “ఓ బోదకినికి, నీను దేవుణు పొక్తి ఒరెన్ నెన్పిస్సాన్ ఇజి మాపు నెసిసాప్. దేవుణు ఒరెన్ వన్నివెట సిల్లెండ మహిజ, నీను కిజిని బమ్మఅతి పణిజ్ కిదెజ్ ఎయెర్బా అట్ఎన్”, ఇజి వెహ్తాన్.

3 అందెజె యేసు వన్నివెట ఈహు వెహ్తాన్: “నాను నిజమ్నె వెహ్సాన్, ఒరెన్ మరి కొతాజ్ పుట్టిజనె, దేవుణు ఏలుబడి:దు మంజినాన్”.

4 అయావలె నికొదెము, “పిరితిలోకు ఒరెన్ ఎలాగ మరి కొత్తాజ్ పుట్టాన్. వాండ్రు అయిసి పొటాద్ సొన్ని మరి ఉండ్రె సుట్కు పుట్టెజ్ అట్ఎన్”, ఇజి వెహ్తాన్.

5 యేసు వెహ్తాన్, “నాను నిజ్నె వెహ్సాన్, ఒరెన్ బాప్సిం లాగె ఆఎండ మహిజ, దేవుణు ఆత్మ బాణిజ్ కొత్త బత్తు దొహ్కెండ మహిజ, వాండ్రు దేవుణు ఏలుబడి:దు మన్ఎన్.

6 యాయ బుబ్బర్వెటనె కొడోర్ కాసినార్. గాని దేవుణు ఆత్మ వెటనె దేవుణు కొడోర్ ఆనార్.

7 “నీను మరి కొత్తాజ్ పుట్టెజ్వెలె”, ఇజి నాను వెహ్తా మాటదిజ్ నీను బమ్మ ఆమా.

8 “గాలి దన్నిజ్ ఇస్థమాతి బాడిద్ డెయ్నాద్. నీను దన్నిజాటు వెని గాని అది ఎంబెణిజ్ వాజినాద్, ఎంబె సొన్నినాద్, ఇజి నిజి తెలివద్. అయలెకెండనె, దేవుణు ఆత్మ ఒరెన్ వన్నిజ్ కొత్త బత్తు సీదెజ్ వన్నిజ్ ఇస్థమాతివజ విజు కినాన్. వాండ్రు అయాక ఎలాగ కినాన్ ఇజి తెలివద్”.

9 “యాక ఎలాగ జర్గినాద్?”, ఇజి నికొదెము యేసుజ్ వెన్బాతాన్.

10 దనిజ్ యేసు, “ఇస్రాయేలుదు మన్ని బోదిసిని వరిలోఇ తగమాతికి ఒరెన్నీను గదె? యాకెజ్ నీను నెన్ఇదా?

11 నాను నిజం వెహ్సాన్, మాపు నెస్తికెజె వెహ్సానాప్, సుడ్డితికెజె వెహ్సానాప్. గాని మీరు అయాకెజ్ నమ్మిఇదెర్.

12 యా బూమిదు జర్గిని దన్నివందిజ్ నాను మిజి వెహ్తా మన్ను. గాని మీరు నమిఇ. అహిజ, నాను దేవుణు మంజిని బాడి:దు మన్ని సజతిజ వందిజ్ వెహ్తాజ, మరి మీరు ఎలాగ నమ్మినిదెర్?

13 ఎయెర్బా ఎనెజ్బా దేవుణు మంజిని బాడి:దు సొన్ఎతార్. దేవుణు మంజిని బాడి: దాన్ డి:గితి వాతి లోకుమరిసి ఆతి నాను ఆవండ మరి ఎయెర్బా దేవుణు మంజిని బాడి:దు సొన్ఎతాన్.

\* 2:17 2:17 కీర్తన 69:9.

14-15 బ్రీడిమ్బూమిదు మోసె కంసుదాన్ తయార్ కితి సరాన్దిజ్ పెహ్ని లెకెండ, లోకు మరిసి ఆతి నాను పెరె ఆనాలె. నా ముస్కు నమకం ఇడ్చి వరిజ్ విజెరిజ్ ఎలాకాలం బత్కిని బత్కు దొవ్కొప్పివందిజె నాను పెరె ఆదెజ్వెలె.

16 దేవుణు లోకుర్ విజెరిజ్ ఎసానొ ప్రేమిస్తాన్. అందెజె వాండ్రు వన్ని ఒరెండ్రె ఒరెన్ మరిసిజ్ సాదెజ్ సితాన్. వన్నిజ్ నమినికార్ ఎలాకాలం సిసుదు మన్ఎండ, ఎలాకాలం దేవుణు వెట మంజిని వందిజ్ వాండ్రు మరిసిజ్ సితాన్.

17 దేవుణు లోకురిజ్ తీర్పు సీజి సిక్కు సీని వందిజ్ ఆవెద, వాండ్రు వన్ని మరిసిజ్ లోకమ్దు పొక్కిక. గాని వాండ్రు వరిజ్ ఎల్లకాలం మన్ని సిక్కుదాన్ గెల్పిన్చివందిజె పొక్తాన్.

18 మరిసిజ్ నమ్మిని ఎయెరిజ్బా తీర్పు సీజి సిక్కు సీనిక సిల్లెద్. గాని వన్నిజ్ నమిఇ వరిజ్ ఏలునె దేవుణు తీర్పు సీజి సిక్కు సిత మనాద్. ఎందనిజ్ ఇహిజ, దేవుణు ఒరెండ్రె మరిసిజ్ వారు నమ్మివితార్.

19 జాయ్ లోకమ్దు వాతమనాద్. గాని లోకుర్ జాయ్దిజ్ ప్రేమిన్ఎండ సీకట్దిజ్ ప్రేమిస్తార్. ఎందనిజ్ ఇహిజ, వారు నెఇ పణిజ్ కిజినార్. యాక సుడఃజినె, లోకురిజ్ దేవుణు తీర్పు సీజి సిక్కు సీనాన్.

20 సెఇ పణిజ్ కిజినికార్ విజెరె జాయ్దిజ్ ఇస్టం కివెర్. వారు జాయ్దు రెవెర్. ఎందనిజ్ ఇహిజ, వరి సెఇ పణిజ్ విజు జాయ్దు తోర్నె ఇజి తియెల్ ఆజినార్.

21 గాని నిజమాతి పణిజ్ కినికాన్ ఎయెన్బా జాయ్దు వాజినాన్. ఎందనిజ్ ఇహిజ, వారు కిజిని పణిజ్ విజు దేవుణుదిజ్ లోజిజి కిజినార్ ఇజి జాయ్వెల్లి తోర్నాద్”, ఇజి వెహ్తాన్.

**బాప్తీసం సీని యోహాను యేసువందిజ్ సాసి వెహ్తానాన్.**

22 వెనుక, యేసుని, వన్నిసిసూర్ యూదయప్రాతమ్దు సాహార్. బాన్ వాండ్రు వరివెట సగం కాలం గడప్పి, లోకురిజ్ బాప్తీసం సీబిసి మహాన్.

23 సలిముడగ్గు అయినో ఇన్ని బాడిడు యోహాను బాప్తీసం సీజి మహాన్. ఎందనిజ్ ఇహిజ, బాన్ నండో ఏరు మహె. లోకుర్ వన్ని డగ్గు సొన్ని బాప్తీసం లాగెఆజి మహార్.

24 యాక యోహానుజ్ జెలిదు ఒఇ ముజాల జర్గితాద్.

25 యోహాను సిసూర్ని ఒరెన్ యూద వాండ్రు సుబ్రం అని యూదురు రూలు వందిజ్ వెహ్ని గొడఃబ ఆతార్.

26 వారు యోహానుడగ్గు వాతారె, “బోదకినికి, యొర్దాను గడ్డ అతాల్ని వెట ఒరెన్ మహాన్ గదె. నీను వన్ని వందిజ్ వెహ్ని మన్ని. ఇవిలోన్ వాండ్రు ఏలు బాప్తీసం సీజినాన్. లోకుర్ విజెరె వన్నిడగ్గు సాన్సినార్”, ఇజి వెహ్తార్.

27 అందెజె యోహాను వెహ్తాన్, “దేవుణు ఇస్టం కితివజినె ఒరెన్ వన్నిబత్కుదు విజు జర్గిజినాద్.

28 “నాను క్రీస్తు ఆవె. గాని వన్నిజ్ ఇంక ముజాల దేవుణు నజి పొక్తాన్”, ఇజి నాను వెహ్తాక మీరు వెహిదెర్.

29 పెండ్లి ఆని వన్నిది నె పెండ్లి బోదలి. పెండ్లి దజడః కూలయెన్ వన్నిడగ్గు మంజి వాండ్రు వెహ్నికెజ్ వెంజినాన్. వెహ్నికెజ్ వెంజినికాదె కూలయెన్ వన్ని సర్ద. పెండ్లి దజడః కూలయెన్ పెండ్లి దజడఃవెట సర్ద ఆని లెకెండ నా సర్ద క్రీస్తువెట పూర్తి ఆజినాద్.

30 వాండ్రు పెరికాన్ ఆదెజ్వెలె. నాను ఇజికాన్ ఆదెజ్.

31 పరలోకమ్దాన్ వాజినికాన్ విజెరి ముస్కు పెరికాన్. యా లోకమ్దాన్ వాజినికాన్ యా లోకమ్దికానె. వాండ్రు లోకమ్ది సజతిజి వందిజ్ వెహ్నినాన్. పరలోకమ్దాన్ వాజినికాన్ విజెరి ముస్కు పెరికాన్.

32 వాండ్రు సుడఃతి వనకవందిజ్ వెహి వన్కా. వందిజ్ వెహ్నినాన్. గాని సెగొండారె వాండ్రు వెహ్నికెజ్ డగ్గు కినార్.

33 వన్నిమాట వెంజినికాన్ దేవుణు వెహ్నికెజ్ నిజం ఇజి ముద్ర పొకె ఆజినాన్.

34 దేవుణు పొక్తాన్ దేవుణు మాటనె వర్గిజినాన్. ఎందనిజ్ ఇహిజ, దేవుణు వన్ని ఆత్మ అంతు సిల్లెండ వన్నిజ్ సీజినాన్.

35 అహ్నిసి మరిసిజ్ ప్రేమిస్తాన్. అందెజె వాండ్రు వన్నిజ్ విజుదనిజ్ అతికారం సిత్త మనాన్.

36 మరిసి ముస్కు నమకం ఇడ్చి మన్నివన్నిజ్ ఎలాకాలం దేవుణువెట బత్కిని బత్కు మనాద్. గాని వన్నిజ్ లోజ్ఇ వన్నిజ్ ఎలాకాలం బత్కిని బత్కు సిల్లెద్. గాని దేవుణు సిక్కు వన్ని ముస్కు ఎలాకాలం మనాద్.

## 4

**యేసు సమరియ దేసెమ్ది బోదెలివెట వర్గిజినాన్**

1-2 యోహాను ఇంక యేసు నండొండారిజ్ వన్ని వెట కుడుఃప్పినాన్, వరిజ్ బాప్తీసం సీజినాన్ ఇజి పరిసయ్యరు వెహార్. (నిజం ఇన్నిక ఇహిజ, యేసు ఎయెరిజ్బా బాప్తీసం సీవితాన్. వన్ని సిసూర్నె సితార్)

3 ఆహా పరిసయరు వర్గజినార్ ఇజి యేసునెస్తాండ్రె, వాండ్రు యూదయ ప్రాంతం డిస్తాండ్రె గలీలయ ముటదు మరి మహ్తా సోహాన్.

4 వాండ్రు సమరియ దేసమ్దాజె సాండ్రెజ్ సరి మనాద్.

5 అందెజె వాండ్రు సమరియ దేసమ్దాజె మన్ని సుకారు ఇన్ని పట్టుమ్దు వాతాన్. అయా పట్టుం, పూర్బమ్దు బత్తిజి మహి యాకోబు వన్ని మరిసి యెసెపుజ్ సిత్తి మన్ని బూమిడగ్రు మన్నికాద్.

6 యాకోబు కారిస్తి నూతి బాన్ మహాద్. యేసు పయిణం కిజి వందితాండ్రె అయా నూతి డగ్రు బస్తాన్. నస్తివలె, మదెనం.

7 అయావలె సమరియాతి బోదెలి ఉండ్రె ఏరు ఒతెజ్ బాన్ వాతాద్. యేసు దని వెట, “ఏహ్ కట్టినాద్. ఏరు బుకెండ్రె సిదా”, ఇహాన్.

8 (వన్ని సినూర్ టిండి కొండ్రెజ్ పట్టుమ్దు సోహా మహార్)

9 అయా బోదెలి వన్నిజ్, “నీను యూద వాండ్రు. నాను సమరియ బోదెలి. అబాయా, నీను నజి ఏరు లోస్సిదా”, ఇహాద్.

(ఎందనిజ్ఇహిజ, యూదురు సమరియతి వరి వెట కూడ్రెజి మన్వెర్)

10 అందెజె యేసు, “నీను దేవుణు సీనిక నెస్సి మంజినిక ఇహిజ, నిజి ఏరు లోస్సికాన్ ఎయెన్ ఇజి నెస్సిమంజినికిహిజ, నీను వన్నిజ్ దేవుణు సీనిక వెన్బాతి మరి. వాండ్రు నిజి ఎలాకాలం బత్తిన్పిస్సి ఏరు సితాన్ మరి”, ఇజి వెహ్హాన్.

11 అయా బోదెలి వన్నిజ్, “బాబు నూతి నిరీక మనాద్. ఏరు లాగ్దెజ్ నిజి డొక్కు ఇన్నిక సిల్లెద్. మరి ఎలాగ నీను బత్తిన్పిస్సి ఏరు లాగ్గి?

12 మా అనిగొగొ యాకోబు యా నూతి మజి సితాన్. వాండ్రు, వన్ని మరిసిర్, వన్ని కోడ్డిజ్, గొర్రెజ్ విజు యా నూతిది ఏరు ఉణిజి మహార్. నీను వన్నిజ్ మిస్తికిదా?”, ఇజి వెహ్హాద్.

13-14 అందెజె యేసు, “యా ఏరు ఉణి విజెరిజ్బా మరి ఏహ్కా కట్టాద్. గాని నాను సీని ఏరు ఉణివరిజ్ఎసెజ్బా ఏహ్ కట్వెద్. నాను సీని ఏరు బూమిదాన్ సోసిని ఉంటు ఏరు లెకెండ్రె వన్ని లోఇ మంజిని. అయాక వన్నిజ్ ఎలాకాలం దేవుణు వెట బత్తిని బత్తు సీజినాద్”, ఇజి వెహ్హాన్.

15 నస్తివలె అది, “బాబు యా ఏరు నజి సిదా. అయావలె ఎసెజ్బా ఏహ్ కట్వెద్. ఇబ్బె వాజి ఏరు లాగ్గి ఒతెజ్ నజి అవ్సరం సిల్లెద్”, ఇజి వెహ్హాద్.

16 యేసు దనిజ్, “సాస్సి నీ మాసిజ్ ఇబ్బె కూక్కి తగ్గఅ”, ఇజి వెహ్హాన్.

17 దన్నిజ్ అది, “నజి మాసి సిలెన్”, ఇహాద్. అందెజె యేసు, “నజి మాసి సిలెన్ ఇజి నీను వెహ్హిమాట నిజమ్నె.

18 నిజి అయ్దుగురు మాసిర్ మహార్. ఏలు నీ వెట మంజినికాన్ నీ మాసి ఆవన్. నీను నిజమ్నె వెహ్హి”, ఇహాన్.

19 అయావలె అది వెహ్హాద్, “బాబు నీను ఒరెన్ ప్రవక్త ఇజి నాను నెస్సా.

20 మా సమరియది అనిగొగొర్ యా గొరొత్నె దేవుణుదిజ్ పొగ్డిజి మాడిస్తార్. గాని యూదురు ఆతి మీరు, దేవుణుదిజ్ పొగ్డిజి మాడిస్తెజ్ మన్ని బాడ్డి యెరూసలెం ఇజి వెహ్హినిదెర్”.

21 అందెజె యేసు, “బీబి, యెరుసలెమ్దుబా, యా గొరొత్నెబా బుబ్బు ఆతి దేవుణుదిజ్ మీరు పొగ్డిజి మాడిస్ఇ ఉండ్రె కాలం వాజినాద్. నీను నా మాట నమ్మిఅ.

22 ఎలాగ మర్తి వన్నిజ్ పొగ్డిజి మాడిసిన్దెర్ ఇజి మిజి తెలివెద్. గాని యూదురు ఆతి మజి తెలినాద్, ఎలాగ మర్తి వన్నిజ్ మాపు పొగ్డిజి మాడిస్తాప్ ఇజి. ఎందానిజ్ ఇహిజ, యూదురు బాణిజె, లోకురిజ్ రక్సిస్సికాన్ వాజినాన్.

23 దేవుణు ఆత్మనత్తుదాన్ లోకుర్ బుబ్బెజ్, వరి మన్ను పూర్తి నిజం పొగ్డిజి మాడిసిని ఉండ్రె కాలం వాజినాద్. అయాక ఏలునె మనాద్. ఆహా పొగ్డిజి మాడిసిని వరిజె దేవుణుదిజ్ ఇస్సం.

24 దేవుణు, ఆత్మనె. అందెజె వన్నిజ్ పొగ్డిజి మాడిస్సికార్ వన్ని ఆత్మ సత్తుదాన్, నిజం ఇక వన్నిజ్ పొగ్డిజి మాడిస్సెజ్వెలె”, ఇజి వెహ్హాన్.

25 అయా బోదెల్ వన్నిజ్, “క్రిస్టు ఇజి కూకె ఆని మిసియ వానాన్ ఇజి నాను నెస్సు. వాండ్రు వానివలె మజి విజు వన్కా వందిజ్ టెటాజ్ వెహ్హాన్”, ఇజి వెహ్హాద్.

26 అయావలె యేసు, “నీవెట వర్గిజిని నాను వాండ్రె”, ఇజి వెహ్హాన్.

27 అయావలెనె వన్ని సినూర్ మర్జి వాతార్. వాండ్రు అయా బోదెల్ వెట వర్గిజినిక సుడ్రెతారె నండొ బమ్మ ఆతార్. గాని నిజి ఇన్నిక కావాలి ఇజి బా, నీను ఎందనిజ్ దన్నివెట వర్గిజిని ఇజిబా ఎయెర్బా వెన్బావితార్.

28-29 అయా బోదెల్ దని కుండ్రె డిస్తాదె పట్టుం సోహాద్. సోహాదె, బాన్ మహి లోకురిజ్, “నాను కితి విజు వన్కా వందిజ్ నజి వెహ్హి ఒరెన్ వన్నిజ్ మీరు వాజి సుడ్రెదు. వీండ్రు క్రిస్టు ఆవెండ్రా?”, ఇజి వెహ్హాద్.

30 వారు పట్టుమ్దాన్ సోతారె వన్నిడగ్రు వాజి మహార్.

31-32 అయావలె వన్ని సిసూరు, “మెస్టరు ఇనికబా ఉణామె”, ఇజి వన్నిజ్ బతిమాలితార్. ‘మిజీ తెలిజ బోజనం నజీ ఉండెజ్ మనాద్”, ఇజి వాండ్రు వరిజ్ వెప్టాన్.

33 “వన్నిజ్ బోజనం ఎయెన్బా తతాండ్రా?”, ఇజి ఒరెన్దిజ్ ఒరెన్ సిసూర్ వర్గితార్.

34 యేసు వరిజ్, “నజీ పోక్టాన్ నజీ వెప్టా పణి పూర్తి కినికాదె నా బోజనం లెకెండ్ మనాద్.

35 ‘నాల్లి నెల్లెజ్ మనాద్ పంట కొయ్ని కాలం’, ఇజి మీరు వెప్పిదెర్గదె. నాను మిజీ వెప్పిన్, మీ కణుకు పెర్జి మడిజు సుడెదు. ఆకెజ్ సోపాతెనె పండితె మన్నె.

36 నా మాటెజ్ వెండ్రెజ్ తయార్ ఆతి మన్ని యా లోకురిజ్ సుడెఅ. కొయిదెజ్ సోపాతి మన్ని మడిజు లెకెండ్ మనార్. వరిజ్ ఎలాకాలం దేవుణు వెట బత్తిని బత్తు దోహక్వాద్ ఇజి నా డగ్రు తని వన్నిజ్ లాబం మనాద్. విత్తికాన్ని కొయినికాన్ రిఎర్ కూడెజి సర్ద ఆని లెకెండ్ వీండ్రు ని విని ముజుల లోకురిజ్ సువార్త వెప్టాకార్ రిఎర్ కూడెజి సర్ద ఆనార్.

37 ‘విత్తికాన్ ఒరెన్. కొయినికాన్ మరి ఒరెన్’, ఇజి వెప్పిక నిజమ్నె.

38 మహికార్ కష్టపడిజి పణి కితార్. మీరు కిఇతిదెర్. వారు కష్టపడిజి కితి పణిది లాబం లాగ్దెజ్ నాను మిజీ పోక్కిన్.

నండొ సమరియదికార్ యేసుజ్ నమిజినార్.

39 “నాను కితి విజు వన్నా వందిజ్ వాండ్రు నజీ వెప్టాన్”, ఇజి అయా బోదెలి మాట వెహరె, అయా పట్టుమ్ది నండొ సమరియదికార్ యేసుజ్ నమ్మితార్.

40 అందెజె సమరియదికార్ వన్ని డగ్రు వాతారె, “మా డగ్రు మన్అ ఇజి వన్నిజ్ బతిమాలితార్. అందెజె వాండ్రు అబె రుండి రోస్సు మహాన్.

41 వన్ని మాట వెహరె, మరి నండొండార్ వన్నిజ్ నమ్మితార్.

42 వారు అయా బోదెల్దిజ్, “నీను వెప్టా దనిదాన్ ఆఎద్ మాపు యేలు నమిజినిక. గాని విని మాటెజ్ మాపు వెహప్. నిజమె, వీండ్రె లోకురిజ్ పాపమ్కాజ్ రక్సిన్సికాన్ ఇజి మాపు నెసినాప్. అందెజె మాపు వినిజ్ నమ్మిజినాప్”, ఇహార్.

యేసు అతికారి మరిసిజ్ నెగెణ్ కిజినాన్

43 రుండి రోస్సు బాన్ మహి వెన్నా, యేసు సమరియదాన్ గలీలయ ప్రాంతమ్దు సాహాన్.

44 (యేసునె వెప్టా మహాన్, “ఒరెన్ ప్రవక్తెజ్ వన్నిసాంత ప్రాంతమ్దు ఎయెర్బా గవరం సిఎర్”, ఇజి)

45 వాండ్రు గలీలయదు వాతివలె, గలీలియదికార్ వన్నిజ్ డగ్రు కితార్. ఎండనిజ్ఇహిజు, వారుబా పస్కు పండొయిదిజ్ యెరూసలెమ్దు సాహ మహరె, వాండ్రు అబ్బె కితి విజు పణిజ్ సుడెత మహార్.

46 వాండ్రు గలీలియది కానా ఇన్ని పట్టుమ్దు మరి వాతాన్. బానె వాండ్రు ఏరుదిజ్ ద్రాక్కు కడు కితాన్. అబ్బె ఒరెన్ గవర్మెంటు అతికారి మహాన్. వన్ని మరిసి కపర్నహొముదు కష్టం అర్త మహాన్.

47 యేసు యుదయదాన్ గలీలయదు వాతాన్ ఇజి వెహివెలె వాండ్రు యేసు డగ్రు వాతాన్. వాతండ్రె, “నా మరిన్ సాదెజ్ డగ్రు ఆత మనాన్. అందెజె నీను వాజి వన్నిజ్ నెగెణ్ కితి”, ఇజి వన్నిజ్ బతిమాలితాన్.

48 యేసువన్నిజ్, “నండొ బమ్మాని గుర్తుజ్ సుడెతిజునె మీరు నమినిదెర్”, ఇజి వెప్టాన్.

49 అయా అతికారి, “బాబు, నా మరిన్ సాని ముజుల రఅ”, ఇజి వెప్టాన్.

50 దన్నిజ్ యేసు వన్నిజ్, “సాన్అ. నీ మరిన్ బత్తినాన్”, ఇజి వెప్టాన్. వాండ్రు యేసు వెప్టామాట నమితాండ్రె సాహాన్.

51 వాండ్రు సాన్ని మహివలె వన్ని ఇండ్రొణి పణి మణిసీర్ వన్ని ఎద్రు వాతారె, “నీ మరిన్ బత్తిత మనాన్”, ఇహార్.

52 ఎసాడు గంటెజ్ వన్నిమరిసి నెగెణ్ ఆతాన్ ఇజి వరిజ్ వెన్బాతిజ్ వారు, “ఇఎన్ ఒంటి గంటదిజ్ నోబు డిస్తాద్”, ఇజి వెప్టాన్.

53 నీ మరిన్ బత్తినాన్ ఇజి యేసు వెప్టా ఆ టయిమ్దునె, వన్నిమరిన్ నెగెణ్ ఆతాన్ ఇజి బుబ్బు నెస్తాన్. అందెజె వాండ్రు వన్ని కుటుమ్దికార్ యేసుజ్ నమ్మితార్.

54 యాకదె యేసు యుదయదాన్ గలీలయదు వాతి వెనుక కిత్తి మరి ఉండ్రె బమ్మాతి పణి.

## 5

1 వెన్నా యూదుర్జ పండొయ్ ఉండ్రె వాతాద్. అందెజె యేసు యెరూసలెమ్దు సాహాన్.

2 యెరూసలెం సుటులం తోహక్కి కోటదు గొరెజ్ సాని గోరెజె ఉండ్రె మనాద్. దన్నిడగ్రు ఉండ్రె నెరు మనాద్. దన్ని పేరు ఎబ్రి బాసదు బెదెస్త ఇజి. దన్నిజ్ అయ్దు అరుబుజ్ సురులం మన్నె.

3-4 అయా అరుబుజు మందెజ్ మందెజ్ కష్టమ్కాణికార్ గూర్త మహార్. గుడ్డిదికార్, సాటాదికార్, కిక్కుకాల్కు అర్తికార్ బాన్ మహార్. ఎస్తివలెనొ ఉండ్రె సుటు దేవుణు దూత ఒరెన్ అయా సెర్దుదు డిగ్గిజి ఏరుదిజ్ కద్దిసినాన్. అయావలె ఎయెన్



ముజాల ఏరుదు డింగ్నాండ్రో, వాండ్రు ఎలాగ మర్తి జబ్బు ఆతికాన్ ఆతిజ్బా నెగెణ్ ఆనాన్. యా కస్టమ్కాణికార్ ఏరు కద్దిని దన్నిజ్ ఎద్దుసుడేజి మహార్.

5 వరి లోఇ ఒరెన్ మహాన్. వాండ్రు ముప్పుయెనిమిది పంటెజాణిజ్ కస్టమ్దాన్ మహాన్.

6 యేసు వన్నిజ్ సుడేతాన్. వాండ్రు నండో పంటెజాణిజ్ కస్టమ్దాన్ మనాన్ ఇజి నెస్తాండ్రె, వన్నిజ్, “నీను నెగెణ్ ఆదెజ్ కోరిజినిదా?”, ఇజి వెన్బాతాన్.

7 వెన్బాతిజ్ అయా కస్టమ్దికాన్, “బాబు, ఏరు కద్దిసినివలె నజి సెరుదు డిపైజ్, ఎయెన్బా నజి సిల్లెన్. నాను డింగ్నాన్ ఇనిజ్, నజి ఇంక ముజాలా మరి ఒరెన్ డింగ్జనాన్”, ఇజి వెహ్తాన్.

8 యేసు వన్నిజ్, “నీను నిజ్జి నీ సాప అసి నడిఃఅ”, ఇజి వెహ్తాన్.

9 వెటనె వాండ్రు నెగెణ్ ఆతండ్రె వన్ని సాప నిక్తాండ్రె నడిఃతాన్. యాక విస్తాంతి దినమ్దు జర్రితాద్.

10 అందెజె యూదురు నెగెణ్ఆతి వన్నిజ్, “నేండ్రు విస్తాంతి దినం గదె. నీను సాపెజ్ నిక్కి ఒతెజ్ ఆవద్. ఎందనిజ్ ఇహిజ, మోసె సతి రూలుజ్దు వెహ్సినాద్, ఇన్ని పణిబా విస్తాంతి దినమ్దు కిదెజ్ ఆవద్ ఇజి”, ఇజి వెహ్తాన్.

11 దన్నిజ్ వాండ్రు, “నజి నెగెణ్ కితికాన్, ‘నీ సాప నిక్కి నిడిఃఅ’, ఇజి నజి వెహ్తాన్”, ఇహాన్.

12 అందెజె వారు, “నీ సాపెజ్ నిక్కి నడిఃఅ ఇజి నిజి వెహ్తాన్ ఎయెన్?”, ఇజి వెన్బాతాన్.

13 నెగెణ్ కిత్తికాన్ ఎయెన్ ఇజి వన్నిజ్ తెలివెతాద్. ఎందనిజ్ ఇహిజ, అబ్బె మందలోకుర్ కూడిఃత మహార్. యేసు వరి లోఇహాన్ తప్పె ఆతండ్రె సాహాన్.

14 వెసుక యేసు వన్నిజ్ దేవుణు గుడిఃదు సుడేతాన్. సుడేఃతండ్రె వన్నిజ్, “సుడేఃఅ, నీను ఏలు నెగెణ్ ఆతి. ఏలుదాన్ పాపమ్కు కిమ. సీలిజ నిజి మరి బాదెజ్ లావు వానె”, ఇహాన్.

15 వాండ్రు సాహాండ్రె వన్నిజ్ నెగెణ్ కితికాన్ యేసు ఇజి యూదురిజ్ వెహ్తాన్.

16 అందెజె యా పణిజ్ యేసు విస్తాంతిదినమ్దు కితిజ్ యూదురు వన్నిజ్ నండో మాలెజ్ కిత్తార్.

17 గాని యేసు వరిజ్, “నా బుబ్బె ఎన్తివలెబా నెగ్గి పణిజ్ మహి వరి వందిజ్ కిజినె మంజినాన్. నానుబా కిజిన”, ఇజి వెహ్తాన్.

18 యా లెకెండ్రె యేసు వెహ్తాజ్, యూదురు వన్నిజ్ సపైజ్ మరి నండో సుడేతార్. ఎందనిజ్ ఇహిజ, వాండ్రు విస్తాంతిదినమ్ది రూలుజ్ తప్పికాదె ఆవండ, దేవుణు వన్ని సొంత బుబ్బె ఇజిబా వెహ్సినాన్. అయాలెకెండ్రె, వాండ్రు దేవుణు వెట సమానం ఆతికాన్ ఇజి వెహె ఆజినాన్. అందెజె యేసుజ్ సపైజ్ మరి నండో సుడేతార్.

19 యేసు వరిజ్ ఈహు మర్జి వెహ్తాన్. “నాను మిజి నిజం వెహ్సిన, మరిసి ఆతి నాను ఇనికబా నా సొంత సత్తుదాన్ కిదెజ్ అట్వెన్. నా బుబ్బె ఇన్ని ఇనికెజ్ కిజినక సుడేఃజినానో, అయాలెకెండ్రె నాను బా కిజిన. బుబ్బె కిజినకెజ్ మరిసి బా కిజినాన్.

20 ఎందనిజ్ ఇహిజ, అపొసి మరిసిజ్ ప్రేమిస్సాన్. వాండ్రు కిజినకెజ్ విజు మరిసిజ్ తోరిస్సాన్. వాండ్రు వన్నిజ్ దినిజ్ మిస్తి మరి నండో పెరి పణిజ్ తోరిస్సాన్. అయాలెకెండ్రె సుడేఃజి మీరు విజెరె నండో బమ్మ ఆనిదెర్.

21 అపొసి ఎలాగ సాతివరిజ్ నిక్కి, వరిజ్ బత్కిసినాండ్రె అయ లెకెండ్రె, మరిసిబా బత్కిసినాన్. వన్నిజ్ ఇస్టం మన్ని వరిజ్ బత్కిస్సాన్.

22-23 అపొసి ఎయెరిజ్బా, వారు తీర్పు కివెన్. గాని విజెరిజ్ తీర్పు కిదెజ్ మరిసిజ్ అతికారం విజు ఒపజెప్త మనాన్. అపొసిజ్ గవరం సీనిలెకెండ్రె విజెరె మరిసిజ్ గవరం సీదెజ్నె యా అతికారం ఒపజెప్త మనాన్. మరిసిజ్ గవరం సిఇకాన్ ఎయెన్బా, వన్నిజ్ పొక్తి అపొసిజ్ గవరం సివెన్.

24 నాను మిజి నిజం వెహ్సిన, నా మాట వెంజి, నజి పొక్తి వన్నిజ్ నమ్మిజినివన్నిజ్ ఎలాకాలం దేవుణు వెట బత్కిని బత్కు మనాద్. వన్నిజ్ నాను తీర్పుసివి. వన్నిజ్ ఎలాకాలం మన్ని సిక్స సిల్లెద్. గాని వాండ్రు ఎలాకాలం దేవుణు వెట బత్కినాన్.

25 సాతి లెకెండ్రె మనికార్ దేవుణు మరిసి ఆతి నాను వెహ్సి మాటెజ్ వెని కాలం వాజినాద్. అయాలెకెండ్రె వాత మనాద్. నా మాటెజ్ వెంజి, అయ లెకెండ్రె కినికార్ బత్కినార్, ఇజి నాను మిజి నిజమ్నె వెహ్సిన.

26 ఎందనిజ్ ఇహిజ, నా బుబ్బె బాణిజె బత్కు వానాద్. వాండ్రు విజెరె బత్కిసిని లెకెండ్రె, నాను లోకురిజ్ బత్కిస్తెజ్ నజి అతికారం సిత మనాన్.

27 మరి లోకురిజ్ తీర్పు సీదెజ్ వాండ్రు నజి అతికారం సిత మనాన్. ఎందనిజ్ ఇహిజ, నాను లోకు మరిసి.

28 దిన్నివందిజ్ బమ్మ ఆమాట్. ఎందనిజ్ ఇహిజ, దూకిదు మనికార్ విజెరె నా మాటెజ్ వెని కాలం ఉండ్రె వాజినాద్.

29 వారు దూకిదాన్ వెళ్లి వానార్. నెగ్గి పణిజ్ కితికార్ నిజ్జి మరి ఎల్లకాలం దేవుణు వెట బత్కినార్. సెజ పణిజ్ కితికార్ నిజ్జి సిక్కు పొందినార్.

30 నా సొంత సత్తుదాన్ ఇనికబా కిదెజ్ నాను అట్వ. దేవుణు వెహ్తి వజనె నాను తీర్పు సీజిన. అందెజె నాను తీర్పు సీజి సిక్కు సీనిక నాయం ఆత్తిక. ఎందానిజ్ ఇహిజ, నాను నజీ ఇస్టం ఆతి వజ కిఎ, నజీ పోక్తి వన్నిజ్ ఇస్టం ఆతివజనె కిజిన.

31 నా వందిజ్ నానె వెహ్తిజ, నాను వెహ్సిని వన్మాజ్ పేరు సిల్లెద్.

32 గాని నా వందిజ్ మరి ఒరెన్ సాక్సి వెహ్సినాన్. వాండ్రు నా బుబ్బు. వాండ్రు నా వందిజ్ వెహ్సిని సాక్సి నిజం ఇజి నాను నెసిన.

33 మీరు యోహాను డగ్రు సెగొండారిజ్ పోక్తిదెర్. వాండ్రు నా వందిజ్ నిజమాతి సాక్సి వెహ్హన్

34 లోకుర్ నా వందిజ్ వెహ్సిని సాక్సి నజీ అవునరం సిల్లెద్. గాని మీరు యోహాను వెహ్తి మాటెజ్ నమిజి దేవుణు మిజీ రక్సిస్టెజ్, నాను వాండ్రు వెహ్తి దని వందిజ్ వెహ్సిని.

35 ఉండీ దీవ కసి జాయ్ సీజినిలెకెండ్ యోహాను నిజమాతికెజ్ నెన్పిస్తాన్. సెగం కాలం వన్ని మాటెజ్ వెంజి మీరు సర్ద ఆతిదెర్.

36 నాను కిజిని పణిజ్ యోహాను వెహ్తి సాక్సి ఇంక గొప్ప పెరి సాక్సిని. ఎందనిజ్ ఇహిజ, నాను పూర్తి కిదెజ్ బుబ్బు నజీ ఒపజెక్తికెజె నాను కిజిని పణిజ్. అయా పణిజ్ బుబ్బు నజీ పోక్తి మనాన్ ఇజి రుజుప్ కిజినె.

37-38 మరి, నజీ పోక్తి బుబ్బునె నా వందిజ్ నిజమాతికెజ్ వెహ్సినాన్. మీరు వన్నిజ్ ఎసెజ్ బా వెన్ ఇతిదెర్. వన్ని రూపు ఎసెజ్ బా తొఇతిదెర్. వన్ని మాటెజ్ మీ మన్నుదు ఇడ్ ఇతిదెర్. ఎందనిజ్ ఇహిజ, వాండ్రు పోక్తి నజీ మీరు నమిఇదెర్.

39-40 మీరు దేవుణు మాట బాగ సద్విజినిదెర్. ఎందనిజ్ ఇహిజ, అయాక మిజీ ఎలాకాలం దేవుణు వెట బత్కిని బత్కు సీనాద్ ఇజి ఒడ్ఃబిజినిదెర్. అయా మాటెజ్ నా వందిజె వెహ్సిని. గాని దేవుణు వెట ఎలాకాలం బత్కిని బత్కు వందిజ్ నా డగ్రు రెఇదెర్.

41 లోకుర్ పొగడిజినికెజ్ నాను కోరివి.

42 గాని మీరు ఎలాగ మర్తికిదెర్ ఇజి నాను నెస్సు. మీరు దేవుణుదిజ్ నిజం ప్రేమిన్ ఇకిదెర్ ఇజి నాను నెస్సు.

43 నా బుబ్బు సిత్తి అతికారమ్ దాన్ నాను వాత మన్ను. గాని మీరు నజీ డగ్రు కిఇదెర్. మరి ఒరెన్, వన్ని సొంత అతికారమ్ దాన్ వాతిజ, మీరు వన్నిజ్ డగ్రు కినిదెర్.

44 లోకుర్ పొగడిదెజ్ ఇజి మీరు కోరిజినిదెర్. ఒరెండ్రె దేవుణు ఆతికాన్ మిజీ పొగడిదెజ్ మీరు కోర్ ఇదెర్. మరి మీరు ఎలాగ నజీ నమ్మినిదెర్?

45 నాను బుబ్బు డగ్రు నేరం మోప్పాన్ ఇజి మీరు ఒడ్ఃబిమాట్. మీరు ఆస దాన్ ఎద్రు సుడఃతి మోసెనె మీ మున్ను నేరం మొప్పాన్.

46 మీరు మోసెజ్ నమ్మినికిదెర్, నజీబా నమ్మితార్ మరి. ఎందానిజ్ ఇహిజ, మోసె నా వందిజ్ రాస్త మనాన్.

47 మీరు వాండ్రు రాస్త మనికెజ్ నమ్మిఇదెర్. మరి ఎలాగ నాను వెహ్సినిక నమ్మినిదెర్?”.

## 6

### యేసు అయ్దు వేయు మొగ్గకొడొరిజ్ బోజనం సీజినాన్

1 దన్నివెనుక యేసు గలీలయ సమ్దరం డాట్టి అతాహ ఒడ్డుద్ సొహాన్. తిబెరియ సమ్దరం ఇజిబా ఇనార్.

2 కస్టమ్ దాన్ మహి వరిజ్ వాండ్రు నెగెణ్ కితి బమ్మ ఆతి పణిజ లోకుర్ సుడఃతార్. అందెజె మంద లోకుర్ వన్ని వెట వాతార్.

3 యేసు అబెణి గొరొణ్ సెల్కాదు ఎక్తాండ్రె వన్ని సిసూర్ వెట బస్త మహాన్.

4 నస్తివలె యూదురు కిని పస్కు ఇని పండొయ్ డగ్రు ఆత మహాద్.

5 యేసు కణక వెహ్తి బేస్టిజ్, మంద లోకుర్ వన్ని డగ్రు వాజినిక సుడఃతాన్. “వీరు ఉండెజ్ బోజనం ఎలాగ కొండెజ్ ఆనాప్?”, ఇజి పిలిపుజ్ వెన్ బాతాన్.

6 ఇనిక కిదెజ్ ఇజి యేసు నెస్సాన్ గాని పిలిపుజ్ వన్నిమున్ను నమకం మనాదా ఇజి సుడఃదెజె వాండ్రు అయా లెకెండ్ వెన్ బాతాన్.

7 అందెజె పిలిపు, “వరి లోఇ ఒరెన్ ఒరెన్ కండెక్ కండెక్ ఉండెజ్ బా రుండి వందెజ్ వెండి రుపాయుజాణి బోజనం కొటిజ్ బా సాల్ ఎద్”, ఇజి వన్నిజ్ వెహ్హన్.

8 అయావలె వన్ని సిసూర్ లోఇ ఒరెన్ ఆతి ఆంద్రెయ ఇనికాన్ యేసుజ్ వెహ్హన్. వీండ్రు సిమోన్ పేతురుజ్ తంబెర్చి.

9 వాండ్రు ఇన్నిక వెహ్తాన్ ఇహిజ, 'ఇబ్బె ఒరెన్ ఇజ్జి కొడోః మనాన్. వన్నిబాన్ అయ్దు యావల రొట్టెజ్, రుండి మొయెజ్ మనె. గాని నిసా మందదిజ్ యాకెజ్ సాల్ఉ", ఇజి వెహ్తాన్.

10 అయావలె యేసు, "యా లోకాజ్ బనె కిదు", ఇజి వెహ్తాన్. అయా బాడిఃదు నండొ గడ్డి మనాద్. అందెజె మొగ్గకొడోః ర్ బస్తార్. వారె డగ్గు అయ్దు వెయుజ్ మహార్.

11 యేసు అయా రొట్టెజ్ అస్తాండ్రె, దేవుణుదిజ్ వందనమ్కు వెహ్తాండ్రె, బస్తి వరిజ్ సీబాజి సితాన్. అయాలెకెండె మొయెజ్బా. వరిజ్ కావాలస్తి నసా సీబాత సితాన్.

12 వారు పొటపంజు తిహి వెనుక, "ఇన్నిక పాడు ఆవండ, మిగిలితికెజ్ కొటు కిదు", ఇజి సిసూర్జ వెహ్తాన్.

13 అందెజె మిగిలితికెజ్ సిసూర్ కెహ్తార్. లోకుర్ తిహి వెన్యా మన్ని అయ్దు యావల రొట్టెజాణి ముకెజ్ కొటు కితారె, వన్నెండు గప్పెజ్ నిహ్తార్.

14 యేసు కిత్తి యా బమ్మాతి పణి సుడఃతారె, "నిజమె, లోకమ్దు వాని ప్రవక్త వీండ్రె", ఇజి వెహ్తార్.

15 యా లోకుర్ వాజి, కెక కెక నజి రాజు కినార్ ఇజి యేసు నెస్తాన్. అందెజె వాండ్రు బాణిజ్ డిస్తాండ్రె ఒరెండ్రె మరి గొరొత్ సాహాన్.

### యేసు సమ్దరం ముస్సు నడిఃజినాన్

16-17 పొద్దు ఆతివెలె, వన్నిసిసూర్ డిఃగితారె, సమ్దరం ఒడ్డుదు వాతార్. అబ్బె వారు ఉండ్రె డోణిదు ఎక్తారె, సమ్దరం డాట్టి, కపర్నహొముదు సొండ్రెజ్ ఇజి సోతార్. అయావలె సీకాట్ ఆతాద్. యేసు వరి డగ్గు ఇంక రెండె మహాన్.

18 నస్తివలె పెరి గాలి ఉండ్రె వాతాద్. సందారమ్దు లావు ఉల్కెజ్ నిజితె.

19 వారు రమారమి మూండ్రె నాల్లి మయలు నడిఃపిస్తార్. అయావలె యేసు సందారం ఏరు ముస్సు నడిఃజి డోణి డగ్గు వాజినిక సుడఃతారె. అయాక సుడఃతారె, వారు నండొ తియెల్ ఆతారె.

20 గాని వాండ్రు, "నానె, తియెల్ ఆమాట్", ఇజి వరిజ్ వెహ్తాన్.

21 అందెజె వారు వన్నిజ్ డోణిదు ఎకిస్తెజ్ ఇన్లం ఆతార్ గాని వెటనె వారు సొండ్రెజ్ సరి సోతి మన్ని గటుదు అందితార్.

22 సిసూరు డోణి ఎక్కి సొని ముజాల నిహి మహి సమ్దరం ఒడ్డుదు మంద లోకుర్ మహార్. మహ్నా నాండిజ్ వారు నెస్తార్, అబ్బె ఉండ్రె డోణినె మహాద్. యేసు వన్ని సిసూర్ వెట అయా డోణి ఎక్కి సొన్వెతాన్. సిసూర్నె ఎక్క సాహార్ ఇజి.

23 నస్తివలె, తిబెరియదాన్ మరి డోణిజ్ వాతె. యేసు రొట్టెజ్ వందిజ్ దేవుణుదిజ్ వందనమ్కు వెహ్తాన్. వెహ్తా వెన్యా లోకుర్ అయాక తిహార్. వారు రొట్టెజ్ తిహి బాడ్డిః డగ్గు అయా డోణిజ్ వాతె.

24 యేసుని వన్ని సిసూర్ బాన్ సిల్లెర్ ఇజి మంద నెస్తార్. ఆహె నెస్తివెలె, వారు డోణిజ్ ఎక్తారె, వన్నిజ్ రెబాజి కపర్నహొముదు సాహార్.

25 వారు యేసుజ్ అతాహ ఒడ్డుదు సుడఃతారె, "బోదకినికిదా, నీను ఎన్కాండె ఇబ్బె వాతి?", ఇజి వన్నిజ్ వెన్బాతార్.

26 దన్నిజ్ యేసు వెహ్తాన్, "నాను మీ వెట నిజం వెహ్సిన, మీరు పొట పంజు రొట్టెజ్ తిహిదెర్. అందెజె మీరు నజి రెబానిదెర్. గాని నాను కితి బమ్మ ఆతి పణి అర్దం నెస్తి వందిజ్ ఆవెద్ రెబాజినిక.

27 పాడాఃజి సొని టిండి వందిజ్ కస్టబడఃమాట్. గాని ఎలాకాలం దేవుణు వెట బత్తిని బత్తు సీని నిజమాతి టిండి వందిజ్ కస్టబడఃదు. లోకు మరిసి అయా టిండి మిజి సీనాన్. ఎందనిజ్ ఇహిజ అయా టిండి సీదెజ్ వన్నిజ్ బుబ్బ ఆతి దేవుణు అతికారం సిత మనాన్.

28 వారు వన్నిజ్, "మాపు దేవుణు పణికిదెజ్ ఇహిజ, ఇన్నిక కిదెజ్వెలె?", ఇజి వెన్బాతార్.

29 యేసు వరిజ్, "దేవుణు పొక్తి వన్నిముస్సు నమకం ఇడఃజి మంజినికాదె దేవుణు సేవ పణి", ఇజి వెహ్తాన్.

30 అందెజె వారు, "అహిజ, నీను ఇని బమ్మాని పణికినిలె? అయాక సుడఃజి నీ ముస్సు నమకం ఇడఃదెజ్ నీను ఇనిక కినిలె?

31 మోసె వెట మహి మా అనిగొగొర్ బీడిమ్బూమిద్ మన్న ఇని బోజనం ఉటార్. దేవుణు మాటదు రాస్త మనాద్, 'వారు ఉండ్రెజ్ దేవుణు మంజిని బాడ్డిదాన్ వాండ్రు బోజనం సితాన్ ఇజి', ఇజి వెహ్తాన్.

32 అందెజె యేసు వరిజ్ వెహ్తాన్, "నాను మిజి నిజం వెహ్సిన, దేవుణు మంజిని బాడ్డిదాన్ బోజనం మిజి సీతికాన్ మోసె ఆవెన్, గాని నా బుబ్బనె సితాన్. వాండ్రె మిజి దేవుణు మంజిని బాడ్డిదాన్ నిజమాతి బోజనం సీజినికాన్.

33 దేవుణు సీజిని బోజనం ఇన్నిక ఇహిజ, వాండ్రు మంజిని బాడ్డిదాన్ డిఃగితి వాతి, యా లోకమ్ది లోకురిజ్ ఎలాకాలం దేవుణు వెట బత్తిని బత్తు సీజినికానె".

34 అహిజ, ప్రబువా, యా బోజనం ఎలాకాలం మజి సీజి మన్అ", ఇజి వారు వన్నిజ్ వెహ్తార్.

35 అందెజె యేసు వరిజ్ ఈహు వెహ్లాన్, “ఎలాకాలం దేవుణు వెట బత్కిదెజ్ లోకురిజ్ బత్కిన్పిన్ని టిండి నానె. నా డగ్గు వాజినికాన్ ఎసెజ్బా బజ సాఎన్, నజీ నమ్మినికాన్ ఎసెజ్బా ఏహ్కా సాఎన్.

36 నాను మిజి వెహ్కా లెకెండే, మీరు నజీ సుడెఃతి మనిదెర్, గాని నజీ నమిఇదెర్.

37 బుబ్బు నజీ ఒపజెప్తి లోకుర్ విజెరె నా డగ్గు వానార్. నా డగ్గు వాని ఎయెరిజ్బా నాను వెల్లి నెక్కి పోక్వీ.

38 ఎందానిజ్ఇహిజ, నాను నజీ ఇన్టం వాతి లెకెండే కిదెజ్ ఆవద్, దేవుణు మంజిని బాడ్డిదాన్ డిఃగితి వాతిక. గాని నజీ పోక్తి వన్నిజ్ ఇన్టం వాతి లెకెండే కిదెజె డిగిత వాత.

39 నజీ పోక్తి దేవుణు, నా బాణిజ్ ఇన్నిక కోరిజినాన్ ఇహిజ, వాండ్రు నజీ ఒపజెప్తి వరి లోఇ ఎయెరిజ్బా నాను డిఃస్టెజ్ ఆవద్. గాని వరిజ్ నాను మరి వాని కడెఃవెరి దినమ్దు ఎలాకాలం బత్కిస్తెజె. యాకదె వాండ్రు నా బాణిజ్ కోరిజినాన్.

40 నా బుబ్బు కోరిజినిక ఇన్నిక ఇహిజ, నాను దేవుణు మరిసి ఇజి నెసి నజీ నమ్మిని ఎయెరిజ్బా ఎలాకాలం దేవుణు వెట బత్కిని బత్కు మండ్రెజ్ ఇజి. మరి నాను మర్జి వానివలె నాను వరిజ్ సావుదాన్ బత్కిస్తెజె ఇజి. యాకదె నా బుబ్బు నా బాణిజ్ కోరిజినాన్.

41 యూదురు యేసువందిజ్ మొరొ ఆతార్. దేవుణు మంజిని బాడ్డిదాన్ డిఃగితి వాతి టిండి నానె, ఇజి వాండ్రు వెహ్లాన్. దిని వందిజ్ వారు మొరొ ఆతార్.

42 వారు, “వీండ్రు యోసేపు మరిన్ ఆతి యేసు గదె? విని అయిసి అప్పొసిరిజ్ మాటు నెస్సాట్గదె? మరి ‘నాను దేవుణు మంజిని బాడ్డిదాన్ డిఃగిత వాత’, ఇజి వీండ్రు ఎలాగ వెహ్లాన్”, ఇజి వర్గిజినార్.

43 అందెజె యేసు, “మీ లోఇ మీరు మొరొ ఆమాట్.

44 నజీ పోక్తి బుబ్బు ఎయెరిజ్బా నా డగ్గు నడిఃపిన్ఎండ మహిజ, వారు నా డగ్గు వాదెజ్ అట్ఎర్. నాను వన్నిజ్ కడెఃవెరి దినమ్దు నాను వానివలె సావుదాన్ బత్కిస్తాలె.

45 ప్రవక్తరు దేవుణు మాటదు ముజాలె రాస్త మనాద్, ‘దేవుణునె లోకురిజ్ విజెరిజ్ నెన్పిస్సాన్’, ఇజి. బుబ్బు వెహ్కా మాట వెంజి, అయాకెజ్ వన్ని బాణిజ్ నెస్తికార్ నాడగ్గు వానార్.

46 దేవుణు బాణిజ్ వాతికానె ఆఎండ మరి ఎయెన్బా బుబ్బెజ్ తోపిన్. వాండ్రు ఒరెండ్రె బుబ్బెజ్ సుడెఃత మనాన్.

47 నాను మీ వెట నిజమెనె వెహ్లాన్, నా ముస్కు. నమకం ఇడ్డివన్నిజ్ ఎలాకాలం దేవుణు వెట బత్కిని బత్కు మనాద్.

48 ఎలాకాలం దేవుణు వెట బత్కిదెజ్ లోకురిజ్ బత్కిన్పిన్ని టిండి నానె.

49 మీ అనిరు బీడిమ్బూమిదు మన్న ఇన్ని బోజనం ఉటార్. గాని వారు సాతార్.

50 గాని యా టిండి ఎయెర్ ఉటిజ్బా వారు సాఎర్. సాఇ నని టిండినె దేవుణు మంజిని బాడ్డిదాన్ డిఃగితి వాతిక.

51 నానె దేవుణు మంజిని బాడ్డిదాన్ డిఃగితి వాతి ఎలాకాలం దేవుణు వెట బత్కిని బత్కు సీని టిండి. ఎయెన్బా యా టిండి తిహిజ, వాండ్రు ఎలాకాలం బత్కినాన్. నా సొంత ఒడెఃలెన్ నాను సీని టిండి. యా లోకమ్దికార్ ఎలాకాలం బత్కిదెజె నాను అయక సీజిన”.

52 యేసు వెహ్కా వెహరె, అయావలె యూదురు వారె వరి లోఇ ఉండ్రె గొడఃబ రేజితాద్. “విని ఒడెఃల్ ఎలాగ మాటు తిండ్రెజ్ మజి సీనాన్”, ఇజి వర్గితార్.

53 అందెజె యేసు వరిజ్ వెహ్లాన్, “నిజమె నాను మీ వెట వెహ్లాన్, లోకుమరిసి ఆతి నా ఒడెఃల్ మీరు తిన్ఎండ మహిజ, నా నల మీరు ఉణెఎండ మహిజ, మీరు ఎలాకాలం బత్కిఇదెర్.

54 నా ఒడెఃల్ తిని ఎయెరిజ్బా, నా నల ఉణి ఎయెరిజ్బా ఎలాకాలం దేవుణు వెట బత్కిని బత్కు మనాద్. నాను వన్నిజ్ కడెఃవెరి దినమ్దు నాను వానివలె సావుదాన్ ఎలాకాలం బత్కిస్తాలె.

55 ఎందానిజ్ ఇహిజ, నా ఒడెఃల్, నా నల యాకెజె తిండ్రెజ్ ఉండ్రెజ్ మనికెజ్. యాకెజె నిజమాతి టిండి.

56 నా ఒడెఃల్ తినికాన్, నా నల ఉణికాన్, నా వెట కూడఃజి మంజినాన్. నాను వన్ని వెట కూడఃజి మంజిన.

57 లోకుర్ విజెరిజ్ బత్కిదెజ్ పాణం సీజిని బుబ్బు నజీ పోక్త మనాన్. వాండ్రు నజీ బత్కు సీజినాన్. అయాలెకెండే ఎయెన్బా నా ఒడెఃల్ తిహిజ, నాను వన్నిజ్ ఎలాకాలం దేవుణు వెట బత్కిని బత్కు సీన.

58 నానె దేవుణు మంజిని బాడ్డిదాన్ డిఃగితి వాతి టిండి. మీ అనిరిజ్ ఉటి మన్న ఇన్ని బోజనంలెకెండే ఆవద్ యాక. వారు ఉటార్ సాతార్. గాని యా టిండి తినికాన్ ఎయెన్బా ఎలాకాలం బత్కినాన్.

59 కపెర్నహుముదు మన్ని యూదురి మీటిజ్ ఇండ్రె నేరీపిసి మహివలె వాండ్రు యా మాటెజ్ వెహ్లాన్.

60 వన్ని సిసూర్ నండెండార్ యా మాటెజ్ వెహరె, “యా మాటెజ్ గొప్ప కన్టం ఆతికెజ్. ఎయెన్దనిజ్ అర్దం కినాన్?”, ఇజి వర్గితార్.

- 61 వన్ని మాటెజ వందిజ్ వన్ని సిసూర్ మొరొ ఆజినార్ ఇజి యేసు నెస్తాండ్రె వరిజ్, “యా మాటెజ్ మిజి బాద కిజినెనా?”, ఇజి వెన్బాతాన్.
- 62 “అహిజ, లోకు మరిసి ఆతి నాను, ముజాల నాను మహి బాడిడు ఎక్కి సొనిక మీరు సూణివలె, మీరు ఇన్నిక ఒడ్డెబినిదెరో?
- 63 దేవుణు ఆత్మనె, ఎలాకాలం దేవుణు వెట బత్కిని బత్కు సీజినాన్. లోకుర్ అయాక సిదెజ్ అట్ఎర్. నాను మిజి వెహ్నిని మాటెజ్వెట, దేవుణు ఆత్మ మీ ముస్కు వాజినాన్. దేవుణు ఆత్మ మిజి బత్కు సీజినాన్”, ఇజి వెహ్హాన్.
- 64 “గాని మీ లోఇ సెగొండార్ నాను వెహ్ని మాటెజ్ నమ్మిఇకార్ మనార్”. సిసూర్ లోఇ ఎయెన్ వాండ్రు వెహ్ని మాటెజ్ నమ్మివర్, ఎయెన్ వన్నిజ్ ఒపజెప్పాన్ ఇజి యేసు మొదొహనె నెస్త మహాన్. అందెజె వాండ్రు ఆహె వెహ్హాన్.
- 65 యేసు మరి వెహ్నినాన్, “మీ లోఇ సెగొండార్ నమ్మిఇదెర్. అందెజె నాను మీ వెట వెహ్హ మన్ను, బుబ్బు సరి సిఎండ మహిజ, ఎయెన్బా నా డగ్రు వాదెజ్ అట్ఎన్”, ఇజి.
- 66 దిన్ని వెనుక, వన్ని సిసూర్ లోఇ నండొండార్ వన్నిజ్ డిస్తారె వన్నివెట మరి సొన్ఎతార్.
- 67 నస్తివలె యేసు పన్నెండొ మణిసి సిసూరిజ్, “మీరు బా నజి డిసి సొండ్రెజ్ కోరిజనిదెరా?”, ఇజి వెన్బాతాన్.
- 68 అందెజె సిమోన్ పేతురు, “ప్రబువా, ఎయెర్బాన్ మాపు సొండ్రెజ్? నీ మాటెజ్నె ఎలాకాలం దేవుణు వెట బత్కిని బత్కు వందిజ్ వెహ్నినె.
- 69 మాపు ఏలు నమ్మిజినాప్, మాపు నెస్తాప్, నీనె దేవుణు బాణిజ్ వాతికాన్ ఇజి”, ఇజి వెహ్హాన్.
- 70 అందెజె యేసు, మిజి పన్నెండొ మణిసిర్ సిసూరిజ్ ఏర్పాటు కితిక నానె గదె. గాని మీ లోఇ ఒరెన్, నయ్హానుజ్ మన్ని బుద్ధి ననికాన్ మనాన్”, ఇజి వెహ్హాన్.
- 71 వాండ్రు ఇన్నురియెతు సిమోన్ మరిసి యూద వందిజ్ వెహ్హాన్. యూద సిసూర్ లోఇ ఒరెన్ ఆతిజ్బా వాండ్రు యేసుజ్ వెన్కా ఒపజెప్పాన్లె.

## 7

### యేసు తంబెర్సిర్ వన్నిజ్ నమ్మివర్

- 1 వెనుక, యేసు గలీలయ దేసమ్దునె మంజి నాహ్కాజ్ బూలాజి మహాన్. వాండ్రు యూదయ దేసమ్దు మండ్రెజ్ కెవితాన్. ఎందానిజ్ ఇహిజ, యూదురు వన్నిజ్ సప్తెజ్ సుడెజి మహాన్.
- 2 నస్తివలె, యూదురి ఉండ్రె పండొయ్ డగ్రు ఆతాద్. అయా పండొయ్ పేరునె గుడుస పండొయ్\* ఇజి.
- 3 పండొయ్ డగ్రు ఆతిజ్, యేసు తంబెర్సిర్ వన్నిజ్, “ఇబ్బెణిజ్ నీను యూదయ దేసమ్దు సొన్అ. ఎందానిజ్ ఇహిజ, నీ సిసూర్ ఆతికార్ నీను కిజిని బమ్మ ఆతి పణిజ్ సుడెదెజ్”, ఇజి వెహ్హాన్.
- 4 “పెరికాన్ అదెజ్ కోరిజనికాన్ ఎయెన్బా డాప్పి వన్ని పణి కిఎన్. విజెరె ఎద్దునె కినాన్. నీను యా బమ్మాని పణిజ్ కిజిని ఇహిజ, నిజి నీనె లోకమ్ది లోకుర్ ఎద్దు తోరె అదెజ్ మరి. యా గలీలయదికార్ ఉండ్రె ఆవండ”, ఇజి వెహ్హాన్.
- 5 వన్ని తంబెర్సిర్బా వన్నిజ్ నమిఎతార్.
- 6 అందెజె యేసు వరిజ్, “నాను పండొయిదిజ్ సొండ్రెజ్ సమయం ఇంక రవదె. గాని మిజి ఎస్తివలెబా సొండ్రెజ్ ఆనాద్.
- 7 యా లోకమ్దు మన్ని దేవుణుదిజ్ దూసిస్నికార్ మిజి దూసిన్ఎర్. ఎందానిజ్ ఇహిజ, మీరు బా వరి వెట మనిదెర్. గాని వారు నజి దూసిస్నార్. ఎందానిజ్ ఇహిజ, వారు సెఇకెజ్ కిజినార్ ఇజి నాను వెహ్నిన.
- 8 మీరు పండొయిదిజ్ సొండ్రు. నాను ఏలు సొన్ఎ. ఎందానిజ్ ఇహిజ, నాను సొండ్రెజ్ సమయం పూర్తి రవదె”, ఇజి వెహ్హాన్.
- 9 యాక వెహ్హండ్రె వాండ్రు గలీలయదు మహాన్.

### యేసు గుడుస పండొయ్దిజ్ సొన్సినాన్

- 10 వన్ని తంబెర్సిర్ పండొయ్దిజ్ సొహి వెన్కా, వాండ్రు బా సొహాన్. లోకుర్ విజెరె వన్నిజ్ నెన్ఇ లెకెండ వాండ్రు డాజ్జి సొహాన్.
- 11 గాని పండొయ్దు, యూదురు వన్నిజ్ రెబాజి, “అయా వాండ్రు ఒంబొవీన్”, ఇజి వెన్బాజి మహాన్.
- 12 లోకుర్ లోఇ వన్ని వందిజ్ నండొ మొరొ ఆతార్. సెగొండార్ వాండ్రు నెగ్గికాన్ ఇజి, మరి సెగొండార్, సిల్లె వాండ్రు లోకురిజ్ మోసెం కిజినికాన్ ఇజి మొరొ ఆతార్.

\* 7:2 7:2 అయా పండొయ్ కాలమ్దు రొడ్డెజాణిజ్ గుడిసె తొహ్పొరబానె మంజినార్. వరి అన్నిసిర్ ఇస్రయేలు లోకుర్ నలపయ్ పంటిజ్ పయనం కిజి మహివలె గుడుసాదు మహిదన్నివందిజ్ ఎత్తుకిజి యూదురు యా పండొయ్ కిజినార్.

13 గాని యూదురిజ్ తియెలాజి, ఎయెర్బా వన్ని వందిజ్ డటం వెహ్‌వితార్.

యేసు పండొయ్దు నెన్‌పిస్నాన్

14 పండొయి దినమ్‌కు సెగం ఆతాద్. అయావలె వాండ్రు దేవుణు గుడిడి అరుజుదు సొహాండ్రె అబె మన్ని లోకురిజ్ నెర్పిసినాన్.

15 అందెజె యూదురు నండొ బమ్మ ఆతారె, “వీండ్రు బడిడు సొన్ని నద్‌విఇతికాన్ గదె? మరి ఎలాగ వీండ్రు నిసా నెస్త మనాన్?”, ఇజి వర్గితార్.

16 నస్తివలె యేసు వెహ్తాన్, “నాను నేర్‌పిస్సి మాట నా సొంత మాట ఆవద్. గాని అయాక నజి పొక్తి వన్ని బాణిజ్ వాజినాద్.

17 దేవుణు ఇస్టం కిదెజ్ కోరిజినికాన్ ఎయెన్‌బా, నాను నేర్‌పిస్సి మాట దేవుణు బాణిజ్ వాజినాదొ, నా సొంత అతికారం దాన్ నాను నేర్‌పిసినికాదొ ఇజి నెస్నాన్.

18 సొంత అతికారమ్‌దాన్ నెన్‌పిసినికాన్ ఎయెన్‌బా వన్నిజ్ గవరం వాదెజె నెన్‌పిస్నాన్. గాని వన్నిజ్ పొక్తి వన్నిజ్ గవరం వాదెజ్ ఇజి కోరిజినికాన్ నిజామాతికాన్. వన్ని లొఇ ఇనితప్పబా సిల్లెద్.

19 దేవుణు మోసెజ్ సిత్తి రూలుజ్ వాండ్రు మిజి సితాన్ గదె? గాని మీ లొఇ ఒరెన్‌బా ఆ రూలుజు వజ నడఁగదెర్. మీరు ఎందానిజ్ నజి సప్తెజ్ సుడఁజినిదెర్?”, ఇజి వెహ్తాన్.

20 అయావలె మందలోకుర్, “నిజి దెయం అస్తాద్. ఎయెర్ నిజి సప్తెజ్ సుడఁజినార్?”, ఇజి మర్జి వెహ్తార్.

21 యేసు వరిజ్ వెహ్తాన్, “నాను బమ్మాతి ఉండ్రీ పణి కిత. మీరు విజిదెరె నండొ బమ్మ ఆతిదెర్.

22 మీరు సునతి కిదెజ్ ఇజి మోసె మిజి రూలు సిత మనాన్. అందెజె మీరు కొడొడిజ్ విస్త్రాంతి దినమ్‌దు సునతి కిజినిదెర్. సుడఁడు, మోసె ఆవన్ సునతి మొదొల్స్తాకాన్, మీ అనిరెన్ అయాక మొదొల్స్తాకాన్.

23 విస్త్రాంతిదినమ్‌దు ఒరెన్ కొడొడిజ్ సునతి కిజినిదెర్. ఎందానిజ్ ఇహిజు, మోసెజ్ దేవుణు సిత్తి రూలుజ్ తప్పెజ్ ఆవద్‌ఇజి. అహిజు, నాను ఒరెన్ లోకుదిజ్ విస్త్రాంతి దినమ్‌దు పూర్తి నెగెణ్ కితి వందిజ్ మీరు ఎందానిజ్‌నా ముస్సు కోపం ఆజినిదెర్?

24 మీరు ముస్సు తోరజిని దన్నివందిజ్ సుడఁజి తీర్పు కిమాట్. గాని నిజమాతికెజ్ సుడఁజి తీర్పు కిదు.

యేసు నిజం క్రీస్తునా ఇజి వెన్‌బాజినార్

25 నస్తివలె సెగొండార్ యెరుసలెమ్‌దికార్, “వినిజె గదె అతికారిజు సప్తెజ్ సుడఁజినార్.

26 ఇవిలొన్ వీండ్రు దయరమ్‌దాన్ విజెరె ఎద్రు వర్గిజినాన్. గాని వారు వన్నిజ్ ఇనికబా ఇన్‌ఎర్. వీండ్రు క్రీస్తు ఇజి అతికారిజు నిజమె ఒప్పకొటారా?

27 క్రీస్తు వానివలె, వాండ్రు ఎమేణికాన్ ఇజి ఎయెర్బా నెన్‌ఎర్. గాని వీండ్రు ఎంబెణికాన్ ఇజి మాపు నెస్నాప్”, ఇజి వర్గితార్.

28-29 అందెజె యేసు గుడిఁ అరుజుదు నేర్‌పిసి మహివలె, ఈహు డటం వెహ్తాన్. “నాను ఎయెన్, ఎమేణికాన్ ఇజి మీరు నిజం నెస్సిదెరా? నాను నా సొంత ఇస్టందాన్ వాతికాన్ ఆవ. గాని నజి పొక్తాన్ ఒరెన్ మనాన్. వాండ్రు నిజమాతి దేవుణు. మీరు వన్నిజ్ నెన్‌ఇదెర్. గాని నాను వన్నిజ్ నెస్సు. ఎందనిజ్ ఇహిజు, నాను వన్ని బాణిజ్ వాత మన్ను. వాండ్రె నజి పొక్తాన్”, ఇజి.

30 యాకెజ్ వెహారె, వారు వన్నిజ్ అస్తెజ్ సుడఁతార్. గాని ఎయెన్‌బా వన్నిజ్ అన్‌ఎతార్. ఎందానిజ్ ఇహిజు, వాండ్రు అస్సె ఆదెజ్ దేవుణు ఏర్‌పాటు కితి సమయం రెవిదె.

31 అహిజ్‌బా లోకుర్ లొఇ నండొండార్ వన్ని ముస్సు నమకం ఇట్టార్. వారు, “వీండ్రు నండొ బమ్మాని పణిజ్ కిత్తాన్. లోకురిజ్ రక్తిస్తెజ్ దేవుణు ఏర్‌పాటు కితి పొక్తి క్రీస్తు వానివలె, విని ముస్సు మరి నండొ బమ్మాని పణిజ్ వాండ్రు కినాండ్రా?”, ఇజి వెహ్తార్.

32 లోకుర్ యేసు వందిజ్ అయాకెజ్ మొరొ ఆజినికెజ్ పరీసయిరు వెహర్. నస్తివలె పెరి పుజెరిజు ని పరీసయిరు వన్నిజ్ తొప్పి ఒతెజ్ దేవుణు గుడిడి జమాన్‌జు పొక్తార్.

33 అందెజె యేసు, “నాను మీ వెట సెగం కాలమ్‌నె మంజినె. వెన్కా నాను నజి పొక్తి వన్ని డగ్రు సొన్‌సిన.

34 మీరు నజి రెబానిదెర్. గాని తొఇదెర్. నాను మన్ని బాన్ మీరు వాదెజ్ అట్‌ఇదెర్”, ఇజి వెహ్తాన్.

35-36 నస్తివలె యూదురు అతికారుజు, ఒరెన్‌వెట ఒరెన్, “వీండ్రు మజి తోర్‌ఎండ ఎంబె సొండ్రెజ్ సుడఁజినాన్? వాండ్రు, సెగొండార్ యూదురు మా బాణిజ్ సెద్రిజి బత్తిజిని గ్రీకు పట్టుమ్‌కాజ్ సొనాండ్రా? వాండ్రు యూదురు ఆఇ వరిజ్

నేరేపిస్తాండ్రా? వాండ్రు వెప్పినాన్, “మీరు నజీ రెబానిదెర్. గాని తోఇదెర్. నాను మన్ని బాన్ మీరు వాదెజ్ అట్ఇదెర్’ ఇజి. ఎందానిజ్ వాండ్రు ఆహె వెప్పినాన్?”, ఇజి వర్ణితార్.

37 పండోయ్ కడెవెరి రోజు వాతాద్. కడెవెరి రోజునె ముకెలమాతి దినం. అయా నాండిజ్ యేసు నిహండ్రె ఈహు డటం వెప్తాన్. “ఏప్పి కట్టికాన్ ఎయెన్బా నా డగ్గు రఅ. నాను వన్నిజ్ ఉండెజ్ సీన.

38 దేవుణు మాటదు వెప్తివజ, “నా ముస్సు నమకం ఇడ్డి ఎయెర్ గర్బం దాన్బా, నిజమాతి బత్తు. సీని ఏరు సోసి సొనెలె. అయాక ఉండ్రె ఊట సోసి సొని లెకెండ్ సొనెలె.

39 ఇబ్బె యేసు నిజమాతి బత్తు. సీని ఏరు ఇజి వెప్తిక దేవుణు ఆత్మ వందిజె. యా దేవుణు ఆత్మ, యేసు ముస్సు నమకం ఇడ్డి వరిజ్, యేసుజ్ దేవుణు మంజిని బాడిడు ఒతి వెన్కా. దోహ్కాన్లె. గాని యేసు యాక వెప్తివలె, దేవుణు వన్ని ఆత్మ వన్నిజ్ నమ్మితి వరిజ్ సీవండ్రె. ఎందానిజ్ ఇహిజ, దేవుణు యేసుజ్ వన్ని వెట వన్ని గొప్ప జాయ్దు మండ్రెజ్ దేవుణు మంజిని బాడిడు ఒవండ్రె.

40 వన్ని మాటెజ్ వెహరె, లోకుర్ లోఇ సెగొండార్, “నిజమె, వీండ్రె మాపు ఎద్రు సుడెజి మహి ప్రవక్త”, ఇజి వెప్తార్.

41 మరి సెగొండార్, “సిల్లె వీండ్రె క్రీస్తు”, ఇహార్. గాని సెగొండార్, “క్రీస్తు ఎలాగ గలీలయదాన్ వానాన్?”

42 క్రీస్తు దావీదు రాజు కుటుమ్దాన్, దావీదు బత్తిజి మహి పట్టుమాతి బెత్తెహెమ్దాన్ వానాన్, ఇజి దేవుణు మాటదు మనాద్ గదె”, ఇహార్.

43 ఆహె వన్ని వందిజ్ లోకుర్ ఎర్లితార్.

44 సెగొండార్ వన్నిజ్ అస్తెజ్ కోరితార్. గాని ఎయెర్బా వన్నిజ్ అన్వితార్.

45 అందెజె యేసుజ్ అస్తెజ్ వాతి దేవుణు గుడిది జమానుజు మర్జి పెరి పుజెరిజ ని పరిసయురుజు బాన్ సొహార్. వారు జమాన్జ, “మీరు ఎందానిజ్ వన్నిజ్ అసి తెఇదెర్?”, ఇజి వెన్బాతార్.

46 దన్నిజ్ వారు, “వీండ్రు వెప్తి మాటెజ్ లెకెండ్ ఎయెర్బా ఎసెజ్బా వెహ్ఎర్”, ఇహార్.

47 పరిసయురుజు, “మీరు బా మొసం ఆత్తిదెరా?”

48 అతికారిజ లోఇనో పరిసయురుజు లోఇనో ఎయెన్బా వన్నిజ్ నమితాండ్రా?

49 గాని యా మంద లోకుర్ దేవుణు మోసెజ్ సిత్తి రూలుజ్ నెన్ఎర్. అందెజె వరిజ్ దేవుణు సాయెప్ సీనాన్”, ఇజి వెప్తార్.

50 నికొదిమొన్ ఇనికాన్ ఒరెన్ ముజాలె యేసు డగ్గు సొహా మహాన్. వాండ్రు పరిసయురుజు లోఇ మన్నికాన్.

51 నస్తివలె నికొదెము, “మా యూదురి రూలుజు వజ, ఒరెన్ వాండ్రు వెప్పినికెజ్ మాపు ముజాల వెంజి, వాండ్రు కితికెజ్ నెస్తి వెన్కనె వన్ని ముస్సు తీర్పు కిదెజ్ ఆనాద్”, ఇజి వెప్తాన్.

52 అందెజె వారు, “నీను బా గలీలయదాన్ వాతికాండ్రా? నీను దేవుణు మాట బాగ సద్విఅ. ఒరెన్ ప్రవక్తబా గలీలయదాన్ సోవన్, ఇజి నీను నస్తివలె నెస్తిలె”, ఇజి వెప్తార్.

53 వెనుక వారు విజెరె వరివరి ఇల్కాజ్ సొహార్.

## 8

### రంకు బూలాజి మహి బోదెల్దిజ్ యేసుడగ్గు తసినార్

1 గాని యేసు ఒలివ గొరొత్\* సొహాన్.

2 జాయ్ ఆతివెలె మరి వాండ్రు దేవుణు గుడిది అరుజుదు వాతాన్. లోకుర్ విజెరె వాజి వన్నిడగ్గు కూడితార్. వాండ్రు బస్తాండ్రె వరిజ్ నెన్పిసినాన్.

3-4 నస్తివలె పరిసయురుని యూదురి రూలుజ్ నెస్తిస్తికార్ ఉండ్రె బోదెల్దిజ్ తతార్. అది, రంకు బూలాజి మహివలె వారు దన్నిజ్ అస్తార్. వారు దన్నిజ్ మంద ఎద్రు నిల్వారె యేసుజ్, “బోదెకినికెదా, యా బోదెల్ రంకు బూలాజి మహివలె, మాపు అస్తాప్.

5 మోసె మజి రూలు సితివెలె మజి ఆడ్ర వెప్తాన్, “ఆహె బూలాని వన్కాజ్ పణకాణిజ్ డెయిజి సప్తెజ్’ ఇజి. గాని నీను ఇనిక వెప్పిని”, ఇజి వెన్బాతార్.

6 వన్ని ముస్సు నేరం మోపైజ్ ఇజి వన్నిజ్ సీకుదు అర్పైజ్ అహు వెన్బాతార్. గాని యేసువజితాండ్రె బూమిదు వన్ని డెస్సుదాన్రాసి మహాన్.

\* 8:1 8:1 అయా గొరొత్ ఒలివ మరెకె నండె మన్నె అందెజె ఒలివ గొరొన్ ఇనార్

7 వారు మరిమరి వెన్బాజి మహిజ్, వాండ్రు బుర్ర పెహ్తాండ్రె వరిజ్, “మీ లోఇ పాపం కిఇకాన్ ముజాల దన్నిజ్ పణుకుదాన్ డెయ్దు”, ఇజి వెహ్హాన్.

8 వెహ్తాండ్రె వాండ్రు మరి వజ్జి, బూమిదు రాసి మహాన్.

9 గాని వారు యా మాటెజ్ వెహారె, ఒరెన్ వెన్కా ఒరెన్ డిస్ట్ర సాహార్. ముజాలె పెరికార్ సాహార్. వెన్కా ఇజ్జికార్. ఆహె విజెరె సాహార్. యేసుని అయా బోదెల్ని బాన్ మహార్. అది నిహిమహిబానె మహాద్.

10 యేసు బుర్ర పెహ్తాండ్రె, దనిజ్, “వారు ఎంబె మనార్? ఎయెర్బా, నిజి తీర్పు సీజి సిక్స సిఎరా?”, ఇజి వెన్బాతాన్.

11 “సిల్లె బాబు”, ఇహాద్ అది. అందెజె యేసు, “అహిజ, నానుబా, నిజి తీర్పు సీజి సిక్స సిఎ. సాన్అ. ఏలుదాన్ మరి పాపం కిమా”, ఇహాన్.

యేసు లోకమ్ది లోకురిజ్ జాయ్

12 మరి, యేసు లోకురిజ్ వెహ్హినాన్, “నానె లోకమ్ది లోకురిజ్ జాయ్. నా సిసూ ఆనికాన్ ఎయెన్బా సీకటుదు మన్ఎన్. గాని వన్నిజ్ బత్తు, సీని జాయ్ మంజినాద్’.

13 నస్తివలె పరిసయ్యరు వన్నిజ్, “నీనె నీ వందిజ్ సాక్సి వెహ్హిన, మరి ఎయెర్బా అయాక నిజం ఇజి వెహ్హాండ. అందెజె నీ సాక్సమ్దిజ్ నిజం సిల్లెద్”, ఇజి వెహ్హార్.

14 అందెజె యేసు వెహ్హాన్, “నానె నా వందిజ్ సాక్సి వెహ్హిన. అహిజ్బా నాను వెహ్హి సాక్సి నిజమ్నె. ఎందానిజ్ ఇహిజ, నాను ఎమెణాజ్ వాత, ఎంబె సాన్సిన ఇజి నాను నెన్ను. గాని మీరు నెన్ఇదెర్ నాను ఎమెణాజ్ వాత ఎంబె సాన్సిన ఇజి.

15 మీరు లోకుర్ సుడెజినికెజ్ సుడెజి తీర్పు సీజినిదెర్. గాని నాను అయాలెకెండ్ ఎయెరిజ్బా తీర్పు సిఎ.

16 నాను తీర్పు సితిజ్బా నాను సిత్తి తీర్పు నిజమ్నె. ఎందానిజ్ ఇహిజ, నాను ఒరెనె ఆవ తీర్పు సీజిన. నజి పోక్తి బుబ్బు నా వెట మనాన్.

17 దేవుణు మోసెజ్ సిత్తి మీ రూలుజ్దు రాస్త మనాద్, ‘రిఏర్ వెహ్హిన సాసి ఉండ్రె లెకెండ్ మహిజ, అయాక నిజం ఇజి’.

18 నానె నా వందిజ్ సాక్సి వెహ్హిన. మరి నజి పోక్తి నా బుబ్బు బా నా వందిజ్ సాసి వెహ్హినాన్”.

19 నస్తివలె వారు వన్నిజ్, “ఎంబె నీ బుబ్బు మనాన్?”, ఇజి వెన్బాతాన్. దన్నిజ్ యేసు”, మీరు నజి నెన్ఇదెర్. నా బుబ్బెజ్ నెన్ఇదెర్. మీరు నజి నెస్సికిహిజ, నా బుబ్బెజ్బా నెస్తిదెర్ మరి”, ఇజి వెహ్హాన్.

20 వాండ్రు యా మాటెజ్ దేవుణు గుడిడు సంత అర్పి పెటెజ్ ఇడ్డిబాన్ మంజి నెన్పిసి మహివలె వెహ్హాన్. గాని ఎయెన్బా వన్నిజ్ అన్ఏతార్. ఎందానిజ్ ఇహిజ, వన్నిజ్ అస్తెజ్ దేవుణు ఎత్తు కిత్తి సమయం రెవిదె.

21 మరి యేసు వరిజ్, “నాను సానాలె. మీరు నజి రెబానిదెర్. మీరు పాపమ్కు కిజి మంజినె సానిదెర్. నాను సాని బాడిడు మీరు వాదెజ్ అట్ఇదెర్”, ఇజి వెహ్హాన్.

22 అందెజె యూదురు ఒరెన్ వెట ఒరెన్, “వన్నిజ్ వాండ్రె నపె ఆనాండ్రా? వాండ్రు వెహ్హినాన్ గదె నాను సాని బాడిడు మీరు వాదెజ్ అట్ఇదెర్ ఇజి’, ఇజి వర్గితార్.

23 యేసు వరిజ్ ఈహు వెహ్హాన్: “మీరు ఇబ్బె యా లోకమ్దికిదెర్. గాని నాను మున్ను దేవుణు మంజిని బాడిదికాన్. మీరు యా లోకమ్దికిదెర్. నాను ఇబ్బెణికాన్ ఆఎ.

24 నాను మిజి వెహ్హా మన్న మీరు పాపం కిజి మంజినె సానిదెర్ ఇజి. నాను ఎయెన్ ఇజి వెహ్హినానో, నానె వాండ్రు ఇజి మీరు నమ్మిఎండ మహిజ, మీరు నిజమ్నె పాపమ్దు మంజినె సానిదెర్”.

25 వారు వన్నిజ్, “నీను ఎయెన్?”, ఇజి వెన్బాతాన్. ‘నాను ఎయెన్ ఇజి మొదోహానె వెహ్హా మనానో, నానె వాండ్రు’, ఇహాన్.

26 యేసు మరి వెహ్హాన్ “మీ వందిజ్ నండో వెహ్హెజ్ నజి మనాద్. మీ మున్ను నండో తీర్పుజ్బా మనాద్. గాని నజి పోక్తాన్ నిజామాతికాన్. వాండ్రు నజి వెహ్హి సజతిజ్నె నాను లోకమ్ది లోకురిజ్ వెహ్హిన.

27 వాండ్రు దేవుణు మంజిని బాడిడు మన్ని వన్ని బుబ్బు వందిజె వరిజ్ వెహ్హినాన్ ఇజి వారు అర్దం కిఎతార్.

28 అందెజె యేసు వరిజ్, “మీరు లోకు మరిసి ఆతి నజి సిలువాదు సప్పివెలె, మీరు నస్తిదెర్, నాను ఎయెన్ ఇజి. మరి, నాను నా సొంత అతికారం దాన్ ఇనికబా కిఎ. గాని నా బుబ్బు నజి నెన్పిస్తివజనె నాను వెహ్హిన, ఇజి మీరు నెస్తిదెర్.

29 నజి పోక్తాన్ నజి తోడు: మంజినాన్. వాండ్రు నజి ఒరెన్ వన్నిజె డిస్ఎతాన్. ఎందానిజ్ ఇహిజ వన్నిజ్ ఇస్టం వాతికెజె నాను ఎస్తివలెబా కిజిన”, ఇజి వెహ్హాన్.

30 వాండ్రు యా మాటెజ్ వెహ్హివలె నండొండార్ వన్ని మున్ను నమకం ఇడ్తార్.

అబ్రాహము కొడొర్



31 వన్ని మున్ను నమకం ఇడ్తి యూదురిజ్ వాండ్రు వెహ్లాన్, “నాను వెహ్లా మాటెజ్ లోజిజి మహిజ, మీరు నిజమనె నా సిసూర్ ఆనిదెర్.

32 నస్తవలె మీరు దేవుణు వందిజ్ నిజమాతికెజ్ నెస్సిదెర్. అయాక మిజి పాపమ్కాణిజ్ డిస్పిస్నాద్”.

33 వారు వన్నిజ్, “మాపు అబ్రాహము తెగ్గదు పుట్టికావ్. మాపు ఎసెజ్బా ఎయె అడిగి వెట్టిపణి మణిసిర్ లెకెండ్ మన్ఎపె. నస్తవలె ‘మీరు డిబె ఆనిదెర్’, ఇజి ఎలాగ వెహ్లాని”, ఇజి వెహ్లాన్.

34 అందెజె యేసు, “ఒరెన్ వెట్టిపణి కినికాన్, ఎలాగ తోహె ఆతి మన్ని వజ ఎజమాని అడిగి మంజి నాండ్రె, అయాలెకెండ్ పాపం కిని విజెరె పాపమ్దిజ్ అడిగి తోహె ఆతి లెకెండ్ మంజినాన్.

35 ఒరెన్ వెట్టిపణి కినికాన్ అక్కు మన్ని వన్ని లెకెండ్ ఎలాకాలం అయా ఇండ్రె మండ్రెజ్ అట్ఎన్. గాని అయా ఇండ్రెణి మరిసిజ్ ఎలాకాలం అయా ఇండ్రె అక్కు మంజినాద్.

36 అందెజె దేవుణు మరిసి మిజి తోహె ఆతి బాణిజ్ డిస్పిస్తిజ, మీరు నిజమనె డిబెఆనిదెర్.

37 నాను నెన్ను మీరు అబ్రాహము తెగ్గాతికిదెర్ ఇజి. గాని మీరు నజి సప్తెజ్ సుడేజినిదెర్. ఎందానిజ్ ఇహిజ నాను వెహ్లాని మాటెజ్ మిజి పడిఁఉ.

38 నా బుబ్బు నజి తోరిస్తికెజ్ నాను వెహ్లాని. గాని మీరు మీ బుబ్బు వెహ్లానికెజ్ కిజినిదెర్”, ఇజి వెహ్లాన్.

39 నస్తవలె వారు, “అబ్రాహమునె మా బుబ్బు”, ఇజి వెహ్లాన్.

40 “మీరు అబ్రాహము కొడెర్ ఇహిజ, మీరు అబ్రాహము కితి పణిజ్నె కితిదెర్ మరి. దేవుణు బాణిజ్ నాను వెహికెజె మిజి వెహ్లాజ్ నాను ఎసెజ్బా సుడేత. గాని మీరు నజి సప్తెజ్ సుడేజినిదెర్. అబ్రాహము యా లెకెండ్ ఇనికబా కిఎన్.

41 మీ బుబ్బు కిజినికెజె మీరు బా కిజినిదెర్”, ఇజి వెహ్లాన్. అయావలె వారు, “మాపు అహ్లాసి వెట పుట్టికాపె. దేవుణు ఒరెండ్రె మా బుబ్బు”, ఇహోర్.

42 అందెజె యేసు వరిజ్ ఈహు వెహ్లాన్: “దేవుణునె మీ బుబ్బు ఇహిజ, మీరు నజి ప్రేమిస్తిదెర్ మరి. ఎందానిజ్ ఇహిజ, నాను దేవుణు బాణిజ్ వాత. నాను యేలు ఇబ్బె మన్ను. నాను నా సొంత ఇస్టమ్దాన్ రెవేత. గాని వాండ్రు నజి పోక్తాన్.

43 ఎందానిజ్ నాను వెహ్లాని మాటెజ్ మీరు అర్దం కిఇదెర్? ఎందానిజ్ ఇహిజ, నాను వెహ్లాని మాటెజ్ వెండ్రెజ్ మీరు కెఇదెర్.

44 మీ బుబ్బు సయ్తానె. మీరు వన్ని కొడెర్. మీరు వన్నిజ్ ఇస్టం ఆతికెజ్ కిదెజ్ కోరిజినిదెర్. మొదోహాన్ అసి వాండ్రు సప్పికాన్. వాండ్రు నిజమాతి బాడిఁదు నిల్వన్. ఎందానిజ్ ఇహిజ, వన్ని లోఇ నిజమాతికెజ్ సిల్లు. వాండ్రు అబద్దం వర్గినివలె, వన్ని సొంత బుద్ధిదాజె వర్గిజినాన్. ఎందానిజ్ ఇహిజ, వాండ్రు అబద్దం వర్గినికాన్. అబద్దం వర్గిని వరి అహిసి.

45 గాని నాను దేవుణు వందిజ్ నిజమాతికెజ్ వెహ్లాని. అందెజె మీరు నజి నెన్ఇదెర్.

46 మీ లోఇ ఎయెన్బా నాను తపు కితికాన్ ఇజి రుజుప్ కిదెజ్ అట్నాండ్రా? నాను నిజమాతికెజ్ వెహ్లాజ, ఎందానిజ్ మీరు నజి నమిఇదెర్.

47 దేవుణు కొడెర్ ఆతికార్ వన్ని మాటెజ్ వెనార్. మీరు దేవుణు కొడెర్ ఆఇదెర్. అందెజె నా మాటెజ్ వెన్ఇదెర్”.

48 నస్తవలె యూదురు వన్నిజ్, “నీను సమరియదికి, నిజి దెయం అస్తాద్ ఇజి మాపు వెహ్లాని మాటదు తపు ఇనికబా మనాదా?”, ఇహోర్.

49 నజి దెయం అన్ఏద్. నాను నా బుబ్బెజ్ గవరం సీజిన. గాని మీరు నజి కరాయి ఇజినిదెర్.

50 నాను నా వందిజ్ గవరం అన్పె ఆదెజ్ సుడేఎ. గాని అయాకెజ్ సుడేజినాన్ ఒరెన్ మనాన్. వాండ్రె నా వందిజ్ నాయమ్దాన్ తీర్పు సీజినికాన్.

51 నా మాటెజవజ బత్కినికాన్ ఎయెన్బా సాఎన్, ఇజి నాను నిజం మీ వెట వెహ్లాని”, ఇజి మర్జి వెహ్లాన్.

52 అయావలె యూదురు, “ఏలు మాపు నెస్నాప్ నీను దెయం అస్తికి ఇజి. అబ్రాహము సాతాన్. అయా లెకెండ్ ప్రవక్తరుబా సాతార్. గాని నీను వెహ్లాని, ‘నా మాటెజ వజ బత్కినికాన్ ఎయెన్బా సాఎన్’, ఇజి.

53 నీను మా బుబ్బు ఆతి అబ్రాహము ఇంక పెరికిదా? వాండ్రు సాతాన్. అయా లెకెండ్ ప్రవక్తరు బా సాతార్. నీను ఎయెన్ ఇజి నీను ఒడేబిజిని?”, ఇజి వెహ్లాన్.

54 అందెజె యేసు, “నానె నజి పోగ్డిఁతిజ దనిజ్ విలువ సిల్లెద్. గాని నజి పోగ్డిఁనికాన్నా బుబ్బునె. వన్నిజె మీరు, మా దేవుణు ఇజి వెహ్లానిదెర్.

55 మీరు వన్నిజ్ నెన్ఇదెర్. గాని నాను వన్నిజ్ నెన్ను. నాను వన్నిజ్ నెన్ఏ ఇజి వెహ్లాజ, మీ లెకెండ్ ఒరెన్ అబద్దం వర్గినికాన్ ఆత మరి. గాని నాను వన్నిజ్ నెన్ను. వన్నిమాటెజ వజ బత్కిజిన.

56 మీ బుబ్బాతి అబ్రాహాము, నాను వాని దినం సుడేదెజ్ అట్లు ఇజి సర్ద ఆతాన్. వాండ్రు అయా దినం సుడేతాండ్రె సర్ద ఆతాన్”, ఇజి వెహ్లాన్.

57 నిజి ఏలు యాబయ్ పంటెజ్ బా సిల్లు. నీను అబహాముజ్ సుడేతిదా?”, ఇజి యూదురు వన్నిజ్ వెహ్లాన్.

58 అందెజె యేసు, “అబ్రాహాము పుట్టిండ ముజాలె నాను మన్న ఇజి నిజం మీ వెట వెహ్లాన్”, ఇజి వెహ్లాన్.

59 యాక వెహ్లాజ్, వారు వన్నిజ్ డెయ్ దెజ్ పణుకు పెహ్లాన్. గాని వాండ్రు డాజీతాండ్రె గుడిదాన్ సాహాన్.

## 9

పుట్టివలెహాన్ అసి గుడ్డి ఆతివన్నిజ్ నెగెండ కిజినాన్

1 యేసు సొన్ని మహివలె, పుట్టిబాణిజ్ అసి గుడ్డి ఆతి ఒరెన్ వన్నిజ్ సుడేతాన్.

2 నస్తవలె వన్నిసినూర్ వన్నిజ్, “బోదకినికి, ఎయెర్ పాపం కితిజ్ వీండ్రు గుడ్డిదాన్ పుట్టాన్? వీండ్రునా విన్ని అయ్ సి అప్పొసిర్నా?”, ఇజి వెన్ బాతార్.

3 అందెజె యేసు, “వీండ్రు పాపం కితిజ్ ఆవిద్, విన్ని అయ్ సి అప్పొసిర్ పాపం కితిజ్ ఆవిద్. గాని దేవుణు ఒరెండ్రె కిదెజ్ అట్టి పణి వినిలోఱ సుడేదెజె వీండ్రు గుడ్డి ఆతాండ్రె పుట్టాన్.

4 వేడె మనివలె, మాటు నజి పొక్తివన్ని పణి కిదెజ్ వలె. సీకట్ బేగి ఆనాద్. అయావలె ఎయెర్ బా ఇనికబా కిదెజ్ అట్ ఏర్.

5 నాను యా లోకమ్ దు మనివలె, యా లోకమ్ దివరిజ్ జాయ్ లెకెండ మన”, ఇజి వెహ్లాన్.

6 వెహ్లాండ్రె, వాండ్రు బూమిదు పూస్తాన్. వన్ని పూసవలిదాన్ కండెక్ బుర్ద కితాండ్రె, అయా బుర్ల గుడిః వన్ని కణకెజు ముస్సు రాస్తాన్.

7 రాస్తాండ్రె, “నీను సొన్ని సిలోయెము ఇన్ని గుమ్మిదు కణుకు నొరె ఆఅ”, ఇజి వెహ్లాన్. (సిలోయెము ఇన్ని మాటదిజ్ పొక్తికాన్ ఇజి అర్లం) వాండ్రు సాహాండ్రె నొరె ఆతాన్. వన్ని కణుకు నెగెణ్ ఆతె. వాండ్రు మర్జి వాతాన్.

8 అయావలె వన్ని పడకాదికార్ ని వాండ్రు ముజాలె లొస్ పానిక సుడిఃతి మహికార్ వెన్ బాతార్, “వీండ్రు అబ్బె బసి లొసి మహికాన్ గదె”, ఇజి.

9 సెగొండార్, “వీండ్రె”, ఇజి. మరి సెగొండార్, “సిలె, వినిలెకెండ మన్ని మరి ఒరెనె”, ఇహార్. గాని వాండ్రు, “నానె లొస్ పాజి మహికాన్”, ఇజి వెహ్లాన్.

10 అయావలె వారు, “నీ కణుకు ఎలాగ రెకె ఆతె?”, ఇజి వెన్ బాతార్.

11 అందెజె వాండ్రు, “యేసు ఇజి కూక్కి ఒరెన్ బుర్ద కితాండ్రె నా కణకెజు ముస్సు రాస్తాన్. సిలోయెము ఇన్ని గుమ్మిదు సొన్ని నొరె ఆఅ, ఇహాన్. అందెజె నాను సొన్ని నొరె ఆత్తిజ్ నాను సుడేదెజ్ అట్ట”, ఇహాన్.

12 “ఎంబె మనాన్ అయా వాండ్రు”, ఇజి వారు వెన్ బాతార్. “ఏమె నాను నెన్ ఏ”, ఇహాన్ వాండ్రు.

13 ముజాల గుడ్డిదాన్ మహివన్నిజ్ వారు పరిసయ్ రుజు డగ్రు తత్తార్.

14 ఉండ్రె విస్తాంతి నాండిజె, యేసు బుర్ల కితాండ్రె అయా వన్ని కణుకు నెగెణ్ కితాన్.

15 పరిసయ్ రు బా నీను ఎలాగ బేస్తెజ్ అట్టి ఇజి వెన్ బాతార్. వాండ్రు, “అయా వాండ్రు నా కణుకు ముస్సు బుర్ల రాస్తాన్. నాను నొరె బాత. ఏలు నాను బేసిన”, ఇహాన్.

16 అందెజె సెగొండార్ పరిసయ్ రు, “యా వాండ్రు దేవుణు బాణిజ్ వాతికాన్ ఆఎన్. ఎందానిజ్ ఇహిజు, విస్తాంతి దినమ్ దు అహు కిజి వాండ్రు రూలుజ్ తప్పినాన్”, ఇహార్. గాని మరి సెగొండార్, “ఒరెన్ పాపం కిజినికాన్ ఎలాగ నిసా బమ్మాని పణిజ్ కిదెజ్ అట్టాన్”, ఇహార్. ఆహె వారు కేటెజ్ ఆతార్.

17 అందెజె పరిసయ్ రు మరి అయా గుడిదాన్ మహి వన్నిజ్, “వాండ్రు నీ కణుకునె రేక్తాన్. అందెజె నీను వన్ని వందిజ్ ఇన్నిక వెహ్లాన్”, ఇజి వెన్ బాతార్. దనిజ్ వాండ్రు, “వాండ్రు ఒరెన్ ప్రవక్త”, ఇహాన్.

18 యా యూదురు అదికారిజు, వీండ్రు గుడిదాన్ మహాన్. వీండ్రు ఏలు రెకె ఆతండ్రె బేసినాన్ ఇజి నమ్మివేతార్. అందెజె వారు వన్ని అయిసి అపొసిజ్ రపిస్తార్.

19 రపిస్తారె వరిజ్, “వీండ్రు మీ మరీనా? వీండ్రునా గుడిదాన్ పుట్టాన్ ఇజి మీరు వెహ్లానిదెర్. అహిజు, ఏలు వాండ్రు ఎలాగ బేసినాన్?”, ఇజి వరిజ్ వెన్ బాతార్. అహు వెన్ బాని దాక, వాండ్రు గుడిదాన్ మహాన్. వాండ్రు నెగెణ్ ఆతాండ్రె బేసినాన్ ఇజి నమ్మివేతార్.

20 వన్ని అయిసి అప్పొసిర్ వెహ్లాన్, “వీండ్రు మా మర్రిన్, ఇజి మాపు నెస్సాప్. వీండ్రు గుడిః దాన్ పుట్టాన్ ఇజి బా నెస్సాప్.

21 గాని ఏలు వాండ్రు ఎలాగ బేసినాన్ ఎయెన్ వన్ని కణుకు రెక్తాన్ ఇన్నిక మాపు నెన్ ఏప్. వాండ్రు బుద్ధి వాతికాన్ గదె. వన్నిజ్ వెన్ బాదు. వాండ్రు వన్నిజ్ జర్తిక వెహ్లాన్”, ఇజి వెహ్లాన్.

22 వన్ని అయిసి అపోసిర్ ఆహె వెహ్టార్. ఎందానిజ్ ఇహిజ వారు యూదురి అదికారిజ తియెల్ ఆతార్. యా యూదురు ఉండ్రి తిరుమానం కిత మహార్. ఎయెన్బా యేసు క్రీస్తు ఇజి ఒప్పుకొటిజి వన్నిజ్యుదురి మీటిజ్ ఇండ్రోదాన్ వెల్లి కిదెజ్ ఇజి.

23 అందెజె వన్ని అయిసి అపోసిర్, వాండ్రు బుద్ది వాతికాన్గదె, వన్నిజ్ వెన్బాదు”, ఇజి వెహ్టార్.

24 అందెజె యూదురు అతికారిజు మరిబా గుడిదాన్మహి వన్నిజ్ కూక్పిస్తార్. కూక్పిస్తారె, “నీను దేవుణుదిజ్ పొగిడిజి వెహ్అ. నిజి నెగెణ్ కితాన్ ఇజి నీను వెహ్నిని యా వాండ్రు పాపం కిజినికాన్ ఇజి మాపు నెసినాప్”, ఇహార్.

25 నస్తవలె వాండ్రు, “వాండ్రు పాపం కిజినికానొ సీలెనొ ఇజి నాను నెన్వ. ఉండ్రి నాను నెన్ను. నాను గుడిదాన్ మహా. ఏలు నాను బేసిన”, ఇజి వెహ్టార్.

26 వారు వన్నిజ్, “వాండ్రు నిజి ఇనిక కితాన్? వాండ్రు ఎలాగ నీ కణుకు రెక్కాన్?”, ఇజి వెన్బాతార్.

27 అందెజె వాండ్రు, నాను ముజాలె మిజి వెహ్ మన. గాని మీరు విన్ఇదెర్. ఎందానిజ్ మీరు మరిబా విండ్రెజ్? మీరుబా వన్ని సిసూర్ఆదెజ్ కోరిజినిదెరా?”, ఇజి వెహ్టార్.

28 “నీను బా వన్ని సిసూనె. మాపు మోసె సిసూర్జ.

29 దేవుణు మోసెవెట వర్గితాన్ ఇజి మాపు నెసినాప్. గాని అయా వాండ్రు ఎమేణికాన్ ఇజి మాపు నెన్వవ్”, ఇజి వారు వన్నిజ్నండొ దూసిస్తార్.

30 అందెజె వాండ్రు ఈహు వెహ్టార్, “అబ్బు గొప్ప పణి యా! వాండ్రు ఎమేణికాన్ ఇజి మీరు నెన్ఇదెర్ గాని వాండ్రు నా కణుకు రెక్కాన్.

31 దేవుణు పాపం కినివరి మొరొ విన్వవ్ ఇజి మాటు నెన్నాట్. వన్నిజ్ గవరం సీజి వన్నిజ్ ఇస్తం ఆతి పణిజ్కిని వరి మొరొ వాండ్రు వినాన్.

32 యాయ పొటలొఇహానె గుడిదాన్ మహివన్ని కణుకు ఎయెన్బా ఎసెజ్బా రెక్కిక విన్వవ్.

33 నా కణుకు రెక్కి యా వాండ్రు దేవుణు బాణిజ్వాతికాన్ ఆవన్ఇహిజ నజి నెగెణ్కిదెజ్అట్వితాన్మరి”.

34 దన్నిజ్ వారు, “నీను పాపమ్దానె పుట్టికి. ఏలు మజి నెన్పిస్తెజ్ వాజినిదా?”, ఇజి వెహ్టారె వన్నిజ్వెల్లి కితార్.

35 అయా గుడ్డిదాన్ మహివన్నిజ్ పరిసయరు వెల్లి కితార్ ఇజి యేసు విహాన్. వాండ్రు వన్నిజ్ సుడెతివెలె, “నీను లోకు మరిసిజ్ నమిజినిదా?”, ఇజి వెన్బాతాన్.

36 వెన్బాతిజ్ వాండ్రు, “బాబు నాను వన్నిజ్ నమిదెజ్ వాండ్రు ఎయెన్ ఇజి నజి వెహ్అ”, ఇహాన్.

37 అయావలె ఏలు, “నీను యేలు వన్నిజ్సుడెతి మన్ని. వాండ్రె నీ వెట వర్గిజినికాన్”, ఇజి వెహ్టార్.

38 నస్తవలె వాండ్రు, “ప్రబువా, నాను నిజి నమిజిన”, ఇహండ్రె యేసు పాదమ్కాజ్ ముణుకుజ్ ఊర్జి మాడిస్తాన్.

39 అందెజె యేసు, “నాను లోకురిజ్కెట కిదెజె వాత మన. గుడివారు బేస్తెజ్ బేస్సికార్ గుడి: ఆదెజ్ నాను వాత మన”, ఇహాన్.

40 నస్తవలె వన్నిడగ్రు నిహి మహి సెగొండార్ పరిసయరు వాండ్రు వెహ్నినిక విహార్. విహారె, “ఇనిక? మాపు బా గుడిదికాపా?”, ఇజి వెన్బాతార్.

41 అందెజె యేసు, “మీరు గుడిదికిదెర్ ఇహిజ, దేవుణు మీ పాపమ్కు లెక్క కివితాన్ మరి. గాని ‘మాపు సుడెజినాప్’ ఇజి మీరు వెహ్నినిదెర్. అందెజె మీ లొఇ పాపమ్కు నిహె మనె”, ఇజి వెహ్టార్.

## 10

1 “గొరెజు సాలదు, సరిదాన్ డుగ్విండ, ఆఇ సరిదాన్ డుగ్నికాన్ డొజారి కజరి ఆత మనాన్.

2 గాని సరిదాన్ డుగ్నికాన్ గొరెజ్ గవుడుయెన్.

3 సాలదిజ్ రెయ్క కాప్కినికాన్, వన్నివందిజ్ సేఫ్లా రేనాన్. గొరెజ్ వన్నికంటం వెన్నె. వాండ్రు వన్నిసొంత గొరెజు పేరు అసి కూక్పి వన్నాజ్ వెల్లి సొప్పాన్.

4 వన్ని సొంతవనకాజ్ విజు వెల్లి సొప్తి వెనుక, గొరెజు ముజాల వాండ్రు నడినాన్. గొరెజ్ వన్ని కంటం నెన్నె. అందెజె అవి వన్నివెట సొనె.

5 గాని నెన్ఇవన్ని కంటం అవి నెన్ఉ. అందెజె వన్నివెట సొన్విండ, అవి వన్నిబాణిజ్ ఉహ్కె, ఇజి నాను నిజం మీవెట వెహ్నిన.

6 యేసు అబ్బె నిహిమహివరిజ్ కతవజ యాక నెన్పిస్తాన్. గాని వారు వాండ్రు వెహ్నినిదనిజ్ అర్దం కివితార్.

7 అందెజె వాండ్రు మరి వరివెట ఈహు వెహ్టార్: “నాను నిజం మీవెట వెహ్నిన, నానె గొరెజ్ సరిలెకెండ్ మన్ను.

8 నా ముజాల వాతికార్ విజెరెబా డొజారి కజరి ఆత మనార్. గాని గొరెజ్ పరిజ్ విన్ఉతె.

9 నాను దేవుణుడగు సొండ్రెజ్ సరిలెకెండ మన్ను. నా వెట డుఃగ్నికాన్ ఎయెన్బా నెగ్రిండ మంజినాన్. వాండ్రు లోఇ సొన్ని వెల్లి వాజి మేత మేజి మంజినాన్.

10 డొజారి డొజి కిదెజ్నో, సప్తెజ్నో పాడు కిదెజ్నో వానాన్. మరి ఇన్నిదనిజ్బా రెవన్. నాను నజీ వెనివరిజ్ దేవుణువెట ఎలాకాలం బత్కిని బత్కు సీని వందిజె వాత మన్ను. అయాక పూర్తి సీని వందిజె వాత మన్.

11 నాను గొర్రెజ్ నెగ్గి గవుడుయెన్. నెగ్గి గవుడుయెన్ గొర్రెజ్ వందిజ్ వన్ని పాణం సీనాన్.

12 జీతం వందిజ్ గొర్రెజ్ అడిజినికాన్ గవుడుయెన్ ఆవన్. అక్కెజ్ వన్ని సొంతగొర్రెజ్ ఆఉ. అందెజె దుమాల్గొండి వాజినిక సుడేజి గొర్రెజ్డిసి ఉహ్కాన్. అయావలె దుమాల్గొండి వన్కాజ్ అసి సెద్దిన్నాద్.

13 వాండ్రు జీతం వందిజ్ అడిజినాన్. గొర్రెజ్ మున్ను వన్నిజ్ బాజిత సిల్లెద్. అందెజె వాండ్రు డిస్సు ఉహ్కాన్.

14-15 నాను గొర్రెజ్ నెగ్గి గవుడుయెన్. బుబ్బు నజీ ఎలాగ నెసినాండ్రో, నాను బుబ్బెజ్ ఎలాగ నెసినానో, అయావజి నాను గొర్రెజ్ నెసిన. నా గొర్రెజ్ నజీ నెసినె. నాను గొర్రెజ్ వందిజ్ నా పాణం సీజిన.

16 యా మందదు మనికెజ్ ఆవిండ, మరి సెగం గొర్రెజ్ నజీ మన్నె. వన్కాజ్బా నాను పేర్జి తత్తెజ్ వెలె. అవి నా కంటం వినె. అయావలె మంద ఉండ్రె ఆనాద్. గవుడుయెన్ ఒరెన్ ఆనాన్.

17 నాను మర్జి బత్కినివందిజె, నా పాణం సీజిన. అందెజె నా బుబ్బు నజీ ప్రేమిన్నాన్.

18 ఎయెన్బా నా పాణం నా బాణిజ్ లాగ్ వన్. నా సొంత ఇస్టమ్దానె నా పాణం సీజిన. నా పాణం సీదెజ్ నజీ అతికారం మనాద్. మర్జి లాగె అదెజ్బా నజీ అతికారం మనాద్. యా లెకెండ కిదెజ్ ఇజినె నా బుబ్బు నజీ ఆడ్ర సిత్తమనాన్”.

19 వాండ్రు వెప్తి యా మాటెజ్ వందిజె, యూదురు లోఇ ఉండ్రె ఇజి గొడేబ పుట్టాద్

20 వరి లోఇ నండొండార్, “వీండ్రు దెయం అస్తికాన్, వెరి వాండ్రు, విన్నిమాట ఎందానిజ్ వెంజినిదెర్”, ఇజి వెప్టార్.

21 మరి సెగొండార్, “దెయం అస్తికాన్ ఒరెన్ యాలెకెండ వర్పివన్. దెయం గుడిదివరిజ్ నెగెండ కిదెజ్ అట్వాదా?”, ఇజి వెప్టార్.

**యూదురు యేసుజ్ నమ్మివర్.**

22 అయావలె పిన్నికాలం. యెరూసలెమ్దు యూదురు దేవుణుగుడిదు బసె ఆతి దినంవందిజ్ ఎత్తుకిని పండొయ్ కిజినార్\*.

23 నస్తివలె యేసు, దేవుణుగుడిదు మన్ని సొలోమోను అరుజు ఇజి కూకె ఆని అరుజుదు బూలాజి మహాన్.

24 అయావలె యూదురు వన్ని సుటులం ఆతారె, “ఎసొడ్ రోస్కు నీను మజి టెటాజ్ వెహ్ వీండ, అనుమానమ్కు ఇడజిని? నీను క్రిస్తు ఇహిజ, మజి తినాజ్ వెహ్ అ”, ఇహార్.

25 అందెజె యేసు, నాను మీవెట వెప్టా. గాని మీరు నమ్మిఇదెర్. నా బుబ్బు సత్తుదాన్ నాను బమ్మాని పణిజ్ కిజిన. అయా పణిజ్ నావందిజ్ సాసి వెహ్సినె.

26 గాని మీరు నమ్మిఇదెర్. ఎందానిజ్ ఇహిజ, మీరు నా గొర్రెజ్ ఆఇదెర్.

27 నా గొర్రెజ్ నా కంటం వెంజినె. నాను వన్కాజ్ నెసిన. అవి నావెట వాజినె.

28 నాను వన్కాజ్ ఎలాకాలం దేవుణువెట బత్కిని బత్కు సీజిన. అవి ఎసెజ్బా నాననం ఆఉ. వన్కాజ్ ఎయెన్బా నా కీదాన్ ఒత్తెజ్ అట్వన్.

29 వనకాజ్ నజీ సత్తి నా బుబ్బు విజెరిజ్ ఇంక పెరికాన్. అందెజె ఎయెన్బా వనకాజ్ బుబ్బుకీదాన్ డొజి కిజి ఒత్తెజ్ అట్వన్.

30 నానుని నా బుబ్బు, ఉండ్రె ఆత మనాప్”, ఇజి వెప్టార్.

31 నస్తివలె, యూదురు వన్నిజ్ మరి డెయిదెజ్ ఇజి పణుకు పెప్టార్.

32 గాని యేసు వరిజ్, “నా బుబ్బు సత్తుదాన్ నండొ బమ్మ ఆని పణిజ్ కిజి మిజి తోరిస్త మన్ను. వనకలోఇ ఎమేణి పణి వందిజ్ నజీ మీరు పణుకుజాణిజ్ డెయినిదెర్?”, ఇజి వెప్టార్.

33 అందెజె యూదురు, “మాపు పణుకుజాణిజ్ డెయినిక నీను కిత్తి ఇని నెగ్గి పణిజ్ వందిజ్ ఆవిద్. గాని నీను ఒరెన్ లోకుఆజి మంజి, నాను దేవుణు ఇజి వెహె ఆజి దేవుణుదిజ్ దూసిన్నివందిజె మాపు పణుకుజాణిజ్ డెయినాప్”, ఇజి వెప్టార్.

\* 10:22 10:22 యెరూసలెమ్ గుడి ముజాల నాననం కిత్తార్ అయాక మరి తొప్టారె గుడిదు పార్లనం కిదెజ్ పూజెజ్ కిదెజ్ మొదొల్స్తార్. అయాకాలం ఒడేబిజి యూదురు కిని పండొయెన్ యా గుడిదు బసె ఆతి దినం వందిజ్ ఎత్తుకిని పండొయె.

34 అందెజె వాండ్రు వరిజ్ ఈహు వెహ్లాన్, “మీరు దేవుణులు’ ఇజి దేవుణునె వెహ్లాన్†, ఇజి దేవుణు మాటదు రాస్త మనాద్ గదె?

35 దేవుణు మాటదు వెహ్లానికెజ్ ఎసెజ్ బా తవ్ ఉ. దేవుణు మాట సిత్తి లోకురిజ్, ‘దేవుణులు’, ఇజి దేవుణు కూక్కినాన్.

36 బుబ్బాతి దేవుణునె నజి వన్ని వందిజ్ కేట కితాండ్రె యా లోకమ్దు పోక్తాన్. అహిజ, ‘నానె దేవుణుమరిసి’ ఇజి నాను వెహ్లావలె దేవుణుదిజ్ దూసిస్నాన్ ఇజి మీరు ఎలాగ వెహ్లానిదెర్.

37 నాను నా బుబ్బ వెహ్లా పణికివిండ మహిజ, నజి నమ్మిమాట్.

38 గాని నాను కిత్తి అయా పణిజ నమ్మిదు. నజి నమ్ఇజ్ బా అయా పణిజ నమ్మిదు. ఎందానిజ్ ఇహిజ, బుబ్బ నావెట కూడేజి మంజినాన్. నాను బుబ్బవెట కూడేజి మంజిన, ఇజి మీరు నెసి అర్థం కిజి మండ్రెజ్”.

39 యాకెజ్ విహారె, మరి వారు వన్నిజ్ అస్తెజ్ సుడేతార్. గాని వాండ్రు వరి కిదాన్ తప్రె ఆతాండ్రె సొహాన్.

40 వాండ్రు యొర్దాను గడ్డ అతాహ పడకాద్ మన్ని ఉండ్రె బాడిడు మరిబా సొహాన్. బానె యోహాను బాప్తినం సీజి మహాన్. వాండ్రు బాన్ మహాన్.

41 నండోడార్ వన్నిడగ్రు వాతార్. వారు, “యోహాను ఇని బమ్మాని పణిబాన్ కివితాన్. గాని విని వందిజ్ యొహాను వెహ్లా నజతిజ్ విజు నిజమ్నె”, ఇజి వెహ్లార్.

42 అబ్బె నండోడార్ యేసుముస్సు నమకం ఇడ్తార్.

## 11

### సాతి లాజరుజ్ నిక్కినాన్

1-3 బెతానియ ఇన్ని నాటో లాజరు ఇన్నికాన్ ఒరెన్ మనాన్. వన్ని బీబికినె మార్త మరియు ఇనికెజ్. యా మరియునె యేసు పాదమ్కాజ్ అతరు ఇన్ని వానన నూనె వాక్తాదె, దన్నికొప్పదాన్ తెల్తాద్. ఉండ్రె నాండిజ్ లాజరుజ్ జబ్బు వాతాద్. నీరసం లావు ఆతిజ్, వన్ని బీబీసిక్ యేసుడగ్రు కబ్బు పోక్తె, ‘ప్రబువా, నీను లావు ప్రేమ కిజిని నీకూలాయెన్ నీరసం ఆత మనాన్’, ఇజి.

4 యేసు యా కబ్బు విహండ్రె, “వాండ్రు సావీన్. సానివందిజ్ వాతిక ఆవీద్ యా నీరసం. గాని దేవుణు గొప్ప పెరికాన్ ఇజి లోకురిజ్ తోరిస్తెజ్. ఎందానిజ్ ఇహిజ, దిన్నిదటాన్ దేవుణు మరిసి గొప్పపెరికాన్ ఇజి తోరె ఆదెజ్”, ఇజి వెహ్లాన్.

5 యేసు మార్తెజ్, దన్నితజిసి మరియెజ్, లాజరుజ్ లావు ప్రేమిస్తాన్.

6 గాని లాజరు నీరసం లావు ఆతాన్ ఇజి కబ్బు విహిజ్ బా వాండ్రు బేగి సాన్ ఏతాన్. వాండ్రు మహి బాన్ మరి రుండి రోస్సుబా మహాన్.

7 వెనుక వాండ్రు వన్ని సిసూరిజ, “రదు, మాటు యూదయ దేసమ్దు మర్జి సొనాట్”, ఇజి వెహ్లాన్.

8 అయావలె వారు, “బోదకినికి, యూదురు నిజి పణకాణిజ్ డెయ్ దెజ్ సెగం రోస్సు ముజాలె సుడేతార్ గదె. మరిబా నీను అబ్బె సాండ్రెజ్ సుడేజినిదా?”, ఇహార్.

9 అందెజె యేసు, “వేడకాజ్ పన్నెండు గంటెజ్ మనె. సిలె? అందెజె ఒరెన్ వేడె బూలాతిజ, వాండ్రు తోరె ఇడేజి అర్న్. ఎందానిజ్ ఇహిజ, వాండ్రు యా లోకమ్ది జాయి సుడేజినాన్.

10 గాని వాండ్రు రెయితు బూలాతిజ, వాండ్రు తోరె ఇడేజి అర్నాన్. ఎందనిజ్ ఇహిజ, వన్ని లోఇ జాయి సిల్లెద్”, ఇజి వెహ్లాన్.

11 యాక వెహ్లాండ్రె, మరి సిసూరిజ్ వెహ్లానాన్, “మా కూలాయెన్ ఆతి లాజరు నిద్రకిజినాన్. వన్నిజ్ నిక్తెజ్ నాను బాన్ సొన్నిన.

12 వన్ని సిసూరు, “ప్రబువా, వాండ్రు నిద్రకిజినాన్ ఇహిజ, వాండ్రు నెగెణ్ ఆనాన్లె”, ఇహార్.

13 లాజరు సాత మనాన్ ఇజి యేసు వెహ్లాన్. గాని వన్నిసిసూర్ మాముల్ నిద్రవందిజె వాండ్రు వెహ్లానాన్ ఇజి ఒడిబితార్.

14-15 అందెజె వాండ్రు వరిజ్ తినాజ్ వెహ్లాన్, “లాజరు సాతాన్. అయావలె నాను వన్నివెట మన్ ఏత. అందెజె నాను మీ వందిజ్ సర్ద ఆజిన. ఎందానిజ్ ఇహిజ, మీరు నజి నమ్మినిదెర్లె. అందెజె రదు, వన్ని బాన్ సొనాట్”, ఇజి వెహ్లాన్.

16 నస్తవలె దిదుము ఇజి కూకె ఆని తోమా మహి సిసూరిజ్, “రదు మాటు బా సొనాట్. వన్నివెట సాదెజ్ సొనాట్”, ఇహాన్.

17 యేసు వాతివలె, లాజరుజ్ నమాది కిజి నాల్లి దినమ్కు ఆతె ఇజి నెస్తాన్.

† 10:34 10:34 కీర్తన 82:6.

18-19 బెతానియ యెరూసలెమ్ దాన్ ఎంజు ఇంసుమింసు రుండి మయ్లుజ్ దూరం మన్నె. నండొండార్ మార్తెజ్ మరియెజ్ ఓదిస్సెజ్ వాత మహార్. వరి తంబెర్ని సాతి వందిజ్, వారు ఓదిస్సెజ్ వాతార్.

20 యేసువాజినాన్ ఇజి వెప్తా మాట విహదె, మార్త ఎద్రు సాహద్. వన్నిజ్ సుడేదెజ్ అది సాహద్. గాని మరియ ఇండ్రొ బస్త్ మహద్.

21 నస్తివలె మార్త యేసుజ్, “ప్రబువా, నీను ఇబ్బె మంజినిక ఇహిజ, నా తంబెరి సాఎతాన్ మరి.

22 గాని ఏలుబా నీను దేవుణుదిజ్ ఇనిక లొస్తిజ్ బా వాండ్రు నిజి సీనాన్ ఇజి నాను నెస్సు”, ఇజి వెప్తాద్.

23 అందెజె యేసు, “నీ తంబెర్ని మర్జి నిజ్ నాన్ లె”, ఇజి వెప్తాన్.

24 అయావలె అది, “యా లోకమ్ దిజ్ కడేవెరి దినమ్ దు, వాండ్రు మరి బత్కినాన్ లె ఇజి నాను నెస్సు”, ఇహద్.

25-26 అందెజె యేసు దనిజ్ ఈహు వెప్తాన్, “నానె సాతి వరిజ్ నిక్కినాన్. వరిజ్ మరి బత్కు సీనికాన్ నానె. నజి నమ్మినికాన్ ఎయెన్ బా వాండ్రు సాతిజ్ బా మరి బత్కినాన్. నజి నమ్మిజి బత్కిని ఎయెన్ బా ఎసెజ్ బా సావన్. నీను యాకెజ్ నమ్మిజినిదా?”.

27 అయావలె అది, “ఒబ, నాను నమ్మిజన, నీనె దేవుణు మరిసి ఆతి క్రీస్తు ఇజి. నీనె యా లోకమ్ దు వాడెజ్ మన్నికాన్ ఇజి దేవుణు వెప్తాకి”, ఇజి వెప్తాద్.

28 యాకెజ్ వెప్తాదె, అది మర్జి సాహదె, దన్నితజి మరియెజ్ కూక్తాదె, “బోదిస్సికాన్ ఇబ్బె మనాన్. నిజి కూక్కినాన్”, ఇజి గిబ్బి డగ్రు వెప్తాద్.

29 మరియ యాక విహిజ్, అది గజిబిజి నిజితాదె, వన్ని డగ్రు సాహద్.

30 అయావలె యేసు ఇంక ఆ నాటొ రెంండె. మార్త వన్నిజ్ దనూల్ ఆత్తి బాడిందెనె మహాన్.

31 మార్తెజ్ ఓదరిసి దనివెట ఇండ్రొ మహి యూదురు అది గజిబిజి నిజ్ జి సొస్సినిక సుడేతివలె, అది అడేబదెజ్ దూకిదు సొస్సినాన్ సు ఇజి దన్నివెనుక సాహార్.

32 యేసు మన్ని బాడిదు మరియ వాతాదె, వన్నిజ్ సుడేతాదె, వన్ని పాదమ్ కాజ్ అర్తాద్. అర్తాదె, “ప్రబువా, నీను ఇబ్బె మంజినిక ఇహిజ, నా తంబెరి సాఎతాన్ మరి”, ఇహద్.

33 అది అడేబాజినిక యేసు సుడేతాన్. దని వెట వాతి యూదురు బా అడేబాజినిక సుడేతాన్. అయావలె వాండ్రు మన్నుదు బాద ఆతాండ్రె మొకొం డిస్టాన్.

34 “వన్నిజ్ ఎంబె ఇడ్తి మన్నిదెర్?”, ఇజి వరిజ్ వెన్ బాతాన్. “వాజి సుడే అ ప్రబువా”, ఇహార్ వారు.

35 యేసు కనీర్ డిస్టాన్

36 అయావలె యూదురు, “సుడేదు వాండ్రు ఎసా వన్నిజ్ ప్రేమిస్తాన్”, ఇజి వెప్తార్.

37 గాని వరి లొఇ నెగొండార్, “వీండ్రు గుడి: వరిజ్ నెగెణ్ కితాన్. మరి ఎందనిజ్ లాజరు సావండ కిదెజ్ అట్ ఎతాన్”, ఇజి వర్గితార్.

38 అయావలె యేసు నండొ బాద ఆతాండ్రె దూకిదు వాతాన్. అయాక ఉండ్రె సాలం. దన్నిముజాల ఉండ్రె పెరి పణుకు ఇడ్త మహార్.

39 యేసు, “అయా పణుకు లాగ్ దు”, ఇజి వెప్తాన్. నస్తివలె సాతివన్ని బీబ్ సి మార్త వన్నిజ్, “ప్రబువా, వినిజ్ ముసి నాల్లి రోస్సు ఆజినాద్. అందెజె గొప్ప కంపు ఏలు మంజినాద్ లె”, ఇజి వెప్తాద్

40 అందెజె యేసు దనిజ్, “నీను నమ్మితిజ, దేవుణు గొప్ప పెరికాన్ ఇజి నీను సూణిలె ఇజి నాను నిజి వెప్తా గదె?”, ఇజి వెప్తాన్.

41 అందెజె వారు పణుకు లాగితార్. యేసు కణుకు ముస్సు బస్తాండ్రె, “ఓ బా నీను నా పార్దనం వెంజినిజ్ నిజి వందనమ్ కు.

42 నీను ఎస్తివలె బా నజి వెంజినిలె ఇజి నాను నెస్సు. గాని ఇబ్బె నిల్లి మంజిని యా లోకుర్ వందిజ్ నాను నిజి వందనమ్ కు వెప్తా మన. ఎందానిజ్ ఇహిజ, నీనె నజి పోక్తి మన్నికాన్ ఇజి వారు నమిదెజ్”, ఇజి పార్దనం కితాన్.

43 పార్దనం కితాండ్రె, వాండ్రు, “లాజరు వెల్లి రఅ”, ఇజి డెల్లి డటం వెప్తాన్.

44 అయావలె లాజరు వెల్లి వాతాన్. వన్ని కికు కాల్కు పాతెజాణిజ్ సుటిస్త మహార్. వన్ని మొకొం రూమాల్ దాన్ తొమ్కొత్ మహద్. యేసు వరిజ్, “వన్నిజ్ సుటిస్తి మన్నికెజ్ లాగ్ దు. వన్నిజ్ నడి: నిలెకెండ కిదు”, ఇహాన్.

### యేసుజ్ నపైజ్ సుడేజినార్

45 అందెజె మరియెజ్ సుడేదెజ్ వాతి యూదురు లొఇ నండొండార్, యేసు కితిక సుడేతారె, వన్ని ముస్సు నమకం ఇట్టార్.

46 గాని వరి లోక సెగొండార్ పరిసయురుజ డగ్రు సొన్ని, యేసు కితిక వరిజ్ వెహ్టార్.

47 నస్తవలె పెరి పుజెరిజు నీ పరిసయురు, పెద్దల్జ కూక్విస్తారె, “వాండ్రు గొప్ప బమ్మ ఆని పణిజ్ కిజినాన్? అందెజె మాటు ఇన్నిక కిదెజ్?”

48 మాటు వన్నిజ్ యా లెకెండ్ పణి కిదెజ్ సరి సెతిజ, లోకుర్ విజెరె వన్నిజ్ నమినార్. రోమాదికార్ వానారె, మా గుడిః, యూదురు ఆతి మజీ విజు నాసనం కినార్”, ఇజి వర్గితార్.

49-50 నస్తవలె వరి లోక కయపా ఇన్నికాన్ ఒరెన్ మహాన్. వాండ్రు అయా ఏంటు విజు పుజెరిజ ముస్సు పెరి పుజెరి. వాండ్రు వరిజ్, “మీరు ఇనికబా నెన్ఇతిదెర్. రోమాదికార్ మా గుడిః, యూదురు ఆతి మజీ వూర్తి నాసనం కినిదని ముస్సు, లోకుర్ వందిజ్ ఒరెన్ వాండ్రు సానికాదె మిజీ నెగెద్ ఇజి మీరు నెన్ఇదెరా?”, ఇహాన్.

51-52 వాండ్రు వెహ్నిని దని అర్లం వాండ్రె నెన్ఎతాన్. గాని వాండ్రు ఆ ఏంటు విజు పుజెరిజ ముస్సు పెరి పుజెరి. అందెజె యేసు యూదురు వందిజ్ సానాన్లె ఇజి, యూదురు వందిజె ఆవిండ, సెద్దితి మన్ని దేవుణు కొడోరిజ్ కుడుఃప్పి తసి వరిజ్ ఉండ్రె లోకుర్ కిదెజ్. దినివందిజ్ యేసు సానాన్లె ఇజి వాండ్రు ఎతు కిజి జర్గిగ ముజాలె వెహ్టాన్.

53 అందెజె అయా నాండిజ్ అని వన్నిజ్ సప్తెజ్ వారు సుడఃజి మహాన్.

54 అందెజె యేసు విజెరె వన్నిజ్ నెస్సిలెకెండ్ బూలాఎతాన్. గాని వాండ్రు ఎయెర్ మన్ఇ బాడిః డగ్రు మన్ని ఉండ్రె ప్రాంతమ్దు సొహాన్. అయా ప్రాంతమ్దు మన్ని ఎప్రయెం ఇన్ని ఉండ్రె పట్టుమ్దు వన్ని సిసూర్ వెట వాండ్రు మహాన్.

55 యూదురి పస్కుపండోయ్ డగ్రు వాతివలె, నండో ప్రాంతమ్కాణిజ్ నండోండార్ యెరూసలెమ్దు సొహాన్. పండోయ్ ముజాలె విజెరె సుబ్బరం మనిక ఉండ్రె ఆసారం. అందెజె, వారు సుబ్బరం మన్నివందిజ్ వారు యెరూసలెమ్దు వాతార్.

56 వారు యేసుజ్ రెబాజినె మహాన్. వారు దేవుణు గుడిః అరుజుదు నిహి మహివలె, ఒరెన్ వెట ఒరెన్, “ఇన్నిక ఒడఃబిజిని? వాండ్రు పండోయ్ దిజ్ వానాండ్రా, సిలెనా?”, ఇజి వర్గితార్.

57 గాని పెరి పుజెరిజు ని పరిసయురు ఉండ్రె ఆడ్ర సిత మనార్. ఎయెన్బా యేసు ఎంబె మనాన్ ఇజి నెస్తిజ, వాండ్రు వరిజ్ వెహ్టాజ్. ఎందానిజ్ ఇహిజ, వన్నిజ్ అరెస్టు కిదెజ్.

## 12

1 పస్కుపండోయ్ మొదొల్స్తెజ్ ఆరు దినమ్కు మనె. అయావలె, యేసు లాజరు మన్ని బెతానియ ఇని పట్టుమ్దు సొహాన్. యా లాజరుజ్ నె యేసుసావుదాన్ బత్తిస్తాన్.

2 అబ్బె వారు యేసువందిజ్ ఉండ్రె వింతు తయార్ కితార్. మార్తనె వింతుదు సవ్దర్ణి. బోజనమ్దిజ్ బస్తి మహివరివెట లాజరుబా యేసువెట బస్తాన్.

3 నస్తవలె, మరియు ఉండ్రె సీసాదు మన్ని వాసన నూనె లాగితాదె, యేసు పాదమ్కాజ్ వాక్తాదె దనికొప్పుదాన్ వన్ని పాదమ్కు తెలితాద్. యా వాసన నూనె, నండో కరీద్తిక. యాక జటమాంసి ఇని ఉండ్రె మొకదానె, తయార్ కితిక. అది వాసన నూనె వాక్తివెలె, అయా ఇల్లు విజు నెగ్గి వాసనందాన్ నిండ్రెతాద్.

4-5 అయావలె వన్ని సిసూర్ లోక ఒరెన్ ఆతి ఇస్కరియొతు యూద, “ఎందానిజ్ యా వాసనం నూనె మూండ్రె వందిజ్ వెండి రుపాయ్ జు పొర్ని అయా డబ్బు బీదాతి వరిజ్ సిఇతి?”, ఇజి వెహ్టాన్. యా ఇస్కరియొతు యుదనె, వెన్కా యేసుజ్ యుదురి అదికారిజ కీదు ఒపజెప్పికాన్.

6 ఏలు వాండ్రు యా లెకెండ్ వెహ్నిక, బీదాతివరిజ్ నెగెండ సుడఃజిన ఇజి ఆవిద్ గాని వాండ్రు డోజ వాండ్రు. వరి సేవపణి వందిజ్ లోకుర్ సీజిని డబ్బు ఇడ్డి సన్ని వీండ్రె అస్త మనాన్. వాండ్రు వన్కాలోఇహాన్ వన్ని సొంత కర్పు వందిజ్ డోజ కిజి మహాన్. అందెజె వాండ్రు ఆహె వెహ్టాన్.

7 అందెజె యేసు, “దనిజ్ బాద కిమాట్. నజి సమాది కిని దినమ్దాక అయాక దని బాన్ మన్నిద్.

8 బీదదికార్ ఎస్తివలెబా మీ వెట మంజినార్. గాని నాను ఎలాకాలం మీ వెట మన్ఎ”, ఇజి వెహ్టాన్.

9 అహిజ, యూదుర్జ లోక మంద లోకుర్, యేసు బెతానియదు మనాన్ ఇజి నెస్తారె అబె వాతార్. వారు యేసుజ్ సుడఃదెజ్ ఇజినె ఆవిండ, వాండ్రు సావుదాన్ బత్తిస్తె లాజరుజ్ సుడఃదెజ్ బా వాతార్.

10-11 అందెజె పెరి పుజెరిజు, లాజరుజ్ బా సప్తెజ్ ఇజి ఆలోసనం కితార్. ఎందానిజ్ ఇహిజ, వన్నిజ్ జర్గితి దనివందిజ్ సుడఃజి యూదురు నండోండార్, వరి పెద్దల్జ డిఃసి యేసుముస్సు నమకం ఇడఃజి మహాన్.

12 మర్సనాండిజ్, పస్కు పండోయ్ దిజ్ యెరుసలెం పట్టుమ్దు వాతి మందలోకుర్ యేసు యెరూసలెమ్దు వాజినాన్ ఇజి వెహాన్.

13 అందెజె వారు ఈత మటెజ్ అస్తారె, పట్టుమదాన్ వెల్లి సాహార్. వన్నిజ్ ఎద్దు సొన్ని, “ఓసన్న ప్రబు సిత్తి అతికారమ్దాన్ వాజిని వన్నిజ్ పొగిడిఃపిద్. ఇస్త్రాయేలు లోకురిజ్ ఏలుబడిః కినిరాజుజ్ పొగిడిఃపిద్”, ఇజి డటం డేల్ని వెహ్తార్.

14-15 “ఓ సియోను గాల్సి\*, తియెలామాట్. ఇవిలోన్ మీ రాజు గాడఃదె పిల్ల ముస్కు ఎక్త బస్తాండ్రె వాజినాన్†”, ఇజి దేవుణు మాటదు రాస్తి మన్నిలెకెండె, యేసు ఉండ్రె గాడఃదె పిల్లదిజ్ నుడఃతాండ్రె దనిముస్కు బస్తాండ్రె వాజినాన్.

16 అయావలె వన్నిసిసూర్ యా జర్గితి వన్నాజ్ అరదం కివేతార్. గాని వెనుకయేసు సాజి, మరి బత్కిజి, దేవుణు మంజిని బాడిఃదు వన్ని వెట గొప్పు జాయ్దు మండ్రెజ్ దేవుణు వన్నిజ్ ఒతివెలెనె, యా జర్గితి నజతిజ్ వన్నివందిజ్ దేవుణు మాటదు ముజాలె రాస్త మనాద్ ఇజి అయాక వన్నిజ్ జర్గితాద్ ఇజి వారు అర్దం కితార్.

17 అహిజ, యేసు లాజరుజ్ దూకిదాన్ కూక్కి సావుదాన్ మరి బత్కిస్తివలె వన్ని వెట మహి లోకురెనె, లాజరుజ్ జర్గితిక సాటిసినార్.

18 యా లోకుర్ వెహ్తి మాట విహరె, మంద లోకుర్వన్నిజ్ ఎద్దు సొన్సినార్. ఎందానిజ్ ఇహిజ, వాండ్రు బమ్మాతి గొప్పు పణిజ్ కిత్తాన్ ఇజి వెహ్తార్.

19 అయావలె పరిసయ్రుజు వరిజ్ వారె, “ఇదిలో, నండో లోకుర్ వన్ని వెన్కా సొన్సినార్. మాటు కిజినికెజ్ ఇనికబా, వన్ని వెట సొన్ఎండ వరిజ్ ఆప్కిఉ”, ఇజి వర్గితార్.

### యేసు వన్నిసావు వందిజ్ వర్గిజినాన్

20 నస్తివలె, పస్కు పండోయ్ కినివలె దేవుణుదిజ్ పొగిడిఃజి మాడిఃసైజ్ యెరూసలెమ్దు వాతి వరి లోఇ సెగొండార్ యూదురు ఆఇకార్ మహార్.

21 వారు గలీలయ ప్రాంతమది బెత్సయిద పట్టుమది పిలిపు డగ్రు వాతారె, “బాబు మాపు యేసుజ్ నుడఃదెజ్ ఆస ఆజినావ్”, ఇజి వెహ్తార్.

22 పిలిపుజ్ వెహ్తిజ్, వాండ్రు ఆంద్రెయెజ్ వెహ్తాన్. వీరు రివర్ కూడ్డి యేసుజ్ వరి ఆస వెహ్తార్.

23-24 అందెజె యేసు వరివెట ఈహు వెహ్సినాన్. “లోకు మరిసి ఆతి నజి దేవుణు వన్ని వెట వన్ని జాయిదు మండ్రెజ్ వాండ్రు మంజిని బాడిఃదు ఒని దినమ్కు డగ్రు ఆతె మనె. నాను నిజం వెహ్సిన ‘ఉండ్రె గోదము గిడ బూమిదు అర్పి సాఎండ మహిజ, అది అయ లెకెండ మంజినాద్. గాని ఆ గిడ సాతిజ నండో గిడెజ్ ఆనె.

25 ఎయెన్బా వన్ని సొంత పాణమ్దిజ్ లావు ప్రేమిస్తిజ, వాండ్రు వన్ని పాణం ఎలాకాలం దేవుణు వెట బత్కిని బత్కుదు మన్ఎండ అయాక పాడు కిజినాన్. గాని ఎయెన్బా యా లోకమ్దు బత్కినివలె, వన్ని సొంత పాణమ్దిజ్ లావు ప్రేమిన్ ఏండ మహిజ, వాండ్రు ఎలాకాలం బత్కిని బత్కు వందిజ్ వన్ని పాణం కాపాడిఃజినాన్.

26 ఎయెన్బా నజి సేవ కితిజ, వాండ్రు నా సిసూ ఆదెజ్ వలె. నాను ఎంబె మంజినానో, అబె నజి సేవ కినికాన్బా మంజినాన్. నజి సేవ కిని వన్నిజ్ నా బుబ్బ గవరం సీనాన్”.

27 మరిబా వాండ్రు వెహ్సినాన్, “ఏలు నా పాణం బాద ఆజిన. నాను ఇన్నిక ఇండ్రెజ్? ఓ బా, నజి వాని కస్టమ్దాన్ నజి తప్రిన్ అ, ఇజి వెహ్తాజా? సీలె. ఎందానిజ్ ఇహిజ, యా కస్టమ్కు ఓరిన్ని వందిజె నాను వాత మన.

28 ఓ బా, నీను గొప్పు పెరికి ఇజి లోకురిజ్ తోరె ఆత”, ఇజి వెహ్తాన్. అయావలె ఆగాసమ్దాన్ ఉండ్రె జాటు వాతాద్. “నాను గొప్పు పెరికాన్ ఇజి నీను కితి పణిజాణిజ్ తోరె ఆత మన. నీను సాజి మరి బత్కినివలె నాను మరి అయాక తోరె ఆన”, ఇజి జాటుదు దేవుణు వర్గితాన్.

29 నస్తివలె అబె నిహి మహి లోకుర్ అయాక విహరె, అయా జాటు ఆగాసమ్దు దీడిఃతిక ఇజి వెహ్తార్. గాని మరి సెగొండార్, “దేవుణు మంజిని బాడిదాన్ దేవుణు దూత ఒరెన్ వన్ని వెట వర్గితాన్”, ఇహార్.

30 అందెజె యేసు, “ఏలు మీరు జాటుదాన్ విహి మాటెజ్ నజి దేవుణు పొక్తాన్ ఇజి మీరు నెస్తిజ్ మీ వందిజె వాతె. నా వందిజ్ ఆవద్.

31 ఇయేలె, దేవుణు యా లోకమ్ది లోకురిజ్ తీర్పు సీని సమయం. ఇయేలె లోకమ్ది అతికారి ఆతి నయ్తానుజ్ వన్ని అతికారమ్దాన్ దేవుణు వెల్లి నెక్కి సమయం.

32 నజి బూమి ముస్కుహాన్ సిలువాదు ఎక్కిస్తివలె, విజు దేసెమ్కాణి లోకురిజ్, నాను నా డగ్రు తపిస్సాలె”, ఇజి వెహ్తాన్.

33 వన్నిజ్ ఎలాగ సప్పాలె ఇజి లోకురిజ్ తోరిస్తిజ్ వాండ్రు యా మాటెజ్ జర్గిని ముజాలె వెహ్తాన్.

\* 12:14-15 12:14-15 జీకరి 9:9 † 12:14-15 12:14-15 సియెను గాల్సి ఇజి ఇబ్బె వెహ్సినక యెరుసలెమ్దు మన్ని వరిజె.



34 అయావలె మంద లోకుర్వన్నిజ్, “దేవుణు మాటదు మాపు సద్విజినాప్గదె క్రిస్తు ఎలాకాలం బత్సినాన్లె ఇజి. మరి నీను ఎలాగ వెప్పిని, లోకు మరిసి ఆతి నిజి సిలువాదు ఎకిస్తెజ్వలె ఇజి. అహిజ, నీను వెప్పిని లోకు మరిసి ఎలాగ మర్రికాన్.

35 అందెజె యేసు, “వాండ్రె జాయి ఇజి వన్ని వందిజె వరిజ్ ఈహు వెప్పినాన్: “జాయి ఆతి నాను మీ వెట నెగం కాలమ్నె మంజినలె. అందెజె సీకట్వాని ముజాల, జాయ్ఆతి నాను మనివలె మీరు నజీ ఇస్టం ఆని వజ నడిఃదు. సీకటుదు నడిఃనికాన్ వాండ్రు ఎంబె సాన్సినాండ్రె ఇజి వాండ్రు నెన్ఎన్.

36 అందెజె మీరు జాయ్దు బత్సినాని నా కొండోర్ఆదెజ్, జాయి ఆతి నాను మీ వెట మనివలె నజీ నమ్మిదు. వాండ్రు యా మాటెజ్వెప్తాండ్రె వరిబాణిజ్ సాహండ్రె వరిజ్ తోర్ఏండ డాజ్జి మహాన్.

37 వాండ్రు నిసా గొప్ప బమ్మాతి పణిజ్ వరిఎద్దు కితిజ్బా యూదురు లోఇ నండొ లోకుర్ వన్నిజ్ నమిఎతార్.

38 ‘ప్రబువా మాపు వెప్తి మాటెజ్ ఎయెర్ నమ్మితార్? ఎయెర్జె దేవుణు వన్నిసత్తు తోర్స్తాన్?’, ఇజి యెసయ ప్రవక్త వెప్తి మాట పూర్తిఆని వందిజె వారు నమ్మివతార్.

39-40 యెసయ ప్రవక్త మరి ఈహు వెప్తా మనాన్, ‘వారు వరి కణకాణిజ్ తోఏండ మండ్రెజ్ దేవుణు వరి కణకు గుడిః కితాన్. వారు వరిదాన్ అర్థం కిఎండ మండ్రెజ్ దేవుణు వరి మన్నును గటి కితాన్. వరిజ్ నెగెణ్ కిదెజ్ వారు నా డగ్గు రెఎండ మండ్రెజ్ నాను అయా లెకెండ కిత’, ఇజి. అందెజె వారు యేసుజ్నీ నమ్మిదెజ్ అట్ఏండఆతార్.

41 యెసయ ఎందానిజ్ యా లెకెండ వెప్తాన్ ఇహిజ, యేసు గొప్ప పెరికాన్ ఇజి వాండ్రు నుడత మహాన్. వాండ్రు వెప్తి మాటెజ్ యేసు వందిజె వెప్పినె.

42 గాని యూదురు అదికారిజ్లోఇ నండొండార్ యేసు మున్ను నమకం ఇట్టార్. గాని పరిసయ్దు వరిజ్ ఇన్నిక కినార్ ఇజి తియెల్ ఆజి వారు యేసుజ్ నమ్మిజినాప్ ఇజి లోకుర్ ఎద్దు వెహ్ఎతార్. వరిజ్ యూదురి మీటిజ్ ఇండ్రెణిజ్ వెల్లి కినార్ ఇజి తియెల్ ఆతార్.

43 ఎందానిజ్ ఇహిజ, వారు దేవుణు వరిజ్ పొగిడిః దని మున్ను లోకుర్ వరిజ్ పొగిడిదెజ్ ఇజి నండొ కొరితార్.

44 మరి యేసు ఈహు డటం వెప్పినాన్, “నా మున్ను నమకం ఇడ్డికాన్ ఎయెన్బా నజినె ఆఎండ, నజీ పొక్తివన్నిజ్బా నమ్మిజినాన్.

45 నజీ సుడఃజినికాన్ ఎయెన్బా నజీ పొక్తి వన్నిజ్బా సుడఃజినాన్.

46 నజీ నమ్మినికాన్ ఎయెన్బా సీకట్దు బత్సినాండ మంజిని వందిజ్ నాను జాయి లెకెండ లోకమ్దు వాత మన్ను.

47 నా మాటెజ్ వెంజి అయావజ కిఇవన్నిజ్, తీర్పు సీజినాను సిక్స సివి. ఎందానిజ్ ఇహిజ, ఆహా తీర్పు సీజి సిక్స సిదెజ్ ఆవిద్ నాను అయా లోకమ్దాన్ వాతిక. గాని లోకురిజ్ రక్సిన్ని వందిజె వాత.

48 నజీ నెక్కి పొక్కి నా మాటెజ్ వజ కిఇవన్నిజ్, వాండ్రు కిఇకాదె వన్నిజ్ ఎలాకాలం మన్ని సిక్స సీనాద్. నాను వెప్తి మాటెజ్నె ఆకార్ దినమ్దు నాను మర్జి వానివలె వన్నిజ్ తీర్పు సీనాద్.

49 ఎందనిజ్ ఇహిజ, నాను నా సొంత అతికారమ్దాన్ వెప్తిక ఆవిద్. గాని నజీ పొక్కి నా బుబ్బనె, నాను ఇన్నిక వెప్తాజ్, ఎలాగ వెప్తాజ్ ఇజి ఆడ్ర సిత మనాన్.

50 వాండ్రు వెప్తి ఆడ్రెజ్ లోజిజినికాన్ ఎలాకాలం బత్సినాన్. అందెజె నా బుబ్బ నజీ వెహ్ఆ ఇజి వెప్తికెజ్నె నాను వెప్పిన.

## 13

### యేసు వన్నిసినూరిజ్ పాదమ్కు నొర్జినాన్

1 నస్తివలె, పస్కు పండొయ్ కిని ముజాహి దినం. యా లోకం డిఃసి బుబ్బ డగ్గు సాండ్రెజ్ టయం ఆతాద్ ఇజి యేసు నెస్తాన్. వాండ్రు ఎన్నివలెబా వన్ని మున్ను నమకం ఇడ్డివరిజ్ ప్రేమిసి మహాన్. వాండ్రు సానిదాక ప్రేమిసినె మహాన్.

2 యేసుని వన్ని సినూరు పొదొయ్ బోజనమ్దిజ్ బస్ట మహాన్. సిమొను మరిసి ఆతి ఇస్కరియొతు యూద మన్నుదు నయ్నూను ముజాలె ఉండ్రె ఆలోసన పుటిస్త మహాన్, యేసుజ్ సెఇవరి కిదు ఒపజెప్తెజ్ ఇజి.

3 బుబ్బ వన్నిజ్ విజి దనిమున్ను అతికారం ఒపజెప్త మహాన్, ఇజి యేసు నెస్తాన్. వాండ్రు దేవుణుబాణిజ్ వాత మహాన్, దేవుణుడగ్గు సొప్పినాన్ ఇజిబా నెస్తాన్.

4 అందెజె వాండ్రు బీజనమ్దిజ్ బస్టి మహిబాణిజ్ నిజితాండ్రె, వాండ్రు పిడఃగితి మన్ని సాల్వ లాగితాండ్రె ఉండ్రె తువాలు నడుముదు తొహా ఆతాన్.

5 తోవ్హొండ్రె, ఉండ్రె పల్లెమ్మదు ఏరు వాక్తాండ్రె వన్ని సిసూర్ పాదమ్కు నొరజి వన్ని నడుముదు తోహొతి మహి తువాలదాన్ వరి పాదమ్కు తేల్జినాన్.

6 ఆహ, వాండ్రు సిమొను పెతురుడగ్రు వాతివలె, వాండ్రు, “ప్రబువా, నీను నా పాదమ్కు నొరదెజ్ సుడజినిదా?”, ఇజి వెన్బాతాన్.

7 అందెజె యేసు, “నాను ఇనిక కిజిన ఇజి ఏలు నీను నెన్ఇ గాని వెనుక నీను అర్దం నెస్సిలె”, ఇజి వన్నిజ్ వెవ్హాన్.

8 అయావలె పేతురు, “సిల్లె, నీను నా పాదమ్కు ఎసెజ్బా నొరదెజ్ ఆవద్”, ఇజి వెవ్హాన్. దనిజ్యేసు, “నాను నీ పాదమ్కు నొరెండమహిజ, నీను నా సిసూడు ఆఇ”, ఇజి వెవ్హాన్.

9 అయావలె సిమోన్ పేతురు, “అహిజ ప్రబువా, నా పాదమ్కునె ఆవెండ నా కికు, నా బుర్బా నొరఅ”, ఇజి వెవ్హాన్.

10 అందెజె యేసు, “ఏరుఈబతి వన్నిజ్ వన్నిఒడొల్ విజు నొరదెజ్ అవసరం సిల్లెద్. వన్ని పాదమ్కునె నొరదెజ్. ఎందానిజ్ ఇహిజ, పాదమ్కునె వెటనె డుల్లిఆనె. నా సిసూర్ ఆత్తి మీరు విజిదెరె సుబ్రం ఆతిదెర్. గాని ఒరెన్ ఆవన్”, ఇజి వెవ్హాన్.

11 వన్నిజ్సెఇవరి కీదు ఒపజెప్పికాన్ ఎయెన్ ఇజి వాండ్రు నెసి మహాన్. అందెజె ‘మీరు విజెరె సుబ్రం ఆత్తికిదెర్ ఆఇదెర్’, ఇజి వాండ్రు వెవ్హాన్.

12 వరి పాదమ్కు నొరజి వీస్తి వెన్కా, వాండ్రు లాగితి ఇడ్డి వన్ని సాల్వు వ్డెగితాండ్రె, బోజనమ్దిజ్ బస్తిమహి బాడిడు సాహాన్. సాహాండ్రె వాండ్రు వరిజ్ వెన్బాజినాన్, “నాను ఏలు మిజి కితిపణిది అర్దం మిజి తెలినాదా?”

13 మీరు నజి కూక్కివలె, ‘ఓ బోదకినికి’ ఇజినో, ‘ఓ ప్రబువా’ ఇజినో కూక్సినిదెర్. నాను బోదకినికానె. ప్రబునె. అందెజె మీరు కూక్కినిక తప్ప సిల్లెద్.

14 ఏలు మీ ప్రబు ఆతి, బోదకినికి ఆతి నాను నీ పాదమ్కు నొరత మన్ను. అందెజె మీరుబా ఒరెన్ మరి ఒరెన్ వన్ని పాదమ్కు నొరదెజ్.

15 నాను మిజి కితిలెకెండ మీరు బా కిని వందిజ్, అయా పణి ఎలాగ కిదెజ్ఇజి నాను మిజి తోరిస్త మన్ను.

16 నాను నిజం వెప్పిన, ఎమేణి పణి మన్నిసి బా వన్ని ఎజుమాని మున్ను పెరికాన్ ఆవన్. అయ లెకెండ ఎమేణి కబ్రు తనికాన్బా వన్నిజ్పోక్తి వన్ని మున్ను పెరికాన్ ఆవన్.

17 మీరు ఏలు యా నిజమాతి నజతిజ్ నెస్తిదెర్. అందెజె మీరు అయా లెకెండకితిజ మీరు గొప్ప వారు”.

**యేసు వన్నిజ్ సెఇవరికిదు ఒపజెప్పి దనివందిజ్ జర్గినిముజాలె వెప్పినాన్**

18 “మీరు పాపమ్కాణిజ్నొరె ఆత్తిదెర్ ఇజి నాను వెప్పినిక మీ విజెరె వందిజ్ ఆవద్. నాను ఏర్పాటు కితికార్ ఎలాగ మర్రికార్ఇజి నాను నెస్సు. గాని, ‘నా వెట బోజనం ఉణిజి మహికాన్నజి పడెఇకాన్ ఆతాన్’, ఇజి దేవుణు మాటదు రాస్తి మన్ని మాట పూర్తి ఆదెజ్ నాను యా లెకెండ కిత్త.

19 అయాక జర్గినివలె, నానె మెసయ ఇజి మీరు నమినివందిజె, అయాక జర్గిని ముజాల, యెలె నాను వెప్పిన.

20 నాను నిజం వెప్పిన, ఎయెన్బా నాను పొక్కివన్నిజ్డగ్రు కితిజ, వాండ్రు నజి డగ్రు కితి లెకెండ. ఎయెన్బా నజి డగ్రు కితిజ, నజి పొక్తి వన్నిజ్డగ్రు కితి లెకెండ”, ఇహాన్.

21 యేసు యాక వెప్తివలె వన్ని మన్నుదు బాద ఆతండ్రె, “నాను నిజం వెప్పిన, మీ లొఇ ఒరెన్ నజి సెఇవరి కీదు ఒపజెప్పాన్లె”, ఇజి వెవ్హాన్.

22 అయావలె వన్ని సిసూర్ ఎయెన్వందిజ్ వాండ్రు ఈహు వెవ్హాన్ ఇజి అర్దం ఆఇతిజ్ ఒరెన్ మొకొ ఒరెన్సుడె ఆఇనార్.

23 బోజనమ్దిజ్ బస్తి మహివలె, సిసూర్ లొఇ యేసు నండొ ప్రేమిస్తి సిసూ వన్ని డగ్రునె బోజనమ్దిజ్ బస్త మహాన్.

24 సిమోన్ పేతురు వన్నిజ్ సయ్న కిజి, “ఎయెన్ వందిజ్ వాండ్రు వర్గిజినాన్ఇజి వన్నిజ్ వెన్బాల”, ఇజి వెవ్హాన్.

25 అందెజె అయా సిసూడు: యేసుజ్ రోన్పె ఆజి, “ప్రబువా, వాండ్రు ఎయెన్?”, ఇజి వెన్బాతాన్.

26 అందెజె యేసు, “నాను యా రొటె ముక పులాదు ముడుక్కి ఎయెన్సీనానొ వాండ్రె నజి ఒపజెప్పికాన్”, ఇజి వెవ్హాన్. వెవ్హాండ్రె ముక పులాదు ముడుక్కి సిమొను మరిసి ఆతి ఇస్కరియొతు యుదెజ్ సిత్తాన్.

27 యూద అయా రొట్టెముక్క తిహి వెటనె నయ్తాను వన్ని లొఇ డుగితాండ్రె వన్ని మున్ను అతికారం కితాన్. అయావలె యేసు, “నీను కిదెజ్ ఒడెబిజినిక బేగి కిఅ”, ఇజి వెవ్హాన్.

28 గాని బోజనమ్దిజ్ బస్తివరి లొఇ ఎయెరిజ్బా ఎందానిజ్ యేసు ఆహ వెవ్హాన్ ఇజి అర్దం ఆవితాద్.

29 వరి కర్సువందిజ్ మన్ని డబ్బు విజు యూద కీదునె మనె. అందెజె పండొయ్దిజ్ కావాలిస్తికెజ్, సొన్ని కొల్అ ఇజిను, సిలిజ బీదాతివరిజ్ డబ్బు సిఅ ఇజి వెప్పినాన్ను ఇజి సిసూర్ సెగొండార్ ఒడిబితార్.

30 యూద ఆ రొట్టెముక్క తిహివెటనె వెల్లి సొహాన్. అక్క రెయు.

31 వాండ్రు సొహి వెన్కా యేసు ఈహు వెహ్లాన్, “లోకు మరిసి ఆతి నాను ఎసొ గొప్ప పెరికాన్ ఇజి లోకుర్ ఏలునూణార్లె. దేవుణు ఎసొ గొప్ప పెరికాన్ ఇజి నా వెట సూణార్లె.

32 దేవుణు గొప్ప పెరికాన్ ఇజి లోకు మరిసి వెట తోరె ఆతిజ, లోకు మరిసి గొప్ప పెరికాన్ ఇజి దేవుణునె తోరిస్సాన్. అయాక వెటనె తోరిస్సాన్.

33 నాను ప్రేమిస్సికిదెరా, కండెక్ నమయమ్నె నాను మీ వెట మంజిన. మీరు నజి రెబానిదెర్, గాని యూదురు అదికారిజ నాను వెహ్లా లెకెండె, “నాను సొని బాడిఃదు మీరు వాదెజ్ అట్ఇదెర్” ఇజి ఏలు మీవెట వెహ్లాన్.

34 నాను కొత్త ఆడ్ర మిజి సీజిన. మీరు ఒరెన్ మరి ఒరెన్ వన్ని వెట ప్రేమిస్అ, ఇజి. నాను మిజి ప్రేమిస్తిలెకెండె మీరు బా ఒరెన్ వన్ని వెట ఒరెన్ ప్రేమిస్లెజ్వలె.

35 మీరు ఒరెన్ వన్ని వెట ఒరెన్ ప్రేమిస్తిజ, మీరు నా సిసూర్ ఇజి లోకుర్ విజెరె నెస్సార్.

36 అయావలె సిమోన్ పేతురు, “ప్రబువా, నీను ఎంబె సొన్సిని?”, ఇజి వెన్బాతాన్. వెన్బాతిజ్ యేసు, “నాను ఏలు సొని బాడిఃదు నీను ఏలు వాదెజ్అట్ఇ. గాని వెన్కా వానిలె”, ఇజి వెహ్లాన్

37 అందెజె పేతురు, “ప్రబువా, ఎందానిజ్ నాను ఏలు మీ వెట వాదెజ్ అట్ఇ. నీ వందిజ్ సాదెజ్బా నాను తయార్నె”, ఇజి వెహ్లాన్.

38 అందెజె యేసు, “నా వందిజ్ సాదెజ్బా నీను నిజం తయార్నెనా? కొరు కెరెని ముజాలె, ‘నీను నజి నెన్ఏ’ ఇజి ముసార్ వెహ్లాన్”, ఇజి వెహ్లాన్.

## 14

### యేసు వన్ని సిసూరిజ్ దయరం సీజినాన్

1 యేసు మరిబా వన్ని సిసూరిజ్ వెహ్లానాన్, “మీ మన్సుదు తియెల్ ఆజి బాద ఆమాట్. దేవుణు మున్సు నమకం ఇడ్డిదెర్. నా మున్సుబా నమకం ఇడ్డిఃదు.

2 పరలోకమ్దు నా బుబ్బ ఇంత్రో నండొ గదిజ్మనె. అయ లెకెండె సిల్లెండె మహిజ, నాను మిజి వెహ్లా మరి. మిజి ఉండ్రీ బాడిః తయార్కిదెజ్ నాను అబ్బె సొన్నిన.

3 నాను సొన్ని మిజి ఉండ్రీ బాడ్డి తయార్ కితి వెనుక, నాను మర్జివాజి నావెట నాను మంజినిబాన్ మీరుబా మండ్రెజ్, కూక్కు ఒనాలె.

4 నాను సొన్నిని బాడిఃదు సొండ్రెజ్ సరి మీరు నెస్సిదెర్”, ఇజి వెహ్లాన్.

### బుబ్బడగ్రు సొండ్రెజ్ నానెసరి ఇజి వెహ్లానాన్

5 అయావలె తోమా వన్నిజ్, “ప్రబువా, నీను ఎంబె సొన్నిని ఇజి మాపు నెన్ఏవ్. అందెజె సరి మాపు ఎలాగ నెస్టెజ్ అనావ్?”, ఇజి వెహ్లాన్.

6 అందెజె యేసు వన్నిజ్, “నానె బుబ్బ డగ్రు సొండ్రెజ్ సరి. నానె బుబ్బ వందిజ్ నిజమాతికెజ్ తోరిసి నెన్పిస్సాన్. నానె ఎలాకాలం దేవుణు వెట బత్కిని బత్కు సీనికాన్. నా వెటనె లోకుర్ విజెరె బుబ్బడగ్రు సొనార్.

7 నాను ఎయెన్ ఇజి మీరు నెస్తి మహిదెర్ఇహిజ, నా బుబ్బ ఎయెన్ఇజిబా మీరు నెస్తిదెర్మరి. ఏలుదాన్ మీరు వన్నిజ్నెస్తి మనిదెర్, సుడిఃతి మనిదెర్”, ఇజి వెహ్లాన్.

8 నస్తివలె పిలిపు, “ప్రబువా, బుబ్బెజ్ మజి తోరిస్అ. ఆకాదె మజి సాలు”, ఇజి వన్నిజ్ వెహ్లాన్.

9 అందెజె యేసు వన్నిజ్, నాను నిసొ కాలం మీ వెట మహ. మహిజ్బా నీను నజి నెన్ఇదా పిలిపు? నజి సుడిఃతికాన్ ఎయెన్బా నా బుబ్బెజ్ సుడిఃత మనాన్. అయావలె బుబ్బెజ్మజి తోరిస్అ ఇజి ఎలాగ నీను వెహ్లాజ్ అట్సిని?

10 నాను నా బుబ్బ వెట కూడిఃత మన. బుబ్బ నా వెట కూడిఃత మనాన్ ఇజి నీను నమ్ఇదా? నాను మీ వెట వెహ్లాని మాటెజ్నా సొంత మాటెజ్ ఆఱ. గాని నా వెటకూడిఃతి మన్ని బుబ్బ బాణిజ్వాతికెజె అయాకెజ్. వాండ్రు వన్ని పణిజ్ నావెట కిబిసినాన్.

11 నాను నా బుబ్బ వెట కూడిఃత మన, బుబ్బ నా వెట కూడిఃత మనాన్ ఇజి నాను వెహ్లానిక మీరు నమ్మిదు. సిలిజ, నాను కిజిని విజి బమ్మ ఆని పణిజి సుడిఃజి అయాక నమ్మిదు.

12 నాను నా బుబ్బ డగ్రు సొన్నిన. అందెజె నజి నిజం నమ్మితికాన్, నాను కిజిని బమ్మ ఆని పణిజ్ వాండ్రు బా కినాన్. ఒబ, దనిజ్ఇంక లావు పణిజ్ వాండ్రు కినాన్ ఇజి మీ వెట నిజం ఇక వెహ్లాన్.

13 నా ఇష్టమేదిగ్గి కూడితి మన్ని ఇనికబా మీరు లొస్తిజ, నాను అయాక కిన. బుబ్బ గొప్ప పెరికాన్ ఇజి లోకురిజ్ తోరిస్తిజె, మరిసి ఆతి నాను అయాక కిన.

14 నా ఇష్టమేదిగ్గి కూడితి మన్ని ఇనికబా మీరు లొస్తిజ, నాను అయాక కిన.

15 మీరు నజి ప్రేమిస్తిజ, నా ఆడ్రెజ్ మీరు వెనిదెర్.

16 నాను బుబ్బెజ్ లొస్తి. మీ వెట ఎలాకాలం మండ్రెజ్ మరి ఒరెన్ తోడుః మంజిని వన్నిజ్ బుబ్బ మిజి సీనాన్.

17 వాండ్రు దేవుణు బాణిజ్ నిజమాతికెజ్ వెహ్నిని దేవుణు ఆత్తు. క్రీస్తుజ్ నమ్మిఇకార్ ఒరెన్ తోడుః మంజిని వన్ని వజి వన్నిజ్ డగ్గు కిదెజ్ అట్విర్. ఎందనిజ్ ఇహిజ, వారు వన్నిజ్ రెబావిర్. వన్నిజ్ నెస్ఎర్. గాని మీరు వన్నిజ్ నెస్సిదెర్. ఎందానిజ్ ఇహిజ, వాండ్రు మీ వెట మంజినాన్. మీ లొఇ మంజినాన్.

18 నాను మిజి డిఃసి సొనివలె, మిజి దిక్కు సిలి వరి లెకెండ్డిఃన్ఎ. నాను మర్జి మీ డగ్గు వానాలె.

19 సెగం కాలం వెన్కా, నజి నమ్మిఇకార్ నజి మరి తోఎర్లె. గాని మీరు నజి నూణిదెర్. నాను బత్తిజిన. అందెజె మీరుబా బత్తినిదెర్.

20 నాను నా బుబ్బవెట కూడిత మన్ను, మీరు నా వెట కూడితి మనిదెర్. నాను మీ వెట కూడిత మన ఇజి దేవుణు ఆత్తు మీ నడిఃమి మండ్రెజ్ వాని దినమ్దు మీరు నెస్సిదెర్లె.

21 నా ఆడ్రెజ్ వెంజి అయావజి కినికానె నజి ప్రేమిస్తికాన్. నజి ప్రేమిస్తి వన్నిజ్ నా బుబ్బ ప్రేమిస్సాన్. నాను వన్నిజ్ ప్రేమిసి వన్నిజ్ తోరె ఆన”, ఇజి యేసువెహ్తాన్.

22 నస్తివలె ఇస్కరియొతు యూద ఆఇ మరి ఒరెన్యుద, “ప్రబువా నీను లోకురిజ్ విజెరిజ్ తోరెఆవిండ, ఎలాగ నీను మజి తోరె ఆనిలె?”, ఇజి వెన్బాతాన్.

23 అందెజె యేసు, “ఒరెన్ నజి ప్రేమిస్తిజ, వాండ్రు నా మాటెజ్ వినాన్. అయావలె నా బుబ్బ వన్నిజ్ ప్రేమిస్సాన్. నా బుబ్బని నాను వన్నిడగ్గు వాజి వన్నివెట మంజినావ్.

24 నజి ప్రేమిస్తికాన్, నా మాటెజ్ వినవ్. మీరు వెంజిని యా మాటెజ్ నా సొంత మాటెజ్ ఆఉ. నజి పొక్తి నా బుబ్బవినె.

25 నాను మీవెట మంజినె యా మాటెజ్ వెహ్తా మన్ను.

26 నా బుబ్బ, నా బదులు తోడుః మంజిని వన్నిజ్ ఇహిజ, దేవుణు ఆత్తుదిజ్ పొక్తివెలె, వాండ్రు మిజి దేవుణు వందిజ్ విజు నజతిజ్ నెస్పిస్సాన్. నాను మిజి వెహ్తా విజు వన్కాజ్ ఎత్తు కిబిసి మంజినాన్.

27 నాను మిజి డిఃసి సొన్సిన. గాని మీరు సమాదనమ్దాన్ మంజినిదెర్లె. అయా సమాదనం నా బాణిజ్ వాజినాద్. నజి నమ్మిఇ లోకురిజ్ మన్ని సమాదనం ననికాద్ ఆవిదనా బాణిజ్ వాజినకాద్. మీ మన్నుదు విసారిసి బాద ఆమాట్. మీరు తియెల్ ఆమాట్.

28 ‘నాను సొన్సిన. మర్జి మీ డగ్గు వానాలె’, ఇజి నాను వెహ్తా మాట మీరు విహిదెర్. నా బుబ్బ నజి ఇంక పెరికాన్. అందెజె మీరు నజి నిజం ప్రేమిస్తిజ, వీండ్రు బుబ్బ డగ్గు సొన్సినాన్ ఇజి సర్ద ఆజినిదెర్.

29 యాకెజ్ జగ్గినివలె, నాను వెహ్తాకెజ్ నిజం ఇజి మీరు నమ్మిని వందిజె, అయాకెజ్ జగ్గిని ముజాల, ఇయేలె నాను మిజి వెహ్తా మన్ను.

30 మరి నండొ సమయం మీ వెట వగ్గిదెజ్ నాను అట్విలె. ఎందానిజ్ ఇహిజ, యా లోకమ్ది అతికారి ఆతి సయ్తాను వాజినాన్. నా మున్ను వన్నిజ్ ఇన్ని అతికారం సిల్లెద్.

31 గాని, నాను నా బుబ్బెజ్ ప్రేమిస్తి. అందెజె వాండ్రు వెహ్నినికెజ్ విజు అయావజి నాను కిజిన ఇజి లోకమ్దికార్ నెస్తిజెవలె. రదు, ఇబ్బెణిజ్ సొనాట్”, ఇజి వెహ్తాన్.

## 15

1 నాను నిజమాతి ద్రాక్కుబడ్డుదిజ్ మొదొల్. నా బుబ్బ పణికినికాన్.

2 నా వెట కూడితి మన్ని పట్టు అన్ఇ విజు కొనెజ్ వాండ్రు కత్నాన్. పట్టుఅన్ని విజు కొనెజ్, మరి నండొ పట్టు అస్సివందిజ్ తెహ్సాన్.

3 నాను మీవెట వెహ్తా మాటెజ్, మీ పాపమ్కాణిజ్ సుబ్బరం కిత్తె మనె.

4 నాను మీ వెట కూడిఃజి మంజినిలెకెండ్ మీరు నా వెట కూడిఃజినె మండ్రు. ఇన్ని కొనెజ్ బా బడ్డుదు మన్విండ మహిజ, అవి పట్టు అన్ఉ. పట్టు అస్తిజ్ ఇహిజ, అవి బడ్డుదు మండ్రెజ్ వలె. అయాలెకెండ్, నావెట కూడిఃజి మహిజనె, మీరు పట్టు అస్సిదెర్.

5 నాను ద్రాక్షబడ్డఉదిజ్ మొదొల్. మీరు కొనెజ్. ఎయెన్బా నా వెట కూడఃజి మంజి, నాను వన్ని వెట కూడఃతి మహిజ, వాండ్రు నండొ పట్టు అస్నాన్. నాను సిల్లెండ, నజి ఇన్దం ఆతి నెగ్గెజ్ ఇనికెజ్బా మీరు కిదెజ్ అట్ఇదెర్.

6 వెల్లి విస్తిరి ఉండ్రొ కొన వస్తా లెకెండ, నా వెట కూడఃజి మన్ఇకాన్మనాన్. వాండ్రు వెల్లి ఆజి వహ్నాన్. నన్ని కొనెజ, లోకుర్ కుంబ కిజి సుర్నార్. ఆకెజ్ వెయ్నె.

7 మీరు నావెట కూడఃజినె మంజి నాను వెప్తాక మీ లొఇ మహిజ, ఇనికబా మీరు దేవుణుదిజ్ లొస్తు. వాండ్రు అయాక మిజి సీనాన్.

8 మీరు నండొ పట్టు అసి అహా నా సిసూర్ఇజి తోరె ఆతిజ, నా బుబ్బు గొప్ప పెరికాన్ ఇజి లోకురిజ్ తోరిసినిదెర్.

9 నా బుబ్బు నజి ప్రేమిన్ని లెకెండ, నాను మిజి ప్రేమిన్ను. నాను మిజి ప్రేమిన్ని వందిజ్, నా వెట కూడఃజినె మండ్రు.

10 నాను నా బుబ్బు వెప్తా ఆడ్రెజ్లోజిత మన. వాండ్రు నజి ప్రేమిస్నాన్. అయాలెకెండ మీరు నాను వెప్తా ఆడ్రెజ్లోజితజి, నాను మిజి ప్రేమిసినె మంజిన.

11 నజి మన్ని సర్ద మిజి బా మండ్రెజ్, మీ సర్ద పూర్తి ఆదెజ్, ముజాలె వెప్తా యా మటెజ్నాను మిజి వెప్తా మన్ను.

12 నాను మిజి ప్రేమిసివజ, మీరు ఒరెన్ వన్ని వెట ఒరెన్ ప్రేమిసి మండ్రు ఇజినె నా ఆడ్ర.

13 ఒరెన్ వన్ని కూలెజి వందిజ్ వన్ని సొంత పాణం సీనికాదె నండొ ప్రేమ. దిని ఇంక మిస్తి మరి ప్రేమ సిల్లెద్.

14 నాను ఆడ్ర సీతిక మీరు కితిజ, మీరు నా కూలెజె.

15 ఒరెన్ పణికినికాన్, వన్ని ఎజుమాని కిని పణిజ్ నెన్ఎన్. అందెజె నాను మరి ఎసెజ్ మిజి పణికినికార్ ఇజి కూక్ఏ, గాని కూలెజ్ ఇజి కూక్ మన. ఎందనిజ్ ఇహిజ, నాను నా బుబ్బు బాణిజ్ విహికెజ్ విజు మిజి వెప్తా మన్ను.

16 మీరు నజి ఏర్పాటు కిఇదెర్. గాని నాను మిజి ఏర్పాటు కిత్త. పట్టు అస్సివజ, మీరు సొన్ని లోకురిజ్ సువార్త వెప్పా దేవుణు దరొట్ మప్పా తని వందిజె నాను మిజి ఏర్పాటు కితానె పోక్కిన. మీరు అస్తి పట్టు ఎలాకాలం మంజినాద్. అయావలె మీరు నా ఇన్దమ్దిజ్ కూడితి మన్ని ఇనికబా బుబ్బెజ్ లొస్తిజ, వాండ్రు సీనాన్.

17 మీరు ఒరెన్ వన్నివెట ఒరెన్ ప్రేమిస్టెజ్ ఇజినె నాను సీజని ఆడ్ర.

18 యా లోకమ్దు మన్ని దేవుణుదిజ్ దూసిస్సికార్, మిజి దూసిస్తిజ, మీరు ఒడిబిదు వారు మిజి దూసిస్సి ముజాలె నజి దూసిస్టార్ ఇజి.

19 మీరు యా లోకమ్దు మన్ని దేవుణుదిజ్ దూసిస్సి పరిలోఇ మన్నికిదెర్ ఇహిజ, వరి సొంత లోకుర్వజ వారు మిజి ప్రేమిస్టార్ మరి. గాని నాను పరి లెకెండ మీరు మన్ఎండ, మిజి ఎర్లిస్త. అయావలె, మీరు పరి లొఇ మన్నికిదెర్ ఆఇదెర్. అందెజె వారు మిజి దూసిసినార్.

20 ఎమేణి పణిమణిసిబా వన్ని ఎజుమాని మున్ను పెరికాన్ ఆవన్\*, ఇజి నాను వెప్తా మాట మీరు ఎత్తు కిదు. వారు నజి హిమ్మెజ్ కితార్ ఇహిజ, మిజి బా హిమ్మెజ్ కినార్. వారు నా మాటెజ్ లొజెతార్ ఇహిజ, మీ మాటెజ్బా లొజెనార్.

21 మీరు నజి నమ్మితి వందిజ్ వారు యా లెకెండ విజు మిజి కినార్. ఎందానిజ్ ఇహిజ, వారు నజి పొక్తి వన్నిజ్ నెన్ఎర్.

22 నాను వాజి దేవుణు వందిజ్ నిజమాతికెజ్ పరిజ్ వెహ్ఎండ మంజినక ఇహిజ, వారు పాపమ్కు కితార్ ఇజి దేవుణు పరిజ్ సుడఃవెతాన్ మరి. అహిజ, ఏలు వారు పరి పాపమ్కాణిజ్ తప్తె ఆదెజ్ అట్ఎర్. ఎందానిజ్ ఇహిజ, నాను పరిజ్ వెప్తా మన్ను.

23 నజి దూసిస్సికాన్నా బుబ్బెజ్ దూసిసినాన్.

24 ఎయెన్బా కిఇ బమ్మాని పణిజ్ నాను పరి నడిమి కిఎండ మంజినక ఇహిజ, వారు పాపమ్కు కితార్ ఇజి దేవుణు పరిజ్ సుడఃవెతాన్ మరి. గాని ఏలు వారు యా బమ్మ అని పణిజ్ సుడఃత మనార్. అహిజ్బా, నజి ని నా బుబ్బెజ్ వారు దూసిస్త మనార్.

25 'ఇని కారణంబా సిల్లెండ వారు నజి దూసిస్టార్', ఇజి దేవుణు మాటదు రాస్తి మన్ని మాట పూర్తి అదెజె యా లెకెండ వారు కిజినార్.

26 నాను మీ డగ్రు తోడుః మంజని వన్నిజ్ ఇహిజ, దేవుణుబాణిజ్ నిజమాతికెజ్ వెప్పా తోరిస్సి దేవుణు ఆత్మెజ్ పొక్కు. వాండ్రు బుబ్బు బాణిజ్ మీ డగ్రు వానాన్. అయావలె నా వందిజ్ విజు వాండ్రు వెహ్నాన్.

27 నాను సేవ మొదొల్స్తి బాణిజ్ మీరు నావెట మనిదెర్. అందెజె మీరు బా నా వందిజ్ విజెరిజ్ వెహ్నాజ్వలె.

## 16

1 "మిజి ఇమ్సెజ్ కినివలె, మీరు నమకం దాన్డిఃస్ఎండ మంజని వందిజె, మిజి దూసిస్సికార్ కిని సజతిజ వందిజ్ నాను వెప్తా.

\* 15:20 15:20 13:16 సుడఃదు

2 వారు మిజి యూదురి మీటిజ్ ఇల్లాణిజ్ వెల్లి కినార్. మిజి సప్పికాన్ ఎయెన్ బా, వాండ్రు దేవుణుదిజ్ సర్ద కిజిన ఇజి ఒడిబిని కాలం వాజినె.

3 వారు నన్నికెజ్ కినార్. ఎందనిజ్ ఇహిజ, బుబ్బెజ్ నొ నజీనొ నెన్ ఏర్.

4 అయ కాలం వానివలె, నాను దినివందిజ్ వెప్తా మన ఇజి మీరు ఎత్తుకిని వందిజ్ నాను యాక మీ వెట వెప్తా మన. నాను యాకెజ్ ముజాలె మిజి వెప్తాజ్ సిలె. ఎందనిజ్ ఇహిజ, నాను మీవెట మహా”.

### దేవుణు ఆత్మ కిని పణిజ్

5 “ఏలు నాను నజి పోక్తి వన్ని డగ్రు సొస్సిన. గాని మీ లొఇ ఎయెన్ బా, ‘నీను ఎంబె సొస్సిని?’, ఇజి నజి వెన్ బా ఇదెర్”.

6 నాను యా సజతిజ్ మిజి వెప్తా మనిజ్, మీ మన్సుసు దుకమ్ దాన్ నిండ్రిత మనాద్.

7 గాని నాను నిజం మీ వెట వెప్సిన, మిజి మేలు వాని వందిజ్ నాను సొస్సిన. నాను సొన్ ఏండ మహిజ, తోడుః మంజనికాన్ మీ డగ్రు రెవెన్. గాని నాను సొహిజ, నాను వన్నిజ్ మీ డగ్రు పోక్కు.

8 వాండ్రు వాజి, దేవుణుదిజ్ నమ్మిఇవరిజ్ పాపం ఇహిజ ఇన్నిక ఇజి, నాను నీతి నిజాయితి మన్నికాన్ ఇజి, దేవుణు సీని ఎలాకాలం మన్ని సిక్ ఇన్నిక ఇజి కసితం వెప్సొ తోరిస్సాన్.

9 వారు పాపం కిత్తమనార్ ఇజి వాండ్రు కసితం వెప్సొ తోరిస్సాన్. ఎందనిజ్ ఇహిజ, వారు నజి నమ్మి ఏర్.

10 నాను నీతి నిజాయితి మన్నికాన్ ఇజి వాండ్రు కసితం వెప్సొ తోరిస్సాన్. ఎందనిజ్ ఇహిజ, నాను నా బుబ్బ డగ్రు సొన్ సిన. మీరు నజి మరి తొఇదెర్.

11 దేవుణు సీని ఎలాకాలం మన్ని సిక్ ఇన్నిక ఇజి వరిజ్ కసితం వెప్సొ తోరిస్సాన్. ఎందనిజ్ ఇహిజ, దేవుణుదిజ్ నమిఇ వరి మున్సు అతికారం కిని సయ్ తానుజ్, దేవుణు ఎలాకాలం మన్ని సిక్ సిత్తమనాన్.

12 ‘నజి మరి నంఠొ మిజి వెప్తాజ్ మనాద్, గాని ఏలు మీరు నసొ అర్దం కిదెజ్ అట్ ఇదెర్.

13 గాని దేవుణు వందిజ్ నిజమాతికెజ్ నెన్ పిస్సి దేవుణు ఆత్మ వానివలె, వాండ్రు దేవుణు బాణిజ్ వాజిని విజు నిజమాతికెజ్ మీరు నెప్తాజ్ మిజి నడిపెసినాన్. వాండ్రు వన్ని సొంతదిక ఇనికబా వెహ్ ఎన్. గాని బుబ్బ వెప్సొనికెజ్ వెంజి మిజి వెప్సాన్. వాండ్రు జర్గిని వన్కాజ్ వందిజ్ మిజి వెప్సాన్.

14 నాను వెప్సొని నిజమాతికెజ్ వెంజి, అయాక మిజి వెప్సాన్. అయ లెకెండ్ నాను గొప్ప పెరికాన్ ఇజి మిజి తోరిస్సాన్.

15 బుబ్బెజ్ మన్నికెజ్ విజు నాదినె. అందెజె నాను వెప్తా, నాను వెప్సొని నిజమాతికెజ్ వాండ్రు వెంజి, అయాక మిజి వెప్సాన్ ఇజి.

16 సెగం రొస్కు వెన్కా, నాను సొన. మీరు నజి మరి తొఇదెర్. మరి సెగం రొస్కు వెన్కా, మీరు నజి సూణిదెర్”.

17 వన్ని సిసూర్ లొఇ సెగొండార్ ఒరెన్ వెట ఒరెన్ ఈహు వెప్తాన్, “సెగం కాలం వెన్కా మీరు నజి తొఇదెర్. మరి సెగం కాలం వెన్కా మీరు నజి సూణిదెర్. నాను నా బుబ్బ డగ్రు సొన్ సిన. అందెజె మీరు నజి తొఇదెర్”, ఇజి వాండ్రు వెప్సొని తర్దం అర్దం ఇనిక? ఇజి.

18 “‘సెగం కాలం’ ఇజి వాండ్రు వెప్సొని దని అర్దం ఇన్నిక? వాండ్రు వెప్సొని దనిజ్ మజి అర్దం రెవెండ ఆజినాద్”, ఇజి మరి వర్గిజినె మహార్.

19 దినివందిజ్ వారు వన్నిజ్ వెన్ బాదెజ్ కోరిజినార్ ఇజి యేసు నెస్తాండ్రె, ఈహు వరిజ్ వెప్సొనాన్, “సెగం కాలం వెన్కా మీరు నజి తొఇదెర్. మరి సెగం కాలం వెన్కా మీరు నజి సూణిదెర్’, ఇజి నాను వెప్తా దని అర్దం ఇన్నిక ఇజినా మీరు ఒరెన్ దిజ్ ఒరెన్ వెన్ బాజినిదెర్?

20 మీరు దుకం కిజి అడఃబానిదెర్ గాని దేవుణుదిజ్ దూసిస్సికార్ సర్ద ఆనార్. మీరు దుకం కినిదెర్ గాని మీ దుకం వెనుక సర్దమనాద్ ఇజి నాను మీ వెట నిజం వెప్సొన.

21 ఉండ్రె బోదెలి ఏరుఈబదెజ్ నొపిదిజ్ అడఃబానాద్. ఎందనిజ్ ఇహిజ, దనిజ్ నెగెండ్ ఆదెజ్ కాలం ఆతాద్. గాని దన్నికొణొ పుట్టిజ, లోకమ్ దు ఒరెన్ పుట్టాన్ ఇజి సర్దదాన్ అయా బాదెజ్ అది ఎత్తు కివెద్.

22 అయాలెకెండ్ మిజి బా. మీరు ఏలు దుకం ఆనిదెర్. గాని నాను మర్జి వానివలె మిజి మరి సూణ. అయావలె మీరు సర్ద ఆనిదెర్. అయా సర్ద ఎయెన్ బా మీ బాణిజ్ లాగ్ దెజ్ అట్ ఏన్.

23 నాను నిజితి సొహి వెన్కా, మీరు ఇనికబా నెప్తాజ్ నజి వెన్ బా ఇదెర్. ఎందనిజ్ ఇహిజ, దేవుణు ఆత్మ మిజి నెన్ పిస్సాన్. నా ఇస్టమ్ దిజ్ కూడితి మన్నికెజ్ ఇన్నికబా మీరు బుబ్బెజ్ లొస్తిజ, వాండ్రు అయాక సీనాన్, ఇజి నాను నిజం మీ వెట వెప్సొన.

24 ఏలుదాక నా ఇస్టమ్ దిజ్ కూడితి మన్నికెజ్ ఇన్నికబా లొన్ ఇతిదెర్. మీ సర్ద పూర్తి ఆని వందిజ్ లొస్టు. మిజి దొప్కానాద్.

25 నాను మిజీ కతవజ యా సజతిజ్ నెన్ పిస్త మన. గాని కతవజ నెన్ పిన్ ఏండ, బుబ్బు వందిజ్ మిజీ టెట అర్దం అనిలెకెండ్ వెప్పి కాలం వాజినాద్.

26 అయా కాలమ్ దు, నా ఇస్టమ్ దిజ్ కూడితి మన్నికెజ్ మీరు లొస్సిదెర్. మీరు లొస్తికెజ్ వరిజ్ సిఅ ఇజి బుబ్బెజ్ వెహ్న ఇజి నాను వెహ్న.

27 ఎందానిజ్ ఇహిజ, బుబ్బునె మిజీ నండో ప్రేమిస్సాన్. మీరు నజీ ప్రేమిస్సిదెర్. నాను బుబ్బు బాణిజ్ వాత ఇజి మీరు నమిజినిదెర్. అందెజె వాండ్రు మిజీ నండో ప్రేమిస్సాన్.

28 నాను బుబ్బు బాణిజె యా లోకమ్ దు వాత. ఏలు నాను యా లోకం డిసి మర్జి బుబ్బు డగ్రు సొస్సిన”.

29 నస్తివలె వన్ని సిసూర్, “ఇదిలో, వానివలె నీను కత లెకెండ్ ఆవండ, అర్దం అని లెకెండ్ వెప్పిని.

30 నీను విజు నెస్సికి ఇజి ఏలు మాపు నెసినాప్. ఎయెర్ బా నిజి వెన్ బా ఎండ ముజాలె, వారు ఒండేబిజినికెజ్ నీను నెసిన ఇజి మాపు నెసినాప్. అందెజె నీను దేవుణు బణిజ్ వాతికి ఇజి మాపు నమ్మిజినాప్”, ఇజి వెహ్నర్.

31 అందెజె యేసు, “మీరు ఏలు నమిజినిదెరా?

32 ఇదిలో, మీరు మీ ఇల్కాజ్ సెద్దిజి సొని కాలం వాజినాద్. అయాక ఏలె వాత మనాద్. మీరు నజీ డిసి సొనిదెర్లె. నాను ఒరెనె ఆన. గాని నాను ఒరెనె ఆఎ. నా బుబ్బు నావెట మనాన్.

33 మీరు నా వెట కూడితి మన్నిదెర్. అందెజె మీరు సమాదనం దాన్ మండ్రెజ్ నాను యా సజతిజ్ మిజీ వెహ్న మన. యా లోకమ్ దు మిజీ కస్టమ్ కు బాదెజ్ మనె. గాని దయ్ రమ్ దాన్ మండ్రు. నాను యా లోకమ్ దు మన్ని దేవుణుదిజ్ దూసిస్సివరిజ్ గెలస్త మన్న.

## 17

### యేసు వన్నివందిజ్ పార్దనం కిజినాన్

1 యా మాటెజ్ వెప్పి వీస్తాండ్రె, యేసు ముస్సు పరలోకం దరోట్ బేసి ఈహు పార్దనం కిజినాన్. “ఓ బా, నాను సాదెజ్ నీను ఏర్ పాటుకితి కాలండ్రు ఆత మనాద్. నీను గొప్పవెరికి ఇజి నీ మరిన్ ఆత్తి నాను తోరిస్సి వందిజ్ నీ మరిన్ ఆత్తి నాను గొప్పవెరికాన్ ఇజి నీను తోరిన్ ఆ.

2 నీను నజీ సితిలోకుర్ విజెరిజ్ ఎలాకాలం దేవుణువెట బత్కినిబత్కు. నాను సీనివందిజ్, నీను లోకుర్ విజెరె ముస్సు నజీ అతికారం సిత్తి.

3 ఒరెండ్రె నిజమాతి దేవుణుఆతి నిజిని, నీను యా లోకమ్ దు షొక్తి యేసు క్రిస్తుజ్ నెస్తిజనె ఎలాకాలం దేవుణువెట బత్కినిబత్కు. మనాద్.

4 నాను కిదెజ్ ఇజి నీను నజీ సిత్తి పణివిజు నాను పూర్తి కిజి నీను గొప్పవెరికి ఇజి బూమిముస్సు. నాను తోరిస్త.

5 ఏలు ఓ బా, లోకం నీను పుటిస్సి ముజాల నివెట నాను మహివలె నజీ గవరం కితిలెకెండ్, ఏలు నీ ఎద్రు నజీ గవరం కితి.

### యేసు సిసూర్ వందిజ్ పార్దనం కిజినాన్.

6 నీను నజీ సితివరిజ్ నాను నీ వందిజ్ వెప్పి తోరిసి నెస్సిస్త. వీరు దేవుణుదిజ్ దూసిస్సి ననికార్ ఆవర్. వీరు నీ వారు. నీను వరిజ్ నజీ సితి. నీ మాటెజు వారు లొజితార్.

7 నీను నజీ సితి విజు నీబాణిజె వాతెమనె ఇజి ఏలు వారు నెస్తార్.

8 ఎందానిజ్ ఇహిజ, నీను నజీ సితి మాటెజ్ నాను వరిజ్ సిత. వారు అయకెజ్ నమ్మితార్. నాను నీ బాణిజ్ వాతికాన్ ఇజి వారు అనుమానం సిల్లెండ నెస్తార్. నీనె నజీ షొక్తి ఇజి వారు నమ్మిత మనార్.

9 నాను యా సిసూర్ వందిజ్ పార్దనం కిజిన. యా లోకమ్ ది లోకుర్ విజెరె వందిజ్ నాను పార్దనం కివి. గాని నీను నజీ సితి విరివందిజ్ పార్దనం కిజిన. ఎందానిజ్ ఇహిజ, వీరు నీ వారు.

10 నా వారు విజెరె నీ వారు. నీ వారు విజెరె నా వారు. అయలెకెండ్ వారు బత్కినారె, నాను గొప్పవెరికాన్ ఇజి వారు తోరిసినార్.

11 ఏలు నాను నీ డగ్రు వాజిన. నాను మరి యా లోకమ్ దు మన్ ఏ. గాని వీరు ఇబ్బె మంజినార్. ఓ నెగ్గి బుబ్బు, మాటు ఉండ్రె ఆతి లెకెండ్ వీరుబా ఉండ్రె ఆదెజ్, నీను నజీ సితి సత్తుదాన్ వరిజ్ కాపాడెఆ.

12 నాను యా లోకమ్ దు వరి వెట మహివలె, నీను నజీ సితి సత్తుదాన్ వరిజ్ కాపాడెత. నాను వరిజ్ నెగ్గెండ తప్పిసి మహ. వరి లోక ఎలాకాలం నాసనం ఆదెజ్ మన్నికాన్ ఆవండ, మహికార్ విజెరె ఎలాకాలం నాసనం ఆవెతార్. దేవుణు మాటదు రాస్తి మనికెజ్ పూర్తి ఆదెజ్ యాకెజ్ విజు జర్గెజ్ వలె.

13 నాను ఏలు నీ డగ్గు వాజిన. నజీ మన్ని సర్ద వరి మన్నుదుబా నిండ్రు మంజిని వందిజె, నాను యా లోకమ్దు మన్నివలెనె యా సజతిజ్ వెప్పిన.

14 నాను వరిజ్నీ మాటెజ్ సిత మన్ను. యా లోకమ్దు మన్ని దేవుణుదిజ్ దూసిస్సికార్ వరిజ్ దూసిస్తార్. ఎందానిజ్ఇహిజ, నాను లోకమ్దికాన్ ఆఇలెకెండ, వారు బా లోకమ్దికార్ ఆవర్.

15 నీను వరిజ్నీయా లోకమ్దాన్ ఒఅ ఇజి నాను పార్దనం కివి గాని సయ్యూసు బాణిజ్ వరిజ్ కాపాడేఅ ఇజినె పార్దనం కిజిన.

16 నాను లోకమ్దికాన్ఆఇలెకెండ, వారు బా లోకమ్దికార్ఆవర్.

17 నీ నిజమాతి మాటెజ్నెన్పిసి, వారు దేవుణువందిజ్ కేట ఆతిలెకెండ వరిజ్ ఇడేఅ. నీ మాటెజ్నిజమాతి మాటెజ్.

18 నీను నజీ యా లోకమ్దు పోక్తి లెకెండ, నాను వరిజ్లోకమ్దు పోక్తిన.

19 నిజమాతి మాట నెసి వారు వరిజె నీ కీదు ఒపజెప్పిని వందిజ్, నాను వరి వందిజ్నీ కీదు ఒపజెపె ఆజిన.

### యేసు దేవుణుదిజ్ నమ్మితివరిజ్ విజెరెవందిజ్ పార్దనం కిజినాన్

20-21 ఓ బా, నాను కిజిని పార్దనం వరి వందిజె ఆవి. వరి మాటెజ్ వెంజి నమ్మిదెజ్మన్ని వరిజ్విజెరె వందిజ్ నాను పార్దనం కిజిన. ఎందానిజ్ఇహిజ, నీను నా వెట కూడేజి మంజిని లెకెండ, నాను నీ వెట కూడేజి మంజిని లెకెండ వారు విజెరె ఉండ్రె ఆదెజ్. నీను నజీ పోక్తి మన్ని ఇజి లోకమ్ది లోకుర్ విజెరె నమ్మినివందిజ్ వారు మావెట కూడేజి మనీర్.

22 నాను పెరికాన్ ఇజి నీను నజీ గవరం నాను వరిజ్ సిత మన. మాటు ఉండ్రె ఆతి లెకెండ వారుబా ఒండ్రె అదెజె నాను సిత్ర.

23 వారు పూర్తి ఉండ్రె ఆనివందిజ్ నాను వరివెట కూడేత మన. నీను నా వెట కూడేతి మన్ని. నీను నజీ పోక్తి ఇజి, నీను నజీ ప్రేమిస్సి లెకెండవరిజ్బా ప్రేమిస్సి ఇజి లోకుర్విజెరె నెస్సి వందిజ్ వారు ఉండ్రె ఆదెజ్.

24 ఓ బా, నీను వరిజ్నజీ సిత. అందెజె నాను మంజిని బాన్వారుబా మండ్రెజ్ ఇజి నాను కోరిజిన. ఎందానిజ్ఇహిజ, నాను గొప్ప పెరికాన్ ఇజి నీను నజీ సిత గవరం వారు సుడేదెజె. లోకం పుటిన్విండ ముజాల, నీను నజీ ప్రేమిస్తి. అందెజె నీను నజీ అయా గవరం సిత్ర.

25 నీతి నిజాయితి మన్ని బుబ్బు, లోకమ్ది లోకుర్ నిజి నెన్వర్. గాని నాను నెస్సు. నీను నజీ పోక్తి ఇజి వీరు నెసివార్.

26 నాను వరి వెట కూడేజి మంజిని వందిజ్, నీను నజీ ప్రేమిస్తి లెకెండ, వారు బా మహివరిజ్ ప్రేమిస్సివందిజ్ నాను నీ వందిజ్ వరిజ్ నెన్పిస్త మన. నెన్పిసినె మంజిన.

## 18

### యేసుజ్ అరెస్టు కిజినార్

1 యేసు పార్దనం వీస్తి వెన్కా, వన్ని సిసూర్వెట సోతాండ్రె, కెద్రొన్ఇని జోరడాట్టి సాహాన్. అబ్బె ఉండ్రె టోట మహాద్. వాండ్రుని వన్నిసిసూర్ అయా టోటాదు సాహార్.

2 నండో సుట్టు. యేసుని వన్నిసిసూర్ అబ్బె కూడేజి మహార్. అందెజె యేసు అయా టోటాదు మంజినాన్లె ఇజి యూద నెస్సాన్. వీండ్రె యేసుజ్యుదురి అదికారిజ కీదు ఒపజెప్పికాన్.

3 అందెజె యూద అబె వాతాన్. పెరి పుజెరిజు పరిసయ్యేరు పోక్తి సెగొండార్ దేవుణు గుడిది జమాజ్ణు, మరి రోమ సయ్యనమ్ది సెగొండారిజ్బా వన్ని వెట కూక్త తత్తాన్. వారు సిసు బొద్దు, లాందెరిజు, కూణమ్కు అస్త మహార్.

4 యేసు వన్ని ముస్సు. వానికెజ్విజు నెసినె, వాండ్రు సోతాండ్రె వరిజ్, “మీరు ఎయెరిజ్ రెబానిదెర్?”, ఇజి వెన్బాతాన్.

5 దన్నిజ్ వారు, “నజరేతుది యేసుజ్”, ఇహార్. అందెజె వాండ్రు, “వాండ్రు నానె”, ఇజి వెహ్సాన్. అయావలె యేసుజ్ ఒపజెప్పి యూద వరి వెట నిహ మహాన్.

6 ‘వాండ్రు నానె’, ఇజి యేసు వరిజ్ వెహ్సావలె, వారు వెన్కా గుసె ఆజి బూమిదు అర్తార్.

7 మరి వాండ్రు వరిజ్ వెన్బాతాన్, “మీరు ఎయెరిజ్ రెబానిదెర్?”, ఇజి. “నజరేతుది యేసుజ్”, ఇహార్ వారు.

8 అందెజె యేసు, “నాను మిజి వెహ్సాగదె, వాండ్రు నానె ఇజి. మీరు నజీ రెబానిదెర్ ఇహిజ, నా సిసూర్ ఆత్తి విరిజ్ పోక్తు”, ఇజి వెహ్సాన్.

9 వారు సిసూరిజ్ పోక్తిజ్, ‘నీను నజీ సిత వరి లోఇ ఒరెన్ వన్నిజ్బా నాను పాడుకివి’ ఇజి వాండ్రు ముజాలె వెహ్సా మాటెజ్ పూర్తి ఆతె.

10 సిమోన్ పేతురు డగ్గు ఉండ్రె కూడం మహాద్. నస్తివలె వాండ్రు అయాక లాగితండ్రె, విజు పుజెరిజ ముస్సు. పెరిపుజెరి పణిమన్నిజ్ ఉణెర్గిబి కత్తాన్. అయా పణిమన్నిసి పేరు మల్కు.



11 యేసు పేతురుజ్జ్, “నీ కూడం దన్నిబరదు ఇడేఱ. నాను ఓరిస్తైజ్నా బుబ్బి ఏర్పాటుకితి స్రమెజ్ నాను ఓరిస్తైజ్అవద్ఱజి నీను ఒడేఱిజినిదా?”, ఇజి వెహ్తాన్.

### యేసుజ్అన్న ముజాల ఒసినార్

12-13 నస్తవలె రోమ సయనమదికార్, వరి అతికారి, జమానుర్ యేసుజ్ అస్తారె తోహ్కాతార్. వారు వన్నిజ్ తోహ్కాతారె, ముజాల, అన్న ఇని వన్నిడగ్గు ఒతార్. వాండ్రు అయా ఏంటు విజు పుజెరిజ ముస్కు పెరి పుజెరి ఆతి కయపెజ్ మామ్సి.

14 యా కయవనె, ‘లోకుర్విజెరె వందిజ్ ఒరెన్ సానికాదె నెగెద్’ ఇజి యూదురి అతికారిజ్ బుద్ది వెహ్తా మహాన్.

### పేతురు యేసుజ్ నెన్ఏ ఇజివెహ్సినాన్

15 సిమోన్ పేతురు ని మరి ఒరెన్సీనూ యేసు వెన్కా సాహార్. అయా సినూ, విజు పుజెరిజ ముస్కు పెరిపుజెరిజ్ నెల్వ అతికాన్. అందెజె వాండ్రు యేసువెట పెరిపుజెరి ఇండ్రోణి డేవారు సాహాన్.

16 పేతురు గవుని వెల్లి నిహమహాన్. పెరిపుజెరిజ్ నెల్వ ఆతి అయా సినూ మర్జి వాతండ్రె, గవ్నిడగ్గు నిల్పి మంజిని అయ్లిదిజ్ వెహ్తండ్రె, పేతురుజ్ లోఇ కూక్త ఒతాన్.

17 అయావలె అయా అయ్లి పేతురువెట, “నీనుబా వన్ని సినూర్లోఇ ఒరిగదె?”, ఇజి వెన్బాతాన్. దన్నిజ్వాండ్రు, “నాను ఆవ?”, ఇహాన్.

18 అయావలె గొప్ప పిని మహాద్. అందెజె అతికారిజుని పణిమన్నిసిరీసిను ఎర్సి దన్ని సుటులం నిల్పికాయ్జి మహార్. పేతురుబా వరివెట నిహండ్రె, సిను కాయ్జి మహాన్.

### పెరి పుజెరి యేసుజ్వెన్బాజినాన్

19 అయావలె, విజు పుజెరిజ ముస్కు మన్ని పెరిపుజెరి యేసుజ్ వన్నిసినూర్ వందిజ్ వాండ్రు నెన్పిస్తి బోద వందిజ్ వెన్బాజి మహాన్.

20 అందెజె యేసు, “నాను లోకుర్ విజెరె ఎద్రునె వెహ్తామన. యూదురు విజెరె కూడ్డి వాజి మంజిని, యూదురి మీటిజ్ ఇల్కాజ్ని దేవుణుగుడిఱదు ఎస్తవలెబా నేర్పిసి మహా. నాను ఇనికబా డొజసాటు వెహ్ఎత.

21 మరి ఎందానిజ్ నజీ వెన్బాజిని? నా మాట విహివరిజ్వెన్బాఅ. నాను వెహ్కెజ్వర్గితికెజ్వారు నెస్సార్”, ఇజి వెహ్తాన్.

22 యేసు యాకెజ్ వెహ్కెజ్, అబ్బె నిహిమహి అతికారిజు లోఇ ఒరెన్ యేసుజ్ ఉండ్రె లెపడెఱియితాండ్రె, “యాలెకెండ విజు పుజెరిజ ముస్కు మన్ని పెరిపుజెరిజ్ మర్జి వెహ్సినాన్?”, ఇజి వెహ్తాన్.

23 అయావలె యేసు, “నాను తపు ఇన్నిక వెహ్కెజ్, అయాక నజీ వెహ్ఎ. గాని నాను నిజం వెహ్కెజ్, ఎందనిజ్ నజీ డెఱియిజిని?”, ఇజి వెహ్తాన్.

24 అందెజె అన్న వన్నిజ్ తోహ్కా డెసనె విజు పుజెరిజ ముస్కు పెరిపుజెరి కయపడగ్గు పొక్తాన్.

### యేసుజ్ నెన్ఏ ఇజి పేతురు మరివెహ్సినాన్

25 పేతురు సిను కాయిజి నిహ మహాన్. అయావలె మహికార్వన్నిజ్, “నీనుబా వన్ని సినూర్లోఇ ఒరిగదె?”, ఇజి వెన్బాతాన్. గాని పేతురు, “నాను ఆవ?”, ఇజి కెవతాన్.

26 నస్తవలె పేతురు గిబ్బి తెవ్కతి పణిమన్నిసి బంతుకులు ఒరెన్ అబ్బె మహాన్. వాండ్రు విజు పుజెరిజ ముస్కు మన్ని పెరి పెరి పుజెరి పణిమన్నిసిర్లోఇ ఒరెన్. వాండ్రు, “నిజి వన్నివెట టోటాదు నాను సుడేఱగదె?”, ఇహాన్.

27 మరిబా, “నాను నెన్ఏ”, ఇజి వెహ్తాన్. వెటనె కొరు కెరెతాద్.

### యేసుజ్పిలాతు ముజాల ఒసినార్

28 వెన్కా యూదురు యేసుజ్ కయప బాణిజ్రోమా గవర్నరు మన్ని పెరి ఇండ్రో ఒతార్. అయావలె పెందాల్ఆతాద్. యూదురు ఆఇ వన్ని ఇండ్రో డుగ్జి మయ్ల ఆనాప్ఇజి ఒడిఱిజి వారు గవర్నరు మన్ని ఇండ్రో డుగ్జివతార్. ఎందానిజ్ఇహిజ, వారు వస్సు బోజనం ఉండెజ్నుబమ్తక మండ్రెజ్వలె. అయాక ఉండ్రె ఆసారం.

29 అందెజె గవర్నరు ఆతి పిలాతు, వెల్లి వరిడగ్గు వాతండ్రె, విని ముస్కు ఇనిఇని నేరమ్కు మొప్పినిదెర్?”, ఇజి వెన్బాతాన్.

30 అయావలె వారు, “వీండ్రు తపు కిఇకాన్ ఇహిజ, నీ బాన్తెవతాప్మరి”, ఇజి మర్జి వెహ్తార్.

31 పిలాతు వరిజ్, “మీరె వన్నిజ్ఒసి, మీ యూదురి రూలుదు మన్ని వజ తీర్పు సీదు”, ఇహాన్. దనిజ్వారు, “ఎయెరిజ్బా సపైజ్మజి అక్కుసిల్లెద్”, ఇహాన్.

32 యేసుఎలాగ మర్తి సావు సానాన్ఇజి వాండ్రు వెహ్కెజ్ మాటెజ్ పూర్తి ఆదెజ్ యాక జర్గితాద్.

33 పిలాతు వన్ని ఇండ్రో మర్జి సాహంద్రె, యేసుజ్ కూక్పిస్తాండ్రె వన్నిజ్, “నీను యుదురిజ్ రాజునా?”, ఇజి వెన్ బాతాన్.

34 అందెజె యేసు, “నీలోఇహాన్ వాతి మాటనా, మహికార్ నా వందిజ్ నిజి వెహ్రా?”, ఇజి వెన్ బాతాన్.

35 అయావలె పిలాతు, “నాను యూద వాండ్రనా? నీ సొంత లోకుర్ ని నీ సొంత పెరిపుజెరిజు నిజి నాబాన్ ఒపజెప్తార్. నీను ఇన్నిక కితి?”, ఇజి వెహ్రాన్.

36 అందెజె యేసు, “నా అతికారం యా లోకమ్ ది రాజురిజ్ మన్ని అతికారం లెకెండ మన్నిక ఆవద్. నన్నిఅతికారం నజి మహిజ, యూదురు నజి అరెస్టు కివండ నా సిసూర్ అడ్డు కిత్తార్ మరి. గాని నాను యా లోకమ్ ది రాజు ఆవ”, ఇజి వెహ్రాన్.

37 “అహిజ, నీను ఒరెన్ రాజునా?”, ఇజి పిలాతు వెహ్రాన్. అందెజె యేసు, “నాను రాజు ఇజి నీను వెహ్రాని. నిజమాతి మాటెజ్ వెహ్రా వందిజె నాను పుట్టానె యా లోకమ్ దు వాత. నీజమాతికెజ్ కోరిజనికాన్ నాను వెహ్రాని మాటెజ్ వినాన్”, ఇజి వెహ్రాన్.

38 అయావలె పిలాతు, “నిజమాతి మాటెజ్ ఇన్నికెజ్?”, ఇజి వెన్ బాతాన్. వెన్ బాతాండ్రె వాండ్రు వెల్లి యూదురు బాన్ సాహంద్రె, “వినిజ్ తిర్పు సిదెజ్ విని లోఇ ఇన్ని నేరంబా తోర్ వద్.

39 గాని మీ అలవాటులెకెండ్రె, ఏంటు ఏంటు పస్కు పండోయ్ కాలమ్ దు, “కయ్ దు మన్ని ఒరెన్ వన్నిజ్ మజి డిసి పోకొఅ”, ఇజి మీరు లొస్తిదెర్. అందెజె యుదురిజ్ రాజుజ్ నాను డిసి సిదెజ్ మీరు కోరిజనిదెరా?”, ఇజి వెన్ బాతాన్.

40 అయావలె వారు, “పోని! వినిజ్ పోని. బరబెజ్ డిసి సిదా మజి”, ఇజి డేల్ని మర్జి వెహ్రాన్. యా బరబ్బు ఒరెన్ కజారి.

## 19

1 అందెజె పిలాతు, “యేసుజ్ ఒసి కొరడెజాణిజ్ డెయ్ దు”, ఇజి సయ్ నమ్ దివరిజ్ వెహ్రాన్.

2-3 సయ్ నమ్ దికార్ సాప్కాణిజ్ టోపి తయార్ కితారె వన్ని బురాదు తోడిగిస్తార్. వారు వన్నిజ్ నండో ఎరాని సరీ సాక్కు తోడగిస్తారె, వన్నిడ్రు సొన్ని, “యూదురిజ్ రాజు నిజి జెయము”, ఇజి వెక్రిసి వెహ్రార్. వారు వన్ని లెపాదు డెయ్యార్.

4 మరి ఉండ్రీసుటుబా, పిలాతు వన్ని ఇండ్రోణిజ్ వెల్లి వాతాండ్రె, మంద యూదురిజ్” ఇదిలో, వన్ని లోఇ ఇనితప్పబా నజి తోర్ వద్ ఇజి మీరు నెస్టెజ్ నాను వన్నిజ్ వెల్లి మీ డగ్రు తపిన్న”, ఇజి వెహ్రాన్.

5 అందెజె యేసుజ్ సాప్కాణి టోపి ని ఎరాని సాక్కు తోడిగిస్తారె వెల్లి తతార్. అయావలె పిలాతు వరిజ్, “ఇవిలోన్ వాండ్రు”, ఇజి వెహ్రాన్.

6 పెరిపుజెరిజుని దేవుణు గుడిది జమాజ్ ణు వన్నిజ్ సుడితారె, “వన్నిజ్ సిలువాదు కుటిజాణిజ్ డెయిజి సవ్ అ, సిలువాదు కుటిజాణిజ్ డెయిజి సవ్ అ”, ఇజి డేడిస్తార్. గాని పిలాతు, “విని లోఇ నజి ఇన్ని తప్ప బా తోర్ వద్. అందెజె మీరె వన్నిజ్ ఒసి, సిలువాదు డెయిజి నప్ప”, ఇహాన్.

7 అయావలె వారు, “మజి మా యూదురి రూలుజ్ మనాద్. అయా రూలుజ్ వజి వీండ్రు సాదెజ్ వలె. ఎందానిజ్ ఇహిజ, వీండ్రు, “నానె దేవుణు మరిసి ఇజి వెహ్రాన్”, ఇహాన్.

8 పిలాతు యా మాటెజ్ విహిజ్ మరి ఒదె తియెల్ ఆతాన్.

9 వాండ్రు మరి వన్ని ఇండ్రో డుగితాండ్రె యేసుజ్, నీను ఎంబెణిజ్ వాతికి? ఇజి వెన్ బాతాన్. గాని యేసు మర్జి ఇనికబా వెహ్రాన్.

10 అందెజె పిలాతు, “నీను నా వెట వర్గెదా? నిజి సిలువాదు కుటిజాణిజ్ డెయ్ జి సప్తెజ్ బా నజి అతికారం మనాద్. విడుదల కిదెజ్ బా అతికారం మనాద్ ఇజి నీను నెన్ ఇదా?”, ఇహాన్.

11 అందెజె యేసు, “నా ముస్కు దేవుణు నిజి అతికారం సితిజ్ నె, నిజి అతికారం మనాద్. అందెజె నజి నీ బాన్ ఒపజెప్తాన్ నిజి ఇంక లావు పాపం కిత్తాన్”, ఇజి వెహ్రాన్.

12 యా మాట విహంద్రె పిలాతు యేసుజ్ విడుదల కిదెజ్ సుడెతాన్. గాని యూదురు, “నీను వినిజ్ డిసి సితిజ, నీను కయ్ సరు రాజుజ్ కులవాండ్రు ఆఇ. రాజు ఇజి వన్నిజ్ వాండ్రె వెహ్రా ఆనికాన్ ఎయెన్ బా కయ్ సరుజ్ పగ ఆతికాన్”, ఇజి మరి డటం డేల్ స్తార్.

13 పిలాతు యా మాటెజ్ విహిజెలె, వాండ్రు యేసుజ్ వెల్లి తతాన్. తతాండ్రె నాయం తిర్స్సికాన్ బన్ని కుర్ సిదు బస్తాండ్రె యేసుజ్ సిలువాదు డెయ్ అ ఇజి తీర్పు సితాన్. అయా కుర్ సి పణకాణిజ్ తయార్ కితి బాడి ఇజి కూక్పి బాడిదు మనాద్. అయా బాడిజ్ ఎల్లి బానదు గబత ఇనార్.

14 నస్తివలె పస్కు పండోయ్ నడిమి మన్ని విస్తాంతిదినం ముజాల మన్ని తయార్ ఆని రోజు. పెందాల్ ఆరు గంటెజ్ ఆతాద్. అయావలె పిలాతు, “ఇవిలోన్ మీ రాజు”, ఇజి యుదురిజ్ వెహ్రాన్.

15 అందెజె వారు, “నవ్ అ వన్నిజ్, నవ్ అ వన్నిజ్, సిలువాదు వన్నిజ్ కుంటిజాణిజ్ డెయ్ జి నవ్ అ”, ఇజి డెడిఃస్తార్. “నాను మీ రాజుజ్ సిలువాదు కుటిజాణిజ్ డెయ్ జి నవ్ జె?””, ఇజి పిలాతు వెన్ బాతాన్. అయావలె పెరి పుజెరజు, “కయ్ నరు ఒరెండ్రె మా రాజు. మరి ఎమేణి రాజు మజి సిల్లెన్”, ఇజి వెహ్టార్.

16 అందెజె పిలాతు యేసుజ్ సిలువాదు డెయ్ జి నవ్ జె వరిజ్ ఒపజెప్తాన్. వారు వన్నిజ్ ఒతార్.

### యేసుజ్ సిలువాదు పొక్కినార్

17 యేసు వన్ని సొంత సిలువ పిండిజి, పట్టు వెల్లి వాతండ్రె బుర్ర పిణికి ఇజి కూకె ఆని బాడిఃదు వాతాన్. ఎబ్రి బాసదు దన్నిజ్ గోల్ గోత ఇనార్.

18 అబ్బె సయ్ నమ్ దికార్ వన్నిజ్ సిలువాదు కుటిజాణిజ్ డెయ్ తార్. వారు రివర్ లోకురిజ్ బా వన్నివెట సిలువాదు కుటిజాణిజ్ డెయ్ తార్. యేసుజ్ నడిఃమి ఇట్టాన్. ఒరెన్ వన్నిజ్ ఉణెర్ పడఃకాద్. ఒరెన్ డెఃబర పడఃకాద్. ఆహె సిలువాదు డెయ్ తార్.

19 పిలాతుబా ఉండ్రె బోర్డు తయార్ కిబ్లిస్తాండ్రె, సిలువాదు తొహ్కాత ఇట్టాన్. అయా బోర్డుదు, ‘నజరెతుదికాన్ ఆతి యేసు. యూదురిజ్ రాజు’, ఇజి రాసి ఇట్టాన్.

20 ఎబ్రి, గ్రికు, రోమ యా మూండ్రె బాసెజాణిజ్ బోర్డుదు ఆహె రాస్త మహోర్. యేసు ప్రబుజ్ సిలువాదు డెయ్ తి బాడ్డిః పట్టు డగ్గు మనాద్. అందెజె నండ్రెండ్రె యూదురు అయాక నద్ విత్తార్.

21 నస్తవలె యూదుర్ జ పెరి పుజెరిజు పిలాతుజ్, “యూదురిజ్ రాజు ఇజి రాస్సు. గాని ‘నానె యూదురిజ్ రాజు’, ఇజి వీండ్రు వెహ్టాన్ ఇజి రాస్ అ”, ఇహోర్.

22 అందెజె పిలాతు, “నాను రాస్తి మన్నికదె మన్నిద్. మరి మారిన్ ఏ”, ఇహోన్.

23 సయ్ నమ్ దికార్ యేసుజ్ సిలువాదు కుటిజాణిజ్ డెయ్ తివలె వన్ని సొక్కిజ్ లాగితార్. వాండ్రు వ్డగితి మహి సాల్ వడిజ్ నాల్లి ముకెక్కిస్తారె, ఉండ్రె ముక ఒరెన్ వన్నిజ్ ఆహె సీబె ఆతార్. పాదమ్ దాక మంజిని ఉండ్రె నిరీ సొక్కుబ మహోర్. అయాక కుటు సిలిక. ముస్కుహోన్ అడ్డి దాక కుటు సిల్లెండ్రె ఉండ్రె లెకెండ్రె గుత మహోర్.

24 ఒరెన్ మరి ఒరెన్ వెట, “అయాక కిస్మాట్. ఎయెరిజ్ అయాక వానాద్ ఇజి సీటి పొక్కి సూణాట్”, ఇజి వర్గితార్. ‘నా సాల్వు వారు సీబె ఆతార్. నా నిరీ సొక వరిజ్ సీటి పొక్కార్\*”, ఇజి దేవుణు మాటదు రాస్తి మనికెజ్ పూర్తి ఆని వందిజ్ యాక జర్గితాద్. సయ్ నమ్ దికార్ అయాలెకెండ్రె కిత్తార్.

25 నస్తవలె, యేసుజ్ డెయ్ తి సిలువ డగ్గు వన్ని అయిసి, వన్ని కొగ్రి అయ్ సి, క్లోపా ఇన్ని వన్ని ఆల్ని మరియ, మగ్ దలెనె మరియ ఇనికెజ్ నిహె మహె.

26 యేసు వన్ని అయ్ సిని వాండ్రు నండ్రె ప్రేమిస్తి సిసూ, డగ్గునిహి మహిక సుడఃతాండ్రె అయ్ సిజ్, “ఓ యా, నేండ్రుహాన్ వీండ్రె నీ మరిన్ లెకెండ్రె మంజినాన్ లె”, ఇజి వెహ్టాన్.

27 మరి సిసూడుజ్, “ఇదిలో నీ యాయ”, ఇజి వెహ్టాన్. నాండిహాన్ అయా సిసూ దనిజ్ వన్ని ఇండ్రో కూక్ ఒతాన్.

### యేసు సాజినాన్

28 వెన్కా, బుబ్బు ఒపజెప్తి పణిజ్ విజు ఏలు పూర్తి ఆతె, ఇజి ఏలు నెస్తాన్. నెస్తాండ్రె, కిర్తన పుస్తకమ్ దు రాస్తి మన్ని మాటెజ్ పూర్తి ఆని వందిజ్ ‘నజి ఏవ్కా కట్టినాద్”, ఇజి వెహ్టాన్.

29 అయావలె అబె నండ్రె సేందు ద్రాక్స కడు మన్ని ఉండ్రె డోకు మహోర్. నయ్ నమ్ దికార్ ఉండ్రె దూది ననిక అయా సేందు ద్రాక్స కల్లుదు ముడుక్ తారె, అయాక ఇసాపు మరాతి కొమాదు తొహ్తారె, వన్ని వెయ్ దు సిత్తార్.

30 వాండ్రు అయాక ఉటాండ్రె, “నా పణిజ్ పూర్తి ఆతాద్”, ఇజి వెహ్టాండ్రె, బుర్ర వక్కి పాణం డిఃస్తాన్.

31 నస్తవలె, అయా రోజు విస్తాంతి దినం ముజాల మన్ని తయార్ ఆని రోజు. మహ్సా నాండిజ్ విస్తాంతి దినం. యా దినం ముకెలమాతిక. ఎందానిజ్ ఇసాజ, యూదురి పస్సు. వండ్రెయి అయనాండిజె మొదోలెసినాద్. నాండిజ్ మొడ సిలువాదు మండ్రెజ్ వరిజ్ ఇస్టం సిల్లెద్. అందెజె యూదురు పిలాతుజ్, సిలువాదు పొక్కి వరి కాల్కు రుజు డెయ్ జి వరిజ్ బేగి నపిసి, వరి పీనుగు సిలువెజాణిజ్ డిఃప్తెజ్ సెల్వు లోస్తార్.

32 పిలాతు సెలవ సిత్తిజ్, సయ్ నమ్ దికార్ వాతారె, యేసువెట సిలువాదు డెయ్ జి మొదోహి వన్ని కాల్కు రుజు డెయ్ తార్. వెన్కా మహి వన్ని కాల్కు బా రుజు డెయ్ తార్.

33 గాని యేసు డగ్గు వాతిజ్, వాండ్రు ముజాలె సాతాన్ ఇజి వారు నెస్తాన్. అందెజె వారు వన్ని కాల్కు రుజు డెయ్ ఏతార్.

34 గాని నయ్ నమ్ దివరి లోఇ ఒరెన్ బలెందాన్ ఉండ్రె పడఃకాదు గుతాన్. గుతిజ్ వెటనె, ఏరు నల సోతె.

\* 19:24 19:24 కిర్తన 22:18.

35 మీరుబా నమినివందిజ్, యాక జర్గితివలె సుడఃతికాన్ దనివందిజ్ వెహ్తాన్. వాండ్రు వెహ్తాక నిజమ్నె. వాండ్రు నిజం వెహ్తానాన్ ఇజి వాండ్రు నెస్సాన్.

36-37 'వన్ని డుముక లొఇ ఉండ్రీ బా రుజ్ వద్†', ఇజి, మరి, 'వారు గుతివన్నిజ్ వారు సూణార్‡', ఇజి రాస్తి మన్ని దేవుణు మాటజ్ పూర్తిఅని వందిజె యా సజతిజ్ జర్గితె.

### యేసుజ్ సమాది కిజినార్

38 యోసేపు ఇనికాన్ ఒరెన్ మహాన్. వాండ్రు అరిమతియ ఇని పట్టుమ్దికాన్. వాండ్రు యేసు సిసూ ఒరెన్. గాని వాండ్రు అయాక ఎయెరిజ్ బా వెహ్ వీతాన్. ఎందానిజ్ ఇహిజ, వాండ్రు యూదురిజ్ తియెల్ ఆతార్. వెన్కా వాండ్రు యేసు పీనుగు సిలువదాన్ డిఃప్పి సమాది కిదెజ్ పిలాతుజ్ సెల్ వ లొస్తాన్. సెల్వ సితిజ్ వాండ్రు వాతండ్రె మొడః ఒతాన్.

39 నికొదిమొ ఇన్నికాన్ ఒరెన్ బా వన్ని వెట సొహాన్. యా నికొదిమొనె, ముజాలె, యేసుజ్ రెయ్ తు సొన్ని సుడఃతికాన్. వాండ్రు డగ్రు ముప్పుయ్ నాల్లి కె. జి, బోలము కలప్తి అగరు ఇన్ని మొడః సబ్ ఎండ ఇడ్డి మాయమ్ కు తత్తాన్

40 వారు రివర్, యేసు పీనుగు ఒతారె, మాయమ్ కు రాసి తెలాని పాతెజాణ్ సుటిస్తార్. యూదురు సమాది కిని ముజాల, పీనుగుతయార్ కిని అలవాటు లెకెండ ఈహు కిత్తార్.

41 యేసుజ్ సిలువాదు డెయ్ తి బాడిఃదు ఉండ్రీ టోట మనాద్. అబ్బె పణుకుదు దొలిస్తి ఉండ్రీ కొత్తదూకి మహాద్. అబ్బె ఎయెరిజ్ బా ఎసెజ్ బా ఇడఃవిరె.

42 అయా రోజు యూదురి విస్త్రాంతిదిసం ముజాల మన్ని తయార్ అని రోజు. మరి, అయా దూకిడగ్రు మహాద్. అందెజె వారు యేసుజ్ అబ్బె ఇట్టార్.

## 20

1 వారమ్దిజ్ మొదొహి రోజు పెందాల్, సీకట్ మన్ బునె మగ్గలెనె మరియు పీనుగు నూనెజ్ రాస్తాజ్ దూకిదు సొహాద్. అది వాతిజ్, పీనుగు ఇడ్డి సమాదిదిజ్ మూక్తి పణుకు లాగితిక సుడఃతాద్.

2 అందెజె అది ఉహ్కొజి సొన్ని, యేసు నండొ ప్రేమిస్తి సిసూ బాన్, సిమోన్ పేతురుబాన్ వాతాదె వరిజ్, "ప్రబుజ్ సమాదిదాన్ వారు ఒతార్. వన్నిజ్ ఎంబె ఇడ్తారొ ఇజి మాపు నెన్ వీప్", ఇజి వెహ్తాద్. (మరియవెట మరి సెగొండెక్ బోదెక్ బా మహె)

3 అందెజె పేతురుని, అయా సిసూ సొతారె సమాదిదు సొహార్.

4 వారు రివర్ ఉహ్కొజి సొన్ సి మహార్. గాని అయా సిసూ పేతురుజ్ ఇంక బేగి ఉహ్కొతాండ్రె సమాది ముజాల్ వాతాన్.

5 వాండ్రు వజ్ జి సుడఃతిజ్, తెలాని పాతెజ్ అబె అర్ధ మహిక సుడఃతాన్. వాండ్రు లొఇ డుఃగ్ వీతాన్.

6-7 నస్తివలె సిమోన్ పేతురు వన్ని వెన్కా వాతండ్రె లొఇ డుగితాన్. వాండ్రు తెలాని పతెజ్ అర్ధ మహిక సుడఃతాన్. యేసు బుర్ల సుటిస్తి మహి పన్ సెబా అబ్బె అర్ధ మహిక సుడఃతాన్. అయా పన్ సె, తెలాని పాతవెట కూడఃవిండ సుటిస్తిడఃసనె వేరె మహాద్.

8 వెనుక ముజాల సమాదిదు వాతి సిసూబా డుగితాన్. వాండ్రు పాతెజ్ అర్ధ మహిక సుడఃతాండ్రె, యేసు మర్జి నిజితాన్ ఇజి నమ్మితాన్.

9 యేసు సాతి వరిబాణిజ్ తప్ ఎండ మర్జి నిజ్ నాన్ లె ఇజి దేవుణు మాటదు రాస్తి మన్ని మాటదిజ్ వారు ఇంక అర్ధం కిఎరె.

10 సిసూర్ వరి ఇల్కాజ్ మర్జి సొహార్.

### యేసు మగ్గలెనె మరియెజ్ తోరె ఆజినాన్

11 మరియు మరి సమాదిదు వాత మహాద్. అది వెల్లినిహాదె, అడఃబాజి మహాద్. అడఃబాజినె అది వజ్ జి సమాది లొఇ సుడఃతాద్.

12 అయావలె, తెలాని పాతెజ్ పొర్ పాతి రిఎర్ దేవుణు దూతెజ అది సుడిఃతాద్. యేసు పీనుగు మహి బాడిఃదు బస్త మహార్. పాదమ్ క దరిజ్ ఒరెన్ బస్త మహాన్. బుర్ల గాడిద్ ఒరెన్ బస్త మహాన్.

13 వారు మరియెజ్, "ఓ బీ ఎందానిజ్ నీను అడఃబాజినె?", ఇజి వెన్ బాతార్. అందెజె అది, "నా ప్రబు మొడః ఎయెరొ పెహ్తా ఒతార్. ఎంబె ఇడ్తారొ నజి తెలిఎద్", ఇజి వెహ్తాద్.

14 యా మాటజ్ వెహ్తాదె, వెన్కా మర్జి బేస్తాద్. బేస్తిజ్ యేసు అబ్బె నిహి మహిక సుడఃతాద్. గాని వన్నిజ్ గుర్తు అన్ వీతాద్.

† 19:36-37 19:36-37 జీకరి 12:10. ‡ 19:36-37 19:36-37 నిగ్గమ 12:46, కీర్తన 34:20.

15 అయావలె యేసు, “ఓ బీ, ఎందానిజ్ నీను అడఃబాజిని? ఎయెరిజ్ రెబాజిని?”, ఇజి వెన్ బాతాన్. వీండ్రు అయా టోటారు పణి కినికాన్ ను ఇజి ఒడిఃబిజి, “బాబు, నీను వన్ని పీనుగుపిండితి ఒతి మహిజ, ఎంబె ఇడ్డి మన్నిదో నజీ వెహాఅ. నాను సొన్ని వన్నిజ్ పెర్న ఒనాలె”, ఇజి వెహ్లాద్.

16 నస్తివలె యేసు దన్నిజ్, “మరియ”, ఇజి కూక్టాద్. వెటనె అది మర్జి వన్ని దరిజ్ మహ్లాద్. వాండ్రు యేసు ఇజి గుర్తు అస్తాదె ఎబ్రి బాసదు, “రబుని”, ఇజి కూక్టాద్. దని అర్థం బోదిస్సికాన్ ఇజి.

17 అయావలె యేసు, “నాను నా బుబ్బడగు ఇంక మర్జి సొన్ ఎనె. అందెజె నజీఅసి మన్ మా. గాని నీను నా సిసూర్ డగు సొన్ని వరిజ్, “నాను నా బుబ్బడగు మర్జి సొన్ సిన. వాండ్రునె నా బుబ్బ మీ బుబ్బ. వాండ్రె నా దేవుణు మీ దేవుణు”, ఇజి వెహాఅ”, ఇజి వెహ్లాన్.

18 అందెజె మగ్గలెనె మరియ సిసూర్ డగు వాతాదె, “ప్రబుజ్ నుడఃత”, ఇజి వెహ్లాద్. మరి ప్రబు దన్నిజ్ వెహ్లాకెజ్ బా వెహ్లాద్.

### యేసు వన్ని సిసూరిజ్ తోరె ఆజినాన్

19 అయా ఆదివారమ్ నె, పొదోయ్ సిసూర్ కూడిఃతారె, సేప్లా కెప్పి బస్త మహార్. ఎందానిజ్ ఇహిజ, వారు యుదురిజ్ తియెల్ ఆతార్. యూదురు వరిజ్ అదికారుజ ఒపజెప్పార్ ఇజి. నస్తివలె యేసు వాతండ్రె వరినడిఃమి నిహండ్రె, “సమాదనం కల్లిపిద్”, ఇజి వెహ్లాన్.

20 యాక వెహ్లాండ్రె, సిలువాదు డెయ్ ఏ అతివెలె వన్ని కికాజ్, వన్ని పడఃకాద్ వాతి గాయమ్ కు వాండ్రు వరిజ్ తోరిస్తాన్. ప్రబుజ్ నుడఃతారె సిసూర్ నండ్రె సర్ద ఆతార్.

21-22 మరి బా యేసువరిజ్, “మిజి సమాదనం కల్లిపిద్. నా బుబ్బ వన్ని మాట బోదిస్సెజ్ నజీ యా లోకమ్ దు పొక్తి వజి నాను మిజి పొక్కిన”, ఇజి వెహ్లాండ్రె, వరి ముస్కు తూబితాన్. తూబితాండ్రె, వరిజ్, “దేవుణు ఆత్మదిజ్ మీ మన్గుదు ఇడ్ఃదు.

23 మీరు ఎయిపాపమ్ కు సెమిస్సిదెరొ, వరి పాపమ్ కు సెమిస్త మనె. ఎయిపాపమ్ కు మీరు సెమిన్ ఇదెరొ, అయకెజ్ సెమిసి మన్ ఉ”, ఇజి వెహ్లాన్.

### యేసుతోమెజ్ తోరె ఆజినాన్

24 యేసు సిసూరిజ్ తోరె ఆతివలె, వన్సెండు మన్నిసీర్ సిసూర్ లోఇ మన్ని దిదుము ఇన్ని తోమా సిల్లెండ మహాన్.

25 అందెజె మహి సిసూర్, “మాపు ప్రబుజ్ నుడఃతాప్ ఇజి వెహ్లాజ్, వాండ్రు, “నాను వన్ని కికాజ్ కుంటిజాణిజ్ డెయ్ తి గాయమ్ ది మసదిజ్ తోఎండ, అయా మసదు ముట్ ఏండ, వన్ని పడఃకాదు నాను కియు ఇడ్ఃవిండ, వాండ్రు నిజీత మనాన్ ఇజి నమిఎ”, ఇహాన్.

26 ఉండ్రి వారం వెన్కా వన్ని సిసూర్ విజెరె మరిబా కూడిఃతారె, ఉండ్రి ఇండ్రొ మహార్. తోమాబా వరివెట మహాన్. సేప్లా కెహె ఆత మహాద్. గాని యేసు వాతండ్రె వరినడిఃమి నిహండ్రె, “సమాదనం కల్లిపిద్”, ఇజి వెహ్లాన్.

27 మరి తోమెజ్, “నీ డెస్కు ఇబ్బె ఇడ్ఃఅ. నా కికాజ్ నుడఃఅ. నీ కియు సాప్పి నా పడఃకాద్ మన్ని గాయమ్ దు ఇడ్ఃఅ. అనుమానం సిల్లెండ నమిఅ”, ఇజి వెహ్లాన్.

28 అయావలె తోమా, “నీనె నా ప్రబు. నీనె నా దేవుణు”, ఇజి వెహ్లాన్.

29 అందెజె యేసు వన్నిజ్, “నీను నజి నుడఃతిజ్ నిజీతమనాన్ ఇజి నమ్మితి. నజీ తోఎండ నమ్మితికార్ గొప్ప వారు”, ఇజి వెహ్లాన్.

30 యేసు వన్ని సిసూర్ జి నడిఃమి, మరి నండ్రె బమ్మాని పణిజ్ కితాన్. అయకెజ్ యా పుస్తకమ్ దు రాన్ ఉ.

31 గాని, యేసు క్రీస్తు ఇజి, వాండ్రు దేవుణుమరిసి ఇజి మీరు నమ్మినివందిజ్, వన్ని ముస్కు మన్ని మీ నమకమ్ దాన్ మిజి ఎలాకాలం దేవుణువెట బత్కిని బత్కు దొప్పివందిజ్ యాకెజ్ రాస్త మన్నె.

## 21

1 దిని వెనుక, యేసు తిబెరియ సమ్ దరం డగు మరి వన్ని సిసూర్ జి తోరె ఆజినాన్. వాండ్రు ఈహు తోరె ఆతాన్.

2 సిమోన్ పేతురు, దిదిమ ఇజి కుకెఅని తోమా, గలిలయ ప్రాంతమ్ ది కానా ఇన్ని పట్టుమ్ ది నతనయేలు, జెబెదయ మరిసిర్ ఆతి యాకోబు యోహాను, మరి రివీర్ సిసూర్ కూడిఃత మహార్.

3 సిమోన్ పేతురు, “నాను మొయెజ్ అస్టెజ్ సొన్ సిన”, ఇజి వరిజ్ వెహ్లాన్. అయావలె వారు, “మాపు బా నీ వెట వానాప్”, ఇహార్. అందెజె వారు సొహారె, ఉండ్రి డోణి ఎక్టారె సొహార్. గాని ఆ రెయితు ఇనికబా అన్ ఏతార్.

4 పొద్దు సొసి మహివలె, యేసు సమ్ దరం దరిదు నిహాన్. గాని వన్ని సిసూర్ యేసు ఇజి గుర్తు అన్ ఏతార్.

5 అందెజె వాండ్రు వరిజ్, “తంబెరిజాండె, మొయెజ్ ఇన్నికబా అస్తిదెరా?”, ఇజి వెన్ బాతాన్. వారు, “సిల్లెద్”, ఇజి వన్నిజ్ వెప్టోర్.

6 నస్తివలె వాండ్రు, “డోణి ఉణెర్ పడఃకాదు మీ వలెజ్ పొక్తు. మిజి దొహ్కానె”, ఇజి వెప్టోన్. వారు అయి లెకెండ కిత్తార్. మొయెజ్ నండె అర్తె. వల లాగ్ దెజ్ అట్ ఏతార్.

7 అయావలె, యేసు నండె ప్రేమిస్తి సిసూ, “వాండ్రు ప్రబు”, ఇజి పేతురుజ్ వెప్టోన్. “వాండ్రు ప్రబు”, ఇజి అయా సిసూ వెప్టో మాట విహి వెటనె, సిమోన్ పేతురు వాండ్రు లాగితి ఇడ్డి సాల్వ వ్డెగితాండె, సమ్ దరమ్ దు డాట్టాన్.

8 వారు గటుదాన్ ఎంజు మెంసు నూరు మూరెజ్ నె దూరం మనార్. అందెజె మహి సిసూర్ మొయెజ్ మన్ని వల లాగ్ జి నె డోణిదు వాతార్.

9 వారు డిగిజి వాతిజ్ గటుదు, సిసూ డిఃప్పుజ్ దనిముస్కు మొయెజ్ రొటెజ్ తోరితె.

10 యేసు వరిజ్, “మీరు ఏలు అస్తి మహి సెగం మొయెజ్ అగాట్”, ఇజి వెప్టోన్.

11 సిమోన్ పేతురు డోణి ఎక్తాండె వల గటుదు లాగితాన్. అబె నూటి యాబయి మూండ్రి పెరి మొయెజ్ వలదు నిండ్రితె మహె. గాని నిసా మహిజ్ బా వల కింజ్ ఏతాద్.

12 యేసు వరిజ్, “రదు తిండ్రు”, ఇజి వెప్టోన్. వాండ్రు ప్రబు ఇజి వరిజ్ తెలితార్. అందెజె, నీను ఎయి ఇజి వన్నిజ్ వెన్ బాదెజ్ సిసూర్ లొఇ ఎయెన్ వన్నిజ్ బా దయరం సిల్లెతాద్.

13 యేసు వాతాండె, రొట్టెజ్ లాగితాండె వరిజ్ సీబాత సితాన్. అయి లెకెండ మొయెజ్ బా సిత్తాన్.

14 యేసు సాతి వరిబాణిజ్ బత్తితి వెన్కా, దినివెట ఏలు ముసార్ సిసూర్ జ తోరె ఆత్తాన్.

15 వారు తిహి వెన్కా, యేసు సిమోన్ పేతురుజ్, “యోహాను మరిసి ఆతి సిమొను, నీను మహి సిసూర్ జ ఇంక నీను నండె నజి ప్రేమిస్తిదా?”, ఇజి వెన్ బాతాన్. “ఒబ ప్రబువా, నాను నిజి ప్రేమిస్సు ఇజి నీను నెస్సి”, ఇజి వాండ్రు వెప్టోన్. అందెజె యేసు, “నా గొరె పిలెకాజ్ మేవ్ అ”, ఇజి వెప్టోన్.

16 మరిబా యేసు వన్నిజ్, “యోహాను మరిసి ఆతి సిమొను, నీను నజి ప్రేమిస్తిదా?”, ఇజి వెన్ బాతాన్. “ఒబ ప్రబువా, నాను నిజి ప్రేమిస్సు ఇజి నీను నెస్సి”, ఇజి రిజ వెప్టోన్. అందెజె యేసు, “నా గొరెజ్ అడిఃఅ”, ఇజి వెప్టోన్.

17 “యోహాను మరిసి ఆతి సిమొను, నజి ప్రేమిస్తిదా?”, ఇజి ముసార్ వెన్ బాతాన్. నీను నజి ప్రేమిస్తిదా ఇజి ముసార్ దిజ్ వెన్ బాతిజ్, పేతురు బాద ఆతాన్. “ప్రబు నీను విజు నెస్సికి. నాను నిజి ప్రేమిస్సు ఇజి నీను నెస్సి”, ఇజి పేతురు వెప్టోన్. అందెజె యేసు, “నా గొరెజ్ మెవ్ అ”, ఇజి వెప్టోన్.

18 “నాను నిజం నీవెట వెస్సిన, నీను దజడః మనివలె, నీను తయార్ ఆజి నీ ఇస్టం ఆతి బాడిఃదు సాహి. గాని నీను డొక్ర ఆనివెలె, నీకికు నీను సాప్పి. మరి ఎయెన్ బా నిజి తోస్సి నిజి ఇస్టం సిల్లి బాడిఃదు పిండిజి ఒనాన్”, ఇజి వెప్టోన్.

19 పేతురు ఎలాగమర్తి సావు సాజి దేవుణు గొప్పపెరికాన్ ఇజి తోరిస్సాండె, దనివందిజ్ వాండ్రు యా మాటెజ్ వెప్టోన్. వెన్కా వన్నిజ్, “నా సిసూ ఆజి రఅ”, ఇజి వెప్టోన్.

20 పేతురు వెనుక మహ్తాండె, యేసు నండె ప్రేమిస్తి సిసూ, వరి వెన్కా వాజినిక సుడ్ తాన్. (యా సిసూనె పన్ను బోజనం తిహివలె యేసు గుంజమ్ దు ఒరిగితాండె, “ప్రబువా, నిజి అదికారిజ కీదు ఒపజెప్పికాన్ ఎయెన్”, ఇజి వెన్ బాతికాన్).

21 పేతురు వన్నిజ్ సుడఃతాండె, “ప్రబువా, వినిజ్ ఇన్నిక జర్గినాద్?”, ఇజి వెన్ బాతాన్.

22 అందెజె యేసు, “నాను మర్జి వానిదాక వాండ్రు బత్తిదెజ్ నజి ఇస్టం ఆతిజ, నిజి ఇన్నిక? నీను నా సిసూ ఆజి వెన్కా వాదెజ్ వలె”, ఇజి వెప్టోన్.

23 యేసు అయి లెకెండ వెప్టోజ్, యా సిసూ సావీన్ ఇజి ఉండ్రి మాట మహి వరి నడిఃమి సెద్రిస్తాద్. గాని వాండ్రు సావీన్ ఇజి యేసు వెహావతాన్. నాను వానిదాక వాండ్రు బత్తిదెజ్ నజి ఇస్టం ఆతిజ, నిజి ఇన్నిక?”, ఇజి నె వాండ్రు వెప్టోన్.

24 యా సజతిజ వందిజ్ వెప్టికాన్ యా సిసూనె. వీండె ఆయాకెజ్ రాస్త ఇట్టాన్. వాండ్రు వెప్టికెజ్ నిజం ఇజి మాపు నెస్సినాప్.

25 యేసు మరి నండె సజతిజ్ కిత్తాన్. అయాకెజ్ విజు రాసి ఇడ్ దెజ్ ఇహిజ, రాసిని పుస్తకమ్ కు అస్తిజ్ యా లోకమ్ దు మన్ని బాడ్డి సాల్ ఏద్ ఇజి నాను ఒడ్ కిస్తు ఇజి.

## అపొస్తురు కిత్తి పణిజ్

నెల్వ కిబిసినిక

లూక సువార్త రాస్తామహి లూకనె యా పుస్తకం రాస్తాన్. లూక ఒరెన్ డాక్టరు. క్రీస్తు సకం 60-63 నడిమి యాక రాస్త మనాద్ ఇజి వెస్పానార్. క్రీస్తు సాజి నిజితి వెన్కా మొదోహి 30 పంటిజ్ లోఇ జర్గితికెజ్ ఇబ్బె రాస్తా మన్నె. లూక సువార్తదు యేసుక్రీస్తు కిత్తి గొప్ప పణిజి వందిజ్ లూక రాస్తాన్. వెనుక, యేసుక్రీస్తు పరలోకమ్దు సాహి వెనుక దేవుణు ఆత్మ వాతంత్తె వన్ని అపొస్తురు వెట గొప్ప బమ్మాతి పణిజ్ కిత్తాన్. యూదయదేసమ్దాన్ అంతియొకయాదు, బాణిజ్ రోమపట్టుం దాక యేసుక్రీస్తు వందిజ్ సువార్త సాటిస్తారె అపొస్తురు అయ కాలమ్దు కిత్తి పణిజి వందిజ్ ఇబ్బె రాస్త మనాద్.

దేవుణు యేసుజ్ పరలోకమ్దు ఒత్తాన్

1-2 నా ప్రియమాతి దెయొపిలా, నాను ముందాల్ రాస్తి పుస్తకమ్దు, దేవుణు యేసుజ్ పరలోకమ్దు ఒనెండ యేసు కిత్తి విజు పణిజి వందిజ్, యేసు నెన్పిస్తి విజు మాటెజివందిజ్ రాస్త మనాద్. దేవుణు యేసుజ్ పరలోకమ్దు ఒనిముందాల యేసు, వాండ్రు ఏర్పాటు కిత్తి అపొస్తురుజ్ వారు కిని పణి వందిజ్ దేవుణు ఆత్మ సత్తుదాన్ ఆడ్ర సిత్తాన్.

3 యేసు కస్టమ్కు ఓరిసి సాతి వెనుక నిజితండ్రి, నాను బత్తిత్త ఇజి అపొస్తురు అనుమానం సిల్లెండ నమ్మిదెజ్ యేసు వరిజ్ తోరె ఆత్తాన్. నలపయ్ రోస్కాజ్ నండో సుట్కు యేసు అపొస్తురుజ్ తోరె ఆతండ్రి దేవుణు ఏలుబడిః వందిజ్ వర్గిత్తాన్.

4 వారు కూడఃజి వాతివలె యేసు ఈహు ఆడ్ర సిత్తాన్, “యెరూసలేం పట్టుం డిఃసి సొన్మాట్. నా బుబ్బ మిజి సీనా ఇజి ఒట్టు కిత్తి వన్ని ఆత్మ ఇని ఇనాయమ్వందిజ్ నాను ముందాల్నె వెప్తాగదె. దన్నివందిజ్ కాప్ కిజి మండ్రు.

5 యోహాను ఏరుదాన్ బాప్తిసం సిత్తాన్. గాని సెగం రోస్కు సాహిజి దేవుణు మిజి వన్ని ఆత్మదాన్ బాప్తిసం సీనాన్”, ఇహాన్.

6 అపొస్తురు యేసు వెట కూడఃజి వాతారె వెన్బాతార, “ప్రబువా, ఏలునె మా ఇస్రాయేలు లోకాజ్ మా దేసెమ్ది ఏలుబడిః మర్జి సీనిలెనా?”.\*

7 యేసు వెప్తాన్, “కాలం వందిజ్ నా బుబ్బానె ఏర్పాటు కిత్తాన్. అక్కెజ్ విజు నా బుబ్బాతి దేవుణు అతికారమ్దు మనాద్. యాకెజ్ విజు ఎసెజ్ జర్గినాద్ ఇజి మీరు నెస్సెజ్ అవ్సరం సిల్లెద్.

8 అహిజ, దేవుణు ఆత్మ మీ మున్కు వానివలె మీరు సత్తు ఆనిదెర్. అయావలె మీరు యెరూసలేమ్దు, యూదయ దేసెం విజు, సమరియ దేసెం విజు, లోకం విజుబాన్ నా వందిజ్ వెప్సి నా సాసిర్ ఆనిదెర్”.

9 యా మాటెజ్ వెప్తాండ్రి వారు సుడఃజిమహిజ్ దేవుణు యేసుజ్ పరలోకమ్దు ఒత్తాన్. అయావలె ఉండ్రీ మొసాప్ వాతాదె అడ్డు కిత్తిజ్ వారు యేసుజ్ తోర్పిండ ఆత్తార.

10 యేసు ఆగాసం మున్కు సొన్ని మహిజ్ వారు ఆగాసం దరోట్నె డిటం బేసి మహార్. అయావలె వెటనె తెల్లాని పాతెజ్ పోర్పాతిమహి రిఎర్ దూతార వరి డగ్రు నిహార్.

11 “ఓ గలీలయాదికిదెరా, మీరు ఎండనిజ్ ఆగాసం దరోట్ సుడఃజినిదెర్? మీ డగ్రుహాన్ దేవుణు పరలోకమ్దు యేసుజ్ ఒత్తాన్. ఎలాగ సాహండ్రో అయావజనె మర్జి వానాన్లె”, ఇజి వారు వరిజ్ వెప్తార.

త్తియెజ్ అపొస్తురు వెట కూడఃజిజ్ ఏర్పాటు కిత్తార

12 వెనుక అపొస్తురు ఒలివ మరెక్ మన్ని గొరొతాన్ యెరూసలేం పట్టుమ్దు మప్తా సాహార్. (ఒలివ మరెక్ మన్ని గొరొన్ యెరూసలేం పట్టుం డగ్రునె. ఉండ్రీ కిలో మీటర్ దూరం మనాద్)

13 వారు యెరూసలేమ్దు సాహారె వారు మహి మేడః గదిదు ఎక్కార. వారు ఎయెర్ ఎయెర్ ఇహిజ, పేతురు, యోహాను, యాకోబు, అంద్రెయ, పిలిపు, తోమా, బర్తోలోమయి, మత్తయి, అల్పయ్ మరిసి ఆతి యాకోబు, జలోతె† ఇని మరి ఉండ్రీ పేరు మహి సీమోను, యాకోబు మరిసి ఆతి యూద ఇనికార్.

14 వారు విజేరె కూడఃతారె ఉండ్రె మన్నుదాన్ డిఃన్పిండ పార్దనం కిజి మహార్. వరివెట సెగొండెక్ అయ్లికొడొక్ బా వాతె మహా. యేసు యాయ ఆతి మరియ, వన్ని తంబెర్సీర్బా అబ్బె మహార్.

\* 1:6 1:6 అయ కాలమ్దు ఇస్రాయేలు లోకురి దేసెం రోమాదికార్ ఏలుబడిః కిజి మహార్. † 1:13 1:13 జలోతె ఇహిజ పటుదల మన్నికాన్ ఇజి అర్థం

15 సెగం రోస్కు సొహి వెనుక డగ్గు డగ్గు నూట ఇర్వయ్ మణిసిర్ యేసుజ్ నమ్మితికార్ కూడిత మహార్. పేతురు వరినడిమి నిహండ్రె ఈహు వెహ్లాన్,

16 “తంబెరిజాండె, దేవుణు మాటదు రాస్తి మహిక తవ్విండ జర్గితాద్. దేవుణు ఆత్మ సత్తుదాన్ దావీదు రాజు యూద వందిజ్ ముందాల్న వెహ్లాకాద్ జర్గితాద్. యా యూద యేసుజ్ అస్తైజ్ వాతివరిజ్ సరి తోరిస్తాన్.

17 వాండ్రు మా లొఇ ఒరెన్. ఎందనిజ్ ఇహిజ మాపు అపొస్తురు వెట కూడేజి పణి కిదెజ్ యేసు వన్నిజ్ ఏర్పాటు కిత్తాన్”.

18 (యా యూద మొసెం పణిదాన్ సంపాదిస్తి డబ్బుజాణ్ బూమి కొటాన్. అబ్బె గడియబుర కితాండ్రె అర్తాండ్రె సాతాన్. అయావలె పొట బదెజ్ ఆజి వన్నిజ్ విజు వెల్లి సోతె.

19 యెరూసలేమ్దికార్ విజేరె యా సజతిజ్ వెహరె నెస్తారె. అందెజె యూద అర్తిసాతి యా బూమిదిజ్ వరి బాసాదు అక్కెల్లెమ ఇజి వెహ్లాన్. దన్ని అర్లం ఇనిక ఇహిజ, ‘ఒరెన్ లోకుదిజ్ సప్తి వందిజ్ దోహ్లా డబ్బుదాన్ కొటి బూమి’ ఇజి అర్లం).

20 పేతురు మరి వెహ్లాన్, “కిర్తనం పుస్తకమ్దు ముందాల్న ఈహు రాస్త మనాద్: వన్ని ఇల్లు ఎయెన్బా మన్విండ ఆపిన్, దన్ని లొఇ ఎయెన్బా బత్తిఎండ ఆపిన్”. ఈహుబా రాస్త మనాద్: అపొస్తుడు‡ వజి వాండ్రు కిత్తి పణి మరి ఒరెన్ లాగె ఆపిన్.

21-22 అందెజె మాపు పదకొండు మణిసిర్ అపొస్తురు వెట కూడేజి మండ్రెజ్ మరి ఒరెన్ వన్నిజ్ ఏర్పాటు కిదెజ్వలె. యోహాను యేసుప్రబుజ్ బాప్తిసం సిత్తి బాణిజ్ అసి యేసుప్రబు పరలోకమ్దు సొనిదాక మా నడిమినె కూడేజిపాడేజి మా వెట మహికాన్ ఒరెన్ వన్నిజ్ అవ్సరం. ఎందనిజ్ ఇహిజ యేసు సాతి వరిబాణిజ్ మర్జి బత్తితాన్ ఇజి వాండ్రుబా మా వెట సాసి మండ్రెజ్.

23 అందెజె కూడేజి వాతి మహికార్ రిఎరి పేర్కు వెహ్లాన్. ఒరెన్ యోసేపు (వన్నిజ్ యుస్తు, బర్సబ ఇని పేర్కుబా మహె) మరి ఒరెన్ మత్తియ.

24-25 అయావలె వారు ఈహు పార్లనం కిత్తారె, “ప్రబువా, విజెరి మన్నుదు మన్ని విజు ఆలోసనమ్కు నీను నెసిని. యూద, వన్నిజ్ తగితి బాడ్డిదు సొహాన్. వాండ్రు డిసిసొహి పణి, ఇహిజ సజమ్దిజ్ నడిపిసి సేవకిని పణి సిదెజ్ వన్నిజ్ బదలు యా రిఎర్ లొఇ ఎయెజ్ నీను ఏర్పాటు కిత్తి ఇజి మజి తోరిన్అ”.

26 వెనుక వారు సీటిజ్ పొక్టార్. అయావలె మత్తియ ఇని పేరుదాన్ సీటి వాతాద్. అందెజె మత్తియెజ్బా పదకొండు మణిసిర్ అపొస్తురు వెట లెక్క కల్పారె.

## 2

పెంతెకొస్తు పండోయ్ నాండిజ్ దేవుణు ఆత్మ వాజినాద్

1 పెంతెకొస్తు ఇని పండోయ్ నాండిజ్ యేసుజ్ నమ్మితికార్ విజేరెకూడేజి ఉండ్రె ఇండ్రె మహార్.

2 వెటనె అగాసమ్దాన్ ఉండ్రె జాటు వాతాద్. అయ జాటు, పెరి గాలి వానివజి జాటుదాన్ వాతాదె వారు బస్తిమహి ఇండ్రె నిండ్రెతాద్.

3 వారు సుడేతిజ్ సిసుబొద్దు లెకెండ్రె తోర్నిక ఉండ్రె వాతాదె ఒరెన్ ఒరెన్ ముస్కు ఉండ్రె ఉండ్రె కొనెజ్ డిగితె.

4 విజేరె ముస్కు దేవుణు ఆత్మ సత్తు వాతిజ్ వారు, వరిజ్ నెన్ఇ బాసెజ్ వర్గిదెజ్ మొదోల్స్తారె. దేవుణు ఆత్మనె నెన్ఇ బాసె వర్గిదెజ్ వరిజ్ సత్తు సిత్తాన్.

5 అయావలె విజు దేసమ్కాణిజ్ వాతిమహి బక్తిమన్ని యూదురు యెరూసలేం పట్టుమ్దు మహార్.

6 యూదురు మంద లోకుర్ యా జాటు వాతిబాన్ కూడితారె. వారు వర్గినిక వీరు వన్ని వన్ని సొంత బాసెజాణిజ్ వెహరె యా కూడేజి వాతి మహి యూదురు బమ్మ ఆతారె. “వీరు మాటు వర్గిని బాసెజ్ వర్గిజినార్ కొటె”, ఇజి వెహ్లాన్.

7 అయావలె వాతి మహికార్ విజేరె ఒదె బమ్మ ఆతారె ఒరెన్ వెట ఒరెన్ వెహ్లాన్, “యాక ఎలాగ? వీరు విజేరె గలీలయాదికార్ ఆవరా?”

8 గాని మాపు పుట్టిమహి నాహ్కాణి ఆఇ ఆఇ బాసెజ్ యా గలీలయాదికార్ వర్గిజినార్. యాక మాపు వెంజినావ్.

9-11 పార్తియికు, మదియికు, ఎలామియికు, మెసొపొతేమియ, యూదయ, కపదోకియ, పొంతు, ఆసియ, పుగియ, పంపులియ, అయ్గుప్తు, కురేనె డగ్గు మన్ని లిబియ, రోమ దేసెమ్దాన్ కుల వాతికార్ (యూదురు, యూదమతం నమ్మితి యూదురు ఇజికార్) క్రేతియిరు, అరెబియిరు, దేవుణు కిత్తి గొప్ప పణిజ్ మాటు విజెటె పుట్టి బాసాదు వెహ్లాక వెంజినావ్.

12 ఒడిబిత్తిజ మన్ను కూడేవద్. యాక ఇనిక ఆనాద్లెన్”, ఇజి వారు విజేరె పంబ్ర ఆతారె ఒరెన్ వెట ఒరెన్ వర్గితారె.

‡ 1:20 1:20 అపొస్తురు. నజమ్దిజ్ సుడేజి నడిపిస్తైజ్ ఏర్పాటు ఆజి పొకె ఆతికార్



13 సెగొండార్ వీరు తియాజ్ ద్రాక్య రసం ఉటారె సొస్త మనార్ ఇజి వరిజ్ సెకాల్ కిత్తార్.

పేతురు కూడేజి వాతి లోకుర్ వెట వెప్పొనాన్.

14 అయావలె పదకొండు మణిసిర్ అపొస్తరు వెట మహి పేతురు నిజితండ్రె అబ్బె కూడేజి వాతి లోకుర్ వెట డటం వెప్టాన్, “యెరూసలేమ్దు బత్తిజిని మా సొంత లోకుర్ ఆతి యూదయ లోకాండె, నాను వెప్పొక నెగ్రెండ వెండ్రు. వీరు విరిజ్ నెన్ ఇ బాసెజ్ వర్గితిక మీరు వెహిదెర్.

15 మీరు ఒడిబిని లెకెండ వీరు సొస్తికార్ ఆవిర్. పొద్దు సొసి ఏలు అంబెలి వేడేబా ఆవిద్.\*

16 గాని దేవుణు మాటెజ్ వెప్టొ యోవెల్ ప్రవక్త ముజాలె వెప్టొకదె మీరు సుడేజినిదెర్.

17 యోవెల్ ప్రవక్త ఇనిక వెప్టాన్ ఇహిజ ఆకార్ దినమ్కాజ్ నాను ఇనిక కిన ఇజి దేవుణు వెప్పొనాన్. విజు లోకాజ్ నా ఆత్మదిజ్ సిన. మీ మరిసిర్, మీ గాడ్సెక్, ప్రవక్తరు లెకెండ దేవుణు మాటెజ్ వర్గినార్లె. మీ దజ్డేజ్ దేవుణు బాణిజ్ వాని దర్సనమ్కు† నూణార్. మీ డొక్టార్బా దేవుణు బాణిజ్ వాని కలెజ్ నూణార్లె.

18 అయ ఆకార్ దినమ్కాజ్ నా ముస్సు. నమకం ఇడేతి పణి మణిసిరిజ్బా విజేరిజ్, అయ్లి కొడొకాజ్, మొగ్గ కొడొకాజ్ నా ఆత్మ సినా. వారు విజేరె దేవుణు మాటెజ్ వెప్పొర్లె.

19 ఆగాసం ముస్సు విజేరె నూణి వజ నాను గొప్ప బమ్మాతి పణిజ్ తోరిస్సు. యా బూమి ముస్సు ఎయెర్బా తొ ఇ పణి నాను కిన. నల, సిను, కర్నిగొయి బూమి ముస్సు వానెలె.

20 ప్రబు మర్జి వాని అయ గొప్ప బమ్మాని దినం వాని ముజాల పొద్దు సీకటి ఆనాద్లె. నెల నల లెకెండ ఎరాజ్ ఆనాద్లె.

21 అయావలె ఎయెర్బా దేవుణు పేరు ఆసి వన్ని ముస్సు. నమకం ఇట్టిజ వరిజ్ విజేరిజ్, దేవుణు, తీర్పుదాన్ గెల్పెస్సాన్లె.

22 పేతురు మరి వెప్టాన్, “ఇస్రాయేలు లోకాండె, నెగ్రెండ వెండ్రు. నజరేతు వాండ్రు ఆతి యేసు అతికారం దేవుణు బాణిజ్ వాతిక ఇజి దేవుణు రుజుప్ కిత్తాన్. ఎలాగ ఇహిజ, యేసు వెట మీ లో ఇ కిత్తి గొప్ప పణిజాజ్, ఎయెర్ కిదెజ్ అట్ ఇ బమ్మాతి పణిజాజ్ రుజుప్ కిత్తాన్. యాక విజు మీరు నెసినిదెర్.

23 యా యేసుజ్, ఒరెన్ మణిసి మీ డగ్రు ఒపజెప్తాన్. యా నజతి దేవుణు ముందాల్పె నెస్టాన్. యాక దేవుణు ముందాల్పె వీర్పాటు కిత్తి సజతి. మీరు యేసుజ్ సెఇవరి దర్పుదాన్ అస్తిదెరె సిలువ ముస్సు. డేయేజి సప్టిదెర్.

24 గాని దేవుణు యేసుజ్ సావుదాన్ తప్పిసి బత్తిస్తాన్. నండొ మాలెజ్ ఆజి సాతాన్ గాని దేవుణు వన్నిజ్ సావుదు డిస్ ఏతాన్. యేసుజ్ ఎలాకాలం తొప్పి ఇడేదెజ్ సావుదిజ్ అట్ ఏండ ఆతాద్.

25 యేసు మాటెజ్ దావీదురాజు ముందాల్పె ఈహు వెప్టాన్ నాను దేవుణుదిజ్ ఎల్లకాలం నా డగ్రు సుడేజి మహా. దేవుణు నా ఉణెర్ పడేక మనాన్. అందెజె నాను మన్నుదు మాలెజ్ ఆవ.

26 అందెజె నా మన్నుదు నాను గొప్ప సర్ల ఆజిన. నాను సర్ల ఆజి వర్గిజిన. నాను నా ఒడొల్ దేవుణుదిజ్ ఒపజెప్ప. ఎండనిజ్ ఇహిజ ఒడొల్ సాతి వెనుక మరి బత్తిస ఇజి నాను నెసిన.

27 ఎండనిజ్ ఇహిజ నీను నా పాణమ్దిజ్ డిస్ ఇ. నమ్మిదెజ్ తగ్గికాన్ ఆతి నీ సేవ కినివన్ని పీనుగు సబ్జి సొండ్రెజ్ సరి సిఇ.

28 నీను నజి ఎలాకాలం బత్తిని సరి తోరిస్తి. నీను నా వెట మహిజ్ నాను గొప్ప సర్ల ఆజిన”.

29 “నా తంబెరిజాండె, నాను దయ్ రమ్దాన్ వెప్పొన, మా అనిగొ ఆతి దావీదురాజు సాతండ్రె వన్నిజ్ ముస్తార్. వన్నిజ్ ముస్తి బాడ్డి ఎంబె మనాద్ ఇజి ఏలుబా మాటు నెసినాట్.

30 గాని దావీదురాజు దేవుణు ప్రవక్త. దేవుణు వన్ని పేరు ఆసి వాండ్రె దావీదురాజు వెట ఒట్టు పొక్తాన్. అక్క ఇనిక ఇహిజ, దావీదురాజు కుటుమ్దాన్ ఒరెన్ వన్నిజ్ దావీదురాజు లెకెండ రాజు కిన ఇజి. యాక దావీదురాజు నెస్త మహాన్.

31 దేవుణు యేసుక్రీస్తుజ్ సాతి వరి బాణిజ్ డిస్ ఏన్ ఇజి, యేసుక్రీస్తు పీనుగు సబ్జి సొన్ ఏద్ ఇజి దావీదురాజు ముందాల్పె నెస్టాన్. ముందాల్పె నెస్టాండ్రె, యేసు సాతి వెనుక మరి మర్జి నిజ్ నాన్లె ఇజి ముందాల్పె దావీదురాజు వెప్టాన్.

32 యా యేసుజ్ దేవుణు మర్జి బత్తిస్తాన్. దన్నిజ్ మాపు విజెపె సాసిర్.

33 అహిజ దేవుణు యేసుజ్ వన్ని ఉణెర్ పడేకాద్ బన్ పిసి వన్నిజ్ ఇంక మిస్తి గవరం ఏలు సిత్తాన్. దేవుణు సీనా ఇజి ఒట్టు కిత్తి వన్ని ఆత్మ యేసుజ్ సిత్తాన్. ఏలు మీరు సుడేజినికెజ్ వెంజినికెజ్ యేసు మజి సీనా ఇజి వెప్టొ దేవుణు ఆత్మనె.

\* 2:15 2:15 యూదురు పండొయ్ వేడేదు పెందాల్పె ఉణెవెర్. పార్లనం వీజితి వెనుక తొమ్మిది గంట వెనుకానె ఉణార్ † 2:17 2:17 దర్సనమ్కు. దేవుణుబాణిజ్ వాని మాటెజ్ బొమ్మెజ్ కలాదు సుడేతి లెకెండ తెలివి మహివలె నూణిక

34-35 దావీదురాజు వెహ్తాక వన్ని వందిజె ఆవద్. దావీదురాజు పరలోకమ్దు సొన్వన్. గాని వాండ్రు ఈహూ వెహ్తాన్, నాను నిజి పడఁజ వరిజ్ నీ పాదమ్కాజ్ ముణుకుజ్ ఊర్జి మాడిన్పిన్పిదాక నీను నా ఉణెర్ పడఁకాదు బసి మన్అ ఇజి దేవుణు నా ప్రబు వెట వెహ్తాన్.

36 పేతురు మరి వెహ్తాన్, “ఇస్రాయేలు కుటుమ్దికార్ ఆతి మాటు విజెటె యాక అనుమానం సిల్లెండ నెస్తెజ్ వలె. మీరు సిలువాద్ సప్తి యేసుజ్ దేవుణు ప్రబువజ, క్రీస్తువజ వీర్పాటు కిత్తాన్”.

37 యాక వెహారె లోకుర్ వరి మన్గుదు నండొ బాద ఆజి పేతురుజ్ మరి అపొస్తురుజ్ వెన్బాతార్, “దాదారండె, ఏలు మాపు ఇనిక కిదెజ్ అట్నాప్?”.

38 అయావలె పేతురు వెహ్తాన్, “మీ పాపమ్కు విజు ఒప్పుకొడఁజి డిసిసిజి, దేవుణుదిజ్ లోజిజినాప్ ఇజి విజెరిజ్ తోరిస్తెజ్ యేసు, క్రీస్తు ఇజి, వాండ్రు, మీ ప్రబు ఇజి తోరిస్తెజ్ బాప్తినం లాగె ఆదు. అయావలె మీ పాపమ్కు నొరె ఆనె. దేవుణు సీనా ఇజి ఒట్టు కిత్తి దేవుణు ఆత్మ నిజి దొహ్కాద్లె.

39 దేవుణు సీనా ఇజి ఒట్టు కిత్తి యా దేవుణు ఆత్మ మిజి, మీ కొడొరిజ్, దూరమ్ది వరిజ్ విజెరిజ్ దేవుణు సీనాన్. వన్ని మున్సు నమ్మిదెజ్ దేవుణు కూక్కి వరిజ్ విజెరిజ్ దేవుణు ఆత్మ సీనాన్”.

40 మరి నండొ నండొ మాటెజాణ్ పేతురు వరిజ్ గటిజ వెహ్తాన్. దేవుణుదిజ్ డిసి సొని యా సెఇ లోకాజ్ వాని తీర్పుదాన్ మీరు గెల్సి సొండెజ్ ఇజి పేతురు వరిజ్ మరి మరి వెహ్తాన్.

41 పేతురు వెహ్తా మాటెజ్ నమ్మితికార్ బాప్తినం లాగె ఆతార్. అయా రోజు రమరమి మూండ్రె వేలు లోకుర్ యేసుజ్ నమ్మిత్తి వరివెట కూడితార్.

### నమ్మిత్తికార్ కూడఁజి మంజినార్

42 వారు అపొస్తురు నెన్పిన్పి మాటెజ్ డిన్వండ మహార్. వారు యేసుజ్ నమ్మిత్తికార్ కూడఁజి మంజిని బాన్ డిన్వండ కూడఁజి వాతారె ప్రబు వీర్పాటు కిత్తి బోజనం †కిజి మహార్. డిన్వండ పార్లనం కిజి మహార్.

43 అపొస్తురు దేవుణు సత్తుదాన్ నండొ బమ్మాని పణిజ్ బమ్మాని గుర్తుజ్ కిత్తార్. అయావలె విజెరె నండొ బమ్మ ఆతార్.

44 యేసుజ్ నమ్మిత్తికార్ విజెరె ఉండ్రె మన్గు మంజి వరిజ్ కల్లితి మహిక విజు విజెరి వందిజ్ కర్సు కిత్తార్.

45 అక్కాదె ఆవండ వారు వరి ఆస్తిజ్ పొర్సి ఎయెజ్ ఎయెజ్ అవ్సరం మనాదొ వరిజ్ సిత్తార్.

46 రోజు తవ్వండ వారు యెరూసలేమ్దు మన్ని దేవుణు గుడిది డేవాదు కూడఁజి వాజి మహార్. వారు విజెరె ఇల్లుదిజ్ తవ్వండ కూడఁజి వాతారె సర్ల ఆజి బోజనం కిజి మహార్. ఎయెజ్బా అవ్సరం మన్ని వరిజ్ వారు సర్లదాన్ సీజి మహార్.

47 వారు దేవుణుదిజ్ స్తుతి కిజి మహార్. బాన్ మహికార్ విజెరె యా యేసుజ్ నమ్మిత్తి వరి వందిజ్ ‘వీరు ఎసొనొ నెగ్గికార్’ ఇజి వెహ్తార్. రోజురోజు యేసుప్రబు మున్సు నమకం ఇడఁజి వరి లెక్క వాండ్రు నండొ కిత్తాన్.

## 3

### నడిదెజ్ అట్ఇ సొట వన్నిజ్ పేతురు నెగెండ కిత్తాన్.

1 ఒర్నెండు వేలె మూండ్రె గంటెజ్ టయమ్దు, లోకుర్ దేవుణు గుడిదు పార్లనం కిని టయమ్దు పేతురు, యోహాను, రిఎర్ కూడఁజి దేవుణు గుడిదు సొన్పి మహార్.

2 పుట్టి బాణిజ్ అసి నడిదెజ్ అట్ఇ ఒరెన్ సొట వాండ్రు అబ్బె దేవుణు గుడి లోఇ సొని సరివడఁకాద్ డబ్బు లొసి మహాన్. దేవుణు గుడిది డేవాదు సొని అయ సరి పేరు సుందరం ఇహార్. అయ సొట వన్నిజ్ వన్ని లోకుర్ రోజు పిండిజి తస్సి అయ పడఁకాద్ ఇడఁజి మహార్.

3 పేతురు యోహాను దేవుణు గుడిదు సొని సరి డగ్రు వాతిజ్ అయ సొట వాండ్రు డబ్బుజ్ లొస్తాన్.

4 లొస్తిజ్, పేతురు వన్నిజ్ డిటం బేస్తాన్. యోహానుబా వన్నిజ్నె డిటం బేస్తాన్. పేతురు వన్నివెట, “నీను మా దరోట్నె బేస్అ” ఇహాన్.

5 అందెజె సొట వాండ్రు, వీరు ఇనికబా సీనార్ ఇజి ఒడిబిజి వరి దరోట్నె బేస్తాన్.

6 గాని పేతురు, “నిజి సీదెజ్ నా బాన్ డబ్బుజ్ సిల్లు. గాని నా బాన్ మనిక నాను నిజి సీనా. నజరేతుదికాన్ యేసుక్రీస్తు అతికారమ్దాన్ నీను నడిఁఅ”, ఇహాన్.

7 పేతురు అయ సొట వన్నిజ్ ఉణికిదు అస్తాండ్రె నిక్తాన్. వెటనె వన్ని పాదమ్కు కణ్క కాల్కు సత్తు ఆతె.

† 2:42 2:42 యేసుప్రబు సాపు వందిజ్ గుర్తు కిదెజ్ మన్ని బోజనం

8 వాండ్రు లిబ్నె నిజితండ్రె నడితాన్. పేతురు యోహాను వెట దేవుణు గుడిః డేవాదు నడిఃజి సొహండ్రె డాట్టి దేవుణుదిజ్ స్తుతి కిత్తాన్.

9 వీండ్రు నడిఃసినిక, దేవుణుదిజ్ స్తుతి కినిక విజేరె సుడఃతాన్.

10 దేవుణు గుడిఃదు సొని సుందరం ఇని సరిడగ్రు బసి డబ్బు లొసి మహి అయ సొట వాండ్రు వీండ్రె ఇజి వారు గుర్తు అస్తార్. వన్నిజ్ జర్గితిక సుడఃజి వారు విజేరె గొప్ప బమ్మ ఆతార్.

**దేవుణు గుడిఃదు మన్ని లోకుర్ వెట పేతురు వర్గిజినాన్**

11 పేతురు, యోహానుని అయ నెగెండ ఆతికాన్ దేవుణు గుడిఃదు మన్ని సొలోమోను ఇని అరబుదు మహార్. ఆ నెగెండ ఆతికాన్ పేతురుజ్ యోహానుజ్ గటిజ కిక్కాజ్ అసి మహాన్. అబ్బె మహికార్ జర్గితిక సుడఃజి గొప్ప బమ్మ ఆతారె పేతురు యోహానుని నెగెండ ఆతి సొట వాండ్రు మహిబాన్ ఉహ్మోసి వాతార్.

12 లోకుర్ విజేరె కూడఃజి వానిక సుడఃతండ్రె పేతురు వరిజ్ వెన్బాతాన్, “ఇస్తాయేలు లోకాండె, ఇబ్బె జర్గితిక సుడఃజి మీరు ఎందనిజ్ బమ్మ ఆజనిదెర్? మీరు ఎందనిజ్ మజి బేసినిదెర్? మా సొంత సత్తుదాన్, మా బక్తిదాన్ వీండ్రు నడిఃదెజ్ కిత్తాప్ ఇజి మీరు ఒడిఃబిజినిదెరా?”

13 మా అనిగొగోర్ ఆతి అబ్రాహాం, ఇస్సాకు, యాకోబు పార్దనం కిత్తి దేవుణు, యా సొట వన్నిజ్ నెగెండ కిజి వన్ని సేవ కినికాన్ ఆతి యేసుజ్ నండొ మర్యాద సిత్తాన్. గాని మీరు యా యేసుజ్ సప్తెజ్ ఒపజెప్పిదెర్. పిలాతు యేసుజ్ డిఃసిసిదెజ్ ఒడిఃబిత్తిజ్బా మీరు పోని ఇహిదెర్.

14 పాపం సిల్లి నీతినిజయ్తిమన్ని వన్నిజ్ మీరు పోని ఇజి వెప్తాదెర్. లోకాజ్ నప్పి ఒరెన్ వన్నిజ్ మీరు డిఃసిసిదు ఇజి వెప్తాదెర్.

15 విజు దన్నిజ్ బత్కు సిత్తి వన్నిజ్ మీరు సప్తిదెర్. గాని దేవుణు వన్నిజ్ మర్జి నిక్తాన్. యా సజతి వందిజ్ మాపు విజెపె సాసీర్.

16 యేసు సత్తుదాన్నె యా సొట వాండ్రు సత్తుఆతాన్. మీరు విజిదెరె ఏలు సుడఃజినిక యేసు పేరుదు ఇడ్డి నమకమ్దానె వాతాద్. యేసు మున్కు ఇడ్డి నమకమ్దానె విన్నిజ్ సత్తు వాతాద్”.

17 “ఏలు నా తంబెరిజాండె, మీరుని, మీ పెద్దెలుజ్, యేసుజ్ కిత్తిక మీరు ఇనిక కిజినిదెరొ ఇజి నెన్విండ కిత్తిదెర్ ఇజి నాను నెన్ను.

18 దేవుణు నండొ వంటిజ్ ముందాల్నె విజేరె ప్రవక్తర్ వెట ‘వన్ని క్రీస్తు కస్టమ్కు ఒరిస్సాలె’ ఇజి వెప్తా మహాన్. దేవుణు ముందాల్నె వెప్తావజనె ఈహు జర్గితాద్.

19-20 దేవుణు మీ పాపమ్కు సెమిన్ని వందిజ్ మీరు మీ పాపమ్కు ఒప్పుకొడఃజి డిఃసిసిజి దేవుణు డగ్రు మర్జి రదు. దేవుణు మీ ఆత్మదిజ్ నెగ్గి పాణం సీని వందిజ్, దేవుణు మీ వందిజ్ ఏర్పాటు కిత్తి క్రీస్తు ఆతి యేసుజ్ మీ డగ్రు పొక్కి వందిజ్ దేవుణు డగ్రు మర్జి రదు.

21 దేవుణు ముందాల్నె వాండ్రు పొక్తి ప్రవక్తర్ వెట వెప్తావజ దేవుణు విజు దన్నిజ్ కొత్తాక లెకెండ కినిదాక యేసు పరలోకమ్దు మండ్రెజ్ వలె.

22 దేవుణు - ప్రవక్తరు లొఇ ఒరెన్ మోసె ఇనికాన్ ఈహు వెప్తాన్: “ప్రబు ఆతి మీ దేవుణు, నా లెకెండ ఒరెన్ ప్రవక్తెజ్ మీ లోకుర్ లొఇహాన్ పుటిస్సాన్లె. వాండ్రు వెప్పొక విజు మీరు నెగ్రెండ వెంజి లొజిదెజ్ వలె.

23 ఎయెర్బా ఆ ప్రవక్త వెప్పొక వెంజి లొజివిండ మహిజ వాండ్రు దేవుణు లోకుర్ వెట మన్విండ పూర్తి పాడాఃనా సొనాన్.

24 సముయేలు ప్రవక్త, వన్ని వెనుక వాతి ప్రవక్తరు విజేరె యా దినమ్కాజ్ వందిజ్ దేవుణు సిత్తి మాటెజ్ ముందాల్నె వెప్తా మహార్.

25 దేవుణు ప్రవక్తర్ వెట కిత్తి ఒట్టు మీ వందిజె. దేవుణు మీ అనిగొగోరు వెట కిత్తి ఒట్టు మీ వందిజె. మీ అనిగొగో ఆతి అబ్రాహాం వెట దేవుణు కిత్తి ఒట్టు ఇనిక ఇహిజ, మీ తెగాది వన్ని బాణిజ్ యా లోకమ్దు మన్ని విజేరిజ్ నాను దీవిన్ను.

26 అందెజె దేవుణు వన్ని సేవ కిని క్రీస్తుజ్ ఏర్పాటు కిత్తాండ్రె ముందాల మీబానె పొక్తాన్. ఎందనిజ్ పొక్తాన్ ఇహిజ మీ సెఇ పణిజాణ్ మజి డిఃబిసి దేవుణుబాన్ మర్జి తసి మిజి దీవిస్తెజ్ వన్నిజ్ పొక్తాన్”, ఇజి పేతురు వెప్తాన్.

## 4

**పేతురుజ్ యోహానుజ్ అస్తార్**

1 పేతురు యోహాను లోకుర్ వెట వర్గిజ మహిజ్ పుజేరిజు, సదుకెయరు, దేవుణు గుడిడు మన్ని జమాన్జ అతికారి పేతురు యోహాను బాన్ వాతార్.

2 అపొస్తురు నెన్పిసినిక వెహారె వారు కోపం ఆతార్. ఎందనిజ్ ఇహిజ యేసు సాజి మర్జి బత్తితాన్ ఇజి వెప్పి సాతికార్ మరి బత్తినార్ ఇజి వారు రుజుప్ కిత్తార్.

3 వారు పేతురుజ్ యోహానుజ్ తొవ్తా ఒతారె మహ్న నాండిజ్ పెందాల్ దాక జెలిదు ఇట్టార్. ఎందనిజ్ ఇహిజ అయావలె పొదొయ్ ఆత మహాద్.

4 గాని వారు నెన్పిసినిక వెహికార్ నండో లోకుర్ యేసుజ్ నమ్మితార్. యేసుజ్ నమ్మిత్తి వరి లెక్క ఏలు రమరమి అయ్దు వేలు ఆతార్.

5 మహ్న నాండిజ్ యూద అతికారిజ్, యూద పెద్దెలుజు, యూదురి రూలు నెస్పిసినికార్ వీరు విజేరె యెరూసలేమ్దు కూడిత వాతార్.

6 విజేరె పుజేరిజ మున్కు పెరి పుజేరి ఆతి అనయు, కయపయు, పెరి పుజేరి కుటుమ్దికార్ యోహాను, అలెక్సంతరు ఇనికార్, మరి సెగొండార్ మొగకొండోర్ బాన్ కూడిత వాతార్.

7 వారు పేతురుజ్ యోహానుజ్ వరి ముందాల నిల్వారె వెన్బాతార్, “మీరు ఎమేణి సత్తుదాన్, ఎయె పేరుదాన్ ఇక కిత్తిదెర్?”.

8-9 అయావలె దేవుణు ఆత్మ సత్తు పేతురు మున్కు వాతాద్. అయ సత్తుదాన్ నె పేతురు వెవ్తాన్: “లోకాజ్ అతికారిజాండె, పెద్దెలుజాండె, యా సొట వన్నిజ్ కిత్తి నెగ్గి పణి వందిజ్ వాండ్రు ఎయె సత్తుదాన్ నెగెండో ఆతాన్ ఇజి మీరు మజి నేండ్రు కరాయి ఇజినిదెర్.

10 దిన్ని వందిజ్ మాపు వెవ్తాజ్ ఇహిజ, మీరు విజిదెరె, ఇస్రాయేలు లోకుర్ విజేరె యాక నెస్సెజ్ వలె. మీరు సిలువాదు డెయ్జి సప్తి యేసుక్రీస్తుజ్ దేవుణు మర్జి బత్తిస్తాన్. సాతి బత్తితి నజరేతు వాండ్రు ఆతి యేసుక్రీస్తు సత్తుదాన్ నె వీండ్రు పూర్తి నెగెండో ఇజి మీ నడిమిదు మనాన్.

11 యా యేసుక్రీస్తు వందిజ్ ఈహు రాస్త మనాద్. అక్క ఇనిక ఇహిజ, ఇల్లు తొప్పి మీరు నెక్తిపొక్తి పణుకునె మూలదిజ్ మూలపణుకు ఆతార్.

12 యేసునె మిజి వాజిని సిక్నదాన్ గెల్పెస్సెజ్ అట్నాన్. ఎందనిజ్ ఇహిజ యా లోకమ్దు లోకాజ్ వాని సిక్నదాన్ వరిజ్ గెల్పెస్సెజ్ మరి ఎయెరి పేరుబా దేవుణు సివితాన్. యేసు పేరునె సిత్తాన్.

13 పేతురు యోహాను తియెల్ ఆవిండ నెగెండో వర్గిజిని మాటజ్ వెంజి సన్హద్రిం సజమ్దికార్ బమ్మ ఆతార్. ‘వీరు ఇనికబా నెన్ఇకార్, పెరి సదువు నద్విఇకార్’ ఇజి నెస్తారె బమ్మ ఆతార్. పేతురు యోహాను యేసు వెట కూడేజి మహికార్ ఇజి వారు నెస్తార్.

14 గాని ఆ నెగెండో అతికాన్ పేతురు యోహాను వెట నిల్పి మహిజ్ ఇనికబా మర్జి వెవ్తాజ్ సన్హద్రిం సజమ్దికార్ అట్వెతార్.

15 అందెజె వారు పేతురుజ్ యోహానుజ్ నెగెండో ఆతి వన్నిజ్ సజమ్ లొఇహాన్ వెల్లి పొక్తారె వరి లొఇ వారె వర్గితార్.

16 “విరిజ్ ఇనిక కిడెజ్? వీరు కిత్తి బమ్మాని పణి వందిజ్ యెరూసలేమ్దికార్ విజేరె నెసినార్. అక్క జర్గివెతాద్ ఇజి మాటు వెవ్తాజ్ అట్వెట్.

17 యేసు పేరు అసి ఎయెన్ వెటబా ఎసెజ్బా ఇనికబా వెహ్మాట్ ఇజి మాటు విరిజ్ గటిజ వెహ్మాట్. యా సజతి మహికార్బా నెన్విండ మండ్రెజ్” ఇహార్.

18 అయావలె వారు పేతురుజ్ యోహానుజ్ లొఇ కూక్తారె, “ఎసెజ్బా యేసు పేరు అసి వెహ్మాట్. యేసు పేరు అసి బోదిస్మాట్”, ఇజి ఆడ్ర సితార్.

19 గాని పేతురు యోహాను ఈహు వెవ్తార్, “ఏలు మీరె వెవ్తు, దేవుణుదిజ్ లోబడేదెజా మిజి లొజిదెజా? దేవుణు సుడేతిజి ఎమేణిక సరియాతిక?”

20 మాపు ఇహిజ, మాపు సుడేతి దన్ని - వందిజ్ మాపు వెహి దన్ని వందిజ్ వెహి - విండ మండ్రెజ్ అట్వెప్”.

21 పేతురుజ్ ని యోహానుజ్ ఎలాగ సిక్న సిదెజ్ ఇజి వారు నెన్వితార్. ఎందనిజ్ ఇహిజ దేవుణు కిత్తి గొప్ప పణి వందిజ్ లోకుర్ విజేరె దేవుణుదిజ్ స్తుతి కిజి మహార్. అందెజె సజమ్దికార్ పేతురుజ్ యోహానుజ్ ‘యేసు పేరు అసి వెవ్తాజ్ ఆవిద్’ ఇజి గటిజ మరి బెద్రిసి వెవ్తారె డిస్తార్.

22 దేవుణు వన్ని సత్తుదాన్ బమ్మాతి పణి కిజి నెగెండో కిత్తి యా సొట వన్నిజ్ వయ్సు నలపయ్ పంటిజ్ ఎక్కునె మహాద్.

నమ్మిత్తి వరి పార్లనం

23 పేతురు యోహాను డిబె ఆతి వెటనె నమ్మిత్తి వరి డగ్రు సొహార్. సొహారె పెరి పుజేరిజు, పెద్దెలుజు వరి వెట వెప్తొక విజు వెప్తొర్.

24 పేతురు యోహాను వెప్తొక వెహారె వారు విజేరె కూడితారె ఉండ్రె మన్నుదాన్ దేవుణుదిజ్ ఈహు పార్దనం కిత్తార్, “విజు దన్నిజ్ ప్రబు ఆతి దేవుణు, నీనె ఆగాసం, బూమి, నమ్దరం, వనక లోఇ మన్ని విజు దన్నిజ్ పుటిస్తె.

25 దేవుణు, నీ సేవ కినికాన్ ఆతి మా అనిగొగొ దావీదురాజు వెప్తొక నీ ఆత్మ సత్తుదాన్ నీనె వెహొప్పిస్తె. అక్క ఇనిక ఇహిజు, యా యూదురు ఆఇకార్ ఎందనిజ్ కోపం ఆజినార్. యా లోకుర్ ఎందనిజ్ ఇని దన్నిజ్ పణిదిజ్ రెవకెజ్ ఒడిబిజినార్?

26 బూ లోకమ్ది రాజుర్, అతికారి లోకుర్, ప్రబు ఆతి దేవుణు వెట, దేవుణు ఏర్పాటు కిత్తి క్రిస్తు వెట ఎద్రిస్తెజ్ కూడేజి వాజినార్.

27 ఆహె హేరోదు, పొంతి పిలాతు, యూదురు, యూదురు ఆఇ లోకుర్ వెట యా పట్టుమ్దు కూడిత మహార్. వారు నీను ఏర్పాటు కిత్తి పాపం సిల్లి నీ సేవ కినికాన్ ఆతి యేసుజ్ సప్తెజ్ ఒడిబిజి మహార్.

28 దేవుణు, నీ సత్తుదాన్, నీ ఇన్జమ్దాన్ ఇనిక జర్గినాద్లె ఇజి ముందాల్నె నీను ఏర్పాటు కిత్తిదొ అయాలెకెండె వారు కిత్తార్.

29 ఏలు ప్రబువా, వారు మజి బద్రిసిని దన్నిజ్ సుడేఱ. మీ సేవ కినికాన్ ఆతి మాపు నండొ దయ్ రమ్దాన్ నీ మాటెజ్ బొద్రిస్తెజ్ మజి సత్తు సిదా.

30 కన్జమ్కు మన్ని వరిజ్ నెగెండొ కిజి మీ సత్తు తోరిన్అ. మీ బాణిజ్ వాతి నమ్మిదెజ్ తగ్గికాన్ ఆతి మీ సేవ కినికాన్ ఆతి యేసు పేరుదాన్ గొప్ప బమ్మాతి పణిజ్ బమ్మాతి గుర్తుజ్ కిఅ”.

31 వారు పార్దనం కిత్తి వెనుక వారు కూడేజి మహి బాడ్డి కద్దితాద్. అయావలె దేవుణు ఆత్మ సత్తు వరి మున్ను వాతాద్. వారు దయ్ రమ్దాన్ దేవుణు మాటెజ్ వెప్తొర్.

### నమ్మితికార్ వరి ఆస్తి అపొస్తురుబాన్ తతార్

32 నమ్మితికార్ విజేరె ఉండ్రె మన్ను ఆజి ఎయెన్బా సరినె వన్నిజ్ మన్నిదన్ని - బాణిజ్ ఇనికబా నాదినె ఇజి ఆవిద్ ఇజి వరిజ్ మన్నిక విజెరె వందిజ్ కర్పు కిత్తార్.

33 దేవుణు సత్తుదాన్ బమ్మాతి పణిజ్ కిజి అపొస్తురు ప్రబు ఆతి యేసు, సాతివరి - బాణిజ్ మర్జి బత్తితాన్ ఇజి సాసి వెప్పి మహార్. దేవుణు దయాదర్శం వరి మున్ను నండొ మహాద్.

34-35 బూమిజ్ ఇల్కు కల్లితి మహికార్ విజేరె అక్కెజ్ పొర్ని కల్లితి డబ్బు అపొస్తురు డగ్రు తతార్. విజేరిజ్ వరివరి అవ్సరం సుడేజి సిబాజి సితార్. అందెజె వరి లోఇ ఎయెన్బా సరి అవ్సరం వాతిజ తక్కు సిల్లెండ ఆతాద్.

36 కుప్ర దేసమ్దు పుట్టి లేవి కుటుమ్దికాన్ ఆతి యోసేపు ఇని ఒరెన్ మహాన్. వన్నిజ్ అపొస్తురు బర్బు ఇజి కూక్కి మహార్. (వన్ని పేరు అర్దం ఇనిక ఇహిజు సాయం కినికాన్ ఇజి)

37 వాండ్రు వన్నిజ్ మహి బూమి ఉండ్రె పొర్ని అయ డబ్బు అపొస్తురు డగ్రు తతాన్.

## 5

### అననియ, సపీర

1 అయావలె అననియ ఇని ఒరెన్ మహాన్. వన్ని ఆల్ని పేరు సపీర. వారుబా ఉండ్రె బూమి పొర్తార్.

2 పొర్తారె మాసి సెగం ఇట్టాండ్రె మిగ్లితి డబ్బు అపొస్తురు డగ్రు ఒతాన్. యాక విజు ఆల్నిబా నెస్తాద్.

3 అయావలె పేతురు అననియెజ్, “నీ బూమి పొర్తి డబ్బుజాణి సెగం డాప్పి దేవుణు ఆత్మదిజ్ ఎందనిజ్ మొసెం కిత్తి? నన్ని మొసెం పణి కిదెజ్ నీను ఎందనిజ్ నీ మన్నుదిజ్ నయ్నానుజ్ ఒపజెప్పి?

4 బూమి నీ బాన్ మహివలె నీదినెగదె. అక్క పొర్తివలెబా ఆ డబ్బు నీ సొంతనె గదె. నిన్ని పణి కిదెజ్ ఎందనిజ్ నీ మన్నుదు ఒడిబిజి? నీను లోకు వెట ఆవిద్, దేవుణు వెటనె అబద్దం వర్గితి”, ఇజి వెప్తొన్.

5 అననియ యా మాటెజ్ వెహివెటనె అర్తాండ్రె పాణం డిస్తాన్. యాక వెహికార్ విజేరె తియెల్ ఆతార్.

6 ద్జడాయెర్ వాతారె పీనుగుదిజ్ పాతెజ్ సుటిస్తారె, పిండిజి ఒతారె ముస్తార్.

7 రమరమి మూండ్రె గంటెజ్ వెన్కా వన్ని ఆల్ని జర్గితిక నెన్ఎండ లోఇ వాతాద్.

8 పేతురు దన్ని వెట, “మీరు యా బూమి నిస్సా డబ్బుదిజె పొర్తిదెరా, వెహాఅ”, ఇహాన్. వెన్బాతిజ్ అది, “నిస్సాదిజె పొర్తాప్”, ఇహాద్.

9 పేతురు దన్ని వెట, “మీరు రిఇదెర్ కూడేజి దేవుణు ఆత్మదిజ్ తప్పు వెహ్తిదెర్. దేవుణు ఆత్మదిజ్ తప్పు వెహ్సి మొసెం కిదెజ్ మీరు ఎందనిజ్ ఒడిబిత్తిదెర్? ఇదిలో నీ మాసిజ్ ముస్తికార్ ఇబ్బె మనార్. వారు నిజీబా పిండిజి ఒనార్లె”, ఇహాన్.

10 వెటనె అది పేతురు పాదం డగ్గు అర్తాదె పాణం డిస్తాద్. అయ దజ్డాడాయెర్ లొఇ వాతారె అది సాతాద్ ఇజి సుడేతారె దన్నిజ్ పిండిత ఒతార్. ఒతారె మాసి డగ్గు ముస్తార్.

11 దేవుణు సజమ్దు మహికార్ విజేరె, యా మాటెజ్ వెహికార్ విజేరె గొప్ప తియెల్ ఆతార్.

### అపొస్తురు నండొ లోకాజ్ నెగెండ కిత్తార్

12 అపొస్తురు లోకుర్ నడిమి నండొ బమ్మాతి పణిజ్ బమ్మాతి గుర్తుజ్ కిత్తార్. నమ్మితికార్ విజేరె ఉండ్రె మన్ను ఆజి దేవుణు గుడిడు మన్ని సొలొమోను అరుజు ఇని బాడ్డిడు కూడేజి వాజి మహార్.

13 ‘యా నమ్మితికార్ ఎస్సానొ నెగ్గికార్’ ఇజి లోకుర్ వెహ్తార్. అహిజ్బా మరి ఎయెర్బా నమ్మితికార్ వెట కూడేదెజ్ తియెల్ ఆతార్.

14 గాని నండొ లోకుర్, మొగ్గకొడొర్, అయ్లికొడొర్ యేసుజ్ నమ్మిత్తారె నమ్మిత్తి వరివెట కూడితార్.

15 అందెజె అపొస్తురు కిత్తి గొప్ప పణిజ్ సుడేతారె కస్టం మన్ని వరిజ్ సాప ముస్సు మన్నుమ్ ముస్సు పేతురు నడిజి వాని సరిపడకాదు తతార్. ఎందనిజ్ ఇహిజి పేతురు అయ సరి వానివలె వన్ని నీడేబా తాక్తిజి నెగెండ ఆనార్ ఇజి.

16 యెరూసలేమ్దు సురుల మన్ని నాహ్కాణిజ్బా నండొ లోకుర్ బాన్ వాతార్. వరి లొఇ కస్టమ్కు ఆతివరిజ్, దెయమ్ కాణిజ్ మాలెజ్ ఆతివరిజ్ అబె తసి మహార్. విజేరె నెగెండ ఆతార్.

### యూదురి అతికారిజు అపొస్తురిజ్ మాలెజ్ కిత్తార్

17 నస్తివలె విజేరె పుజేరిజి ముస్సు పెరి పుజేరి, వన్ని వెట కూడితి మహికార్ విజేరె, ఇహిజి, సదుకెయరు ఇని పార్తి లొఇ నెగెండొర్ అపొస్తురు వెట గొప్ప గోస ఆతార్.

18 వారు అపొస్తురుజ్ అస్తారె పట్నమ్దు మన్ని జెలిదు ఇట్టార్.

19 గాని దేవుణు దూత పొదొయ్ వాతండ్రె జెలిది సేఫ్లాజ్ రేతాండ్రె వరిజ్ వెల్లి తతాన్.

20 వెల్లి తతాండ్రె దూత, “మీరు దేవుణు గుడి డేవాదు సొన్ని లోకాజ్ విజెరిజ్ యా కొత్త బత్తువందిజ్ పూర్తి వెహ్తూ” ఇహాన్.

21 వారు జాయ్ ఆని డగ్గు దేవుణు గుడి డేవాదు సొహారె దూత వెహ్తి వజి లోకాజ్ బొద్దిస్తాజ్ మొదొల్స్తార్. వెనుక, విజేరె పుజేరిజి ముస్సు పెరి పుజేరి, వన్నివెట మహికార్ వాతారె సన్హద్రి సజమ్దు మహి యూదవెద్దెలుజి విజేరిజ్ కూక్కి మీటిజ్ కిత్తార్. మీటిజ్దు కూడితారె జెలిదు మన్ని అపొస్తురుజ్ వరిబాన్ తత్తెజ్ జమాన్జి పొక్తార్.

22-23 గాని వారు జెలిదు సొన్ని సుడేతిజ్ పేతురుని యోహాను లొఇ సిల్లెర్. వారు మహ్తా వాతారె వెహ్తార్, “మాపు సొన్ని సుడేతిజ్ జెలిదు సేఫ్లాజ్ తాలం అర్పె మహె, కాప్ కినికార్ సేఫ్లాజి ముందొల్నె నిహ మహార్. గాని మాప్ సొన్ని సేఫ్లాజ్ రేనివలె లొఇ వారు సిల్లెర్”.

24 వీరు వెహ్తిక వెహారె పెరి పుజేరిజు, దేవుణు గుడిది జమాన్జి అతికారి గొప్ప బమ్మ ఆతారె, ‘ఇక ఇనిక ఆనాద్లెస్’ ఇజి ఒడిబిత్తార్.

25 అయావలె ఒరెన్ వాతండ్రె, “ఇదిలో మీరు జెలిదు ఇడ్డిమహి లోకుర్ ఏలు దేవుణు గుడిడు నిహారె లోకాజ్ బొద్దిసినార్”, ఇజి వెహ్తాన్.

26 వెహ్తిజ్, అతికారి జమానుజి వెట సొహండ్రె అపొస్తురుజ్ కూక్త తతార్. ‘లోకు మజి పణుకుజాణిజ్ డెయ్నారెను’ ఇజి తియెల్ ఆతారె అపొస్తురుజ్ ఒపిసి కూక్త తతార్.

27 వరిజ్ కూక్త తత్తారె సన్హద్రిం సజం నడిమి నిల్వ్తార్. నిల్వ్తారె విజేరె పుజేరిజి ముస్సు పెరి పుజేరి వరివెట వెన్బాతాన్:

28 “యా యేసు పేరు అసి బొద్దిన్మాట్’ ఇజి మాపు మిజి డటం బెద్రిసి వెహ్తాప్గదె. గాని మీరు యెరూసలేమ్దు విజు మీ బొద్ సాట్టిదెర్. సాతి వన్ని వందిజ్ మాప్ వన్నిజ్ సప్తాప్ ఇజి మీరు మా ముస్సు తప్పు ఇడేదెజ్ సుడేజినిదెర్”, ఇహాన్.

29 దన్నిజ్ పేతురు మరి అపొస్తురు, “లోకాజ్ ఆవద్, దేవుణుదిజె మాపు లొజిదెజ్ గదె?”

30 మీరు యేసుజ్ సిలువాదు డెయ్జి సప్తిదెర్. గాని మా అనిగొగిరి వలెహాన్ అసి మన్ని దేవుణు, వన్నిజ్ సాతి వరి బాణిజ్ నిక్తాన్.

31 యా యేసుజ్ రాజు మరిసి వజి, విజెరిజ్ రక్సిసిని వన్ని వజి దేవుణు గొప్ప మర్కాద సితండ్రె వన్ని ఉణెర్ పడకాదు బన్పిస్తాన్. ఎందనిజ్ ఇహిజి ఇస్రాయేలు లోకుర్ వరి పాపమ్కు డిసి దేవుణుదిజ్ లొజిదెజ్. వరి పాపమ్కు నొరె అదెజ్ సరి సిదెజ్ ఇజి దేవుణు వన్ని ఉణెర్ పడకాదు యేసుజ్ బన్పిస్తాన్.

32 యా సజతిజ వందిజ్ మాపు సాసిర్. దేవుణుదిజ్ లోజిని వరిజ్ దేవుణు సీని వన్ని ఆత్మబా యా సజతిజ వందిజ్ సాసి”, ఇజి వెహ్టార్.

33 అపొస్తురు వెహ్టిక వెంజి విజేరె పుజేరిజ ముస్కు పెరి పుజేరి, వన్నివెట మహికార్ కోపం ఆతారె ‘వరిజ్ సప్పాప్’ ఇజి ఒడిబిజ్టార్.

34 అయావలె సజమ్దు మహి పరిసయరు లోఇ ఒరెన్ గమాలియేలు ఇనికాన్ సన్హద్రిం సజమ్దు నిహండ్రె వెహ్టాన్, “వీరు సణెం సజమ్దాన్ వెల్లిసె మనీర్”. గమాలియేలు ఎయెన్ ఇహిజ యూదురి రూలుజ్ నెస్సిసిని వరిలోఇ ఒరెన్. లోకుర్ విజేరె వన్నిజ్ మర్యాద సీజి మహార్.

35 అపొస్తురుజ్ వెల్లి పోక్తారె గమాలియేలు సజమ్ది లోకాజ్ ఈహు వెహ్టాన్, “ఇస్రాయేలు లోకాండె, యా లోకాజ్ మీరు ఇనిక కిదెజ్ ఇజి ఒడిబిజినిదెరో జాగర్త మండ్రు.

36 సెగం పంటజ్ ముందాల దూద ఇనికాన్ ఒరెన్ నిజితండ్రె నాను గొప్పవాండ్రు ఇజి వెహ్టాన్. రమరమి నాల్లి వందెజ్ లోకుర్ వన్నివెట కూడితార్. ఎయెరో వన్నిజ్ సప్టార్. వన్నివెట కూడితి మహికార్ విజేరె సెద్రితారె వరి పణి ఇని దన్నిజ్ రెవండ్రాతా సాహద్.

37 వెసుక, లోకుర్ లెక్క సుడేని జనాబా దినమ్కాజ్ గలీలయ వాండ్రు ఆతి యూద ఇనికాన్ ఒరెన్ నిజితాన్. మంద లోకుర్ వన్నివెట కూడితారె వారు ఏలుబడి: కినివరి ముస్కు ఎద్రిస్తార్. వన్నిజ్బా ఎయెరో సప్టార్. వన్నివెట కూడితి మహికార్ విజేరె సెద్రిత సాహర్.

38 అందెజె, నాను ఇనిక వెహ్సిన్ ఇహిజ, విరిజ్ ఇనికబా కిమాట్. విరిజ్ డి:సిసిఅ. ఎందనిజ్ ఇహిజ విరి ఆలోసనమ్కు, విరి పణిజు లోకువలెహాన్ వాతిక ఇహిజ అది ఇనిదన్ని పణిదిజ్ రెవండ్రాన సానాద్.

39 గాని ఇక్క దేవుణు బాణిజ్ వాతిక ఇహిజ విరిజ్ అడ్డు కిదెజ్ మీరు అట్ఇదెర్. అక్కాదె ఆవిండ మీరు దేవుణు వెట టంటజ్ ఆతికార్ ఇజి మిజి తెలినాద్”.

40 సజమ్దికార్ గమాలియేలు వెహ్టి మాటదిజ్ ఒప్పకొటార్. వారు అపొస్తురుజ్ కూక్పిసి వరిజ్ కొరెడె:దాన్ డెయ్బిసి యేసు పేరు అసి ఎసెజ్బా బోదిస్మాట్ ఇజి డటం వెహ్సి వరిజ్ డి:స్తార్.

41 యేసు పేరు వందిజ్ మాలెజ్ ఒరిస్తెజ్ తగితికార్ ఆతి వందిజ్ అపొస్తురు డెయ్తి దెబ్బ తిహిజ్బా సర్ల ఆజి అబెణిజ్ సాహర్.

42 రోజు అపొస్తురు దేవుణు గుడి: డేవాదు, లోకురి ఇల్కాజ్ బోదిసి మహార్. యేసు దేవుణు పొక్తి క్రిస్తునె ఇజి నెగ్గిమాట వారు తప్విండ బోదిసి మహార్.

## 6

### అపొస్తురు ఏడుగురు మొగ వరిజ్ ఏర్పాటు కిత్తార్

1 యేసుప్రబుజ్ నమ్మితికార్ ఆ కాలమ్దు నండో లోకుర్ ఆజి వాతార్. అయావలె ముండ మణిసిరిజ్ బోజనం సీని దన్నిలోఇ, మా ముండ మణిసిరిజ్ బోజనం సివిర్ ఇజి గ్రికు బాస వర్గిని యూదురు ఏబ్రి బాస వర్గిని యూదురు ముస్కు మొరో ఆతార్.

2 అయావలె పన్నెండ మణిసిర్ అపొస్తురు నమ్మితి వరిజ్ విజెరిజ్ కూక్తరె వెహ్టార్, “మాపు బోజనం సీబాజి సీని వందిజ్ దేవుణు మాట నెస్సిస్తెజ్ డి:సి సీనిక తగివద్.

3 తంబెరిజాండె, అందెజె ఏడుగురు మొగ వరిజ్ ఏర్పాటు కిదు. మీ లోఇ దేవుణు ఆత్మ నిండ్రీతి మన్ని, గెణం నిండ్రీతి మన్ని విజేరె ఒప్పకొటి మని ఏడుగురు మొగ్గ వరిజ్ ఏర్పాటు కిదు, మాపు వరిజ్ యా పణి ఒపజెప్పాప్.

4 అహిజ మాపు పార్లనం కిదెజ్, దేవుణు - మాట నెస్సిస్తెజ్ కేట మంజినాప్”, ఇహార్.

5-6 అపొస్తురి మాటజ్ అబ్బె కూడితి మహి లోకాజ్ విజెరిజ్ ఇస్టం ఆతాద్. అందెజె దేవుణు ముస్కు పూర్తి నమకం ఇడేజి దేవుణు ఆత్మ సత్తు పూర్తి నిండ్రీతి మహి సైపాను, పిలిపు, ప్రొకొరు, నికనొరు, తిమొను, పర్మనను, యూద మతమ్దు కూడితి అంతియొకియ దేసెమ్దికాన్ నికొలాను ఇని ఏడుగురు మొగవరిజ్, నమ్మితికార్ అపొస్తురి ముందాల తతార్. అపొస్తురు పార్లనం కితారె వరి ముస్కు కిక్కు ఇడేజి వరిజ్ అయా పణి కిదెజ్ ఆతికారం సితార్.

7 అందెజె మరి నండో లోకుర్ దేవుణు మాటజ్ నమ్మితార్. యెరూసలేమ్దు మన్ని నమ్మితి వరి లెక్క నండో ఆజి వాతాద్. నండోండోర్ పుజేరిజు యేసుప్రబు ముస్కు నమకం ఇట్టార్.

### లోకుర్ సైపానుజ్ అస్తార్

8 వరి లొక ఒరెన్, సైపాను ఇనికాన్, దేవుణు దయదర్మమదాన్ దేవుణు ఆత్మ సత్తుదాన్ నిండ్రితాండ్రె లోకుర్ నడిమి గొప్పు బమ్మాని పణిజ్ బమ్మాని గుర్తుజ్ కిజి మహాన్.

9 గాని, కురెనియ పట్టుమదికార్ యూదురు, అలెక్సంత్రీయు పట్టుమదికార్ యూదురు, (వీరు లిబెర్తి ఇని యూదురు మీటిజ్ ఇండ్రోణి గుంపుదికార్) మరి కిలికియ దేసమ్దాన్ వాతి యూదురు, ఆసియ దేసమ్దాన్ వాతి యూదురు వాతారె సైపాను వెట తర్కిస్తార్.

10 గాని వాండ్రు వెప్టా మాటెజి ఎద్రిస్తైజ్ వారు అట్ఎండ్రాతార్. ఎండనిజ్ ఇహిజి దేవుణు బాణిజ్ వాతి గెణమ్దాన్, దేవుణు ఆత్మ సత్తుదాన్ సైపాను వరివెట వర్గితాన్.

11 అయావలె వారు, 'వీండ్రు మోసె ముస్సు, దేవుణు ముస్సు దూసిసిని మాటెజ్ వర్గినిక మాప్ వెహాప్' ఇజి వెప్టాజ్ సెగొండార్ లోకాజ్ ఎయెర్ నెన్విండ్రు సుత్రిస్తారె కూడుస్తార్.

12 కూడుస్తారె, లోకాజ్, పెద్దెల్జి, యూదురి రూలు నెస్సిసినికార్ విజెరిజ్ రేప్తారె వన్ని ముస్సు వాతార్. వాతారె సైపానుజ్ అస్తారె యూద పెద్దెల్జి సన్హద్రిం ఇని పెరి సజమ్దు తతార్. బానె అబద్దం సాసి వెప్టా వరిజ్ నిల్వ్తార్.

13 వారు ఈహు వెప్టార్, "వీండ్రు ఎస్తివలెబా దేవుణుదిజ్ కేటి కిత్తి యా దేవుణు గుడిదిజ్, మోసె సిత్తి రూలుజి వెత్త్రేకం వర్గిజినాన్.

14 యా సజరేతు వాండ్రు ఆతి యేసు యా దేవుణు గుడిః పాడు కినాన్, మాటు ఎలాగ నడిదెజ్ ఇజి మోసె మా అనిగొగొరిజ్ సిత్తి మాటెజ్ మారిస్తాన్ ఇజి వీండ్రు వెప్టాక మాపు వెహాప్".

15 సన్హద్రిం సజమ్దికార్ సైపాను మొకొం డిటం సుడెజి మహిజ్ వన్ని మొకొం దేవుణు దూత మొకొం లెకెండ్ర జాయ్ తోర్కిక వారు సుడెతార్.

## 7

### సైపాను సన్హద్రిం సజమ్దు మన్ని వరివెట వర్గిజినాన్

1 అయావలె విజేరి పుజేరిజి ముస్సు పెరి పుజేరి సైపానుజ్ వెన్బాతాన్, "యా మాటెజ్ నిజమా? వీరు వెప్టా లెకెండ్ర నీను వెప్టాదా సిల్లెదా?"

2 దన్నిజ్ సైపాను వెప్టాక ఇనిక ఇహిజి, "తంబెరిజాండె, బుబ్బురాండె, వెండ్రు, మా అనిగొగొ ఆతి అబ్రాహాం ఆరోసు ఇని పట్టుమదు బత్తిఎండ్ర ముందాల, మెసాపొతెమియ ఇని దేసమ్దు బత్తిజి మహాన్. అయావలె నండ్రె జాయ్ మన్ని దేవుణు వన్నిజ్ తోరె ఆతాన్.

3 దేవుణు అబ్రాహాం వెట ఈహు వెప్టాన్, 'నీను నీ దేసెం డిసి, నీ సొంత లోకాజ్ డిసి నాను నిజి తోరిసిని దేసెం సొన్అ'.

4 అయావలె వాండ్రు కల్లియుజ్ బత్తితి మహి మెసాపొతెమియ దేసెం డిసి ఆరోసు పట్టుమదు సొన్ని బత్తితాన్. వన్ని బుబ్బు సాతి వెనుక అబెణిజ్ మీరు ఏలు బత్తిజిని యా దేసమ్దు బత్తిదెజ్ దేవుణు వన్నిజ్ కూక్త తతాన్.

5 అయావలె దేవుణు వన్నిజ్ ఉండ్రీ ముక బూమిబా అక్కు సివతాన్, యా దేసమ్దు. గాని అయావలె అబ్రాహాముజ్ కొడొకర్ సిల్లితిజ్బా దేవుణు వన్ని వెట ఉండ్రీ మాట సిత్తాన్. అక్కు ఇనిక ఇహిజి, 'నిజి, నీ పొటెజాణి వరిజ్ విజెరిజ్ యా బూమి ఆనాద్'.

6 దేవుణు వన్ని వెట, 'నీ పొటెజాణికార్ ఆఇ దేసమ్దు సొనారె బానె ఆఇకార్ లెకెండ్ర మనార్. అయ దేసెమ్దికార్ నీ లోకాజ్ నాల్లి వందెజ్ పంటెజ్ వెట్టిపణి కిజిని వరిలెకెండ్ర పణి కిబిసి వరిజ్ లోజిజి మంజిని వజి ఇడెజి మాలెజ్ కినార్'.

7 గాని వారు ఎమేణి దేసమ్దు పణి కిజినారొ అయ దేసెమ్ది వరిజ్ నాను తీర్పు తీరిసి సిస సీనాలె. వెనుక వారు ఆ దేసెం డిసి వాజి యా బాడ్డిదు మంజి నజి పొగ్డిజి మాడిస్తార్లె ఇజి వెప్టా మహాన్.

8 దేవుణు అబ్రాహాం వెట 'విజెరి కుటుమ్కాజ్ పుట్టి మొగ్గ కొడొకర్జి సునతి కిదెజ్ వలె', ఇజి వెప్టాన్. అందెజె అబ్రాహాం, వన్ని మరిసి ఇస్సాకు పుట్టి ఏడు రోస్సు వెనుక మప్పా నాండిజ్, ఇహిజి, ఎనిమిది రోస్సాజ్ సునతి కిత్తాన్. ఇస్సాకు, వన్ని మరిసి యాకోబుజ్ సునతి కిత్తాన్. యాకోబు వన్ని పన్నెండు మంది మరిసిరిజ్ సునతి కిత్తాన్. యా పన్నెండు మందినె ఇస్సాయేలుది పన్నెండు కుటుమ్ది అనిగొగొర్ ఆతార్.

9-10 యా పన్నెండు మంది అనిగొగొర్ వరి లొక తంబెరి ఆతి యోసేపు ముస్సు గోస ఆతారె వన్నిజ్ గొత్తి పణి కిదెజ్ పొర్తార్. ఆహె యోసేపు అయ్గుప్పు దేసమ్దు గొత్తి పణి కిత్తాన్. గాని దేవుణు వన్ని వెట మహండ్రె వన్నిజ్ వాతి విజు మాలెజాణిజ్ తప్తిస్తాన్. దేవుణు వన్నిజ్ గెణం సిత్తిజ్ అయ్గుప్పు రాజు ఆతి పరో యోసేపు ముస్సు దయ తోరిస్తాన్. పరో రాజు యోసేపుజ్ అయ్గుప్పు దేసెమ్దిజ్ నడిపిసిని వన్నిలెకెండ్ర నిల్వ్తాన్. పరో రాజుజ్ కల్లితి మహి విజు వనకాజ్ ముస్సు నడిపిసిని వన్నిలెకెండ్ర కిత్తాన్.



11 అయావలె అయ్గుప్పు దేసమ్దు విజు, మా అనిగొగొర్ బత్తిజి మహి కనాసు దేసమ్దు విజు పెరి కరు వాతాద్. కరు వాతిజ్ నండొ మాలెజ్ వాతె. మా అనిగొగొర్ ఆతి వరిజ్ తిండి దొహ్కొవిండ ఆతాద్.

12 అయావలె, అయ్గుప్పు దేసమ్దు తిండి మనాద్ ఇజి యాకోబు వెహాన్. వెహండ్రె వన్ని మరిసిరిజ్, ఇహిజ, మా అనిగొగొరిజ్ ముందాల్నె ఉండ్రె సుటు బాన్ పోక్తాన్.

13 వారు మరి ఉండ్రె సుటు సొహిజ్, యోసేపు, వన్ని దాదారిజ్ వాండ్రు ఎయెన్ ఇజి నెల్వ కిబె ఆతాన్. అయావలె యోసేపు కుటుమ్ది వరి వందిజ్ పరో రాజు నెస్తాన్.

14 వెనుక యోసేపు వన్ని బుబ్బి ఆతి యాకోబుజ్ వన్ని సొంత లోకాజ్ విజేరిజ్ అయ్గుప్పు దేసమ్దు రదు ఇజి కబ్బు పోక్తాన్. వారు మొత్తం డబయ్ అయ్దుగురు మహార్.

15 అయావలె యాకోబు, వన్నివెట మహికార్ విజేరి అయ్గుప్పు దేసెం సొహార్. వారు అబ్బె బత్తిత్తార్. వెనుక యాకోబు, మహి అనిగొగొరు బానె సొతార్.

16 వెనుక వరి డుముక్ సెకెం ఇని పట్టుమ్దు మర్జి తత్తారె, ముందాల అబ్రాహాం హామోరు మరిసిర్ బాణిజ్ కొటి దూకి లొఇ ముస్తార్\*.

17 దేవుణు అబ్రాహాముజ్ ముందాల్నె సెత్తి మాట వజ జర్గిదెజ్ డగ్రు ఆజి వాతాద్. అయావలె మా లోకు అయ్గుప్పు దేసమ్దు నండొ లోకు ఆజి వాతాద్.

18 అయావలె, యోసేపు ఎయెన్ ఇజి నెన్ఇ ఒరెన్ రాజు అయ్గుప్పు దేసెమ్దిజ్ ఏలుబడిః కిదెజ్ మొదొల్స్తాన్.

19 యా రాజు మా లోకాజ్ మాయ మాటెజ్ వెప్పి మొసెం కిత్తాన్. గొప్ప మాలెజ్ కిత్తాన్. మొగ్గకొడొర్ పుట్టిజ వరిజ్ సప్తెజ్ వెటనె గడ్డు విసిర్దెజ్ వలె ఇజి యా రాజు ఆడ్ర సిత్తాన్. ఎందనిజ్ ఇహిజ వారు సొజి సొండ్రెజ్.

20 ఆ కాలమ్దు మోసె ఇనికాన్ ఒరెన్ పుట్టాన్. వాండ్రు సుడొదెజ్ గొప్ప నెగ్గికాన్. వాండ్రు మూండ్రె నెలెజ్ దాక వన్ని బుబ్బి ఇండ్రొ పిరితాన్.

21 మూండ్రె నెలెజ్ వెనుక వన్నిజ్ ఇండ్రొ వెల్లి సొప్పి గడ్డు ఒడ్డుదు ఇట్టార్. అయావలె పరో రాజు గాల్ని వాతాదె కొడొడిదెజ్ లాగితాదె దన్ని మరిసి లెకెండ్ పోస కిబిస్తాద్.

22 మోసెజ్ అయ్గుప్పు వరి విజు తెలివి నెన్పిస్తాన్. వాండ్రు, వర్గిని మాటెజ్ లొఇ బాగ వర్గిదెజ్ అట్నాన్. కిని పణిజ్ లొఇ నెగ్గెండ కిదెజ్ అట్నాన్.

23 మోసెజ్ నలపయ్ పంటెజ్ ఆతివలె నా సొంత లోకుర్ ఆతి ఇస్తాయెలుర్ బానె సొన ఇజి బుద్ది పుట్టాద్.

24 వాండ్రు సొహిజ్ అయ్గుప్పుదికాన్ ఒరెన్, ఒరెన్ ఇస్తాయెలు వన్నిజ్ మాలెజ్ కిజి మహిజ్ సుడొతాన్. సుడొతండ్రె, ఇస్తాయెలు వన్నిజ్ గెల్పిస్తెజ్ ఇజి అయ్గుప్పు వన్నిజ్ సప్తాన్. ఆహె నాయం తీరిస్తాన్.

25 ఇస్తాయెలు లోకాజ్ వరి బాదెజాణిజ్ డిఃబిస్తెజ్ దేవుణు నజి పోక్తాన్ ఇజి మోసె ఒడిఃబితాన్. గాని వారు అర్దం కివ్తార్.

26 మహ్న నాండిజ్ మోసె ఇస్తాయెలు లోకాజ్ సుడొఃజి సొహాన్. రిఎర్ ఇస్తాయెలు లోకుర్ టంటెజ్ ఆజి మహిజ్ మోసె వరిజ్ సుడొతండ్రె, 'ఒరె ఒరె బాబు, మీరు తంటెరి రిఇదెర్గదె? మీరు ఎందనిజ్ ఒరెన్ వన్ని ముస్సు ఒరెన్ టంటెజ్ ఆజినిదెర్' ఇజి వెప్తాండ్రె వారు రిఎరిజ్ కూడుఃపైజ్ ఇజి సుడొతాన్.

27-28 గాని ఆఇ వన్ని ముస్సు అనయం కినికాన్ వెప్తాన్, 'మా ముస్సు అతికారి వజ మండ్రెజ్, తీర్పు తీర్న్సి వన్నివజ మండ్రెజ్ నిజి ఎయెన్ ఏర్పాటు కిత్తాన్? నీను ఇఎన్ అయా అయ్గుప్పు వన్నిజ్ సప్తిలెకెండ్ నజిబా సప్తెజ్ ఇజి సుడొఃజినిదా ఇజి వెప్తాండ్రె మోసెజ్ నెక్తపొక్తాన్.

29 యాక వెహండ్రె మోసె తియెల్ ఆతాన్. వెటనె అయ్గుప్పు దేసెం డిఃసి సొహాన్. మిద్యాను ఇని దేసమ్దు సొహండ్రె ఆఇకాన్ లెకెండ్ బత్తిత్తాన్. బానె పెండ్రె ఆతండ్రె రిఎర్ కొడొఃరిజ్ ఇట్టాన్.

30 నలపయ్ పంటెజ్ వెనుక, సినాయి ఇని పెరి గొరొన్ డగ్రు మన్ని బిడిఃమ్ బూమిదు మహిజ్, ఒరెన్ దేవుణు దూత మోసెజ్ తోరె ఆతాన్. యా దూత వెయ్జి మహి తుప్పెజ్ నడిఃమి ఉండ్రె సీను కొణ లొఇ తోరె ఆతాన్.

31 మోసె అక్క సుడొఃతిజ్ బమ్మ ఆతాన్. బమ్మ ఆతండ్రె నెగ్గెండ సుడొదెజ్ తుప్ప డగ్రు సొహాన్. డగ్రు సొహిజ్ దేవుణు మాట ఈహు వెహాన్,

32 'నాను నీ అనిగొగొర్ ఆతి అబ్రాహాం, ఇస్సాకు, యాకోబు ఇని వరి దేవుణు'. యాక వెహండ్రె మోసె తియెల్ ఆజి వణక్తాన్. సుడొదెజ్బా అట్వతాన్.

33 దేవుణు మరి వెప్తాన్, 'నీ జోడ్కు కుత్తి ఇడొఃఅ. నీను నిహిమన్ని బాడ్డి దేవుణుదిజ్ కేట ఆతి బాడ్డి'.

\* 7:16 7:16 అయ కాలమ్దు అయ్గుప్పు దేసెమ్దికాన్ పీనుగుదిజ్ నూనె రాసి పాత లొఇ ఇడ్వార్, నబ్విండ మండ్రెజ్

34 అయ్యగుప్పు దేసమ్దు మన్ని నా లోకాజ్ మాలెజ్ నాను నెగ్రెండ నుడేత. వారు అడఃబానిక వెహ. అందెజె నాను వరిజ్ డిఃబిస్తాజ్ డిఃగిత వాత. ఏలు రఅ నిజి నాను అయ్యగుప్పు దేసెం పొక్కు ఇజి వన్నివెట వెహ్లాన్.

35 'మా ముస్కు అతికారి వజ మండ్రెజ్ తగ్గు తెప్పికాన్ వజ మండ్రెజ్ నిజి ఎయెర్ ఏర్పాటు కిత్తాన్' ఇజి వెప్పి ఇస్రాయేలు లోకుర్, ముందాల నెక్కి పొక్తి యా మోసెజ్నె, దేవుణు అతికారి వజ, తప్రిసినికాన్ వజ వరిబాన్ పొక్తాన్. వెయ్జి మహి తుప్ప లోఇ తోరె ఆతి దేవుణు దూత సాయమ్దాన్ మోసెజ్ దేవుణునె పొక్తాన్.

36 అయ్యగుప్పు దేసమ్దు బమ్మ పణిజ్ కిజి మోసె ఇస్రాయేలురిజ్ తప్రిస్త తతాన్. ఎర్రజ్ నమ్దరంబానె, మరి వారు నలపయ్ పంటెజ్ నడిఃజి సాహిమహి బిడిఃమ్ బూమిదుబా మోసె బమ్మాని పణిజ్ బమ్మాని గుర్తుజ్ కిత్తాన్.

37 యా మోసెనె ఇస్రాయేలురు వెట, 'దేవుణు నజి పొక్తి లెకెండ మీబాణిజె ఒరెన్ ప్రవక్తెజ్ మీబాన్ పొక్తాన్', ఇహాన్.

38 బిడిఃమ్ బూమిదు సజం కూడిఃతి మహి ఇస్రాయేలు లోకుర్ వెట మహికాన్ యా మోసెనె. మా అనిగొగొర్ వెట మహికాన్ వీండ్రె. సీనాయి గొరొతు దేవుణు దూత విన్నివెటనె వర్గితాన్. మజి సీదెజ్ దేవుణు బాణిజ్ ఎల్లకాలం బత్తిని మాటెజ్ తత్తికాన్ వీండ్రె.

39 గాని యా మోసెజ్ మా అనిగొగొర్ లొజిజి మన్ఏండ నెక్తపొక్తార్. మర్జి అయ్యగుప్పు దేసమ్దు సాహిజ నెగ్గెద్ ఇజి వారు కోరితార్.

40 అయ్యగుప్పు దేసమ్దాన్ మజి కూక్తి తత్తి యా మోసె ఇనిక అతాండ్రో మజి తెలివద్. అందెజె మర్జి అయ్యగుప్పు దేసమ్దు సాండ్రెజ్ మజి ముందాల నడిఃదెజ్ దెయమ్కు తయార్ కిజి సిదా ఇజి మోసె అన్నసి ఆతి ఆరోను వెట వెహ్లాన్.

41 అయావలె వారు ఉండ్రె దూడః లెకెండ బొమ్మ తయార్ కిత్తెర్ పూజ కిత్తార్. వరి కిక్కాణిజ్ తయార్ కిత్తి దన్నిముస్కు వారు నండ్రె సర్ల ఆతార్.

42 గాని దేవుణు కోపం ఆతండ్రె మొకొం వెనుక మహ్లాన్. ఆగాసమ్దు మన్నికెజ్ నుడఃదెజ్, నెల పొద్దు సుక్కెజ్ విజు దన్నిజ్ పూజ కిదెజ్ వరిజ్ డిఃస్త సిత్తాన్. ప్రవక్తరు ముందాల్పై రాస్తిమహిక దిని వందిజె. అక్క ఇనిక ఇహిజ "ఇస్రాయేలు లోకాండ్రె, మీరు బిడిఃమ్ బూమిదు నల్వయ్ పంటెజ్ నడిఃసి సాన్ని మహివలె పూజ కిత్తిక నజినె ఆవద్.

43 మీరు పూజ కిసాట్ ఇజి తయార్ కిత్తి మొలూకు రొంపయు ఇని సుక్కెజాణి దెయమ్కాజె గూడారమ్దు పిండిజి ఒసి మహిదెర్. వనకాజె పూజ కిత్తిదెర్. అందెజె బబులోను దేసెం అతాల్ మిజి తొప్పి ఒతెజ్ నాను సరి సీనాలె.

44 మా అనిగొగొర్ బిడిఃమ్ బూమిదు సాన్ని మహివలె సాసి గూడారం వరివెట మహాద్. దేవుణు మోసెజ్ తొరిస్తి లెకెండ్రె మోసె యా సాసి గూడారం †తయార్ కిత్తాన్.

45 మరి లావు పంటెజ్ వెనుక యెహోసువ ఇనికాన్ అయ టయమ్దు యా సాసి గూడారం పిండిత ఒతండ్రె మా అనిగొగొరిజ్ నడిఃపిస్తాన్. అయావలె ఇస్రాయేలు లోకాజ్ సీనా ఇజి దేవుణు వెహ్లా దేసమ్దు వారు సాహార్. దేవుణు వరివెట మహిజ్ బానె మహి యూదురు ఆఇ లోకుర్ వెట ఉద్దం కిత్తారె, గెల్స్తారె ఆ దేసెం సాంతం కిత్తార్. బానెబా మా అనిగొగొర్ యా సాసి గూడారం పిండిత ఒతార్. దావీదురాజు వరిజ్ ఏలుబడిః కిత్తి కాలమ్దాక యా సాసి గూడారం బానె మహాద్.

46 దావీదురాజు ఇహిజ దేవుణు వెహ్లా వజ నడిఃతికాన్. దేవుణు దయ వన్ని ముస్కు లావు మహాద్. అహిజ్బా మా అనిగొగొ ఆతి యాకోబు పార్దనం కిత్తి యా దేవుణుదిజ్ ఎలాకాలం మండ్రెజ్ ఉండ్రె గుడిః తొహ్లాజ్ దావీదు రాజు వెన్బాతిజ్బా దేవుణు సరి సిఏతాన్.

47 గాని దావీదురాజు మరిసి ఆతి సాలోమొనుజ్నె దేవుణు గుడిః తొహ్లాజ్ సరి సిత్తాన్.

48 అహిజ్బా విజెరిజ్ ఇంక గొప్ప పెరి దేవుణు, లోకు కిక్కాణిజ్ తయార్ కిత్తి బాడ్డిదు మన్ఏన్.

49 దేవుణు మాటెజ్ ప్రవక్త ఈహు వెప్పినాన్: "పరలోకం నాను బసిని సిమసనం‡. బూమి నా పాదమ్కు ఇడ్డి పీట. నాను మండ్రెజ్ ఉండ్రె గుడిః తొహ్లాజ్ మీరు అట్ఇదెర్.

50 ఎందనిజ్ ఇహిజ, పరలోకం, బూమి, దన్ని లొఇ మన్నికెజ్ విజు నానె పుటిస్త".

51 మూర్కం బుద్ది మన్నికిదెరా, దేవుణు మాటెజ్ ఒప్పుకోటాప్ ఇజి మీరు సునతి కిత్తిదెర్ గాని దేవుణు మాటెజ్ గిబ్బిజాణి వెంజిబా సరినె వెన్ఇ లెకెండ్రె మంజినిదెర్. వెహిజ్బా సరినె మన్నుదు ఇడఃఏండ లొజిఇదెర్. మీ అనిగొగొర్ లెకెండ్రె మీరుబా ఎసెజ్బా సరినె దేవుణు ఆత్మదిజ్ నెక్కిపొక్కినిదెర్.

52 మీ అనిగొగొర్ ప్రవక్తరిజ్ విజెరిజ్ గొప్ప మాలెజ్ కిత్తార్. దేవుణు పొక్కు ఇజి వెహ్లా ఆ నీతి వాండ్రు వందిజ్ ముందాల్పై వెహ్లా ప్రవక్తరిజ్బా మీ అనిగొగొర్ సప్తార్. ఏలు ఆ నీతి వన్నిజ్ మీరు ఒవజెప్పిదెర్. వన్నిజ్ సప్తిదెర్.

53 దేవుణు వన్ని దూతవెట మిజి సిత్తి రూలుజ్ మిజి దొహ్కా గాని మీరు దన్నిజ్ లొజిఇతిదెర్".

† 7:44 7:44 సాసి గూడారం. దేవుణు ఇబ్బి మనాన్ ఇజి లోకాజ్ వెప్పి మహి గూడారం ‡ 7:49 7:49 సిమసనం. తీర్పు కిదెజ్ రాజర్ బసిని కుర్చి

సైపానుజ్ పణుకుజాణిజ్ డెయ్జినార్

54 యా మాటెజ్ వెహారె వారు గొప్ప కోపం ఆతారె సైపానుజ్ సుడెజి పల్కు కొహ్కార్.

55 గాని సైపాను దేవుణు ఆత్మ సత్తు పూర్తి నిండ్రెజి ఆగానం దరోట్ సుడెజి. సుడెతిజ్ దేవుణు గొప్ప జాయ్ సుడెజి. యేసుప్రబు దేవుణు ఉణెర్ పడెక నిహి మహిక సుడెజి.

56 “సుడెఃఅ, ఆగానం రే ఆతి మహిక, లోకు మరిసి ఆతి యేసు దేవుణు ఉణెర్ పడెక నిహిమహిక నాను సుడెజి”, ఇజి సైపాను వెహ్తాన్.

57 గాని యా మాటెజ్ వెహారె వెటనె వారు గిబ్బిజ్ మూకె ఆతారె డటం గగోలాజి విజేరె ఉండ్రె ఆజి వన్ని ముస్కు వాతార్.

58 పట్టుమ్దాన్ వెల్లి లాగిత ఒతారె వన్నిజ్ పణుకుజాణ్ డెయ్జి సప్తెజ్ మొదొల్స్తార్. పణుకుజ్ వినీర్ని సాసి లోకుర్ వరి సొక్కెజ్ ముందాల సవులు ఇని ఒరెన్ దజడాఃయెన్ పాదమ్కాజ్ డగ్రు తత్తారె ఇట్టార్.

59 వారు సైపానుజ్ పణుకుజాణిజ్ డెయ్జి మహిజ్ సైపాను, “యేసుప్రబువా నా పాణమ్దిజ్ ఏలు నీ డగ్రు కూడుఃవ్అ”, ఇజి పార్లనం కిత్తాన్.

60 వెనుక సైపాను ముణుకుజ్ ఊర్జి, “ప్రబువా, వీరు కిజిని యా పాపం విరి ముస్కు మోప్ప”, ఇజి డటం డేల్స్తాన్. యా మాట వెహ్తాండ్రె వాండ్రు పాణం డిస్తాన్. సైపానుజ్ సప్తిక సవులు ఒప్పుకొటాన్.

## 8

దేవుణుదిజ్ నమ్మితి వరిజ్ సవులు పాడుః కిజినాన్

1 ఆ దినమ్కాజ్ యెరూసలేమ్దు మహి దేవుణు సజమ్దిజ్ గొప్ప మాలెజ్ ఆజి మహాద్. అపొస్తురు ఆవిండ మహి నమ్మితికార్ విజేరె యూదయ సమరియ దేనమ్కాజ్ సెద్రిత సాహార్.

2 బక్తి కల్లితి నమ్మితి లోకుర్ సైపానుజ్ సమాది కితారె వన్ని వందిజ్ గొప్ప దుకం ఆజి అడఃబాతార్.

3 సన్తివలె సవులు ఇనికాన్ యేసుప్రబు ముస్కు నమకం ఇడ్డిమహి వరి నమకం పాడుః కిదెజ్ సుడెజి. ఇల్కాజ్ ఇల్కాజ్ డుఃగిజి మొగ్గకొడొరిజ్ అయ్లికొడొకాజ్ ఈడిసి ఒసి జెలిదు ఇడఃజి, వాండ్రు సజమ్దిజ్ పాడుః కిదెజ్ మొదొల్స్తాన్.

సమరియ దేనమ్దు సువార్త సాటిస్తార్

4 అయావలె సెద్రితి సాహి సజమ్దికార్ సువార్త సాటిసి విజు బాడ్డిజి విజెరిజ్ వెన్పిసి బూలాతార్.

5 అయావలె అపొస్తురు ఏర్పాటు కిత్తివరి లోక ఒరెన్ పిలిపు ఇనికాన్ సమరియ పట్టుమ్దు సాహాన్. అబ్బె యేసు, క్రీస్తు\* ఇజి బోదిస్తాన్.

6 పిలిపు వెహ్తా మాటెజ్ లోకుర్ విజేరె నెగ్రెండ వెహారె వాండ్రు కిత్తి బమ్మాని గుర్తుజ్ సుడెజి.

7 కిక్కు కాల్యు సాతికార్, సాటవారు నండొండార్ అబ్బె వాతారె నెగ్రెండ ఆతార్. నండొండార్ లోకుర్ దెయం అస్తి మహికార్ అబ్బె మహార్. దెయమ్కు నండొ గగోలాజి వరిజ్ డిస్తా సాహె.

8 అందెజె సమరియ పట్టుమ్దు నండొ సర్గ కల్లితాద్.

గార్లి పణి కిని సిమోను

9 సమరియ పట్టుమ్దు సిమోను ఇని ఒరెన్ మహాన్. సిమోను ఆ పట్టుమ్దు సెగం పంటెజ్ గార్లి విదె కిజి నాను ఒరెన్ గొప్ప వాండ్రు ఇజి వెహ్తా మహాన్. అబ్బె మహి లోకాజ్ సిమోను బమ్మ కిబిసి మహాన్.

10 అయ పట్టుమ్దు మహికార్ ఇజిరికార్ పెరికార్ విజేరె వీండ్రు ‘దేవుణు గొప్ప సత్తు ఇనికాన్’ ఇజి వెహ్తా వన్ని ముస్కు నమకం ఇడఃజి.

11 నండొ కాలం సిమోను గార్లి పణి కిజి లోకాజ్ బమ్మ కిబిసి మహాన్. అందెజె వారు సిమోనుజ్ నమ్మితార్.

12 గాని దేవుణు ఏలుబడిః వందిజ్, యేసుక్రీస్తు వందిజ్ పిలిపు పట్టుమ్ది లోకాజ్ సాటిస్తాజ్ యా సువార్త వెహికార్. నమ్మితారె మొగ్గకొడొర్, అయ్లికొడొక్ బాప్తినం లాగె ఆతార్.

13 అయావలె సిమోనుబా నమ్మిజి బాప్తినం పొందితాండ్రె పిలిపుజ్ డిస్ఎండ వన్నివెటనె మహాన్. పిలిపు కిని బమ్మాని గుర్తుజ్, బమ్మాని పణిజ్ సుడెజి సిమోను గొప్ప బమ్మ ఆతాన్.

14 యేసు ప్రబు వందిజ్ వెహ్తా సువార్త సమరియ దేనమ్దికార్ ఒప్పకొటార్ ఇజి యెరూసలేమ్దు మన్ని అపొస్తురు వెహార్. వెహారె పేతురుజ్ యోహానుజ్ వరి డగ్రు పొక్తార్

\* 8:5 8:5 క్రీస్తు (మెనయ) ఇహిజ దేవుణు ఏర్పాటు కిత్తి పొక్తాన్ ఇజి అర్లం

15 వీరు వాతారె సమరియ పట్నమ్దు నమ్మితి వరి ముస్కు దేవుణు ఆత్మ సత్తు వాదెజ్ ఇజి పార్దనం కిత్తార్.

16 ఎందనిజ్ ఇహిజ అబ్బెణి దాక దేవుణు ఆత్మ సత్తు వరి ఎయేరి ముస్కుబా రెవిండ మహాద్. వారు ప్రబువాతి యేసు పేరుదాన్ బాప్తినం ఉండ్రెనె లాగె ఆజి మహాద్.

17 అయావలె పేతురు, యోహాను వరి ముస్కు కిక్కు ఇడ్డిజ్ దేవుణు ఆత్మ సత్తు వరి ముస్కు వాతాద్.

18-19 అపొస్తురు లోకుర్ ముస్కు కిక్కు ఇట్టి వలె వారు దేవుణు ఆత్మదాన్ నిండ్రెజినార్ ఇజి సిమోను సుడెతాన్. సుడెతండ్రె, “నాను ఎయెన్ ముస్కు కిక్కు ఇడ్డానొ, వాండ్రు దేవుణు ఆత్మ సత్తుదాన్ నిండ్రెని వజ యా అతికారం నజీబా సిదా”, ఇజి వెప్పి వరి ముందాల డబ్బు ఇట్టాన్.

20 అయావలె పేతురు, “నీను డబ్బు సీజి దేవుణు వరం సంపాదనం కిన ఇజి ఒడిబిత్తిదా? నీ డబ్బు నీ వెట నాననం ఆపిద్.

21 నీ ఆలోసనం దేవుణు సుడెతిజ్ సరి ఆతిక ఆపిద్. అందెజె మాపు కిని పణిదు నిజి ఇని వంతు సిల్లెద్.

22 అందెజె యా సెఇ ఆలోసనమ్కు డిసిసిజి దేవుణు డగ్రు వాజి పార్దనం కిదు. నీను ఒడిబిత్తి ఆలోసనమ్ వందిజ్ దేవుణు నిజి నెమిస్సాన్.

23 నీ మన్సుదు నండొ గోస నిండ్రెత మనాద్ ఇజి నాను నెస్సా. అక్కాదె ఆవిండ నీ పాపమ్కు నిజి తొప్తా మన్నె ఇజి నాను నెస్సా”, ఇజి పేతురు వెప్తాన్.

24 దన్నిజ్ సిమోను, “నీను వెప్తాకెజ్ ఇనికబా నా ముస్కు రెవిండ మీరు నావందిజ్ యేసుప్రబుజ్ పార్దనం కిదు”, ఇజి పేతురుజ్ యోహానుజ్ వెప్తాన్.

25 వెనుక పేతురు, యోహాను సాసి వెప్పి, యేసుప్రబు సువార్త సాటిసి, యెరూసలేమ్దు మప్తా వాతార్. వాని సరి సమరియదు మహి నండొ నాహ్కాజ్ సువార్త సాటిసి వాతార్.

### పిలిపు అయ్యుయెపియది వన్నిజ్ బాప్తినం సిత్తాన్

26 అయావలె, ఒరెన్ దేవుణు దూత పిలిపుజ్ వెప్తాన్, “నీను దసిణం దరోట్ సొన్ని యెరూసలేమ్దాన్ గాజ ఇని పట్టుం సొని బిడిమ్ బూమిదు సొన్అ”, ఇజి వెప్తాన్.

27-28 అందెజె పిలిపు సొతాండ్రె సొహాన్. సొన్ని మహిజ్ ఒరెన్ అయ్యుయెపియదికాన్ రదం† ముస్కు సొన్నినాన్. వాండ్రు అయ్యుయెపియ దేసెమ్ది రాణి కందెకెబాన్ ముకెలమతి పణి కినికాన్ ఒరెన్. ఇని పణి ఇహిజ దేసెమ్ది డబ్బు నడిపిసిని దన్ని ముస్కు వీండ్రు మంత్రి. వీండ్రు యెరూసలేమ్దు పార్దనం కిదెజ్ సొహాండ్రె మర్జి సొన్నినాన్. సొన్ని మహిజ్ వీండ్రు రదమ్దు బసి యెసయ ప్రవక్త రాస్తి పుస్తకం సద్విజినాన్.

29 అయావలె దేవుణు ఆత్మ పిలిపుజ్, “నీను రదం డగ్రు సొన్ని దన్ని వెట నడిజి సొన్అ”, ఇజి వెప్తాన్.

30 పిలిపు రదం డగ్రు ఉహ్కెక్కి సొహిజ్ అయా అయ్యుయెపియదికాన్ యెసయ ప్రవక్త రాస్తి పుస్తకం సద్విజినాన్. పిలిపు అక్క వెహాన్. వెహాండ్రె, “నీను సద్విజినిక అర్దం కిజినిదా?”, ఇజి వెన్బాతాన్.

31 వెన్బాతిజ్, “ఎలాగ అర్దం కిన? ఎయెన్బా నజీ అర్దం వెహ్విండ మహిజ ఎలాగ అర్దం కినా? రదమ్ ముస్కు ఎక్కి నా వెట బన్అ. దిన్ని అర్దం వెప్పి సిదా” ఇహాన్, అయ అయ్యుయెపియదికాన్. అందెజె పిలిపు రదం ఎక్కి వన్ని డగ్రు బస్సాన్.

32 అయ అయ్యుయెపియదికాన్ సద్విజి మహి మాటెజ్ ఇనికెజ్ ఇహిజ “సప్తెజ్ ఒని గొర్రె వజ వన్నిజ్ ఒతార్. బుడుఁస్కుజ్ కత్రిసినివలె అలెజి మంజిని మెండగొర్రెపిల్ల వజ అలేత మహాన్. వాండ్రు ఇనికబా ఇన్వెతాన్.

33 వారు వన్నిజ్ సిగు కిత్తార్. వన్నిజ్ నాయం దొహ్కెవిండత సొహాద్. వన్ని పొటెజాణి వరి వందిజ్ ఎయెర్బా వెహ్విండ ఆనార్. ఎందనిజ్ ఇహిజ, వన్ని పాణమ్దిజ్ బూమి ముస్కుహాన్ లాగితార్”.

34 అయ అయ్యుయెపియదికాన్ ఈహు వెన్బాతాన్, “ప్రవక్త ఎయె వందిజ్ ఈహు వెప్పినాన్? వన్ని వందిజెనా, మరి ఒరెన్ వందిజా? దయ కిజి వెహ్అ”.

35 అందెజె పిలిపు అయ అయ్యుయెపియదికాన్ సద్విజి మహి యెసయ ప్రవక్త రాస్తి పుస్తకమ్దు మహి మాటదాన్ మొదొల్లి యేసుప్రబు వందిజ్ సువార్త వెప్తాన్.

36 ఆహె వారు సొన్ని మహిజ్ ఏరు మహి ఉండ్రె బాడ్డిదు వాతార్. అయ అయ్యుయెపియదికాన్ వెప్తాన్, “ఇబ్బె ఏరు మన్నె. నాను బాప్తినం లాగె అదెజ్ ఇనికబా అడ్డు మనాదా?”.

† 8:27-28 8:27-28 రదం ఇహిజ గుర్రమ్కాజ్ ఉండ్రె బంటి పూట్వార్

37 దన్నిజ్ పిలిపు, “నీను మన్ను పూర్తి యేసుప్రబుజ్ నమ్మిత్తిజ బాప్తిసం లాగె ఆదెజ్ ఇని అడ్డుబా సిల్లెద్”, ఇహాన్. అందెజె వాండ్రు, “ఒఒ, యేసుక్రీస్తు దేవుణు మరిసి ఇజి నాను నమ్మిజిన”, ఇహాన్.

38 అయావలె, “రదం నిల్వ్అ”, ఇజి అయ్యుయొపియదికాన్ ఆడ్ర సిత్తాన్. రదం నిల్వ్వాండ్రె వాండ్రు, పిలిపు, రిఎర్ డిగ్జి ఏరుదు డిగితార్. పిలిపు అయ్యుయొపియది వన్నిజ్ బాప్తిసం సిత్తాన్.

39 వారు ఏరు లోఇహాన్ వెల్లి వాతిజ్ వెటనె దేవుణు ఆత్మ పిలిపుజ్ కూక్ట బతాన్. అయ్యుయొపిదికాన్ పిలిపుజ్ మరి సుడెఃవితాన్. గాని వాండ్రు సర్ద ఆజి వన్ని సరినె సొహాన్.

40 పిలిపు సుడెఃతిజ్ అజొతు పట్నమ్దు మన్న ఇజి నెస్తాన్. అబ్బెణిజ్ సోసి వాండ్రు సొహి సరిదు మహి విజు పట్నమ్కాజ్ యేసు ప్రబు వందిజ్ సువార్త వెప్పి కయ్సరియ ఇని పట్నమ్దాక వాతాన్.

## 9

### సవులు యేసుప్రబుజ్ నమ్మిత్తాన్

1-2 అయావలె సవులు ఇనికాన్ యేసుప్రబు మున్ను నమ్మితి వరిజ్ బెద్రిసి మహాన్. వరిజ్ మాలెజ్ కిజి మహాన్. వాండ్రు విజేరె పుజేరిజ మున్ను పెరి పుజేరిబాన్ సొహాండ్రె దమన్ను పట్నమ్దు మన్ని యూదురి మీటిజ్ ఇల్కాణి పెద్దెల్జ సిదెజ్ ఉత్తమ్కు లొస్తాన్. ఇని ఉత్తమ్కు ఇహిజ, దమన్ను పట్నమ్దు యేసుప్రబు మున్ను నమకం ఇడ్డికార్ ఎయెర్బా మహిజ, మొగ్గకొడెర్ గాని అయ్లికొడెక్ గాని వరిజ్ తొప్పి ఒసి యెరూసలేం పట్నమ్దు తతెజ్ సవులుజ్ అతికారం మనాద్ ఇజి వెప్పిని ఉత్తమ్కు.

3 విజేరె పుజేరిజ మున్ను పెరి పుజేరి సిత్తి ఉత్తమ్కు అస్తాండ్రె సవులు దమన్ను పట్నమ్దు సొండ్రెజ్ సొత్తాన్. దమన్ను పట్నం డగ్రు వాజి మహిజ్ గదెం ఆగసమ్దాన్ ఉండ్రె గొప్ప జాయ్ వన్ని సురులం డెఃయ్తాద్.

4 అయావలె సవులు బూమిదు అర్తాన్. అర్తిజ్, “సవులు, సవులు, నీను ఎందనిజ్ నజి మాలెజ్ కిజిని”, ఇజి వన్ని వెట వెప్పి ఉండ్రె మాట వెహాన్.

5 “ప్రబు, నీను ఎయి”, ఇజి సవులు వెన్బాతాన్. “నీను మాలెజ్ కిజిని యేసునె నాను.

6 ఏలు నిజ్జి పట్నమ్దు సొన్అ. నీను ఇనిక కిదెజ్ ఇజి ఒరెన్ నిజి వెహ్నాన్లె”, ఇజి మాట వెహ్నాన్.

7 సవులు వెట సొన్ని మహికార్ జాటు వెహార్ గాని ఎయెరిజ్బా తోర్వితార్. వారు అల్లెత నిహ మహార్.

8 సవులు బూమిదాన్ నిజిత్తాండ్రె బేస్తాన్ గాని కణుకు తోర్వెండ ఆతె. అందెజె వారు వన్నిజ్ కికాజ్ అస్తారె దమన్ను పట్నమ్దు నడిఃపిసి ఒతార్.

9 వాండ్రు మూండ్రె రొన్ను కణుకు తోర్వెండ మహాన్. ఇనికబా తిన్వెండ ఉణెవెండ మహాన్.

10 దమన్ను పట్నమ్దు యేసుప్రబు సిసూడుః ఒరెన్ అననియ ఇనికాన్ మహాన్. యేసుప్రబు వన్నిజ్ దర్సనమ్దు తోరె ఆతండ్రె, “అననియ”, ఇజి కూక్టాన్. కూక్తిజ్ అననియ, “ప్రబువా నాను ఇబ్బె మన్న”, ఇహాన్.

11 యేసుప్రబు వన్నివెట, “నీను తినాజ్ ఇజి కూక్తి సరిదు సొన్అ. బానె యూద ఇని వన్ని ఇండ్రె సొన్ని తార్పు పట్నమ్దికాన్ సవులు ఇని వన్ని వందిజ్ వెన్బాఅ. సవులు పార్సం కిజి మంజినాన్. ఉండ్రె దర్సనమ్దు సవులు ఇనిక సుడెఃతాన్ ఇహిజ,

12 అననియ ఇనికాన్ ఒరెన్ వాతండ్రె వన్ని కణెకెజ్ నెగెండ కిజి మరి సూణి లెకెండ ఆదెజ్ వన్ని బురూదు కిక్కు ఇడ్డివజ సుడెఃతాన్”, ఇజి వెహ్నాన్.

13 దన్నిజ్ అననియ వెహ్నాన్, “ప్రబు వీండ్రు యెరూసలేమ్దు నిజి కేట ఆతి వరిజ్ ఎస్సానో మాలెజ్ కిత్తాన్ ఇజి వన్ని వందిజ్ నాను నండ్రె వెహ్ మహా.

14 ఇబ్బె యా పట్నమ్దు నీ మున్ను నమకం ఇడ్డి వరిజ్ తొప్పి ఒసి యెరూసలేమ్దు ఒతెజ్ వన్నిజ్ అతికారం నీని ఉత్తమ్కు పెరి పుజేరిజ బాణిజ్ అస్తాండ్రె వాత మహాన్”.

15 యేసుప్రబు అననియ వెట, “నీను సొన్అ. యూదురు ఆజ లోకుర్ నడిఃమి, రాజురిజ నడిఃమి, ఇస్రాయేలు లోకాజ్ నడఃమి నా వందిజ్ వెహ్నాజ్ నాను వన్నిజ్ ఏర్పాటు కిత మన్న.

16 నా వందిజ్ వాండ్రు ఎసొనో మాలెజ్ ఆనాన్ ఇజి నాను వన్నిజ్ తోరిన్న”, ఇహాన్.

17 అందెజె అననియ అయ ఇండ్రె సొహాండ్రె సవులు మున్ను కిక్కు ఇట్టాన్. “సవులునా, నీను వాతి సరిదు నిజి తోరె ఆతి ప్రబు ఆతి యేసు నజి పొక్త మనాన్. నీను మరి సూణి వందిజ్ దేవుణు ఆత్మ సత్తు నీ మున్ను వాని వందిజ్ నజి పొక్త మనాన్”, ఇజి సవులు వెట వెహ్నాన్.

18 అయావలె వన్ని కణకాణిజ్ పొరొజ్ నన్నికెజ్ రాల్తిజ్ సుడెఃదెజ్ అట్టాన్. సవులు నిజితండ్రె బాప్తిసం లాగె ఆతాన్.

19 వెనుక బోజనం కితాండ్రై సత్తు ఆతాన్.

సవులు దమస్కు పట్నమ్దు, యెరూసలేం పట్నమ్దు యేసుప్రబు వందిజ్ వెప్పినాన్.

సవులు దమస్కు పట్నమ్దు మహి యేసుప్రబు సిసూర్ వెట సెగం దినమ్కు మహాన్.

20 యూదురి మీటిజ్ ఇల్కాజ్ తిన్నాజ్ సొహండ్రై యేసునె దేవుణు మరిసి ఇజి యేసుప్రబు వందిజ్ బోదిస్తైజ్ మొదొల్స్తాన్.

21 అక్క వెహికార్ విజేరె నండొ బమ్మ ఆతార్. యెరూసలేమ్దు యేసుప్రబుజ్ నమ్మితి వరిజ్ పాడుః కిజి మహికాన్ పిండ్రెగదె. యేసుప్రబుజ్ నమ్మితి వరిజ్ తొప్పి పెరి పుజేరిర్ డగ్రు కూక్కి ఒతెజ్ ఇబ్బెబా వీండ్రు వాత మనాన్ ఇజి వెప్తార్.

22 అహిజ్బా పవులు మరి నండొ సత్తుదాన్ బోదిసి మహాన్. యేసునె దేవుణు పొక్కి క్రిస్తు ఇజి రుజువ్ కితాండ్రై దమస్కు పట్నమ్దు మహి యూదురుజ్ గాబ్ర కితాన్.

23 నండొ రొస్కు సొహి వెనుక సవులుజ్ సప్తెజ్ ఇజి యూదురు ఆలోసనం కితాన్.

24 గాని వరి ఆలోసనం సవులుజ్ తెలితాద్. వన్నిజ్ సప్తెజ్ వారు రెయువేల పూర్తి పట్నం వెల్లి సొని సేప్లా\* బాన్ సుడేజి కాత మహార్.

25 గాని వన్ని సిసూర్ రయ్యు వన్నిజ్ ఒతారె ఉండ్రై గంపదు బసె కితారె పట్నం సురుల మన్ని గోడెదు మన్ని ఉండ్రై కిటికి బొరొదాన్ వన్నిజ్ అడిఃగి డిఃప్తార్.

26 సవులు యెరూసలేమ్దు సొహిజ్ సిసూర్ వెట కూడేదెజ్ సుడేతాన్. గాని వాండ్రు సిసూర్ లొఇ ఒరెన్ ఆవన్ ఇజి వారు ఒడిఃబితారె వన్నిజ్ వరివెట కూడుఃపైజ్ తియెల్ ఆతార్.

27 గాని బరబ్బ ఇనికాన్ వన్నిజ్ అపొస్తురుబాన్ కూక్కి ఒతాన్. సవులు దమస్కు పట్నమ్దు సొహి సరిదు ఎలాగ యేసుప్రబు వన్నిజ్ తోరె ఆతాన్ ఇజి, ఎలాగ యేసుప్రబు వన్నివెట వర్తితాన్ ఇజి, వెనుక సవులు ఎలాగ దమస్కు పట్నమ్దు తియెల్ సిల్లెండ యేసుప్రబు వందిజ్ బోదిస్తాన్ ఇజి బరబ్బ అపొస్తురు వెట వెప్తాన్.

28 అయావలె అపొస్తురు సవులుజ్ కూడుఃప్తిజ్ వాండ్రు వరివెట కూడిఃత మహాన్. వరివెట కూడిఃతాండ్రై యెరూసలేమ్దు విజా బాడ్డిదు సొన్ని తియెల్ సిల్లెండ యేసుప్రబు వందిజ్ బోదిస్తైజ్ మొదొల్స్తాన్.

29 గ్రీకు బాస వర్గిని యూదురు వెట వర్గితాండ్రై తర్కిస్తాన్. అందెజె వారు సవులుజ్ సప్తెజ్ సుడేతాన్.

30 యాక తెలితారె సిసూర్ వన్నిజ్ డిగు మన్ని కయ్సరియాదు ఒతారె తార్పు పట్నం పొక్తార్.

31 అయ కాలమ్దు యూదయ, గలిలయ, సమరియ దేసమ్కాజ్ మహి దేవుణు సజం తియెల్ సిల్లెండ సమదానమ్దాన్ మహార్. సజం దేవుణుదిజ్ లోజిజి దేవుణు ఆత్మ సాయమ్దాన్ సత్తు ఆజి వాతె. నమ్మితికార్ నండొండార్ ఆజి వాతార్.

పేతురు లుదదు యోపాదు బమ్మాతి పణిజ్ కితాన్

32 అయావలె పేతురు నాహ్కునాహ్కు, పట్నమ్కుపట్నమ్కు సొన్ని లుద ఇని నాటొ దేవుణుదిజ్ కేట ఆతి వరిజ్ సుడిః సొహాన్.

33 బానె ఒరెన్ అయ్నెయ ఇనికాన్ ఎనిమిది పంటెజాణ్ అసి నిజ్దెజ్ అట్ఇ వన్నిజ్ సుడేతాన్. వాండ్రు కిక్కు కాల్కు అర్తికాన్.

34 పేతురు వన్నిజ్ సుడేజి, “అయ్నెయ, యేసుక్రిస్తు నిజి నెగెండ కిజినాన్. నిజ్జి, నీ మంసం నీనె పెర్జి ఉండ్రై పడేకాద్ ఇడేఃఅ” ఇహాన్.

35 వెటనె అయ్నెయ నిజితాన్. లుదా నాటొదు, సారోసు దేసమ్దు మహికార్ విజేరె, వన్నిజ్ జర్గితిక సుడేతారె యేసుప్రబుజ్ నమ్మితార్.

36 అయావలె యోప ఇని పట్నమ్దు తబిత ఇని ఉండ్రై అయ్లి కొడొః మహాద్. అదిబా యేసుప్రబు సిసూ. గ్రీకు బాసాదు దన్ని పేరు దొర్క. దొర్క ఇహిజ డుపి ఇజి అర్థం. అది ఎసెజ్బా నెగ్గి పణి కిజి మహాద్. సిల్లి వరిజ్ సాయం కిజి మహాద్.

37 గాని అది అయావలె ఉండ్రై కస్టం అస్తాదె సాతాద్. వారు పినుగుదిజ్ ఏరు వడిఃస్తారె మేడః ముస్కు మన్ని గదిదు తెర్ప్తార్.

38 లుద పట్నం యోప పట్నం డగ్రు మహాద్. పేతురు అబ్బె మనాన్ ఇజి యోపాదు మన్ని సిసూర్ వెహారె రిఎర్ మణిసిరిజ్ పొక్కి, “దయ కిజి వెటనె రఅ”, ఇజి కబ్బు పొక్తార్.

\* 9:24 9:24 సేప్లా. దమస్కు పట్నం సురుల పెరి గోడేః తొప్తా మహాద్. గోడేఃదు పట్నం వెల్లి సొని సేప్లాజ్ మహి. బానె పట్నం కాప్ కినికార్ కాప్ కిజి మహార్

39 పేతురు నిజితండ్రి వరివెట యోపాదు సొహాన్. వారు వన్నిజ్ మేడఃగది లొఱ ఒతార్. అబ్బె ముండ మణిసిక్ అడఃబాజి, దొర్క వరివెట మహివలె గుతిస్తి సొక్కెజ్ పాతెజ్ తొరిసి వన్ని సురుల నిహె.

40 పేతురు విజేరిజ్ వెల్లి పొక్తాండ్రె ముణుకుజ్ ఊరజి పార్దనం కిత్తాన్. పీనుగుదిజ్ సుడఃజి, “తబిత, నిజ్అ” ఇహాన్. అయావలె అది బేస్తాదె పేతురుజ్ సుడఃజి నిజిత బస్తాద్.

41 పేతురు దన్నిజ్ కిక్కాజ్ అస్తాండ్రె నిక్తాన్. నమ్మితి వరిజ్, ముండ మణిసికాజ్ కూక్కి అది బత్తిత్తాద్ ఇజి వరిజ్ ఒపజెప్తాన్.

42 యాక యోపాదు మనికార్ విజేరె నెస్తారె నండొండార్ యేసుప్రబు ముస్సు నమకం ఇట్టార్.

43 పేతురు యోపాదు సీమోను ఇని ఒరెన్ తొల్కు పొర్ని వన్నిబాన్ యోప పట్టుమదు నండొ దిన్మకు బత్తితాన్.

## 10

### పేతురు కొర్నెలియెజ్ సువార్త వెప్పినాన్

1 అయావలె కయ్సరియ ఇని పట్టుమదు, ఉద్దం కినివరి లొఱ కొర్నెలి ఇని ఒరెన్ నదాతిపతి\* మహాన్. వాండ్రు, వన్ని అడ్డి మహి ఉద్దం కినికార్ ఇటలి దేసెమ్దాన్ వాతి మహి గుంపుదికార్ ఇజి కూకె ఆతమహార్.

2 కొర్నెలి, వన్ని ఇండ్రొణికార్, బక్తి మనికార్. వారు దేవుణుదిజ్ తియెల్ ఆతికార్. వాండ్రు సిల్లి వరిజ్ వన్నిజ్ మనిక సెడ్డినె సీజి మహాన్. దేవుణుదిజ్ ఎస్తివలెబా పార్దనం కినికాన్.

3 ఒర్నొండు మదెనం రమరమి మూండ్రె గంటజ, దేవుణు బాణిజ్ వాతి ఒరెన్ దూత వన్నిబాన్ నిహండ్రె, “కొర్నెలి”, ఇజి కూక్తాన్. కూక్తిజ్ యా దూతెజ్ టటాజ్ సుడఃతాన్.

4 కొర్నెలి గొప్ప తియెల్ ఆతండ్రె, “ప్రబు, ఇనిక?”, ఇహాన్. దూత వెప్తాన్, “నీను దేవుణుదిజ్ కిత్తి పార్దనమ్కు, సిల్లి వరిజ్ నీని దానం విజు దేవుణు సుడఃతండ్రె నీ వందిజ్ ఒడిఃబిజినాన్.

5 ఏలు యోప ఇని పట్టుమదు లోకాజ్ పొక్కి పేతురు ఇజి కూకె ఆని సీమోను ఇని వన్నిజ్ కూక్కిన్అ.

6 వాండ్రు సమ్దరం డగ్రు మన్ని సీమోను ఇని తొల్కు తయార్ కినికాన్ ఒరెన్ వన్ని ఇండ్రొ బత్తిజినాన్”.

7 యాక వెప్పి దూత సొహిజ్, కొర్నెలి వన్ని పణి మణిసిర్ రిఎరిజ్ కూక్పిస్తాన్. ఎస్తివలెబా వన్నివెట కూడఃజి మంజిని బక్తి మన్ని ఒరెన్ ఉద్దం కిని వన్నిజ్బా కూక్పిస్తాన్.

8 జర్గితిక విజు వరివెట వెప్తాండ్రె వరిజ్ యోప పట్టుమదు పొక్తాన్.

### పేతురు సుడఃతి దర్శనం

9 మర్సనాండిజ్ వారు సొన్ని యోప పట్టుం డగ్రు ఆతార్. అయావలె మదెనం ఆతాద్. పేతురు పార్దనం కిదెజ్ మేడః† ముస్సు ఎక్తాన్.

10 పేతురు గొప్ప బజ కట్టిజ్ ఇనికబా ఉండెజ్ కోరిత్తాన్. బోజనం తయారాజి మహిజ్ వాండ్రు ఉండ్రె దర్శనం సుడఃతాన్.

11 అక్క ఇనిక ఇహిజ ఆగానం రే ఆజి నాల్లి సెంగుజ అసిమహి పెరి దుపాటి ననిక ఉండ్రె బూమిదు డిపె ఆతిలెకెండ్రె సుడఃతాన్.

12 దన్ని లొఱ బూమి ముస్సు మన్ని నాల్లి కాల్కు మన్ని విజు రకం జంతుజ్, బూమి ముస్సు ఊజి బూలానికెజ్, ఆగసమ్ ముస్సు ఎగ్రిని పొటిజ్ మహె.

13 అయావలె, “పేతురు, నిజ్అ, సప్పి తిన్అ”, ఇజి, ఉండ్రె మాట పేతురు వెహాన్.

14 దన్నిజ్ పేతురు, “సిల్లె ప్రబువా, తిండ్రెజ్ ఆఇకెజ్ ఎసెజ్బా నాను తిన్వ”, ఇజి వెప్తాన్‡.

15 వెప్తాజ్, మాట మరి వాతాద్, “దేవుణు నెగ్గక ఇజి ఇడ్డికెజ్ నీను సెవిద్ ఇజి ఎర్లిన్సు”.

16 ఈహు మూండ్రె సుట్టు జర్గితాద్. వెటనె ఆ దుపాటిన్నక ఆగాసమ్దు మర్జి పెరె ఆతాద్.

17 దర్శనమ్దు సుడఃతి దన్ని అర్దం ఇనికాదొ ఇజి పేతురు గొప్పజ ఒడిఃబిజి మహాన్. అయావలె కొర్నెలి పొక్తి లోకుర్ సీమోను ఇల్లు ఎమేణిక ఇజి వెన్బాజి నెస్తారె వన్ని ఇల్లు ముందాల వాతార్.

18 “పేతురు ఇజి కూకె ఆని సీమోను ఇబ్బె మనాండ్రా, సిల్లెండ్రా”, ఇజి పేరు అస్తారె డేడిఃస్తార్.

19 పేతురు దర్శనమ్దు సుడఃతి దన్ని వందిజ్ ఒడిఃబిజి మహివలెనె దేవుణు ఆత్మ వన్నివెట వెప్తాన్, “సీమోను, ముఎర్ లోకుర్ నిజి రెబాజినార్.

\* 10:1 10:1 వంద మంది విదెం కినివరిజ్ నడిప్పి రోమ అతికారి. † 10:9 10:9 మేడ ముస్సు బాన్ మహి ఇల్కాజ్ ముస్సు మేడెజ్ మన్నె. ఎక్కి సొన్ని బస్తెజ్ ఆనాద్ ‡ 10:14 10:14 యూదురుజ్ తిండ్రెజ్ ఆఇకెజ్ సెగం మన్నె, అక్కెజ్ తిన్వర్

20 నీను నిజ్జి అడ్డి డిగ్జి సొన్అ. అనుమానం ఆవిండ వరివెట సొన్అ. ఎందనిజ్ ఇహిజ నానె వరిజ్ పొక్త”.

21 పేతురు డిగ్జి సొహండ్రె, “మీరు నజినె రెబాజినిదెర్. ఎందనిజ్ వాతిదెర్?”, ఇహాన్.

22 దన్నిజ్ వారు, “సదాతివతి ఆతి కొర్నెలి మజి పొక్తాన్. వాండ్రు నీతి నిజాయితి మన్నికాన్. దేవుణుదిజ్ తియెలాజి మన్నికాన్. వాండ్రు గొప్ప నెగ్గికాన్ ఇజి యూదురు విజేరె వెహ్సినార్. ఒరెన్ దేవుణు దూత వన్నిజ్ తోరె ఆతండ్రె, ‘పేతురుజ్ నీ ఇండ్రొ కూక్చి తసి వన్ని మాటెజ్ వెన్అ’ ఇహాన్”, ఇజి వెహ్సార్.

23 అయావలె పేతురు వరిజ్ ఇండ్రొ తతాండ్రె, “నేండ్రు మా బాన్ మండ్రు”, ఇహాన్.

పేతురు కొర్నెలి ఇండ్రొ సొన్నినాన్.

మహ్న నాండిజ్ పేతురు నిజితండ్రె వరివెట పయనం ఆతాన్. యోపాదికార్ సెగొండార్ యేసుప్రబుజ్ నమ్మితికార్ వరివెట సొహార్.

24 ఉండ్రొ రోజు పయనం ఆతారె మహ్న నాండిజ్ వారు కయసరియాదు అందితార్. కొర్నెలి వన్ని కుటుమ్ది వరిజ్ వన్ని డగ్గుహి కూడెజి ఇండ్రొ కూడుఘాండ్రె పేతురు వందిజ్ కాప్ కిజి మహాన్.

25 పేతురు ఇండ్రొ వాతిజ్ కొర్నెలి సొహండ్రె వన్ని పాదమ్కాజ్ ఆర్తాండ్రె వన్నిజ్ మాడిస్తాన్.

26 గాని పేతురు వన్నిజ్ నిక్తాండ్రె, “నిజ్అ, నానుబా నీ నన్ని లోకునె” ఇహాన్.

27 కొర్నెలి వెట వర్గిజి పేతురు లోఇ సొహిజ్ మంద లోకుర్ బాన్ కూడెజిమహిక సుడెతాన్.

28 పేతురు వరి వెట వెహ్సాన్. “మా యూదురి రూలు వజ ఇహిజ యూదురు ఆఇ లోకుర్ వెట కూడెనిక ఆవిద్. వరివెట మంజినిక ఆవిద్. ఇక్క మీరు నెసినిదెర్గదె. గాని లోకాజ్ ఎయెరిజ్బా తక్కుదికార్ ఇజి ఇండ్రెజ్ ఆవిద్ ఇజి దేవుణు నజి తోరిస్త మనాన్.

29 అందెజె నజి కూక్పిస్తిజ్ నాను అడ్డు వెహ్విండ వాత. నజి ఎందనిజ్ కూక్పిస్తిదెర్. ఏలు వెహ్అ”, ఇహాన్.

30 అయావలె కొర్నెలి వెహ్సాన్, “నాల్లి దినమ్కు ముందాల యా గడియూదునె నాను మదెనం మూండ్రొ గంటెజి ఇండ్రొ పార్లనం కిజి మహా. వెటనె మెర్నిని నన్ని పాతెజ్ పొర్నాతి మన్ని ఒరెన్ నా ఎద్రు నిహాన్.

31 “కొర్నెలి, దేవుణు నీ పార్లనమ్కు వెహాన్. సిల్లి వరిజ్ సెడ్డినె సిత్తికెజ్ దేవుణు సుడెతాన్.

32 యోపాదు కబ్బు పొక్చి పేతురు ఇజి కూకె ఆని సీమోనుజ్ కూక్చిన్అ. వాండ్రు సమ్దరం డగ్గు తోల్కు తయార్ కినికాన్ ఒరెన్ సీమోను ఇని వన్ని ఇండ్రొ బత్తిజినాన్.

33 అందెజె వెటనె నిజి కబ్బు పొక్త. నీను వాతికాదె నెగెద్. ఏలు మాపు విజెపె దేవుణు డగ్గు వాతాప్. మా వెట వెహ్సాజ్ దేవుణు నిజి ఆడ్ర సిత్తి విజు మాటెజ్ వెండ్రెజ్ మాపు వాతాప్.

34 దన్నిజ్ పేతురు వెహ్సాన్, “దేవుణు విజెరిజ్ ఉండ్రె లెకెండ సుడెజినాన్, ఇజి ఏలు నాను నిజమ్నె నెస్నా.

35 ఎమేణి జాతి ఇహిజ్బా దేవుణుదిజ్ తియెలాజి, నీతి నిజాతిదాన్ నడితిజి దేవుణు వన్నిజ్ ఒప్పుకొణాన్.

36 యేసు క్రీస్తు విజెరిజ్ ప్రబు. దేవుణు వెట లోకాజ్ కాల తొప్పిస్తెజ్ వాండ్రు యేసుజ్ పొక్తాన్. యేసువలెహాన్ ఇస్రాయేలు లోకాజ్ సమదనం వాతాద్ ఇజి దేవుణు సువార్త పొక్తాన్.

37 యోహాను దేవుణు మాటెజ్ బోదిసి బాప్తిసం సిత్తి వెనుక గలిలయాదాన్ మొదొల్ని యూదయ దేసమ్దు విజు ఇనిక జర్గితాద్ ఇజి మీరు నెసినిదెర్.

38 యాక ఇనిక ఇహిజ, దేవుణు, నజరేతు వాండ్రు ఆతి యేసుజ్ దేవుణు ఆత్మ సత్తు సీజి ఏర్పాటు కిత్తాన్. వాండ్రు సొన్ని నెగ్గి పణిజ్ కితాండ్రె సయ్తాన్ లోకురిజ్ కిజిని బాదెజాణిజ్ డిబిస్తాన్. దేవుణు వన్నివెట మహిజానె వాండ్రు అక్కెజ్ విజు కిదెజ్ అట్టాన్.

39 వాండ్రు యూదురి దేసమ్దుని, యెరూసలేమ్దుని, కిత్తి విజు వనకాజ్ మాపు సాసిర్. యూదురు వన్నిజ్ సిలువారు డెయ్యారె సఫ్టార్.

40 గాని మూండ్రొ రోస్కాజ్ దేవుణు వన్నిజ్ సాతి వరిబాణిజ్ నిక్తాండ్రె మజి తోరిస్తాన్.

41 విజేరె లోకాజ్ వాండ్రు తోరె ఆవితాన్. దేవుణు ముజాలె ఏర్పాటు కిత్తి సాసిర్, ఇహిజ, మజినె వాండ్రు తోరె ఆతాన్. సాతి వరిబాణిజ్ నిజితి వెన్కా మాపె వన్నివెట తింజి ఉణిజి మహాప్.

42 సాతి వరిజ్, బత్తిజిని వరిజ్ తీర్పు సీదెజ్ దేవుణు యేసుజె ఏర్పాటు కిత్తాన్ ఇజి సాసి వెహ్సా సువార్త సాటిస్తెజ్ యేసుప్రబు మజి ఆడ్ర సిత్తాన్.

43 ప్రవక్తరు విజేరె వన్ని వందిజ్ ఇని సాసి వెహ్సార్ ఇహిజ, వన్ని ముస్కు నమకం ఇడ్చి విజెరి పాపం దేవుణు వన్ని వందిజ్ సెమిస్నాన్ ఇజి.



యూదురు ఆఇ వరిజ్ దేవుణు ఆత్మ సత్తు, దొహ్కసినాద్.

44 పేతురు యా మాటెజ్ వెప్పి మహిజ్ నె, వన్ని మాటెజ్ వెంజి మహివరి ముస్సు దేవుణు ఆత్మ వాతాద్.

45 పేతురు వెట వాతి మహి నమ్మితికార్ యూదురు, యాక సుడెతారె బమ్మ ఆతార్. “యూదురు ఆఇ వరిజ్ బా దేవుణు ఆత్మ సత్తు ఇని ఇనాయం దేవుణు సీజినాన్”, ఇజి బమ్మ ఆతార్.

46 ఎందనిజ్ ఇహిజ దేవుణు ఆత్మ సత్తు వరి ముస్సు వాతిజ్ వారు ఆఇ బాసెజ్ వర్గిజి దేవుణు ఎసొనొ పెరికాన్ ఇజి స్తుతి కినిక వీరు వెహార్.

అయావలె పేతురు వెప్తాన్,

47 “మజి దేవుణు ఆత్మ దొహ్కతి లెకెండ్ విరిజ్ బా దొహ్కాద్. ఏలు వీరు ఏరుదు బాప్తినం లాగె ఆదెజ్ ఇహిజ ఎయెర్ బా అడ్డు కిదెజ్ అట్నారా?”.

48 అందెజె యేసుక్రీస్తు పేరు అసి ఏరుదు బాప్తినం లాగె ఆదెజ్ పేతురు వరిజ్ ఆడ్ర సిత్తాన్. వెనుక, సెగం రోస్సు మా వెట మన్ అ ఇజి వారు పేతురుజ్ వెప్తార్.

## 11

పేతురు జర్గితికెజ్ వెప్పినాన్.

1 యూదురు ఆఇ లోకుర్ బా దేవుణు - మాటెజ్ నమ్మితార్ ఇజి యూదయ దేసమ్ దు మన్ని నమ్మిత్తికార్ ని, అపొస్తరు వెహార్.

2-3 అందెజె పేతురు ఎక్కు యెరూసలేమ్ దు సొహివలె బానె మహి సునతి కిబె ఆతి యూదురు, వన్నివెట తర్కిస్తార్. “నీను సునతి కిఇ లోకుర్ వెట కూడితి మహి, వరివెట ఉణిజి మహి”, ఇజి వన్ని ముస్సు తర్కిస్తార్.

4 అయావలె పేతురు, జర్గితికెజ్ విజు మొదొహన్ అసి వరివెట వెప్తాన్.

5 “నాను యోప పట్టుమ్ దు మహివలె ఒర్ నెండ్ పార్లనం కిజి మహిజ్ ఉండ్రి దర్లనం సుడెత. ఇనిక సుడెత ఇహిజ, ఆగాసం రే ఆజి నాల్లి సెంగుజ అసిమహి పెరి దుపాటి ననిక ఉండ్రి బూమిదు డిపె ఆతిలెకెండ్ నా డగ్రు డిగ్ జి వాతాద్.

6 అక్క నెగ్రెండ్ సుడెతిజ్ దన్ని లోఇ నాల్లి కాల్కు మన్ని జంతుజ్, అడివి జంతుజ్, బూమి ముస్సు ఊజి బూలానికెజ్, ఆగాసం ముస్సు ఎగ్రిని పొటిజ్ నజి తోరితె.

7 అయావలె, ‘పేతురు నిజ్ అ. సప్పి తిన్ అ’, ఇజి ఉండ్రి మాట వెహా.

8 దన్నిజ్ నాను, ‘సిల్లె ప్రబు, సెవద్ ఇజి ఇడ్డికెజ్ ఇనికెజ్ బా నాను ఎసెజ్ బా తిన్ ఏ’ ఇహా.

9 ఆగాసమ్ దాన్ మాట మరి వాతాద్, ‘దేవుణు నెగ్గిక ఇజి వెప్తికెజ్ నీను ఏరిన్గు’.

10 ఈహు మూండ్రి సుట్టు వాతాద్. ఆక్కర్ దిజ్ అక్కెజ్ విజు ఆగనమ్ దు మర్ జి పెరె ఆతె.

11 యాక జర్గితి వెటనె కయ్యురియ దాన్ కొర్నెలి పొక్తి మువర్ లోకుర్ నజి రెబాజి నాను మహి ఇల్లు డగ్రు వాతాద్.

12 అయావలె దేవుణు ఆత్మ, ‘నీను ఇని అనుమానం సిల్లెండ్ వరివెట సొన్ అ’ ఇహాన్. వీరు ఆరుగురు నమ్మిత్తికార్ బా నావెట వాతాద్. వాతారె మాపు కొర్నెలి ఇండ్రో సొహావ్.

13-14 కొర్నెలి ఇండ్రో సొహిజ్, దేవుణు దూత వన్నివెట వెప్తికెజ్ విజు వెప్తాన్. ‘నీను యోపాదు లోకాజ్ పొక్తి పేతురు ఇజి కూకె అని సీమోసుజ్ కూక్పిన్ అ. వాండ్రు వానాండ్రె నీను, నీ కుటుమ్ దికార్ విజేరె పాపం కిత్తి దన్ని సిక్చదాన్ ఎలాగ గెలిస్తెజ్ ఆనాద్ ఇజి వెహ్నాన్ లె’ ఇజి వెప్తికెజ్ విజు కొర్నెలి మజి వెప్తాన్.

15 నాను వరివెట వర్గిదెజ్ మొదొల్ స్తిజ్, మా ముస్సు దేవుణు ఆత్మ తోలిత ఎలాగ వాతాదొ అయావజనె వరి ముస్సు బా వాతాద్.

16 అయావలె నజి ప్రబు మాటెజ్ గుర్తు వాతాద్. ఇనిక ఇహిజ, ‘యోహాను ఏరుదాన్ బాప్తినం సిత్తాన్. గాని మీరు దేవుణు ఆత్మదాన్ బాప్తినం లాగె ఆనిదెర్ లె’ ఇజి.

17 అహిజ మాపు ప్రబు ఆతి యేసుక్రీస్తు ముస్సు నమకం ఇట్టి వలె దేవుణు మజి సిత్తి ఇనాయమ్ నె వరిజ్ బా సిత్తాన్. దేవుణుదిజ్ అడ్డు కిదెజ్ నాను ఎపటిదికానా?”.

18 యాక వెహారె వారు మరి ఇని అడ్డుబా వెహావితార్. “నిజమ్ నె, యూదురు ఆఇ వరిజ్ బా వరి పాపమ్ కు డిసిసిజి దేవుణుదిజ్ లోజిజి ఎలాకాలం బత్కిదెజ్ దేవుణు సరి సీజినాన్”, ఇజి వెప్పి వారు దేవుణుదిజ్ స్తుతి కిత్తార్.

అంతియోకయాదు నమ్మితి వరిజ్ క్రీస్తు లోకు ఇజి పేరు వాతాద్.

19 సైపానుజ్ సప్తివెనుక యేసుప్రబు ముస్కు నమ్మితి వరిజ్ లావు మాలెజ్ వాతిజ్ వారు సెద్రిత సాహార్. సెద్రితికార్ సెగొండార్ పెనికె, కుప్ర, అంతియొకియ ఇని దేసమ్దాక సాహారె యూదురిజ్ ఉండ్రెనె దేవుణు మాటెజ్ వెప్తార్.

20 గాని వరి లొఇ సెగొండార్ కుప్రదికార్, కురేనియదికార్ మహార్. వారు సొన్ని అంతియొకయాదు మన్ని గ్రీకు బాస వర్గిని వరిజ్బా యేసు ప్రబు వందిజ్ సువార్త వెప్తార్.

21 ప్రబు సత్తు వరివెట మహాద్. అందెజె మంద లోకు దేవుణు మాట నమ్మిత్తారె ప్రబు ముస్కు నమకం ఇట్టార్.

22 యెరూసలేమ్దు మన్ని సజమ్దికార్ యాక వెహారె బర్నబెజ్ అంతియొకయాదు పోక్తార్.

23 బర్నబ వాతండ్రె దేవుణు దయ వరి ముస్కు వాతాద్ ఇజి సుడెతాండ్రె సర్ద ఆతాన్. దేవుణు ముస్కు ఉండ్రె మన్నుదాన్ నమ్మిదు ఇజి వాండ్రు వరిజ్ దయరం వెప్తాన్.

24 బర్నబ దేవుణు ఆత్మ సత్తుదాన్, నమకమ్దాన్ నిండ్రెతికాన్, నెగ్గికాన్. వాండ్రు దేవుణు మాటెజ్ బోదిస్తిజ్ మంద లోకుర్ యేసుప్రబు ముస్కు నమకం ఇట్టార్.

25 వెనుక బర్నబ సవులుజ్ రెబాజి తార్పు పట్టుం సాహాన్.

26 సవులుజ్ రెబాజి దొహ్క్తిజ్ వన్నిజ్ అంతియొకయాదు తతాన్. వారు రిఎర్ ఉండ్రె ఏండు బానె మహి సజమ్దికార్ వెట కూడితారె మంద లోకాజ్ దేవుణు మాటెజ్ బోదిస్తార్. అంతియొకయాదునె, నమ్మితి వరిజ్ క్రీస్తు లోకు ఇజి పేరు తొలిత ఇడె: ఆత్త మహాద్.

27 యా కాలమ్దు ప్రవక్తరు సెగొండార్ యెరూసలేమ్దాన్ అంతియొకయాదు వాతార్.

28 వరి లొఇ అగబ ఇనికాన్ ఒరెన్ దేవుణు ఆత్మదాన్ నిండ్రెతాండ్రె రోమరాజు ఏలుబడి: కిని దేసమ్కాజ్ విజు ఉండ్రె పెరి కరు వానాద్లె ఇజి వెప్తాన్. (క్లవుదియ ఇని రాజు ఏలుబడి: కిత్తి కాలమ్దు యా కరు వాతాద్)

29 అయావలె నమ్మితికార్ విజెరె యూదయదు బత్రిని నమ్మిని వరిజ్ సాయం పోక్తెజ్ ఒడిబితార్. మాపు ఎసా సినాపా నసా సీనాప్ ఇజి వారు ఒడిబితార్.

30 వరి సాయమ్కు వారు బర్నబని, సవులు వెట పెద్దెలుజబాన్ పోక్తార్.

## 12

పేతురు జెలిదాన్ గెలిస్తాన్.

1 అయ కాలమ్దు హేరోదు రాజు సజమ్ది వరిజ్ సెగొండారిజ్ మాలెజ్ కిదెజ్ మొదొల్స్తాన్.

2 యోహానుజ్ దాద ఆతి యాకోబుజ్ కుర్దదాన్ సపిస్తాన్.

3 యా సజతి యూదురిజ్ ఇస్టం ఆతాద్ ఇజి నెస్తాండ్రె హేరోదు రాజు పేతురుజ్బా తొప్పి ఇడె:దెజ్ ఆడ్ర సిత్తాన్. యూదురి పులాజ్ ఆఇ రొటెజ్ తిని పండొయ్ దిసమ్కాజ్ యాక జర్గితాద్.

4 పేతురుజ్ అరెస్టు కితారె వన్నిజ్ జేలిదు ఇట్టార్. జేలిదు ఇట్టారె వన్నిజ్ కాప్ కిజి మండ్రెజ్ పదహారు మణిసిర్ జమానుజ ఒపజెప్తాన్. ఉండ్రె సుటు నాల్ఎర్ మణిసిర్ కాపు మంజినార్. పస్కు పండొయ్ వెన్కా లోకాజ్ నడిమి తసి పేతురుజ్ తీర్పు తీరిస్తెజ్ హేరోదు రాజు ఒడితాన్.

5 ఆహె పేతురు జేలిదు మహాన్. గాని సజమ్దికార్ వన్ని వందిజ్ గటిజ దేవుణుదిజ్ పార్దనం కిజి మహార్.

6 మర్సనాండిజ్ పేతురుజ్ తీర్పు తీరిస్తెజ్ వెల్లి తన ఇజి హేరోదు రాజు ఒడిబిత మహాన్. అయ పొదొయ్ పేతురు రిఎర్ జమానుజ నడిమి రుండి గొల్స్కాణిజ్ తొహె ఆజి నిర్ద కిజి మహాన్. రిఎర్ జమానుజ్ వెల్లి కాపు మహార్.

7 అయావలె వెటనె ఒరెన్ దేవుణు దూత తోరె ఆతాన్. ఆ గది లొఇ జాయ్ నన్ని వెల్లర్ వాతాద్. దూత పేతురుజ్ పడెకాదు డెయ్జి బేగి నిజ్అ ఇజి వెప్పి నిక్తాన్. వన్ని కిక్కాణిజ్ గొల్స్కు ఊడె:జి అర్దె.

8 దూత వన్నివెట, “నీను నడుముదు తొహె ఆజి జోడ్కు తొడె:గిఅ”, ఇహాన్. పేతురు అక్కెజ్ తొప్తాజ్ దూత, “నీ పాత పిడిగ్గి నా వెనుక రఅ”, ఇహాన్.

9 పేతురు దూత వెనుక సాహండ్రె జెలిదాన్ వెల్లి వాతాన్. గాని జర్గినిక నిజమె ఆవిదొ ఇజి పేతురు నెన్ఏతాన్. యాక విజు దర్సనమ్దు సుడె:జిన ఇజి ఒడిబితాన్.

10 వారు ముందాల కాప్ కిని వరిజ్ డాట్టి వెనుకాది వరిజ్బా డాట్టి పట్టుం సొని ఇనుము గవుని డగ్రు వాతార్. వాతిజ్ అదిసె రే ఆతాద్. వారు సొసి వాజి ఉండ్రె వీది డాట్టిసాహె వెటనె దూత వన్నిజ్ డి:స్త సాహాన్.

11 అయావలె, జర్గితికెజ్ విజు నిజమె ఇజి పేతురు తెలి ఆతాన్. దేవుణు వన్ని దూతెజ్ పోక్తాండ్రె నజి హేరోదురాజు బాణిజ్ డి:బిస్తాన్. యూదురు నజి ఇనిక కిదెజ్ ఒడిబితారొ దన్ని లొఇహాన్బా డి:బిస్తాన్ ఇజి ఏలు నాసు నిజం నెస్సా ఇజి ఒడిబితాన్.

12 యాక నెస్తాండ్రె పేతురు, మార్కు ఇజి కూకె ఆని యోహానుజ్ అయ్సి ఆతి మరియు ఇండ్రో సాహాన్. బాన్ మంద లోకుర్ కూడిత మహారె పార్లనం కిజి మహార్.

13 పేతురు వెల్లి మహి సేప్లాదు కొత్తాన్. ఎయెన్ ఇజి వెండ్రెజ్ రోద ఇని పణి మణిసిబాన్ సాహాద్.

14 అది పేతురు కంటం గుర్తు అస్తాదె గొప్ప సర్ల ఆతాద్. సేప్లా రేవిండ ఉహ్కాన్సి సాహాదె, “పేతురు సేప్లా డగ్రు నిహ మనాన్”, ఇజి మహి వరిజ్ వెప్టాద్.

15 వారు, “నిజి వెరి మనాద్” ఇహార్. గాని అది మరి మరి వెప్టాజ్ వారు, “అహిజ వన్ని దూత వాతాద్” ఇహార్.

16 గాని పేతురు సేప్లాదిజ్ కొత్తి మహాన్. వారు సొన్ని సేప్లా రేతిజ్ పేతురుజ్ సుడెతారె గొప్ప బమ్మ ఆతార్.

17 మీరు జమ్న మండ్రు ఇజి పేతురు వరిజ్ కియు సయ్న కితాండ్రె, దేవుణు వన్నిజ్ ఎలాగ జెలి లోఇహాన్ వెల్లి తత్తాన్ ఇజి వరిజ్ విజు వెప్టాన్. యాక యాకోబుజ్ని మహి నమ్మితి వరిజ్ వెప్టూ ఇహండ్రె మరి ఉండ్రె బాడ్డిదు సాహాన్.

18 పెండాహిజ్ జేలిదు మహి జమాజ్ణు గొప్ప గాబ్ర ఆతార్. పేతురు ఇనిక అతాండ్రె ఎంబె సాహండ్రె ఇజి వారు గొప్ప గాబ్ర ఆతార్.

19 పేతురుజ్ రెబాజి దొహ్కెస్టెజ్ హేరోదు రాజు ఆడ్ర సిత్తాన్. గాని వారు ఎసా రెబాతిజ్బా తోర్వితాన్. అందెజె హేరోదు రాజు కాప్ కిజిమహి జమాన్జ మరి మరి యా సజతి వందిజ్ వెన్బాజి పేతురు గెలస్త సాహాన్ కాక వరి ముస్సు తీర్పు కితాండ్రె వరిజ్ సప్టెజ్ ఆడ్ర సిత్తాన్.

**హేరోదు రాజు సాతాన్.**

హేరోదు రాజు యూదయదాన్ కయ్సరియాదు సాహండ్రె బాన్ సెగం కాలం బత్కితాన్.

20 హేరోదురాజు తూరు పట్టుమది వరి ముస్సు, సీదోసు పట్టుమదివరి ముస్సు గొప్ప కోపం కల్గిజి మహాన్. అందెజె వారు ఉండ్రె మన్నుదాన్ వాతారె రాజు ఇండ్రోణి అతికారి ఆతి ఒరెన్ బ్లాస్తు ఇని వన్నిజ్ వరి పడెకాదు కూడుస్తార్, రాజు వరి ముస్సు సమదనం ఆదెజ్ ఇజి. ఎందనిజ్ ఇహిజ రాజు దేనమ్దానె వరిజ్ పంట దొహ్కాన్సి మహాద్.

21 ఏర్పాటు కిత్తి రోజు, హేరోదు రాజు, రాజుర్ తోడెగిని సొక్కెజ్ పొర్పాతాండ్రె రాజు కుర్చిదు బస్తాండ్రె వాతివరివెట మీటిజ్దు వర్గితాన్.

22 అక్క వెహారె లోకుర్, వీండ్రు ఒరెన్ దేవుణు లెకెండ్ వెస్సినాన్, లోకు లెకెండ్ ఆవన్ ఇజి గగోల్ కిత్తార్.

23 రాజు యాక వెహిజ్ దేవుణుదిజ్ స్తుతి కివెతాన్. వెటనె దేవుణు దూత వన్నిజ్ ఉండ్రె కస్తం పుటిస్తిజ్ వాండ్రు పిడుకు ఆజి సాతాన్.

24 గాని దేవుణు సువార్ల మరి మంద లోకు వెహార్కాక దేవుణు ముస్సు నమకం ఇట్టార్.

25 బర్నబని సవులు యెరూసలేమ్దు సొన్ని వరి పణిజ్ వీస్తారె మార్కు ఇజి కూకె ఆని యోహానుజ్ కూడుస్తారె యెరూసలేమ్దాన్ మర్జి వాతార్.

## 13

**బర్నబెజ్ని సవులుజ్ సువార్ల సాటిస్టెజ్ దేవుణు సజమ్దికార్ ఏర్పాటు కిత్తార్.**

1 అంతియోకయాదు మహి సజమ్దు, సెగెండార్ ప్రవక్తరు, మరి సెగెండార్ దేవుణు మాటెజ్ బోదిసినికార్ మహార్. వారు ఎయెర్ ఇహిజ, బర్నబ, నిగెర్ ఇజి కూకె ఆని సిమెయోను, కురేనదికాన్ లూకియ, హేరోదు అంతిపాన్\*.

2 వీరు దేవుణుదిజ్ పార్లనం కిజి ఉపాస్ కిజి మహివలె దేవుణు ఆత్మ వెప్టాన్, “బర్నబెజ్ని సవులుజ్ నాను కూక్తి పణి వందిజ్ మీరు ఏర్పాటు కిదు”.

3 వెప్టాజ్, సజం ఉపాస్ మంజి పార్లనం కితారె వరి ముస్సు కిక్కు ఇట్టారె, దేవుణు వెప్టా పణి వందిజ్ పోక్టార్.

**బర్నబని సవులు కుప్త ఇని ద్వీపుదు సాహార్.**

4 దేవుణు ఆత్మ పొక్తిజ్ బర్నబని సవులు డిగు సమ్దరం డగ్రు మన్ని సెలూకిన ఇని పట్నం సాహారె ఓడెదు ఎక్తారె కుప్త ఇని ద్వీపుదు† సాహార్.

5 వారు సలామి ఇని పట్నందు సాహారె బాన్ మహి యూదురి మీటిజ్ కిని ఇల్కాజ్ సాహారె దేవుణు మాటెజ్ సాటిసి మహార్. మార్కు ఇజి కూకె ఆని యోహాను వరివెట వరిజ్ తోడు: లెకెండ్ మహాన్.

\* **13:1 13:1** హేరోదు అంతిపాన్. మార్కు సువార్లదు బాప్తీసం సీని యోహానుజ్ జెలిదు ఇడ్డి వెనుక వన్నిజ్ సప్టెజ్ ఆడ్ర సిత్తి హేరోదు రాజు వీండ్రె. (మార్కు 6:14-28) రాజు వెట కూడిజి పితితి మనయెను, సవులు ఇనికార్ † **13:4 13:4** ద్వీపు. సురుల సమ్దరం మన్ని ఇజి దిసె

6 వారు అయ ద్వీపు విజు పయనం కితారె పాపు ఇని పట్టుమదు వాతార్. బానె వారు బర్యేసు ఇజి కూకె ఆని ఒరెన్ యూద వన్నిజ్ సుడేతార్. వాండ్రు ఒరెన్ సెట్టికాన్. వాండ్రు అబద్దం మాటెజ్ వెప్పి ప్రవక్త. దేవుణు మాటెజ్ వెప్పి ప్రవక్త ఇజి నాటిసినాన్ గాని ఆవన్.

7 వాండ్రు రోమ గవర్నరు ఆతి సెర్గిపవులు వెట మహికాన్. అయ రోమ గవర్నరు ఇహిజ వాండ్రు తెలివి మన్నికాన్. వాండ్రు దేవుణు మాటెజ్ వెనా ఇజి బర్నబెజ్ని సవులుజ్ కూకెప్పిస్తాన్.

8 గాని అయ సెట్టికాన్ వరిజ్ అడ్డు కిత్తాన్. (గ్రీకు బానదు వన్ని పేరు ఎలీమ) రోమ గవర్నరు ఆతి సెర్గిపవులు యేసుప్రబు ముస్కు నమకం ఇడేవిండాదెజ్ సుడేతాన్, యా గార్ది విదె కినికాన్.

9-10 అయావలె సవులు (వన్నిజ్ పవులు ఇని పేరుబా మహద్) దేవుణు ఆత్మదాన్ నిండ్రితాండ్రె ఎలీమేజ్ తినాజ్ సుడేజి వెప్తాన్, “నీను సయ్యూన్ పొటాదికాన్, నీతి నిజాయితీ ఆతి విజు దన్నిజ్ వడేఇకి. నీను పూర్తి సెఇకి, గొప్ప మొసెం కినికి. నిజమాతి దేవుణు మాటెజ్ నిజం ఆఇకెజ్ ఇజి తోరిసిని.

11 ఇదిలో, దేవుణు ఏలు నిజి తీర్పు సీజి సిక్స సీజినాన్. నీను సెగం కాలం గుడ్డి ఆజి పొద్దుదిజ్ సుడేదెజ్ అట్విండ ఆనిలె” వెటనె వాండ్రు గుడ్డి ఆతాన్. గోయ్ నన్ని గాందుదాన్ వన్ని కణెకెజ్ సీకటి ఆతె. ఎయెర్బా కికాజ్ అసి బుల్లెయ్ కిబిస్సారా ఇజి అతాల్ ఇతాల్ బూలాజి మహాన్.

12 అయ రోమ గవర్నరు జర్గితిక సుడేతివలె యేసుప్రబు ముస్కు నమకం ఇడ్తాన్. ఎండనిజ్ ఇహిజ యేసుప్రబు - వందిజ్ బోద వెంజి బమ్మ ఆతాన్.

### పవులుని బర్నబు పిసిదియ దేసమ్దు మన్ని అంతియోకయాదు సువార్త వెప్పినార్

13 వెనుక పవులుని వన్నివెట మహికార్ ఓడె ఎక్తారె పాపుదాన్ పంపులియాదు మన్ని పెర్గ ఇని పట్టుం సొహార్. బానె యోహాను వరిజ్ డిస్తారె యెరూసలేమ్దు మర్జి సొహాన్.

14 వారు పెర్గు పట్టుమదాన్ సొత్తారె పిసిదియ దేసమ్దు మన్ని అంతియోకయాదు సొహార్. బానె వారు విస్త్రాంతి దినమ్దు యూదురి మీటిజ్ ఇండ్రె సొహారె బస్తారె.

15 మోసె సిత్తి రూలుదాన్, ప్రవక్తరు రాస్తి మాటెజుదాన్ సెగం నద్వితి వెనుక మీటిజ్ ఇండ్రెణి అతికారిజు పవులుని బర్నబు వెట. “దాదారండె, లోకాజ్ బోదిస్సెజ్ ఇని మాటెజ్బా మహిజ వెప్తూ” ఇహార్.

16 అయావలె పవులు నిజితండ్రె విజేరె అలెజి మండ్రు ఇజి కియు సయన కితాండ్రె వరివెట వెప్తాన్, “ఇస్త్రాయేలు లోకాండె, దేవుణుదిజ్ తియెల్ ఆని యూదురు ఆఇ లోకాండె, నా మాట వెండ్రు.

17 మా ఇస్త్రాయేలు లోకు పార్లనం కిని దేవుణు, మా అనిగొగొరిజ్, వన్ని లోకుర్ ఇజి మండ్రెజ్ ఏర్పాటు కిత్తాన్. వారు అయ్గుప్ప దేసమ్దు ఆఇదేసెమ్దివరిలెకెండ మహివలె వరిజ్ నండె లోకు ఎల్పిస్తాన్. వెనుక గొప్పసత్తుదాన్ వరిజ్ అబ్బెణాన్ గెల్పిసి తత్తాన్.

18 రమారమి నలపయ్ పంటెజ్ వారు బిడిఃమ్ బూమిదు సొన్ని మహివలె దేవుణు వరిజ్ ఓరిసి మహాన్.

19 కనాను దేసమ్దు మహి ఏడు జాతిజాణి వరిజ్ విదెం కిజి గెల్పిస్తాండ్రె వరిజ్ పాడు కిజి వరి దేసెం వన్ని లోకాజ్ అక్కు లెకెండ సిత్తాన్.

20 యాకెజ్ విజు నాల్లి వందెజ్ యబాయ్ పంటెజాణ్ జర్గితె.

వెనుక సముయేలు ఇని ప్రవక్త వాతి కాలమ్దాక వరిజ్ ఏలుబడిః కిదెజ్ తీర్పు తీరిస్సి నెయ్యి. లోకాజ్ దేవుణు ఏర్పాటు కిత్తాన్.

21 దన్ని వెనుక ఇస్త్రాయేలు లోకుర్ ‘మజి ఉండ్రె రాజుజ్ ఏర్పాటు కిఅ’ ఇజి వెప్తాజ్ దేవుణు వరిజ్ బెన్యమిను కుటుమ్దికాన్ కీసు మరిసి ఆతి సవులుజ్ నలపయ్ పంటెజ్ ఏలుబడిః కిదెజ్ ఏర్పాటు కిత్తాన్.

22 వెనుక సవులుజ్ లాగితాండ్రె దావీదుజ్ రాజువజ దేవుణు ఏర్పాటు కిత్తాన్. దావీదు వందిజ్ దేవుణు ఇని సాసి వెప్తాన్ ఇహిజ, ‘యెసెయి మరిసి ఆతి దావీదు ఇహిజ నాను ఒడిఃబిని లెకెండ ఒడిఃబిజినాన్. నాను ఇన్దం ఆనికెజ్ వాండ్రు ఇన్దం ఆజినాన్. వాండ్రు ఇనిక కిదెజ్ ఇజి నాను కోరిజినానొ అక్కెజ్ వాండ్రు కినాన్’.

23 యా దావీదు పొటెజాణిజె మా అనిగొగొర్ వెట దేవుణు ఒట్టుకిత్తి లెకెండ ఇస్త్రాయేలు లోకాజ్ తప్పిస్సికాన్ ఆతి యేసుజ్ పుటిస్తాన్.

24 యేసు వాని ముందాల యోహాను ఇస్త్రాయేలు లోకాజ్ బోదిస్తాన్. ఇనిక ఇహిజ ‘విజేరె పాపమ్కు ఒప్పుకోడేజి డిఃసిసీజి బాప్తినం లాగె ఆదెజ్’ ఇజి.

25 యోహాను వన్ని పణి వీస్సివలె లోకాజ్ వెహ్తాన్, 'నాను ఎయెన్ ఇజ మీరు ఒడిబిజినిదెర్? మీరు ఒడిబిజినికాన్ ఆవన్ నాను. మీరు ఎద్రు సుడేజి మహికాన్ వెన్కా వాజినాన్. వన్ని జోడ్కుబెట్టు కూతెజ్బా నాను ఏపటిదిక ఆవ'.

26 తంబెరిజాండె, అబ్రాహాం కుటుమ్దికిదెరా, దేవుణుదిజ్ తియెల్ ఆనికిదెరా, దేవుణు లోకాజ్ ఎలాగ గెల్పిస్సానై ఇజి కబ్బు దేవుణు మజి విజేరిజె పోక్తాన్.

27 ఎందనిజ్ ఇహిజ యెరూసలేమ్దు మహికార్, వరి అతికారి లోకుర్, యేసు, దేవుణు పోక్తాన్ ఇజి గుర్తు అన్వితార్. విజు విస్త్రాంతి దినమ్దు వారు ప్రవక్తరు రాస్తి మాటెజ్ నద్వితార్ గాని అర్థం కివితార్. గాని ప్రవక్తరు ముందాల్పై వెహ్తి అయ మాటెజ్ వజ జర్పిస్తార్. ఎలాగ ఇహిజ యేసుజ్ సప్తెజ్ వారు తీర్పు కిత్తార్.

28 యేసుజ్ తీర్పు కిని వన్నిడగు తసి సావుదిజ్ తగితి తప్పు ఇనికబా కివితాన్ ఇజి సుడేతిజ్బా గాని విన్నిజ్ సిలువ డేయేజి సప్తు ఇజి వారు పిలాతుజ్ బతిమాలితార్.

29 యేసుజ్ యూదురు ఇనికెజ్ ఇనికెజ్ కినారొ ఇజి ప్రవక్తరు రాస్తి మహికెజ్ విజు వారు కిత్తి వెనుక వన్ని సిసూర్ వన్ని పీనుగుదిజ్ సిలువదాన్ డిప్తారె సట్టుపణుకుదు దొలిస్తి సాలమ్ లొఇ ఇడ్తార్.

30 గాని దేవుణు యేసుజ్ సాతి వరిబాణిజ్ నిక్తాన్.

31 గలీలయదాన్ యెరూసలేమ్దు వన్నివెట సొన్ని మహి వరిజ్ యేసు నండొ రోస్కు తోరె ఆతాన్. వారు ఏలు మాటు ఇస్తాయేలు లోకాజ్ నడిమి యేసుజ్ సాసిర్.

32-33 ఏలు మాపు మిజి సువార్త వెహ్సినావ్. అయ సువార్త ఇనిక ఇహిజ దేవుణు యేసుజ్ సాతి వరిబాణిజ్ నిక్తాన్. యాక మా అనిగొగొర్ వెట దేవుణు కిత్తి ఒట్టు. వరిజ్ కిత్తి ఒట్టు వరి పొటెజాణికార్ ఆతి మా వందిజ్ ఏలు జర్పితాద్. "నీను నా మరిన్, నేండ్రు నాను నీ బుబ్బ ఆత మన్న", ఇజి కీర్తన రుండిదు రాస్తి మనిక దిన్నివందిజె.

34 దేవుణు వన్నిజ్ సాతి వరిబాణిజ్ నిక్తాన్. వన్ని పీనుగు సబ్విద్ ఇజి వన్నివందిజ్ దేవుణు మాటాదు ఈహు రాస్త మనాద్. "దావీదుజ్ సీనా ఇజి ఒట్టు కిత్తి నెగ్గి దీవెనమ్కు నాను మిజి తవ్విండ సీనా".

35 కీర్తన పుస్తకమ్దు మరి రాస్త మనాద్. అక్క ఇనిక ఇహిజ "నీను పొక్తివన్ని పీనుగు సబ్జి సొండ్రెజ్ నీను సరి సిఇ".

36 అహిజ దావీదురాజు దేవుణు ఏర్పాటు కిత్తి వజ వన్ని తరమది వరిజ్ సేవ కిజి వీస్తాండ్రె సాత సాహాన్. వన్ని అనిగొగొరిబాన్ వన్నిజ్బా ముస్తార్. వన్ని పీనుగు సబిత సాహాద్.

37 గాని సాతి వరిబాణిజ్ దేవుణు నిక్తి యా యేసు పీనుగు సబ్జి సాన్వితాద్.

38 అందెజె తంబెరిజాండె, మిజి వెహ్సిన సువార్త యాకాదె. పాపమ్కు సెమిస్తెజ్ యేసు అట్నాన్. యాక మీరు నెగ్రెండ నెస్తెజ్ ఇజి నాను ఆస ఆజిన.

39 మోసె సిత్తి రూలుజ్ ఒరెన్ వన్నిజ్ వన్ని పాపమ్కాణ్ డిబిస్తెజ్ అట్ఉ. గాని యేసు ముస్కు నమకం ఇడ్పి వరిజ్ వరి పాపమ్కాణ్ యేసు పూర్తి డిబిస్తాన్.

40 ప్రవక్తరు వెహ్తివజ మిజి రెవిండ సుడేదు. వారు ఇనిక వెహ్తార్ ఇహిజ.

41 "సుడేదు, వెక్కినికిదెరా, మీరు బమ్మ నిదెరెలె గాని పాడాజి సొనిదెర్లె. ఎందనిజ్ ఇహిజ మీ కాలమ్దు నాను ఉండ్రె బమ్మాని పణి కిన. గాని అయ పణి వందిజ్ ఎయెర్బా వెహ్తెజ్బా మీరు నమ్ఇదెర్".

42 పవులుని బర్బబ యూదురి మీటిజ్ ఇండ్రెణిజ్ సొత్తిజ్, "వాని విస్త్రాంతి దినమ్దు వాజి యా మాటెజ్ మజి మరి వెహ్సి సిదాట్", ఇజి బానె కూడితి మహికార్ వరిజ్ బతిమాలితార్.

43 మీటిజ్ ఆతి వెనుక నండొండార్ యూదురు, నండొండార్ యూద మతమ్దు కూడితి యూదురు ఆఇ బక్తి మన్నికార్ పవులుని బర్బబ వెట సాహార్. పవులు, బర్బబ వరివెట వర్పితార్. దేవుణు మిజి తోరిస్సి దయాదర్మమదిజ్ డిన్విండ ఎలాకాలం నడిదు ఇజి పవులుని బర్బబ వరిజ్ ఉసార్ కిబిస్తార్.

44 మరి వాతి విస్త్రాంతి దినమ్దు పట్టుమ్దికార్ విజేరె సొహి లెకెండ మంద లోకుర్ దేవుణు మాట వెండ్రెజ్ ఇజి యూదురు మీటిజ్ కిని ఇండ్రె కూడేజి వాతార్.

45 పవులు వెహ్సి మాటెజ్ వెండ్రెజ్ మంద లోకుర్ కూడేజినార్ ఇజి సుడేతారె యూదురు గోస ఆతార్. వారు పవులు వెహ్తి మాటదిజ్ మరేజి వెహ్తారె వన్నిజ్ దూసలాడితార్.

46 అయావలె పవులు, బర్బబ తియెల్ ఆవిండ వెహ్తార్, "దేవుణు మాట ముందాల మిజి వెహ్తెజ్వలె. అందెజె మాపు ముందాల మిజి వెహ్తావ్. గాని మీరు, ఎలాకాలం బత్కిని బత్కు దొహ్క్కికావ్ ఆవప్ ఇజి మిజి మీరె నెక్కి పొక్తిదెరె తీర్పు కిజినిదెర్ కక మాపు మిజి డిసి యూదురు ఆఇ లోకుర్ బాన్ సొన్నినావ్.

47 దేవుణు మజి సత్తి ఆడ్ర ఇనిక ఇహిజ, 'యూదురు ఆజ వరిజ్ ఉండ్ర జాయ్ వజ మిజి ఇట్టా మన్ను. ఎందనిజ్ ఇహిజ యా లోకమ్దు మన్ని విజు లోకాజ్, వరి పాపమ్కాణ్ వాని సిక్చదాన్ గెల్పెసెజ్' ఇజి వెప్తా మనాన్.

48 యూదురు ఆజ లోకుర్ విజేరె యా మాటెజ్ వెహారె సర్ద ఆతార్. దేవుణు మాటెజ్ ఎస్సానొ నెగ్గికెజ్ ఇజి వారు వెప్తార్. ఎలాకాలం బత్తిని బత్తుదిజ్ ఏర్పాటు ఆతికార్ విజేరె దేవుణు మాటెజ్ నమ్మితార్.

49 దేవుణు మాట అయ దేసమ్దు విజు సాటె ఆతాద్.

50 గాని యూదురు ఆ పట్టుమ్దు బక్తి మన్ని పల్కుబడి: మనికెజ్ ఆతి అయ్లి కొణ్ణెక వెట, పెరికార్ ఆతి మొగవరి వెట వర్గిజి కోపం రేప్తారె పవులు ముస్కు, బర్నబ ముస్కు మాలెజ్ కితారె వరిజ్ అయా పట్టుమ్దాన్ నెక్త పొక్తార్.

51 అందెజె పవులుని బర్నబ, వరి కాల్యాణి దూల్లి అయ పట్టుమ్ది వరి ఎద్రు దుల్ప్తార్. ఎందనిజ్ ఇహిజ వారు దేవుణు మాట నెక్సిపొక్తిజ్ వరిజ్ వాని సిక్చ వారె తప్పిస్తార్ ఇజి సాసి లెకెండ్ మండ్రెజ్ ఇజి. వెనుక వారు ఇకోనియ ఇని పట్టుమ్దు సొహార్.

52 అంతియొకయాదు మన్ని సిసూర్ ఎస్సానొ సర్ద ఆతార్. దేవుణు ఆత్మ వరి ముస్కు పూర్తి వాతాద్.

## 14

పవులు, బర్నబ ఇకోనియాదు సువార్త వెప్పినార్

1 పవులుని బర్నబ కూడెజి ఇకోనియాదు సాహారె అంతియొకయాదు కిత్తిలెకెండ్ యూదురు మీటిజ్ కిని ఇండ్రొ సాహార్. వారు నెగ్గెండ బోద వెప్తాజ్ నండెండార్ యూదురు, నండెండార్ యూదురు ఆఇకార్బా నమ్మితార్.

2 గాని నమ్మిఇకార్ యూదురు, యూదురు ఆఇ వరిజ్ రేప్తారె అపొస్తురుజ ముస్కు కోపం పుటిస్తార్.

3 గాని పవులు, బర్నబ నండె రొస్కు బానె మహార్. యేసువందిజ్ దయ్ రమ్దాన్ వర్గితార్. వారు ప్రబు దయాదర్ మమ్ వందిజ్ వెప్తా మాటెజ్ నిజం ఇజి ప్రబు విజెరిజ్ తోరిస్తాన్. ఎలాగ ఇహిజ బమ్మాతి పణిజ్ బమ్మాతి గుర్తుజ్ కిదెజ్ పవులుజ్ బర్నబెజ్ సత్తు సితాన్.

4 అయ పట్టుమ్దు మహి లోకుర్ రుండి గుంపుజ్ ఆతార్. సెగెండార్ యూదురు పడెకాద్, మరి సెగెండార్ అపొస్తురి పడెకాద్.

5 అయావలె సెగెండార్ యూదురు ఆఇకార్, మరి సెగెండార్ యూదురు, యూదురి అతికారిజు వెట కూడెజి అపొస్తురుజ్ అసి వరిజ్ సిగు కిజి పణుకుజాణిజ్ డెయ్ జి సప్తెజ్ వలె ఇజి ఒడిబిజి మహార్.

6-7 అపొస్తురు అయ సజతి నెస్తారె లుకయెనియాదు మహి లున్త్ర, దెర్బ ఇని పట్టుమ్కాణ్, వన్కా సురుల మన్ని దేసమ్కాజ్ ఉహ్కాసి సాహారె అబ్బె సువార్త సాటిస్తార్.

లున్త్ర దెర్బ ఇని పట్టుమ్కాజ్ సాన్సినార్

8 లున్త్ర ఇని పట్టుమ్దు, నడిదెజ్ అట్ ఇ సాట వాండ్రు ఒరెన్ మహాన్. వాండ్రు పుట్టిబాణిజ్ మొదొల్ని సాటాదికాన్ ఆతండ్రె ఎసెజ్ బా నడిదెజ్ అట్ ఏండ బసినె మంజినాన్.

9 పవులు బోదిసి మహిజ్ వాండ్రు వెంజి మహాన్. పవులు వన్నిజె సుడెతిజ్ నెగెండ్ ఆన ఇజి వన్నిజ్ నమకం పుట్టినాద్ ఇజి నెస్తాన్.

10 అయావలె పవులు వన్నిజ్, "నిజ్ అ, నీ పాదమ్కు బూమిదు మొప్పి నిల్ అ", ఇజి డటం వెప్తాజ్ అయ సాటాదికాన్ లిట్టి నిజెతండ్రె డాట్టెజ్ మొదొల్స్తాన్.

11 పవులు కిత్తి బమ్మాతి పణి సుడెతారె బాన్ మహి లోకుర్ లుకోనియ బాసాదు గగోలాతార్. "దెయమ్కు లోకు లెకెండ్ ఆతెనె మాడగ్రు డిగ్ జి వాతె", ఇజి డటం గగోలాతార్.

12 బర్నబెజ్ బ్రుహాన్ పతి ఇజి పేరు ఇట్టార్. నండె బోద వెప్తా వందిజ్ పవులు హెర్మ ఇజి పేరు ఇట్టార్.

13 పట్టుం వెల్లి మహి బ్రుహాన్ పతి గుడిది పుజేరి వాతండ్రె డాకుజ్, మాజుదండెజ్ అస్తాండ్రె పట్టుం వెల్లి మహి సేప్లా డగ్రు తత్తాన్. మంద లోకు కూడెజి వాతారె పూజ కిసాట్ ఇజి అయ పుజేరిని, కూడితి మహి లోకుర్ ఒడిబిజి తార్.

14 బర్నబని పవులు యాక నెస్తారె వారు కిని పణిదిజ్ ఒప్పుకొండె ఎవ్ ఇజి తోరిసిని వందిజ్ వరి సొక్కెజ్ పాతెజ్ కిస్తారె లోకురి నడిమిదు ఉహ్కాసి సాహారె డటం వెప్తార్.

15 "తంబెరిజాండె, మీరు ఎందనిజ్ ఈహు కిజినిదెర్? మాపుబా మీ నన్ని లోకునె. మీరు యా పణిదిజ్ రెఇకెజ్ డిసిసిజి ఆగాసం, బూమి, సమ్దరం, బాన్ మన్ని విజు వనకాజ్ పుటిస్తి బత్తిజి మంజిని దేవుణుదిజ్ నమ్మిదు ఇజి మిజి సువార్త వెప్పినాప్.

16 గడ్డిసి కాలమ్దు విజు జాతిజ్ వరిజ్ వరిజ్ ఇష్టమాతి వన్కాజ్ పొగిడిజి మాడిసెజ్ దేవుణు డిస్త సితాన్.

17 అహిజ్బా దేవుణులు ఆగాసమదాన్ మిజి పిరు, ఎమేణివేల పంట అయావలె కనికారం ఆజి సీజినాన్. తక్కు సిల్లెండ బోజనం సీజినాన్. మీ మన్నుదిజ్ నర్ల కిబిసి పోస కిజినాన్. ఈహు వాండ్రు ఎలాగ మహ్తి దేవుణు ఇజి లోకాజ్ తోరిస్తాన్”.

18 అపొస్తరు యాలెకెండ వెహ్టిజ్బా వారు విరిజ్ పూజ కివండ ఆదెజ్ ఇజి లోకురిజ్ అడ్డు కిదెజ్ గొప్ప కస్టం ఆతాద్.

19 అయావలె అంతియోకయదాన్, ఇకొనియదాన్ సెగొండార్ యూదురు వాతారె వరి మాటెజాణిజ్ నండో లోకాజ్ వరి పడెకాదు కూడుస్తారె. కూడుస్తారె, పవులు మున్ను పణుకుజ్ డెయ్యూర్. వాండ్రు సాతాన్ ఇజి ఒడిబిత్తారె పట్టుం వెల్లి వన్నిజ్ ఈడ్డిస్తారె బానె డిస్తారె.

20 గాని సిసూర్ వన్ని సురుల కూడితి మహివలె పవులు నిజితండ్రె పట్టుమ్ లోఇ మర్జి సాహాన్. మహ్నా నాండిజ్ పవులు, బర్బబ కూడితారె దెర్బ ఇని పట్టుమ్దు సాహాన్.

### పవులుని బర్బబ సిరియాదు మన్ని అంతియోకయాదు మర్జి సాహాన్

21 పవులుని బర్బబ దెర్బ ఇని పట్టుమ్దు సువార్త బోదిస్తారె. నండో లోకుర్ యేసుప్రబుజ్ నమ్మితారె. వెనుక పవులుని బర్బబ, లున్త్ర, ఇకొనియ, అంతియోకయాదు మర్జి వాతారె.

22 వాతారె, ఎమేణి పట్టుమ్ది వరిజ్ బానె సిసూరిజ్ ఉసార్ కిబిస్తారె. “మీ నమకం డిన్విండ మండ్రు. మాటు నండో మాలెజ్ ఓరిసి దేవుణు రాజెమ్దు సొండ్రెజ్ వలె”, ఇజి మరి మరి పణిసి వెహ్టారె.

23 పవులు, బర్బబ విజు సజమ్కాజ్ పెద్దెల్జ ఏర్పాటు కితారె ఉపాన్ మంజి పార్దనం కిజి, వారు నమ్మితి దేవుణుదిజ్ వరిజ్ ఒపజెస్తారె.

24 వెనుక పిసిదియ దేసెం డాట్టారె పంపులియాదు వాతారె.

25 పెర్గ ఇనిబాన్ దేవుణు మాటెజ్ బోదిసి వెనుక అతలియ పట్టుమ్దు డిగ్జి సాహాన్.

26 అబ్బెణిజ్ ఓడె ఎక్కారె వారు మొదోహి సోత్తి సాహి అంతియోకయాదు మర్జి వాతారె. యా అంతియోకయాదునె దేవుణు పణివందిజ్, వన్ని దయాదర్మమ్దిజ్ ఒపజెపె ఆతారె. అయ పణి వీస్తారె ఏలు బానె మర్జి వాతారె.

27 మర్జి వాతారె సజమ్ది వరిజ్ విజెరిజ్ కూడుస్తారె, దేవుణు వరి వెటెని కిత్తి పణిజ్ విజు వెహ్టారె. యూదురు ఆఇకార్ దేవుణుదిజ్ నమ్మిదెజ్ వాండ్రు ఎలాగ సరి సిత్తాన్ ఇజి వెహ్టారె.

28 వారు నండో కాలం బానె మంజి సిసూరి వెటె బత్తిత్తారె.

## 15

### అపొస్తరు, పెద్దెలుజు ఆలోసనం కిదెజ్ యెరూసలేమ్దు కూడెజి వాతారె

1 సెగొండార్ యూదయ దేసెమ్దికార్ అంతియోకయాదు వాతారె. వారు అబ్బె మన్ని లోకాజ్ ఈహు నెస్పిస్తెజ్ మొదోల్స్తారె. ఇనిక ఇహిజ మోసె సిత్తి రూలు వజ సునతి కిబె ఆవిండ మహిజ మీరు సిక్చదాన్ గెలిస్తెజ్ అట్ఇదెర్ ఇజి నెన్పిస్తారె.

2 పవులుని బర్బబ యా సజతి వందిజ్ కూడితారె యూదయ దేసెమ్ది వరివెటె నండో వర్గిజి ఆహె తర్కిస్తారె. అందెజె యా మాటెజ వందిజ్ పవులు, బర్బబ, వరివెటె అంతియోకయ దేసెమ్దు మన్ని మరి సెగొండార్ ఎక్కు యెరూసలేమ్దు సొన్ని అబ్బె మన్ని అపొస్తరుజు, పెద్దెల్జ డగ్రు సొండ్రెజ్ వలె ఇజి తీర్మానం ఆతారె.

3 ఆహె అయ సజమ్ది లోకుర్ వరిజ్ పోక్తారె. వారు పినెకె, సమరియ ఇని దేసెమ్క సరి సాహారె బానె మహి వరివెటె యూదురు ఆఇకార్ దేవుణు దరోట్ మహ్తా వాతారె దేవుణుదిజ్ నమ్మిజినార్ ఇజి విజు వెహ్టారె సాహాన్. అబ్బె మహి నమ్మితికార్ యాక వెహారె గొప్ప నర్ల ఆతారె.

4 వారు యెరూసలేమ్దు వాతివలె సజమ్దికార్, పెద్దెలుజు, అపొస్తరు విజెరె వరిజ్ గవరం సీజి బసె కిత్తారె. దేవుణు వరివెటె కిత్తి పణిజ వందిజ్ విజు వారు వెహ్టారె.

5 గాని బాన్ పరిసయరు ఇని జటుదు మహి నమ్మితికార్ సెగొండార్ నిజ్జె వెహ్టారె, “నమ్మిత్తి వరి లోఇ యూదురు ఆఇ లోకుర్ సునతి కిబె ఆదెజ్ వలె. మోసె సిత్తి రూలుదు మన్ని ఆద్రెజ్ విజు వారు ఒప్పుకోడెజి ఆహె కిదెజ్వలె ఇజి మాటు వరిజ్ వెహ్టారె”, ఇజి వెహ్టారె.

6 అయావలె అపొస్తరు, పెద్దెలుజు యా సజతి వందిజ్ ఆలోసనం కిదెజ్ కూడెజి వాతారె.

7 నండో తర్కిసి వెనుక పేతురు నిజితండ్రె వరివెట ఈహు వెహ్లాన్. “తంబెరిజాండె, సెగం కాలమ్కాజ్ ముందాల్నై\* యూదురు ఆఇ లోకాజ్ సువార్త వెహ్లాజ్ మీ నడిమిహానె దేవుణు నజి ఏర్పాటు కిత్తాన్ ఇజి మీరు నెసినిదెర్. ఎందనిజ్ ఇహిజ వారుబా దేవుణు మాట వెంజి దేవుణుదిజ్ నమ్మిదెజ్.

8 లోకు ఒడిబినికెజ్ విజు నెసిని దేవుణు, దేవుణుదిజ్ నమ్మితి యూదురు ఆఇ లోకాజ్బా వన్నిబాన్ కూడుఃప్పాన్ ఇజి తోరిస్తాన్. ఎలాగ తోరిస్తాన్ ఇహిజ మజి సిత్తివజనె యూదురు ఆఇ లోకాజ్బా దేవుణు వన్ని ఆత్మ సిత్తాన్.

9 యూదురు ఆతి మజిని ఆఇ లోకుర్ ఆతి వరిజ్ ఇని తేడ సిల్లెండ దేవుణు ఉండ్రె వజనె కిత్తాన్. ఎలాగ ఇహిజ వారు నమ్మితిజ్ వరి మన్నుదు మన్ని పాపమ్కు విజు లాగితండ్రె సుబరం కిత్తాన్.

10 అహిజ, మాపు గాని, మా అనిగొగొర్ గాని పిండిదెజ్ అబ్బి బరుదిజ్ ఎందనిజ్ యా నమ్మితి వరి మున్ను మొప్పినిదెర్? ఆహా మీరు కిత్తిజ మీరు దేవుణుదిజ్ కోపం రేప్పినిదెర్.

11 గాని ప్రబు ఆతి యేసు దయాదర్మమ్దానె మాటు గెలిస్తమనాట్ ఇజి మాటు నమ్మిజినాట్. అయావజనె వారుబా గెలస్త మనార్”, ఇహాన్.

12 ఆఇ జాతి లోకుర్ నడిమి దేవుణు వరివెట కిత్తి గొప్ప బమ్మాతి పణిజ వందిజ్ గొప్ప బమ్మాతి గుర్తుజ వందిజ్ పవులు, బర్నబ వెహ్లాజ్, అబ్బె మహి లోకుర్ విజేరె జమ్న అలెతారె వెహర్.

13 వారు వెహ్లా వీస్తి వెనుక యాకోబు ఈహు వెహ్లాన్. “తంబెరిజాండె, నా మాట నెగ్రెండ వెండ్రు.

14 ఆఇ జాతి లోకుర్ వెట దేవుణు ముందాల్నై దయ తోరిస్తాన్. అక్క ఎలాగ ఇహిజ వరి బాణిజ్ ఉండ్రె జటు వన్ని సొంత లోకు వజి ఏర్పాటు కిడెజ్ దేవుణు వరిజ్ దయ తోరిస్తాన్. అక్క విజు పేతురు యెలె వెహ్లా మనాన్.

15 ప్రవక్తరు ముందాల్నై వెహ్లాకెజ్ యాకదె. ఇని తేడ సిల్లెద్. వారు ముందాల్నై వెహ్లా మాట ఇనిక ఇహిజ.

16 “దిన్ని వెనుక నాను మర్జి వాజి దావీదురాజుది అర్తి సాహి ఇల్లు తోహ్న. లాగ్గి విసీర్జి దన్నిజ్ నాను మర్జి తోహ్ని దన్నిజ్ నాను ముందాల్ మహిలెకెండె కిన.

17-18 అయావలె ఆఇ జాతి లోకుర్ విజేరె నజి రెబానార్లె. ఆఇ జాతి లోకుర్ బాణిజ్ నా పేరు అస్తెజ్ నాను ఏర్పాటు కిత్తికార్ విజేరె నజి రెబానార్లె ఇజి దేవుణునె వెహ్నినాన్”, “యాక నండో కాలమ్కాజ్ ముందాల్నై దేవుణు వెహ్లా మనాన్”.

19 యాకోబు మరి వెహ్లాన్, “నా మన్నుదు ఇనిక ఇహిజ, దేవుణు దరోట్ మహ్ని వాతి ఆఇ జాతి లోకురిజ్ మాటు మాలెజ్ కినిక ఆవిద్.

20 మాటు వరిజ్ ఉండ్రె ఉత్రం రాసి పోక్తెజ్. అబ్బె ఇనిక రాస్తెజ్ ఇహిజ, బొమ్మెజి పూజ సిత్తి కండ తినిక ఆవిద్. అక్క సెఇక. సాని బూలానిక ఆవిద్. గొత్తిక పిడికిప్పి సప్తిక తినిక ఆవిద్. నల తినిక ఆవిద్. యాక విజు డిఃసిసీదెజ్. ఆక్యె. మరి ఇనిక సిల్లెద్.

21 ఎందనిజ్ ఇహిజ యాక విజు రాస్తిమని మోసె సిత్తి రూలుజ్ ప్రతి విస్తాంతి దినమ్దు, నండో కాలమ్కాణిజ్† యూదురు మీటిజ్ కిని ఇల్కాజ్ సదివిజి మంజినాద్. మోసె వెహ్ని మాటెజ్ విజు పట్టుమ్దు బోదిసి మంజినాద్, అందెజె వన్కాజ్ విజు వారు లోబడిదెజ్”, ఇజి వెహ్లాన్.

### అపొస్తురు ఉండ్రె ఉత్రం రాస్త పోక్తార్

22 అయావలె అపొస్తురు, పెద్దెలుజు, సజమ్దికార్ విజేరె కూడితారె నమ్మిత్తి వరిలోఇహాన్ సెగొండారిజ్ ఏర్పాటు కిజి పవులుని బర్నబవెట అంతియొకయాదు పోక్తెజ్ ఇజి తెగిస్తార్. వారు బర్నబ ఇని మరి ఉండ్రె పేరు మన్ని యూద వన్నిజ్, సీలెజ్ ఏర్పాటు కిత్తార్. యూదని, సీల రిఎర్. అయ సజమ్దు ముకెలమతికార్.

23 వరివెట సజమ్దికార్ ఉండ్రె ఉత్రం రాస్త పోక్తార్. అబ్బె ఇనిక రాస్త మనాద్ ఇహిజ, ‘మీ దాద్సీర్ ఆతి అపొస్తురు, పెద్దెలుజు, అంతియొకయాదు, సిరియాదు, కిలికియాదు మన్ని దేవుణుదిజ్ నమ్మిత్తి యూదురు ఆఇ జాతిజి విజేరిజ్ వందనమ్కు పోక్కినార్.

24 సెగొండార్ మా డగ్రుహాన్ సాహారె వరి బోదదాన్ మజి మాలెజ్ కిత్తార్, మీ మన్నుజ విజు బాద కిత్తార్ ఇజి మాపు నెస్తాప్. గాని వరిజ్ మాపు పోక్వితాప్, ఇని అతికారంబా సివితాప్.

25-26 అందెజె, మా యేసు ప్రబు వందిజ్ పాణం సాపుదిజ్ ఒపజెప్పి మా ప్రియమాతి బర్నబ, పవులు ఇని వరివెట మా డగ్రుహాన్ సెగొండారిజ్ మీ బాన్ పోక్వాప్ ఇజి మాపు ఉండ్రె మన్ను ఆత మనాప్.

27 అందెజె మాపు యూద, సీల ఇని రిఎరిజ్ పోక్కినాప్. వారు వాజి మాపు రాస్తి మాటనె వెహ్లాద్.

\* 15:7 15:7 యూదురు ఆఇవరివెట సొన్ని సువార్త వెహ్లాజ్ దేవుణు పేతురువెట వెహ్ని కతవందిజ్ అపొస్తురు కిత్తి పణిజ్ 10:1-1; 1:18. దు సద్విదు.

† 15:21 15:21 నండో కాలం ఇహిజ, రమరమి 200 పంటిజాణిజ్ 300 పంటిజ్ దాక.



28-29 మిజీ అవ్వసరం ఆతి ఆడ్రెజ్ ఇనికెజ్ ఇహిజ, దెయమ్కాజ్ పూజ కిత్తికెజ్ తిన్మాట్. నల తిన్మాట్. గొత్తిక పిడికిన్సి సప్తివనకాజ్ తిన్మాట్. సాని బూలాదెజ్ ఆవద్. యా పణిజ్ కివిండ మీరు దూరం మహిజ మిజినె నెగెద్. మిజీ అవ్వసరం ఆతి యా ఆడ్రెజ్ ఆవిండ మరి నండో ఆడ్రెజ్ వెప్పి మీ ముస్సు. బరు ఇడ్డిక ఆవద్ ఇజి దేవుణు ఆత్మని, మాపు ఉండ్రె మన్ను ఆజినావ్. మిజీ మా వందనమ్కు.

30 అయావలె సజమ్దికార్ సెల్వ సిత్తిజ్ వారు సొత్తారె డిఃగు అంతియొకయాదు వాతార్. బానె నమ్మితి వరిజ్ విజెరిజ్ కూడుఃవ్తారె ఉత్తం సితార్.

31 వారు అయ ఉత్తం సద్వితారె డటం సర్ల ఆతార్. ఎందనిజ్ ఇహిజ అయ ఉత్తం వరిజ్ దయ్ఠం కిత్తార్.

32 యూద, సీల రివెర్ దేవుణు మాటెజ్ వెప్పికార్. అందెజె వారు దేవుణు మాటెజ్ నండో వెప్పి అబ్బె మహి దాద్దిరిజ్ తంబెరిసిరిజ్ దయ్ఠం వెప్పి ఇడ్తార్. అక్క వెంజి వరి మన్నుదు బలం ఆతార్.

33-34 వారు అబ్బె సెగం రోస్సు గడఃవ్తార్. వెనుక, బానె మహి నమ్మితికార్ వరిజ్ యెరూసలేమ్దు వరిజ్ పొక్తి వరిబాన్ మర్జి పొక్తార్. “దేవుణు సమదనం మీబాన్ మనీద్”, ఇహారె పొక్తార్.

35 గాని పవులుని బర్నబ అంతియొకయాదు మహారె మరి నండో లోకుర్ వెట దేవుణు మాటెజ్ బోదిసి సువార్త వెప్పి మహారె.

**మార్కు వందిజ్ పవులుని బర్నబ గొడఃబ ఆతార్**

36 సెగం రోస్సు ఆతి వెనుక పవులు బర్నబెజ్, “ఏలు సొనాటె మాటు దేవుణు మాట వెప్పి విజు పట్టుమ్కాజ్ మన్ని తంబెరిజు విజెరె ఎలాగ మనారె ఇజి సూణ సొనాట్ ఇజి వెప్తాన్.

37 అయావలె మార్కు ఇజి ఆఇ పేరు మన్ని యోహానుజ్ వరివెట కూక్కి ఒతెజ్ బర్నబ ఇన్ఠం ఆతాన్.

38 గాని మార్కుజ్ వరివెట ఒతెజ్ ఆవద్ ఇజి పవులు వెప్తాన్. ఎందనిజ్ ఇహిజ మార్కు ముందాల వరివెట పణిదిజ్ సొహిజ్ పూర్తి టయం మన్విండ పంపులియదు వరిజ్ డిఃస్త సొహాన్.

39 మార్కు వందిజ్ పవులుని బర్నబ నండో గొడఃబ ఆతారె రియాజ సొహారె. బర్నబ మార్కుజ్ వెట ఒతండ్రె ఓడః ఎక్కి కూప్త ఇని ద్విప్పుదు సొహారె.

40 గాని పవులు సీలెజ్ కూక్కి ఒతాన్. బాన్ మహి తంబెరిజు వారు రివెరిజ్ దేవుణు దయాదర్మమ్దిజ్ ఒపజెవ్తారె వరిజ్ పొక్తార్.

41 వారు సొత్తారె సిరియ కిలికియ పట్టుమ్కాజ్ మన్ని సజమ్కాజ్ సొహారె. బానె దేవుణు ముస్సు నమకం ఇడ్డివరి నమకం సత్తు కిబిస్తార్.

## 16

**పవులుని సీల వెట తిమోతి కూడఃజినాన్**

1 పవులు, సీల వెట దెర్బ, లున్త్ర ఇని పట్టుమ్కాజ్ వాతాన్. అబ్బె తిమోతి ఇనికాన్ ఒరెన్ యేసుప్రబుజ్ నమ్మిత్తికాన్ మహాన్. వన్ని అయ్సెబా నమకం ఇట్టా మహాద్. అది యూద జాతిదికాన్. వన్ని బుబ్బ ఆఇ జాతిదికాన్. వాండ్రు గ్రిసు దేసెమ్దికాన్.

2 తిమోతి వందిజ్ లున్త్రదు, ఇకొనియాదు నమ్మితికార్ వాండ్రు గొప్ప పేరు మన్నికాన్, ఇజి పొగ్డిఃతార్.

3 తిమోతిజ్ వన్నివెట ఒతెజ్ ఇజి పవులు ఆస ఆతండ్రె వన్నిజ్ సునతి కిబిస్తాన్. ఎందనిజ్ ఇహిజ వన్ని బుబ్బ ఆఇ జాతిదికాన్ ఇజి అబ్బె మహి యూదురు విజెరె నెస్త మహారె.

4 వారు పట్టుమ్కాణిజ్ సొన్ని మహిజ్, యేసుప్రబుజ్ నమ్మితికార్ ఎలాగ నడిదెజ్ ఇజి యెరూసలేమ్దు మన్ని అపొస్తురు, పెద్దెలుజు ఏర్పాటు కిత్తి ఆడ్రెజ్ బోదిస్తారె అక్కెజ్ లోజెదెజ్ ఇజి వెప్తార్.

5 ఆహె సజమ్దు మన్నివరి నమకం లావు పిరితాద్. వరి లెక్క రోజు రోజు లావు ఆజి మహాద్.

**పవులు మసిదోనియ దేసెమ్ది వన్నిజ్ దర్ననమ్దు సుడఃజినాన్**

6 ఆసియ ప్రాంతమ్దు దేవుణు మాటెజ్ వెప్పిక ఆవద్ ఇజి దేవుణు ఆత్మ వరిజ్ అడ్డు కిత్తిజ్ వారు ప్రుగియ, గలతీయ దేసెమ్కాణిజ్ సొహారె.

7 అయావలె ముసియ బెతనియ డగ్రు వాతారె బెతనియ సొండ్రెజ్ ఇజి సుడఃతార్. గాని బాన్ సొండ్రెజ్ యేసుప్రబు ఆత్మ వరిజ్ సరి సివ్తాన్.

8 అందెజె వారు ముసియ ప్రాంతం డాట్టారె డిఃగు సమ్దరం డగ్రు మని త్రోయ ఇని పట్టుమ్దు సొహారె.

9 అయి పొదోయ్ పవులు, బాన్ మహిజ్, ఉండ్రీ దర్సనం సుడేతాన్. అక్క ఇనిక ఇహిజ మసిదోనియ దేసెమ్దికాన్ ఒరెన్ నిల్సి, “నీను మసిదోనియాదు వాజి మజి సాయం కిఆ”, ఇజి బతిమాలితి వజ దర్సనం సుడేతాన్.

10 పవులు అయా దర్సనం వాతిజ్, మాపు వెటనె మసిదోనియ సొండ్రెజ్ తయార్ ఆతాప్. ఎందనిజ్ ఇహిజ, మసిదోనియాది వరిజ్ దేవుణు సువార్త వెప్పి వందిజ్ దేవుణు మజి కూక్త మనాన్ ఇజి మాపు నెస్తాప్.

### లుదియ యేసుప్రబుజ్ నమ్మిజినాద్

11 మాపు త్రోయ పట్నమ్దాన్ ఓడః ఎక్తాపె తినాజ్ సమొత్త ఇని ద్వీపుదు సొహాప్. మహ్నా నాండిజ్ నెయపోలి ఇని పట్నమ్దు అందితాప్.

12 అబ్బెణిజ్ పిలిప్పి ఇని పట్నం వాతాప్. మసిదోనియ దేసెమ్దు పిలిప్పి పట్నం ఉండ్రీ ముకెలమాతి పట్నం. అక్క నండొండార్ రోమాదికార్ బత్తిజి మహి పట్నం. మాపు సెగం రోస్కు ఆ పట్నమ్దు మహాప్.

13 విస్తాంతి దినమ్దు మాపు పట్నం వెల్లి వాతాపె గడ్డ ఒడ్డు దరోట్ యూదురు పార్లనం కిని బాడ్డి మనాద్సు ఇజి వాతాప్. వాతిజ్, బాన్ బస్తాపె కూడఃజి వాతి మహి అయలి కొడొకవెట వర్గిదెజ్ మొదోల్స్తాప్.

14 అయావలె లుదియ ఇని ఉండ్రీ అయలి కొడొక వెంజి మహాద్. అది తుయతయర పట్నమ్దికాద్. అది లావు దరది ఊద రంగుది పాతెజ్ పొర్నికాద్. అది దేవుణుదిజ్ పార్లనం కినికాద్. దేవుణు మాటెజ్ అర్లం కిదిజ్ దేవుణు బుద్ది సిత్రీజ్ అది పవులు వెప్తి మాటెజ్ మన్నుదు ఇడఃతాదె అయావజనె నడిఃతాద్.

15 అది, దన్ని ఇండ్రొణికార్, విజేరె బాప్తినం లాగె ఆతార్. వెనుక అది, “నాను దేవుణుదిజ్ పూర్తి నమ్మిజిన ఇజి మీరు ఒప్పుకొటిజ నా ఇండ్రొ వాజి మండ్రు”, ఇజి మజి బతిమాలితాద్.

### పవులుజ్ సీలెజ్ జెలిలోఇ ఇడ్తార్

16 ఒర్నెండు మాపు పార్లనం కిని బాడ్డిదు సొన్సి మహిజ్ ఉండ్రీ వెట్టిపణి కిని ఇజిరి అయలి మా ఎద్దు వాతాద్. దన్నిజ్ పుతోన్\* ఇని దెయం అస్త మహాద్. అది జాతకం వెప్పి దన్ని ఎజుమానురిజ్ నండొ డబ్బు గణపిస్తాద్.

17 అది పవులుని మజి వెనుక వాజి డటం గగోల్ ఆజి వెప్తాద్, “యా లోకుర్, విజెరిజ్ ఇంక పెరి దేవుణుదిజ్ సేవ కినికార్. దేవుణు ఎలాగ మిజి గెల్పిస్తాల్లె ఇజి మీరు వెహ్సార్లె” ఇహాద్.

18 నండొ రోస్కు అది ఆహె కిజి మహిజ్, పవులు మన్నుదు గొప్ప బాద ఆతండ్రె అయ దెయమ్దిజ్ “నీను యా ఇజిరి దన్నిజ్ డిసి సొన్అ ఇజి యేసుక్రీస్తు అతికారమ్దాన్ వెహసిన”, ఇజి వెప్తాన్. వెటనె అయ దెయం అయలిదిజ్ డిస్త సొహాద్.

19 గాని దన్ని ఎజుమానిరు వరిజ్ వాని డబ్బు విజు సొహె ఇజి సుడఃతారె పవులు సీలెజ్ పట్నం నడిఃమి, అతికారిజ డగ్రు ఈడిసి తతార్.

20-21 కోర్టు నడిఃపినిని వరిబాన్ తతారె, “వీరు యూదురు. వీరు బోదిసిని అలవాటుజ్ మజి పడఃఇకెజ్. మాటు రోమాదికాట్. మాటు అక్కెజ్ ఒప్పకొణిక ఆవద్, అయావజనె నడిఃనిక ఆవద్. మా పట్నమ్దు వీరు గొప్ప కలిబిలి కిజినార్”, ఇజి వెప్తార్.

22 అయావలె బాన్ కూడిఃతి మహి లోకుర్ విజేరె పవులుజ్ని, సీలెజ్ ఎద్దు వాతారె నింద మొప్తారె గగోల్ ఆతార్. వరి సొక్కెజ్ లాగిజి వరిజ్ డెయ్యు ఇజి కోర్టు నడిఃపినినికార్ ఆడ్ర సితార్.

23 వారు లావు దెబ్బెజ్ డెయ్యారె పవులు సీలెజ్ జెలి లొఇ ఇడ్తార్. “వరిజ్ జాగర్ల సుడఃదు”, ఇజి జేలి ఎజుమానిజ్ ఆడ్ర సితార్.

24 అయ ఆడ్ర వాతిజ్ జెలి ఎజుమాని వరిజ్ జేలిదు లొఇ మన్ని గదిదు వరి కాల్యాజ్ డుకేజి లొఇ తొప్తొండ్రె ఇట్టాన్.

25 రమారమి మదరెయ్తు పవులుని సీల దేవుణుదిజ్ పార్లనం కిజి పాటెజ్ పార్లి మహార్. వీరు పార్జి మహిజ్ జెలిదు తొహె ఆతి మహికార్ విజేరె వెంజి మహార్.

26 అయావలె వెటనె బూమి విజు డటం కద్దితాదె అయ జేలి పునాదిజ్ విజు కద్దితె. వెటనె సేప్లాజ్ విజు రే ఆతె. జెలిదు మహివరి విజెరి కట్టు. ఊడిఃతె.

27 అయ జేలి ఎజుమాని తెలి ఆతండ్రె జెలిది సేప్లాజ్ విజు రే ఆతిమనిక సుడఃతాన్. సుడఃతండ్రె జెలిదు మహికార్ ఉహ్కత్త సొహార్ ఇజి ఒడిఃబిజి కుర్ల లాగితండ్రె వన్నిజ్ వాండ్రె గుత్తె ఆజి సాదెజ్ తయార్ ఆతాన్.

28 అయావలె పవులు, “నీను ఇని కూనిబా కిబె ఆమ. మాప్ విజెపె ఇబ్బెనె మనాప్”, ఇజి డటం గగోల్ ఆజి వెప్తాన్.

\* 16:16 16:16 పుతోన్ ఇని దెయం యా అయలిదిజ్ వాని కాలమ్దు జగ్గిని సజతిజవందిజ్ నెస్పిని మహాద్. అక్క వెప్తిజ్ లోకుర్ దన్నిజ్ డబ్బు సీజి మహార్

29 అయ జేలి ఎజుమాని, దీవ తగ్గ అ ఇజి వెహ్ని లో ఇ ఉహ్ క్వి వాతాండ్రె వణక్కి పవులు సీలారి పాదమ్ కాజ్ డగ్రు అర్తాన్.

30 వాండ్రు పవులుజ్ ని సీలెజ్ వెల్లి తతాండ్రె వెన్ బాతాన్, “బాబురాండె, నాను తపై ఆదెజ్ ఇహిజ ఏలు ఇనిక కిదెజ్?”.

31 “యేసుప్రబు ముస్కు నమకం ఇట్టిజ, అయావలె నీను నీ ఇండ్రోణికార్ విజిదెరె తపై ఆనిదెర్”, ఇజి పవులు సీల వెహ్నార్.

32 పవులుని సీల వన్నిజ్, వన్ని ఇండ్రోణి వరిజ్ యేసుప్రబు వందిజ్ సువార్త వెహ్నార్.

33 ఆ పొదొయ్ అయా గడియారునె వాండ్రు పవులుని సీలెజ్ ఒతాండ్రె వరి దెబ్బెజ్ నోహ్తాన్. వెటనె వాండ్రు, వన్ని ఇండ్రోణికార్ విజేరె బాప్తినం లాగె ఆతార్.

34 వాండ్రు పవులుజ్ ని సీలెజ్ వన్ని ఇండ్రో కూక్కి తసి బోజనం సిత్తాన్. దేవుణు ముస్కు నమకం ఇట్టి వందిజ్ వాండ్రు వన్ని ఇండ్రోణికార్ విజేరె నండో సర్ల ఆతార్.

35 పెందల కోర్టు నడిపిసినికార్, “అయ లోకాజ్ డి:స్తు”, ఇజి ఆడ్ర సిత్తారె జమాన్ జ జెలి ఎజుమానిబాన్ పోక్తార్.

36 జేలి ఎజుమాని అయ మాటెజ్ పవులు వెహ్నాన్. “మిజి డి:స్తు ఇజి కోర్టు నడిపిసినికార్ ఆడ్ర పోక్త మనార్. మీరు ఏలు జమ్న సొండ్రు”, ఇజి వెహ్నాన్.

37 గాని పవులు, “మాపు వర్గిదెజ్ అవకాసం సివిండ వారు తీర్పు కిజి విజేరె ముందాల డెయ్యూర్. మాపు రోమాదిజ్ అక్కు మనికాప్ ఇహిజబా మజి జెలిదు ఇట్టార్. ఏలు మజి ఎయెర్ బా నెన్ విండ పోక్తెజ్ సుడె:జినార్. మాపు ఒప్ ఏప్. వారె వాజి మజి వెల్లి తసి పోక్తెజ్”, ఇజి జమానుజ్ వెహ్నాన్.

38 యా మాటెజ్ అయ జమానుజ్ కోర్టు నడిపిసిని వరిజ్ వెహ్నార్. పవులుని సీల రోమాదిజ్ అక్కు మనికార్ ఇజి వెహరె వారు తియెల్ ఆతార్.

39 అయ కోర్టు నడిపిసినికార్ వాతారె పవులుజ్, సీలెజ్ సెమ లొస్తారె జెలిదాన్ వెల్లి కూక్కి తతారె ‘పట్టుం డి:సి సొండ్రు’ ఇజి వరిజ్ వెహ్ని పోక్తార్.

40 వారు జెలిదాన్ వెల్లి వాతారె లుదియబాన్ సొహార్. అబ్బె నమ్మిత్తివరి వెట వర్గిజి వరిజ్ ఆదరిస్తారె వరి నమకందిజ్ సత్తు కిదిసి దయ్ రమ్ ముస్కు మండ్రు ఇజి వెహ్నార్. వెనుక వారు బాణిజ్ సొత్త సొహార్.

## 17

### పవులు తెసలొనికదు సొహాన్

1 అయావలె పవులుని సీల పిలిప్పి పట్టుమ్ దాన్ సొత్తారె అంపిపొలి, అపొలోనియ పట్టుమ్ కు డాట్టి దెసలొనిక\* ఇని పట్టుమ్ దు వాతార్. అబ్బె యూదురు మీటిజ్ కిని ఇల్లు ఉండ్రీ మహాద్.

2 పవులు, వాండ్రు ఒజి ఆతి లెకెండ యూదురి మీటిజ్ కిని ఇండ్రో సొహాన్. సొహాండ్రె, బానె మహి వరివెట మూండ్రీ విస్తాంతి దినమ్ కు దేవుణు మాట వెహ్ని మహాన్. ఇనిక ఇహిజ,

3 “క్రీస్తు ఇనికాన్ మాలెజ్ అజి సొనాన్లె. సొజి మర్జి నిజ్ నాన్లె’ ఇజి ప్రవక్తరు రాస్తిక దేవుణు మాటాదు మనాద్. అయ లెకెండ జర్గిదెజె. నాను మీ వెట సొటిసి వెహ్ని యా యేసుప్రబునె క్రీస్తు”. యా మాటెజాణిజ్ సదివిజి వెహ్ని సిత్తాన్.

4 యూదురు - లో ఇహాన్ సెగొండార్ పవులు వెహ్ని మాటెజ్ ఒప్పకొటారె పవులుని సీల వెట కూడితార్. బక్తి మన్ని గ్రీకు జాతిదికార్ నండొండార్, ముకెలమాతి అయ్ లికొడొక్ నండొండెకబా వరివెట కూడితార్.

5 అహిజ యూదురు గోస ఆతార్. గోస ఆతారె ఇని పణి సిల్లెండ తిరిగిని సెఇ లోకాజ్ సర్దుహాన్ కూడుస్తారె మందెజ్ అజి పట్టుమ్ దు కలిబిలి కిజి యాసొను ఇని వన్ని ఇండ్రో సొహార్. ఇండ్రోణి సెప్లాదిజ్ డెయ్ త పొక్తారె పవులుని సీలెజ్ లోకుర్ నడిమి అసి తనాట్ ఇజి లొఇ డు:గితార్.

6 గాని పవులుజ్ ని సీలెజ్ తోర్ ఏవార్ కాక యాసొనుజ్ మరి నమ్మిత్తి వరిజ్ సెగొండారిజ్ పట్టుం అతికారిజ డగ్రు లాగిత తతార్. “వీరు, యా లోకం విజు కలిబిలి కినికార్, ఇబ్బెబా వాత మనార్.

7 విరిజ్ యా యాసొను వన్ని ఇండ్రో ఇట్టా మహాన్. వీరు విజేరె యేసు ఇజి మరి ఒరెన్ రాజు మనాన్ ఇజి వెహ్ని కయ్ సరు రూలుజి లోజివిండ నడిపిసినార్”, ఇజి డటం గగోలాజి వెహ్నార్.

8 యాక వెహరె లోకుర్, పట్టుం అతికారిజు గొప్ప కలిబిలి ఆతార్.

9 అతికారిజు యాసొను బాణిజ్, అయ నమ్మిత్తి వరి బాణిజ్ డబ్బు తొహ్నిస్తారె వరిజ్ డి:స్త సిత్తార్.

### పవులు బెరెయారు సొహాన్

\* 17:1 17:1 దెసలొనియ పట్టుం మనిదొనియ దెసమ్ దు మహాద్. రోమదేసమ్ దిజ్ రాజదాని ఆతాద్ యా పట్టుం. నండొ ఆస్తి మహాద్ బాన్. నండొండార్ రోమ లోకుర్ ని యూదురు బాన్ బత్తి:జి మహాద్

10 సీకటి ఆతిజ్ వెటనె నమ్మితికార్ పవులుజ్, సీలెజ్ బెరెయ ఇని బాడ్డిదు పోక్తార్. వారు బానె వాతారె యూదురు మీటిజ్ కిని ఇండ్రొ సాహార్.

11 బెరెయాదు మహికార్ తెసలొనికదు మహి వరిలెకెండ్ర్ ఆవీర్. వారు గొప్ప ఆసదాన్ దేవుణు మాటెజ్ వెహారె వనక వందిజ్ ఒడిబిజి మహార్. పవులుని సీల వెప్పొ మహి సజతిజ్ నిజమనెనొ ఆవీదొ ఇజి వారు రోజు దేవుణు మాటాదు సుడేజి సదివిజి మహార్.

12 అందెజె వరి లొఇ నండొండార్ యూదురు నమ్మితార్. నండొండార్ గ్రీసు జాతిది వరి లొఇ పల్కుబడి: మన్ని అయ్లి కొడొకని మొగకొడొకర్ నమ్మితార్.

13 గాని బెరెయాదుబా పవులు దేవుణు మాటెజ్ సాటిసినాన్ ఇజి తెసలొనికదు మన్ని యూదురు నెస్తారె బాణిజ్ వాతారె బెరెయా లోకాజ్ కోపం పుటిస్తారె కలిబిలి కిత్తార్.

14 అయావలె నమ్మితికార్ పవులుజ్ వెటనె సమ్దరం డగ్రు సాన్అ ఇజి పోక్తార్. గాని సీలని, తిమోతి బెరెయాదునె నిహా మహార్.

15 పవులుజ్ పోక్తెజ్ సాహికార్ ఏదెన్ను† పట్టుమదాకానె ఒత్తార్. సీల, తిమోతి వెటనె నా బాన్ రద్దు ఇజి కబ్బు సితండ్రె పవులు వరిజ్ మహి పోక్తాన్.

### పవులు ఏదెన్ను పట్టుమదు సాహాన్

16 పవులు ఏదెన్ను పట్టుమదు సీలెజ్ తిమోతిజ్ ఎద్దు సుడేజి మహాన్. మహిజ్ అయ పట్టుమదు వారు మాడిస్తి మహి దెయమ్కాణి బొమ్మెజ్ ‡నండొ మహిజ్ అక్కెజ్ సుడేజి మన్నుదు నండొ బాద ఆత్తాన్.

17 అయావలె యూదురు మీటిజ్ కిని ఇండ్రొ సాహాండ్రె యూదురు వెట, బక్తి మన్ని యూదురు ఆఇ వరివెట పవులు వాదిస్తాన్. రోజు రోజు సత సహ్కా కూడేజి వాతి వరివెట వాదిసి మహాన్.

18 అబ్బె లావు నద్వితి మన్నికార్ ఎపికూరియ జటుదికార్ సెగొండార్§ స్ట్రొయికుల లోకుర్ లొఇ సెగొండార్ మహార్. వారు పవులు వెట వాదిస్తార్. సెగొండార్, యా బడాకి ఇనిక వెప్పొనాన్ ఇజి వెప్తార్. యేసుప్రబు వందిజ్, సాతికార్ మర్జి నిజ్ని వందిజ్ పవులు నెస్పిస్తిజ్ అబ్బె మరి సెగొండార్ వీండ్రు ఆఇ దెయమ్కాజ్ వందిజ్ వెప్పొనాన్ ఇజి వెప్తార్.

19 వారు పవులు అరెయొపగు ఇని సద్దుదు లాగిత తత్తారె, “నీను వెప్పొని యా కొత్త మాట ఎలాగ మర్తికాదొ, మాపుబా నెస్టెజ్ ఆనాదా?

20 నీను సెగం కొత్త మాటెజ్ వెప్పొని. అక్కెజ్ మాపు ఎసెజ్బా వెన్ఇకెజ్. వన్నా అర్లం ఇనికాదొ ఇజి నెస్టెజ్ మాపు కోరిజినావ్”, ఇజి వెప్తార్.

21 ఆ ఏదెన్ను పట్టుమదికార్ విజేరె, అబ్బె బత్తిజి మహి ఏదెన్ను పట్టుమదికార్ ఆఇకార్బా ఇనికాదొ ఉండ్రె కొత్త మాట విని వందిజ్, వర్గిని వందిజ్ లావు ఇస్టమాజి వరి సమయం విజు బానె గడేప్పి మహార్.

22 అయావలె పవులు అరెయొపగు సద్దుదు నిహండ్రె ఈహు వెప్తాన్, “ఏదెన్ను పట్టుమదికిదెరా, మీరు విజు పణిజి లొఇ గొప్ప బక్తి మన్నికిదెర్ ఇజి నజి తోరిజినాద్.

23 ఎందనిజ్ ఇహిజ నాను బూలాజి బూలాజి మీ బొమ్మెజ నెగ్రెండ్ర సుడేజి మహిజ్ ఉండ్రె మాలి పీట సుడేత. దన్ని మున్ను ‘నెన్ఇ దెయమ్దిజ్’ ఇజి రాస్త మనాద్. అందెజె మీరు నెన్ఎండ్ర ఇని దన్నిజ్ మాడిసెనిదెరొ దన్ని వందిజ్ నాను మిజి బోదిసిన”, ఇజి వెప్తాన్.

24 పవులు మరి వెప్తాన్, “యా బూ లోకమ్దిజ్, దన్ని లొఇ మన్ని విజువ నకాజ్, దేవుణునె పుటిస్తాన్. అయ దేవుణునె పరలోకమ్దిజ్, బూమిదిజ్ ప్రబు ఆత మనాన్. అయ దేవుణు లొకు తొష్టి గుడిదు బత్తిఎన్.

25 దేవుణునె విజు లోకాజ్ బత్కు, పాణం, విజు సీజినాన్. దేవుణుదిజ్ ఇనికబా తక్కు ఆవిండ్ర మన్ఎద్. అందెజె లొకు వన్నిజ్ ఇనికబా సీదెజ్ అవ్సరం సిల్లెద్.

26 దేవుణు ఒరెన్ వన్ని వెట విజు జాతి లోకాజ్ పుటిస్తాన్. ఎందనిజ్ ఇహిజ యా బూలోకం మున్ను విజుబాన్ బత్తిని వందిజ్ పుటిస్తాన్. వారు ఎంబె బత్తిదెజ్ ఇజి, ఎమేణి కాలమ్దు బత్తిదెజ్ ఇజి దేవుణు ముందాల్పొ ఏర్పాటు కిత మనాన్.

† 17:15 17:15 ఏలు ఏదెన్ను పట్టుం గ్రీకు దేసెమది ముకెలమాతి పట్టుం    ‡ 17:16 17:16 యా బొమ్మెజ్ అయ పట్టుమదికార్ మాడిస్తిమహి దెయమ్కలెకెండ్ర తోరితె    § 17:18 17:18 ఎపికూరియ లోకుర్, స్ట్రొయికుల లోకుర్. వీరు గ్రీకుజాతిలొఇ ఎక్కు నద్వితి లోకుర్. ఎపికూరియ లోకుర్ ఎపికురు ఇని ఒరెన్వన్ని బోదెజ్ వజ నడిసెకార్. వన్ని బోద ఇనిక ఇహిజ, ఒడేలదిజ్ మన్నుదిజ్ సర్గ కిబిసి బత్తిదెజె ఇజి మా బత్తుది ఉదెసం ఇజి. స్ట్రొయికుల లోకుర్ ఇహిజ జెన్ ఇనివన్ని బోదెజ్ వజ నడిసెకార్. బత్తుదు ఇనిక జర్గితిజ్బా జర్గిపిద్ ఇజి వాండ్రు బోదిస్తాన్. బాగ ఆలోసనం కిజెనె వారు విజు సూణార్

27 ఎందనిజ్ ఇహిజ ఉండ్రీ వేలా వారు నజీ రెబాజి వానార్పు ఇజి ఇక్కెజ్ విజు దేవుణు ఏర్పాటు కిత్తాన్. దేవుణు మా డగ్రుహాన్ దూరం మంజినొకాన్ ఆవన్.

28 మాటు దేవుణు వెటనె బత్కినాట్, దేవుణు వెటనె నడిసినినాట్, దేవుణు వెటనె మంజినాట్. మీ లొఇ పాటెజ్ రాస్సికార్ వెష్టివజ 'మాటు దేవుణు కొడొరె'.

29 అందెజె మాటు దేవుణు కొడొరె అతిజ్, లోకు, వరి మన్నుదు మన్ని ఆలోసనం వజ, వారు నెస్తిమన్ని పణి వజ బజారమ్దాన్, వెండిదాన్, పణుకుజాన్ తయార్ కిత్త బొమ్మెజు వజ దేవుణు మనాన్ ఇజి ఒడిబిదెజ్ ఆవద్.

30 నస్తివలె మాటు నెన్వండ మహివలె దేవుణు అక్క సుడెతిజ్బా సుడెఇ లెకెండ డిస్తాన్. ఏలు ఇహిజ ఎంబెబా సరినె, విజేరె లోకుర్ వరి పాపమ్కు డిసిసిజి దేవుణుబాన్ రద్దు ఇజి దేవుణు ఆడ్ర సీజినాన్.

31 ఎందనిజ్ ఇహిజ, దేవుణు విజేరె లోకాజ్ నీతినిజిల్లిదాన్ తీర్పు కిదెజ్ ఉండ్రీ రోజు ఏర్పాటు కిత మనాన్. అయా రోజు దేవుణు ఏర్పాటు కిత్తి ఒరెన్ లోకువెట తీర్పు తీరిస్తాన్. దేవుణు ఆ లోకుదిజ్ సావుదాన్ మర్జి నిక్త మనాన్. ఎందనిజ్ నిక్తాన్ ఇహిజ ఆ లోకుదిజ్ తీర్పు కిదెజ్ అతికారం మనాద్ ఇజి విజేరిజ్ రుజుప్ కిదెజ్”.

32 లోకు సాజి మర్జి నిజ్ని వందిజ్ వెహారె వరి లొఇ సెగొండార్ కరాయితార్. గాని మరి సెగొండార్ “దిన్ని వందిజ్ మరి వెహా, వెనాప్”, ఇజి పవులుజ్ వెహార్.

33 ఆహె మహిజ్ పవులు వరిబాణిజ్ సాహాన్.

34 అహిజ సెగొండార్ పవులు వెష్టి మాటెజ్ నమ్మిత్తారె వన్ని వెట కూడితార్. పవులు వెట కూడితి మహి వరి లొఇ అరెయొపగు సద్దుదికాన్ ఒరెన్ దియొనుసియు, దమరి ఇని ఉండ్రీ అయ్లి కొడొః, మరి సెగొండార్ మహార్.

## 18

### పవులు కొరింతు పట్టుమ్దు సువార్త వెప్పినాన్

1 వెనుక, పవులు ఏదెన్ను పట్టుమ్దాన్ సోతాండ్రె కొరింతు ఇని పట్టుం సాహాన్. అయ కొరింతు పట్టుమ్దు సాహిజ్ బానె పొంతు దేసెమ్దికాన్ అక్కల ఇని ఒరెన్ యూదు వన్నిజ్ని వన్ని ఆల్ని ఆతి ప్రీస్కిలదిజ్ సుడెతాన్.

2 యూదురు విజేరె రోమ పట్టుం డిసి సొండ్రెజ్వలె ఇజి క్లవుదియ ఇని రోమ పెరిరాజు ఆడ్ర సితాన్. ఆడ్ర సిత్రీజ్ యా ఆల్ని మాసిర్ ఇటలి దేసెం డిస్తారె కొరింతు పట్టుమ్దు కొత్తాజ్ వాతార్. పవులు వరిజ్ సుడెదెజ్ సాహాన్.

3 పవులు వరివెట బత్కిజి వరివెట కూడెజి పణి కిత్తాన్. ఎందనిజ్ ఇహిజ వారుని పవులు టంబుజ్ గుత్తికార్.

4 ప్రతి విస్తాంతి దినమ్దు పవులు యూదురు మీటిజ్ కిని ఇండ్రొ సాహాండ్రె, యూదురు వెట, గ్రీసు వరివెట తర్కిసి వెప్పి వాండ్రు వెష్టికెజ్ నిజం ఇజి ఒపిసి మహాన్.

5 సీలని తిమోతి మసిదోనియదాన్ వాతారె పవులు వెట కూడితార్. అయావలె పవులు పూర్తి టయం దేవుణు మాటెజ్ బోదిసి మహాన్. యేసునె క్రీస్తు ఇజి యూదురుజు డటిసి సాసి వెప్పి మహాన్.

6 పవులు వెష్టి మాటెజ్ యూదురు నెక్తపొక్తారె పవులుజ్ దుసలాడితార్. అయావలె పవులు, “దేవుణు మిజి సిక్కుసిత్రీజ్ అక్క మీరె మీ ముస్సు తపిసినిదెర్. దిన్ని వందిజ్ నా బాన్ తప్పు సిల్లెద్. ఇబ్బెహాన్ నాను యూదురు ఆఇ వరిబాన్ సానానె దేవుణు మాటెజ్ నెస్పిస్తాలె”, ఇజి వెహండ్రె, సొక్కెజు దూల్లి దుల్ప్తాన్.

7 పవులు యూదురు మీటిజ్ కిని ఇండ్రొహాన్ సోతాండ్రె పడెకాద్ మహి తీతియు యూస్తు ఇని వన్ని ఇండ్రొ సాహాన్. తీతియు దేవుణుదిజ్ పార్లనం కినికాన్. వన్ని ఇల్లు యూదురు మీటిజ్ కిని ఇల్లు డగ్రునె మహాద్.

8 యూదురి మీటిజ్ ఇల్లు నడిపిసినికాన్ ఆతి క్రీస్తు, వన్ని ఇండ్రొణికార్ విజేరె యేసుప్రబుజ్ నమ్మిత్తార్. మరి కొరింతు పట్టుమ్దికార్ నండొండార్బా దేవుణు మాట వెహారె నమ్మిత్తారె బాప్తినం లాగె ఆతార్.

9 ఒరెండె పొదొయ్, దర్ననమ్దు యేసుప్రబు, “నీను తియెల్ ఆవండ వర్గిల. అలెజి మన్అ.

10 ఎందనిజ్ ఇహిజ నాను నీవెటనె మంజిన. నిజి పాడు కిదెజ్ నీ ముస్సు ఎయెన్బా రెవన్. ఎందనిజ్ ఇహిజ యా పట్టుమ్దు నాలోకుర్ నండొండార్ మనార్”, ఇజి పవులుజ్ వెహాన్.

11 అందెజె పవులు దేవుణు మాటెజ్ నెస్పిసి వరి నడిమి ఉండ్రీ ఏండుని ఆరు నెలెజ్ దాక మహాన్.

12 గాని గలియోను ఇనికాన్ అయ అకాయ దేసెమ్దిజ్ ఏలుబడిః కినికాన్ ఆతివలె యూదురు ఉండ్రె జటు ఆతారె పవులు ముస్సు వాతార్. పవులుజ్ అస్తారె కోర్టుదు ఒతార్.

13 వారు పవులు ముస్సు పిరాద్ కిత్తార్. ఇనిక ఇహిజ, “దేవుణుదిజ్ ఎలాగ పార్లనం కిదెజ్ ఇజి మజి మన్ని రూలుదిజ్ ఎదిరిసివెప్పి వీండ్రు ఒపిసి మారిస్పిలెకెండ వెప్పినాన్”

14 పవులు వర్గదెజ్ సుడేతాన్. అయావలె గలియోను యూదురిజ్ ఈహు వెహ్తాన్, “యూదురాండె, ఇక్క ఉండ్రీ తప్పు పణి వందిజ్ ఇహిజ, ఉండ్రీ సెఇ పణి వందిజ్ ఇహిజ నాను మీమాటెజ్ నెగ్రెండ వెండ్రెజ్ ఆనాద్.

15 గాని ఇక్క ఇనికాదొ ఉండ్రీ మాటవందిజ్, పేర్కువందిజ్, మీ రూలుజ్ వందిజ్ తర్కిస్తెజ్ ఇహిజ మీరె పన్నిజ్ సుడేదు. నిన్ని సజతిజ వందిజ్ తీర్పు తీరిస్తెజ్ నజీ ఇస్టం సిల్లెద్”, ఇజి యూదురు వెట వెహ్తాన్.

16 ఈహు వెహ్తాండ్రె వరిజ్ కోర్టుదాన్ పేర్తాన్.

17 అయావలె విజేరె కూడితారె యూదురి మీటిజ్ ఇల్లు నడిపిసినికాన్ ఆతి సోస్తెనేసు ఇనివన్నిజ్ అస్తారె కోర్టు డగ్రు తత్తారె డెయ్యూర్. అహిజ్ బా గలియోను యా సజతిజ వందిజ్ ఇనికబా ఇన్వెతాన్.

### ప్రిస్కిలని అక్కుల

18 పవులు దేవుణువెట మొకిత మహాన్ కాక అక్క వీస్తివలె బుర్ర కత్రె ఆతాన్. కొరింతు పట్టుమ్దు మరి నండో రోస్కు మంజి వెనుక నమ్మిత్తివరిబాణిజ్ సెలవ లోస్తాండ్రె సోహాన్. కెంకెయూదు సోహారె బుర్ర కత్రె ఆతాన్. బాణిజ్ ఓడః ఎక్తాండ్రె సిరియ ఇని దేసెమ్దిజ్ ప్రిస్కిల, అక్కుల వెట సోహాన్.

19 వారు ఎపెసు పట్టుమ్దు వాతార్. ప్రిస్కిల అకులరిజ్ డిసి పవులు సొనివలె వీరు యా పట్టుమ్దునె మంజినార్. పవులు ఇహిజ ఒరెండ్రె బానె మహి యూదురి మీటిజ్ ఇండ్రె సోహాన్. సోహాండ్రె యూదురు వెట తర్కిసి వర్గిజి మహాన్.

20 సెగం రోస్కు మా వెట మన్అ ఇజి యూదురు పవులు వెన్బాతిజ్ పవులు కెవితాన్.

21 వరిజ్ డిసి సోహివలె, “దేవుణు ఇస్టం ఇహిజ మీ డగ్రు మర్జి వాన్”, ఇజి వెహ్తాండ్రె సోత్తాన్. ఓడః ఎక్తాండ్రె ఎపెసుదాన్ సోహాన్.

22 కయ్సరియాదు అందితాండ్రె పవులు యెరూసలేం పట్టుమ్దు ఎక్త సోహాన్. బానె మహి సజమ్దివరిజ్ సుడిః సోహాన్. వెనుక అంతియోకయాదు సోహాన్.

23 బానె సెగం కాలం మహి వెనుక సోతాండ్రె గలతియ ప్రగియ ఇని దేసెమ్కాణిజ్ వర్స బూలాతాండ్రె నమ్మిత్తి వరిజ్ నెస్తిస్తాన్. దేవుణుదిజ్ డిసెంవిండ నెగ్రెండ మండ్రు ఇజి వెహ్సి వరిజ్ దయ్ రం సిత్తాన్.

### అపొలో ఇనికాన్

24 అయావలె అలక్సంత్రియదికాన్ అపొలో ఇని ఒరెన్ యూదవాండ్రు ఎపెసు పట్టుమ్దు వాతాన్. వాండ్రు గొప్ప సద్వితికాన్. దేవుణు మాటదు రాస్తిమన్నికెజ్ విజు బాగ నెస్తిమనికాన్. దేవుణు మాట నెగ్రెండ వర్గదెజ్ వాండ్రు అట్నాన్.

25 వాండ్రు యేసు ప్రబువందిజ్ నెగ్రెండ సుర్కుదాన్ నెన్పిస్తాన్. ఎలాగ బత్కిదెజ్ ఇజి యేసుప్రబు నెన్పిస్తి మాటెజ్ వాండ్రు నెస్తాన్. గాని యోహాను లోకాజ్ సిత్తి బాప్తిసం వందిజె వాండ్రు నెస్త మహాన్.

26 యూదురు మీటిజ్ కిని ఇండ్రె దయ్ రమ్దాన్ దేవుణు మాటెజ్ వర్గితాన్. ప్రిస్కిల అక్కుల విన్ని మాటెజ్ వెహారె విన్నిజ్ వరి ఇండ్రె కూక్త ఒత్తార్. ఒత్తారె దేవుణు వరిజ్ సిత్తి సువార్త వందిజ్ వీండ్రు నెన్ఇ వనకవందిజ్ వన్నిజ్ నెన్పిస్తార్.

27 వెనుక అపొలో అకాయ దేసెమ్దు సొండ్రెజ్ సుడేతిజ్, ఎపెసుదు మన్ని నమ్మితికార్, నీను సోన్అ ఇజి వెహ్సి, అక్కాయాదు మహి నమ్మితివరిజ్, ‘విన్నిజ్ మీ వెట కూడుపు’ ఇజి ఉత్రం రాస్తార్. వాండ్రు అబ్బె సోహాండ్రె దేవుణు దయాదర్మమ్దాన్ నమ్మితి వరిజ్ నండో సాయం కిత్తాన్.

28 విజేరె కూడితి మహి బాడ్డిదు అపొలో యూదురువెట వాదిస్తాండ్రె వరి వాదం తప్పు ఇజి గటిజ వెహ్తాన్. యేసునె క్రీస్తు ఇజి దేవుణు మాటదు రాస్తికెజ్ వెహ్సి రుజుప్ కిత్తాన్.

## 19

### పవులు ఎపెసు పట్టుమ్దు యేసువందిజ్ వెహ్సి నాన్

1 అపొలో కొరింతు పట్టుమ్దు మహివలె పవులు, ముస్కుమన్ని దేసెమ్ది నాహ్కాణిజ్ బూలాజి సువార్త వెహ్సి ఎపెసు పట్టుమ్దు వాతాన్. బాన్ సెగొండార్ సిసూరిజ్ సుడేతాన్.

2 “మీరు నమ్మిత్తివలె దేవుణు ఆత్మ సత్తు మీ ముస్కు వాతాదా సిల్లెదా?”, ఇజి వరిజ్ వెన్బాతాన్. వెన్బాతిజ్ సిల్లెద్, దేవుణు ఆత్మ మనాద్ ఇజి మాప్ ఎసెజ్ బా నెన్ఏప్”, ఇజి వారు వెహ్తార్.

3 దన్నిజ్ పవులు, “మీరు ఎమేణి బాప్తిసం లాగె ఆతిదెర్”, ఇజి వెన్బాతిజ్, “మాపు యోహాను సిత్తినన్ని బాప్తిసం లాగె ఆతాప్” ఇహార్.

4 పవులు మరి వెహ్తాన్, “పాపమ్కు ఒప్పుకోడిఃజి డిసివరిజె యోహాను బాప్తిసం సిత్తాన్. నా వెనుక వాని యేసు ముస్కు నమకం ఇడ్దు”, ఇజి వెహ్తాండ్రె బాప్తిసం సిత్తాన్.

5 యాక వెహారె వారు యేసుప్రబు పేరు అస్తారె బాప్తిసం లాగె ఆతార్.

6 పవులు వరి ముస్కు కికు ఇడ్డిజ్ దేవుణు ఆత్మ వరి ముస్కు వాతాద్. వాతిజ్, వారు వరిజ్ నెన్జ ఆఇ బాసిజ్ వర్గితార్. దేవుణుబాణిజ్ వాతి మాటెజ్ వెహ్లాజ్ మొదోల్స్తార్.

7 వారు డగ్రుడగ్రు పన్నెండు మణిసిర్ మొగకొణ్ణోర్ మహార్.

8 పవులు అయ ఎపెసు పట్టమదు మన్ని యూదురి మీటిజ్ ఇండ్రో సొహండ్రె దేవుణు ఏలుబడి: వందిజ్ తర్కిసి వర్గిజి వరిజ్ ఒపుకొడిసి దయరమ్దాన్ వర్గితాన్. ఆహె మూండ్రె నెలెజ్ బానె మహాన్.

9 గాని సెగొండార్ గర్త ఆజి అసల నమ్మివితార్. వారు పవులు వెహ్లా సువార్త వందిజ్ విజెరి ముందాల దుసలాడి:జి వర్గితార్. అందెజె పవులు వరిజ్ డి:సి నమ్మితి వరిజ్ వన్నివెట ఒతండ్రె రోజు రోజు తురాను ఇని ఒరెన్ వన్ని బడి: ఇండ్రో నెస్సిస్త మహాన్.

10 రుండి పంటెజ్ దాక పవులు యాలెకెండ్రె వెహ్లాసిత్తిమహిజ్ అయ ఆసియ ప్రాంతమదు బత్కిజిని యూదురు, యూదురు ఆఇకార్, విజెరె దేవుణు మాట వెహార్.

11 దేవుణు పవులువెట ఒద్దె గొప్ప బమ్మాతి పణిజ్ జర్గిస్తాన్.

12 వన్ని తువాలిజ్, నడు:ముదు తొహ్ని కటు జబ్బు మన్నివరి డగ్రు తత్తిజ్ వారు నెగెండ్రె ఆతార్. దెయమ్కు విజు డి:స్టె సొహె.

13 అయావలె యూదురు లోఇ సెగొండార్ మోటిగురుజ్ బూలాజి దెయమ్కాజ్ పేర్జి మహార్. దెయమ్కాజ్ పేర్లెజ్ నెస్తికార్ వారు. వారు యేసుప్రబు పేరు అసి దెయమ్కాజ్ పేర్లెజ్ సుండె:తార్. “పవులు వెహ్లా యేసు సత్తుదాన్ వెహ్లాన్, నీను విన్నిజ్ డి:సిని సొన్అ ఇజి నాను ఆడ్ర సీజిన్”, ఇజి వారు దెయమ్కాజ్ అస్తి వరిజ్ వెహ్లా మహార్.

14 స్కెవ ఇని ఒరెన్ యూదపెరిపుజెరి మరిసిర్ ఏడుగురు యా లెకెండ్రె దెయమ్కాజ్ పేర్దెజ్ సుండె:జి మహార్.

15 గాని ఆ దెయం వరివెట, “నాను యేసుజ్ నెస్సా, పవులు నెసిన్, గాని మీరు ఎయిదెర్?”, ఇజి వెన్బాతాన్.

16 అయ దెయం అస్తిమహికాన్ వరిముస్కు ఎగ్రితాండ్రె విజెరిజ్ అడి:గి అర్ప్తాండ్రె గెలిస్తాన్. వరి పాతెజ్ కిస్త విసిర్తాండ్రె గొప్ప దెబ్బెజ్ డె:య్తాన్. అందెజె వారు ఏడుగురు లోకుర్ డుమ్డ ఆతారె దెబ్బెజ్ తాక్తిజ్ అయ ఇండ్రోణిజ్ సొత్తారె ఉహ్కార్.

17 అయ ఎపెసు పట్టమదు మహి విజెరె యూదురు, యూదురు ఆఇ జాతిదికార్ యాక వెహార్ గొప్ప తియెలాతార్. యేసుప్రబు పేరుదిజ్ గొప్ప గవరం సిత్తార్.

18 కొత్తజ్ నమ్మితికార్ నండ్రెండ్రె వాతారె వారు కిత్తి సెఇ పణిజ్ విజు విజెరి ముందాల వెహ్లారె ఒప్పుకొటార్.

19 కొత్తజ్ నమ్మితి సెట్టిపణికినికార్ నండ్రెండ్రె మంత్రమ్కు రాస్తిమని వరి పుస్తకమ్కు తత్తారె విజెరి ముందాల అక్కెజ్ సురార్. వారు లెక్క సుండె:తిజ్ వనక దర యబాయ్ వెయిజ్ వెండిరుపాయిజ్ \* వాతె.

20 ఈహె దేవుణు - మాట విజుబాన్ సాటె ఆతాదె నండ్రెండ్రె నమ్మితికార్ ఆతార్.

21 ఇక్కెజ్ విజు జర్గితి వెనుక పవులు మసిదోనియ అకాయ ఇని దేనమ్కాజ్ సొన్ని దేవుణు సజమ్కాజ్ సుడి: సొన్ని వెనుక బాణిజ్ యెరూసలేం పట్టమదుబా సొండ్రెజ్వలె ఇజి ఒడి:ఒడి:బితాన్. వెనుక రోమ పట్టమదుబా సొండ్రెజ్వలె ఇజి ఒడి:బితాన్.

22 వన్నివెట కూడె:జి పణి కిజిమహి తిమోతి, ఎరాస్తు ఇనివరిజ్ మసిదోనియాదు పొక్తాండ్రె పవులు సెగం కాలం ఆసియ ప్రాంతమదు బత్కితాన్.

### ఎపెసు పట్టమదు గొడె:బ జర్గితాద్

23 అయ కాలమ్దు యేసుప్రబు ముస్కు లోకుర్ నమకం ఇట్టి వందిజ్ ఉండ్రె గొప్ప గొడె:బ వాతాద్.

24 ఇక్క ఎలాగ ఇహిజ, దెమెత్రి ఇని ఒరెన్ సరాబు మహాన్. వాండ్రు వెండిదాన్ అరైమి ఇని దెయమ్దిజ్ ఇండ్రో ఇడ్డి ఇజిరి గుడి:జ్ తయార్ కినికాన్. యా దెమెత్రిజ్, వన్నివెట మహి సరాబురిజ్ విజెరిజ్ యా పణిదాన్ నండ్రె లాబం దోహ్కీ మహాద్.

25 యా దెమెత్రి యా పణికినివరిజ్ని, వరిలెకెండ్రె ఆఇపణిజ్ కిని వరిజ్బా కూడు:ప్తాండ్రె ఈహు వెహ్లాన్, “బాబురాండ్రె, యా పణిదానె ఎక్కు అస్తి మజి వానాద్ ఇజి మీరు నెసినిదెర్గదె.

26 గాని కికాణిజ్ తయార్ కినికెజ్ దెయమ్కు ఆఉ ఇజి యా పవులు వెహ్లా, ఎపెసు పట్టమదు ఉండ్రె ఆవిద్, ఆసియ ప్రాంతమదు విజుబాణిలెకెండ్రె నండ్రెండ్రెజ్ నమ్మిసి మహ్లాన్. ఇక మీరు సుండె:జినిదెర్. వెంజినిదెర్.

27 ఏలు గొప్ప ప్రమాదం ఆజినాద్. మా పణి వందిజ్ మన్ని నెగ్గి పేరు పాడా:నాద్లె. అక్కాదె ఆవండ్రె పెరి దెయమాతి యా అరైమి దెయమ్ది గుడి:బా ఎయెరిజ్బా అవ్సరం సిల్లెండ్రె ఆనాద్. ఆసియ దేసెమ్దికార్ విజెరె, బూలోకం విజు పూజ కిని యా అరైమి దెయమ్ది గొప్ప పేరు సిల్లెండ్రె ఆనాద్లె”, ఇజి యా దెమెత్రి వరివెట వెహ్లాన్.

\* 19:19 19:19 ఉండ్రె వెండి రుపాయి ఉండ్రె రోజుది కూలి † 19:24 19:24 ఇజిరి గుడి:జ్ ఇహిజ అరైమి దెయమ్ది గుడి:ది ఇజిరి బొమ్మెజ్

28 యాక వెహారె వారు గొప్ప కోపం ఆతారె, “ఎపెసుదికార్ పూజకిని అర్తెమి దెయం గొప్ప పెరి దెయం”, ఇజి గొప్ప గగోల్ ఆతారె.

29 అయ పట్టుమ్దు గొప్ప కలిబిలి ఆతాద్. వారు ఉండ్రె మన్ను ఆతారె పవులువెట బూలాజి మహి మసిదోని - యాదికార్ గాయి, అరిస్తర్కు ఇని రివిరిజ్ అస్తారె అయ పట్టుమ్దు మన్ని పెరి సద్దుదు‡ లాగిత ఒతారె.

30 మంద కూడితి మహి అయ సద్దుదు సొండ్రెజ్ ఇజి పవులు ఒడిబడిబితాన్. గాని నమ్మితికార్ వన్నిజ్ సరి సివతారె.

31 పవులు కూలయెర్ ఆతి అయ ఆసియ ప్రాంతమ్ది అతికారి లోకుర్ సెగొండార్బా లోకుర్ కూడఃజివాతిమహిబాన్ సొన్మా ఇజి కబ్బు పోక్తారె బతిమాలితారె.

32 అయ సద్దుదు గొప్ప కలిబిలి జర్గితాద్. సెగొండార్ అహు వెహిన్, మరి సెగొండార్ ఈహు వెహిన్ గగోల్ ఆతారె. గాని వారు ఇని దన్నిజ్ కూడిత మనారొ ఇజి నండొ లోకుర్ నెన్వతారె.

33 యూదురు అలెకజెండర్ ఇనివన్నిజ్, విజెరె వందిజ్ నీనె వర్గిత ఇజి లోకుర్ నడిమిహాన్ ముందాల నిల్వారె. అలెజి మండ్రు ఇజి వాండ్రు కియు సాప్తాండ్రె ఉండ్రె మాట కీవెహ్న ఇజి సుడఃజి మహాన్.

34 గాని వాండ్రు యూద వాండ్రు ఇజి నెస్తారె వారు రుండి గంటెజ్ దాక, ‘ఎపెసువరి అర్తెమి దెయం గొప్ప దెయం’ ఇజి ఉండ్రెలెకెండ గగోల్ ఆతారె.

35 అయావలె అయ పట్టుం కర్లం \*వాతాండ్రె లోకాజ్ విజెరిజ్ గగోల్ ఆవిండ మండ్రు ఇజి వెహ్హాన్. “ఎపెసు పట్టుమ్దికిదెరా, మాపు అర్తెమి పెరి దెయమ్ది గుడిదిజ్ కాప్ కినికాప్ ఇజి విజెరె నెసినార్గదె. ఆగాసమ్దాన్ అర్తి అర్తెమి దెయమ్ది పణుకుదిజ్బా కాపు కినికార్ మాపె ఇజి విజెరె నెసినార్గదె.

36 యా సజతిజ విజి ఎద్రిసినిక ఆవిద్. అహిజ మీరు ఏలు అలెజి మండ్రెజ్ వలె. ఇనికబా గజిబిజి ఆజి కిదెజ్ ఆవిద్.

37 మీరు యా లోకాజ్ లాగితి తత్తిదెర్. గాని వీరు గుడిజు డొజ కినికార్ ఆవిర్. మా దెయమ్దిజ్ దుసలాడఃవిర్.

38 దెమెత్రిజ్, వన్నివెట కూడితి మహి పణిమణిసిరిజ్ ఎయెన్ మున్నుబా నేరం మొప్పెజ్ ఇహిజ, కోర్టుజ్ నడిసినె, అతికారి లోకుర్ మనార్. బానె సొన్ని వారు ఒరెన్మున్ను మరి ఒరెన్ నేరమ్కు సీదెజ్.

39 గాని మరి ఇనివందిజ్ ఇనికబా తగ్గు మహిజ అక్క రోజు జర్గిని సద్దుదు వర్గిజి తీర్పు తీరిస్తెజ్.

40 నేండ్రు జర్గితి గొడఃబవందిజ్ రోమ అతికారిబు మా మున్ను కేను పొక్కారొ ఇజి నాను తియెలాజిన. జర్గితి గొడఃబవందిజ్ వెహ్హాజ్ ఇని మాటబా సిల్లెద్. ఎందానిజ్ ఇహిజ యావజ కూడఃజి గగోలాజి వర్గినిదన్నిజ్ వెహ్హాజ్ అసల కారణం సిల్లెద్”, ఇజి వరివెట వెహ్హాన్†.

41 వాండ్రు ఈహు వెహిన్ కూడితి మహి వరిజ్ విజెరిజ్ సొండ్రు ఇజి పోక్తాన్.

## 20

### పవులు మసిదోనియ గ్రీసు దేసెమ్కాజ్ సొహాన్

1 అయ గొడఃబ అణస్తి వెనుక పవులు నమ్మితివరిజ్ కూక్పిస్తాండ్రె వరి నమకమ్దిజ్ సత్తు కిబిస్తాన్. దయ్మమున్ను మండ్రు ఇజి వెహిన్ సెల్వ లొస్తాండ్రె మసిదోనియదు సొండ్రెజ్ సొత్తాన్.

2 పవులు ఆ దేసెం విజు బూలాజి నమ్మితి వరిజ్ సుడఃజి సొహాన్. వరి నమకమ్దిజ్ సత్తు కిబిస్తాన్. వెనుక అకాయ ఇజి కూక్పి గ్రీసు దేసెమ్దు వాతాన్

3 పవులు అబ్బె మూండ్రె నెలెజ్ మహాన్. ఓడః ఎక్కి సిరియాదు సొన ఇజి మహిజ్ యూదురు వన్నిజ్ సప్తెజ్ కుట్ర ఆజి మహార్ ఇజి వెహాన్. అక్క నెస్తాండ్రె మసిదోనియదాన్ నడిజి సొన్ని అబ్బెణాన్ ఓడః ఎక్కి సొండ్రెజ్ ఒడిబితాన్.

4 పురు మరిసి ఆతి బెరెయ పట్టుమ్దికాన్ సొపత్తు ఇనికాన్, దెసలోనియదికార్ అరిస్తర్కు, సెకుందు ఇనికార్, దెర్బ పట్టుమ్దికాన్ గాయి ఇనికాన్, మరి తిమోతి, ఆసియ దేసెమ్దికార్ ఆతి తుకికు, త్రోపిము ఇనికార్ పవులు వెట సొహార్.

5 వీరు ముందాల్నె సొహారె త్రోయ ఇని పట్టుం మా వందిజ్ సుడఃజి మహార్\*.

‡ 19:29 19:29 సద్దు ఇహిజ స్థిడియం లెకెండ మహాద్. బానె లోకు కూడఃనారె బేను కర్గినార్. లోకు సురుల బన్నార్. ఇరువయ్ఆరువెయి లోకుర్ బస్తెజ్ ఆనాద్ అయ సద్దుదు. కొడఃవేలి నని గుండ్రాజ్ మనాద్ అయ సద్దు. గాని మేడః సిల్లెద్. ఎపెసు పట్టుం నడిమిద్ మహాద్ యా సద్దు. § 19:33 19:33

గొడఃబ కినికార్ మాపు యూదురు ఆవిప్, పవులుని వన్నివెట మన్నికారె ఇజి వెహ్హాజ్ సుడఃజాన్ \* 19:35 19:35 ముకెలమాతి ఒరెన్ అతికారి † 19:40 19:40 ఎపెసు పట్టుమ్దు మన్ని లోకుర్వందిజ్ యా ముకెలమాతి అతికారి, రోమ అతికారిబు వెట వర్గినికాన్. లోకు గొడఃబ పుటిస్తెజి వరిజ్ వాని అవుకాసమ్కు

సిల్లెండ ఆనె \* 20:5 20:5 యా పుస్తకం రాస్తిమహి లూక పవులువెట పయనం కిదెజ్ మర్రి వాతాన్



6 పులాజ్ ఆఇ రొట్టెజ పండోయ్ ఆతి వెనుక మాపు పిలిప్పి పట్ను డిసి ఓడః ఎక్కి అయ్దు రోన్కాణ్ త్రోయ్† పట్ను వాతావ్. అబ్బె ముందాల సొహిమహివరివెట ఏడు రోస్కు మహావ్.

### పవులు సాతివన్నిజ్ నిక్రాన్

7 వారమ్ది మొదోహి రోజు ‡ప్రబు ఏర్పాటు కిత్తి బోజనం తిండ్రెజ్ మాపు కూడిత వాతావ్. అయావలె పవులు మర్చు నాండిజ్ సొనాలె ఇజి వరిజ్ నెస్సిస్తాన్. మదరెయు - దాక నండో మాటెజ్ వర్గిజి మహాన్.

8 మాపు కూడితి మహి మేడః గదిదు నండో దీవెజ్ మహె.

9 అయావలె అయుకు ఇని ఒరెన్ దజ్డాఃయెన్ కిటికిదు బస్తాండ్రె వెంజిమహాన్. వెంజిమహిజ్ నిద్ర వాతాద్. పవులు లావు సుట్కు నెస్సిస్తా మహిజ్ యా దజ్డాఃయెన్ నిద్ర లావాత్తిజ్ జోజీతాండ్రె మూండ్రె అంత్రంకాణిజ్ అడిఃగి అర్తాన్. పెహ్తి సుడ్డెతిజ్ సాత మహాన్.

10 గాని పవులు అడ్లి డిఃగితాండ్రె వన్ని ముస్కు అర్చి వన్నిజ్ పొంబిజి అస్తాన్. “మీరు బాద ఆమాట్. వన్ని పాణం వన్నిలోఇనె మనాద్”, ఇజి వరివెట వెహ్తాన్.

11 పవులు మరి మేడఃముస్కు సొహాండ్రె రొటె రుక్కి వరివెట బోజనం కిత్తాన్. జాయానిదాక నండో మాటెజ్ వర్గిజి సొతాండ్రె సొహాన్.

12 వారు బత్తితి మహి అయ దజ్డాఃజ్ ఇండ్రె తతార్ గొప్ప సర్ల ఆతార్.

### పవులు ఎపెసు పట్నుమ్ది పెద్దెలుజవెట సెలవ లొస్తాండ్రె యెరూసలేమ్దు సొహాన్.

13 పవులు అసోసు ఇనిబాన్ నడిఃజి సొండ్రెజాతిజ్ మాపు వన్నిముందాల ఓడః ఎక్కి అసోసు సొహావ్. పవులుజ్ బానె ఓడఃదు ఎక్కావ్ ఇజి మాపు ఒడిఃబిత్తావ్.

14 అసోసుదు పవులు మా వెట కూడితివలె మాపు వన్నిజ్ ఓడఃదు ఎక్కిస్తాపె మితులె ఇని బాడ్డిదు వాతావ్.

15 బాణిజ్ సోసి మహ్నా నాండిజ్ కియోసు ఇని బాడ్డిజి ఎద్రు వాతావ్. మహ్నా నాండిజ్ సమోసు ఇనిబాన్ సొహాపె బాణిజ్ మహ్నా నాండిజ్ మెలితె ఇని బాడ్డిదు వాతావ్.

16 వెంతెకోస్తు ఇని పండోయ్నాండిజ్ యెరూసలేమ్దు అందిదెజ్వలె ఇజి పవులు తొత్త్ర ఆతాన్. ఆసియదు సొహిజు అలస్యం ఆనాద్ ఇజి ఎపెసు పట్నుమ్దు సొన్ఎండ తిసాజ్ సొండ్రెజ్ ఒడిఃఒడిఃబితాన్.

17 అందెజె పవులు మిలెతుదు అందితివలె ఎపెసు పట్నుమ్దు మన్ని సజమ్ది పెద్దెల్జ వన్నిబాన్ కూక్పిస్తాన్.

18 వారు వన్ని డగ్రు వాతిజ్ పవులు వరివెట ఈహు వెహ్తాన్, “నాను ఆసియదు వాతి మొదోల్ దినమ్కాజ్ ఎలాకాలం మీ నడిఃమి ఎలాగ బత్తిజి మహానో ఇజి మీరె నెస్సిదెర్గదె.

19 యూదురు నజీ సప్తెజ్ కుట్ట కిజి నజీ మాలెజ్ కిత్తార్ గాని నాను గొప్ప వాండ్రు ఇజి ఒడిఃబివండ కణెరు వాక్కి దేవుణు పణి కిజి ఎలాగ మహానో ఇజి నిజినె తెలినాద్.

20 సిక్కుదాన్ ఎలాగ గెలిస్తాజ్ ఇని వందిజ్ అవ్సరమాతిక ఇనికబా సరినె మీలోకుర్ నడిఃమి విజేరె కూడితి మహి బాడ్డిదు నాను సాటిస్త. మీ ఇల్కాజ్బా వాతానె మిజీ నెస్సిస్త.

21 పాపమ్కు ఒప్పుకోడఃజి డిసిసిజి, దేవుణుదిజ్ లోజిజి, మా ప్రబు ఆతి యేసుక్రీస్తు ముస్కు నమకం ఇడ్దు ఇజి నాను యూదురిజ్ యూదురు ఆఇ వరిజ్ సాసి వెహ్తా.

22 ఇదిలో, నాను దేవుణు ఆత్మదిజ్ లోజిత్తానె యెరూసలేమ్దు సొన్నిన. అబ్బె నజీ ఇనిక జర్గినాద్లెనో నజీ తెలివద్.

23 గాని విజు పట్నుమ్కాజ్బా, నజీ మాలెజ్ వాజినె ఇజి, యెరూసలేమ్దు నజీ జెలిదు ఇడ్నార్లె ఇజి, దేవుణు ఆత్మ నజీ వెహ్తానాన్.

24 గాని నా పాణమ్దిజ్ నాను కండెక్బా విలువ సివి. ఎందానిజ్ ఇహిజు ప్రబు ఆతి యేసు నజీ సిత్తి పణి పూర్తి కిదెజె. అయ పణి ఇనిక ఇహిజు దేవుణు దయాదర్మమ్వందిజ్ మన్ని సువార్త వందిజ్ నాను సాసి వెహ్తాజ్.

25 నాను బూలాజి దేవుణు ఏలుబడిః వందిజ్ మీ నడిఃమి వెహ్తా గాని మీలోఇ ఎయిదెర్బా మరి నజీ తొఇదెర్లె ఇజి నాను ఏలు నెస్సా.

26 గాని మీలోఇ ఎయిదెర్బా పాడాఃజి సొహిజు నా పూసి తెవితాద్ ఇజి నేండ్రు మీరె సాసిర్ ఆనిదెర్లె.

27 దేవుణు ఇన్టం పూర్తి నాను మిజీ నెస్సిస్త. ఇనికబా డాప్విత.

† 20:6 20:6 మసిదోనియ దేసమ్దు మన్ని పిలిప్పి ఇనిబాణిజ్ ఓడః ఎక్కార్. గాలి వరి ఎద్రు డెయ్తిజ్ త్రోయ్ అందిదెజ్ అయ్దు రోస్కు ఆతె. సొహివలె రుండి రోస్కునె ఆతె మహె. 16:11 ‡ 20:7 20:7 యూదురి దినమ్కు లెక్క కినిక ఎలాగ ఇహిజు సనివారం పొదోయ్ ఆరు గంటెజ్ కొత్త వారం మొదోల్నినాద్. లూక యా పుస్తకం రాస్వలె యాకెండె లెక్క కిత్తాన్ ఇజి బయ్బిల్వందిజ్ ఎక్కు సదు కిత్తికార్ నండోండార్ వెహ్తానార్

28 దేవుణు వన్ని సొంత మరిసి నల సితండ్రై సజమ్దిజ్ నమ్పాదిస్తాన్. అయ సజమ్దిజ్ మీరు బాగ కాపకెదెజ్. దేవుణు ఆత్మ మిజి సజమ్దిజ్ సుడెదెజ్ ఒపజెప్తాన్. అయ పణిలోఇ నెగ్రెండ సుడెదు. మీవందిజ్బా మీరు జాగర్త సుడెదు.

29 నాను సొహి వెనుక క్రూరమాతి కార్నుకుడిజ్ నన్ని లోకుర్ మీలోఇ డుఃగ్నార్లె ఇజి నాను నెస్సా. వారు నమ్మితి వరి ముస్సు కనికారం తోరిన్వెర్. సజమ్దిజ్ పాడు కినార్.

30 మీలోఇహానె సెగొండార్, నమ్మితి వరిజ్ వెకొరి మాటెజ్ వెస్సా నెగ్గి సరిదాన్ లాగ్గి సెఇ సరిదు నడిపిసి, వరివెట కూక్కి ఒతెజ్ సూణార్లె.

31 అహిజ జాగర్త మండ్రు. నాను మూండ్రై పంటెజ్ దాక రెయుపొగలు కణెరు వాక్కి నమకమ్వందిజ్ విజెరిజ్, ఒరెన్ ఒరెన్ వన్నిజ్ డెన్వెండ వెప్తా మన్న. అక్క మీరు ఒడిబిజి జాగర్త మండ్రు.

32 దేవుణుదిజ్ని వన్ని దయాదర్మం తోరిన్ని మాటదిజ్ మిజి ఒపజెప్పిన. మీ నమకం నండొ కిదెజ్ అట్టి దేవుణు - మాటదిజ్ మిజి ఒపజెప్పిన. దేవుణుదిజ్ కేట ఆతి వరివెట మిజి అక్క సీదెజ్ అట్టి దేవుణుమాటదిజ్ మిజి ఒపజెప్పిన.

33 నాను ఎయె డబ్బుదిజ్, బజరమ్దిజ్, సొక్కెజ్ పాతెజ్ వందిజ్ ఆస ఆవిత

34 నా అవ్సరమ్వందిజ్ గాని నావెట మహివరి అవ్సరమ్కు వందిజ్ గాని నా కికాజణిజె పణి కిజి బత్రిత్త ఇజి మీరు నెసినిదెర్.

35 నాను కిత్తి విజు పణిజాజ్ మిజి నెన్పిస్తిక ఇనిక ఇహిజ మీరు డటం పణి కిజి సిల్లి వరిజ్ సాయం కిదెజ్. దిన్ని వందిజ్ యెసుప్రబు నెన్పిస్తి మాట గుర్తు కిదెజ్. అక్క ఇనిక ఇహిజ సీనివన్ని సర్ల లొస్సివన్ని సర్ల ఇంక పెరిక.

36 పవులు ఈహు వెప్తాండ్రై ముణుకుజ్ ఊర్జి వారు విజెరె వెట పార్లనం కిత్తాన్.

37 వారు విజెరె పవులుజ్ పొంబితారె వన్నిజ్ ముద్దు కిజి లావు అడెబాతార్.

38 ఎందానిజ్ ఇహిజ, మీరు ఇబ్బెహాన్ నజి సుడెఱదెర్లె ఇజి పవులు వెప్తా అయ మాటవందిజె గొప్ప దుకం ఆతార్. వారు ఓడె ఎక్కి అందు పవులు ఇట్టా వాతార్.

## 21

### పవులు యెరూసలేం సొన్నినాన్

1 మాపు వరిజ్ డెసిసొత్తి వెనుక ఓడె ఎక్తాపె తినాజ్ సొన్ని కోసు ఇనిబాన్ వాతాప్. మహ్న నాండిజ్ రోదు ఇనిబాన్ వాతాపె బాణిజ్ పతరు ఇనిబాన్ వాతాప్.

2 బానె పెనికెదిజ్ సొని ఉండ్రై ఓడె సుడెఱతాపె, ఎక్తాపె సొహాప్.

3 సొహాపె కుప్ర ఇని ద్విపు మా డేబ్ర పడెకాద్ సుడెఱతాప్ గాని దన్ని డేబ్ర పడెకాద్ తినాజ్ సిరియ దరోట్ సొహాపె, తూరు ఇనిబాన్ డిగితాప్. బాన్ డిపెజ్ ఓడెదు సామనమ్కు మహా.

4 బాన్ సిసూరిజ్ రెబాజి సుడెఱతిజ్ వరివెట కూడిఱతాపె ఏడు రొస్సు బానె మహాప్. 'నీను యెరూసలేమ్దు సొన్మా', ఇజి దేవుణు ఆత్మ వెప్తా లెకెండ్రై పవులు వెప్తార్

5-6 గాని బాణిజ్ సొండ్రైజ్ టయం ఆతివలె మాపు సొత్తాపె పయనం కిత్తాప్. నమ్మితికార్ విజెరె, అయ్లికొణెక్, కొణెర్, మా వెట పట్టుం వెల్లిదాక ఇడ్డిః వాతార్. మాపు విజెపె నమ్దరం ఒడ్డుదు ముణుకుజ్ ఊర్జి పార్లనం కిత్తాపె ఒరెన్ వెట ఒరెన్ సెలవ లొస్తాపె ఓడె ఎక్తాప్. వారు వరి ఇండ్రై మర్జి సొహార్.

7 మాపు తూరుదాన్ సొత్తాపె తొలెమాయి ఇని పట్టుమ్దు వాతాప్. బాన్ నమ్మితి తంబెర్సిరిజ్ సుడిః సొహాపె వరివెట ఉండ్రై రోజు మహాప్.

8 మహ్న నాండిజ్ సొత్తాపె కయ్సరియాదు వాతాప్. బానె సువార్త వెప్తాకాన్ పిలిపు ఇండ్రై సొహాపె వన్ని ఇండ్రై మహాప్. పిలిపు యెరూసలేమ్దు మన్ని సజమ్దు ఏర్పాటు కిత్తి ఏడుగురు లొఇ ఒరెన్.

9 అయా పిలిపుజ్ నాల్గురు విడ్డిః అయ్లిక్ మహా. అవిక్ దేవుణుబాణిజ్ వాని మాటెజ్ వెప్తాకెజ్.

10 మాపు సెగం రొస్సు బానె మహివలె అగబు ఇని ఒరెన్ ప్రవక్త యూదయ ప్రాంతమ్దాన్ బానె వాతాన్.

11 అగబు మాపు మన్నిబాన్ వాతాండ్రై పవులు నడుముదు తొప్తా మన్ని కటు కుతాన్. కుతాండ్రై, వన్ని కికాజ్ కాల్యాజ్ అగబు తొహా ఆతాన్. తొహా ఆతండ్రై, యా కటు ఎయెర్ది ఇహిజ వన్నిజ్ యెరూసలేమ్దు మన్ని యూదురు తొహా ఆఇ లొకాజ్ ఒపజెప్తార్లె ఇజి దేవుణు ఆత్మ వెప్తానాన్ ఇజి యా అగబు వెప్తాన్.

12 యాక మాపు వెహాపె మాపు, బానె మహి నమ్మితికార్, పవులు వెట, "యెరూ - సలేమ్దు సొన్మా", ఇజి బతిమాలితాప్.

13 దన్నిజ్ పవులు, “మీరు ఎందనిజ్ అడఃబాజి నజీ దుకం కిబిసినిదెర్? నా ప్రబు ఆతి యేసువందిజ్ తోహా అదెజె ఆవద్, వన్ని వందిజ్ యెరూసలేమ్దు సాదెజ్బా నాను ఒప్పుకోడఃజిన”, ఇహాన్.

14 పవులు మా మాటెజ్ ఒప్పుకోడఃఇతిజ్ మాపు అలెతాప్. దేవుణుదిజ్ ఇస్టమాతి వజ జర్గిపిద్ ఇహాప్.

15 అయ పట్టుమ్దు సెగం రోస్సు మహి వెనుక మాపు సామనమ్కు విజు అస్తాపె ఎక్కు యెరూసలేం పట్టుమ్దు సొండ్రెజ్ సొత్తాప్.

16 కయ్సరియదాన్ సెగొండార్ సిసూర్ మా వెట వాతారె మాపు మండ్రెజ్ ఇజి ఒడిఃబిత్తి మ్నాసోను ఇండ్రొ మజి తతార్. మ్నాసోను కుప్రదికాన్. మొదోహాన్ అసి యేసుప్రబు సిసూడుః ఆతికాన్.

### పవులు యెరూసలేమ్దు అందితాన్

17 మాపు యెరూసలేమ్దు వాతిజ్ నమ్మిత్తి తంబెర్సిర్ మజి సర్దదాన్ మర్యాద కిత్తార్.

18 మర్న నాండిజ్ పవులు మా వెట యాకోబు డగ్రు సాహాన్. నజం పెద్దెలుజు విజేరె బానె మహార్.

19 పవులు వరిజ్ మాడిఃస్తాన్. వెనుక యూదురు ఆఇవరిలోఇ పవులు కిత్తి సువార్త పణిదాన్ దేవుణు జర్గిస్తికెజ్ విజు పూర్తి వెహ్తాన్.

20 వారు ఇక్కెజ్ వెహారె దేవుణుదిజ్ స్తుతి కిత్తార్. పవులు వెట వారు ఈహు వెహ్తార్, “పవులునా, యూదురు లోఇ నమ్మితికార్ నండో వెయుజ్ లోకుర్ మనార్ ఇజి నీను సుడఃజనిగదె. వారు విజేరె దేవుణు మోసెజ్ సిత్తి రూలుజ్ వందిజ్ నండో పటుదల మనికార్.

21 ఇబ్బె మన్ని యూదురు విజేరె నీవందిజ్ ఉండ్రొ బోగట్ వెహ మనార్. అక్క ఇనిక ఇహిజ, మోసె వెహ్తాకెజ్ విజు డిఃస్టెజ్ ఇజి నీను యూదురు ఆఇవరి లోఇ బత్కిని యూదురిజ్ నెస్పిసిని ఇజి. వరి ఇజిరి కొడోరిజ్ సునతి కినిక ఆవద్ ఇజి నీను నెస్పిసిని ఇజి. మరి, యూదురు ఎలాగ నడిఃదెజ్ ఇజి మహి పదతిజ్ వజ నడిఃనిక ఆవద్ ఇజి నీను నెస్పిసిని ఇజి. వినకవందిజ్ బోగట్ వెహ మహాప్”, ఇహార్.

22 “అహిజ మాటు ఇనిక కిదెజ్? నీను వాతివందిజ్ విజేరె తవ్వుండ వెనార్.

23 అందెజ్ మాపు వెహ్తావజ నీను కిఅ. ఇనిక ఇహిజ మొకు నీల్పి మన్ని నాల్ఎర్ మొగావారు ఇబ్బెనె మనార్.

24 నీను వరిజ్ వెట కూక్కి ఒసి వారు మొకుబడిః సొన్పిస్తెజ్ వరివెట దేవుణు గుడిఃదు సొన్అ. వారు పూజ నీజి బుర్ర బోడి కిదెజ్ మన్ని కర్పు నీనె సిఅ. అహిజ నీవందిజ్ లోకుర్ వెహిమన్ని బోగట్ నిజం ఆవద్ ఇజి విజేరె నెస్సార్. నీను మోసె సిత్తి రూలుజ లోజిజి నడిఃజినాన్ ఇజి విజేరె నెస్సార్.

25 అహిజ యూదురు ఆఇ నమ్మితి వరిజ్ మాపు ఇనిక తీర్మానం కిజి రాస్త మనాద్ ఇహిజ, బొమ్మెజ పూజ కిత్తి వన్నాజ్ తినిక ఆవద్ ఇజి, నల తినిక ఆవద్ ఇజి, మెడః పిడిఃక్కి సప్తి వనకాజ్ తినిక ఆవద్ ఇజి. రంకు బూలానిక ఆవద్ ఇజి”. ఈహు నజమ్ది పెద్దెలుజు పవులు వెహ్తార్.

26 అందెజ్ పవులు, మహ్సా నాండిజ్ అయ నాల్ఎరిజ్ వెట కూక్కి ఒతండ్రె వరివెట సుబ్బరం ఆతాన్. వారు సుబ్బరం ఆజి మంజిని కాలం ఎసెజ్ అందినాద్, వరి లోఇ విజేరివందిజ్ ఎసెజ్ పూజ కిదెజ్, ఇక్కెజ్ వెహ్తావందిజ్ పవులు దేవుణు గుడిఃదు యూదురు లోఇ మొగావారు మండ్రెజ్ మన్ని బాడ్డిదు సాహాన్.\*

### పవులు యూదురు అస్తార్

27 సుబ్బరం ఆజిమంజిని ఏడు రోస్సు డగ్రు ఆతాద్. అయావలె ఆసియదాన్ వాతిమహి సెగొండార్ యూదురు, దేవుణు గుడిఃదు యూద మొగవరిజ్ మన్ని బాడ్డిఃదు పవులు సుడఃతారె, బానె మహి లోకాజ్ విజేరిజ్ కలిబిలి కితారె వన్నిజ్ అస్తార్.

28 “ఇస్తాయేలు లోకాండె, తోడుః కిదెజ్ రద్దు. మా లోకాజ్ పడఃఇకెజ్, మోసె సిత్తి రూలుజ పడఃఇకెజ్, యా దేవుణు గుడిఃదిజ్ పడఃఇకెజ్ విజు బాడ్డిజ సొన్పి లోకాజ్ విజేరిజ్ నెన్పిసినికాన్ వీండ్రె. అక్కాదె ఆవండ, వీండ్రు యూదురు ఆఇ వరిజ్ దేవుణు గుడిఃదు కూక్త తతాండ్రె దేవుణుదిజ్ కేట కిత్తి యా బాడ్డి మయ్ కిత్తాన్”, ఇజి నండో గగోలాతార్.

29 ఎండానిజ్ ఇహిజ, పట్టుమ్దు పవులు వెట యూదురు ఆఇ ఎపెసుదికాన్ త్రోపిమును ఇని ఒరెన్ వన్నిజ్ ముందాల్పె వారు సుడఃత మహార్. వన్నిజ్ పవులు దేవుణు గుడిఃదు యూదురి మొగ్గ వరిజ్ మండ్రెజ్ మన్ని బాడ్డిఃదు తతాన్ ఇజి వారు ఒడిఃబితార్†.

30 పట్టుమ్దు మహి లోకుర్ విజేరె కలిబిలి ఆతార్. విజుబాణిజ్ లోకుర్ మందెజ్ మందెజ్ ఆజి ఉహ్కొక్కి వాతారె పవులుజ్ అస్తారె దేవుణు గుడిఃదు యూదురి మొగ్గ వరిజ్ మండ్రెజ్ మన్ని బాడ్డిహాన్ వెల్లి లాగితార్. వెటనె యూదురి మొగ్గ వరిజ్ మండ్రెజ్ మన్ని బాడ్డిదు సొని సేఫ్లాజ్ కెహె ఆతె.

\* 21:26 21:26 యా బాడ్డిదు మొగవారె మంజినార్. అయ్లికొడోక్ బాన్ సొండ్రెజ్ ఆవద్ † 21:29 21:29 యూదురు ఆఇకార్ దేవుణు గుడిః డేవాదు సొండ్రెజ్ ఆవద్. బాన్ యూద మొగకొడోరె సొండ్రెజ్ ఆనాద్ ఇజి రూలు మనాద్

31 పవులుజ్ వారు సప్తెజ్ ఇజి సుడఃజిమహిజ్ యెరూసలేం పట్నం విజు కలిబిలి ఆతాద్ ఇజి అబ్బె మహి రోమ సయ్నమ్ది పెరి అతికారిజ్ కబ్బు వాతాద్.

32 వెటనె అయ పెరి అతికారి సయ్నమ్దివరిజ్, నదాతిపతివరిజ్ వెట ఒతండ్రె కూడిఃతి మహి లోకుర్ డగ్రు ఉహ్కీ వాతాన్. లోకుర్ అయ పెరి అతికారిజ్, వన్నివెట వాతి సయ్నమ్ది వరిజ్ సుడఃతిజ్ పవులుజ్ డెయ్యెజ్ డిఃస్తార్.

33 అయ పెరి అతికారి డగ్రు వాతండ్రె పవులు అస్తాన్. 'రుండి గొలుస్కాణిజ్ వన్నిజ్ తొప్తు' ఇజి ఆడ్ర సిత్తాన్. వీండ్రు ఎయెన్? ఇనిక కిత్తాన్ ఇజి వెన్బాతాన్.

34 వెన్బాతిజ్ లోకుర్ సెగొండార్ ఈహు ఇజి, సెగొండార్ అహు ఇజి వెప్పి డేల్లి మహిజ్ గగోల్ లావాత్తిజ్ నిజం ఇనికాదొ ఇజి నెన్విండ ఆతండ్రె 'బారి గోడఃలోఇ వన్నిజ్ ఒతు' ఇజి ఆడ్ర సిత్తాన్.

35 పవులు పావు అన్ను ముస్కు వాతివలె లోకుర్ ఒదె కోపమాజి లాగ్దెజ్ నెక్కెజ్ కిత్తిజ్ సయ్నమ్దికార్ పవులుజ్ పిండితారె ఒతార్.

36 ఎందానిజ్ ఇహిజు, వన్నిజ్ సవ్అ ఇజి లోకుర్ విజేరె డటం గగోలాజి వెటసాహర్.

### పవులు లోకుర్ వెట వర్గిజినాన్

37 మొదొహి పావు అన్నుదాన్ ఎక్కి సొన్ని ఆకరి పావు అన్ను దాక వారు సాహర్. సయ్నమ్దికార్ పవులుజ్ బారిగోడఃలోఇ ఒతెజ్ సుడఃజి మహిజ్ పవులు అయ పెరి అతికారి వెట, నీ వెట ఉండ్రి మాట వెప్తాజ్ ఆనాదా ఇజి వెన్బాతాన్. అందెజె అయ అతికారి, "గ్రీకు బాస నీను నెసినిదా?", ఇజి వెన్బాతాన్.

38 "యా దిన్మకాజ్ ముందాల్పె అతికారిజు ఎద్రువెప్పి లోకాజ్ సప్పి నాల్లి వెయి లోకాజ్ బిడిఃజ్బూమిదు వెట కూక్కి ఒసి మహి అయగుప్తు దేసెమ్దికి నీను ఆఇదా?", ఇజి పవులుజ్ వెన్బాతాన్.

39 దన్నిజ్ పవులు, "నాను కిలికియాదు మన్ని తార్పు పట్నమ్దికాన్ యూద వాండ్రు. నాను అయ గొప్ప పట్నమ్ది లోకు. లోకుర్ వెట వర్గిదెజ్ నజీ సెల్వ సిదా", ఇజి బతిమాలితాన్.

40 పవులు సెలవ లొస్తిజ్ పెరి అతికారి సరి సిత్తాన్. అయావలె పవులు పావు అన్ను ముస్కు నిహండ్రె లోకాజ్ అలెజి మండ్రు ఇజి కియు సయ్న కిత్తాన్. వారు అలెతి మహివలె పవులు యూదురి బాసాదు ఈహు వెప్తాన్.‡

## 22

1 "తంబెరిజాండె, బుబ్బరాండె, నా లొఇ ఇని తప్పుబా సిల్లెద్ ఇజి మీరు నెసినివందిజ్ నాను వెప్పిని మాటెజ్ వెండ్రు".

2 పవులు వరి సొంత బాసాదు వర్గినిక వెహారె వారు జమ్న అల్లెత మహర్. అయావలె పవులు ఈహు వెప్తాన్.

3 "నాను కిలికియాదు మన్ని తార్పు పట్నమ్దికాన్ యూద వాండ్రు. అహిజు యా పట్నమ్దు గొప్ప పేరు పొందితి మేస్టర్ గమాలియెలు బాన్ మోసె మా అనిగొరిజ్ సిత్తి రూలుజు ఎలాగ లోబడఃదెజ్ ఇజి నెగ్గెండ నెస్తానె పిరితా. మీరు విజిదెరి నేండ్రు ఎలాగ పటుదలదాన్ మన్నిదెరొ అయ వజనె నానుబా యా రూలుజ్ వందిజ్ పటుదలదాన్ మహా.

4 నాను యేసుప్రబు ముస్కు నమ్మితి వరిజ్ మొగ్గకొడెరిజ్, అయ్లి కొడెకాజ్ అసి తొప్పి జెలిదు ఇడఃజి సానేండ మాలెజ్ కిత.

5 దిన్ని వందిజ్, విజేరె పుజేరిజు ముస్కు పెరి పుజేరి, పెద్దెలుజు విజేరె నజీ సాసి ఆత మనార్. దమస్కు పట్నమ్దు మహి మా సొంత లోకురాతి యూదురు లొఇ మహి నమ్మిత్తి వరిజ్బా అసి తొప్పి మాలెజ్ కిదెజ్ యెరూసలేమ్దు తతెజ్ ఇజి పుజేరిజు బాణిజ్ ఉత్తమ్ము లొస్త ఒతానె దమస్కు పట్నమ్దు మహి యూదురుబాన్ సాహ.

6 నాను పయ్నం కిజి దమస్కు పట్నం డగ్రు సొన్ని మహిజ్, మదెనం వేడెదు, ఆగాసమ్దాన్ వెటనె గొప్ప జాయ్ నా సుటులం డెయ్తాద్.

7 అయావలె నాను బూమి ముస్కు అర్తానె, 'సవులు, సవులు, నీను ఎందానిజ్ నజీ మాలెజ్ కిజిని', ఇజి నావెట ఉండ్రి జాటు వాతిక వెహ.

8 'ప్రబు, నీను ఎయి' ఇజి నాను వెన్బాత. వెన్బాతిజ్ వాండ్రు 'నీను మాలెజ్ కిజిని నజరేతుదికాన్ ఆతి యేసునె నాను', ఇజి నావెట వెప్తాన్.

9 నావెట సొన్ని మహికార్ అయ జాయ్ సుడఃతార్ గాని నావెట వర్గితిమహివన్ని జాటు నెన్వితార్.

10 అయావలె నాను, 'ప్రబు నాను ఇనిక కిదెజ్' ఇజి వెన్బాతిజ్, 'నీను నిజ్జి దమస్కు పట్నం సొన్అ. అబ్బె నీను ఇని పణి కిదెజ్ ఇజి నీ వందిజ్ నాను ఏర్పాటు కిత్తికెజ్ విజు నిజి ఒరెన్ వెహ్నాన్లె' ఇజి నావెట ప్రబు వెప్తాన్.

‡ 21:40 21:40 యూదవరి బాస ఏత్రి బాస. యూద పుజేరిజు నదవితి మహి దేవుణు మాటెజ్ ఏత్రి బాసాదునె రాస్త మహాద్. వారు వర్గితి మాట అరామియ బాస

11 అయి సుడెండెజ్ అట్ ఇ నన్ని పెరి జాయ్ మహిజ్ నాను కణుకు తోరదెజ్ అట్ ఎండత. నావెట మహికార్ నా కికు అసి నడిపిసి దమస్కు పట్టమదు కూక్త తతార్.

12 అయావలె మోసె సిత్తి రూలుజ్ లోజిజి, బక్తి మన్నికాన్ అననియ ఇనికాన్ ఒరెన్ బాన్ మహాన్. అబ్బె మహి యూదురు విజేరె యా అననియ, ఒరెన్ పల్కుబడి: మన్నికాన్ ఇజి వెహ్ని మహార్. వాండ్రు నా డగ్రు వాతాన్.

13 డగ్రు వాతండ్రె నా డగ్రు నిహండ్రె, 'సవులునా, బేస్ అ', ఇజి వెహ్నిజ్ వెటనె నాను బేస్తానె వన్నిజ్ సుడెంత.

14 అయావలె అయి అననియ వెహ్ని, 'మా అనిగొగొరి దేవుణు నిజి ఏర్పాటు కిత మనాన్. దేవుణు నిజి ఇని పణి వందిజ్ ఏర్పాటు కితాండ్రె అక్క నీను నెస్తెజ్. అందెజె నీను సుడెంతిమహి, వెహిమహి నీతి నిజాయితి మన్నికాన్ నిజి ఏర్పాటు కితాన్.

15 ఎండనిజ్ ఇహిజ, నీను సుడెంతికెజ్, నీను వెహికెజ్, విజు లోకాజ్ సొన్ని వెహ్నిజ్, వన్నివందిజ్ ఉండ్రె సొనివజ నీను మంజిని.

16 ఏలు ఎండనిజ్ ఆలస్యమాజిని? నిజ్ ఇ బాప్తిసం లాగె ఆఅ. యేసు పేరు అసి, పార్లనం కిజి నీ పాపమ్ కాణ్ నొరె ఆఅ', ఇజి వెహ్ని.

17 నాను యెరూసలేమదు మర్జి వాతానె దేవుణు గుడిడు పార్లనం కిజి మహా. పార్లనం కిజి మహిజ్ ఎద్రునె ఉండ్రె దర్లనం సుడెంత.

18 అయి దర్లనమదు నావెట, 'నీను యెరూసలేం డిసి గజిబిజి సొన్ అ. ఎండనిజ్ ఇహిజ నావందిజ్ నీను వెహ్ని సొని వీరు ఒప్పుకోడెవర్', ఇజి వెహ్ని మహిక నాను సుడెంత.

19 ప్రబు అయి మాట వెహ్నిజ్ నాను, 'నాను యూదురి మీటిజ్ ఇల్కాజ్ వరస సొన్ని మీ ముస్కు నమకం ఇట్టి వరిజ్ డెయ్ జి జెలిదు ఇట్టా ఇజి వారు విజేరె బాగ నెసినార్.

20 అక్కాదె ఆవిండ, నీవందిజ్ సొని వెహ్ని సైపానుజ్ సప్తివలె, నానుబా అక్క ఒప్పుకోటానె వన్నిజ్ సప్తివరి సాల్ వెజ్ కాప్ కిజి మహగదె', ఇజి ప్రబు వెట వెహ్ని.

21 గాని ప్రబు, 'నీను సొన్ అ, దూరం మన్ని దేసమదు బత్తిని యూదురు ఆఇవరిబాన్ నాను నిజి పొక్కు' ఇజి నావెట వెహ్ని".

### పవులు రోమదిజ్ అక్కు ఆతికాన్

22 యా మాటదాక లోకుర్ పవులు వెంజి మహార్. గాని యాక వెహ్నిజ్, "నిన్ని వన్నిజ్ ఇడాట్. విన్నిజ్ సప్తు. వీండ్రు బత్తిదెజ్ ఆవిద్", ఇజి వారు విజేరె డటం గగోలాత్తార్.

23 ఈహె వారు గగోలాజి వరి సాల్ వెజ్ కిసి విసిర్ తారె దూల్లి అసి ఎగ్రిస్తార్.

24 అయావలె 'పవులుజ్ బారిగోడె లోఇ తగ్ అ' ఇజి రోమ సయ్ నమది పెరి అతికారి ఆడ్ర సిత్తాన్. లోకు పవులు ముస్కు ఎండనిజ్ ఈహు కోపం ఆతారె గగోల్ ఆతార్ ఇజి నెన్ని వందిజ్ పవులుజ్ కొర్దాన్ డెయ్ దెజ్ అయి అతికారి ఆడ్ర సిత్తాన్.

25 గాని పవులు డెయ్ డెయ్ తోహ్నిజ్ పవులు వన్ని డగ్రు మహి సదాతిపతివెట ఈహు వెన్ బాతాన్, "రోమదిజ్ అక్కు మన్నికాన్ ఆతి ఒరెన్ వన్నిజ్ తీర్పు సివిండ్రె కొరెడెదాన్ డెయ్ రోమ రూలుజ్ వజ మిజి అతికారం మనాదా?".

26 అయి సతాతిపతి యాక వెహండ్రె రోమ సయ్ నమది పెరి అతికారిబాన్ సొహండ్రె ఈహు వెహ్ని. "నీను ఇనిక కిదెజ్ సుడెంతి? వీండ్రు రోమదిజ్ అక్కు మన్నికాన్", ఇజి వెహ్ని.

27 అయావలె అయి పెరి అతికారి పవులుబాన్ వాతండ్రె, "నీను రోమదిజ్ అక్కు మన్నికిదెనా?", ఇజి వెన్ బాతాన్. "ఒబ", పవులు ఇహాన్.

28 దన్నిజ్ అయి పెరి అతికారి, "లావు డబ్బు సిత్తానె యా రోమది అక్కు నాను పొందిత", ఇహిజ్ పవులు, "నాను ఇహిజ పుట్టివలెహెనె రోమదిజ్ అక్కు మన్నికాన్" ఇహాన్.

29 అందెజె పవులు వెట డటిసి వెహ్నిజ్ వాతికార్ వెటనె వన్నిజ్ డిస్త సితార్. రోమదిజ్ అక్కు మన్ని వన్నిజ్ గొలుస్కాణిజ్ తోహ్ పిస్త మహ ఇజి నెసి అయి రోమ సయ్ నమది పెరి అతికారి తియెలాతాన్.

### పవులు యూద పెద్దెల్ జి నడిమి వర్గిజనాన్

30 మహ్నా నాండిజ్, పవులు ముస్కు యూదురు ఇని నేరం మొప్పారొ ఇజి నెస్తెజ్ అయి రోమ పెరి అతికారి ఆస ఆతాన్. అందెజె పవులు డిబిస్తాన్. పెరి పుజేరిజ్ ని సంహద్రి సజ్ మదిజ్ కూక్ పిస్తాండ్రె 'మీటిజ్ కినాట్' ఇజి ఆడ్ర సిత్తాన్. వారు కూడెజి వాతివలె పవులుజ్ వరి ముందాల నిల్ ప్తాన్.

## 23

1 పవులు సంహద్రి సజమ్దివరిజ్ తినాజ్ నుడఃజి ఈహు వెహ్తాన్, “తంబెరిజాండె, గడిఃస్తి సొహి దినమ్కు విజు నాను దేవుణు ఎద్దు నా గర్బం గదిన్ ఏండ మహా”.

2 అయావలె విజేరె పుజేరిజి ముస్సు పెరి పుజేరి ఆతి అననియ పవులు డగ్రు నిల్పిమహివరివెట, “వన్ని వెయ్దు డెయ్ అ”, ఇజి ఆడ్ర సిత్తాన్.

3 దన్నిజ్ పవులు, “నీను తెలాజ్ దూల్లి రాస్తి గోడ్జి\* నన్నికి. దేవుణు నిజి డెయ్ నానె. మోసె సిత్తి రూలుజ్ తగితివజి నజి తీర్పు కిదెజ్ నీను బస్తిమన్ని. గాని మోసె సిత్తి రూలుదిజ్ తగ్ ఏండ నజి డెయ్ డెజ్ ఆడ్ర సీజినిదా?”, ఇహాన్.

4 పవులుడగ్రు నిహికార్, “నీను దేవుణు పెరి పుజేరిదిజ్ దుసలాడిజినిదా?”, ఇహాన్.

5 దన్నిజ్ పవులు, “తంబెరిజాండె, వాండ్రు విజేరె పుజేరిజి ముస్సు పెరి పుజేరి ఇజి నాను నెన్ ఏత. మీ లోకాజ్ ఏలుబడిః కినివరిజ్ దుసలాడిజినిక ఆవద్ ఇజి దేవుణు మాటదు రాస్త మనాద్ గదె”, ఇహాన్.

6 యూద పెద్దెల్జి పెరి సజమ్ లోక సెగొండార్ పరిసయరు, సెగొండార్ సదుకయరు ఇజి పవులు నెస్తాన్. నెస్తాండ్రె వెనుక పవులు డటం వెహ్తాన్, “తంబెరిజాండె, నానుబా పరిసయ వాండ్రునె, పరిసయ వన్నిజ్ పుట్టికాన్. దేవుణు సాతివరిజ్ నిక్నాన్ ఇజి నాను నమ్మిజిన. అక్క నాను ఎద్దు నుడఃజి మంజిన. దన్నివందిజ్ నాముస్సు తప్పు మొప్పి తీర్పు కిజినార్”.

7 పవులు యాక వెహ్తావలె పరిసయరుజి సదుకయరుజి నడిఃమి గొడఃబ పుట్టాద్. గొడఃబ పుట్టాదె వారు రుండి జటుజ్ ఆతార్.

8 (ఎందానిజ్ ఇహిజి సాతికార్ మర్జి బత్తిఎర్, దూతార్ సిల్లు, దెయమ్కు సిలు ఇజి సదుకయరు వెహ్తాన్. పరిసయరు ఇహిజి అక్కెజ్ విజు మన్నె ఇజి వెహ్తాన్).

9 అయావలె అబ్బె గొప్ప గగోల్ ఆతాద్. పరిసయరులోక సెగొండార్ దేవుణు మోసెజ్ సిత్తి రూలుజ్ నెస్పిసినికార్ నిజిత్తారె, “మాపు నుడఃతిజ్, యా లోకు ముస్సు ఇని తప్పుబా తోర్ ఏద్. ఒరెన్ దూత గాని ఉండ్రె తోర్డెజ్ అట్ ఇకాద్ గాని వన్నివెట వర్గితాద్ ను, ఇజి గొడఃబెజ్ ఆతార్.

10 వరి లోక గొడఃబ లావాత్తిజ్ వారు పవులు కిన్న విసిర్వారెను ఇజి తియెలాతాండ్రె అయ రోమ సయనమ్ది పెరి అతికారి సయనమ్ది వరిజ్ పొక్తాండ్రె పవులుజ్ వరి నడిఃమిహాన్ లాగ్ బారిగొడః లోక తత్తెజ్ ఆడ్ర సిత్తాన్.

11 ఆ పొదొయ్ ప్రబు పవులు తోరె ఆతండ్రె, “దయరం ముస్సు మన్ అ. నీను యెరూసలేమ్దు నావందిజ్ ఎలాగ సాసి వెహ్తాదొ అయావజనె రోమ పట్టుమ్దుబా సాసి వెహ్ అ”, ఇజి వెహ్తాన్.

### పవులు సప్తెజ్ యూదురు కుట్ర కిత్తార్

12 మర్చ నాండిజ్ పెందల సెగొండార్ యూదురు కూడిఃతారె, ‘మాటు పవులు సప్ ఏండ ఉండెజ్ తిండ్రెజ్ ఆవద్’ ఇజి ఒట్టు కితారె పవులు సప్తెజ్ ఇజి పూర్తి తెగిస్తార్.

13 పవులుజ్ సప్తెజ్ అలోసనం కిత్తికార్ నల్ పయ్ ముస్సు మొగావారు మహాన్.

14 వారు పెరి పుజేరిజిబాన్ పెద్దెలుజిబాన్ సాహారె వెహ్తార్, “మాపు పవులుజ్ సప్ ఏండ ఇనికబా తిన్ ఏప్ ఉణ్ ఏప్, ఇజి గటిజి ఒట్టు కిత మహాప్.

15 అందెజె మీరు, సంహద్రి సజమ్దికార్ విజేరె కూడఃజి రోమ సయనమ్ది పెరి అతికారి వన్నిజ్ కబ్బు పొక్ అ. అక్క ఇనిక ఇహిజి, పవులు మరి మాబాన్ రపెన్ ఇండ్రు. వన్నివెట మరి వర్గిజి వన్ని వందిజ్ మాపు విజు నెస్తెజ్ ఇజి నాటిస్నాట్. వాండ్రు ఇబ్బె అంది ఏండనె మాపు వన్నిజ్ సప్తెజ్ తయారాజి మనాప్”.

16 గాని పవులుజ్ బణిజి అతికాన్ యాక నెస్తాండ్రె సెల్వు లొస్తాండ్రె బారిగొడః లోక సొస్సి పవులుజ్ వెహ్తాన్.

17 అయావలె పవులు సదాతిపతిలోక ఒరెన్ వన్నిజ్ కూక్తాండ్రె, “యా దజ్ డెజ్ రోమ సయనమ్ది పెరి అతికారిబాన్ ఒ. పెరి అతికారి వెట వన్నిజ్ ఉండ్రె మాట వెహ్తాజ్ మనాద్” ఇహాన్.

18 వెహ్తాజ్ అయ సతాతిపతి అయ దజ్ డెజ్ పెరి అతికారిబాన్ ఒతాన్. ఒతండ్రె, “జెలిదు మన్ని పవులు నజి కూక్తాండ్రె యా దజ్ డెజ్ మీబాన్ ఒతెజ్ ఇజి వెహ్తాన్. యా దజ్ డెజ్ మీ వెట ఇనికాదొ వెహ్తాన్”, ఇజి వెహ్తాన్.

19 అయ పెరి అతికారి అయ దజ్ డెజ్ కీదు అస్తాండ్రె ఉండ్రె పడఃకాద్ ఒతాన్. “నా వెట వెహ్తాజ్ ఇని మాట మనాద్?”, ఇజి వన్నిజ్ వెన్ బాతాన్.

20 వెన్ బాతిజ్ అయా దజ్ డెజ్ యెన్, “విగెహిజ్ పవులుజ్ సంహద్రి సజం నడిఃమి తసి వన్ని వందిజ్ మరి నెస్తెజ్ ఇజి నాటిసి వన్నివెట మరి వర్గిదెజ్ నీబాన్ సెలవ లొస్తెజ్ ఇజి యూదురు ఒప్పుకోట మనార్.

\* 23:3 23:3 పవులు కోపమాజి వెహ్తా మాటెజ్

21 గాని నీను వరిజ్ సరి సీమ. ఎందానిజ్ ఇహిజ నలవయ్ మణిసిరిజ్ ముస్సు. మొగావారు, పవులు నప్ ఏండ మాటు ఉండెజ్ తిండెజ్ ఆవిద్ ఇజి ఒట్టు కితారె వన్ని వందిజ్ సరిదు సుడెజినార్. వారు వన్నిజ్ సప్తెజ్ తయారాత మనార్. మీమాటదిజ్ కాప్ కిజినార్” ఇహాన్.

22 యాక వెహొండ్రె అయ పెరి అతికారి, “నీను నజీ యాక వెహొ ఇజి ఎయెజ్ బా వెహొ”, ఇజి గటిజ వెహొండ్రె అయ దజడాయెనుజ్ పోక్తాన్.

23 వెనుక అయ పెరి అతికారి సదాతిపతిర్ లొఇ రిఎరిజ్ కూక్తాండ్రె, “యా పొదొయ్ తొమ్మిది గంటెజ కయ్ సరియ దాక సొండ్రెజ్ తయార్ ఆదు. రుండి వందెజ్ సయ్యుమ్ దికార్, డబయ్ మణిసిరి గుర్రమ్ దాన్ సొని సయ్ నమ్ దికార్, రుండి వందెజ్ బల్లెమ్ కు అస్తికార్ సొండ్రెజ్ వలె.

24 పవులుజ్ ఎకిసి ఒతెజ్ గుర్రమ్ కు సీదు. వన్నిజ్ గవర్నరు ఆతి పేలిక్కుబాన్ ఇని ప్రమాదం రెఏండ ఒతెజ్”, ఇజి వెహొన్.

25 అయ పెరి అతికారి ఈహె ఉండ్రె ఉత్రం రాస్తాన్,

26 “క్లవుదియ లూసియ ఆతి నాను గొప్ప పేరు మన్ని పేలిక్కు గవర్నరిజ్ వందనమ్ కు వెహొన్.

27 విన్నిజ్ యూదురు అస్తారె సప్తెజ్ సుడెతిజ్ నాను నా సయ్ నమ్ దివరివెట వాతానె విన్నిజ్ గెల్ పిస్త. ఎందనిజ్ ఇహిజ వీండ్రు రోమ దిజ్ అక్కు మన్నికాన్ ఇజి నాను నెస్త.

28 విని ముస్సు యూదురు ఎందనిజ్ నేరం మొప్పినార్ ఇజి నెస్తెజ్ నాను విన్నిజ్ యూదురి సంహద్రి సజమి నడిమి ఒత.

29 ఒతిజ్, యూదురి రూలుజలొఇ మన్ని ఇనికెజొ వందిజ్ వారు విన్నిజ్ నేరం మొప్తార్ గాని, సప్తెజ్ నొ, జెలిదు పోక్తెజ్ నొ తగితి తపుజ్ తోర్ ఉతె.

30 విన్నిజ్ సప్తెజ్ ఇజి యూదురు కుట్ర కిజినార్ ఇజి నాను నెస్తానె వెటనె విన్నిజ్ నీబాన్ పోక్కిన. విని ముస్సు నేరం మొప్తికార్ బా నీబాన్ వాజి వన్ని ముస్సు మన్ని నేరమ్ కు విజు వెహొజ్ నాను వరిజ్ ఆడ్ర సిత్త”.

31 అయ రోమ సయ్ నమ్ ది పెరి అతికారి ఆడ్ర సిత్తిలెకెండ్రె సయ్ నమ్ దికార్ పవులు ఆ పొదొయ్ నె అంతిపత్రి ఇని పట్టుమ్ దాక కూక్త ఒతార్.

32 మహ్సా నాండిజ్ వారు పవులు గుర్రమ్ కు అస్తి సయ్ నమ్ ది - వరివెట పోక్తారె మహికార్ మర్జి వాతార్.

33 వారు కయ్ సరియదు అందితిజ్ అతికారి పోక్తి ఉత్రం గవర్నరిజ్ సితార్. పవులుజ్ బా గవర్నరుబాన్ ఒపజెప్తార్.

34-35 గవర్నరు అయ ఉత్రం సద్ వితాండ్రె పవులు వెట, “నీను ఎమేణి ప్రాంతమ్ దికి”, ఇజి వెన్ బాతాన్. “కిలికియ దికాన్”, ఇజి వెహొజ్, “నీ ముస్సు నేరం మొప్తికార్ వానివలె నీ సజతి సూణ ఇజి వెహొన్. పవులు హేరోదు రాజు పెరి ఇండ్రొ ఇడెజి కాప్ కిజి మండ్రెజ్ ఆడ్ర సిత్తాన్.

## 24

### పేలిక్కు గవర్నరుబాన్ పవులు నిల్సినాన్

1 అయ్ దు రోస్సు సాహిజ్ విజేరి పుజేరిజ ముస్సు పెరి పుజేరి ఆతి అననియ, వన్నివెట సెగొండార్ యూద పెద్దెలుజు, తెర్తుల ఇని ఒరెన్ తగ్గు వర్గినికాన్, డిగు మన్ని కయ్ సరియదు వాతార్. వాతారె పేలిక్కు గవర్నరుబాన్, పవులు వందిజ్ మొప్తి నేరమ్ కు వెహొన్.

2-3 పవులుజ్ కూక్కిసి కోర్టుదు నిల్ ప్తాన్. అయావలె తెర్తుల ఇని తగ్గు వర్గినికాన్ పవులు వందిజ్ ఈహె నేరం మొప్తెజ్ మొదొల్ స్తాన్, “పెరి పేరు మన్ని గవర్నరు ఆతి పేలిక్కు, నీను నండొ కాలం ఏలుబడిః కిజినిజ్ మాపు సమదానమ్ దాన్ మంజి - నాప్. మా జాతివందిజ్ మీరు బాగ కిత్తిజ్ మజి నెగ్రెండ బత్తిదెజ్ అప్ సరం ఆతికెజ్ విజు మన్నె. మాపు విజెపె మీరు కిత్తి యా నెగ్గి పణిదిజ్ ఒప్పుకోడెజి నిజి వందనమ్ కు వెహొనాప్.

4 గాని నాను నీ పణిదిజ్ అడ్డు కిఏండ, మాపు ఎందానిజ్ మీబాన్ వాతాపొ అయ సజతి వందిజ్ వర్గిన. దయ కిజి వెన్ అ.

5 యా పవులు గొప్ప గొడెబ కినికాన్. లోకం విజు యూదురి నడిమి గొడెబెజ్ రేప్పికాన్. వీండ్రు సజరేతుది జటుదిజ్ నెయ్యి. యాక విజు మాపు నెసినాప్.

6-7 విండ్రు యెరూసలేమ్ దు మన్ని దేవుణు గుడిదిజ్ మయ్లు కిదెజ్ బా సుడెతాన్. అందెజె మాపు విన్నిజ్ అస్తాప్. గాని రోమ సయ్ నమ్ ది పెరి అతికారి లూసియ వాతండ్రె మాబాణిజ్ విన్నిజ్ లాగితాన్.

8 నీను విన్నిజ్ వెన్ బాఅ. మాపు విన్నివందిజ్ వెహొకెజ్ విజు నిజమె ఇజి నిజి నెస్తెజ్ ఆనాద్”.

9 తెర్తుల వెహొ మాటెజ్ విజు నిజం ఇజి బానె వాతిమహి యూదురుబా ఒప్పుకోటార్.

10 పవులు వర్గదెజ్ గవర్నరు సయన కిత్తిజ్ పవులు వర్గదెజ్ మొదొల్స్తాన్, “గవర్నర్ ఆతి పేలిక్కు, నీను నండొ పంటెజ్ యా యూదురి లోకాజ్ నెగ్రెండ ఏలుబడిః కిజిమహి. అందెజె నాను దయ్ రమ్దాన్ వెహ్సాన్.

11 నాను యెరూసలేమ్దు దేవుణు గుడిఃదు పార్దనం కిదెజ్ సోహిజ్ ఏలు పనెండు రోస్సునె ఆతె ఇజి విరిజ్ వెన్బాతిజి నీను నెస్సి.

12 దేవుణు గుడిః లోఇబా, యూదురి మీటిజ్ ఇండ్రోబా, పట్టుమ్దుబా నాను ఎయెన్ వెటబా లోకురిజ్ నెక్తి పొక్తిక, జటు కిజి రేప్పిక, ఇనికబా యూదురు సుడఃవితార్.

13 ఏలు నావందిజ్ వీరు వెహ్సాకెజ్ నిజం ఇజి రుజుప్ కిదెజ్ వీరు అట్వర్.

14 గాని నాను ఉండ్రీ నిజం మాట వెహ్సా. అక్క ఇనిక ఇహిజ. నిజం ఆవద్ ఇజి వీరు వెహ్సాని బోదవజి నాను నడిఃజిన. ఆహె నడిఃజి దేవుణు మోసెజ్ సిత్తి రూలుజ్ వజి విజు, ప్రవక్తరు రాస్తికెజ్ విజు నాను నమ్మిజి మా అనిగొగొర్ పొగ్డిఃజి మాడిఃస్తి దేవుణుదిజ్ పార్దనం కిజిన.

15 వీరు నమ్మినివజి నెగ్గికార్, సెఇకార్ విజేరె సాతి వరిబాణిజ్ మర్జి నిజ్నార్ ఇజి నానుబా దేవుణుదిజ్ నమ్మిజి ఆసదాన్ ఎద్రు సుడఃజిన.

16 అందెజె నాను, దేవుణు ఎద్రుగాని, లోకుర్ ఎద్రుగాని నా గర్బం గదెన్ఏండ మండ్రెజ్ సుడఃజిన.

17 సెగం పంటెజ్ సోహి వెనుక ఏలు నాను నా సొంత జాతిజ్ సాయం కిదెజ్, దేవుణు గుడిఃదు పూజ కిదెజ్ యెరూసలేమ్దు వాత్.

18-19 దిన్ని వందిజ్ నాను దేవుణు గుడిఃదు సోహిమహిజ్, సుబ్బరం ఆతి వెనుకానె యూదురు నజి బాన్ సుడఃజాన్. అయావలె నావెట మంద లోకుర్ ఎయెర్ సిల్లెజాన్. ఇని గొడఃబ జర్గివితాద్. గాని నాను బాన్ మహివలె ఆసియ దేసెమ్దాన్ వాతిమహి సెగెండార్ యూదురు, బాన్ మహారె నా ముస్సు గొడఃబ ఆతార్. నా ముస్సు వరిజ్ ఇని నేరం మహిజి వారె వాజి నీ వెట వర్గదెజ్.

20 సిలిజి నాను సంహద్రి సజమ్దు వర్గిజి మహిజ్ ఇని తప్పు వర్గిత ఇజి వీరు వెహిర్.

21 గాని ఉండ్రీ మాట నాను వెహ్సా. అక్క ఇనిక ఇహిజ, సాతి లోకుర్ మర్జి బత్కినార్ ఇజి నమ్మినివందిజ్ మీరు నేండ్రు నజి తీర్పు కిజినిదెర్ ఇజి నాను బానె డటం వెహ్సా మహా”.

22 పవులు వెహ్సా బోదవందిజ్ గవర్నరాతి పేలిక్కు నెగ్రెండ్ర నెస్త మహాన్. అందెజె వాండ్రు, “రోమ సయనమ్ది పెరి అతికారి ఆతి లూసియ వానివలె తీర్మానం కిన”, ఇజి వెహ్సాండ్రె అయ సద్రు మీటిజ్ ముగిస్తాన్.

23 వెనుక పవులు జేలిదు ఇడఃజి వన్నిజ్ కాపు ఇడఃదెజ్ సదాతిపతిజ్ ఆడ్ర సిత్తాన్. వన్ని లోకుర్ వాజి వన్నిజ్ సుడఃజి వన్నిజ్ సాయం కిదెజ్ అడ్డు కిమాట్ ఇజి ఆడ్ర సిత్తాండ్రె వన్నిజ్ కండెక్ సరి సిత్తాన్.

24 సెగం రోస్సు సోహిజ్ పేలిక్కు వన్ని ఆల్ని ఆతి ద్రుసిలవెట వాతాన్. అది యూదురి అయ్లి కొడః. పేలిక్కు పవులుజ్ కూక్పిస్తాన్. యేసు క్రీస్తు ముస్సు మన్ని నమకంవందిజ్ పవులు వెహ్సాకెజ్ వెంజి మహాన్.

25 గాని పవులు సరియాతి పణి కిని వందిజ్, మన్సుదిజ్ అణసె ఆజి ఇడ్డివందిజ్, దేవుణు, లోకుర్ ముస్సు కిని తీర్పువందిజ్ గటిజి వర్గితిజ్ పేలిక్కు తియెలాతాండ్రె, “ఆనె, ఏలు సోన్అ. మరి ఒర్పు టయం మహివలె కూక్పిన్సు”, ఇజి వెహ్సాండ్రె పోక్తాన్.

26 పవులు నజి డబ్బు సీనాన్సు ఇజిబా పేలిక్కు ఒడిఃఒడిఃబితాన్. అందెజె పవులు మాట మాటదిజ్ కూక్పిస్తాండ్రె వన్నివెట వర్గితాన్.

27 రుండి పంటెజ్ సోహిజ్, పేలిక్కు వెనుక పోర్కియు పెస్తు ఇనికాన్ గవర్నరు ఆతాన్. పేలిక్కు యూదురిజ్ సర్ద కిబిస్తెజ్ పవులుజ్ జెలిదునె ఇట్టాన్.

## 25

పవులు పెస్తు ఎద్రు నిల్సాన్.

1 పోర్కియు పెస్తు అయ ప్రాంతమ్దిజ్ గవర్నరు ఆజి మూండ్రీ రోస్సు సోహిజ్ వాండ్రు కయ్సరియాదాన్ ఎక్కి యెరూసలేమ్దు సోహాన్.

2 బానె పెరి పుజేరిజు యూదురి పెద్దెలుజు పవులు ముస్సు మహి తప్పుజవందిజ్ గవర్నరుజ్ వెహ్సార్.

3 “దయ కిజి పవులు యెరూసలేమ్దు పోక్అ”, ఇజి వారు గవర్నరుబాన్ నండొ సుట్సు బతిమాలితార్. ఎందానిజ్ ఇహిజ పవులుజ్ సర్దు సప్పాప్ ఇజి వారు కుట్ట కిజి మహార్.

4 గాని గవర్నరు, “పవులు కయ్సరియాదు కాప్ ఇట్టా మనాద్. నాను వెటనె బానె సొన్నిన.



5 అందెజె మీలో ఇ మన్ని పెరిలోకుర్ నావెట బానె సొండ్రెజ్. పవులు ముస్కు ఇని తప్పుబా మహిజ వీరు కోర్టుదు నేరమ్కు తోరిస్తెజ్ ఆనాద్” ఇహాన్.

6 గవర్నరు వరివెట ఎనిమిది నో పది రోస్కు నో మహి వెనుక, డిఃగు కయ్ సరియాదు సొహాన్. మహ్నా నాండిజ్ కోర్టుదు సొహాండ్రె తీర్పు కిదెజ్ ఇజి, తీర్పు కినిబాన్ బస్తాన్. ‘పవులు కోర్టుదు తగాట్’ ఇజి ఆడ్ర సిత్తాన్.

7 పవులు వాతిజ్ యెరూసలేమ్ దాన్ డిఃగు వాతి యూదురు వన్ని నుటులం నిహారె వన్ని ముస్కు నండ్రె రకమ్ ది బల్మి ఆతి తప్పుజ్ మొప్తార్ గాని అక్కెజ్ నిజం ఇజి రుజుప్ కిదెజ్ వారు అట్ ఎతార్.

8 పవులు, “నాను యూదురు రూలుజ్ వందిజ్ గాని, యెరూసలేమ్ దు మన్ని దేవుణు - గుడిఃవందిజ్ గాని, రోమ దేసెమ్ దిజ్ ఏలుబడిః కిని కయ్ సరువందిజ్ గాని ఇని తప్పుబా కివిత”, ఇజి వన్ని వందిజ్ వాండ్రె వెప్తాన్.

9 నాను నెగ్గికాన్ ఇజి యూదురు ఒడిఃబిదెజ్ ఇజి గవర్నరు సుడఃతాన్. అందెజె వాండ్రు పవులు వెట వెన్ బాతాన్, “యెరూసలేమ్ దు సొన్ని బానె నీ వందిజ్ వీరు వెహ్పికెజ్ నిజమ్ నో అబద్దమ్ నో ఇజి నాను తీర్పు కిదెజ్ నీను బప్పుకోడఃజినిదా?”.

10 దన్నిజ్ పవులు, “రోమ రాజు ఆతి కయ్ సరుది కోర్టుదు నిల్పిన. యా కోర్టుదునె నజి తీర్పు కిదెజ్. యూదురిజ్ ఇని తప్పుబా నాను కివిత. అక్క నీను నెగ్రెండ నెస్సిగదె.

11 నాను ఇని రూలుదిజ్ బా తప్పిజ, సొపుదిజ్ తగితి పణి కిత ఇహిజ, సిక్కుదాన్ తప్పె ఆదెజ్ నాను సుడఃఏ. గాని నా ముస్కు వీరు వెహ్పికెజ్ నిజం ఆడ ఇహిజ నజి వరిజ్ ఒవజెప్పెజ్ ఎయెరిజ్ బా అక్క సిల్లెద్. నాను రోమ పెరి రాజు ఆతి కయ్ సరుబాన్ సొండ్రెజ్ ఆజిన”, ఇహాన్.

12 అయావలె గవర్నరు వన్నివెట మహి లోకుర్ వెట వర్గితాండ్రె పవులుజ్, “నీను కయ్ సరుబాన్ సొన్ని వెప్తాజ్ ఇజి వెప్తా. అందెజె కయ్ సరుబానె సొన్ అ”, ఇహాన్.

### పెస్తు అగ్రిప రాజు వెట పవులు వందిజ్ వెహ్పినాన్

13 సెగం రోస్కు సొహి వెనుక రాజు ఆతి అగ్రిప \* వన్ని తజిసి ఆతి బెర్నికయువెట కొత్త గవర్నరు ఆతి పోర్కియు పెస్తుజ్ మాడిఃస్తెజ్ కయ్ సరియాదు వాతార్

14 వారు పెస్తువెట నండ్రె రోస్కు మహార్. మహిజ్ పెస్తు పవులు వందిజ్ రాజు వెట వర్గితాన్, “గవర్నరు ఆతి పేలిక్కు పవులు ఇని ఒరెన్ వన్నిజ్ జెలిదు ఇడిఃస్తాన్.

15 నాను యెరూసలేమ్ దు సొహివలె, యూదురి పెరి పుజేరిజు, పెద్దెలుజు విని ముస్కు నేరమ్కు మొప్తారె సిక్కుసి అ ఇహార్.

16 దన్నిజ్ నాను వరివెట వెప్తా, ‘రోమ అలవాటు ఇహిజ, నిందెజ్ మొప్పికార్ ఎయెన్ ముస్కు తప్పు మొప్పారో, వాండ్రు వాజి వరి నడిఃమి వన్ని వందిజ్ వర్గిదెజ్ అవకాసం సివీండ ముందాల్పై తీర్పు కిదెజ్ ఆవద్’ ఇజి.

17 అందెజె వారు నావెట ఇబ్బె వాతివలె నాను ఆల్సెం ఆవీండ మర్చనాండిజ్ నె సద్దు కూడఃప్తానె పవులు నాముందాల తప్పిస్త.

18 నేరమ్కు మొప్పికార్ నిహివలె నాను ఒడిఃబిత్తిలెకెండ వారు నేరమ్కు లోః ఉండ్రె నేరంబా వన్ని ముస్కు మొవ్ ఏతార్.

19 ఇహిజ, వరి మతం వందిజ్, సాతి సొహి యెసు ఇని ఒరెన్ వందిజ్ పవులు వెట గొడఃబ ఆతికాదె తోరితాద్. పవులు ఇహిజ యెసు బత్కిజినాన్ ఇజి వెహ్పినాన్.

20 యా సజతి వందిజ్ మరి ఇనిక కిదెజ్ ఇజి నెన్ ఏండాతానె నాను పవులు వెట, ‘నీను యెరూసలేమ్ దు సొన్ని బానె దిన్ని వందిజ్ తీర్పు తీరిసె ఆదెజ్ మన్ను ఆజినిదా?’, ఇజి వెన్ బాత.

21 గాని పవులు, ‘రోమ రాజు ఆతి కయ్ సరు నజి తీర్పు కిదెజ్’ ఇజి వెప్తాజ్ నాను వన్నిజ్ కయ్ సరుబాన్ పోక్నేండ ఇబ్బె జెలిదునె ఇడ్ దెజ్ ఆడ్ర సిత్తాన్”.

22 అగ్రిప రాజు పెస్తువెట, “అయ పవులు వెహ్పికెజ్ వెండ్రెజ్ నాను ఇస్టమాజిన” ఇహిజ్, “విగెహిజ్ నీను వెండ్రెజ్ ఆనాద్”, ఇహాన్.

### పవులు అగ్రిప రాజు ఎద్దు నిల్పినాన్

23 మహ్నా నాండిజ్ అగ్రిప రాజుని, వన్ని తజిసి ఆతి బెర్నికయు రాజు వర్గిని అతికారం ఇండ్రె వాతార్. వారు ఎసా గొప్ప పెరికార్ ఇజి తోరిసి కర్చు ఆతి రాజురి సొక్కెజ్ ఇట్ కిజి, బజారం, వెండి ఇడ్కిజి రోమ సయ్ నమ్ ది పెరి అతికారి లోకుర్

\* 25:13 25:13 యూదయదేసెమ్ దిజ్ ఎక్కు మన్ని ప్రాంతమ్ కాజ్ వీండ్రు రాజు

వెట, పట్టుమీది ముకెలమతివరివెట వాతార. వాతారె పవులుజ్ తగఅ ఇజి పెస్తు ఆడ్ర సిత్తిజ్ జమానుజ్ సాహారె పవులుజ్ వరి నడిమి తతార.

24 అయావలె పెస్తు వెహ్హాన్, “అగ్రిప రాజు, మాబాన్ కూడఃజి వాతిమహి విజు లోకాండె, మీరు యా పవులు సుడఃజినిదెర్. యెరూసలేమ్దు మరి ఇబ్బెబా యూదురు విజేరె వీండ్రు బత్కినిక ఆవద్ ఇజి గగోలాత్తారె నావెట పిరాడ్ కిత్తార.

25 గాని సావుదిజ్ తగితిక ఇనికబా వీండ్రు కివెతాన్ ఇజి నాను నెస్తానె రోమ రాజుబాన్ సాండ్రెజ్ వీండ్రు వెహ్హిజ్ రోమ రాజుబాన్ సాన్ని తీర్పు ఆపిద్ ఇజి నాను తీర్మానం కిత.

26 గాని నాను రోమ రాజుజ్ విన్నివందిజ్ ఇనిక రాస్తి పోక్తెజ్ ఇజి తోరవిత. తీర్పు కిదెజ్ తగితిక ఇనికబా విని ముస్సు, సిల్లెద్. అందెజె మీరు విజెరి నడిమిని, అగ్రిప రాజు, నీ నడిమిబా విన్నిజ్ తత్త మన్న. మాపు విన్నివెట వర్గితివెనుక ఇనికబా రాస్టెజ్ నెస్సాను.

27 తొప్పి అసి తీర్పు కిదెజ్ పోక్తివన్నిముస్సు ఇని నింద మోపు మనాద్ ఇజి వెహ్హావండ వన్నిజ్ కయసరుబాన్ పోక్తెజ్ ఆవద్ ఇజి నాను నెస్సాన్”.

## 26

1 అగ్రిప రాజు పవులుజ్ సుడఃజి, “ఏలు నీ వందిజ్ వర్గిదెజ్ నాను సరి సీజిన”, ఇజి వెహ్హాన్. అయావలె పవులు కియు సాప్తాండ్రె వన్ని వందిజ్ వాండ్రె ముదాయి ఇజి మొదోల్స్తాన్,

2 “అగ్రిప రాజు, యూదురు నా ముస్సు మొప్పి నేరమ్కు నిజం ఆవద్ ఇజి నావందిజ్ నీ ఎద్రు వర్గిదెజ్ నాను గొప్ప సర్ద ఆజిన.

3 ఎందానిజ్ ఇహిజ యూదురి అలవాటుజ్ విజు వరి గొడఃబెజ్ విజు నీను బాగ నెసినికి. అందెజె దయ కిజి నా మాట ఓరిసి వెండ్రు.

4 ఇజిరివలెహాన్ అసి నాను ఎలాగ మహ ఇజి, నా సొంత లోకుర్ నడిమి, నా సొంత దేసమ్దు, యెరూసలేమ్దుబా, ఎలాగ బత్తిజి మహ ఇజి, యూదురు విజేరె బాగ నెసినార్.

5 మా మతమ్దు పరిసయిరి జటుదికార్ ఉండ్రె రూలుబా తవ్విండ నీతి నిజాతిదాన్ నడినార్. వరి లోఇ ఒరెన్వజ నాను బత్తిజి మహ ఇజి వారు నావందిజ్ సాసి వెహ్హెజ్ ఇహిజ, సాసి వెహ్హెజ్ అట్నార్. ఎందనిజ్ ఇహిజ, వారు మొదోహాన్ అసి నజి నెసినార్.

6 ఏలు ఇహిజ, దేవుణు మా అనిగొగొర్ వెట, సీనా ఇజి కిత్తి ఒట్టుదిజ్ ఎద్రుసుడఃజి మహిదన్నివందిజ్ నజి తీర్పు కిజినార్.

7 మా వన్నెండు తెగ్గదికార్ యా ఒట్టువందిజె ఎద్రు సుడఃజి దేవుణుదిజ్ రెయు పొగల్ డిస్విండ పార్దనం కిజి మంజినార్. ఓ రాజు, నానుబా ఆసదాన్ ఎద్రు సుడఃజి మంజినిదన్నివందిజె యూదురు నా ముస్సు నేరం మొప్పినార్.

8 సాతివరిజ్ దేవుణు నిక్సాన్ ఇజి నమ్మిదెజ్ మాపు అట్వె ఇజి మీరు ఎందనిజ్ వెప్పినిదెర్?

9 నజరేతుదికాన్ యేసువందిజ్ వెహ్హెమని విజు దన్నిజ్ నెక్కిపొక్తెజ్ నాను అట్టి పణి విజు కిదెజ్వలె ఇజి నానుబా ముందాల ఒడిబిజి మహ.

10 అయావజనె నాను యెరూసలేమ్దు కిత. పెరి పుజేరిజ్ నజి అతికారం సిత్తిజ్ నాను దేవుణుదిజ్ కేట ఆతి నండొండారిజ్ జెలిదు ఇట్టా. అక్కాదె ఆవిండ, వరిజ్ సప్తెజ్ తీర్మానం ఆతిజ్ ‘నానుబా ఒప్పుకోడఃజిన’, ఇజి వెహ్హా.

11 నాను నండొ సుట్టు యూదురి మీటిజ్ ఇల్కాజ్ ఇల్కాజ్ సాన్ని నమ్మితి వరిజ్ గొప్ప మాలెజ్ కిత. యేసు ముస్సు నమకం ఇడ్విప్ ఇజి వారు వెహ్హిదాక నాను బలవంతం కిత. అక్కాదె ఆవిండ వరి ముస్సు ఒదె కోపం ఆతానె, ఆఇ పట్టుమ్కాజ్బా సాహనె బాన్బా మాలెజ్ కిత”.

### పవులు ఎలాగ యేసుప్రబుజ్ నమ్మితికాన్ ఆతాన్ ఇజి వెప్పినాన్

12 “అహా నాను ఒర్పు, పెరి పుజేరిజు సిత్తి అతికారమ్దాన్ ఆడ్రదాన్ దమస్సు పట్టుమ్దు సాన్ని మహ.

13 ఓ రాజు, మదెనెం ఆతివలె సర్దు సాన్ని మహివలె, ఆగాసమ్దాన్ వాతి పెరి జాయ్ సుడఃత. అయ జాయ్ పొద్దు జాయ్ ఇంక పెరి జాయ్. అక్క నజి సుటులం, నావెట మహివరి సుటులం డెయ్తాద్.

14 మాపు విజెవె బూమిదు అర్థాప్. అయావలె, ‘సవులు, సవులు, నీను నజి ఎందానిజ్ మాలెజ్ కిజిని? ముల్లు డుడ్డుదాన్ గుతివలె మరీజ వెనుక గుసె ఆతిజ నండొ కస్తం తప్పిన్’, ఇజి అరామియ బాసాదు వెహ్హి మాట నాను వెహ్హా.

15 ‘నీను ఎయి, ప్రబు’, ఇజి నాను వెన్బాతిజ్, ‘నీను మాలెజ్ కిజిని యేసు నానె’ ఇజి ప్రబు నావెట వెహ్హాన్.

16 'ఏలు నిజ్జి నిల్అ. నాను ఎందనిజ్ నిజి తోరె ఆత ఇహిజ, నావందిజ్ పణి కిదెజ్, నావందిజ్ నేండ్రు సుడఃతికెజ్ విజెరిజ్ వెప్పి, వాని కాలమ్దు నాను నిజి తోరిస్సికెజ్ విజెరిజ్ వెప్పి నజి ఉండ్రి సాసివజ మండ్రెజ్ నిజి నాను ఏర్పాటు కిజిన.

17 ఇస్రాయేలు లోకాణిజ్ నిజి నాను గెల్పిస్సు. యూదురు ఆఇ లోకాణిజ్ గెల్పిస్సు. యూదురు ఆఇవరినడిఃమి నాను నిజి పోక్కు.

18 ఎందానిజ్ నిజి పోక్కిన ఇహిజ, వారు సీకటిదాన్ జాయ్దు వాజి వరి కణెకెజ్ తోరె ఆదెజ్. వరిజ్ సయ్తాన్ సత్తుహాన్ దేవుణు దరోట్ మహ్తాజ్. నా మున్సు నమకం ఇడఃజి, వరి పాపమ్కు నొరె ఆదెజ్. నావందిజ్ కేట ఆతి వరివెట కూడఃజి మండ్రెజ్. దిన్నివందిజె నిజి వరి నడిఃమి పోక్కిన' ఇజి ప్రబు నావెట వెహ్హాన్.

19 అందెజె ఓ అగ్రిప రాజు, నాను ఆగాసమ్దాన్ వాతి అయ మాటజ్ లోజిత్త.

20 లోజిత్తానె తొలిత దమన్సు. పట్టుమ్దు, వెనుక యెరూసలేం పట్టుమ్దు, మరి యూదయ ప్రాంతం విజు, యూదురు ఆఇ వరిజ్బా నెస్సిస్త. ఇనిక నెస్సిస్త ఇహిజ, విజెరె, పాపమ్కు డిఃసి దేవుణు దరోట్ మర్దు ఇజి. పాపమ్కు డిఃస్తిసత్తిదన్నిజ్ తగితిలెకెండ్ నెగ్గి పణిజ్ కిదు ఇజి.

21 నాను ఈహె నెన్పిస్తి దన్నివందిజె యూదురు నజి యెరూసలేమ్దు మన్ని దేవుణు గుడిఃదు సుడఃతారె నజి అస్తారె సప్తెజ్ సుడఃతార్.

22 గాని గడఃస్తి సోహి కాలం విజు దేవుణు నజి తోడః మహాన్. అందెజె నాను ఏలు ఇబ్బె నిల్పి తక్కువరివెట, పెరివరివెట నిజం వెప్పిన. వాని కాలమ్దు ఇనికెజ్ జర్గినెలె ఇజి ప్రవక్తరుని, మోసె వెప్తికెజె నానుబా వెప్పిన.

23 అక్కెజ్ ఇనికెజ్ ఇహిజ, క్రిస్తు నండో మాలెజ్ ఆజి సాతాన్. సాతి వరిబాణిజ్ తొలిత నిజ్నాన్. నిజ్జి, యూదురిజ్, యూదురుఆఇవరిజ్ దేవుణు - దరోట్ సాండ్రెజ్ జాయ్ తోరిస్సాన్”.

24 పవులు ఈహె, వన్ని వందిజ్ వర్గిజి మహిజ్ పెస్తు, “పవులు, నీను వెరి వాండ్రు. నండో నదు కిత్తిజ్ అక్క. నిజి వెరి కిబిసినాద్”, ఇజి డటం వెహ్హాన్.

25 దన్నిజ్ పవులు, “గొప్ప పెరికాన్ ఆతి పెస్తు, నాను వెరి వాండ్రు ఆవ. నాను నెగ్గిబుద్దిదానె నిజం వెప్పిన”, ఇహాన్.

26 “రాజు యా సజతిజ వందిజ్ నెసినాన్. అందెజె వన్నివెట దిన్ని వందిజ్ నాను అడ్డు సిల్లెండ వర్గిజిన. దిన్ని వందిజ్ ఇనికబా వన్నిజ్ డాజ్జి మనిక సిల్లెద్. ఎందనిజ్ ఇహిజ, జర్గితికెజ్ విజు ఉండ్రి మూల పడఃకాద్ జర్గివితాద్.

27 ఓ రాజు, ప్రవక్తరిమాటెజ్ నీను నమ్మిజిని ఇజి నాను నెస్సాన్”.

28 దన్నిజ్ రాజు, “నిస్సా సులువుదాన్ నజి క్రిస్తు లోకు కిదెజ్ ఇజి నీను నజి ఒపిసినిదా?”, ఇహాన్.

29 “సులువుదానొ అలస్యమ్దానొ నీను ఒరిదె ఆవ, నేండ్రు నజి వెంజినికార్ విజెరె నా వజ ఆదెజ్ ఇజి నాను దేవుణుదిజ్ పార్లనం కిజిన. గాని నా వజ గొల్స్కాణిజ్ తోహె ఆదెజ్ పార్లనం కివ”, ఇజి పవులు వెహ్హాన్.

30 అయావలె రాజు, గవర్నరు, బెర్నిక, వరివెట బస్తి మహికార్ విజెరె నిజిత్తార్.

31 వారు వెల్లి వాతారె, “వీండ్రు సావుదిజ్ గాని, తోహె ఆదెజ్ గాని తగితి పణి ఇనికబా కివితాన్”, ఇజి ఒరెన్ వెట ఒరెన్ వర్గితాన్.

32 “వీండ్రు ‘కయ్సరు రాజుబాన్ సాన’, ఇజి వెహ్విండ మహాన్ ఇహిజ విన్నిజ్ డిఃస్తిసత్తిక మరి”, ఇజి అగ్రిప రాజు పెస్తుజ్ వెహ్హాన్.

## 27

### పవులు ఓడః ఎక్కి రోమ పట్టుం సొన్నినాన్

1 మాపు ఓడః ఎక్కి ఇటలి దేసెం సాండ్రెజ్ ఇజి ఆడ్ర వాతిజ్, పవులుజ్, మరి జెలిదు మహి సెగొండారిజ్ యూలి ఇని సదాతివతిజ్ ఒవజెప్తార్. వాండ్రు రోమ సయ్నమ్లోఇ ఉండ్రి గుంపు ఆతి అవ్గుస్తు ఇని గుంపుదికాన్.

2 మాపు అద్దమత్తియదాన్ వాతి ఉండ్రి ఓడః ఎక్తాపె పయ్నం ఆతావ్. యా ఓడః ఆసియ ప్రాంతమ్దు సమ్దరం డగ్రు మహి పట్టుమ్కాజ్ సొనిక. దెసలోనిక పట్టుమ్దాన్ ఒరెన్ మసిదోని దేసెమ్దికాన్ అరిస్తర్కు ఇనికాన్ మావెట మహాన్.

3 మహ్నా నాండిజ్ సీదోను ఇనిబాన్ వాతావ్. సతాతిపతి ఆతి యూలి పవులు మున్సు. దయ తోరిస్తాండ్రె పవులు వన్ని కుాలబాబుర్బాన్ సొన్ని వారు వన్నిజ్ నెగ్గెండ సుడఃదెజ్ సెల్వ సిత్తాన్.

4 వెనుక బాణిజ్ సోతాపె కుప్ర ఇని ద్వీపు ఓరమ్దాన్ గాలి తక్కు మహి బాడ్డిదు పయ్నం ఆతావ్. ఎందానిజ్ ఇహిజ ద్వీపుదాన్ గొప్ప గాలి సమ్దరం దరోట్ డెయ్జి మహాద్.

5 వెనుక మాపు కిలికియ, పంపులియ ఇని ప్రాంతమ్కాజ్ డగ్రు మహి సమ్దరం డాట్టాపె లుకియాదు మన్ని మూర ఇని పట్టమ్దు వాతాప్.

6 బానె అలెక్సాండ్రీయదాన్ వాతి ఉండ్రీ ఓడః ఇటలి పట్టుం సాండ్రెజ్ తయారాత మనాద్ ఇజి రోమ సతాతిపతి సుడఃతాన్. సుడఃతండ్రె మజీ అయ ఓడఃదు ఎకిస్తాన్.

7 మాపు నండ్రో రోస్కు మెలేక పయనం కిత్తాపె గాలివందిజ్ మాలెజ్ ఆతాపె క్షీదు ఇని ద్వీపుదిజ్ ఎద్రు వాతాప్. గాలి మజీ ఎద్రు డెయ్తిజ్ అయా సరి మరి సాండ్రెజ్ అట్ఎతాప్. అందెజె మాపు గాలి తక్కు డెయ్తిమహి బాడ్డిదాన్ సాహాపె సల్మీను ఇని బాడ్డి డాట్టి క్రేతు ద్వీపు ఓరదాన్ పయనం కిత్తాప్.

8 గాలి డెయ్తిజ్ మాలెజ్ ఆజి, ఓరదాన్ పయనం కిత్తాపె నెగ్గిబాడ్డి ఇని కూక్కి జాగదు వాతాప్. దన్ని డగ్రు లుసెయ పట్టుం మహాద్.

9 పయనం కిజినిజ్ నండ్రో రోస్కు ఆతె. యూదురి పండ్రోయ్ ఆతి ఉపాసి రోజాబా గడఃస్త సాహాద్. సమ్దరమ్దు ఓడఃదు సాండ్రెజ్ ప్రమాదమాని కాలం ఆత మహాద్. అందెజె పవులు వరిజ్ బుద్ది వెహ్తాన్.

10 “బాబురాండ్రె, మాటు ఏలు సాన్ని మహిజ ఓడఃదిజ్ని ఇబ్బె మన్ని సామానమ్కాజ్, పు నస్టమ్కు, మరి మా పాణమ్కాజ్బా నస్టమ్కు వానాద్, ఇజి నాను నెస్సాన్”.

11 గాని అయ రోమ సతాతిపతి పవులు వెహ్తా మాట అన్ఎండ, అయ ఓడః నడిపిసినివన్ని మాటెజ్ని అయ ఓడః ఎజుమాని మాటెజ్ అస్తాన్.

12 పిన్ని కాలమ్దు మండ్రెజ్ అయా బాడ్డి నెగ్గికాద్ ఆవిద్ ఇహిజ్ బాణిజ్ డిసి సోతెజ్ నండ్రెండ్రో వెహ్తార్. క్రేతుదు మన్ని పీనిక్కు ఇనిబాన్ అందిజి బానె పిన్ని కాలం గడఃప్పాట్ ఇజి వారు విజేరె ఒడిబితార్. యా పీనిక్కు పట్టుం దసిణ పడఃమర, ఉస్సన్ పడఃమర దరోట్ మొకొ మహ్తా మహాద్.

#### సమ్దరమ్దు ముసూర్ డెయ్జినాద్

13 దసిణ దరోటాణ్ ఉండ్రీ ఇజిరి గాలి డెయ్తిజ్ వారు సాండ్రెజ్ ఒడఃబిత్తిలెకెండ్రె సానాట్ ఇజి ఒడిబితార్, ఓడఃది లంగరు\* లాగితారె సోత్తార్. క్రేతు ఓర దానె సాన్ని మహార్.

14 గాని సజెం వెనుక ఉస్సన్ తూర్పు దరోటాణ్ ఊరకులోన్† ఇని పెరి గాలి ద్వీపుదాన్ గొప్పజ్ డెయ్తాద్.

15 పెరి గాలి ఓడఃదిజ్ డెయ్తిజ్ గాలి ఎద్రు సాండ్రెజ్ అట్ఎండ్రాతాద్. అందెజె మాపు గాలి ఎద్రు సాండ్రెజ్ అట్ఎండ్రాతానె గాలి డెయ్తి మహి దరోట్టి ఓడః మహ్తాపె సాహాప్.

16 వెనుక కంద ఇని ఉండ్రీ ఇజిరి ద్వీపు ఓరదాన్ సాహివలె అయ గాలి మా ముస్కు డెయ్విండ్రె అయ ద్వీపు మజీ ముస్తాద్. నండ్రో కస్టబాడితాపె ఇజిరి ఓడఃదిజ్ ముస్కు లాగితాప్.

17 ముస్కు లాగితాపె నెగ్గెండ్రె తోహ్తా ఇడ్తాప్. వెనుక పెరి ఓడఃదిజ్ పెరి నాసుదాన్ సుటులం గటిజ తోహ్తార్. మరి సుర్తిసు ఇని ఇస్కు మెటు ముస్కు ఓడః డెయ్నాద్ను ఇజి తియెలాతారె ఓడః మెలేక సానీద్ ఇజి ఓడఃది సాప‡ డిష్టారె గాలి డెయ్నిదరోట్ సానీద్ ఇజి డిష్టార్.

18 అయ ముసూర్ డిస్ఎండ్రె డెయ్జి మహిజ్ మహ్నా నాండిజ్ వారు ఓడఃదు మహి బరుజ్ సమ్దరమ్దు విసిర్డెజ్ మొదోల్స్తార్.

19 దన్ని మహ్నా నాండిజ్ వారు ఓడః నడపిసిని సెగం సామనమ్కు వరి సాంత కికాణిజ్ సమ్దరమ్దు విసిర్డార్.

20 నండ్రో రోస్కు షాద్దు గాని సుక్కెజ్ గాని తోర్విండ్రె మహా. గాలి గొప్పజ డెయ్జి మహాద్. మా పాణమ్దిజ్ ఎలాగ గెల్పిస్తెజ్, మాపు సానాఫ్లెసు ఇజి తియెలాతాప్.

21 వారు నండ్రో రోస్కు బోజనం కివిండ్రె మహిజ్ పవులు వరి నడిమి నిహండ్రె వెహ్తాన్, “బాబురాండ్రె, మీరు నామాట వెంజిమంజినిక ఇహిజ నెగ్గెండ్రె మహాద్ మరి. క్రేతుదాన్ సోవిండ్రె మహిదెర్ మరి. సోవిండ్రె మంజినిక ఇహిజ, యా నస్టమ్కు కస్టమ్కు జర్దివిండ్రాతాద్ మరి.

22 ఏలు ఇహిజ దయ్రమ్దాన్ మండ్రు ఇజి నాను గటిజ వెహ్సాన్. ఎందానిజ్ ఇహిజ మీలోఇ ఎయెన్బా సాజి సాన్ఇదెర్. గాని ఓడః ఉండ్రెనె పాడానె సానాద్.

\* 27:13 27:13 బరుమన్ని పణుకుదాన్ తయార్ కిత్తిక. గెలుస్కాణ్ తోహ్సా ఓడఃదు ఇడ్తార్. సమ్దరమ్దు డిష్టిజ ఓడః బానె నిల్పాద్దె, సాన్విద్ † 27:14 27:14 ఊరకులోన్ ఇని తుహాన్ గాలి డెయ్తిజ్ ఓడః సాండ్రెజ్ గొప్ప కస్టమానాద్. అయ గాలి ఉస్సన్ తూర్పు దరోటాణ్ డెయ్తిమానాద్ ‡ 27:17 27:17 గాలి వాజి నెక్కి బనిదన్నిజ్ ఓడఃదిజ్ తెరలెకెండ్రె తోహ్సాక

23-24 ఎందానిజ్ ఇహిజ, పొదొయ్ నాను, ఎయె వాండ్రునొ, ఎమేణి దేవుణుదిజ్ పార్లనం కిజిననొ, అయ దేవుణు దూత నాబాన్ వాతండ్రి, 'పవులు, తియెల్ ఆమ. నీను కయ్సరు రాజు ఎద్రు నిల్దెజ్వలె. దేవుణు కనికారమాతికాన్. నీవందిజ్ ఇదిలో నీ వెట మన్నివరి పాణమ్కు దేవుణు గెల్పిస్సొన్లై' ఇజి వెప్తాన్.

25 అందెజె బాబురాండె, దయ్సరమ్దాన్ మండ్రు. ఎందనిజ్ ఇహిజ దూత నావెట వెప్తావజ జర్గినాద్ ఇజి నాను దేవుణు మాట నమ్మిజిన.

26 గాని మా ఓడః గాలిదు సొన్ని ఎంబెబా ఉండ్రీ ద్విపుదు పాడానాద్", ఇజి పవులు వరివెట వెప్తాన్.

27 పదినాల్లి రోస్కు అద్రియ ఇని సమ్దరమ్దు మాపు ముసూర్దిజ్ అబె ఇబ్బె బూలాజి మహాప్. మదరెయ్తు ఆతిజ్ ఎంబెనొ ఉండ్రీ దేనమ్ డగ్రు వాజినావ్ ఇజి ఓడః నడిపిసినివరిజ్ ఉదెసమ్దు వాతాద్.

28 అందెజె వారు ఇజిరి బరుదిజ్ తాడు తొప్పి డిస్తారె ఎసా లోతు మనాద్ ఇజి సుడఃతార. నూట ఇర్వయ్ అడుఃగుజ్ లోతు మనాద్ ఇజి నెస్తార. నెగం వెనుక మరి డిస్తారె తొబయ్ అడుఃగుజ్ లోతు మనాద్ ఇజి నెస్తార.

29 మా ఓడః ఓరదు మన్ని పణుకుముస్కు తగ్గినాదొ ఇజి తియెలాతారె వారు ఓడః వెనుకపడఃకదాన్ నాల్లి లంగరుజ్ డిస్తారె జాయ్ ఆనెండ పార్లనం కిజి మహాప్.

30 ఇహిజ్, ఓడః నడిఃప్పికార్ ఓడః డిసి సొండ్రెజ్ సుడఃతార. వారు ఓడః ముందాల్పడఃక మన్ని లంగరుజ్ డిస్తారె ఇజి నాటిసి ఓడఃదు మన్ని ఇజిరి ఓడః సమ్దరమ్దు డిస్తార. ఇజిరి ఓడఃదు ఎక్కిసొండ్రెజ్ ఆలోసనం కిత్తార.

31 పవులు అక్క నెస్తాండ్రె సదాతిపతివెట, "సయ్సరమ్దివరివెట, యా ఓడః నడిఃపిసినికార్ ఓడః డిసి సొనార్ ఇహిజ, మీరు తప్రె ఆదెజ్ అట్ఇదెర్", ఇహాన్.

32 అందెజె సయ్సరమ్దికార్ ఇజిరి ఓడః తొప్పిమహి నాసు కుతారె సమ్దరమ్దు డిస్తారె సితార.

33 కోడిఃజామ్దు పవులు విజెరె వెట వెప్తాన్, "ఏలు బోజనం కిదు, మీరు బోజనం కివిండాజి పదినాల్లి రోస్కు ఆతె. నిస్సొ రోస్కు మీరు మన్ను బాద ఆజి ఇనికబా ఉణెఎండ మహిదెర్.

34 అందెజె నాను బతిమాల్లిన, బోజనం కిదు. ఎందనిజ్ ఇహిజ మీరు సావిండ మండ్రెజ్ వలె ఇహిజ బోజనం కిదెజ్వలె. తియెలామాట్. మీలోఇ ఎయె బుర్దాన్బా ఉండ్రీ కొప్పుబా రాలజి సాన్విద్ ఇహాన్.

35 ఈహు వెప్తా వెనుక పవులు రొట్టె అస్తాండ్రె వారు సుడఃజి మహివలె దేవుణుదిజ్ వందనమ్కు వెప్తాండ్రె రొటె ముకెజ్ కితాండ్రె తిండ్రెజ్ మొదొల్స్తాన్.

36 వారు విజెరె దయ్సరం ఆతారె బోజనం కిత్తార.

37 అయ ఓడఃదు మాపు మొత్తం రుండివందెజ్ డబయ్ఆరు - మంది మణిసిర్ మహాప్.

38 వారు పొటపంజు ఉటి వీస్తి వెనుక గొదుముజ్ సమ్దరమ్దు వినీర్తారె ఓడః సుల్కాజ్ కిత్తార.

**ఓడః బదెజ్ ఆజినాద్**

39 పొద్దు సొత్తిజ్ వారు అందితి దేసెం ఎంబెణి దేసెం ఇజి నెన్వితార గాని ఓడః ఉండ్రీ ఇస్కు మన్ని పడఃకాద్ ఒతెజ్ తగితి ఉండ్రీ నెగ్గి పడక సుడఃతారె బాన్ ఒనాట్ ఇజి ఒడిఃబితార.

40 అందెజె ఓడః నడిఃపిసినికార్ లంగరుజ్ తొప్పిమహి నాస్కుజ్ కుతారె సమ్దరమ్దు డిస్తార. ఓడః నడిఃప్పి సుకానుజ్ కట్టుజ్ కుతార. ముందాల్ పడఃకాదు మహి సాప ఎక్కిస్తారె గాలి నెక్కి ఒనిలెకెండ ఓరదు నడిఃపిస్తార.

41 గాని ఓడః ఏరులోఇ మన్ని ఉండ్రీ ఇస్కు మెటుదు డఃసె ఆతాదె ఓడః ముందాహిక ఇస్కాదు నాడిఃతాద్. వెనుక పడఃకాదు వెరి ఉల్కెజ్ డెయ్తిజ్ ఓడః బదెజ్ బదెజ్ ఆత సాహాద్.

42 జెలిదాన్ ఒసి మహి లోకుర్ సమ్దరమ్దు ఈత డెయ్జి తప్రె ఆజి సొనార్ ఇజి తియెలాతారె వరిజ్ సప్తెజ్ సయ్సరమ్దికార్ ఆలోసనం కిత్తార\*.

43 గాని సతాతిపతి పవులు గెల్పిస్సెజ్ ఒడఃబిజి సయ్సరమ్ది వరి ఆలోసనమ్దిజ్ సరి సివితాన్. ఈత డెయ్జెజ్ నెస్సివారు ముందాల సమ్దరమ్దు డిఃగేజి గదెం డాట్టి ఈత డెయ్జి ఓరదు సొండ్రు ఇజి ఆడ్ర సిత్తాన్.

44 మహివరిజ్ బల్లెజ్ నెక్కెజ్ ఓడఃది ముక్కెజ్ అసి ఒడ్డుదు సొండ్రెజ్ ఆడ్ర సిత్తాన్. ఈహా మాపు విజెపె గెల్స్తాపె ఒడ్డుదు అందితాప్.

## 28

మెలిత ద్విపుదు అందిజినార్

§ 27:40 27:40 ఓడః తిర్ప్పి ఇజిరి మర \* 27:42 27:42 కర్దువారు తప్రె ఆతిజి వరిజ్ కాప్ కిని సయ్సరమ్ది వరిజ్ వరి అతికారి లోకుర్ నప్తెజ్ ఇజి రోమ రూలు మహాద్

- 1 మాపు తప్పె ఆతి వెనుక అయా ద్వీపు పేరు మెలిత ఇజి నెస్తావ్.
- 2 అయ ద్వీపుదికార్ మజి కిత్తి సాయం నిస్సా నసా ఆవద్. వారు సిసు ఎర్తారె మజి విజేరిజ్ కూడేస్తారె. ఎందానిజ్ ఇహిజ పిరు డెయ్లెజ్ మొదోల్స్తిజ్ పిన్ని కిత్తాద్.
- 3 పవులు ఉండ్రి కట రివెజ్ పెప్తా తతాండ్రి దోస్తాన్. అక్క సిసుముస్సు అర్పివలె గొప్ప వినం మన్ని ఉండ్రి సరాన్ వేడిడిజ్ వెహ్కాణ్ వెల్లి వాతాదె పవులు కిదు కట్టాద్.
- 4 పవులు కిదు సరాన్ దూజ్జిమహిక అయ ద్వీపుదికార్ సుడేతిజ్ వారు ఒరెన్ వెట ఒరెన్ వర్గితార్, “నిజమనె, వీండ్రు లోకాజ్ సప్పికాండ్రి, ఏలు సుడేతి, సమదరమ్దాన్ గెలిసి వాతాన్ గాని నాయం సీని దేవుణు విన్నిజ్ బత్కిదెజ్ సరి సిఎన్.
- 5 గాని పవులు అయ సరాన్దిజ్ సిసుముస్సు సుడేతిజ్ అది సిసుద్ అర్తాద్. పవులుజ్ ఇనికబా ఆవితాద్.
- 6 ఆ ద్వీపుదు మనికార్ పవులు ఉబినాన్, సిలిజ వెటనె సానాన్ ఇజి ఒడిబిజి సుడేతి మహార్. గాని వారు సుడేతిమహిజ్ పవులు ఇనికబా ఆవితాద్. అందెజె వారు వరి మన్ను మారిస్తారె, ‘వీండ్రు ఒరెన్ దేవుణులెకెండ్ మన్నికాన్’ ఇజి వెప్తాన్.
- 7 అయ ద్వీపుది నెయ్యి ఆతి పొప్లి ఇనివన్నిజ్ బానె డగ్రునె బూమిజ్ మహె. వాండ్రు మజి వన్ని కూలెజి వజి మర్యాద సితండ్రి మూండ్రి రోస్సు వన్ని ఇండ్రి కూడుస్తాన్.
- 8 అయ నెయ్యి అప్పొసి నోబుదిజ్, మరి నెత్తెర్పొటదాన్ బాద ఆజి మహాన్. పవులు, వాండ్రు మహి గదిలోఇ సాహండ్రి పార్లనం కిత్తాండ్రి వన్ని ముస్సు కికు ఇడేజి వన్నిజ్ నెగెండ్ కిత్తాన్.
- 9 ఇక జగ్గితిజ్ అయా ద్వీపుదు కన్ఠం అస్తిమహికార్ విజేరె బానె వాతారె నెగెండ్ ఆతార్.
- 10 వారు మజి నండ్రి ఇనాయమ్కు సితారె నెగ్గి కిత్తారె. వెనుక మాపు పయనమాతివలె మజి అవసరం మనికెజ్ విజు ఓడేదు తత్తారె ఇట్టారె.

### పవులు మెలిత ద్వీపుదాన్ రోమ పట్టుం సొన్నినాన్

- 11 ముండ్రి నెలెజ్ ఆతి వెనుక అలెక్సాంత్రియదాన్ వాతి ఉండ్రి ఓడే ఎక్తాపె పయనమాతావ్. అయ ఓడే పిన్ని కాలమ్దు మెలిత ద్వీపుదు మహాద్. కాస్తరు, పోలుక్కు ఇని జవల దెయమ్కాణి బోమ్మెజ్ ఆ ఓడే ముందాహిబాన్ మహాద్.
- 12 మాపు సురకూన్ ఇనిబాన్ వాతాపె బానె మూండ్రి రోస్సు మహావ్.
- 13 బాణిజ్ పయనమాతాపె సుటులం తిర్వజి రేగియు ఇనిబాన్ వాతావ్. ఉండ్రి రోజు వెనుక దసిణ దరోట్దాన్ గాలి డెయ్తిజ్ మహా నాండిజ్ పొతియెలి ఇనిబాన్ వాతావ్.
- 14 బానె నమ్మితి వరిజ్ నెగెండాండ్రి సుడేతిజ్. ‘మాబాన్ వారం రోస్సు మండ్రు’ ఇజి వారు మజి బతిమాలితార్. దన్నివెనుక మాపు రోమ పట్టుమ్దు వాతావ్.
- 15 రోమాదు మహి నమ్మితికార్ మాపు రోమాదు వాజినావ్ ఇజి కబ్బు వెహ్కారె నెగెండాండ్రి రోమ పట్టుమ్దాన్ అపియాదు\* మహి సత దాక, మరి నెగెండాండ్రి మూండ్రి సత్తమ్కు† మహి బాడ్డిదాక మజి కూక్కి ఒతెజ్ వాతార్. పవులు వరిజ్ సుడేతిజ్ దేవుణుదిజ్ స్తుతి కిత్తాన్. వన్నిజ్ దయరం వాతాద్.
- 16 రోమ పట్టుమ్దు అందితిజ్ పవులుజ్, వన్నిజ్ కాప్కిని జమానివెట ఉండ్రి ఆదు ఇండ్రి కేట మండ్రిజ్ సెలవ దోహ్కాద్.

### పవులు రోమదు మన్ని యూదురిజ్ దేవుణు మాట వెహ్సినాన్

- 17 మూండ్రి రోస్సు సాహి వెనుక పవులు బానె మహి యూద పెద్దెల్జి వన్నిబాన్ కూక్పిస్తాన్. వారు కూడేజి వాతివలె పవులు వరివెట వెప్తాన్, “తంబెరిజాండ్రి, మా లోకాజ్ పడేఇకెజ్ గాని, మా అనిగొగొరి అలవాటుజి పడేఇకెజ్ గాని ఇనికబా నాను కివిత. ఇహిజ్బా, నజి యెరూసలేమ్దు అస్తారె రోమవరిజ్ ఒపజెప్తారె.
- 18 వారు నజి గవర్నరుబాన్ తత్తారె నండ్రి ప్రస్నెజ్ వెన్బాజి సుడేతివలె సావుదిజ్ తగితి తప్పు ఇనికబా నాను కివిత ఇజి తెలితాద్. అయావలె నజి డిస్సెజ్ సుడేతిజ్.
- 19 గాని నజి డిస్సెజ్ యూదురు ఒప్పుకోడేవితార్. అందెజె నా సొంత లోకుముస్సు నజి ఇని మొరొ సిల్లిజ్బా కయసరుబాన్ సొన్ని నావందిజ్ వెప్తాజ్ ఆత.
- 20 అందెజె నాను మిజి సుడేతిజ్ మీ వెట వర్గిదెజ్ మిజి కూక్పిస్త. ఎందానిజ్ ఇహిజ ఇస్రాయేలు లోకు ఎయెవన్నివందిజ్ ఎర్దు సుడేతి మంజినారె వన్నివందిజ్ నాను ఏలు యా గొలుస్కాణ్ తోహె ఆత మన్ను”, ఇజి వరివెట వెప్తాన్.

\* 28:15 28:15 అపియాదు మహి సత రోమ పట్టుమ్దాన్ అరువయ్తోమ్మిది కిలో మీటర్ దూరం మహె † 28:15 28:15 పయనం కినికార్ నిద్రదిజ్ సాని గదిజ్. మూండ్రి సత్తమ్కు మహి బాడ్డి రోమ పట్టుమ్దాన్ యాబయ్ మూండ్రి కిలో మీటర్ దూరం మహె

<sup>21</sup> దన్నిజ్ యూదురు, “యూదయ ప్రాంతమందు మన్ని మా లోకాణిజ్ మీవందిజ్ మజి ఇని ఉత్రమబా రెవితాద్. ఇబ్బై వాతి మా లోకు ఎయెర్బా మీ వందిజ్ ఇని సెఇ మాటబా వెహ్వితార్. నీను ఇనికాదొ తప్పు కిత్తి ఇజి మాపు వెన్వితాప్.

<sup>22</sup> గాని యా సజతివందిజ్ మీ ఆలోసనం ఇనిక ఇజి వెండ్రెజ్ మాపు ఆస ఆజినాప్. ఎందానిజ్ ఇహిజ నీను కూడిఃతి మహి యా జటువందిజ్ విజేరె లోకుర్ పగదాన్ వెహ్సినార్ ఇజి మాపు నెసినాప్”, ఇహార్.

<sup>23</sup> అందెజె వారు పవులు వెట పలాన్ రోజు కూడెదెజ్ ఏర్పాటు కితారె పవులు బత్కినిబాన్ మంద ఆజి వాతార్. పవులు పెందాహాన్ అసి పొదొయ్దాక నెగ్రెండ వరిజ్ వెహ్సినార్ దేవుణు ఏలుబడిః వందిజ్ వరివెట వెహ్సాన్. మోసె సిత్తి రూలుజ్ దాన్, ప్రవక్తరు రాస్తి మాటెజాణ్ యేసువందిజ్ తోరిసి, వాండ్రు వెహ్సినార్ నిజమె ఇజి వెహ్సినార్ తోరిస్తాన్. వరిజ్ ఒప్పకొడిఃస్తెజ్ సుడెఃతాన్.

<sup>24</sup> పవులు వెహ్సినార్ మాటెజ్ సెగొండార్ నమ్మితార్, మహికార్ నమ్మివితార్.

<sup>25</sup> వారు ఒరెన్ వెట మరి ఒరెన్ వర్గిజి నెక్త పొక్తారె ఉండ్రె మన్ను ఆదెజ్ అట్ఎండాతారె మర్జి సొహార్. వారు మర్జి సొని ముందాల పవులు వరివెట ఉండ్రె మాట వెహ్సాన్, “దేవుణు ఆత్మ యెసయ ప్రవక్త దాన్ మీ అనిగొగొర్ వెట వెహ్సినార్ మాట నిజమె.

<sup>26</sup> అక్క ఇనిక ఇహిజ, “నీను సొన్ని యా లోకాజ్ వెహ్సా. ‘మీరు బాగ వెంజినిదెర్ గాని అర్దం కిదెజ్ అట్ఇదెర్. బాగ సుడెఃజినిదెర్ గాని తొఇదెర్’.

<sup>27</sup> ఎందానిజ్ ఇహిజ యా లోకురి మన్ను బేగి అర్దం కిఎద్. వారు కణుకెజ్ గిబ్బిజ్ మూక్త మనార్. సిల్లిజ్ వారు కణకాణ్ సుడెఃతార్ మరి. మన్నుదు అర్దం కిత్తార్ మరి. నా దరోట్ మహ్తాజ నాను వరిజ్ నెగెండ కిన”, ఇజి దేవుణు వెహ్సాన్.

<sup>28</sup> అందెజె దేవుణు రక్సణ సీనాన్ ఇని సువార్త యూదురు ఆఇ వరిజ్ సీజినాన్ ఇజి, వారు అయ మాట వెనార్, ఇజి మీరు నెస్తెజ్ వలె”.

<sup>29-30</sup> రుండి పంటెజ్ పూర్తి పవులు ఉండ్రె ఇల్లు అదె లొస్తాండ్రె బత్కితాన్. వన్నిబాన్ వాతివరిజ్ విజెరిజ్ వాండ్రు డగ్రు కిత్తాన్.

<sup>31</sup> దేవుణు ఏలుబడిః వందిజ్, ప్రబు ఆతి యేసుక్రీస్తు వందిజ్ దయ్ రమ్దాన్, ఇని అడ్డు సిల్లెండ, నెస్పిస్తాన్.

## అపొస్తుడు ఆతి పవులు రోమ పట్టమదు మన్ని దేవుణు సజమ్దివరిజ్ రాస్తి ఉత్తం.

నెల్వు కిబిసిని

యా ఉత్తం రాస్తికాన్ ప్రబు ఆతి యేసుక్రీస్తుజ్ అపొస్తుడు ఆతి పవులు. రోమాదు మన్ని దేవుణుదిజ్ నమ్మిత్తివరిజ్ యా ఉత్తం రాస్తికాన్. రాస్తి కాలం క్రీస్తుయేను యా లోకమ్దు వాజి సిలువాదు సాజి, మర్రి నిజ్జి పరలోకమ్దు సాహివెనుక 56 సమస్తం నడిఃమి (ఏ.డి 55-56) రాస్తి మంజిన. యా ఉత్తమ్దు ముకెలమాతిక ఇనిక ఇహిజ, క్రీస్తువందిజ్ వెప్పి సువార్త. సువార్త ఇహిజ ఇనిక, సువార్త నమ్మిత్తివరిజ్ ఇనికెజ్ జర్గినె, వినకవందిజ్ రాసినాన్. మరి, దేవుణు లోకురిజ్ నీతినిజియ్ మన్నికార్ ఇజి ఎలాగ ఇడ్డినాన్, ప్రబు ఆతి యేసుక్రీస్తువలెహాన్ ఎలాగ విడుదల వానాద్ నన్ని సజతిజి వందిజ్ రాసినాన్.

1 క్రీస్తుయేనుజ్ పణి కినికానాతి పవులు ఇని నాను యా ఉత్తం రాసిన. సువార్త వెప్టాజ్ దేవుణు సజి అపొస్తుడుజి వజి నిల్ఫాన్.

2 సేన కాలమ్కు ముజాలె, ఇహిజ, యేసు ప్రబు యా లోకమ్దు వానెండ మహివలెనె, దేవుణు మాటెజ్ రాస్తి మహి ప్రవక్తరుబాన్ దేవుణు యా సువార్త వందిజ్ వెహ్న ఇజి ఒపందం కిత్త మహాన్.

3 దేవుణు మరిసి వందిజె యా సువార్త. వీండ్రు లోకు వజి దావీదు రాజు తెగాదు పుట్టికాన్.

4 వీండ్రు దేవుణు వజి ఇహిజ, దేవుణు మరిసి ఇజి గొప్ప సత్తుదాన్ తోరె ఆతాన్. ఎలాగ ఇహిజ, వాండ్రు సాతి వరిబాణిజ్ మరీజి నిజితాన్. వాండ్రు మా ప్రబు ఆతి యేసు క్రీస్తునె.

5 క్రీస్తు దయాదర్మమ్దాన్ అపొస్తుడు వజి దేవుణు సజి కూక్తాన్. ఎందానిజ్ ఇహిజ, విజు జాతిదికార్ క్రీస్తుముస్సు. నమకం ఇడ్డి, వన్నిజ్ మాడిఃసి, వన్నిజ్ లోజిజి మండ్రెజ్ ఇజి.

6 రోమ పట్టమదు యేసు క్రీస్తుజ్ నమ్మిత్తికార్ ఆతి మీరుబా దేవుణు కూక్తి వరి లోఇ మన్నిదెర్.

7 దేవుణు ప్రేమ కిజి, వన్నిజ్ కేట ఆతి మిజి విజేరిజ్ నాను యా ఉత్తం రాసిన. బుబ్బాతి మా దేవుణుబాణిజ్, ప్రబు ఆతి యేసుక్రీస్తుబాణిజ్ కనికారమ్ని నిసాతి మిజి మనీద్ ఇజి నాను పార్దనం కిజిన.

రోమ పట్టమదు మన్ని నమ్మిత్తివరిజ్ సొన్ని సుడెఃదెజ్ పవులు కోరిజినాన్

8 యా ఉత్తమ్దు తొలిత నాను మీరు విజిదెరె వందిజ్ దేవుణుదిజ్ వందనమ్కు వెప్పిన. యేసు ప్రబువలెహాన్ నమ్మిత్తి దన్నివందిజ్ రోమ దేసెమ్దికార్ ఏలుబడిః కిని విజు బాడ్డిదు మన్ని లోకుర్ వెప్పినార్.

9-10 నాను ఎస్తివలెబా పార్దనం కినివెలె మీ వందిజ్ వెప్పిని సువార్త పూర్తి మస్సుదాన్ నాను కిజిన ఇజి నెసిని దేవుణునె దిన్నిజ్ సాసి. గాని నాను ఎలాగ ఇహిజ్బా ఏలు వాజి మిజి సుడెఃదెజ్ దేవుణు సిత్రం ఆదెజ్ ఇజి పార్దనం కిజిన.

11 ఎందానిజ్ ఇహిజ, మిజి వాజి సుడెఃజి దేవుణు వందిజ్ బత్కిని బత్కుదు మిజి దయరం కిబిసైజ్ ఇజి ఆస ఆజిన.

12 ఎలాగ దయరం కిబిసైజ్ ఇహిజ మాటు ఒరెన్ వన్ని నమకమ్దాన్ మరి ఒరెన్ వన్నిజ్ దయరం వెప్టాజ్వెలె.

13 నమ్మిత్తి తంబెరిజాండె, నాను నండొ సుట్కు మిజి సుడెః వాదెజ్ ఇజి ఆలోసనం కిత్త ఇజి మీరు నెస్టెజ్వెలె. గాని అట్ఎండ ఆత. ఎందానిజ్ ఇహిజ, నండొ అడ్డుజ్ వాతె. మీ బాన్ వాజి మిజి సుడెఃతిజి మీ బాణిజ్ మజి గొప్ప లాబం వాని లెకెండె. ఎందానిజ్ ఇహిజ మీ నన్ని నండొ జాతిజి నడిఃమి నాను సొని లెకెండె మీ నడిఃమిబా నాను వాజి సువార్త వెప్టాజి ఇజి. సువార్త వెంజి నమ్మిజి దేవుణు కొడెఃర్ ఆనార్.

14 యూదురు ఆఇ వరిజ్ విజేరిజ్ సువార్త వెప్టాజ్ నాను ఉండ్రె అప్పు మన్నికాన్. గ్రీకు బాస నెస్తి వరిజ్బా, నెన్ఇ వరిజ్బా, పెరి సదువు మన్ని వరిజ్బా, సదువు సిల్లి వరిజ్బా వెప్పి సీదెజ్ ఇజి సజి ఉండ్రె అప్పు మనాద్.

15 అందెజె, రోమ పట్టమదు మన్ని మిజిబా యా సువార్త వెప్టాజ్ ఇజి నాను గొప్ప ఆస ఆత మన.

16 ఎందానిజ్ ఇహిజ, నాను సువార్త వెప్టాజ్ సిగు అవి. యేసుక్రీస్తు ముస్సు. నమకం ఇడ్డి విజేరిజ్ వరి పాపమ్కాణిజ్ రక్సిసైజ్ యా సువార్తదిజ్ దేవుణుబాణిజ్ ఒద్దె సత్తు మనాద్. యా సువార్త తొలిత యూదురిజ్ వెనుక ఆఇ జాతిజి సాటె ఆజినాద్.



17 యా సువార్తదు దేవుణు ఇనిక వెహ్సానాన్ ఇహిజ, లోకు కిత్తి తప్పు పణిజ వందిజ్ వారు సిక్స పొందిదెజ్ అక్కర్ సిల్లెద్ ఇజినె. వారు యేసుప్రబు ముస్కు నమకం ఇడ్డి వందిజె సిక్సదాన్ తప్రె ఆతార్. యాక ముందాల్ ఒరెన్ దేవుణు ప్రవక్త రాస్తి లెకెండెనె. “ఎయెర్ నీతినిజయ్తూకాన్ ఇజి నాను ఇడ్డ మనానొ, వాండ్రు నా ముస్కు నమకం ఇడ్డి వందిజ్ ఎలాకాలం బత్సినాన్”.

**దేవుణు లోకుర్ ముస్కు నండొ కోపం ఆజినాన్**

18 దేవుణువందిజ్ మన్సు సిల్లి లోకాజ్ విజేరిజ్ సెఇపణి కిని విజేరిజ్ దేవుణు సిక్స సీనాన్ ఇజి పరలోకమ్దాన్ తోరిస్త మనాన్. ఎందానిజ్ ఇహిజ, వరి సెఇ పణిదాన్ దేవుణు వందిజ్ నెస్తిమన్ని నిజమాతికెజ్ విజు వారు అడ్డు కిజినార్.

19 దేవుణు వందిజ్ నిజమాతికెజ్ అర్దం కిదెజ్ వారు అట్సార్. ఎందానిజ్ ఇహిజ, దేవుణు ఎలాగమర్తికాన్ ఇజి వాండ్రు విజేరిజ్ తోరిస్త మనాన్.

20 మాపు దేవుణుదిజ్ నెన్వీప్ ఇజి ఎయెన్బా వెప్తాజ్ వీలు సిల్లెద్. ఎందానిజ్ ఇహిజ, దేవుణు ఎలాగ మర్తికాన్ ఇజి మాటు సుడెదెజ్ సిల్లి, గాని వాండ్రు లోకం తయార్ కిత్తిబాణిజ్ అసి లోకమ్దు తయార్ కిత్తి వనకబాణిజ్ వాండ్రు ఎలాగ మర్తికాన్ ఇజి ఎలాకాలం మన్ని వన్ని పెరిసత్తు ఎలాగమర్తిక ఇజి మాటు సుడెజినాట్. అందెజె దేవుణుదిజ్ నెన్వీప్ ఇజి ఎయెన్బా వెప్తాజ్ వీలు సిల్లెద్.

21 యూదురు ఆఇకార్, దేవుణు ఎలాగ మర్తికాన్ ఇజి నెస్తిజ్బా దేవుణు ఇజి మాడిసెన్ఎర్, వాండ్రు కిత్తి దన్నివందిజ్ వందనమ్కు వెహ్విర్. నస్తివలె వారు దేవుణు వందిజ్ అర్దం కిదెజ్ అట్ఎండ ఆతారె. వరి ఆలోసనమ్కు సెఇకెజ్ ఆతె.

22 వారు బుద్ధి మన్నికార్ ఇజి వెహ్ ఆజి బుద్ధి సిల్లి పణిజ్ కిత్తార్.

23 ఎలాకాలం మంజిని దేవుణుదిజ్ పొగ్డిజినగవరం సివండ బొమ్మెజు పొగ్డిజి గవరం సిత్తార్. సబ్బిసాని లోకులెకెండె, పొటిజ్ లెకెండె, జమతుజ్ లెకెండె, మరి బూమి ముస్కు ఊజి బూలాని వనకాజ్ లెకెండె తోర్ని బొమ్మెజు తయార్ కిత్తారె వనకాజ్ పొగ్డిజి గవరం సిత్తార్.

24 అందెజె వారు, కిదెజ్ ఆఇ ఆసెజ్ వరి మన్సుదు పుట్టి లెకెండె కిదెజ్, దేవుణు వరిజ్ సరి సిత్తాన్. ఇనిక ఇహిజ వారు వరిజె సుగు ఆతి సెఇ పణిజ్ కిత్తార్.

25 ఎందానిజ్ ఇహిజ, నిజమాతి దేవుణు వందిజ్, నిజమ్దిజ్ డిస్తారె నిజం ఆఇ దన్నిజ్ ఇడ్డార్. విజు దన్నిజ్ పుటిస్తికాన్ ఆతి ఒరెండె దేవుణుదిజ్, మాడిసి వన్నిజ్ లొజిఎండ, దేవుణు పుటిస్తి వనకాజ్ మాడిస్తార్, వనకాజ్ లొజిత్తార్. గాని పుటిస్తికెజ్ విజు అయ దేవుణుదిజె ఎస్తివలెబా మాడిస్తెజ్ వెలె.

26 అందెజె సిగు ఆతి ఒడొల్ ఆసెజు వందిజ్ దేవుణు వరిజ్ ఒపజెప్తాన్. అందెజె వరిలోఇ అయ్లికొడొక్ మాసిరిజ్ సాన్వండ అయ్లికొడొకాజ్ దరోట్ ఒడొల్ ఆస ఆజి మప్తె.

27 అయావజనె యూదురు ఆఇవరి లొఇ మొగకొడొర్ ఆల్నికాజ్ ఇడ్ఎండ మొగకొడొర్ దరోట్ ఏక ఉత్పుత్ ఆజి మప్తార్. వారు మొగకొడొర్ వెట సిగు ఆతి పణిజ్ కిత్తార్. అయ ఒద్దె తప్పు ఆతి పణిజ్ వరిజ్ తగితి సక్స ఆజి వరిముస్కు వాతాద్.

28 వారు దేవుణుదిజ్ నెక్తపాక్తారె వన్ని వందిజ్ నెస్తిమన్ని నిజమాతికెజ్ విజు డిస్తెసిత్తార్. నస్తివలె వరి సెఇ బుద్ధిదు నడిదెజ్ ఇజి దేవుణు వరిజ్ డిస్తెసిత్తాన్. అందెజె సరి ఆఇ పణిజ్ కిదెజ్ వరి బుద్ధి మప్తాద్.

29 విజు రకమ్కాణి సెఇ పణిజ్ కిదెజ్ వారు ఏక ఒడెబినార్. ఇనికెజ్ ఇహిజ, మహి వరిజ్ సెడ్డ కిదెజ్, మహివరిజ్ మన్నికెజ్ మజి దొహ్కెజ్ ఇజి సెఇ ఆస ఆదెజ్, ఎలాగబా మహివరిజ్ సెఇక కిదెజ్, మహివరి వెట గోస ఆదెజ్, సప్తెజ్, గొడెబ కిబిస్తిజ్, మొసెం కిదెజ్, మహివరివందిజ్ సెఇకెజ్ వెప్తాజ్, సాండి వెప్తాజ్.

30 నండొ లోకుర్ మహివరివందిజ్ తప్పుజ్ వెహ్సినార్. నండొండార్ దేవుణు ఎర్దు వెత్తేకం కిజినార్, ఆఇవరిజ్ సిగు కిబిస్సార్, గర్త ఆజినార్, పొజిజినికార్ ఆజినార్, మరి రెకరకమ్ది కొత్త సెఇపణిజ్ ఎలాగ కిదెజ్ ఇజి సుడెజినార్, వరి కొడొర్ అయ్సి అప్పాసిరిజ్ లొజివర్.

31 వారు అర్దం కిదెజ్ అట్వర్. ఒపందం కిత్తిలెకెండె కివర్. నండొండార్ వరి సాంత ఇండ్రొణివరిజ్ నెగెండ తొవర్. నండొండార్ కనికారం సిల్లికార్ ఆజినార్.

32 నిన్ని పణిజ్ కనివరిజ్ సప్తెజ్ వలె ఇజి దేవుణు వెప్తా మనాన్ ఇజి నెస్తిజ్బా వారు నిన్ని సెఇ పణిజ్ కిజి మంజినార్. అక్కాదె ఆవండ నిన్ని సెఇ పణిజ్ కినివరిజ్ వారు డగ్రు కిజినార్.

## 2

### దేవుణు సరియ్యతి తీర్పు తీరిస్సాన్

1 మహిక్కా తప్పు కినికార్ ఇజి మీరు వెప్పి వరిముస్సు తీర్పు తీరిసినిదెరా? ఆహ వెప్పిజ మీరు మిజినె తప్పు కినికిదెర్ ఇజి వెప్పినిదెర్. మాపు తప్పు కిఇకాప్, ఇజి వెప్తాజ్ మీరు అట్ఇదెర్. ఎందానిజ్ ఇహిజ, మీరుబా వరిలెకెండ్ తప్పు కినికిదెర్.

2 తప్పు కిని యూదురు ఆఇవరిజ్ దేవుణు తీర్పు తీరిస్సివలె వరిజ్ సరియ్యతి తీర్పు తీరిస్సాన్ ఇజి మాటు నెసినాట్.

3 అందెజె ఆఇ లోకుర్ పాపం కినికార్ ఇజి వెప్పిని మీరు అయ పాపమ్కునె కిజి మహిజ దేవుణు తీర్పుదాన్ తప్తె ఆఇదెర్ ఇజి నెస్సెజ్వెలె.

4 దేవుణు మీవెట వన్ని గొప్పు విలువతి దయ,కనికారం తోరిసినాన్. అక్క మీరు ఇజిరి కణకదాన్ సుడజినిదెరా? దేవుణు మీవెట తోరిసిని కనికారం మీరు పాపమ్కు ఒప్పుకొడజి డిసిసిని వందిజ్నె ఇజి మీరు నెస్ఇదెరా?

5 గాని మీరు మీ మస్సుదు గొప్పు గర్త ఆజి పాపమ్కు ఒప్పుకొడజి డిసిసివండ మహిజ దేవుణు తీర్పు కిని రోజుదు మీ ముస్సు సిక్స నండొ కుంబ కిజినిదెర్. దేవుణు విజు లోకురిజ్ ఉండ్రె లెకెండ్ తీర్పు కిని దినమ్దు మిజిబా తీర్పు కినాన్.

6 దేవుణు ఒరెన్ ఒరెన్ వన్నిజ్ వారు కిత్తి పణిజ తగితిక మర్జి సినాన్ల\*

7 దేవుణుబాణిజ్ జాయ్ని గవరం, సాపు సిల్లి బత్తు దొహ్కెజ్ ఇజి డిస్ఎండ నెగ్గి పణిజ్ కిజి మహివరిజ్ దేవుణు ఎలాకాలం బత్తుని బత్తు సినాన్.

8 గాని నజి నానె నెగెండ మండ్రెజ్ ఇజి సుడజిని వరిజ్, దేవుణు వెప్పిని నిజమాతి మాటదిజ్ డగ్రు కివండ ఒద్దె సెఇపణిజ్ కినివరిజ్, దేవుణుబాణిజ్ గొప్పు కోపం వానాద్.

9 పాపం కిజిని మంజిని ఒరెన్ ఒరెన్ వన్నిజ్ బాదెజ్ వానె. కస్టమ్కు వానె. నన్ని కస్టమ్కు యూదురుజ్ మొదొల్లినె. వెనుక యూదురు ఆఇ వరిజ్ వానె.

10 గాని నెగ్గి పణిజె కినివరిజ్దేవుణు వన్ని గొప్పు జాయ్ని గవరం, సాంతి సినాన్. ముందాల యూదురిజ్ని వెనుక యూదురు ఆఇ వరిజ్ సినాన్.

11 ఎందానిజ్ ఇహిజ, దేవుణు లోకాజ్ తీర్పు కినివలె తేడ తోవండ తీర్పు కినాన్లె.

12 విజెరె లోకుర్ పాపం కిత్తిజ్ విజెరిజ్ సక్స వానాద్. దేవుణు మోసెజ్ సిత్తి రూలుజ్ వందిజ్ యూదురు ఆఇకార్ నెస్ఏతార్. అందెజె “మీరు ఎందానిజ్ రూలుజ లోజెఇతిదెర్?”, ఇజి వరివెట వెహివన్. దేవుణు మోసెజ్ సిత్తి రూలుజ్ నెస్తి యూదురుజ్ సిక్ససిదెజ్ దేవుణు తీర్పు కినాన్. ఎందానిజ్ ఇహిజ వారు రూలుజ లోజెఏతార్.

13 నీతినిజయ్కాన్\* ఎయెన్ ఇహిజ, దేవుణు రూలుజ్ వెహికాన్ ఆవన్, అయ రూలుజ్ లోజెత్తికాండ్రె.

14 దేవుణు యూదురిజ్ సిత్తి రూలుజ్ యూదురు ఆఇవరిజ్ సివతాన్. అహిజ్బా వారు అయ రూలుజ్ వజ బత్తిత్తిజ్, అయ రూలుజ్ వారు నెస్టమనార్ ఇజి మాటు నెసినాట్. అయ రూలుజ్ వరిజ్ సిల్లు గాని మన్నిలెకెండ్ వారు నడిజినార్.

15 అయ రూలుజ్ వరి మస్సుదు ఇడె ఆతె మన్నె ఇజి వరి పణిజాణ్ తోరిసినార్. ఒరెన్ నెగ్గి పణిజ్ కిత్తిజ్బా సెఇ పణిజ్ కిత్తిజ్బా అక్కెజ్ నెగ్గికెజ్, సెఇకెజ్ ఇజి వన్ని మస్సుదు నెసినాన్. అహ దేవుణు సిత్తి రూలుజ్ వన్ని బుద్దిదు మన్నె.

16 లోకుర్ వరి మస్సుదు ఎయెరిజ్ నెస్ఏండ ఇడ్డిమన్ని ఆలోసనమ్కు వందిజ్బా, దేవుణు తీర్పు కిని రోజుదు తీర్పు సినాన్. యేసు క్రీస్తు వెట యాకెజ్ విజు జర్జినె ఇజి నాను వెప్పిని సువార్తదు మనాద్.

### దేవుణు మోసెజ్ సిత్తి రూలుజ్ వజ నడినికాప్ ఇజి వెప్పిని యూదురువందిజ్

17 ఏలు యూదురు ఆతి మిజి ఉండ్రె మాట నాను వెప్పా. మాపు యూదుర్ ఇజి మీరు వెప్పినిదెర్. దేవుణు మోసెజ్ సిత్తి రూలుజ్ వజ నడినికాప్, అందెజె దేవుణు తీర్పుదాన్ తప్తె ఆదెజ్ ఆనాప్, ఇజి మీరు ఒడిబిజినిదెర్. దేవుణు కొడొర్ ఇజి పొగ్గెడె ఆజినిదెర్.

18 దేవుణుదిజ్ ఇస్టమాతిక ఇనిక ఇజి మీరు నెస్సిదెర్. దేవుణు రూలుజ్ వందిజ్ నెగెండ నెస్తిజ్, డగ్రు కిదెజ్ విజు దన్నిజ్ మిస్తి విలువతికెజ్ ఇనికెజ్ ఇజి మీరు నెసినదెర్.

19 గుడ్డివరిజ్ సరి తోరిసి నడిపిసిని వరిలెకెండ్, యూదురు ఆఇవరిజ్ సరియ్యతి సరి వెప్పి నడిపిసెజ్ అట్పాప్ ఇజి మీరు వెప్పినిదెర్. సీకటిదు నడిపిసిని వరిజ్ జాయ్ తోరిసిని వరిలెకెండ్ మీ మాటెజాణిజ్ యూదురు ఆఇవరిజ్ దేవుణు సరి తోరిసినిదెర్ ఇజి వెప్పినిదెర్.

\* 2:6 2:6 కీర్తన 62:12; సామెత 24:12. \* 2:13 2:13 దేవుణు ముస్సు నమకం ఇడ్డి మన్ని పాపమ్కు దేవుణు మాయిప్పికాన్.

20 బుద్ధి సిల్లివరిజ్, యూదురు ఆఇవరిజ్ నెస్సిస్తైజ్ అట్నాప్ ఇజి మీరు ఒడిఃబిజినిదెర్. కొణ్డోర్ లెకెండ్ మన్నివరిజ్, ఇహిజ దేవుణు వందిజ్ నిజమాతికెజ్ నెస్ ఇ వరిజ్ నెస్సిస్తైజ్ అట్టికాప్ ఇజి ఒడిఃబిజినిదెర్. ఎండానిజ్ ఇహిజ, రాస్తిమన్ని దేవుణు మాటదు మన్ని విజ వనకాజ్ ఇంక ఒద్దె విలువతి గెణం మరి నిజమాతి మాట మీబాన్ మనాద్ గదె.

21 మహివరిజ్ నెస్సిసిని మీరు, మిజి మీరె నేర్పె ఆఇదెరా? డోజి కిమాట్ ఇజి గటిజ వెప్పిని మీరు డోజి పణి కిజినిదెరా?

22 రంకు బూలాదెజ్ ఆవిద్ ఇజి వెప్పిని మీరు రంకు బూలాజినిదెరా? దెయమ్కాజ్ డిఃస్తి సిత్తి మీరు దెయమ్క గుడిఃదికెజ్ డోజి కిజినిదెరా?

23 దేవుణు రూలుజ్ మాబాన్ మన్నె ఇజి వెప్పి మీరు అయా రూలుజ లోజిఎండ దేవుణుదిజ్ సిగు తపిసినిదెర్.

24 “మీరు ఈహు కిత్తిజ్ దేవుణు పేరు యూదురు ఆఇకార్ దూసినినార్”, ఇజి దేవుణు మాటదు రాస్తి మన్నిక, మీ వందిజ్ బా రాస్తి లెకెండ్ నె.

25 దేవుణు మోసెజ్ సిత్తి రూలుజ్ వజి మీరు నడిఃజినిదెర్ ఇహిజ మీరు సునతి ఆతి వందిజ్ మిజి లాబం మనాద్. గాని దేవుణు సిత్తి రూలుజ మీరు లోజిఇతిజ మీరు దేవుణు లోకుర్ ఇజి తోరిస్తైజ్ సునతి కిబె ఆఇ యూదురు ఆఇవరిలెకెండ్ మీరు.

26 అయావజనె, సునతి కిబె ఆఇతిజబా దేవుణు సిత్తి రూలుజ వజి నడిఃని యూదురు ఆఇకార్ వన్ని సొంతలోకుర్ లెకెండ్ వాండ్రు ఇడ్నాన్ గదె.

27 సునతి కిబె ఆఇకార్ గాని దేవుణు రూలుజ లోజిని మిజి తీర్పు కినార్. ఎలాగ ఇహిజ, మిజి రూలుజ విజు రాస్తి మహిజ్ బా, సునతి కిబె ఆతిజ్ బా అయా రూలుజ లోజిఇతిజ్ యూదురు ఆఇకార్ మిజి తీర్పు కినార్.

28 దేవుణు లోకుర్ ఇజి తోరిస్తైజ్ ఇనికాదొ అలవాటుజ్ లెకెండ్ కినికాన్, నిజమాతి యూద వాండ్రు ఆవిన్. దేవుణు లోకుర్ ఇజి తోరిస్తైజ్ మీ ఒడిఃల్ దిజ్ ఇనికాదొ కిత్తిజ్ దేవుణు ఒప్పకొణాన్ ఇజి ఒడిఃబిమాట్.

29 గాని, నిజమాతి యూద వాండ్రు ఎయెన్ ఇహిజ, మన్ను మారిస్తైకాండ్రి నిజమాతి యూద వాండ్రు. దేవుణు ఆత్మదాన్ మన్ను మారిస్తైకార్ దేవుణు లోకుర్. దేవుణు లోకుర్ ఆదెజ్ ఇజి మరి ఇనికబా కిదెజ్ ఆవిద్. నన్ని వరిజ్ లోకుర్ పొగ్డిఃఇతిజ్ గాని దేవుణు వరిజ్ పొగ్డిఃనాన్.

### 3

#### దేవుణు నమ్మిదెజ్ తగ్గికాన్.

1 అహిజ, యూద వాండ్రు ఇజి ఇని లాబం మనాద్? సునతి కిబె ఆతికాన్ ఇజి ఇని లాబం మనాద్ ఇజి మీరు వెప్పిదెర్ ను?

2 దన్నిజ్ నాను వెప్పిని విజు సజతిజలొఇబా గొప్ప లాబమ్ నె! ఎలాగ ఇహిజ, దేవుణు వాండ్రు కిత్తిమన్ని ఒపందమ్ కు మన్ని వన్ని మాటెజ్, ముజాల మా అనిగొరుజ్ నె సిత్తాన్.

3 అహిజ, యూదురు నంఠెండార్ దేవుణుదిజ్ నమ్మిదెజ్ తగ్గికార్ ఆవితార్. వారు నమ్మిదెజ్ తగ్గికార్ ఆఇతిజ్, దేవుణు వాండ్రు వెప్తిలెకెండ్ కివిన్ ఇజి వెప్పినిదెరా?

4 నాను వెహ్పా, ఆహె ఇండ్రెజ్ ఆవిద్. దేవుణు వెప్తిలెకెండ్ వాండ్రు కినాన్. లోకుర్ దేవుణు వెట వెప్తిలెకెండ్ కిఎండ అబద్దం వెప్తికార్ ఆతిజ్ బా, దేవుణు నిజమ్ నె వెహ్పాన్. దావీదు రాజు దన్నివందిజ్ కిర్తన పుస్తకమ్ దు ఈహు రాస్త మనాన్. దేవుణు ఈహు వెహ్పాన్, “నీను వర్షినివలె నీ మాటెజ్ నిజమాతికెజ్ ఇజి లోకుర్ వెహ్పార్. లోకు నీ మున్ను నేరం మొప్పెజ్ సుడిఃజినివలె వారు గెలిస్తైజ్ అట్ ఏండానార్లే”.

5 మాటు తప్పు కినివలె దేవుణు మా పాపమ్ కు సెమిసి వాండ్రు నీతినిజయ్ మన్నికాన్ ఇజి ఒద్దె తోరిసినాన్. అందెజె మాటు తప్పుజ్ కిత్తివందిజ్, మజి సిక్కు సిత్తిజ దేవుణు నాయం కినికాన్ ఆవిన్ ఇజి వెప్పికార్ మనార్.

6 ఆహె ఇండ్రెజ్ ఆవిద్. ఎండానిజ్ ఇహిజ దేవుణు నాయం కినికాన్ ఆవిన్ ఇహిజ, విజెరె లోకాజ్ తీర్పు కిదెజ్ మన్ని ఆత్తికారం ఎలాగ మంజినాద్.

7 ఎయెన్ బా, “నాను తప్పు వెహ్పా”, ఇజి వెహ్పొన్ను. గాని నాను తప్పు వెహ్పా ఇహిజ దేవుణు నిజమ్ నె వెప్పినాన్ ఇజి తోరిజినాద్. అందెజె లోకుర్ దేవుణుదిజ్ పొగ్డిఃనార్. అహిజ దేవుణుదిజ్ పొగ్డు వానివలె నాను తప్పు కిత్తిదన్నిజ్ దేవుణు నజి తీర్పు సీజి సిక్కు సీదెజ్ ఆవిద్ ఇజి మీరు వెప్పిదెర్ ను.

8 అయాలెకెండ్ వెప్పిక నిజం ఇహిజ, దేవుణు పొగ్డిః ఆవిన్ ఇజి మాటు పాపం కిజి మండ్రెజ్ నా? నానుబా ఈహు వెప్పిన ఇజి సెగొండార్ తప్పు మొప్పినార్. ఈహు వెప్పివరిజ్ దేవుణు తీర్పు తీరిసి తగితి సిక్కు సీనాన్.

\* 2:24 2:24 మెనయ 52:5; మెహి 36:22. \* 3:4 3:4 కిర్తన 51:4.

దేవుణు ఎద్రు నిజమాతికాన్ ఎయెన్బా సిల్లెన్.

9 అహిజ ఏలు ఇనిక వెహ్లాట్? మాటు యూదురు, యూదురు ఆఇవరిజ్ ఇంక పెరికాటా? ఆఎట్. యూదురిజ్ని యూదురు ఆఇవరిజ్ విజేరిజ్ దేవుణు తీర్పు కినాన్ ఇజి నాను వెహ్లాగదె. ఎందానిజ్ ఇహిజ, పాపం విజేరిజ్ అడిగి ఇడ్డినాద్.

10 దేవుణు మాటదుబా దిన్ని వందిజ్ రాస్తమనాద్. ఇనిక ఇహిజ, “ఎయెన్బా నీతి మన్నికాన్ ఆవన్, నీతిమన్నికాన్ ఒరెన్బా సిల్లెన్”.

11 సరియాతి ఇనిక ఇజి అర్లం కినికాన్ ఒరెన్బా సిల్లెన్. దేవుణుదిజ్ నెస్తెజ్ ఇజి రెబానికాన్బా సిల్లెన్.

12 విజేరి ఉండ్రెలెకెండ్ సెఇవణిజ్ కినికార్ ఆతారె దేవుణుబాణిజ్ మహ్తా సాహార్. సరియాతి పణి కినికార్ ఎయెర్బా సిల్లెర్. ఒరెన్బా సిల్లెన్\*,”

13 “లోకుర్ మాటెజ్ ఎలాగ మన్నె ఇహిజ, పీనుగుదిజ్ మూస్తి వెనుక మర్జి లాగితిజి ఎలాగ కంపు డెయ్నాదొ, అయాలెకెండ్నె. మాటెజ్ణాణిజె మొసం కిజినార్\*. సరాసి వినం లోకాజ్ ఎలాగ పాడె: కినాదొ అయాలెకెండ్నె వారు మాటెజ్ణాణిజ్ పాడె: కినార్”\*.

14 “వారు ఆఇవరిజ్ సయివ్ కిజినె మంజినార్. ఆఇవరిజ్ దూసిసినార్.”\*

15 లోకాజ్ సప్తెజ్ వరిజ్ సులునె వానాద్.

16 వారు సొనిబాన్ విజు నాసనం కిజినార్, లోకాజ్ గొప్పు కస్టమ్కు తపిసినార్.

17 ఆఇవరి వెట సమాదనమదాన్ బత్కిదెజ్ ఎసెజ్బా నెన్వర్.”\*

18 వరి మన్నుదు దేవుణు ఇహిజ ఇని తియెల్ సిల్లికార్.

19 దేవుణు మాటాదు రాస్తిమన్నికెజ్ విజు దేవుణు ఎయెరిజ్ వన్ని రూలుజ్ సిత్తాండ్రొ వరివందిజె ఇజి మాటు నెసినాట్. అందెజె యూదురు గాని యూదురు ఆఇకార్ గాని మా పాపమ్క వందిజ్ దేవుణు ఎద్రు ఇనికబా వెహ్ఎండ మంజినాట్. విజెరి తప్పుకిత్తికార్ ఇజి దేవుణు వెహ్సినాన్.

20 దేవుణు మోసెజ్ సిత్తి రూలుజ్ వజి కిత్తిదన్నివందిజ్ దేవుణు ఎయెరిజ్బా నీతినిజయ్కాన్ ఇజి వెహ్ఎన్. ఎందానిజ్ ఇహిజ దేవుణు రూలుజ్ నెస్తిమహిజ్బా మాటు ఎస్సానొ తప్పుజ్ కిత్తికాట్ ఇజి నెస్త మనాట్.

క్రీస్తుమున్ను నమకం ఇడ్డికాండ్రె నీతిమన్నికాన్ ఆనాన్.

21 గాని లోకుర్ దేవుణు ఎద్రు ఎలాగ నీతినిజయ్కార్ ఆదెజ్ అట్నార్ ఇజి దేవుణు ఏలు మరి ఉండ్రె సుటు తోరిస్త మనాన్. మోసెజ్ సిత్తి రూలుజి లోజిత్తివలెహాన్ ఆవద్. గాని దిన్నివందిజ్ మోసెజ్ సిత్తి రూలుదు మరి ఒరెన్ దేవుణు ప్రవక్తరు రాస్తి మాటెజి లోఇబా తోరిస్త మహాద్.

22 యేసుక్రీస్తు మున్ను నమకం ఇడ్డివరి పాపమ్కు విజు దేవుణు మాయిప్తాన్. దేవుణు సుడెతిజి యూదురుని యూదురు ఆఇకార్ ఇజి తెడె: ఇనిక సిల్లెద్. ఎయెర్ నమ్మిజినారొ దేవుణు వరి పాపమ్కు విజు మాయిప్తాన్. వారు నీతి నిజయ్కా మన్నికారె.

23 ఎందానిజ్ ఇహిజ, విజేరి పాపం కిత్తారె దేవుణు తయార్ కిత్తిమన్ని గొప్పు జాయ్ పొందిదెజ్ అట్ఎండాతార్.

24 గాని క్రీస్తుయేసు మా వందిజ్ సాతిజ్, అయ సావుదాన్ మాటు కిత్తి పాపమ్కు వందిజ్ వాని సిక్సదాన్ దేవుణు మజి డిబిస్తాన్. ఎలాగ ఇహిజ, తప్పు కిత్తికార్ ఇహిజ్బా, అయ తప్పుజ్ నాను సెమిస్త మన్ను ఇజి దయాదర్మమదాన్ ఉండ్రె ఇనాయం లెకెండ్ సెడినె సీజినాన్.

25 లోకురి పాపమ్క వందిజ్ వాని సిక్స వన్ని మున్ను తపిసి, వన్ని సావుదాన్ లోకురి పాపమ్కు వరి నమకమ్దాన్ దేవుణు సెమిసినె వందిజె యేసుక్రీస్తుజ్ పొక్తాన్. ఎందానిజ్ ఈహు కిత్తాన్ ఇహిజ, దేవుణు నీతినిజయ్కా మన్నికాన్ ఇజి తోరిస్తెజె. ఎందానిజ్ ఇహిజ యేసు వాని ముందాల లోకుర్ పాపం కిత్తిమహివలె దేవుణు అక్కెజ్ ఒరిసి మహాన్. పాపం కిత్తివలె సిక్స సివతాన్.

26 గాని దేవుణు అయ పాపమ్కు పోన్వన్. యేసు అక్కెజ్ విజు వన్నిమున్ను ఒత్తాండ్రె వరివందిజ్ సాతాన్. దేవుణు నీతిమన్నికాన్ ఇజి ఈహు తోరిస్తాన్. యేసు మున్ను నమకం ఇడ్డికార్ నీతినిజయ్కార్ ఇజి ఇడ్డార్.

27 అందెజె ఏలు, మోసె సిత్తి రూలుజి లోజిత్తిజ్ నీతిమన్నికాట్ ఆతాట్ ఇజి పొగిడిదెజ్ అట్ఎట్, యేసుక్రీస్తుజ్ నమ్మితిజానె మాటు కిత్తి పాపమ్కు విజు దేవుణు మాయిప్తాన్ ఇజి దేవుణు వహ్సాన్. అయావజనె మాటు నీతి మన్నికాట్ ఆనాట్.

\* 3:12 3:12 క్రిస్తన 14:1-3; 53:1-3. \* 3:13 3:13 క్రిస్తన 5:9. \* 3:13 3:13 క్రిస్తన 140:3. \* 3:14 3:14 క్రిస్తన 10:7. \* 3:17 3:17 యెసయ 59:7,8.

28 రూలుజు లోజీత్తిజ ఆవద్, యేసుక్రీస్తుజ్ నమ్మితిజానె పాపమ్కు విజు మాయిపె ఆజి నీతి మన్నికార్ ఆతార్ ఇజి దేవుణు వెహ్సన్. యాక మాటు నెసినాట్.

29 దేవుణు, వహి యూదురిజ్ నె దేవుణు ఆవన్ గదె, మహి జాతిది వరిజ్ బా దేవుణు గదె. ఒబ మహి జాతిది వరిజ్ బా దేవుణు నె.

30 ఒరెండ్రె దేవుణు నె మనాన్. వాండ్రు యూదురిజ్ ని యూదురు ఆఇ వరిజ్ ని విజేరిజ్ వరి నమకం వందిజ్ పాపమ్కు విజు మాయిప్పి, నీతి మన్నికార్ ఆతార్ ఇజి వెహ్సన్.

31 అహిజు క్రీస్తు ముస్సు. నమకం ఇడ్డిజ్ దేవుణు ఎద్దు నీతి మన్నికార్ ఇజి దేవుణు వెహ్సాజు, రూలుజు విలువ సిల్లెద్ ఇజి ఒడ్డెబిని దెర్ ను. సిల్లె, రూలుజ్ విలువ సిల్లెకెజ్ ఆఱ. యేసుక్రీస్తు ముస్సు. నమకం ఇడ్డి మహిజ్ అయ రూలుజ్ మరి మరి లోజీదెజె.

## 4

### నమకమ్దాన్ అబ్రహాం నీతి నిజయ్తి మన్నికాన్ ఆతాన్

1 అహిజు గొప్ప పేరు మన్ని మా అనిగొగొ ఆతి అబ్రాహాము నీతి మన్నికాన్ ఇజి దేవుణు వెహ్సా వందిజ్ ఇనిక వెహ్సాజ్?

2 వాండ్రు కిత్తి నెగ్గి పణిజు వందిజ్ దేవుణు వన్నిజ్ నీతి నిజయ్తికాన్ ఇజి ఇడ్డిజు దన్ని వందిజ్ లోకురు వెట పొగిడిఁదెజ్ అట్నాన్ గాని దేవుణు బాన్ పొగిడిఁ ఆదెజ్ అట్ ఏన్.

3 ఎందానిజ్ ఇహిజు దేవుణు మాటాదు ఇనిక రాస్త మనాద్ ఇహిజు, “దేవుణు అబ్రాహాము వెట కిత్తి ఒవందం వాండ్రు నమ్మితాన్. అందెజె వాండ్రు నీతి నిజయ్తికాన్ ఇజి దేవుణు ఒప్పుకొటాన్”☆.

4 ఒరెన్ పణి కిత్తి దన్నిజ్ కూలి దొహ్కాజి అయాక ఇనాయం ఆవద్ గదె. అక్క వన్ని కూలి నె. నీతి నిజయ్తికాన్ ఆదెజ్ ఇహిజు బా అయాలెకెండ్లె.

5 గాని, తప్పు కిత్తి వన్ని తప్పుజ్ దేవుణు మాయిప్పి నీతి నిజయ్తి మన్నికాన్ ఇజి ఇడ్డాన్. నమ్మిని వన్ని నమకమ్దాన్, వాండ్రు నీతి నిజయ్తికాన్ ఇజి దేవుణు ఇడ్డాన్. గాని, వన్ని పణిజాణిజ్ నీతి నిజయ్తికాన్ ఆవన్.

6 దిన్ని వందిజ్ దావీదు రాజు బా కిర్తన పుస్తకమ్దు రాస్త మనాన్. ఇనిక ఇహిజు, నమకం ఇడ్డి వందిజ్ నీతి నిజయ్తికార్ ఇజి దేవుణు ఇడ్డికార్ గొప్ప సర్ల ఆతికార్. వరి పణి వందిజ్ ఆవద్, నమకం వందిజె.

7 పాపం కిత్తి దన్నిజ్ దొహ్కాజి నెమ వందిజ్ వారు సర్ల ఆనికార్. ఎందానిజ్ ఇహిజు, వరి తప్పుజ్ మరి ఎత్తు కిఎ ఇజి దేవుణు తీర్తనం కిత్తాన్.

8 ఎయెర్ది పాపమ్కాజ్ దేవుణు లెక్క తొవిండ్రొ వాండ్రు సర్ల ఆతికాన్. ☆

9 పాపమ్కాజ్ దేవుణు సెమిస్తి దన్ని వందిజ్ మన్ని సర్ల సునతి ఆతి యూదురిజ్ నె ఆవద్. సునతి కిబె ఆఇ యూదురు ఆఇ వరిజ్ బా మనాద్. అబ్రహాం దేవుణు దేవుణు దిజ్ నమ్మితాన్. అందెజె వాండ్రు నీతి నిజయ్తి మన్నికాన్ ఇజి దేవుణు ఒప్పుకొటాన్ ఇజి మాటు నెసినాట్ గదె.

10 ఎస్తివలె దేవుణు అబ్రహాం వందిజ్ యాలెకెండ్ వెహ్సాన్? సునతి కిబె ఆవండ ముజాల్ నా? సునతి కిబె ఆతి వెనుకానా? అబ్రహాం నీతి మన్నికాన్ ఇజి ఎస్తివలె దేవుణు వెహ్సాన్ ఇహిజు, సునతి కిబె ఆని ముందాల్ నె అబ్రహాం నీతి మన్నికాన్ ఇజి దేవుణు వెహ్సాన్.

11 వెనుక అబ్రహాం సునతి కిబె ఆతాన్. ఎందానిజ్ ఇహిజు దేవుణు ముస్సు. నమకం ఇడ్డి వందిజ్ వాండ్రు నీతి మన్నికాన్ ఆతాన్ ఇజి గుర్తు వందిజె. సునతి కిబె ఆవండ మహివలె దేవుణు దిజ్ నమ్మిత్తి వరి పాపం దేవుణు మాయిష్టాన్. నన్ని వరిజ్ బుబ్బులెకెండ్ దేవుణు అబ్రాహాముజ్ ఇడ్డాన్.

12 అయావజనె నమకం ఇడ్డి సునతి కిబె ఆతి వరిజ్ బా అబ్రహాం బుబ్బు లెకెండ్ నె. సునతి కిబె ఆవండ మహివలె నమకం ఇడ్డి బుబ్బాతి అబ్రహాం లెకెండ్ వారు. వారు బా అయా నమకమ్ నె ఇడ్డార్.

13 దేవుణు అబ్రహాం వెట ఉండ్రె ఒట్టు కిత్తాన్. ఇనిక ఇహిజు, అబ్రహామ్ జ్ ని వన్ని కొడెఁ కొక్తారిజ్ యా లోకమ్ దిజ్ సీన ఇజి. యా ఒట్టు అబ్రాహాముజ్ ఎలాగ దొహ్కాద్ ఇహిజు దేవుణు సిత్తి విజు రూలుజ్ వాండ్రు లోజీత్తి వందిజ్ ఆవద్. దేవుణు ముస్సు. నమకం ఇట్టివెలె నీతి నిజయ్తికాన్ ఆతాన్ కాక యా ఒట్టు దేవుణు బాణిజ్ దొహ్కాద్.

14 రూలుజు లోజీత్తి వరిజె, దేవుణు సిత్తి ఒట్టు దొహ్కాద్ ఇహిజు, దేవుణు ముస్సు. ఇడ్డి నమకమ్ దిజ్ ఇని విలువ సిల్లెద్. ఆహె ఆతిజు దేవుణు సిత్తి అయ ఒట్టు బా విలువ సిల్లెండ మనాద్.

☆ 4:3 4:3 ఆది 15:6. ☆ 4:8 4:8 కిర్తన 32:1,2.

15 రూలుజ్ మన్నె ఇహిజ లోకు వనకాజ్ లోజీవండ సిక్స తపిసినార్. ఎంబె రూలుజ్ మహిజ్బా లోకుర్ వనకాజ్ లోజీవర్.

16 నమకం ఇడ్డి రూలుజ లోజీత్తి యూదురునె ఆవిద్ అబ్రహాంలెకెండ దేవుణు మున్ను నమకం ఇడ్డివరిజ్ విజేరిజ్ యా ఒట్టు దోహక్కాద్. దేవుణు మున్ను నమకం ఇడ్డివరిజ్ అబ్రహాం ఒరెన్ బుబ్బువజనె.

17 “నాను నిజి నండో జతిజ బుబ్బు లెకెండ ఏర్పాటు కిత్త మన్ను”, ఇజి దేవుణు అబ్రహాం వెట కిత్తి ఒట్టు దేవుణు మాటాదు రాస్త మనాద్. సాతివరిజ్ బత్తు సీజినాన్. వన్ని మాటదాన్ సిల్లివనకాజ్ మన్నిలెకెండ కూక్కినాన్, యా దేవుణు. వన్నిజె అబ్రహాం నమ్మిత్తాన్. దేవుణు ఎర్దు, యా ఒట్టువలెహాన్ మజి విజేరిజ్ అబ్రహాం బుబ్బులెకెండ ఆతాన్.

18 దేవుణు అబ్రాహముజ్ వెప్తి మాటెజ్ జర్గిదెజ్ కస్తమాతికెజ్ గాని అక్కెజ్ జర్గినె ఇజినె నమ్మిజి ఎర్దుసుండేజి మహాన్. అందెజె నండో జాతిజ బుబ్బువజ ఆని ఇజి దేవుణు వెప్తి మాటెజ్లెకెండె వాండ్రు ఆతాన్. నీ కొడోర్ ఆగనమ్దు మన్ని లెక్క కిదెజ్ అట్త నస్సా సుక్కెజ్లెకెండ నండోండార్ ఆనార్లె ఇజి దేవుణు వెప్తి మాటలెకెండ జర్గితాన్.

19 అబ్రాహముజ్ డగ్రు డగ్రు వంద పంటెజ్ ఆత మహాద్. “నాను నిస్సా డొక్క ఆత. నా ఆల్ని సారాయిబా కొడోర్ ఇడ్డెజ్ అట్వద్”, ఇజి ఒడేబీజి మహాన్. అహిజ్బా దేవుణు వెప్తి మాటెజ్ అబ్రహాం ఇని అనుమానం సిల్లెండ నమ్మిత్తాన్.

20 వన్ని నమకం డిస్వితాన్. దేవుణు కిత్తి ఒట్టు వందిజ్ అనుమానం ఆవితాన్. దేవుణు వెప్తిలెకెండ జర్గినాద్లె ఇజి నమ్మిత్తాండ్రె దేవుణుదిజ్ పొగడితాన్.

21 దేవుణు ఒవందం కిత్తిలెకెండ కిదెజ్ అట్నాన్ ఇజి పూర్తి నమ్మిత్తాన్.

22 అందెజె దేవుణు మాటదు రాస్త మనాద్, “అబ్రహాం దేవుణుదిజ్ నమ్మిత్తాన్. అందెజె దేవుణు వన్నిజ్ నీతినిజయ్తి మన్నికాన్ ఇజి ఇడ్తాన్”, ఇజి

23 నీతినిజయ్తికాన్ ఇజి ఇడె ఆతాన్”, ఇజి దేవుణు మాటాదు రాస్తి మన్నిక అబ్రహాం ఒరెన్ వందిజె ఆవిద్.

24 మా వందిజ్బా నీతినిజయ్తి మన్నుకార్ ఇజి దేవుణు ఇడ్డ మనాన్ ఇజి రాస్త మనాద్. సాతివరిబాణిజ్ యేసుక్రీస్తుజ్ నిక్తి దేవుణు మున్ను నమకం ఇడ్డి మా వందిజ్బా నీతినిజయ్తికార్ ఇజి రాసె ఆతమనాద్.

25 మా సెఇ పణిజ వందిజె యేసు క్రీస్తుజ్ సప్తార్. సాతివరిబాణిజ్ దేవుణు వన్నిజ్ నిక్తిజ్, మా పాపమ్కు విజు సెమిస్తాండ్రె మజి దేవుణు వెట కూడిత్తికార్ ఇజి ఇడ్తాన్.

## 5

### దేవుణు వెట మజి సాంతి సమదనమ్ని సర్ల ఆజినాట్

1 మా ప్రబు ఆతి క్రీస్తు మావందిజ్ సాతాన్ ఇజి మాటు నమ్మిత్తిజ్, మాటు దేవుణు వెట కూడేజి మంజినాట్. అందెజె దేవుణు వెట సాంతి సమదనం వాత మనాద్.

2 యేసుక్రీస్తు మా వందిజ్ సాతిజ్ ఏలు దేవుణు మజి తోరిస్తి దయాదర్మం మాటు నెస్త మనాట్. దేవుణు ఎస్సానొ గొప్పవాండ్రు ఇజి నెస్తాటె వన్ని గొప్ప జాయ్దు మాటుబా మంజినాట్లె ఇజి ఎర్దుసుండేజి మంజినిలోఇ సర్ల ఆజినాట్.

3 అక్కాదె ఆవిండ, క్రీస్తుమున్ను నమకం ఇడ్డి వందిజ్ వాని కస్తమ్కలోఇ సర్లదాన్ మంజినాట్. ఎందానిజ్ ఇహిజ, అయ కస్తమ్కు వాతిజ్ అక్కెజ్ ఎలాగ బరిస్తిజ్ ఇజి మాటు నెస్తెజ్ ఆనాద్.

4 కస్తమ్కు వానివలె అక్కెజ్ బరిస్తిజ్ మాటు నెగ్గి గుణమ్కు మన్నికార్ ఇజి దేవుణు మా వందిజ్ ఒప్పు కొడేజినాన్. నెగ్గి గుణమ్కు మన్నికార్ ఇజి ఒప్పుకొటిజ్ మాటు ఆసదాన్ ఎర్దుసుండేజి మంజినాట్.

5 దిన్ని వందిజ్ మాటు ఎర్దు సుండేజి మన్నిజ్ అక్క నిజమ్నె జర్గినాద్ ఇజి సుండేజినాట్. ఎందానిజ్ ఇహిజ దేవుణు మజి ప్రేమిసినాన్ ఇజి మా మన్నుదు మాటు నెగెండ నెస్తాట్. మజి సిత్తి మన్ని దేవుణు ఆత్మదానె దేవుణు మా మున్ను మన్ని ప్రేమ వందిజ్ నెసినాట్.

6 ఎలాగ ఇహిజ, మాటు ఇనికబా కిదెజ్ అట్వండ మహివలె దేవుణు ఏర్పాటు కిత్తి కాలమ్దు, దేవుణు వందిజ్ బక్తిసిల్లి వరివందిజ్ క్రీస్తు సాతాన్.

7 నీతినిజయ్తి మన్ని వన్నివందిజ్ ఒరెన్ సాదెజ్ ఇహిజ కస్తం. నెగ్గికాన్ ఆతివన్నివందిజ్ ఒరెన్ సానాన్సు.

8 గాని దేవుణు మజి ఎస్సానొ ప్రేమిసినాన్ ఇజి తోరిస్తాన్. ఎలాగ ఇహిజ మాటు దేవుణు వేట వెత్తేకమ్దాన్ ఆఇసరి నడిసి మహివలెనె క్రీస్తు మా వందిజ్ సాతాన్.

9 అందెజె, క్రీస్తు మా వందిజ్ సాతిజ్ మాటు నీతిమన్నికాట్ ఇజి దేవుణు ఇడ్డిమన్నిక నిజమె. అహిజ, ఎలాకాలం మంజిని సిక్సదాన్ మాటు క్రీస్తువెట తప్తె ఆనాట్ ఇజి మన్నిక ఒడ్డె నిజమాతిక.

10 ఎందానిజ్ ఇహిజ, మాటు దేవుణు వెట పగ అస్తి మహివలె దేవుణు మరిసి మా వందిజ్ సాతాండ్రె మజీ దేవుణు వెట కూడుఃస్రాన్. అహిజ ఏలు దేవుణు వెట మాటు కూడిఃతాట్ ఇహిజ, మరి నండో మజీ గెల్పిస్తైజ్ క్రీస్తు అట్నాన్ ఇజి మాటు నెసినాట్. వాండ్రు మర్జి నిజిత్తిజ్ నె యా గెలుపు మజీ వాతాద్.

11 అక్కాదె ఆవిద్, మా ప్రబు ఆతి యేసుక్రీస్తు మా వందిజ్ సాతి వందిజ్ ని మా వందిజ్ కిత్తి పణి వందిజ్ సర్ల ఆజినాట్. యేసుక్రీస్తు బాణిజ్ మాటు దేవుణువెలె సమదనం మన్నికాట్ ఆతాట్.

**ఆదాముని క్రీస్తు**

12 ఏలు నాను ఉండ్రె వెహ్నా, ఒరెన్ లోకు, ఇహిజ ఆదాం పాపం కిత్తిజ్ పాపం యా లోకమ్దు డూగితాద్. పాపం కిత్తిజ్ ఆదాం సాతాన్. అందెజె యా లోకమ్దు విజేరె సాజినార్. విజేరె పాపం కిత్తిజ్ విజేరె సాజినార్.

13 దేవుణు మోసెవెట రూలుజ్ సిపిండ మహివలె లోకుర్ పాపం కిజి మహార్. గాని వారు కిత్తి తప్పుజు లెక్క సుడఃవతాన్. ఎందానిజ్ ఇహిజ రూలుజ్ సిల్లెండ మహాద్కాక రూలుజ్ తప్టార్ ఇజి ఇన్ ఏన్.

14 గాని ఆదాం బత్కితి మహి కాలమ్దాన్ మోసె కాలమ్దాక బత్కిజి మహికార్ సాతార్. ఎందానిజ్ ఇహిజ ఆదాం కిత్తి పాపం లెకెండ వారు కివితార్ గాని వారుబా పాపం కిత్తార్. ఆదామ్ ని వెనుక వాతి క్రీస్తు ఉండ్రెలెకెండ్రె. ఎలాగ ఇహిజ ఆదాం కిత్తి పణిని క్రీస్తు కిత్తి పణి విజేరిజ్ కూడిఃత వాతాద్.

15 గాని రిఎర్బా ఉండ్రె లెకెండ్రె ఆవిర్. దేవుణు సెడినె సిత్తి ఇనాయం తతాన్. మరి ఒరెన్ విజేరిజ్ సాపు తతాన్. గాని యేసు క్రీస్తు వన్ని దయాదర్మమ్దాన్ తత్తి ఇనాయం ఒద్దె పెరికాదె. దేవుణు విజేరిజ్ సెడినె సిత్తి వన్ని దయాదర్మమ్ నె అయ ఇనాయం.

16 ఆదాం కిత్తి పాపమ్దాన్ వతిదన్నిజ్ క్రీస్తు సెడినె సిత్తి ఇనాయమ్దిజ్ లోఇ మరి ఉండ్రె తేడ మనాద్. ఇనిక ఇహిజ, ఆదాం ఉండ్రె పాపం కితిజ్ దేవుణుబాణిజ్ తీర్పు తతాన్. గాని క్రీస్తు దేవుణుబాణిజ్ తత్తి ఇనాయం అయాలెకెండ్రె ఆవిద్. సెడినె దోహ్కీ అయ ఇనాయం ఇనిక ఇహిజ దేవుణు లోకురిజ్ నీతినిజయ్కార్ ఇజి ఇడ్డికదె. నీతినిజయ్కార్ ఇజి దేవుణు లోకురిజ్ ఇడ్డిని అయ ఇనాయం వాతిజ్, లోకుర్ కిత్తి విజు పాపమ్క వందిజ్ “మీ పాపమ్కు విజు నాను మాయిప్ప”, ఇజి దేవుణు వెహ్ండ్రె వరిజ్ నీతినిజయ్కార్ ఇజి ఇడ్నాన్.

17 ఒరెన్ లోకు తప్పు కిత్తిజ్ లోకుర్ విజేరె సాజినారె, సాపు లోకురిజ్ ఏలుబడిః కిజినాద్. గాని మరి ఉండ్రె ఒద్దె నిజమె, ఇనిక ఇహిజ, యేసు క్రీస్తు ఇని మరి ఒరెన్ కిత్తి పణిదాన్, దేవుణు బాణిజ్ గొప్ప దయాదర్మమ్ని సెడినె దోహ్కీ నీతినిజయ్కార్ ఇనికెజ్ వాతిజ్ అక్కెజ్ మా బత్కుదు ఏలుబడిః కిజినె.

18 ఆహె ఒరెన్ వన్ని తప్పుదాన్ దేవుణు బాణిజ్ తీర్పు వాతి లెకెండ్రె, మరి ఒరెన్ వన్ని నీతి పణిదాన్ విజేరె తీర్పుదాన్ తవై ఆదెజ్ అట్నార్. యా నీతి పణి, వరిజ్ ఎలాకాలం బత్కిని బత్కు తతాద్.

19 ఎలాగ ఇహిజ ఒరెన్ లోకు దేవుణుదిజ్ లోజిపిండ మహివలె ఎలాగ లోకుర్ విజేరె తపు కిత్తికార్ ఆతారొ, అయాలెకెండ్రెనె మరి ఒరెన్ లోకు దేవుణుదిజ్ లోజితిజ్ దేవుణు లోకురిజ్ నీతినిజయ్కార్ మన్నికార్ ఇజి ఇడ్నాన్.

20 దేవుణు రూలుజ్ లోకురిజ్ వాతివెలె తపుజ్ నండో కిజినాప్ ఇజి లోకర్ నెస్తార్. గాని తపుజ్ నండో ఆతివెలె దేవుణుది గొప్ప దయాదర్మమ్బా దన్నిజ్ ఇంక నండో పిరిజి వాతాద్.

21 పాపం నండో ఆజి వాతివలె లోకుర్ సాపుదిజ్ తగిజి వాతార్. గాని ఏలు దేవుణు లోకురిజ్ నీతినిజయ్కార్ మన్నికార్ ఇజి ఇడ్డిజ్ గొప్ప దయాదర్మం లోకుర్ మున్కు ఏలుబడిః కిజినాద్. ఎందానిజ్ ఇహిజ మా ప్రబు ఆతి యేసుక్రీస్తు కిత్తి పణిదాన్ ఎలాకాలం బత్కిని బత్కు వాదెజ్ ఇజి.

**6**

**పాపం వందిజ్ సాతికాట్ గాని క్రీస్తువెట బత్కినికాట్.**

1 అహిజ, ఏలు ఇనిక వెహ్నాట్? మాటు పాపం కిత్తివెలె దేవుణు గొప్ప దయాదర్మం తోరిస్తాన్ ఇహిజ ఏలు మరి నండో దయాదర్మం తోరిస్తైజ్ ఇజి మరి నండో పాపమ్కు కిజినె మండ్రెజ్ నా?

2 ఆవిద్, మాటు పాపం కిజినె మండ్రెజ్ ఆవిద్. ఎందానిజ్ ఇహిజ, పాపం కిదెజ్ ఆస మాటు డిఃస్తాట్. నన్ని ఆసెజ్ డిఃస్తిజ్ పాపం కిజినె మండ్రెజ్ అట్ ఏట్లె.

3 యేసు క్రీస్తు వెట కూడిఃదెజ్ ఇజి బాప్తిసం షొందినివలె మాటుబా వన్నివెట సాతాట్ ఇజి విజేరిజ్ వెప్పినాట్. ఇక్క మీరు నెస్తైజ్ వలె.

4 అందెజె క్రీస్తు సాతి వెనుక బూమి లోక వన్ని పీనుగు ఎలాగ మూసె ఆతాదో, అయాలెకెండెనె బాప్తిసం ఘొందితివెలె మాటుబా వన్నివెట మూసె ఆతి లెకెండె ఆతాట్. ఎలాగ ఇహిజ, పాపం కిదెజ్ మన్ని ఆసవందిజ్ బత్తిదెజ్ అట్విండె ఆజినాట్. బుబ్బాతి దేవుణుది గొప్ప జాయ్ మన్ని సత్తుదాన్ యేసుప్రబు ఎలాగ సావుదాన్ మర్రి నీజితాండ్రో అయాలెకెండె మాటుబా ఉండ్రీ కొత్త బత్తుదు మండ్రెజ్ అట్నాట్.

5 మాటు మా పడాయ్ బత్తు డిసిసిజి యేసుక్రీస్తు వెట వన్ని సావుదు కూడితాట్ ఇహిజ యేసుక్రీస్తు సావుదాన్ మర్రి నిజిత్తి లెకెండె మాటుబా తప్విండె ఉండ్రీ కొత్త బత్తుదు వన్నివెట కూడఃజి మంజినాట్.

6 ఒరెన్ ఎజమాని అడిగి పణికినికాన్ లోజిజి మంజినిలెకెండె, మాటు పాపం కిదెజ్ మన్ని ఆసదిజ్ లోజిజి మండ్రెజ్ అవిద్. అందెజె యేసుక్రీస్తు సిలువాదు సాతివెలె పాపం కిదెజ్ మన్ని మా ఆసెజబా అయ సిలువాదు సప్తి లెకెండెనె. యాక మాటు గుర్తు కినాట్.

7 సాతిసాహికాన్ పాపం కిదెజ్ మన్ని ఆసెజాణిజ్ డిబె ఆతికాన్గదె. అయాలెకెండె మాటుబా డిబె ఆతాట్.

8 అహిజ, మాటు క్రీస్తు వెట సాతి లెకెండె ఇహిజ, క్రీస్తు వెట బత్తిత్తి లెకెండె మాటుబా వన్నివెట బత్తినాట్ ఇజ నమ్మిజినాట్.

9 క్రీస్తు సాతిజ్ దేవుణు క్రీస్తుజ్ సాతి పరిబాణిజ్ మర్రి నిక్తాన్. వాండ్రు మరి సావన్. అందెజె సావు వన్ని ముస్సు అతికారం కిదెజ్ అట్విద్ ఇజ మాటు నెసినాట్.

10 క్రీస్తు సాతివెలె లోకురి పాపమ్క వందిజ్ ఉండ్రె నుటునె సాతాన్. గాని మర్రి బత్తిత్తివెలె దేవుణు వందిజ్ బత్తిజినాన్.

11 అయాలెకెండె మీరుబా పాపం కిదెజ్ మన్ని ఆసదిజ్ సాతికార్ ఇజి మిజి ఇడ్డు. మరి యేసుక్రీస్తు వెట కూడితి మహిజ్ దేవుణుదిజ్ ఇన్ఱమాతి బత్తు బత్తిజనిదెర్ ఇజి ఇడ్డు.

12 అందెజె, పాపం కిదెజ్ మన్ని ఆసెజ్, సాజి సాని మీ ఒడోల్దు ఏలుబడిః కిదెజ్ అవిద్. ఎందానిజ్ ఇహిజ, పాపం కిదెజ్ మన్ని ఆసెజ్ వజ కిబిస్తెజె అక్క. సుడఃజినాద్.

13 పాపం మీ ముస్సు ఏలుబడిః కిజి సెఇ పణిజ్ కిదెజ్ వాడుకొని ఆయుదమ్కులెకెండె మీ ఒడోల్ది బాగమ్కాజ్ వాడుకొండఃమాట్. గాని సావుదాన్ బత్తుదు వాతివరిలెకెండె మీ ఒడోల్దిజ్ దేవుణుదిజ్ ఒప్పజెప్తెజ్. నన్ఱివలె మీ ఒడోల్లి బాగమ్కు నీతినిజయ్తి మన్ని పణిజ్ కిదెజ్ వాడుకొని ఆయుదమ్కులెకెండె ఆసె.

14 పాపం కిదెజ్ ఇజి ఆస మీ ముస్సు ఏలుబడిః కిదెజ్ అవిద్. ఎందానిజ్ ఇహిజ దేవుణు తీర్పుదాన్ తప్రె ఆదెజ్ ఏలు మోసె సిత్తి రూలుజ లోజిదెజ్ అవ్సరం సిల్లెద్. గాని పాపం కివిండె మండ్రెజ్ ఏలు దేవుణు దయాదర్థం మీ ముస్సు ఏలుబడిః కిజినాద్.

**నీతినిజయ్తి మన్ని బత్తు బత్తిదెజ్ ఇజి మన్ని ఆసదిజ్ మీరు వెటిపణి కినివరిలెకెండె లోజిజి మంజనిదెర్**

15 ఏలు మాటు దేవుణు మోసెజ్ సిత్తి రూలుజ అడిగి మంజనిజ్, పాపం కిజి మండ్రెజా? అవిద్, ఎసెజ్బా అవిద్.

16 ఇనిక ఇహిజ యాక నిజం ఇజి మీరు నెనినిదెర్. ఎయెన్బా వెటిపణి కినివన్ని లెకెండె ఒరెన్ ఎజమానిజ్ లోజిజి మండ్రెజ్ నూణివలె, అయ ఎజమానిజ్ వెటిపణి కినికాన్ ఆజినాన్గదె. పాపమ్దిజ్ లోజిత్తిజ సావు తపిసినిదెర్. దేవుణుదిజ్ లోజిదెజ్ ఒప్పుకొటిజ దేవుణు మిజి నీతినిజయ్తికార్ ఇజి ఇడ్నాన్.

17 ముందాల్ మీరు ఇన్ఱం ఆతి వజ పాపం కిజి, పాపం కిదెజ్ మన్ని ఆస ఇని ఎజమానిజ్ వెటిపణి కినికార్ లెకెండె మహిదెర్. గాని వెనుక మిజి దేవుణు వందిజ్ నెస్సిన్ఱి దన్నివందిజ్ మీరు పూర్తి మన్నుదాన్ నెస్తిదన్నిజ్ లోజిత్తి మన్నిదెర్. దిన్నివందిజ్ నాను దేవుణుదిజ్ వందనమ్కు వెహ్సిన.

18 పాపం కిదెజ్ మన్ని ఆసెజాణిజ్ దేవుణు మిజి డిబిన్ఱి దన్నిజ్ నాను దేవుణుదిజ్ వందనమ్కు వెహ్సిన. దేవుణు ఎర్దు నీతినిజయ్తి మన్ని బత్తు బత్తిదెజ్ ఇజి మన్ని ఆసదిజ్ మీరు వెటిపణి కినివరిలెకెండె లోజిజి మన్ని దన్నిజ్బా నాను దేవుణుదిజ్ వందనమ్కు వెహ్సిన.

19 దేవుణు వందిజ్ నిజమాతికెజ్ అర్థం కిబిస్తెజ్ ఇజి నాను అర్థం కిబిసిని మాటెజ్ వెహ్సిన. ఏలుదాక మీరు వెటిపణి కినివరి లెకెండె మీ ఒడోల్ది బాగమ్కు సెఇపణిజ్ కిదెజ్ మరి ఒద్దె సెఇకెజ్ కిజి, పాపం కిదెజ్ మన్ని ఆసెజ్ లోజిత్తి మహిదెర్. ఏలు దేవుణుదిజ్ కేట అతివరిలెకెండె నీతినిజయ్తి పణిజ్ కిజి దేవుణుదిజ్ వెటిపణి కినికార్ లెకెండె మీ ఒడోల్దిజ్ నడిఃపిస్తు.

20 మిజి ఇన్ఱం ఆతివజ బత్తిజి పాపం కిదెజ్ మన్ని ఆసెజ లోజిజి మహివలె మీరు నీతినిజయ్తిదాన్ బత్తిదెజ్ ఇజి ఎయెర్బా మిజి డటం వెహ్విత్తార్.

21 గాని ఏలు మిజి సిగు తపిసిని నన్ని బత్తు మిజి ఇని లాబం తెవిత్తాద్. అయ బత్తుదాన్ దేవుణుబాణిజ్ దూరం మండ్రెజ్నె ఆతాద్. నన్ని బత్తు దేవుణు ఇనిక తనాద్ ఇహిజ సావునె తనాద్.



22 గాని ఏలు పాపం కిదెజ్ మన్ని ఆస మీ ముస్కు ఏలుబడిః కివండ మీరు దన్ని ముస్కు గెలిస్తెదెర్. దేవుణుదిజ్ వెటిపణి కినికార్ లెకెండ ఆతిదెర్. నన్ని బత్కుదాన్ వాతి ఉండ్రె పండులెకెండ మీరు దేవుణుదిజ్ కేట ఆతి లోకుర్ ఆతిదెర్. నస్తవలె ఎలాకాలం బత్కిని బత్కు దోహ్కాద్.

23 పాపమ్దిజ్ లోజిజి మహివరిజ్ దోహ్కాద్ కులి ఎలాకాలం మన్ని సావు. గాని మా ప్రబు ఆతి క్రీస్తుజ్ నమ్మితివరిజి ఎలాకాలం బత్కిని బత్కు దేవుణు సెడినె సీనాన్.

## 7

### ఆలు మాసిర్ నడిఃమి మన్ని రూలుజ్

1 యేసుప్రబుజ్ నమ్మితి మా తంబెరిజాండె, రూలుజి వందిజ్ నెసినివరి వెట నాను యాక వెప్పిన. ఇనిక ఇహిజి ఒరెన్ లోకు బత్కిజి మహివలె ఉండ్రెనె రూలుజి లోజిజి మండ్రెజ్గదె.

2 ఎలాగ ఇహిజి, పెండ్లి ఆతివందిజ్ మన్ని రూలుజి సుడఃతిజి, ఉండ్రె అయ్లి కొడః దన్ని మాసివెట మంజినాద్గదె. గాని మాసి సాతసాహాన్ ఇహిజి అది వన్నిజ్ పెండ్లి ఆతిలెకెండ మండ్రెజ్ అవ్సరం సిల్లెద్గదె. అది మాసివెట మండ్రెజ్ ఇజి మన్ని రూలుజిబాణిజ్ డిబె ఆతాద్.

3 రూలువజి సుడఃతిజి, మాసి బత్కిజి మహివలె మరి ఒరెన్ వెట అది సాహిజి, అది రంకు బూలానికాద్ ఇనార్. గాని మాసి సాతిజి పెండ్లి ఆతి మన్ని రూలుదిజ్ లోజిజి మండ్రెజ్ అవ్సరం సిల్లెద్. వెనుక మరి ఒరెన్ వన్నిజ్ పెండ్లి ఆతిజి అది రంకు బూలానికాద్ ఇజి ఇన్వెర్.

4 అయాలెకెండెనె మా తంబెరిజాండె, యేసుప్రబు వెట మీరుబా సాతిలెకెండె ఆతిదెర్. అందెజె దేవుణు మోసెజ్ సిత్తి రూలుజ్ లోజినిబాణిజ్ మీరు డిఃబె ఆతిదెర్. మాసి సాతికాద్ మరి ఒరెన్ వన్నిజ్ పెండ్లి ఆతిలెకెండె ఏలు మీరు, సాతివరిబాణిజ్ దేవుణు నిక్తి క్రీస్తువెట కూడిఃతిదెర్. ఎందానిజ్ ఇహిజి, మా బత్కుదాన్ దేవుణువందిజ్ నెగ్గి పట్కు పండెదెజ్ ఇజి.

5 ఒడఃలోది సెఇ ఆసెజ్ వజి కిదెజ్ ఆస ఆని మన్సు మజి అడిజిమహివలె పాపం కిబిస్తెజ్ తగితి ఆసెజ్ మా ఒడఃలోది బాగమ్కాజ్ ఏలుబడిః కిజి మహి. దేవుణు మోసెజ్ సిత్తి రూలుజ్ మాటు నెస్తవలె యా ఆసెజ్ పిరితిజ్ పాపం కిజి మాటు సావు తపిసిని పట్కు పండిస్తాట్.

6 గాని ఏలు యేసుప్రబు వెట సాతిలెకెండె మహిజి రూలుజి వెటిపణి కినిదన్నిదటాన్ డిఃబె ఆతాట్. రాస్తిమహి అయ రూలుజి ఏలు మాటు వెటిపణి కినికార్ ఆవిట్. ఏలు మాటు దేవుణు ఆత్మదిజ్ వెటిపణి కినివరివజి ఉండ్రె కొత్త బత్కిజినాట్.

### దేవుణు మోసెజ్ సిత్తి రూలుజ్

7 ఏలు మాటు ఇనిక వెహ్నాట్? దేవుణు మోసెజ్ సిత్తి రూలుజ్ పాపం కిదెజ్ మన్ని ఆసెజ్ పుటిసినాద్. అందెజె అయ రూలుజ్ సెఇకెజ్ ఇజి వెహ్నాట్? అట్వెట్, ఆహు వెహ్నాజ్ ఆవిద్. గాని పాపం కిజిన ఇజి నాను ఎలాగ నెస్త ఇహిజి, దేవుణు మోసెజ్ సిత్తి రూలుజాణిజ్నె నెస్తమన్సు. ఎలాగ ఇహిజి, ఆఇవరిజ్ మన్ని వనకాజ్ వందిజ్ ఆస ఆమాట్ ఇజి మోసె సిత్తి రూలుదు వెహ్విండ మంజనిక ఇహిజి, అక్క దేవుణు ఎద్దు పాపమ్కు ఇజి నెన్వెతా మరి.

8 ఆఇ వరిజ్ మన్ని వనకాజ్ వందిజ్ ఆస ఆమాట్ ఇజి రూలు మహిజ్నె, నన్ని ఆసెజ్ పుట్టిజ్ నాను వనకవందిజ్ ఆస ఆత. పాపం కిమాట్ ఇజి రూలుజ్ సిల్లెండ మంజనిక ఇహిజి పాపం కిదెజ్ మన్ని ఆస మా ముస్కు ఏలుబడిః కివిద్.

9 రూలుజ్ నెన్విండ మహివలె నాను ఇని బాద సిల్లెండ బత్కిజి మహి గాని రూలుజ్ నెస్తి వెనుక నాను తప్త ఇజి నెస్త. దేవుణుబాణిజ్ దూరం ఆత ఇజి నెస్త.

10 రూలుజి లోజితిజి ఎలాకాలం బత్కిని బత్కు వానాద్ ఇజి నాను ఒడఃబిత్త గాని అయ రూలుజాణిజ్ నా సావుదిజ్ తీర్పు వాత ఇజి నెస్త మన్సు.

11 ఎలాకాలం బత్కిని బత్కు వానాద్ ఇజి నాను మొసెం కిబె ఆత. అయ రూలుజ్ నాను తప్తానె సావుదిజ్ తీర్పు తత్త.

12 అందెజె దేవుణు మోసెజ్ సిత్తి రూలుజ్ దేవుణుబాణిజ్ వాతికెజ్. లోకుర్ ఎలాగ నడిఃదెజ్ ఇజి మన్ని ఆడ్రెజ్ నీతినిజర్దుకెజ్, నెగ్గికెజ్.

13 అహిజి, దేవుణు మోసెజ్ సిత్తి రూలుజ్ నెగ్గికెజ్ గాని నజి సావుదిజ్ తీర్పు తత్త ఇజి వెహ్నాజ్? ఆవిద్, ఆహు ఆవిద్. రూలుజ్ నెగ్గికెజ్నె గాని పాపం కిదెజ్ నజి మన్ని ఆస యా రూలుజాణిజ్ ఒద్దె పెరిక ఆజి తోరె ఆతాదె నాను దేవుణుబాణిజ్ దూరం ఆత. రూలుజ్ ఎందానిజ్ సిత్తాన్ ఇహిజి పాపం కిదెజె మన్ని మా మన్సు తోరిస్తెజె. రూలుజి వజి బత్కిదెజ్

అట్లండ, మాటు పాపం కినికాట్ ఇజ తోరిస్తెజె ఇక్కెజ్ పణిదిజ్ వాతె.అహె మాటు ఎస్సానో పాపం కినికాట్ ఇజ నెస్తెజె యా రూలుజ్ పణిదిజ్ వాతె.

14 దేవుణు మోసెజ్ సిత్తి రూలుజ్ దేవుణు ఆత్మదాన్ వాతికెజ్ ఇజి మాటు విజేటె నెసినాట్. గాని నాను ఇహిజ నావందిజె ఎత్తు కిజిని మన్నుదాన్ మన్ను. పాపం కిదెజ్ మన్ని ఆసదిజ్ ఒరెన్ వెటిపణి కినివన్నిలెకెండ్ లోజిజి మంజిన.

15 ఎలాగ ఇహిజ, నాను కినికెజ్ ఎందానిజ్ అహె కిజిన ఇజి నాను అర్థం కివి. కిన ఇజి నండో సుట్టు ఒడెబినికెజ్ కివిండ అజిన. కిదెజ్ ఇస్టం సిల్లికెజ్ నండో సుట్టు కిజిన.

16 కిదెజ్ ఇస్టం సిల్లి సెకెజ్ నాను కినివెలె ఉండ్రె నెసిన. ఇనిక ఇహిజ దేవుణు రూలుజ్ నెగ్గికెజ్ నె ఇజి నెసిన.

17 అందెజె, కిదెజ్ ఇస్టం సిల్లి సెకెజ్ నాను కినివెలె, అక్క నాను ఆవి, నా లొఇ మన్ని పాపమనె అక్కెజ్ కిబిసినె.

18 ఒడెబినికెజ్ సెకె ఆసెజ్ వందిజ్ ఎత్తు కిని నా మన్నులొఇ నెగ్గికెజ్ ఇనికెజ్ సిల్లు ఇజి నాను నెసిన. ఎలాగ ఇహిజ, నెగ్గికెజ్ కిదెజ్ ఇస్టం మనాద్ గాని కిదెజ్ అట్వి.

19 కిన ఇజి ఒడెబిత్తి నెగ్గి పణిజ్ నాను కివి. కిదెజ్ ఆవిద్ ఇజి ఒడెబిత్తి సెకె పణిజ్ నె కిజిన. కిత్తిజ

20 కిదెజ్ ఆవిద్ ఇజి ఒడెబిత్తి సెకె పణిజ్ కిత్తిజ అక్క కినిక నాను ఆవి. నా లొఇ మన్ని పాపమనె అక్కెజ్ కిబిసినె.

21 అహిజ, ఇనిక జర్గిజినాద్ ఇహిజ నాను ఇనికాదొ ఉండ్రె నెగ్గికెజ్ కిదెజ్ ఇజి సుడెతిజ సెకెకె కిజిన.

22 ఎందానిజ్ ఇహిజ దేవుణు రూలుజ వందిజ్ నాలొఇ గొప్ప సర్గ ఆజిన.

23 గాని మరి ఉండ్రె సత్తు నా లొఇ ఏలుబడి: కినిక నాను సుడెజిన. నాను కిన ఇజి సుడెజిని దన్నిజ్ అయ సత్తు నావెట కట్టాడజినాద్. పాపం కిదెజ్ నా ఒడెబిల్లి బాగమక లొఇ మన్ని ఆసెజి అడిగి నజి ఇడ్డెజ్ అయ సత్తు సుడెజి మంజినాద్. అందెజె గెల్లిస్తెజ్ అట్విండెజిన.

24 ఒబ, ఒబ దిన్నివందిజ్ మన్నుదు గొప్ప కన్ఠమాతి మణిసి నాను. సావుదిజ్ తీర్పు వాతి యా ఒడెబిదాన్ నజి డిబిస్సికాన్ ఎయెన్బా మంజినిక ఇహిజ బాగ మహాద్మరి.

25 మా ప్రబు ఆతి యేసు క్రీస్తు వెటనె మజి అయ విడుదల వానాద్. దిన్ని వందిజ్ నాను దేవుణుదిజ్ వందనమ్కు వెప్పిన. అహిజ దేవుణు సిత్తి రూలుజ లొజెదెజ్ సుడెజిన. గాని ఒడెబిది సెకె ఆసెజ్ కిదెజ్ ఆస ఆని నా మన్ను నజి అడిజి దన్ని అడిగి నజి ఇడ్డెజినాద్. అందెజె నాను ఏలుబా పాపమదిజ్ వెటిపణి కినికాన్ లెకెండ్.

## 8

### దేవుణు ఆత్మ నడిపిసిని బత్తు

1 అందెజె ఏలు యేసుక్రీస్తు మున్ను నమకం ఇడ్డె దేవుణు ఎద్రు నీతినిజయ్కార్ ఆతివరిజ్ సిక్స సిల్లెద్.

2 ఎందానిజ్ ఇహిజ, యేసుక్రీస్తుదాన్ వాతి కొత్త బత్తు. బత్తిదెజ్ దేవుణు వన్ని ఆత్మ మజి సిత్త మనాన్. అయ ఆత్మ సత్తుదాన్ పాపం కిదెజ్ మన్ని ఆసదాన్ మాటు డిబె ఆత మనాట్. అహె సావుని సిక్స తపిసిని పాపం కిదెజ్ మన్ని ఆసెజాణిజ్ నాను డిబె ఆత మన్ను.

3 మాటు ఒడెబిది సెకె అసెజాణిజ్ మహిజ్ పాపమదాన్ గెల్లిస్తెజ్ దేవుణు సిత్తి రూలుజ్ అట్విండ మహాద్. ఎందానిజ్ ఇహిజ, ఒడెబిది సెకె అసెజ్ అడ్డు కిత్తాద్. గాని దేవుణు మజి డిబిస్తాన్. ఎలాగ ఇహిజ, మా పాపమకాజ్ వందిజ్ వన్ని సొంత మరిసిజ్ యా లొకమ్దు పొక్తాండ్రె, ఒడెబిది సెకె ఆసెజ్ మా మున్ను ఏలుబడి: కినిదన్నిదటాన్ మజి డిబిస్తాన్. వన్ని మరిసి మా లెకెండ్ ఒడెబిదాన్ పుట్టాండ్రె మా పాపమకాజ్ వందిజ్ సాతాన్.

4 అందెజె ఏలు దేవుణు సత్తుదాన్ దేవుణు రూలుజ లొజెదెజ్ అట్టాట్. ఒడెబిది సెకె ఆసెజి లొజెదెజ్ అక్కర్ సిల్లెద్. ఏలు దేవుణు ఆత్మదిజ్ ఇస్టం ఆతి లెకెండ్ బత్తిదెజ్ అట్టాట్.

5 ఒడెబిది సెకె ఆసెజి లొజెజి బత్తినికార్ దన్ని వందిజె ఎత్తు కిజి మంజినార్. గాని దేవుణు ఆత్మదిజ్ లొజెజి నడిసికార్ దేవుణు అత్మదిజ్ తగిత్తికెజ్ ఒడెబినార్.

6 పాపం కిదెజ్ ఒడెబిల్లు మన్ని సెకె అసెజి ఏలుబడి: కిని మన్ను మన్నికార్ దేవుణుబాణిజ్ దూరం ఆనారె సానార్. గాని దేవుణు అత్మదిజ్ ఇస్టం ఆతిలెకెండ్ బత్తినికార్ దేవుణువెట బత్తినికార్ పరిలొఇ సొంతి సమదనం మంజినాద్.

7 ఒడెబిది సెకె ఆసెజ్ ఏలుబడి: కిని మన్ను మన్నికార్ దేవుణువెట కుట్ర మన్నికార్. వారు దేవుణు రూలుజ లొజెకెకార్. లొజెదెజ్ అట్విర్.

8 అందెజె ఒడెబిది సెకె ఆసెజ్ ఏలుబడి: కిన మన్ను మన్నికార్ దేవుణుదిజ్ ఇస్టం ఆతివజ నడిదెజ్ అట్విర్.

9 దేవుణు ఆత్మ మీ లోక మహిజ అయ ఆత్మదిజ్ లోజిజి మండ్రెజ్ అట్టిదెర్. ఒడోల్ది సెఇ ఆసెజ్ వందిజ్ లోజిజి మండ్రెజ్ ఎత్తు కిని మన్నుదిజ్ లోజిజి మండ్రెజ్ అక్కర్ సిల్లెద్. క్రీస్తుబాణిజ్ వాజిని ఆత్మ సిల్లికాన్, క్రీస్తుజ్ సెందితికాన్ ఆవన్.

10 గాని మీ లోక క్రీస్తుబాణిజ్ వాజిని ఆత్మ మహిజ మీ ఒడోల్ పాపమ్ దాన్ సానాద్ గాని మీ ఆత్మ బత్కినాద్. ఎందానిజ్ ఇహిజ దేవుణు మీ పాపమ్ కు విజు మాయిప్తాండ్రె నితి మన్నికార్ ఇజి ఇడ్త మనాన్.

11 సాతివరిబాణిజ్ యేసుజ్ మరి బత్కిన్తి దేవుణు ఆత్మ మీలోక బత్కజిమహిజ, సాతివరిబాణిజ్ క్రీస్తుజ్ మరి బత్కిన్తి దేవుణు సాజిసాని మీ ఒడోల్దిజ్ బా బత్కిన్తి. మీలోక మన్ని దేవుణు ఆత్మదాన్ యాక కినాన్.

12 అందెజె తంబెరిజాండె, మాటు ఉండ్రె దన్నిజ్ లోజిజి మండ్రెజ్ బాజిత మన్నికాట్ గాని అక్క ఒడోల్ది సెఇ ఆసెజ్ లోజినిక ఆవద్.

13 ఎందానిజ్ ఇహిజ, మీ ఒడోల్ది సెఇ ఆసెజాణిజ్ ఏలుబడి: కిబె ఆని మన్ను వెప్తాలెకెండ్ నడితిజ మీరు సాన సానార్. గాని దేవుణు ఆత్మదాన్ మీ మన్నుదు మన్ని సెఇ ఆసెజ లాగ్టికొక్తిజ ఎలాకాలం బత్కినిదెర్.

14 దేవుణు ఆత్మ నడిపిసిని వజ నడినికార్ దేవుణు కొడోరె.

15 ఎందానిజ్ ఇహిజ, దేవుణు మజి సిత్తి ఆత్మ మజి తియెల్ తపిసి వెటి పణిమణిసిర్ లెకెండ్ ముందాల్ మహివజ సిక్కు వానాద్ ఇజి తియెలాజి మండ్రెజ్ ఇడ్వన్. గాని మజి దేవుణు కొడోర్ ఇజి ఇడ్త మనాన్. అందెజ మాటు ఏలు దేవుణుదిజ్ అబ్బు ఇజి కూర్తెజ్ ఆనాద్.

16 మాటు దేవుణు కొడోరెనె ఇజి దేవుణు ఆత్మ మా ఆత్మవెట కూడితాండ్రె నిజం వెప్సినాన్ ఇజి మాటు నెసినాట్.

17 మాటు దేవుణు కొడోర్ కాక దేవుణు వన్ని కొడోరిజ్ ఇడ్తిమన్ని ఆస్తిదిజ్ అక్కు మజి వానాద్. దేవుణు క్రీస్తుజ్ ఇడ్తిమన్ని అక్కుజ్ బా క్రీస్తువెట మజి దోహ్ క్కె. ఎలాగ ఇహిజ మాటు క్రీస్తువెట వన్ని గొప్ప గవరం దోహ్ క్కెజ్ ఇహిజ వన్నివెట కస్టమ్ కుబా బరిస్తెజ్ వలె.

**వాని కాలమ్ దు తోర్ని సోకు**

18 యా కాలమ్ దు మజి వాని కస్టమ్ కు సుడతిజ అక్కెజ్ ఏవటిదిక్కెజ్ ఆఉ ఇజి నాను ఒడోబిజిన. గాని వాని కాలమ్ దు దేవుణు మజి తోరిసిని సోకు దన్నిజ్ ఇంక ఎస్సా గొప్ప పెరిక.

19 దేవుణు కొడోర్ ఎయెర్ ఇజి దేవుణు తోరిస్సి కాలం వందిజ్ దేవుణు తయార్ కిత్తికెజ్ విజు ఆసదాన్ ఎద్దుసుడోజి మంజినె.

20 ఎందానిజ్ ఇహిజ దేవుణు తయార్ కిత్తికెజ్ విజు పణిదిజ్ రెవండ సిక్కు సీజి ఇడ్తాన్. ఎలాగ ఇహిజ అక్కెజ్ కిత్తిక ఆవద్. ఉండ్రె దన్ని వందిజ్ వారు ఎద్దుసుడోజి మండ్రెజ్ ఇజి దేవుణునె అక్క జర్పిస్తాన్.

21 ఇనిక ఎద్దుసుడోజి మంజినె ఇహిజ, దేవుణు తయార్ కిత్తికెజ్ విజు ఏలు పాడాజి సాని దన్నిజ్ అడిగి ఆతె మన్నె గాని దన్నిబాణిజ్ దేవుణు డిబిస్సి దన్నిజ్ ఎద్దుసుడోజి మంజినె. వన్ని కొడోరిజ్ తగితి లెకెండ్ గొప్ప జాయ్ కల్గితి మన్ని విడుదల సీనాన్ ఇజి ఎద్దుసుడోజినె.

22 ఏలుదాక, ఏరుకబాని ఆయ్లికొడో: నొప్పిదాన్ అడోబానిలెకెండ్, దేవుణు తయార్ కిత్తికెజ్ విజు ఉండ్రెలెకెండ్ మొరొ ఆజి మంజినె.

23 దేవుణు తయార్ కిత్తికెజ్ విజునె ఆఉ, దేవుణు ఆత్మ దోహ్ క్కె మాటుబా అడోబాజి మంజినాట్. మా లోక మన్ని దేవుణు ఆత్మ ఇహిజ తోలిత దోహ్ క్కె ఉండ్రె ఇనాయం లెకెండ్. వెనుక వాని పూర్తి ఇనాయమ్ దిజ్, ఇహిజ దేవుణు వన్ని కొడోరిజ్ ఇడ్తిమన్ని గొప్ప అక్కువందిజ్ మాటు ఎద్దుసుడోజి మంజినాట్. నస్తివలె మా ఒడోల్ కస్టమ్ దాన్ డిబె ఆనాడ్లె.

24 దేవుణు మజి రక్సిన్తిబాణిజ్ అసి మాటు మజి వాని జాయ్ కల్గితిమన్ని విడుదలవందిజ్ ఎద్దు సుడోజి మంజినాట్. ఎద్దుసుడోజి మంజినిక సుడోతాన్ ఇహిజ ఒరెన్ దన్నివందిజ్ ఎద్దుసుడోజి మండ్రెజ్ అక్కర్ సిల్లెద్ గదె. ఎందానిజ్ ఇహిజ సుడోతి వెనుక దన్నివందిజ్ మరి ఎద్దుసుడోజి మన్ వన్ గదె.

25 గాని మాటు సుడోఇ దన్నివందిజ్ ఎద్దుసుడోజి మహిజ్, దన్నివందిజ్ ఓరిసి మంజినాట్.

26 అయావజనె మా లోకమన్ని ఆత్మ వందితిమన్నివలె దేవుణు ఆత్మ మజి సత్తు సీజినాన్. ఎలాగ పార్దనం కిదెజ్ ఇజి నెన్ ఏండ మాటెబాణిజ్ వెప్తాజ్ అట్ ఇనన్ని గుపె ఆనివలె దేవుణు ఆత్మనె మా వందిజ్ పార్దనం కిజినాన్.

27 మా మన్నుదు ఇనిక ఇజి దేవుణు సూణాండ్రె, దేవుణు ఆత్మ వెప్సిక అర్దం కిజినాన్. అక్క ఇనిక ఇహిజ దేవుణు ఆత్మ దేవుణు వెట ఎలాగ పార్దనం కిదెజ్ ఇజి దేవుణు ఆస ఆజినాండ్రె అయావజ దేవుణు ఆత్మ వరివందిజ్ పార్దనం కిజినాన్.

**విజువనకాజ్ మున్ను గొప్పజ గెలిస్సాట్**

28 దేవుణుని ప్రేమిని వరించే వాండ్లు ఏర్పాటు కిత్తిదన్నిజ్ ఎర్లిస్తవరిజ్, విజు నెగెండ్ జర్పిసినాన్ ఇజి మాటు నెసినాట్.

29 దేవుణు ముందాల్ నె వన్నిజ్ నమ్మిని వరిజ్ నెస్తాండ్రె వరిజ్ ఎర్లిస్తాన్. వన్ని మరిసిలెకెండ్ ఆనార్ ఇజి దేవుణు వరిజ్ కేట ఇడ్తాన్. ఆవె కిత్తిజ్ క్రీస్తు దేవుణుని పెరిమరిసి లెకెండ్ ఆనాన్. దేవుణు కొడెఃరాతి మాటు యేసుజ్ తంబెరుజు లెకెండ్ ఆనాట్.

30 ఎయెర్ దేవుణుని నమ్మినార్ ఇజి దేవుణు ముందాల్ నె నెస్తాన్. వరిజ్ దేవుణు కూకాన్. దేవుణు కూక్తిజ్ వన్నిడగు సాహివరిజ్ వరి పాపమకు విజు సెమిస్తాండ్రె దేవుణు వెట కూడిఃత్తికార్ ఇజి ఇడ్తాన్. కూడుఃప్తి వరిజ్ వన్ని గొప్ప జాయ్ సిత్తాన్.

**దేవుణు ప్రేమ**

31 ఏలు దన్నివందిజ్ మాటు ఇనిక వెహ్నాట్. దేవుణు మా దరిజ్ మహిజ మా ఎద్దు ఎయెర్ బా నిల్ ఏర్ ఇజి నె వెహ్నాజ్.

32 దేవుణు వన్ని సొంత మరిసిజ్ సివిండ ఆవెతాన్. గాని గొప్ప కస్టమాతి సావుదిజ్ ఒపజెప్తాన్. క్రీస్తుజ్ మజి సిత్తి దేవుణు, మాటు వన్ని వందిజ్ బత్తిదెజ్ మజి కావాలిస్తెకెజ్ విజు సివిండ్రా? నిజం సినాన్.

33 దేవుణు ఎర్లిస్తవరి ముస్సు తప్పుజ్ మొప్పి వరి ముస్సు గెలిస్తెజ్ ఎయెర్ బా అట్ ఏర్. ఎందానిజ్ ఇహిజ, దేవుణు నె మా పాపమకు సెమిసి మజి వన్ని వెట కూడుఃప్త మనాన్.

34 మజి సిక్స సీదెజ్ ఇజి ఎయెన్ బా తీర్పు తీరిస్తెజ్ అట్ ఏర్. మజి సిక్స సీదెజ్ ఇజి యేసు తీర్పు సీనాండ్రా? సిల్లెన్. ఎందానిజ్ ఇహిజ, మా వందిజ్ సాతి యేసుజ్ దేవుణు వన్ని ఉణెర్ పడఃకాదు బనయి కితాండ్రె గొప్ప గవరం సిత్తాన్. ఏలు క్రీస్తునె మా వందిజ్ దేవుణుబాన్ బతిమాల్లినాన్

35 క్రీస్తుజ్ మా ముస్సు మన్ని ప్రేమదిజ్ అడ్డు కిదెజ్ ఇనిదన్నిజ్ బా అట్ ఏర్. స్రమెజ్ వాతిజ్ బా గాని, కస్టమకు వాతిజ్ బా గాని, మాలెజ్ వాతిజ్ బా గాని, కరు వాతిజ్ బా గాని, పొర్పాదెజ్ సాక్కెజ్ సిలితిజ్ బా గాని, ఇని ప్రమాదమకు వాతిజ్ బా గాని, మజి సప్తిజ్ బా గాని క్రీస్తు ప్రేమ ఎసెజ్ బా డిఃన్ ఏండ మంజినాద్.

36 యాకెజ్ విజు దావీదు రాజు రాస్తి లెకెండ్ మన్నె. “మాపు మీ లోకుర్ ఆతాప్ కాక ఆఇకార్ ఎసెజ్ బా మజి సప్తెజ్ ఇజి సుడఃజినార్. గొర్రెజ్ కత్తికార్ వనకాజ్ కొయ్ దెజ్ సుడఃనిలెకెండ్ మజి సప్తెజ్ సుడఃజినార్\*”.

37 యాకెజ్ విజు జర్గితిజ్ బా మాటు క్రీస్తు ప్రేమదాన్ విజు వనకాజ్ ముస్సు గొప్పజ గెలిసినాట్.

38-39 యాక నాను గటిజ నమ్మిజిన. ఇనిక ఇహిజ, సావు ఆతిజ్ బా గాని, బత్తు ఆతిజ్ బా గాని, దేవుణు దూతార్ ఆతిజ్ బా గాని, దెయమక సత్తుజ్ ఆతిజ్ బా గాని, ఏలు జర్గినికెజ్ ఆతిజ్ బా గాని, వాని కాలమదు జర్గినికెజ్ ఆతిజ్ బా గాని, ఏలుబడిః కినికార్ ఆతిజ్ బా గాని, పెరి ఎత్తుదు మన్నికెజ్ ఆతిజ్ బా గాని, పెరి జోరెదు మన్నికెజ్ ఆతిజ్ బా గాని, మరి ఇనికబా గాని దేవుణుని మా ముస్సు మన్ని ప్రేమదిజ్ అడ్డు కిదెజ్ వనకాజ్ అట్ ఉ మా ప్రబు ఆతి యేసుక్రీస్తు మా వందిజ్ కిత్తి గొప్ప పెరి పణిజాణిజ్ దేవుణు వన్ని ప్రేమ తోరిస్తాన్.

**9**

**యూదురు వందిజ్ పవులు విసారిసినాన్**

1-2 ఏలు నాను ఉండ్రె వెహ్నా, అక్క నిజమనె. అబద్దం ఆవెద్. నాను వెహ్నిక నిజమె ఇజి క్రీస్తు నెసినాన్. నాను వెహ్నిక అబద్దం ఆవెద్. నా సొంత జాతి ఆతి యూదురు వందిజ్ నా మన్నుదు గొప్ప బాద ఆజిన. డిఃన్ ఏండ దుకం ఆజిన. నాను వెహ్నిక నిజమనె ఇజి నా మన్నుని దేవుణు ఆత్మ సాసి వెహ్నినార్.

3 నా సొంత జాతి ఆతి యూదురు, క్రీస్తుజ్ నమ్మిదెజ్ ఇజి నాను ఆస ఆజిన. అక్క జర్గిదెజ్ దేవుణు బాణిజ్ నా ముస్సు సయిప్ వాతిజ్ బా, క్రీస్తుబాణిజ్ నజి ఎర్లిస్తెజ్ బా పరవ సిల్లెద్ ఇజి ఒడఃబిజిన.

4 వారు ఇస్రాయేలుదికార్, వన్ని సొంత లోకుర్ ఇజి దేవుణు ఇడ్తికార్. దేవుణు వన్ని గొప్ప గుణమ్ దాన్ ఎయెర్ సిల్లి బాడ్డిదు నడిఃపిస్తెకార్. దేవుణు వరి వెటనె ఒపుమానమకు కిత్తాన్. దేవుణుని ఎలాగ మాడిఃస్తెజ్ ఇజి వరిజె వెహ్నాన్. వరిజె దేవుణు సీన ఇజి ఒపుమానమకు కిత్త మనాన్.

5 వరి అనిగొగొరు ఆతి అబ్రహాం, ఇస్సాకు, యాకోబు ఇనికార్ ఇస్రాయేలు లోకుర్ లోఇ గొప్ప పేరు పొందితికార్. దేవుణు పొక్కు ఇజి ఒపుమానమకు కిత్తి రాజు యా యూదు జాతిలోఇనె లోకు వజ వుట్టాన్. విజేరిముస్సు ఏలుబడిః కిని దేవుణు ఎసెజ్ బా పొగిడః ఆజి మనీన్.

\* 8:36 8:36 కీర్తన 44:22.

6 అహిజ, దేవుణు ఇస్రాయేలు లోకురిజ్ వెహ్తైకెజ్ జర్గివితాద్ ఇజి ఇండ్రెజ్ ఆవిద్. ఎందానిజ్ ఇహిజ, ఇస్రాయేలు లోకుర్ ఇజి వెహ్ ఆనికార్ విజేరె దేవుణుదిజ్ సరియాతి సాంత లోకుర్ ఆవిర్.

7 అబ్రాహాం పొటాదికార్ విజేరె వన్ని తెగాదు పుట్టికార్ ఇజి దేవుణు ఇడ్ఎన్. ఎందానిజ్ ఇహిజ “నీ కొడోః ఆతి ఇస్సాకువెలెహాన్ వానికారె నీ జాతి ఆనార్”, ఇజి దేవుణు అబ్రాహాం వెట వెహ్తా మనాన్.

8 ఎలాగ ఇహిజ, అబ్రాహాం తెగాదు పుట్టికార్ విజేరె దేవుణు కొడోః ఆవిర్. గాని దేవుణు అబ్రాహాముజ్ సిత్తి ఒపుమానం నమ్మితిజ్ దేవుణు కొడోః అబ్రాహాముజ్ సరియాతి తెగాదికార్ ఇజి దేవుణు ఇడ్వాన్.

9 దేవుణు అబ్రాహాం వెట కిత్తి ఒపుమానం ఇక్కాదె. “కాలెహిజ్ యా సమయమ్దు నాను వాన. నస్తివలె నీ ఆల్ని ఒరెన్ కొడోః ఇడ్వాద్లె”.

10 అక్కాదె ఆవిద్, రిబెక పొటాదివరిజ్ ఒరెండ్రె అప్పొసి, ఎయెన్ ఇహిజ మా అనిగొగొ ఆతి ఇస్సాకు.

11-13 ఇస్సాకు ఆల్ని రిబెక పాత డిఃస్తి మహివలె, దేవుణు దన్నివెట వెహ్తాన్. జవ్ల మరిసిర్ పుట్విండ మహివలెనె, వారు తప్పు గాని నెగ్గిక గాని కివిండ మహివలెనె దేవుణు దన్నిజ్ వెహ్తాన్, “పెరికాన్ ఇజిరి వన్నిజ్ అడిగి మంజినాన్లె”, ఇజి దేవుణు యాక వెహ్తా నండొ పంటిజ్ వెనుక ఒరెన్ దేవుణు ప్రవక్త దేవుణు వెహ్తా మాట వెహ్తాన్. “యాకోబుజ్ నాను ప్రేమిసిన, ఏసాపు నజీ పడిఃఇకాన”. ఇజి. ఎందానిజ్ ఇహిజ, వన్ని లోకుర్ వందిజ్ దేవుణుదిజ్ ఉండ్రె ఉదెనం మహాద్. అయాలెకెండ వాండ్రు నడఃపిన్నాన్. లోకుర్ కిని పణిజాణిజ్ ఆవిద్. దేవుణు ఏర్పాటుదానె విజా జర్గిజినె. దేవుణు ఏర్పాటు కినికెజ్ లోకుర్ ఒడఃబినిలెకెండ్రె ఆవిద్.

14 అహిజ, దేవుణు కొడోః ఎయెర్ ఇజి దేవుణు ఏర్పాటు కిత్తిదన్ని లోఇ దేవుణు తేడ సూణికాన్ ఇజి ఒడఃబినిదెర్ను. సిల్లె, దేవుణు అనెయం కినికాన్ ఆవిన్.

15 ఎలాగ ఇహిజ, దేవుణు మోసెవెట ఈహు వెహ్తాన్. “ఎయెన్ ముస్కు దయ తోరిస్సెజ్ నాను ఇస్టం ఆజినానొ వన్నిముస్కు దయ తోరిస్సె. ఎయెన్ ముస్కు కనికారమాదెజ్ ఇజి ఇస్టం ఆజినానొ వన్ని ముస్కు కనికారం ఆజిన”.

16 అందెజె, యాక లోకు ఆసదానె గాని వన్నిపణిజాణిజ్ గాని దొహ్కెకె ఆవిద్. దేవుణు దయదానె యాక జర్గిజినాద్.

17 దేవుణు మాటదు ఈహు మనాద్. దేవుణు పరోరాజు వెట ఇనిక వెహ్తాన్ ఇహిజ, నాను ఎస్సానొ సత్తు మన్నికాన్ ఇజి నీ వెలెహాన్ విజుబాణి లోకుర్ వెండ్రెజ్ నె నిజి రాజువజ ఇడ్త మన్న” ఇజి.

18 అహిజ ఎయెన్ ముస్కు దయ తోరిస్సెజ్ దేవుణు ఇస్టం ఆనాండ్రొ వన్ని ముస్కు దయ తోరిస్సాన్. ఎయె ముస్కు గర్త కిబిస్సెజ్ ఇస్టం ఆనాండ్రొ వన్ని ముస్కు గర్త కిబిస్సాన్.

**దేవుణు విజు జర్పిసినాన్**

19 ఏలు మీరు మరి వెహ్పిదెర్పు. దేవుణు ఇస్టమ్దిజ్ ఎయెన్బా ఎద్రిస్సెజ్ అట్విన్గదె. మరి దేవుణు ఇస్టం వజ లోకుర్ కిదెజ్ ఇజి విజు జర్పిస్సివలె, తప్పు కిత్తార్ ఇజి లోకుర్ వందిజ్ దేవుణు ఎలాగ వెహ్తాజానాన్?

20 గాని దేవుణు ఎద్దు వర్గిదెజ్ లోకు నీను ఎయి?. “తయార్ కిత్తి వన్నివెట, తయార్ కిబె ఆతికెజ్ ఎందానిజ్ నజీ ఈహు తయార్ కిత్తి ఇజి వెన్బాదెజ్ ఆనాదా?

21 కుండెజ్ తయార్ కినివన్నిజ్ ఉండ్రె ముదదాన్ రుండి రకమ్ది కుండెజ్ తయార్ కిదెజ్ అక్కు మనాద్గదె?. ఉండ్రె కుండ లోకుర్ సుడఃజి ఇక్క ఎస్సా నెగ్గిక ఇజి వహ్పివందిజె మరి ఉండ్రె కుండ మాముల్ పణిదిజ్ ఇడ్పి వందిజ్.

22 దేవుణుదిజ్బా లోకుర్వెట ఇస్టమాతి వజ కిదెజ్ అక్కు మనాద్. పాపం కిని వరి వెట వన్ని నండొ కోపమ్దాన్ వాని గొప్ప సత్తు తోరిస్సెజ్ ఆస ఆజినాన్. గాని వరివెట దేవుణు వెటనె కోపం ఆవిండ మహిజ, నాసనం వందిజ్ ఇడె ఆతి మన్ని వరి వెట కోపం ఆవిండ ఓర్పుదాన్ మంజినాన్.

23 ఎందానిజ్ ఇహిజ, వన్ని గొప్ప దయ దొహ్కె మజి, వన్ని గొప్ప జాయ్ వందిజ్ తయార్ కిత్తివరిజ్ దేవుణు వన్ని గొప్ప జాయ్ తోరిస్సెజ్ ఆహె కిత్తాన్ ఇహిజ మాటు ఇనిక వెహ్పాట్?

24 ఏర్పాటు కిబె ఆతి మాటు ఎయెర్ ఇహిజ, యూదురిని యూదురు ఆఇజాతికార్బా.

25 యూదురు ఆఇ జాతిదివరిజ్ ఎర్లిసినివందిజ్ హుసెయ ప్రవక్త వెట దేవుణు ఈహు వెహ్తాన్. “నా లోకు ఆఇ వరిజ్ ఏలు నా లోకుర్ ఇజి కూక్కు. నాను ముందాల ప్రేమ తోరిన్ ఇ వరిజ్ నాను ప్రేమిసినికార్ ఇజి కూక్కు”.

26 దేవుణు ఆఇ జాతిదివరి వందిజ్ వెహ్తా మాటెజ్ హుసెయ మరి వెహ్తాన్. “మీరు మా లోకుర్ ఆఇదెర్ ఇజి నాను వెహ్తాబాన్, బత్కిని దేవుణు కొడోః ఇజి మీరు పేరు ఇడె ఆనిదెర్”.

☆ 9:7 9:7 ఆది 21:12. ☆ 9:9 9:9 ఆది 18:10,14. ☆ 9:11-13 9:11-13 ఆది 25:23. ☆ 9:11-13 9:11-13 మలా 1:2,3. ☆ 9:15 9:15 నిర్గమ 33:19. ☆ 9:17 9:17 నిర్గమ 9:16. ☆ 9:25 9:25 హోసెయ 2:23. ☆ 9:26 9:26 హోసెయ 1:10.

27 యెసయ ప్రవక్త ఇస్రాయేలు లోకుర్ వందిజ్ ఇనిక వెహ్తాన్ ఇహిజ, “ఇస్రాయేలు సమ్దరం ఒడ్డుదు మన్ని ఇన్కు లెకెండ, లెక్క కిదెజ్ అభీణ నస్సా లోకుర్ అతిజ్బా, వరిలోఇ ఉండ్రి ఇజిరి గుంపుదిజ్నె దేవుణు రక్కిస్సాన్.

28 ఎందానిజ్ ఇహిజ దేవుణు అల్పయం ఆవండ యా లోకం ముస్సు తీర్పు కినాండ్రె వన్ని పణి వెటనె పూర్తి కినాన్లె”,

29 దేవుణు కనికారం తోరిన్ఇజ్ ఎయెన్బా సిక్కుదాన్ తప్తె ఆవన్. యెసయ ప్రవక్త ముందాల్ వెహ్తాలెకెండ, “విజు దన్నిజ్ అతికారం మన్ని దేవుణు మా కొడొకొక్కారిజ్ ఇడవండ పూర్తి సప్తాన్ ఇహిజ, మాటుబా సాదోము గొమొర పట్టుమది వరిలెకెండ పూర్తి పాడాఃత మహాట్సు”. దేవుణు అయ పట్టుమదు మహివరిజ్ పూర్తి విజేరిజ్ సప్తాన్.

**యూదురు గెలిస్తెజ్ అట్వండ ఆజినార్**

30 అహిజ, ఏలు ఇనిక వెహ్తాజ్? దేవుణు వరిజ్ నీతినిజయ్తి మన్నికార్ ఇజి ఇడ్డెజ్ యూదురు ఆఇకార్ సుడవితార్ గాని దేవుణు వరిజ్ నీతినిజయ్తి మన్నికార్ ఇజి ఇడ్డాన్. క్రీస్తు ముస్సు నమకం ఇడ్డెజ్ నీతినిజయ్తి మన్నికార్ ఇజి ఇడ్డాన్.

31 గాని ఇస్రాయేలు లోకుర్ ఇహిజ దేవుణు మోసెజ్ సిత్తి రూలుజ్ లోజితిజ్ నీతి మన్నికార్ ఆనార్ ఇజి నండొ సుడఃతార్ గాని అట్వండ ఆతార్.

32 ఎందానిజ్ ఇహిజ వారు దేవుణు ముస్సు నమకం ఇడవితార్. గాని వరి పనిజాణిజ్ నీతినిజయ్తికార్ ఆనార్ ఇజి నంబ సుడఃతార్. అందెజె దేవుణు క్రీస్తు ఇజి ఎర్లిసి వన్ని ముస్సు అడ్డు అతి పణుకు ముస్సు అర్నిలెకెండ వారు తొరో ఒడిఃజి అర్తార్.

33 యాక ప్రవక్త రాస్తి లెకెండ మనాద్. “సుడఃదు, నాను సియెన్దు ఉండ్రి పణకు నిల్పిన. అక్క అడ్డు ఆనాదె లోకాజ్ తొరో ఒడిఃజి అర్పాద్. గాని వన్ని ముస్సు నమకం ఇడ్డికాన్ సిగు ఆవన్.”

**10**

1 తంబెరిజాండె, నా సొంత జాతి అతి యూదురిజ్ దేవుణు రక్కిస్తెజ్ ఇజి నాను గొప్ప ఆస ఆజి పార్లనం కిజిన.

2 వారు దేవుణు వందిజ్ గొప్ప ఉసారదాన్ మన్నికార్ గాని దేవుణుదిజ్ పూర్తి నెన్వీర్ ఇజి వరివందిజ్ నాను వెహ్సిన.

3 ఎందానిజ్ ఇహిజ, దేవుణు లోకురిజ్ ఎలాగ నీతినిజయ్తికార్ ఇజి ఇడ్డాన్ ఇజి వారు అర్దం కివీర్. నీతినిజయ్తికార్ ఇజి దేవుణు ఇడ్డివందిజ్ లోకు ఎలాగ నడిదెజ్ ఇజి దేవుణు తోరిస్తి సర్దు నడివండ నీతినిజయ్తికార్ ఆదెజ్ ఇజి వారు వరి సొంత రూలుజ్ ఇడ్డాన్.

4 క్రీస్తు వాతిజ్ ఏలు దేవుణు మోసెజ్ సిత్తి రూలుజ్ లోకాజ్ దేవుణుబాన్ కూడువ్విద్. క్రీస్తుముస్సు నమకం ఇడ్డికార్ విజేరిజ్ దేవుణు వన్నిబాన్ కూడుప్పాన్.

**విజేరి వందిజ్ ఉండ్రి కొత సరి**

5 దేవుణు మోసెజ్ సిత్తి రూలుజాణిజ్ నీతినిజయ్తి మన్నికాన్ ఆదెజ్ సుడఃజిని వన్ని వందిజ్ మోసెబా రాస్త మనాన్. ఇనిక ఇహిజ “రూలుజ్ వజ నడిదెజ్ ఆస ఆనికాన్ వనకదటాన్ బత్తిదెజ్వలె”

6 గాని నమకం ఇడ్డివందిజ్ నీతినిజయ్తి మన్నికార్ ఇజి దేవుణు ఇడ్డిదన్ని వందిజ్ మన్ని మాటాదు మాటు ఇని ఇనికెజ్ ఆవద్ ఇజి వెహ్తా మనాద్. ఇనికెజ్ ఇహిజ “రక్కణ దోహ్కాద్ ఇజి పరలోకమ్దు ఎక్కి క్రీస్తుజ్ అడిగి తత్తెజ్ ఎయెన్ సొనాన్ ఇజి మీ మన్నుదు వెహ్తాజ్ ఆవద్”.

7 అయాలెకెండ సాతివరిబాన్ అయాలోకమ్దు సొన్ని క్రీస్తుజ్ బాణిజ్ తత్తెజ్ ఎయెన్ సొనాన్ ఇజి మీ మన్నుదు వెహ్తాజ్ ఆవద్.

8 గాని అయ మాట ఇనిక వెహ్సినాద్? ఇనిక వెహ్సినాద్ ఇహిజ, “దేవుణు మాట డగ్రునె మనాద్. అయ మాటెజ్ మీ వెయుదునె మన్నె, వెహ్తాజ్ ఆనిదెర్. మీ మన్నుదు మన్నె, ఒడ్కుబిదెజ్ ఆనిదెర్” మాటు సాటిసిని యా మాట క్రీస్తు ముస్సు నమకం ఇడ్డు ఇజినె.

9 అయ మాట ఇనిక ఇహిజ, యేసునె ప్రబు ఇజి ఎయెన్బా లోకుర్ ముందాల వెహ్తాజ్, అక్కాదె ఆవద్, యేసుజ్ సాతివరిబాణిజ్ దేవుణు నిక్తాన్ ఇజి ఎయెన్బా వన్ని గర్బుమ్దు నమ్మిత్తిజ్ దేవుణు వన్నిజ్ రక్కిస్సాన్.

10 ఇనిక ఇహిజ, మీ మన్నుదు నమ్మిత్తిజ్ దేవుణు మిజి వన్నిబాన్ కూడుప్పాన్. అక్కాదె ఆవద్, యేసు నీ ప్రబు ఇజి లోకుర్ ముందాల వెహ్తాజ్ దేవుణు నిజి రక్కిస్సాన్లె.

11 దేవుణు మాటాదు ఇనిక రాస్త మనాద్ ఇహిజ, క్రీస్తు ముస్సు నమకం ఇడ్డికాన్ ఎయెన్బా సిగు ఆవన్.

☆ 9:28 9:28 యెసయ 10:22,23. ☆ 9:29 9:29 యెసయ 1:9. ☆ 9:33 9:33 యెసయ 8:14; 28:16. ☆ 10:5 10:5 లేవి 18:5. ☆ 10:8 10:8 ద్వీతీ 30:14.

12 యూదురుజ్ గాని ఆఇజాతిది వరిజ్ గాని దేవుణు ఉండ్రెలెకెండ సూణాన్. వాండ్రు ఒరెండ్రె విజేరిజ్ ప్రబు ఆతిజ్, వన్నిజ్ లొస్సివరిజ్ విజేరిజ్ వాండ్రు నండ్రె దీవిస్సాన్.

13 యాక ఒరెన్ ప్రవక్త వెహ్తాలెకెండె, “నజి రక్సిన్అ ఇజి దేవుణు వెట వెహ్వివరిజ్ విజేరిజ్ దేవుణు రక్సిస్సాన్”✧.

14 గాని యూదురు వందిజ్ సెగొండార్ వెహ్సినార్ను. క్రీస్తుముస్సు నమకం సిల్లిజ “నజి రక్సిన్అ”, ఇజి క్రీస్తు వెట ఎలాగ ఇనార్? క్రీస్తువందిజ్ వెండ్రెజ్ ఇహిజ వెన్ఇకార్ ఎలాగ వన్నిజ్ నమ్మినార్? ఎయెరిజ్బా క్రీస్తువందిజ్ నెస్పిన్ఎండ మహిజ వారు ఎలాగ వెనార్?

15 ఎయెరిజ్బా దేవుణు పొక్ఎండ మహిజ సాటిస్సికార్ ఎలాగ సొనార్. దన్నివందిజె దేవుణు మాటాదు ఈహు రాస్త మనాద్. “దేవుణు సువార్త వెహ్తాజ్ సొన్నినిక ఎస్సా గొప్ప నెగ్గిక”✧.

16 దన్నిజ్ నాను వెహ్సిన. క్రీస్తువందిజ్ వెహ్తాజ్ దేవుణు లోకాజ్ పొక్తాన్ గాని విజేరె సువార్తదిజ్ లొజిఎతార్. దిన్నివందిజ్ యెసయ ప్రవక్త ఇనిక వెహ్తాజ్ ఇహిజ, “ప్రబు, మాపు వెహ్తా మాటెజ్ ఎయెర్బా వెన్ఎతార్✧”, ఇజి.

17 అహిజ క్రీస్తువందిజ్ విహ్తిజానె నమకం ఇడ్వార్. ఎయెర్బా సువార్త సాటిస్తిజానె క్రీస్తు వందిజ్ వెండ్రెజ్ ఆనాద్.

18 గాని నాను వెన్బాజిన, “యూదురు సువార్త వెన్ఎరా?”, “నిజమె వెహార్”, ఇజి వెహ్సా. కీర్తనదు రాస్తి మన్ని లెకెండ, దేవుణు వందిజ్ వారు వెహ్తాక లోకమదు విజు బాడ్డిజ మన్నికార్ వెహార్. అందిదెజ్ అట్ఇ బాడ్డిదుబా దేవుణు వందిజ్ మాటెజ్ అందితె మన్నె✧.

19 మరి ఉండ్రె ప్రస్న వెన్బాన, “సువార్త వందిజ్ యూదురు అర్దం కితారా? సెగొండార్ అర్దం కితార్ గదె. దేవుణు ఇస్రాయేలు లోకాజ్ దిన్నివందిజ్ వెహ్తాక మోసె వెహ్తాన్, “యూదురు ఆఇజాతిది వరివెట మిజి గోస కిబిస్సాలె. అర్దం కిదెజ్ అట్ఇ వరిజ్ నాను దీవిస్సాలె”✧

20 యెసయ ప్రవక్తబా దిన్నివందిజ్ గటిజ రాస్త మనాన్, “నజి రెబాఇవరిజ్ నాను దొహ్కృ. నజి వెన్బాఇవరిజ్ నాను తొరె ఆన”✧.

21 గాని ఇస్రాయేలు లోకుర్ వందిజ్ దేవుణు ఇనిక వెహ్తాజ్ ఇజి యెసయ రాస్తాన్, “నా మాటదిజ్ లొజిఎండ నా వెట ఎద్రిసిని నా లోకు వందిజ్, వారు మర్లి వానిదాక నాను ఎద్రుసుడేజి మంజిన”✧.

# 11

యూదురిజ్ దేవుణు దయ తొరిస్సాన్.

1 అహిజ నాను వెన్బాజిన, దేవుణు వన్ని సొంత లోకుర్ ఆతి యూదురిజ్ డిస్త సిత్తాండ్రా? సిల్లెన్, ఎస్సెజ్బా డిన్ఎన్. ఎలాగ ఇహిజ నానుబా యూదువాండ్రునె. అబ్రహాం తెగాదు పుట్టి బెన్యామిను కులమదు పుట్ట మన్న. గాని దేవుణు నజి డిన్ఎత్తాన్.

2 సిల్లె దేవుణు ముందాలనె కూక్లి వన్ని లోకుర్ ఇజి కేటకిత్తి వరిజ్ నెక్సిపొక్ఎత్తాన్. ఏలియ ప్రవక్త దేవుణువెట మొరొ అతాన్ ఇజి దేవుణు మాటాదు రాస్తిమన్నిక గుర్తు కిజినిదెర్గదె. వాండ్రు ఇస్రాయేలు లోకుర్ వందిజ్ ఇనిక వెహ్తాజ్ ఇహిజ,

3 “ప్రబువా నిజి మహి ప్రవక్తరిజ్ విజేరిజ్ వారు సఫ్తార్. నిజి సంత సుర్లి సీని మాలి పీటెజ్ వారు డెయ్య పొక్తార్. నిజి నమ్మిని వరి లొఇ నాను ఒరెనె మిగిలిత మన్న. ఏలు నజిబా సప్తెజ్ సుడేజినార్✧”.

4 గాని దేవుణు వన్నిజ్ ఇనిక వెహ్తాజ్ ఇజి గుర్తు మన్నిదెరా?. “నీను ఒరిదె ఆఇ బయాలు ఇని దెయమ్దిజ్ మాడిన్ఇ ఏడు వెయిజ్ లోకురిజ్ నావందిజ్ నాను కేట ఇడ్డ మన్న✧”.

5 అయాలెకెండె యా కాలమ్దుబా దేవుణు యూదురి లొఇ ఉండ్రె ఇజిరి గుంపుదిజ్ కేట ఇడ్తాన్. వన్ని దయాదర్మమ్దానె వరిజ్ కేట ఇడ్తాన్.

6 లోకుర్, వారు కిత్తి నెగ్గి పణిజ వందిజ్ ఆవద్ గాని, దేవుణు దయాదర్మమ్దానె వన్నిముస్సు నమకం ఇడ్డెజ్ అట్టార్. ఎందానిజ్ ఇహిజ వారు కిత్తి నెగ్గి పణిజ్ వందిజ్ దేవుణు వరిజ్ ఎర్లిస్తాన్ ఇహిజ, వన్ని గొప్ప దయ సెడినె దొహ్కృక ఆవద్గదె.

7 అందెజె ఇనిక జర్గితాద్ ఇహిజ, ఇస్రాయేలులోకుర్ నండ్రెండార్ నండ్రె ఆసదాన్ రెబాతిక వరిజ్ దొహ్కృఎత్తాద్. దేవుణు ఎర్లిస్తి ఇడ్డి ఇజిరి గుంపుదివరిజె అక్క దొహ్కృద్. మిగిలిత్తికార్ దేవుణు వందిజ్ ఇనికబా నెస్పెజ్ అట్ఇ లెకెండ దేవుణు కిత్తాన్.

✧ 10:13 10:13 యోవేలు 2:32. ✧ 10:15 10:15 యెసయ 52:7. ✧ 10:16 10:16 యెసయ 53:1. ✧ 10:18 10:18 కీర్తన 19:4.  
 ✧ 10:19 10:19 ద్వితీ 32:21. ✧ 10:20 10:20 యెసయ 65:1. ✧ 10:21 10:21 యెసయ 65:2. ✧ 11:3 11:3 1రాజు 19:10,14.  
 ✧ 11:4 11:4 1రాజు 19:18.

8 దిన్నివందిజ్ దేవుణు మాటాదు రాస్త మనాద్. ఇనిక ఇహిజ, దేవుణు వరిమన్ను నిద్ర కినివరి మన్నువజ కిత్తాన్. వరిజ్ కణుకెజ్ మహె గాని సుడొనిదన్నిజ్ అర్థం కివర్. వరిజ్ గిబ్బిజ్ మహె గాని వెహిదన్నిజ్ అర్దం కివర్”\*  
 9-10 దిన్నివందిజ్ దావీదు రాజుబా వెహ్తా మనాన్. వన్ని మున్ను వగాతి వరివందిజ్ ఈహు వెహ్తాన్ “వారు సర్ల అనివలె కిని పణిజ్ వరిజ్ ఉరి లెకెండ్ ఆపిద్. నెగెండ్ మంజినాప్ ఇజి ఒడొబినివలె వెటనె వరి మున్ను నాసనం రపిద్. దేవుణు వందిజ్ నిజమాతిక సెనవిండ అనివందిజ్ వరి మన్ను సీకటి ఆజి సొనీద్. వారు గొప్ప బరుదాన్ వజ్నిలెకెండ్ ఆపిద్”.\*

టోటాదు పిరిజిని ఒలివ మరాతు అడివిది కొమెజ్ అంతు తొహ్తాన్.

11 అహిజ, నాను వెన్బాజిన, యూదురు క్రీస్తుజ్ నెక్తిపొక్తిజ్ దేవుణు బాణిజ్ తెగు సొహార్ ఇజి వెహ్తాజ్నా? ఆవిద్ ఎస్సెజ్బా ఆవిద్. గాని వారు క్రీస్తు మున్ను నమకం ఇడొఇతిజ్, క్రీస్తుజ్ నమ్మితిజ్ వాని అయ రక్కణ దేవుణు యూదురు ఆఇవరిజ్ సిత్తాన్. మజి వానిక వరిజ్ దొహ్కాదా ఇజి యూదురు గోస అదెజ్వలె ఇజి యాక జర్గితాదా?

12 యూదురు క్రీస్తుజ్ నెక్తి పొక్తివలె యూదురు ఆఇజాతిదివరిజ్ దీవన దొహ్కాద్ ఇహిజ, వరిజ్ వాతి నస్టం ఆఇవరిజ్ లాబం ఆతాద్ ఇహిజ, దేవుణు ఎర్లిస్తి ఇడ్తి యూదురు దేవుణుబాన్ మర్ది వానివలె, యా లోకమ్ది విజు జాతిదివరిజ్ మరి ఎస్సానొ గొప్ప లాబమ్కు వానె!

13 ఏలు యూదురు ఆఇ మిజి నాను వెహ్సిన. యూదురు ఆఇవరిజ్ అపొస్తుడు వజ దేవుణు నజి ఇడ్తిజ్ దన్నివందిజ్ గొప్పజ గవరం దొహ్కా మన్ను.

14 దేవుణు నజి ఒపజెప్పి యా పణి కిజి ఎలాగబా నా సొంత జాతి ఆతి యుదురిజ్ గోస పుటిస్తిజ్ ఇజి నాను సుడొజిన. ఎందానిజ్ ఇహిజ మిజి దేవుణు దీవిస్తిలెకెండ్ వరిజ్ దొహ్కెజ్ ఇజి వారుబా ఆస ఆతిజ దేవుణు వరిలోఇ సెగొండారిజ్బా రక్కిస్సాన్.

15 దేవుణు మా సొంత లోకుర్ ఆతి యూదురు నండొండార్ నెక్తి పొక్తివలె యా లోకమ్దు మన్ని ఆఇజాతిది వరిజ్ నండొండారిజ్ వన్నిబాన్ కూడుఃప్తాన్, అహిజ దేవుణు యూదురుజ్ వన్నిబాన్ కూడుఃప్పివలె ఇనిక వానాద్? సావుదాన్ బత్కునె వానాద్.

16 ఉండ్రీ దూరు ముదదాన్ తొలిత సుహ్తాక దేవుణుదిజ్ సీనిక ఇహిజ అయ ముద విజు దేవుణుదిజ్ సిత్తి లెకెండ్. అయవజనె యూదురు దేవుణు లోకురె. ఎందానిజ్ ఇహిజ, వరి అనిగొగొరుబా దేవుణు లోకురె. ఉండ్రీ మరాతి వెల నెగ్గిక ఇహిజ అయ మరాతి కొమెజ్బా నెగ్గికెజ్నె. అయావజనె, యూదురి అనిగొగొరు దేవుణు లోకుర్కాక వరి కొడొః కొక్రాదికార్బా దేవుణు లోకురె.

17 టోటాదు మన్ని నెగ్గి ఒలివ మరాతి కొమెజ్ సెగం రుక్కిపొక్తిలెకెండ్ దేవుణు యూదురి సెగొండారిజ్ నెక్తి పొక్తాన్. అడివిది ఒలివ మరాతి ఉండ్రీ కొమలెకెండ్ యూదురు ఆఇ మిజి టోటాదు మన్ని నెగ్గి ఒలివ మరాతు కూడుఃప్తాన్. అయ నెగ్గి ఒలివ మరాతు కూడుఃప్తిజ్ కొమెజ్, అయ మరాతి వెలెజాణిజ్ కన లాగ్గి సత్తు అనివజ మిజిబా యూదురుజ్ దేవుణు సిత్తి దీవన దొహ్కా మనాద్.

18 మరాతాన్ కొమెజ్ కొయ్జి విసీర్పిలెకెండ్ దేవుణు యూదురిజ్ నెక్తి పొక్తాన్ గాని యూదురు ఆఇ మీరు గర్ల అనిక ఆవిద్. మాపు వరిజ్ ఇంక పెరికాప్ ఇజి మీరు గర్ల ఆతిజ యాక గుర్తు కిదెజ్. ఇనిక ఇహిజ వెలెజ్ బత్కినిక కొమెజాణిజ్ ఆవిద్. వెలెజ్దానె మీరు బత్కిజనిదెర్.

19 మజి కూడుఃప్తెజ్నె దేవుణు యూదురిజ్ నెక్తి పొక్తాన్ ఇజి మీలోఇ ఒరెన్ వెహ్సాన్సు.

20 యాక నిజమె గాని, ఉండ్రీ వెహ్సా. యూదురు క్రీస్తు మున్ను నమకం ఇడొఇ వందిజె దేవుణు వరిజ్ నెక్తి పొక్తాన్. మీరు క్రీస్తుమున్ను నమకం ఇడ్తి వందిజెనె గటిజ నిల్పినిదెర్. అందెజె గర్ల ఆమాట్. జాగర్ల మండ్రు.

21 ఎందానిజ్ ఇహిజ మరాతి కొమెజ్ ఇహిజ యుదురిజ్ దేవుణు నెక్తిపొక్తి లెకెండ్, మీరు నిల్వెండ మహిజ మిజిబా తవ్వెండ నెక్తి పొక్తాన్.

22 యాక గుర్తు కిదు. దేవుణు కనికారమ్దాన్ మనాన్. వాండ్రు కొపమ్దాన్బా మనాన్. వన్నిజ్ నెక్తి పొక్తి యూదురువెట దేవుణు కోపమ్దాన్ మనాన్. గాని యూదురు ఆఇ మిజి దేవుణు కనికారం తోరిసినాన్. గాని దేవుణు తోరిసి కనికారం మీరు నమ్మిత్తిజ్నె మిజి కనికారం తోరిసినాన్. సిల్లిజ మిజిబా కత్తు విసీర్నాన్.

23 యూదురు క్రీస్తుమున్ను నమకం ఇట్టిజ మరాతు కొమెజ్ మరి అంతు తొహ్పిలెకెండ్ దేవుణు వరిజ్ మరి వన్నిబాన్ కూడుఃప్తాన్. ఎందానిజ్ ఇహిజ వరిజ్ కూడుఃప్తెజ్ అట్సాన్.

\* 11:8 11:8 ద్విత్తి 29:4; యెసయ 29:10. \* 11:9-10 11:9-10 కీర్తన 69:22,23.



24 యూదుర ఆఇ మీరు అడఃవిదాన్ తత్తి ఉండ్రీ ఒలివ మరాతి కొమ లెకెండ. టోటాదు పిరిజిని ఒలివ మరాతు యా అడఃవిది కొమెజ్ దేవుణు అంతు తొవ్తాన్. యాక మాముల్ జర్గిదెజ్ కస్టం. అహిజ కత్తివిసిర్తి టోటమొక్కాది కొమెజ్ మరి అయ మరాతు అంతు తొవ్తాజ్ ఎస్సానొ నులు. అయా లెకెండ నెక్తి పొక్తి యూదురిజ్ మరి వన్నిబాన్ కూడుఃపైజ్ దేవుణుదిజ్ ఇని అడ్డు సిల్లెద్.

**దేవుణు యూదురుజ్ రక్సిస్సాన్**

25 నాను ప్రేమిసిని తంబెరిజాండె, ఏలు ఉండ్రీ డాఃజీతి మన్ని గొప్పు నజతి మీరు నెస్తెజ్ ఇజి నాను వెహ్సిన. నాను ఎందానిజ్ వెహ్సిన ఇహిజ దేవుణు మిజి కూడుఃపైవందిజ్ యూదురిజ్ ఇంక తెలిమన్నికాప్ ఇజి మీరు గర్త్ర ఆవిండ మండ్రెజ్ ఇజినె. ఇనిక ఇహిజ యూదురు ఆఇ జాతిదివరి లొఇహాన్ దేవుణుబాన్ వాదెజ్ ఇజి వాండ్రు కేట కిత్తి సస్సాండార్ వన్నిబాన్ కూడుఃవె ఆనిపాక యూదురు దేవుణుదిజ్ నమ్మివండ వరిలొఇ నండొండారి మన్ను వాండ్రు గటి కినాన్.

26-27 యూదురు ఆఇవరి లెక్క పూర్తి ఆతి వెనుక, దేవుణు యూదురుజ్ రక్సిస్సాన్. దేవుణు ప్రవక్త ఒరెన్ రాస్తిలెకెండ అక్క జర్గినాద్. ఎలాగ ఇహిజ, “లోకురిజ్ రక్సిస్సికాన్, దేవుణు లోకుర్ బాణిజ్ వానాన్. నస్తివలె వాండ్రు మా లోకాజ్ వరి పాపం కిత్తి వందిజ్ ఎత్తుకిని బాణిజ్ డిఃబిస్సాన్. నాను ఒప్పుమానం కిత్తిలెకెండ వరి పాపమ్కు నాను లాగ్గు”✧.

28 యూదురు నువార్త నెక్తి పొక్తిజ్ దేవుణు వరిజ్, వన్నిజ్ పడిఃఇవరివజ ఇడ్తార్. గాని, వారు దేవుణు ఎర్లిస్తి లోకుర్ కాక దేవుణు వరిజ్ ప్రేమిసినె మనాన్. ఎందానిజ్ ఇహిజ వన్ని అనిగొగొర్ వెట వాండ్రు ఒట్టు కత్తి దన్నివందిజె,

29 దేవుణు యూదురిజ్ ఏలుబా ప్రేమిసినాన్. ఎందానిజ్ ఇహిజ దేవుణు ఎస్సెజ్బా వెహ్సాలెకెండ కినాన్. వన్ని లోకుర్ ఇజి కూక్తి వరిజ్ ఎస్తివలెబా ప్రేమిస్సాన్. వరిజ్ ఎస్సెజ్బా దీవిస్సాన్.

30 యూదురు ఆఇ మీరు ముందాల దేవుణుదిజ్ లొజివండ మహిదెర్. గాని యూదురు దేవుణుదిజ్ లొజివండ ఆతిజ్ దేవుణు కనికారం మిజి వాతాద్.

31 అయావజనె, యూదురు దేవుణుదిజ్ లొజివండ ఆతిజ్ మిజి ఏలు కనికారం తొరిస్తిలెకెండ వరిజ్బా దేవుణు మరి కనికారం తొరిస్సాన్.

32 విజేరివెట కనికారం తొరిస్సెజ్ ఇజి దేవుణు విజేరిజ్ వారు లొజివండ ఆతి మన్నిదన్ని లొఇనె డిఃస్తి సిత్రాన్.

33 దేవుణు బుద్ది, గెణం ఎస్సానొ గొప్పు పెరిక కొటె. వాండ్రు తీర్మనం కిత్తికెజ్ ఎయెన్బా అర్దం కిదెజ్ అట్వన్. వాండ్రు కిని పణి వందిజ్ ఎయెన్బా అర్దం వెహ్తాజ్ అట్వన్.

34-35 ప్రవక్త దేవుణు మాటదు రాస్తిలెకెండ మనాద్ యాక. ఎలాగ ఇహిజ, “దేవుణు ఒడఃబినికెజ్ ఎయెజ్బా తెలివద్. దేవుణు ఇని ఇనికెజ్ కిదెజ్ ఇజి వన్నిజ్ బుద్ది వెహ్తాజ్ ఎయెజ్బా అట్వన్✧. “ఎయెన్బా దేవుణుదిజ్ ఇనికబా సీదెజ్ సిల్లెద్. అందెజె దేవుణు ఎయెరిజ్బా మర్జి సీదెజ్ అక్కర్ సిల్లెద్✧”.

36 యాక నిజం ఇజి మాటు నెసినాట్. ఎందానిజ్ ఇహిజ, దేవుణు విజు తయార్ కిత్తాన్. అక్కెజ్ విజు మన్నె. వాండ్రు సిత్తి సత్తుదాన్ అక్కెజ్ బత్తిజినె. దేవుణుదిజ్ పొగడిఃదెజ్నె అక్కెజ్ మన్నె. విజేరి లోకుర్ దేవుణుదిజ్ ఎస్తివలెబా గొప్పు గవ్తరం సీజి మనీద్. ఆమెన్.

**12**

**కొత్త బత్తు**

1 అందెజె మా తంబెరిజాండె, నాను మీవెట బతి మాల్లిన, దేవుణు మిజి నిస్సా దయ తొరిస్తివందిజ్ మీరు మిజినె దేవుణుదిజ్ పూజ లెకెండ సీదు. అయ పూజ బత్తిజి మంజిని వజ మండ్రెజ్వలె, దేవుణుదిజ్ కేట ఆతివజ దేవుణుదిజ్ ఇస్టం ఆతివజ మండ్రెజ్వలె. దేవుణుదిజ్ సీదెజ్ తగితి పొగడిఃజి మాడిఃసినిక ఇక్కాదె

2 యా లోకమ్దికార్ బత్తిని వజ దేవుణుదిజ్ పడిఃవండ బత్తిదెజ్ ఆవద్. గాని మీ బత్తు ఆనివందిజ్, మీ మన్ను పూర్తి కొత్తాజ్ కిదెజ్ దేవుణుదిజ్ సరి సీదు. ఆహె కిత్తిజ మీరు ఇనిక కిదెజ్ ఇజి దేవుణు కోరిజనాండ్రొ అక్క ఎమేణిక ఇజి నెసి ఒప్పుకొండెజ్ ఆనిదెర్. దేవుణు మీ వందిజ్ కోరిజనిక నెగికాదె, వన్నిజ్ ఇస్టం ఆతికాదె, ఇని తక్కు సిల్లికాదె.

3 దేవుణు నజి, వన్ని గొప్పు దయదాన్ నజి అపొస్తుడు వజ ఇడ్తాన్. అందెజె నాను మిజి విజిదెరిజ్ వెహ్సిన. నాను ఎలాగ మర్తికాన్ ఇజి ఒరెన్ ఒరెన్ ఒడఃబినివలె మీరు మన్నిదన్నిజ్ ఇంక నండొ మనాద్ ఇజి మీ వందిజ్ ఒడఃబిమాట్. గాని దేవుణు మిజి సిత్తి నమకమ్దిజ్ తగితివజ మిజి మీరె సరిఆతి వజ కొల్ల కిదు.

4 ఉండ్రీ ఒడొల్దు కాల్కు కిక్కు ఇజి రక రకమ్ది బాగమ్కు మనె, వనక వనక పణిజ్ వేరె వేరె మన్నె.

✧ 11:26-27 11:26-27 యెసయ 59:20,21; 27:9; యర్మీయా 31:33,34. ✧ 11:34-35 11:34-35 యెసయ 40:13. ✧ 11:34-35 11:34-35 యోబు 41:11.

5 అయవజనె, మాటుబా నండొండార్ గాని క్రీస్తు వెట కూల తొహ్తాజ్ మాటు ఉండ్రె లెకండ మనాట్. మాటు ఉండ్రె ఒడొల్దిజ్ సెందితికాట్. ఒరెన్ మరి ఒరెన్ వన్నివందిజ్ మనాన్.

6 దేవుణు వన్ని గొప్ప దయ మజి సత్తిజ్ నండొ రకమ్ది వరమ్కు\* సత్తాన్. యా వరమ్కు మాటు నెగెండ వాడుకొండెజ్. దేవుణు సత్తి మాటెజ్ వెహ్తాజ్ అట్టు ఇహిజ అక దేవుణు నీవెట వెహ్తాన్ ఇజి నీను నమ్మిత్తి వజ వెహ్తాజ్.

7 మహివరిజ్ అవ్సరం ఆతికెజ్ కిజి సీదెజ్నా మీ వరం ఇహిజ, అక్క కిదెజ్ దేవుణు మాటెజ్ నెస్సిసి సిదెజ్నా మీ వరం ఇహిజ నెస్సిసి సిదెజ్.

8 మహివరిజ్ దయరం వెహ్తాజ్నా మీ వరం ఇహిజ దయరం వెహ్తాజ్. సీబాజి సినిక మీ వరం ఇహిజ అక్క కల్లి సత్తి మన్సుదాన్ సీదెజ్. సజమ్దిజ్ నడిఃపిసినికాన్ బాగ నడిఃపిస్తెజ్వెలె. బాద ఆతివరిజ్ కనికారం తోరిస్సికాన్, సర్దదాన్ కనికారం తోరిస్తెజ్వెలె.

**ఎలాగ ప్రేమకిదెజ్**

9 మీరు మహివరిజ్ కల్లి సత్తిండ పేమిస్తెజ్. దేవుణుదిజ్ పడిఃఇ వనకబాణిజ్ దూరం మండ్రెజ్. అక్కెజ్ ఒద్దె డిఃస్తెజ్. దేవుణుదిజ్ ఇస్తం ఆతి వనకాజ్ డగ్గు కిదు.

10 సొంత ఇండ్రొణివరి లెకెండ ఒరెన్ మరి ఒరెన్ వన్నిజ్ నండొ ప్రేమిస్తెజ్. మర్యాద సీని దన్నిలోఇ ఒరెన్, మరి ఒరెన్ వన్నిజ్ వాండ్రు నజి ఇంక పెరికాన్ ఇజి మర్యాద సీజి మండ్రెజ్.

11 దేవుణుది సెందితి సజతిజ లొఇ ఉసార్ ఆజి మండ్రు. బండెజ్ ఆమాట్. ప్రబు పణి లొఇ దేవుణు ఆత్మదాన్ ఉసార్ ఆజి పణికిదు.

12 దేవుణు మీ వందిజ్ గొప్ప సజతిజ్ కినాన్ ఇజి ఎద్రు సుడఃజి సర్దదాన్ మండ్రు. కస్తం వానివలె ఓరిసి మండ్రు. పార్దనం కిదెజ్ మన్ని సజతిజ వందిజ్ డిఃన్వండ పార్దనం కిదు.

13 దేవుణుదిజ్ నమ్మిత్తి వరిజ్ ఎయెరిజ్బా ఇనికబా అవ్సరం ఆతిజ వరిజ్ కావాలిస్తెకెజ్ సీదెజ్. దూరమ్దాన్ వాజిని వరిజ్ ఇండ్రొ కూక్కి మిజి మన్నిబాణిజ్ సీజి మర్యాద కిదు.

14 మిజి బాద కినివరి మున్సు కనికారం తోరిన్అ ఇజి దేవుణుదిజ్ పార్దనం కిదెజ్. ఒబ వరిజ్ దీవిస్తెజ్ ఇజి దేవుణుదిజ్ వెహ్తా వరిజ్ సయిప్ సీఅ ఇజి వెహ్తాట్.

15 సర్ద ఆని వరివెట సర్ద ఆజి మండ్రు. దుకం ఆతి వరివెట వరి దుకమ్దు కూడఃజి మండ్రు.

16 ఒరెన్ మరి ఒరెన్వెట ఉండ్రె మన్సు ఆజి మండ్రు. గర్త ఆమాట్. తకుదివరి వెట కూడఃజి మండ్రెజ్ మన్సు ఆదు. నానె గొప్ప బుద్ది మన్నికాన్ ఇజి ఒడఃబిమాట్.

17 మిజి సెఇక కినివరిజ్ మర్రి సెఇకెజ్ కిమాట్. నెగ్గిక ఇజి విజేరె ఒప్పుకొడఃని పణిజ్నె కిదెజ్.

18 విజేరి వెట సమదనమ్దాన్ మండ్రెజ్ ఒద్దె నెగెండ సుడఃదు.

19 నాను ప్రేమిసిని కూలెజాండె, మిజి ఎయెరిబా సెఇక కిత్తిజ వన్నిజ్ మర్రి సెఇక కిమాట్. గాని దేవుణు వన్నిజ్ సిక్కు సీదెజ్ డిఃసిసిదు. దేవుణు మాటదు దన్నివందిజ్ రాస్త మనాద్. ఇనిక ఇహిజ, “లోకు కిత్తి సెఇ పణి వందిజ్ నీను కోపం తీరిస్సా. అక్క నానె తీరిస్సు. నిజి సెఇక కిత్తివన్నిజ్ నాను సిక్కు సీన”, ఇజి దేవుణు వెహ్తానాన్\*.

20 గాని మరి మీరు ఇనిక కిదెజ్ ఇహిజ; నిజి పగాతి వన్నిజ్ బజ కట్టిజ వన్నిజ్ ఉండెజ్ సీఅ. వన్నిజ్ ఎహ్కా కట్టిజ, ఏరు సీఅ. నస్తవలె వాండ్రు సిగు ఆనాండ్రె వన్ని కోపం డిఃస్సాన్”,\* ఇజి రాస్త మనాద్.

21 మరి ఒరెన్ కిత్తి సెఇ పణిదిజ్ తగితి పణి మీరు కిమాట్. గాని మీరు వరిజ్ కిని నెగ్గిపణిజాణిజ్ వరి సెఇ పణిదిజ్ గెలిస్తెజ్.

**13**

**ఏలుబడిః కినివరిజ్ లొజిదు.**

1 విజేరె ఏలుబడిః కినివరిజ్ లొజిజి మండ్రెజ్వలె. ఎందానిజ్ ఇహిజ, ఏలుబడిః కినివరిజ్ అతికారం దేవుణునె సీజినాన్. వరిజ్ ఏర్పాటు కిత్తికాన్ దేవుణునె.

2 అందెజె ఏలుబడిః కినివరిజ్ లొజిఇకార్ దేవుణు ఏర్పాటు కిత్తిదన్నిజ్ ఎద్రిసినార్. వరిజ్ తగితి తీర్పుదొహ్కాద్.

\* 12:6 12:6 వరమ్కు ఇహిజ ఉండ్రె పణికిదెజ్ దేవుణు సీని ఇనాయం ☆ 12:19 12:19 ద్విత్తి 32:35. ☆ 12:20 12:20 సామెత 25:21,22.

3 నెగ్గి పణిజ్ కినివరిజ్ ఆవిద్, సెఇ పణిజ్ కినివరిజె ఏలుబడిః కినికార్ తియెల్ తపిస్సార్. అందెజె ఎయెన్బా ఏలుబడిః కినివరిజ్ తియెల్ సిల్లెండ మండ్రెజ్ ఇహిజ, నెగ్గి పణిజ్ కిజి మండ్రెజ్. నస్తవలె ఏలుబడిః కినికార్ మీ వందిజ్ నెగ్గికెజ్ వెహ్సార్.

4 ఎందానిజ్ ఇహిజ మీ నడిఃమి విజు నెగెండ జర్గిదెజ్ ఇజి పణికినికారె వీరు. దేవుణుదిజ్ పణికిదెజ్ దేవుణు ఏర్పాటు కిత్తికారె వీరు. మీ లోఇ ఎయెన్బా తప్పు కిత్తిజ వాండ్రు తియెల్ ఆదెజె. ఎందానిజ్ ఇహిజ తప్పు కిత్తివరిజ్ సిక్స సీదెజ్ విరిజ్ అతికారం మనాద్. దేవుణు ఏర్పాటు కిత్తిజ్ దేవుణు వందిజ్ పణికినికార్ లెకెండ, వారు తప్పు కినివరిజ్ సిక్స సీనార్.

5 అందెజె అతికారి లోకాజ్ లోజిజి మండ్రెజ్ వలె. సిక్సదాన్ తప్రె ఆదెజ్ ఉండ్రె ఆవిద్, లోజిజి మంజినిక సరి అతికదె ఇజి నెస్తిబా లోజిదెజ్ వలె.

6 ఏలుబడిః కినికార్ దేవుణుదిజ్ పణికిజినార్. వారు అయ ఏలుబడిః కినిపణి వందిజె కాలం విజు గడఃప్పినార్. అందెజె మీరు వరి వందిజ్ పన్నుబా తొప్పినిదెర్.

7 ఎయెరిజ్బా ఇనికబా సీదెజ్ ఇహిజ అక్కెజ్ సీదెజ్. ఎంబెబా పన్ను తొప్తాజ్ మహిజ బాన్ పన్ను తొప్తాజ్. ఎయెరిజ్ మర్యాద సీదెజ్ ఇహిజ వరిజ్ మర్యాద సీదెజ్. ఎయెరిజ్ గవరం సీదెజ్ ఇహిజ వరిజ్ గవరం సీదెజ్.

**ప్రబు మర్లి వాజిని కాలం డగ్రు ఆత మనాద్**

8 ఎయెర్బాన్బా అప్పు తీరిన్ఎండ ఇడమాట్. ఎసెజ్బా ఒరెన్ మరి ఒరెన్ వెట ప్రేమిస్సికాదె అప్పు లెకెండ మనీద్. మహివరిజ్ ప్రేమిస్సికాన్ దేవుణు రూలుజ పూర్తి లోజినాన్.

9 దేవుణు రూలుజ లోఇ రకరకమ్వి రూలుజ్ మనె. వనకలోఇ సెగం ఇనికెజ్ ఇహిజ, “రంకు బులాదెజ్ ఆవిద్. లోకాజ్ సప్తెజ్ ఆవిద్. డొజ కిదెజ్ ఆవిద్. ఆఇవరిజ్ మన్నికెజ్ నజి కావాలి ఇజి సెఇ ఆస ఆదెజ్ ఆవిద్” గాని యా రూలుజ్ విజు కూడుఃప్తిజ, యాకాదె, “నీను నిజి ప్రేమిన్అ☆”, ఇజినె.

10 మహి వరిజ్ ప్రేమిస్తిజ వరిజ్ ఇని తప్పుబా నీను కిఇ గదె. అందెజె మహివరిజ్ ప్రేమిసినికాన్ దేవుణు రూలుజ విజు వనకాజ్ పూర్తి లోజిజినాన్.

11 నాను వెప్తాలెకెండ మీరు కిజి మండ్రెజ్ వలె. ఎందానిజ్ ఇహిజ, మాటు బత్కిని యా కాలం నండొ ముకెలమాతి కాలం ఇజి మీరు నెసినిదెర్. ప్రబు మర్లి వాజి మజి రక్సినిని కాలం డగ్రు ఆత మనాద్ కాక నిద్రదాన్ నిజ్జి తెలి అతివరి వజ జాగర్ల మండ్రు. తొలిత మాటు నమ్మిత్తి మహి కాలమ్దిజ్ ఇంక అయ సమయం డగ్రు ఆత మనాద్.

12 రెయు అందిజి వాజినిలెకెండ మా బత్కుబా అందిజి వాజినాద్. క్రీస్తు మర్లి వాని కాలం డగ్రు ఆత మనాద్. అందెజె సికటిదు కిని సెఇ పణిజ్ విజు డిఃసి సీదెజ్. వేడెఃక విదెమ్దిజ్ సానికాన్ దన్నిజ్ కావాలిస్తికెజ్ తొడుఃగిజి విదెమ్దిజ్ తయార్ ఆనిలెకెండ, సెఇ వనకాజ్ ఎద్రిస్తెజ్ తయార్ ఆజి మండ్రు.

13 సీకటుదు కిని సెఇ పణిజ్ డిఃసి సీజి మాటు జాయ్దు నడిఃసి మండ్రెజ్. కల్లు విందుజ సొన్ని ఉణిజి సొస్తెజ్ ఆవిద్. మొగ కొణ్డోర్ గాని అయ్లి కొణ్డోక్ గాని రంకు బూలాదెజ్ ఆవిద్, టంటెజ్ ఆదెజ్ ఆవిద్, గోస ఆదెజ్ ఆవిద్.

14 మరి ఎలాగ మండ్రెజ్ ఇహిజ, మహి లోకురిజ్ తొర్పివజ మీరు ప్రబు ఆతి యేసుక్రీస్తు లెకెండ మండ్రు. మీ ఒణ్డొల్లి సెఇ ఆసెజి వజ కిజి సర్ల ఆదెజ్ ఇజి ఒడఃబిజి మంజిని మన్నుదాన్ మన్యాట్.

**14**

**అనుమానం ఆని నమ్మితికార్ వందిజ్**

1 ఇని ఇనికెజ్ కిదెజ్ దేవుణు సరి సీనాండ్రొ ఇజి అనుమానం ఆని నమ్మితికార్ మనార్. వారు నమ్మిత్తి దిన్నివందిజ్ పూర్తి అర్లం కిఇకార్ గాని వరిజ్ డగ్రు కిదు. గాని నమ్మితికార్ ఇని ఇనికెజ్ కిదెజ్ ఆనాద్ ఇజి ఒడఃబిని దన్నిలోఇ తేడ వానివలె వరివెట వాదిస్సాట్.

2 విజు తిండ్రెజ్ ఆనాద్ ఇజి ఒరెన్ నమ్మిజినాన్. మరి ఒరెన్ కుసెజ్నె తింజినాన్. ఎందానిజ్ ఇహిజ, వారు నమ్మిత్తి దిన్నివందిజ్ పూర్తి అర్లం ఇంక కివీన్.

3 విజు తినికాన్, విజు తిన్ఇ వన్నిజ్ తక్కుదికాన్ ఇజి సుడదెజ్ ఆవిద్. విజు తిండ్రెజ్ ఆవిద్ ఇజి ఒడఃబినికాన్ విజు తినికార్ తప్పు కిజినార్ ఇజి వెప్తాజ్ ఆవిద్. ఎందానిజ్ ఇహిజ దేవుణు వరిజ్ డగ్రు కిత్త మనాన్.

☆ 13:9 13:9 నిర్గమ 20:13-15,17.

4 మరి ఒరెన్ ఎజమానిజ్ వన్ని పణిమణిసి కినికెజ్ సరియాతికెజ్నో, ఆకెజ్నో ఇజి వెహైజ్ తగితికార్ మీరు ఆకెజ్నో. వాండ్రు కిని పణిజ్ నెగ్గికెజ్నో సెకెజ్నో ఇజి వన్ని ఎజమానినె వెహ్సాన్. అయావజనె నమ్మితికాన్ కినిపణిజి వందిజ్ దేవుణునె తీర్పు కిజి సరిఅతికదో ఆవదో ఇజి వెహ్సాన్. ఎందానిజ్ ఇహిజ సరిఅతిక కిదెజ్ దేవుణు వన్నిజ్ సత్తు సినినాలె.

5 సెగొండార్, ఉండ్రీ రోజు మహి రోస్కాజ్ ఇంక నెగ్గి రోజు ఇజి ఒడొబిజినార్. మరి ఒరెన్ విజు రోస్కు ఉండ్రె లెకెండ్రె సుడొబిజినాన్. ఒరెన్ ఒరెన్ వన్నిజ్ వాండ్రె వన్ని మన్సుదు ఒడొబినిక ఎందానిజ్ ఆహు ఒడొబిజినాన్ ఇజి టోటాజ్ నెసి తిర్మానం కిదెజ్వెలె.

6 ఉండ్రీ రోజు నెగ్గి రోజు ఇజి ఇడ్మికాన్ అక్క ప్రబు వందిజ్ ఇడ్మికాన్. విజు తినికాన్ ప్రబుజ్ వమదనమ్కు వెహ్సా ప్రబుజ్ గవరం సీదెజ్ ఇజి తింజినాన్. విజు తిన్ఇకాన్ తిని వనక వందిజ్ ప్రబుజ్ వందనమ్కు వెహ్సా ప్రబుజ్ గవరం సీదెజ్ ఇజి విజు తిన్ఎండ మంజినాన్.

7 మా లొఇ ఎయెర్బా వన్నిజె సర్ల కిబిసైజ్ ఇజి బత్మిఎన్. వన్ని వందిజె సర్ల కిబిసైజ్ ఇజి సాఎన్.

8 ఎందానిజ్ ఇహిజ మాటు బత్మినివెలె ప్రబుజ్ ఇస్టం కిబిస్సి లెకెండ్రె బత్మిదెజ్. సానివల ప్రబుజ్ ఇస్టం కిబిస్సి లెకెండ్రె సాదెజ్వలె. అందెజె మాటు బత్మితిజ్బా సాతిజ్బా ప్రబుజ్ సెందితికాటె.

9 దినివందిజె సాతి వరిజ్ని బత్మిని వరిజ్ విజేరిజ్ ప్రబు లెకెండ్రె మండ్రెజ్ క్రీస్తు సాజి మర్లి బత్మితాన్.

10 అహిజ, ఎయెర్బా మరి ఒరెన్ వన్నిజ్ తీర్పు తీరిసైజ్ ఆవద్. ఎయెర్బా తకుదికాన్ ఇజి సుడొదెజ్ ఆవద్. ఎందానిజ్ ఇహిజ మాటు విజేటె తప్పు కితికాటో, సరి అతిక కితికాటో ఇజి దేవుణు తీర్పు కిదెజ్ వన్ని ఎద్రు నిల్పాట్.

11 దినివందిజ్ మాటు ఎలాగ నెసినాట్ ఇహిజ, ప్రబు వెహ్సా మాటెజ్ ఈహు రాస్త మనాద్. ఇనిక ఇహిజ, “నాను ఒద్దె నిజం వెహ్సాన, నానె దేవుణు ఇజి లోకుర్ విజేరె నా ఎద్రు ముణుకుజ్ ఊర్సార్. నానె దేవుణు ఇజి లోకుర్ విజేరె ఎద్రు వెహ్సార్”.

12 అహిజ, ఒరెన్ ఒరెన్ కిత్తి దన్నివందిజ్ దేవుణు ఎద్రు లెక్క ఒవజెహైజ్ వలె. దేవుణు తీర్పు తీరిస్సాన్.

13 అందెజె ఆకవరిజ్ తీర్పు తీరిసినిక డిసిసినాట్. అక్కాదె ఆఎండ, మరి ఒరెన్ నమ్మిత్తి వన్నిజ్ తప్పు సరిదు నడిపిసిని ఇనికబా కిదెజ్ ఆవద్ ఇజి మీ మన్సుదు ఒప్పుకోండు.

14 నాను యెసుప్రబు వెట కూడితిజ్ ఉండ్రీ నిజం నెసిన. ఇనిక ఇహిజ, తిండ్రెజ్ ఆవద్ ఇజి దేవుణు వెహ్సా తిండి ఇనికబా సిల్లెద్. గాని ఇనికాదో ఉండ్రీ తినిక ఆవద్ ఇజి ఎయెర్బా ఒడొబిత్తిజి అక్క వాండ్రు తినిక తప్పు.

15 నీను ఇనికదో ఉండ్రీ తిని దన్నిదాన్ మరి ఒరెన్ నమ్మితికాన్ మన్సుదు బాద అతిజి నీను వన్ని ముస్కు ప్రేమ తోరిన్ఇ. నీను తినిదన్నిదటాన్ మరి ఒరెన్ నమ్మిత్తి వన్ని నమకమ్దిజ్ పాడు కిమా.

16 నెగ్గికెజ్ ఇజి ఒడొబిజి నీను కినికెజ్, మరి ఒరెన్ నమ్మితి వన్నిజ్ పాపం కిబిసైజ్ తగితికెజ్ ఇహిజ అక్కెజ్ సెకెజ్ ఇజి వారు వెహ్సార్. అందెజె నెగ్గిక ఇహిజ్బా కిమా.

17 దేవుణు ఏలుబడిః కినిదన్నిజ్ లొజిజి మండ్రెజ్ ఇహిజ, ఇనికెజ్ తిండ్రెజ్ ఉండ్రెజ్ ఇజి రూలుజ్ ఆఉ. గాని దేవుణు ఏలుబడిఃదిజ్ ఎలాగ లొజిదెజ్ ఇహిజ, అత్తు సత్తుదాన్ దేవుణుదిజ్ ఇస్టం ఆతి వజి కిదెజ్, లోకుర్ వెట సమదనమ్దాన్ మండ్రెజ్, మన్సు లొఇ సర్ల నిండ్రెజి మండ్రెజ్.

18 యా లెకెండ్రె క్రీస్తుజ్ లొజినికాన్ దేవుణుదిజ్ ఇస్టం కిబిస్సాన్. లోకుర్ వన్నిజ్ నెగ్గికాన్ ఇజి వెహ్సార్.

19 అందెజె మాటు ఒరెన్ మరి ఒరెన్ వన్నివెట సమదనమ్దాన్ మండ్రెజ్ సుడొదెజ్ వెలె. మాటు ఒరెన్ మరి ఒరెన్ వన్నిజ్ నమకమ్దు సత్తు కిబిసైజ్ సుడొదెజ్ వెలె.

20 ఇని తిండిబా తిండ్రెజ్ ఆనాద్ ఇజి ఒడొబిజి, దేవుణు కిత్తి పణిజ్ పాడొః కిమా దేవుణు సుడొతిజ్ విజు రకమ్ది బోజనమ్కుబా తిండ్రెజ్ అనికెజ్ గాని, నీను తినిక, తిండ్రెజ్ ఆకెజ్ ఇజి మరిఒరెన్ వన్నిజ్ తప్పు కిబిస్సిజి అక్క తినిక తప్పునె.

21 కండ తింజి గాని ద్రాక్కు కల్లు ఉణిజి గాని, మరి నన్నిపణిజ్ ఇనికెజ్ గాని కిత్తిజి అక్క మరి ఒరెన్ నమ్మితి వన్నిజ్ తప్పు కిబిసైజ్ కూడితిజి అక్కెజ్ డిస్సికాదె నెగ్గిక.

22 నిన్ని సజతిజి వందిజ్ నీను నమినికెజ్ నీను ఆకవరిజ్ వెహైజ్ పొని. నిన్ని సజతిజ్ నీనుని దేవుణు నెస్తిజి ఆనె. ఉండ్రీ పణికిత్తి వెనుక, సరి అతిక కితానో, సిలిజి తప్పు కితానో ఇజి అనుమానం ఆవండ మహిజి నీను దేవుణుబాణిజ్ సర్ల తస్సిని.

23 గాని ఉండ్రీ తినిక దేవుణు ఎద్రు సరిఅతికదో ఆవదో ఇజి అనుమానం అనికాన్, అక్క తిహిజి తప్పు కిత్తాన్ ఇజి తీర్పు వానాద్. ఎందానిజ్ ఇహిజ, తిండ్రెజ్ ఆకక ఇజి ఇడ్మిక వాండ్రు తిహాన్. మాటు ఇనిక కిత్తిజ్బా దేవుణు ఎద్రు సరి అతిక కిత్ ఇజి నమకం సిల్లిజి అక తప్పునె.

# 15

1 ఇనియన్లకు సరియైనట్లు కిరీయోస్ ఆనె ఇజి మన్యుడు బాగ నెసిని నమ్మితికాట్ ఆతి మాటు మజి ఇస్టం ఆతికెజ్ ఉండ్రెనె కిజి మండ్రెజ్ ఆవద్. గాని అనుమానం ఆతివరిజ్ మాటు బరిస్తెజ్ వలె.

2 మరి ఒరెన్ నమకమ్దు పిరినివందిజ్ మా లోఇ ఒరెన్ ఒరెన్ వన్నిజ్ నెగ్గికెజ్ కిజి సర్ల కిబిస్తెజ్.

3 క్రీస్తు కిత్తి లెకెండ్ మాటు కినాట్. క్రీస్తు వన్ని సర్ల ఉండ్రె వందిజ్నె తోఎండ దేవుణుదిజ్ ఇస్టం ఆతిలెకెండ్ కిత్తాన్. కీర్తన పుస్తకమ్దు రాస్తి లెకెండ్, “లోకుర్ నిజి నింద కిత్తివెలె, అయ నింద నజి వెహ్తి లెకెండ్”, ఇజి క్రీస్తు దేవుణుదిజ్ వెహ్తాన్.

4 దేవుణు మాటదు ముందాల్ రాస్తి మన్నికెజ్ విజు మజి నెస్సిస్తెజె రాసి ఆత మనాద్. ఎందానిజ్ ఇహిజ, మాటు ఓర్పుదాన్ మంజి దేవుణు మాటెజ్ మజి ఉసార్ కిబిసి, మాటు ఆసదాన్ ఎద్రు సుడెజి మండ్రెజ్ వలె.

5-6 మజి ఓర్పుని ఉసార్ కిబిస్సిక దేవుణు ఉండ్రె మన్యు ఆజి మండ్రెజ్ సాయం కిపిన్. ఇహిజ యేసు క్రీస్తు వజ మండ్రు. నస్తివలె మా ప్రబు అతి యేసు క్రీస్తుజ్ బుబ్బు ఆతి దేవుణుదిజ్ ఉండ్రె మన్యు ఆజి ఉండ్రె లెకెండ్ పొగ్డిడెజ్ ఆనిదెర్.

7 అహిజ క్రీస్తు మిజి డగ్రు కిత్తి లెకెండ్ మీరు ఒరెన్ మరి ఒరెన్ వన్నిజ్ డగ్రు కిదు. ఎందానిజ్ ఇహిజ అహు కిత్తిజ్ లోకుర్ దేవుణుదిజ్ పొగ్డిడెనార్.

8 నాను ఇనిక వెహ్సిన్ ఇహిజ, దేవుణు నమ్మిదెజ్ తగ్గికాన్ ఇజి, ఇహిజ వాండ్రు, మాటు యూదురి అనిగొగొరిజ్ కిత్తి ఒటు లెకెండ్ నిజం కినాన్ ఇజి తోరిస్తెజ్ ఇజి క్రీస్తు యూదురిజ్ పణి మణిసి ఆత మహాన్.

9 అక్కాదె ఆవిదు, యూదురు ఆఇజాతిదికార్ దేవుణు తోరిస్తి గొప్పు కనికారం వందిజ్ దేవుణుదిజ్ పొగ్డిడెజ్ ఇజిబా క్రీస్తు యూదురిజ్ పణిమణిసి ఆతమహాన్. ఎలాగ ఇహిజ, “అందెజె నాను యూదురు ఆఇ లోకుర్ నడిమి నిజి పొగ్డిడెజి. నిజి పొగ్డిడెజి పాటెజ్ పార్పు”, ఇజి రాస్తి మన్నె.

10-11 ఈహుబా రాస్త మనాద్, “యూదురు ఆఇజాతిదికార్ ఆతికిదెరా మీరు దేవుణు లోకుర్ వెట సర్ల ఆదు”\*. మరి ఉండ్రెబాన్ ఈహు రాస్త మనాద్. “యూదురు ఆఇజాతికార్ ఆతికిదెరా, మీరు ప్రబుజ్ పొగ్డిడెదు. విజెరె లోకుర్ వన్నిజ్ పొగ్డిడెదు”\*

12 మరి యెసయ ప్రవక్త ఈహె వెహ్సినాన్, “యెస్సయి తెగాదికాన్ ఒరెన్ వానాన్లె. యూదురు ఆఇవరిజ్ ఏలుబడి: కినికాన్ వానాన్. వన్నిజె వారు ఆసదాన్ ఎద్రు సుడెజి మంజినార్”\*.

13 ఎద్రు సుడెజి మండ్రెజ్ మిజి అటిసిని దేవుణుదిజ్, మీరు నమ్మిజి మంజినిదెర్ కాక మీ లోఇ సర్లని సమదనం నిండ్రెపిన్. ఎందానిజ్ ఇహిజ, అసదాన్ ఎద్రు సుడెజి మంజిని లోఇ దేవుణు ఆత్మ సత్తు మిజి మరి నండో పిరిస్తెజ్ ఇజి.

## దేవుణు సువార్త యూదురు ఆఇకార్బా వెంజినార్

14 నమ్మితి తంబెరిజాండె, మీరు ఒరెన్ మరి ఒరెన్ వెట నెగెండ మంజినిదెర్ ఇజి నాను నెసిన్. మీరు బాగ నెస్తెజ్ ఇజి దేవుణు సుడెజినికెజ్ విజు మీరు నెస్సిదెర్ ఇజి నాను నెసిన్. ఒరెన్ మరి ఒరెన్ వన్నిజ్ బుద్ధి వెహ్సి నెస్సిస్తెజ్ అట్టిదెర్ ఇజి నాను మీ వందిజ్ నిజం నెసిన్.

15-16 గాని నాను యా ఉత్తమ్దు సెగం సజతిజి వందిజ్ మిజి ఎతు కిబిస్సివలె దయరమ్దాన్ వెహ్తా. ఎందానిజ్ ఇహిజ, యేసుక్రీస్తుజ్ ఉండ్రె పణిమన్సి లెకెండ్ యూదురు ఆఇ జాతిది వరి నడిమి మండ్రెజ్ ఇజినె దేవుణు వన్ని గొప్పు దయాదర్మం నా ముస్కు తోరిస్తాన్. దేవుణు ఆత్మ వరిజ్ కేటకిజి దేవుణుదిజ్ సిదెజ్ తగితి ఉండ్రె పూజ లెకెండ్ వరిజ్ తయార్ కినికాదె నా పణి. దన్నివందిజె ఒరెన్ పుజెరి లెకెండ్ నాను వరిజ్ సువార్త వెహ్సిన్.

17 అందెజె, నాను క్రీస్తుయేసు వెట కూడెజి మన్నిజ్, దేవుణుదిజ్ కిని సేవ పణివందిజ్ పొగ్డిడెజిన్.

18 యూదురు ఆఇకార్ దేవుణుదిజ్ లోజిని వందిజ్ క్రీస్తు నా వెట కిత్తి పణిజ్ ఉండ్రె వందిజె నాను దయరమ్దాన్ వెహ్సిన్. నాను నా మాటెజాణిజ్, నా పణిజాణిజ్ దేవుణుదిజ్ లోజిదెజ్ వరిజ్ నడెపిస్త.

19 బమ్మాతి పణిజాణిజ్ని దేవుణు ఆత్మ సత్తుదాన్ నడెపిస్త. ఆహె యెరూసలేం పట్నం మొదొల్ని అయ సుట్టు పడెక మన్ని పట్నమ్కు విజు ఇలారికు ఇని పట్నం దాక విజు బాడ్డిజి సొన్ని నాను క్రీస్తు వందిజ్ సువార్త పూర్తి సాటిస్త మన్ను.

20 క్రీస్తు వందిజ్ సాటె ఆఇ బానె సువార్త సాటిస్తెజ్ ఇజినె నజి ఉండ్రె ఆస. ఎందానిజ్ ఇహిజ, మరి ఒరెన్ సువార్త కినిబాన్ సొన్ని వన్ని పణి లాగ్డెజ్ ఆవద్ ఇజినె నా మన్ను.

21 గాని నాను ఇనిక కిత్త ఇహిజ, దేవుణు మాటదు రాస్తిమన్ని లెకెండ్ కిత్త, “వన్నివందిజ్ ఎనెజ్బా వెహె ఆఇకార్ వన్నివందిజ్ నిజం ఆతిక నూణార్. వన్నివందిజ్ ఎనెజ్బా వెహె ఆఇకార్ వన్నివందిజ్ అర్లం కినార్”\*.

22 యా పణికిజి మహిజ్ నాను మీబాన్ వాదెజ్ నండో అడ్డు ఆత మహాద్.

\* 15:3 15:3 కీర్తన 69:9. \* 15:9 15:9 2సము 22:50; కీర్తన 18:49. \* 15:10-11 15:10-11 ద్వితీ 32:43. \* 15:10-11 15:10-11 కీర్తన 117:1. \* 15:12 15:12 యెసయ 11:10. \* 15:21 15:21 యెసయ 52:15.

పవులు రోమపట్టణం సొండ్రెజ్ ఒడఃబిజినాన్

23-24 గాని ఏలు యా ప్రాంతమ్కాజ్ మన్ని పణిజ్ వీజితె. నండో పంటెజ్ అస్సిబా మీబాన్ వాజి మిజి సుడఃదెజ్ ఆస ఆతిజ్బా, ఏలు వాదెజ్ ఎద్దు సుడఃజిన. నాను స్సెయిను దేసెం సొని సరిదాన్, మిజి వాజి సుడఃజి సణెం మీ వెట మంజి సర్ల ఆదెజ్ ఆస అజిన. బాణిజ్ సొనివెలె మీబాణిజ్ సాయం దొహ్కెజ్ ఇజి సుడఃజిన.

25 గాని, ఏలు యెరూసలేమ్దు మన్ని దేవుణుదిజ్ నమ్మిత్తి వరిజ్ డబ్బు ఒత్తెజ్ యెరూసలేమ్దు సొన్నిన.

26 ఎలాగ ఇహిజ యెరూసలేమ్దు మన్ని నమ్మిత్తి వరి లొఇ డబ్బు సిల్లివరిజ్ సంద సీదెజ్ మాసిదోనియ ప్రాంతమ్దు మన్ని నమ్మిత్తికార్ని అకాయ ప్రాంతమ్దు మన్ని నమ్మిత్తికార్ వారి అజి ఇస్టం ఆతార్.

27 ఒఒ, వారు సీదెజ్ ఇస్టం ఆతారి సీజినార్. నిజమె, యూదురు అఇకార్ యెరూసలేమ్దు మన్ని దేవుణు లోకురిజ్ సాయం కిదెజ్నె. ఎందానిజ్ ఇహిజ, యూదురు అఇవరిజ్ ఉండ్రీ అప్పు మనాద్. ఎలాగ ఇహిజ, దేవుణు యూదురిజ్ సిత్తి దీవనమ్కు అఇ జాతిదివరిజ్ బాట వాతాద్. అందెజె యూదురిజ్ తక్కు ఆతిక యూదురు అఇకార్ వరిజ్ మన్నివనక లొఇహాన్ బాట కిజి సీదెజె.

28 యా పణి వీజ్త ఇహిజ, వరిజ్ సీదెజ్ మన్ని డబ్బు పూర్తి వరిజ్ తవ్వెండ సిత్తి వెనుక నాను యెరూసలెం పట్టుమ్దాన్ స్సెయిను సొని సరిదు మీబాన్ వానా.

29 నాను మీబాన్ వానివలె క్రీస్తుబాణిజ్ మజి విజెరిజ్ గొప్పు పెరి దీవనమ్కు దొహ్కె ఇజి నాను నెసిన.

30 ఏలు తంబెరిజాండె, ప్రబు ఆతి యేసుక్రీస్తు ముస్సు. మన్ని నమ్మకం మన్నిదన్నివందిజ్, దేవుణు ఆత్మ మిజి సిత్తి దన్నివందిజ్, మీరు నా వందిజ్ గట్టిజ పార్లనం కిదు ఇజి నాను బతిమాల్జిన.

31 యూదయ దేసమ్దు యేసుప్రబుజ్ నమ్మిఇ యూదురు బాణిజ్ నజి ఇని ప్రమాదం రెండె మండ్రెజ్ పార్లనం కిదు.

32 మరి దేవుణు సిత్తం ఆతిజ నాను సర్లదాన్ వాజి మీబాన్ రోమ్దెజ్ ఇజిబా పార్లనం కిదు.

33 మజి సమదనం సీని దేవుణు మిజి తోడు మనీన్.

## 16

రోమ పట్టుమ్దు నెగొండార్ నమ్మిత్తి వరిజ్ పవులు వందనమ్కు వెప్పినాన్.

1 కెంకెయారు మన్ని దేవుణు సజమ్దు సేవ కిదెజ్ ఏర్పాటు ఆతి పిబె ఇని మా బీబి వందిజ్ నాను వెప్పిన. అది గొప్పు నెగ్గొకాద్.

2 దేవుణుదిజ్ నమ్మిత్తి దన్నిజ్, నమ్మిత్తికార్ కిదెజ్ తగితి లెకెండ డగ్గు కిదు. దన్నిజ్ కావాస్తిక ఇనికబా మీబాన్ మహిజ, మీబాణిజ్ సీజి మండ్రు. ఎందానిజ్ ఇహిజ, అది నండొండారిజ్ మరి నజిబా సాయం కిజి మహాద్.

3 క్రీస్తు వందిజ్ మా వెట కూడఃజి పణికిత్తి మహి ప్రిస్కిలాదిజ్ని దన్ని మాసి అకులాదిజ్బా మా వందనమ్కు వెప్తు.

4 వారు నా పాణం వందిజ్ వరి పాణమ్కు సీదెజ్ తయార్ ఆతికార్. నాను ఒరెనె ఆవ, యూదురు అఇవరి సజమ్కు విజు వారు కిత్తి దన్ని వందిజ్ వందనమ్కు వెప్పినార్.

5 మరి వరి ఇండ్రో మన్ని నమ్మిత్తివరిజ్బా వందనమ్కు వెప్తు ఆసియ ప్రాంతమ్దు తొలిత క్రీస్తు ముస్సు. నమకం ఇడ్డి, నాను ప్రేమిసిని ఎపాయినెటుజ్ వందనమ్కు వెప్తు.

6 మీ వందిజ్ నండొ కస్టబాడఃజి పణి కిత్తి మరియెజ్ వందనమ్కు.

7 నావెట జేలిదు మహి, నా సొంత లోకుర్ యూదురు ఆతి అండ్రొనికుని, యూనియాకు వందనమ్కు వెప్పిన. వారు అఫొస్తురు నడిమి పెరికార్ ఇజి విజేరె నెసినార్. నజి ఇంక ముందాల్ వారు క్రీస్తు లోకు ఆతికార్.

8 ప్రబు వందిజ్ నాను నండొ ప్రేమిసిని అంప్లియతుజ్ వందనమ్కు.

9 క్రీస్తు వందిజ్ మా వెట పణి కిత్తి ఉర్బానుజ్ వందనమ్కు. నాను నండొ ప్రేమిసిని స్థాకుజ్ వందనమ్కు.

10 క్రీస్తు ముస్సు నిజమాతి నమకం ఇడ్డాన్ ఇజి రుజుప్ కిత్తి మన్ని అపెలుజ్ వందనమ్కు. అరిస్తొబులు ఇండ్రొణి వరిజ్ వందనమ్కు.

11 నా సొంత లోకు యూద వాండ్రు ఆతి హెరొదియొనుజ్ వందనమ్కు.

నర్కిను ఇండ్రొణి వరి లొఇ ప్రబు ఆతి క్రీస్తుజ్ సెందితి వరిజ్ వందనమ్కు.

12 క్రీస్తు వందిజ్ కస్టబాడఃజి పణికినికెజ్ ఆతి త్రువయానుజ్ని త్రపొసానుజ్ వందనమ్కు.

నాను నండొ ప్రేమిసిని పెర్నిసుజ్ వందనమ్కు. అది ప్రబు వందిజ్ నండొ కస్టబాడఃజి పణి కితామహాద్.

13 ప్రబు వందిజ్ గొప్ప నెగ్గికాన్ ఇజి కేట ఆతి రువసుజ్ వందనమ్కు. వన్ని అయ్సిజ్ వందనమ్కు. అది నజీబా యాయ వజ్జనె.

14 అనున్క్రీస్తుజ్, ఫ్లెగొముజ్, హెర్మెకునుజ్, పత్రొబుజ్, హెర్మెకునుజ్, వరి వెట మన్ని నమ్మితి వరిజ్ వందనమ్కు.

15 పిలోగునుజ్, యూలియాకుజ్, నెర్యాతునుజ్, వన్ని తజీసిజ్, ఒలంపాకుజ్ వరివెట మన్ని నమ్మితి వరిజ్ వందనమ్కు.

16 నమ్మితి వరిజ్ తగితి లెకెండ ఒరెన్ మరి ఒరెన్ వన్నిజ్ ముదు కిజి వందనమ్కు వెహ్టూ. యా బాడ్డిదు క్రీస్తుజ్ నమ్మితి సజమ్కాణికార్ మిజి వందనమ్కు వెహ్సినార్.

17 నమ్మితి తంబెరిజాండె, మీరు నెస్తి మన్ని బోదదిజ్ డిస్సిసి దన్నిజ్ వెత్రేకం ఆతి బోద నెస్సిసి ఆఇ గుంపుజ్ కిదెజ్ ఇజి వెహ్సినార్ మనార్. వరి వందిజ్ జాగర్త మండ్రు. నన్ని వరి బాణిజ్ దూరం మండ్రు ఇజి నాను బతిమాల్లి వెహ్సిన.

18 నన్నికార్ మా ప్రబు ఆతి క్రీస్తుజ్ పణి కినికార్ ఆవర్. గాని వారు వరిజ్ ఇస్టం ఆతి దన్నివందిజె బత్తిజినార్. నెగ్గి మాటెజ్ వెహ్సినజ బడాఱి మాటెజ్ వెహ్సిన వీరు మొసెం కిజినార్. వారు నెఇలోకు ఇజి నెన్ఇకార్ వరి మాటెజాణ్ మొసెం కిబె ఆనార్.

19 మీరు దేవుణు మాటదిజ్ లొజ్జిత్తి మన్నికార్ ఇజి విజెరె నెస్సార్. అందెజె మీ వందిజ్ నాను సర్ల ఆజిన. గాని మీరు నెగ్గిక ఇనిక ఇజి నెస్సి దన్నిలోఇ బుద్ది కల్లిజి మండ్రు. నెఇ వనకవెట కూడఱివండ దన్నివందిజ్ కల్లిసిల్లెండ మండ్రు ఇజి నాను ఆస ఆజిన.

20 సమదనం సీని దేవుణు, సయ్యూను సత్తు పాడుకిజి వనిజ్ మీ కాల్యాజ్ అడగి బేగినె సిదులు మటిస్సాండ్రె ఇడ్సాన్. ప్రబు ఆతి యేసుబాణిజ్ దయాదర్మం మిజి తోడు మనిద్.

21 మా వెట కూడఱి పణికిని తిమోతి మిజి వందనమ్కు వెహ్సినాన్. నా సొంత లోకుర్ యూదురు ఆతి లూకియ, యాసోను, సొసి పత్తు ఇనికార్ వందనమ్కు వెహ్సినార్.

22 పవులు వెహ్సినె సిత్తిజ్ యా ఉత్తం రాసిని తెర్తియు ఇని నాను ప్రబు వందిజ్ వందనమ్కు వెహ్సిన.

23 సజమ్దు కూడఱిని వరిజ్ విజేరిజ్ని నజీని నెగెండ సూణి గాయియు మిజి వందనమ్కు వెహ్సినాన్. యా పట్టుమ్దు పెర్ని డబ్బుజ్ లెక్క సుడఱి అస్సికాన్ ఎరస్తు, నమ్మితికాన్ ఆతి క్వార్తును మిజి వందనమ్కు వెహ్సినార్.

24 మా ప్రబు ఆతి యేసు క్రీస్తుబాణిజ్ వన్ని దయాదర్మం మీబాన్ మనిద్.

25-26 మీ నమకమ్దు మిజి గటిజ నిల్పెజ్ దేవుణు అట్సాన్. నాను యేసుప్రబు వందిజ్ సువార్త సాటిసినివలె యాకదె వెహ్సిన. నండో కాలం దేవుణు డాప్తి ఇడ్డి మహి నిజమాతి మాట ఏలు దేవుణు వెహ్టూ మనాన్. ఏలు అయ నిజమాతి సువార్త మాటు సాటిస్సిజ్ ప్రవక్తరు రాస్తి మాటదానె క్రీస్తు వందిజ్ విజెరె నెసినార్. ఎలాకాలం మన్ని దేవుణు ఆగ్నదాన్ యా సువార్త విజు లోకాజ్ నెస్సిసినాన్. ఎందానిజ్ ఇహిజ విజెరె లోకుర్ నమ్మిజి లొజిదెజ్ ఇజి.

27 విజు వనకాజ్ నెసిని ఒరెండ్రె దేవుణుదిజ్, క్రీస్తుయేసుదాన్ ఎలాకాలం లోకుర్ పొగ్డిజి మనిర్. ఆమెన్.

## అపొస్తుడు ఆతి పవులు కొరింతి పట్నమ్దు మని నమ్మిత్తి వరి సజమ్దిజ్ రాస్తి మొదోహి ఉత్తం

నెల్వ కిబిసినిక

ఇక్క అపొస్తుడు ఆతి పవులు కొరింతి పట్నమ్దు మన్ని దేవుణు సజమ్దిజ్ రాస్తి మొదోహి ఉత్తం. పవులునె ఇక్క రాస్తికాన్ ఇజి యా ఉత్తమ్నె రుజుప్ సీజినాద్. 1:1,16,21. దేవుణు సజమ్దు మన్ని విజు సజతిజ్ వందిజ్, నమ్మిత్తి వరి నడిమి మన్ని గొడబెజ్ వందిజ్, దేవుణుదిజ్ పొగడిజి మాడిన్ని వందిజ్, దేవుణు పణి వందిజ్ సీని వందిజ్, నమ్మిత్తికార్ జటు ఆజిని వందిజ్, సజమ్దు మన్ని బోదెక్ ఎలాగ మండ్రెజ్ ప్రబు ఏర్పాటు కిత్తి బోజనం వందిజ్, పెండ్లి వందిజ్, మరి యాలెకెండ్ మన్ని నండో సజతిజ్ వందిజ్ ఎలాగ కిదెజ్ ఇజి యా ఉత్తమ్దాన్ పవులు కొరింతి సజమ్ది వరిజ్ వెప్పొనాన్. యా ఉత్తమ్దు రాస్తిమన్ని సజతిజి వందిజ్ సుడెజి అయా కాలమ్దు మని సజమ్దిజ్ ఆవిండ యా కాలమ్దు మన్ని సజమ్కాజ్బా యాక ముకెలమాతి ఉండ్రె ఉత్తం. అక్కడె ఆవిండ నమ్మిత్తి వన్నిజ్ మన్ని ప్రేమ వందిజ్, సాత్తికార్ మర్జి నిజ్ని వందిజ్ రాస్తి సజతిజ్ ఎలాకాలమ్దు మన్ని నమ్మిత్తి వరి వందిజ్ రాస్తిక్కాదె. యా ఉత్తం యేసుక్రీస్తు సాజి మర్జి నిజితి వనుక యాబ్బయ్ ఏడునో యాబ్బయ్ ఆరునో పంటెజ్ వెనుక రాసె ఆత్త మనాద్ ఇజి విజేరె నమ్మిజినార్. పవులుని వన్ని జటుదికార్ వారు రుండి సుట్టు సువార్త సాటిస్తెజ్ సొన్ని మహివలె (A.D. 50) కొరింతి పట్నమ్దు అందితార్. డగ్రు 18 నెల్లెజ్ మంజి సువార్త పణి కిజి మహిజ్ బాన్ దేవుణు సజం తయారాతాద్. (అపొస్తురు కిత్తి పణిజ్ 18:1-8). పవులు ఎపెసు పట్నమ్దు మహివలె, బాణిజ్ యా ఉత్తం రాస్తపోక్తాన్. యా ఉత్తం నెగెండ్ సద్విజి నెసి మహిజ దేవుణు సజం ఎలాగ మండ్రెజ్ ఇజి సజమ్దిజ్ నడిపిసిని వరిజ్, నమ్మిత్తి వరిజ్ నెగెండ్ అర్థమానాద్.

మొదోల్

- 1 దేవుణు ఇస్తమాతి వజ, క్రీస్తుయేసుజ్ అపొస్తుడు లెకెండ్, వాండ్రు కూక్తి మని పవులు ఇని నాను కొరింతి పట్నమ్దు మని దేవుణు సజమ్దిజ్ రాసిని ఉత్తం. మా తంబెరి ఆతి సొస్తెనెసు నా వెట మనాన్.
- 2 మీరు లోకమ్దు విజుబాన్ మని వరిజ్ని మజి ప్రబు ఆతి యేసుక్రీస్తు పేరు అసి పొగడిజి మాడిన్ని వరి వెట మీరుబా కూడ్లి మంజినిదెర్. అందెజె మీరు ప్రబు ఆతి యేసుక్రీస్తు వేట కూడిజి దేవుణు వందిజ్ కేట ఆతికిదెర్ని దేవుణుదిజ్ సెందితికిదెర్ ఆజి మండ్రెజ్ ఇజి కూకె ఆతి మనిదెర్.
- 3 మా బుబ్బాతి దేవుణుని ప్రబు ఆతి యేసు క్రీస్తు దయా దర్మమ్దాన్ మీరు నిపాతి మండ్రెజ్ సాయం కిపిన్.
- 4 క్రీస్తుయేసుదాన్ మిజి దేవుణు సితమని వన్ని దయా దర్మం వందిజ్ నాను ఎస్తివలెబా మీ వందిజ్ దేవుణుదిజ్ వందనమ్కు వెప్పొన.
- 5 అహిజ, మీరు విజు సజతిజి వందిజ్, ఇహిజ, మీరు వర్గిజిని విజు మాటెజి లోఇ, మిజి మని గెణమ్దు, క్రీస్తు వెట మని సంమదమ్దు మీరు దేవుణు సీజిని మేలుజ్ విజు కలితి మని కిదెర్ ఆజినిదెర్.
- 6 ఎందనిజ్ ఇహిజ క్రీస్తు వందిజ్ మాపు వెప్తా మని సాస్యం వందిజ్ ఇని అనుమానమ్బా సిల్లెండ మీ మన్నుజి మీరు గటిజి గుర్తు అస్తిదెర్.
- 7 అందెజె, దేవుణు ఆత్మ సీజిని వరమ్కాజ్ లోఇ ఇని దనిజ్బా తకు సిల్లెండ, మా ప్రబు ఆతి యేసు క్రీస్తు తోరె అని దినం వందిజ్ గొప్ప ఆనదాన్ ఎద్దు సుడెజి మంజినిదెర్.
- 8 మా ప్రబు ఆతి క్రీస్తు యేసు తీర్పు సీని దినమ్దు మీరు ఇని తపు సెలెండ మనికిదెర్ ఇజి తోరె ఆదెజ్ దేవుణు మిజి సత్తు సీజి ఆకార్దాక కాప్ కినాన్లె.
- 9 వన్ని మరిన్ ఆతి, మా ప్రబువతి యేసుక్రీస్తు వెట కూడిజి మండ్రెజ్ మిజి కూక్తి మని దేవుణు నమ్మిదెజ్ తగ్గికాన్.

దేవుణు సజమ్దు నమ్మిత్తికార్ కేట ఆజిని వందిజ్

- 10 తంబెరిజాండె, అందెజె మీ లోఇ ఇని కేట ఆవిండ మండ్రెజ్ ఇజి, మీరు విజిదెరె, ఒరెన్ మరి ఒరెన్ వెట ఉండ్రె మన్ను ఆజి మండ్రెజ్. మరి మీరు విజిదెరె ఒడెబినిబాన్, మీ మన్నుదు పూర్తి ఉండ్రె ఆజి మండ్రెజ్ ఇజి మా ప్రబు ఆతి యేసుక్రీస్తు బాణిజ్ నజి దోహక్తి అతికారమ్దాన్ నాను మిజి బతిమాల్లిన.



11 ఎందనిజ్ ఇహిజ మా తంబెరిజాండె, మీ లొఇ గొడెబెజ్ మన్నె ఇజి క్లొయె ఇంఠ్రొణికార్ సెగొండార్ నజి కబ్బు తత మనార్.

12 నాను వెహ్నినిక ఇనిక ఇహిజ, ఒరెన్, “నాను పవులుజ్ సెందితికాన్”, ఇజినాన్గె, మరి ఒరెన్, “నాను అపొలుజ్ సెందితికన్”, ఇజినాన్గె. మరి ఒరెన్, “నాను కేపెజ్ సెందితికాన్”, ఇజినాన్గె, మరి ఒరెన్, “నాను క్రీస్తుజ్ సెందితికాన్”, ఇజి వెహ్ ఆజినిదెర్గె.

13 క్రీస్తు ఎయెర్ వందిజ్బా బాటెజ్ ఆవతాన్. పవులు ఇని నాను మీ వందిజ్ సిలువాదు సావత. మీరు పవులు ఇని నా పేరుదాన్ బాప్తీసం లాగె ఆఇతిదెర్.

14 క్రీస్తునుని గాయియుకు, వారు రిఎర్ ఆవిండ మరి ఎయెరిజ్బా నాను బాప్తీసం సివత. దన్ని వందిజ్ నాను దేవుణుదిజ్ వందనమ్కు వెహ్నిన.

15 అందెజె నా పేరుదాన్ మీరు బాప్తీసం లాగె ఆతిదెర్ ఇజి వెహ్బాజ్ ఎయెరిజ్బా అక్కు సిల్లెద్.

16 స్తీపాను ఇంఠ్రొణి వరిజ్బా నాను బాప్తీసం సితమన. అక్కాదె ఆవిండ మరి ఎయెరిజ్బా బాప్తీసం సితక నజి ఎత్తు సిల్లెద్.

17 ఎందనిజ్ ఇహిజ, సువార్త వెహ్బాజ్నె క్రీస్తు నజి పొక్తాన్. గాని బాప్తీసం సిదెజ్ ఇజి నజి పొక్ఎతాన్. అందెజె క్రీస్తు సిలువాదు సాతి సావుది సత్తు తకు ఆదెజ్ ఆవద్ ఇజి నాను సువార్త సాటిస్నిక యా లొకమ్ది లొకురి గెణమ్దాన్ కూడితి మాటెజాణిజ్ ఆవద్.

### దేవుణు గెణమ్ని సత్తు ఆతిమన్ని క్రీస్తు

18 నాననమాజి సాని వరిజ్ క్రీస్తు సిలువాదు సాతి వందిజ్ వెహ్నిని సువార్త బుద్ది సిల్లి పణి కిత్తి వందిజ్ వెహ్నిని మాటెజ్ లెకెండ తొరిజెనె గాని దేవుణు రక్సిస్తి మని మజి యాక దేవుణు సత్తు.

19 అందెజె, “వారు గెణం మనికార్గె! వరి గెణం నాను పాడెకినాలె. వారు బుద్ది మనికార్గె! వరి బుద్ది నాను పణిదిజ్ రెవెండ కినాలె”, ఇజి దేవుణు మాటదు రాస్త మనాద్.

20 బుద్ది మన్నికాన్ ఇజి ఒడిబితి మని వన్ని బుద్ది ఇనిక ఆత మనాద్? గొప్ప సదువు మనికాన్ ఇజి ఒడిబితి మని వన్ని సదువు ఇనిక ఆత మనాద్? యా లొకమ్ది పండిత్ ఇజి ఒడిబితి మనికాన్ ఇనిక ఆత మనాన్? యా లొకమ్ది విజు గెణం దేవుణు బుద్ది సిలి పణి లెకెండ పణిదిజ్ రెజ లెకెండ కివెతాండ్రా?

21 దేవుణు సతి గెణమ్దాన్, లొకమ్దిజ్ సెందితి వరిజ్, వరి గెణమ్దాన్ దేవుణుదిజ్ నెస్టెజ్ అట్ఎండ మహిజ్, లొకమ్దిజ్ సెందితి వరిజ్ బుద్ది సిల్లి పణి ఇజి తొరె ఆతి సువార్త సాటిసి, నమ్మిజిని వరిజ్ రక్సిస్టెజ్ దేవుణు ఇన్టం ఆతాన్.

22 యూదురు ఆతికార్ బమ్మాతి పణిజ్ కొరిజినార్. గ్రిసు దేసెమ్దికార్ గెణమ్దిజ్ రెబాజినార్.

23 గాని మాపు క్రీస్తు మా పాపమ్క వందిజ్ సిలువాదు సాతి సావు వందిజ్ సువార్త సాటిసినాప్. ఇక్క యూదురిజ్ అడ్డు లెకెండ తొరిజెనె. మరి యూదురు ఆఇ వరిజ్ బుద్ది సిలి పణి లెకెండ తొరిజెనె.

24 గాని యూదురిజ్ని యూదురు ఆఇ వరిజ్, అహిజ రక్సిస్టెజ్ ఇజి దేవుణు కూక్తి మని విజెరిజ్, క్రీస్తు, దేవుణు సత్తు ఆత మనాన్. క్రీస్తు, దేవుణు గెణం ఆత మనాన్.

25 ఎందనిజ్ ఇహిజ, దేవుణు బుద్ది సిలి పణి ఇజి లొకుర్ ఒడిబినిక లొకురి బుద్దిదిజ్ ఇంక బుద్ది మనిక. దేవుణు సత్తు సిల్లి పణి ఇజి లొకుర్ ఒడిబినిక లొకురి సత్తుదిజ్ ఇంక బలం మనిక.

26 తంబెరిజాండె, దేవుణు మిజి కూక్తి మహివలె మీరు ఎలాగ కూకె ఆతి మనిదెర్ ఇజి ఒడిబిదు. లొకమ్దు మన్నికార్ ఒడిబిని లెకెండ ఇహిజ, మీ లొఇ బుద్ది మనికార్ లావు నండొండార్ సిల్లెర్, గొప్ప వారు లావు నండొండార్ సిల్లెర్, పెరి కుటుమ్దికార్ లావు నండొండార్ సిల్లెర్.

27 వారు బుద్ది సిలికార్గె! గాని లొకమ్దు మని బుద్దిమని వరిజ్ సిగు కిదెజ్, దేవుణు బుద్ది సిలి వన్కాజ్ ఎర్లిస్తాన్. వారు సత్తు సిలికార్గె! గాని లొకమ్దు మని సత్తుమని వరిజ్ సిగు కిదెజ్ దేవుణు సత్తు సిలివనకాజ్ ఎర్లిస్తాన్.

28 యా లొకమ్దు ఇనికాదొ ఆతిమని వన్కాజ్, అక్కెజ్ ఇనికెజ్ ఆఉ ఇజి తొరిస్టెజ్ ఇజి ఏకం అడిగి మని వనకాజ్ని ఇన్టం కిఇ వన్కాజ్, ఇనికబా ఆఇ వన్కాజ్ దేవుణు ఎర్లిస్తాన్.

29 అందెజె ఎయెన్బా దేవుణు ఎర్దు ఇనిదని వందిజ్బా పొగ్డె: ఆదెజ్ ఆట్ఎన్.

30 వన్ని వెటనె మీరు మా వందిజ్ దేవుణు బాణిజ్ వాతి మని గెణమాతి మన్ని క్రీస్తుయేసు వెట కూడిజి మంజినిదెర్. అహిజ, వన్ని వెటనె మాటు నీతి నిజాయితి మనికాట్ ఆతాట్, దేవుణు వందిజ్ కేట ఆతికాట్ ఆతాట్, విడుఃదల పొందితికాట్ ఆతాట్.

31 అందెజె దేవుణు మాటదు రాస్తి మని లెకెండ. “పొగ్డె: ఆనికాన్ ప్రబు కిత్తి వన్కా వందిజ్ పొగ్డె: ఆదెజ్ వలె”.

## 2

1 తంబెరిజాండె దేవుణు వందిజ్ సాస్యం మీ నడఁమి సాటిస్తాజ్ ఇజి మీ డగ్రు నాను వాతివలె నెగెండ వర్గిదెజ్ అట్టి వన్ని లెకెండో, గొప్ప పెరి బుద్ధి మని వన్ని లెకెండో మీ డగ్రు రెవత.

2 అందెజె నాను మీ నడఁమి మహివెల, యేసుక్రీస్తు వందిజ్ని వాండ్రు సిలువాదు సాతి సావు వందిజ్నె ఆవండ మరి ఇనికబా నెన్ ఇ వన్ని లెకెండ మండ్రెజ్ ఇజి నాను నిర్లం కిత.

3 నాను మీ నడఁమి వాతివలె నా సత్తు ముస్కు ఆదారం ఆవండ, సత్తు సిల్లినవన్ని లెకెండ తియెల్దాన్, ఎసొనో వణక్కి వాత.

4 నాను మీ వెట వర్గితి మాట వెహ్తామని సువార్త, లోకు బుద్ధిదాన్ కూడితి మని తియాని మాటెజాణిజ్ ఆవతాద్. గాని మిజి తోరె ఆదెజ్ ఇజి దేవుణు ఆత్మ సత్తుదాన్ కిజిని పణిజాణిజె తోరిస్త మనాద్.

5 ఎందనిజ్ ఇహిజ, దేవుణు ముస్కు మిజి మని నమకం లోకు బుద్ధి ముస్కు ఆదారం ఆవండ, దేవుణు సత్తు ముస్కునె ఆదారం ఆదెజ్ ఇజి.

దేవుణు ఆత్మ బాణిజ్ దొహ్క్కి గెణం.

6 దేవుణు ముస్కు మని నమకమ్దు పిరితివరి నడఁమి బుద్ధిదాన్ కూడితి మని మాటెజాణిజ్ వర్గిజినావ్. గాని అక్క యా లోకమ్దు మని యా తరమ్ది వరి బుద్ధి ఆవద్. మరి సిల్లెండ ఆజి సొన్నిని యా లోకమ్ది అతికారిజ బుద్ధి ననికబా ఆవద్.

7 అక్కాదె ఆవండ, దేవుణుదిజ్ డాఁజితి మని గెణం వందిజ్ వర్గిజినావ్. డాఁపె ఆతి మహి యా గెణం, మాటుబా వన్నిజ్ మని గొప్ప గవరమ్దు కూడిజి మండ్రెజ్ ఇజి లోకం పుట్వెండ ముందాల్న దేవుణు మా వందిజ్ కేట కిత్తి ఇడ్డి మహిక.

8 యా తరమ్ది అతికారిజ ఎయెరిజ్బ యాక అర్లం కిదెజ్ అట్వెండతార్. ఎందనిజ్ ఇహిజ, వారు అర్లం కిజి నెసి మంజనిక ఇహిజ గొప్ప గవరమ్దిజ్ ప్రబు ఆతి వన్నిజ్ సిలువాదు డెయ్జి సవ్వెతార్మరి.

9 అందెజె దేవుణు మాటదు రాస్తి మన్ని లెకెండ, “దేవుణు వన్నిజ్ ప్రేమిసిని వరి వందిజ్ ఇనికెజ్ తయార్ కిత ఇట్టామనాండ్రొ ఇజి ఎయెర్బా వరి కణకెజాణిజ్ సుడఁదెజ్ సిల్లెద్, ఎయెర్బా వరి గిబిజాణిజ్ వెండ్రెజ్ సిల్లెద్. ఎయెర్బా వరి మన్సుదు ఎసెజ్బా ఒడఁబిదెజ్ సిల్లెద్”.

10 గాని దేవుణు వన్ని ఆత్మదాన్ అయాకెజ్ మజి తెలియ కిత మనాన్. దేవుణు ఆత్మ విజు దనిజ్ రెబాజినాన్. దేవుణు లొఇ మని డాఁజితి మని సజతిజ్బా రెబాజి తోరిసినాన్

11 ఒరెన్ వన్ని మన్సుదు ఒడఁబినికెజ్ విజు వన్ని లొఇ మని వన్ని ఆత్మనె ఆవండ మరి ఎయెర్బా నెన్ఎర్. అయా లెకెండె దేవుణు మన్సుదు మనికెజ్ వన్ని ఆత్మదిజ్నె ఆవండ మరి ఎయెర్బా తెలివద్.

12 దేవుణు బాణిజ్ మజి సెడ్డిఁనె సతిమని వన్కాజ్ అర్లం కిజి నెసైజ్, మజి దొహ్క్కి మని ఆత్మ లోకమ్ది వరి లెకెండ ఒడఁబిని నని ఆత్మ ఆవద్. దేవుణు బాణిజ్ వాతిమని దేవుణు ఆత్మనె మజి దొహ్క్కి మనాద్.

13 మాపు వర్గిజిని యా మాటెజ్ లోకు బుద్ధిదాన్ నెన్పిస్తి మాటెజ్ ఆఱ. గాని దేవుణు ఆత్మ నెన్పిస్తి మాటెజాణిజ్, దేవుణు ఆత్మదిజ్ సెందితి నిజమాతి సజతిజ్, దేవుణు ఆత్మదిజ్ సెందితి మాటెజాణిజ్ మాపు వర్గిజినావ్.

14 దేవుణు ఆత్మ సిలికాన్ దేవుణు ఆత్మబాణిజ్ వాని సజతిజ్ డగ్రు కిఎన్. ఎందనిజ్ ఇహిజ అయాకెజ్ వన్నిజ్ బుద్ధి సిల్లి పణిజ్ లెకెండ తోరిజినె. వన్కాజ్ అర్లం కిదెజ్ ఇహిజ దేవుణు ఆత్మదానె అర్లం కిబె ఆదెజ్. దేవుణు ఆత్మ వన్ని లొఇ సిల్లితిజ్, వన్కాజ్ అర్లం కిదెజ్ వాండ్రు అట్వెన్.

15 దేవుణు ఆత్మ లొఇ మనికాన్ విజు వన్కాజ్ అక్కెజ్ ఎలాగ మర్తికెజ్ ఇజి నెసైజ్ అట్నాన్. గాని వన్ని లొఇ ఇనికెజ్ మన్నె ఇజి ఎయెర్బా నెసైజ్ అట్వెర్.

16 దేవుణు మాటదు రాసి ఆతి మని లెకెండ, “ప్రబుజ్ బుద్ధి వెహ్తాజ్ ఇజి వన్ని మన్సుదు మనికెజ్ నెస్తిమనికాన్ ఎయెన్ మనాన్?”. గాని మజి క్రీస్తుజ్ మని నని మన్సు మన్నె.

## 3

సజమ్దు నమ్మిత్తికార్ కేట ఆజిని వందిజ్

1 తంబెరిజాండె, క్రీస్తుజ్ లొజిజి నడఁజిని వరి వెట వర్గిని లెకెండ నాను మీ వెట వర్గిదెజ్ అట్వెత. గాని ఒడఁబిది ఆసెజ్ లొజిజి నడఁజి వరివెట వర్గిని లెకెండె నాను మీ వెట వర్గిత. ఎందనిజ్ ఇహిజ, మీరు క్రీస్తు వెట కూడితి మహిదెర్ గాని క్రీస్తుజ్ సెందితి సజతిజ్ లొజిజిని దని లొఇ ఏలుబా మీరు లేత కొడొర్ లెకెండెనె మనిదెర్.

2 లేత కొండొరిజ్ పాలు సీని లెకెండ్ ఇజిరి సజతిజ్ నె నాను మిజి నెస్సిన్. పెరికార్ ఉణి మాముల్ బోజనం నని గటిమని ఇనికబా నాను మిజి నెస్సిన్ ఎత. నిజమె ఏలుబా మీరు దనిజ్ తగ్గికిదెర్ ఆవెర్, మీరు లేత కొండొర్ లెకెండ్ నె మనిదెర్.

3 ఏలుబా మీరు యేసుక్రీస్తుజ్ లోజిజి నడిజిని వరి లెకెండ్ ఆగదెర్. ఎందనిజ్ ఇహిజ మి నడిమి గోస ఆనికెజ్, గొడఃబెజ్ మహిజ్ మీరు యేసుక్రీస్తుజ్ లోజిజి నడిజిని వరి లెకెండ్ ఆగదెర్. క్రీస్తు ముస్కు నమకం మన్ ఇవరి లెకెండ్ నె మీరు విజు సజతిజ్ కిజినిదెర్.

4 ఎందనిజ్ ఇహిజ ఒరెన్, “నాను పవులుజ్ సెందితికాన్”, ఇజి, మరి ఒరెన్, “నాను అపొలుజ్ సెందితికాన్”, ఇజి మరి ఒరెన్, యాలెకెండ్ వెహ్నినివలె మీరు క్రీస్తు ముస్కు నమకం ఇడఃఇ మాముల్ లోకుర్ లెకెండ్ ఆగదెరా?

5 అపొలు ఎయెన్? పవులు ఎయెన్? వహి పణి కినికారెగదె? ఒరెన్ ఒరెన్ వన్నిజ్ ప్రబు ఒవసెప్తి లెకెండ్ వారు కిత్తి పణిజాణిజ్ మీరు దేవుణుదిజ్ నమ్మిత్తిదెర్.

6 నాను గింజ ఉణుస్త, అపొలు దనిజ్ ఏరు వడిఃస్తాన్, గాని దనిజ్ పిరిప్తికాన్ దేవుణునె.

7 అందెజె ఉణుస్తికాన్ గాని ఏరు వడిఃస్తికాన్ గాని ఇనిక ఆవెర్. గాని దనిజ్ పిరిప్తికాన్ దేవుణు ఒరెండ్రె.

8 ఉణుస్తి వన్నిజ్ నె ఏరు వడిఃస్తి వన్నిజ్ ఉండ్రె ఉదెనమ్ నె మహాద్. ఒరెన్ ఒరెన్ వన్నిజ్, వరి సొంత పణిదిజ్ తగితి జితం దోహ్క్కాద్.

9 మాపు దేవుణు వెట కూడఃజి పణి కినికాప్. మీరు దేవుణు మడిఃజ్ లెకెండ్ ఆతి మనిదెర్. దేవుణు ఇల్లు లెకెండ్ ఆతి మనిదెర్.

10 దేవుణు నా ముస్కు తోరిస్తి మన్ని దయా దర్మమాదాన్, నెగెండ ఇల్లు తోహ్టాజ్ నెస్తివన్ని లెకెండ్ నాను పునాది పొక్క మన. మరి ఒరెన్ దని ముస్కు ఇల్లు తోహ్నిని వన్ని లెకెండ్ తోహ్నినాన్. ఒరెన్ ఒరెన్ ఎలాగ దని ముస్కు తోహ్నినాండ్రె ఇజి వాండ్రు జాగర్త సుడఃదెజ్ వలె.

11 అహిజ పొక్తిమని పునాది ఆవండ మరి ఉండ్రె పునాది పొక్తిజ్ ఎయెన్బా అట్ ఎన్.

12 ఒరెన్ యా పునాది ముస్కు తోహ్నివలె బజరమ్ దాన్ తోహ్నాన్, సిల్లిజ వెండిదాన్ తోహ్నాన్, సిల్లిజ నండొ కరితి రంగు పణకాణిజ్ తోహ్నాన్, సిల్లిజ మరాన్ దాన్ తోహ్నాన్, సిల్లిజ గడిఃదాన్ తోహ్నాన్, సిల్లిజ ఆకుజాణిజ్ తోహ్నాన్.

13 ఒరెన్ ఒరెన్ కిత్తి పణిజ్ ఎలాగ మర్తిక ఇజి యేసుక్రీస్తు తీర్పు తీరిస్సి దినమ్ దు తోరె ఆనె. అయ పణిజ్ డాజ్ ఎండ తోరె. అయా పణిజ్ సీను వెటనె తోరె ఆనె. ఒరెన్ ఒరెన్ కిత్తి మని పణి ఎలాగ మర్తికాదొ ఇజి సీనునె పరిస కినాద్.

14 ఒరెన్ అయ పునాది ముస్కు తోహ్ని మని పణి సినుదిజ్ గెలిసి నిల్ని మహిజ వాండ్రు జితం లొసె ఆనాన్.

15 ఒరెన్ కిత్తి పణి సినుదాన్ వెతిజ వన్నిజ్ నస్టం వానాద్. గాని వాండ్రు తప్రె ఆనాన్. గాని సినుకొనెజ నడిఃమిహాన్ తప్రె ఆతి లెకెండ్ తప్రె ఆనాన్ లె.

16 మీరు దేవుణు గుడిః అతికిదెర్ ఇజి మీరు నెన్ ఇదెరా?. మరి దేవుణు ఆత్మ మీ లోఇ బత్కిజినాన్ ఇజి మీరు నెన్ ఇదెరా?

17 ఎయెన్బా దేవుణు గుడిఃదిజ్ పాడఃకిత్తిజ దేవుణు వన్నిజ్ పాడఃకినాన్. ఎందనిజ్ ఇహిజ అయ గుడిః దేవుణుదిజ్ సెందితిక. అయ గుడిః ఆతి మనికిదెర్ మీరె.

18 మిజి మీరె మొసెం కిబె ఆదెజ్ ఆవెద్. మీ లోఇ ఎయెన్బా యా తరమ్ దిజ్ తగ్గి గెణం మనికాన్ వాండ్రె ఇజి ఒడిఃబిజి మహిజ, గెణం మనికాన్ ఆదెజ్ ఇజి వన్నిజ్ వాండ్రె యా లోకమ్ ది వజ బుద్ధి సీలి వన్ని లెకెండ్ ఆపిన్.

19 ఎందనిజ్ ఇహిజ యా లోకమ్ ది గెణం దేవుణు ఎద్రు పణిదిజ్ రెఇకాదె. ఎందనిజ్ ఇహిజ, “గెణం మనికార్ ఇజి ఒడిఃబిని వరిజ్ దేవుణు వరి గెణమ్ దాన్ ఓడిఃస్నాన్”, ఇజి దేవుణు మాటదు రాస్త మనాద్.

20 మరి, “బుద్ధి మని వరి ఆలోసనమ్ కు పణిదిజ్ రెఇకెజ్ ఇజి ప్రబు నెసినాన్”, ఇజి దేవుణు మాటదు రాస్త మనాద్.

21 అందెజె ఎయెర్ బా లోకు పేరు అసి నాను వన్నిజ్ సెందితికాన్ ఇజి పొజిదెజ్ ఆవెద్. మీరు నెగెండ మండ్రెజ్ ఇజి విజు సజతిజ్ దేవుణు మిజి సిత మనాన్.

22 పవులు ఆతిజ్ బా, అపొలు ఆతిజ్ బా, కేప ఆతిజ్ బా మీరు నెగెండ మండ్రెజ్ ఇజి దేవుణు ఏర్పాటు కిత్తికాప్. లోకమ్ దు మనికెజ్ విజు, పాణం ఆతిజ్ బా, సాపు ఆతిజ్ బా, యా కాలమ్ దు జర్గినికెజ్ ఆతిజ్ బా, వాని కాలమ్ దు జర్గిదెజ్ మనికెజ్ ఆతిజ్ బా విజు మీరు నెగెండ మండ్రెజ్ ఇజి దేవుణు సీతికెజ్.

23 మీరు క్రీస్తుజ్ సెందితికిదెర్. క్రీస్తు దేవుణుదిజ్ సెందితికాన్.

## 4

క్రీస్తుజ్ అపొస్తరు ఆతికార్

1 అందెజె క్రీస్తుజ్ పణి కినికార్ ఇజి లోకుర్ మజి సుడెదెజ్ వలె. దేవుణుది డాజితి మని నజతిజ్ లోకురిజ్ నెస్పిస్తెజ్ బవజెపె ఆతికార్ ఇజి వారు మజి సుడెదెజ్ వలె.

2 అక్కాదె ఆవిండ ఉండ్రీ పణిదిజ్ బవజెపె ఆతి మనికాన్ అయ పణిదు నమ్మకమాతికాన్ ఇజి తోరె ఆదెజ్ వలె.

3 మీరు గాని లోకురి కోర్టుబగాని నజి ఒపెజెపె ఆతి మని పణి నాను నెగండ కిజిననో సిలెనో ఇజి సుడెజిని దనిజ్ నాను లస్యం కిఎ. నజి నానెబా అయ లెకెండ నా పణిదిజ్ సుడెదెజ్ సిల్లె.

4 నా గర్బం నజి గదిన్ఎండ బాగనె మనాద్. అయ లెకెండ మహిజ్బ నాను ఇని తపు సిలికాన్ ఇజి వెహె ఆదెజ్ అట్ఎ. నజి తీర్పు సీనికాన్ ప్రబునె.

5 అందెజె ఏర్పాటు కిత్తి మని గడియ రెఎండ ఇనిదనిజ్బా తీర్పు తీరిస్తెజ్ ఆఎద్. ప్రబు వాని దాక కాప్కిదెజ్. సీకటుదు డాజితి మని విజు తప్పు పణిజ్ వాండ్రు వెల్లి జాయ్దు తనాన్లె. లోకురి మన్సుదు మహి విజు ఉదెనమ్కాజ్ వెల్లి తనాన్లె. అయావలె ఒరెన్ ఒరెన్ వన్నిజ్ వాండ్రు కిత్తి పణిదిజ్, తగ్ని లెకెండ దేవుణు బాణిజ్ పొగ్డె: ఆనాన్లె.

6 తంబెరిజాండె, “రాస్తి మహి దనిజ్ జవ డాట్టి సాండ్రెజ్ ఆఎద్”, ఇజి రాస్తి మని మాటదిజ్ అర్థం మీరు మజి సుడెజి నెస్పెజ్ వలె. యాలెకెండె నా వందిజ్ని అపొలో వందిజ్ నాను మిజ వెప్తా మహ. అయాలెకెండ మీరు ఒరెన్ వన్ని పేరు అసీ పొజిదెజ్ ఆఎద్.

7 మహి వరిజ్ ఇంక మిజి గొప్ప పెరికార్ కిత్తికాన్ ఎయెన్? మిజి కలిగితి మని బుద్ధిని గెణం లొఇ దేవుణు బాణిజ్ దొహ్కెకెజ్ ఆవిండ మరి ఇనికెజ్ మన్నె? అక్కెజ్ మిజి దేవుణు బాణిజ్ దొహ్కె వెనుక, అక్కెజ్ దొహ్కెకెజ్ అఉ, అక్కెజ్ మీరు గణస్తి మని లెకెండ పొజిజినిదెర్.

8 ఏలు మీరు ఇనికబా తకు సిల్లెండ మిజి కావాలిస్తెకెజ్ విజు మనికిదెర్ అతిదెర్గె! ఏలు మీరు ఆస్తి మనికిదెర్ అతిదెర్గె! మజి డిస్తి సితిదెర్ మీరు దేవుణు వెట ఏలుబడి: కినికిదెర్ అతిదెర్గె! మపుబా మీ వెట దేవుణు వెట ఏలుబడి: కినికాప్ అని లెకెండ మీరు నిజమె మీరు ఆజిమంజినిక ఇహిజ ఎసానో నెగెద్ ఇజి నాను ఎసానో కోరిజిన.

9 మజి అయా లెకెండ సిల్లెద్. జంతుజ వెట విద్దెం కిజి సుడెజి మంజిని వరి ముందాల సాదెజ్ ఇజి సావుదిజ్ తగితి సిక్కు దొహ్కె మని వరి లెకెండ దేవుణు మజి అపొస్టురు లొఇ కడె:వేరిదికార్ లెకెండ కిత మనాన్ ఇజి నజి తోరిజినాద్. లోకమ్దు మనికార్ విజెరె, మరి దేవుణు దూతెజ్ విజు కణ్కు నవ్వెండ బేసిని లెకెండ మాపు ఇడె: ఆత మనాప్ ఇజి నజి తోరిజినాద్.

10 మాపు క్రీస్తు వందిజ్ బుద్ధి సిలికాప్ గాని మీరు క్రీస్తు లొఇ బుద్ధి మనికిదెర్గె! మాపు నీరసమ్దికాప్ గె మీరు సత్తు మనికిదెర్గె! మీరు తగమాతికిదెర్గె మపు సిగు లాగె ఆతికాప్ గె!

11 ఏలు యా గడియారుబా బజ ఏహ్కెదికాప్. గుడెజ్ తోహె ఆతికాప్. ముటిజాణిజ్ గుదె ఆతికాప్. మండ్రెజ్ ఇల్లుబా సిలికాప్.

12 మా సాంత కికాణిజ్ కన్జబాడె:జి పణి కినికాప్. మజి సయిప్ సీని వరిజ్ మిజి నెగెండ మనిద్ ఇజి వెహెనాప్. మజి హిమ్మెజ్ కినివలె అక్కెజ్ ఓరిసినాప్.

13 దూసె ఆనివలె సార్లిదాన్ వర్రిజినాప్. ఏలు యా గడియారుబా మాపు యా లోకమ్దిజ్ కసర లెకెండ మనాప్. విజెరె ఎద్రు పెంటు లెకెండ మనాప్.

14 నాను ప్రేమిసిని నా కొడోర్ ఇజి మిజి సారిసి సరిసి వెప్తా లెకెండె యా మాటెజ్ రాసిన, గాని మిజి సిగు కిదెజ్ ఇజి ఆఎద్.

15 క్రీస్తు వందిజ్ మిజి నూణికార్ పదివెయుజ్ లోకుర్ మహిజ్బా, మిజి అప్పాసిర్ నండెండార్ సిల్లెర్. ఎందనిజ్ ఇహిజ క్రీస్తుయెసు వందిజ్ నాను వెప్తా సువార్తదాన్ నానె మిజి కాస్త.

16 అందెజె నజి పొలిసి యెసుక్రీస్తుజ్ లోజిజి నడిదెజ్ ఇజి మిజి బతిమాల్లిన.

17 దిని వందిజ్ ప్రబు ఎద్రు నమ్మకమాతికాన్ ఆతి, నాను ప్రేమిసిని నా మరిన్ ఆతి తిమోతిజ్ మీ డగ్రు పొక్కిన. విజు బాడ్డిజి విజు దేవుణు సజమ్కాజ్ నాను నెస్పిస్తి దనిజ్ తగితి లెకెండ క్రీస్తుయెసుజ్ నాను ఎలాగ లోజిజి నడిజిన ఇజి వాండ్రు మిజి ఎత్తు కిబిస్నాన్లె.

18 మీ లొఇ సెగొండార్ నాను మీ డగ్రు రెపె ఇజి ఉబె ఆత మనార్.

19 ప్రబు సితం ఇహిజ నాను మీ డగ్రు బేగి వాన. అయావలె ఉబె ఆతిమని వరి మాటెజ్నె ఆవిండ, వరిజ్ ఎసా సత్తు మనాద్ ఇజిబా నాను సూణ.

20 ఇనిక ఇహిజ, దేవుణు ఏలుబడి: ఇహిజ వర్రిని మాటెజాణిజ్నె ఆఎద్, సత్తుదాన్ మనాద్.

21 మీరు ఇనిక కోరిజినిదెర్? నాను మీ డగ్రు వానివలె మిజి దిదిదెజ్ డుడ్డు అసి వాదెజా, సిల్లిజ ప్రేమ తోరిసిని వన్ని లెకెండ వాదెజ్?

## 5

## రంకు బూలాని వన్నిజ్ మీ బాణిజ్ వెల్లి పొక్కు

1 రంకు బూలానిక మీ లొఇ మనాద్ ఇజి నజీ నిజమె కబ్బు వాతాద్. మీ లొఇ ఒరెన్, వన్ని కొగ్రి అయ్సిజ్ ఇడె ఆతాన్ గె. ననిక నమ్మి ఇ వరి లొఇబా జర్రి ఇక.

2 మరి, యాక మీ నడిమి మంజి మీరు పొజిజినిదెర్! గాని అయాలెకెండ్ ఆవండ, మీరు ఎసానొ దుకం ఆజి నన్ని పణి కిత్తి వన్నిజ్ మీ నడిమిహాన్ వెల్లి పొక్కి మండ్రెజ్, అయాలెకెండ్ మండ్రెజ్ గదె?

3 నాను ఒడొల్ వందిజ్ మీ బాణిజ్ దూరం మన్న, గాని ఆత్మదాన్ నాను మీ వెటనె మన్న. నాను మీ వెట మన్ని లెకెండ్ నె నిన్ని పణి కిత్తి వన్ని మున్ను తీర్పు తీరస్త మన్న.

4 మా ప్రబు ఆతి యేసు పేరుదాన్ మీరు కూడెజి వానివలె, మా ప్రబు ఆతి యేసుక్రీస్తు సత్తు మీ నడిమి మంజినాద్. నానుబా మీ వెట మన్న ఇజి మీరు ఒడిబిదు.

5 అయావలె మీరు యా లెకెండ్ కిదు. సర్వూనుజ్ లొజిజి మన్ని వరి వెట మండ్రెజ్ ఇజి వన్నిజ్ మీ నడిమిహాన్ వెల్లి పొక్కు. అబ్బె వన్ని ఒడొల్ కస్టమ్దిజ్ ఒపజెవె ఆనాద్లె. అయావలె వాండ్రు పాపం ఒప్పుకొడెజి డిసిసిజి, యేసుప్రబు యా లొకమ్దిజ్ తీర్పు తీరిసిని దినమ్దు వన్ని ఆత్మ తప్రె ఆనాద్లె.

6 మీరు పొజిజినిక బాగ సిల్లెద్. పులాని దూరు కండెక్ ఆతిజ్ బా పులాజ్ సిల్లి దూరుదు కలప్తిజ, దూరు విజు పులాజ్ ఆనాద్ ఇజి మీరు నెసినిదెర్. సెఇకెజ్ మీ నడిమి మహిజు అయాలెకెండ్ నె మన్ ఏదా?

7 అందెజె నిజమె పులాని దూరు లెకెండ్ మన్ని వన్నిజ్ మీ నడిమిహాన్ దూరం కిదు ఇజి నాను మిజి గటిజి వెప్పిన. అయావలె మీరు పులాజ్ సిల్లి నెగ్గి దూరు లెకెండ్ మనిదెర్. నిజమె మీరు పులాజ్ సిల్లి కొత్త దూరు నన్నికిదెర్, ఎందనిజ్ ఇహిజి పన్ను పండొయ్దిజ్ సప్పి గొరెపిల్ల లెకెండ్ యేసుప్రబు మా వందిజ్ పూజి ఆత మనాన్.

8 అందెజె పులాజ్ మన్ని పడెయి దూరుదాన్ పిటం సుర్జి మాటు పండొయ్ కిమాట్. ఇహిజ, ముజాల మహి సెఇ అలవాటుజ్, ముజాల కిజి మహి సెఇ పణిజాణిజ్ మాటు పండొయ్ కిమాట్. నాను వెప్పినక ఇనిక ఇహిజ, మాటు నిజం మన్నికాట్ని నమ్మిదెజ్ తగ్గికాట్ ఆజి మంజినాట్. అయాలెకెండ్ మాటు పండొయ్ కినాట్.

9 రంకు బూలాని వరి వెట కూడెజి మన్మాట్ ఇజి మిజి రాస్తి ఉత్తమ్దు రాస్త మన్న.

10 యా లొకమ్దు మన్ని రంకు బూలాని వరివెటనొ, లొబం కిని వరివెటనొ, డొజి కిని వరివెటనొ, బొమ్మెజి మాడిసిని వరివెటనొ మీరు ఎసెజ్ బా కూడెదెజ్ ఆవద్ ఇజి దన్నిజ్ అర్లం సిల్లెద్. అయాలెకెండ్ మండ్రెజ్ ఇహిజి మీరు యా లొకం డిసి సొండ్రెజ్ గదె?

11 నాను మిజి రాస్తి మన్ని దన్నిజ్ అర్లం ఇనిక ఇహిజ, నమ్మితికాన్ ఇజి కూకె ఆతికాన్ ఎయెన్ బా రంకు బూలానికాన్ ఆతిజనొ, లొబం కినికాన్ ఆతిజనొ, బొమ్మెజ్ మాడిసినికాన్ ఆతిజనొ, సెఇ మాటెజ్ వర్గినికాన్ ఆతిజనొ, కడు ఉణికాన్ ఆతిజనొ, ఇల్లు డెయ్ జి డొజి కినికాన్ ఆతిజనొ, నన్ని వన్ని వెట కూడెజి మండ్రెజ్ ఆవద్. వన్ని వెట బొజనమ్ బా కిదెజ్ ఆవద్.

12 దేవుణు సజమ్దిజ్ వెల్లి మన్ని నమ్మిఇకార్ ఆతి వరి మున్ను తీర్పు తీరిసినిక, నా పణి ఆవద్. సజమ్దు మన్ని వరి మున్ను మీరు తీర్పు కిఇదెరా?

13 సజమ్దిజ్ వెల్లి మన్ని వరిజ్ దేవుణునె తీర్పు తీరిస్సికాన్. అందెజె, “అయ సెఇ వన్నిజ్ మీ నడిమిహాన్ వెల్లి పొక్కు”.

## 6

## నమ్మిత్తి వరి నడిమి గొడెబెజ్ మహిజ

1 మీ లొఇ ఒరెన్ మరి ఒరెన్ వన్ని వెట గొడెబ మహిజ, దేవుణుదిజ్ సెందితివరి ఎద్దు రెవండ, వాండ్రు ఎందనిజ్ నమ్మి ఇ వరి ఎద్దు తీర్పు వందిజ్ సొన్నినాన్?

2 దేవుణుదిజ్ సెందితికార్ యా లొకమ్దిజ్ తీర్పు తీరిసినిక ఇజి మీరు నెన్ ఇదెరా? మీరు యా లొకమ్దిజ్ తీర్పు తీరిసినికిదెర్ ఆతిదెర్. అయ లెకెండ్ మహివలె మీ లొఇ మని గొడెబెజి వందిజ్ తీర్పు తీరిస్తెజ్ మీరు అట్ ఇతిదెరా?

3 మాటు దేవుణు దూతరిజ్ తీర్పు తీరిసినికాట్ ఇజి మీరు నెన్ ఇదెరా? ఆహిజ యా లొకమ్దిజ్ సెందితి సజతిజి వందిజ్, మరి తీరిస్తెజ్ అట్టికాట్.

4 అందెజె నని గొడెబెజ్ మీ నడిమి మహిజ, వనకాజ్ తీర్పు తీరిస్తెజ్ ఎందనిజ్ మీరు సజమ్దు ఇనికబా ఆఇవరి ఎద్దు తీర్పు వందిజ్ బస్సిదెర్?

5 మీరు సిగు ఆదెజ్ ఇజినె ఇక్క నాను వెప్పిన. దేవుణుదిజ్ నమ్మిత్తి వరి లొఇ మని గొడఃబెజ్ తీరిస్తెజ్ అట్టికాన్ ఎయెన్బా మీ నడిఃమి సిల్లెండ్రా?

6 గాని ఒరెన్ నమ్మిత్తికాన్ మరి ఒరెన్ నమ్మిత్తి వన్ని వెట గొడఃబెజ్ ఆజి కోర్టుదు సొన్నినిదెర్. అక్కాదె ఆవండ తీర్పు వందిజ్ నమ్మిత్తి వరి ఎర్దు తగుదిజ్ బనయి కిజినిదెర్.

7 మీ నడిఃమి ఎయెరిజ్బా ఒరెన్ వెట కోర్టు కిత్తి మని గొడఃబెజ్ మన్నె ఇహిజ మీరు పూర్తి అడిగి అర్తి మనిదెర్. కోర్టు కిని దనిజ్ ఇంక మీ వెట కిత్తి తప్ప బరిసినికాదె నెగెద్. కోర్టు కిని దనిజ్ ఇంక డొజ కిజి ఒతిక డిఃసినికకాదె నెగెద్.

8 గాని మీరె మొసెం కిజినిదెర్, తప్ప కిజినిదెర్. యాక నమ్మిత్తి కూలెజ వెటనె మీరు కిజినిదెర్.

9 నెఇ పణిజ్ కినికార్ దేవుణు ఏలుబడిఃదు మండ్రెజ్ అట్ఎర్ ఇజి మీరు నెన్ఇదెరా? మీరు ఒడఃబినిబాన్ తప్ప కిమాట్. రంకు బూలానికార్, బొమ్మెజ మాడిఃసినికార్, సాని బూలానికార్, మొగవరి వెట కూడ్చి మొగ్గకొడొర్,

10 డొజ కినికార్, లోబం కినికార్, ఎస్తివలెబా కడు ఉణిజి సోసి మంజినికార్, దూసలాడిఃజినికార్, ఇల్లు డెయ్జి డొజ కినికార్, నినికార్ ఎయెర్బా దేవుణు ఏలుబడిఃదు మండ్రెజ్ అక్క మనికార్ ఆవెర్.

11 మీ లొఇ నెగొండార్ యా లెకెండెనె మహిదెర్. గాని మీ పాపమ్కాణిజ్ నొరె ఆజి నుబరం ఆతికిదెర్. మా ప్రబు ఆతి యెసుక్రీస్తు పేరుదాన్ని, మా దేవుణు ఆత్మదాన్ నీతినిజాయిమనికార్ ఆతికిదెర్. మరి ఏలు దేవుణు వందిజ్ కేట ఆతికిదెర్.

### రంకు బూలానిక

12 “ఇనిక కిదెజ్బా మజి అక్క మనాద్, ఇని అడ్డు సిల్లెద్”, ఇజి మీరు వెప్పినిదెర్. గాని విజు పణిదిజ్ వానికెజ్ ఆఉ ఇజి నాను వెప్పిన, “ఇనిక కిదెజ్బా నజి అక్క మనాద్, ఇని అడ్డు సిల్లెద్”. అహిజ్బా నాను కిని దని లొఇ ఇనికబా నజి ఉండ్రె అలవాటు లెకెండె మండ్రెజ్ నాను సరి సిఎ. ఎందనిజ్ ఇహిజ అయక సిల్లెండ బత్తిదెజ్ ఇజి ఉండ్రె అలవాటుదిజ్ అణజిజి మన్ఎ.

13 “తిండి పొటదిజ్ సర్ల వందిజ్ని పొట తిండి ఊణి వందిజ్నె తయార్ కిత మనాద్”, ఇజి మీ లొఇ నెగొండార్ వెప్పినిదెర్. గాని వాని కాలమ్దు పొట గాని తిండి గాని అక్కర్ సిల్లెద్. అందెజె దేవుణు రుండి వనకాజ్ సిల్లెండ కినాన్లె”, ఇజి నాను వెప్పిన. ఒడొల్ రంకు బూలాని వందిజ్ ఆవెద్ ఇజి నాను గటిజ వెప్పిన. గాని మా ఒడొల్ ప్రబు వందిజ్ పణి కిదెజ్నె. ఒడొల్ వందిజ్ సూణికాన్ ప్రబునె.

14 దేవుణు వాని కాలమ్దు మా ఒడొలుజు సాతి వరిబాణిజ్ వన్ని సత్తుదాన్ నిక్కాన్లె. అయావలె సాతి వరిబాణిజ్ ప్రబుజ్ నిక్తి లెకెండె మజిబా నిక్కాన్.

15 మీ ఒడొల్ క్రీస్తు ఒడొల్ ఆతి దేవుణు సజమ్దు మని నమ్మిత్తి వరి వెట కూడిఃతి మనికెజ్ ఇజి మీరు నెన్ఇదెరా? అయాలెకెండె మహిజ ఎయెన్బా క్రీస్తు వెట కూడిఃతి మని వన్ని ఒడొల్ ఉండ్రె సాని దనివెట కుడుఃప్తిజ అయాక తగ్గాదా? ఆవెద్, వాండ్రు ఎనెజ్బా అయక కిదెజ్ ఆవెద్.

16 సాని దనివెట కూడిఃనికాన్ దని వెట కూడిఃజి ఉండ్రె ఒడొల్ ఆతి లెకెండె మనాద్, ఇజి మీరు నెన్ఇదెరా?. “వారు రివెర్ ఉండ్రె ఒడొల్ ఆన మంజినార్”, ఇజి దేవుణు మాటదు రాస్త మనాద్.

17 గాని వన్నిజ్ వాండ్రె ప్రబు వెట కుడుఃపె ఆతి మనికాన్, వాండ్రు ఒడిఃబిని దని లొఇ ప్రబు ఆత్మ వెట ఉండ్రె ఆజి మంజినాన్.

18 రంకు బూలాఎండ దని బాణిజ్ దూరం ఉహ్కీ మండ్రు. లోకుర్ కిజిని విజు పాపమ్కు ఒడొల్దిజ్ వెల్లి మనికెజ్నె. గాని రంకు బూలానికాన్ వన్ని సొంత ఒడొల్దిజ్ వెత్తెకం కిజినాన్.

19 దేవుణు బాణిజ్ మిజి దొహ్కీ మని మీ లొఇ మని దేవుణు ఆత్మ మంజిని గుడిఃనె మీ ఒడొల్ ఇజి మీరు నెన్ఇదెరా? అందెజె మీరు మీ సొంత ఆఇదెర్.

20 మీరు గొప్ప కరిదాన్ కొలె ఆతి మహికిదెర్. అందెజె మీ ఒడొల్దాన్ దేవుణుదిజ్ గవ్రం సిదు.

## 7

### పెండ్రె వందిజ్ వెప్పిక

1 మీరు రాస్తిమని సజతిజ వందిజ్ ఏలు నాను వెప్పిన. పెండ్రె ఆవండ మంజినిక మొగ్గ కొడొదిజ్ నెగెద్.

2 గాని రంకు బూలానిక లావ్ మనిజ్ ఒరెన్ ఒరెన్ వన్నిజ్ సొంత బోదెలి మండ్రెజ్. విజు బోదెకాజ్ వరి సొంత మాసి మండ్రెజ్ వలె.

3 మాసి ఆల్పి వందిజ్ కిదెజ్ మనికెజ్ విజు కిజి మండ్రెజ్ వలె. అల్పిబా మాసి వందిజ్ అయాలెకెండెనె మండ్రెజ్ వలె.

4 ఆల్ని ఒడొఱల్ దనిజె సొంతం ఆవండ దని మాసిజ్బా సెందితిక. అయలెకెండెనె మాసి ఒడొఱల్ వన్నిజె సొంతం ఆవండ వన్ని ఆల్నిజ్బా సెందితిక.

5 పార్దనం కిని వందిజ్ మిజి సమయం దొహ్కొ వందిజ్నె ఆవండ, రిఎర్ కూడొజి ఒవ్ఎండ మీరు కేట కేట మండ్రెజ్ ఆవెద్. గాని మీ ఆసెజ అణస్సె ఆజి మండ్రెజ్ అట్ఎండ మనిజ్, సయ్తాను మిజి తపు కిబిసి అర్పైజ్ సరి సిఎండ ఉండ్రెబానె కూడొజి మండ్రు.

6 మిజి యాలెకెండె కిదెజ్ ఆనాద్ ఇజి యాక నాను వెహ్సిన, గాని ఉండ్రె ఆడ్ర లెకండె ఆవెద్.

7 విజెరె నాను మని లెకెండె పెండ్రె ఆవండ మహిజ బాగ మనాద్ ఇజి ఆస ఆజిన. గాని ఒరెన్ ఒరెన్ వన్నిజ్ దేవుణు బాణిజ్ ఉండ్రె ఉండ్రె వరం దొహ్కొ మనాద్. ఒరెన్ వన్నిజ్ యా వరం, మరి ఒరెన్ వన్నిజ్ మరి ఉండ్రె వరం.

8 ఏలు పెండ్రె ఆజి వరి వెటని రాండి బోదెకాజ్ నాను వెహ్సినక ఇనిక ఇహిజ, నాను మంజిని లెకెండె పెండ్రె ఆవండ మంజినికాదె పరిజ్ నెగెద్.

9 గాని వరి ఆసెజ అణస్సె ఆజి మండ్రెజ్ అట్ఎర్ ఇహిజ వారు పెండ్రె ఆదెజ్ వలె. ఎండనిజ్ ఇహిజ మన్సుదు ఉత్పుత్ ఆజి సిసుదాన్ వెయ్ని లెకెండె మనిదనిజ్ ఇంక పెండ్రె ఆనిక నెగెద్.

10 పెండ్రె ఆతి వరిజ్ నాను సీజిని ఆడ్ర, నానె ఆవద్ దేవుణు సీజిని ఆడ్ర ఇనిక ఇహిజ, ఆల్ని, దని మాసిజ్ డిసి సొండ్రెజ్ ఆవెద్.

11 అది మాసిజ్ డిసి సొహిజ మరి ఉండ్రె పెండ్రె ఆదెజ్ ఆవెద్. మరి పెండ్రె ఆవండ మండ్రెజ్ ఇన్టం సిల్లెద్ ఇహిజ, దని మాసి వెట రాజినం ఆజి సమాదనం ఆజి మండ్రెజ్ వలె. మరి ఒరెన్ మాసి వన్ని ఆల్నిజ్ డిసి సిదెజ్ ఆవెద్ ఇజిబా వన్ని ఆడ్ర మనాద్.

12 మహి వరిజ్ నాను వెహ్సినక ఇనిక ఇహిజ, ప్రబు ఆవెన్ నానె, నమ్మితికాన్ ఆతి ఒరెన్ వన్ని ఆల్ని నమ్మితికాన్ ఇహిజ్బా, అది వన్ని వెటనె బత్కినాద్ ఇహిజ వాండ్రు దనిజ్డిసి సిదెజ్ ఆవెద్.

13 మరి, ఉండ్రె నమ్మితికాన్ ఆతి బోదెల్దిజ్, మాసి నమ్మితికాన్ ఇహిజ్బా దని వెటనె వాండ్రు బత్కినాన్ ఇహిజ అది వన్నిజ్ డిసి సిదెజ్ ఆవెద్.

14 ఎండనిజ్ ఇహిజ నమ్మితికాన్ ఆతి మాసి నమ్మితికాన్ ఆతి వన్ని ఆల్ని వెట దేవుణు వందిజ్ కేట ఆతికాన్ కిబె ఆత మనాన్. అయా లెకెండెనె నమ్మితికాన్ ఆతి ఆల్ని నమ్మితికాన్ ఆతి దని మాసి వెట దేవుణు వందిజ్ కేట ఆతికాన్ కిబె ఆత మనాన్. యా లెకెండె సిల్లెండ మహిజ మీ షొటాద్ పుట్టి కొడొర్, దేవుణుదిజ్ నమ్మితి వరి కొడొర్ లెకెండె మంజినార్, గాని ఏలు దేవుణు వందిజ్ ఆతికారె.

15 గాని ఆల్ని మాసిర్ లొక నమ్మితికాన్ ఆతి మాసి గాని నమ్మితికాన్ ఆతి ఆల్ని గాని డిసి సిదెజ్ ఇజి ఆస ఆతిజ ఆహె కిపిర్. అయాలెకెండె జర్గినవలె, నమ్మితికాన్ నమ్మితి దనిజ్ గాని నమ్మితికాన్ నమ్మితి వన్నిజ్ గాని కూడొజి మన్అ ఇజి బలవంతం కిదెజ్ ఆవెద్. సమాదనమ్దాన్ బత్కిదెజ్ ఇజినె దేవుణు మిజి కూక్త మనాన్.

16 ఓ, బోదెలి నీ మాసిజ్ దేవుణు రక్కిన్సి లెకెండె కిదెజ్ అట్టిదొ సిల్లెదొ ఇజి నీను ఎలాగ నెస్సి? ఓ, మొగకొడొ నీ ఆల్నిజ్ దేవుణు రక్కిన్సి లెకెండె కిదెజ్ అట్టిదొ సిల్లెదొ ఇజి నీను ఎలాగ నెస్సి?

17 ఒరెన్ ఒరెన్ ఎలాగ బత్కిదెజ్ ఇజి దేవుణు ఒవసెప్త మనాండ్రొ అయాలెకెండె మండ్రెజ్ వలె. ఎలాగ మండ్రెజ్ ఇజి దేవుణు కూక్త మనాండ్రొ దనిజ్ తగితి లెకెండె వారు మండ్రెజ్ వలె. ఇక్కదె విజు సజమ్కాజ్ నాను సీతి మని రూలు.

18 ఎయెన్బా దేవుణు వన్నిజ్ కూక్తివలె సునతి కిబె ఆతికాన్ ఇహిజ వాండ్రు సునతి కిబె ఆతి లెకెండెనె మండ్రెజ్ వలె. అయాక మారిస్సెజ్ సుడొదెజ్ ఆవెద్. మరి ఒరెన్ దేవుణు వన్నిజ్ కూక్తి వలె సునతి కిబె ఆతికాన్ ఇహిజ వాండ్రు సునతి కిబె ఆదెజ్ సుడొదెజ్ ఆవెద్.

19 సునతి కిబె ఆతిజ్బా ఇనిక సిల్లెద్. సునతి కిబె ఆతిజ్బా ఇనిక సిల్లెద్. దేవుణు ఆగ్నెజ్ లొజిజి నడిసికాదె ముకెలమతిక.

20 ఒరెన్ వన్నిజ్ ఎలాగ మహివలె దేవుణు వన్నిజ్ కూక్త మనాండ్రొ అయాలెకెండెనె వాండ్రు మండ్రెజ్ వలె.

21 నీను వెట్టిపణి కిజి మహిజ్ కూకె ఆతిజ దని వందిజ్ బాద ఆమ. అబెణిజ్ విడుదల ఆదెజ్ నిజి అక్కు మనాద్ ఇహిజ ఆహె కితి.

22 ఒరెన్ వెట్టిపణి కినికాన్ ఆతి మహిజ్ దేవుణు ముస్కు నమకం ఇట్టాన్ ఇహిజ వాండ్రు దేవుణుదిజ్ సెందితికాన్ నీ పాపమ్కాజ్ విడుదల ఆతి లెకెండె ఆజినాన్. అయాలెకెండెనె అక్కు మనికాన్ దేవుణు ముస్కు నమకం ఇట్టాన్ ఇహిజ వాండ్రు క్రిస్తు వందిజ్ వెట్టిపణి కినికాన్ లెకెండె ఆజినాన్.

23 నండొ ఏలువదాన్ కొలె ఆతికార్ మీరు, అందెజె లొకురి బుద్దిదిజ్ వెట్టిపణి కినివరి లెకెండె ఆమాట్.

24 నమ్మితికిదెర్ ఆతి మా తంబెరిజాండె, ఒరెన్ ఒరెన్ ఎలాగ మండ్రెజ్ ఇజి దేవుణు ఇట్ట మనాండ్రొ అయాలెకెండె మండ్రెజ్ వలె. ఎలాగ మహివలె దేవుణు కూక్త మనాండ్రొ అయాలెకెండెనె దేవుణు వందిజ్ బత్తిదెజ్ వలె.

25 ఏలు విడ్డి అయలిక వందిజ్ నజీ ప్రబు బాణిజ్ ఇని ఆడ్ర సిల్లెద్. గాని దేవుణు కనికారమ్దాన్ నమ్మిదెజ్ తగ్గికాన్ ఇజి నజీ ఒండేబిజిని వందిజ్ నాను ఒండేబినికెజ్ వెప్పిన.

26 యా లోకమ్దు ఏలుమని కస్టమ్కు సుడేతిజ ఎయెన్బా వాండ్రు మని లెకెండెనె మహిజ నెగెద్ ఇజి నాను ఒండేబిజిన.

27 నీను పెండ్లి ఆతి మనిదా? అహిజ డిసి సిదెజ్ సుడేమా. పెండ్లి ఆవిండ మహిజ పెండ్లి ఆదెజ్ సుడేమా.

28 నీను పెండ్లి ఆతిజ పాపం ఆవద్. విడిఃఅయలి పెండ్లి ఆతిజ పాపం ఆవద్. గాని పెండ్లి ఆతి వరిజ్ యా బత్తుదు నండ్రొ కస్టమ్కు మంజినె. అయాకెజ్ మిజి రెండ మండ్రెజ్ ఇజినె నాను కోరిజిన.

29 తంబెరిజాండె, నాను వెప్పినిక ఇనిక ఇహిజ ఏర్పాటు కిత్తిమని సమయం ఆదెజ్ కాలం కండెకెనె మనాద్. ఆల్నిక్ మనికార్ ఏలుదాన్ ఆల్నిక్ సిలివరి లెకెండె బత్కిదెజ్.

30 అడేబనికార్ అడేబజ వరి లెకెండె మండ్రెజ్ వలె, సర్ల ఆనికార్ సర్ల ఆఇకార్ లెకెండె మండ్రెజ్ వలె, కొణికార్ మాపు కొటిక మా వందిజ్ ఇడెః ఆనికావ్ ఆవప్ ఇజి మండ్రెజ్ వలె.

31 యా లోకమ్దు మనికెజ్ వాడేబనికార్ వనక వందిజ్ మని ఆసదాన్ మన్ను నిండ్రెజి మండ్రెజ్ ఆవద్. యా లోకం ఏలు మని లెకెండె ఎస్తివలెబా మన్ఎండ, సిల్లెండ ఆనాద్లె.

32 మీరు విసారిసి మంజిని వరి లెకెండె మండ్రెజ్ ఆవద్ ఇజి నాను కోరిజిన. పెండ్లి ఆఇకాన్ ఎలాగ ప్రబుజ్ సర్ల కిదెజ్ అట్టు ఇజి ప్రబుజ్ సెందితి సజతిజ్ వందిజ్ ఒండేబిజి మంజినాన్.

33 పెండ్లి ఆతికాన్ ఎలాగ ఆల్నిజ్ సర్ల కిదెజ్ అట్టు ఇజి యా లోకమ్దిజ్ సెందితి సజతిజ వందిజ్ ఒండేబిజి మంజినాన్.

34 వాండ్రు రుండి దరొటు లాగె ఆజినాన్. అయాలెకెండెనె పెండ్లి ఆఇ బోదెలి గాని ఉండ్రొ విడ్డిః అయలి గాని దేవుణుదిజ్ సెందితి సజతిజ వందిజ్ ఎత్తు కిజి మంజినాద్. పూర్తి ఆత్తుదాన్ పూర్తి ఒడోల్దాన్ దేవుణు వందిజ్ కేట మండ్రెజ్ ఇజి అది ఒండేబిజినాద్. గాని పెండ్లి ఆతికాద్ మాసిజ్ ఎలాగ సర్ల కిదెజ్ అట్టు ఇజి యా లోకమ్దిజ్ సెందితి వన్కా వందిజ్ ఒండేబిజి మంజినాద్.

35 మీరు నెగెండె మండ్రెజ్ ఇజినె నాను వెప్పిన, మిజి అడ్డు కిదెజ్ ఇజి సిల్లెద్. మీరు ఇతల్ అతాల్ ఆవిండ దేవుణు దరొట్ నెగెండె మంజి బత్కిదెజ్ ఇజి వెప్పిన.

36 ఎయెన్బా, వన్ని వందిజ్ పేరు కిత్తి అయలిదిజ్ పెండ్లి కిఎండ మంజి, దనిజ్ సిగు కిబిస్సాన్ ఇజి వన్నిజ్ తోరితిజ, దనిజ్ వయసు డాట్టినాద్ ఇజి ఒండేబిజి దనివెట పెండ్లి ఆదెజ్ వలె ఇజి ఒండేబితిజ వాండ్రు కోరిజిన లెకెండె కిదెజ్ వలె. వాండ్రు కినిక పాపం ఆవద్. వారు పెండ్లి ఆదెజ్ వలె.

37 ఎయెన్బా పెండ్లి ఆదెజ్ ఇని బలవంతం సిల్లెండ, వన్నిజ్ వాండ్రె వన్ని గర్బం గదిన్ఎండ పూర్తి అణినె ఆదెజ్ అట్నాన్ ఇజి అయ అయలి వెట నాను పెండ్లి ఆవ ఇజి, అయా సజతి వందిజ్ వన్ని మన్నుదు గటిజ తీర్మనం కిత్తాన్ ఇహిజ, వాండ్రు కిని తీర్మనమ్బా నెగ్గికాదె.

38 అందెజ్ వన్నిజ్ పేరు కిత్తి అయలిదిజ్ పెండ్లి కినికాన్ నెగ్గిక కిజినాన్. అయాలెకెండె పెండ్లి ఆఇకాన్ మరి ఒదె నెగ్గిక కిజినాన్.

39 మాసి బత్తితి మనిదాక ఆల్ని వన్ని వెట మండ్రెజ్ వలె. వాండ్రు సాతిజ దనిజ్ ఇస్టమాతి వన్ని వెట పెండ్లి ఆదెజ్ ఆనాద్ గాని వాండ్రు ప్రబుజ్ సెందితికాన్ ఆజి మండ్రెజ్ వలె.

40 అది రాండిణి లెకెండెనె మహిజ ఒదె సర్లదాన్ మండ్రెజ్ ఆనాద్ ఇజి నాను ఒండేబిజిన, నజీబా దేవుణు ఆత్తు మంజి నాను ఒండేబిని దని లోఇ నజీ నడిపిస్సాన్ ఇజి నాను ఒండేబిజిన.

## 8

### బొమ్మెజి పూజ సితిమని బోజనం వందిజ్

1 ఏలు బొమ్మెజి పూజ సితి బోజనం వందిజ్ వెప్పిన. మాటు విజెటి గెణం మనికాట్ ఇజి నెసినాట్. గాని అయా లెకెండె మని గెణం పొజిస్సినాద్. గాని మా లిఇ ఒరెన్ వన్నిజ్ మరి ఒరెన్ వెట ప్రేమ మహిజ దేవుణు మున్ను మని నమకమ్దు పిరిఫైజ్ అట్నాట్.

2 ఎయెన్బా, నాను ఇనికాదొ నెస్సికాన్ ఇజి ఒండేబితిజ, వాండ్రు నెస్టెజ్ మని లెకెండె ఇనికబా నెస్సికాన్ ఆవన్.

3 గాని దేవుణుదిజ్ ప్రేమిసిని వన్నిజ్ దేవుణుదిజ్ సెందితి వన్ని లెకెండె వాండ్రు సుణాన్.



4 అందెజె బొమ్మెజ పూజ సితికెజ్ తిని వందిజ్ వెప్పిన. ఉండ్రె బొమ్మె ఇహిజ యా లోకమ్దు ఇనికబా ఆఇక ఇజి మాటు నెసినాట్. మరి దేవుణు ఒరెండ్రె మనాన్ మరి ఒరెన్ దేవుణు సిల్లెన్ ఇజి మాటు నెస్త మనాట్.

5 దేవుణు ఇజి కూకె ఆనికెజ్ ఇజి నండొ మహిజ్బా, నిజమె ప్రబుని దేవుణు ఇజి కూకె ఆనికెజ్ నండొ మన్నె. ఆగాసమ్దు గాని బూమి ముస్సు గాని దేవుణు ఇజి పేరు కూకె ఆనికెజ్ నండొ మన్నె.

6 గాని మజీ ఒరెండ్రె దేవుణు మనాన్, వాండ్రు మా బుబ్బు. వన్ని బాణిజె మనికెజ్ విజు కల్లితె. వన్ని వందిజ్ మాటు బత్తిజినాట్. మజీ యేసు క్రీస్తు ఒరెండ్రె మా ప్రబు ఆతికాన్. మనికెజ్ విజు వన్ని వెటనె తయార్ ఆతె. వన్ని వెటనె మాటు బత్తిజినాట్.

7 గాని యాక విజెరె నెన్ఎర. దేవుణుదిజ్ నమ్మిత్తికార్ సెగొండార్ ఏలుబా బొమ్మెజ్ నిజమె దేవుణు ఇజి ఒడొబిజినార్. అందెజె వారు నని బోజనం కినివలె, నిజమె ఆక బొమ్మెజ పూజ సితికెజ్ ఇజి ఒడొబిజినార్. యాలెకెండ్ ఒడొబిజినె వారు ఉణార్. అందెజె వారు నని బోజనం కిత్తార్ ఇహిజ, వారు పాపం కిత్తార్ ఇజి వరి గర్బం గదిసి మంజినాద్.

8 గాని ఉణి బోజనమ్దాన్ మాటు దేవుణుదిజ్ డగ్రు ఆదెజ్ అట్ఎట్. మాటు ఉణెఎండ మహిజ ఇనికాదొ గొప్ప విలువాతిక మజీ నస్తం ఆఎద్. మాటు ఉటిజ ఇనికాదొ గొప్ప విలువాతిక మజీ లాబమ్బా మన్ఎద్.

9 అహిజ ఇనికబా కిదెజ్ నిజే మని అక్కుదాన్, మన్నుదు దయరం సిల్లి వరిజ్ తొరొ ఇడ్డి లెకెండ్ మండ్రెజ్ ఆఎద్.

10 ఎండనిజ్ ఇహిజ, యా గెణం మని నీను, బొమ్మెజ మని గుడిఁదు బోజనం కిజి మంజినిక, మన్నుదు దయరం సిలికాన్ ఒరెన్ సుడొతిజ, బొమ్మెజ పూజ సితికెజ్ తిండ్రెజ్ వాండ్రు దయరం తపె ఆనాన్. అయాలెకెండ్ కిజి వన్ని గర్బం వన్నిజ్ గదిసి మంజినాద్.

11 ఎండనిజ్ ఇహిజ, యా మన్నుదు దయరం సిలి వన్ని వందిజ్బా క్రీస్తు సాత మనాన్. గాని, “నజీ గెణం మనాద్”, ఇజి తొరొ ఆజిని నీను కిజిని పణిజాణిజ్ నీను వన్నిజ్ పాపం కిబిస్సి, మరి వన్నిజ్ పాడొ కిజిని.

12 యా లెకెండ్ మీరు, గర్బం గదిసిని, దయరం సిల్లి తంబెరిజ పడిఎండ పాపం కిజినిదెర్. ఎండనిజ్ ఇహిజ, నీను కిజిని పణిజ్ సుడొజి తప్ప ఇజి ఒడొబినికెజ్, వన్ని గర్బం గదిసినికెజ్ వాండ్రుబా కిజి మంజినాన్. యా లెకెండ్ మీరు క్రీస్తుజ్ పడిఁఇ పాపం కిజినిదెర్.

13 అందెజె నాను ఉణిజిని దనిదటాజ్ నా తంబెరి ఒరెన్ తప్పి సొన్నినాన్ ఇహిజ, నా తంబెరి తప్పి సొన్ఎండ మండ్రెజ్ ఇజి నాను ఎసెజ్బా నన్ని కండ తిన్ఎ.

## 9

అపొస్తుడు ఆతి వన్నిజ్ మన్ని అక్కుజ్

1 నాను అక్కు మనికాన్ ఆవినా? నాను అపొస్తుడు ఆవినా? మా ప్రబు ఆతి యేసుజ్ తొవినా? మీరు, ప్రబు వందిజ్ నాను కిత్తి పణిదిజ్ పంట ఆఇదెరా?

2 నాను అపొస్తుడు ఇజి మహికార్ ఒడొబిఎండ మహిజ్బా, నిజమె మీ వందిజ్ నాను అపొస్తుడునె. నాను ప్రబు వందిజ్ అపొస్తుడు ఇని దనిజ్ రుజుప్ మీరె.

3 నా ముస్సు తీర్పు కిని వరిజ్ ఎద్రు నాను నా వందిజ్ వెప్పినిక యాక.

4 మాపు దేవుణు మాటెజ్ నెన్పిస్తి వరిబాన్ లొసి ఉండెజ్ తిండ్రెజ్ మజీ అక్కు సిల్లెదా?

5 మహి అపొస్తురుజ్ లెకెండ్ని, ప్రబు తంబెరిజు ఆతివరి లెకెండ్ని, పేతురు లెకెండ్ నమ్మిత్తికాద్ ఆతి ఆల్ని వెట బుల్లెయ్ కిదెజ్ మజీ అక్కు సిల్లెదా?

6 దేవుణు పణి కిజిని మహివరి లెకెండ్, మాపు దేవుణు పణి కినివలె నజిని బర్బుబెజ్ తిండి వందిజ్ పణి కిఎండ ఉణిజి తిండ్రెజ్ అక్కు మనాద్.

7 వన్ని సొంత డబ్బు కర్బు కిజి ఎయెన్బా సయనమ్దు పణి కిసాండ్రా? ద్రాక్స టోట ఉణుసి దని పట్టు తిన్ఇకాన్ ఎయెన్బా మనాండ్రా? గొర్రెజ పోస కిజి వన్నా పాలు ఉణిఇకాన్ ఎయెన్బా మనాండ్రా? ఎయెర్బా మన్ఎర్.

8 యా మాటెజ్ నాను లోకమ్దిజ్ సెందితి వరి వజనె వెహొఎ. దేవుణు సిత్తి రూలుదుబా యా లెకెండ్నె వెప్పినాద్.

9 “కలమ్దు మటిసిని డాఁసు మూతుదు కిమా తొహ్మాట్”, ఇజి మోసా వెట దేవుణు సిత్తి రూలుదు రాస్త మనాద్. దేవుణు డాఁకు వందిజ్నె విసారిస్సాండ్రా?

10 నిజమె, యాక మా వందిజ్బా వెహొఎతాండ్రా? మా వందిజ్ వెప్తికెజె. ఎండనిజ్ ఇహిజ, పంట పంటితిజ, ఉండెజ్ ఆనాద్ ఇజి ఉండ్రె ఆసదాన్ డూనికాన్ డూజినాన్. మటిసినికాన్బా అయ ఆసదాన్ మటిసినాన్.

11 మీ వందిజ్ అత్మదిజ్ సెందితికెజ్ మాపు మీ నడిమి వితావ్ ఇహిజ, అందెజె మీ బాణిజ్ మా ఒడొల్దిజ్ కావాలిన్సికెజ్ మాపు లొసె ఆతిజ ఆక పెరి సజతినా?

12 మీ బాణిజ్ సాయం లొసె ఆదెజ్ మహి వరిజ్ అతికారం మనాద్ ఇహిజ, మజి వరిజ్ ఇంక ఒద్దె అక్కు సిల్లెదా? గాని మాపు యా అతికారమదిజ్ వాడెదెజ్ సిల్లెద్. అక్కాదె అఎండ క్రిస్తు సువార్తదిజ్ ఇని అడ్డుబా రెఎండ మండ్రెజ్ ఇజి విజు వన్యాజ్ బరిస్తావ్.

13 దేవుణు గుడిడు పణి కిజిని వరిజ్ దేవుణు గుడిదాన్ బోజనం దొహ్క్కాద్. పూజ సీని మాలి పీటదు పణి కిజిని వరిజ్ పూజ సిత్తి వన్యా లొఇహాన్ వంతు మనాద్ ఇజి మీరు నెన్ ఇదెరా?

14 అయా లెకెండెనె సువార్త వెహ్సిని వరిజ్ బత్తుదిజ్ కావిలిన్సికెజ్ సువార్తదానె దొహ్క్కెకెజ్ ఇజి ప్రబు ఆడ్ర సిత్తా మనాన్.

15 గాని నాను ఇహిజ యా అతికారం లొఇ ఇనికబా వాడెవత. మీరు యా లెకెండె నజి కినిదెర్లె ఇని ఆసదాన్ ఇక రాన్వత. నాను పొగ్గెడె ఆజి వెహ్తి యా మాటెజ్ ఎయెన్బా ఇని అర్థం సిల్లెండ కిని దనిజ్ ఇంక నాను సాతిజానె నెగెద్.

16 అహిజ, నాను సువార్త సాటిసిన ఇజి పొగ్గెడె ఆదెజ్ నజి అక్కు సిల్లెద్. ఎందనిజ్ ఇహిజ సువార్త సాటిస్తెజ్ ఇజి ఉండ్రె బలవంతం నా లొఇ మనాద్. సువార్త సాటిన్వెండ మహిజ నజి బాద.

17 నా సొంత ఇస్టమ్దాన్ నాను సువార్త సాటిస్తెజి నజి జితం దొహ్క్కాద్. నా సొంత ఇస్టమ్దాన్ ఆవిండ కిత్తిజ, నాను కిదెజ్ ఇజి నజి ఒప్పజెపె ఆతి పణి కిజిన ఇజి ఆజినాద్.

18 అహిజ నజి దొహ్క్కె జితం ఇనిక? సువార్త సాటిసినవలె, నాను సువార్త సాటిసిన వరిజ్ మని అతికారమదాన్ ఇనికబా నా వందిజ్ గణస్తెజ్ సుడెఎండ, సెడ్డినె కిదెజ్ వలె. అక్కాదె నజి దొహ్క్కె ఇనాయం.

19 నాను ఎయెరిజ్బా అడిగి మనికాన్ ఆవిండ విజు దనిజ్ అక్కు మనికాన్. గాని, నజి అట్టి నసొండారిజ్ దేవుణు దరిజ్ కలపైజ్ ఇజి నానె నజి విజెరె వందిజ్ వెట్టిపణి కిని వన్ని లెకెండె కిబె ఆత.

20 యూదురిజ్ దేవుణు దరిజ్ కలపైజ్ ఇజి నాను వరి వందిజ్ యూదురు లొకు లెకెండె ఆత. నాను మోసె రాస్తి రూలుజి అడిగి మన్ఇకాన్ ఆతిజ్బా మోసె రాస్తి రూలుజ్ లొజిని వరిజ్ దేవుణు దరిజ్ కలపైజ్ ఇజి వరివందిజ్ మోసె రాస్తి రూలుజ్ లొజితి వన్ని లెకెండె ఆత మన.

21 దేవుణు మోసె సితె రూలుజ్ లొజిజి వరిజ్ దేవుణు దరోట్ కుడుపైజ్ ఇజి నాను వరి లెకెండె ఆత. దేవుణు మోసె వెట సితె రూలుజ్ నాను లొజిఎ ఇజి నాను వెహ్ఎ, గాని క్రిస్తు సిత్తి రూలుజ్ లొజిజి మంజిన.

22 సత్తు సితె వరిజ్ దేవుణు దరిజ్ కుడుపైజ్ ఇజి నాను సత్తు సితె వన్ని లెకెండె ఆత. ఎలాగ ఆతిజ్బా సెగొండారిజ్ దేవుణు రక్సిన్సి లెకెండె కిదెజ్ ఇజి నాను విజెరె వందిజ్ ననివరి లెకెండె ఆత మన.

23 ఎందనిజ్ ఇహిజ దేవుణు బాణిజ్ వాజిని దినమ్క వందిజ్ సువార్త సాటిసిన నజిబా వంతు మండ్రెజ్ ఇజి యాకెజ్ విజు నాను సువార్త వందిజ్ కిజిన.

24 పందెం పొటిదు ఉహ్క్కె పందెమ్దు ఉహ్క్కెనార్ విజెరె ఉహ్క్కెనార్ గాని ఒరెన్ వన్నిజె ఇనాయం దొహ్క్కాద్ ఇజి మీరు నెన్ ఇదెరా? అందెజె ఇనాయం దొహ్క్కెజ్ ఇజినె మీరు పందెమ్దు ఉహ్క్కు.

25 పందెమ్దు పొటి అనికార్ విజెరె దనివందిజ్ ఒజి ఆజి తయార్ ఆజినార్. సాణెం మంజి పాడె ఆజి సొన్సినె టొపి దొహ్క్కె వందిజ్ యాకెజ్ విజు కిజినార్. గాని మజి ఎలాకాలం మంజిని టొపినె దొహ్క్కాద్.

26 అందెజె నాను గురి సుడెఎండ ఉహ్క్కెకాన్ ఆవె. నాను ముటి అసి గాలిదిజ్ డెయ్ని నని వన్ని లెకెండె ఆవె.

27 గాని మహి వరిజ్ సువార్త సాటిసి వెనుక, ఇనాయం దొహ్క్కెజ్ వన్ని లెకెండె నజి నానె కిఎండ మండ్రెజ్ ఇజి నా ఒడొల్దిజ్ నెగెండ అడ్డిజి, నజి వెట్టిపణి కిని వన్ని లెకెండె కిజిన.

## 10

ఇస్రాయేలు లొకురిజ్ సుడెజి నెస్తెజ్ మన్నికెజ్.

1 తంబెరిజాండె, మా అని గొగొర్ ఆతి యూదరు విజెరె మోసె వెట మహివలె ఇనిక జర్గిత మనాద్ మీరు నెగెండ నెసి మండ్రెజ్ ఇజి నాను ఆస ఆజిన. దేవుణు వరివెట మనాన్ ఇజి ఉండ్రె గుర్తు లెకెండె దేవుణు వరి మున్కు ఇడ్డి మని మొసొప్ అడిగి వారు నడిత మహార్. ఎరాని సమ్దారం ఇని సమ్దారం నడిమిహాన్ వారు విజెరె వహ్తి బూమిదాన్ అతాహ పడక నడిత సాహార్.

2 వారు విజెరె మోసె వెట మొసొప్ అడిగి మంజి సమ్దారం నడిమిహాన్ వహ్తి బూమిదాన్ నడిజి మహిజ్, మోసె వెట బాప్సిం లాగె ఆతి లెకెండె అతార్. ఎందనిజ్ ఇహిజ వారు మోసెజ్ వరిజ్ నెయ్యి లెకెండె వారు ఒప్పుకొటార్.

3 విజెరె దేవుణు సితె ఉండ్రె బోజనమ్నె ఉటార్.

4 వారు విజెరె సట్టుదాన్ దేవుణు రపిస్తి ఉండ్రె ఏరునె ఉటార్. అయ సటు క్రీస్తుజ్ గుర్తు లెకెండెనె మనాద్. ఎందనిజ్ ఇహిజు వాండ్రు ఇనికబా తకు సిల్లెండ వరిజ్ కావాలిస్తికెజ్ విజు సీజి నిజమె వరి వెట నడిజి మహాన్.

5 అయా లెకెండ మహిజ్బా, వరి లోఇ నండోడారిజ్ దేవుణు ఇన్లం ఆవిండ ఆతాన్. అందెజె ఎయెర్బా మన్ఇ అయా అడివిదు వరిజ్ సప్త విసీర్తాన్.

6 ఇక్కెజ్ విజు మాటు నెస్టెజ్ ఇజి మజి ఉండ్రె గుర్తు లెకెండ వరిజ్ జర్గితె మన్నె. వారు సెఇ వనకాజ్ వందిజ్ ఆస ఆతి లెకెండ మాపు ఆస ఆవిండ జాగర్త మండ్రెజ్ ఇజి.

7 వరి లోఇ సెగెండార్ లెకెండ బొమ్మెజు మాడిసినికార్ ఆమాట్. “లోకుర్ తిండ్రెజ్ ఉండ్రెజ్ బస్తార్, కర్ణిదెజ్ నీజితార్”, ఇజి వరి వందిజ్ దేవుణు మాటదు రాస్త మనాద్.

8 వరి లోఇ సెగెండార్ కిత్తి మహి లెకెండ మాటు రంకు బాలమాట్. ఉండ్రె రోజుదు ననికార్ ఇరువయ్మూండ్రె వెయుజ్ లోకుర్ సాతార్.

9 వరి లోఇ సెగెండార్ కిత్తి మహి లెకెండ మాటు ప్రబుజ్ పరిస కిదెజ్ ఆవెద్. ననికార్ సరాన్ వెట సాతార్.

10 వరి లోఇ సెగెండార్ దేవుణు ముస్సు సణిజితార్. వారు నాసనం కినికాన్ ఆతి దేవుణు దూత వెట సాతార్. మాటు దేవుణు ముస్సు సణిజెదెజ్ ఆవెద్.

11 మహివరిజ్ తోదెజ్ ఉండ్రె గుర్తు లెకెండ యాకెజ్ వరిజ్ జర్గితె. యా తరమది ఆకర్ దినమ్దు బత్తిజిని మజి బుద్ది వాదెజ్ ఇజి గెపతం కిత్తి మని లెకెండ రాసి ఇడె ఆత మనాద్.

12 అందెజె ఎయెస్బా దేవుణు ముస్సు మని నమకమ్దు నాను గటిజు నిల్సిన ఇజి ఒడెబితిజు, వాండ్రు వెటనె పాపమ్దు అరెండ జాగర్త మండ్రెజ్ వలె.

13 మాములుక లోకురిజ్ వాజిని పరిక్సెజ్ ఆవిండ మరి పెరికెజ్ ఇనికెజ్బా మిజి రవుతె. దేవుణు నమ్మకమాతికాన్. అందెజె ఓరిస్టెజ్ అట్టి దనిజ్ ఇంక పెరిక ఇనికబా మిజి వాదెజ్ వాండ్రు ఒప్వీన్. అక్కాదె ఆవిండ వాజిని పరిక్సెజ్ నిల్సి మండ్రెజ్ పరిక్సె వెట తప్తె ఆదెజ్ ఉండ్రె సరిబా తోరిస్సాన్లె.

### దెయమ్క పండ్రెయ్ని ప్రబు ఏర్పాటు కిత్తి బోజనం

14 అందెజె నజి ఇన్లమాతి తంబెరిజాండె, బొమ్మెజు మాడిసిని బాణిజ్ దూరం ఉప్కొక్కి మండ్రు.

15 మీరు నెగ్గి బుద్ది మనికిదెర్ ఇజినె నాను వర్గిజిన. నాను వెహిని సజతిజు మీరె అర్థం కిజి సుడెడు.

16 మాటు విజెటె కూడెజి వానివలె, మాటు దేవుణు ఏర్పాటు కిత్తి బోజనం ఉణువలె, దేవుణుదిజ్ వందనమ్కు వెహి గినాదిక ఉణిజి, మాటు ఉండ్రె రోటె రుక్కి తినివలె క్రీస్తు నలదాన్ మజి వాజిని నెగ్గి వన్కాజ్ కూడెజి మంజినికాట్ ఆజినాట్.

17 రోటె ఉండ్రెనె, అయ ఉండ్రె రోటెదునె మాటు విజెటె కూడెజి తింజినాట్. అందెజె నండోడార్ ఆతి మాటు ఉండ్రె ఒడెల్ ఆత మనాద్.

18 ఇస్రాయేలు లోకురిజ్ సుడెడు, దేవుణుదిజ్ సంద సుర్ని బాడ్డిదు సంద సీని వన్కాజ్ తినికార్, దనివెట కూడెజి మంజినికార్ ఆవెరా?

19 అందెజె బొమ్మెజు పూజు సీతి వనకాజ్ లోఇ ఇనికబా మనాద్ ఇజినో, బొమ్మెజు లోఇ ఇనికబా మనాద్ ఇజినో నాను వెహినానా?

20 సిల్లెద్. గాని దేవుణు లోకుర్ ఆఇకార్ పూజెజ్ సీనివలె దేవుణుదిజ్ పూజు సీనినార్ ఇజి వారు ఒడెబిజినార్. గాని నిజమె వారు దెయమ్కాజెనె పూజు సీజినార్. అందెజె మీరు దెయమ్క వెట కూడెజి మంజినిక నజి ఇన్లం సిల్లెద్.

21 మీరు ప్రబు గినాదాన్ ఉణిజి మరి దెయమ్క గినాదాన్బా ఉండ్రెజ్ అట్ఇదెర్. ప్రబు ఏర్పాటు కిత్తి బోజమమ్దుని దెయమ్క బోజనమ్దుబా ఒర్పె కూడెజి మండ్రెజ్ అట్ఇదెర్.

22 దేవుణుదిజ్ సెందితి గవరం తగ్గి లెకెండె వన్నిజ్ సీదెజ్ వలె. అయా లెకెండె కిఎండ ప్రబు కోపం రేపిస్టెజ్ మాటు పణి కిజినాటా? మాటు వన్నిజ్ ఇంక సత్తు మనికాటా? నమ్మిత్తి వన్నిజ్ మని అక్కుజ్

23 “విజు వన్కా వందిజ్ నజి అక్కు మనాద్”, గాని విజు పణిదిజ్ వానికెజ్ ఆఉ. “విజు వనక వందిజ్ నజి అక్కు మనాద్”, గాని విజు నెగెండె పిరిప్పికెజ్ ఆఉ.

24 ఎయెస్బా నజి నానె నెగెండె మండ్రెజ్ ఇజి తోఎండ మహికార్బా నెగెండె మండ్రెజ్ ఇజి సుడెదెజ్వలె.

25 మీ గర్బం మిజి గదిన్ఎండ మహిజు సతాదు పొర్ని ఇని కండబా తిండ్రు.

26 ఎందనిజ్ ఇహిజు, “యా బూమి ప్రబుదినె, దని ముస్సు మనికెజ్ విజు వన్నివినె”, ఇజి దేవుణు మాటదు రాస్త మనాద్.

27 ఒరెన్ నమ్మిఇకాన్ మిజీ విందుదిజ్ కూక్కి తనివలె, మిజీ ఆస మహిజ సొండ్రు. గాని గర్బం గదిన్ఎండ, మి ఎద్రు ఇడ్మికెజ్ ఇనికబా వెన్బాఎండ తిండ్రు.

28 గాని ఎయెన్బా, “యాక బొమ్మెజ పూజ సితీ దనిబాణిక”, ఇజి వెప్తాజ, వెప్తా వన్ని వందిజ్ని మీ గర్బం గదిసిని వందిజ్ అక తిన్మాట్.

29 గర్బం గదిసిని వందిజ్ ఇజి వెప్తా వలె అక్క నీది ఆవద్, వెప్తావన్ని వందిజ్నె వెప్తాన. విజు వన్కా వందిజ్ మజీ మని అక్కుదిజ్ మరి ఒరెన్ వన్ని గర్బమ్దు మని ఆలోసనమ్దాన్ ఎందనిజ్ మాపు తీర్పు కిబె ఆదెజ్?

30 నాను అయా బోజనం వందిజ్ దేవుణుదిజ్ వందనమ్కు వెప్తా ఉటిజ, దేవుణుదిజ్ వందనమ్కు వెప్తా ఉటి బోజనం వందిజ్ ఎందనిజ్ నాను దూసె ఆదెజ్ వలె.

31 అందెజె మీరు ఉటిజ్బా, తిహిజ్బా, ఇనిక కిత్తిజ్బా విజు దేవుణుదిజ్ గొప్ప పేరు వాని లెకెండె కిదు.

32 యూదురిజ్ గాని, యూదురు ఆఇవ వరిజ్ గాని, దేవుణు సజమ్ది వరిజ్ గాని తొరొడ్డి లెకెండె ఇనికబా కిఎండ మండ్రు.

33 నండొండారిజ్ దేవుణు రక్కిస్తెజ్ ఇజి, నాను నజీ నానె నెగెండె మండ్రెజ్ ఇజి తొవ. గాని మహికార్బా నెగెణ్ మండ్రెజ్ ఇజి విజు వన్కా లొఇ విజెరిజ్ సర్ద కిబిన్ని లెకెండె నాను మంజిన. మీరుబా నాను కిజిని లెకెండె కిజి మండ్రు.

## 11

### దేవుణుదిజ్ పొగిడిజి మాడిస్సిక

1 నాను క్రీస్తుజ్ పొలిసి నడిసిని లెకెండె మీరు నజీ పొలిసి నడిదు.

2 నాను మిజీ నెస్పిస్టి బోదదిజ్ డిస్ఎండ లొజిజి నడిజినిదెర్ ఇజి, మరి విజు సజతిజి వందిజ్ నజీ ఎత్తు కిజిని వందిజ్ నాను మిజీ పొగిడిజిన.

3 ఏలు మీరు ఇక్కెజ్ నిజం నెస్తెజ్ ఇజి కోరిజిన. ఒరెన్ వన్నిజ్ బుర్ర క్రీస్తు, ఉండ్రి బోదెలిదిజ్ బుర్ర మొగకొడొః క్రీస్తుజ్ బుర్ర దేవుణు ఇజి మీరు నెసి మండ్రెజ్.

4 ఎమేణి మొగకొడొఃబా పార్లనం కినివలెనొ, దేవుణు ప్రవక్త లెకెండె వర్గిని వలెనొ వన్ని బురాదు టుకుర్ ఇడ్డి మహిజ వాండ్రు వన్ని నెయ్యి క్రీస్తుజ్ గవ్ఠం సొన్సిస్నాన్.

5 మరి ఎమేణి బోదెల్బా పార్లనం కనివలెనొ, దేవుణు ప్రవక్త లెకెండె వెప్తావలెనొ బురాదు టుకుర్ ఇడ్ఃఎండ మహివలె అది దని బుర్ర బోడిః కిబె ఆతి లెకెండె సిగు లాగె ఆజినాద్.

6 ఉండ్రి బోదెలి బురాదు టుకుర్ ఇడ్ఃఎండ మహిజ అది దని బుర్రది కొపు కత్తిస్తెజ్ వలె. కొపు కత్తిస్తెజ్నొ బోడి బుర్ర ఆదెజ్నొ సిగు ఆతిజి అది బురాదు టుకుర్ ఇడ్ఃదెజ్వలె.

7 మొగకొడొః బురాదు టుకుర్ ఇడ్ఃదెజ్ అక్కర్ సిల్లెద్. ఎందనిజ్ ఇహిజ దేవుణు, వన్ని గవ్ఠం తొరిస్తెజ్ ఇజి మొగవన్నిజ్ వన్ని మూర్తి లెకెండె తయార్ కిత మనాన్. గాని బోదెలి బురాదు టుకుర ఇడ్ఃదెజ్ వలె. ఎందనిజ్ ఇహిజ బోదెలి దని మాసిజ్ గవ్ఠం తొరిసిన్.

8 ఎందనిజ్ ఇహిజ బోదెలి మొగకొడొః బాణిజ్ తయార్ కిబె ఆత మనాద్, గాని మొగకొడొః బోదెలి బాణిజ్ తయార్ కిబె ఆవతాన్.

9 అక్కాదె ఆవండ, దేవుణు బోదెలి వందిజ్ మొగకొడొఃదిజ్ తయార్ కిఎతాన్, గాని మొగకొడొః వందిజ్నె బోదెలిదిజ్ తయార్ కిత్తాన్.

10 అందెజె యా సజతి వందిజ్ని దేవుణు దూతార్ వందిజ్ అతికారమ్దిజ్ అడిఃగి మని దనిజ్ గుర్తు లెకెండె బోదెలి బురాదు టుకుర్ ఇడ్ఃదెజ్ వలె.

11 గాని ప్రబు వెట కూడిఃతి మని బత్కుదు బోదెలి మొగకొడొః వెట సమందం సిల్లెండ మన్ఎద్. మొగకొడొః బోదెలి వెట సమందం సిల్లెండ మన్ఎన్.

12 మొగకొడొః బాణిజ్ బోదెలి వాతి లెకెండెనె బోదెలి బాణిజ్ మొగకొడొః పుట్టినాన్. గాని విజు దేవుణు బాణిజ్నె వాజినె.

13 ఉండ్రి బోదెలి బురాదు టుకుర్ ఇడ్ఃఎండ దేవుణుదిజ్ పార్లనం కిదెజ్ తగ్నాదా? మీరె ఒడిఃబిదు.

14 మొగ్గ కొడొః వన్ని బుర్రది కొపు పిరిస్తి మహిజ అక్క వన్నిజ్ సిగు ఇజి ఎయెర్బా వెహ్ఎండ మిజి మీరె నెస్సిదెర్ గదె.

15 గాని ఉండ్రి బోదెలిదిజ్ బుర్రది కొపు పిరితి మహిజ అక్క దనిజ్ ఉండ్రి పేరు మని లెకెండెనె, ఉండ్రి పాత సెంగు లెకెండెనె.

16 దిన్ని వందిజ్ ఎయెన్బా గొడఃబ రేప్తిజి ఇక్కాదె ఆవండ మా లొఇ వేరె అలవాటు ఇనికబా సిల్లెద్. దేవుణు సజమ్దుబా సిల్లెద్.

ప్రబు ఏర్పాటు కిత్తి బోజనం వందిజ్.

17 మరి ఏలు నాను వెప్పిని మాటదు మీరు నెగ్గికార్ ఇజి నాను మిజి పొగ్డిఃవి. ఇనిక ఇహిజ మీరు నెగ్గిదని వందిజ్ నె కూడఃజి వాజనిదెర్ గాని నెగ్గి దన్నిజ్ ఇంక అక్క సెఇక కిజినాద్.

18 మొదోహి సజతి ఇనిక ఇహిజ దేవుణు సజం లెకెండ్ మీరు కూడఃజి వానివలె మీ లోఇ గుంపుజ్ మన్నె ఇజి నాను వెహమన. యాక కండెక్ నిజమ్ నె ఇజి నాను నమ్మిజిన.

19 దేవుణు ఎద్రు నెగ్గికార్ ఎయెర్ ఇజి తోరె ఆదెజ్ మీ లోఇ బేదమ్ కు తప్ ఎండ మంజినె.

20 మీరు విజిదెరె కూడఃజి వానివలె మీరు ఉణిక ప్రబు ఏర్పాటు కిత్తి బోజనం ఆవెద్.

21 ఎండనిజ్ ఇహిజ, బోజనం కినివలె ఎయెర్ వందిజ్ బా కాప్ కిఎండ ఒరెన్ ఒరెన్ ముజాల బోజనం కిజినాన్. ఒరెన్ బజ సానాన్ మరి ఒరెన్ సాసి మంజినాన్.

22 ఆహె ఉండెజ్ తిండ్రెజ్ మిజి ఇల్కు సిలునా? మరి దేవుణు సజమ్ దిజ్ ఇజిరి కణక సుడఃజి ఇనిక సిల్లి వరిజ్ మీరు సిగు కిజినిదెరా? నాను మీ వెట ఇనిక వెప్తెజ్? దిన్ని వందిజ్ నాను మిజి పొగ్డిఃదెజ్ నా? కసితం నాను పొగ్డిఃవి.

23-24 ప్రబు బాణిజ్ నజి దోహక్తిక నాను మిజి ఒపజెప్తిక ఇనిక ఇహిజ, ప్రబువాతి యేసు వాండ్రు ఒపజెపె ఆతి పొదోయ్, ఉండ్రె రొటె పెర్లి దేవుణుదిజ్ వందనమ్ కు వెప్పి దనిజ్ ముక్కెజ్ కిజి, “ఇక్క మీ వందిజ్ సీజిని నా ఒడోల్. నజి ఎత్తు కిజి యా లెకెండ్ కిజి మండ్రు”, ఇజి వెప్తాన్.

25 అయా లెకెండ్ నె బోజనం కిత్తి వెనుక వాండ్రు ద్రాసకాలు మని గిన్ను పెర్లి, “యా గిన్ను నా నలదాన్ కిజిని కొత్త ఒపుమానం, మీరు యా గిన్నుదిక ఉణి ఎస్తివలెబా నజి ఎత్తు కిజి యా లెకెండ్ కిజి మండ్రు”, ఇజి వెప్తాన్.

26 అందెజె మీరు యా రొట్టె తింజి యా గినాది ద్రాసకాలు ఉణి ఎస్తివలెబా ప్రబు మర్జి వానిదాక వన్ని సావుదిజ్ సాటిసినిదెర్.

27 అందెజె ఎయెన్ బా తగ్గికాన్ ఆవండ ప్రబు ఏర్పాటు కిత్తి బోజనమ్ దు రొట్టె తింజి గినాదిక ఉటిజ, వాండ్రు ప్రబు ఒడోల్ దిజ్ వన్ని నలదిజ్ పడిఃఎండ పాపం కినికాన్ ఆజినాన్.

28 అందెజె రొట్టెని గినాదిక ఉణి ముజాల్ ఒరెన్ ఒరెన్ వన్నిజ్ వాండ్రె నాను తగ్గికాండ్రా ఇజి సుడః ఆదెజ్ వలె.

29 గాని ఎయెన్ బా యాక ప్రబు ఒడోల్ ఇజి నిజం నెన్ ఎండ ఉణి తినికాన్ వన్ని ముస్కు వాండ్రె సిక్స తపె ఆని వందిజ్ ఉణిజి తింజినాన్.

30 అందెజె మీ లోఇ నండెండార్ సత్తు సిల్లికార్ ని జబుజ్ మనికార్ ఆతార్. నండెండార్ సాత సాహార్.

31 గాని మజి మాటె నెగెణ్ నుడః ఆతాల్ ఇహిజ దేవుణు తీర్పుదు రెఎండ తపె ఆతాల్ మరి.

32 మాటు ప్రబు బాణిజ్ తీర్పు తీర్పు ఆతాల్ ఇహిజ, యా లోకమ్ ది వరిజ్ సీని సిక్సాదు రెఎండ ప్రబు మజి బుద్ది వెప్పి సిక్సాదాన్ దిదిజినాన్.

33 అందెజె నా తంబెరిజాండె, మీరు కూడఃజి వాజి బోజనం కినివలె మహివరి వందిజ్ కాప్ కిదు.

34 మీరు కూడఃజి వాజనిక సిక్సాదిజ్ గురి ఆవండ మండ్రెజ్ ఇజి ఎయెరిజ్ బా బజ కట్టిజ వాండ్రు వన్ని ఇండ్రోనె బోజనం కిదెజ్ వలె. నాను వానివలె మరి మని సజతిజ వందిజ్ వెప్తాలె.

## 12

దేవుణు ఆత్మ సీని వరమ్ కు.

1 తంబెరిజాండె, దేవుణు ఆత్మ సీజిని వరమ్ కాజ్ వందిజ్ మీరు నెగెండ నెసి మండ్రెజ్ ఇజి నాను కోరిజిన.

2 దేవుణుదిజ్ నమ్మిఎండ మహివలె, ఇనికాదో ఉండ్రె సత్తుదాన్ ఎయెండ్రో మిజి నడిఃపిస్తి మహి లెకెండ్ మీరు సొన్ని వర్గిఇ బొమ్మెజ మాడిఃసి మహిదెర్ ఇజి మీరు నెస్సిదెర్.

3 అందెజె, నాను మిజి వెప్పినిక ఇనిక ఇహిజ, దేవుణు ఆత్మదాన్ వర్గిజినికాన్ ఎయెన్ బా, “యేసు సయెమ్ పొందితికాన్”, ఇజి వెప్తాజ్ నో, దేవుణు ఆత్మదాన్ ఆవండ “యేసు, ప్రబు ఆత మనాన్”, ఇజి వెప్తాజ్ నో అట్ ఎవెన్.

4 దేవుణు ఆత్మ సీజిని వరమ్ కు నండో రకమ్ కు మన్నె. గాని అయా ఉండ్రె దేవుణు ఆత్మనె విజు వరమ్ కు సీజినాన్.

5 మరి దేవుణు వందిజ్ కిదెజ్ అట్టి పణిజ్ నండో రకమ్ కు మన్నె, గాని ఒరెండ్రె ప్రబు వందిజ్ మాటు విజెటె పణి కిజినాట్.

6 జర్గిని సజతిజ్ నండో రకమ్ దికెజ్ మన్నె. గాని విజు వన్నా లోఇ, మరి విజెరె లోఇ పణి కినికాన్ ఒరెండ్రె దేవుణునె.

7 విజెరిజ్ పణిదిజ్ వాని వందిజ్ ఇజి ఒరెన్ ఒరెన్ వన్ని వెట దేవుణు ఆత్మ కిజిని పణిజ్ తోరె ఆజినె.

8 ఎలాగ ఇహిజ, ఒరెన్ వన్నిజ్ దేవుణు ఆత్మదాన్ బుద్ది మని మాటెజ్ వెప్తాజ్ వరం సీజినాన్. మరి ఒరెన్ వన్నిజ్ గెణం మని మాటెజ్ వర్గిదెజ్ అయా దేవుణు ఆత్మనె వరం సీజినాన్.

9 మరి ఒరెన్ వన్నిజ్ అయా ఆత్మనె దేవుణు మున్ను నమకం సీజినాన్. మరి ఒరెన్ వన్నిజ్ అయా దేవుణు ఆత్మనె జబుజాణి వరిజ్ నెగెండ్ కిదెజ్ వరం సీజినాన్.

10 మరి ఒరెన్ వన్నిజ్ బమ్మాతి పణిజ్ సత్తుని, మరి ఒరెన్ వన్నిజ్ దేవుణు బాణిజ్ వాజిని మాటెజ్ వన్ని ప్రవక్త లెకెండ్ వెహైజ్, మరి ఒరెన్ వన్నిజ్ ఆత్మెజ్ ఎలాగ మర్తికెజ్ ఇజి నెస్తెజ్, మరి ఒరెన్ వన్నిజ్ ఆఇ ఆఇ బాసెజ్ వర్గిదెజ్, మరి ఒరెన్ వన్నిజ్ బాసెజి అర్లం కిజి నెస్తెజ్ దేవుణు ఆత్మ వరమ్కు సీజినాన్.

11 అయ ఉండ్రె దేవుణు ఆత్మనె వన్నిజ్ ఇష్టమాతి వజ ఒరెన్ ఒరెన్ వన్నిజ్ వరమ్కు సీబాజి సీజి యా పణిజ్ విజు కిజినాన్.

ఉండ్రె ఒడొల్ని నండొ బాగమ్కు.

12 ఒడొల్ ఉండ్రెనె, గాని నండొ బాగమ్కు కూడొజి తయార్ ఆత మనాద్. నండొ బాగమ్కు కూడొతికాదె గాని అవి కూడొజి ఉండ్రె ఒడొల్ ఆతి లెకెండ్నె క్రిస్తుబా మనాన్.

13 ఎలాగ ఇహిజ, యూదురు ఆతిజ్బా, యూదురు ఆఇకార్ ఆతిజ్బా, వెటి పణి కినికాన్ ఆతిజ్బా, అక్కు మనికాన్ ఆతిజ్బా మాటు విజెటి ఉండ్రె ఒడొల్దు ఉండ్రె ఆత్మదానె బాప్తినం లాగె ఆతాట్. అయ ఉండ్రె దేవుణు ఆత్మదానె మా మన్నుజు దేవుణు మజి సిత మనాన్.

14 ఒడొల్ ఇహిజ నండొ బాగమ్కాణిజ్ తయార్ ఆతిక. ఉండ్రె బాగమ్దాన్ తయార్ ఆతిక ఆవద్.

15 అందెజె, “నాను కియు ఆవ, అందెజె నాను ఒడొల్దు మనిక ఆవ”, ఇజి పాదం వెహైజ, అక్కు ఒడొల్దు మంజినిక ఆవండ ఆజినాదా?

16 మరి, “నాను కణక ఆవ, అందెజె నాను ఒడొల్దు మనిక ఆవ”, ఇజి గిబ్బి వెహైజ, అక్కు ఒడొల్దు మంజినిక ఆవండ ఆజినాదా?

17 ఒడొల్ విజు ఉండ్రె కణకానె ఆతిజ, ఎలాగ విండ్రెజ్ అనాద్? ఒడొల్ విజు గిబ్బి ఉండ్రె ఆతిజ, వాసనం సూణిక ఎంబె మంజినాద్?

18 గాని ఉండ్రె ఉండ్రె బాగం ఎలాగ మండ్రెజ్నొ, అయా లెకెండ్ దేవుణు వన్నిజ్ ఇష్టమాతి లెకెండ్ ఒడొల్దు ఇట్టా మనాన్.

19 ఆకెజ్ విజు ఉండ్రె బాగం ఆతిజ ఒడొల్ ఎంబె?

20 ఆకెజ్ మని లెకెండ్ నండొ బాగమ్కు మన్నె గాని ఒడొల్ ఉండ్రె.

21 అందెజె, కణక కియుదిజ్, “నీను నజి అక్కర్ సిల్లెద్”, ఇజి వెహైజ్ అట్ఎద్. బుర్ర పాదమ్కాజ్, “మీరు నజి అక్కర్ సిల్లెద్”, ఇజి వెహైజ్ అట్ఎద్.

22 అక్కాదె ఆవండ, ఒడొల్దు కూడొతి మని సత్తు తకు ఆతి బాగమ్కాజ్, అక్కెజ్ మండ్రెజ్ అక్కర్ సిల్లెద్ ఇజి డొస్సిస్తెజ్ అట్ఎద్.

23 ఒడొల్దు ఎమేణి బాగమ్కాజ్ గవరం సిల్లికెజ్ ఇజి మాటు ఒడొబిజి నాటొ వన్కాజ్ మరి నండొ గవరం మని లెకెండ్ తయార్ కిజినాట్. సుడొదెజ్ సొకు తొరిఇ బాగమ్కాజ్ ఒద్దె అందం వాని లెకెండ్ కిజినాట్.

24 ఒడొల్దు మని అందం మని బాగమ్కాజ్ మరి నెగెండ్ సుడొదెజ్ అక్కర్ సిల్లెద్. గాని దేవుణు విజు బాగమ్కాజ్ కుడుప్పి ఒడొల్దు ఇట్టివలె, మర్యాద తకు మని వనకాజ్ లావ్ మర్యాద సితాన్.

25 అందెజె ఒడొల్దు గొడొబెజ్ మన్ఎండ విజు బాగమ్కు ఉండ్రె మరి ఉండ్రె బాగం వందిజ్ నెగెండ్ సుడొజి మంజినె.

26 ఉండ్రె బాగమ్దు కస్తం వాతిజ, బాగమ్కు విజు కూడొజి దని వెట కస్తమ్దు మంజినె. ఉండ్రె బాగమ్దిజ్ గవరం దొహ్క్వి వలె, బాగమ్కు విజు దనివెట కూడొజి సర్ల ఆనె.

27 ఏలు, మీరు క్రిస్తు ఒడొల్ ఆతి మనిదెర్. ఒరెన్ ఒరెన్ ఉండ్రె బాగం ఆత మనాద్.

28 మరి దేవుణు సజమ్దు ముజాల సెగొండొరిజ్ అపొస్తురు ఇజి, వెనుక మరి సెగొండొరిజ్ దేవుణు ప్రవక్తరు ఇజి, దని వెనుక సెగొండొరిజ్ దేవుణు మాటెజ్ నెస్పిసినికార్ ఇజి, దని వెనుక సెగొండొరిజ్ బమ్మాతి పణిజ్ కినికార్ ఇజి, దని వెనుక మనికార్ ఇజి, సెగొండొరిజ్ మహి వరిజ్ సాయం కినికార్ ఇజి, మరి సెగొండొరిజ్ నడిపిస్సికార్ ఇజి, మరి సెగొండొరిజ్ ఆఇ ఆఇ బాసెజ్ వర్గినికార్ ఇజి ఏర్పాటు కిత మనాన్.

29 విజెరె అపొస్తురునా? విజెరె దేవుణు ప్రవక్తరునా? విజెరె దేవుణు మాటెజ్ నెస్పిసినికార్నా? విజెరె బమ్మాతి పణిజ్ కినికారా?

30 విజెరె జబుజాణి వరిజ్ నెగెండ్ కిదెజ్ వరం మనికారా? విజెరె ఆఇ బాసెజాణిజ్ వర్గిజినారా? విజెరె అయ బాసెజి అర్లం కిజి వెహైజినారా?

31 గాని వరమ్క లొఇ గొప్ప పెరి వన్కా వందిజ్ ఆస ఆజి మండ్రు. ఏలు నాను మిజి గొప్ప నెగ్గి సరి తొరిసినాలె.

## 13

### విజు దనిజ్ పెరిక ప్రేమ

1 నాను లోకుర్ వర్గిని విజు బాసెజాణిజ్ వర్గిటిజ్బా, దేవుణు దూతార్ వర్గిని బాసెజాణిజ్ వర్గిటిజ్బా, నాను ప్రేమ సిల్లికాన్ ఇహిజ పణిదిజ్ రెజ కంసు, సిల్లిజ టిజ్టిజ్ పలక్కి తాలిబిలెజ్ లెకెండ్నె.

2 నాను దేవుణు ప్రవక్త లెకెండ్ వరం మనికాన్ ఆతిజ్బా, డాజితి మని విజు సజతిజ్ నెస్తిజ్ అట్టికాన్ ఆతిజ్బా, విజు గెణం మనికాన్ ఆతిజ్బా, గొరొకాజ్ బస్తిసిని నమకం మనికాన్ ఆతిజ్బా ప్రేమ సిలికాన్ ఇహిజ నాను పణిదిజ్ రెజక.

3 నజి కల్లితి మనికెజ్ విజు బీద వరిజ్ సిత్తిజ్బా, సిసుదు సుర్దెజ్ నా ఒడొల్ ఒపజెప్తిజ్బా, ప్రేమ సిల్లికాన్ ఇహిజ నాను కినిక పణిదిజ్ రెజక.

4 ప్రేమ మనికాన్ నండొ ఓరిసినాన్. వాండ్రు మహి వరి ముస్కు దయ మనికాన్ ఆనాన్. వాండ్రు గోస ఆవెన్. వాండ్రు పొజినికాన్ ఆవెన్. వాండ్రు గర్ర ఆవెన్.

5 ప్రేమ మనికాన్ మర్యాద సిల్లెండ మనికాన్ ఆవెన్. వాండ్రు నజి నానె నెగెండ మండ్రెజ్ ఇజి ఒడొబినికాన్ ఆవెన్. వాండ్రు బేగి కోపం ఆవెన్. వాండ్రు వన్ని వెట కిత్తిమని సెజ వన్కా వందిజ్ మన్నుదు ఇడొజి మన్వెన్.

6 ప్రేమ మనికాన్ సెజ వన్కా వందిజ్ సర్ద ఆవిండ, నిజమాతి వన్కా వందిజ్ సర్ద ఆజినాన్.

7 ప్రేమ మనికాన్ ఎస్తివలెబా సణిజిఎండ విజు సెమిస్సాన్. వాండ్రు ఎస్తివలెబా మహివరి వందిజ్ నెగ్గికెజ్ నమ్మిజి మంజినాన్. వాండ్రు ఎస్తివలెబా ఆనదాన్ ఎద్దు సుడొజి మంజినాన్. వాండ్రు ఎస్తివలెబా డిస్ఎండ ఓరిసి మంజినాన్.

8 ప్రేమ ఎలాకాలం మంజినాద్. దేవుణు ప్రవక్త లెకెండ్ వెప్తాజ్ మని వరం ఎలాకాలం మన్వెద్. అజ అజ బాసెజ్బా వర్గినికబా ఎలాకాలం మన్ఉలె. గెణమ్బా సిల్లెండ ఆనాద్.

9 ఎందనిజ్ ఇహిజ ఏలు మాటు సెగమ్నె నెస్త మనాట్. సెగమ్నె దేవుణు ప్రవక్త లెకెండ్ వెప్సినాట్.

10 గాని పూర్తి ఆతిక వానివలె పూర్తి అజక నిల్లెండ ఆనాద్.

11 నాను ఇజిరికాన్ మహివలె ఇజిరి వన్ని లెకెండ్ వర్గిత. ఇజిరి వన్ని లెకెండ్ ఒడొబిత. ఇజిరి వన్ని లెకెండ్ ఆలొసనం కిత. పెరికాన్ ఆతివలె ఇజిరికాన్ మహివలె మని పణిజ్ డిస్త్ సిత్త.

12 ఏలు అద్దమ్దు సుడొతి లెకెండ్ ఉండ్రె బొమ్మనె సుడొజినాట్. నస్తివలె మొకొం నిండ్రు సూణాట్. ఏలు సెగమ్నె నెస్సాట్, నస్తివలె దేవుణు నజి ఏలు నెస్తిమని లెకెండ్ పూర్తి నెస్సాట్లె.

13 అహిజ దేవుణు ముస్కు మని నమకం, ఆనదాన్ ఎద్దు సుడొజి మంజినిక, ప్రేమ యా మూండ్రెబా నిల్లి మంజినె. గాని వినుక లొజ గొప్ప నెగ్గిక ప్రేమనె.

## 14

### దేవుణు ఆత్మ సీని వరమ్కు.

1 మీ బత్తుదు ప్రేమనె ముజాల మనిద్. దేవుణు ఆత్మ సీని వరమ్కాజ్ వందిజ్ ఆస ఆజి మండ్రు. దేవుణు ప్రవక్తరు ఆదెజ్ ఆస ఆదు.

2 ఎందనిజ్ ఇహిజ, అజ బాసెజ వర్గినికాన్ లోకుర్ వెట ఆవిండ దేవుణు వెటనె వర్గినికాన్. నిజమె లోకు ఎయెన్బా వాండ్రు వర్గినికెజ్ అర్దం కిదెజ్ అట్వెన్. గాని వాండ్రు వన్ని ఆత్మదాన్ దేవుణుదిజ్ సెందితి డాజితి మని సజతిజ్ వర్గినికాన్.

3 గాని, దేవుణు ప్రవక్తరు లెకెండ్ వర్గినికాన్ లోకుర్ వెటనె వర్గినికాన్. లోకుర్ మన్నుదు సత్తు మనికార్ ఆదెజ్, వరిజ్ దయరం వెప్తాజ్, మరి ఓదరిస్సెజ్ ఇజి.

4 అజ బాసెజ్ వర్గినికాన్ వన్నిజ్ వాండ్రె దయరం కిబె ఆజినాన్. గాని దేవుణు ప్రవక్తరు లెకెండ్ వర్గినికాన్ సజమ్దు మని వరిజ్ ఉసార్ కిజినాన్.

5 మీరు విజిదెరి అజ బాసెజాణిజ్ వర్గినికెదెరి ఆదెజ్ ఇజి నాను కోరిజన. గాని దేవుణు ప్రవక్తరు లెకెండ్ ఆదెజ్ ఇజి లావ్ ఆస ఆజిన. అజ బాసెజాణిజ్ వర్గినికాన్, సజమ్దిజ్ దయరం వెప్తాజ్ ఇజి అజ బాసెజాణిజ్ వర్గిని మాటెజ అర్దం కిజి వెహ్ఎండ మహిజ, దేవుణు ప్రవక్తనె వన్నిజ్ ఇంక పెరికాన్ ఆజినాన్.

6 తంబెరిజాండె, నాను మీ డగ్గు వాజి, దేవుణుది డాజితి మని సజతిజ్ దేవుణు తోరిస్సికెజ్నొ, గెణం మాటెజ్నొ, దేవుణు ప్రవక్త లెకెండ్ దేవుణు సిత్తి మాటెజ్నొ మీ వెట వర్గిఎండ, అజ బాసెజాణిజ్ వర్గిని మహిజ నా వెట మిజి ఇని లాబం వానాద్?

7 అయా లెకెండ్నె, పలక్కివలె సెవుడుః వాజిని పాణం సిల్లి వస్తుజ్ ఆతి, టొయ్ల గాని పిరుడిః గాని పలక్కివలె ఇని తేడ సిల్లెండ ఉండ్రె లెకెండ్ పలక్కి మహిజ, ఊక్తి మనిక ఇనిక, పలక్కి మనిక ఇనిక ఇజి ఎలాగ నెస్తిజ్ ఆనాద్?

8 విదెమీదిజ్ సొండ్రెజ్ ఇజి సయనమీది వరిజ్ కూకైజ్ జోడు బాంగ పలక్కివలె వరిజ్ అర్థమానిలెకెండ నెగెండ జాటు సిఎండ మహిజ, విదెమీదిజ్ సొండ్రెజ్ సయనమీదికార్ తయార్ ఆనారా?

9 అయాలెకెండెనె మీరుబా వెయుదాన్ నెగెండ వర్గిఎండ మహిజ, మీరు ఇనిక వర్గిజినిదెర్ ఇజి వినికార్ ఎలాగ అర్థం కిదెజ్ అట్పార్? మీరు గాలి వెటనె వర్గినికిదెర్ ఆజినిదెర్.

10 యా లోకమీదు నండొ బాసెజ్ మన్నె ఇని దనిజ్ ఇని అనుమానం సిల్లెద్. గాని వన్నా లొఇ ఉండ్రెబా అర్థం సిల్లిక ఆవీద్.

11 ఒరెన్ వర్గిని మాటెజ నాను అర్థం కిదెజ్ అట్ఎండ మహిజ, నాను వర్గిని వన్నిజ్ ఆఇ దేసెమీది వన్ని లెకెండ ఆనాలె. వర్గినికాన్ నజిబా ఆఇ దేసెమీది వన్ని లెకెండ మంజినాన్.

12 మిజిబా అయాలెకెండెనె మంజినాద్. మీరు దేవుణు ఆత్మ సీజిని వరమ్కాజ్ వందిజ్ నండొ ఆస ఆజి మంజినికిదెర్. అందెజె సజమీదిజ్ పిరిప్పి వందిజ్ అయా వరమ్కాజ్ నండొ పణి కిదు.

13 అందెజె దిన్ని వందిజ్, ఆఇ బాసదాన్ వర్గినికాన్, బాసెజ అర్థం కిజి వెహైజ్ అట్టి లెకెండ పార్థనం కిదెజ్ వలె.

14 అహిజ, నాను ఆఇ బాసదాన్ పార్థనం కిజి మహిజ, నా ఆత్మ పార్థనం కిజినాద్. గాని నా గర్బం కాలి మంజినాద్.

15 అందెజె నాను ఇనిక కిదెజ్ వలె? నాను నా ఆత్మదాన్ పార్థనం కిన్. గాని నా మన్నుదాన్బా నాను పార్థనం కిసాలె. నాను నా ఆత్మదాన్ పాటెజ్ పార్పు. గాని నా మన్నుదాన్బా పాటెజ్ పార్పాలె.

16 మీరు మీ ఆత్మదాన్ దేవుణుదిజ్ పొగ్డిజి మహిజ, మీరు దేవుణుదిజ్ వందనమ్కు వెప్పినిదెర్. మీరు వర్గిని మాటెజ అర్థం కిదెజ్ అట్ఇకాన్ ఒరెన్, మీరు వెప్పిని వందనమ్మిదిజ్, ఎలాగ మీ వెట కూడెజి, “అమెన్” వెహైజ్ అట్పాన్.

17 మీరు ఇహిజ ఒద్దె నెగెండ దేవుణుదిజ్ వందనమ్కు వెప్పినిదెర్. గాని ఆఇకాన్ దయరం కిబె ఆదెజ్ అట్ఎన్.

18 నాను మిజి విజెరిజ్ ఇంక నెగెండ ఆఇ బాసెజాణిజ్ వర్గిని వందిజ్ దేవుణుదిజ్ వందనమ్కు వెప్పిన్.

19 గాని సజమీదు ఆఇ బాసెజాణిజ్ పది వెయుజ్ మాటెజ్ వర్గిని దనిజ్ ఇంక మహివరిజ్ నెప్పిన్ని లెకెండ బుద్దిదాన్ కూడితి అయ్దు మాటెజ్నె నాను వెహ్న.

20 తంబెరిజాండె, మీరు ఇజిరి కొండొర్ ఒడెబిని లెకెండ ఒడెబిజి మంజినిక డిసి సిదు. నెఇ వన్నా వందిజ్ లేత కొండొర్ లెకెండ మండ్రు. గాని ఒడెబినిబాన్ పెరికిదెర్ ఆదు.

21 “ఆఇ బాసెజ్ వర్గిని ఆఇ దేసెమీది లోకర్ నా వందిజ్ విరి వెట వర్గితిజ్బా వారు గిబిజ్ ఒడెజి నా మటెజ్ విన్వర్”, ఇజి ప్రబు వెప్పినాన్ ఇజి దేవుణు మాటదు రస్త మనాద్.

22 అందెజె ఆఇ బాసెజ్ వర్గినిక, నమ్మిఇ వరిజ్ దేవుణు సత్తుదిజ్ ఉండ్రె గుర్తు లెకెండెనె మనాద్ ఇజి మాటు దేవుణు మాటదాన్ నెస్పాట్. నమ్మిత్తి వరిజ్ ఆవద్. గాని దేవుణు ప్రవక్తరు వెప్పిని మాటెజ్, నమ్మిత్తి వరి వందిజ్ రుజుప్ ఆజినె గాని నమ్మిఇ వరివందిజ్ ఆవద్.

23 అందెజె సజమీదు మనికార్ విజెరె కూడెజి వానివలె విజెరె ఆఇ బాసెజాణిజ్ వర్గిని మహిజ, యాక అర్థం కిదెజ్ అట్ఇకానొ, నమ్మిఇకానొ లొఇ వాతిజా, మీరు బుద్ది నెగెండ సిల్లెండ ఆజి వర్గినిదెర్ ఇజి వారు వెవ్ఎరా?

24 గాని ఒరెన్ నమ్మిఇకాన్ గాని దిన్ని వందిజ్ నెన్ఇకాన్ గాని లొఇ వాతిజ, విజెరె దేవుణు ప్రవక్తరు లెకెండ వెప్పి మహిజ, వెని మాటెజాణిజ్ వాండ్రు కిత్తి మని తప్పుజ వందిజ్ ఎత్తు కిజి వన్ని మన్నుదు ఒడెబిజి ఒప్పకొణాన్. మీరు వెప్పిని మాటెజాణిజ్ వన్నిజ్ వాండ్రె తీర్పు కిబె ఆనాన్లె.

25 మరి వన్ని మన్నుదు డాజితి మనికెజ్ విజు వెల్లి తోర్పె. అయావలె, “నిజమె దేవుణు మీ వెట మనాన్”, ఇజి బమ్మ ఆజి వాండ్రు ముణుకుజ్ ఊర్జి దేవుణుదిజ్ పొగ్డిజి మాడిస్సాన్లె.

**దేవుణుదిజ్ పొగ్డిజి మాడిస్సిక ఎలాగ మండ్రెజ్.**

26 అహిజ తంబెరిజాండె, మాటు ఇనిక వెహైజ్? మీరు కూడెజి వానివలె, ఒరెన్, ఉండ్రె పాటెజ్ పార్దెజ్ వలె ఇజినాన్. మరి ఒరెన్ బుద్ది మాటెజ్ నెప్పిస్తెజ్ వలె ఇజినాన్. మరి ఒరెన్ డాజితి మనిక దేవుణు తోరిస్తికెజ్ వెహైజ్ వలె ఇజినాన్, మరి ఒరెన్ ఆఇ బాసెజాణిజ్ వర్గిదెజ్ వలె ఇజినాన్, మరి ఒరెన్ బాసదిజ్ అర్థం వెహైజ్ వలె ఇజినాన్, యాకెజ్ విజు సజమీదు మని వరిజ్ దయరం వాని వందిజ్ కిదెజ్ వలె.

27 ఆఇ బాసెజ వర్గినికార్ ఒరెనొ రిఎర్నొ వర్గిదెజ్ వలె. రిఎర్నొ మిస్తిజ ముఎర్ వర్గిదెజ్ వలె. గాని విజెరె ఒర్పె వర్గిఎండ, ఒరెన్ ఒరెన్ వర్గిదెజ్ వలె. ఎయెర్బా దనిజ్ అర్థం వెహైజ్ వలె.

28 ఆఇ బాసెజ వర్గిని దనిజ్ అర్థం కిజి వెప్పికాన్ సిల్లెండ మహిజ, ఆఇ బాసెజాణిజ్ వర్గినికాన్ సజమీదు పల్లక్ మండ్రెజ్. వాండ్రు వన్ని మన్నుదు వర్గిని దేవుణు వెట వర్గిదెజ్ వలె.



29 దేవుణు ప్రవక్తరు లెకెండ వర్గినికార్బా రివెన్, మువెన్ వర్గిదెజ్ ఆనాద్. మహికార్ వెహ్ని దనిజ్ నెగెండ వెంజి, ఇనిక వెహ్నినార్ ఇజి జాగర్ల సుడెడెజ్వలె.

30 డగ్రు బస్తిమని మరి ఒరెన్ దేవుణు ప్రవక్తెజ్ ఇనికాబా దేవుణు బాణిజ్ తోరె ఆతిజ, ముజాల వర్గిజి మంజినికాన్ పలక్ మండ్రెజ్ వలె.

31 విజెరిజ్ నెస్పిసిని వందిజ్, విజెరిజ్ దయరం వెహ్ని వందిజ్, మీరు విజెదెరె ఒరెన్ వన్ని వెనుక మరి ఒరెన్ దేవుణు బాణిజ్ వాజిని మాటెజ్ దేవుణు ఆత్మ నడిపిస్సి లెకెండ వర్గిదెజ్ ఆనాద్.

32 ప్రవక్తరు లొఇ మని వరి ఆత్మ ప్రవక్తరిజ్ లొజిజి మంజినాద్.

33 ఎందనిజ్ ఇహిజ దేవుణు సమాదానమ్దిజ్ దేవుణునె గాని గగోలిదిజ్ దేవుణు ఆవెన్.

34 విజు దేవుణు సజమ్కాజ్ మని లెకెండ, సజమ్దు పొగ్డిజి మాడిఃస్సివలె, బోదెక్ గగోల్ ఆజి వర్గిజి మండ్రెజ్ ఆవిద్, పలక్ మండ్రెజ్ వలె. సజమ్దు అవిక్ వర్గిదెజ్ ఆవిద్. గాని మోసె రాస్తి రూలుదు వెహ్ని మని లెకెండ అవిక్ అణిజిజి మండ్రెజ్.

35 వరిజ్ ఇనికబా నెస్టెజ్ ఇహిజ, ఇండ్రో వన్కా వన్కా మాసిరిజ్ వెన్బాదెజ్ వలె. సజమ్దు బోదెలి వర్గిజి మంజినిక దనిజ్ సిగు.

36 మీరు ఇనిక ఒడెఃబిజనిదెర్? దేవుణు మాటెజ్ మీరె రాస్తి తయార్ కిత్తిదెరా? అక్క మిజినె అక్క దొహ్క మనాదా?

37 ఎయెన్బా వాండ్రు దేవుణు ప్రవక్త ఇజి ఒడెఃబిజినాన్ ఇహిజ, దేవుణు ఆత్మ సిత్తి వరమ్కు మనికాన్ ఇజి ఒడెఃబిజి మహిజ్బా, వాండ్రు నాను మిజి రాస్తి మనికెజ్ ప్రబుబాణిజ్ వాతి ఆడ్రెజ్ ఇజి తవ్ఎండ ఒప్పుకొండెజ్ వలె.

38 ఎయెన్బా యాక నెక్కి పొక్కిజ, వన్నిజ్ వాండ్రె నెక్కి పొకె ఆనాన్లె.

39 అందెజె నా తంబెరిజాండె, దేవుణు ప్రవక్తరు ఆదెజ్ ఆస ఆజి మండ్రు. గాని ఆఇ బాసెజాణిజ్ వర్గిని వరిజ్ అడ్డు కిమాట్.

40 గాని విజుబా నెగెండ మర్యాదదాన్ తగ్గి లెకెండ కిదెజ్ వలె.

## 15

**క్రీస్తు సాతి వరిబాణిజ్ మర్రి నిజితి వందిజ్.**

1 తంబెరిజాండె, నాను మీ నడిఃమి సాటిస్తి సువార్ల వందిజ్ మరి మిజి ఎత్తు కిబిస్టెజ్ ఇజి నాను కోరిజిన. మీరు డగ్రు కిజి నమ్మిత్తి అయ సువార్ల, దన్నిజ్ తగితి లెకెండ మండ్రెజ్ ఇజి నిర్ణెం కిత్తిదెర్.

2 నాను మిజి వెహ్ని మని అయా సువార్లదానె దేవుణు మిజి రక్కిస్ట మనాన్. అందెజె నాను వెహ్ని మని మాటెజ్, మీరు నెగెండ అసి అయాలెకెండె మండ్రెజ్. సిల్లెండ మహిజ మీరు దేవుణు ముస్సు ఇట్టి నమకం నిజం ఆవిండ మంజినాద్.

3 దేవణు బాణిజ్ నజి దొహ్క మన్నిక, నాను మిజి ఒప్పుజెప్తి మని వన్కా లొఇ గొప్ప ముకెలమతిక ఇనిక ఇహిజ, ముజాల దేవుణు మాటదు రాస్తి మహిక పూర్తి కిత్తి లెకెండ, క్రీస్తు మా పాపమ్క వందిజ్ సాతాన్.

4 ముజాల దేవుణు మాటదు రాస్తి మహిక పూర్తి కిత్తి లెకెండెనె మూసె ఆతండ్రె మూండ్రె రోస్కాణిజ్ మర్రి నీకె ఆతాన్.

5 ముజాల పేత్రుజ్ని\* వెనుక వన్ని సిసుర్ ఆతి పనెండు మన్సిరిజ్ తోరె ఆతాన్.

6 దన్ని వెనుక అయదు వందెజ మిస్తి నమ్మిత్తి తంబెరిజ ఒర్నె తోరె ఆతాన్. వరి లొఇ నెగెండార్ సాత సాహోర్ ఇహిజ్బా నండెండార్ ఏలుబా బత్తిజినార్.

7 వెనుక వాండ్రు యాకోబుజ్ని అపొస్తురుజ్ విజెరిజ్ తోరె ఆతాన్.

8 విజెరిజ్ తోరె ఆతి వెనుక, కడెఃవెరిదు, నెగెండ పుట్ఇకానాతి నజిబా తోరె ఆతాన్.

9 అపొస్తురు లొఇ విజెరిజ్ ఇంక వీన్కోడెః నానె. అపొస్తుడు ఇజి కూకె ఆదెజ్బా నాను తగితిక ఆవి. ఎందనిజ్ ఇహిజ నాను దేవుణు సజమ్ది వరిజ్ హిమ్సెజ్ కిత మన్ను.

10 ఏలు నాను ఇనిక ఆత మనానో, అక్క దేవుణు నజి తోరిస్తి దయాదర్మదానె ఆత మన్ను. అహిజ వాండ్రు నా ముస్సు దయా దర్మం తోరిస్తిక దర్మమ్దిజ్ సిత్తి లెకెండ ఆవెతాద్. విజెరిజ్ ఇంక నండె కస్టబాడెఃజి నాను పణి కిత మన. గాని కస్టబాడెఃతిక నాను ఆవి, నజి తోడుః మహి దేవుణు దయాదర్మమనె.

11 అందెజె నాను ఆతిజ్బా, వారు ఆతిజ్బా ఇక్కాదె మాపు సాటిస్ట మనాప్.

**సాతికార్ మర్జి నీజ్ని వందిజ్.**

\* 15:5 15:5 పేతురుజ్ కెప ఇజిబా పేరు మనాద్.

12 గాని, క్రీస్తు సాతి వరి బాణిజ్ నీకె ఆత మనాన్ ఇజి సాటె ఆతి మహిజ్, సాతి వరి బాణిజ్ మరజి నిజ్నిక సిల్లెద్ ఇజి మీ లోఇ సెగొండార్ ఎలాగ వెప్పినార్?

13 సాతి వరిబాణిజ్ మరజి నిజ్నిక సిల్లెద్ ఇహిజి క్రీస్తుబా మరజి నిజ్ఎతాన్.

14 క్రీస్తు సాతి వరిబాణిజ్ మరజి నిజ్ఎతాన్ ఇహిజి మాపు సాటిసిని సువార్త పణిదిజ్ రెఇక. మీరు దేవుణుదిజ్ నమ్మిత్తికబా పణిదిజ్ రెఇక.

15 అక్కాదె ఆవిండ, మాపు దేవుణు వందిజ్ అబద్దం వెప్పి సాసిర్ ఇజి తోరె ఆజినాద్. ఎందనిజ్ ఇహిజి దేవుణు సాతి వరిబాణిజ్ క్రీస్తుజ్ నిక్త మనాన్ ఇజి మాపు దేవుణు వందిజ్ సాసి వెప్తా మనాప్. సాతికార్ మర్ణి నిజె ఆవెర్ ఇహిజి, దేవుణు క్రీస్తుజ్బా నికెవతాన్.

16 దేవుణు సాతి వరిజ్ మర్ణి బత్కిన్ఎన్ ఇహిజి అయాలెకెండె దేవుణు క్రీస్తుజ్బా మరజి బత్కిన్ఎతాన్.

17 క్రీస్తు మర్ణి నిజె ఆవెతాన్ ఇహిజి మీరు నమకం ఇడెతిక పణిదిజ్ రెఇక. మీరు ఏలుబా మీ పాపమ్క వందిజ్ దేవుణు సిని సిక్కిదిజ్ తగ్గికిదెరె.

18 అక్కాదె ఆవిండ క్రీస్తుజ్ నమ్మిజి సాతికార్బా నాసనం ఆత సాహార్.

19 యా బత్కుదునె వాండ్రు మజి సాయం కినాన్, సాతిసాహి వెనుక సిల్లెద్ ఇజినె మాటు క్రీస్తు ముస్కు ఆసదాన్ ఎద్రు సుడెజి మంజినికాల్ ఇహిజి, మా బత్కు విజెరిజ్ ఇంక హిసమాతి బత్కు బత్కిజినాట్.

20 గాని, సాతి వరిబాణిజ్ తొలిత పండితి పంట లెకెండె, క్రీస్తు నిజమె సాతి వరిబాణిజ్ మర్ణి నిజెత మనాన్.

21 ఇనిక ఇహిజి ఒరెన్ లోకు వెటనె సావు వాతాద్. అయాలెకెండె సాతి వరిబాణిజ్ మర్ణి నిజె ఆనికబా ఒరెన్ వన్ని వెటనె వాతాద్.

22 ఆదము వెట విజెరె ఎలాగ సాజినారొ, అయాలెకెండెనే క్రీస్తు వెట విజెరె పాణం మనికార్ ఆనార్లె.

23 గాని ఒరెన్ ఒరెన్ వన్ని వర్నాదునె పాణం మనికాన్ ఆనాన్. తొలిత పండితి పంట క్రీస్తు. వెనుక క్రీస్తు వానివలె వన్నిజ్ సెందితికార్ పాణం మనికార్ ఆనార్.

24 దని వెనుక వాండ్రు యా లోకమ్దు మని విజు సెఇ సత్తుజ్ని, విజు అతికారమ్కాజ్, విజు సత్తుజు మాయిప్పి పోక్కి, వన్ని బుబ్బాతి దేవుణు ఏలుబడి: కిని వందిజ్ విజు ఒవజెప్పాన్లె. నస్తివలె విజు దన్నిజ్ ఆక్కర్ ఆనాద్లె.

25 ఎందనిజ్ ఇహిజి వన్నిజ్ పగాతి విజెరిజ్, వన్ని పాదమ్కు అడి:గి దేవుణు ఇడె:నిదాక క్రీస్తు ఏలుబడి: కిజి మండ్రెజ్ వలె.

26 లోకురిజ్ విజెరిజ్ పగాతి సావుదిజ్, కడె:వేరిదు వాండ్రు నాసనం కినాన్లె.

27 దేవుణు, “విజు వనకాజ్ వన్ని పాదమ్కు అడ్డి ఇట్టాన్”, ఇజి దేవుణు మాటదు రాస్త మనాద్. “విజు వన్కాజ్”, క్రీస్తు పాదమ్క అడి:గి ఇట్టా మనాన్ ఇజి వెప్పి వలె, విజు వనకాజ్ విని పాదమ్కు అడి:గి ఇడ్డి మనికాన్ ఆతి దేవుణు అయ విజు వనకాజ్ వెట వన్నిజ్ వాండ్రె క్రీస్తు పాదమ్క అడి:గి ఇడె: ఆవెన్ ఇజి టేట తోరెజినాద్.

28 వాండ్రు యా లెకెండె కిత్తి వెనుక, మరిన్ విజు వనకాజ్ వన్ని పాదమ్కు అడి:గి ఇట్టి మనికాన్ ఆతి దేవుణుదిజ్, వన్నిజ్ వాండ్రె అణజిజి మంజినాన్లె. ఎందనిజ్ ఇహిజి దేవుణు ఒరెండ్రె అయ విజు వన్కాజ్ ముస్కు అతికారం మనికాన్ ఆదెజ్వలె.

29 సాతికార్ మర్ణి నిజ్నిక సిల్లెద్ ఇహిజి, సెగొండార్ కిని లెకెండె సాతి వరి వందిజ్ బాప్తినం లాగె ఆని దనిజ్ ఇని అర్దం మనాద్? సాతికార్ నిజె ఆవెర్ ఇహిజి ఎందనిజ్ లోకుర్ వరి వందిజ్ బాప్తినం లాగె ఆదెజ్?

30 మరి సాతికార్ మర్ణి నీజ్నార్ ఇజి మాపు నమ్మిఎప్ ఇహిజి ఎందనిజ్ సావు తప్పిప్రమాదమ్కాజ్ మాపు గురి ఆదెజ్.

31 తంబెరిజాండె, ప్రబు ఆతి క్రీస్తు యేసుక్రీస్తు వెట మీరు కూడి:తి వందిజ్ నాను నిజం ఎసా సర్ల ఆజినానొ అయాలెకెండెనే ఎస్తివలెబా నాను సపె ఆదెజ్బా అక్కు మనద్ ఇజి నాను మిజి నిజం వెప్పిన.

32 యా లోకమ్దిజ్ సెందితి సజతిజ్ వందిజ్నె నాను ఎపెసి పట్టుమ్దు అడి:వి జంతుజు వెట విద్దె కితానా? సాతికార్ మర్ణి నిజె ఆవెర్ ఇహిజి నజి ఇని లాబం మనాద్? సాతికార్ మర్ణి నీజ్ఎర్ ఇహిజి, “విగెహిజ్ సానాట్, అందెజె ఉణాట్ తినాట్”, ఇజి అఇకార్ వెప్తాలెకెండెనే మాటుబా కిదెజ్ వలె.

33 మీరు మొసెం కిబె ఆజి తపు సరిదు సొన్మాట్. “సెఇ వరివెట కూడె:జి మనిజ్, నెగ్గి అలవాటుజ్ మనికార్బా పాడె: ఆజినార్”.

34 నెగ్గి బుద్ధి మనికిదెర్ లెకెండె మీరు మప్పి సొన్ని పాపం కిఎండ నితినిజాయిదాన్ మండ్రు. ఎందనిజ్ ఇహిజి మీ లోఇ సెగొండార్ దేవుణు వందిజ్ నెన్ఎర్. మిజి సిగు కిదెజ్ ఇజినె ఇక్క నాను వెప్పిన.

సాతికార్ మర్ణి నీజ్నివలె మంజిని ఒడె:ల్

35 సెగొండార్ యా లెకెండ్ వెన్బానార్లెసు, “సాతికార్ ఎలాగ మర్రి నికె ఆనార్? ఎలాగ మర్రి ఒడొల్దాన్ వారు వానార్?”.

36 బుద్ది సిలికిదెరా మీరు విత్తు విత్తువలె, అయి విత్తు విత్తు సబితిజానె దని బాణిజ్ మొక నేర్జినాద్.

37 నీను వితిక కూలిజ్గాని, మరి ఎమేణి విత్తుబగాని వహి విత్కునె విత్తిని. విత్తిక వితునె గాని నేర్జిన మొక్క ఒడొల్ అవద్దగదె.

38 గాని దేవుణు వాండ్రు నిర్ణెం కిత్తి లెకెండ్ దనిజ్ ఉండ్రొ ఒడొల్సిజినాన్. విత్తిమన్ని విజు రకమ్ది విత్తుజ వనక వనక ఒడొల్ సీజినాన్.

39 కంట విజు ఉండ్రె ననిక అవద్. లోకు కంట ఉండ్రొ రకం మనాద్. జంతు కంట మరి ఉండ్రొ రకం, పొటి కంట మరి ఉండ్రొ రకం, మొయ కంట ఉండ్రొ రకం.

40 అయాలెకెండ్నె ఆగానమ్ది వనకాజ్ని, బూమిదు మని వన్యాజ్ తేడ మంజినాద్, ఉండ్రె ననికెజ్ ఆఉ. విజు అంతం మనికెజ్ గాని వనక అంతం ఉండ్రె లెకెండ్ మన్వద్.

41 ఎలాగ ఇహిజ, పొద్దుది అందం ఉండ్రొ రకం, నెలాది అందం మరి ఉండ్రొ రకం, సుక్కెజ అందం మరి ఉండ్రొ రకం. ఉండ్రొ సుక్కాది అందం మరి ఉండ్రొ సుక్కాది అందమ్దిజ్ తేడ మనాద్.

42 అందెజె సాతికార్ మర్రి నిజె ఆనివలె అయాలెకెండ్నె మంజినాద్. బూమిదు మూసె ఆతి మని పీనుగు సబ్జె సానిక. గాని సబ్జె సాన్ఇ ఉండ్రొ ఒడొల్దాన్ వారు నికె ఆనార్లె.

43 మూసె ఆతి పీనుగు సుడెదెజ్ బాగ సిల్లక. సత్తు సిల్లక. గాని నికె ఆజని ఒడొల్ అంతమ్ని సత్తు మంజనిక ఆనాద్.

44 మూసె ఆజని పీనుగు యా లోకమ్దు బత్తిదెజ్నె తగ్నాద్. గాని నికె ఆజని ఒడొల్ దేవుణు మంజని బాడిదు బత్తిదెజ్ తగ్గిక. యా లోకమ్దు బత్తిదెజ్ తగ్గి ఉండ్రొ ఒడొల్ మనాద్ ఇహిజ దేవుణు మంజని బాడిదు బత్తిదెజ్ తగ్గి ఉండ్రొ ఒడొల్బా మంజినాద్.

45 అందెజె, “తొలిత లోకు ఆతి ఆదము బత్తిజని జీవు ఆతాద్”, ఇజి దేవుణు మాటదు రాస్త మనాద్. కడెవేరి ఆదము ఆతి క్రీస్తు పాణం సీజని ఆత్తు ఆతాన్.

46 పరలోకమ్దు బత్తిదెజ్ తగితి ఒడొల్ ముజాల రెవెతాద్. యా లోకమ్దు బత్తిదెజ్ తగితి ఒడొల్నె ముజాల వాతాద్. వెనుక పరలోకమ్దు బత్తిదెజ్ తగితి ఒడొల్ వానాద్.

47 తొలిత ఆదము యా బూమి దూలిదాన్ తయార్ ఆత మనాన్. వెనుకాహి ఆదము ఆతి క్రీస్తు దేవుణు మంజని బాడిదాన్ వాతాన్.

48 బూమిది దూలిదాన్ తయార్ ఆతి వన్ని బాణిజ్ పుట్టి మాటు వన్ని లెకెండ్నె మంజినాట్. దేవుణు మంజని బాడిదాన్ వాతి వన్ని వెట కూడితికార్ దేవుణు మంజని బాడిదు బత్తిదెజ్ తగ్గికార్ ఆనార్లె.

49 ఏలు మాటు ఎలాగ బూమిదాన్ తయార్ ఆతి వన్ని మూర్తి లెకెండ్ మనాట్, అయాలెకెండ్నె దేవుణు మంజని బాడిదాన్ వాతి వన్ని క్రీస్తు మూర్తి లెకెండ్ తయార్ ఆనాట్లె.

50 తంబెరిజాండె, కండాని నలదాన్ తయార్ ఆతిమని యా ఒడొల్దాన్ మాటు దేవుణు కిజని ఏలుబడిదు సాన్ని మండ్రెజ్ అట్వెట్ ఇజి నాను మిజి కసితం వెస్సిన. ఎందనిజ్ ఇహిజ సాపు మని యా ఒడొల్కు సాపు మన్ఇ బాడిదు మండ్రెజ్ అట్వెద్. అక్కెజ్ కొత్తాకెజ్ కిబె ఆదెజ్ వలె.

51 గిబ్బిజ్ ఒడొజి విండ్రు, నాను దేవుణుది డాజితి మని ఉండ్రొ సజతి మిజి తెలియ కిజిన. మాటు విజెటె సావెట్. మాటు విజెటె మార్నాట్.

52 సణెమ్దు, అహిజ ఉండ్రొ కణక రెప డెయ్జి పెర్ని ముజాలె, కడెవేరిది పెరి జోడుబంగ పలక్కిజ సరి అక్క జర్జినాద్. జోడు బంగ పలక్కివలె సాతికార్ సాపు మన్ఇ ఒడొల్దాన్ నికె ఆనార్. ఏలుదాక బత్తిజని మాపు కొత్తాజ్ కిబె ఆతి ఒడొల్దాన్ మార్నాట్లె.

53 సబ్జె సాన్నిని మా యా ఒడొలుజు ఎసెజ్బా సబ్జె సాన్ఇ ఒడొలుజ్ లెకెండ్ మార్నెలె. నిజమె, సాపు వాజని యా మా ఒడొలుజ్, సాపు సిలి ఒడొలుజ్ లెకెండ్ కొత్తాజ్ మార్నెలె.

54 సబ్జె సాని మా ఒడొలుజ్, ఎసెజ్బా సబ్జె సాన్ఇ ఒడొలుజ్ లెకెండ్ మార్నెజ్ వలె. సాపు వాజని మా యా ఒడొలుజ్, సాపు సిల్లి ఒడొల్ లెకెండ్ మార్నెజ్వలె. నస్తివలె దేవుణు మాటదు రాస్తి యా మాటెజ్ నిజం అనాద్, “సాపు మున్కు పూర్తి గెలిస్తి వందిజ్, సాపు మరి మన్వెద్. సాపు డిజె ఆతి లెకెండ్ వీజితాద్”.

55 “సాపు మా మున్కు మరి గెలిస్తిజ్ అట్పాదా? మజి గుత్తెజ్ ఇజి సావుదిజ్ మరి సాప్పు మనాదా?”, ఇజి దిన్ని వందిజ్ దేవుణు మాటదు రాస్తి మనిక, నస్తివలె పూర్తి అనాద్.

56 సావు తపిసిని సాంపు పాపం. మాటు దేవుణు రూలుజు లోజీఎండ మంజినిక, మజి ఓడిసైజ్ పాపమదిజ్ సత్తు ఆజినాద్.

57 మా ప్రబువాతి యేసుక్రీస్తుదాన్ మజి పాపమదిజ్ని సావు ముస్కు గెల్పిస్తా మన్ని దేవుణుదిజ్ వందనమ్కు.

58 అందెజె, నాను ప్రేమిసిని తంబెరిజాండె, ఇనికబా మిజి కద్లిన్ఎండ గటిజు నిల్పి మండ్రు. ఎస్తివలెబా దేవుణు వందిజ్ కష్టబాడేజి పణి కిదు. ఎందనిజ్ ఇహిజు ప్రబు వేట కూడేజి మీరు కష్టబాడేజి కిజిని పణిజ్, ఎసెజ్బా పణిదిజ్ రెఎండేజి మన్ఉ ఇజి నెసి ఎస్తివలెబా పణి కిజి మండ్రు.

## 16

నమ్మిత్తి వరి వందిజ్ డబ్బు కుడుఃప్పిని వందిజ్ వెప్పినిక.

1 దేవుణుదిజ్ నమ్మిత్తి వరి వందిజ్ డబ్బు కుడుఃప్పిని వందిజ్ ఇహిజు నాను గలాతియదు మని దేవుణు సజమ్కాజ్ వెప్పి మని లెకెండ మీరుబా కిదు.

2 నాను వానివలె, అయావలెనె కుడుఃపైజ్ తోఎండ, విజు ఆదివారమ్కాజ్ మీ లోఇ ఒరెన్ ఒరెన్ వన్నిజ్ దోహ్కాని దని బాణిజ్ ఉండ్రీ వంతు కేట ఇడేజి వన్నిబాన్ కుడుఃప్పి మండ్రెజ్ వలె.

3 అహిజు నాను వానివలె, మీరు తగ్గికార్ ఇజి ఎయెరిజ్ ఎర్లిసినిదెరో, వరిజ్ ఉత్రమ్కు రాసి సీజి మీరు కుడుఃప్పిని డబ్బు వరి కిదు యెరూసలెమ్దు పోక్నాట్.

4 నానుబా సోహిజు బాగ మంజినాద్ ఇజి తోరె ఆతిజు వారు నా వెట వానార్లె.

5 అహిజు ఏలు నాను మాసిదోనియాదు సొన్ని అబ్బె మని దేవుణుదిజ్ నమ్మిత్తి వరిజ్ నెస్సిని మండ్రెజ్ ఇజి ఒడిబిజిన. మాసిదోనియాదు సోహి వెనుక నాను మీ డగ్రు వాన.

6 నస్తివలె మీ డగ్రు సెగం రోస్కు మండ్రెజ్ ఆనాద్ ఇజి, సిల్లిజు పణి కాలం విజు మీ బానె గడేప్పా. ఎందనిజ్ ఇహిజు, అయావలె నాను ఎవేణి దరిజ్ సొండ్రెజ్నో, అయా పయనమ్దు నజి సాయం కిదెజ్ మీరు అట్టిదెర్.

7 ఏలు పయనమ్దు మీ డగ్రు వాజి మిజి దసూల్ ఆజి సొండ్రెజ్ నజి ఇస్టం సిల్లెద్. ప్రబుజ్ ఇస్టం ఇహిజు మీ డగ్రు సెగం కాలం మండ్రెజ్ ఇజి ఆన ఆజిన.

8 గాని పెంతుకొస్తు\* పండోయ్దాక ఇబ్బె ఎపెసి పట్టుమ్దునె నాను మంజినలె.

9 ఎందనిజ్ ఇహిజు, ఇబ్బె నెగెండ సువార్త పణి జర్లిని లెకెండ, తగ్గి నెగ్గి అవ్కాసం నజి దోహ్కా మనాద్. నజి ఎర్లిసినికార్బా మనార్.

10 తిమోతి మీ డగ్రు వాతిజు, ఇని దనిజ్బా తియెల్ఆవిండ మీ వెట మంజిని లెకెండ వన్నిజ్ సుడేజి మండ్రు. ఎందనిజ్ ఇహిజు, నాను కిజిని లెకెండెనె వాండ్రుబా ప్రబు పణి కిజినాన్.

11 ఎయెన్బా వన్నిజ్ ఇజిరి కణక సుడేదెజ్ ఆఎద్. వాండ్రు మర్లి నా డగ్రు వాదెజ్ వన్ని మన్నుదు సార్లిదాన్ వన్నిజ్ పొక్తు. మహి తంబెరిజు వెట వాండ్రు వానానె ఇజి నాను ఎర్దు సుడేజిన.

12 ఏలు తంబెరి ఆతి అపోలో వందిజ్ వెప్పిక ఇమిక ఇహిజు, మహి తంబెరిజు వెట మీ డగ్రు సొండ్రెజ్ ఇజి నాను వన్నిజ్ బతిమాళిత గాని ఏలు వాదెజ్ వన్నిజ్ ఇస్టం సిల్లెతాద్. గాని మరి ఎసెజ్బా వాండ్రు అవ్కాసం దోహ్కావలె మీ డగ్రు వానానె.

13 మీరు జాగర్త మండ్రు. దేవుణు ముస్కు మని నమకమ్దు గటిజు మండ్రు. దయరమ్దాన్ మండ్రు. సత్తుదాన్ మండ్రు.

14 మీరు కిజిని పణిజ్ విజు ప్రేమదాన్ కిదు.

15-16 అక్కాయ ప్రాంతమ్దు తోలిత దేవుణుదిజ్ నమ్మిత్తికార్ సైపాను ఇండ్రోణికార్ ఇజి మీరు నెస్సిదెర్గదె? దేవుణుదిజ్ నమ్మిత్తి వరి వందిజ్ పణి సాయం కిదెజ్ వరిజ్ వారి ఒపజెపె ఆత మనార్ ఇజిబా మీరు నెసినిదెర్. అందెజె తంబెరిజాండె, మీరు నిని వరిజ్ అణిజిజి మండ్రు. అక్కాదె ఆవిండ పణిదిజ్ కూడేజి వాని వరిజ్ని కష్టబాడేజి పణి కిజిని వరిజ్బా అణిజిజి మండ్రెజ్ ఇజి నాను మిజి బతిమాల్లిస.

17 మీరు వాదెజ్ అట్ఎండ మహిజ్బా, సైపానుని పొర్మానాతు, అక్కాయికు ఇనికార్ వాతివలె నాను సర్ల ఆత. ఎందనిజ్ ఇహిజు, మీ బాన్ నజి సిదెజ్ సిల్లితికెజ్ మీరు నజి సితార్.

18 నా మన్నుదిజ్, మీ మన్నుదిజ్ వారు సర్ల కిత్తార్. ననికార్ గవరమ్దిజ్ తగ్గికార్.

\* 16:8 16:8 పడాయి ప్రమాణమ్దు ఇక్క వారమ్క పండోయ్, మరి పంట కొయ్యి పండోయ్ ఇజి వెహె ఆజినాద్. (నిర్గమ 34:22, 23:16) వెజెరె వెట కూడేజి యా పండోయ్ కిదెజ్ ఇజి ఇస్రాయేలు లోకుర్ యెరుసలెమ్దు మంద వాజి మహార్. పెంతుకొస్తు ఇహిజు యాబయ్ ఇజి అర్లం. యాక పస్కు పండోయ్ ఆతి వెనుక యాబయ్ రోస్కు ఆనివలె ఆజినాద్.

19 ఆసియాదు మన్ని సజమ్కాణికార్ మీరు నెగెండ్ మనిదెరా ఇజి వెన్బాజినర్. అక్కల, ప్రిస్కిల ఇనకార్ని వరి ఇండ్రో కూడ్జి వాజిని నమ్మిత్తి వరి సజమ్బా ప్రబు పేరుదాన్ మీరు నెగెండ్ మనిదెరా ఇజి వెన్బాజినార్.

20 నమ్మిత్తి తంబెరిజ్ విజెరె మీరు నెగెండ్ మనిదెరా ఇజినార్. దేవుణు వెట కూడితి మన్ని వరిజ్ మీ ప్రేమ తోరిస్తు. నెగ్గి మన్నుదాన్ ఒరెన్ మరి ఒరెన్ వన్నిజ్ పొంబిజి వందనమ్కు వెహ్టూ.

21 పవులు ఇని నాను నా కియుదానె యా వందనమ్కు రాసిన.

22 ఎయెన్బా ప్రబుజ్ ప్రేమిన్ఎండ మహిజ సయిప్ వన్ని ముస్కు రపిద్. యేసు ప్రబు వాజినాన్. రఅ ప్రబువా.

23 ప్రబువాతి యేసుక్రీస్తు దయదర్మం మిజి తోడుః ఆజి మనీద్.

24 క్రీస్తుయేసు వెట కూడితి మన్ని మీరు విజిదెరె వెట నా ప్రేమ మనీద్. ఆమెన్.

## అపొస్తుడు ఆతి పవులు కొరింతి పట్టుమదు మని దేవుణు సజమ్ది వరిజ్ రాస్తి రుండి ఉత్తం

నెల్లు కిబిసినిక

ఇక్క అపొస్తుడు ఆతి పవులు కొరింతి సజమ్ది వరిజ్ రాస్తిమన్ని రుండి ఉత్తం. యా ఉత్తమదు పవులు వన్ని వందిజ్, మరి వాండ్రు ఎలాగ నువార్త పణి కిత్తాన్, మరి అయావలె వన్నిజ్ ఇని ఇనికెజ్ జర్గితె ఇజి యా ఉత్తమదు లావ్ వెహ్సినాన్. కొరింతి పట్టుమదు మన్ని దేవుణు సజమ్దికార్ సెగొండార్, ఆఇవరి బోద వెంజి పవులు అపొస్తుడు ఆవన్ ఇజి వెహ్సార్. దన్ని వందిజ్ జవాబ్ వెహ్సాలెకెండ్ యా ఉత్తమదు నండ్ సజతిజ్ రాస్త మనాద్. దేవుణు ఇస్త్మాతి వజి యేసుప్రబునె వన్నిజ్ అపొస్తుడు లెకెండ్ ఇడ్డాన్ ఇజి రుజుప్ కిజినాన్. వాండ్రు కిత్తి పణిదునొ, వెహ్సా మాటదునొ, వన్ని బత్తుదునొ, ఇనికబా తప్పు మహిజ తోరిస్త ఇజి వరిజ్ వెన్బాజినాన్. నన్ని వరి వెట మొకొ సుడేజి వర్గిదెజ్ తయారాజి వాజినాన్ ఇజి వెహ్సా ఉత్తం ముగిసినాన్.

యేసుక్రీస్తు సాజి మరజి నిజితి వెనుక యాబ్బయ్ ఆరునొ యాబ్బయ్ ఏడునొ పంటెజ్ వెనుక యా ఉత్తం రాస్తాన్ ఇజి దిన్ని వందిజ్ నెస్తికార్ నమ్మిజినార్. పవులు మాసిదొనియదు మహివలె బాణిజ్ యా ఉత్తం రాస్త పొక్తాన్ ఇజిబా వారు నమ్మిజినార్.

1 దేవుణు ఇస్త్మాతి వజి యేసు క్రీస్తుజ్ అపొస్తుడు ఆతి పవులుని మా తంబెరి ఆతి మోతితి కొరింతి పట్టుమదు మని దేవుణు సజమ్ది వరిజ్ని అక్కాయ ప్రాంతమదు మని దేవుణుదిజ్ నమ్మితి వరిజ్ విజెరిజ్ రాసిని ఉత్తం.

2 మా బుబ్బాతి దేవుణు బాణిజ్ని ప్రబువాతి యేసుక్రీస్తు బాణిజ్ దయాదర్మమని సమాదనం మిజి మనీద్.

ఓదరిసిని దేవుణు

3 ఎస్తివలెబా మా ముస్కు కనికారం మనికాన్ ఆతి బుబ్బ, ఎస్తివలెబా మజి ఓదరిసిని దేవుణు ఆతి, మా ప్రబు ఆతి యేసుక్రీస్తుజ్ బుబ్బ ఆతి దేవుణు పొగిడెః ఆపిన్.

4 ఎందనిజ్ ఇహిజ, విజు కస్త్మకాజ్ దేవుణు మజి ఓదరిసిని ఓదర్పుదాన్ ఎలాగ మర్తి కస్త్మమదు మని వరిజ్బా ఓదరిస్తెజ్ మాపు సత్తుమనికాప్ ఆదెజ్ ఇజి వాండ్రు మా విజు కస్త్మకాజ్ మజి ఓదరిసినాన్.

5 క్రీస్తు వెట కస్త్మకు మా బత్తుదు ఎలాగ లావ్ఆజెనెనొ, అయాలెకెండ్నె క్రీస్తు వెట ఓదర్పుబా మా బత్తుదు నిండ్రెజి పొజిజి వాజినాద్.

6 మాపు కస్త్మమదు మనాప్ ఇహిజ అక్క మిజి దేవుణు బాణిజ్ ఒదర్పు దొహ్కెజ్ ఇజిని దేవుణు మిజి రక్సిస్తెజ్ ఇజిని మాపు కస్త్మమదు మనాప్. దేవుణు మజి ఓదరిస్తి మనిక మిజి ఓదర్పు దొహ్కెజ్ ఇజిని. ఎందనిజ్ ఇహిజ, మజి వాతిమని లెకెండ్ కస్త్మకు మిజి వానివలె, అయాలెకెండ్ మీరు డిస్ఎండ్ ఓరిసినివలె అయ ఓదర్పు ఎలాగ మర్తిక ఇజి మీరు నెసినిదెర్.

7 మజి వాతిమని కస్త్మకాజ్ మీరు ఎలాగ మా వెట కూడేజి మంజినిదెర్, అయాలెకెండ్నె మా వెట ఓదర్పుదుబా కూడేజి మంజినిదెర్ ఇజి మాపు నెసినాప్. అందెజి మీ వందిజ్ మాపు ఆసదాన్ ఎర్దు సూణిక కద్దిఎండ మంజినాద్.

8 తంబెరిజాండె, ఆసియ ప్రాంతమదు మాపు ఓరిస్తిమని కస్త్మకు మీరు నెస్ఎండ మండ్రెజ్ ఆవద్ ఇజి మాపు కొరిజినాప్. మాపు సానాప్లెను ఇజి ఒడిబితాప్. మజి ఓరిస్తెజ్ అల్ఇ నని నసా కస్త్మకు మజి వాతె.

9 నిజమె సావుదిజ్ సిక్కు మజి దొహ్క మనాద్ ఇజి మాపు ఒడిబితాప్. గాని మాపు, మా ముస్కునె ఆదారం ఆవండ, సాతి వరిజ్ నిక్సి దేవుణు ముస్కునె ఆదారం ఆదెజ్ ఇజిని ఇక్కెజ్ విజు మజి జర్గితె.

10-11 మీరుబా మా వెట కూడేజి పార్దనం కిజి సాయం కిత్తిజ్, దేవుణు గొప్పు పెరి సావు నని కస్త్ం కాణిజ్ మజి తప్తిస్తాన్. మరి వాని కాలమ్దుబా తప్తిసినాన్. వాండ్రు మరి ఎస్తివలెబా మజి తప్తిసి మంజినాన్ ఇజి వన్ని వందిజ్నె మాపు ఆసదాన్ ఎర్దు సుడేజి మంజినాప్. నండొండార్ పార్దనం కిత్తిజ్, దేవుణు బాణిజ్ అయ పార్దనమ్క వందిజ్ మజి కనికారం దొహ్కె వందిజ్, నండొండార్ మా వందిజ్ దేవుణుదిజ్ వందనమ్కు వెహ్సార్.

12 మా గర్బం వెహ్సాని సాస్యం ఇనిక ఇహిజ, యా లోకమ్దు మని బత్తుదుబా, మరి మీవెట మన్ని విజు సజతిజి లోఇబా గర్బం గద్నెండ దేవుణు సిత్తిమని నెగ్గి మన్పుదాన్, లోకమ్దు మన్ని వరి బుద్దిదాన్ ఆవండ దేవుణు దయాదర్మమది సత్తుదాన్ బత్తితాప్. దిన్ని వందిజ్ మాపు పొగిడేజినాప్.

13 సద్విదెజ్ నో, పూర్తి అర్థం కిదెజ్ అట్ ఇ మాటెజ్ నో మాపు మిజి రాస్తెజ్ సిల్లె.

14 ఏలు మీరు మజి సెగం నెస్తి మనిదెర్. గాని ప్రబు ఆతి యేసు మర్జి వాని దినమ్ దు మాపు మీ వందిజ్ పొగ్డిఃజి వెహ్ న్నావ్ లె. అయాలెకెండ్ మా వందిజ్ పొగ్డిఃజి వెహ్ న్నావ్ అట్టిలెకెండ్ మీరుబా నజి పూర్తి నెస్తిదెర్ లె ఇజి మాపు ఆసదాన్ ఎద్రు సుడఃజి మంజినావ్.

15 యాలెకెండ్ మా మన్సుదు నమకం తవ్ ఎండ మన్నిజ్, మిజి రుండి వంతుజ్ లాబం మండ్రెజ్ ఇజి ముజాల మీ డగ్రు వాదెజ్ ఇజి నజి ఉండ్రె ఉదెనం మహాద్.

16 ముజాల మీ డగ్రు వాజి మాసిదోనియ సొండ్రెజ్ ఇజి, మరి మాసిదోనియదాన్ మర్జి మీ డగ్రు వాజి, మీరె యూదయ దేసెం సొండ్రెజ్ మజి పొక్కిదెర్ ఇజి నాను ఒడిఃబిత.

17 యాలెకెండ్ కిదెజ్ ఇజి నాను ఒడిఃబితవలె, యాక ఇజిరి సజతి ఇజి నాను ఒడిఃబితానా?. “ఒబ” ఇజి వెహ్ న్ని వెటనె “ఆవద్, ఆవద్” ఇజి వెహ్ న్నావ్ యాకెజ్ నాను లోకమ్ దిజ్ సెందితి లెకెండ్ కిజినానా?

18 దేవుణు నమ్మిదెజ్ తగ్గికాన్ ఇజి మన్ని లెకెండ్ నె, మాపు మిజి వెహ్ న్ని మని మాటెజ్ ఎస్తివలెబా ‘ఒబ’ ఇజినె మంజినె, “ఆవద్” ఇజి వెహ్ న్నికెజ్ ఆఉ.

19 ఎందనిజ్ ఇహిజ, నావెట, సిలువాను వెట, తిమోతి వెట మీ నడిఃమి సాటె ఆతి మని దేవుణు మరిసి ఆతి యేసుక్రీస్తు ‘ఒబ’ ఇజినె “ఆవద్” ఇజినె ఆవెతాన్. గాని వన్ని వెట అక్క ఎస్తివలెబా ‘ఒబ’ ఇజినె మంజినాద్.

20 దేవుణు సీతి ప్రమాణమ్ కు ఎస్సాడు ఆతిజ్ బా, అక్కెజ్ విజు క్రీస్తు వెట ‘ఒబ’ ఇజినె మన్నె. అందెజె దేవుణు గొప్ప పెరికాన్ ఇజి తోరె ఆదెజ్ ఇజి క్రీస్తు వెట ‘ఆమెన్’ ఇజి మాటు వెహ్ న్నినాట్.

21-22 మీ వెట మజిబా క్రీస్తు వెట కూడఃజి గటిజ నిల్ ప్పి మంజినికాన్ దేవుణునె. బుర్రదాన్ నూనె వాక్కి కేట కిత్తి లెకెండ్ ఏర్పాటు కిత్తికాన్ దేవుణునె. వన్ని సొంతం ఇజి మా మున్సు, ముద్ర పొక్కి, వెనుక మజి దోహ్ కెజ్ మని మేలుజ వందిజ్ రుజువ్ లెకెండ్ వన్ని ఆత్మ ఇని బయాన్ మా మన్సుజ మజి సీత మనాన్.

23 మీ మున్సు కనికారం మనిజ్ నె నాను మరి కొరింతి పట్టుమ్ దు రెవెత, ఇని దనిజ్ దేవుణునె సాక్కి.

24 అందెజె మీరు దేవుణు మున్సు నమకం ఇడ్డి దనిజ్ మీ మున్సు అతికారం మనికావ్ ఇజి ఆవద్ గాని సర్ల వందిజ్ మీ వెట కూడఃజి పణికినికావ్ లెకెండ్ నె. ఎందనిజ్ ఇహిజ దేవుణు మున్సు మని నమకమ్ దాన్ మీరు గటిజ నిల్పి మంజినెదెర్.

## 2

1 అందెజె మరి ఉండ్రె సుటు దుకమ్ దాన్ మీ డగ్రు రెవె ఇజి నా మన్సుదు నానె నిర్ణెం కిత.

2 ఎందనిజ్ ఇహిజ, నాను మిజి దుకం తపిస్త ఇహిజ, నా వెట దుకం ఆతికారాతి మీరు ఆవిండ ఎయెర్ నజి సర్ల కిబిస్సార్?

3 ఎందనిజ్ యా సజతిజ్ నాను మిజి రాస్త ఇహిజ, నాను వానివలె, నజి సర్ల కిబిస్సెజ్ మని వరివెట నజి దుకం రెవిండ మండ్రెజ్ వలె ఇజి రాస్త. మరి నజి మని సర్లాదు మీరుబా నావెట సర్ల ఆనిదెర్ లె ఇజి మీ వందిజ్ నా మన్సుదు నమకం ఇట్టా మన.

4 మీరు దుకం ఆదెజ్ ఇజి ఆవద్, గాని మిజి నాను ఎసానో ప్రేమిసిన ఇజి మీరు నెస్తిజ్ ఇజినె, నండో దుకమ్ దాన్ మన్సుదు బాద ఆజి, ఎసానో కణెరు వాక్కి మిజి రాస్త మన.

### తప్పు కిత్తి వరిజ్ సెమిస్సి వందిజ్

5 ఎయెన్ బా దుకం కిబిస్సాన్ ఇహిజ, నజినె లావ్ ఆవిండ, వాండ్రు మిజి విజెరిజ్ కండెక్ దుకం కిబిస్త మనాన్. అందెజె నజి దుకం కిబిస్తి వందిజ్ నాను గటిజ వెహ్ న్నావ్ ఆవద్ గదె?

6 వన్నిజ్ మీ లోఇ నండొండార్ వెట సీతి సిక్స సరి ఆనాద్.

7 అందెజె మీరు వన్నిజ్ సెమిసి ఓదరిస్సెజ్ వలె. ఎందనిజ్ ఇహిజ వాండ్రు మరి నండో దుకమ్ దు మడుఃగ్ ఇజి మని లెకెండ్ మండ్రెజ్ ఆవద్ ఇజి.

8 అందెజె వన్నిజ్ మీరు ప్రేమిసినెదెర్ ఇజి మరి వన్నిజ్ మీరు తోరిస్సెజ్ వలె ఇజి నాను బతిమాల్లిన.

9 మీరు విజు దనిజ్ లోజిజ తగ్గికిదెర్ లెకెండ్ మంజినెదెరా ఇజి నెస్తిజ్ నె నాను మిజి రాస్త మన.

10 మీరు ఎయెరిజ్ బా సెమిస్సిజ నానుబా వన్నిజ్ సెమిసిన. మరి ఇనిదని వందిజ్ బా సెమిస్సెజ్ ఇహిజ, మీ వందిజ్ అక్కబా క్రీస్తు ఎద్రు నాను సెమిస్త మన.

11 ఎందనిజ్ ఇహిజ, నయ్తూను మా ముస్సు గెలిస్తాజ్ ఆవద్ ఇజి నాను సెమిస్త మన్న. మరి వన్ని సెజ పణిజ వందిజ్ మాటు నెన్ ఇకాట్ ఆవద్ గదె?

కొత్త ఒప్పుమానం వందిజ్ సాటిస్సికార్.

12 క్రీస్తు సువార్త సాటిస్టెజ్ నాను త్రోయ పట్టుమ్దు వాతివలె అబ్బె నెగ్గి అవ్కాసం దేవుణు నజి సితాన్.

13 గాని నా తంబెరి ఆతి తీతుజ్ తొఎండ నా మన్నుదు నిపాతి సిల్లెండ ఆతిజ్, వరిజ్ నాను సొన్నిన ఇజి వెప్పొ అబ్బెణిజ్ మాసిదోనియ సొండ్రెజ్ సోత.

14 గాని మాపు దేవుణుదిజ్ వందనమ్కు వెప్పొనావ్. ఎందనిజ్ ఇహిజ, క్రీస్తు వెట కూడితి మజి దేవుణు ఎస్తివలెబా గెలిస్తె వరి సర్దదాన్ నడిపిసినాన్. ఉండ్రె నెగ్గి వాసనం లెకెండ విజుబాన్ మాపు సాటిస్సి సువార్తదాన్ క్రీస్తు వందిజ్ విజెరె నెస్తిలెకెండ వాండ్రు కిబిస్నాన్.

15 దేవుణు రక్కిస్తి వరి నడిమి, పాడాజి సొన్నిని వరి నడిమి మాపు దేవుణుదిజ్ క్రీస్తుది నెగ్గి వాసనం లెకెండ ఆత మనావ్.

16 పాడాజి సొన్నిని వరిజ్ మాపు సాతి ఒడొల్ది కంపు లెకెండ మనావ్. దేవుణు రక్కిస్తి వరిజ్ బత్తు సిజిని నెగ్గి వాసనం లెకెండ మనావ్. నిని పణిదిజ్ తగ్గిక్వాన్ ఎయెన్ మనాన్?

17 మహి నండొండార్ లెకెండ, లాబం రపిద్ ఇజి దేవుణు మాటదిజ్ బేరం కినికాప ఆవవ్. దేవుణు బాణిజ్ పొకె ఆతివరి లెకెండ క్రీస్తు వెట కూడిజి నీతినిజాయిదాన్ దేవుణు ఎద్రు మాపు వర్గిజినావ్.

### 3

1 మరి మజి మాపె మర్రి పొగ్డిజి వెహైజ్ మొదొల్నినాపా? సెగొండారిజ్ అవ్నరం మని లెకెండ మీబాణిజ్నొ, మిజి తోరెస్టెజ్ ఇజినొ, కీదు పొక్కిని నెల్వ కిబిస్సి ఉత్తమ్కు మజి మండ్రెజ్నా?

2 మా మన్నుజు రాసె ఆతిమని లోకుర్ విజెరె నెసి సద్విజిని ఉత్తమ్కు మీరె.

3 పణకుదాన్ తయార్ కిత్తి బల్లెజు ముస్సు గీస్తి మనిక ఆవద్, మరి సిరదాన్ రాస్తిక ఆవద్, గాని లోకురి మన్ను ఇని మెతాని బల్లెజు ముస్సు, మాపు కిత్తి సువార్త పణిదాన్ బత్తిజిని దేవుణు ఆత్మదాన్, రాసె ఆతిమని క్రీస్తుబాణిజ్ వాతి మని ఉండ్రె ఉత్తమ్నె మీరు ఇజి మీరె తోరిసినిదెర్.

4 క్రీస్తు వెట దేవుణు ఎద్రు మా మన్నుదు నస్సొ నమకం మనాద్.

5 మాపు కిజిని పణిజ్ విజు మా సత్తుదాన్ మాపె కిజినావ్, ఇజి ఒడొబిదెజ్ మా లొఇ ఇనికబా సిల్లెద్. యాకెజ్ కిదెజ్ మని సత్తు దేవుణు బాణిజ్నె వాతాద్.

6 వాండ్రె మజి కొత్త ఒప్పుమానమ్దిజ్ నెగెండ పణికనికార్ ఇజి ఇట్ట మనాన్. కొత్త ఒప్పుమానం ఇహిజ అనరమ్దాన్ రాస్తిక ఆవద్, బత్తిజిని దేవుణు ఆత్మదాన్ వాతిక. ఎందనిజ్ ఇహిజ అనరమ్దాన్ రాసె ఆతి ప్రమాణం సాపు తపిసినాద్. ఆత్మదాన్ వాతి ప్రమాణం పాణం సీజినాద్.

కొత్త ఒప్పుమానం ఇని గొప్పు పెరి సజతి.

7 పణకు బల్లెజు ముస్సు అనరమ్దాన్ రాసె ఆతిమని సాపు తపిస్తి ప్రమాణం నస్సొ గొప్పు పెరిక మహాద్.

8 ఇహిజ, మోసె మొకొం తగిజి సొన్నిని జాయ్దాన్ మహిజ్బా, ఇస్రాయేలు లోకుర్ వన్ని మొకొమ్దు తినాజ్ బెస్టెజ్ అట్ ఇ లెకెండ గొప్పు పెరి జాయ్దాన్ మహాన్. అక్క అయాలెకెండ పెరిక మహాద్ ఇహిజ, దేవుణు ఆత్మదాన్ మని పణిజ్ దన్నిజ్ ఇంక ఎస్సొనొ గొప్పు పెరిక ఆవదా?

9 లోకురిజ్ తీర్పు తీరిసి సిక్స సీని పణి నస్సొ గొప్పు పెరిక మహాద్ ఇహిజ, లోకురిజ్ నీతి నిజాయితిదికార్ కిజిని యా పణి, దనిజ్ ఇంక ఒద్దె పెరిక మంజినాద్.

10 ఏలు మనిక ఒదె గొప్పు పెరిక ఆతిక ఆతిజ్, దినిజ్ పొలిసి సుడొతిజు, ముజాల గొప్పు పెరిక మహి దనిజ్ ఏలు ఇనిక సిల్లెండ ఆతాద్.

11 అనరమ్దాన్ రాసె ఆతి, కండెక్ కాలం మహి యా ప్రమాణం యాలెకెండ గొప్పు పెరిక వాతాద్ ఇహిజ, ఎస్తివలెబా మంజిని యా కొత్త ప్రమాణం మరి ఒదె గొప్పు పెరిక మంజినాద్.

12 మాపు యాలెకెండ అనదాన్ ఎద్రు సుడొజి మంజినాట్. అందెజె మా మన్నుదు దయ్ రమ్దాన్ మనావ్.

13 మాపు మోసె లెకెండ ఆవవ్. ఎందనిజ్ ఇహిజ ఇస్రాయేలు లోకుర్ వన్ని మొకొమ్దు మని తగిజి సొని జాయ్దిజ్ బేన్ ఎండ మోసె వన్ని మొకొమ్దు టుకుర్ ఇట్టాన్.



- 14 గాని వరి మన్ను గుడిః ఆత మహాద్. అందెజె ఏలుబా వారు పడాఃయి ఒవుమానం సద్విజనివలె వరి మన్నుజు మున్ను అయా టుకుర్ ఏలుబా లాగె ఆవిండ అయా లెకెండెనె మనాద్. ఎందనిజ్ ఇహిజు క్రిస్తు వెటనె అక్క లాగె ఆజినాద్.
- 15 ఏలుదాక మోసె రాస్తి మనికెజ్ వారు సద్విజని వలె వరి మన్నుజు మున్ను ఉండ్రీ టుకుర్ మని లెకెండెనె మనాద్.
- 16 గాని ఎయెన్బా ఎస్తివలెబా ప్రబువాతి యేసుక్రిస్తు దరిజ్ మహ్తాజు వన్ని బాణిజ్ టుకుర్ లాగె ఆజినాద్.
- 17 ప్రబు ఇహిజు దేవుణు ఆత్మనె. ప్రబు ఆత్మ మజీ విడుఃతల కిజినాద్.
- 18 మాటు విజెటె టుకుర్ మన్ఇ మొకొమ్దాన్, అదమ్దాన్ జాయ్ తోరితి లెకెండె, ప్రబు జాయ్ తోరిసినాట్. ఆత్మ ఆతి ప్రబుబాణిజ్ వాని జాయ్దాన్ మరి ఒద్దె జాయ్ ఆజి వన్ని మూర్తి లెకెండె ఆజి మంజినాట్లె.

## 4

ఒడొల్ ఇని ఇస్కా కుండ లొఇ మన్ని ఆస్తి

- 1 దేవుణు కనికారమ్దానె మాపు దేవుణు పణిదు మనాప్. అందెజె మాపు మన్నుదు దయరం సిల్లెండె ఆవిప్.
- 2 మాపు సిగు లాగ్గిని డాఃజిజి కిజిమహి పణిజ్ డిఃస్త సిత్తాప్. మాపు మోసెం కిదెజ్ ఇజి సుడఃఎప్. మాపు దేవుణు మాట మని లెకెండె దనిజ్ మారిన్ఎండ వెప్పినాప్. మాపు మోసెం కిదెజ్ ఇజి సుడఃఎప్. మాపు దేవుణు మాట మన్ని లెకెండె మారిన్ఎండ వెప్పినాప్. అక్కాదె ఆవిండ నిజమాతికెజ్ విజెరిజ్ నెసిని లెకెండె వరి గర్భమ్దిజ్ ఎద్దు మజీ మాపె నెగెండె దేవుణు ఎద్దు బత్తిజినాప్.
- 3 మాపు వెప్పిని సువార్త డాఃజె ఆతి మహిజు, అక్క పాడాఃజి సొన్నిని వరిజె డాఃజె ఆత మనాద్.
- 4 దేవుణు మూర్తి ఆతిమని క్రిస్తు జాయ్ ఆతి సువార్తదిజ్ జాయ్, వరిజ్ తొర్ఎండె మంజిని వందిజ్ యా తరమ్దిజ్ ఆతికారి ఆతి సెతూసు నమకం సిల్లికార్ ఆతివరి మన్నుది కణకెజ్ గుడ్డి కిబిస్తాన్.
- 5-6 “సీకటిదాన్ జాయ్ ఆపిద్”, ఇజి వెప్తి దేవుణునె, క్రిస్తు మొకొమ్దు మని జాయ్ దేవుణు గెణమ్ది జాయ్ మజీ మండ్రెజ్ ఇజి వన్ని జాయ్ మా మన్నుజు జాయ్ సీని లెకెండె మజీ సిత్త మనాన్. అందెజె మజీ మాపె ఆజి సువార్త సాటిన్ఎప్. గాని యేసుక్రిస్తు ప్రబు ఇజి ఒడిఃబిజి, మాపు యేసు వందిజ్ మిజీ పణి కినికాప్ ఇజి సువార్త సాటిసినాప్.
- 7 అహిజు విజు దన్నిజ్ మిస్తి యా సత్తు మాది ఆవిద్, గాని దేవుణు బాణిజ్ వాతిక ఇజి తోరె ఆదెజ్ ఇజి యా నెగ్గి ఆస్తి మా ఒడొల్ ఇని ఇస్కా కుండెజు లొఇ మజీ దొహ్క మనాద్.
- 8 విజు దరిజాణిజ్ గటిజు సీపె ఆజినికాప్ గాని పెడెఃహికాప్ ఆవిప్. ఇనిక కిదెజ్నొ ఇజి తెల్లిఎండె ఆతికాప్ గాని ఇన్ని ఆస సిల్లికాప్ ఆవిప్.
- 9 హిమ్సెజ్ కిబె ఆజినాప్ గాని డిఃసి సిబె ఆతికాప్ ఆవిప్. డెయె ఆజి అడిఃగి అర్తికాప్ గాని నాసనం ఆజినికాప్ ఆవిప్.
- 10 మాపు ఎస్తివలెబా మా ఒడొల్దు యేసు సావుదిజ్ బరిసినాప్, ఎందనిజ్ ఇహిజు యేసు బత్కుబా మా ఒడొల్దాన్ తొరె ఆదెజ్ వలె ఇజి.
- 11 ఏలు బత్తిజినికాప్ ఆతి మాపు ఎస్తివలెబా యేసు వందిజ్ సావుదిజ్ ఒపజెపె ఆజినాప్. ఎందనిజ్ ఇహిజు నాసనం అజి సొని మా ఒడొల్దు యేసు బత్కు తొరె ఆదెజ్ వలె.
- 12 అందెజె సావు మా లొఇ పణి కిజినాద్ గాని మీ లొఇ పాణం పణి కిజినాద్.
- 13 “నాను నమ్మిత మన్ను. అందెజె నాను వర్గిత మన్ను”, ఇజి దేవుణు మాటదు రాస్త మనాద్. అయాలెకెండె మన్ని మన్నుదాన్ మాపుబా నమ్మిత మనాప్, అందెజె వర్గిజినాప్.
- 14 ఇనిక ఇహిజు, ప్రబు ఆతి యేసుజ్ సాతి వరిబాణిజ్ నిక్తికాన్, యేసు వెట మజిబా నిక్తి మీవెట వన్ని ఎద్దు నిల్ప్పాన్ ఇజి మాటు నెసినాట్.
- 15 దేవుణు దయా దర్మం మరి ఒద్దె నండెండారిజ్ అందిజి సార్పివలె, నండె పార్లనమ్కు కిజి, మరి వందనమ్కు వెప్పి వారు దేవుణుదిజ్ గవరం సీనార్లె. యాకెజ్ విజు మీ వందిజ్నె.
- 16 అందెజె మాపు మన్నుదు దయరం సిల్లికాప్ ఆవిప్. వెల్లి తొరె ఆజిని మా ఒడొల్ పాడాఃజి సొన్నినాద్ గాని మా మన్నుదు మాపు రోజు రోజుదిజ్ కొత్త సత్తు మనికాప్ ఆజినాప్.
- 17 మాపు ఓరిసిని యా సాణెం మంజిని ఇజిరి కస్టమ్కు, మజీ వనకాజ్ విజు మిస్తిక ఆతి ఎలాకాలం మంజిని గవరం దొహ్కాన్.
- 18 అందెజె మాపు తోరిజిని వనక మున్ను మన్ను ఇడఃఎండె, తోరిణ వనక వందిజ్నె ఎద్దు సుడఃజినాప్. ఎందనిజ్ ఇహిజు తొర్సికెజ్ సెగం కాలమ్నె మంజిని, తోరికెజ్ ఎలాకాలం మంజినికెజ్.

## 5

1 యీ బూమి ముస్సు మాపు బత్కిజిని గుడారం\* లెకెండ మని మా ఒడోల్ ఎస్తివలె నాసనం ఆతి సాహిజ్బా, మా వందిజ్ దేవుణు మంజిని బాడిడు లోకు కిక్కాణిజ్ తొవ్తాక ఆవండ, దేవుణు తయార్ కిత్తి మన్ని ఎలాకాలం మంజిని ఉండ్రీ ఇల్లు మంజినాద్ ఇజి మాపు నెస్నాప్.

2 పరలోకమ్దు మన్ని ఇల్లు లెకెండ మన్ని ఒడోల్దు మండ్రెజ్ ఇజి ఆసదాన్ యీ గుడారం ఆతి ఒడోల్దు మాపు ములుజిజినె మంజినాప్.

3 మాపు అబ్బె ఒడోల్ మన్ని వరి లెకెండ మన్నిజ్ మా ఆత్మ డుమ్డ లెకెండ తోర్వప్.

4 గుడారమాతి యీ ఒడోల్దాన్ మన్నివలె మాటు ములుజిజి బరు పిండజిని వరిలెకెండ మంజినాప్. యీ ఒడోల్ డిసి సిదెజ్ ఇజి సిల్లెద్. గాని దేవుణు మంజిని బాడిడు మని ఒడోల్దు మండ్రెజ్ ఇజి ఆస ఆజినాప్. అందెజె సాపు మన్ని యీ ఒడోల్ ఎసెజ్బా సాపు సిల్లి పాణం మని ఒడోల్ లెకెండ మార్నాద్లె.

5 వన్ని ఆత్మదిజ్ బయాన్ లెకెండ మజి సీతిమనికాన్ ఆతి దేవుణునె దిన్ని వందిజ్ మజి తయార్ కిత్త మనాన్.

6 అందెజె మాపు ఎస్తివలెబా మన్నుదు దయరం మనికాప్. మాపు యీ ఒడోల్దు ఇబ్బె బత్కిజిని దాక ప్రబు బాణిజ్ దూరం మనాప్ ఇజి నెసినాప్.

7 మాపు దేవుణు ముస్సు మని నమకమ్దానె బత్కిజినాప్. కణకెజ తోర్నిని వన్నిక దటాజ్ ఆవద్.

8 యీ ఒడోల్దు బత్కిని దన్నిజ్ ఇంక, యాక డిసి సీజి ప్రబు వెట మంజినికాదె మజి ఒదె ఇస్సం, దిన్ని వందిజ్ మజి మన్నుదు దయరం మనాద్, ఇజి నాను వెస్సిన.

9 అందెజె, మా ఒడోల్దు ఇబ్బె బత్కిజి మహిజ్బా, యాక డిసి సీజి ప్రబు వెట మహిజ్బా వన్నిజ్ ఇస్సమాతి లెకెండ మండ్రెజ్ ఇజి మాపు గురి సుడోజినాప్.

10 ఎందనిజ్ ఇహిజ ఒరెన్ ఒరెన్ యీ ఒడోల్దాన్ మహివలె కిత్తి పణిజి వందిజ్, అయాకెజ్ నెగ్గికెజ్ ఆతిజ్బా, సెఇకెజ్ ఆతిజ్బా దన్నిజ్ తగితి లెకెండ దొస్కిని వందిజ్ మాటు విజెటె క్రిస్తు నాయం తీరిన్ని బాడిడు తోరె ఆదెజ్ వలె.

మహి వరిజ్ దేవుణు వెట కూల తోహ్పిన్ని పణి

11 అందెజె దేవుణుదిజ్ ఎస్సానొ తియెలాజి మండ్రెజ్ ఇజి నెసినె, మహి వరిజ్ అయాలెకెండ మండ్రు ఇజి బుద్ది వెస్సినాప్. మాపు ఎలాగ మర్తికాప్ ఇజి దేవుణు నెసినాన్. మీ గర్భం ఎద్రు మీరుబా మజి నెసినెదెర్ ఇజి మాపు ఆస ఆజినాప్.

12 మరి మాపు మీ ఎద్రు మా వందిజ్ పొగ్డిజి వెవ్తాజ్ ఇజి సుడోవప్, గాని మా వందిజ్ పొగ్డిదెజ్ మిజి ఉండ్రీ అవ్కానం సీజినాప్. ఎందనిజ్ ఇహిజ మన్నుదు మనికెజ్ నెన్వండ, వెల్లి తొర్నికెజ్ సుడోజి పొగ్డిజి వర్గిజిని వరివెట మర్తి వెవ్తాజ్ మీరు అట్టికిదెర్ ఆదెజ్ ఇజినె.

13 మాపు వెరిదికాప్ లెకెండ మనాప్ ఇహిజ అక్క దేవుణు వందిజ్నె. నెగ్గి బుద్ది మనికాప్ ఇహిజ అక్క మీ వందిజ్నె.

14 క్రిస్తు ప్రేమ మజి బలవంతం కిజి నడిపెసినాద్. ఎందనిజ్ ఇహిజ విజెరె వందిజ్ ఒరెన్ సాతాన్ అందెజె విజెరె సాతాన్ ఇజి ఇని అనుమానం సిల్లెండ నెసినాప్.

15 మరి, వాండ్రు విజెరె వందిజ్ సాతాన్ ఇజి బత్కిజినికార్ ఏలుదాన్ వరి వందిజ్నె బత్కివండ వరి వందిజ్ సాజి మర్తి నిజితి వన్ని వందిజ్నె బత్కిదెజ్ ఇజి నెసినాప్.

16 అందెజె ఏలుదాన్ మాపు ఎయెర్ వందిజ్బా యీ లోకమ్దు మనికార్ ఒడోబిని లెకెండ ఒడోబివప్. క్రిస్తుజ్ వందిజ్బా ముజాల యీ లెకెండనె ఒడోబితాప్ గాని ఏలుదాన్ వన్ని వందిజ్ అయాలెకెండ ఒడోబివప్.

17 అందెజె, ఎయెన్బా క్రిస్తు వెట కూడితిజ, వాండ్రు కొత్తాజ్ తయార్ ఆజినాన్. పడాఱికెజ్ విజు సాహె, ఇదిలో విజు కొత్తాకెజ్ ఆతె.

18 యాకెజ్ విజు దేవుణు బాణిజ్నె ఆతె. దేవుణు వెట పగాతికాట్ మజి క్రిస్తు వెట, దేవుణు మజి వన్నిజ్ కూలెజ్ లెకెండ కిత్తాన్. మరి మహికార్ దేవుణు వెట వన్నిజ్ కూలెజ్ లెకెండ తయార్ కిని పణిబా మజి ఒపజెప్తాన్.

19 అహిజ, దేవుణు లోకురి పాపమ్కు విజు వరి ముస్సునె మొవ్విండ, లోకమ్దు మని వరిజ్ క్రిస్తు వెట వన్నిజ్ కూలెజ్ లెకెండ కిత్తాన్. మహి వరిజ్ దేవుణు వెట కూలెజ్ లెకెండ కిబిన్ని అయ మటెజ్ మజి ఒపజెప్తాన్.

20 అందెజె మాపు క్రిస్తుజ్ బోగటు వెస్సినాప్. దేవుణు మా వెట మిజి బతిమాలజిని లెకెండ వర్గిజినాన్. మీరు దేవుణు వెట పగాతికిదెర్ లెకెండ మన్వండ వన్నివెట రాజినమాజి వన్నిజ్ కూలెజ్ లెకెండ మండ్రు ఇజి మాపు క్రిస్తు వందిజ్ మిజి బతిమాలజినాప్.

\* 5:1 5:1 ఇల్లు, గుడుస ఇజిబా ఒడోబిదెజ్ అనాద్

21 మాటు క్రీస్తు వెట దేవుణు ఎద్రు నీతినిజాయి మనికాట్ ఆదెజ్ ఇజ దేవుణు ఇని పాపం సిల్లికాన్ ఆతి క్రీస్తుజ్ మా వందిజ్ పాపం ఆదెజ్ ఇట్టాన్.

## 6

1 దేవుణు వెట జత కూడఃజి పణికినికాప్ ఇజి మపు మిజి బతిమాల్నినిక ఇనిక ఇహిజ, దేవుణుబాణిజ్ మిజి దొహ్క్తి మన్ని వన్ని దయా దర్మం పణిదిజ్ రెఇదని లెకెండ్ మీరు కిదెజ్ ఆవద్.

2 “నీను మొరొ ఆతిక తగితి సమ్యమ్దు నాను వెహమన్న. రక్సిస్తెజ్ మన్ని రోజుదు నాను మిజి సాయం కిత మన్న ఇజి వాండ్రు వెహ్నినాన్”, ఇజి దేవుణు మాటదు రాస్త మనాద్. అందెజె నాను వెహ్నిన, ఇక్కాదె దేవుణుది తగితి సమయం. ఇక్కాదె దేవుణు రెసిసిని రోజు.

### పవులుజ్ వాతి కస్తమ్కు

3 ఎయెరిజ్బ ఇని తొరొ ఇడఃఎండ మపు కిజిని విజు పణిదు ఎలాగ మర్తి నిందబా రెఎండ మాపు సుడఃజినాప్.

4 విజు వన్కా లొఇ దేవుణు వందిజ్ పణి కినికాప్ ఇజి మజి మాపె తోరిసినాప్. ఎలాగ ఇహిజ కస్తమ్కు విజు గొప్పజు ఓరిసినిబాన్, స్రమెజు లొఇ బాద ఆనిబాన్, దుకమ్దు,

5 డెఃయె ఆనిబాన్, జెలిదు మన్నిబాన్, మహికార్ గొడఃబ ఆనిబాన్, కస్తబాడఃజి పణి కినిబాన్, నిద్రు సిల్లి రెయ్కాజ్, బజ ఆతివలె, దేవుణు వందిజ్ పణికినికాప్ ఇజి మజి మాపె తోరిసినాప్.

6 మాపు ఇని తప్పుబా సిల్లెండ మహాప్. అర్దం కిజి నెసినిబాన్, ఓరిసినిబాన్, దయ ఆనిబాన్, దేవుణు ఆత్మ వెట, కల్లి సిల్లి ప్రేమదాన్,

7 నిజమాతి మాటెజ్ వర్గిని దన్ని లొఇ, దేవుణు సత్తు లొఇ, ఉణిర్ డెబ్రు కిక్కాణిజ్ నీతి నిజాయితి ఇని ఆయుదమ్కు అస్సిబాన్,

8 మర్కాద సిత్తిబాన్, సిగు ఆతిబాన్, పొగ్డః ఆనిబాన్, సెఇ మటెజ్ వెహ ఆనిబాన్ దేవుణు వందిజ్ పణికినికాప్ ఇజి మజి మాపె తోరిసినాప్. నిజమాతికెజ్ మాప్ వర్గిజనాప్ గాని అబద్దం వర్గినికాప్ ఇజి లోకుర్ మజి ఒడఃబిజనార్.

9 విజెరె బాగ నెస్తికార్ గాని ఎయెర్బా నెన్ఇ వరిలెకెండ్ మనాప్. సాజిని వరిలెకెండ్ మహిజ్బా మాపు బత్తిజినాప్. డెఃయె ఆజినాప్ గాని సపె ఆవ్.

10 దుకమ్దాన్ మన్నికాప్ గని ఎస్తివలెబా సర్ల మన్నికాప్. బీదాదికాప్ గాని నండెండారిజ్ ఆస్తి మన్నికార్ కిజినాప్. ఇనికబా సిల్లికాప్ గాని విజు మన్నికాప్.

11 కొరింథి పట్టుమ్దికిదెరా, ఇనికబా డాప్ఎండ మా మన్నుదు మన్నికెజ్ విజు మీవెట మాపు వర్గిత మనాప్.

12 మాపు మీ వందిజ్ ప్రేమదాన్ కిక్కు సాప్సినాప్. మీరు మూక్తి కిక్కుబా మా వందిజ్ సాప్ఇదెర్.

13 మీరు నా కొడఃర్ ఇజి మిజి యా లెకెండ్ వెహ్నిన. మాపు మీ వందిజ్ కిత్తి లెకెండ్ మీరుబా మా వందిజ్ కిదు. మా వందిజ్ మీ ప్రేమ తోరిస్తు.

### నమ్మిఇ వరి వెట జత్త కూడఃదెజ్ ఆవద్.

14 నమ్మిఇ వరివెట మీరు జత్త కూడఃజి మన్మాట్. నీతి నిజాతిమనికార్ని సెఇకార్ ఎలాగ కుడఃజి మండ్రెజ్ అట్టె? జాయ్ని సీకటి ఎలాగ ఉండ్రెబాన్ కుడఃజి మండ్రెజ్ అట్టె?

15 క్రీస్తుజ్ పగాతికాన్ ఆతి బెలియాలుదిజ్\* క్రీస్తు వెట ఇని పొత్తు మనాద్. నమ్మితి వరిజ్ నమ్మిఇ వరిజ్ ఇని పొత్తు మనాద్?

16 దేవుణు గుడిదిజ్ బొమ్మెజు వెట ఇని పొత్తు మనాద్? మాపు బత్తిజిని దేవుణుది గుడిః ఆత మనాప్. అహిజ దేవుణు వెహ్ని లెకెండ్నె, “నాను వరివెట బత్తిజి వరివెట నడిఃన. నాను వరిజ్ దేవుణు ఆజి మంజినాన్లె. వారు నా లోకర్ ఆన మంజినార్”.

17 “అందెజె వరి బాణిజ్ వెల్లి వాజి కేట మండ్రు”, ఇజి ప్రబు వెహ్నినాన్. “సుబారం సిల్లి ఇని దనిజ్బా ముట్మాట్, నాను మిజి డగ్రు కిన”,

18 “నాను మిజి బుబ్బు ఆన మంజిన, మరి మీరు నజి మరిసిర్ గాల్పిక్ ఆనిదెర్లె”, ఇజి విజు సత్తుజ్ మనికాన్ ఆతి ప్రబు వెహ్నినాన్”.

\* 6:15 6:15 బెలుయాల్ ఇహిజ సయ్నాను

## 7

1 నజీ ఇస్టమాతి తంబెరిజాండె, దేవుణు మజీ యాలెకెండ్ర ప్రమాణమకు సిత్త మనాన్. అందెజె ఒడొల్దెదెన్ ఆత్మదిజ్ సెఇకెజ్ కిజిని విజు వనక బాణిజ్ దూరం మంజి మజీ మాటె సుబారం కిజి, దేవుణుదిజ్ గొప్ప మర్యాద సీజి, పూర్తి నెగ్గికాట్ ఆజి మంజినాట్.

2 మీ మన్సుజు మజీ బాడ్డి సిదాట్. మాపు ఎయెరిజ్బా ఇని తపుబా కిఎతాప్. ఎయెరిజ్బా పాడ్జె కిఎతాప్. ఎయెరిజ్బా ఇనికబా మోసెం కిజి లాగ్గె ఆఎతాప్.

3 మీరు తపు కిత్తిదెర్ ఇజి మీ మున్సు, తపు మోపైజ్ ఇజి నాను ఇక వెహ్వి. ఎందనిజ్ ఇహిజు, నాను ముజాల వెహ్వి మన్ని లెకెండ్ర మీరు మజీ నండొ డగ్గుహికిదెర్. అందెజె మాపు బత్తితిజ్బా మీ వెటనె, సాతిజ్బా మీ వెటనె ఎస్తివలెబా మంజినాట్.

4 మీ వందిజ్ నా మన్సుదు నండొ దయరం మనాద్. మీ వందిజ్ నాను గొప్ప పొగ్డిజిజన. నాను ఓదర్పుదాన్ నిండ్రిత మన్న. నజీ నండొ కస్టమ్కు వాతె గాని నాను గొప్ప ఓదర్పుదాన్ మన్న.

5 మాపు మాసిదొనియాదు వాతి వెననుకబా కండెక్బా రోమ్దెజ్ అట్వితాప్. విజు దరిజాణిజ్ మజీ కస్టమ్కునె మహె. వెల్లిహాన్ గొడజెజ్, మా లొఇ ఇహిజు తియెల్దాన్ మహాప్.

6 గాని ఇని ఆస సిల్లెండ్ర అడిగి అర్తి వరిజ్ ఓదసిసిని దేవుణు, తీతు వాతిజ్ వన్నివెట మజీ ఓదరిస్తాన్.

7 వాండ్రు వాతి దని వెటనె ఆవిండ్ర, మీరు వన్నిజ్ ఓదరిస్తా దనివెటా దేవుణు మజీ ఓదరిస్తాన్. నా వందిజ్ మీ మన్సుదు మని ప్రేమ వందిజ్, మీరు నా వందిజ్ నండొ దుకం ఆతి వందిజ్, మరి నా వందిజ్ మీ మన్సుదు ఎస్సా ఆస మనాద్ ఇజి వాండ్రు నజీ వెహ్హాన్. అందెజె నాను మరి ఒదె గొప్ప సర్ల ఆత.

8 నాను మిజి రాస్తి ఉత్తమ్దాన్ మీరు దుకం ఆతిజ్బా, నజీ దని వందిజ్ విసారం సిల్లెద్. అయ ఉత్తం మిజి సెగం రొస్సు, దుకం కిబిస్తాద్ ఇజి నెస్తానె విసారం అస్త.

9 గాని నాను ఎలు దని వందిజ్ సర్లదాన్ మన. మీరు దుకం ఆతి వందిజ్ ఆవిద్, గాని మీరు అయ దుకమ్దాన్ దేవుణు ఎద్రు మీ తపుజ్ ఒపుకొడెజి మారు మన్సు పొందితిదెర్ ఇజి నాను సర్లదాన్ మన. దేవుణు ఇస్టమాతి వజనె మీరు దుకం ఆతిదెర్, అందెజె దనివెట మిజి ఇనికబా నస్టం రెవత.

10 దేవుణు ఇస్టమాతి వజ వాజిని దుకమ్దాన్, దేవుణు మిజి రక్కిన్ని లెకెండ్ర మీ లొఇ మారు మన్సు పుటిసినాద్. అయ మరు మన్సు దుకం పుటిసివిద్. లోకమ్దిజ్ సెందితి దుకం సాపు తపిసినాద్.

11 దేవుణు ఇస్టమాతి వజ వాతి యా దుకమ్దాన్ మీరు ఎస్సానొ జాగర్త మనికిదెర్ ఆతిదెర్. మరి మీరు కల్తి సిలికిదెర్ ఇజి తోరిస్తెజ్ ఎస్సానొ ఆస, తప్పు పణి వందిజ్ ఎస్సానొ కోపం రెపిస్తాద్. మరి, దేవుణు వందిజ్ ఎస్సానొ తియెల్, దేవుణు వందిజ్ ఎస్సానొ ప్రేమ, దేవుణు వందిజ్ పణి కిదెజ్ మన్సుదు ఎస్సానొ ఆస, నయం జర్గిజి మండ్రెజ్ ఇజి ఎస్సానొ ఆస, మీ లొఇ పుటిస్తాద్. యా విజు సజతిజు వందిజ్ మీరు నెగ్గికిదెర్ ఇజి రుజుప్ కిబె ఆతె.

12 అందెజె, నాను మిజి ఉత్తం రాస్తిక అయ సెఇ పణి కిత్తి వన్ని వందిజ్ ఆవిద్. వాండ్రు కిత్తి పణిదాన్ దుకం ఆతి వన్ని వందిజ్బా ఆవిద్. గాని మా వందిజ్ మీ మన్సుదు ఎస్సానొ ఆస ఆజినిదెర్ ఇజి దేవుణు ఎద్రు మీరు నిజం నెస్తెజ్ ఇజినె నాను రాస్త.

13 యా విజు వన్కా వందిజ్ మాపు ఉసార్ కిబె ఆతాప్. అక్కాదె ఆవిండ్ర, మీరు తీతు మన్సు సలాజ్ కిత్తి వందిజ్ వాండ్రు సర్లదాన్ మనికబా సుడెజి మాపు మరి ఒద్దె సర్ల ఆతాప్.

14 నాను మీ వందిజ్ తీతు ఎద్రు పొగ్డిజిజ వెహ్హి వందిజ్ మీరు నజీ సిగు కిఇతిదెర్. మాపు మిజి వెహ్హి విజు మాటెజ్ ఎలాగ నిజమాతికెనొ, అయాలెకెండ్రెనె మీ వందిజ్ తీతు వెట పొగ్డిజిజ వెహ్హికెజ్బా నిజం ఇజి తోరె ఆతె.

15 మీరు విజెదెరె వన్నిజ్ లొజిజి, ఎస్సానొ తియెలాజి ఆజి, వణకుదాన్ వన్నిజ్ డగ్గు కిత్తిదెర్. అక్క. ఎత్తు కినివలె మీ వందిజ్ వన్ని మన్సుదు మని ప్రేమ మరి ఒద్దె పిరిజినాద్.

16 మరి మీ వందిజ్ మన్సుదు పూర్తి దయరమ్దాన్ మండ్రెజ్ ఆనాద్ ఇజి నాను సర్ల మన్న.

## 8

## దేవుణుదిజ్ సంత సీని వందిజ్

1 తంబెరిజాండె, మాసిదొనియాదు మన్ని దేవుణు సజమ్కాజ్ దేవుణు తోరిస్తా మన్ని వన్ని దయా దర్మం వందిజ్ మీరు నెసి మండ్రెజ్ ఇజి మాపు కోరిజినాప్.

2 వరిజ్ వాతి గొప్ప పెరి కస్టమ్కాణిజ్ వారు పరిస కిబె ఆతార్ గాని ఒద్దె సర్ల ఆజి మహార్. వారు గొప్ప బీదదికార్ ఆతి మహిజ్బా దేవుణు వందిజ్ నండొ సీదెజ్ అక్క వరిజ్ అడ్డు కివితాద్.

3 నాను వరి వందిజ్ వెప్పిని సాస్యం ఇనిక ఇహిజ, వరిజ్ ఎసొ సీదెజ్ అట్వారొ అయాలెకండెనె వారు సిత్తార్, నిజమె వరిజ్ సీదెజ్ అట్టి దనిజ్ ఇంక లావ్నె సిత్తార్. వరి సొంత ఇస్టమ్దాన్ సిత్తార్.

4 నమ్మిత్తి వరి వందిజ్ కిజిని యా సాయమ్దు వరి వంతుజ్ కూడుఃపైజ్ ఇజి వరిజ్ అవ్కాసం సీదెజ్ వారు మజి నండొ బతిమాల్తార్.

5 వారు కిత్తిక మాపు ఒడిఃబితి లెకెండెబా ఆవితాద్. ముజాల వరిజ్ వారె ప్రబుదిజ్ సిత్తార్. వెనుక దేవుణు ఇస్టమాతి వజ వరిజ్ వారె మజిబా సిత్తార్.

6 అందెజె తీతు మీ లొఇ మొదొల్సి లెకెండె, కనికారమ్దాన్ కిజిని యా పణి పూర్తి కిదెజ్ ఇజి మాపు వన్నిజ్ ఉసార్ కిబిస్తాప్.

7 మీరు విజు వన్కా లొఇ ముజాల మనికిదెర్. అహిజ దేవుణు ముస్కు మని నమకమ్దు, మాటెజ వర్గిని దని లొఇ, గెణమ్దు, మహివరిజ్ సాయం కిదెజ్ మన్ని ఆనాదు, మా వందిజ్ మన్ని ప్రేమాదు ముజాల మన్ని లెకెండె నమ్మిత్తి వరి వందిజ్ సీని కనికారమ్దాన్ కిజిని యా పణిదుబా మీరు ముజాల మండ్రెజ్ వలె.

8 ఇక్క నాను మిజి ఉండ్రె ఆడ్ర సిత్తి లెకెండె వెహ్వి, గాని సీదెజ్ ఇజి మహివరిజ్ మన్ని ఆసదిజ్ పొలిసి సుడఃతిజ, మీ మన్సుదు మని ప్రేమ ఎసొని నిజమాతిక ఇజి నెస్తెజ్ ఇజి నాను వెప్తా.

9 మీరు మా ప్రబు ఆతి యేసుక్రీస్తు దయాదర్మమిదిజ్ నెస్సిదెర్గదె? వాండ్రు గొప్ప ఆస్తి మన్నికాన్ గాని వాండ్రు మీ వందిజ్ బీదవాండ్రు ఆతాన్. ఎందనిజ్ ఇహిజ, మీరు ఆస్తి మన్నికిదెర్ ఆదెజ్ ఇజి వన్నిజ్ వాండ్రె బీదవాండ్రు కిబె ఆతాన్.

10 యా సజతిజ వందిజ్ మీరు యా లెకెండె కిత్తిజ బాగ మనాద్ ఇజి నాను ఒడిఃబిజిన. నీరొండు, యా లెకెండె కిదెజ్ ఆస మనికిదెరె ఆవిండ, సీదెజ్బా మీరె ముజాహికిదెర్.

11 అందెజె, మీరు సీదెజ్ ఎలాగ ఆస ఆజినిదెరొ, దనిజ్ తగితి లెకెండె, ఇహిజ మిజి కల్లితి మనిదనిజ్ తగితి లెకెండె సీజి యా పణి పూర్తి కిదు.

12 ఒరెన్ వన్నిజ్ సీదెజ్ ఇజి మన్సు మహిజ, అట్టి దన్నిజ్ ఇంక మిస్తి ఆవిద్, గాని వన్నిజ్ మని దన్నిజ్ తగితి లెకెండె సిత్తిజ, అక్క దేవుణుదిజ్ ఇస్టమాతిక ఆజినాద్.

13 మహి వరిజ్ సులు ఆజిమంజి మిజి లావ్బరు మండ్రెజ్ ఇజి ఆవిద్ గాని విజెరిజ్ ఉండ్రె లెకెండె బరు మన్నిద్ ఇజినె మాపు కోరిజినాప్.

14 ఏలు మిజి లావ్మనిక వరిజ్ అవ్సరమ్క వందిజ్ సిత్తిజ, వరిజ్ లావ్మన్నివలె మీ అవ్సరం వందిజ్ మర్జి సీనార్లె. అయాలెకండెనె విజెరిజ్ ఉండ్రె లెకెండె మంజినాద్.

15 “లావ్ పెప్తా వన్నిజ్ ఇనిక మిగిల్లివితాద్. తక్కు పెప్తా వన్నిజ్ సాల్వండ ఆవితాద్”.\* ఇజి దేవుణు మాటదు రాస్తి మన్ని లెకెండెనె.

16 మీ వందిజ్ మా మన్సుదు మన్ని ఆస లెకెండెనె, దేవుణు తీతు మన్సుదుబా ఆస సిత్తి వందిజ్ నాను దేవుణుదిజ్ వందనమ్కు వెప్పిన.

17 తీతు మాపు వెప్తాక విహాన్. అక్కాదె ఆవిండ వన్నిజ్ వాండ్రె ఆజి గొప్ప సర్లదాన్ మీ డగ్రు వాజినాన్.

18 సువార్ల పణిదు విజు సజమ్కాజ్ వన్ని పణి వందిజ్ పేరు మనికాన్ ఆతి మరి ఒరెన్ తంబెరిబా వన్ని వెట పొక్కినాప్.

19 అక్కాదె ఆవిండ, ప్రబుజ్ పేరు వాదెజ్ ఇజిని మహి వరిజ్ సాయం కిదెజ్ మా మన్సుదు మన్ని ఆస తోరిస్తెజ్ ఇజినె మాపు కనికారమ్దాన్ కిజిని యా పణి కిజినాప్. యా సంత అసి మాపు సొనివలె, మా వెట వాదెజ్ ఇజి విజు సజమ్కు కూడఃజి యా తంబెరిజ్నె ఎర్గిస్త మనార్.

20 విజు సజమ్కు కూడఃజి లొబం కివిండ సిత్తి యా సందదాన్ మాపు పణి కిత్తి వందిజ్ ఎయెర్బా మా ముస్కు ఇని తప్పబా వెహ్విండ గొప్ప జాగర్లదాన్ మనాప్.

21 అందెజె ప్రబు ఎద్రునె ఆవిండ లొకురి విజెరి ఎద్రుబా సరి ఆతికెజ్ కిదెజ్ జాగర్ల మనాప్.

\* 8:15 8:15 నిర్గమకాండం 16:8 ఇస్రాయేలు లొకుర్ అయగ్గుప్తు దేసమ్దాన్ కనాను దేసం సొన్ని మహివలె, వారు బిడిఃజ్బామిదు 40 పంటిజ్ మహివలె మన్సునె వరిజ్ ముకెలమతి తిండి ఆత మహాద్. బిడిఃజ్ బామిదు మహివలె వరిజ్ సరిఆతి తిండి సిల్లెద్ ఇజి వారు దేవుణు వెట సణజితార్. దేవుణు అగసమ్దాన్ వరిజ్ మన్సు సిత్తాన్. రోజు పెందల మన్సు వారు మన్నిబాన్, ఇజిరి బెల్లమ్లెకెండె బామిదు అర్గి మహాద్. రోజు రోజుదిజ్ సరి ఆతిక అయ రోజుదునె దేవుణు వరిజ్ సీజి మహాన్. వారు కనాను దేసం అందిజి బాణక తిండి తినిదాక దేవుణు వరిజ్ మన్సు సీజి మహాన్. (యెహొసువ 5:12)

22 అక్కాదె ఆవిండ, వరివెట మరి ఒరెన్ తంబెరిజ్ బా పొక్కినావ్. నండొ పణిజాణిజ్ నండొ సుట్టు వన్నిజ్ పరిస కిజి వన్ని మన్నుది ఆస నెస్త మనావ్. ఏలు మీ వందిజ్ వన్ని మన్నుదు మని గొప్ప దయరమ్దాన్ ఆస ఒద్దె పిరిజినాద్ ఇజి మరి నెసినావ్.

23 తీతు ఇహిజ, నా వెట మహికాన్, మీ నడిమి నా వెట జత కూడ్డి పణి కిత్తికాన్. వన్ని వెట వాజిని యా కూలెజ్ ఇహిజ, ఉండ్రీ ఉండ్రీ సజమ్కాణిజ్ వాతికార్. క్రీస్తుజ్ నెగ్గి పేరు తపిసినికార్.

24 అందెజె విజు సజమ్క ఎద్దు తోర్ని లెకెండ, విరిజ్ మీ ప్రేమ, మరి మీ వందిజ్ మాపు పొగిడిజిని దని వందిజ్ రుజువ్ కిజి తోర్నిస్తు.

## 9

1 నమ్మిత్తి వరి వందిజ్ కిజిని యా పణి వందిజ్ నాను మిజి రాస్తెజ్ అక్కర్ సిల్లెద్.

2 సాయం కిదెజ్ మీ మన్నుదు మని ఆస నాను నెసిన. అందెజె అక్కాయదికార్ ఆతి మీరు దేవుణు వందిజ్ సీదెజ్ ఇజి నీరుండ్రాన్ తయార్దాన్ మనిదెర్ ఇజి మీ వందిజ్ మాసిదోనియాది వరివెట పొగిడిజి వెప్పి మహావ్. మీ మన్నుదు మని ఆసదిజ్ నెస్తారె వరి లొఇ నండొండ్రాన్ సీదెజ్ ఇజి ఉసార్ ఆజినార్.

3 మాపు మీ వందిజ్ పొగిడిజి వెప్పికెజ్ అర్లం సిల్లికెజ్ ఆదెజ్ ఆవిద్ ఇజి ఏలు యా తంబెరిజ పొక్కిన. నాను వెప్పి వజ సాయం సీజి పొక్కెజ్ తయార్ ఆజి మండ్రు.

4 ఉండ్రీ వేలా మాసిదోనియాదికాన్ ఒరెన్ మా వెట వాతిజ, మీరు తయార్ అవిండ మనిక సుడెతిజ, మీ మున్ను మజి మని యా నమకం వందిజ్ అయావలె మజి సిగు వానాద్, మీరుబా సిగు ఆనిదెర్.

5 అందెజె, మీరు సీనావ్ ఇజి వెప్పి మనిక లోబం కివిండ ముజాలె తయార్ కిజి మండ్రెజ్ ఇజి యా తంబెరిజ మూజాల్ నె మీ డగ్గు సొండ్రు ఇజి వెప్పి పొక్కెజ్ ఇజి నాను ఒడిబిత. అహిజ మీరు సీనా ఇజి వెప్పి మనిక లోబమ్దాన్ సీని లెకెండ మన్విండ పూర్తి మన్నుదాన్ సీని సంత లెకెండ మంజినాద్.

దేవుణుదిజ్ లోబం కివిండ సర్దదాన్ సీదెజ్ ఇజి వెప్పినాన్.

6 తక్కు విత్తికాన్ తక్కునె పంట కొయ్యాన్. నండొ విత్తికాన్ నండొ పంట కొయ్యాన్. ఇజి గెపతం కిజి మండ్రు.

7 ఒరెన్ ఒరెన్, ఎస్సా సీన ఇజి వన్ని మన్నుదు నిరణెం కిత్తిలెకెండెనె సీదెజ్. అక్క సణిజెండ, బలవంతమ్దాన్ ఆవిండ సీదెజ్ వలె. ఎండనిజ్ ఇహిజ సర్దదాన్ సీని వరిజ్ దేవుణు ప్రేమిసినాన్.

8 ఎస్తివలెబా మిజి కావాలిస్తి దన్నిజ్ ఇంక లావ్ మండ్రెజ్ ని, మరి విజు నెగ్గి పణిజ వందిజ్ లావ్ సీదెజ్ మిజి మండ్రెజ్, వన్ని దయాదర్మమ్దాన్ సీజిని దేవుణు ఇంక మరి ఒద్దె మిజి సీదెజ్ అట్టికాన్.

9 దిన్ని వందిజ్ దేవుణు మాటదు యాలెకెండ రాస్త మనాద్. “వాండ్రు దోసదాన్ కెప్పి విరివిత్తి ఇనాయమ్కు బీదాది వరిజ్ సీజినాన్. వన్ని నీతి నిజాయితి ఎలాకాలం మంజినిక”.

10 విత్తి వన్నిజ్ విత్తుని ఉండెజ్ తిండి సీని దేవుణు సీజినాన్. మిజి మా వాండ్రు విత్తెజ్ విత్తు సీజి, మీరు విత్తికెజ్ నెగెండె విరిప్పి లావ్ కిజి, మీరు కిజిని నీతి నిజాయితి పణిజ్ బా లావ్ కిబిస్సాన్.

11 విజు సజతిజ లొఇ మీరు లావ్ మన్నికిదెర్ కిబె ఆనిదెర్లె. అందెజె ఎస్తివలెబా మహి వరి వందిజ్ లావ్ సీదెజ్ మీరు అట్టిదెర్. మీరు మజి సీజిని దనిదటాజ్ మాపు మహివరిజ్ సీనివలె మా వెట దేవుణుదిజ్ వందనమ్కు వెహె ఆనాద్లె.

12 యా పణివెట నమ్మిత్తి వరి అవ్సరమ్కు తీరిసినికాదె ఆవిండ దేవుణు వందిజ్ వెప్పిని వందనమ్కు మరి ఒద్దె లావ్ ఆజినె.

13 యా పణిజాణిజ్ మీరు తగ్గికిదెర్ ఇజి రుజువ్ కిజినిదెర్. అందెజె మీరు క్రీస్తు సువార్దదిజ్ ఒప్పుకొటి లొజిత్తి వందిజ్, మిజి కల్లితి మన్నికెజ్ వరిజ్ ని మహి వరిజ్ విజెరిజ్ లోబం కివిండ సీదెజ్ తయార్ ఆతి వందిజ్ వారు విజెరె దేవుణుదిజ్ పొగిడినార్లె.

14 వరిజ్ సాయం కిదెజ్ దేవుణు మీ మున్ను తోర్ని విజు దనిజ్ మిస్తి వన్ని దయా దర్మం వందిజ్, మీ వందిజ్ పార్లనం కినివలె, మిజి సుడెదెజ్ మన్నుదు ఆసదాన్ మంజినార్.

15 వెప్పాజ్ అట్ ఇ నన్ని వరం సిత్తి దేవుణుదిజ్ వందనమ్కు!

## 10

1 ఏలు పవులు ఇని నాను బతిమాల్లిన. మీ వెట మనివలె నిపాతి మనికాన్ లెకెండ గాని మీ బాణిజ్ దూరం మనివలె గటిజ మనికాన్ ఇజి మీరు ఒడిబిజిని నాను, క్రీస్తుజ్ మని సార్లదాన్ ని సాంతిదాన్ మిజి బతిమాల్లిన.

2 మాపు లోకమదిజ్ సెందితి వరి లెకెండ్ నడిసినావ్ ఇజి మీ లొఇ సెగొండార్ మా వందిజ్ వెహ్నినిదెర్. ననివరి వెట నాను ఒండేబిని లెకెండ్ తెగిజి నండొ గటిజి వర్గిదెజ్ అట్టు. గాని నాను వానివలె గటిజి వర్గిఎండ మంజిని లెకెండ్ మీరు మండ్రు ఇజి నాను మిజి బతిమాల్లిన.

3 యా లోకమదునె మపు బత్తిజినావ్ గాని లోకమది వరి లెకెండ్ విదెం కినికావ్ ఆవ్.

4 మాపు విదెం కిని ఆయుదమ్కు యా లోకమదిజ్ సెందితి ననికెజ్ ఆఉ. గాని సెఇ వన్కా పెరి ఎత్తుమని కోటెజి అర్పైజ్ దేవుణు బాణిజ్ వాతిమని సత్తుమని ఆయుదమ్కు అక్కెజ్.

5 మాపు, దేవుణు వందిజ్ నెన్ఎండ మండ్రెజ్ అడ్డు కినిలెకెండ్ మన్సుదాన్ రేజ్జి వాజిని విజు వన్కాజ్ అడ్డిజి అర్పి, విజు ఆలోసనమ్కాజ్ అసి క్రీస్తుజ్ లోజిని లెకెండ్ కిజినావ్.

6 మీరు పూర్తి లోజిజి మంజినికిదెర్ ఆనిదాక, లోజిఎండ మన్ని విజు వన్కా వందిజ్ మిజి సిక్స సీదెజ్ తయార్ ఆత మనావ్.

7 మీరు వెల్లి మన్ని వనకాజ్నె సుండేజినిదెర్. ఎయెన్బా వాండ్రు క్రీస్తుజ్ సెందితికాన్ ఇజి ఒండేబిజి మహిజ, వాండ్రు ఎలాగ క్రీస్తుజ్ సెందితికాన్ ఆజి మంజినాండ్రొ, అయాలెకెండ్నె మాపుబా క్రీస్తుజ్ సెందితికావ్ ఇజి వాండ్రు ఒండేబిదెజ్ వలె.

8 మీ బత్తు నాననం కిదెజ్ ఇజి సిల్లెద్ గాని దన్నిజ్ నెగెండ పిరిపైజ్ ఇజి ప్రబు మజి అతికారం సిత్ర మనాన్. అయ అతికారం వందిజ్ నండొ పొగడిజి వెహ్నిజ్బా నాను సిగు ఆవ్.

9 నాను మిజి రాసిని ఉత్తమ్దాన్ మిజి తియెల్లిని వన్ని లెకెండ్ మండ్రెజ్ ఆవద్ ఇజి కోరిజిన.

10 “వన్ని ఉత్తమ్కు గొప్ప అర్థం మన్ని మాటెజ్ మన్నికెజ్, సత్తుదాన్ కూడితికెజ్ గాని వాండ్రు మా నడిమి మనివలె సత్తు సిల్లి వన్ని లెకెండ్ మనాన్. వర్గిజిని మాటెజ్ ఇని అర్థం సిల్లికెజ్ మన్నె”, ఇజి ఎయెరో వెహ్నినార్గె.

11 యాలెకెండ్ వెహ్నినికార్ యాక నెసైజ్. ఇనిక ఇహిజ మాపు దూరం మనివలె రాసిని ఉత్తమ్దు మన్ని మాటెజ్ ఎలాగ మర్తికెజ్నొ, అయాలెకెండ్నె మీ నడిమి మాపు మన్నివలె మాపు కిని పణిజ్బా మంజినె.

12 వరిజ్ వారె పొగడె: ఆజిని సెగొండార్ లెకెండ్ మాపుబా మనావ్ ఇజినొ, మాపు వరిజ్ సమానం ఆతికావ్ ఇజినొ వెహ్నిజ్. ఎండనిజ్ ఇహిజ, వారు మహి వరి వెట విజు సజతిజి లొఇ సమానం మనానా ఇజి పొలిసి సుండేజినార్. అయాక బుద్ది సిల్లి పణినె.

13 గాని మజి అక్కు మనిదనిజ్ ఇంక మాపు పగడె: ఆవ్. దేవుణు మా వందిజ్ కేట కిత్తి మన్ని పణిదిజ్ జవ డాట్ఎండ దన్ని లొఇనె పొగడిజినావ్. మాపు మీ నడిమి కిజిని పణిబా దన్ని లొఇ మనాద్.

14 మాపు క్రీస్తు వందిజ్ సువార్త సాటిసి మీ డగ్రు వాతివలె దేవుణు మజి ఒవజెప్పి మన్ని దనిజ్ జవ డాట్టి సానికావ్ ఆవితావ్. ఎండనిజ్ ఇహిజ మీరు దన్ని లొఇనె మన్నిదెర్. మాపె క్రీస్తు సువార్త ముజాల మీ నడిమి సాటిస్తావ్.

15 మహికార్ కష్టబాడేజి కిత్తి దన్ని లొఇ వంతు మనికావ్ ఇజి మాపు పొగడిఎవ్. గాని దేవుణు మున్సు మన్ని మీ నమకం పిరిజి వానివలె మీ నడిమి మాపు కిజిని సువార్త పణి మరి ఒద్దె పెరిక ఆజి సర్నాద్ ఇజి మాపు ఆస ఆజినావ్.

16 మీ అతాల మని నాహ్కాజ్బా సువార్త సాటిస్తెజ్ ఇహిజ అట్నావ్. అయాలెకెండ్ కిజి ఒరెన్ వన్నిజ్ ఒవజెపె ఆతిమని ప్రాంతమ్దు కిబె ఆతి పణి వందిజ్ మజి మాపె పొగడె: ఆవ్.

17 గాని దేవుణు మాటదు రాస్తి మన్ని లెకెండ్, “పొగడె: ఆజినికాన్ ప్రబు కిత్తి వనకాజ్ వందిజ్నె పొగడె: ఆదెజ్ వలె”.

18 వన్నిజ్ వాండ్రె పొగడె: ఆనికాన్ తగ్నికాన్ ఆవెన్, తగ్నికాన్ ఇజి దేవుణు వెహ్నికాండ్రె తగ్నికాన్ ఆజినాన్.

## 11

1 నా బుద్ది సిల్లి పణిజ్ మీరు కండెక్ ఓరిసినిదెర్ ఇజి నాను ఆస ఆజిన, నిజమె ఏలుబా మీరు ఓరిసినిదెర్.

2 మీ వందిజ్ దేవుణు మన్సుదు మన్ని ఆస వజనె నానుబా మీ వందిజ్ అయాలెకెండ్నె సత్తు మన్ని ఆసదాన్ మంజిన. ఎండనిజ్ ఇహిజ, ఒరెన్ దజడె: వందిజ్ నాను మిజి ప్రదానం కిత్త మన్ను. అహిజ, క్రీస్తు వందిజ్ నాను మిజి ఇని కల్తినెల్లి ఉండ్రె విడిబోదెలి లెకెండ్ వన్నిజ్ ఒవజెప్ప మన్ను.

3 గాని సరాస్ వన్ని సెఇ ఆలోసనమ్దాన్ అవ్వెజ్ మోసెం కిత్తి లెకెండ్, మీ మన్సుబా తపు బోదెజాణిజ్ మోసెం కిబె ఆజి, మీరు క్రీస్తు మున్సు మిజి మన్ని ఇని కల్తినెల్లి ప్రేమ డిసి సీజి, వన్ని బాణిజ్ దూరం ఆనిదెల్లె, ఇజి నాను తియెల్ ఆజిన.

4 ఎండనిజ్ ఇహిజ, ఎయెన్బా మీ డగ్రు వాజి మాపు సాటిస్తి యేసుజ్ ఆవండ మరి ఒరెన్ యేసుజ్ సాటెసిజ, మరి మా వెట మీరు పొందితి మని దేవుణు ఆత్మ ఆవండ మరి ఉండ్రె ఆత్మ పొందితిజ, అక్కాదె ఆవండ మాపు వెహ్ని సువార్త ఆవండ మరి ఉండ్రె సువార్త డగ్రు కిత్తిజ, సులుగ మీరు వన్కాజ్ లోజిజి వరిజ్ ఒరిసినిదెర్.

5 అయ గొప్ప పేరు పొందితికార్ ఆతి అపొస్తురు ఇంక నాను ఒద్దె తక్కుదికాన్ ఆవె ఇజి నాను ఒండేబిజిన.

6 నాను నెగెణ్ వర్గిదెజ్ నెన్ఇకాన్ ఆతిజ్బా, గాని నాను గెణం సిల్లిక ఆవ. మిజి విజేరిజ్ విజు పణిజాణిజ్, విజు మాటెజాణిజ్ మాపు అయ గెణం వందిజ్ రుజువ్ కిజి తోరిస్త మనావ్.

7 మీ బాణిజ్ ఇనికబా లొన్ఏండ దేవుణు సువార్త మీ నడిమి సాటిసి, మీరు పెరికిదెర్ ఆదెజ్ ఇజి నజి నానె తగి ఆతివలె నాను పాపం కిత్తానా?

8 మీ నడిమి దేవుణు పణికిదెజ్ మహి నజుమ్కాణిజ్ వరి డబ్బుజ్ డోజ కిత్తి లెకెండ వరి బాణిజ్ కూల్లి లొసె ఆత.

9 నాను మీ నడిమి మహివలె, ఇనికబా అవ్సరం ఆతిజ్బా, నాను ఎయెరిజ్బా ఇనికబా లొన్ఏత. మాసిదోనియదాన్ వాతి తంబెరిజ్ నా అవ్సరమ్కాజ్ వందిజ్ సిత్తార్. మీ బాణిజ్ ఇనికబా లొన్ఏండ, నాను మిజి ఉండ్రీ బరు లెకెండ మన్ఏండ జాగర్తదాన్ మహి లెకెండెనె వాని కాలమ్దుబా మంజిన.

10 క్రీస్తుజ్ మని నిజం నా లొఇ మన్నిజ్ అక్కాయ ప్రాంతమ్దు మనికార్ ఎయెర్బా నాను యా లెకెండ పొగ్డిజి వెప్పిని దనిజ్ అడ్డు కిదెజ్ అట్ఏర్.

11 ఎందనిజ్ నాను అయాలెకెండ మహ ఇహిజ, మిజి ప్రేమిన్ఇ వందిజ్ ఆవద్. నాను మిజి ఎస్సా ప్రేమిసిన ఇజి దేవుణు నెసినాన్.

12 గాని ఏలు కిజిని లెకెండెనె నాను దేవుణు పణి కిజి మంజిన, అందెజె మాపు కిజిని లెకెండెనె వారుబా దేవుణు పణి కిజినార్ ఇజి వెప్తాజ్ ఇజి ఆస ఆజిని వరిజ్ మా వెట పొగ్డిజి ఆదెజ్ అక్కు సిల్లెండ మన్ఏద్ ఇజి.

13 వారు నన్నికార్, క్రీస్తుజ్ అపొస్తురు లెకెండ వేసం పోకె ఆజి తోరె ఆతిమని మోసెం పణిజ్ కిజిని మిజి మోసెం కిత్తి డోజ అపొస్తురు.

14 దన్ని వందిజ్ బమ్మ ఆదెజ్ అక్కర్ సిల్లెద్. సయ్యూసుబా జాయ్ మని దూత లెకెండ వేసం పోకె ఆనాన్.

15 అందెజె సయ్యూను వందిజ్ పణి కినికార్, వారు వరిజ్ వారె నీతి నిజాయితి పణిజ్ కినివరి లెకెండ వేసం పోకె ఆతిజ అక్క పెరిక ఆవద్. వారు కిజిని పణిజ తగితి లెకెండెనె ఆకార్దిజ్ వరిజ్ జర్గినాద్లె.

**పవులు వన్నిజ్ వాతి కన్జమ్కాజ్ వందిజ్ పొగ్డిజినాన్.**

16 నాను బుద్ది సిల్లికాన్ ఇజి ఎయెన్బా ఒడెబిదెజ్ అవద్ ఇజి నాను మరి మిజి వెప్పిన. నాను బుద్ది సిల్లికాన్ ఇజి మీరు ఒడెబిత్తిజ ఆహ ఒడెబిదు. అందెజె నానుబా కండెక్ పొగ్డిజి ఆదెజ్ అట్టు.

17 యాలెకెండ నా మన్నుదు దయరం ఆజి పొగ్డిజినవలె, అక్క ప్రబు మాటెజ్ వర్గితి లెకెండ ఆవ, ఉండ్రీ బుద్ది సిల్లివన్ని లెకెండ వర్గిజిన.

18 నండొండార్ యా లోకమ్దిజ్ నెందితి వరి లెకెండ పొజిజినార్, అందెజె నానుబా అయాలెకెండెనె పొజిజిన.

19 మీరు గొప్ప బుద్ది మన్నికిదెర్గె. మీరు బుద్ది సిల్లివరిజ్ సర్దదాన్ డగ్గు కిజినిదెర్.

20 ఒరెన్ మిజి వెట్టపణి కిని వన్ని లెకెండ కిత్తిజబా, ఒరెన్ మోసం కిజి మిజి మన్నికెజ్ విజు లొసె ఆతిజబా, ఒరెన్ మిజి మోసం కిజి వన్నిజ్ లాబం తప్పిజ్బా, మీ మొకొమ్దు డెయ్యిజ్బా మీరు వన్నిజ్ ఓరిసినిదెర్.

21 అయాలెకెండ వారు కిత్తి లెకెండ కిదెజ్ మాపు సత్తు మనికావ్ అవ్ ఇజి నాను సిగు ఆజి వెప్పిన. గాని ఎయెన్బా ఇనిదన్ని వందిజ్బా పొగ్డిజి ఆదెజ్ అక్కు మనాద్ ఇహిజ, నజిబా అయాలెకెండ పొగ్డిజి ఆదెజ్ అక్కు మనాద్. నాను ఒరెన్ బుద్ది సిల్లి వన్ని లెకెండెనె వర్గిజిన.

22 వారు ఎబ్రివారునా? నానుబా ఎబ్రి వాండ్రునె. వారు ఇస్రాయేలుదికారా? నానుబా ఇస్రాయేలుదికానె. వారు అబ్రాహము కుటుమ్దికార్రా? నానుబా నన్నికాండ్రె.

23 వారు క్రీస్తు వందిజ్ పణి కినికారా? నాను వెరి వన్ని లెకెండ వర్గిజిన. నాను క్రీస్తు వందిజ్ మరి ఒద్దె పణి కిత్త మన్ను. నాను నండొ కన్జబాడెజి పణి కిత్తమన్ను. నండొ సుట్టు జెలిదు మహ. కొరెడెజాణిజ్ నండొ సుట్టు గొప్ప డెయె ఆత. నండొ సుట్టు సావుదిజ్ డగ్గు ఆత.

24 యూదురు లోకర్ బాణిజ్ అయ్దు సుట్టు, ఉండ్రీ తక్కు నలపయ్ దెబ్బెజ్ తిహ.

25 మూండ్రీ సుట్టు డుడ్డుదాన్ డెయె ఆత. ఉండ్రీ సుటు పణకాణిజ్ డెయె ఆత. మూండ్రీ సుట్టు సందరమ్దు పయనం కిజి మహిజ్ ఓడెజ్ పెడెహిజ్ బాద ఆత. ఉండ్రీ రెయు పొగొల్ సందరమ్దు ఏరుదు మహ

26 ఎస్తివలెబా నాను పయనం కిజి మహిజ్ నండొ సుట్టు పయనమ్దు పెరి గడ్డెజాణిజ్ ప్రమాదమ్కు వాతె. డొజారిజు వెట ప్రమాదమ్కు వాతె. మా సొంత జాతిదికారాతి యూదురి వెట ప్రమాదమ్కు వాతె. పట్టుమ్దు ప్రమాదమ్కు వాతె. అడివిదు ప్రమాదమ్కు వాతె. సందరమ్దు ప్రమాదమ్కు వాతె. డొజ తంబెరిజ వెట ప్రమాదమ్కు వాతె.

27 నాను నండొ కన్జమ్దాన్ స్రమెజాణిజ్ పణిజ్ కిజి, రెయు నిద్ర సిల్లెండ మహ. ఏక, ఏక తిండి సిల్లెండ బజ ఎప్పిదాన్ మహ. ఒడెల్దు సొక్కెజ్ సిల్లెండ పిన్నిదు నిగసాణె మహ.



28 యాకెజె ఆవండ విజు దేవుణు సజమ్కాజ్ వందిజ్ ఎలాగ ఆనెనొ ఇజి రోజు మన్సుదు ఒడేబిజి మహా.

29 సత్తు సిల్లికాన్ ఎయెన్ మనాన్? నానుబా సత్తు సిల్లికాన్ ఆవినా? ఎయెన్ పాపమ్దు తొరొడె ఆజినానా? నజీ మన్సుదుబా కోపం రెజె ఆవినా?

30 నాను పొగ్గడె: ఆదెజ్వలె ఇహిజ నజీ మన్ని సత్తు సిల్లి వన్కా వందిజ్నె నాను పొగ్గడినాలె.

31 నాను వర్గిజనిక అబద్దం ఆవద్ ఇనిదన్నిజ్ ఎస్తివలెబా పొగిడె: ఆజిని మా ప్రబువాతి యేసుజ్ బుబ్బాతి దేవుణునె నెసినాన్.

32 దమన్సు పట్టుమ్దు నాను మహివలె, రాజు ఆతి అరెత అడిగి మన్నికానాతి అదికారి నజీ అస్తెజ్ ఇజి దమన్సు పట్టుం విజు కాపు ఇడ్డాన్.

33 నస్తివలె పట్టుమ్ది కోట గోడాదు మన్ని కిటికి బొరొదాన్, గంపదు డిపె ఆతానె వన్ని కియుదాన్ తప్తె ఆత.

## 12

1 పొగ్గడిజి వర్గిదెజ్ ఇహిజ మరి నండొ మన్నె. వన్నీ దన్నిజ్ ఇని లాబం సిల్లిజ్బా దేవుణు బాణిజ్ తొరె ఆతి కలెజి వందిజ్, డాజితి మన్నికెజ్ దేవుణు తొరిస్తి వందిజ్ నాను వెహ్నా.

2 క్రీస్తుజ్ సెందితికాన్ ఒరెన్ వన్నిజ్ నాను నెసిన. పదనాల్లి వంటిజ్ ముజాల వాండ్రు మూండ్రీ ఆగాసం దాక పెరె ఆతాన్. ఒడొల్దాన్ పెరె అతాండ్రొ, ఒడొల్ సిల్లెండ పెరె అతాండ్రొ ఇజి నాను నెన్వ. అక్క దేవుణునె నెసినాన్.

3 పరదీసు ఇని దేవుణు మంజిని బాడిదాక పెరె ఆతి ఒరెన్ వన్నిజ్ నాను నెసిన. వాండ్రు ఒడొల్దాన్ పెరె అతాండ్రొ, ఒడొల్ సిల్లెండ పెరె అతాండ్రొ ఇజి నాను నెన్వ. అయాక దేవుణు నెస్నాన్.

4 అబ్బె వర్గిదెజ్ అల్త ఇ నన్ని సజతిజ్ వెహాన్. లోకు ఎయెన్బా వన్ని వెయుదాన్ అయ మాటెజ్ వర్గిదెజ్ అక్కు సిల్లెద్.

5 నని ఒరెన్ వన్నిజ్ పొగ్గడిజి నాను వర్గిన గాని నజీ నానె పొగ్గడె: ఆవ. నాను పొగ్గడె: ఆదెజ్ ఇహిజ నజీ మన్ని సత్తు సిల్లి వన్కా వందిజ్నె పొగ్గడె: ఆన.

6 నాను పొగ్గడిదెజ్ ఇజి ఒడేబిత్తిజ, నిజం మనికెజ్నె వెహ్నా. అందెజె నాను బుద్ది సిల్లికాన్ ఆవ. ఎందనిజ్ ఇహిజ నాను కిత్తికెజ్ సుడేజిసొ, నాను వర్గినికెజ్ వెంజిసొ, నాను మన్ని దనిజ్ ఇంక ఒద్దె పెరికాన్ ఇజి నా వందిజ్ ఎయెన్బా ఒడేబివిండ మండ్రెజ్ ఇజి నాను పొగ్గడివ.

7 దేవుణుది డాజితి మన్ని గొప్ప పెరి సజతిజ్ నజీ తొరె ఆతి వందిజ్, నజీ నానె పెరిక ఇజి ఉబె ఆవండ మండ్రెజ్ ఇజి నజీ బాద కిదెజ్ ఇజి నా ఒడొల్దాన్ ఉండ్రీ సాంపు ఇడ్డె: ఆతి లెకెండ ఒరెన్ సయ్తాను దూత నా డగ్గు పొకె ఆత మనాన్.

8 అయాక నా ఒడొల్దాన్ లగిజి విసిర్అ ఇజి నాను ప్రబు వెట మూండ్రీ సుట్కు బతిమాలిత.

9 గాని వాండ్రు నజీ, “నా దయా దర్మం నిజీ ఆనాద్, సత్తు సిల్లిబాన్ నా సత్తు పూర్తి సత్తు మనిక ఆజినాద్”, ఇజి వెహ్నాన్. అయావలె నజీ సత్తు సిల్లి వన్కా వందిజ్ మరి ఒద్దె సర్దదాన్ పొగ్గడినాలె అందెజె క్రీస్తు సత్తు నా మున్సు నిల్లి మంజినాద్.

10 ఎస్తివలె నాను సత్తు సిల్లికానొ, నస్తివలె నాను సత్తుదికాన్ ఆజినాన్. అందెజె క్రీస్తు వందిజ్ నజీ మన్ని సత్తుసిల్లి వనక వందిజ్, నిండెజి వందిజ్, కస్టమ్కు వాతి వందిజ్, హిమ్సెజి వందిజ్, స్రమెజి వందిజ్ నాను సర్ద ఆజిన.

11 నాను బుద్దిసిల్లి వన్నిలెకెండ మన, అయా లెకెండ మండ్రెజ్ ఇజి మీరె నజీ బలవంతం కిత్తిదెర్. నాను తగ్గికాన్ ఇజి మీ బాణిజ్ వెహె ఆదెజ్ నజీ అక్కు మనాద్. ఎందనిజ్ ఇహిజ, నాను ఎపటిదికాన్ ఆఇజ్బా, మీ గొప్ప పేరు పొందితి అపొస్తురు ఇంక తక్కుదికాన్ ఆవ.

12 నాను ఎస్సానొ ఓర్బుదాన్ మీ నడిమి తొరిస్తి మన్ని బమ్మాతి పణిజ్, ఎసెజ్బా తొఇ పణిజ్, బమ్మాని గొప్ప పణిజ్ నాను అపొస్తుడు ఇని దన్నిజ్ రుజాప్ కిజినె.

13 ఇనిదన్ని వందిజ్బా నాను మీ మున్సు ఆదారం ఆవిత. ఇక్కడె ఆవండ మరి ఇని సజతిదుబా మీరు మహి సజమ్క ఎద్దు తక్కుదికెదెర్ ఆఇతిదెర్. నాను కిత్తి యా తపు మీరు సెమిస్తు.

14 ఏలు మూండ్రీ సుట్కు మీ డగ్గు వాదెజ్ ఇజి తయారాజిన. నాను వాతివలె ఇనిదన్ని వందిజ్బా నాను మీ మున్సు ఆదారం ఆవ. ఎందనిజ్ ఇహిజ మిజీ కల్లితి మన్నికెజ్ ఇనికబా నజీ అవ్సరం సిల్లెద్, గాని మీరె నజీ కావాలి. కొడొర్ అయ్సి అపొసిర్ వందిజ్ ఆవద్, గాని అయ్సి అపొసిర్నె కొడొర్ వందిజ్ ఆస్తి గణస్తెజ్గదె.

15 అందెజె నాను నజీ కల్లితి మన్నికెజ్ విజు మీ వందిజ్ కర్పు కిన. మరి నజీ నానె మీ వందిజ్ కర్పు కిబె ఆన. నాను మిజీ లావు ప్రేమిస్తిజి మీరు నజీ తక్కు ప్రేమిసినిదెరా?

16 నాను ఇనిదన్ని వందిజ్బా మీ మున్సు ఆదారం ఆవ, అక్క నిజమె. గాని ఇనికాదొ ఉండ్రీ ఉపాయ్కిజి మిజీ మొసెం కిజి లొసె ఆనాన్లె ఇజి ఎయెర్బా వెహ్నార్లె.

17 నాను మీ డగ్రు పోక్తి ఎయెర్ వెటబా మిజి మొసెం కిజి ఇనికబా లొసె ఆత మనానా?

18 మీ డగ్రు సొండ్రెళ్ ఇజి తీతుజ్ నాను బతిమాలిత. వన్నివెట మా తంబెరి ఒరెన్ వన్నిజ్ బా పోక్త. తీతు మిజి మొసెం కిజి ఇనికబా లొసె ఆతాండ్రా? మాపు ఉండ్రె మన్నుదాన్, ఉండ్రె లెకెండె నడిఃవితాపా?

19 మాపు నెగ్గికాప్ ఇజి మీ ఎద్దు తోరిస్తెళ్ ఇక్కెళ్ విజు మీవెట వర్గిజినాప్ ఇజి మీరు ఒడఃబిజినిదెరా? క్రీస్తుజ్ సెందితికిదెర్ ఇజి దేవుణు ఎద్దునె మాపు వర్గిజినాప్. మా తంబెరిజాండె, మీరు మీ మన్నుదు నెగెండె దేవుణు సత్తుదాన్ మండ్రెళ్ ఇజినె యాకెళ్ విజు మాపు కిత్తాప్.

20 నాను వానివలె మీరు నజి ఇస్టమాతికిదెర్ లెకెండె మన్ ఇదెర్సు, మరి మిజి ఇస్టమాతి లెకెండె నానుబా మన్ ఎసు ఇజి నాను తియెలాజిన. మరి మీ నడిఃమి జటిళ్, గోస ఆనికెళ్, కోపం ఆజి మంజినిక, గుంపుజ్ గుంపుజ్ ఆనికెళ్, దుసలాడఃనికెళ్, గునగున వర్గినిక, పొజిజి ఉబె ఆనిక, గగోలి ఆనిక విజు మంజినెను ఇజి నాను ఒడిఃబిజిన.

21 మరి నాను మీ డగ్రు వానివలె మీ ఎద్దు దేవుణు నా బుర్ర డిఃప్పిని లెకెండె కినానెను ఇజి నాను తియెలాజిన. మరి ముజుల వరిజ్ అలవాటు మహిలెకెండె సెఇ పణిజ్ కిజి, కేలార్ బూలాజి, రంకు బూలాజి విజెరె ముందాల సిగు ఆజి మంజిని వందిజ్ మరి వారు దుకమాజి పాపమ్ కు ఒప్పుకోడఃజి డిఃసిసివండ మన్ని వందిజ్ నాను దుకం ఆనాలె ఇజి తియెలాజిన.

### 13

1 ఏలు నాను మీ డగ్రు వానివలె ఇక కూడుఃప్పి మూండ్రె సుట్టు. ఆనె. దేవుణు మాటదు రాస్తామని లెకెండె, “రిఎర్, ముఎర్ సాసిరి మాటెజ వెట విజు సజతిజ్ నిజమాతికెళ్ ఇజి రుజుప్ కిదెళ్ వలె”

2 రుండి సుట్టు నాను వాతిజ్ మీవెట మహివలె నాను మిజి బుద్ధి వెప్పి లెకెండెనె వెప్తా మన. ఏలు మీబాణిజ్ దూరం మంజిబ వెప్పిన. నాను మర్జి వానివలె ముందాహాన్ తపు కిత్తి వరిజ్ బా నాను డిఃసివ, వెనుక తపు కిత్తి విజెరిజ్ ఎయెరిజ్ బా డిఃసివ.

3 ఎందనిజ్ ఇహిజ క్రీస్తు నావెట వర్గిజినాన్ ఇని దనిజ్ రుజుప్ కిఆ ఇజి మీరు వెప్పినిదెర్ గదె? వాండ్రు మీ వెట సత్తు సిల్లికాన్ ఆవన్, గాని మీ నడిఃమి గొప్ప సత్తుమన్నికాన్.

4 క్రీస్తు యా బూమి మున్ను మహివలె సత్తు సిల్లివన్ని లెకెండె సిలువ పోకె ఆతాన్, యాక నిజమ్ నె. గాని దేవుణు సత్తుదాన్ ఏలు బత్తిజినాన్. అయాలెకెండెనె వన్నివెట కూడఃజి మాపుబా సత్తు సిల్లికాప్ గాని దేవుణు సత్తుదాన్ మీ వందిజ్ దేవుణు పణి కిదెళ్ క్రీస్తు వెట కూడఃజి బత్తిజినాప్.

5 మీరు దేవుణు మున్ను నమకం మనికిదెరో ఇజి మిజి మీరె పరిస కిబె ఆదు. యేసుక్రీస్తు మీ లొఇ మనాన్ ఇజి మీరు నెన్ ఇదెరా? యేసుక్రీస్తు మీ లొఇ మనాన్ ఇజి నెన్ ఇదెర్ ఇహిజ, నిజమె మీరు అర్తిమనికిదెర్.

6 మాపు అయా లెకెండె అర్తికాప్ ఆవన్ ఇజి మీరు నిజం నెస్సిదెర్ ఇజి నా మన్నుదు నజి నమకం మనాద్.

7 మీరు ఇని సెఇ పణిజ్ కిఎండ మండ్రెళ్ వలె ఇజి దేవుణుదిజ్ పార్దనం కిజినాప్. మాపు పరిసెజ నిల్ని మంజినికాప్ ఇజి లోకుర్ ఎద్దు తొరె ఆదెజ్ ఇజి సిల్లెద్. గాని మాపు వీజితికాప్ ఇజి తొరె ఆతిజ్ బా మీరు నిజమాతికెళ్ కిజి మండ్రెళ్ ఇజి కోరిజినాప్.

8 నిజమాతికెళ్ నె ఆవిండ, నిజమాతి దనిజ్ పడిఃఎండ ఇనికబా కిదెళ్ మాపు అట్ ఎవ్.

9 మాపు సత్తు సిలికాప్ మనివలె, మీరు సత్తు మనికదెర్ ఇజి మాపు పార్దనం కిజినాప్. అక్కాదె ఆవిండ మీరు దేవుణు ఎద్దు ఇనికబా తకు సిల్లెండ విజు నెగెణ్ మనికిదెర్ ఆదెజ్ ఇజి మాపు పార్దనం కిజినాప్.

10 మిజి దేవుణు మున్ను మని నమకమ్ దు పిరిపైజ్ నె ప్రబు నజి అతికారం సితాన్ గాని మిజి అర్పైజ్ ఇజి సిల్లెద్. అందెజె నాను మీ డగ్రు వానివలె ప్రబు నజి సతిమని అతికారమ్ దాన్ కోపమ్ దాన్ గటిజ ఇనికబా కిఎండ మండ్రెళ్ ఇజినె మీ బాణిజ్ దూరం మంజి యా ఉత్తం రాసిన.

11 కడఃవెరిదు, తంబెరిజాండె, మీరు సర్దదాన్ మండ్రు. మీరు మరి ఒద్దె నెగెణ్ మనికిదెర్ ఆదెజ్ ఇజి దేవుణుదిజ్ సర్ద కిదెజ్ మిజి ఆట్టి లెకెండె విజు సజతిజ్ కిదు. ఓదర్పుదాన్ మండ్రు. మా మాటెజ్ మీ మన్నుదు నాటిసి మండ్రు. విజెరె ఉండ్రె మన్నుదాన్ మండ్రు. సమాదానమ్ దాన్ బత్తిదు. ప్రేమని సమాదనం మనికానాతి దేవుణు మీవెట మంజినాన్.

12 నెగ్గి మన్నుదాన్ ఒరెన్ మరి ఒరెన్ వన్నిజ్ పొంపిజి మాడిఃసి మండ్రు.

13 ఇబ్బెణికార్ నమ్మిత్తికార్ విజెరె మీరు బాగ మనిదెరా ఇజి వెన్ బాజినార్.

14 ప్రబువాతి యేసుక్రీస్తు దయా దర్మం, దేవుణు ప్రేమ, దేవుణు ఆత్మ మీవెట కూడఃజి మంజినిక, మీ విజెరె వెట మనీద్.

## అపొస్తుడు ఆతి పవులు గలాతీయ ముటాదు మని దేవుణు సజమ్కాజ్ రాస్తి ఉత్తం

నెల్వ కిబిసినిక

అపొస్తుడు ఆతి పవులు గలాతీయ ముటాదు మని దేవుణు సజమ్కాజ్ రాసిని ఉత్తరమ్నె యాక. గలాతీయ ముటాదు పవులునె సువార్త వెహ్రాన్. వీరు నెగ్రెండనె క్రీస్తుజ్ నమ్మిజి వాజి మహార్. నస్తివలె సెగొండార్ నమ్మితి యూదురు, క్రీస్తు ముస్సు మని నమకమ్నె ఆవిండ, యూదురి రూలుజ్ లోజిజి, సునతిబా కిబె ఆదెజ్ వలె ఇజి తప్ప బోద వరిజ్ వెహ్రార్. యా మాట వెహరె, విరి మన్ను అయా బోద దరోట్ మహ్రార్. దినిజ్ దిదిజి పవులు రాసిని ఉత్తరమ్నె యాక. ఒరెన్ సునతి కిబె ఆతిజి, దేవుణు ఎద్దు నీతి నిజాయితి మనికాన్ ఆవెన్. గాని యేసుప్రబు ముస్సు నమకం ఇట్టిజనె దేవుణు ఎద్దు నీతి నిజాయితి మనికాన్ ఆనాన్ ఇజి వెహ్సినాన్. మరి, మాటు క్రీస్తుజ్ నమ్మితివలె డిబె ఆతి మని వరి లెకెండె మనాట్, అక్కు మని వరి లెకెండె మనాట్. రూలుజి అడిగి మన్ఎట్ ఇజి వెహ్సినాన్. మరి, ఒడోల్ది సెఇ ఆసెజ్ కిబిస్సి పణిజ్ ఇని ఇనికెజ్, దేవుణు అత్తు నడిః పిసిని వజి నడిఃనికాన్ ఎలాగ మంజినాన్ ఇజి బా వెహ్సినాన్.

1-2 అపొస్తుడు ఆతి పవులు ఇని నాను, గలాతీయ ముటాదు మని దేవుణు సజమ్కాజ్ రాసిని ఉత్తం. సెగొండార్ నజి అపొస్తుడు ఇజి ఏర్పాటు కిత్తిజ్ నాను అపొస్తుడు ఆవిత. ఒరెన్ లోకు నజి అపొస్తుడు ఇజి పోక్తిజ్ నాను అపొస్తుడు ఆవిత. గాని యేసు క్రీస్తుని బుబ్బాతి దేవుణు నజి అపొస్తుడు ఇజి ఏర్పాటు కిత్తి పోక్తిజ్నె నాను అపొస్తుడు ఆత. వాండ్రె యేసుక్రీస్తుజ్ సావుదాన్ మర్జి బత్తిస్తాన్. నానుని నా వెట ఇబ్బె మని దేవుణుదిజ్ నమ్మితి తంబెరిజు, అబ్బె మని సజమ్కాణి విజెరిజ్ వెన్బాతి లెకెండె వెహ్సినార్.

3 మా బుబ్బు ఆతి దేవుణుని ప్రబు ఆతి యేసుక్రీస్తు దయ దర్మమ్దాన్, మీరు నిపాతిదాన్ మండ్రెజ్ సాయం కిపిర్.

4 మాటు కిత్తి తప్పు పణిజ్ మజి తప్తిస్తెజ్, యా లోకమ్దు మని సెఇ బాణిజ్ డిఃస్సిస్తెజ్ క్రీస్తు మా పాపమ్క వందిజ్ వన్నిజ్ వాండ్రె ఒవజెపె ఆతండ్రె సాతాన్. మా బుబ్బు ఆతి దేవుణు ఎత్తు కిత్తి వజనె వాండ్రు యా లెకెండె మా వందిజ్ సాతాన్.

5 దేవుణుదిజ్ అంతు సిల్లెండ ఎలాకాలం గవరం మనీద్. ఆమెన్.

సువార్త ఉండ్రె. మరి ఉండ్రె సిల్లెద్.

6 నిజమాతి సువార్త నమ్మితి వెనుక నిసా బేగి మీరు దేవుణుదిజ్ డిఃసి సీజనిదెర్ ఇజి నాను నండో బమ్మ ఆజిన. క్రీస్తు దయ దర్మమ్దాన్ మిజి సీజని కొత్త బత్తుదిజ్నె, దేవుణు మిజి కూక్తాన్. వన్నిజ్ డిఃస్తిదెరె, సువార్త ఇజి పేరు వెహె ఆజిని తప్ప బోదదు మన్ను ఇడఃజినిదెర్ ఇజి నాను నండో బమ్మ ఆజిన.

7 నాను నిజం వెహ్సిన, అయాక క్రీస్తు వందిజ్ తోరిసి నెస్సిసిని సువార్త ఆవద్. గాని సెగొండార్ మిజి పంర్ర కిబిసి, అయా సువార్త మారిస్తెజ్ సుడఃజినార్.

8 గాని అపొస్తురు ఆతి మాపునో, పరలోకమ్దాన్ వాతి దేవుణు దూతనో మరి ఎయెన్ ఆతిజ్బ, మాపు ముజాలె మిజి వెహ్సె సువార్త ఆవిండ, దినిజ్ వెత్రెకం ఆతి సువార్త మిజి వెహ్సెజు, దేవుణు సాయిపు వన్ని ముస్సు ఎలాకాలం మనీద్.

9 మాపు ముజాలె మిజి వెహ్సె లెకెండె, ఏలు నాను మరి ఉండ్రె సుటుబా వెహ్సె న. మా బాణిజ్ మీరు వెంజి, నమ్మితి సువార్త ఆవిండ, దినిజ్ వెత్రెకం ఆతి సువార్త మిజి ఎయెన్బా వెహ్సెజు, దేవుణు సాయిపు వన్ని ముస్సు మనీద్.

10 నాను యా లెకెండె వెహ్సె లోకుర్ బాణిజ్ మెపు కోరిజినానా? దేవుణు బాణిజ్ మెపు కోరిజినానా? లోకురిజ్ సర్ద కిదెజ్ సుడఃజినానా? లోకురిజ్ సర్ద కిబిస్తెజ్ నాను సుడఃజిని మహిజు, నాను క్రీస్తుజ్ సేవ కినికాన్ ఆవిండ మన.

దేవుణునె పవులుజ్ అపొస్తుడు ఇజి కూక్తాన్.

11 తంబెరిజాండె, నాను మిజి వెహ్సె సువార్త లోకు బాణిజ్ వాతిక ఆవద్ ఇజి నాను మిజి వెహ్సెన.

12 అయాక లోకు బాణిజ్ నజి దోహక్తిక ఆవద్. ఎయెన్బా నజి నెన్పిస్తిక ఆవద్. గాని యేసు క్రీస్తునె యా సువార్త నజి తోరిసి నెన్పిస్తాన్.

13 ఒరెన్ యూద వాండ్రు కిజిని లెకెండ్ యూదురి మతమ్ది రూలుజ్ విజు లోజిజి పటుదలదాన్ అయాకెజ్ కిజి నాను ఎలాగ బత్తిజి మహా ఇజి మీరు వెహి మనిదెర్. అయాలెకెండ్ దేవుణు సజమ్కాజ్ కనికారం సిల్లెండ నాను ఎసొనొ హిమ్మెజ్ కిజి, వరిజ్ నాసనం కిదెజ్ సుడఃత ఇజి మీరు వెహి మనిదెర్.

14 నా జతదు మని మహి యూదురిజ్ ఇంక యూద మతమ్ది రూలుజ్ విజు నాను తప్ఎండ కిత. నా అనిసిర్ నెస్పిస్తి ఆసారమ్కు పటుదలదాన్ కిదెజ్ నండొ సుడఃత.

15-16 గాని నాను నా యూదు పొటాదు పిండెం ఆతి మహివలె, దేవుణు నజి వన్ని వందిజ్ ఎర్లిస్తాన్. వన్ని దయ దర్మదాన్ వన్నిజ్ సేవ కిదెజ్ నజి ఏర్పాటు కిత్తాన్. నాను యూదురు ఆఇ వరి నడిఃమి యేసు వందిజ్ సువార్త వెహి వందిజ్ వన్ని మరిసిజ్ నజి తోరిసి నెస్పిస్తెజ్ ఇజి వాండ్రు తిర్మామానం కిత్తాన్. ఆహె తిరర్మానం కిత్తివలె నాను ఎయె వెటబా ఆలోసనం వెన్బావత.

17 నాను అపొస్తుడు ఆని ముజాల అపొస్తుడు ఆతి వరిజ్ సుడఃదెజ్ యెరూసలెమ్దుబ సొన్వత. గాని వెటనె నాను అరెబియ ముటుదు సొహ. వెనుక నాను దమస్కు పట్టుమ్దు మర్జి వాత.

18 దేవుణు వన్ని మరిసిజ్ నజి తోరిసి, మూండ్రీ పంటెజ్ వెనుక, కేపా ఇజి కూకె ఆని పేతురు వెట నెల్వ ఆదెజ్ యెరూసలెమ్దు సొహ. అబ్బె వన్ని వెట రుండి వారమ్కు మహ.

19 మరి, ప్రబుజ్ ఎయెరిజ్బ సుడఃవత. ప్రబుజ్ తంబెరి ఆతి యాకోబుజ్నె సుడఃత.

20 నాను రాసినికెజ్ నిజమ్నె. అబద్దం ఆఱ. దిన్ని వందిజ్ దేవుణు నెసినాన్.

21 పేతురు వెట యెరూసలెమ్దు మహి వెనుక నాను సిరియ, కిలికియ ఇని ముటెజి సొహ.

22 నస్తివలె యూదయ ప్రాంతమ్దు మని దేవుణు సజమ్కాణికార్ నజి తోఎండ మహార్.

23 గాని మహికార్ నా వందిజ్ వెహి మనికెజ్నె వెహ మనార్. “మజి ముజాలె హిమ్మెజ్ కిజి మహికాన్, ఉండ్రీ కాలమ్దు వాండ్రు నాసనం కిదెజ్ సుడఃతి మని సువార్త ఏలు వెహినాన్”, ఇజి వెహి మనికెజ్నె వెహ మనార్.

24 అందెజె నా వందిజ్ వారు దేవుణుదిజ్ పొగిడితార్.

## 2

మహి అపొస్తురు వరి జతదు పవులుజ్ కుడుఃప్పినార్.

1 పతినాల్లి పంటెజ్ గడఃప్పి వెనుక, నాను యెరూసలెమ్దు మరి సొహ. బర్బుబ నా వెట వాతాన్. తితుజ్బా మాపు వెట కూక్ బతాప్.

2 నాను సొండ్రెజ్ వలె ఇజి దేవుణు నజి తోరిసి వెహిజ్నె నాను సొహ. అబ్బె పల్కుబడిః మని పెద్దలిజి కూడుప్తానె, యూదురు ఆఇ వరిజ్ నాను వెహిని సువార్త ఇనిక ఇజి వరిజ్ వెహి. ఎందన్నిజ్ ఇహిజ నాను వెహినికెజ్ నిజం ఇజి వారు నెసిమండ్రెజ్. సిల్లిజి నాను ఏలు కిజిని సువార్త పణి, పణిదిజ్ రెవిండ ఆనాద్. యాలెకెండ్ వర్దిదెజ్ పల్కుబడిః మని పెద్దెల్జనె కుడుఃప్. మరి ఎయెరిజ్బ కూడుఃవత.

3 నా వెట వాతి తీతు యూద వాండ్రు ఆఎన్. వాండ్రు గ్రీకు వాండ్రు. అందెజె వాండ్రు సునతి కిబె ఆఇకాన్. అహిజ్బా, వాండ్రు సునతి కిబె ఆదెజ్వలె ఇజి వారు కసితం వెహెవతార్.

4 గాని నమ్మితికాప్ ఇజి వెహె ఆని సెగొండార్ తీతు సునతి కిబె ఆదెజ్ వలె ఇజి వెహి. వీరు గుట్టు నెస్తిజ్ ఇజి మా నడిఃమి డుగితారె, క్రీస్తుయేసు వెట కూడిఃతి మని దన్నిదటాన్ మజి వాతి విడుఃదలదిజ్ సుడఃతార్. మాటు యూదురి రూలుజ్ లోజిదెజ్ వలె ఇజి వెహివతార్.

5 వారు వెహిదన్నిజ్ సణెంబా లోజివతాప్. ఎందనిజ్ ఇహిజ నిజమాతి సువార్త మీ నడిఃమి నిల్ని మండ్రెజ్ ఇజి కోరితాప్.

6 గాని పల్కుబడిః మని పెద్దెల్జు, నాను వెహిని సువార్త మారిస్సెజ్ ఇజినొ, కండెక్బా దనివెట కుడుఃప్తెజ్ ఇజినొ వెహెవతార్. నజి వారు పలుకు బడిః మనికార్ ఆతిజ్బ ఆఇతిజ్బ నాను లెక్క కివత. దేవుణు ఇజ్రికార్ పెరికార్ ఇజి తెడః తోఎన్.

7 గాని యూదురిజ్ సువార్త వెహిజ్ దేవుణు పేతురుజ్ ఒపజెప్పి వజ, యూదురు ఆఇ వరిజ్ సువార్త వెహిజ్ నజి ఒపజెప్ప మనాన్ ఇజి వారు నెస్టార్.

8 ఇహిజ యూదురు నడిఃమి అపొస్తుడు ఆఇ సేవ కిదెజ్ పేతురుజ్ సత్తు సితి దేవుణునె యూదురు ఆఇవరి నడిఃమి అపొస్తుడు ఆఇ సేవ కిదెజ్ నజి సత్తు సితాన్.

9 నిటకొహి లెకెండ్ మని పెరి పెద్దెల్జు ఆతి యాకోబు, పేతురు, యోహాను ఇనికార్ దేవుణు నజి యా పెరి పణి ఒపజెప్ప మనాన్ ఇజి నెస్తివలె బర్బుబెజ్ని నజి వరి వెట జత కూడఃజి పణి కినికార్ ఇజి ఉండ్రీ గుర్తు లెకెండ్ మా కికు వరి వెట కలప్తార్. మాపు యూదురు ఆఇ వరి నడిఃమి సువార్త వెహిజ్ ఇజి వారు యూదురు నడిఃమి సువార్త వెహిజ్ ఒప్పుకోటార్.

10 వరి నడిమి యెరూసలేమ్దు మని బీద వారు ఆతి నమ్మితి యూదురిజ్ మాపు సాయం కిదెజ్ ఇజినె వారు మా బాణిజ్ కోరితార్. నాను కిదెజ్ ఇజి నండో ఆస ఆతికాదె అయా సజతి.

**పవులు పేతురుజ్ జటిజ్ ఆజినాన్.**

11 కేపా ఇని పేతురు అంతియొకయ ఇని పట్టుమ్దు వాతివలె, ఎద్రునె నాను వన్నిజ్ జటిజ్ ఆత. ఎందనిజ్ ఇహిజ వాండ్రు కిత్తి పణి తపు.

12 యాకోబు వెట కూడితి మని సెగొండార్ నమ్మితి యూదురుజు అబ్బె వాని ముజాల వాండ్రు యూదురు ఆఇ నమ్మితి వరి వెట కూడిజి బోజనం కిజి మహాన్. గాని వారు వాతిజ్, వీండ్రు యూదురు ఆఇ నమ్మితి వరివెట బోజనం కిఎండ వరి బాణిజ్ దూరం ఆతాన్. వాండ్రు యా లెకెండ కిత్తాన్. ఎందనిజ్ ఇహిజ మోసే సీతి రూలుజ్ లోజిదెజ్వలె ఇజి డట్టం వెప్పిమహి యూదురి గుంపుదిజ్ తియెల్ ఆతాన్.

13 అంతియొకయదు మని మహి నమ్మితి యూదురు పేతురు వెట వాండ్రు ఆతి వేనమ్దు కూడితార్. వారు కిత్తిక సుడేజి, బర్నబ మొసెం ఆతండ్రె, వారు కిత్తి లెకెండ వాండ్రుబా కిత్తాన్.

14 నిజమాతి సువార్తదు వెప్తి వజ వారు నడిగక సుడేతానె, అబ్బె మని నమ్మితి విజెరె ఎద్రు పేతురుజ్ జటిజ్ ఆత. నాను ఈహు వన్నిజ్ వెప్తా, “ఓ పేతురు, నీను యూద వాండ్రు ఆజిబా, వరి లెకెండ బత్తి. యూదురు ఆఇవరి లెకెండ బత్తిజిని. మరి యూదురు ఆఇకార్ యూదురు లెకెండ మండ్రెజ్ వలె ఇజి ఎలాగ నీను డటం వెప్తాజ్ అట్సినీ”.

15 నాను మరి వరి విజెరిజ్ వెప్పిన. మాటు యూదురు జాతిదు పుట్టికాట్. దేవుణు రూలుజ్ నెన్ఇకాట్ ఆవెట్.

16 గాని దేవుణు మోసెజ్ సీతి రూలుజ్ లోజిజి ఒరెన్ దేవుణు ఎద్రు నీతి నిజాయితి మనికాన్ ఆవెన్. గాని యేసుక్రీస్తు ముస్కు నమకం ఇట్టిజనె నీతి నిజాయితి మనికాన్ ఆనాన్ ఇజి నెస్త మనాట్. అందెజె యూదురు ఆఇకార్నె ఆవండ, మాటుబా క్రీస్తు యేసుజ్ నమ్మితాట్. రూలుజ్ లోజిజి దేవుణు ఎద్రు నీతి నిజాయితి మనికాట్ ఆవండ, క్రీస్తుజ్ నమ్మిజినె దేవుణు ఎద్రు నీతి నిజాయితి మనికాట్ ఆని వందిజె మాటు క్రీస్తు యేసుజ్ నమ్మితాట్. ఎందనిజ్ ఇహిజ, రూలుజ్ లోజిజి ఎయెన్బా దేవుణు ఎద్రు నీతి నిజాయితి మనికాన్ ఆవెన్ ఇ జి మాటు నెసినాట్.

17 క్రీస్తు యేసు వెట కూడితి మని దనితాన్ మాటు దేవుణు ఎద్రు నీతి నిజాయితి మనికాట్ ఆదెజ్ కోరినాట్. గాని మాటు యా లెకెండ ఆదెజ్ సూణివలె, యూదురు ఆఇవరి లెకెండ పాపమ్దు మనాట్. అయావలె క్రీస్తునా మజి తపు కిబిసినికాన్? ఆవెన్.

18 రూలుజ్ లోజిజి ఒరెన్ దేవుణు ఎద్రు నీతి నిజాయితి మనికాన్ ఆవెన్ ఇజి నాను ముజలె తొరిస్త. నాను నెక్తిపొక్తి దన్ని దరోట్ మరి మప్తిజ రూలుజ్ తప్పి వన్ని లెకెండ నాను మన్న ఇజి రుజుప్ కిజిన.

19 యూదురి రూలుజ్ లోజిజి మహివలె, అయాకెజ్ కిజి, దేవుణు ఎద్రు నీతి నిజాయితి మనికాన్ ఆదెజ్ అట్వెన్ ఇజి నాను నెస్త. అందెజె దేవుణు వందిజ్ బత్తిదెజ్ యూదురి రూలుజ్ బాణిజ్ డిఃబె ఆత.

20 నాను క్రీస్తు వెట సిలువాదు కుటిజాణిజ్ డెయె ఆతి లెకెండ మన. నాను బత్తిజి మహి లెకెండ మరి బత్తి. క్రీస్తునె నా మన్నుదు బత్తిజినాన్. ఏలు నాను ఆవె నా ముస్కు అతికారం కిజినాన్. గాని క్రీస్తు నా లోక మంజి నా ముస్కు అతికారం కిజినాన్. నాను యా లోకమ్దు బత్తిజిని బత్తు దేవుణు మరిసిజ్ నమ్మిజి బత్తిజిన. వాండ్రు నజి ప్రేమిసి నా వందిజ్ వన్ని పాణం సితాన్.

21 దేవుణు దయ దర్మం నాను నెక్తి పొక్వె. యూదురి రూలుజ్ లోజిజి ఒరెన్ నీతి నిజాయితి మనికాన్ ఆనాన్ ఇహిజ క్రీస్తు సాతి సావు అనవసరమెనె.

### 3

**యూదురి రూలుజ్నా క్రీస్తు ముస్కు మని నమకమ్నా నిజమాతిక?**

1 గలాతియ ముటాదు మని దేవుణుదిజ్ నమ్మితికిదెరా, ఎందనిజ్ మీరు బుద్ధి సీలివరి లెకెండ మనిదెర్? ఎయెర్ మిజి మొసెం కిత్తార్? యేసు క్రీస్తు మీ వందిజ్ సిలువాదు సాతిదని వందిజ్ నాను మీ కణకెజ్ నిండ్రు తోరిసి వెప్తా మన గదె?

2 “యూదురి రూలుజ్ లోజిజినిజ్ దేవుణు ఆత్మ మిజి దోహక్త మనాదా? మాపు మిజి వెప్తి సువార్త వెంజి నమ్మిత్తిజ్ గదె మిజి దోహక్త మనాద?”. యా ఉండ్రె సజతినె వెప్తు.

3 మీరు నిసా బుద్ధి సీలికిదెరా? మీరు మీ కొత్త బత్తు మొదొల్సివలె దేవుణు ఆత్మ సత్తుదాన్ మొదొల్సిదెర్. మరి ఏలు మీ సొంత సత్తుదాన్ మీ బత్తు పూర్తి కిదెజ్ సుడేజినిదెరా?

4 మీరు దేవుణుదిజ్ నమ్మితి వెనుక, నండో ఒరిసిదెర్. మీరు ఒరిసికెజ్ పణిదిజ్ రెకెజ్ ఆతెనా? మిజి జరిగితికెజ్ పణిదిజ్ రెండ ఆఉతె ఇజి నాను ఆస ఆజిన.

5 అందెజె దేవుణు ఆత్మ మిజి నండో సీజి గొప్ప సత్తు మని పెరి పణిజ్ మీ నడిమి కిజినిక, మీరు మోసె సీతి రూలుజ్ లోజిజినిజ్నా? ఆఎద్. గాని మీరు సువార్త వెంజి నమ్మిజినిజ్నె వాండ్రు మిజి వన్ని ఆత్మ సీజిన్.

6 అబ్రాహము వందిజ్ దేవుణు మాటదు రాస్తి మనిక నెస్టు, “వాండ్రు దేవుణుదిజ్ నమ్మితాన్. అందెజె దేవుణు వన్నిజ్ సీతి నిజాయితి మనికాన్ ఇజి ఒప్పుకొటాన్”, ఇజి రాస్త మనాద్.

7 అందెజె దేవుణు ముస్సు నమకం ఇట్టికారె, నిజమాతి అబ్రాహము కొడోర్ ఇజి నెస్టు.

8 సీన దినమ్కాజ్ ముజాలె దేవుణు మాటదు రాస్తమనాద్, యూదురు ఆఇకార్ దేవుణు ముస్సు నమకం ఇట్టిజ, వాండ్రు వరిజ్ సీతి నిజాయితి మనికార్ ఇజి డగ్రు కినాన్. వాండ్రు అబ్రాహముజ్, “లోకమ్ది లోకుర్ విజెరెజ్ నీ వెట నాను దీవిస్సు”, ఇజి అయాక జర్గిణ ముజాలె సువార్త వెప్టోన్.

9 అందెజె దేవుణు ముస్సు నమకం ఇట్టి విజెరిజ్ అబ్రాహము వెట కూడుఃప్పి దీవిసినాన్.

10 దేవుణు మోసెజ్ సీతి రూలుజ్ లోజిజి వన్ని ఎద్దు సీతి నిజాయితి మనికార్ ఆదెజ్ సుడేజిని విజెరె, దేవుణు సీతి సాయిపు అడిగి మంజినార్. ఎందనిజ్ ఇహిజ, దేవుణు మాటదు రాస్త మనాద్, “మోసె రాస్తి పుస్తకమ్కాజ్ మని రూలుజ్ విజు ఎస్తివలెబా కిఇ ఎయెన్బా దేవుణు సీతి సాయిపు అడిగి మంజినాన్”,

11 గాని నిజమె, ఒరెన్ విజు రూలుజ్ లోజితిజ్బా దేవుణు ఎద్దు సీతి నిజాయితి మనికాన్ ఆఎన్. ఎందనిజ్ ఇహిజ, “ఎయెజ్ సీతి నిజాయితి మనికాన్ ఇజి నాను ఇట్టమననో వాండ్రు నా ముస్సు నమ్మకం ఇట్టి వందిజ్ ఎలా కాలం బత్తినాన్”, ఇజి దేవుణు వెప్టామనాన్ ఇజి దేవుణు మాటదు మనాద్.

12 గాని దేవుణు సీతి రూలుజు లోఇ అయాలెకెండె ఆవిద్. ఎందనిజ్ ఇహిజ నమ్మకం మండ్రెజ్ వలె ఇజి రూలుజ్ వెహొఉ. దేవుణు మాటదు వెప్టాక ఇనిక ఇహిజ, ‘రూలుజ్ నడిపిసిని వజ బత్తిదెజ్ కోరిజినికాన్ అయాకెజ్ ఎస్తివలెబ లోజిదెజ్ వలె’,

13 మోసె సీతి విజు రూలుజ్ లోజిఇ వరి ముస్సు వాజిని సయిపుదాన్ క్రీస్తు మజి డిసేపిస్తాన్. ఎందనిజ్ ఇహిజ దేవుణు మాటదు రాస్త మనాద్, “కొహిదు డెల్పె ఆజి సాని ఎయెన్బా దేవుణు సాయిపు మనికాండ్రె”.

14 క్రీస్తు యా లెకెండె ఆతండ్రె మజి డిసేపిస్తాన్. ఎందనిజ్ ఇహిజ, దేవుణు అబ్రాహముజ్ ఒట్టు కిత్తి దీవెనమ్కు యూదురు ఆఇ వరిజ్ క్రీస్తు యేసు వెట దోహొకె. మరి క్రీస్తు ముస్సు మజి మని నమ్మకమ్దాన్, దేవుణు సీన ఇజి ఒట్టు కిత్తి వన్ని ఆత్మ మజి దోహొక్కి వందిజ్ క్రీస్తు యా లెకెండె సాయిపు మొపె ఆతండ్రె మజి సాయిపుదాన్ డిసేపిస్తాన్.

15 తంబెరిజాండె, మాటు రోజు బత్తిజిని బత్తుదాన్ ఉండ్రె మాట లాగ్గి వెహ్నా. రిఎర్ ఉండ్రె సజతి వందిజ్ ఉండ్రె ఆజి ఉండ్రె ఒపుమానం కిత్తి మహిజ, ఎయెన్బా అయాక తప్తెజ్నో, దనివెట ఇనికబా కుడుప్పెజ్నో అక్కు సిల్లెద్. అయాలెకెండె, దేవుణు మా వెట కిత్తి యా ఒపుమానమ్బా నిల్పి మంజినాద్.

16 దేవుణు అబ్రాహము వెట, మరి వన్ని తెగ్గదు పుట్టి వన్నివెట ఒట్టుజ్ కిత్తాన్. ‘తెగ్గదు పుట్టి వరిజ్ ఇహిజ నండో లోకురిజ్’, ఇజి దేవుణు మాటదు వెహొఎద్. గాని ‘నీ తెగ్గదు పుట్టి వన్నిజ్’ ఇజి వెహ్సినాద్. ఇహిజ అయాక ఒరెన్ వనిజ్నె. వాండ్రె క్రీస్తు.

17 నాను వెహ్సి వాజినిక ఇనిక ఇహిజ, దేవుణు ముజాలె అబ్రాహము వెట ఒట్టు కిత్తాండ్రె అయాక కిదెజ్ ఇజి తీర్కానం కిత ఇట్టాన్. అందెజె నాల్లి వందెజ్ ముసాయ్ (430) పంటిజ్ వెనుక దేవుణు మోసెజ్ సీతి రూలుజ్ అబ్రాహము వెట కిత్తి ఒపుమానమ్దిజ్ తప్తిసి నస్తివలె కిత్తి తిరుమానమ్దిజ్ సిల్లెండె కిదెజ్ అట్ఉ.

18 దేవుణు సీన ఇజి ఒట్టు కిత్తి అక్కు, మాటు రూలుజు లోజితిజునె దోహొక్కాద్. ఇహిజ వాండ్రు కిత్తి ఒట్టుదాన్ మజి అయా అక్కు దోహొక్ఎద్. గాని దేవుణు అబ్రాహముజ్ సీన ఇజి ఒట్టు కిత్తిజ్ వాండ్రు వన్ని దయా దర్మమ్దాన్ సీతాన్.

19 అందెజె మరి ఎందనిజ్ దేవుణు మోసె వెట రూలుజ్ సీతాన్? ఎందనిజ్ ఇహిజ తపుజ్ ఇని ఇనికెజ్ ఇజి తోరిస్తెజె రూలుజ్ సీతాన్. యా రూలుజ్ అబ్రాహము తెగ్గదు పుట్టికాన్ వానిదాక లోకురిజ్ నడిపిస్తెజె సీతాన్. ఒట్టుదు ఎయె వందిజ్ వెప్టా మనానో వాండ్రె వీండ్రు. దేవుణు వన్ని దూతెజ్ వెట మోసెజ్ రూలుజ్ సీతాన్. మోసె అయాక లోకురిజ్ సీతాన్. మోసెనె, దేవుణు లోకుర్ నడిమి ఒపిసిని వన్ని లెకెండె నిహ మనాన్.

20 రిఎర్ నడిమి నిల్పికాండ్రె ఒరెన్ ఒపిస్నికాన్. గాని ఒపిస్నికాన్ సిల్లెండెనె దేవుణు అబ్రాహముజ్ ఒట్టు కిత్తాన్. ఎందనిజ్ ఇహిజ ఒరెండ్రె ఒట్టు కిత్తాన్ వాండ్రె దేవుణు.

21 అహిజ, దేవుణు అబ్రాహముజ్ ఒట్టు కిత్తి వెనుక, మోసెజ్ రూలుజ్ సీతివలె వాండ్రు కిత్తి ఒట్టుదిజ్ వెత్రెకమ్దికెజ్నె రూలుజ్? సిల్లె ఆహె ఆవిద్. రూలుజ్ లోకురిజ్ ఎల్లకాలం బత్తిదెజ్ బత్తిని బత్తు సీదెజ్ అట్సి ఇహిజ, యా రూలుజ్ లోజిజి దేవుణు ఎద్దు సీతి నిజాయితి మనికార్ ఆతార్ మరి.

22 గాని దేవుణు మాట వెప్పినాద్, యా లోకమ్దు మని లోకుర్ విజెరె తొహ ఆతి వరిలెకెండ పాపం అడిఃగి మనార్ ఇజి. అందెజె దేవుణు ఒట్టు కిత్తికెజ్ దోహ్కెజ్ ఇహిజ యేసుక్రీస్తు మున్కు నమ్మకం ఇడ్దెజ్. నమ్మకం ఇట్టిజనె దోహ్కె.

23 క్రీస్తు రెఎండ మహి ముజాల, యా నమకం రెఎండ మహాద్. నస్తవలె మోసె సితీ రూలుజ్, ఒరెన్ జమాను కాప్ కిని లెకెండ, యూదురు ఆతి మజీ తొహ్ని ఇడఃజి కాప్ కిజి మహా. ఇహిజ యా రూలుజ్నె మా మున్కు అతికారం కిజి మహా. యాక, లోకుర్ క్రీస్తుజ్ నమ్మిడెజ్ ఆనాద్ ఇజి దేవుణు తొరిసిని కాలమ్దాన్నె మహాద్.

24 అందెజె క్రీస్తు రెఎండ మహివలె, యా యూదురి రూలుజ్నె, మజీ సుడఃజి నడిఃపిసితె. ఎందనిజ్ ఇహిజ, క్రీస్తు వాతి వెనుక వన్నిజ్ నమ్మిజి దేవుణు ఎద్రు నీతి నీజాయితి ఆదెజ్ ఇజి వెహ్హాన్.

25 గాని ఏలు క్రీస్తుజ్ నమ్మిడెజ్ అట్టాట్. అందెజె రూలుజ్ మా మున్కు అతికారం కిడెజె అట్టె.

### దేవుణు కొడోర్

26 క్రీస్తు యేసు మున్కు నమకం ఇట్టిదెర్. అందెజె మీరు విజెరె దేవుణు కొడోర్.

27 మీ లోక మని బాప్తీసం లాగె అతికార్ విజెరె క్రీస్తు వెట కూడిఃతి మనిదెర్. అందెజె క్రీస్తు గుణమ్కు మిజిబా మంజినె.

28 అందెజె యూదురు ఇజినో, యూదురు ఆఇకార్ ఇజినో, వెట్టిపణి కినికార్ ఇజినో, కిఇకార్ ఇజినో, మొకకొడోః ఇజినో, అయ్లికొడోః ఇజినో ఆవద్ ముకెలం మీరు విజెరె ఉండ్రె లోకుర్. ఎందనిజ్ ఇహిజ, మీరు క్రీస్తు యేసు వెట కూడిఃతి మనిదెర్.

29 మీరు క్రీస్తు వెట కూడిఃతి మనికిదెర్ ఇహిజ, అబ్రాహము తెగ్గుదు పుట్టికిదెర్. ఎందనిజ్ ఇహిజ క్రీస్తు అబ్రాహము తెగ్గుదు పుట్టికాన్. మీరు దేవుణు అబ్రాహము వెట ఒట్టు కిత్తి దన్నిజ్ అక్కు మనికిదెర్.

## 4

1 నాను వెప్పినిక ఇనిక ఇహిజ, ఒరెన్ వన్ని ఆస్తిదిజ్ అక్కు మనికాన్ వన్ని కొడోఃనె. గాని అయా కొడోః ఇజ్రికాన్ మనివలె, వాండ్రు ఒరెన్ వెట్టిపణి కినివన్ని లెకెండ ఇనిదని మున్కుబా అతికారం సిల్లెండ మనాన్. అయా కొడోః అప్పొసి ఆస్తిదిజ్ అక్కు మనికాన్ ఆతిజ్బా ఇనిదని మున్కు అతికారం సిల్లెండ మనాన్.

2 వన్ని అప్పొసి ఎత్తుకిత్తి వయుసు వానిదాక, వాండ్రు వన్నిజ్ కోప కినివరి అడిఃగి, వన్ని ఆస్తి సూణి పణి మణిసిర్ అడిఃగి మంజినాన్.

3 అయాలెకెండె మాటుబా క్రీస్తు యా లోకమ్దు వాని ముజాల, మాటుబా యా లోకమ్ది అలవాటుజ అడిఃగి మహాట్.

4 గాని దేవుణు ఎత్తుకిత్తి తగితి నమయం వాతివలె వాండ్రు వన్ని మరిసిజ్ పోక్తాన్. వాండ్రు ఉండ్రె బోదెలి పొటా లోకహాన్ పుట్టాన్. వాండ్రు యూదురి రూలుజ్ విజు లోజిజి బత్తితాన్.

5 యూదురి రూలుజ్ లోజిజి దని అడిఃగి మహి మజీ, దని బాణిజ్ డిః డిఃన్పిన్ని వందిజ్, దేవుణు వన్ని మరిసిజ్ పోక్తాన్. ఎందనిజ్ ఇహిజ మాటు పూర్తి అక్కు మని దేవుణు కొడోర్ ఆదెజ్ ఇజి,

6 మీరుని మాపు వన్ని కొడోర్. అందెజె దేవుణు వన్ని మరిసి ఆత్మదిజ్ మా మున్కుదు మండ్రెజ్ ఇజి పోక్తాన్. యా ఆత్మనె మా లోకహాన్ 'ఓబా', ఇజి కూక్కి మజి పార్దనం కిబినినాన్.

7 అందెజె ఏలుదాన్ మీరు ఒరెన్ ఒరెన్ వెటి పణికిని వన్నిలెకెండ ఆఇదెర్. గాని మీరు ఒరెన్ ఒరెన్ దేవుణు కొడోః ఆతి మనిదెర్. అందెజె మీరు వన్ని మరిసిరిర్ సీన ఇజి వాండ్రు ఒట్టు కిత్తి దన్నిజ్ విజు అక్కు మనికిదెర్.

8 ఉండ్రె కాలమ్దు దేవుణుదిజ్ నెన్ఇ ముజాల నిజం ఆఇ దేవుణుక అడిఃగి మహిదెర్.

9 గాని ఏలు మీరు దేవుణుదిజ్ నెస్తి మనిదెర్. మరి ఒదె వాండ్రు మిజి నెస్త మనాన్. మరి ఎందనిజ్ మీరు సత్తు సీలి పణిదిజ్ రెఇ దెయమ్క దరోట్ మర్జినిదెర్. మరిబ దన్ని అడిఃగి మండ్రెజ్ కోరిజినిదెరా?

10 మీరు నెగ్గి దినమ్కు ఇజి నెగ్గి నెలెజ్ ఇజి సర్ద ఆని కాలమ్కు ఇజి నెగ్గి ఏంటుజ్ ఇజి సూణిదెర్.

11 మీరు కిజిని వన్కాజ్ నాను నెసి, మీ వందిజ్ బాద ఆజిన. నాను మీ నడిఃమి కన్ఠబడిఃజి కిత్తి సేవ పణి, పణిదిజ్ రెఎండ ఆనాద్ ఇజి బాద ఆజిన.

12 అందెజె తంబెరిజాండె, నాను మిజి బతిమాల్లిన. మీరు నజి పొలిజి మండ్రు. ఎందనిజ్ ఇహిజ మోసె సితీ రూలుజు బాణిజ్ డిఃబె ఆతి యూదురు ఆఇ మీలెకెండె ఆతమన నాను. మీరు ఎస్తివలెబా నజి నెగ్గెండ సుడఃతి మనిదెర్.

13 నాను మిజి సువార్త తొలిత వెప్తివలె నాను ఎలాగ మహా ఇజి మీరు నెస్తిదెర్. నాను నెగెండ సిల్లెండ కన్ఠం ఆర్తమహా.

14 నాను కన్ఠం అర్తివలె మీరు నండో బాద ఆతిదెర్. గాని మీరు నజి ఇజ్రి కణకదాన్ తొఇదెర్. నజి నెక్కి పోకెతిదెర్. అహిజ దేవుణు పోక్తి ఒరెన్ దూత లెకెండ మీరు నజి డగ్రు కిత్తిదెర్. క్రీస్తుయేసుజ్ డగ్రు కిని లెకెండ నజి డగ్రు కిత్తిదెర్.

15 అయావలె మీరు గొప్ప సర్దదాన్ మహిదెర్. ఏలు మీ సర్ద విజు ఇనిక ఆతాద్? మీరు నా వందిజ్ ఇనికబా కిదెజ్ తయార్దాన్ మహిదెర్. మీ సొంత కణుకుబా లాగ్గి సీదెజ్ ఇజి నాను లొస్సిక ఇహిజు, అయాకబా కిదెజ్ మీరు తయార్దాన్ మహిదెర్ ఇజి నాను మీ వందిజ్ నిజం వెప్పిన.

16 ఏలు నాను మిజి నిజం వెప్పినిజ్ మిజి పడెఃఇకాన్ ఆతానా?

17 యూదురి రూలుజ్ లోజీదెజ్ వలె ఇజి వెప్పిని వరి వెట మీరు కూడెదెజ్ ఇజి పటుదలదాన్ నండొ ఆస ఆజినార్. గాని వరి ఉదేసమ్కు నెగ్గెజ్ ఆఉ. మిజి మా బాణిజ్ దూరం కిబెస్తెజి వారు సుడెఃజినార్. ఎందనిజ్ ఇహిజు మీరు వరివెట కూడెఃజి, వారు మీ వందిజ్ పటుదలదాన్ ఆస ఆజిని లెకెండ, మీరు వరి వందిజ్ ఆస ఆజి మండ్రెజ్.

18 ఉదెసం నెగ్గెక ఇహిజు పటుదలదాన్ మంజినిక నెగెదె. ఎస్తివలెబా పటుదలదాన్ ఆహె మండ్రెజ్. నాను మీ వెట మని వలెనె ఆవండ, సీలివలెబా పటుదలదాన్ మండ్రెజ్.

19 నాను ప్రేమిన్ని లోకురండె, నాను మీ వందిజ్ మరిబా బాద ఆజిన. ఏరు ఈబదెజ్ నొప్పిదాన్ బాద ఆని ఉంత్రి బోదెల్లెకెండ నాను మరిబా మీ వందిజ్ బాద ఆజిన. క్రీస్తు నని గుణమ్కు మిజి వానిదాక నాను బాద ఆజినె మంజిన.

20 ఏలు మీ నడిఃమి మంజి, మిజి నిపాతి వెప్తాజ్ ఇజి నాను నండొ ఆస ఆజిన. ఎందనిజ్ ఇహిజు మీరు ఎందనిజ్ యా లెకెండ కిత్తిదెర్ ఇజి నాను గాబ్ర ఆజిన.

### ఆగారుని సార

21 మోసె రాస్తి రూలుజ్ లోజీదెజ్ వలె ఇజి వెప్పిని వరిజ్ నాను వెన్బాజిన. మోసె రాస్తి పుస్తకమ్కాజ్ ఇనిక రాస్త మనాద్ ఇజి మీరు నెస్సిదెరా?

22 ఇనిక రాస్త మనాద్ ఇహిజు, అబ్రాహముజ్ రిఎర్ మరిసిర్ మహార్. ఒరెన్ వన్నిజ్ వెటి పణిమణిసి కాస్తాద్. మరి ఒరెన్ వన్నిజ్ వెట్టిపణి మణిసి ఆఇకాద్ కాస్తాద్.

23 వెట్టిపణి మణిసి వెట పుట్టికాన్ ఒడొల్ ఆసదాన్ పుట్టాన్. గాని వెట్టిపణి మణిసి ఆఇ దని వెట పుట్టికాన్, దేవుణు ఎత్తు కిజి అబ్రాహము వెట కిత్తి ఒట్టు వజ పుట్టాన్.

24 యా రుండి బోదెకాజ్ రుండి నజతిజు వెట పొలిసి వెప్తాజ్ ఆనాద్. యా రుండి బోదెకు దేవుణు లోకుర్ వెట కిత్తి రుండి ఒపుమానమ్కు లెకెండ మన్నె. సీనాయి గొరొతు దేవుణు ఇస్తాయేలు లోకురిజ్ రూలుజ్ సీతివలె, వరి వెట కిత్తి ఒపుమానం ఆగారుజ్ పొలిత మనాద్. ఆగారు వెట్టిపణి కొడొరిజ్ ఇట్టి లెకెండ, యా ఒపుమానం లోకురిజ్ వెట్టిపణి మణిసిర్ లెకెండ కినాద్.

25 ఏలు అరెబియాదు మని సీనాయి గొరొతు సీతి ఒపుమానం ఆగారుజ్ పొలిత మనాద్. వెట్టిపణి మణిసి ఆతి ఆగారు ని దని కొడొరి లెకెండ మనార్. ఏలు యెరూసలెమ్ని బాన్ మని లోకుర్ ఎందనిజ్ ఇహిజు వారు అయా ఒపుమానమ్దు వెప్పిని రూలుజు అడిఃగి మనార్.

26 గాని ముస్సు మని యెరూసలెం వెట్టిపణి మణిసి ఆఇకాద్ ఆతి సారెజ్ పొలిత మనాద్. నమ్మితి మజి విజెరిజ్ అయ్సినె సార.

27 ఎందనిజ్ ఇహిజు దేవుణు మాటదు వెప్పినాద్, “కొడొరి కాన్ఇ గొడ్డు బోదెలి సర్ద ఆఅ. ఏరు ఈబని వలె మని నొప్పి నెన్ఇకి, నీను గొప్ప సర్ద ఆజి డటం డెడిఃసఅ. ఎందనిజ్ ఇహిజు, మాసి మని బోదెల్దెజ్ ఇంక మాసి డిఃస్తి బోదెల్దెజ్ నండొడార్ కొడొరి మనార్”.

28 ఏలు తంబెరిజాండె, మీరు ఇస్సాకు లెకెండ మనిదెర్. ఎందనిజ్ ఇహిజు, దేవుణు అబ్రాహముజ్ సీన ఇజి కిత్తి ఒట్టు వజ మీరు పుట్టిదెర్.

29 నస్తివలె ఒడొల్ ఆసదాన్ పుట్టికాన్ దేవుణు ఆత్మదాన్ పుట్టి వన్నిజ్ మాలెజ్ కిత్తాన్. అయాలెకెండె ఏలుబా జర్గిజినాద్.

30 గాని దేవుణు మాట ఇనిక దిన్ని వందిజ్ వెప్పినాద్, ‘వెట్టిపణి బోదెల్దెజ్ దని కొడొరి వెట నెక్కి పొక్తు. ఎందనిజ్ ఇహిజు, వెట్టిపణి మణిసి పొటది కొడొరిజ్, వెట్టిపణి మణిసి ఆఇ దని పొటది కొడొరి వెట అప్పొసి ఆస్తిదిజ్ అక్కు మండ్రెజ్ వీలు సిల్దెద్’,

31 అందెజె తంబెరిజాండె, మాటు వెట్టిపణి బోదెలి కొడొరి ఆఎట్. గాని మాటు వెట్టిపణి మణిసి ఆఇ దని కొడొరినె.

## 5

1 క్రీస్తు మోసె సీతి రూలుజు అడిఃగిదాన్ డిఃబిస్తివలె, దని అడిఃగి మన్ఎండ మంజిని వందిజె డిఃబిస్తాన్. అందెజె డిఃబె ఆతి వరిలెకెండ నెగ్రెండ నిల్పి మండ్రు. మీరు వెట్టిపణి మణిసి లెకెండ రూలుజు అడిఃగి మన్మాట్.



2 నా మాటెళ్ల జాగ్రత్త వింధ్రు. పవులు ఇని నాను మిజి వెప్పిన. దేవుణు ఎద్రు నీతి నిజాయితి మనికిదెర్ ఆదెజ్ మీరు సునతి కిబె ఆదెజ్ సుడఃతిజ, క్రీస్తు మీ వందిజ్ ఆతిదని వందిజ్ ఇని విలువ సిల్లెద్.

3 సునతి కిబె ఆని విజెరెజ్ నాను మరిబా వెప్పిన. మోసె సీతి రూలుజ్ విజు మీరు పూర్తి లోజిదెజ్ వలె.

4 మోసె సీతి రూలుజ్ లోజిజి, దేవుణు ఎద్రు నీతి నిజాయితి మనికాన్ ఆదెజ్ సూణికాన్, క్రీస్తు బాణిజ్ పూర్తి దూరం ఆతాన్. దేవుణు దయా దర్మమదిజ్ నెక్తి పొక్తిదెర్.

5 గాని దేవుణు మజి నీతి నిజాయితి మనికార్ ఇజి వన్ని ఎద్రు ఇడ్నాన్ ఇజి మాటు ఆస ఆజినాట్. మాటు ఎందనిజ్ యా లెకెండ్ ఆసదాన్ ఎద్రు సుడఃజినాట్ ఇహిజ, దేవుణు మజి నీతి నిజాయితి మనికార్ ఇజి ఇడ్నాన్ దేవుణు ఆత్మనె మజి దయరం సీజినాన్. ఎందనిజ్ ఇహిజ మాటు క్రీస్తు యేసు ముస్కు నమకం ఇడఃజినాట్.

6 ఎందనిజ్ ఇహిజ, క్రీస్తు యేసు వెట కూడిఃతి మనాట్ ఇజి మాటు నెస్నాట్. ఒరెన్ సునతి కిబె ఆత మనాండ్రొ, సీలెనొ ఇజి దేవుణు తోఎన్. గాని దేవుణు సూణిక, ఒరెన్ క్రీస్తు ముస్కు నమకం ఇట్టా మనాండ్రొ ఇజినె. మహి వరిజ్ ప్రేమిసిన్ క్రీస్తు ముస్కు నమకం ఇట్టా మనాన్ ఇజి తోరిస్తెజ్.

7 మీరు నెగ్రెండె నమ్మిజి మహిదెర్. మరి, ఎయెన్ మిజి మొసెం కిజి, నిజమాతి సువార్త లోజిఎండ అడు కిత్తాన్?

8 వన్ని లోకుర్ ఆదెజ్ మిజి కూక్తి దేవుణు యా లెకెండ్ మిజి వెహెన్.

9 పులాని దూరు కండెక్ ఆతిజ్బా, కుండార్ మని దూరు విజు పులాజ్ కినాద్. అయాలెకెండ్ ఉండ్రొ తపు బోదబ కినాద్.

10 మాటు ప్రబు వెట కూడిఃత మనాట్. అందెజె మహి బోదెజ మిరు లోజిఇదెర్ ఇజి నాను అనుమానం సిల్లెండ నమ్మిజిన. మిజి పంబ్ర కిబిస్సికాన్, వాండ్రు ఎయెన్ ఆతిజ్బా దేవుణు వన్నిజ్ తగితి సిక్స సీనాన్.

11 తంబెరిజాండె, సెగొండార్ వెప్పినార్ దేవుణు కొడొరస ఆదెజ్ ఇహిజ సునతి కిబె ఆదెజ్వలె ఇజి. నాను అయాలెకెండ్ వెప్పి మంజినిక ఇహిజ, యూదురు నజి మాలెజ్ కిఎతార్మరి. సునతి కిబె ఆదెజ్వలె ఇజి నాను వెప్పి మంజినిక ఇహిజ, సిలువాదు క్రీస్తు సాతిసాపు వందిజ్ నాను వెప్పి వలె వారు నా ముస్కు కోపం ఆఎతార్మరి.

12 సునతి కిబె ఆదెజ్వలె ఇజి వెప్పి మజి పంబ్ర కిబిస్సి యా లోకుర్, కొడొర్ ఇడఃదెజ్ అట్ఇ వరి లెకెండ్ ఆపిర్ ఇజి నాను ఆస ఆజిన.

13 తంబెరిజాండె, డిఃబె ఆతి వరి లెకెండ్ దేవుణు మిజి కూక్త మనాన్. మీరు ఇస్టం ఆతి సెఇకెజ్ కిదెజ్ ఆనాద్ ఇజి ఒడఃబిమాట్. గాని మరి ఒరెన్ వన్నిజ్ ప్రేమిసి సేవ కిదెజ్ మిజి అక్కు మనాద్.

14 మోసె సీతి రూలుజ్ విజు ఉండ్రె మాటాద్ కూడిఃతె మన్నె. అయాక ఇనిక ఇహిజ, “నీను నిజి ప్రేమిస్సి లెకెండ్, మహి వరిజ్ ప్రేమిస్అ”, ఇజి.

15 గాని మీరు జంతుజ లెకెండ్ కటి ఆజి, ముకెజ్ లాగ్గి మహిజ, మీరు ఒరెన్ మరి ఒరెన్ వన్ని బాణిజ్ పూర్తి నాసనం ఆనిదెర్ ఇజి జాగ్రత్త సుడఃఆదు.

### దేవుణు ఆత్మ నడిఃపిసిని బత్తు

16 అందెజె నాను మిజి వెప్పిన, దేవుణు ఆత్మ మీ మన్నుదిజ్ వెప్పి నడిః పిసిని వజ నడిఃదు. అయావలె మీ ఒడఃల్దది సెఇ ఆసెజ్ కిబిస్సి సెఇ పణిజ్ మీరు కిఎండ మంజినిదెర్.

17 మా ఒడఃల్దది సెఇ ఆసెజి పడిఃఎద్ దేవుణు ఆత్మ. దేవుణు ఆత్మదిజ్ పడిఃఎద్ సెఇ ఆసెజ్. యా రుండి సెఇ ఆసెజ్ని దేవుణు ఆత్మ కూడఃజి మన్ఉ. అందెజె మీరు ఎస్తివలెబా కిదెజ్ కోరిజినిక కిఎండ మండ్రెజ్ అట్టిదెర్.

18 గాని దేవుణు ఆత్మనె మిజి నడిఃపిసి మహిజ, మీరు మోసె సీతి రూలుజ్ లోజిజి దని అడిఃగి మన్ఇదెర్.

19-21 ఒడఃల్దది సెఇ ఆసెజ్ కిబిస్సి పణిజ్ విజెరి నెస్సికెజె. అయాకెజ్ ఇని ఇనికెజ్ ఇహిజ, రంకు బూలానిక, కెలార్బూలానిక, సాని బూలానిక, బోమెజ మాడిఃస్సిక, సెట్నిక, పగ ఆనిక, గొడబ ఆనిక, ఆఇవరి వన్కా వందిజ్ నండొ ఆస ఆనిక, సొంత ఇస్టమ్కునె సూణిక, కేటెజ్ ఆనిక, మిజి పడఃఇ వరి బాణిజ్ దూరం ఆనిక, మిజి కూడ్డి వరివెట కూడ్డిక, గోస ఆనిక, సోస్సిక, ఉణిజి తింజి సోసి కర్జిజ సెఇ పణిజ్ కిజినిక. నాను ముజాలె మిజి డటం వెప్తి లెకెండ్ మరి వెప్పిన. నిని పణిజ్ కిజి బత్కినికార్ దేవుణు ఏలుబడిః కిని లోకుర్ లోఇ మండ్రెజ్ అట్ఎర్.

22-23 గాని దేవుణు ఆత్మ వెప్పి నడిఃపిసిని వన్నిజ్ నిని గుణెమ్కు మంజినె. అయాకెజ్ ఇని ఇనికెజ్ ఇహిజ, మహి వరిజ్ ప్రేమిస్నాన్, సర్దదాన్ మంజినాన్, సాంతి సమాదనమ్దాన్ మంజినాన్, కీడు కిత్తిజ్బా అయాకెజ్ ఓరిసి మంజినాన్, కనికారం తోరిస్నాన్, నెగ్గికెజ్ కినాన్, నమ్మిదెజ్ తగ్గికాన్, సార్లిదాన్ మంజినాన్, సోస్ఎండ మంజినాన్. యా లెకెండ్ కిజి మంజినికార్, ఇని రూలుజ్బా తప్ఎర్.

24 క్రీస్తుయేసు వెట కుడిఃతి మనికార్, వరి పడాఃయి బత్కు, వరి సెఱ ఆసెజ్ విజు, సిలువాదు కుంటిజాణిజ్ డెఃయె ఆతి లెకెండ్ మనాద్. ఇహిజ వారు అయాకెజ్ పూర్తి డిఃస్త సితార్.

25 దేవుణు ఆత్మ మజి కొత్త బత్కు సిత మనాన్. అందెజె దేవుణు ఆత్మ వెప్పి నడిఃపిసిని వజ మాటు బత్కిదెజ్.

26 మాటు గొప్ప పెరికాల్ ఇజి గర్త ఆవండ మహి వరిజ్ కోపం రేపిన్వండ, గొస ఆజి సెఱకెజ్ కిఎండ ఒరెన్ మరి ఒరెన్ వన్ని వెట మండ్రెజ్.

## 6

1 తంబెరిజాండె, మీ లొఱ ఒరెన్ తపు కిత్తిజ, దేవుణు ఆత్మ నడిఃపిసిని వజ నడిఃజిని మీరు సార్లిదాన్ వన్ని తపు దిదిజి, నెగ్గి సరిదు తతెజ్. మరి అయాలెకెండ్, మీరుబా పాపమ్దు అర్వండ జాగర్త సుడఃదెజ్.

2 మహి వరి బాదెజ్, కన్ఠమ్కు నెసి వరిజ్ సాయం కిదెజ్. యా లెకెండ్ కిజి క్రీస్తు వెప్పి రూలుజ్ మీరు పూర్తి కిజినిదెర్.

3 ఎయెన్బా వాండ్రు పెరికాన్ ఆఱతిజ్బా, గొప్ప పెరికాన్ ఇజి ఒడఃబితిజ వన్నిజ్ వాండ్రె మొసెం కిబె ఆజినాన్.

4 విజెరె ఎయెన్ కిజినికెజ్ నెగ్గికెజ్నా సెఱకెజ్నా ఇజి వాండ్రె సుడః ఆదెజ్. అయావలె వాండ్రు కిజిని దనితాన్ వాండ్రు పొగడః ఆదెజ్ అట్నాన్. మహికార్ కిజిని దనిజ్ ఆవండ, వాండ్రు కిజినిదాన్ సుడఃజి పొగడః ఆదెజ్.

5 ఎందనిజ్ ఇహిజ, ఒరెన్ ఒరెన్ వన్నిజ్, వాండ్రు కిదెజ్ మని బాజిత మనాద్.

6 దేవుణు మాట వెంజి నెసినికాన్ ఎయెన్బా వెప్పి నెప్పిన్ని వన్నిజ్, వన్నిజ్ కల్లితి మని విజు నెగ్గి వన్కాజ్ లొఱ వంతు సిదెజ్.

7 మిజి మీరె మొసెం ఆమాట్. దేవుణుదిజ్ సుత్రిసి అర్పైజ్ ఆనాద్ ఇజి ఒడిఃబిమాట్. నాను ఎందనిజ్ యాక వెప్పిన ఇహిజ, విత్తికాన్ ఇనిక విత్నాండ్రె, అయా పంటనె కొయినాన్.

8 ఒడఃలొది సెఱ ఆసెజ వజి కిజి బత్కిజినికాన్ నాసనం ఆనాన్. ఎందనిజ్ ఇహిజ వాండ్రు సెఱ ఆస వజ బత్కితాన్. గాని దేవుణు ఆత్మ వెప్పి నడిఃపిసిని వజ నడిఃనికాన్ ఎలాకాలం దేవుణు వెట బత్కినాన్. ఎందనిజ్ ఇహిజ, వాండ్రు దేవుణు ఆత్మ వెప్పి నడిఃపిసిని వజ బత్కితాన్.

9 నెగ్గి పణిజ్ కిదెజ్ విస్కిమాట్. ఎందనిజ్ ఇహిజ, మాటు విస్కిఎండ మహిజ, దేవుణు ఎత్తు కిత్తి సమయమ్దు మాటు కిత్తి దనిజ్ వాండ్రు పలితం సీనాన్.

10 అందెజె మహి వరివందిజ్ సాయం కిదెజ్ సమయం దొప్పివలె, మాటు విజెరిజ్ నెగ్గికెజ్ కిదెజ్. ముకెలం దేవుణుదిజ్, నమ్మితి వరివందిజ్ కిదెజ్.

**సునతి ఆవద్ కొత్త బత్కునె ముకెలం.**

11 నాను యా మాటెజ్ నా సొంత కిద్దాన్ నె రాసిం. ఎసొ పెరి అసరమ్కాణిజ్ రాసిం ఇజి సుడఃదు.

12 మహి యూదురిజ్ సర్ద కిబిస్తెజ్ సూణికారె, మీరు తవ్వండ సునతి కిబె ఆదెజ్ వలె ఇజి మిజి డటం వెప్పినార్. వారు ఎందనిజ్ యా లెకెండ్ వెప్పినార్ ఇహిజ, క్రీస్తు సిలువాదు సాతాన్ ఇజి నమ్మితిజనె దేవుణు రక్సిస్నాన్ ఇజి వెప్పిని వలె లొకుర్ వరిజ్ మాలెజ్ కినార్. ఆహా వరి ముస్కు మాలెజ్ రెండం మండ్రెజ్నె సునతి కిబె ఆదెజ్ వలె ఇజి డటం వెప్పినార్.

13 సునతి కిబె ఆతికార్బా, మోసె సితి రూలుజ్ విజు లొజిఎర్. గాని మిజి సునతి కిబిస్తెజ్ కోరిజినార్. ఎందనిజ్ ఇహిజ, వారు వెప్పినిజ్ మీరు సునతి కిబె ఆతిదెర్ ఇజి మహి యూదురిజ్ వెప్పి వరి నడిఃమి పొగడః ఆదెజ్ సుడఃజినార్.

14 గాని నాను, మా ప్రబు ఆతి యేసు క్రీస్తు సిలువాదు మా వందిజ్ సాతాన్ ఇజి ఆవండ మరి ఇనిదని వందిజ్బా పొగడిఃఎ. వాండ్రు అయాలెకెండ్ సాతిజ్, నాను గొప్ప విలువ మనిక ఇజి ఒడఃబిని దనిజ్ యా లొకమ్దికార్ విలువ సిఎర్. వారు విలువ మనిక ఇజి ఒడఃబిని దనిజ్ నాను విలువ సిఎ.

15 ఒరెన్ సునతి కిబె ఆతాండ్రా, సిల్లెనా ఇజి ఆవద్ ముకెలం. ముకెలమతిక ఇనిక ఇహిజ, ఒరెన్ పడాఃయి బత్కు డఃసి కొత్తాజ్ ఆతాన్ ఇజినె.

16 యా మాట వెంజి అయా వజ కిని విజెరిజ్ దేవుణు వన్ని సమాదనం సీజి, వన్ని ముస్కు కనికారం తొరిస్నాన్. వీరు ఎయెర్ ఇహిజ, దేవుణు వన్ని వందిజ్ ఎర్లిస్తికారె.

17 ఆకార్దు, ఎయెన్బా నజి మరి బాదెజ్ కిమాట్. ఎందనిజ్ ఇహిజ యేసుజ్ సేవ కిత్తి వందిజ్ నజి కిత్తి బాదెజ మసెజ్ నా ఒడఃలొదు మన్నె. యాకెజ్ నాను వన్ని వెట్టిపణి మణిసి ఇజి తొరిస్నె.

18 తంబెరిజాండె, మా ప్రబు ఆతి యేసుక్రీస్తు దయ దర్మం మీ ముస్కు మనీద్. ఆమెన్.

## అపొస్తుడు ఆతి పవులు ఎపెసుడు మని దేవుణుడిజ్ నమ్మితి వరిజ్ రాస్తి ఉత్తం

నెల్వ కిబిస్సిక

అపొస్తుడు ఆతి పవులు ఎపెసు ఇని పట్టుమ్దు మని దేవుణు సజమ్దిజ్ రాసిని ఉత్తమ్నె యాక. యా ఉత్తం రాస్తి మహివలె, వాండ్రు రోమ జెలిదు తొహె ఆత మహాన్. నస్తివలె ఆసియ ఇని రోమ ప్రాంతమ్దు మని ఉండ్రె ముకెలమాతి పట్టుమ్నె ఎపెసు.

పవులు యా ఉత్తం రాస్తాండ్రె, తుకికు వెట పొక్కినాన్. దేవుణుడిజ్ నమ్మిత్తికార్, వన్ని దయ దర్మం ఎసా గొప్ప పెరిక ఇజి వారు అర్థం కిజి నెస్సెజ్ రాస్తికాదె. మరి దేవుణు ఎత్తు కిత్తి సజతిజ్ క్రీస్తు వెటనె పూర్తి ఆతె. వాండ్రె విజు వన్కా, మున్కు, మనికాన్. క్రీస్తు వెటనె దేవుణు యూదురిజ్, యూదురు ఆఇ వరిజ్ రక్కిసి వరిజ్ ఉండ్రె ఒడొల్ కిజినాన్. ఇబ్బె ఒడొల్ ఇజి వెప్పినిక, యా లోకమ్దు మని దేవుణుడిజ్ నమ్మిత్తికార్ విజెరె కూడితి మని సజమ్నె. మరి దేవుణు సజం ఎలాగ ఉండ్రె ఆజి మండ్రెజ్ నమ్మిత్తికార్ ఒరెన్ ఒరెన్ ఎలాగ మండ్రెజ్ ఇజి వెప్పినాన్. నమ్మిత్తికార్ ఎద్రిసినిక యా లోకమ్ది లోకుర్ వెటనె ఆవద్. గాని సయతాను వెటనె ఎద్రిసినార్ ఇజి ఎత్తు కిబిసి, ఎలాగ సయతానుజ్ ఎద్రిస్సెజ్ ఇజి వెప్పినాన్.

1 క్రీస్తు యేసు వందిజ్ అపొస్తుడు ఆతి పవులు ఇని నాను ఎపెసు పట్టుమ్దు మని దేవుణు వందిజ్ కేట ఆతి వరిజ్ రాసిని ఉత్తం. దేవుణు ఎత్తు కిత్తి వజనె నాను క్రీస్తు యేసు వందిజ్ అపొస్తుడు ఆత. మీరు క్రీస్తు యేసుజ్ నమ్మిజినె మనికిదెర్.

2 మా బుబ్బు ఆతి దేవుణుని ప్రబు ఆతి యేసు క్రీస్తు దయ దర్మమ్దాన్ మీరు నిపాతిదాన్ మండ్రెజ్ సాయం కిపెర్.

3 దేవుణుడిజ్ పొగిడిజినాట్. వాండ్రె మా ప్రబు ఆతి యేసు క్రీస్తు దేవుణు. మరి వాండ్రె వన్ని బుబ్బుబా. ఎందనిజ్ ఇహిజ, దేవుణు ఆత్మ మా మన్సుదిజ్ వెప్పి, వన్ని సరిదు నడిపిస్సిదనితాన్ మజి వాజిని విజు నెగ్గికెజ్ సీజి వాండ్రె మజి దీవిస్తాన్. పరలోకమ్దాన్ వాజినికెజె అయా నెగ్గికెజ్. క్రీస్తు వెట మజి కుడుప్తాండ్రె, యా నెగ్గికెజ్ మజి సితాన్.

4 ఎందనిజ్ ఇహిజ దేవుణు లోకం పుటిన్ఎండ ముజాలె మజి వన్ని లోకుర్ ఇజి ఎర్లిస్తాన్. క్రీస్తు వెట మజి మని సమమ్దమ్దాన్ యా లెకెండ్ మజి ఎర్లిస్తాన్. మాటు వన్ని వందిజ్ కేట ఆతి లోకుర్ లెకెండ్, ఇని నిందెజ్ సిల్లెండ వన్ని ఎద్రు మండ్రెజ్నె వాండ్రు యా లెకెండ్ ఎర్లిస్తాన్.

5 వాండ్రు మజి ప్రేమిసినాన్. అందెజె యేసు ప్రబు మా వందిజ్ ఆతి దనితాన్ మాటు వన్ని కొడొర్ ఆదెజ్ ఇజి నండొ ముజాలె వాండ్రు తిరుమానం కిత్తాన్. వాండ్రు యా లెకెండ్ తిరుమానం కిత్తాన్. ఎందనిజ్ ఇహిజ, అయాకదె వాండ్రు ఎత్తు కిత్తిక. వన్నిజ్ ఇప్టం ఆతిక.

6 అందెజె గొప్ప బమ్మ కిని వన్ని దయ దర్మం వందిజ్ దేవుణుడిజ్ పొగిడిజినాట్. వాండ్రు ప్రేమిసిని వన్ని మరిసి ఆతి దని దనటానె యా గొప్ప దయ దర్మం మా మున్కు వాతాద్. మజి నెడ్డినె దొహ్కాద్.

7-8 క్రీస్తు మా వందిజ్ నల వాక్కి సాతి సాపుదాన్ దేవుణు మా పాపమ్కాణిజ్ మజి డిజిన్పిస్తాన్. ఇహిజ మా పాపమ్కు సెమిస్తాన్. అయా లెకెండ్ వన్ని దయ దర్మం గొప్ప పెరిక ఇజి తోరిస్తాన్. మా మున్కు నండొ దయ దర్మం నెడ్డినె తోరిస్తాన్. వన్ని బుద్ది గెణమ్దానె వాండ్రు వన్ని దయ దర్మం మా మున్కు తోరిస్తాన్.

9 దేవుణు ఎత్తు కిత్తిక వాండ్రు కిత్తాన్. క్రీస్తు వెట పూర్తి కిదెజ్ ఇజి వాండ్రు వన్ని గర్బమ్దు ఎత్తు కిజి డాప్పి ఇట్టి పణి మజి తోరిస్తాన్. అయాక ముజాల్ ఎయెర్బా నెన్ఎతార్.

10 వాండ్రు గర్బమ్దు ఎత్తు కిజి డాప్పి ఇట్టిక ఇనిక ఇహిజ, పరలోకమ్దు మని విజు వన్కాజ్, బూమి మున్కు మని విజు వన్కాజ్, కూడుప్పి ఒరెన్ వన్ని అడిగి ఇట్తాన్. వాండ్రె క్రీస్తు. యాక కిదెజ్ తగితి సమయం వానివలె వాండ్రు పూర్తి కినాన్.

11 విజు సజతిజ్ దేవుణు ఎత్తు కిత్తి వజ వాండ్రు కిజినాన్. క్రీస్తు వెట మజి కుడుప్తాండ్రె, వన్ని సొంత లోకుర్ ఇజి మజి ఎర్లిస్తాన్. ఎందనిజ్ ఇహిజ అయా లెకెండ్ ఎర్లిస్సెజ్ ఇజి వాండ్రు పూర్బమ్దునె తిరుమానం కిత మహాన్. అయాకదె వాండ్రు ఎత్తు కిత్తిక.

12 క్రీస్తు రక్కిస్సెజ్ వానాన్లె ఇజి విజెరె ఇంక ముజాలె నమకం ఇట్టికాపె యూదురు ఆతి మాపు. అందెజె దేవుణు గొప్ప పెరికాన్ ఇజి పొగిడిజినాట్. అయాకదె వన్ని ఉదెనం.

13 అయాలెకెండె యూదురు ఆజ మీరుబ నిజమాతి బోద వెహిదెర్ ఇహిజ, దేవుణు మిజీ రక్సిస్సాన్లె ఇజి వెహిని సువార్త వెహిదెర్. మీరు క్రీస్తు ముస్సు నమకం ఇట్టిదెర్ వన్ని వెట కూడితి మనిదెర్. అందెజి దేవుణు సీన ఇజి ఒట్టు కిత్తి దేవుణు ఆత్మజ్ మిజీ సితాన్. సితండ్రె దేవుణు మిజీ లోకుర్ ఇజి కూక్తాన్. యా దేవుణు ఆత్మనె, మీరు దేవుణు లోకుర్ ఇని దనిజ్ ఉండ్రె గుర్తు.

14 మరి దేవుణు వన్ని లోకురిజ్ ఒట్టు కిత్తి విజు మజీ దోహ్కెఇని దనిజ్ ఉండ్రె ఆదారమ్నె యా దేవుణు ఆత్మ. వాండ్రు వన్ని లోకురిజ్ పూర్తి విడుఃదల కినివలె అయాకెజ్ మిజీ దోహ్కె. దేవుణు గొప్ప పెరికాన్ ఇజి దినితాన్ లోకుర్ పొగిడిఃనార్.

**ఎపెసు సజమ్దు మని వరి వందిజ్ పవులు కిజిని పార్దనం**

15-16 దేవుణు మిజీ ముస్సు వెహ్తా లెకెండ దీవిస్త మనాన్. అందెజె నాను మీ వందిజ్ వన్నిజ్ పార్దనం కిజిన. మీరు ప్రబు ఆతి యేసుజ్ నమ్మిజినిదెర్. దేవుణు వందిజ్ కేట ఆతి వరిజ్ విజెరిజ్ ప్రేమిసినిదెర్ ఇజి నాను వెహి బాణిజ్ అసి మీ వందిజ్ ఎస్తివలెబా డిఃఎండ దేవుణుదిజ్ వందనమ్కు వెహ్సిన. ఎస్తివలెబా నాను పార్దనం కినివలె, మీ వందిజ్ పార్దనం కిజిన.

17 గొప్ప పెరికాన్ ఆతి మా బుబ్బెజ్ పార్దనం కిజిన. వాండ్రె మా బుబ్బు ఆతి యేసు క్రీస్తుజ్ దేవుణు. మీరు వన్నిజ్ బాగ నెస్సి వందిజ్ దేవుణు ఆత్మ మిజీ గెణం సీదెజ్ ఇజి, దేవుణు వందిజ్ మిజీ తెలివి కిబిస్తెజ్ ఇజి నాను వన్నిజ్ పార్దనం కిజిన.

18 దేవుణు వందిజ్ కేట ఆతి లోకుర్ వందిజ్ వాండ్రు ఇట్టి మని గొప్ప పెరి దీవెనమ్కు ఇనికెజ్ ఇజి మీరు నెస్సి వందిజ్, అయా దీవెనమ్కాజ్ ఆనదాన్ ఎద్రు సూణి వందిజ్ వరిజ్ నెస్సిన్అ ఇజి నాను పార్దనం కిజిన. దేవుణు వన్ని లోకురిజ్ సీన ఇజి ఒట్టు కిత్తి దీవెనమ్కు ఎసా పెరికెజ్ ఇజి మీరు నెస్తిజ్ ఇజి నాను వన్నిజ్ పార్దనం కిజిన.

19-21 వన్నిజ్ నమ్మిజిని మా లోఇ మని వన్ని సత్తు ఎసా పెరిక ఇజి మీరు నెస్తిజ్ ఇజి నాను పార్దనం కిజిన. అయా సత్తు విజు వన్కా ముస్సు గొప్ప పెరిక. యా గొప్ప పెరి సత్తుదాన్నె దేవుణు క్రీస్తుజ్ సావుదాన్ బత్తిస్తాండ్రె పరలోకమ్దు వన్ని ఉణెర్ పడఃకాదు బసె కిత్తాన్. క్రీస్తు అబె అతికారం కిజినాన్. విజు రకమ్కాణి అతికారం కిజిని దూతెజ, దెయమ్క ముస్సు అతికారం కిజినాన్. అతికారం కిజిని విజెరె ముస్సు వాండ్రె గొప్ప అతికారం మనికాన్. వన్ని అతికారం ఏలు అతికారం కిజిని వరి ముస్సునె ఆవిద్. గాని వాని కాలమ్దు అతికారం కిని వరి ముస్సుబా వాండ్రె గొప్ప అతికారం మనికాన్.

22 దేవుణు విజు వన్కాజ్ క్రీస్తు పాదమ్క అడిఃగి ఇట్టాన్. దేవుణు సజం ముస్సు అతికారి లెకెండ వన్నిజ్ ఏర్పాటు కిత్తాన్.

23 వాండ్రు దేవుణు సజమ్దిజ్ బుర్ర లెకెండ దేవుణు సజమ్నె వన్ని ఒడోఃల్ లెకెండ దేవుణు సజమ్నె వన్నిజ్ పూర్తి కిజినాద్. ఎంబెబా విజు వన్కాజ్ పూర్తి కిజినికాన్ వాండ్రె.

**2**

**దేవుణు వన్ని కనికారమ్దాన్ మజీ రక్సిసినాన్.**

1 మీరు క్రీస్తుజ్ నమ్మిఇ ముజుల సాతి వరి లెకెండ మహిదెర్. ఎందనిజ్ ఇహిజ మీరు దేవుణుదిజ్ లోజిఇతిదెర్, సెఇ పణిజ్ కిజి మహిదెర్.

2 యా లోకమ్దు మని దేవుణుదిజ్ దూసిస్సికార్ కిజి మహి లెకెండ మీరుబా కిజి మహిదెర్. ఆగాసమ్దు బుల్లెయ్ కిని దెయమ్కాజ్ నెయ్కి ఆతి సయ్తానుజ్ లోజిజి మహిదెర్. వీండ్రె దేవుణుదిజ్ లోజిఇ వరి ముస్సు ఏలు అతికారం కిజినాన్.

3 ఉండ్రె కాలమ్దు, నిజమె, మాటుబా నని వరి లెకెండ మహాట్. మా సొంత సెఇ ఇస్టమ్దానె కిజి మహాట్. మ ఒడోఃల్ది ఆసెజి వజ, సెఇ ఆలోసమ్క వజ కిజి మహాట్. మహి విజెరె లెకెండ, మాటుబా దేవుణు కోపమ్దిజ్ గురి ఆతి మహికాట్.

4 గాని దేవుణు నండో కనికారం మనికాన్. వాండ్రు మజీ నండో ప్రేమిసినినాన్.

5 అందెజె మజీ క్రీస్తు వెట కుడుప్తాండ్రె మజీ కొత్త బత్తు. సితాన్. మాటు దేవుణుదిజ్ లోజిఎండ ఆతి మహిజ్, సాతి వరి లెకెండ మహాట్. అయావలెబా వాండ్రు యా లెకెండ కొత్త బత్తు. సితాన్. దేవుణు దయాదర్మమ్దానె వాండ్రు మజీ రక్సిస్సాన్.

6 వాండ్రు మజీ క్రీస్తుయేసు వెట సావుదాన్ మర్జి బత్తిస్తాండ్రె, పరలోకమ్దు వన్ని వెట కూడఃజి ఏలుబడిః కిదెజ్ బసె కిత్తాన్. క్రీస్తు వెట మజీ కుడుప్తాండ్రె యా లెకెండ కిత్తాన్.

7 వాని కాలమ్దు లోకుర్ విజెరె వన్ని దయ దర్మం విజు వన్కా ముస్సు గొప్ప నండో పెరిక ఇజి సుడఃదెజె యా లెకెండ క్రీస్తు వెట మా ముస్సు దయ దర్మం తోరిస్తాన్.

8 ఎందనిజ్ ఇహిజ దేవుణు, దయాదర్మమ్దానె మిజి రక్సిస్సాన్. మీరు క్రీస్తుజ్ నమ్మిత్తి దనితానె రక్సిస్సాన్. మీరు కిత్తి నెగ్గి పణిజాణిజ్ ఆవిద్ వాండ్రు మిజి రక్సిస్తిక. అయాక వాండ్రు మిజి సీతి ఉండ్రె ఇనాయమ్నె.

9 మీరు కిత్తి నెగ్గి పణిజాణిజ్ ఆవిద్ దేవుణు మిజి రక్సిన్తిక. అందెజె ఎయెన్ బా నాను కిత్తి నెగ్గి పణిజాణిజ్ దేవుణు నజి రక్సిన్తాన్ ఇజి పొజిదెజ్ ఆవెద్.

10 మాటు నెగ్గి పణిజ్ కిజినె మంజిని వందిజ్ క్రిస్తు యేసు వెట మజి కుడుఃవ్తాండ్రె కొత్త బత్తు మజి సితాన్. మాటు కిదెజ్ మని యా నెగ్గి పణిజ్ వాండ్రు ముజాలె తిరుమానం కితాండ్రె ఇట్టాన్. నిజమె దేవుణు ఒరెండ్రె యా లెకెండ్ మా బత్తుదిజ్ కొత్తాజ్ కిత్తాన్.

11 అందెజె యూదురు జాతిదు పుట్ ఇతి మీరు క్రిస్తుజ్ నమ్మిజ ముజాల ఎలాగ మహిదెర్ ఇజి ఎత్తు కిదు. మీరు సునతి కిబె ఆఇకిదెర్ ఇజి యూదురు మిజి వెప్పినార్. ఎందనిజ్ ఇహిజ, వారు సునతి కిబె ఆత మనార్. అందెజె వారు దేవుణు లోకుర్ ఇజి ఒడొఃబిజినార్. (గాని యా సునతి ఒరెన్ వన్ని ఒడొఃల్ దు కిని ఆసారమ్ నె)

12 సుడొఃదు, అయా కాలమ్ దు మీరు క్రిస్తుజ్ దూరం మహిదెర్. దేవుణు లోకుర్ ఆతి ఇస్తాయేలుదిజ్ సెందిఇకిదెర్. మీరు పయివారు. దేవుణు వన్ని లోకురిజ్ కిత్తి ఒట్టుదిజ్ సమందం సిలికిదెర్. మీరు యా లోకమ్ దు ఇని ఆస సిల్లెండ, దేవుణుదిజ్ నెన్ ఎండ బత్తిజి మహిదెర్.

13 గాని ముజాల క్రిస్తుజ్ దూరం మహి మీరు ఏలు వన్ని వెట కూడిఃతి మనిదెర్. క్రిస్తు నల వాక్కి సాతి సావుదాన్ దేవుణు మిజి డగ్గు కిత్తాన్.

14 క్రిస్తునె యూదురు ఆఇ మిజి, యూదురు ఆతి మజి రాజినం కిబిన్తికాన్. ముజాల మిజి మజి అడ్డు లెకెండ్ మహి పగ వాండ్రు లాగితండ్రె, ఉండ్రె నన్ని లోకుర్ కిత్తాన్.

15 యూదురి రూలుదు మని ఆడ్రెజ, రూలుజ క్రిస్తు వన్ని ఒడొఃల్ దు సాతి సావుదాన్ వన్కాజ్ నత్తు సిల్లెండ కితాండ్రె, అడు లెకెండ్ మహి పగ లాగితాన్. ఎందనిజ్ ఇహిజ, రుండి లోకురిజ్ ఇహిజ, యూదురిజ్, యూదురు ఆఇ వరిజ్ వన్ని వెట కుడుప్పి ఉండ్రె నని కొత్త లోకు కిత్తాన్. యా లెకెండ్ వాండ్రు రాజినం కిబిన్తాన్.

16 మరి సిలువాదు సాతి సావుదాన్ వాండ్రు రుండి జాతిజ నడిఃమి మహి పగ సొన్పిసి, ఉండ్రె నని లోకుర్ లెకెండ్ కిజి, దేవుణు డగ్గు మర్జి తతెజ్ యా లెకెండ్ రాజినం కిబిన్తాన్.

17 క్రిస్తు యా లోకమ్ దు వాతండ్రె, దేవుణుదిజ్ దూరం మహి యూదురు ఆఇ మిజి, వన్ని డగ్గు మహి యూదురు ఆతి మజి సమాదనం సీజిని సువార్త వెప్తాన్.

18 వన్ని వెట మజి రిఎరిజ్, ఇహిజ యూదురు ఆఇ మిజి, యూదురు ఆతి మజి, బుబ్బి ఆతి దేవుణు ముజాల దయ్ రమ్ దాన్ సొండ్రెజ్ వన్నిజ్ లొస్తెజ్ అక్కు దొహ్ క్తాద్. యాక దేవుణు ఆత్మ వెట మజి దొహ్ క్తాద్.

19 అందెజె మీరు ఏలుదాన్ పయిదికిదెర్ ఆఇదెర్. దేవుణుదిజ్ సెందిఇకిదెర్ ఆఇదెర్. గాని మీరు దేవుణు లోకుర్ వెట అక్కు ఆతికిదెర్. దేవుణు కుటుమ్ దికిదెర్.

20 ఉండ్రె ఇల్లు పణకాణిజ్ తొప్పిలెకెండ్ మీరు మనిదెర్. దనిజ్ పునాది ఆతికార్ ప్రవక్తరు, అపొస్తురు. దనిజ్ మూల పణకు క్రిస్తుయేసునె.

21 వాండ్రె ఆ ఇల్లు అరెండ్రె అస్సికాన్. వన్ని వెటనె ఆ ఇల్లు తొహ్ ఆజి పిరిసి ప్రబు ఆతి యేసు క్రిస్తు మండ్రెజ్ వన్ని వందిజ్ కేట ఆతి నెగ్గి ఇల్లు ఆనాద్.

22 క్రిస్తు వెట కూడిఃతి మని మిజి వాండ్రు మహి నమ్మిత్తి వరివెట కుడుప్పినాన్. అయావలె మీరు మహి నమ్మిత్తి వరివెట, దేవుణు వన్ని ఆత్మ సత్తుదాన్ మంజిని ఉండ్రె ఇల్లు ఆజినిదెర్.

### 3

#### యూదురు ఆఇ వరిజ్ సువార్త వెప్పి పణి పవులుజ్ దేవుణు ఒపజెప్పినాన్

1 అందెజె క్రిస్తు యేసుజ్ సేవ కిని వందిజ్ జెలిదు మని పవులు ఇని నాను మీ వందిజ్ పార్దనం కిజిన. యూదురు ఆఇ మిజి సువార్త వెప్పిని వందిజె నాను జెలిదు ఆత.

2 మీరు తప్ ఎండ వెహిమనిదెర్. దేవుణు దయ దర్మమ్ దాన్, మిజి సువార్త వెప్పి పణి నజి ఒపజెప్తాన్

3-4 దేవుణు ఎత్తు కిజి వన్ని గర్బమ్ దు డాప్తి ఇట్టిక వాండ్రు నా వెట తోరిన్తాన్. దిని వందిజ్ నాను ముస్కు కండెక్ రాస్త మన. అయాక మీరు సద్ వితిజ, క్రిస్తు వందిజ్ దేవుణు ఎత్తు కిజి గర్బమ్ దు డాప్తి ఇట్టిక నాను నెస్త మన ఇజి మీరు నెస్సిదెర్.

5 యాక దేవుణు పూర్ బమ్ దు మహి లోకురిజ్ తోరిసి నెన్ పిన్ ఎతాన్. గాని ఏలు వన్ని వందిజ్ ఏర్ పాటు కిత్తి అపొస్తుడురిజ్, ప్రవక్తరిజ్ తోరిసి నెన్ పిన్తాన్. దేవుణు ఆత్మదాన్ ఈహు తోరిసి నెన్ పిన్తాన్.

6 దేవుణులు ఎత్తు కిజి గర్భమందు డాప్పి ఇట్టిక ఇనిక ఇహిజ, యూదురు ఆఇ వరిజ్, యూదురు ఆతి వరివెట దేవుణు సీని దీవెనమ్కాజ్ అక్కు మనాద్. యూదురు ఆఇకార్ని, యూదురు ఉండ్రె ఒడోల్ ఆత మనార్. దేవుణు క్రీస్తు యేసు వెట యూదురిజ్ కిత్తి ఒట్టుదిజ్, యూదురు ఆఇ వరిజ్బా వంతు మనాద్. యాకెజ్ మీరు సువార్త నమ్మిత్తిజ్నె దోహ్కె.

7 యా సువార్తనె నాను లోకురిజ్ వెప్పిన. యా సువార్త పణినె దేవుణు వన్ని దయ దర్మమదాన్ నజి ఒపజెప్తాన్. వన్ని సత్తు సీజి నా వెట కిబిసినాన్.

8 దేవుణు లోకుర్ లొఇ నాను ఎందనిజ్ పణిదిజ్ రెఇకాన్. గాని వాండ్రు నజి యా పెరి పణి ఒపజెప్తాన్. ఇహిజ, క్రీస్తు సీజిని అంతు సీలి దీవెనమ్క వందిజ్ యూదురు ఆఇ వరిజ్ వెప్తాజ్,

9 మరి దేవుణులు ఎత్తు కిజి గర్భమందు డాప్పి ఇట్టిక ఎలాగ వాండ్రు కినాన్ ఇజి లోకుర్ విజెరిజ్ నెస్పిస్తెజ్ వాండ్రు యా పణి నజి ఒపజెప్తాన్. విజా తయార్ కితి దేవుణు పూర్బమదాన్ అసి వాండ్రు ఎత్తు కిజి గర్భమందు ఇట్టిక లోకురిజ్ డాప్తాన్.

10 వాండ్రు ఎందనిజ్ యా లెకెండ్ డాప్తాన్ ఇహిజ, పరలోకమదు మని దూతారిజ్, వన్కా అతికారిజ, వాండ్రు గొప్ప గెణం మనికాన్ ఇజి దేవుణు సజం వెట ఏలు తోరిస్తెజ్ యాక వన్ని లోకుర్ వందిజ్ వాండ్రు ఆతి దనితాన్నె తోరిసినాన్.

11 లోకం పుటిన్ఎండ ముజాలె, యా లెకెండ్ కిదెజ్ ఇజి దేవుణులు ఎత్తు కిత్ మహాన్. అయాలెకెండ్ మా ప్రబు ఆతి క్రీస్తు యేసు వెట కిత్తాన్

12 మాటు వన్నిజ్ నమ్మిజినాట్. వన్ని వెట కూడిత మనాట్. అందెజె తియెల్ సిల్లెండ దయరమ్దాన్ దేవుణు డగ్రు సొన్ని లొస్తెజ్ అక్కు దోహ్కె మనాద్.

13 అందెజె మా వందిజె వన్నిజ్ స్రమెజ్ వాతె ఇజి నా వందిజ్ విసారిస్సాట్ ఇజి నాను మిజి బతిమాల్జిన. గాని యా స్రమెజాణిజ్ మిజి గవరం సీనార్.

**పవులు ఎవెనుదు మని నమ్మిత్తి వరి వందిజ్ పార్దనం కిజినాన్**

14 దినివందిజె, నాను మా బుబ్బి ఆతి దేవుణు ఎద్రు ముణుకుజ్ ఊర్జి మీ వందిజ్ పార్దనం కిజిన.

15 పరలోకమదు మని నమ్మిత్తి విజెరిజ్, యా లోకమదు మని నమ్మిత్తి విజెరిజ్ విండ్రె బుబ్బి. విజెరి వన్ని కుటుమ్దికార్.

16 వన్ని లోకుర్ వందిజ్ ఇట్టి మని నండో దివెనమ్కాణిజ్, మీ మన్ను దయరమ్దాన్ నెగ్రెండ మండ్రెజ్ వన్ని ఆత్మ వెట సత్తు సీదెజ్ ఇజి నాను వన్నిజ్ పార్దనం కిజిన.

17 మీరు క్రీస్తుజ్ నమ్మిజినిదెర్. అందెజె వాండ్రు మీ మన్నుదు ఎలాకాలం మండ్రెజ్ ఇజి నాను పార్దనం కిజిన. మీరు దేవుణుదిజ్ ప్రేమిసి మహి వరిజ్ ప్రేమిసి మండ్రెజ్ ఇజి నాను పార్దనం కిజిన. అయ లెకెండ్ కిజి మహిజ, బూమి లొఇ సారితి సొహి వెల్లెజ్ మని మరాన్ లెకెండ్ మీరు మనిదెర్. నెగ్గి పునాది మున్ను తోహ్కె మని ఇల్లు లెకెండ్ మనిదెర్.

18 అయావలె క్రీస్తు మజి ఎసొ ప్రేమిసినాన్ ఇజి మీరు, దేవుణు వందిజ్ కేట ఆతి లోకుర్ విజెరి వెట పూర్తి నెస్తెజ్ అట్టిదెర్. వాండ్రు మజి అంతు సిల్లెండ నండో ప్రేమిసినాన్.

19 ఎయెర్బా అర్దం కిదెజ్ అట్ఇ క్రీస్తు ప్రేమ మీరు నెసినె మండ్రెజ్ ఇజి నాను పార్దనం కిజిన. దేవుణుదిజ్ మని పూర్తి బుద్ధి మిజిబా మంజిని వందిజె నాను ఈహు పార్దనం కిజిన.

20 మాటు లొన్ని విజు దని ఇంక, ఒడిబిని దనిజ్ నండో కిదెజ్ దేవుణు అట్నాన్. మా లొఇ పణి కిజిని వన్ని ఆత్మ సత్తుదాన్నె వాండ్రు కిజినాన్.

21 క్రీస్తు యేసు వెట వాండ్రు కితి గొప్ప పణి వందిజ్, దేవుణు సజం వెట వాండ్రు కితి గొప్ప పణి వందిజ్ యా దేవుణుదిజ్ తర తరమ్కు పొగిడిజి మంజినాట్. వన్నిజ్ ఎలాకాలం పొగిడిజినాట్. ఆమెన్.

**4**

**క్రీస్తు వెట ఉండ్రె ఒడోల్ ఆతాట్**

1 అందెజె ప్రబుజ్ సేవ కిజిని వందిజ్ జెలిదు ఆతి నాను మిజి బతిమాల్జిన. దేవుణు మిజి నా లోకు ఇజి కూక్తివలె నెగ్గి సరిదు నడిదెజ్ ఇజి కూక్తాన్. దనిజ్ తగ్గి వజ మీరు మండ్రెజ్ ఇజి నాను మిజి బతిమాల్జిన.

2 ఎస్తివలెబా గర్ర ఆవండ తగిజి మండ్రు. మహి వరివెట సార్లిదాన్ మండ్రు. మహి వరిజ్ ప్రేమిసి, వరి వందిజ్ ఓరిసి మండ్రు.

3 దేవుణు ఆత్మనె మిజి కుడుప్త మనాన్. అందెజె మీరు ఉండ్రె ఆజి మంజిని వందిజ్ సమాదనమ్దాన్ కూడేజి పాడేజి మండ్రెజ్ నండో నుడేదెజ్ వలె.

4 మాటు ఉండ్రె ఒడోల్. ఉండ్రె దేవుణు ఆత్మ మజి దొహ్క మనాన్. దేవుణు మజి వన్ని లోకుర్ ఇజి కూక్తివలె, వాండ్రు సిన ఇజి ఒట్టు కితి ఉండ్రె నని దీవనమ్క వందిజ్ మాటు విజెటి ఆనదాన్ ఎద్రు సుడోజినాట్.

5 మజి విజెరిజ్ ఒరెండ్రె ప్రబు. మాటు నమ్మిజిని బోద ఉండ్రె. మాటు ఉండ్రె బాప్తిసం లాగె ఆతాట్.

6 మాటు ఒరెండ్రె దేవుణుదిజ్ మాడిస్సాట్. వాండ్రె విజెరిజ్ బుబ్బు. వాండ్రె విజెరి ముస్సు అతికారం కినికాన్. వాండ్రె మా లోక మంజినాన్. మా వెట పణి కిబిసినాన్.

7 గాని మా లోక ఒరెన్ ఒరెన్ వన్నిజ్ ఉండ్రె ఉండ్రె వరం, క్రీస్తు మజి సితాన్. అయాక వన్నిజ్ ఇన్టం ఆతి వజ వాండ్రు సీబాత సితాన్.

8 అందెజె దేవుణు మాటదు రాస్త మనాద్, “వాండ్రు ఎత్తు మని బాన్ ఎక్కి సోహివలె, వాండ్రు ఉద్దం గెలస్తవలె, అస్తి వరిజ్ వన్నివెట తోహ్క ఒతాన్. వాండ్రు లోకురిజ్ ఇనాయమ్కు సీబాత సితాన్”, ఇజి.

9 (వాండ్రు ‘ఎక్క సోహాన్’, ఇజి వెహ్నిని దనిజ్ అర్దం ఇనిక? దని అర్దం ఇనిక ఇహిజ, వాండ్రు ముజాల, అడిగి మని యా బూమిదు వాతాన్.

10 యా బూమి ముస్సు డిగితి వాతికాండ్రె అగాసం డాట్టి ముస్సు నండో అతికారం మని బాన్ ఎక్కి సోహికాన్. యా బూలోకమదు మని విజు వన్కాజ్ వన్ని వెట పూర్తి కిదెజె వాండ్రు ముస్సు ఎక్క సోహాన్)

11 వాండ్రె, లోకురిజ్ ఒరెన్ ఒరెన్ వన్నిజ్ ఉండ్రె ఉండ్రె వరం ఒపజెప్తాన్. సెగొండారిజ్ అఘొస్తురు ఇజి సెగొండారిజ్ ప్రవక్తరు ఇజి, సెగొండారిజ్ సువార్త వెహ్నికార్ ఇజి, సెగొండారిజ్ దేవుణు సజం సుడోజి, నెస్సిసి, వరిజ్ నెగ్రెండ నడిపిస్సి పొస్టరుజు ఇజి వాండ్రు ఏర్పాటు కిత్తాన్.

12-13 ఎందనిజ్ ఇహిజ, దేవుణు లోకురిజ్ దేవుణు పణి కిదెజ్ పూర్తి నెన్పిస్తెజె యా లెకెండ ఏర్పాటు కిత్తాన్. క్రీస్తు ఒడోల్ ఆతి దేవుణు సజమ్దికార్ దేవుణుదిజ్ నెసి పూర్తి పిరిని వందిజె దేవుణు లోకుర్ దేవుణు పణి కిదెజ్. అయా లెకెండ మాటు దేవుణుదిజ్ నమ్మిజి, వన్ని మరిసిజ్ నెసి ఉండ్రె ఆజి మంజినాట్. మాటు పూర్తి బుద్ది వాతి వరి లెకెండ పిరినాట్ ఇహిజ క్రీస్తు లెకెండ పూర్తి ఆనాట్.

14 అయావలె మాటు కొడోర్ లెకెండ మన్ఎట్. గాలి డెయిజి, ఉత్కాజ్ ఇతల్ అతాల్ దూక్కిని డోణి లెకెండ, అబద బోద నెస్సిస్సి మొసెం కిని వరి బాణిజ్ మొసెం ఆవట్.

15 గాని మాటు ఎస్తివలెబా నిజం వెహ్ని ప్రేమిసి మండ్రెజ్. అయాలెకెండ మాటు కిజిని విజు వన్కా లోక, క్రీస్తు లెకెండ పూర్తి ఆనాట్. వాండ్రె మా బుర్త లెకెండ.

16 మాటు వన్ని ఒడోల్. ఒడోల్దు ఒడోల్ది అత్కుజ్ అత్కిస్తి లెకెండ క్రీస్తు మజి అత్కిస్తాన్. ఒడోల్ది అత్కుజ్ విజు అయాకెజ్ పణి కిదెజ్ మని లెకెండ పణి కితిజ, ఒడోల్ సత్తుదాన్ పిపినాద్. అయాలెకెండ దేవుణు సజమ్దికార్ ఒరెన్ మరి ఒరెన్ వన్నిజ్ ప్రేమిసి వారు కిదెజ్ మనికెజ్ కితిజనె దేవుణు సజం సత్తుదాన్ పిరినాద్.

17 అందెజె ప్రబు నజి సీతి అతికారమ్దాన్ నాను మిజి వెహ్నిన. నాను డటమ్నె మిజి వెహ్నిన. ఏలుదాన్ దేవుణుదిజ్ నెన్ఇకార్ కిజిని లెకెండ మీరు మన్మాట్. వారు పణిదిజ్ రెఇకెజ్ ఒడోబినార్

18 వరి ముస్సుదు సీకాట్ మని లెకెండ మనార్. దేవుణు సీజిని కొత్త బత్కుదిజ్ దూరం మనార్. ఎందనిజ్ ఇహిజ, దేవుణు వందిజ్ నిజమాతికెజ్ వారు అర్దం కిఎర్. వరి ముస్సు గటిదిక.

19 వరిజ్ సిగు సోహాద్. వారు ఒడోల్ది సెఇ ఆసెజ ఒజ ఆతార్. విజు రకమ్కాణి పాపమ్కు కిజినార్. వారు అయాకెజ్ డిస్ఎర్. మరి మరి కిదెజె ఆస ఆజినార్.

20 గాని మీరు క్రీస్తు వందిజ్ నెస్తివలె అయాలెకెండ మండ్రెజ్ అవద్ ఇజి నెస్తిదెర్.

21 నిజమ్నె, మీరు వన్ని వందిజ్ వెహ్నిదెర్. మీరు వన్ని వెట కూడితివలె యేసు వందిజ్ నిజమాతి దనిజ్ తగ్గివజ మిజి దేవుణు ఆత్మ నెస్తిస్త మనాన్.

22 మీరు బత్కిజి మహి పడాఁ ఇ బత్కు డిస్టు ఇజినె నెస్తిస్తాన్. పడాఁ ఇ బత్కుదు, మిజి మహి సెఇ ఆసెజ్ మిజి మొసెం కిజి పాడు కిజినె మవె.

23 మీ బుద్దిని మీ ముస్సు దేవుణు మారిస్తెజ్ వలె.

24 దేవుణు మిజి వన్ని నని బుద్ది సితాన్. అందెజె వాండ్రు సీతి ఆ కొత్త బుద్దిదాన్ మీరు మండ్రు. అయావలె సీతి నిజాయితిదాన్ మంజినిదెర్. తప్పజ్ కిఎండ మంజినిదెర్.

25 అందెజె ఏలుదాన్ అబద్దం వర్గిమాట్. మహి వరి వెట నిజం వర్గిదెజ్ వలె. ఎందనిజ్ ఇహిజ మాటు ఉండ్రె ఒడోల్దిజ్ నెందితికాట్.

26 మీరు కోపం ఆతిజ, మీ కోపం మిజి పాపం కిబిన్ఎండ సుడోదెజ్. మీ కోపం వెడారు మండ్రెజ్ అవద్.

27 తప్ప కిబిస్తెజ్ నయితాన్దిజ్ సరి సీమాట్.

28 డొబ్బ కిజి మహికాన్ ఏలుదాన్ డొబ్బ కిదెజ్ ఆవెద్. గాని వాండ్రు వన్ని కికాణిజ్ కన్ఱబడిజి వన్నిజ్ పణిదిజ్ వానికెజ్ కిదెజ్. ఎందనిజ్ ఇహిజ, అయావలె వాండ్రు బీదవరిజ్ సాయం కిదెజ్ అట్నాన్.

29 మీ వెయ్దాన్ సెజ మాటెజ్ వాదెజ్ ఆవెద్. గాని మహికార్ నమకమ్దు పిరిదెజ్ తగ్గి నెగ్గి మాటెజె వర్గిదెజ్. లోకురిజ్ వరి అవుసరం సుడెజి వర్గిదెజ్. ఎందనిజ్ ఇహిజ అయావలె మీ మాటెజ్ వెని వరిజ్ లాబం మంజినాద్.

30 దేవుణు అత్తుదిజ్ దుకం కిబిస్మాట్. ఎందనిజ్ ఇహిజ, దేవుణు మిజి పూర్తి విడుదల కిని దినమ్దాక మీరు వన్ని లోకుర్ ఇని దనిజ్ గుర్తు యా దేవుణు అత్తునె.

31 మీ లోఇ మని కుత అస్సిక, కోపం, పగ అస్సిక, జటిజ్ ఆనిక, దుసలాడెనిక, మహి వరిజ్ సెఇకెజ్ కిజ బుద్ది, మీ లోఇహాన్ డిఃస్టు.

32 గాని మహి వరి వందిజ్ నెగ్గికెజ్ కిదు. వరిజ్ కనికారం తోరిస్తు. మిజి కితి సెఇ దని వందిజ్ సెమిస్తు. క్రీస్తు వెట దేవుణు మీ తప్పుజ సెమిస్తి లెకెండ్, మీరు వరిజ్ సెమిస్తు.

## 5

1 అందెజె మీరు దేవుణుదిజ్ పొలిజి మండ్రు. ఎందనిజ్ ఇహిజ, వాండ్రు నండో ప్రేమిస్సి వన్ని కొడెరె మీరు.

2 క్రీస్తు మిజి ప్రేమిస్తాండ్రె, మా వందిజ్ సాదెజ్ వన్నిజ్ వాండ్రె ఒపజెవె ఆతాన్. వాండ్రు వన్ని పాణం నెగ్గి వాసనం సీని పూజ లెకెండ్ సితాన్. దనివెట దేవుణు సర్ద ఆతాన్. అయావజ మీరుబా ఒరెన్ మరి ఒరెన్ వన్నిజ్ ప్రేమిసి మండ్రు.

3 మీ లోఇ ఎయెన్బా రంకు బూలమాట్. కేలార్ బూలమాట్. మని దనిజ్ ఇంక మరి నండో కావాలి ఇజి ఆస ఆమాట్. నిని పణి మీ లోఇ మంజినె ఇజి మహికార్ వెహైజ్బా సరి సీదెజ్ ఆవెద్. ఎందనిజ్ ఇహిజ, మీరు దేవుణు లోకుర్.

4 గాని మీ లోఇ కేడి మాటనో, బుద్ది సీలి మాటనో వెంజి, సిగు ఆని మాటెజ్నో వర్గిదెజ్ ఆవెద్. అయాకెజ్ మిజి తగ్గె. గాని దేవుణుదిజ్ వందనమ్కు మీరు వెహైజ్.

5 యాక మీరు తప్వండ నెస్తు రంకు బూలానికాన్, కెలార్ బూలానికాన్, మని దనిజ్ ఇంక మరి నండో కావాలి ఇజి ఆస ఆనికాన్ ఎయెన్బా దేవుణుని క్రీస్తు ఏలుబడిః కిని లోకుర్ లోఇ మన్వెర్. అబె అక్కు మనికార్ ఆవెర్. మని దని ఇంక మరి నండో కావాలి ఇజి ఆస ఆనికాన్, బోమెజ మాడిఃస్సి వన్నిలెకెండ్ మనాన్. వాండ్రు వన్నిజ్ కావాలి ఇజి ఆస ఆని దనిజె దేవుణు ఇజి ఒడిఃబినాన్.

6 పణిదిజ్ రెఇ మాటెజ్ వెప్పి ఎయెన్బా మిజి మొసెం కిఎండ సుడెఃదు. ఎందనిజ్ ఇహిజ, సెఇకెజ్ కిజి దేవుణుదిజ్ లోజిఎండ మని వరిజ్ వాండ్రు సిక్స సీనాన్.

7 అందెజె నని వరి వెట జత కూడ్మాట్.

8 ఎందనిజ్ ఇహిజ, ఉండ్రె కాలమ్దు మీరు సీకటుదు బత్తితిదెర్. గాని ఏలు మీరు ప్రబు వెట కూడితిదెర్ జాయిదు బత్తిజినిదెర్. అందెజె జాయిదు బత్తిజిని వరిలెకెండ్ బత్తిదు.

9 ఎందనిజ్ ఇహిజ జాయిదు బత్తిజినికార్, ఎస్తివలెబా నెగ్గికెజ్, నీతి మనికెజ్, నిజమాతికెజ్ కిజి మంజినార్.

10 ప్రబుజ్ ఇనికెజ్ ఇస్టం ఇజి నెసి అయావజ కిదెజ్ సుడెఃదు.

11 సీకటుదు మనికార్ కిని పణిదిజ్ రెఇ పణిజ వెట కూడ్మాట్. గాని అయాకెజ్ సెఇకెజ్ ఇజి లోకురిజ్ వెస్తు.

12 వారు సడి సిల్లెండ కిజిని పణిజ వందిజ్ వెహైజ్బా సిగునె.

13 గాని విజు వన్మాజ్ జాయి వెల్లి తపిస్సివలె అయాకెజ్ ఇనికెజ్ ఇజి లోకుర్ నెస్సార్. ఎందనిజ్ ఇహిజ, జాయి నిజమాతికెజె వెల్లి తోర్నాద్.

14 అందెజె వెప్పి మంజినార్, “నిద్ర కిజినికి తెలి ఆఅ. సాతి వరిబాణిజ్ నిజ్అ. క్రీస్తు నిజి జాయి సీనాన్”, ఇజి.

15 అందెజె మీరు ఎలాగ నడిఃజినిదెర్ ఇజి జాగర్త సుడెఃదు. బుద్ది సీలివరి లెకెండ్ ఆవండ, బుద్ది మని వరిలెకెండ్ నడిఃదు.

16 కాలం గడాప్పాట్. ఎందనిజ్ ఇహిజ ఏలు నెగ్గి దనిమ్కు ఆఉ.

17 అందెజె బుద్ది సీలిలెకెండ్ బత్తిమాట్. గాని ప్రబుజ్ ఇనికెజ్ ఇస్టం ఇజి నెసి అయాకెజ్ కిదు.

18 మతు సీనికెజ్ ఉణిజి సోసి మన్మాట్. ఎందనిజ్ ఇహిజ అయాక పాడు కినాద్. గాని దేవుణు అత్తుదాన్ నిండ్రెజి మండ్రు.

19 మీరు ఒరెన్ మరి ఒరెన్ వన్ని వెట వర్గిని వలె దేవుణు మాటెజ్ పాటెజ్ వజ వెప్పి, దేవుణుదిజ్ పొగిడిఃజి వందనమ్కు వెప్పి, దేవుణు అత్తు మీ మన్నుదిజ్ రేప్పిని వజ పాటెజ్ వెప్పి వర్గిదు. మీ మన్ను పూర్తిదాన్ ప్రబు అతి దేవుణుదిజ్ పాటెజ్ పార్తు.



20 మా ప్రబు ఆతి యేసు క్రీస్తు వెట మజి దోహక్తి మని విజు దని వందిజ్ ఎస్తివలెబా మా బుబ్బు ఆతి దేవుణుదిజ్ వందనమ్కు వెప్తు.

**దేవుణు సజమ్దిజ్ క్రీస్తు మాసి**

21 క్రీస్తుజ్ మీరు గవరం సీజినిదెర్. అందెజె ఒరెన్ మరి ఒరెన్వన్నిజ్ లోజిదు.

22 బోదెకాండె, మీరు ప్రబుజ్ లోజిజిని వజ మీ మాసిరిజ్ లోజిదు. మాసిరు మీ ముస్కు అతికారం మనికార్ ఇజి ఒడ్డిబిజి వరిజ్ లోజిదు.

23 ఎందనిజ్ ఇహిజు క్రీస్తు, విజు దేవుణు సజమ్కాజ్ బుర్ర ఆతి లెకెండ, మాసి వన్ని బోదెల్దిజ్ బుర్ర ఆత మనాన్. దేవుణు సజమ్కు విజు క్రీస్తు ఒడొల్నె. వాండ్రె విజు దేవుణు సజమ్కాజ్ రక్కిన్నికాన్.

24 విజు దేవుణు సజమ్కు క్రీస్తుజ్ లోజిజిని వజ, బోదెకుబా వన్కా మాసిరిజ్ విజు వన్కా లోఇ లోజిదెజ్.

25 మొగ్గ కొడొరాండె, మీరు మీ బోదెకాజ్ ప్రేమిస్తు. క్రీస్తు విజు దేవుణు సజమ్కాజ్ ప్రేమిసి విజు సజమ్క వందిజ్ సాతిలెకెండ మీరు మీ బోదెకాజ్ ప్రేమిస్తు.

26-27 క్రీస్తు ఎందనిజ్ విజు దేవుణు సజమ్కాజ్ వందిజ్ సాతాన్ ఇహిజు, విజు దేవుణు సజమ్కు సుబ్బురమ్దాన్ మండ్రెజ్ ఇజిని. వాండ్రు దేవుణు మాటదాన్, బాప్తిసమ్దాన్ సజమ్కాజ్ సుబారం కిత్తాన్. మరి సజమ్కు ఇని పాపం సిల్లెండ, నిందెజ్ సిల్లెండ, తకుజు సిల్లెండ, ఇని సెఇకెజ్ సిల్లెండ వన్ని ఎద్రు వాండ్రె నెగ్రెండ తోరిస్తెజె విజు దేవుణు సజమ్క వందిజ్ వాండ్రు సాతాన్.

28 అయలెకెండెనె క్రీస్తు విజు దేవుణు సజమ్కాజ్ ప్రేమిసినాన్. అయలెకెండెనె ఒరెన్ మాసి ఆల్నిజ్ ప్రేమిస్తెజ్. ముకెలం మాసిరు వరి సాంత ఒడొల్దిజ్ ప్రేమిన్ని లెకెండ, వరి బోదెకాజ్ ప్రేమిస్తెజ్ వలె. వన్ని బోదెల్దిజ్ ప్రేమిన్నికాన్ వన్నిజ్ వాండ్రె ప్రేమిస్తాన్.

29-30 ఎందనిజ్ ఇహిజు ఎయెస్బా వన్ని సాంత ఒడొల్దిజ్ దూసిన్ఎన్. గాని దనిజ్ నెగ్రెండ సుడ్డిబి పొస కినాన్. మాటు క్రీస్తు ఒడొల్దు అత్తిత మనాట్. అందెజె క్రీస్తు వన్ని ఒడొల్ ఆతి విజు దేవుణు సజమ్కాజ్ నెగ్రెండ సుడ్డిబినాన్.

31 యాక దేవుణు మాటదు రాస్తి మని లెకెండ మనాద్. అందెజె, “మొగ్గకొడొ వన్ని అయిసి అప్పొసిరుజ్ డిసి వన్ని బోదెల్ వెట కూడ్డినాన్. వారు రిఎర్ ఉండ్రె ఒడొల్ ఆనార్”.

32 యా మాటదిజ్ నండొ నిరి అర్దం మనాద్. గాని యా మాటెజ్ క్రీస్తు వెట విజు దేవుణు సజమ్కాజ్ మని సమదం వందిజ్ వెప్పొనికెజ్ ఇజి నాను ఒడ్డిబిజిన.

33 గాని యా మాటెజ్ మీ వందిజ్బా మనికాదె. ఒరెన్, వన్నిజ్ వాండ్రె ప్రేమిన్ని లెకెండ, వాండ్రు వన్ని బోదెల్దిజ్బా ప్రేమిస్తెజ్ వలె. మరి బోదెల్ మాసిజ్ గవరం సీదెజ్ వలె.

**6**

**కొడొరిజ్, అయిసి అప్పొసిరిజ్ వెప్పొనిక**

1 కొడొరాండె, మీరు ప్రబు వెట కూడితి మనికిదెర్. అందెజె మీ అయిసి అప్పొసిరిజ్ లోజిదు. యాక కిదెజ్ తగ్గికాదె.

2-3 దేవుణు మాటదు రాస్త మనాద్, “మీ అయిసి అప్పొసిరిజ్ గవరం సీదు. యాకదె దేవుణు వెప్తి ఆడ్రెజు లోఇ ఒట్టుదాన్ కూడితి మని మొదొహి ఆడ్ర. అయా ఒట్టు ఇనిక ఇహిజు, ‘మీరు మీ అయిసి అప్పొసిరిజ్ లోజితిజు విజు మిజి నెగ్రెండ మంజిని. మీరు నండొ పంటెజ్ యా బూమిదు బత్తినిదెర్’.

4 అప్పొసిరాండె, మీరు మీ కొడొరి మన్నుదిజ్ కోపం రేవ్మాట్. గాని ప్రబుజ్ ఇస్టం ఆతి వజ, వరిజ్ బుద్ది వెప్పొ, నెస్సిసి పొస కిదు.

**వెట్టిపణి కిని వరిజ్ ఎజమానిరిజ్ వెప్పొనిక**

5 వెట్టిపణి కినికిదెరా, బూమి ముస్కు మని మీ ఎజమానిరిజ్ లోజిదు. మీరు క్రీస్తుజ్ లోజిజిని లెకెండ వరిజ్ లోజిదు. మీరు పూర్తి మన్నుదాన్ వరిజ్ తియెల్ ఆజి వరిజ్ సీని గవరం సీజి లోజిదు.

6 నెగ్గికార్ ఇజి వెహె ఆదెజ్ వారు సూణివలెనె ఆవద్. వరిజ్ లోజిదెజ్. గాని మీరు కిదెజ్ ఇజి దేవుణు కోరిజిన వజ మీ పూర్తి మన్నుదాన్ కిదు. ఎందనిజ్ ఇహిజు మీరు క్రీస్తుజ్ వెట్టి పణిమణిసీర్.

7 మీరు పణిజ్ కిని వలె, లోకుర్ వందిజె కిజినాప్ ఇజి ఆవండ, దేవుణు వందిజ్ కిజినాప్ ఇజి సర్దదాన్ కిదు.

8 ఎందనిజ్ ఇహిజు వెట్టిపణి కినికాన్ ఆతిజ్బా, మరి ఎయెస్ ఆతిజ్బా మరి ఇని నెగ్గి పణి కినికాన్ ఆతిజ్బ ప్రబు పలితం సీనాన్ ఇజి మీరు నెసినిదెర్.

9 ఎజమానురుజాండె, మీరుబా మీ వెట్టిపణి మణిసిరిజ్ నెగ్రిండ నుడెదు. వరిజ్ బెద్రిస్మాట్. ఎందనిజ్ ఇహిజ మీరు నెస్సిదెర్, మిజిని వరిజ్ ఒరెన్ ఎజమాని దేవుణు మంజిని బాడిెదు మనాన్. ఇజ్రికాన్ పెరికాన్ ఇజి వన్నిజ్ తెడ సిల్లెద్.

సయ్తానుజ్ ఎద్రిస్సిక ఎలాగ ఇజి వెప్పినాన్

10 కడెవెరిదు నాను మిజి వెప్పిన, ప్రబు వెట మీరు కూడెజి వన్ని సత్తుదాన్ మండ్రు. ఎందనిజ్ ఇహిజ వన్ని సత్తు గొప్ప పెరిక.

11 దేవుణు సీజిని విజు అయుదమ్కు తొడిగిజి తయార్ ఆజి మండ్రు. సయ్తాను అడ్డుజ ఎద్రిసి గెలస్సివందిజ్ యా లెకెండ తొడిజి తయార్ ఆజి మండ్రు.

12 ఎందనిజ్ ఇహిజ, మాటు లోకుర్ వెట ఆవిద్ ఎద్రిస్సిక. గాని సీకటుదు మని లోకుర్ ముస్సు అతికారం కిజిని దెయమ్కు వెట, వన్కా నెయ్కిర్ వెట, ఆగాసమ్దు మని విజు దెయమ్కాజ్నె మాటు ఎద్రిసినాట్.

13 అందెజె మీరు దేవుణు సీజిని విజు అయుదమ్కు తొడిగిజి సయ్తానుజ్ ఎద్రిస్సిజ్ తయార్ ఆజి మండ్రు. నెఇ దినమ్కు వానివలె, దయరమ్దాన్ నిల్దెజ్ అట్టిదెర్. ఆకర్ దాక, మీరు దయరమ్దాన్ నిల్దెదెర్.

14 అందెజె మీరు దయరమ్దాన్ నిల్దెజ్ తయార్ ఆజి మండ్రు. ఒరెన్ విదెం కినికాన్ నడుముదు బెట్టు తొహె ఆజి విదెమ్దిజ్ తయార్ ఆజిని లెకెండ, దేవుణు వందిజ్ నిజమాతికెజ్ నమ్మిజి తయార్ ఆజి మండ్రు. గుండెదు కాడెఎండ మంజిని వందిజ్ ఇనుము కవనం తొడిగిజిని లెకెండ దేవుణు ఎద్రు నీతి నిజాయితిదాన్ మంజి, సయ్తాన్ బాణిజ్ తప్రె ఆదు.

15 జార్ఎండ నెగ్రిండ నిల్లి వందిజ్ బూట్టు తొడిగిని లెకెండ సమాదనం సీజిని సువార్త మాట నమ్మిజి, సయ్తానుజ్ ఎద్రిసి నెగ్రిండ నిల్దు.

16 యాకెజె ఆవిండ, ఒరెన్ ఉద్దం కినికాన్, వన్నిజ్ పడెఱకాన్ వన్ని ముస్సు పోక్కిని సిసు బాణమ్కు డాలు అసి నప్పి ఎద్రిస్సి లెకెండ, సయ్తాను బాణిజ్ తప్రె ఆదెజ్ ఎస్తివలెబా యేసు క్రీస్తు ముస్సు నమకం ఇడెజి నె మండ్రు.

17 బుర్దు దెబ తగ్గిఎండ మంజిని వందిజ్ గొప్ప గటి మని టోపి తొడిగిని లెకెండ దేవుణు మిజి రక్సిన్త మనాన్ ఇజి నెసి నమ్మిజి సయ్తాన్ మిజి బాదెజ్ కిఎండ వన్ని బాణిజ్ దూరం మండ్రు. కిదు కూడం అసి తయార్ ఆతి లెకెండ, దేవుణు మాటదాన్ సయ్తానుజ్ ఎద్రిస్సిజ్ తయార్దాన్ మండ్రు. దేవుణు ఆత్మ మిజి సీజిని కూడెమ్నె దేవుణు మాట.

18 దేవుణు ఆత్మ మన్నుదు వెప్పి నడిపిస్సి లెకెండ ఎస్తివలెబా పార్దనం కిదు. దేవుణు బాణిజ్ సాయం లొస్తు. మీరు ఎస్తివలెబా పార్దనం కినివలె బదకమ్దాన్ పార్దనం కిమాట్. పార్దనం డిెస్మాట్. దేవుణు వందిజ్ కేట ఆతి లోకుర్ విజెరె వందిజ్ ఎస్తివలెబా పార్దనం కిదు.

19 నా వందిజ్బా పార్దనం కిదు. నాను వర్గిని వలె నెగ్గి మాట నా వెయిదు దేవుణు సీని లెకెండ, ఎందనిజ్ ఇహిజ, సువార్తదు ముజాలె డాజితి మహి. గాని ఏలు దేవుణు తోరిసి నెన్పిస్తి గొప్ప సజతిజ్ వెల్లి తసి దయిరమ్దాన్ లోకురిజ్ తోరిస్సెజ్.

20 యా సువార్త వెప్తాజ్, వన్ని కబ్బు తనివన్ని లెకెండ యేసుక్రీస్తు నజి ఏర్పాటు కిత్తాన్. దిని వందిజె ఏలు నాను జెలిదు మన. అందెజె నాను నెగ్రిండ దయిరమ్దాన్ వెప్తాజ్, మని లెకెండ వెప్తాజ్ నా వందిజ్ పార్దనం కిదు.

21 మాటు ప్రేమ కిజిని మా తంబెరి ఆతి తుకికు, నా వందిజ్ మిజి విజు వెహ్నాన్. నాను ఇనిక కిజిని, ఎలాగ మన ఇజి మీరు నెస్సెజ్ నా వందిజ్ వాండ్రు వెహ్నాన్. వాండ్రు ప్రబు వందిజ్ నమ్మకమ్దాన్ సేవ పణి కిజినికాన్.

22 మజి జర్గిని దని వందిజ్ మిజి వెప్తాజ్, మిజి దయిరం మాట వెప్పి ఓదరిస్సెజ్, దిని వందిజె నాను వినిజ్ మీ డగ్రు పోక్కిన.

23 మా బుబ్బు ఆతి దేవుణుని మా ప్రబు ఆతి యేసు క్రీస్తు, తంబెరిజు ఆతి మీరు విజెరె, నిపాతిదాన్ మండ్రెజ్ సాయం కిపిన్. మీరు మహి వరిజ్ ప్రేమిని మండ్రెజ్ క్రీస్తుజ్ నమ్మిజి నె మండ్రెజ్ సాయం కిపిన్.

24 కొన సిల్లెండ, మా ప్రబు ఆతి యేసు క్రీస్తుజ్ ప్రేమిస్సి విజెరిజ్ దేవుణు దయ దర్మం మనీద్.

## అపొస్తుడు ఆతి పవులు పిలిపియ పట్టుమ్దు మని దేవుణు సజమ్దిజ్ రాస్తి ఉత్తం నెల్వ కిబిస్సిక

అపొస్తుడు ఆతి పవులు పిలిపియ పట్టుమ్దు మని దేవుణుదిజ్ నమ్మిత్తి వరి సజమ్దిజ్ రాసిని ఉత్తమ్నె యాక. యా సజం మొదొల్స్తికాన్ పవులునె. డగ్రు పది పంటెజ్ వెనుక, సువార్త వెప్పిని వందిజ్ పవులు జెలిదు మహివలె, యా సజమ్దికార్ వన్నిజ్ ఎత్తు కితారె, వరి లొఇ మని ఎపప్రాదితుజ్ వన్నిజ్ తోడుః కిని వందిజ్ పొక్కినార్. పవులుజ్ సాయమ్బా వన్ని వెట పొక్కినార్. వారు కితి యా నెగ్గి పణి వందిజ్ వరిజ్ వందనమ్కు వెప్పి రాసిని ఉత్తమ్నె యాక. నిజమాతి సర్ద యేసుక్రీస్తు బాణిజె వానాద్ ఇజి వెప్పి వరిజ్ దయరం కిబిసినాన్.

1 క్రీస్తు యేసు పణిమనిసి ఆతి పవులు ఇని నాను రాసిని ఉత్తం. క్రీస్తు యేసు పణిమనిసి ఆతి తిమోతి నా వెట మనాన్. పిలిపియ పట్టుమ్దు మని క్రీస్తు యేసు వెట కూడిఃతి మని దేవుణుదిజ్ కేట ఆతి విజెరిజ్, మరి సజం నడిఃపిన్ని ప్లాస్టర్జ, సజ పెద్దల్జ, రాసినిక.

2 బుబ్బు ఆతి దేవుణు ని ప్రబు ఆతి యేసు క్రీస్తు దయా దర్మమ్దాన్ మీరు నిపాతిదాన్ మండ్రెజ్ సాయం కిపిర్.

పవులు కిని పార్దనం

3 నాను ఎస్తివలెబా, మిజి ఎత్తు కినివలె, నా దేవుణుదిజ్ మీ వందిజ్ వందనమ్కు వెప్పిన.

4-5 మీరు సువార్త వెంజి, నమ్మిత్తి దినందాన్ మొదొల్ని ఏలుదాక, సువార్త సాటిస్సి వందిజ్ మీరు నా వెట జత కూడిఃతి మనిదెర్. అందెజె మీ విజెరె వందిజ్ నాను పార్దనం కినివలె, నాను సర్దదాన్ పార్దనం కిజిన.

6 మరి, మీ మన్పుదు నెగ్గి పణి మొదొల్స్తి దేవుణు, క్రీస్తు యేసు వాని రోజుదు అయాక పూర్తి ఆనిదాక, వాండ్రు నడిఃపినిసె మంజినాన్. యా సజతి, నాను అనుమానం సిల్లెండ పూర్తి నమ్మిజిన.

7 మిజి నాను నండొ పెమిన్సు. అందెజె మీ విజెరె వందిజ్ యా లెకెండ నాను ఒడఃబిదెజ్ తగ్గికాదె. ఎందనిజ్ ఇహిజ, నాను జెలిదు మనివలెబా, సువార్తదిజ్ విరోదం అతికెజ్ వెప్పి వరిజ్ నెగ్గెండ మర్జి వెప్పి, అయా సువార్త నిజం ఇజి లోకురిజ్ వెప్పి తోరిస్సి వలెబా, దేవుణు సజి సీతి యా గొప్ప పణిదు మీరు విజెరె నా వెట కూడిఃతి మనిదెర్.

8 క్రీస్తు యేసు మిజి ప్రేమిసిని వజనె, నానుబా మిజి ప్రేమిన్సు. మిజి విజెరిజ్ నండొ ఎత్తు కిజిన యాక నిజం ఇని దనిజ్ దేవుణునె సాక్కి.

9-11 నాను ఈహునె మీ వందిజ్ పార్దనం కిజిన ఇనిక వాతిజ్బా, మీరు ఒరెన్ మరి ఒరెన్ వన్నిజ్ నెగ్గెండ లావు ప్రేమిసి మండ్రెజ్ ఇజి పూర్తి నెస్టెజ్ ఇజి, మరి, ఇనిక వాతిజ్బా, నెగ్గెజ్ ఇని ఇనికెజ్, సెఇకెజ్ ఇని ఇనికెజ్ ఇజి మీరు పూర్తి నెస్టెజ్ ఇజి నాను పార్దనం కిజిన. నాను ఎందనిజ్ ఈహు పార్దనం కిజిన ఇహిజ, క్రీస్తు వాని రోజుదాక నెగ్గెక ఇనిక ఇజి టెట నెసి మీరు ఇని పాపం సిల్లెండ, ఇని నింద సిల్లెండ నెగ్గెండ మండ్రెజ్. మరి, యేసు క్రీస్తు సత్తుదాన్ మీ బత్తు. విజా పలితం వాని లెకెండ నీతి నిజయితిదాన్ మంజిని వందిజ్ నాను ఈహు పార్దనం కిజిన. నాను యా లెకెండ పార్దనం కిజిన, ఎందనిజ్ ఇహిజ, మీ బత్తు. సుడఃజి లోకుర్ దేవుణుదిజ్ గనం సీదెజ్, పొగిడిఃదెజ్.

పవులు జెలిదు మనిక సువార్త సాటె ఆని వందిజ్ నెగెద్

12 తంబెరిజాండె, నజి వాతి బాదెజ్ విజా, మరి నండొ లోకుర్ సువార్త విని వందిజ్ పణిదిజ్ వాతాద్ ఇజి మీరు నెస్టెజ్ ఇజి నాను కోరిజిన.

13 అందెజె, క్రీస్తు వందిజ్ సువార్త వెప్పిని వందిజ్నె తోహె ఆత మన ఇజి రాజు ఇండ్రొ మని జమనుజు విజెరెని మరి పట్టుమ్ది లోకుర్ విజెరె ఏలు నెస్టె మనార్.

14 మరి నాను తోహె ఆతి మనిజ్, నమ్మిత్తి తంబెరిజా లొఇ నండొడార్ దయరమ్దాన్ తియెల్ సిల్లెండ దేవుణు మాట వెప్పినార్. ఎందనిజ్ ఇహిజ, నాను జెలిదు మహివలె, ప్రబు ఎలాగ నజి సాయం కితాన్ ఇజి వారు సుడఃతార్. అందెజె, వారు ప్రబు మున్సు. నండొ నమకం ఇట్టా మనార్.

15-17 నిజమె, సెగొండార్ నా మున్సు గొస ఆజినార్. గొడుబెజ్ ఆజినార్. అందెజె వారు క్రీస్తు వందిజ్ వెప్పినార్. వీరు నెగ్గి మన్పుదాన్ ఆవిండ, పవులు మున్సు. మాపు పెరికాప్ ఇజి పొజె ఆని వందిజె క్రీస్తు వందిజ్ వెప్పినార్. ఈహు కితిజ,

నాను జెలిదు మనివలె, మరి నండో బాదెజ్ నజీ వానె ఇజి వారు ఒడఁబిజినార్. గాని మరి సెగొండార్ నెగ్గి బుద్దిదాన్ వెప్పినార్. వీరు నజీ ప్రేమిసినార్. సువార్దదిజ్ ఎద్రిన్సి వరిజ్, మర్జి వెప్పి నిజం ఇజి తోరిస్తెజ్ దేవుణు నజీ ఏర్పాటు కిత మనాన్ ఇజి వీరు నెసినార్. అందెజె వీరు నెగ్గి బుద్దిదాన్ వెప్పినార్.

18 వారు నా వందిజ్ ఇనిక ఒడఁబితిజ్బా, ఇనిక కిదెజ్ సుడఁబితిజ్బా నజీ ఇని తియెల్ సిల్లెద్. నెగ్గి బుద్దిదాన్ ఆతిజ్బా, సెఇ బుద్దిదాన్ ఆతిజ్బా, ఎలాగ ఆతిజ్బా, క్రీస్తు వందిజ్ వెహె ఆజినె. అయాకదె ముకెలం. దని వందిజ్ నాను సర్ద ఆజిన.

19 మరి, సర్ద ఆజినె మంజిన. ఎందనిజ్ ఇహిజ, మీ పార్దనమ్దాన్, యేసు క్రీస్తు నజీ సీతి దేవుణు ఆత్మ సాయమ్దాన్, నజీ ఏలు వాతి యా బాదెజ్ విజు, ఆకార్దు, నా విడుఁదల వందిజ్నె వాతె ఇజి నాను నెసిన.

20 నాను ఇని దని లొఇబా సిగు ఆవిండ మండ్రెజ్ ఇజినె నాను నండో ఎద్రు సుడఁబి ఆస ఆనిక. గాని ఎస్తివలెబా నాను కీతి లెకెండ, ఏలుబా నండో దయరమ్దాన్ క్రీస్తు గొప్ప పెరికాన్ ఇజి తోరిస్తు. ఎందనిజ్ ఇహిజ, నాను సాతిజ్బా, బత్తితిజ్బా క్రీస్తు గొప్ప పెరికాన్ ఇజి నాను కిజిని విజు పణిజాణిజ్ నాను తోరిస్తు.

21 అందెజె నాను బత్తిజిన ఇహిజ క్రీస్తు వందిజె. నాను సాతిజ నజీ లాబం. ఎందనిజ్ ఇహిజ, అయావలె నాను క్రీస్తు వెటనె మంజినలె.

22-23 గాని నాను బత్తిజి మహిజ, క్రీస్తు వందిజ్ పలితం వాని పణి కిదెజ్ అట్టు. అయావలె ఇనిక నాను కోరిదెజ్? సాదెజ్నా, బత్తిదెజ్నా? నాను నెన్ఎ. నాను రుండి వన్కాజ్ గుపె ఆజిన. యా లొకం డిసి క్రీస్తు వెట మండ్రెజ్ ఇజినె నా ఆస. ఎందనిజ్ ఇహిజ అయాకదె నజీ ఒదె నెగెద్.

24-25 గాని నాను బత్తిజినక, మిజి గొప్ప అవుసరం. యాక నాను పూర్తి నెసిన. అందెజె, నాను మంజి మీ విజెరె వెట కూడఁబి మండ్రెజ్ వలె ఇజి నెసిన. ఎందనిజ్ ఇహిజ, అయావలె, మీరు క్రీస్తుజ్ నెగ్రెండ నమ్మిజి మండ్రెజ్ సాయం కిని వందిజ్ నాను అట్టు. అయాలెకెండ మీరు నెగ్రెండ నమ్మిజినిజ్ మీరు సర్ద ఆనిదెర్.

26 అందెజె, నాను మీ వెట మరి కూడ్పివలె, క్రీస్తు మరి నజీ మీ నడిఁమి తపిస్తాన్ ఇని దని వందిజ్ క్రీస్తుయేసుజ్ పొగిడిఁనిదెర్లె.

27 ఇనిక ఆతిజ్బా, క్రీస్తు వందిజ్ వెప్పిని సువార్దదు మని దనిజ్ తగ్గి వజ నడిదు. ఎందనిజ్ ఇహిజ, నాను మీ డగ్రు వాజి, మిజి సుడఁబితిజ్బా, సీలిజ రెఎండ మీ వందిజ్ వెహిజ్బా, మీరు విజెరె సువార్దదు వెప్పిని నమకం వందిజ్ ఉండ్రె మన్ను కల్లిజి ఉండ్రె ఉదెసమ్దాన్ ఉండ్రె ఆజి నెగ్రెండ నిల్పిదెర్లె ఇజి నాను నెస్సాలె.

28 మరి, మిజి ఎద్రిన్సి వరిజ్, ఇని దని లొఇ మీరు తియెల్ ఆఇదెర్ ఇజి నాను నెస్సాలె. యాక దేవుణు వరిజ్ నాసనం కినాన్ ఇని దనిజ్ నెగ్గి రుజుప్ ఆనాద్. గాని దేవుణు మిజి ఎల్లకాలం రక్సిస్సాన్లె ఇని దనిజ్బా రుజుప్ ఆనాద్. దేవుణునె యాకెజ్ విజు కినాన్.

29 క్రీస్తుజ్ నమ్మిదెజ్నె ఆవిండ, వన్ని వందిజ్ కస్టమ్కు ఒరిస్తెజ్బా దేవుణు మిజి అక్కు సిత మనాన్.

30 అందెజె సువార్దదిజ్ విరోదం ఆతికెజ్ వెప్పివరిజ్ ఎద్రిన్సిజ్ కస్టబడిఁబి దనిజ్ మాటు ఉండ్రె ఆతాట్. నాను ముజాలె, పిలిప్పియదు మహివలె ఎద్రిన్సిజ్ కస్టబడిఁబితిక మీరు సుడఁబిదెర్. ఏలుబా కస్టబాడిఁబితిక వెంజినిదెర్.

## 2

1 క్రీస్తు వెట కూడిఁతి మనిజ్, మీ బత్తుదు దయరం మనాద్ గదె? క్రీస్తు మిజి ప్రేమిసిని ప్రేమదాన్ మిజి నిపాతి కల్లిత మనాద్ గదె? దేవుణు ఆత్మ వెట మిజి సమందం మనాద్ గదె? క్రీస్తు మీ వందిజ్ పాణం నొత మనాన్ గదె?

2 ఆహె మహిజ, మీరు ఉండ్రె లెకెండ ఒడఁబిజి, ఒరెన్ మరి ఒరెన్ వన్నిజ్ ప్రేమిసి, ఉండ్రె మన్నుదాన్, ఉండ్రె ఉదెసమ్దాన్ మంజి, నా సర్ద పూర్తి కిదు.

3 సొంత ఇస్టం వందిజ్ ఆవిండ, కీతి దని వందిజ్ నాను కిత ఇజి పొజె ఆవిండ, ఇనికబా కిదెజ్ గాని, మహికార్ నజీ ఇంక పెరికార్ ఇజి ఒడిఁబిజి, తగిజి మండ్రెజ్.

4 మీ లొఇ విజెరెబా, మీ సొంత పణిజె తొవిండ, మహి వరిజ్ సాయం కిదెజ్బా సుడఁబెజ్ వలె.

5 క్రీస్తుయేసుజ్ మహి యా మన్నునె మిజిబా మండ్రెజ్.

6 వాండ్రు ఎస్తివలెబా దేవుణు ననికాన్ ఆతిజ్బా, దేవుణు వెట సమానం ఆతికాన్ ఇజి, అయా అక్కు మండ్రెజ్ వలె ఇజి పట్టుతల కిఎతాన్.

7 గాని వాండ్రు వన్ని మన్నుదాన్, అయాక విజు డిస్తాండ్రె, ఒరెన్ పణి కిని వన్ని లెకెండ ఒడఁబిజి, లొకు ఆతాన్.

8 వాండ్రు ఒరెన్ లొకు ఆతండ్రె, వన్నిజ్ వాండ్రె తగి ఆతాన్. వాండ్రు దేవుణుదిజ్ లొజితాండ్రె, సాదెజ్బా వన్నిజ్ వాండ్రె ఒపజెపె ఆతాన్. గొప్ప సిగుదాన్ కూడిఁతి మని సిలువాదు సాని సాపు సాదెజ్బా వన్నిజ్ వాండ్రె ఒపజెపె ఆతాన్.

9 అందెజె దేవుణు వన్నిజ్ గొప్ప పెరికాన్ కితాండ్రె, మహి విజు పెర్కు మున్కు గొప్ప పేరు సితాన్.

10-11 దేవుణు యా లెకెండీసితాన్. ఎందనిజ్ ఇహిజు, పరలోకమ్దు మనికెజ్ విజు, బూమి మున్కు మనికెజ్ విజు సాతికారని మరి తోరకెకె విజు యేసు పేరుదు ముణుకుజ్ ఊర్జి మాడిసైజ్. విజు యేసుక్రీస్తు ప్రబు ఇజి వరి వెయ్దాన్ ఒప్పుకొండెజ్. అయ లెకెండ బుబ్బి ఆతి దేవుణుదిజ్ గొప్ప గనం సీజినార్.

12 అందెజె నాను ప్రేమిసినికిదెరా, దేవుణు రక్సిస్తి లోకుర్ కిదెజ్ తగ్గి పణిజ్, మీ లొఇ ఒరెన్ ఒరెన్ తియెల్దాన్ వణుకుదాన్ కిదెజ్ నండొ కస్టపడిదెజ్. ఎస్తివలెబా, మీరు నా మాట వెంజి లొజితిదెర్. నాను మీ వెట మనివలెనె ఆవండ, మీ వెట ఏలు సిలివలె, మరి ఒదె అయాక కిదెజ్ కస్టబాడిదు.

13 మీరు అయాక కిదెజ్ అట్టిదెర్. ఎందనిజ్ ఇహిజు, దేవుణుదిజ్ ఇస్టం కితి పణిజ్, కిదెజ్ ఇజి మీ లొఇ ఆస పుటిస్సికాన్ దేవుణునె. అయాక కిదెజ్ సాయం కినికాన్బా దేవుణునె.

14-15 మీరు విజు పణిజ్, ఒరెన్ వన్నిజ్ మొరొ ఆవండ, జటిజ్ ఆవండ కిదెజ్. ఎందనిజ్ ఇహిజు, మీరు మూర్కమ్ది వరి నడిమి, నెఇవరి నడిమి బత్కినివలె, నిందెజ్ సిల్లెండ, పాపం సిల్లెండ, ఇని తపు సిలి దేవుణు కొడొర్ ఇజి తోరె ఆదెజ్. మీరు నని వరి నడిమి మంజి, బత్కు సీని మాట మీరు నెన్పిస్సివలె, ఆగానమ్దు సుక్కెజ్ ఎలాగ జాయి సీజినానో, అయా లెకెండ మీరుబా మనిదెర్.

16 మీరు యా లెకెండ మహిజు, క్రీస్తు వాని దినమ్దు నాను గెలస్తి వన్నిలెకెండ సర్ద ఆదెజ్ అట్టు. ఎందనిజ్ ఇహిజు, నాను మీ నడిమి కస్ట బాడిజి కితి పణి, ఎందనిజ్ పణిదిజ్ రెవండ ఆవెతాద్ ఇజి మీ బత్కు రుజుప్ కినాద్.

17 మీరు సువార్త నమ్మిత్తివలె, మీ బత్కు దేవుణుదిజ్ సీతిదెర్. ఒరెన్ పుజెరి, దేవుణుదిజ్ పూజ సీనివలె, పూజ సీని దని మున్కు ద్రాక్కు పట్టు రసం వాక్తి లెకెండ, రోమ అతికారిజు నజీ సప్తిజు, నా నల మీ పూజ మున్కు వాక్తి లెకెండ ఆనాద్. అయ లెకెండ జర్గితిజు, నాను సర్ద ఆజిన. మీ విజెరె వెట సర్ద ఆజిన.

18 అయాలెకెండ మీరు విజిదెరెబా నా వెట నండొ సర్ద ఆదు.

### తిమోతిని ఎవప్రాదితు

19 తిమోతిజ్ మీ డగ్రు బేగి పొక్తెజ్ ప్రబు ఆతి యేసు నజీ తవ్వెండ సాయం కినాన్ ఇజి నాను ఆస ఆజిన. వాండ్రు నా వందిజ్ వెహ్సి, మిజి సర్ద కిబిస్సాన్. అయ లెకెండ వాండ్రు మర్జి వాజి మీ వందిజ్ వెహ్సిజు, నాను సర్ద ఆస. అందెజె తిమోతిజ్ మీ డగ్రు బేగి పొక్తెజ్.

20 మీరు నెగ్రెండ మండ్రెజ్ ఇజి నిజం ఆస ఆజినికాన్ వీండ్రె. మీ వందిజ్ వినిజ్ మని ఆస ననికాన్ మరి ఎయెన్బా నా డగ్రు సిలెన్.

21 మహికార్ విజెరె, వరిజ్ ఇస్టం ఆతి సొంత పణిజె సుడొజినార్. గాని యేసు క్రీస్తుజ్ ఇస్టం ఆతికెజ్ తొవర్.

22 గాని, తిమోతి నమ్మకమ్దాన్ ప్రబుజ్ సేవ కిజి నెగ్గికాన్ ఇజి రుజుప్ కితిక మీరు నెస్సిదెర్. అప్పొసి వెట మరిసి ఎలాగ కూడ్డి పణి కినాండ్రొ, అయాలెకెండ సువార్త నండొ లోకుర్ విని వందిజ్ నా వెట కూడ్డి సాటిస్సాన్.

23 అందెజె, ఇబ్బె నజీ జర్గిదిజ్ మనిక ఎలాగ జర్గినాద్ ఇజి నెస్తిజు, వెటనె నాను వినిజ్ మీ డగ్రు పొక్తెజ్ ఇజి నాను ఆస ఆజిన.

24 నానుబా బేగి మీ డగ్రు వాదెజ్ ప్రబు నజీ తవ్వెండ సాయం కినాన్ ఇజి నాను నమ్మిజిన.

25 ఎవప్రాదితుజ్ మీ డగ్రు మర్జి పొక్తెజ్ వలె ఇజి నాను బాగ ఎత్తు కిజిన. వాండ్రు నా తంబెరి ననికాన్. నా వెట జత కూడొజి పణి కినికాన్. క్రీస్తు వందిజ్ నా వెట కూడొజి నండొ కస్టబాడిజినాన్. నజీ అవ్వనరం మనివలె తోడొ మంజి సాయం కిదెజ్ మీరు నా డగ్రు పొక్తెజ్.

26 నాను వన్నిజ్ మీ డగ్రు మర్జి పొక్తెజ్. ఎందనిజ్ ఇహిజు, వాండ్రు మిజి విజెరిజ్ నండొ ఎత్తు కిజినాన్. వన్నిజ్ జబ్బు వాతాద్ ఇని మాట మీరు విహిదెర్ ఇజి నెస్సాండ్రె, మీరు వెహిదెర్ ఇజి నండొ బాద ఆజినాన్.

27 నిజమె, వాండ్రు నండొ కస్టం అర్చి సావు బత్కు ఆతాన్. గాని దేవుణు వన్ని మున్కు కనికారం తోరిస్తాన్. వన్నిజె ఆవండ, నా మున్కు బా కనికారం తోరిస్తాన్. వన్ని జబ్బు వందిజ్ దుకం ఆతి దని మున్కు వన్ని సావు వందిజ్బా దుకం ఆవండ మంజిని వందిజ్ నా మున్కు కనికారం తోరిస్తాన్. వన్నిజ్ నెగెణ్ కితాన్

28 అందెజె, మీరు వన్నిజ్ మరి సుడొజి సర్ద ఆని వందిజ్, నజీ మని దుకం తకు ఆని వందిజ్ గజి బిజి పొక్తెజ్ ఇజి ఒదె ఆస ఆజిన.

29-30 అందెజె, ప్రబు వెట కూడొతి మని వినిజ్ నండొ సర్దదాన్ డగ్రు కిదు. వాండ్రు క్రీస్తుజ్ సేవ కిని వందిజ్ సావు బత్కు ఆతాన్. మీరు నా వందిజ్ కిదెజ్ అట్ఇతి సాయం కిదెజ్, వాండ్రు వన్ని పాణం సీదెజ్బా గుసె ఆవండ కితాన్. అందెజె వినిజ్ గవ్వరం సీదు. విని నని వరిజ్బా గవ్వరం సీదు.

## 3

1 ఆకారీదు, నా తంబెరిజాండె, ప్రబు వెట మీరు కూడితి మనిదెర్. అందెజె, మీరు సర్ద ఆజినె మండ్రు. నాను ముజాలె సెగొండార్ సెజ వరి వందిజ్ వెహ్తా మన. అయా సజతిజ్ నె మరి మరి రాస్తిజ్ బా నాను వంద్. అయాక మిజి మొసెం కిని వరి బాణిజ్ తప్సిన్నాద్.

2 వెరి నుకుడిజు పొలితి వరి వరిజ్ జాగ్రత మండ్రు. వారు నండొ సెజ పణిజ్ కినికార్. దేవుణుదిజ్ నమ్మితి లోకు ఆని వందిజ్ మొగకొణ్డొర్ సునతి కిబె ఆదెజ్ వలె ఇజి వారు కసితం వెహ్సినార్. అయాక నిజం ఆవెద్. వారు పణిదిజ్ రెండొ ఒణ్డొల్ కొయ్ జినార్. అందెజె వరి వందిజ్ జాగ్రత మండ్రు.

3 నాను ఆహె వెహ్సిన. ఎందనిజ్ ఇహిజు, నిజమాతి సునతి కిబె ఆతికాట్ మాటె. వారు ఆవెర్. ఇహిజు, దేవుణుదిజ్ నిజమాతి లోకుర్ మాటె. దేవుణు అత్మదాన్ నె, మాటు దేవుణుదిజ్ పొగిడిజు మాడిసినాట్. క్రీస్తు యేసు మా వందిజ్ కితి దని వందిజ్ సర్ద ఆజినాట్. సునతి ముస్సు ఆవెద్, మా నమకం సునతి కితిజు, దేవుణు కొణ్డొర్ ఆదెజ్ ఆనాద్ ఇజి నమ్మివెట్.

4 అహిజు, యా లెకెండొ మని సజతిజు ముస్సు ఒరెన్ వన్నిజ్ నమకం ఇడెదెజ్ ఆనాద్ ఇహిజు, మహి వరిజ్ ఇంక నండొ వెహ్తాజ్ అట్టికాన్ నానె. దేవుణు కొణ్డొ ఆదెజ్ యా లెకెండొ మని సజతిజు కిదెజ్ ఆనాద్ ఇజి ఎయెన్ బా ఒణ్డొబితిజు, వన్ని ముస్సు మరి ఒదె వెహ్తాజ్ అట్టికాన్ నానె.

5 ఎందనిజ్ ఇహిజు, నాను పుట్టి ఎనిమిది రోస్కాజె నజి సునతి కిత్తార్. నాను ఇస్రావీలు జాతిదిదు మని బెనియమిను తెగ్గదు పుట్టికాన్. నా అనిగొగొర్ విజెరె ఎబ్రివారు. నానుబా పూర్తి ఎబ్రి వాండ్రునె. నాను పరిసయ వాండ్రు. దేవుణు మోసెజ్ సితి రూలుజ్ నాను పూర్తి లోజిత.

6 యా లెకెండొ కినిక దేవుణుదిజ్ ఇస్టం ఆతికాదెను ఇజి ఒడిబిజి, క్రీస్తు ముస్సు నమకం ఇట్టి వరిజ్ నాను నండొ బాదెజ్ కితికాన్. మోసెజ్ సితి రూలుజు లోజిజి, ఒరెన్, నీతి నిజాయితి మనికాన్ ఇజి తోరె ఆదెజ్ అట్టిజు, వన్ని లెకెండొ నానుబా తోరె ఆదెజ్ అట్టు. ఎందనిజ్ ఇహిజు, రూలుజు లోఇ ఇనికబా తప్వెత.

7 నజి లాబం వానిక ఇజి ఒడిబితి యా సజతిజ్ విజు, పణిదిజ్ రెఇక ఇజి నాను డిస్త సిత. క్రీస్తుజ్ నెస్సి వందిజె డిస్త సిత.

8-9 అయాకదె ఆవండ, నాను ముజాలె కిజి మహి విజు సజతిజ్ పణిదిజ్ రెఇక ఇజి నాను ఒడిబిజిన. క్రీస్తు యేసుజ్ నెస్సినికాదె విజు వన్కా ముస్సు గొప్ప విలువ మనిక. క్రీస్తు యేసుజ్ నెస్సి వందిజె యా సజతిజ్ విజు పణిదిజ్ రెఇక ఇజి డిస్త సిత. నాను క్రీస్తు వెట కూడెజు మంజిని వందిజ్, మరి, నాను పూర్తి క్రీస్తుయేసు వాండ్రు ఆని వందిజ్ నాను అయాకెజ్ విజు గుమమ్ది కనర ఇజి నాను ఒడిబిజిన. దేవుణు మోసెజ్ సితి రూలుదు మనికెజ్ లోజిజినెజ్ ఆవెద్ నాను నీతి నిజాయితి మనికాన్ ఆతిక. నాను క్రీస్తుయేసు ముస్సు నమకం ఇడ్డిజెనె, దేవుణు నజి నీతి నిజాయితి మనికాన్ ఇజి కూక్తాన్.

10-11 నాను క్రీస్తుజ్ పూర్తి నెస్టెజ్ ఇజినె నాను మరి మరి కోరిజిన. ముకెలం, వాండ్రు సావుదాన్ నిజితి వలె, దేవుణు వన్నిజ్ సితి సత్తు నజిబా కావాలి ఇజి నాను కోరిజిన. వాండ్రు నా వందిజ్ కస్టమ్కు ఓరిస్సి లెకెండొ నాను వన్నివందిజ్ కస్టమ్కు ఓరిసి వన్ని వెట కూడెజు మండ్రెజ్ ఇజి నాను కోరిజిన. వాండ్రు నా వందిజ్ సాతి లెకెండొ నాను వన్ని వందిజ్ సాదెజ్ ఇజి కోరిజిన. నాను సాతి వెనుక మర్జి బత్మిని బత్తు ఎలాగ్ బా నజి దొహ్పిద్ ఇజినె నాను అయా లెకెండొ కోరిజిన.

12 నాను క్రీస్తు లెకెండొ పూర్తి ఆత ఇజి నాను వెహ్. ఇహిజు, దేవుణుదిజ్ ఇస్టం ఆతి వజ నాను పూర్తి ఆతమన ఇజి వెహ్. గాని క్రీస్తుయేసు నజి కూక్తివలె, నాను ఎలాగ మండ్రెజ్ ఇజి వాండ్రు కోరిత మనాండ్రొ, దని వందిజ్ నాను కస్టబడిజిన.

13 తంబెరిజాండె, క్రీస్తు లెకెండొ నాను పూర్తి ఆత ఇజి నాను వెహ్. గాని ఉండ్రె సజతి నాను కిజిన. నాను ముజాలె కిజి మహి వన్కాజ్ పొసి, నాను బత్మిజిని బత్తు అంతు క్రీస్తు లెకెండొ మండ్రెజ్ ఇజి నాను సుడెజు కస్టబాడిజిన.

14 అందెజె దేవుణు నజి పరలోకమ్దు కూక్తి సీని ఇనాయం లొస్సి నా గురి వందిజ్, నాను కస్ట బాడిజిన. ఎందనిజ్ ఇహిజు, క్రీస్తుయేసు ముస్సు నాను నమకం ఇట్టా మన.

15 అందెజె, నమకమ్దు పూర్తి పిరీతి మాటు విజెటి, ముజాలె వెహ్టి వజ మండ్రెజ్ ఇజి, ఉండ్రె మన్ను మండ్రెజ్. గాని ముజాలె వెహ్టి ఇని దని లోఇబా మిజి మరి ఉండ్రె మన్ను మహిజు, దేవుణు అయాకబా మిజి వెహ్టి తోరిస్సాన్.

16 దేవుణు మిజి వెహ్టి తోరిస్సి వజ మాటు మండ్రెజ్ ఇనికాదె ముకెలం ఆతిక.

17 తంబెరిజాండె, మీరు విజెరె, నజి సుడెజు నడిదు. మాపు నడితి వజ నడిజిని వరిజ్ సుడెజు మీరు నడిదు.

18 ఎందనిజ్ ఇహిజ, నండొండార్ నమ్మిత్తికావ్ ఇజి వెహె ఆనికార్, క్రీస్తు సిలువాదు సాతి ఉదెనమ్దిజ్ పడిఁఎండ మనార్ ఇజి వరి బత్తుదాన్ తోరిసినాద్. నిని వరి వందిజ్ నాను ముజాలె మిజి నండొ సుట్టు వెహ్తా మన. ఏలు వరి వందిజ్ నాను వెహ్తా వలె, అడఁబాజినె వెహ్సిన.

19 దేవుణు వరిజ్ నాసనం కినాన్. వారు ఒడొలది ఆన వందిజె బత్తిజినార్. దేవుణుదిజ్ సర్ద కిబిస్తెజ్ బత్తిఎర్. సిగు తపిస్సి పణిజె వారు కిజినార్. వన్కా లొఇనె సర్ద ఆజినార్. యా లొకమ్ది పణి కిదెజె వారు ఎత్తు కినార్.

20 గాని మాటు పరలోకమ్దు మనికాట్. అబెణిజ్ వాని, మజి రక్కిస్సి వన్నిజ్ మాటు ఎద్దు సుడఁజినాట్. వాండ్రు ప్రబు ఆతి యేసు క్రీస్తు.

21 వాండ్రు మర్జి వానివలె, మా సత్తు సిలి సబ్జి సాని ఒడొలదిజ్, వన్ని సత్తు మని సబ్జి ఒడొలె లెకెండ్ కినాన్. విజు వన్కాజ్ అతికారం కిని వన్ని గొప్ప సత్తుదాన్, వాండ్రు యా లెకెండ్ మా ఒడొలదిజ్ కినాన్.

## 4

1 అదెజె నా తంబెరిజాండె, ముజాలె నాను నెస్పిస్తి దని వజ మీరు ప్రబు ముస్కు మని నమకం డిన్ఎండనె మండ్రు. మీరు నా లెకెండ్ దేవుణుదిజ్ నమ్మిత్తికిదెర్. మీరు నజి నండొ ఇన్ఠం ఆతికిదెర్. మీ వెట మండ్రెజ్ నాను నండొ ఆన ఆజిన. మీరె నజి నండొ సర్ద కిబిస్సికిదెర్, నజి నెగ్గి పేరు తపిస్సికిదెర్.

2 ఓ యువొదియ సుంటుకె మీరు కూడఁజి పాడఁజి మండ్రు ఇజి నాను మిజి బతిమాల్జిన. ఎందనిజ్ ఇహిజ, మీరు ప్రబు లొక్కు.

3 మరి, నా వెట సేవ పణి కినికి, నీను నమ్మిదెజ్ తగ్గికి. నీను యా బొదెక్ కూడఁజి పాడఁజి మంజిని లెకెండ్ వెహ్తా ఇజి నాను నిజి వెహ్సిన. ఎందనిజ్ ఇహిజ, క్రీస్తు వందిజ్ సువార్త సాటిస్తెజ్ నా వెట నండొ కన్ఠబాడితె. మరి, క్లెమెంతు వెట, నా వెట జత పణి కిని మహి వరి వెటబా కూడఁజి సువార్త సాటిస్తెజ్ అవికు నండొ కన్ఠబాడితె. ఎలాకాలం దేవుణు వెట బత్తిని వరి పేర్కు రాసి ఇడ్డిని పున్ఠకమ్దు వాండ్రు వన్కా పేర్కు రాస్త మనాన్.

4 ఎన్ఠివలెబా మీరు సర్ద ఆదు. ఎందనిజ్ ఇహిజ, మీరు ప్రబు లొకుర్. నాను మరిబా వెహ్సిన, సర్ద ఆదు.

5 మీరు విజెరె వెట సార్లిదాన్ మంజిన ఇజి తోరిస్అ. ప్రబు బేగి వానాన్ ఇజి పొస్మాట్

6 ఇని దని వందిజ్బా విసారిస్మాట్. గాని ఎలాగ మర్తి సమయమ్దుబా, మహిజ్బా, సిలిజ్బా, దేవుణుదిజ్ పార్దనం కిదెజ్. మిజి మని అవ్సరమ్కు వన్నిజ్ వెహ్తాజ్. వన్ని సాయం మీరు లొస్తెజ్. వన్నిజ్ ఎన్ఠివలెబా వందనమ్కు వెహ్తాజ్.

7 అయావలె, దేవుణు వన్ని సమాదనం మీ మన్నుదు, మీ గర్భమ్దు మిజి కాపాడఁదెజ్ సీనాన్. ఎందనిజ్ ఇహిజ, మీరు క్రీస్తు యేసు వెట కూడితి మనికిదెర్. యా సమాదనం లొకుర్ అర్దం కిదెజ్ అట్ఇక.

8 నా తంబెరిజాండె, ఆకార్దు, నాను ఉండ్రె వెహ్సిన. మీరు ఈహు ఒడిఁబిజి మండ్రెజ్ ఇజి నాను వెహ్సిన. నిజమాతి వన్కాజ్, లొకుర్ గవ్సరం సీదెజ్ తగ్గి వన్కాజ్, నాయం మని వన్కాజ్, పాపం సిలి వన్కాజ్, లొకుర్ ఇన్ఠం కిదెజ్ తగ్గి వన్కాజ్, గొప్ప పేరు తపిస్సి వన్కాజ్, లొకుర్ పొగిడిని వన్కాజ్ మీరు ఒడిఁబిజి మండ్రు.

9 మరి నాను మిజి నెస్పిస్తికెజ్, మీరు నమ్మిత్తికెజ్, కిజినె మండ్రు. నా బాణిజ్ మీరు విహికెజ్, నాను కిజినికెజ్ మీరు సుడఁతికెజ్ కిజినె మండ్రు. అయావలె, సమాదనం మిజి సీజిని దేవుణు మిజి తోడుఁ మంజినాన్.

### నజి సీజిని సాయం వందిజ్ వందనమ్కు

10 సెగం రొస్కు డిఁస్సిదెర్, నజి ఎత్తు కిజినాప్ ఇజి ఏలు మీరు తోరిస్సి వందిజ్ నాను ప్రబుజ్ సర్ద ఆజి వందనమ్కు వెహ్సిన. మీరు ఎన్ఠివలెబా నజి ఎత్తు కిజినె మహిదెర్ ఇజి నాను నెన్ను. గాని నజి సాయం కిజి ఎత్తు కిజినాప్ ఇజి మిజి తోరిస్సిజ్ అవకాసం దొహ్కావతాద్.

11 నజి అవ్సరం మనిజ్ ఇజి అవ్ ద్ యా లెకెండ్ వెహ్సినక. ఎలాగ మర్తి సమయమ్దుబా నజి మనికాదె సాలు ఇజి సరి కిదెజ్ నెస్త మన.

12 ఇహిజ, నజి కావాలస్తికెజ్ విజు సిలితివలె ఎలాగ మండ్రెజ్ ఇజి నాను నెసిన. నండొ మనివలె ఎలాగ మండ్రెజ్ ఇజిబా నాను నెసిన. ఎలాగ మర్తి సమయమ్దుబా సరి కిబె ఆదెజ్ నాను నెస్త మన. పొట పంజితి వలెబా, బజ కట్టిని వలెబా, నండొ మనివలెబా, ఇనిక సిలివలెబా సరి కిబె ఆదెజ్ నాను నెస్త మన.

13 యా లెకెండ్ సరి కిబె ఆదెజ్ విజు నాను అట్సిన. ఎందనిజ్ ఇహిజ, క్రీస్తు నజి సత్తు సీజినాన్.

14 అహిజ్బా, ఏలు యా లెకెండ్ నాను కన్ఠమ్దు మనివలె, మీరు నజి సాయం కితిదెర్. నెగ్గి పణినె కితిదెర్.

15 పిలిప్పీయదు మని నమ్మిత్తికిదెరా, మీరు నెస్సిదెర్ నాను సువార్త వెహ్తాజ్ మొదొల్ని తొలి రొస్కాజ్, నాను మసిదొనియ రాన్ఠ్రం డిఁస్తి వాతివలె, మీ సజమ్దికిదెరె నజి సితిదెర్, నా బాణిజ్ లొస్ ఆతిదెర్. మరి ఎమేణి సజమ్దికార్బా సివెతార్.

16 మరి నాను తెసెలోనికయ పట్టుమదు మహివలెబా నజి అవ్సరం మహివలె మీరు ఉండ్రీ సుటునె ఆవండ నండొ సుట్టు డబ్బు పోక్తిదెర్.

17 మీరు యా లెకెండ మరి డబ్బు పోక్తెజ్ ఇజి నాను ఆస ఆజి వెహ్ఎ. గాని మీరు యా లెకెండ సీతి దనిజ్ దేవుణు మిజి నండొ దీవిన్పిన్ ఇజినె ఆస ఆజిన.

18 ఏలు నజి సరి ఆని నసా మనాద్. మరి నండొబా మనాద్. మీరు ఎపప్రాదితు వెట పోక్తికెజ్ వాండ్రు తత సితాన్. అందెజె ఒదె నండొ మనాద్. మీరు నజి సీతిక, దేవుణుదిజ్ సీజిని వాసనం మని పూజ లెకెండ మనాద్. వాండ్రు దని వెట సర్ద అతండ్రె డగ్గు కితాన్.

19 మరి, నా దేవుణు, మీ అవ్సరం విజు తీరిస్నాన్. లెక్క సిల్లి వన్ని నండొ ఆస్తిదాన్ మాటు బమ్మ ఆని లెకెండ తీరిస్నాన్. ఎందనిజ్ ఇహిజ, క్రీస్తు యేసు వెట కూడిఃతి మనికిదెర్.

20 మా బుబ్బు ఆతి దేవుణుదిజ్ అంతు సిల్లెండ ఎల్లకాలం గవ్సరం మనిద్. ఆమెన్.

21 క్రీస్తుయేసు ముస్కు నమకం ఇట్టి దేవుణు లోకుర్ ఆతి విజెరిజ్ నాను వెన్బాతి లెకెండ వెప్తు. నా వెట మని తంబెర్జు మిజి వెన్బాతి లెకెండ వెప్సినార్.

22 ఇబ్బె మని దేవుణు లోకుర్ విజెరె, ముకెలం కయ్సరు రాజు ఇండ్రొ పణి కిజిని నమ్మిత్తికార్ మిజి వెన్బాతి లెకెండ వెప్సినార్.

23 ప్రబు ఆతి యేసు క్రీస్తు దయా దర్మం మిజి తోడు మనిద్. ఆమెన్.



## అపొస్తుడు ఆతి పవులు కొలోసు పట్టుమదు మని దేవుణు సజమ్దిజ్ రాస్తి ఉత్తం నెల్వ కిబిస్సిక

అపొస్తుడు ఆతి పవులు కొలోసి పట్టుమదు మని దేవుణు సజమ్దిజ్ రాసిని ఉత్తమ్నె యాక. వాండ్రు రోమ జెలిదు పొకె ఆతి మహివలె రాస్తికాదె. పవులు ఎనెజ్బా కొలోసి పట్టుమదు సాన్వతాన్. వాండ్రు దేవుణు దరోట్ నడిఃపిస్తి ఎపప్రాదితునె యా పట్టుమదు దేవుణు సజం మొదొల్స్తాన్.

యా లోకమ్దు మని దేవుణుదిజ్ నమ్మిత్తికార్ విజెరె కూడిఃతి మని సజమ్దిజ్ బుర లెకెండ క్రిస్తు మనాన్. వన్ని ఒణెఃల్ దేవుణు సజం. వాండ్రు విజు వన్కాజ్ ముజాలె మనికాన్. విజు తయార్ కితికాన్ వాండ్రె. విజు అతికారమ్క మున్కు అతికారం మనికాన్ వాండ్రె ఇజి ఎత్తు కిబిసి రాసినాన్.

నమ్మిత్తికార్ యా లోకమ్ది సజతిజ మున్కు మన్సు ఇఢ్ఃఎండ, పరలోకమ్దు మని సజతిజ మున్కు మన్సు ఇఢ్ఢెజ్ ఇజి వెప్పినాన్. నమ్మిత్తికార్ ఎలాగ నడిఃదెజ్ ఇజిబా యా ఉత్తమ్దు రాసి వెప్పినాన్.

1-2 క్రిస్తు యేసు వందిజ్ అపొస్తుడు ఆతి పవులు ఇని నానుని, మా తంబెరి ఆతి తిమోతి కొలోసి పట్టుమదు మని దేవుణు వందిజ్ కేట ఆతి వరిజ్ రాసిని ఉత్తం. దేవుణు ఎత్తు కితి వజనె నాను క్రిస్తు యేసు వందిజ్ అపొస్తుడు ఆత. మీరు నమ్మిదెజ్ తగ్గి తంబెరిబు. మా బుబ్బు ఆతి దేవుణు దయ దర్మమ్దాన్, మీరు నిపాతిదాన్ మండ్రెజ్ సాయం కిపిన్.

3 మాపు మీ వందిజ్ ఒణెఃబిజి పార్దనం కినివలె, ఎస్తివలెబా మా ప్రబు ఆతి యేసుక్రిస్తుజ్ బుబ్బు ఆతి దేవుణుదిజ్ వందనమ్కు వెప్పినాన్.

4 ఎందనిజ్ ఇహిజ, మీరు క్రిస్తు యేసుజ్ నమ్మిజినిదెర్ ఇజి, దేవుణు వందిజ్ కేట ఆతి లోకుర్ విజెరిజ్ ప్రేమిసినిదెర్ ఇజి మాపు వెహ మనాప్.

5 మీరు యా లెకెండ, క్రిస్తుయేసుజ్ నమ్మిజినిదెర్, దేవుణు వందిజ్ కేట ఆతి లోకురిజ్ విజెరిజ్ ప్రేమిసినిదెర్. ఎందనిజ్ ఇహిజ, నిజమాతి బోద, ఇహిజ, సువార్త మీరు వెహివలె, దేవుణు పరలోకమ్దు మీ వందిజ్ ఇడ్డి మని దని వందిజ్ ముజాలె మీరు వెహి మనిదెర్. అయాక తవ్వెండ దొహ్క్వాద్ ఇజి దని వందిజ్ ఆసదాన్ ఎద్దు సుడఃజినిదెర్.

6-7 లోకమ్ది నండొ దేసమ్కాజ్ యా సువార్త వెహి ఆతి లెకెండ, మీ నడిఃమిబా వెహి ఆత మనాద్. మీరు అయాక వెంజి దేవుణు దయ దర్మం నిజం ఇజి నెస్తి బాణిజ్ అసి మీ నడిఃమి అయా సువార్త నెగ్గి పణి కిజినాద్. మీ నడిఃమి అయా సువార్త నెగ్గి పణికిజిని లెకెండ మహి లోకురిజ్బా నెగ్గి పణి కిబిస్సాద్. మరి, నండొ నండొ లోకుర్ సువార్త నమ్మిజినార్. ఎపప్రానె మిజి సువార్త నెస్తిపిస్తి. మాపు వన్నిజ్ ప్రేమిస్సాప్. మజి బదులు వాండ్రు క్రిస్తుజ్ అబె సేవ కిజినాన్. మీ మేలు వందిజ్ నమకమ్దాన్ వాండ్రు క్రిస్తుజ్ సేవ కిజినాన్.

8 దేవుణు అత్తు మీ లొక పుటిస్తి ప్రేమదాన్, మీరు దేవుణు వందిజ్ కేట ఆతి లోకుర్ విజెరిజ్ ప్రేమిసినిదెర్ ఇజిబా వాండ్రు మజి వెప్తా మనాన్.

9 అందెజె, మీ వందిజ్ వెహి బాణిజ్ అసి, డిఃఎండ ఎస్తివలెబా మీ వందిజ్ దేవుణుదిజ్ పార్దనం కిజినాప్. మీ బత్తుదు మీరు కిదెజ్ ఇజి దేవుణు కోరిజిన విజు సజతిజ్ మీరు బాగ నెస్తిజ్ ఇజి పార్దనం కిజినాప్. ఇహిజ మీరు, దేవుణు అత్తు సిజిని విజు గెణం, బుద్ది మనికిదెర్ అదెజ్ ఇజి మాపు పార్దనం కిజినాప్.

10 మాపు ఎందనిజ్ యా లెకెండ పార్దనం కిజినాప్ ఇహిజ, దేవుణు కోరిజిన వజ మీరు బత్తిజి, వన్నిజ్ సర్ద కిబిస్సికెజ్ ఎస్తివలెబా కిదెజ్. ముకెలం, మీరు విజు రకమ్కాణి నెగ్గి పణి కిని వందిజ్, దేవుణుదిజ్ నిజం మరి లావు నెస్తి వందిజ్ మాపు యా లెకెండ పార్దనం కిజినాప్.

11 దేవుణు, లోకురిజ్ తోరిస్తి గొప్ప బమ్మ కిని వన్ని సత్తుదాన్ మీరు సత్తు మనికిదెర్ ఆని వందిజ్ యా లెకెండ పార్దనం కిజినాప్. ఎందనిజ్ ఇహిజ, ఎస్తివలెబా విజు బాదెజ, సర్దదాన్ విజు ఓరిసి, బరిసి మండ్రెజ్, మీరు సత్తు మనికిదెర్ అదెజ్. అందెజె యా లెకెండ పార్దనం కిజినాప్.

12 మరి, దేవుణు ఏలుబడిఃదు ఇహిజ గొప్ప జాయిదు వన్ని వందిజ్ కేట ఆతి లోకుర్ వందిజ్ వాండ్రు తయార్ కితి ఇడ్డి మని విజు దని లొక మిజిబా అక్కు మండ్రెజ్ తగ్గి వరి లెకెండ మిజి కితి దని వందిజ్ బుబ్బు ఆతి దేవుణుదిజ్ వందనమ్కు వెప్పినె మండ్రెజ్ ఇజి మాపు మీ వందిజ్ యా లెకెండ పార్దనం కిజినాప్.

13 దేవుణు మజి నయ్తాన్ అతికారం అడిగి సీకటుదు తొహ ఆతి బాణిజ్ తప్రిస్తాండ్రె వాండ్రు ప్రేమిసిని వన్ని మరిన్ అతికారం అడిగి మజి తతాన్.

14 వన్ని మరిన్ ఆతి దనితాన్ దేవుణు మజి విడుడల కిత్తాన్. ముకెలం, మా పాపమ్కు వాండ్రు సెమిస్త మనాన్.

### క్రీస్తు విజు వన్కా మున్కు గొప్ప పెరికాన్

15 తోరెద దేవుణు మూర్తి నె క్రీస్తు. దేవుణు ఎలాగ మనాన్ ఇజి వీండ్రు తోరిస్తాన్. దేవుణు విజు తయార్ కిని ముజాల వీండ్రు మహాన్. తయార్ కితి విజు వన్కా మున్కు అతికారం మనికాండ్రె క్రీస్తు.

16 ఎందనిజ్ ఇహిజ, వన్నినవెటనె దేవుణు విజు తయార్ కిత మనాన్. బూమిదు మనికెజ్, ఆగాసమ్దు మనికెజ్, తోర్నికెజ్, తోరెకెజ్, ముకెలం గొప్ప సత్తు మని విజు రకమ్కాణి అతికారం కిని విజు దూతెజ దెయమ్కాజ్, విజు వన్ని వెటనె దేవుణు తయార్ కిత్తాన్. విజు క్రీస్తు వెటనె తయార్ కిత్తాన్. విజు వన్నిజ్ గవరం సీని వందిజె దేవుణు తయార్ కిత్తాన్.

17 క్రీస్తు, విజు తయార్ ఆని ముజాల మనికాన్. విజు వన్కాజ్ వాండ్రు కుడుప్పి అస్త మనాన్.

18 వన్ని ఒడొల్ ఆతి దేవుణు సజమ్దిజ్ బుర్ర వాండ్రె. వన్ని బాణిజె దనిజ్ కొత్త బత్తు వాజినాద్. ఎందనిజ్ ఇహిజ, సాతి వరి బాణిజ్ ముజాల్ మర్జి బత్తితి మనికాన్ వాండ్రె. విజు వన్కా మున్కు గొప్ప పెరికాన్ ఆని వందిజె, సాతి వరి బాణిజ్, ముజాల్ మర్జి బత్తిత మనాన్.

19 ఎందనిజ్ ఇహిజ, వన్ని లొఇనె వన్ని బుబ్బ ఆతి దేవుణు వెల్తి సిల్లెండ పూర్తి మండ్రెజ్ ఇజి తీర్మనం కిత్తాన్.

20 అందెజె, మరిన్ వెటనె బూమిదు మని విజు వన్కాజ్, పరలోకమ్దు మని విజు వన్కాజ్, వన్ని డగ్రు మర్జి కుడుప్పెజ్ ఇజి దేవుణు తీర్మనం కిత్తాన్. వన్ని మరిన్ సిలువాదు సాతివలె, నల వాక్తి దనితాన్, దేవుణు బూమిదు మని విజు వన్కా వెట, దేవుణు మంజిని పరలోకమ్దు మని విజు వన్కా వెట రాజినం ఆతండ్రె, విజు వన్కాజ్ వన్ని డగ్రు మర్జి కుడుప్పాన్.

21 ఉండ్రె కాలమ్దు, మీరు కితి సెఇ పణిజాణిజ్, సెఇ ఆలోసనెజాణిజ్ దేవుణు బాణిజ్ దూరం మహిదెర్. దేవుణుదిజ్ పడిఎండ మహిదెర్.

22 గాని ఏలు, వన్ని మరిన్ ఒరెన్ లోకు ఆజి సాతి సావుదాన్ వాండ్రు మీ వెట రాజినం ఆతాన్. ఎందనిజ్ ఇహిజ, ఇని నింద సిలి, ఇని నేరమ్కుబా రెఇ, నొరె ఆతి లోకుర్ లెకెండ, క్రీస్తు మర్జి వానివలె మిజి దేవుణు ఎద్రు మిజి నిల్పెజె వాండ్రు మీ వెట రాజినం ఆతాన్.

23 మీరు సువార్త నమ్మజి మహిజ అయాలెకెండ మంజినిదెర్. మీరు నమ్మకమ్దాన్ దిగజార్ఎండ మండ్రెజ్ వలె. యా సువార్త వెప్పిని ఆస వందిజ్ డిఃఎండ ఎద్రు సుడెజినె మండ్రెజ్ వలె. యా సువార్తనె నండొ దేన్కాణి లోకుర్ నడిమి వెహె ఆత మనాద్. యాక వెప్పెజె పవులు ఇని నజి దేవుణు ఏర్పాటు కిత్తాన్.

### పవులు దేవుణు సజం వందిజ్ సేవ కిజినాన్

24 ఏలు, మీ మేలు వందిజ్ నాను స్రమెజ్ ఓరిసిన ఇజి సర్ద ఆజిన. ఇహిజ, క్రీస్తు ఒడొల్ లెకెండ మని సజమ్ది మేలు వందిజ్ నాను నా ఒడొల్దు స్రమెజ్ ఓరిసెజ్ వలె ఇజి క్రీస్తు ఏర్పాటు కితిక నాను పూర్తి కిజిన.

25-26 దేవుణు సజి సజమ్దిజ్ సేవ కిదెజ్ ఇజి ఏర్పాటు కిత్తాన్. మీ మేలు వందిజ్, క్రీస్తు వందిజ్ మని సువార్త మిజి పూర్తి నెప్పిన్ని బాజత వాండ్రు నజి సితాన్. యా సువార్త, ముజాలె బత్తితి మహి లోకుర్ బాణిజ్ దేవుణు డాప్పి వన్ని గర్బమ్దు ఇట్టా మహాన్. గాని ఏలు వాండ్రు వన్ని వందిజ్ కేట ఆతి లోకురిజ్ అయాక తోరిసి నెన్పిస్తాన్.

27 దేవుణు అయాలెకెండ కిత్తాన్. ఎందనిజ్ ఇహిజ, వాండ్రు యూదురు ఆఇ వరిజ్ నండొ దీవిస్తాన్ ఇజి వన్ని గర్బమ్దు వాండ్రు ఎత్తు కిజి డాప్పి ఇట్టిక వరిజ్ తెలివి కిదెజ్ ఇజి తీర్మనం కిత్తాన్ ఇజి తోరిస్తెజ్. ముకెలం, క్రీస్తు, యూదురు ఆఇ మీ మన్కుదు మంజినాన్. అందెజె, కడెవేరిదు దేవుణు జాయ్దు మండ్రెజ్ మిజి ఒనిదెర్ ఇజి ఆసదాన్ ఎద్రు సుడెజి మంజినిదెర్ ఇజి. యాకదె దేవుణు వన్ని లోకురిజ్ తోరిసి నెన్పిస్తాన్ సువార్త.

28 అందెజె మాపు క్రీస్తు వందిజ్ విజెరిజ్ వెప్పినాప్. ముకెలం మాపు నండొ గెణమ్దాన్ విజెరిజ్ బుద్ది వెప్పి నెన్పిస్తాప్. ఎందనిజ్ ఇహిజ, క్రీస్తు వెట కూడితి మని వరిజ్ విజెరిజ్ వాండ్రు మర్జి వానివలె దేవుణు ఎద్రు నిల్పెవలె, వారు పూర్తి అతికార్ ఆదెజ్ మాపు బుద్ది వెప్పి నెన్పిస్తాప్.

29 వారు పూర్తి అతికార్ ఆని వందిజ్ క్రీస్తు సీజిని గొప్ప సత్తుదాన్ నాను నండొ కస్తబాడిజిన. అయా గొప్ప సత్తునె, నాను కస్తబాడిదెజ్ నజి సత్తు కిబిస్తాద్.

## 2

1 మీ వందిజ్, లవోదియ పట్టమీదు మని దేవుణుదిజ్ నమ్మిత్తి వరి వందిజ్, నజి ఎసెజ్బా తోఇ వరి వందిజ్ నాను ఎసా కస్టబాడిజిన ఇజి మీరు నెస్తెజ్ ఇజి నాను కోరిజిన.

2 నాను ఎందనిజ్ యా లెకెండ కస్టబడిజిన ఇహిజ, మీరుని వారు, నెగ్రెండ దయ్ రమ్ దాన్ నిల్పి వందిజ్, మరి, మీరు ఒరెన్ మరి ఒరెన్ వన్నిజ్ ప్రేమిసిని వజ, కూడేజి పాడేజి మంజిని వందిజ్ కస్ట బడిజిన. ఎందనిజ్ ఇహిజ, అయావలె మీరు అనుమానం సిల్లెండ దేవుణు వన్ని గర్బమీదు డాప్తి ఇట్టిక ఇహిజ, క్రీస్తుజ్ పూర్తి నెస్తెజ్.

3 ఎందనిజ్ ఇహిజ, క్రీస్తు వెటనె దేవుణు వన్ని గర్బమీదు డాప్తి ఇడ్డి విజు గెణమ్ ని ఆలోననెజ్ నెస్తెజ్ అట్టాట్.

4 నాను ఎందనిజ్ యా లెకెండ వెస్సిన ఇహిజ, ఎయెర్ బా మిజి తియాని మాటెజ్ వెస్సిన మోసెం కిఎండ మండ్రెజ్.

5 నాను మీ నడిమి సిలితిజ్బా మీ వందిజ్ నండో ఎత్తు కిజిన. నాను నండో సర్దబా ఆజిన. ఎందనిజ్ ఇహిజ, మీరు ఉండ్రె ఆజి కూడేజి పాడేజి మంజినిదెర్. మీరు క్రీస్తుజ్ డటం నమ్మిజినిదెర్ ఇజి నాను నెస్సు.

6 మీరు క్రీస్తుయేసుజ్, ప్రబు ఇజి ఒప్పకొటి మనిదెర్. అందెజె వన్ని వెట కూడితి మనికార్ కిదెజ్ మని లెకెండ మండ్రు.

7 వన్ని వందిజ్ మిజి నెస్పిస్తి మనికెజ్ నమ్మిజి, అయాకెజ్ కిజినె మండ్రు. అయా సజతిజ్ నలిజిజి నమకమ్దు పిరిదు. మిజి నెస్పిస్తి వజ నిజమాతి బోదదిజ్ అసినె మండ్రు. మా బుబ్బు ఆతి దేవుణు మీ వందిజ్ కితి దని వందిజ్ పూర్తి మన్నుదాన్ వందనమ్కు వెస్సినె మండ్రు.

8 ఎయెర్ బా మోసెం కిని బోదెజ్ నెస్పిసి మిజి తోహ్కొత్తి మని వరిలెకెండ కిఎండ జాగర్త మండ్రు. వారు మిజి అర్దం సిలి మోసెం కిని లోకురిజ్ మని గెణం నెస్పిసి మోసెం కినార్. అయాకెజ్ క్రీస్తు బాణిజ్ వాజినికెజ్ ఆఉ. గాని పూర్బమ్ దాన్ అసి నెస్పిసిని బోదెజు బాణిజ్ వాజినికెజె. యా లోకమ్దిజ్ అతికారం కిజిని దెయమ్క బాణిజ్ వాజినికెజె.

9 నాను అయ లెకెండ వెస్సిన. ఎందనిజ్ ఇహిజ, దేవుణు, క్రీస్తు ఒడోల్ దునె వెల్తి సిల్లెండ పూర్తి మంజినాన్.

10 క్రీస్తు వెట మీరు కూడితి మనిజ్, మీ కొత్త బత్తుదిజ్ కావాలిస్తికెజ్ విజు మిజి సిత మనాన్. అతికారం కిజిని విజు సత్తుజ ముస్సు, ఏలుబడి: కిని వరి ముస్సు, తోర్ని వన్కాజ్ని, తోర్ని వన్కాజ్ ముస్సు వాండ్రె గొప్ప అతికారం మనికాన్. తోర్ని వన్కాజ్ ఇహిజ, దేవుణు దూతార్ని దెయమ్కు. వన్కా ముస్సు గొప్ప అతికారం మనికాండ్రె వాండ్రు.

11 వన్నివెట మీరు కూడితి మనిదెర్. అందెజె క్రీస్తు బాణిజ్ నునతి కిబె ఆతి లెకెండ మనిదెర్. లోకుర్ వరి కికాణిజ్ కిని సునతి కిబె ఆఇదెర్, గాని క్రీస్తు కితి సునతికె కిబె ఆతిదెర్. ఇహిజ, క్రీస్తు మీ సెఇ ఆసెజ్ విజు పూర్తి లాగితాన్.

12 మరి, మీరు బాప్తినం లాగె ఆతివలె, క్రీస్తు వెట సాజి ముసె ఆతి లెకెండె మనిదెర్. వన్ని వెట మర్జినికె ఆతి లెకెండె మనిదెర్. దేవుణు గొప్ప సత్తు మనికాన్ ఇజి మీరు నమ్మిజిని దనిదానె వన్ని వెట మర్జినికె ఆతిదెర్. దేవుణు సత్తునె వన్నిజ్ సాతి వరి బాణిజ్ బత్తిస్తాన్.

13 ఉండ్రె కాలమ్దు, మీరు సాతి వరి లెకెండె మహిదెర్. ఎందనిజ్ ఇహిజ, మీరు పాపమ్కు కిజినె మహిదెర్, పాపం కిబిస్సి సెఇ ఆసెజ్బా మిజి మహె. అయాకెజ్ సాన్ఎండ మహె. గాని ఏలు మిజినె దేవుణు క్రీస్తు వెట కొత్త బత్తు సితాన్. ఎందనిజ్ ఇహిజ, వాండ్రు మా పాపమ్కు విజు నొహ్తాన్.

14 ఇహిజ, మజి సిక్చ సీని, మాటు కితి తప్పజ్ రాస్తి ఇడ్డి కాకితం సిల్లెండ లెకెండె మనాద్ అయాక క్రీస్తు సాతివలె మా పాపమ్క వెట అయా కాకితమ్బా సిలువాదు కుంటిజాణిజ్ డెయింతాండ్రె అయాకెజ్ పూర్తి సిల్లెండ ఆతె ఇజి తోరిస్తాన్.

15 అతికారమ్దు మహి ఏలుబడి: కిజి మహి దెయమ్కాజ్ మరి తోర్ని సత్తుజ, దేవుణు వీజిస్తాండ్రె, వన్కా ముస్సు గెలస్తాన్. క్రీస్తు సిలువాదు ఆతి దనిదనటాన్ దేవుణు వన్కా ముస్సు గెలస్తాండ్రె, విజెరె ఎద్దు వన్కాజ్ సిగు కిత్తాన్.

16 అందెజె, మీరు సెగం బోజనం ఉణిజి తింజిని వందిజ్ సిలిజ, మీరు ఏంటు ఏంటు బత్తువందిజ్ కిజిని పండోయి కిఇ వందిజ్, ఆమాన్దు పండోయి కిఇ వందిజ్, విస్తాంతి దినం సుడేఇ వందిజ్ మీరు తప్ప కితిదెర్ ఇజి తీర్పు కిని వన్నిజ్ దూరం కిఅ.

17 నిని ఆడ్రెజ్ విజు ఉండ్రె నీడ: లెకెండె మన్నె. ఆ నీడ ఎయెదినో వాండ్రు వెనుక వాజినాన్. అయా వాండ్రు క్రీస్తునె.

18 'తగె ఆజినాప్' ఇజి వేసం తోరె ఆఇతిజ్, దూతెజ్ మాడిసెఇతిజ్, మీరు తప్ప కితిదెర్ ఇజి మిజి తీర్పు కిని వన్నిజ్ దూరం ఆదు. ఎందనిజ్ ఇహిజ, వాండ్రు కలాదు సుడేతి ఇనిదనిజో ఆదారం ఇడేజి అతికారం కిజినాన్. వాండ్రు కిజిని ఆలోననెజ్ సెఇకెజ్. అందెజె వాండ్రు గర్త ఆజినాన్. వాండ్రు గర్త ఆదెజ్ మని ఇని సజతిబా వన్నిజ్ సిలితిజ్బా గర్త ఆజినాన్.

19 అయా లెకెండె మనికాన్ క్రీస్తు బాణిజ్ ముజాలె దూరం ఆత మనాన్. బుర్త ఆతి క్రీస్తు వందిజ్ మని నిజమాతి బోద వాండ్రు నెస్పిస్ఎన్. బుర్త వెస్తి వజనె ఒడోల్ సత్తుదాన్ పిపినాద్. ఒడోల్ అత్తుజాణిజ్ సిరెజాణిజ్ అత్తిస్త మనాద్. అయాలెకెండె, దేవుణు ఎత్తు కితి వజనె సజమ్దిజ్ సత్తుదాన్ పిరిప్పికాన్ క్రీస్తునె.

20-21 సాతి క్రీస్తు వెట మీరు కూడితి మనిదెర్. అందెజె నని ఆద్రెజ, బోదెజ లోజిఎండ డిబె ఆతిదెర్. అయకెజ్ క్రీస్తుజ్ నమ్మి ఇ లోకుర్ వందిజ్ ఇడ్డి మనికెజె. అందెజె మరి ఎందనిజ్, సెగం సజతిజ్ వాడుకొడుమాట్, రుసి సుణ్ మట్, ముట్ మాట్, ఇని యా లోకమది ఆద్రెజ లోజిదెజ్ వలె ఇజి లోజిజి నిదెర్.

22 ఆద్రెజారు వెహ్నిని బోజనమ్ ని మహి సజతిజ్ వాడు కొడుజి మహిజ, సిల్లెండ ఆనె. మరి ఎందనిజ్ అయాకెజ్ లోజిజినిదెర్. అయకెజ్ లోకుర్ ఇడ్డి ఆద్రెజ బోదెజె.

23 నిని ఆద్రెజ్, ఇట్టికార్ గొప్పు గెణం మనికార్ ఇజి తోర్నార్. ఎందనిజ్ ఇహిజ, లోకుర్ తీర్మనం కిత ఇల్టూ మనార్ ఎలాగ మాడిసైజ్ ఇజి. అయాలెకెండె కిదెజ్ ఇజి ఆద్రెజ్ వెహ్నినాద్. తగె ఆజినాప్ ఇజి వేసం తోరె ఆదెజ్ ఇజి, దేవుణుదిజ్ సరద కిదెజ్ ఒరెన్ వన్ని ఒడోల్ దిజ్ బాదెజ్ కిదెజ్ ఇజి ఆద్రెజ్ వెహ్నినాద్. అందెజె నిని ఆద్రెజ్ నెగ్గెకెజె ఇజి తోర్నె. గాని, ఒరెన్ వన్నిజ్, వన్ని ఒడోల్ ది ఆసెజ, ఆప్ కిదెజ్ ఇజి ఆస ఆని వన్నిజ్ ఇని సాయమ్ బా కిఉ. అందెజె నిని ఆద్రెజ్ లోకురిజ్ సెఇకెజె కిబిన్సి.

### 3

#### పరలోకమదు మంజిని సజతిజ వందిజ్ ఎత్తుకిజి మండ్రు

1 క్రీస్తుజ్ సాతి బాణిజ్ దేవుణు బత్తిన్సి లెకెండె, మిజి బా వాండ్రు కొత్త బత్తు సితాన్. అందెజె క్రీస్తు మని దేవుణు మంజిని బాడిడు మని సజతిజ వందిజ్ ఎస్తివలెబా నండో ఆస ఆజి మండ్రు. వన్నిజ్ దేవుణు గొప్పు అతికారమ్ ని నండో మర్యాద సిత మనాన్.

2 యా లోకమదు మని సజతిజ ముస్కు మీ మన్సు ఇడ్మాట్. గాని పరలోకమదు మని సజతిజ ముస్కు మీ మన్సు ఇడ్డోదు.

3 ఎందనిజ్ ఇహిజ, మీ పడాఁయి బత్తు సాత మనాద్. మీరు ఏలు క్రీస్తు వెట దేవుణు ఎద్రు బత్తిజినిదెర్. అయాక లోకుర్ సుడెదెజ్ అబ్ ఎర్.

4 మిజి నిజమాతి బత్తు సీజనికాన్ క్రీస్తునె. వాండ్రు మర్జి వానివలె, దేవుణు విజెరె ఎద్రు వన్నిజ్ వెల్లి తోరిస్సి వలె మిజిబా వన్నివెట వెల్లి తోరిస్సాన్. మీరుబా వన్ని వెట వన్ని జాయ్ దు మంజినిదెర్. లోకుర్ మిజి వన్ని వెట గవ్ రం సీనార్.

5 అందెజె, మీరు ముజాలె కిజి మహి యా లోకమది తపు పణిజ్ పూర్తి డిఁస్తు. ముకెలం, రంకు బూలమాట్, కేలార్ బూలమాట్. దిన్ని వందిజ్ నండో ఎత్తు ఆజి మన్సు ఇడ్మాట్. సెఇకెజ్ కిదెజ్ ఆస ఆమాట్. మని దని ఇంక మరి నండో కావాలి ఇజి ఆస ఆమాట్. ఎందనిజ్ ఇహిజ, అయా లెకెండె కినిక మీరు ఆస ఆనిదనిజ్ మాడిసిని లెకెండె మనాద్.

6 యా లెకెండె కిమాట్. ఎందనిజ్ ఇహిజ, దేవుణు కోపం యా లెకెండె కిజిని వరి ముస్కు వానాద్.

7 ముజాలె మీరుబా దేవుణుదిజ్ లోజిఎండ మహివలె, యా లెకెండె కిజి మహిదెర్.

8 గాని ఏలు యాకెజ్ ఇనికబా కిమాట్. ముకెలం పగ అస్మాట్. కోపం ఆమాట్. మహి వరి వందిజ్ సెఇకెజ్ ఎత్తు కిమాట్. దుసలాడఁమాట్. కేడి మాటెజ్ మీ వెయ్ దాన్ వర్గిమాట్.

9 మరి ఒరెన్ వన్ని వెట అబద్దం వర్గిమాట్. ఎందనిజ్ ఇహిజ, మీ పడాఁయి బత్తు మీరు డిఁస్తిదెరె, నస్తివలె కిజి మహి సెఇ పణిజ్ మీరు డిఁస్తిదెర్.

10 అయాకెజ్ డిఁస్తిదెరె, ఉండ్రీ నెగ్గె కొత్త బత్తు బత్తిజినిదెర్. మిజి తయార్ కితి దేవుణునె యా కొత్త బత్తు మీ లోఇ ఇల్టూన్. వన్ని లెకెండె మంజిని వందిజ్ మరి మరి మిజి కొత్తాజ్ కిజినాన్. వన్నిజ్ మీరు నెగ్గెండ నెస్సి వందిజె, యా లెకెండె మరి మరి కొత్తాజ్ కిజినాన్.

11 అందెజె, యూదురు ఇజినో, యూదురు ఆఇకార్ ఇజినో, సునతి కిబె అతికార్ ఇజినో, కిబె ఆఇకార్ ఇజినో, తకు జాతిదికార్ ఇజినో, మూర్కమ్ ది నని ఒదె తకు జాతిదికార్ ఇజినో, వెటి పణి కినికార్ ఇజినో, కిఇకార్ ఇజినో ఆవిద్ ముకెలం. గాని క్రీస్తునె ముకెలమాతికాన్. వాండ్రు నమ్మిత్తి వరి విజెరె లోఇ మంజినాన్.

12 మీరు దేవుణు లోకుర్. వాండ్రు మిజి ప్రేమిస్తాండ్రె వన్ని సొంత లోకుర్ ఇజి కేట ఇల్టూన్. అందెజె, మీరు మరి ఒరెన్ వన్ని వందిజ్ మీ పాణం నొతెజ్ దయ తోరిస్తు. తగిజి మండ్రు. సార్లిదాన్ మండ్రు. ఓరిసి మండ్రు.

13 మహి వరి వెట బరిస్తు. మీ లోఇ ఒరెన్ మరి ఒరెన్ వన్ని వెట మొరొ ఆజి మహిజ, అయాక ఇనిక ఆతిజ్ బా సెమిస్తు. ప్రబు అతి క్రీస్తు మిజి సెడ్డినె సెమిస్తి వజ, మీరు సెమిస్తు.

14 దినిజ్ విజు ఇంక మహి వరిజ్ ప్రేమిస్తు. అయాకెదె ముకెలం. ఎందనిజ్ ఇహిజ, మీరు ప్రేమిస్సి దనిదనటాన్ మీరు పూర్తి కూడఁజి మంజినిదెర్.

15 మీరు ఒరెన్ మరి ఒరెన్ వన్ని వెట కూడఁజి పాడఁజి మండ్రెక్ క్రీస్తు సీని సమదనం నీ మన్నుదు మంజినాద్. ఎందనిజ్ ఇహిజ, మీరు దేవుణు సజమ్దు ఒరెన్ మరి ఒరెన్ వన్నివెట సమాదనమ్దాన్ మంజిని వందిజె, దేవుణు మిజి కూక్త మనాన్. దేవుణు కితి సజతిజ వందిజ్ ఎస్తివలెబా పోస్ఎండ దనిజ్ ఎత్తుకిజినె వందనమ్కు వెహ్ని మండ్రు.

16 క్రీస్తు వందిజ్ మని బోద మీరు నెగ్రెండ నెనినె మండ్రు. నండొ గెణమ్దాన్ ఒరెన్ వన్నిజ్ నేర్పిసి, బుద్ది వెహ్ని మండ్రు. దేవుణు మాటెజ్ పాటెజ్ వజ పార్జి, దేవుణుదిజ్ పొగిడిఁజి వందనమ్కు వెహ్నిని పాటెజ్ పార్జి, దేవుణు ఆత్మ మీ మన్నుదిజ్ రేప్పిని వజ పాటెజ్ పార్జి మండ్రు. దేవుణు కితికెజ్ పోస్ఎండ మీ పూర్తి మన్నుదాన్ దేవుణుదిజ్ పాటెజ్ పార్డు.

17 మీరు ఇనిక వెహ్నిజ్బా, ఇనిక కితిజ్బా ప్రబుయేసుజ్ లోజితికార్ కిదెజ్ మని వజ కిదు. మా ప్రబు ఆతి క్రీస్తు వెట, మిజి దోహ్కె దని వందిజ్ బుబ్బ ఆతి దేవుణుదిజ్ వందనమ్కు వెహ్నివలె, యా లెకెండ కిదు.

**దేవుణుదిజ్ నమ్మిత్తికార్ ఒరెన్ ఒరెన్ ఎలాగ మండ్రెజ్.**

18 బోదెకాండె, మీరు మీ మాసిర్ మీ మున్ను అతికారం మనికార్ ఇజి ఒడఁబిజి వరిజ్ లోజిదు. మీరు ప్రబు వెట కూడిఁతి మనికిదెర్. అందెజె అయాకదె మీరు కిదెజ్ మనిక.

19 మాసిరాండె, మీరు మీ బోదెకాజ్ ప్రేమిస్తు. వన్యాజ్ బాదెజ్ కిమాట్.

20 కొడెరాండె, మీరు మీ యాయ బుబ్బెజ్ ఎస్తివలెబా వెండ్రు. ఎందనిజ్ ఇహిజ, యాకదె ప్రబుజ్ ఇస్తు ఆతిక.

21 అప్పొసిరాండె, మీ కొడెకార్ మన్ను రుజ్ఎండ మంజిని వందిజ్ మరి మరి జటిజ్ ఆమాట్.

22 వెటి పణి కినికిదెరా, మీరు యా లోకమ్ది మీ ఎజుమారుజ, విజు వన్యా లోఇ లోజిదు. నెగ్గికార్ ఇజి వెహ్ ఆదెజ్ వారు సూణివలెనె ఆవద్. గాని పూర్తి మన్నుదాన్ వరిజ్ లోజిదు. ఎందనిజ్ ఇహిజ, మీరు ప్రబుజ్ తియెల్ ఆజి గవరం సీజినిదెర్.

23 మీరు ఇనిక కితిజ్బా, పూర్తి మన్నుదాన్ కిదు. లోకుర్ వందిజ్ ఆవద్. గాని దేవుణు వందిజ్ కిజినావ్ ఇజి పూర్తి మన్నుదాన్ కిదు.

24 ఎందనిజ్ ఇహిజ, ప్రబునె మిజి పలితం సీనాన్ ఇజి మీరు నెసినిదెర్. ఇహిజ, వాండ్రు ఒట్టు కితికెజ్ మిజి దోహ్కె. ఎందనిజ్ ఇహిజ మీరు సేవ కిజిని నిజమాతి ఎజమాని ప్రబు ఆత క్రీస్తునె.

25 తపు కిని వన్నిజ్, వాండ్రు ఎయెన్ ఆతిజ్బా వాండ్రు కితి తప్పుదిజ్ దేవుణు సిక్స సీనాన్. ఇజ్రికార్ పెరికార్ ఇజి దేవుణుదిజ్ తేడ సిల్దెద్.

## 4

1 ఎజుమానిరాండె, మీరు మీ వెట్టిపణి మనిసిరిజ్ నాయమ్దాన్, వరిజ్ సీదెజ్ మనికెజ్ సీజి నెగ్రెండ సుడఁదు. ఎందనిజ్ ఇహిజ, మిజిబా ఒరెన్ ఎజమాని పరలోకమ్దు మనాన్ ఇజి ఒడఁబిదు.

2 విస్కిఎండ పార్దనం కిజి మండ్రు. మీరు పార్దనం కినివలె మన్ను ఇతాల్ అతాల్ ఆవిండ జాగర్దదాన్ మండ్రు. దేవుణు మిజి కితి దని వందిజ్ వందనమ్కు వెహ్ని మండ్రు.

3 మరి మా వందిజ్బా పార్దనం కిదు. దేవుణు బోద వెహ్నిజ్ మజి సరి దోహ్కెజ్ సాయం కిపిన్ ఇజి పార్దనం కిదు. ఎందనిజ్ ఇహిజ, క్రీస్తు వందిజ్ ఉండ్రీ కాలమ్దు డాజితి మహికెజ్ గాని, ఎలు తోరె ఆతి నిజమాతి సజతిజ్ బోద్దిస్తెజ్. యాక బోద్దిస్తెజ్నె, నాను జెలిదు ఆత.

4 యాక నాను బోద్దిస్తెజ్ మనికాదె. అందెజె నాను నెగ్రెండ, అర్దం ఆనిలెకెండ వెహ్నిజ్ నజి సరి దోహ్కెజ్ సాయం కిపిన్ ఇజి నా వందిజ్ దేవుణుదిజ్ పార్దనం కిదు.

5 మీరు కిజిని దనితాన్ తెలివిదాన్ నమ్ఇ వరివెట మండ్రు. మిజి దోహ్కె సమయమ్దు విజు క్రీస్తు వందిజ్ వరిజ్ వెహ్నిజ్ తయార్దాన్ మండ్రు.

6 మీరు తెలివిదాన్, నెగ్రెండ, ఎస్తివలెబా వరి వెట వర్దిదు. అయావలె, వరి లోఇ విజెరె వెట వారు వెన్బాతి దనిజ్ ఎలాగ మర్జి వెహ్నిజ్ ఇజి ఎస్తివలెబా నెస్సిదెర్.

7 నజి జర్గిజిని విజు సజతిజ్, తుకికు మిజి వెహ్నిన్. వాండ్రు నాను ప్రేమ కిజిని ఒరెన్ తంబెరి. నమ్మకమ్దాన్ దేవుణు సేవ పణి కిజినికాన్. నా వెట జత కూడఁజి ప్రబుజ్ సేవ కిజినికాన్. వాండ్రు నా వందిజ్ మిజి వెహ్నిన్.

8 మజి జర్గినికెజ్ మీరు నెస్సి వందిజ్ నెగ్గి మాట వెహ్ని మిజి దయరం కిబిన్ని వందిజ్ నాను వన్నిజ్ మీ డగ్గు పొక్కిన.

9 ఒనెసిము వన్ని వెట మీ డగ్గు వాజినాన్. వీండ్రు నమ్మిదెజ్ తగ్గికాన్. మాపు ప్రేమిన్ని ఒరెన్ తంబెరి. మీ పట్టుమ్దికాన్. ఇబ్బె జర్గినికెజ్ విజు మీరు మిజి వెహ్నిన్.

10 నా వెట జెలిదు మని అరిస్తర్కు మిజి వెన్బాతి లెకెండ్ వెప్పినాన్. బర్నబెజ్ బణిజ ఆతి మార్కుబా మిజి వెన్బాతి లెకెండ్ వెప్పినాన్. (విని వందిజ్ ముజాలె మీరు వెహె ఆతి మనిదెర్. అందెజె వాండ్రు మీ డగ్రు వాతిజ డగ్రు కిదు)

11 యుస్తు ఇని యేసుబా మిజి వెన్బాతి లెకెండ్ వెప్పినాన్. నమ్మిత్తి యూదుర్జ లొఇ నా వెట కూడేజి పణి కిజినికార్ మీరు ముఎరె. దేవుణు ఏలుబడిః వందిజ్ వెహెజ్ వారు పణి కిజినార్. వారు సజి గొప్ప తోడుః ఆత మనార్.

12 క్రీస్తుయేసుజ్ సేవ కిజిని, మీ లొఇ ఒరెన్ ఆతి ఎపప్రా మిజి వెన్బాతి లెకెండ్ వెప్పినాన్. వాండ్రు ఎస్తివలెబా మీ వందిజ్ డిన్ఎండ డటం పార్దనం కిజినాన్. మీరు అనుమానమ్కు సిల్లెండ నమకమ్దు పూర్తి పిరిని వందిజ్, దేవుణు ఇస్టం కినికెజ్ విజు మీరు పూర్తి నెస్సి వందిజ్ వాండ్రు డటం పార్దనం కిజినాన్.

13 ఎందనిజ్ ఇహిజ, వాండ్రు మీ వందిజ్, లవొదికియ పట్టుమ్ది నమ్మిత్తి వరి వందిజ్ ఇయరపొలి పట్టుమ్ది నమ్మిత్తి వరి వందిజ్ వాండ్రు నండొ కస్త బాడిజినాన్. యాక నిజం ఇజి నాను వెహెజ్ అట్టు.

14 మాపు ప్రేమ కిజిని లాక డాక్టరుని దెమా మిజి వెన్బాతి లెకెండ్ వెప్పినాన్.

15 లవొదికియ పట్టుమ్దు మని కూలెజ్, నుమ్పాకుజ్, వన్ని ఇండ్రో కూడేజి వాజిని దేవుణు సజమ్దిజ్ నాను వెన్బాతి లెకెండ్ వెహెజ్.

16 మీ లొఇ యా ఉత్రం డటం సద్విజి వెనుక లవొదికియ పట్టుమ్దు మని దేవుణు సజమ్దుబా యాక సద్విదెజ్. అయాలెకెండ్ లవొదికియ పట్టుమ్దు మని దేవుణు సజమ్దిజ్ నాను రాస్తి ఉత్రం, వారు మిజి పొక్కార్. అయాక మీరుబా డటం సద్విదెజ్.

17 అర్కిపుజ్ వెహెజ్, 'ప్రబు వెట నీను కూడితి మనికి. నిజి ఏర్పాటు కితి పణి పూర్తి కిదెజ్ సుడేదెజ్ వలె', ఇజి.

18 పవులు ఇని నాను మిజి వెన్బాతి లెకెండ్ వెప్పినాన్. నా సొంత కీదానె ఆకర్తి యా మాటెజ్ రాసిన. నాను జెలిదు మన ఇజి పొక్కార్. దేవుణు దయాదర్మం మీ ముస్కు మనిద్.

## అపొస్తుడు ఆతి పవులు తెస్సలోనిక పట్టుమది దేవుణు సజమ్దీ రాస్తి మొదోహి ఉత్తం

నెల్వ కిబిసినిక

ఇక్క అపొస్తుడు ఆతి పవులు దెసలోనిక పట్టుమదు మని దేవుణు సజమ్దీ వరిజ్ రాస్తి మొదోహి ఉత్తం. పవులు కొరింతు పట్టుమదు మహివలె బాణిజ్ యా ఉత్తం రస్తపోక్తాన్ ఇజి నండొండార్ ఒడఃబిజినార్. తిమోతి, సిల ఇనికార్ యా ఉత్తం ఒత్త సిత్తార్ ఇజి నండొండార్ ఒడఃబిజినార్. పవులుని వన్ని వెట సువార్త పణి కినికార్ కూడఃజి దెసలోనిక పట్టుమదు సొన్ని సువార్త సాటిసి దేవుణు సజం మొదోల్స్త మనాద్. (అపొస్తురు కిత్తి పణిజ్ 17:1-9). యూదురు మీటిజ్ కిని ఇల్కాజ్ వాండ్రు సువార్త సాటిస్తెజ్ మొదోల్స్తాన్. బక్తి మనికార్ ఆతి యూదురు ఆఇకార్ బా నండొండార్ బాన్ కూడ్డి వాజి దేవుణుదిజ్ పొగ్డిఃజి మాడిసి మహార్. అందెజె దెసలోనిక పట్టుమదు మని నెగొండార్ యూదురుని యూదురు ఆఇకార్, పవులు సాటిస్తెమని సువార్త నమ్మితార్. యూదురిజ్ ఇంక యూదురు ఆఇకార్ నండొండార్ సువార్త నమ్మితార్. ఇంజుముంజు మూండ్రి వారమ్కు బాన్ మహండ్రి వాండ్రు బాణిజ్ సొత సొహన్. కొత్తాన్ దేవుణుదిజ్ నమ్మితి వరిజ్ హిమ్సెజ్ కినార్లెసు ఇజి వరిజ్ దయరం వెహైజ్ ఇజి బాన్ తిమోతిజ్ పొక్తాన్. మరి వెనుక దేవుణు సజమ్దీ వరిజ్ దయరం వెహైజ్ ఇజి, మరి దేవుణుదిజ్ నమ్మితికార్ దేవుణుదిజ్ తియోలాజి ఎలాగ బత్కిదెజ్, మరి బండెజ్ ఆవండ, మహికార్ గవరం సీనిలెకెండె ఎలాగ బత్కిదెజ్ ఇజి నెస్సిస్తెజ్ ఇజి యా ఉత్తం వరిజ్ రాస్తాన్. నండొండార్ యేసుప్రబు మర్జివాని దన్ని వందిజ్ అనుమానమాతార్. దన్ని వందిజ్ వరిజ్ నెస్సిస్తెజ్ ఇజి యా ఉత్తం రాస్తాన్. యేసుప్రబు మర్జివాని వందిజ్ విజు అద్యయమ్కు రాస్త మనాద్.\*

1 బుబ్బాతి దేవుణుదిజ్ దేవుణుదిజ్ని, ప్రబు ఆతి యేసుక్రీస్తుజ్ సెందితి మన్ని, తెస్సలోనిక పట్టుమదు మని దేవుణు సజమ్దీ వరిజ్, పవులుని సిలువాను తిమోతి ఇనికార్ రాసిని ఉత్తం. దేవుణు దయాదర్మమ్దాన్ మీరు నిపాతిదాన్ మండ్రెజ్ సయం కిపిన్.

తెస్సలోనికాది వరి నమకం వందిజ్ దేవుణుదిజ్ సమదనమ్కు!

2 ఎస్తివలెబా మా పార్దనమ్దు మిజి ఎత్తు కిజి, మీరు విజిదెరి వందిజ్ మాపు దేవుణుదిజ్ వందనమ్కు వెహినాప్.

3 మిజి దేవుణు ముస్సు మని నమ్మకమ్దాన్ మీరు కితి పణిజి వందిజ్, మహి వరి వందిజ్ ప్రేమదాన్ మీరు కస్టబాడఃజిని దన్ని వందిజ్, ప్రబు ఆతి యేసు క్రీస్తు ముస్సు మని ఆనదాన్ ఎద్రు సుడఃజి డిన్వండ ఓరిసిని ఓర్పు వందిజ్ మాపు ఎస్తివలెబా మా బుబాతి దేవుణు ముందాల ఎత్తు కిజి మంజినాప్.

4 తంబెరిజాండె, దేవుణు మిజి ప్రేమిస్తాండ్రె ఎర్జిస్త మనాన్ ఇజి మాపు నెస్నాప్.

5 ఎందనిజ్ ఇహిజ, మాపు మిజి వెహై సువార్త, వహి మాటెజాణిజ్నె ఆవండ, దేవుణు సత్తుదాన్, దేవుణు ఆత్తుదాన్ మరి మా మన్నుదు పూర్తి నమ్మకమ్దాన్ మిజి నెస్సిస్తాప్. మీ వందిజ్ మాపు మీ వెట కూడఃజి ఎలాగ బత్కితాప్ ఇజి మీరు నెసినిదెర్.

6 గొప్ప పెరి కస్టమ్దు మీరు ప్రబుజ్ని మిజి పొలిసి నడితిదెర్. గొప్ప పెరి కస్టమ్కు మిజి వాతె. గాని దేవుణు ఆత్తు మిజి సితి సర్దదాన్ మీరు యా సువార్తదిజ్ డగ్రు కితిదెర్.

7 అందెజె అయాలెకెండె నమ్మిత్తికిదెర్ ఎలాగ మండ్రెజ్ ఇజి నెస్తిజ్ మాసిదోణియని అకాయ ఇని ప్రాంతమ్కాజ్ నమ్మిత్తి వరిజ్ విజేరిజ్ మీరు ఉండ్రి గుర్తు లెకెండె ఆతిదెర్.

8 మాసిదోణియని అకాయ ప్రాంతమ్కాజ్నె ఆవండ దేవుణు సువార్త మీ బాణిజ్ విజుబాన్ సాటె ఆతాద్. అక్కాదె ఆవండ దేవుణు ముస్సు మిజి మని నమకం విజేరి నెస్తార్. అందెజె దని వందిజ్మాపు ఇనికబా వెహైజ్ అకర్ సిల్లెద్.

9-10 ఎందనిజ్ ఇహిజ మీరు ఎలాగ మిజి డగ్రు కితిదెర్ ఇజి వారి వెహినార్. బొమ్మెజ మాడిఃస్సిక డిసి,సిజి బత్కిజిని

నిజమాతి దేవుణుదిజ్ పొగ్డిఃజి మాడిఃస్తిజ్ మీరు ఎలాగ దేవుణు దరోటు మహ్తిదెర్ ఇజి వారి వెహినార్. బత్కిజిని నిజమాతి దేవుణుదిజ్ నమ్మిజిని వందిజ్, దేవుణు బాణిజ్ వాని కోపమ్దాన్ మిజి తప్రిసినికాన్ నాతి, సాతివరి బాణిజ్

\* 0: 1:0 1:8-10; 2:19-20; 3:13-18; 5:23-24

దేవుణు నిక్తిమని వన్ని మరిన్ ఆతి యేసు, దేవుణు పరలోకమదాన్ డిగ్జి వానాన్లె ఇజి వన్ని వందిజ్ ఆనదాన్ ఎద్రు సుడేజి మంజినిదెర్.

## 2

దెసలోనిక పట్టుమ్దు పవులు కితి సువార్త పణి

1 తంబెరిజాండె, మాపు మీ డగ్రు వాతిక పణిదిజ్ రెఎండ ఆవతాద్, ఇజి మీరె నెసినిదెర్.

2 ముజాల పిలిపియా పట్టుమ్దు మజి ఎసా కస్టమ్కు వాతె, మరి ఎసానొ సిగు కిత్తార్ ఇజి మీరు నెసినిదెర్. గాని గొప్ప గటిదాన్ అడ్డుజ్ వాతిజ్బాగాని దేవుణు మజి సితి దయరమ్దాన్ సువార్త మాపు మిజి వెప్తావ్ ఇజి మీరు నెసినిదెర్.

3 మా మన్నుదు ఇనికాదొ సెఇ ఉదేసమ్దానొ, మజి ఇనికాదొ లాబం దొహ్కెజ్ ఇజినొ, మిజి మోసెం కిదెజ్ ఇజినొ మాపు యా సువార్త మిజి వెహ్వతావ్.

4 గాని అక్కడె ఆవండ మాపు తగ్గికావ్ ఇజి దేవుణు మజి సుడేజి సువార్త వెప్తాజ్ ఇజి ఒపజెప్తి వందిజ్ మాపు వర్గిజినావ్. అందెజె మాపు లోకురిజ్ సర్ల కిబిస్సికార్ అవిండ, మా మన్నుజ పరీక్స కిజిని దేవుణుదిజ్నె సర్ల కిబిస్సికార్ ఆదెజ్ ఇజి సుడేజినావ్.

5 మాపు మిజి వెప్తాకెజ్ ఇనికెజ్బా పొజిజిని మాటెజ్ ఆఱ ఇజి మీరు నెసినిదెర్. మరి మజి డబ్బు వందిజ్ నండొ ఆన మనాద్ ఇజి మీరు నెన్ఎండ, మీ బాణిజ్ ఇనికబా గణస్తాజ్ ఇజి మాపు ఇనికబా డాఱ్సి వర్గివతావ్ ఇనిదన్నిజ్ దేవుణునె సాక్సి.

6 లోకుర్ మజి పొగ్డిడెజ్ ఇజి మాపు కోర్వతావ్. మీరు గాని మహికార్ ఎయెర్బాగాని మజి పొగ్డిడెజ్ ఇజి మాపు కోర్వతావ్. మాపు క్రిస్తు వందిజ్ అపొస్తురు ఆతికావ్ ఇజి మీబాణిజ్ లొసె ఆదెజ్ అక్కు మన్నికావ్.

7 గాని అయాలెకెండ కిఎండ, ఉండ్రె అయ్సి దని కొడొరిజ్ ఎలాగ సుడేజినాదొ, అయాలెకెండె మాపు మీ నడిమి తగె ఆత మహావ్.

8 మీరు మజి నండొ ఇస్టం ఆతికిదెర్. అందెజె మాపు గొప్ప సర్దాదాన్ మీ వెట దేవుణు సువార్త వెప్పికదె అవిండ, మరి మీ వందిజ్ మా బత్కుదాన్ ఇనిక కిదెజ్ అట్నాపొ అక్కెజ్ కిదెజ్బా తయార్ ఆత మహావ్. ఎందనిజ్ ఇహిజ మీరు మజి నసా డగ్రుహికిదెర్ ఆతిదెర్.

9 తంబెరిజాండె, మీ నడిమి సువార్త వెప్పి మహివలె, మాపు మీ మున్ను ఆదారం ఆవిండ, రెయు పొగొల్ కస్టబాడ్డి పణి కిజి మహావ్. మాపు కస్టబాడ్డి పణికితిక మరి మా కస్టమ్కు విజు మీరు తవ్విండ ఎత్తు కిజి మంజినిదెర్ ఇజి మాపు నెసినిదెర్.

10 దేవుణుదిజ్ నమ్మిత్తికిదెర్ ఆతి మీ నడిమి, మాపు ఎసా బక్తిదాన్, నీతి నిజాయితిదాన్, నిందెజ్ సిల్లెండ ఎలాగ బత్తితావ్ ఇని దనిజ్ మిరె సాక్సి, దేవుణుబా సాక్సి.

11-12 ఎందనిజ్ ఇహిజ. వన్ని గొప్ప జాయ్దుని, వన్ని ఏలుబడిడు మండ్రెజ్ ఇజి మిజి కూక్తి మని దేవుణుదిజ్ తగితి లెకెండ మీరు బత్తిదెజ్ ఇజి మిజి ఒరెన్ అప్పాసి వన్ని కొడొర్ వెట ఎలాగ వెప్పి నెగ్గి సర్ల నడిపిసినండ్రొ, అయ లెకెండ మీ లొఇ ప్రతి ఒరెన్ వన్నిజ్ ఉసార్ కిజి, దయరం వెప్పి, బతిమాలజ్ మాపు మీ వెట మహావ్ ఇజిబా మీరు నెస్సిదెర్.

13 మాపు దేవుణుదిజ్ ఎస్తివలెబా డిన్విండ వందనమ్కు కిజిని మంజినావ్. ఎందనిజ్ ఇహిజ మా బాణిజ్ మీరు వెప్పి మని దేవుణు మాట, అక్క లోకుర్ బాణిజ్ వాతి మాట లెకెండ ఆవిండ, అక నిజం మని లెకెండె, దేవుణు బాణిజ్ వాతి దేవుణు మాట లెకెండె మీరు డగ్రు కితిదెర్. అందెజె దేవుణుదిజ్ నమ్మిత్తికిదెర్ ఆతి మీ మన్నుదు అక్క నెగ్గి పణి కిజినాద్.

14 తంబెరిజాండె మీరు యూదయ దేసమ్దు మని క్రిస్తు యేసుజ్ నమ్మిత్తి మని దేవుణు సజమ్కాణి వరిజ్ పొలిసి నడిసినెదెర్. ఎందనిజ్ ఇహిజ, వారు వరి సొంత లోకుర్ ఆతి యూదురు బాణిజ్ స్రమెజ్ ఓరిస్తి మహి లెకెండ మీరుబా మీ సొంత లోకుర్ బాణిజ్ స్రమెజ్ ఒరిస్తిదెర్.

15 యూదురు ఆతికార్ ప్రబు ఆతి యేసుజ్ని దేవుణు ప్రవక్తరుజ సప్తార్. వారు మజిబా డిన్విండ హిమ్మెజ్ కిత్తార్. యూదురు ఆకార్ సువార్త వీంజి దేవుణు వరిజ్ రక్సిస్తెజ్ ఆవద్ ఇజి మాపు వరి వెట వర్గివిండ మజి అడు కిజి దేవుణుదిజ్ పడిఇ పణిజ్ కిజి వారు లోకుర్ విజెరిజ్ పగాతికార్ ఆజినార్.

16 యా లెకెండ వారు వరి పాపమ్కు మున్ను మరి కుడుఱ్సి పూర్తి కిజినార్. అందెజె కడివేరిదు దేవుణు కోపం వరి మున్ను మనాద్.

తెస్సలోనికది వరిజ్ సుడేడెజ్ పవులుజ్ మని గొప్ప ఆన

17 తంబెరిజాండె, మాపు సెగం కాలం మీ బాణిజ్ దూరం ఆతి మనిజ్ (మా ఒడొల్నె దూరం ఆతాద్ గాని మా మన్ను దూరం ఆవతాద్) మర్జి మీ డగ్రు వాజి మిజి సుడేడెజ్ ఇజి నండొ ఆన ఆజి నండొ పణి కిత్తావ్.



18 నిజమే, మీ డగ్రు వాదెజ్ ఇజి గొప్ప ఆస ఆతావ్ గాని సయ్ తాను దనిజ్ అడ్డు కిత్తాన్. పవులు ఇని నాను మరి మరి మీ డగ్రు వాదెజ్ ఇజి సుడేత.

19 మాపు ఎయెర్ వందిజ్ దేవుణు ఎద్రు ఆసదాన్ ఎద్రు సుడేజినాప్? మజి సర్ద కిబిస్సికార్ ఎయెర్? సిల్లిజ ఎస్తివలెబా మాపు యేసుక్రీస్తు ఎద్రు పొగిడిజి, మజి గొప్ప సర్ద కల్గిసిని ఉండ్రి టోపి లెకెండ్ మనికార్ ఎయెర్? మా ప్రబు ఆతి యేసు క్రీస్తు వాని వలె వన్ని ఎద్రు మంజిని మీరెగదె?.

20 నిజమే మీరె మజి నెగ్గి పేరు తపిసినికిదెర్. మజి సర్ద కిబిసినికిదెర్ మీరె.

### 3

1 మిజి సుడేదెజ్ ఇజి మజి మని ఆస బరిస్సెజ్ అట్ ఏండాతిజ్, మాపు ఏదెన్ను ఇని పట్టుమ్దు మంజినిక నెగ్గిక ఇజి ఒడిబిజినె,

2 యేసుక్రీస్తు ముస్సు మీరు ఇడ్డి నమకమ్దు కద్దిఎండ మిజి దయరం వెప్పి, సత్తు మని వరి లెకెండ్ ముజాల నడిపిస్సెజ్ ఇజి యేసుక్రీస్తు వందిజ్ సువార్త సాటిస్సెజ్ మా వెట కూడ్డి దేవుణు పణి కినికానాతి మా తంబెరి ఆతి తిమోతిజ్, మీ డగ్రు పోక్తాప్.

3 అందెజె మీ లొఇ ఎయెన్ బా యా కస్టమ్ కాజ్ సుడేజి వెనుక సొన్ ఎండ, యేసుక్రీస్తు ముస్సు మని నమకమ్దు గటిజి నిల్లి మండ్రెజ్ వలె. ఎండనిజ్ ఇహిజ మాటు యాకెజ్ ఒరిస్సెజ్ వలె ఇజి మీరు నెసినిదెర్.

4 నిజమే, మాపు మీ వెట మహివలెనె మజి హిమ్మెజ్ వానె ఇజి మిజి వెప్పి మహాప్. యాకెజ్ మాపు వెహితి లెకెండ్ నె జర్గితె ఇజి మీరు నెసినిదెర్.

5 ఎలాగబా సయ్ తాను నెఇ పణిజ్ కిదెజ్ ఇజి మీ మన్నుదు ఆస పుటిసి, మీ నడిమి మాపు కితి పణిజ్ విజు ఉండ్రి వేల పణిదిజ్ రెవండ కిత్తాను ఇజి నాను తియెలాత. అందెజె దన్ని వందిజ్ ఎత్తు కిజి, యాక ఒరిస్సెజ్ అట్ ఏండా మీ నమకం వందిజ్ నెస్సెజ్ ఇజి నాను తిమోతిజ్ పోక్త.

#### తిమోతి తతి నెగ్గి కబ్బు

6 గాని తిమోతి మీ బాణిజ్ ఏలె మా డగ్రు వాతాన్. మిజి దేవుణు ముస్సు మని నమకం వందిజ్, మీ ప్రేమ వందిజ్ నెగ్గి కబ్బు తతాన్. మాపు మిజి సుడేదెజ్ ఆస ఆజిని లెకెండ్, మీరుబా మజి సుడేదెజ్ ఆస ఆజినిదెర్ ఇజి వాండ్రు వెప్తాన్. మరి మా వందిజ్ ఎస్తివలెబా సర్దాదాన్ ఎత్తు కిజినిదెర్గె.

7 అందెజె తంబెరిజాండె, మాపు మజి వాతి దుకమ్దాన్ మహివలె, మజి హిమ్మెజ్ వాతివలె మీ నమకం వందిజ్ విహాపె ఉస్సార్ కిబె ఆతాప్.

8 మీరు ప్రబు ముస్సు మని నమకమ్దు గటిజి నిల్లి మంజినిదెర్, అందెజె దేవుణు ముస్సు మిజి మని నమకం మా బత్తు లెకెండ్ నె మజి విలువాతిక ఆజినాద్.

9 దేవుణు ముండాల మీ వందిజ్ మన్ని విజు సర్ద వందిజ్ దేవుణుదిజ్ వందనమ్కు ఎసా వెప్తాజ సరి ఆనాద్? ఎస్సా మాపు వెప్తాజ్ బా అక్క తక్కునె మంజినె.

10 మాపు మిజి మరి ఉండ్రి సుటు సుడేజి దేవుణు ముస్సు మని మీ నమకమ్దు మిజి తకు మనిక పూర్తి కిదెజ్ ఇజి ఉండ్రి సుటు అవ్ కాసం దొహ్ క్తికెజ్ ఇజి రెయు పొకల్ దేవుణు వెట పార్దనమ్దు నండొ బతిమాలిజినాప్.

11 మా బుబ్బాతి దేవుణుని మా ప్రబువాతి యేసు మీ డగ్రు వాదెజ్, మజి ఇని అడ్డు సిల్లెండ సరి తొరిసిన్.

12 మాపు మిజి ప్రేమిసిని లెకెండ్ మీరు ఒరెన్ మరి ఒరెన్ వెట ప్రేమిస్సెజ్, మరి మీ లొఇ మని ప్రేమ నండొ అజి పొగిజిని లెకెండ్ ప్రబు మిజి సాయం కిపిన్.

13 మా ప్రబువాతి యేసు వన్ని నీతి నిజాయితి మని వరి వెట వాని వలె, మా బుబ్బాతి దేవుణు ఎద్రు మీరు ఇని కరయి సిల్లెండ, నీతి నిజాయితిదాన్ మండ్రెజ్, మీ మన్నుదు దేవుణు మిజి సత్తు సిపిన్.

### 4

#### దేవుణుదిజ్ ఇస్టమాతి లెకెండ్ బత్తిని వందిజ్

1 తంబెరిజాండె, దేవుణుదిజ్ ఇస్టం ఆతివజ ఎలాగ బత్తిదెజ్ ఇజి మాపు మిజి నెస్సిస్త మనాప్. మీరు అయాలెకెండ్ నె కిజినిదెర్. గాని అక్కర్దిజ్, మాపు మిజి యేసుప్రబు పేరుదాన్ గటిజి సారిసి సారిసి వెప్పినిక ఇనిక ఇహిజ మీరు అయ లెకెండ్ మరి ఒదె నెగెణ్ కిజి మండ్రు.

2 యేసుప్రబు బాణిజ్ మజి దొహ్ క్తి అతికారమ్దాన్ మాపు మిజి నెస్సిస్తికెజ్ ఇనికెజ్ ఇజి మీరు నెసినిదెర్.

3 మీరు దేవుణు వందిజ్ ఒప్పుజెప్పి వన్ని వందిజ్ కేట ఆతికార్ ఆజి మండ్రెజ్ ఇజినె దేవుణు ఇస్టమాజినాన్. మీరు రంకు బూలానిక ఆవద్ ఇజినె దేవుణు కోరిజినాన్.

4 అక్కాదె ఆవండ దేవుణు మీ ఒణ్ణోల్దిజ్ మని ఆసదిజ్ సరి సివిండ, ఒరెన్ సొంత ఒణ్ణోల్దిజ్ ఇని పాపమ్దిజ్ సొన్విండ ఎలాగ తగితి లెకెండ దేవుణుదిజ్ ఇస్టమాతి వజ అడిదెజ్ ఇజి మీరు ఒరెన్ ఒరెన్ నెస్టెజ్ వలె.

5 మీరు, దేవుణుదిజ్ నెన్ఇ, దేవుణుదిజ్ నమ్మిఇ వరిలెకెండ, ఉత్పుత్ ఆజి మండ్రెజ్ ఆవద్.

6 ఎయెన్బా, ఉత్పుత్ ఆజి, వన్ని వెట మన్ని నమ్మిత్తికానాతి ఒరెన్ తంబెరి ఆల్ని వెట, కూడ్జి మంజి, వన్నిజ్ మొసెం కిదెజ్ ఆవద్. యా లెకెండ కిని వరిజ్ దేవుణు సిక్స సీనాన్. దిన్ని వందిజ్ మాపు ముజాల మీ వెట కసితం వెప్తో మహాప్.

7 ఎందనిజ్ ఇహిజ. రంకు బూలాజి బత్తిదెజ్ ఇజి దేవుణు మజి కూక్తెజ్ సిల్లెన్, గాని పాపం సిలి నెగ్గి బత్తు, బత్తిదెజ్ ఇజినె కూక్త మనాన్.

8 అందెజె యా బోదదిజ్ నెక్కి పొక్కికాన్, లోకుదిజ్ నెక్కి పొక్విన్ గాని దేవుణు అత్తుదిజ్ మిజి సీజిని దేవుణుదిజ్ నెక్కి పొక్కికాన్ ఆజినాన్.

9 తంబెరిజ నడిమి, ఒరెన్ వన్నిజ్ మరి ఒరెన్ వన్ని వెట మన్ని ప్రేమ ఎలాగ మండ్రెజ్ ఇజి, మాపు మిజి ఏలు రాస్తెజ్ అవ్సరం సిల్లెద్. ఒరెన్ మరి ఒరెన్ వన్నిజ్ ఎలాగ ప్రేమిసి మండ్రెజ్ ఇజి దేవుణునె మిజి నెస్పిస్త మనాన్.

10 నిజమె మాసిదొనియ ప్రాంతమ్దు మనిక తంబెరిజ విజెరిజ్ మీరు ప్రేమిసినిదెర్. గాని మీరు మరి ఒదె ప్రేమిసి మండ్రెజ్ ఇజి మాపు సారిసి సారిసి వెహ్సినాప్.

11 మాపు ముజాలలె మిజి ఆడ్ర సత్తిమహి లెకెండ సార్లిదాన్ బత్తిదెజ్ ఆస ఆజి మండ్రు. మరి మీ కికాణిజ్ మీ వందిజ్ పణి కిజి మండ్రు మహివరి నజతిజి లోఇ బుర డుజ్విండ, మీ పణిజ్ నుడేజి మండ్రు.

12 నస్తవలె మీ బత్తు నడేజి నమ్మిఇకార్ మిజి గవ్వరం సీనార్. మరి మీరు, మహి వరి ముస్సు ఇనిదని వందిజ్ బా ఆదారం ఆవిండ మంజినిదెర్.

### ప్రబు మర్జి వాని వందిజ్

13 తంబెరిజాండె, దేవుణు ముస్సు నమకం ఇట్టి సాతివరిజ్ ఇనికా జర్గినాద్లె ఇజి మీరునెసి మండ్రెజ్ ఇజి మాపు కోరిజినాప్. ఎందనిజ్ ఇహిజ దేవుణు ఎద్రు ఇని ఆస సిలి నమ్మిఇ వరి లెకెండ మీరు దుకం ఆవిండ మండ్రెజ్ వలె ఇజి మాపు కోరిజినాప్.

14 యేసుప్రబు సాతండ్రె మర్జి నిజితాన్ ఇజి మాటు నమ్మిజినాట్. అయలెకెండె యేసుప్రబు ముస్సు నమ్మకం ఇడేజి సాతివరిజ్ బా దేవుణు యేసు వెట కూక్త తనాన్.

15 అందెజె ప్రబు ఆతి యేసు వెప్తి మని మాట అసి మాపు మిజి దయ్ రమ్దాన్ వెహ్సినిక ఇనిక ఇహిజ, ఏలు బత్తిజిని మాటు, యేసు ప్రబు మర్జి వాని రోజు బత్తిజి మహిజ్ బా, ప్రబు ముస్సు నమకం ఇడేజి సాతి వరిజ్ ఇంక ముజాల వన్ని డగ్రు సొండ్రెజ్ అట్విట్. వారె ముజాల సొనార్లె.

16 ప్రబువాతి యేసుక్రిస్తు వన్ని గొప్ప పెరి జాటుదాన్ ఆడ్ర సీజి, విజు దాతారి ముస్సు నెయ్యి ఆతి దూత జాటుదాన్ ని, దేవుణుది గొప్ప పెరి జోడూబంగ ఊక్కి జాటుదాన్ పరలోకమ్దాన్ డిగ్గి వానివలె, యేసుప్రబు ముస్సు నమకం ఇడేజి సాతికార్ ముజాల నిజ్నార్లె.

17 నస్తవలె బూమి ముస్సు బత్తిజిని మాటు యేసుప్రబుజ్ దసుల్ ఆదెజ్ ఆకాసమ్దు మని మొసొపుదు వరివెట పెరె ఆనాట్లె. అయలెకెండ మాటు ప్రబు వెట ఎలాకాలం మంజినాట్లె.

18 అందెజె మీరు యా మాటెజాణిజ్ ఒరెన్ మరి ఒరెన్ వన్ని వెట దయ్ రం వెహ్సి మండ్రు.

## 5

1 తంబెరిజాండె, ఎస్తివలె అక్కెజ్ విజు జర్గినాద్లె ఇజి, ఆ గడియ వందిజ్ నొ, ఆకెజ్ ఎలాగ జర్గినె ఇని వందిజ్ నొ మాపు మిజి రాస్తెజ్ అవ్సరం సిల్లెద్.

2 ఎందనిజ్ ఇహిజ, ఎయెర్ బా ఒడేబిఎండ మనివలె రెయ్య, డొజ కిదెజ్ డొజారి ఎలాగ వానాండ్రొ, అయ లెకెండె ప్రబు వాని దినంబా మంజినాద్ ఇజి మీరు బాగ నెసినిదెర్.

3 “నమదనమ్దాన్ మనాప్, మజి ఇని తియెల్ సిల్లె”, ఇజి లోకుర్ వర్గిజి మంజిని వలెనె, పొటాదు మన్ని బోదెలిదిజ్ ఎలాగ ఏరు ఈబాని నొప్పి వానాదొ, అయలెకెండె వెటెనె నాసనం వరి ముస్సు వానాద్లె. అందెజె ఎయెర్ బా తప్రె ఆదెజ్ అట్విట్.

4 తంబెరిజాండె, ఇనికబా ఒడోబిఎండ మనివలె, ఒరెన్ డోజారి లెకెండ అయా దినం మీ ముస్సు వాతిజ్బా మీరు బమ్మ ఆఇదెర్. ఎందనిజ్ ఇహిజ, మీరు దిని వందిజ్ నెన్ఎండ సీకటిదు బత్తిని కిదెర్ ఆఇదెర్.

5 మీరు విజదెరె జాయ్దు పుట్టి నని వరి లెకెండ మనిదెర్, వెడెదిజ్ పుట్టి నని వరి లెకెండ మన్నిదెర్. మాటు రెయుదిజ్ పుట్టి నని వరి లెకెండ ఆవెట్.

6 అందెజె మాటు మహి వరి లెకెండ నిద్ర కిజి మన్ఎండ మా మన్సుదిజ్ అడిజి తెలిదాన్ మంజినాట్.

7 నిద్ర కినికార్ రెయు నిద్ర కిజినార్. ఉణిజి సోస్సికార్ రెయు సోసి మంజినార్.

8 మాటు వేలెదిజ్ పుట్టి నని వరి లెకెండ మనికాట్. అందెజె మాటు మా మన్సుదిజ్ అడ్డిజి, దేవుణు ముస్సు మని నమకమ్ని ప్రేమ, మజి గుండెదిజ్ అడు కిని ఉండ్రీ ఇనుము సొక లెకెండ తోడుగినాట్. మరి దేవుణు మజి రక్సిస్సాన్లె ఇజి వన్ని వందిజ్ ఆసదాన్ ఎద్రు సుడోజి మంజినిక, మజి బురాదిజ్ అడు కిని ఇనుము టోపి లెకెండ తోడిగిజి మంజినాట్.

9 ఎందనిజ్ ఇహిజ, మా ప్రబువాతి యేసుక్రీస్తు మజి రక్సిస్టెజ్ ఇజినె దేవుణు మజి ఏర్పాటు కిత్తాన్. గాని వన్ని బాణిజ్ వాని సిక్కు వందిజ్ అవెద్.

10 మాటు బత్తితి మహిజ్బా, సాతి మహిజ్బా, వాండ్రు మర్జి వానివలె వన్నివెట మజి బత్తిస్టెజ్నె యేసుక్రీస్తు మా వందిజ్ సాత్తాన్.

11 అందెజె మీరు ఏలు కిజిని లెకెండె ఒరెన్ మరి ఒరెన్ వన్ని వెట దయరం వెహ్ని, ఒరెన్ వన్నిజ్ దేవుణు ముస్సు మని నమ్మకమ్దు పిరిని లెకెండ సాయం కిజి మండ్రు.

12 తంబెరిజాండె, యేసుప్రబు బాణిజ్ మన్ని అతికారమ్దాన్ మిజి నెస్సిసి, బుది వెహ్ని, మీ నడిమి కస్టబాడిజి దేవుణు పణి కిని వరిజ్ గవరం సీదు ఇజి మిజి బతిమాల్జినాప్.

13 వారు కిజిని పణి వందిజ్ వరిజ్ నండో ప్రేమిని గవరం సీజి మండ్రు. ఒరెన్ మరి ఒరెన్ వన్ని వెట నిపాతిదాన్ బత్తిజి మండ్రు.

14 తంబెరిజాండె, మాపు మిజి వెహ్నినిక ఇనిక ఇహిజ, బదకమ్దాన్ మని వరిజ్ మీరు బుద్ధి వెహ్ను. విసారం అస్తి మనివరిజ్ దయరం వెహ్ని మండ్రు. దేవుణు ముస్సు మని నమకమ్దు పిరిదెజ్ అట్ఇ వరిజ్ సాయం కిజి మండ్రు. విజేరె వెట ఓరిసి మండ్రు.

15 ఎయెన్బా వన్ని వెట మరి ఒరెన్ కితి సెఇ పణిదిజ్ మర్ది సెఇ పణిజ్ కివిండ సుడోదు. ఎస్తివలెబా ఒరెన్ మరి ఒరెన్ వన్ని వెట కనికారమ్దాన్ మండ్రు. లోకుర్ విజెరె వెటబా కనికారమ్దాన్ మండ్రు.

16 ఎస్తివలెబా సర్దదాన్ మండ్రు.

17 డిన్ఎండ పార్దనం కిజి మండ్రు.

18 ఎలాగ మర్ది సమయమ్దుబా విజు దనిజ్ దేవుణుదిజ్ వందనమ్కు వెహ్ని మండ్రు. యేసుక్రీస్తుజ్ నమ్మిత్తి మని మీరు యాలెకెండ మండ్రెజ్ ఇజినె దేవుణు కొరిజినాన్.

19 మీ లోఇ మని దేవుణు ఆత్మదిజ్ నప్పాట్.

20 దేవుణు బాణిజ్ వాతి దేవుణు ప్రవక్తరు వెహ్ని మాటెజు నెక్కి పొక్కాట్.

21 విజు వనకాజ్ పరిస కిజి నెగ్గి దనిజ్ డగ్గు కిదు.

22 సెఇ విజు వన్కాజ్ దూరం కిదు.

23 నిపాతిదిజ్ ప్రబువాతి దేవుణునె మిజి పూర్తి నెగ్గికార్ కిపిన్. మా ప్రబువాతి యేసుక్రీస్తు వానిదాక వన్ని ఎద్రు మీ దేవుణు ఆత్మాని, మీ పాణం, ఒడోల్ విజు ఇని నిందెజ్ సిల్లెండ దేవుణు కాపాడోజి మనీన్ ఇజి నాను పార్దనం కిజిన.

24 మిజి కూక్తి మని దేవుణు నమ్మకమాతికాన్. అందెజె వాండ్రు వెహ్ని లెకెండె కినాన్.

25 తంబెరిజాండె, మా వందిజ్ పార్దనం కిదు.

26 పూర్తి నెగ్గి మన్సుదాన్ పొంపిజి ముద్దు కిజి తంబెరిజ్ విజెరిజ్ వందనమ్కు వెహ్ను.

27 తంబెరిజ్ విజేరిజ్ యా ఉత్తం నద్వీజి వెన్పిస్టెజ్ ఇజి ప్రబువాతి యేసుక్రీస్తు పేరుదాన్ మిజి బతిమాలిజన.

28 మా ప్రబువాతి యేసుక్రీస్తు దయాదర్మం మీ వెట మనీద్.

## అపొస్తుడు ఆతి పవులు తెస్సలోనిక పట్టుమది నమ్మిత్తి వరిజ్ రాస్తి రుండి ఉత్తం

నెల్వ కిబిసినిక

ఇక్క అపొస్తుడు ఆతి పవులు దెసలోనిక పట్టుమదు మహి దేవుణు సజమ్ది వరిజ్ రాస్తి మన్ని రుండి ఉత్తం. సీలాని తిమోతి ఇనికార్ దెసలోనిక పట్టుమదు సొన్ని, అపొస్తుడు ఆతి పవులు రాస్తి ఉత్తం సీజి మర్ణి వాత్తి వెనుక యా ఉత్తం రాసి ఆత మనాద్ ఇజి ఒడఃబిజినార్.

యా ఉత్తమ్దు మొదోహి ఉత్తమ్దు మన్ని దన్నిజ్ సమానమాతి మాటెజ్ మన్నె. (ఉండ్రీ దెస్సలోనిక నెల్వ కిబిసినిక సుడఃదు). రుండి ఉత్తమ్కాజ్, వాండ్రు కిత్తి సువార్త పణిదాన్ తయారాతి మన్ని సజమ్కాజ్ వన్ని మన్నుదు మన్ని బాద, పవులు తోరిసినాన్. తప్పు బోదదిజ్, అబద్దం నెస్సిసిని వరిజ్ లోజిజి మన్ఎండ, గటిజ నిల్పి మండ్రు ఇజి పవులు వరిజ్ ఎత్తు కిబిసినిక.

యేసుప్రబు మర్ణి వాని వందిజ్ యా ఉత్తమ్దు రాస్త మనాద్. (రుండి దెస్సలోనిక 1:9-10; 2:1-3). యేసుప్రబు సిలువాదు సాజి, మర్ణి నిజీతి వెనుక ఇంజు ముంజు 17-20 పంటెజ్ డాట్టి వెనుక పవులు ఇక్క రాస్తాన్ ఇజి విజెరె ఒడఃబిజినార్ దేవుణు మున్ను నమ్మకం ఇట్టి వరిజ్ వాని కాలమ్దు ఇనిక ఆనాద్ ఇజి నెస్సిస్తెజ్, మరి వారు నమకం డిఃన్ఎండ గటిజ నిల్పిమండ్రెజ్ ఇజి యా ఉత్తం రాస్తాన్.

1 బుబ్బాతి దేవుణుదిజ్ని ప్రబు ఆతి యేసు క్రీస్తుజ్ సెందితి మని దెసలోనిక పట్టుమది దేవుణు సజమ్దిజ్ పవులుని సిలువానుని తిమోతి రాసిని ఉత్తం.

2 బుబ్బాతి దేవుణుని ప్రబు ఆతి యేసుక్రీస్తు, దయాదర్మమ్దాన్ మీరు నిపాతిదాన్ మండ్రెజ్ సాయం కిపిర్.

3 తంబెరిజాండె, మాపు ఎస్తివలెబా మీ వందిజ్ దేవుణుదిజ్ వందనమ్కు వెప్పినె మండ్రెజ్ వలె. అయ లెకెండె వెప్పినె, కిదెజ్ మన్ని సరి ఆతి సజతిసె. ఎందనిజ్ ఇహిజ దేవుణు మున్ను మని మీ నమకం మరి నండో ఆజి పిరిసినాద్. ఒరెన్ వన్నిజ్ మరి ఒరెన్ వన్ని వెట మని ప్రేమ మీరు విజెరె లోఇ మరి నండో ఆజినాద్.

4 అందెజ్ మీరు, డిఃన్ఎండ హిమ్మెజ్ ఓరిసిని వందిజ్, స్రమెజ్ ఓరిసి మహిజ్బా దేవుణు మున్ను మని నమకమ్దు మీరు ఎలాగ గటిజ నిల్పి మంజినిదెర్ ఇజి మహి దేవుణు సజమ్కాజ్ మీ వందిజ్ మాపు పొగడిజి వెప్పినాప్.

5 నీతి నిజాయిదాన్ దేవుణు తీర్పు సిజినాన్ ఇని దనిజ్ యాకెజ్ విజు రుజుప్ ఆజినె. దేవుణు కిని ఏలుబడిదు మండ్రెజ్ మీరు తగ్గికిదెర్ ఆజినిదెర్. దని వందిజ్నె యా కస్టమ్కు విజు మీరు ఓరిసినిదెర్.

6-8 మా ప్రబు ఆతి యేసు నేగడిజిని సిసు కొనెజాణిజ్ వన్ని గొప్పు సత్తుమని దూతెజ వెట పరలోకమ్దాన్ తోరె ఆనివలె, దేవుణుదిజ్ నెన్ఇ వరిజ్ని, మా ప్రబు ఆతి యేసు సువార్త మాటెజ్ లోజిజి వరిజ్ సిక్స సీనాన్లె. దేవుణు నీతి నిజాయిమనికాన్. అందెజె నస్తివలె మిజి స్రమెజ్ కితి వరిజ్ స్రమెజ్ మర్జి సీనాన్లె. స్రమెజ్ ఓరిస్తిమని మిజిని, మజి రొబిస్సాన్లె.

9 నస్తివలె యేసుప్రబు సెఇ వరిజ్ వన్ని ఎద్రుహాన్, వన్ని గొప్పు సత్తుదాన్, వారు వన్ని డగ్రు మన్ఎండ దూరం కిజి ఎలాకాలం మంజిని నాసనమ్దాన్ సిక్స సీనాన్లె.

10 అయా రోజు, వన్నిజ్ సెందితి వరివెట వన్ని గొప్పు జాయ్ తోరె ఆదెజ్, మరి వన్నిజ్ నమ్మిత్తికార్ విజెరె బమ్మ ఆని లెకెండె వరి నడిఃమి ప్రబు వానివలె మాపు వెప్తి మా సాన్యమ్కు నమ్మిత్తికిదెర్ ఆతి మీరుబా వరి వెట మంజినిదెర్లె.

11 యాకా మా మన్నుదు మంజి, మిజి వాండ్రు కూక్తి దనిజ్ తగ్గికిదెర్ లెకెండె దేవుణు మిజి సుడఃదెజ్ ఇజి, మరి మీ నెగ్గి ఉదెసమ్కు విజు, మరి మీరు వన్ని మున్ను ఇడ్డి మని నమ్మకమ్దాన్ కిజిని విజు పణిజ్ దేవుణు వన్ని సత్తుదాన్ పూర్తి కిదెజ్ ఇజి మాపు మీ, వందిజ్ ఎస్తివలెబా దేవుణుదిజ్ పార్దనం కిజినాప్.

12 మా దేవుణు బాణిజ్ని ప్రబు ఆతి యేసు క్రీస్తు బాణిజ్ వాతి దయా దర్మమ్దాన్ యేసు ప్రబు పేరు మీ నడిఃమి గొప్పు పెరిక ఆదెజ్, మరి మీరు వన్ని వెట కూడ్డి గొప్పు పేరు పొందితికిదెర్ ఇజి తోరె ఆదెజ్ ఇజి మాపు యా లెకెండె మీ వందిజ్ దేవుణుదిజ్ పార్దనం కిజినాప్.

## 2

### దేవుణుడి పడితకాన్

1-2 తంబెరిజాండె, మా ప్రబు ఆతి యేసు క్రీస్తు మర్రి వాని దినమ్ వందిజ్ని మాటు వన్ని వెట కూడ్డి మంజిని వందిజ్ ఏలు వెప్పినాన్. ప్రబు ఆతి యేసు వాత మనాన్ ఇజి ఉండ్రీ ప్రవక్త మాటదానో, మా బాణిజ్ వాతి లెకెండ్రీ ఉండ్రీ ఉత్రం వాతాద్ ఇజినో, కబ్బు వాతాదిజినో వెంజి గజిబిజి ఆజి మీ మన్ను సెద్రిన్ ఏండ, తియెల్ ఆవిండ మండ్రెజ్ ఇజి మాపు మిజి బతిమాల్లినాన్.

3 ఎయెర్ బా ఇని పణి కిజి మిజి మోసెం కివిండ జాగర్త మండ్రు. (అయ దినం ఏలు దాక రెవెదె). లోకుర్ నండ్రెండ్రా దేవుణుడి పడిత పణిజ్ కిజి టంటెజ్ ఆనార్లె. మరి దేవుణు రూలుజ విజు పడిత కిజిని నాసనమ్దిజ్ తగ్గికాన్ ఆతి సెఇకాన్ తోరె ఆనిదాక అయ రోజు రెవెదె.

4 దేవుణు ఇజి పేరు ఇడె: ఆతి మని విజు వన్కాజ్, పూజెజ్ కిబె ఆజిని విజు వనకాజ్ పడిత ఏండ పణిజ్ కిజి, అయ విజు వన్కాజ్ మున్ను వన్నిజ్ వాండ్రె దేవుణు ఇజి వెప్పాడ్రె, వాండ్రు దేవుణు గుడిదుబా సొన్ని బస్సాన్.

5 నాను మీ వెట మహివలె యా సజతిజ్ మీవెట వెప్తి మహిక మీరు ఎత్తు కిడెరా?

6 వన్ని వందిజ్ ఏర్పాటు కితి మని గడియారునె వాండ్రు తోరె ఆదెజ్ వలె. అందెజె, ఏలు నాసనమ్దిజ్ తగ్గికాన్ ఆతి వన్నిజ్ అడ్డు కిజి నిల్సెనిక ఇనికాదో ఇజి మీరు నెస్సిదెర్.

7 దేవుణు విజు రూలుజ పడిత పణి కిజిని డాజెతి మని సత్తు ఏలుబా పణి కిజినాద్. గాని దనిజ్ అడ్డు కిజి నిల్సె మంజినికాన్ నడిమిహాన్ లాగె ఆనిదాక యా లెకెండ్రీ అడ్డు కిజి మంజినాన్.

8 నస్తవలె దేవుణు రూలుజ పడిత పణిజ్ కినికాన్ తోరె ఆనాన్లె. వన్నిజ్ మా ప్రబు ఆతి యేసు వన్ని వెయుదాన్ వాని ఊప్రిదాన్ సప్పి, వాండ్రు వానివలె మంజిని గొప్ప జాయ్దాన్ వన్నిజ్ నాసనం కినాన్లె.

9-10 దేవుణు రూలుజ పడిత పణిజ్ కినికాన్ తోరె ఆనివలె సయ్యూను వన్ని సత్తుదాన్ రకరకమ్ది బమ్మ పణిజ్ గొప్ప పెరి పణిజ్ కిజి, నాసనం ఆజి సొని వరిజ్ విజెరిజ్ మోసెం కిదెజ్ విజు సెఇ పణిజ్ కిజి తొరిస్సాన్. ఎందనిజ్ ఇహిజు నిజమాతి దనిజ్ ప్రేమిసి దేవుణు వరిజ్ రక్సిస్తెజ్ వారు ఒవ్వెతార్. అందెజె వారు నాసనం ఆజి సొన్నినార్.

11 అందెజె వారు అబదమ్దిజ్ నమ్మిని లెకెండ్రీ మోసెం కిని సత్తుదిజ్ దేవుణు వరి మున్ను పొక్కాన్.

12 అందెజె, నిజమాతి దనిజ్ నమ్మి ఏండ సెఇదని వెట సర్ల ఆతి విజెరిజ్ దేవుణు సిక్స సీనాన్.

### గటిజు నిల్పి మండ్రు

13 గాని మీ వందిజ్ ఎస్తివలెబా దేవుణుడి మాపు వందనమ్కు వెప్పి మండ్రెజ్ వలె. యాక కిజి మంజినిక సరి ఆతి పణినె. తంబెరిజాండె ఎందనిజ్ ఇహిజు దేవుణు ఆత్మ, వన్ని నెగ్గి కిజిని పణిదాన్, మీరు నిజమాతి దనిజ్ నమ్మిజి దేవుణు మిజి రక్సిస్తెజ్ ఇజి, దేవుణు యా లోకం పుట్ ఏండ ముజాలె మిజి ఎర్లిస్త మహాన్.

14 మీరు యా లెకెండ్రీ యేసుప్రబు వెట వన్ని గొప్ప పెరి జాయ్దు మండ్రెజ్ అక్కు మనికిదెర్ అదెజ్ ఇజి మాపు వెప్తి సువార్దదాన్ దేవుణు మిజి కూక్త మనాన్.

15 అందెజె తంబెరిజాండె, మాపు మాటాదానో ఉత్రమ్దానో మిజి నెస్పితికెజ్ డి:న్ ఏండ మీ మన్నుదు ఇడ్డి కద్ది ఏండ మండ్రు.

16-17 మజి ప్రేమిసి ఎలాకాలం ఎద్రు సుడెజి మంజిని ఆసని, ఉసార్ మా మన్నుదు వన్ని దయాదర్మమ్దాన్ మజి సీతి మా బుబ్బాతి దేవుణుని, మా ప్రబు ఆతి యేసు క్రీస్తు మీ మన్నుజ దయరం వెప్పి, మీ విజు నెగ్గి మాటాదుని, మీరు కిజిని నెగ్గి పణిదు సత్తు సీజి నడిపిసీర్.

## 3

### పార్లనం కిజి మండ్రు

1 కడె:వేరిది మాట ఇనిక ఇహిజు, తంబెరిజాండె, ప్రబు మాటెజ్ మీ నడిమి సారితి లెకెండ్రీ మహిబాన్ బా మరి బేగి సార్లెజ్, గవరం లొన్ ఆదెజ్ ఇజి మీరు మా వందిజ్ పార్లనం కిజి మండ్రు.

2 విజెరిజ్ నమకం సిల్లెద్ గదె, అందెజె మాపు మూర్కతమ్దు మని వరి బాణిజ్ సెఇ వరి బాణిజ్ తప్రె ఆనిలెకెండ్రీబా మా వందిజ్ పార్లనం కిదు.

3 అహిజు ప్రబు నమ్మిదెజ్ తగ్గికాన్ అందెజె వాండ్రు మిజి సత్తు సీజి సెఇ వన్ని బాణిజ్ వాండ్రు కాపాడ్నాన్.

4 ఇక్కడ మీరు కిజి మండ్రెజ్ ఇజి మాపు మిజి ఆడ్ర సితమనికెజ్ అయాలెకెండ మీరు కిజినిదెర్. మరి కిజి మంజినిదెర్లె ఇజి ప్రబు పేరుదాన్ మాపు మన్నుదు ఒడొబిజినాప్.

5 దేవుణు ముస్కు మని ప్రేమని, మరి మీరు ఎలాగ కస్టమ్కు ఓరిస్తెజ్ ఇజి యేసుక్రీస్తు తోరిస్తి లెకెండ ఒరిస్తెజ్ మీ మన్నుదు రేపె ఆజి మండ్రెజ్ దేవుణు మిజి సాయం కిపిన్.

#### బండెజ్ ఆదెజ్ ఆవద్

6 తంబెరిజాండె, మా బాణిజ్ మీరు నెస్తిమని లెకెండ ఆవండ బదకమ్దాన్ మంజిని వరిజ్ గుర్తు కిజి, వరి బాణిజ్ మీరు ఏడాడిసి మండ్రు ఇజి మా ప్రబు ఆతి యేసుక్రీస్తు పేరుదాన్ మిజి ఆడ్ర సిత లెకెండ వెస్పినాప్.

7 మజి సుడొజి మా లెకెండ ఎలాగ నడిదెజ్ ఇజి మీరు నెస్తిదెర్ గదె. మాపు మీ వెట మహివలె బదకమ్దాన్ మన్వెత్తాప్.

8 మాప్వయెర్ బాణిజ్బా సెడ్డినె తిండి ఉణ్వెత్తాప్. ఎయెన్ ముస్కుబా ఆదారం ఆవండ మాపు రెయు పొగల్ కస్టబాడొజి పణి కిజి మహిక మీరు నెస్తిదెర్.

9 మీ బాన్ లొసి ఉండెజ్ అతికారం సిల్లెద్ ఇజి ఆవద్. గాని మీరు మజి సుడొజి నెసి అయా లెకెండ మండ్రెజ్ ఇజినె మాపు అయా లెకెండ ఇనికబా లొన్వెండ పణి కిజి మహాప్.

10 మరి మాపు మీ నడిమి మహివలె “ఒరెన్ పణి కవండ మహిజ వాండ్రు బోజనం కిదెజ్ ఆవద్”, ఇజి మిజి రూలు స్తిత్తాప్.

11 మీ లొఇ సెగొండార్ వరి సొంత పణి ఇనికబా కివండ, అనవుసరమ్దిజ్ ఆఇవరి నజతిజ లొఇ బుర్త డుక్కి మంజినార్ ఇజి మాపు వెహాప్.

12 ననికార్ వారు కిజిని అవ్సరం సిల్లి పణిజ్ డిసి సిజి నిపాతి పణి కిజి, మరి తిండి వందిజ్ గణస్తెజ్ ఇజి మా ప్రబు ఆతి యేసుక్రీస్తు పేరుదాన్ బతిమాలజి ఆడ్ర సిత లెకెండ వెస్పినాప్.

13 మరి తంబెరిజాండె మీరు నెగ్గికెజ్ ఆతికెజ్ కిదెజ్ ఎసెజ్బా వందిదెజ్ అవద్.

14 మాపు యా ఉత్తమ్దు రాస్తి పొక్తి మాటెజ్ లొజిఇ వన్నిజ్ గుర్తు కిదు. వాండ్రు సిగు ఆని వందిజ్ వన్ని వెట కూడొవండ మండ్రు.

15 అహిజ వన్నిజ్ పగాతి వన్ని లెకెండ ఒడొబివండ తంబెరి లెకెండ ఒడొబిజి వన్నిజ్ బుది వెత్తూ.

16 సమాదానమ్దిజ్ప్ ప్రబు ఆతికాన్ ఎస్తివలెబె ఎలాగ మర్తి కాలమ్దుబా మిజి నిపాతిదాన్ మండ్రెజ్ సిపిన్. ప్రబు మీ విజెరె వెట ఎస్తివలెబా మనిన్.

17 పవులు ఇని నాను, నా కియుదాన్ యా కడెవెరి మాటెజ్ రాసిన. నా విజు ఉత్తమ్దు యాకాదె గుర్తు. అందెజె నాను ఎలాగ రాసిన ఇజి మీరు పొలిస్తెజ్ అట్టిదెర్.

18 మా ప్రబు ఆతి యేసు క్రీస్తు దయా దర్మం మీ విజిదెరె వెట మనిద్.

## అపొస్తుడు ఆతి పవులు తిమోతిజ్ రాస్తి ఉండ్రీ ఉత్తం

నెల్వ కిబిసినిక

అపొస్తుడు ఆతి పవులు తిమోతిజ్ రాస్తి ఉండ్రీ ఉత్తమనె యాక. ఎపెసి పట్టుమదు మని దేవుణుదిజ్ నమ్మిత్తి వరి సజమ్దిజ్ నడిపిన్ని వన్ని లెకెండ తిమోతిజ్ ఏర్పాటు కిత మనాన్. అందెజె, సజం నడిపిన్నిక ఎలాగ, నడిపిన్ని పాస్టరుజు, పెద్దెల్జు ఎలాగ మండ్రెజ్ ఇని దనివందిజ్ వెప్పినాన్.

ఎపెసి పట్టుమదు నండో రకమ్కాణి గుడిజ్ మన్నె. దేసమ్కాజ్ నండో లోకుర్ బాన్ వానార్. అందెజె క్రీస్తు వందిజ్ నిజమాతి బోదదిజ్ కూడెకెజ్ నెస్పినికార్ నండోడార్ మనార్. వరి వందిజ్ జాగ్రత మండ్రు. నని బోద తప్పిన్నివరిజ్ బాణిజ్ దూరం ఆదు ఇజి వెప్పినాన్.

1-2 క్రీస్తు యేసుజ్ అపొస్తుడు ఆతి పవులు ఇని నాను తిమోతిజ్ రాసిన. నీను నా సొంత మరిన్ లెకెండ మని. ఎందనిజ్ ఇహిజ నానె నిజి దేవుణు దరోట్ తత. మజి రక్సినిని దేవుణు వెప్తి ఆడ్ర వజ, మాటు ఆసదాన్ ఎద్రు సుడెజిని క్రీస్తు యేసు వెప్తి ఆడ్ర వజ, నాను క్రీస్తు యేసుజ్ అపొస్తుడు ఆత. బుబ్బ ఆతి దేవుణుని ప్రబు ఆతి క్రీస్తుయేసు దయా దర్మమాదాన్, మీ మున్ను కనికారం తోరిసి, మీరు నిపాతిదాన్ మండ్రెజ్ సాయం కిపిర్.

3-4 నాను మసిదోనియదు సాన్సి మహివలె నిజి వెప్తి లెకెండ, నీను ఎపెసుదు మండ్రెజ్ వలె ఇజి నాను కసితం వెప్పిన. ఎందనిజ్ ఇహిజ, అబె సెగొండార్ తవు బోద నెస్పినికార్. వారు అయకెజ్ మరి ఎసెజ్బా నెస్పిన్తెజ్ ఆవిద్ ఇజి నీను డటం వెప్తిజ్ వలె. వారు డొక్టార్ వెప్పి మంజిని కత సాన్తరమ్క లొఇ, అంతు సిల్లెండ అని గొగొర్ వందిజ్ వెప్పిని సాన్తరమ్క లొఇ మన్ను ఇడెడెజ్ ఆవిద్ ఇజి నీను డటం వెప్తిజ్ వలె. అయాకెజ్ దేవుణు ఎత్తు కితి సజతిజ అడ్డు కిజి ఒరెన్ వెట ఒరెన్ తర్కినిని సజతిజ్నె రేజ్జెనె. దేవుణు మున్ను మని నమకం దానె, వాండ్రు ఎత్తు కితి సజతిజ్ నెస్సెజ్ఆనాద్.

5 నమ్మిత్తికార్, ఒరెన్ వెట ఒరెన్ ప్రేమిసి మండ్రెజ్. అందెజె నీను యా లెకెండ డటం వెప్తిజ్ వలె ఇజి నాను నిజి వెప్పిన. నెగ్గి మన్నుదాన్ వాజిని ప్రేమదాన్, నెగెండ గదిసిని గర్బందాన్ వాజిని ప్రేమదాన్, దేవుణు మున్ను మని నిజమాతి నమకమ్దాన్ వాజిని ప్రేమదాన్, ప్రేమిసి మండ్రెజ్.

6 సెగొండార్, మున్ను వెప్తి సజతిజ డిస్త సాహారె పణిదిజ్ రెకెజ్ వర్గిజనార్.

7 వారు దేవుణు మోసెజ్ సీతి రూలుజ్ నెస్పినికార్ ఆదెజె కోరిజనార్. గాని ఇని దని వందిజ్ వర్గిజనార్ ఇజినో, నండో దయరమ్దాన్ నిజమనె ఇజి వర్గిజని సజతిజ వందిజ్నో, వారు నెస్ఎర్.

8 దేవుణు మోసెజ్ సీతి రూలుజ్ వాడుకండెజ్ మని వజ వాడుకొటిజ, అయా రూలుజ్ నెగ్గికెజ్నె ఇజి మాటు నెస్సాట్.

9-11 మరి మాటు నెసినాట్, దేవుణు మోసెజ్ సీతి యా రూలుజ్, నాయమ్దాన్ మని వరిజ్ వరి తపుజ్ దిదిదెజ్ సిఎన్ ఇజి. గాని రూలుజ్ తప్పి వరిజ్, లోజ్ ఇ వరిజ్, నమ్మి ఇ వరిజ్, పాపిన్టిజ్, దేవుణు బాణిజ్ వాజిని సజతిజ్ ఇజి కణకదాన్ సూణి వరిజ్ మతమ్దిజ్ దూసిన్ని వరిజ్, అయిసి అప్పొసిరిజ్ సప్పి వరిజ్, లోకాజ్ సప్పి వరిజ్, రంకు బూలాని వరిజ్, మొకకొడె: మొకకొడె:నె కూడ్చి వరిజ్, వెట్టిపణి కిదెజ్ లోకురిజ్ అసి పొర్ని వరిజ్, అబద్దం వర్గిని వరిజ్, అబద్దమ్దిజ్ ఒట్టు కిని వరిజ్, నిజమాతి బోదదిజ్ విరోదం ఆతికెజ్ కిని వరిజ్, నని వరి వందిజె రూలుజ్ సీత మనాన్. నీను మహి లోకురిజ్ వెహా ఇజి, దేవుణు సజి ఒపజెప్తి సువార్తదు అయా నిజమాతి బోద మనాద్. లోకుర్ పొగిడిజిని కిజిని గొప్ప పెరి దేవుణు బాణిజె అయా సువార్త వాజినాద్.

పవులు మున్ను దేవుణు తోరిస్తి కనికారం

12-13 ముజాల నాను యేసుప్రబు ఆతి యేసుక్రీస్తుజ్ దూసినికాన్. నమ్మిత్తి వరిజ్ ఇమ్మెజ్ కిజి ఆహా వన్నిజ్ ఇమ్మెజ్ కితికాన్. వన్నిజ్ స్రమెజ్ కితికాన్. అహిజ్బా నాను నమ్మిదెజ్ తగ్గికాన్ ఇజి వాండ్రు ఒడిబిజి, మహివరిజ్ సువార్త వెప్పిని వన్ని పణిదిజ్ నజి ఏర్పాటు కిత్తాన్. అందెజె నాను మా ప్రబు ఆతి క్రీస్తు యేసు నజి కితి దని వందిజ్ ఎసెజ్బా పోన్ఎండ మన. వాండ్రునె వన్ని పణి కిదెజ్ నజి సత్తు సితాన్. నాను యేసుజ్ నమ్మిఎండ మహివలె, తెలిఎండ అక్కెజ్ కిత. అందెజె దేవుణు నా మున్ను కనికారం తోరిస్తాన్.

14 మా ప్రబు దయా దర్మమాదాన్, వన్నిజ్ నమ్మిదెజ్, మహివరిజ్ ప్రేమిస్సెజ్ నజి సాయం కిత్తాన్. క్రీస్తుయేసు వెట మాటు కూడితి మని దని దటాన్, నమకమ్ని ప్రేమ నజి దొహ్కె.

15 పాపం కిని వరిజ్ రక్సిస్తాజ్ క్రీస్తు యేసు లోకమ్దు వాతాన్ ఇని మాట నిజం ఆతిక. అయాక పూర్తి నమ్మిదెజ్ తగ్గిక. నాను కిత్తి పాపం నసా పాపం కినికార్ కిఎర్.

16 గాని, నసా పాపం కితి నా ముస్కు దేవుణు కనికారం తోరిస్తాన్. ఎందనిజ్ ఇహిజ, వాని కాలమ్దు యేసు ముస్కు నమకం ఇడేజి, ఎలాకాలం దేవుణు వెట బత్కిని బత్కు దోహక్కి వరిజ్ నాను ఉండ్రీ గుర్తు లెకెండ్ ఆని వందిజ్, నసా పాపం కితి నజీ, క్రీస్తుయేసు అంతు సిల్లెండ నండో ఓరిస్తాన్.

17 ఎలాకాలం రాజు ఆతి, ఎసెజ్బా సాఇ, నుడెదెజ్ అల్తె ఇ ఒరెండ్రె దేవుణుజ్ ఎలాకాలం గవరం సీజి పొగిడేజి మనీర్. ఆమెన్.

18 నా మరీన్ లెకెండ్ మని తిమోతి యాకదె నాను వెహ్నిని బుద్ది 'నీను కిదెజ్ మని వన్కా. వందిజ్ ప్రవక్తరు ముజాలె వెహ్తా మనార్గదె. వారు వెహ్తా వజనె నాను వెహ్నిన. వారు వెహ్తా మని వజ లోజీజి, తపు బోద నెన్పిన్ని వరిజ్ గటిజ ఎద్రిన్అ.

19 నా ముస్కు మని నీ నమకం డిఃస్కు. గర్బం గదిన్ఎండ నెగ్రెండ మన్అ. నెగొండార్, గర్బం గదిసి వెహ్నిని దనిజ్ నెక్త పొక్తార్ వరి నమకం పాడు కిత్తార్.

20 నని వరి లోఇ, హుమెనియ, అలక్నాండర్ ఇనికార్ మనార్. దేవుణుదిజ్ దూసిస్తాజ్ ఆవద్ ఇజి వారు నెన్ని వందిజ్, సయ్తాను కీదు నాను వరిజ్ ఒపజెప్త మన.

## 2

### సజమ్దు పార్దనం కిని వందిజ్ వెహ్నినాన్.

1 అందెజె మరి ముకెలం, లోకుర్ విజెరె వందిజ్, దేవుణుదిజ్ పార్దనం కిదెజ్. వరిజ్ కావాలిస్తెకెజ్ సిఅ ఇజి బతిమూల్జి లొస్తాజ్, వరి విజు వన్కా. వందిజ్ ఎస్తివలెబా పార్దనం కిదెజ్, వాండ్రు విజెరిజ్ కితి మేలు వందిజ్ వన్నిజ్ వందనమ్కు వెహ్తాజ్ ఇజి నాను మిజి ఉసార్ కిబిన్పు.

2 యా లెకెండ్ రాజుర్ వందిజ్, అదికారమ్దు మని విజెరె వందిజ్ పార్దనం కిదెజ్. ఎందనిజ్ ఇహిజ, మాటు సాంతి సమాదనమ్దాన్ మహి వరి ఎద్రు నెగ్రెండ బత్కిదెజ్, దేవుణుదిజ్ తియెల్ ఆజి పూర్తి బక్తిదాన్ మండ్రెజ్.

3 యా లెకెండ్ కినిక నెగెద్. మజి రక్సిన్ని దేవుణుదిజ్ ఇస్టం ఆతిక.

4 ఎందనిజ్ ఇహిజ, లోకుర్ విజెరిజ్ ఎల్లకాలం మని సిక్చదాన్ తపిస్తాజ్ ఇజి, లోకుర్ విజెరె క్రీస్తు వందిజ్ నిజమాతి మాటెజ్ నెస్టెజ్ ఇజి దేవుణు కోరిజినాన్.

5 దేవుణు ఒరెండ్రె. దేవుణు, లోకుర్ నడిఃమి ఒపిన్నికాన్ ఒరెండ్రె మనాన్. అయా ఒరెన్ క్రీస్తుయేసునె.

6 వాండ్రు లోకుర్ విజెరె పాపమ్కాజ్, ఎల్లకాలం మని సిక్చదాన్ తపిన్ని వందిజ్ సాదెజ్ వన్నిజ్ వాండ్రె ఒపజెపె ఆతాన్. యాకదె, దేవుణు ఏర్పాటు కితి కాలమ్దు, లోకుర్ విజెరిజ్ రక్సిస్తాజ్ దేవుణు కోరిజిని దనిజ్ సాస్యం.

7 అందెజె, ఒరెన్ సాటిన్ని వన్ని లెకెండ్, అపొస్తుడు లెకెండ్, నేర్పిన్ని వన్ని లెకెండ్, యూదురు ఆఇకార్ యేసు వందిజ్ నిజమాతి సజతిజ్ నెసి నమ్మిదెజ్, వరి వందిజ్ దేవుణు నజి ఏర్పాటు కిత్తాన్. ఈహు నజి ఏర్పాటు కిత్తాన్ ఇజి వెహ్నినిక నిజమనె అబద్దం ఆవద్.

8 అందెజె, దేవుణుదిజ్ పార్దనం కిదెజ్ మీరు కూడేజి వానివలె ఎంబెబా మొకకొడోర్ పార్దనం కిదెజ్ ఇజి నాను కోరిజిన. వారు దేవుణు వందిజ్ కేట ఆతి బత్కు బత్కిదెజ్ వలె. వారు పార్దనం కినివలె, వరి మన్సుదు కోపం సిల్లెండ, ఎయెవెటబ జటిజ్ ఆవండ కిక్కు పెర్తి కిదెజ్.

9 అయాలెకెండ్, దేవుణుదిజ్ పార్దనం కిదెజ్ మీరు కూడేజి వానివలె, బోదెకు నెగ్రెండ తయార్ ఆజి, వన్కాజ్ తగ్గి వజ తయార్ ఆజి వాదెజ్. అవికు సోకుజాణిజ్ మూల కనినో, బజారమ్నో, నండో కరీద్ది పూసెజ్నో నండో కరీద్తి పాతెజ్నో పోర్పాజి తయార్ ఆదెజ్ ఆవద్.

10 గాని దేవుణుదిజ్ నమ్మిజినికెజ్ ఇజి వెహ్ ఆని బోదెకు మహివరి వందిజ్ నెగ్గి పణిజ్ కిజి వన్కా. సోకు తోరె ఆదెజ్.

11 మొకకొడోర్ నెన్పిన్నివలె, బోదెకు నెగ్రెండ వెంజి, జమ్న మంజి, వరిజ్ లోజీజి నెస్టెజ్.

12 మొక వరిజ్ నెన్పిస్తాజ్నో వరి ముస్కు. అతికారం కిదెజ్నో బోదెకాజ్ నాను సెల్వ సిఎ. అవికు జమ్న మండ్రెజ్.

13 ఎందనిజ్ ఇహిజ, దేవుణు అవ్వెజ్ ఆవద్, ఆదముజునె ముజాలె తయార్ కిత్తాన్.

14 సయ్తాను ఆదముజ్ ఆవద్, అవ్వెజ్నె మొసం కిత్తాన్. ఆహె అది పాపమ్దు అర్తాద్.

15 గాని అవికు దేవుణు ముస్కు. మని నమకం డిఃఎండ, మహి వరిజ్ ప్రేమిసి, దేవుణుదిజ్ ఒపజెపె ఆతి లోకు వజ నెగ్రెండ బత్కిదెజ్. ఆహె బత్కిజి మహిజ, కొడోరిజ్ ఏరుఈబాని వలె దేవుణు బోదెకాజ్ రక్సిస్తాన్.



## 3

1 ఒరెన్ పాస్టరు ఆదెజ్ కోరిజినాన్ ఇహిజు, వాండ్రు నెగ్గి పణి కోరిజినాన్. యా మాట పూర్తి నమ్మిదెజ్ తగ్గిక్.

2 పాస్టరు నింద సిలికాన్ ఆదెజ్ వలె. ఉండ్రె ఆల్ని మంజినికాన్, అణసె ఆజి మంజినికాన్ ఆదెజ్వలె. నెగ్గి బుది మంజినికాన్, వని పణిజాణిజ్ తగమాతికాన్ ఇజి తోరె ఆదెజ్ వలె. వాతి వరిజ్ నెగ్రెండ డగ్రు కినికాన్ ఆదెజ్ వలె. దేవుణు మాట నెగ్రెండ నెస్పిస్సికాన్ ఆదెజ్ వలె.

3 వాండ్రు సోస్ఎండ, డెయ్సె ఆవండ మంజినికాన్, సార్లిదాన్ మంజినికాన్, జటిజ్ ఆవండ మంజినికాన్ ఆదెజ్ వలె. వాండ్రు డబ్బుదిజ్ ఆస ఆఇకాన్ ఆదెజ్ వలె.

4 వాండ్రు వన్ని సొంత ఇండ్రోణి వరిజ్ నెగ్రెండ సూణికాన్ ఆదెజ్ వలె. వన్ని కొడోరి ఎస్తివలెబా విజెరిజ్ గవరం సీజి, వన్ని మాటదిజ్ లోజిజిని వరి లెకెండ వాండ్రు కిదెజ్.

5 ఎందనిజ్ ఇహిజు, సొంత ఇండ్రోణి వరిజ్ నెగ్రెండ సుడెదెజ్ నెస్ఇకాన్ ఇహిజు ఎలాగ దేవుణు సజం నడిపిస్తెజ్ అట్నాన్.

6 వాండ్రు కొత్తాజ్ నమ్మిత్తికాన్ ఆజి మండ్రెజ్ ఆవద్. ఎందనిజ్ ఇహిజు, కొత్తాజ్నె వన్నిజ్ యా పెరి పణిదిజ్ ఏర్పాటు ఆత ఇజి గర్ల ఆజి, సయ్తాన్ ఎలాగ దేవుణు తీర్పు ఆజి సిక్కుదు అర్థ మనాండ్రో, అయ లెకెండ వీండ్రు బా అర్నాన్.

7 మహికార్ వన్ని వందిజ్ సెఇకెజ్ వెహ్ఎండ, సయ్తాన్ సిక్కుదు అర్ఎండ మంజిని వందిజ్ నమ్మిఇ వరి ఎద్రు పల్కుబడిః మనికాన్ ఆదెజ్వలె.

8 అయాలెకెండ, పెద్దెల్జు, విజెరె వన్నిజ్ గవరం సీదెజ్ తగ్గి వరి లెకెండ మండ్రెజ్. వారు రుండి నాలికెజ్ మన్ఇకార్ ఆదెజ్ వలె. వారు సోస్ఎండ, డబ్బు వందిజ్ ఆసగొటు ఆవండ మంజినికార్ ఆదెజ్ వలె.

9 దేవుణు ఏలు తోరిసి నెస్పిస్తి డాజితి మహి గొప్ప నిజమాతి సజతిజ్, వన్ని గర్భం వన్నిజ్ గదిసిని లెకెండ ఆవండ నెగ్రెండ మంజినికాన్ ఆదెజ్.

10 పెద్దెల్జు ఇజి వరిజ్ ఏర్పాటు కిని ముజాల, వారు నెగ్రెండ మంజినారా, నమ్మకమ్దాన్ పణి కిజినారా ఇజి సుడుఃదెజ్. నింద సిలికార్ ఇజి వారు రుజుప్ కితిజు, వారు పెద్దెల్జు పణి కిదెజ్.

11 అయాలెకెండ, పెద్దెల్జు బోదెకు, మహికార్ వరిజ్ గవరం సీని వరి లెకెండ మండ్రెజ్. అవికు సొండిజ్ వర్గిఎండ, సోస్ఎండ మండ్రెజ్ వలె. విజు దని లోఇబా మాపు నమ్మిదెజ్ తగ్గిక్ ఇజి తోరె ఆదెజ్ వలె.

12 పెద్దెలి ఉండ్రె ఆల్ని మంజినికాన్ ఆదెజ్ వలె. వన్ని కొడోరిజ్ వన్ని ఇండ్రోమని వరిజ్ నెగ్రెండ సుడెఃజి నడిపిస్సికాన్ ఆదెజ్ వలె.

13 నెగ్రెండి పణి కిని పెద్దెలి ఎయెన్ వన్నిజ్బా పల్కు బడిః మనాద్. క్రీస్తు యేసు ముస్కు మని వన్ని నమకం వందిజ్ వెహ్తాజ్ వన్నిజ్ తియెల్ సిల్లెద్.

14 నీ డగ్రు బేగి వాదెజ్ ఇజి నాను ఆస ఆజిన. అహిజ్బా, నాను యా సజతిజ్ నిజి రాసిన.

15 ఎందనిజ్ ఇహిజు, నాను వాదెజ్ ఆల్సెం ఆతిజు, దేవుణు కుటుమ్దు ఒరెన్ ఒరెన్ ఎలాగ మండ్రెజ్ ఇజి నీను నెస్తిలె. బత్తిజిని దేవుణు సజమ్దికార్ విజెరెనె దేవుణు కుటుమ్దికార్. ఉండ్రె నిట కొహి ఉండ్రె ఇల్లు అర్ఎండ అస్సి లెకెండ దేవుణు సజమ్దికార్ దేవుణు వందిజ్ నిజమాతికెజ్ అస్సార్. అయాలెకెండ, ఉండ్రె పునాది లెకెండ దేవుణు సజమ్దికార్ దేవుణు వందిజ్ నిజమాతికెజ్ అస్సార్.

16 మాటు నమ్మిజిని మతమ్దు మని, యేసుక్రీస్తు వందిజ్ ముజాలె డాజితి మహికెజ్, గాని ఏలు దేవుణు తోరిసి నెస్పిస్తి నిజమాతికెజ్ గొప్ప పెరిక ఇజి ఎయెర్బా ఒప్పకొణార్. క్రీస్తు లోకు వజ లోకమ్దు వాతాన్. దేవుణు ఆత్మ, వాండ్రు నీతి నిజాయితి మనికాన్ ఇజి రుజుప్ కిత్తాన్. దేవుణు దూతార్ వన్నిజ్ సుడెఃతార్. లోకుర్ వన్ని వందిజ్ యూదురు ఆఇ వరిజ్ వెహ్తార్. లోకమ్దు ఎంబెబా, లోకుర్ వన్నిజ్ నమ్మితార్. పరలోకమ్దు దేవుణు వన్నిజ్ ఒత మనాన్.

## 4

తప్పుబోద నెస్పిసినికార్.

1 కడెవెరి దినమ్కాజ్ సెగొండార్, వారు నమ్మిత్తి నిజమాతి మాటెజ్ డిఃసి, అబద్దం వర్గిని దెయమ్కు వెట సొనారె, అయా దెయమ్కు బోద వినారె దనిజ్ లోజినార్ ఇజి దేవుణు ఆత్మ టెటజ్ వెహ్సినాన్.

2 అబద్దం వర్గిని వేసం కినికారె యా బోదెజ్ నెస్పిసినికార్. ఇనుముదాన్ సుహ్తిజు ఎలాగ మా తోలు సాతి లెకెండ అనాదొ అయ లెకెండ వరి గర్భం గదిస్ఎండ సాత మనాద్.

3 పెండ్లి ఆనిక తవు ఇజి, సెగం రకమ్కాణి ఉణి తినికెజ్ తిండ్రెజ్ ఆవద్ ఇజి వారు నెస్పిస్సార్. గాని దేవుణుదిజ్ నమ్మిత్తి, నిజమాతి మాటెజ్ నెస్తికార్, దేవుణుదిజ్ వందనమ్కు వెప్పి తిండ్రెజ్ ఇజినె దేవుణు అయాకెజ్ తయార్ కిత్తాన్.

4 ఎందనిజ్ ఇహిజ, దేవుణు తయార్ కితికెజ్ విజు నెగ్గికెజె. ఇనికబా నెక్కి పొక్కిక ఆవద్. గాని దేవుణుదిజ్ వందనం వెప్పి అయాకెజ్ తిండ్రెజ్.

5 ఎందనిజ్ ఇహిజ, దేవుణు మాటదాన్, పార్లనదాన్ దేవుణు వందిజ్కేట ఆతికెజ్ ఆతె మన్నె.

6 నీను యా సజతిజ్, నీ సజమ్దు మని తంబెర్సిరిజ్ నెస్పిసి మహిజ, నీను క్రిస్తు యేసుజ్ నెగ్గి పణి మనిసి ఆని. దిని వెట, ఏలుదాక నీను నమ్మిజిని నీ నమకం వందిజ్ వెప్పిని మాటదాన్ నిజమాతి నెగ్గి బోదదాన్ నీను నమకమ్దు పిరిఅ

7 వర్గిదెజ్బా విలువ సిలి, డొక్టార్ వెప్పి మంజిని కత సాన్తరమ్కాణిజ్ నీను దూరం మన్అ. గాని దేవుణు వందిజ్ తియెల్ ఆజి బక్తిజి మండ్రెజ్ నీను ఒజ్జ ఆఅ.

8 ఒడొల్దిజ్ రూణు వాక్కి ఒజ్జ కితిజ నెగెద్. గాని దేవుణు వందిజ్ తియెల్ ఆజి బక్తిజి మహిజ, విజు వన్కా లొఇ గొప్పు లాబం మంజినాద్. ఎందనిజ్ ఇహిజ, అయాలెకెండ్ మహిజ, ఏలుబా నెగ్గి బత్తు మంజినాద్, వాని కాలమ్దుబా నెగ్గి బత్తు మంజినాద్ ఇజి ఒట్టు కిజినాద్.

9 నాను ముస్సు వెప్పి సజతి నమ్మిదెజ్ తగ్గిక. పూర్తి నమ్మిదు.

10 బత్తిజిని దేవుణు ముస్సునె మా ఆస మాటు ఇట్టా మనాట్. అందెజె మాటు అయా నెగ్గి బత్తు వందిజ్ నండొ అరల ఆజి కస్టబడిజినాట్. వాండ్రె లొకుర్ విజెరిజ్ ముకెలం వన్ని ముస్సు నమకం ఇడ్డి వరిజ్ రక్కిస్సికాన్.

11 నీను యా సజతిజ్ నీ సజమ్దు మని వరిజ్ నెస్పిసి, ఆహె కిదెజ్ ఇజి డటం వెహ్అ.

12 నీను దజడః ఇజి, ఎయెర్బా నిజి ఇజి కణక సుడఃఎండ నీను నిజి సుడఃఅ. గాని నీను వర్గిని మాటదు, నడిఃని నడఃకదు, నీను ప్రేమిస్సి ప్రేమదు, దేవుణు ముస్సు మని నీ నమకమ్దు, ఇని పాపం సిలి నీ బత్తుదు, నమ్మిత్తి వరిజ్ ఉండ్రె గుర్తు లెకెండ్ నీను మన్అ. వారు నిజి సుడఃజి అయాలెకెండ్ మండ్రెజ్, నీను గుర్తు లెకెండ్ మన్అ.

13 నాను వానిదాక, నీను విజెరిజ్ దేవుణు మాట సద్విజి వినపిసినె, బోదిసినె, నెస్పిసినె మన్అ.

14 సజం పెద్దెల్బు నీ ముస్సు కికు ఇట్టివలె, ప్రవక్తరు నీ వందిజ్ వర్గితి దని వెట, దేవుణు ఆత్మ నిజి సతి వరం డిఃఎండ, నీను అయాక కిఅ.

15 యా సజతిజ్ నీను జాగర్లదాన్ కిఅ. నీ మన్ను విజు, దిని ముస్సునె ఇడఃఅ. ఎందనిజ్ ఇహిజ, నీను నమకమ్దు పిరిజినిక లొకుర్ విజెరి టెటజ్ సుడఃదెజ్. అందెజె, నీ మన్ను విజు దని ముస్సునె ఇడఃఅ.

16 నీను కిజిని పణి నెగ్రెండ్ కిఅ. నీను నెస్పిసిని బోదదు తవు సిల్లెండ్ నెస్పిన్అ. నీను అయాకెజ్ డిఃఎండ కిజి మన్అ. ఎందనిజ్ ఇహిజ, నీను అయ లెకెండ్ కితిజ, ఎలాకాలం మని సావుదాన్ నిజి నీనె తప్తె ఆనిలె. నీను వెప్పినికెజ్ వెని వరిజ్బా తప్తిస్సిలె.

## 5

1-2 నీ సజమ్దు మని డొక్రెజ్ జటిజ్ ఆవండ వన్నిజ్ బుబ్బు లెకెండ్ ఒడిఃబిజి, పణిసి వెహ్అ. దజడఃరిజ్ తంబెరిజు లెకెండ్ సుడఃఅ. డొక్రికాజ్ యాయెక్ లెకెండ్ సుడఃఅ. దజడఃకాజ్ తవు ఆలోసనదాన్ సుడఃఎండ, తజ్జిక్ లెకెండ్ సుడఃఅ.

3 దిక్కు సిల్లి రాండి బోదెకాజ్ గవరం సిఅ.

4 ఎంబెణి రాండి బోదెలిదిజ్బా కొడొర్నొ నాతిసిర్నొ మహిజ, వీరు వరి సొంత ఇండ్రొణి వరిజ్ సుడఃదెజ్ వలె. సొంత ఇండ్రొణి వరిజ్ సూణికాదె దేవుణుదిజ్ సేవకిని వందిజ్ ముకెలమతిక ఇజి ముజ్జాలె నెస్టెజ్ వలె. అయ లెకెండ్ అయ్సి అప్పొసిజ్, అని అమ్మెజ్ రుణం తీర్సినార్. ఎందనిజ్ ఇహిజ, అయాక దేవుణుదిజ్ ఇష్టం ఆతిక.

5 దిక్కు సిలి రాండి బోదెలి దేవుణు ముస్సునె వాండ్రు కావలిస్తికెజ్ విజు సీనాన్ ఇజి, దని ఆస ఇట్టా మనాద్. అది రెయు పొగాల్ పార్లనం కిజి, వన్ని సాయం లొసి మంజినాద్.

6 గాని ఉణిజి, తింజి సుకం వందిజ్ బత్తిజిని రాండి బోదెలి బత్తితిజ్బా ఆత్మియ బత్తు సాతి లెకెండ్ మనాద్.

7 మహికార్ ఎయెర్బా వరిజ్ దుసలాడఃఎండ మంజిని వందిజ్, నీను సజమ్దు మని నమ్మిత్తి వరిజ్ యా సజతిజ్ ఆడ్ర సిఅ.

8 ఎయెన్బా వన్ని కుటుమ్ది వరిజ్, ముకెలం వన్ని సంత ఇండ్రొణి వరిజ్ సుడఃఎండ మహిజ, వన్ని నమకం డిఃస్తి లెకెండ్ నె దేవుణు ఎద్రు మనాన్. వాండ్రు నమ్మిఇ వన్ని ఇంక నండొ సెఇకాన్.

9 ఉండ్రె రాండి బోదెల్దిజ్ అరువయ్ పంటెజ్ లావు మహిజనె, దనిజ్ రాండి బోదెక్ లెక్కాదు కూడుఃవ్అ. మరి, అది ఒరెన్ వన్నిజె పెంట్టి ఆతిమహికాద్ ఆదెజ్ వలె.

10 నెగ్గి పణిజ వందిజ్ నెగ్గికాద్ ఇజి పేరు అనువె ఆతికాద్ ఆదెజ్. ఇహిజ, దని కొడొరిజ్ నెగ్గెండ పొస కితాదా, నెల్వ సిల్లి వరిజ్ బా డగ్గు కిజి నెగ్గెండ సుడఃతదా, దేవుణుదిజ్ నమ్మిత్తి వరి పాదమ్కు నొర్జి మహదా, కన్వమ్దు మని వరిజ్ సాయం కిజి మహదా, విజు నెగ్గి పణిజ వందిజ్ దనిజ్ అదిసె ఒపజెవె ఆజి మహదా, ఇజి సుడఃదెజ్. యా లెకెండ మని వన్మాజ్ లెక్కాదు కుడుఃవఅ.

11 దజడిః కాలమ్దు రాండి ఆతి బోదెకాజ్ లెక్కాదు కూడుఃబమ. ఎందనిజ్ ఇహిజ, సెగం కాలం వెన్మా అవికు మన్పు అస్తైజ్ అట్ఎండ పెండ్లి ఆసె. ఆహె క్రీస్తుజ్ డిఃస్సి.

12 అయావలె, మురి పెండ్లి ఆవె ఇజి దేవుణు పణిసె కిన ఇజి ముజుల కితి ఒట్టు తప్పినె. అందెజె, అవికు తప్పె ఇజి లోకుర్ బాణిజ్ వెహె ఆసె.

13 మురి అవికు బదకం ఆజి ఇల్పు ఇల్పు బూలాదెజ్ ఒజ ఆసె. బదకమ్నె ఆవెండ సొండిజు వర్గిజి మహి వరి సజతిజ జోలి కినె. వర్గిదెజ్ ఆఇకెజ్ వర్గినె.

14 అందెజె, దజడిః కాలమ్దు రాండి ఆతి బోదెకు పెండ్లి ఆజి, కొడొర్ ఇడఃజి, ఇండ్రొణి పణి సుడఃజి మండ్రెజ్ ఇజి నాను కోరిజిన. ఆహె, సజమ్దిజ్ దూసిస్తైజ్ పడఃఇ వన్మిజ్ అవ్సరం సీదెజ్ ఆవద్ ఇజి నాను కోరిజిన.

15 దజడిః కాలమ్దు రాండి ఆతి సెగొండెక్ నమకం డిఃస్సెనె సయ్తాన్ వెట సొహె.

16 దేవుణుదిజ్ నమ్మిత్తి ఉండ్రీ దని కుటుమ్దు రాండి బోదెక్ మహిజ, అది వన్మాజ్ సుడఃదెజ్ వలె. వెన్మ, బాజిత సజమ్దు ఒపజెపైజ్ ఆవద్. ఎందనిజ్ ఇహిజ, దిక్కు సిలి రాండి బోదెకాజ్ సుడఃదెజ్ సజం ఆనాద్.

17 దేవుణు సజం ఏలుబడిః కిజిని పెద్దెల్జ, ముకెలం కన్వబడిఃజి దేవుణు మాట బోదిసి నెస్సిసిని వరిజ్ వరి జితమ్దిజ్ మురి నసొనె కుడుఃప్పి లొసె ఆదెజ్ వారు తగ్గికార్.

18 ఎందనిజ్ ఇహిజ, “కలమ్దు మటిసిని డాఃను మూతుదు కిమ తోహమాట్” ఇజి, “పణికినికాన్ జితమ్దిజ్ తగ్గికాన్”, ఇజి దేవుణు మాటదు వెప్పినాద్.

19 ఒరెన్ పెద్దెలి మున్ము మోప్పి నేరమ్దిజ్ రిఎర్ మువెర్ సొసిరు మహిజనె అయాక నమ్మిదెజ్.

20 మహికార్ తప్పదిజ్ తియెల్ ఆజి మంజిని వందిజ్ పాపం కిజినె మంజిని పెద్దలుజ వరి సజమ్దు మని విజెరె ఎద్దు డటం దిదిఅ.

21 ఇజ్జికాన్ పెరికాన్ ఇజి తేడ తొవెండ నాను మున్ము వెప్పి సజతిజ్ నీను కిదెజ్ వలె ఇజి దేవుణు ఎద్దు, క్రీస్తుయేసు ఎద్దు, ఏర్పాటు ఆతి దేవుణు దూతార్ ఎద్దు నాను నిజి ఆడ్ర సీజిన.

22 గబి బిజి, ఎయెరి మున్ముబా పెద్దెలి పణి వందిజ్ కిక్కు ఇడఃజి దీవిన్మ. మహి వరి పాపమ్కాజ్ వెట కూడఃజి మన్అ. విజు పాపమ్కాజ్ నీను దూరం మన్అ.

23 నీను ఉణిజినిక అర్గిని వందిజ్, డిఃస్ఎండ వాజిని జబ్బు వందిజ్ ఏరునె ఉణెఎండ, బుకెండ ద్రాక్కు కల్లుబ ఉణ్అ.

24 సెగొండార్ కిజిని పాపమ్కు విజెరె ఎద్దు తోర్జినె. వారు, తీర్పు తిరెసె ఆదెజ్ సొని ముజులె, తీర్పు సీనికార్ వరి సజతి నెసినార్. గాని మురి సెగొండారి పాపమ్కు వెనుకనె తెలిసె.

25 అయాలెకెండ, సెగొండార్ కితి నెగ్గి పణి విజెరె ఎద్దు తోర్జినె. విజెరె ఎద్దు తోర్ఇక ఎసెజ్ బా డాజ్ జి మండ్రెజ్ అట్ఉలె.

## 6

### వెటిపణి కినికార్ ఎలాగ మండ్రెజ్

1 దేవుణుదిజ్ నమ్మిత్తి వెట్టిపణి కినికార్ విజెరె వరి ఏజుమానురిజ్ సీని గవ్సరం విజు సీదెజ్. ఎందనిజ్ ఇహిజ, ఎయెర్బా దేవుణు పేరుదిజ్, యేసు వందిజ్ మాపు నెస్పిసిని మాటదిజ్ దూసిస్ఎండ మంజిని వందిజ్ వరిజ్ సీదెజ్ మన్ని గవ్సరం సీదెజ్.

2 వరి ఏజుమానిరు నమ్మిత్తికార్ ఇహిజ, వారు మా తంబెరిజునెగదె ఇజి తక్కు గవ్సరం సీదెజ్ ఆవద్. గాని వారు మురి ఒదె ఏజుమానిరు వందిజ్ పణికిదెజ్. ఎందనిజ్ ఇహిజ, వారు ప్రేమిసిని నమ్మిత్తి వరిజె వారు కిజిని పణిజాణిజ్ మేలు వాజినె. నీను యా సజతిజ్ నీ సజమ్దు మని వరిజ్ నెస్పిసి, డటం వెప్పైజ్ వలె.

### డబ్బు వందిజ్ ఆస ఆదెజ్ ఆవద్.

3-5 ఎయెన్బా యేసుప్రబు వందిజ్ ఆఇ బోదెజ్ నెస్పిసి, మా ప్రబు ఆతి యేసుక్రీస్తు వెప్పి నిజమాతి బోదెజ ఒవుకొడెండ, దేవుణు బక్తిదాన్ కూడిఃతి మని బోదెజ ఒవుకొడిఃఎండ మనికాన్ గర్దదాన్ నిండ్రిత మనాన్. వన్మిజ్ ఇనికబా తెలివద్. వన్మిజ్ అవ్సరం మన్ని దన్మిజ్, అవ్సరం సిల్లి దన్మిజ్ విజు వన్మా వందిజ్ తర్కిస్తైజ్ పెరి ఆస మనాద్. క్రీస్తు వెప్పి మాటిజ అర్థం వందిజ్ జటిజ్ ఆనాన్. యా లెకెండ కినిక, గోస, జటిజ్, దుసలాడఃనిక, సెఇ అనుమానమ్కు విజు

పుటిస్తాను. ఎన్నివలెబా గొడవబెట్టే పుటిస్తాను. యా లెకెండ్ తర్కిస్తాను వరి బుద్ధి సెద్దిత మనాద్. వరి లొక నిజమాతి బోద సిల్లెద్. క్రీస్తు మతం వందిజ్ వెప్పి, ఆస్తి గణస్తైజ్ ఇజి వారు ఒడవబిజినార్.

6 దేవుణుదిజ్ ఇస్టం ఆతివజ బత్కిజి, దన్ని దటాజ్ సర్దె ఆజి, నజి యాకదె సాలు ఇజి ఎత్తు కిని వన్నిజ్ గొప్ప లాబం మనాద్

7 ఎందనిజ్ ఇహిజ, మాటు పుట్టివలె ఇనికబా యా లోకమ్దు తెవతాట్. మాటు సానివలె యా లోకమ్దాన్ ఇనికబా ఒత్తెజ్ అట్వట్.

8 అందెజ, మజి ఉణిక మహిజ, పొర్పాదెజ్ పాత పర మహిజ, అయాకదె మజి సాలు.

9 గాని ఆస్తి మన్నికానాదెజ్ కోరిజనికాన్ డబ్బు గణస్తైజ్ ఇని ఆసెజ సిక్కుదు అర్నాన్. బుద్ధి సిలి పాడు కిని నండో ఆసెజ్ ఉరి లెకెండ్ ఆజి, అయాకెజ్ వన్నిజ్ పాడు కిని, నాసనం కిని.

10 ఎందనిజ్ ఇహిజ, ఉండ్రీ మొకదిజ్ వెల ఎలాగ మంజినాదో, అయ లెకెండ్ విజు సెఇ పణిదిజ్ డబ్బు ఆసనె వెల. సెంగొండార్ డబ్బుదిజ్ ఆస ఆజి, వారు నమ్మిత్తి నిజమాతికెజ్ డిసి, వరి మన్ను కూడం గుత్తి సాహిజ ఎలాగ మంజినాద్, అయ లెకెండ్ వరిజ్ వారి నండో బాదెజ్ కల్గిస్తా.

11 గాని దేవుణు లోకు ఆతి నీను యా సెఇ ఆసెజాణిజ్ దూరం మన్అ. నీతి నిజయ్యాకెజ్ని నెగ్గెకెజ్ కిజి దేవుణు బక్తిదు మన్అ. దేవుణుదిజె నమ్మిజి మహి వరిజ్ ప్రేమిసి, కస్టమ్కు ఓరిసి, సార్లిదాన్ మన్అ.

12 నీను యేసుక్రీస్తుజ్ నమ్మిత్తిజ్ కస్టమ్కు వానె. వన్యాజ్ నీను గెలస్తైజ్ నీను నెగ్గెండ సుడవఅ. నీను అయాలెకెండ్ గెలస్తైజ, ఎలాకాలం బత్కిని బత్కు దొహ్కాద్. దిని వందిజె దేవుణు నిజి కూక్త మనాన్. 'నాను క్రీస్తుజ్ నమ్మిజిన', ఇజి నండో లోకుర్ ఎద్దు నీను ఒప్పకొటివలె, నని బత్కు వందిజె దేవుణు నిజి కూక్తాన్.

13-14 విజు వన్యాజ్ పాణం సీజిని దేవుణు ఎద్దుని పొంతి పిలాతు ముజాలె వెన్బాతివలె, దయరమ్దాన్ నెగ్గెండ ఒప్పకొటి క్రీస్తుయేసు ఎద్దు నాను నిజి ఆడ్ర సీజిన. మా ప్రబు ఆతి యేసుక్రీస్తు వాని దినమ్దాక నీను పాపం సిల్లెండ, నిందెజ్ సిల్లెండ నాను నిజి వెప్తి సజతిజ్ కిజి మన్అ ఇజి ఆడ్ర సీజిన.

15 దేవుణు ఏర్పాటు కితి సమయమ్దు యేసుప్రబుజ్ వాండ్రు రపిస్తాన్. గొప్ప పెరికాన్ ఆతి విజు వన్యా మున్ను ఒరెండ్రె అతికారం మనికాండ్రె దేవుణు. వాండ్రు రాజురిజ్ ఇంక పెరి రాజు. ప్రబురిజ్ ఇంక పెరి ప్రబు.

16 వాండ్రు ఒరెండ్రె ఎసెజ్బా సాఇకాన్. డగ్రు సొండ్రెజ్ అట్వజ నసా జాయ్దు బత్కిజినాన్. వన్నిజ్ ఎయెర్బా ఎసెజ్బా తొవర్. ఎయెర్బా ఎసెజ్బా సుడవెజ్ అట్వర్. వన్నిజె విజు గవ్దరమ్ని ఎలాకాలం అతికారం మనిద్, ఆమెన్.

17 యా లోకమ్దు ఆస్తి మనికార్, గర్త్ర ఆవండ, ఆస్తి మున్ను ఆస ఆవండ మండ్రెజ్ ఇజి నీను డటం వెహ్అ. యా ఆస్తిదిజ్ నమ్మిదెజ్ అట్వక. గాని వరి ఆస దేవుణు మున్ను ఇడవెజ్ ఇజి నీను వెహ్అ. సుకమ్దాన్ సర్ద ఆజి మండ్రెజ్ దేవుణునె తకు సిల్లెండ విజు సీనికాన్.

18 వారు మహి వరిజ్ నండో మేలు కిదెజ్, నండో నెగ్గి పణిజ్ కిదెజ్, నీను వారు ఆవండ, నండో సీబాజి సీనికార్ అదెజ్ ఇజి నీను వరిజ్ వెహ్అ.

19 అయాలెకెండ్, వాని కాలమ్ది వరి బత్కు వందిజ్ వారు ఉండ్రీ నెగ్గి పునాది తయార్ కిజినార్. ఎందనిజ్ ఇహిజ, అయావలె వరిజ్ దేవుణు వెల ఎలాకాలం బత్కిని బత్కు దొహ్కాద్.

20 ఓ తిమోతి, దేవుణు నిజి ఒపజెప్తి సేవ పణి నీను నెగ్గెండ సుడవఅ. పణిదిజ్ రెఇ సెఇ మాటెజ వర్గిఎండ దూరం మన్అ. అర్దం సిల్లెండ తర్కిస్తా వన్యాజ్ దూరం మన్అ. దనిజె సెంగొండార్ అబద్దమ్క గెణం ఇజి కూక్సినార్.

21 సెగొండార్, 'అయాక నజి మనాద్', ఇజి ఒప్పకొటారె, యేసు వందిజ్ నిజమాతి సజతిజ్ డిస్త సాహార్. దేవుణు దయా దర్మం మీ వెట మనీద్.

## అపొస్తుడు ఆతి పవులు తిమోతిజ్ రాస్తి రుండి ఉత్తం

నెల్వ కిబిస్సిక

అపొస్తుడు ఆతి పవులు ఎపెసి సజం నడిపిసిని తిమోతిజ్ రాస్తి రుండి ఉత్తమనె యాక. పవులు, సాదెజ్ కాలం డగ్రు ఆతాద్ ఇజ నెస్తాండ్రె, నజమ్దిజ్ నెగ్రెండ నడిపిసి, నిజమాతి బోద వరిజ్ నెస్పిస్టెజ్ వలె ఇజ తిమోతిజ్ వెస్సానాన్.

1-2 క్రీస్తుయేసు పోక్తి అపొస్తుడు ఆతి పవులు ఇని నాను, నా సొంత మరిన్ లెకెండ నాను ప్రేమిసిని తిమోతిజ్ రాసిన్. దేవుణు ఎత్తు కితి వజనె నాను అపొస్తుడు ఆత. క్రీస్తుయేసు వెట మాటు కూడితి మన్ని దన్నితాన్ లోకుర్ ఎలాకాలం బత్కినార్ ఇజ దేవుణు కితి ఒట్టు వెహైజ్ నె నాను అపొస్తుడు ఆత. మా బుబ్బు ఆతి దేవుణుని ప్రబు ఆతి క్రీస్తుయేసు దయా దర్మమాదాన్ మీ ముక్కు కనికారం తోరిసి, నిపాతిదాన్ మండ్రెజ్ సాయం కిపిర్.

నమకమ్దాన్ మంజిని వందిజ్ దయరం వెస్సానాన్

3 రెయు పొకాల్ నాను పార్లనం కినివలె డిన్ఎండ నిజి ఒడిబిజి దేవుణుదిజ్ వందనమ్కు వెస్సాన. నా అనిగొగొరు వన్నిజ్ పొగిడిజి మాడిసి లెకెండ, నానుబా నా గర్బం నజి గదిన్ఎండ నెగ్రెండ వన్నిజ్ పొగిడిజి మాడిసిన్.

4 నాను నిజి డిస్టానె వాజి మహిజ్, నీను అడఃబాతి. అయాక ఎత్తు కితానె నిజి సుడఃదెజ్ ఇజ నండో ఆన ఆజిన. ఎందనిజ్ ఇహిజ, నజి సర్ద పూర్తి వానాద్.

5 నీను క్రీస్తుయేసుజ్ నిజం నమ్మిజిని. అయాక నాను ఎత్తు కిజిన. ముజాలె, నీ డొక్ర బీబి ఆతి లొయిని నీ యాయ యునికె, క్రీస్తుయేసుజ్ నమ్మితె మహె. అయ లెకెండ ఏలు నీనుబా నమ్మిజిని ఇజ నాను తప్ఎండ నెసిన్.

6 అందెజె నీను కిదెజ్ ఇజ దేవుణు నిజి సిత, వరం నీను నెగ్రెండ నండో కిదెజ్ ఇజ నాను నిజి ఎత్తు కిబిసిన్. నాను దేవుణు సేవ పణి వందిజ్ నీ ముస్కు కిక్కు ఇడఃజి దీవిస్తివలె, దేవుణు అయా వరం నిజి సితాన్.

7 నీను కిదెజ్ ఇజ దేవుణు నిజి సిత వరం నీను కిఅ. ఎందనిజ్ ఇహిజ, దేవుణు వన్ని ఆత్మ మజి సిత మనాన్. అయాక మజి తియెల్ పుటిసిని ఆత్మ ఆవెద్. గాని దేవుణు పణి కిదెజ్ నత్తు సీని, మహి వరిజ్ని దేవుణుదిజ్ ప్రేమిసిని, మాటు అణసె ఆజి మండ్రెజ్ సాయం కిని ఆత్మనె సిత మనాన్.

8 అందెజె, మా ప్రబు వందిజ్ వెహైజ్ నీను సిగు ఆమ. వన్ని వందిజ్ వెహైజ్ జెలిదు ఆతి, నా వందిజ్బా సిగు ఆమ. గాని సువార్త వందిజ్ నా వెట కస్టమ్కు ఓరిస్అ. దేవుణు సత్తుదాన్ అయాక ఓరిస్అ.

9 దేవుణు మజి రక్సిస్తాండ్రె, వన్ని వందిజ్ కేట ఆతి బత్కు బత్కిదెజ్ ఇజ మజి కూక్లాన్. మాటు కితి పణిజాణిజ్ ఆవెద్ గాని వన్ని సొంత ఎత్తుదాన్ వన్ని దయా దర్మమాదాన్ వాండ్రు మజి రక్సిస్తాండ్రె కూక్లాన్. లోకం పుట్ఎండ ముజాలె, క్రీస్తు యేసు కితి దనితాన్ యా దయా దర్మం దేవుణు మజి సిత మనాన్.

10 గాని మజి రక్సిస్సి క్రీస్తుయేసు లోకమ్దు వాతివలెనె అయాక ఏలు తోరె ఆతాద్. వాండ్రు సావుదిజ్ సిల్లెండ కితాండ్రె, సువార్త వెంజి నమ్మిని దనితాన్, సాఎండ దేవుణు వెట ఎలాకాలం బత్కిని బత్కు తోరిస్తాన్.

11 యా సువార్త వెహైజ్ వందిజె, ఒరెన్ సాటిస్సి వన్ని లెకెండ, అపొస్తుడు లెకెండ, నెస్పిస్సి వన్ని లెకెండ దేవుణు నజి ఏర్పాటు కితాన్.

12 అందెజె నాను యా కస్టమ్కు ఓరిసిన్. గాని నాను సిగు ఆవె. ఎందనిజ్ ఇహిజ, నాను నమ్మిత్తి వన్నిజ్ నాను నెన్ను. వాండ్రు, తీర్పు కిదెజ్ వాని దినమ్దాక, నజి ఒపజెప్తి సువార్త కాపాడఃదెజ్ వాండ్రు అట్టికాన్ ఇజ నాను నిజం నెన్ను.

13 నిజమాతి మాట నీను నా బాణిజ్ విహి లెకెండె నీను మహి వరిజ్ వెహెఅ. క్రీస్తుయేసు వెట మని సమందమ్దాన్ మని నమకమ్దు ప్రేమాదు నీను మన్అ.

14 దేవుణు నిజి ఒపజెప్తి సువార్త ఎయెర్బా మారిన్ఎండ నీను సుడఃఅ. మా లొఇ మంజిని దేవుణు ఆత్మ సాయమ్దాన్ అయాక కాపాడఃఅ.

15 ఆసియ ప్రాంతమ్దు మన్ని నమ్మిత్తికార్ విజెరె నా బాణిజ్ దూరం ఆతార్ ఇజ నీను నెస్సి. పుగెలు హెర్మొసు ఇనికార్ వరి లొఇ మనార్.

16 ఒనెసిపారు ఇండ్రోణి వరిజ్ ప్రబు కనికారం తోరిన్పిన్. ఎందనిజ్ ఇహిజ, వాండ్రు నజి నండో సుట్కు ఆదరిస్తాన్. నాను జెల్లిదు మహిజ్బా వాండ్రు నా వందిజ్ సిగు ఆతాన్.

17 గాని వాండ్రు రోమ పట్టమ్దు వాతివలె, నాను తోర్నిదాక నండో రెబాతాన్.

18 నాను ఎపెసుదు మహివలె, వాండ్రు నజీ నెగ్రెండ సుడఃజి, ఎసా సాయం కిత్తాన్ ఇజి నీను బాగ నెసిని. ప్రబు తీర్పు కిని దినమ్దు ప్రబు వన్నిజ్ కనికారం తోరిస్పిన్.

## 2

1 అందెజె నా మరిన్ లెకెండ మని నీను, క్రీస్తుయేసు దయా దర్మమ్దాన్ సత్తు పొందిజి మన్అ.

2 నండొ లోకుర్ ఎద్రు నాను వెహ్టి నిజమాతి మాటెజ్ నీను వెహిమని. అయా మాటెజ్ నమ్మిదెజ్ తగ్గి వరిజ్ ఒపజెవ్అ. వారు యా నిజమాతి మాటెజ్ మహివరిజ్ బాగ నెస్పిస్తెజ్బా అట్టికార్ ఆదెజ్.

3 ఒరెన్ నెగ్గి విద్దె కినికాన్ వన్ని కస్టమ్కు ఓరిసిని లెకెండ నీను క్రీస్తుయేసు వందిజ్ మా వెట కస్టమ్కు ఓరిసి మన్అ.

4 ఒరెన్ ఉద్దం కినికాన్, వన్ని బత్తు వందిజ్ మరి ఆఇ పణిజి సొన్ఎన్. ఎందనిజ్ ఇహిజ, సొహిజ వన్నిజ్ సయన్మదు ఏర్పాటు కితి అతికారిజ్ సర్ద కిబిన్ఎన్. అయా లెకెండ నీనుబా క్రీస్తు సేవ పణిదు మన్అ.

5 మరి అయాలెకెండె, ఉహ్క్వి పందెమ్దు ఒరెన్ ఉహ్క్వికాన్ పందెమ్దు వెహ్టి రూలు వజ ఉహ్క్వాండ మహిజ, వాండ్రు గెలెన్ఎన్. వన్నిజ్ ఇనాయం దొహ్కెవద్. అయా లెకెండ నీనుబా క్రీస్తు సేవ పణిదు మన్అ.

6 కస్టపడిజి పణి కిని ఒరెన్ రయ్దు వన్నిజ్, పండితి పంటది తొలి వంతు దొహ్కెజ్వలె. అయా లెకెండ నీనుబా క్రీస్తు సేవ పణిదు మన్అ.

7 నాను ముస్కు వెహ్టి దన్ని వందిజ్ నీను మరి మరి అలోసనం కితి. ఎందనిజ్ ఇహిజ, నీను ఆలోసనం కితిజ, నీను నెస్టెజ్ మన్ని విజు వన్కాజ్ వాండ్రు అర్దం కిబిస్సాన్.

8 ఎస్తివలెబా క్రీస్తు యేసుజ్ ఒడఃబిఅ. సావుదాన్ దేవుణు వన్నిజ్ బత్కిస్త మనాన్. దావీదు రాజు తెగ్గదు పుట్టి మనికాన్. యాకదె నాను లోకురిజ్ వెహ్టిని సువార్త.

9 నాను యా సువార్త వెహ్టినిజ్, నజీ బాదెజ్ వాజినె. తపుజ్ కితి ఒరెన్ వన్నిజ్ తొహ్పిలెకెండ, నాను తొహ్ ఆజిన. గాని దేవుణు మాట తొహ్ ఆవెతాద్.

10 అందెజె, దేవుణు ఏర్పాటు కితి వరి వందిజ్ నాను విజు కస్టమ్కు ఓరిసిని. క్రీస్తుయేసు వరిజ్బా రక్కిసి, దేవుణు గొప్ప జాయ్దు మంజిని బాడిఃదు వన్ని వెట ఎల్లకాలం వారుబా మంజిని వందిజ్, వరి వందిజ్ నాను కస్టమ్కు ఓరిసిని.

11 యా మాటెజ్ నమ్మిదెజ్ తగ్గిక్ మాటు వన్ని వెట సాతిజ వన్నివెట బత్కినాట్మరి.

12 మాటు మా కస్టమ్కు ఓరిసిజి వన్నివెట ఏలుబడిః కిసాట్మరి. వన్నిజ్ నెన్ఎ ఇహిజ వాండ్రుబా మజి నెన్ఎ ఇనాన్.

13 మాటు నమ్మిదెజ్ తగ్గిక్ ఇహిజ వాండ్రు ఎస్తివలెబా నమ్మిదెజ్ తగ్గిక్ ఆజి మంజినాన్. ఎందనిజ్ ఇహిజ వన్నిజ్ వాండ్రె తప్పెజ్ అట్ఎన్.

### నమకమాతి నెగి పణిమణిసి

14 నాను ముస్కు వెహ్టి సజతిజ్ లోకురిజ్ ఎత్తు కిబిసి మన్అ. ఇని ఇని మాటెజ్ వందిజ్ జటిజ్ ఆమాట్ ఇజి దేవుణు ఎద్రు వరిజ్ సరి దిదిఅ. అయాక పణిదిజ్ రెఇక. వెనివరి నమకం పాడుః కిజినాద్.

15 నెగ్గి పణి మనిసి ఇజి దేవుణు బాణిజ్ అనువె ఆదెజ్, నీను అయ లెకెండ మండ్రెజ్ బాగ సుడఃఅ. కిని పణిజి వందిజ్ దేవుణు వెనబానివలె, సిగు ఆవండ మంజిని పణి మనిసి లెకెండ నీను మన్అ. నిజమాతి మాట నెగ్రెండ నెస్పిస్సి వన్ని లెకెండ మన్అ.

16 పణిదిజ్ రెఇ, సెఇ మాటెజ్ నీను దూరం మన్అ. ఎందనిజ్ ఇహిజ, నని మాటెజ్ వర్గిజి మంజినికార్ మరి ఒదె సెఇకార్ ఆజి దేవుణు బాణిజ్ దూరం ఆనార్.

17 మలెరియ నోబు నండొడారిజ్ పాడు కిని లెకెండ, వారు నెస్పిసిని మాటెజ్ మహివరిజ్ పాడుః కినె. నని వరి లోఇ మనికారె హుమెనయ, పిలెతు ఇనికార్.

18 వీరు నిజమాతి మాటెజ్ డిస్త సొహార్. వారు తపు వెహ్టినార్, దేవుణు సాతి సొహి వరిజ్ మర్జి బత్కిస్త మనాన్ ఇజి అహ్ వెహ్టి, ఇనిక నమ్మిదెజ్ ఇజి నెన్ఎండ, ఇతల్ అతాల్ కిజి సెగొండారిజ్ బమ్మ కిజినార్.

19 అహిజ్బా, దేవుణు బాణిజ్ వాతి నిజమాతి మాట తవ్ఎదు. అయాక నెగెండ నిల్పిని ఉండ్రె పునాది లెకెండ మనాద్. 'ప్రబు వన్ని సొంత వరిజ్ నెస్సాన్' ఇజి, 'యేసుజ్ నా ప్రబు ఇజి ఒపుకొణికార్ విజెరెబా సెఇ పణిజాణిజ్ దూరం ఆదెజ్ వలె' ఇజి అయా పునాదిదు ముద్ద పొక్త మనాద్.

20 ఉండ్రె పెరి ఇండ్రె నండొ రకమ్కాణి కుండెజ్ మండిజ్ మంజినె. సెగం వెండిదాన్, బజారమ్దాన్ తయార్ కితికెజ్, మరి సెగం సెకదాన్, దుల్లిదాన్ తయార్ కితికెజ్. విన్కా లోఇ వెండిదాన్ బజారమ్దాన్ తయార్ కితికెజ్ నెగ్గి పణిదిజ్ వాడుకొణార్. సెకదాన్, దుల్లిదాన్ తయార్ కితికెజ్ ఆఇ పణిదిజ్ వాడుకొణార్. అయాలెకెండె, దేవుణుదిజ్ నమ్మిత్తి వరి సజమ్దు, దేవుణు వందిజ్ నెగ్గి పణి కిదెజ్ తగ్గిక్ మంజినార్. ఆఇకార్బా మంజినార్.

21 అందెజె ఎయెన్బా సెఇకెజ్ విజు డిఃస్తిజ, వాండ్రు నెగ్గిపణి కిదెజ్ తగ్గికాన్ ఆనాన్. పెరి ఇండ్రోణి ఎజుమాని, నెగ్గి పణిదిజ్ వాడుకొండెజ్ కేట ఇడ్డి వెండి బజారమ్ది కుండెజ్ మండిజ్ లెకెండ, వీండ్రుబా దేవుణు వందిజ్ ఇని నెగ్గి పణిదిజ్బా తగ్గికాన్ ఆనాన్.

22 దజుడారిజ్ మని ఉత్పుత్దాన్ దూరం మన్అ. గాని నీతి నిజయ్యిదికెజె కిదెజె సుడఃఅ. దేవుణు వందిజ్ నిజమాతి మాటెజ్ నమ్మిఅ. ఎస్తివలెబా ప్రేమ తోరిస్అ. విజెరె వెట సాంతి సమాదనమ్దాన్ మండ్రెజ్ సుడఃఅ. నెగ్గి మన్పుదాన్ ప్రబుజ్ పార్దనం కినివరి వెట కూడఃజి మన్అ.

23 బుద్ది సిల్లెండ అర్దం సిల్లెండ తర్కిసిని వరి బాణిజ్ దూరం మన్అ. ఎందనిజ్ ఇహిజ, వారు జటిజ్ పుటిసినార్ ఇజి నీను నెసిని.

24 దేవుణు పణి మనిసి జటిజ్ ఆదెజ్ ఆఎద్. గాని వాండ్రు విజెరివెట కనికారం ఆజి మండ్రెజ్ వలె. నెగ్గెండ నేస్పిసినికాన్ ఆదెజ్ వలె. ఓరిసినికాన్ ఆదెజ్వలె.

25 నిజమాతి మాటెజ, ఎద్రిస్సి వరిజ్ వాండ్రు సార్లిదాన్ వెప్పి దిదిదెజ్. వారు పాపమ్కు ఒప్పుకొడిఃజి, నిజమాతికెజ్ నెస్సి వందిజ్, దేవుణు ఉండ్రీ వేలా వరి మన్పు మారిస్సాన్సు.

26 ఆహె వారు బుద్దిదు వాజి, సయ్యూన్ ఉరిదాన్ తప్రె ఆనార్. సయ్యూను, వన్ని ఇస్టమ్కు కిబిస్తెజె వరిజ్ అస్తమనాన్. అందెజె దేవుణు పణి మనిసి వరిజ్ సార్లిదాన్ వెప్టాజ్.

### 3

#### కడెవెరి దినమ్క వందిజ్ వెప్పినిక

1 యేసుప్రబు వాని ముజాల, కడిఃవెరి దినమ్కాజ్ నండొ తియెల్ ఆని రోస్కు మంజినెలె ఇజి నీను నెస్అ.

2-5 లోకుర్, వరిజ్ వారి నెగ్గెండ మండ్రెజ్ ఇజి సుడః ఆనార్ డబ్బుదిజ్ ఆస ఆనార్. నా ననికాన్ మరి ఎయెన్బా సిలెన్ ఇజి వెహె ఆనార్. గర్త ఆనార్, దూసిస్సార్. యాయబ్బారిజ్ లోజిఎర్. మేలుదిజ్ నెన్ఎర్, సెఇకార్ ఆనార్. ప్రేమ సిల్లికార్ ఆనార్, సెమిన్ఇకార్ ఆనార్. సాండిఃజ్ వెప్పికార్ ఆనార్. అణసె ఆఇకార్ ఆనార్. అడిఃవి జంతు నని మూర్కమ్దికార్ ఆనార్. సాంత వరిజ్బా మొసెం కినికార్ ఆనార్. బుద్ది సిల్లెండ ఇని ఇనికెజ్ కినార్. గర్త ఆనార్. దేవుణుదిజ్ ప్రేమిస్ఎండ వరి సుకమ్కాజ్ ప్రేమిస్సార్. వారు దేవుణు బక్తి మనికార్ ఇజి ముస్కునె తొరె ఆనార్. గాని వన్నిజ్ లోజిదెజ్ వాండ్రు సీజిని సత్తుదిజ్ నెక్కి పొక్కినార్. నని వరి బాణిజ్ దూరం మన్అ.

6-7 ఎందనిజ్ ఇహిజ, నని వరి లోఇ సెగొండార్, లోకుర్ వెట నెల్వ ఆజి ఇల్కాజ్ వానారె, తపు బోదెజ్ వెప్పి, బాన్ మని బుద్ది సిలి బోదెకాజ్ మోసం కినార్. అవికు వీరు వెప్పినికెజ్ నమ్మిజి మోసెం ఆనె. అవికు కితి నండొ పాపమ్క వందిజ్ వన్కా గర్బమ్కు గదిసిని మంజినె. అవికు, వన్కా ఆసెజ విజు ఎత్తు కిజినె మంజినె. ఎస్తివలెబా నెసె ఆదెజ్ ఆస ఆనె. గాని నిజమాతికెజ్ ఇనికెజ్ ఇజి టెటజ్ నెన్ఉ.

8 యెనె, యెంబ్రె ఇనికార్ మోసెజ్ ఎద్రిస్తిలెకెండ, వీరుబా దేవుణు వందిజ్ నిజమాతికెజ్ ఎద్రిసిని. వీరు విరి మన్పుదు సెఇకెజ్నె ఒడఃబినార్. అందెజె వారు నమ్మిజినికెజ్ పణిదిజ్ రెఇకెజ్

9 యెనె, యెంబ్రె బుద్ది సిలికార్ ఇజి లోకుర్ విజెరె టెటజ్ సుడిఃతి లెకెండ, వీరుబా బుద్ది సిలికార్ ఇజి లోకుర్ విజెరె టెటజ్ సూణార్లె. అందెజె ఎలాకాలం దేవుణు మాటదిజ్ ఎద్రిసి సాండ్రెజ్ వారు అట్ఎర్.

#### తిమోతిజ్ ఆడ్ర సీజినాన్.

10-11 గాని నాను నెస్పిసికెజ్, నాను ఎలాగ బత్కిజి నడిఃత ఇజి నాను కిదెజ్ ఇజి నా బత్కుదు మని ఉదెసం, నాను దేవుణుదిజ్ ఎలాగ నమ్మిజి మహ ఇజి, నజి కితి కిడుదిజ్ ఎలాగ ఓరిస్త ఇజి, నాను ఎలాగ మహి వరిజ్ ప్రేమిస్త ఇజి నీను పూర్తి నెసిని. లోకుర్ నజి బాదెజ్ కితివలె నాను ఎలాగ అయకెజ్ ఓరిస్తెజ్ అట్ట ఇజి నీను నెసిని. నజి వాతి హిమ్సెజ్ విజు నీను నెసిని. అందియొకయ, ఇకొనియ, లున్త్ర ఇని పట్టమ్కాజ్ నజి వాతికెజ్ విజు నీను నెసిని. లోకుర్ కితి నండొ బాదెజ్ నాను ఓరిస్త. గాని ప్రబు వన్కా బాణిజ్ విజు నజి తప్రిస్తాన్.

12 క్రీస్తుయెసు వెట సమందం ఆజి, దేవుణు బక్తిదాన్ బత్కిదెజ్ ఆస ఆని ఎయెరిజ్బా బాదెజ్ వానె.

13 గాని సెఇ పణిజ్ కినికార్ని, మహివరిజ్ మొసం కినికార్ ఇంక ఒదె పాడాఃనార్. వారు మొసెం కినార్. మొసెం కిబె ఆనార్.

14-15 గాని నీను, నెస్తిమనికెజ్, తప్ఎండ నమ్మిజి మనికెజ్ డిఃస్ఎండ మన్అ. ఎందనిజ్ ఇహిజ, నిజి నెస్పిస్తి వరిజ్ నీను నెసిని. ఇజివలెహాన్ అసి నీను దేవుణు మాట ఎలాగ నెస్తి ఇజి నీను నెసిని. యాకెజ్, క్రీస్తు యెసు ముస్కు నీను ఇడ్డి నమ్మకమ్దాన్, దేవుణు నీ పాపమ్కాజ్ నిజి రక్కిస్సి వందిజ్ నిజి గెణం సిదెజ్ అట్టె.

16 దేవుణు మాటజ్ విజు దేవుణు వన్ని ఊప్రిదాన్ వెప్పి రాన్పిస్తెకెజె. అయాకెజ్, నిజమాతికెజ్ మజి నెస్పిస్తెజ్, మా తప్పుజ్ తోరిస్తెజ్, మజి సరి దిదిదెజ్, నీతి నిజయితికెజ్ కిదెజ్ నెన్పిస్తెజ్ పణిదిజ్ వానికెజ్.

17 ఈహునె ఒరెన్ దేవుణు లోకు వాండ్రు కిదెజ్ మనికెజ్ విజు కినాన్. విజు నెగ్గి పణి కిదెజ్ ఎస్తివలెబా తయార్ ఆనాన్.

## 4

1 దేవుణు ఎద్దు, సాతి వరిజ్ బత్కిజిని వరిజ్ తీర్పు సీని క్రీస్తుయేసు ఎద్దు నాను నిజి ఆడ్ర సీజిన. ఎందనిజ్ ఇహిజు వాండ్రు మర్జి వాజి రాజు వజ ఏలుబడిః కినాన్లె.

2 నాను నిజి ఈహు ఆడ్ర సీజిన నీను దేవుణు మాట లోకురిజ్ వెహ్అ. లోకుర్ వినారో, వినెరొ ఇజి నెగ్గి సమయం, ఆఇ సమయం తోఎండ ఎస్తివలెబా అయాక వెహ్తెజ్ తయార్ ఆజి మన్అ. లోకురిజ్ వరి తప్పుజ్ తోరిసి వెహ్అ. వరి తప్పుజు దిదిఅ. వారు కిదెజ్ మనికెజ్ పణిన్అ. నీను కోపం ఆఎండ నిపాతిదాన్ వరిజ్ నెస్పిన్అ.

3 ఎందనిజ్ ఇహిజు, లోకుర్ నిజమాతికెజ్ వినెండ బత్కిని కాలం వానాద్. గాని వరిజ్ ఇస్టం ఆని వజ లోతు మాట వెప్పి నని బోద కిని నండొండొరిజె వారు తపిసి డగ్గు కినార్. అందెజె, నని వరిజ్ తపిసి డగ్గు కినార్.

4 ఇహిజు, నిజమాతి మాట వారు వినెర్. గాని కత సాన్తరమ్క దరోట్ మర్నార్.

5 గాని ఓ తిమోతి, నీను విజు వన్కా లోఇ నెగ్గి బుద్ధిదాన్ మన్అ. కష్టమ్కు ఓరిన్అ. క్రీస్తుయేసు వందిజ్ సువార్త లోకురిజ్ వెహ్అ. దేవుణు సేవపణి కినివలె, నీను కిదెజ్ మనిక విజు పూర్తి కిత.

6 ఎందనిజ్ ఇహిజు, నాను పూజ ఆదెజ్ సమయం డగ్గు ఆత మనాద్. నాను సాదెజ్ సమయం డగ్గు ఆత మనాద్.

7 పందెమ్దు ఒరెన్ కష్టబడిఃతి లెకెండ, నాను సువార్త లోకురిజ్ వెప్పి వందిజ్ కష్టబడిఃత. ఉప్పి పందెమ్దు, ఒరెన్ ఉప్పిక, పూర్తి కిని లెకెండ, నాను కిదెజ్ దేవుణు నజి వెహ్తెజ్ పూర్తి కిత. దేవుణు ముస్సు మని నమకం డిన్ఎత.

8 అందెజె నజి ఉండ్రె ఇనాయం మనాద్. నాను నీతి నిజాయితిదాన్ బత్కితి దని వందిజ్ సీని ఇనాయం. అయాక ఆకరి దినమ్ది తీర్పుదు, నీతి నాయమ్దాన్ తీర్పు సీని ప్రబు అయాక నజి సీనాన్. నజినె ఆఎండ వాండ్రు వాని దనిజ్ ఎద్దు సుడఃజి ఆస ఆని విజెరిజ్ సీనాన్.

9-10 తిమోతి, నా డగ్గు బేగి వాదెజ్ నీను సుడఃఅ. ఎందనిజ్ ఇహిజు, దెమ, యా లోకమ్ది సజతిజ్ ప్రేమిసి, నజి డిఃస్త సాహాన్. వాండ్రు దెసలొనిక పట్టమ్దు సాహాన్. క్రెన్కె ఇనికాన్ గలతియ ఇని ముటాదు సాహాన్. తీతు దెల్మియ జిల్లాదు సాహాన్.

11 లూక ఒరెండ్రె నా వెట మనాన్. నీను వానివలె మార్కుజ్ నీ వెట కూక్కి తగ్అ. ఎందనిజ్ ఇహిజు, వాండ్రు నజి తోడుఃదిజ్ బాగ్ మంజినాన్.

12 తుకికుజ్ ఎపెసు పట్టమ్దు షోక్త.

13 నీను వానివలె త్రొయ పట్టమ్దు కార్పు ఇని వన్ని బాన్ నాను ఇట్టా వాత సాల్య తగ్అ. పుస్తకమ్కుబా తగ్అ, ముకెలం తోలుదు రాస్తి మనికెజ్.

14 అలెక్సెజండర్ ఇని కంసు తయార్ కిని సరాబు నజి నండొ బాదెజ్ కిత్తాన్. వాండ్రు కితి దనిజ్ ప్రబు వన్నిజ్ సిక్కు సీనాన్.

15 వాండ్రు నిజిబా బాదెజ్ కిఎండ నీను జాగర్త మన్అ. ఎందనిజ్ ఇహిజు, మాటు బోద్దిస్తి మాటెజు, వాండ్రు నండొ ఎద్దిస్తాన్.

16 నజి ముజాలె, కోర్టుదు ఒసి వెనబాతివలె, నజి నానె ముదాయి. ఎయెర్బా నా దరోట్ వర్గెతార్. విజెరె నజి డిఃస్త సాహార్. దిన్ని వందిజ్ దేవుణు వరిజ్ సిక్కు సిఎండ మనీన్.

17 అహిజు, కోర్టుదు మహి యూదురు ఆఇకార్ విజెరె, నా వెట సువార్త పూర్తి విని వందిజ్, ప్రబు నా పడఃకాద్ మంజి, నజి సత్తు సితాన్. నొరెన్ వెయుదాన్ తప్పిస్తి లెకెండ సాపు సిక్కుదాన్ తప్పిస్తాన్.

18 అందెజె, ప్రబు నజి విజు సెఇ వన్కా బాణిజ్ తప్పిసి, వాండ్రు రాజు వజ ఏలుబడిః కిని పరలోకమ్దు నెగ్రెండ కూక్కు ఒనాన్. వన్నిజ్ ఎలాకాలం గవరం మనీద్. ఆమెన్.

19 ప్రిస్కిలెజ్, అక్కులెజ్, ఒనెసిఫారు ఇండ్రొణి వరిజ్ నాను వెన్బాతి లెకెండ వెహ్అ.

20 ఎరాస్సు కొరింతు పట్టమ్దు నిహాన్. త్రొపిముజ్ కష్టం అర్తిజ్, వన్నిజ్ మిలెతు పట్టమ్దు డిఃస్త వాత.

21 పినికాలం రెఎండ ముజాలె, నీను బేగి వాదెజ్ సుడఃఅ. యుబులు, పుదె, లిను, క్లఉడియ ఇనికార్ నిజి వెన్బాతి లెకెండ వెప్పినార్. అయ లెకెండ యా పట్టమ్దు మని మహి నమ్మిత్తికార్బా వెన్బాతిలెకెండ వెప్పినార్.

22 ఓ తిమోతి, ప్రబు నీ వెట తోడుః మనీన్. వన్ని దయా దర్మం మీ విజెరె వెట మనీద్.



## అపొస్తుడు ఆతి పవులు తీతుజ్ రాస్తి ఉత్రం

నెల్వు కిబిసినిక

అపొస్తుడు ఆతి పవులు తీతుజ్ రాస్తి ఉత్రమనె యాక. పవులువెట దేవుణు సేవపణి కినివరి లొణ ఒరెనె తీతు. క్రేతు దేసమ్దు మన్ని దేవుణుదిజ్ నమ్మితి వరి సజమ్కాజ్ నెగ్రెండ నడిపిస్తెజ్, వన్నిజ్ సజం మున్సు అతికారి లెకెండ పవులు ఏర్పాటు కిత్తాన్. అందెజె సజమ్కాజ్, ఎలాగ మన్ని పెద్దల్జ నిల్పెజ్, వారు కిదెజ్ మన్ని పణిజ్, దిన్ని వందిజ్ వెప్పి పవులు తీతుజ్ రాసిన్. మరి, సజమ్దు మన్ని ఒరెన్ ఒరెన్ ఎలాగ మండ్రెజ్ ఇజిబా వెప్పిన్.

1-4 దేవుణు సేవకిని, యేసు క్రీస్తు వందిజ్ అపొస్తుడు ఆతి పవులు ఇని నాను తీతుజ్ రాసిన్. నీను నా సొంత మరిన్ లెకెండ మన్ని. ఎందానిజ్ ఇహిజ, దేవుణు వందిజ్ వెప్పి మన్ని మాటెజ్, నాను సమ్మిజనికెజె నీనుబా సమ్మిజని. దేవుణుదిజ్ నెగ్రెండ నమ్మిదెజ్, వాండ్రు ఏర్పాటు కిత్తి లోకురిజ్ నడిపిస్సివందిజ్, వాండ్రు సజి ఏర్పాటు కిత్తాండ్రె పోక్తాన్. మరి, దేవుణు వందిజ్ నిజమాతి సజతిజ్ నెన్పిసిని వందిజ్ వాండ్రు సజి ఏర్పాటు కిత్తాండ్రె పోక్తాన్. యా నిజమాతి సజతిజ్ దేవుణుదిజ్ లోజిజె నడిపినిక ఎలాగ ఇజి వెప్పి తోరిస్సాద్. అయావలె వారు ఎలాకాలం దేవుణు వెట బత్కిని బత్కుదిజ్ ఆసదాన్ ఎద్రునూణార్. అబద్దం వర్గిజ దేవుణు, ఎలాకాలం వన్నివెట బత్కిని బత్కు వందిజ్ లోకుర్ వెట ఒట్టు కిత్తాన్. నిరకారమ్బా సిల్లెండ మన్నివలె మహి వన్ని ఉదెసం వజనె వాండ్రు ఒట్టు కిత్తాన్. దేవుణు పణిమనిసిన్ సువార్త వెహ్తార్. ఆహా వాండ్రు ఏర్పాటు కిత్తి కాలమ్దు, లోకురిజ్ సువార్త వెన్పిస్తాన్. అయాక వెహ్తాజ్ సజి ఒపజెప్త మనాన్. మజి రక్కిసిని దేవుణు ఆడ్ర వజనె నాను వెప్పిన్. బుబ్బాతి దేవుణుని, మజి రక్కిసిని క్రీస్తుయేసు, దయాదర్మమ్దాన్, నీను నిపాతిదాన్ మండ్రెజ్ సాయం కిపిర్.

క్రేతు దేసమ్దు తీతు కిదెజ్ మన్ని పణి

5 నాను నిజి వెప్పి వజనె, తప్పికెజ్ దిదిజి, దేవుణు సజమ్కు మన్ని పట్టుమ్కాజ్ విజు పెద్దెలుజ నిల్పెఅ. దిన్నివందిజె నాను నిజి క్రేతు దేసమ్దు డిస్తె వాత.

6 దేవుణు సజమ్దు, పెద్దెలి ఆనికాన్ ఎయెన్ ఇహిజ, నింద సిల్లికాన్. ఉండ్రె ఆల్సి మంజినికాన్. వన్ని కొడోర్ దేవుణుదిజ్ సమినికార్ ఆదెజ్. కొడోర్, సెణ పణిజ వందిజ్ నేరం మొవె ఆకకార్ ఆదెజ్. వెప్పిమాట వెనికార్ ఆదెజ్. నన్ని వరి అప్పొసిన్ పెద్దెలి ఆదెజ్.

7 ప్లాస్టరు నింద సిల్లికాన్ ఆదెజ్వెలె. ఎందానిజ్ ఇహిజ, వాండ్రు దేవుణుదిజ్ నమ్మితి వరిజ్ నడిపిస్సికాన్. వాండ్రు గర్త ఆకకాన్. మూంజిన్ కోపం మన్ఎండ, సోన్ఎండ, డెయెసె ఆవండ, సిగు వాని సెణ పణిజ్ కిజి లాబమ్వందిజ్ సుడెఎండ మంజినికాన్ ఆదెజ్వెలె.

8 అహిజ, వాండ్రు వాతివరిజ్ డగ్రు కినికాన్, నెగ్గి వన్కాజ్ కోరిజినికాన్, అణసె ఆజి మంజినికాన్, నీతి నిజాయి మనికాన్, దేవుణు వందిజ్ కేట ఆతికాన్, నెగ్గి బుద్ది మనికాన్ ఆజి మండ్రెజ్.

9 ప్లాస్టరు ఆనికాన్ యేసుక్రీస్తు వందిజ్ మాటు నెన్పిస్తి నిజమాతి మాటెజ్ అయావజ గటిజ సమ్మినికాన్ ఆదెజ్వెలె. ఎందానిజ్ ఇహిజ, వాండ్రు నమ్మిత్తి వరిజ్ నిజమాతి మాటెజ్ నెన్పిసి, నిజమాతి మాటెజ్ ఎద్రిసిని వరిజ్ వరి తప్పుజ తోరిస్తెజ్ అట్టికాన్ ఆదెజ్.

10 ఎందానిజ్ ఇహిజ, నండొండార్ మనార్, అతికారమ్దిజ్ లోజిఎండ, పోక్తి వర్గిజ, మొసం కినికార్ నండొండార్ మనార్. ముకెలం, యేసుప్రబు రక్కిస్తెజ్ ఇహిజ సునతి కిబె ఆదెజ్ వెలె ఇజి కసితం వెప్పినికారె యాలెకెండ మనార్.

11 వరి వెయికు మీరు మూక్తెజ్వెలె. ఎందానిజ్ ఇహిజ, వారు నమ్మిత్తి వరిజ్ తప్పుజ్ నెన్పినార్. ఆహా నమ్మిత్తి వరి కుటుమ్దికార్ విజెరె నిజమాతి మాటెజ్ నమ్మిఎండ ఆప్కిజినార్. వరి సొంత లాబం వందిజె వారు ఈహు కిజినార్.

12 క్రేతుదికాండ్రె వెహ్తాన్, “క్రేతుదికార్ ఎస్తివలెబా అబద్దం వర్గినికార్, మూర్కమ్దికార్, బదకం ఆజి తిండికకుర్తి ఆతికార్”, ఇజి. యా లెకెండ వెప్పికాన్, వరి లొణ ఒరెన్ పల్కుబడి మన్నికాండ్రె.

13 వాండ్రు క్రేతుది వరి వందిజ్ వెప్పికెజ్ నిజమ్నె. అందెజె బాన్ మన్ని నమ్మితికార్ నిజమాతి మాటెజ్ నెగ్రెండ నమ్మిని వందిజ్ నీను వరిజ్ డటిసి డటిసి దిదిఅ.

14 వారు అర్దం సిల్లి యూదురి కత సాన్తరమ్కు అన్ఎండ మంజిని వందిజ్ నీను వరిజ్ దిదిఅ. మరి, నిజమాతి సజతిజ్ డిసి సొహివరి మాటెజ్ లోజిఎండ మంజిని వందిజ్ నీను వరిజ్ డటం దిదిఅ.

15 మన్ను పాపమకాజ్ సుబరం ఆతివరిజ్, విజుబా సుబరం ఆతిలెకెండె నెగెండె మనాద్. గాని, మన్ను సుబరం ఆవిండ, యేసుక్రీస్తుజ్ నమ్మిఇ వరిజ్ ఇనికబా సుబరం ఆవిండ సెవిణ్ మనాద్. ఎందానిజ్ ఇహిజు, వరి గర్బం సెఇక ఆత మనాద్. వారు సెఇకెజ్ కినివెలె, 'తప్తాప్', ఇజుబా వరి గర్బం గదిన్వద్.

16 వారు దేవుణుదిజ్ నెస్సాప్ ఇజు వెహె ఆజినార్. గాని వరి పణిజాణిజ్ వన్నిజ్ నెక్కిపొక్కినార్. వారు పెంటు లెకెండె మనికార్. దేవుణుదిజ్ లోజిఇకార్. ఇని నెగ్గి పణిజ్ కిదెజ్బా తగ్గకార్.

## 2

### నిజమాతి మాటెజ్ వెహ్సినాన్

1 తీతు, నీను దేవుణుదిజ్ నమ్మితి వరిజ్, నిజమాతి మాటదిజ్ కూడితి మన్ని సజతిజ్ నెన్పిన్త.

2 డొక్టారిజ్ నెన్పిన్త, వారు సోస్ఎండ మండ్రెజ్ ఇజు. విజెరె వరిజ్ గవరం సీజి మంజిని లెకెండె మండ్రెజ్ ఇజు. నెగ్గి బుద్దిదాన్ మండ్రెజ్ ఇజు నెస్సిన్త. మరి, వారు నిజమాతి మాటెజ్ నెగ్గెండె నమ్మిజు, మహివరిజ్ ప్రేమిసి ఓరిసి మండ్రు ఇజు నెస్సిన్త.

3 అయాలెకెండె, డొక్రికాజ్బా నెన్పిన్త, అవిక్ బక్తిదాన్ మంజిని వరిలెకెండె మండ్రెజ్ ఇజు. అవిక్ సాండిజ్ వర్గివండ, సోస్ఎండ, మహి వన్నాజ్ నెగ్గి సజతిజ్ నెన్పిన్తె ఇజు.

4-5 అయావలె అవిక్, బోదెకాజ్ నెన్పిన్తె ఆనాద్. ఇనికెజ్ నెన్పిన్తె ఇహిజు, వనక మాసిరిజ్ని కొడొరిజ్ ప్రేమిన్తె, అణసె ఆజి మండ్రెజ్, నెగ్గి మన్నుదాన్ మండ్రెజ్, ఇండ్రొణి పణిజ్ సుడొజు, కనికారం తోరిసి మండ్రెజ్, మాసిరిజ్ లోజెదెజ్ ఇజు. బోదెక్ అయాలెకెండె మండ్రెజ్, ఎందానిజ్ ఇహిజు దేవుణు మాట ఎయెన్బా దూసిన్వండ మండ్రెజ్.

6 అయాలెకెండె, దజ్డార్ అణసె ఆజి మండ్రెజ్ వరిజ్ ఉసార్ కిబిన్త.

7-8 నీను విజు వనకాజ్ లోఇ నెగ్గికెజ్ కిజి వరి ఎద్దు ఉండ్రీ గుర్తు లెకెండె తోరె ఆత. నీను నెన్పిసినివెలె, డొజు సాటు వెహె ఆవిండ, నీను వెహ్సినాని మాటదు మొసం సిల్లెండ, పూర్తి నీను వరిజ్ నెన్పిన్త. ఎందానిజ్ ఇహిజు, మజి పడొఇకార్ మా మున్ను సెఇ మాటెజ్ వర్గిదెజ్ ఆవిండ, సిగు ఆజి మండ్రెజ్.

9-10 నీను వెటి పణి కినివరిజ్ నెన్పిన్త, వారు విజు దని లోఇ ఎజుమానిరిజ్ లోజిజు, వరిజ్ ఇన్తం ఆనివజు కిజి మండ్రెజ్ ఇజు. ఎజుమానిరిజ్ మరజు వెహెవిండ, డొజు కివిండ మండ్రెజ్ ఇజు నెన్పిన్త. వారు ఎజుమానిరిజ్, 'మజి పూర్తి నమ్మిదెజ్ ఆనాద్', ఇజు తోరిన్తె. వెట్టిపణి కినికార్ అయాలెకెండె మండ్రెజ్. ఎందానిజ్ ఇహిజు, వారు కిని విజు దన్ని లోఇ లోకుర్ నెన్తె, మజి రక్కిసిని దేవుణు వందిజ్ మన్ని మాటెజ్ గొప్పు నెగ్గికెజ్ ఇజు.

11 ముజాలె వెహ్సాలెకెండె నమ్మిత్తి వరిజ్, నీను నెన్పిన్తె. ఎందానిజ్ ఇహిజు, లోకురిజ్ విజెరిజ్ రక్కిస్సివందిజ్ దేవుణు, వన్ని దయాదర్మమదాన్ యేసుక్రీస్తుజ్ యా లోకమ్దు పొక్తాన్.

12 వాండ్రు మజి వన్ని దయా దర్మమదాన్ నెన్పినాన్, దేవుణుబాణిజ్ దూరం కిబిసిని విజు సజతిజు డిన్త, ఇజు. యా లోకమ్ది లోకుర్ ఆస ఆజినికెజ్ డిన్త, ఇజు నెస్సినినాన్. మరి, మాటు నెగ్గి బుద్దిదాన్, నీతి నిజయ్దిదాన్, దేవుణుదిజ్ సర్ల సినికెజ్ కిజి యా తరమ్దు మండ్రెజ్ ఇజు నెన్పిన్తాన్.

13 మాటు అయా లెకెండె మండ్రెజ్. ఎందానిజ్ ఇహిజు, మజి గొప్పు సర్ల కిబిస్సి ఉండ్రీ రోజువందిజ్ మాటు ఆసదాన్ ఎద్దు సుడొజునాట్. ఇహిజు, మాటు మజి రక్కిసిని పెరి దేవుణు ఆతి యేసుక్రీస్తు వాజిని రోజు వందిజ్ ఆసదాన్ మజి కొత్తాజ్ పుటిస్తాండ్రె ఎద్దు సుడొజునాట్. వాండ్రు గొప్పు జాయ్ కూడితి మన్ని నండొ సోకుదాన్ వానాన్.

14 మా విజు పాపమకాజ్ మజి డిన్పిన్తె, సాదెజ్ వన్నిజ్ వాండ్రె ఒపజెపె ఆతాన్. మరి, మజి సుబరం కిజి, నెగ్గికెజ్ కిదెజ్ పూర్తి ఒపజెపె ఆతి వన్ని సాంత లోకుర్ లెకెండె తయార్ కిదెజ్ వాండ్రె ఒపజెపె ఆతాన్.

15 నాను ఏలు వెహ్సికెజ్ విజు నమ్మితివరిజ్ పూర్తి అతికారమ్దాన్ నెస్సిన్త. వారు అయాకెజ్ కిదెజ్ వరిజ్ పణిసి వెహె. అయాకెజ్ కిఇవరిజ్ దిది. నిజి ఎయెన్బా దుసలాడొవిండ సుడొజు.

## 3

### నెగ్గి పణిజ్ కినివందిజ్ వెహ్సినాన్

1 దేవుణుదిజ్ నమ్మితి లోకుర్ అతికారిజు లోజెదెజ్, వెహ్సా మాట వెంజి మండ్రెజ్, ఇని నెగ్గి పణిజ్ కిదెజ్బా తయారాజు మండ్రెజ్ ఇజు నీను వరిజ్ ఎత్తు కిబిసి మన్త.

2 వారు, ఎయెరిజ్బా సెఇకెజ్ వెహెవిండ, జటిజ్ ఆవిండ, సార్లిదాన్ విజెరె వెట తగిజు మండ్రెజ్ ఇజు వరిజ్ వెహ్సా మన్త.

3 ఎందానిజ్ ఇహిజు, మాటుబా ముజాల నమ్మిణ వరిలెకెండ, బుద్ది సిల్లెండ మహాట్. మాటు ఎయెరిజ్బా లోజీఏండ మహాట్. మొసెం కిబె ఆజి మహాట్. యా లోకమ్ది సెఇ ఆసెజ్ని సుకమ్కాజ్ నండో ఆస ఆజి మహాట్. పగదాన్, గోసదాన్ కాలం గడఱ్పి మహాట్. మహి వరిజ్ దూసలాడఱజి మహాట్. వారు మజి దూసలాడిఱతార్.

4 గాని అయాలెకెండ మహివలెనె, మజి రక్సిసిని దేవుణు వన్ని కనికారం తోరిస్తాండ్రె, ప్రేమ తోరిస్తాండ్రె మజి రక్సిస్తాన్.

5 మాటు కిత్తి నీతి పణిజాణిజ్ ఆవద్. గాని వన్ని కనికారమ్దానె మజి రక్సిస్తాన్. దేవుణు ఆత్మదాన్, వాండ్రు మా పాపమ్కు నోరిజి మజి కొత్తాజ్ పుటిస్తాండ్రె, ఉండ్రె కొత్త బత్తు. సిత్తాండ్రె మజి రక్సిస్తాన్.

6-7 దేవుణు దయా దర్మమ్దాన్ మాటు నీతి నిజయ్తి మన్నికాట్ ఇజి వాండ్రు తీర్పు సితాన్. ఆహె, తీర్పు సిత్తిజ్ మాటు కోరిజిని ఎలాకాలం దేవుణు వెట బత్తిని బత్తుదిజ్ అక్కు. మన్నికార్ ఆనివందిజ్ మా ముస్సు. దేవుణు ఆత్మ నండో పోక్తాన్. వాండ్రు మజి రక్సిసిని యేసుక్రీస్తు వెటనె దేవుణు ఆత్మ నండో పోక్తాన్.

8 యా మాట పూర్తి నమ్మిదెజ్ తగ్గిక. అందెజె దేవుణుదిజ్ నమ్మితి వరిజ్ అయాకెజ్ డటిసి నీను నెన్పిస్తెజ్ ఇజి నాను కోరిజిన. ఎందానిజ్ ఇహిజు, వారు మహి వరిజ్ వరి మన్సు పూర్తిదాన్ నెగ్గి పణిజ్ కిదెజె. ముస్సు వెప్తి మన్ని మాటెజ్ విజు విజెరిజ్ నెగ్గికెజెనె, పణిదిజ్ వానికెజెనె.

9 గాని అర్దం సిల్లెండ తర్కిస్సికెజ్, అనిగొగొర్ వందిజ్ వెప్పినికెజ్, జటిజ్ ఆనికెజ్, యూదురి రూలుజు వందిజ్ వెప్పి గొడఱబ కినికెజ్ విజు, ఎందానిజ్ పణిదిజ్ రెఇకెజ్, విలువ సిలికెజ్. అందెజె వనక వందిజ్ దూరం మన్అ.

10 నమ్మిత్తి వరి సజమ్దు, నిజమాతి మాటెజు వెట కూడఱకెజ్ నెన్పిసి, వరిజ్ ఎర్లిసి కేట కిని వన్నిజ్ ఉండ్రె రుండి సుట్టు. బుద్ది వెహాఅ. మరి, వాండ్రు వినఏండ మహిజు, వన్నిజ్ దూరం కిఅ.

11 నన్నికాన్ నిజమాతి సజతిజ్ సరి తప్పి పాపం కిజినాన్ ఇజి నిజి తెలినాద్. వన్ని పాపమ్కు వాండ్రు తప్పు కిజినాన్ ఇజి రుజుప్ కిజినె.

12 నాను పిన్ని కాలం నికొపొలితు గడఱ్పెజ్ ఇజి తిరుమానం కిత్త మన. అందెజె నాను అరెమానుజ్ ఇని వన్నిజ్నో, తుకికుజ్నో నీ డగ్గు పొక్కు. నస్తివలె నీను అబె నా డగ్గు వాదెజ్ సుడఱె.

13 జెనా ఇని లాయిరు, అపొలు, క్రేతు దేసం డిసి మరి సొండ్రెజ్ సుడఱఱనార్. వరి పయ్నమ్దు ఇనికబా తక్కు సిల్లెండ వరిజ్ కావాలిస్తికెజ్ విజు సీజి నెగ్రెండ పోక్అ.

14 నమ్మితికార్ పణిదిజ్ రెఇ బత్తు. బత్తిఏండ, పణిదిజ్ వానికెజ్ కిజి మండ్రెజ్. అందెజె, వారు వరి సమయం విజు అవ్సరం మన్ని వరిజ్ సాయం కిదెజ్ నెస్తెజ్వెలె.

15 నా వెట మనికార్ విజెరె నిజి వెన్బాతిలెకెండ వెప్పినార్. మాటు నమ్మిజిని లెకెండ నమ్మిజి, మజి ప్రేమిస్సివరిజ్ నాను వెన్బాతి లెకెండ వెహాఅ. దేవుణు దయా దర్మం మీరు విజెరె వెట మనీద్.

## అపొస్తుడు ఆతి పవులు పిలెమొనుజ్ రాస్తి ఉత్తం

నెల్లు కిబిస్సిక

అపొస్తుడు ఆతి పవులు కొలొసి పట్టుమదు మని పిలెమొను ఇని ఒరెన్ దేవుణుదిజ్ నమ్మిత్తి వన్నిజ్ రాస్తి ఉత్తమ్ నె యాక. పిలెమొనుజ్ ఒనెసిము ఇని ఒరెన్ వెట్టిపణి మనిసి మహాన్. ఒనెసిము పిలెమొనుజ్ డి:స్తాండ్రె, ఉహొక్కి ఎంబెనొ సొహాన్. వాండ్రు సొహి మహివలె పవులుజ్ దసూల్ ఆతాన్. పవులు వన్నిజ్ సువార్త వెప్తిజ్, వాండ్రు యేసుక్రీస్తుజ్ నమ్మితాన్.

పవులు ఒనెసిముజ్ పిలెమొను డగ్రు మర్జి పొక్కినాన్. నీను, ఒనెసిముజ్ సెమిసి ఒరెన్ తంబెరి లెకెండ్ వన్నిజ్ డగ్రు కిఆ, ఎందనిజ్ ఇహిజ, వాండ్రు ఏలు దేవుణు వెట సమందం ఆతికాన్ ఇజి యా ఉత్తమ్దు రాసి ఒనెసిము వెట పొక్కినాన్.

1-2 క్రీస్తుయేసు వందిజ్ జెలిదు మన్ని పవులు ఇని నాను రాసిని ఉత్తం. మా వెట సువార్త పణి కిజిని మా సొంత కూలాయెన్ ఆతి పిలెమొనుజ్, మా తజి లెకెండ్ మని ఆపియెజ్, మా వెట క్రీస్తు వందిజ్ సేవకిదెజ్ నండొ కర్ణబడిజి కాట్లాడజిని అర్కిపుజ్, మీ ఇండ్రొ కూడజి వాజిని దేవుణు సజమ్దిజ్ రాసిన. మా కూలాయెన్ ఆతి తిమోతిబా నా వెట మిజి వెన్బాతి లెకెండ్ వెప్పినాన్.

3 మా బుబ్బు ఆతి దేవుణుని ప్రబు ఆతి యేసు క్రీస్తు దయా దర్మమ్దాన్ మీరు నిపాతిదాన్ మండ్రెజ్ సాయం కిపిర్.

దేవుణుదిజ్ వందనమ్కు

4-5 ఓ పిలెమొను, నాను నిజి ఒడిబిజి పార్దనం కినివలె, నా దేవుణుదిజ్ ఎస్తివలెబా వందనమ్కు వెప్పిన. ఎందనిజ్ ఇహిజ, లోకుర్ నజి వెప్పినార్ నీను ప్రబు ఆతి యేసుజ్ నమ్మిజిని ఇజి. దేవుణుదిజ్ నమ్మిత్తి వరిజ్ విజెరిజ్ ప్రేమిస్సి ఇజి. దిని వందిజ్ నాను దేవుణుదిజ్ వందనమ్కు వెప్పిన.

6 క్రీస్తు వందిజ్ నీను నమ్మిత్తి సజతిజ్ మహివరిజ్ ఉసార్దాన్ వెప్తిజ్ ఇజి నాను పార్దనం కిజిన. అయావలె దేవుణు మజి సీజిని విజు నెగ్గి ఇనాయమ్కు నీను పూర్తి నెస్తిలె. యేసు క్రీస్తు వెట మాటు కూడితి మనితానె దేవుణు అయా ఇనాయమ్కు మజి సీనాన్.

7 ఓ తంబెరి, దేవుణుదిజ్ నమ్మిత్తి వరిజ్ నీను ప్రేమిసి, వరి పాణమ్దిజ్ నిమాలం కిబిన్అ. ఆహె, నీను నజి నండొ సర్ద కిబిస్సిదె ఆదరిస్తి.

పవులు ఒనెసిము వందిజ్ బతిమాల్జినాన్.

8-10 అందెజె, క్రీస్తు నజి సీతి అతికారమ్దాన్ నీను కిదెజ్ మని పణి కిఆ ఇజి ఆడ్ర సీదెజ్ నజి అక్కు మనాద్. గాని నాను నిజి బతిమాల్జిన. ఎందనిజ్ ఇహిజ, నీను దేవుణుదిజ్ నమ్మిత్తి వరిజ్ ప్రేమిస్సికి ఇజి నాను నెసిన. డొక్ర ఆత, ఏలు క్రీస్తుజ్ సేవ కిని వందిజ్ జెలిదు మని పవులు ఇని నాను నిజి బతిమాల్జిన. నా మరిన్ లెకెండ్ మని ఒనెసిముజ్ సాయం కిని వందిజ్ నాను బతిమాల్జిన. నాను గొలుస్కాణిజ్ మహివలె వాండ్రు నా మరిన్ లెకెండ్ ఆతాన్. నానె వన్నిజ్ దేవుణు దరొబ్ తత.

11 వాండ్రు\* ముజాల, నిజి ఎందనిజ్ పణిదిజ్ రెకాన్. ఎందనిజ్ ఇహిజ, వాండ్రు నిజి డి:స్త సొహాన్. గాని ఏలు నిజిని నజి పణిదిజ్ వాతికాన్ ఆతాన్.

12 నజి నండొ ఇస్టం ఆతి వినిజ్ నీ డగ్రు మర్జి పొక్కిన.

13 సువార్త వెప్పిని వందిజ్ నాను గొలుస్కాణిజ్ మనివలె, నజి సాయం కిదెజ్ వినిజ్ నా డగ్రు ఇడెదెజ్ నజి ఇస్టం మనాద్. ఎందనిజ్ ఇహిజ, విన్ని సాయం నీను కితి లెకెండ్ ఆదెజ్.

14 గాని నీను వెహొఎండ నాను వినిజ్ ఇబ్బె ఇడె:వ. ఎందనిజ్ ఇహిజ, నా వందిజ్ నీను కిని ఇని మేలుబా నాను డటిసి వెప్తిజ్ ఇజి ఆమాట్. గాని నిజి ఇస్టం ఆతివజ, పూర్తి మన్నుదాన్ కిదెజ్.

15-16 వాండ్రు మర్జి వానిక నీ డగ్రు ఎలాకాలం మంజిని వందిజ్ నెను. వాండ్రు సెగం కాలం దూరం ఆత మహాన్. అందెజె ఏలుదాన్ వాండ్రు నీ వెట్టిపణి కిని వన్నిలెకెండ్ ఆవెన్. దన్నిజ్ ఇంక నండొ ఇస్టం మని ఒరెన్ తంబెరి లెకెండ్ మనాన్. నజి వన్ని ముస్కు ఒరెన్ తంబెరి లెకెండ్ నండొ ఇస్టం మనాద్. గాని వన్నిజ్ నిజి ఒదె ఇస్టం మంజినాద్లె. ఒరెన్ వెట్టిపణి కిని వన్ని వజ ఇస్టం మంజినాద్లె. యేసుప్రబు వెట కూడితి మని దనితాన్ ఒరెన్ తంబెరి వజబా ఇస్టం మంజినాద్లె.

\* 1:11 1:11 ఒనెసిము ఇని పేరుదిజ్ అర్దం పణిదిజ్ వానికాన్ ఇజి.

17 అందెజె క్రీస్తు వందిజ్ నీ వెట జత కూడఃజి పణికినికాన్ ఒరెన్ ఇజి, నజీ ఒడఃబితిజ, నీను నజీ ఎలాగ డగ్రు కినిదొ, అయా లెకెండ్ వన్నిజ్ డగ్రు కిఅ.

18 వాండ్రు నిజీ ఇని తపు కితిజనొ, నిజీ అప్పు మర్జి సీదెజ్ మహిజనొ, అయాక నా ముస్సు మోప్అ.

19 పవులు ఇని నాను నా సొంత కీదాజె రాసిన. నీను దేవుణు దరొబ్వాదెజ్ నానె సాయం కిత. అందెజె నీ కొత్త బత్తు వందిజ్, నజీ నీ బత్తునె సీదెజ్ మనాద్. గాని నాను అయాక లొస్ఎ. వాండ్రు సీదెజ్ మనికెజ్ నాను తిరిస్సు.

20 ఓఓ తంబెరి, యేసుప్రబు వెట మజీ మని సమందమ్దాన్, నీ బాణిజ్ నాను యా సాయం కోరిజిన. యేసుప్రబు వెట కూడితి మని దనితాన్ వన్నిజ్ డగ్రు కిజి నజీ సర్ద కిబిన్అ.

21 నాను వెప్తాకెజ్ నీను తప్ఎండ కిని ఇజి నాను నెసిన. అందెజె నాను నిజీ రాసిన. ఒఒ, నాను వెప్తా దని ముస్సు నీను నండొ కినిలె ఇజి నాను నెసిన.

22 జెలిదాన్ నజీ డిఃస్సి వందిజ్ మీరు పార్దనం కిజినిదెర్. మీ పార్దనం దేవుణు వెంజి, మీ డగ్రు మర్జి వాదెజ్, దేవుణు సాయం కినాన్ ఇజి నాను కోరిజిన. అందెజె నా వందిజ్ ఉండ్రీ బాడ్డిః తయార్ కిఅ.

23 యేసు క్రీస్తుజ్ వెప్సాని వందిజ్ నా వెట జెలిదు మని ఎపప్ నిజీ వెన్బాతి లెకెండ్ వెప్సానాన్.

24 అయాలెకెండ్, నా వెట సేవ పణి కిజిని మార్కు, అరిస్తార్కు, దెమ, లూక ఇనికార్బా నిజీ వెన్బాతి లెకెండ్ వెప్సానార్.

25 ప్రబు ఆతి యేసుక్రీస్తు దయా దర్మం మిజితోడు మనీద్.

## ఎబ్రి లోకురిజ్ రాస్తి ఉత్తమదిజ్ నెల్వ కిబిసినిక

ఇస్రాయేలు లోకుర్ అయ్గుప్పు దేసమ్దు వెటిపణి కిజి మహార్. వారు నండో బాదెజ్ ఆజి మహార్. దేవుణు ఇస్రాయేలు లోకురిజ్ అయ్గుప్పు దెసమ్దాన్ డిసీపిసి, కానాను దేసమ్దు ఒత్తెజ్ ఇజి, మోసె వరిజ్ నడిపిసి తత్తాన్. కానాను దేసమ్నె వరిజ్ సీన ఇజి దేవుణు వరిజ్ ఒట్టు కిత్తాన్, వారు పయ్నం కిజి మహి వలె, మోసె వెట దేవుణు వరిజ్ పది ఆత్తెజ్ సీజినాన్. దన్ని వెట దేవుణు వెహ్సినాన్, “నాను వరి నడిమి మండ్రెజ్ ఇజి నా వందిజ్ నెగ్గి ఇల్లు లెకెండ్ మంజిని ఉండ్రీ గుడారం తొహ్తెజ్”, ఇజి (నిర్గమ 25:8). యాక ఎలాగ తొహ్తెజ్ ఇజి గుర్తులెకెండ్ ఉండ్రీ రూపు దేవుణు మోసెజ్ తోరిసినాన్. “నాను మిజి సుడేజి, మీ వెట అబ్బె వర్గిన”, ఇజి దేవుణు వెహ్తాన్ (నిర్గమ 29:42). అందెజె, దేవుణు మంజిని ఉండ్రీ బాడ్డినె గుడారం. దేవుణు మంజిని బాడ్డిదిజ్ పోలిత మనాద్ యా గుడారం (ఎబ్రి 9:11).

పుజేరిజు - యూదురి మతమ్దు, లేవి తెగాదు మన్ని వరిజె, పుజేరిజు ఇజి ఏర్పాటు కినార్. మహి తెగాదికార్ విరిజ్ వరి దసమ్బాగం సిదెజ్. పుజేరిజు ఆవిండ, పెరి పుజేరిజు ఇజి, విజేరె పుజేరిజు మున్కు మన్ని పెరి పుజేరిజు ఇజి నండోండోబా మహార్. ఉండ్రీ కాలమ్దు విజేరె పుజేరిజు మున్కు మన్ని పెరి పుజేరి ఇజి దేవుణు తోలిత ఏర్పాటు కిత్తాన్\*. పుజేరిజు దేవుణుదిజ్ ఒద్దె కెట ఆతి గదిదు డుగ్గజి సేవ కిత్తాన్. గాని విజేరె పుజేరిజు మున్కు మని పెరి పుజేరి ఒరెండ్రె దేవుణుదిజ్ ఒద్దె కేట ఆతి గదిదు డుగ్గజి సేవ కిత్తాన్. ఏలు యేసు మా వందిజ్ విజేరె పుజేరిజు మున్కు మన్ని పెరి పుజేరి వజ వాత మనాన్.

గుడారం - దేవుణు మోసెజ్ తోరిస్తి రూపు వజ తయార్ కిత్తి ఉండ్రీ టంబు గుడుఃసని దన్నిలోఇ మన్ని వనక వందిజ్నె గుడారం ఇనార్. ఇబ్బెనె దేవుణు వన్ని లోకుర్ వెట వర్గినాన్. టంబు గుడుఃసదిజ్ రుండి గద్దిజ్ మన్నె. దేవుణు వందిజ్ కేట ఆతి గదిని దేవుణు వందిజ్ ఒద్దె కెట ఆతి గది ఇజి రుండి మన్నె. యా రుండి గదిజబా దేవుణు వందిజ్ కేట ఆతి ఇట్టికెజె. ఉండ్రీ తెరనె యా రుండి గదిజ కేట కేట కిత్తాద్. తెర, నీరి దుపాటి లెకెండ్ మనాద్. రుండి గదిజ నడిమి డోయె ఆత మనాద్. అయాక నండో దలం మన్నిక, నండో సోకుదాన్ అట మనార్.

దేవుణుదిజ్ కేట ఆతి గది - దేవుణుదిజ్ కేట ఆతి గది పెరిక. దన్నిజ్ 30 మూరెజ్ నీరిండ్, 15 మూరెజ్ ఒసార్ మహాద్. దిన్ని లోఇ దేవుణు ఎద్దు రొటెజ్ ఇడ్డి బల్ల ఉండ్రీ కల్లితి సిల్లి బజారమ్దాన్ తయార్ కిత్తి దీవెజ్ డండి ఉండ్రీ, దేవుణుదిజ్ దూపం సురుని మాలి వెటె ఉండ్రీ, మన్నె.

### 1 దేవుణు ఎద్దు రొటెజ్ ఇడ్డి బల్ల

దేవుణుదిజ్ కేట ఆతి గదిది ఉణెర్ పడఃకాదు యా బల్ల మంజినాద్. యాక తుంబ మరాతి సెక్కెజాణిజ్ తయార్ కితిక. దిన్ని మున్కు కల్లిసిల్లి బజారమ్దాన్ పూత రాస్త మనాద్. దేవుణు ఎద్దు ఇడ్డి రొటెజ్ ఎస్తివలెబ దిన్ని మున్కు మంజినె. యూదురి ఆసారం వజ యా రొటెజ్ ఉండ్రీ పలెమ్దు, రుండి వర్సెజ్ ఆరు దొత్తిజ్ మంజినె. విస్రాంతి దినమ్దునె యాకెజ్ మారిసి మరి కొత్తకెజ్ ఇడ్డార్. అయా పడాయి రొటెజ్ పుజేరిజునె తిండ్రెజ్. మరి ఎయెర్బా తిండ్రెజ్ ఆవిద్. లేవి తెగాదు మన్నికారె, యా రొటెజ్ తయార్ కినార్. విస్రాంతి దినమ్దిజ్ ముజాల మన్ని రెయునె తయార్ కినార్.†

### 2 కల్తి సిల్లి బజారమ్దాన్ తయార్ కిత్తి దీవ డండిజ్

యా డండిజ్ కల్తి సిల్లి బజారమ్దాన్ తయార్ కిత్తిక్కాదె. దేవుణు వందిజ్ కేట ఆతి గదిది డేబ్ర పడఃకాద్ మంజినాద్. యా కంతుదు ఏడు దీవెజ్ మంజినె. దిన్ని ముజాల మన్ని బాడ్డిదు జాయ్ మండ్రెజ్నె యాక మంజినాద్. ఒరెన్ పుజేరి పెందల్కని పొదొయ్క కసిసి మంజినాన్.‡

### 3 దూపం సుర్ని మాలి వెటె

యాక, నడిమి డెర డగ్గు మంజినాద్. దిన్ని మున్కు దూపమ్నె ఆవిండ మరి ఇనికబా కూలిజ్నె, జంతుజ్నె పార పొట్టిజ్నె సుర్దెజ్ ఆవిద్. పెందల్కని పొదొయ్క దూపం సుర్నార్. గాని యాక దేవుణు వందిజ్ ఒద్దె కేట ఆతి గదిదు మన్ని ఉండ్రీ వస్తు. అందెజె, దేవుణు వందిజ్ ఒద్దె కేట ఆతి గదిదు మంజినక ఇజి ఒడఃబిజినార్.§

దేవుణు వందిజ్ ఒద్దె కేట ఆతి గది - దేవుణు వందిజ్ ఒద్దె కేట ఆతి గది నీరిండ్, ఒసార్ ఉండ్రె సమానమ్నె. 15 మూరెజ్ మన్నె. దిన్ని లోఇ మందసం మనాద్. మందసం ఇహిజ ఉండ్రీ వెటె. యాక దేవుణు మనాన్ ఇజి ఉండ్రీ గుర్తు లెకెండ్ మనాద్. దేవుణుదిజ్ కేట ఆతి గదిదిజ్నె ఒద్దె కేట ఆతి గదిదిజ్ నడిమి ఉండ్రీ డెర అడ్డు మనాద్. యా డెర

\* 0: 1:0 ఎబ్రి 5:4 † 0: 1:0 లేవి 24:5-9 ‡ 0: 1:0 నిర్గమ 26:35 § 0: 1:0 ఎబ్రి 9:4, 1రాజు 6:22

నండో దలం మన్నిక. నండో కరిదిక. దన్ని ముస్సు నండో సోకుదాన్ అటార్. దేవుణు వందిజ్ ఒద్దే కేట ఆతి గదిదు విజేరె పుజేరిజ ముస్సు పెరి పుజేరి ఒరెండ్రె సొనాన్. మరి ఎయెన్బ సొన్ఎన్. వాండ్రుబా ఏంటుదిజ్ ఒర్సునె, సోనాన్. లోకురి విజెరె పాపమ్క వందిజ్ పూజ సీదెజ్ ఉండ్రె రోజు మనాద్. నాండిజె డేర పెర్జి, లోఇ సొనాన్.\*

యేసు మా వందిజ్ విజెరె పుజేరిజ ముస్సు మన్ని పెరి పుజేరి ఆత మనాన్. వాండ్రు సిలువాదు సాతిజ్, పాపమ్క వందిజ్ ఎలాకాలం వందిజ్ ఉండ్రె సుట్టు పూజ లెకెండ వన్నిజ్ వాండ్రె ఒవజెవె ఆతాన్.† యేసు సిలువాదు సాతి గడియోదు దేవుణు గుడియో దేవుణు వందిజ్ కేట ఆతి గదిదిజ్ని దేవుణు వందిజ్ ఒద్దే కేట ఆతి గదిదిజ్ నడిమి మహి డేర, ముస్సుహాన్ అడిగిదాక రుండి బదెజ్ ఆజి కింజితాద్.‡ ముజాల డేర పెర్జి విజేరె పుజేరిజ ముస్సు మన్ని పెరి పుజేరి ఒరెండ్రె దేవుణు వెట వర్గిదెజ్ లోఇ డుగ్నాన్. గాని క్రీస్తు సాతిజ్, వన్ని ముస్సు నమకం ఇడ్ని ఎయెన్బా దేవుణు డగ్రు సాండ్రెజ్ అట్నాన్. మరి పూజదిజ్ అవ్సరమ్బా సిల్లెద్.

మందసం - మందసం ఉండ్రె దేవుణు వందిజ్ కేట ఆతి గదిదు మన్ని వస్తు. మందసం ఇహిజ ఉండ్రె పెటెనె. యాక తుంబ మరాతి సెక్కెజాణిజ్ తయార్ కిజి దిన్ని ముస్సుని లోఇ కల్తి సిల్లి బజారమ్దాన్ పూత రాసి ఆతమనాద్. దిన్ని ముస్సు ఉండ్రె మూత మనాద్. అయాకబా కల్తి సిల్లి బజారమ్దాన్ పూత రాసి ఆత మనాద్. అయాక మూత నెక్కి ముద కిదెజ్ ఆనాద్. లాగ్జి సాప్తెజ్బా ఆనాద్.§ యా మూతదిజ్ “కరుణ పీటం” ఇనార్.\* కరుణ పీటం ఇహిజ, పాపమ్కు సెమిస్సి బాడ్డి ఇజి అర్థం. కరుణ పీటం ముస్సు కెరూబుజ్ మన్నె. కెరూబుజ్ లోకు మూర్తి వజనె మన్నె గాని రెక్కెజ్ మన్నె. యా కెరూబుజ్ ఇతాన్ ఉండ్రె ఆతాన్ ఉండ్రె ఎద్దు నిల్లి, కరుణ పీటమ్దునె బేసి రెక్కెజ్ కోరిస్తె మన్నె.† కెరూబుజు నడిమి మొసాప్ మనాద్. కరుణా పీటం ముస్సు యా మొసాప్దు దేవుణు మంజినాన్. పరిసుద్దమాతి దేవుణు యా లెకెండ బాన్ మంజినాన్. అందెజె ఇని సెఇకాన్నో తప్పు కిత్తికాన్నో బాన్ కరుణ పీటం డగ్రు సాండ్రెజ్ అట్ఎన్. గాని దేవుణు ఏర్పాటు కిత్తి విజేరె పుజేరిజ ముస్సు మన్ని పెరి పుజేరి ఒరెండ్రె సాండ్రెజ్ అట్నాన్. వాండ్రుబా వన్ని సాంత ఇస్సమ్దాన్నో, పూజ కిత్తి దన్ని నల సిల్లెండ్రె సాండ్రెజ్ ఆవెద్. యా లెకెండ సిల్లెండ్రె సాహిజ వాండ్రు నిజం సొనాన్.

మందసమ్దు మన్నికెజ్ - మందసమ్దు దేవుణు మోసెజ్ సిత్తి పది ఆడ్రెజ్ రాస్తి మన్ని రుండి పల్కెజ్ మన్నె. కల్తిసిల్లి బజారమ్దాన్ తయార్ కిత్తి జగ్గుదు మన్నా మనాద్. మరి, సిగిరిస్తిమన్ని, అహారోసు డుడ్డుబా మనాద్.

మన్నా ఇహిజ తెలాని గింజ లెకెండ మనాద్. తేనె నూనె లెకెండ రుసి మంజినాద్. దేవుణు ఇస్రాయేలు లోకురిజ్ బిడిమీమ్ బూమిదు నడిపిసి మహివలె వరిజ్ తిండ్రెజ్ యాక సిత్తాన్.‡

పది ఆడ్రెజ్ రాస్తి ఇడ్డి పల్కెజ్ - యా పల్కెజ్ పణకాణిజ్ తయార్ కిత్తికెజె. నన్ని పల్కెజు ఆడ్రెజ్ గిస్తు మనాద్.§

డేవ - డేవ నడిమి టంబు గుడుసెన మనాద్. డేవ సుటులం వెల్గు మనాద్. దిన్నిజ్ ఉండ్రె సరి మానాద్. డేవదు సంత సుర్ని మాలి పీటని నోర్బాదెజ్ ఏరు ఇడ్ని పలెం మన్నె.

సంత సుర్ని మాలి పీట - యాక తుంబ మరాతి సెక్కెజాణిజ్ తయార్ కిత్తిక. దిన్ని ముస్సు కంసు పూత రాస్త మనాద్. ఇబ్బెనె సంద సుర్ని పూజ కినార్. యా పీటదు సిసు ఎస్తివలెబా నమ్బివిండ కసీనె మండ్రెజ్, యా మాలి పీట సరి డగ్రు మంజినాద్.

నోర్బాదెజ్ ఏరు ఇడ్ని పలెం - యా పల్లెం సంద సుర్ని మాలి పీటని, గుడారం నడిమి మంజినాద్. యాకబా కంసుదాన్ తయార్ కిత్తిక. పుజేరిజు పూజ కిని ముజాల్నో, గుడారమ్ లోఇ సొని ముజాల్నో నోర్బాదెజ్ ఏరు ఇడ్నికాదె యాక.

**ఏబ్రి లోకురిజ్ రాస్తి ఉత్తం**

నెల్వు కిబిసినిక

ఏబ్రి లోకురిజ్ రాసిని ఉత్తమ్నె యాక. ఏబ్రి లోకుర్ ఇహిజ, క్రీస్తు ముస్సు నమకం ఇట్టి యుదురి లోకుర్. యా ఉత్తం రాస్తికాన్ ఎయెన్ ఇజి తెలివిద్. యేసు ప్రబునె, దూతారిజ్ ఇంక మోసెజ్ ఇంక, మోసె సితి రూలు వజ పుజెరి పణి కిజిని పెరి పుజేరిజ ఇంక గొప్ప పెరికాన్ ఇజి యా ఉత్తమ్దు వెహ్సినాద్. పూజెజ్ లోకురి పాపమ్కు సొన్పిన్ఉ. గాని యేసు ప్రబు పూజ ఆతి దన్నితాన్నె లోకురి పాపమ్కు సొనె. వన్ని నలదాన్నె, లోకుర్ సుబ్బరం ఆనార్. దేవుణు డగ్రు దయ్ రమ్దాన్ మండ్రెజ్ అట్నార్. అయాలెకెండ, కొత్త ఒపుమానం నడిపిస్సికాండ్రె యేసు ఇజి వెహ్సినాద్. మరి దేవుణు ముస్సు నమకం ఇట్టి పూర్బమ్దు బత్తిజి మహి నండెండార్ వరిజ్ వెహ్సినార్. కండెవెరిదు, నమ్మితి లోకుర్ ఎలాగ మండ్రెజ్ ఇజి యా ఉత్తమ్దు వెహ్సినాద్.

\* 0: 1:0 ఏబ్రి 9:27 † 0: 1:0 ఏబ్రి 7:27 ‡ 0: 1:0 మత్తయి 27:51 § 0: 1:0 నిర్గమ 25:10-15 \* 0: 1:0 నిర్గమ 25:7 † 0: 1:0 నిర్గమ 25:18-22 ‡ 0: 1:0 నిర్గమ 16:14-31 § 0: 1:0 నిర్గమ 31:18

- 1 పూర్బమీదు, ఆఇ ఆఇ నండొ సమయమీదు, నండొ రకమ్కాణిజ్, దేవుణు ప్రవక్తరు వెట మా అనిగొగొరిజ్ వర్గితాన్.
- 2 గాని యా కడెవెరి దినమ్కాజ్, వాండ్రు వన్ని మరిన్ వెట మజి వర్గితాన్. వన్ని వెటనె బూలోకమ్ని దని లొఇ మనికెజ్ విజు దేవుణు తయార్ కిత్తాన్. వన్నిజె, విజు దనిజ్ అక్కు మనికాన్ ఇజి ఏర్పాటు కిత్తాన్.
- 3 దేవుణు గొప్ప పెరికాన్ ఇజి తోరిస్సికాండ్రె మర్రిన్. వన్ని లెకెండె వీండ్రు మనాన్. గొప్ప సత్తు మని వన్ని మాటదాన్, బూలోకమ్దు మని విజు వన్కాజ్ వీండ్రు నడిపిసినాన్. లోకురి పాపమ్కు నొరదెజ్ వాండ్రు సాతి వెనుక, గొప్ప పెరి దేవుణు ఉణెర్ పడెకాదు అతికారమ్దు బస్తాన్.
- 4 అందెజె, వాండ్రు దూతార్ ముస్సు గొప్ప పెరికాన్ ఆతాన్. దూతార్ పేర్కు ముస్సు దేవుణు వన్నిజ్ సీతి పేరు గొప్ప పెరిక మని లెకెండె, వాండ్రు పెరికాన్ ఆతాన్.
- 5 ఎందనిజ్ ఇహిజ, దేవుణు యేసుప్రబుజ్నె ఆవిండ, వన్ని దూతారిజ్ ఎయెరిజ్బా ఎసెజ్బా వెహ్ఎతాన్, “నీను నా మర్రిన్. నేండ్రు నానె నీ బుబ్బు ఆత మన”,\* ఇజి. మరి, దేవుణు దూతారిజ్ ఎయెరిజ్బా ఎసెజ్బా వెహ్ఎతాన్”, నానె వన్ని బుబ్బు ఆన. వాండ్రె నా మరిన్ ఆనాన్లె”,\* ఇజి.
- 6 మరి, దేవుణు వన్ని లోల్సుర్ కొణెడిజ్ యా లోకమ్దు తపిసిని వలె, వెప్పినాన్, “దేవుణు దూతార్ విజెరె వన్నిజ్ పొగిడిజి మాడిస్టెజ్వలె”,\* ఇజి.
- 7 దూతార్ వందెజ్ వెప్పినివలె, వాండ్రు ఈహు వెప్పినాన్, “గాలి లెకెండె వన్ని దూతారిజ్ తయార్ కిజినాన్, కసిస్సి సిను లెకెండె, వన్ని పణి మణిసిరిజ్ తయార్ కిజినాన్”,\* ఇజి.
- 8 గాని వన్ని మరిన్ వందిజ్ ఈహు వెప్పినాన్, “ఓ దేవుణు, నీను బస్సి సిమాసనం అంతు సిల్లెండ ఎల్లాకలం మంజినాద్. నీను నీతి నిజాయితీదాన్ రాజు వజి ఏలుబడికి కిని.
- 9 నీను నిజమాతి దనిజ్ ప్రేమిస్తి మని. సెఇ దనిజ్ దూసిస్తి మని. అందెజె, నీ దేవుణు ఆతి దేవుణు నిజి ఎర్రిసి సర్ద అని గొప్ప గనం సితాన్. యాక నీ జత మని వరిజ్ సీతి దన్నిజ్ ఇంక నండొ గొప్ప పెరిక”,\* ఇజి, దేవుణు మరిన్ వందిజ్ వెప్పినాన్.
- 10 వాండ్రు మరి వెప్పినాన్, “ఓ ప్రబువా, లోకం పుటిన్ఎండ ముజాలె, యా లోకమ్దిజ్ పునాది ఇడ్డికి నీనె. ఆగాసం తయార్ కితికి నీనె.
- 11 అయాకెజ్ విజు నాసనం ఆనె. గాని నీను మంజిని. పాత పణిదిజ్ రెఎండ పడాఱియిక ఆనిలెకెండె అయాకెజ్ విజు పణిదిజ్ రెఎండ పడాఱియికెజ్ ఆనె.
- 12 పంనె మడత కినిలెకెండె, నీను వన్కాజ్ మడత కిని. పాత మారిసిని లెకెండె, వన్కాజ్ మారిసిని. గాని నీను ఎలాకాలం ఉండ్రె లెకెండె మంజిని. నీను ఎసెజ్బా డొక్ర ఆఇ”,\* ఇజి.
- 13 దేవుణు వన్ని దూతార్ ఎయెరిజ్బా ఎసెజ్బా వెహ్ఎతాన్, “నాను నీ పగాతి వరిజ్ నీ పాదమ్క అడిగి ఇడ్డిదాక, నీను నా ఉణెర్ పడెకాద్ మసి మన్అ”,\* ఇజి.
- 14 అహిజ, దూతార్ ఎయెర్? వారు విజెరె దేవుణుదిజ్ సేవ కిని ఆత్మెజ్నె. దేవుణు రక్సిసిని వరిజ్ సాయం కిదెజ్, వాండ్రు పొక్తికారె.

## 2

యేసు రక్సిస్నాన్ ఇని నిజమాతి పెరి సజతి నెక్సిపొక్ఎండ జాగర్త వెండ్రెజ్.

- 1 అందెజె మాటు వెహిమని నిజమాతి సజతిజ్, మరి నండొ జాగర్తదాన్ వెండ్రెజ్ వలె. ఎందనిజ్ ఇహిజ, దని బాణిజ్ దూరం ఆవిండ మంజిని వందిజె.
- 2 దేవుణు దూతారిజ్ వాండ్రు వెహ్పిన్తి మాటెజ్, నిజం ఇజి రుజుప్ ఆత మనాద్. అయా మాటెజ్ తప్పికాన్, లొజిఇకాన్ ఎయెన్ ఆతిజ్బా, తగితి సిక్కు వన్నిజ్ దొహ్క మనాద్.
- 3 అహిజ, దేవుణు లోకురిజ్ సిక్కుదాన్ ఎలాగ గెల్పిస్టెజ్ ఇజి వెప్పిని ముకెలమాతి బోద మాటు నమ్మిదెజ్ కెఇతిజ, అయా సిక్కుదాన్ ఎలాగ తపై ఆదెజ్ అట్నాట్? గెల్పిస్సి వందిజ్ మని యా బోద ప్రబునె తొలిత వెహ్హాన్. వాండ్రు వెహ్హికెజ్ వెహికార్, అయాక నిజం ఇజి మజి రుజుప్ కిత్తార్.
- 4 మరి, దేవుణుబా విజు రకమ్కాణి సత్తుమని పణిజ్, గొప్ప బమ్మాని పణిజ్ కిజి రక్కుణ వందిజ్ వెహ్హిక నిజం ఇజి రుజుప్ కిత్తాన్. వన్నిజ్ ఇస్టం ఆతివజ, దేవుణు ఆత్మెజ్ సీబాజి సీజి దేవుణు రుజుప్ కిత్తాన్.

యేసుప్రబునె లోకురిజ్ రక్సిస్సికాన్.

\* 1:5 1:5 క్రిస్త 2:7. \* 1:5 1:5 1:5ము 7:14; 1:5నరు 17:13. \* 1:6 1:6 ద్విత్తి 32:43. \* 1:7 1:7 క్రిస్త 104:4. \* 1:9 1:9 క్రిస్త 45:6,7. \* 1:12 1:12 క్రిస్త 102:25-27. \* 1:13 1:13 క్రిస్త 110:1.



- 5 వాజిని కాలమ్ది లోకం ఏలుబడిః కిదెజ్ దేవుణు, దూతారిజ్ ఒవజెవ్ ఎతాన్. పరలోకం వందిజె మాటు వర్గిజినాట్.
- 6 గాని దేవుణు మాటుదు ఎంబెనో ఎయెండ్రొ డటిసి ఈహు వెప్పినాన్, “ఓ దేవుణు, నీను ఎత్తు కిదెజ్ లోకు ఏపటిదికాన్? నీను బాగ సుడెడెజ్ లోకు ఏపటిదికాన్?”
- 7 నీను దూతారిజ్ ఇంక వన్నిజ్ సణెం ఇజ్రికాన్ కితి. నీను వన్నిజ్ పెరికాన్ కితి. గవ్ రవమ్దిజ్ తగ్గికాన్ లెకెండ్ కితి.
- 8 విజు వన్కాజ్ ముస్సు వన్నిజ్ అతికారం సితి\* ✱. లోకురిజ్ విజు వన్కాజ్ ముస్సు దేవుణు అతికారం సితి”, ఇజి వెప్పినాన్. ఇహిజు, విజు వన్కాజ్ ముస్సు అతికారం వన్నిజ్ మనాద్. గాని ఏలు, లోకుర్ విజు వన్కాజ్ ముస్సు అతికారం కిజినిక తొవట్.
- 9 గాని ఏలు, యేసుజ్ గొప్ప గనమ్దాన్, గొప్ప గవ్ రవమ్దాన్ దేవుణు పెరికాన్ కితిక మాటు సుడెఃజినాట్. ఎందనిజ్ ఇహిజు, వాండ్రు నండో బాదెజ్ ఓరిసి సాతాన్. వన్నిజ్ దూతారిజ్ ఇంక సణెం దేవుణు ఇజ్రికాన్ కిత్తాన్. ఎందనిజ్ ఇహిజు, వాండ్రు యా లెకెండ్ లోకుర్ విజెరి వందిజ్ సాదెజ్. యా లెకెండ్, దేవుణు దయా దర్మం కిత్తాన్.
- 10 విజు, దేవుణు తయార్ కిత్తాన్. విజు వన్నివందిజె తయార్ కిత్తాన్. యేసుప్రబు బాదెజ్ ఓరిసి సాజిని దనితాన్ దేవుణు వన్నిజ్ పూర్తి కిజినాన్. వాండ్రు పూర్తి ఆతికాన్ ఆతాన్. అయ లెకెండ్ యేసుజ్ పూర్తి కిజినిక తగ్గికాదె. ఎందనిజ్ ఇహిజు, నండో కొడెఃరిజ్ వాండ్రు ఎలాకాలం దేవుణు వెట బత్కిని బత్కుదు నడిఃపిస్తెజ్. యేసునె వరిజ్ రక్సణదు నడిఃపిస్సికాన్.
- 11 వాండ్రె లోకురిజ్ దేవుణు వందిజ్ కేట ఆతి వరి లెకెండ్ కిజినాన్. వన్నిజ్ని వాండ్రు దేవుణు వందిజ్ కేట కిత్తి లోకురిజ్, బుబ్బు ఒరెండ్రె. అందెజె వరిజ్ తంబెరిజు ఇజి కూకైజ్ యేసు సిగు ఆవన్.
- 12 వాండ్రు దేవుణుదిజ్ వెప్పినాన్, “నీ వందిజ్ నాను నా తంబెరిజు వెహ్పా, నీ లోకుర్ కూడఃనిబాన్, నాను నిజి పొగిడిఃన” ✱ ఇజి.
- 13 మరి వాండ్రు వెప్పినాన్, “నాను వన్ని ముస్సు నా నమకం ఇడ్చు” ✱ ఇజి. మరి బా వెప్పినాన్, “ఇదిలో, నానుని దేవుణు నజి సితి కొడెఃర్”, ✱ ఇజి.
- 14 దేవుణు కొడెఃర్ నలని, కండదాన్ తయార్ ఆతి లోకుర్నె. అందెజె యేసుప్రబుబా నలని, కండదాన్ తయార్ ఆతి లోకు వజ ఆతాన్. ఎందనిజ్ లోకు ఆతాన్ ఇహిజు, ఒరెన్ లోకు వజనె సాదెజ్ అట్నాన్. వాండ్రు సాజినె, సావు ముస్సు అతికారం మని సయ్తానుజ్ సిల్లెండ కిదెజ్ అట్నాన్.
- 15 అయా లెకెండ్, సావుదిజ్ తియెల్ ఆజి, వరి బత్కు విజు సావు తియెల్దిజ్ అడిఃగి మని విజెరిజ్ డిఃన్ పిస్తెజ్ అట్నాన్.
- 16 నిజమె, వాండ్రు దూతారిజ్ సాయం కిఎన్. గాని అబ్రాహము\* తెగ్గాది వరిజ్ సాయం కిజినాన్.
- 17 దిన్ని వందిజ్, వాండ్రు ఎల్లగాతిజ్ బా వన్ని తంబెరిజు లెకెండ్ ఆదెజ్ వలె. ఎందనిజ్ ఇహిజు, వాండ్రు నండో కనికారం మని, నమ్మిదెజ్ తగ్గి పెరి పుజెరి ఇజి, దేవుణుదిజ్ సేవ కిదెజ్ మరి, లోకురి పాపమ్క వందిజ్ పూజ కిదెజ్.
- 18 వాండ్రె పరిసెజ్ కిబె ఆజి, బాదెజ్ ఆతాన్. అందెజె పరిసెజ్ కిబె అని వరిజ్ సాయం కిదెజ్ అట్నాన్.

### 3

యేసు మోసె ముస్సు పెరికాన్.

- 1 అందెజె దేవుణు వందిజ్ కేట ఆతి, దేవుణు కూకె ఆతి తంబెరిజాండె, యేసుప్రబుజ్ ఎత్తు కిదు. వాండ్రె, దేవుణు పొక్తి అపొస్తుడుః ఇజి, విజెరి పుజెరిజు ముస్సు పెరి పుజెరి ఇజి, మాటు నమ్మిజి ఒప్పకొడిఃజినాట్.
- 2 దేవుణు కుటుమ్ది వరిజ్ విజెరిజ్ మోసె నమ్మకమ్దాన్ సేవ కితి లెకెండ్, వీండ్రుబా వన్నిజ్ పణి ఒవజెప్పి దేవుణుదిజ్ నమ్మకమ్దాన్ సేవ కిత్తాన్.
- 3 ఉండ్రీ ఇల్లుదిజ్ ఇంక ఇల్లు తొహిస్తి వన్నిజె గొప్ప గనం వానాద్. అయాలెకెండ్, మోసె ఇంక యేసునె గొప్ప గనమ్దిజ్ తగ్గికాన్.
- 4 నిజమె, విజు ఇల్కుబా, ఎయెండ్రొ ఒరెన్ తొహ్నాన్. గాని విజు తొహ్నికాన్ దేవుణునె.
- 5 దేవుణు కుటుమ్ది వరిజ్ విజెరిజ్, ఒరెన్ సేవమపణిమణిని వజ మోసె నమ్మిదెజ్ తగ్గికాన్ ఆతాన్. వాని కాలమ్దు దేవుణు వెహ్టాజ్ మనికెజ్ వాండ్రు వెహ్టాన్.
- 6 గాని దేవుణు కుటుమ్ది వరి ముస్సు అతికారం మని మరిన్ వజ, క్రీస్తు నమ్మిదెజ్ తగ్గికాన్. మాటు దయ్ రమ్దానె నిల్సి, మాటు ఎద్రు సుడెఃజిని ఆసదిజ్ డిఃన్ ఎండ గటిజు అనినె మహిజు, మాటు వన్ని కుటుమ్దికాట్.

✱ 2:8 2:8 కీర్తన 8:4-6. ✱ 2:12 2:12 కీర్తన 22:22. ✱ 2:13 2:13 యెసయ 8:17. ✱ 2:13 2:13 యెసయ 8:18. \* 2:16 2:16 అబ్రహము తెగతికార్ ఇజి వెప్పినిక దేవుణు లోకుర్ వందిజె.

నమ్మిఇతి వందిజ్ సారిసి సారిసి వెప్పొనిక.

7-8 అందెజె, దేవుణు ఆత్మ ఈహు వెప్పొని లెకెండ, “నేండ్రు మీరు దేవుణు వెప్పొనిక వెహిజ, అయా దినమ్దు బీడిమ్ బూమిదు దేవుణుదిజ్ లోజిదెజ్ కెఇత్తి వలె, వన్నిజ్ పరిస కితివలె, మీ మన్నుజ్ గర్త ఆతి లెకెండ గర్త కిమాట్.

9 అబె, నాల్పయి పంటెజ్ నాను కితి గొప్ప బమ్మ ఆతి పణిజ్ నుడఃతిజ్బా, మీ అనిగొగొర్ నజి పరిస కిజి నజి లోజిదెజ్ కెవెతార్.

10 అందెజె నాను అయా తరమ్ది లోకుర్ వెట కోపం ఆతానె వెప్తా. “ఎస్తివలెబా వరి మన్ను నా బాణిజ్ దూరం ఆజినాద్, నాను వెప్పొనికెజ్ వారు వెన్ఎర్”, ఇజి.

11 అందెజె నాను నండో కోపం ఆజి ఉండ్రీ ఒట్టు కిత, ‘వారు ఎసెజ్బా నా డగ్రు వాజి నా వెట రోమ్బెఎర్లె’, ✱ ఇజి.

12 తంబెరిజాండె, మీ లోఇ ఎయెన్ వన్నిజ్బా, బమ్మిజిని దేవుణు బాణిజ్ దూరం కిబిన్ని నమకం సిలి, సెఇ మన్ను మన్ఎండ జాగర్త నుడఃదు.

13 గాని, విజు దినమ్కాజ్ మీరు ఒరెన్ మరి ఒరెన్ వన్నిజ్ బుద్ది వెప్పొ, ఆదరిసి మండ్రెజ్ వలె. ‘నేండ్రు’ ఇజి వెప్పొ దినం విజు, అయాలెకెండ కిజి మండ్రెజ్ వలె. ఎందనిజ్ ఇహిజ, మీ లోఇ ఎయెన్బా పాపమ్దాన్ మొసెం ఆజి, మన్ను గటి ఆవండ మంజిని వందిజ్ ఆదరిసి మండ్రెజ్ వలె.

14 మాటు, క్రీస్తుజ్ తొలిత నమకం ఇట్టివలె వన్నిజ్ నమ్మిత్తి లెకెండ, ఆకర్దాక డటం నమకమ్దాన్ మహిజనె, మాటు క్రీస్తు వెట జత కూడితి మనికాట్.

15 దేవుణు మాటదు ముజాలె వెప్పొని లెకెండ, “నేండ్రు, మీరు దేవుణు వెప్పొనిక వెహిజ, దేవుణుదిజ్ లోజిదెజ్ కెఇత్తి వలె మీ మన్ను గర్త ఆతిలెకెండ గర్త కిమాట్” ✱.

16 దేవుణు వెప్పొనిక వెంజి, వన్నిజ్ లోజిదెజ్ కెఇతికార్ ఎయెర్? ఎయెర్ ఇహిజ, అయ్గుప్పు దేసెమ్దాన్ మోసె డిసిసి, నడిఃపిసి తతి లోకుర్ విజెరె గదె.

17 ఎయెర్ వెట దేవుణు నలపయ్ పంటెజ్ కోపం దాన్మహాన్? పాపం కిజి, బీడిమ్ బూమిదు సాతి వరివెట గదె కోపమ్దాన్ మహాన్.

18 “వారు ఎసెజ్బా నా డగ్రు వాజి నా వెట రోమ్బెఎర్లె”, ఇజి దేవుణు ప్రమానం కితివలె ఎయెర్ వందిజ్ వెప్తాన్? వాండ్రు వెప్తాకెజ్ వెన్ఇతి వరి వందిజ్ గదె వెప్తాన్.

19 అందెజె, వారు నమ్మిఇతిజ్నె, దేవుణు డగ్రు సొన్ని రోమ్బిదెజ్ అట్ఎతార్ ఇజి మాటు నెస్సాట్.

## 4

దేవుణు లోకురిజ్ రోమ్బిదెజ్ సిత మనాన్

1 దేవుణు డగ్రు సొన్ని వన్ని వెట రోమ్బిదెజ్ అట్నార్లె ఇజి వాండ్రు కితి ఒట్టు ఏలుబా మనాద్. అందెజె, మీ లోఇ ఎయెన్ వన్నిజ్బా అయా ఒట్టు కితిక తప్పి సొన్ఎండ మండ్రెజ్, మాటు జాగర్త మంజినాట్.

2 ఎందనిజ్ ఇహిజ, బీడిమ్ బూమిదు నడిఃతికార్ వెహిలెకెండెనె మాటుబా నువార్త వెహా మనాట్. గాని వారు వెహి మని దేవుణు మాట, వరిజ్ ఎందనిజ్ పణిదిజ్ రెవెతార్. ఎందనిజ్ ఇహిజ, వారు అయా మాట నమ్మిఎతార్.

3 ఏలు అయాక నమ్మిత్తి మాటు, దేవుణు డగ్రు సొన్ని వన్నివెట రోమ్బిజినాట్. యాక, వాండ్రు వెప్తా లెకెండెనె మనాద్. “అందెజె, నాను నండో కోపం ఆజి ఉండ్రీ ప్రమానం కిత. ‘వారు ఎసెజ్బా నా డగ్రు వాజి రోమ్బెఎర్లె”, ఇజి. దేవుణు లోకం తయార్ కితి వలెహాన్ అసి, వన్ని డగ్రు సొన్ని మాటు వన్నివెట రోమ్బిదెజ్ వాండ్రు మా వందిజ్ తయార్ కితండ్రె మనాన్. గాని వాండ్రు ఆహె వెప్తాన్.

4 ఎందనిజ్ ఇహిజ, దేవుణు మాటదు ఎంబెనో ఏడు దినం వందిజ్ వెప్పొనాద్. “దేవుణు విజు పణిజ్ పూర్తి కితండ్రె, ఏడు దినమ్దు రొంబితాన్”, ఇజి.

5 మరి, ముజాలె వెప్పొని మాటదు వెప్పొనాద్, “వారు ఎసెజ్బా నా డగ్రు వాజి రోమ్బెఎర్లె”, ✱ ఇజి.

6 ముజాలె నువార్త వెహి మనికార్, దేవుణు డగ్రు సొన్ని వన్నివెట రోమ్బెఎర్లె. ఎందనిజ్ ఇహిజ, వారు నమ్మిఎతార్. గాని, దేవుణు డగ్రు సొన్ని వన్ని వెట రోమ్బెజ్ మహి సెగొండార్ మనార్.

7 అందెజె, దేవుణు, వన్ని డగ్రు సొన్ని వన్ని వెట రోమ్బిదెజ్ మరి ఉండ్రీ రోజు ఇట్టాండ్రె, ‘నేండ్రు’, ఇజి కూక్తాన్, దిన్ని వందిజ్, నండో కాలం వెనుక దావీదు వెట వెహిపిస్తి వలె, ముజాలె వెప్తా అయా మాటనె వెహిపిస్తాన్. “నేండ్రు మీరు దేవుణు వెప్పొనిక వెహిజ, మీ మన్ను గర్త కిమాట్”, ✱ ఇజి.

✱ 3:11 3:11 కీర్తన 95:7-11. ✱ 3:15 3:15 కీర్తన 95:7,8. ✱ 4:5 4:5 కీర్తన 95:11. ✱ 4:7 4:7 కీర్తన 95:7,8.

8 దేవుణు డగ్గు సొన్ని వన్నివెట రోమ్బిదెజ్, యెహోసువ వరిజ్ నడిపిసి మంజిని కిహిజ, మరి ఉండ్రె రోమ్ని దినం వందిజ్ దేవుణు వెనుక వెహ్ఎండ మహాన్ మరి.

9 అందెజె దేవుణు ఏడు దినమ్దు రోమ్బితిలెకెండ, లోకుర్బా రోమ్బిదెజ్ ఇజి వాండ్రు సిత మనాన్.

10 ఎందనిజ్ ఇహిజ, దేవుణు డగ్గు సొన్సి వన్ని వెట రోమ్ని ఎయెన్బా, దేవుణు వన్ని పణిజ్ వీస్తాండ్రె రోమ్బితి లెకెండ, వాండ్రుబా వన్ని పణిజ్ వీస్తాండ్రె రోమ్బిజినాన్.

11 అందెజె, దేవుణు డగ్గు సొన్ని వన్నివెట రోమ్బిదెజ్ మాటు నండో కప్పబడిజినాట్. ఎందనిజ్ ఇహిజ, ఇస్త్రాయేలు లోకుర్ దేవుణుదిజ్ లోజిఎండ అర్తిలెకెండ ఎయెన్బా అర్ఎండ మండ్రెజ్.

12 ఎందనిజ్ ఇహిజ, దేవుణు మాట పాణం మనిక. నండో సత్తు మనిక. రుండి దరోట్ తెవుగు మని ఎలాగ మర్తి కుర్దదిజ్ ఇంక ఒదె తెవుగు మనిక. దేవుణు మాట, లోఇ డుగ్జి మన్సుదిజ్ గర్బుమ్దిజ్ ఎర్లిసి డూగ్గు సొనాద్. అత్కుజ, ముల్వెజి ఎర్లిసినాద్. ఆలోసనమ్కాజ్, మన్సుదు మని ఉదెసమ్కాజ్ పరిక్స కినాద్.

13 తయార్ ఆతి ఇనికబా దేవుణు బాణిజ్ డపె ఆదెజ్ అట్ఉ. విజు వన్ని కణకెజ ఎద్రు టెటాజ్ తోర్జినె, డాజ్ఎండ తోర్జినె వన్నిజె, మాటు కితి విజు వన్కా వందిజ్ లెక ఒపజెపైజె మనాద్.

**యేసునె విజు పుజెరిజ మున్సు గొప్ప పెరి పుజెరి.**

14 అందెజె, మాటు డటం వెహ్నిని నమకం డిస్ఎండ అసి మంజినాట్. ఎందనిజ్ ఇహిజ, ఆగాసం డాట్టి, దేవుణు డగ్గు సొహి విజెరి పుజెరిజ మున్సు మని పెరి పుజెరి ఒరెన్ మజి మనాన్. వాండ్రు దేవుణు మరిసి ఆతి యేసు.

15 మా విజెరి పుజెరిజ మున్సు మని పెరి పుజెరి, మజి మని తకుజ విజు నెన్ఇకాన్ ఆఎన్. గాని మజి వాజిని విజు రకమ్కాణి పరిసెజ్, వన్నిజ్బా వాతె. గాని వాండ్రు పాపం కిఎతాన్.

16 అందెజె నండో దయా దర్మం తోరిసిని దేవుణు బస్సి సిమసనం డగ్గు మాటు తియెల్ సిల్లెండ దయ్ రమ్దాన్ సొనాట్. అబె వన్ని కనికారం మజి దోహనాద్. మజి అవ్సరం మనివలె మజి సాయం కిదెజ్ వన్ని దయా దర్మం దోహనాద్.

## 5

1 విజెరి పుజెరిజ మున్సు మని పెరి పుజెరిజబా వరి లోకుర్ నడిమిహానె దేవుణు ఎర్లిస్తాండ్రె, లోకుర్ వందిజ్ దేవుణుదిజ్ సేవ కిదెజ్, వాండ్రు ఏర్పాటు కినాన్. ఎందనిజ్ ఇహిజ, వారు లోకురి దేవుణుదిజ్ సీదెజ్.

2 విజెరి పుజెరిజ మున్సు మని పెరి పూజెరి, నెన్ఎండ తప్పి కినివరిజ్, సరి తప్పి సొని వరిజ్ సారలి తోర్స్టెజ్ అట్నాన్. ఎందనిజ్ ఇహిజ, వరిజ్ మని తకుజ్ విన్నిజ్బా మన్నె.

3 దిన్ని వందిజె, లోకురి పాపమ్క వందిజె ఆఎండ, వన్ని సొంత పాపమ్క వందిజ్బా, వాండ్రు పూజెజ్ సీదెజ్ మనాద్.

4 ఎయెన్బా వన్నిజ్ వాండ్రె, విజు పుజెరిజ మున్సు మని పెరి పూజెరి ఇని పెరి గనం తపె ఆఎన్. అహరోసుజ్ విజెరి పుజెరిజ మున్సు మని పెరి పూజెరి ఇజి దేవుణు ఏర్పాటు కితి లెకెండ, దేవుణునె వన్నిజ్ ఏర్పాటు కిదెజ్ వలె.

5 అయాలెకెండ, క్రీస్తుబా వన్నిజ్ వాండ్రె విజెరి పుజెరిజ మున్సు మని పెరి పుజెరి ఇని యా పెరి గనం తపె ఆతాన్. గాని విజెరి పుజెరిజ మున్సు మని పెరి పుజెరి ఇజి వన్నిజ్ ఏర్పాటు కితి దేవుణు వన్నిజ్ వెహ్హాన్. “నీను నా మరిన్. నేండ్రు నాను నీ బుబ్బు ఆత మన”, ఇజి.

6 మరి, ఎంబెనోబా దేవుణు వెహ్సినాన్, “మెల్కిసెదెక్ మహి లెకెండ, నీను ఎల్లకాలం మని ఒరెన్ పుజెరి”, ఇజి.

7 యేసు బూమిదు మహివలె, వన్నిజ్ సావుదాన్ తప్పిస్తెజ్ అట్టి దేవుణుదిజ్ డటం అడఃబాజి, కణెర్ వాక్సి పార్దనం కిత్తాన్. వన్ని మొరొ దేవుణు వెహ్న్ ఎందనిజ్ ఇహిజ వాండ్రు తియెల్దాన్ తగె ఆత మహాన్.

8 వాండ్రు దేవుణు మరిసి ఆతిజ్బా, వన్నిజ్ వాతి స్రమెజాణిజ్ దేవుణుదిజ్ లోజిదెజ్ వాండ్రు నెస్తాన్.

9 దేవుణు వన్నిజ్ పూర్తి కితివలె, వన్నిజ్ లోజిని వరిజ్ విజెరిజ్ రక్సిస్సికాన్ ఆతాన్.

10 మెల్కిసెదెక్ మహి లెకెండ, విజెరి పుజెరిజ మున్సు మని పెరి పుజెరి ఇజి దేవుణు వన్నిజ్ ఏర్పాటు కిత్తాన్.

**నమకమ్దాన్ అర్ఎండ జాగర్ల సుడఃదెజ్.**

11 దిన్ని వందిజ్ మరి నండో వెహ్హెజ్ మజి మన్నె గాని, మీరు నిపాతినె అర్దం కిజినిదెర్. అందెజె నండో వెహ్హెజ్ కప్పం ఆజినాద్.

12 మీరు దేవుణుదిజ్ నమ్మిజి నండో పంటజ్ ఆజినాద్. ఏలు మహి వరిజ్ బోదెస్టెజ్ మనికిదెరి మీరు. గాని, దేవుణు మాటదు తొలిత నెస్టెజ్ మని నిజమాతి సజతిజ్ మరిబా నెస్సిస్టెజ్ ఎయెన్బా నెన్పిస్సాన్ మండ్రెజ్ వలె. పాలు ఉణిజిని లేత కొడెం లెకెండ మీరు మనిదెర్. బోజనం ఉండెజ్ అట్ఇకిదెర్.

13 పాలు ఉణికాన్ ఎయెన్బా లేత కొడెంనె. నిజమాతికెజ్ ఇనికెజ్ ఇజి నెన్పిసిని బోద నెన్ఎన్.

14 గాని పెరి వరిజె బోజనం మనాద్. నెగ్గికెజ్, సెఇకెజ్ తేడ నెసి, నెగ్గికెజ్ కిదెజ్ నెస్తిమనికారె వారు.

## 6

1 అందెజె, క్రీస్తు వందిజ్ తొలిత నెస్తి మహి బోదెజె నెసినె మన్ఇండ, మరి పెరి మాటెజ్బా నెసి పిరినాట్. సావుదు నడిఃపిసిని సెఇ పణిజ్ ఒప్పుకొడిఃజి డిఃసి సీజి, దేవుణు ముస్సు, నమకం ఇడఃదెజ్ ఇజి మరి మరి వెప్పినె మన్మాట్.

2 బాప్తినం లాగె ఆని దని వందిజ్, కికు ఇడ్డి దని వందిజ్, లోకుర్ సావుదాన్ మర్జి నిజ్ని దని వందిజ్, ఆకార్దు దేవుణు సీని లిర్పు వందిజ్ మరి మరి వెప్పినె మన్మాట్.

3 దేవుణుదిజ్ ఇస్టం ఇహిజ, మరి లావు నెసి పిరినాట్.

4-6 ఉండ్రీ కాలమ్దు దేవుణు జాయ్దు మహికార్, పరలోకమ్ది ఇనాయం వందిజ్ బాగ నెస్తి మనికార్, దేవుణు ఆత్మ వెట కూడిఃతికార్, దేవుణు మాట నెగ్గిక ఇజి నెస్తికార్ క్రీస్తు మర్జి వానివలె నమ్మిత్తి లోకురిజ్ నస్తివలె మంజిని పెరి సత్తు వందిజ్ నెస్తికార్, వారు దేవుణు బాణిజ్ దూరం ఆతిజ, మరి పాపమ్కు ఒప్పుకొడిఃజిని వరిజ్ మర్జి తతెజ్ అట్ఎద్. ఎందనిజ్ ఇహిజ, వారు దేవుణు మరిసిజ్ మరి ఉండ్రీ సుటుబా సిలువాదు కుటిజాణిజ్ డెయ్జి, విజెరె ఎద్రు సిగు కిబిస్సార్.

7 నిన్ని వరిజ్ పణిదిజ్ రెఇ బూమిదిజ్, పొలిస్తెజ్ ఆనాద్. ఎందనిజ్ ఇహిజ, ఎసెజ్ ఎసెజ్ అరసిని పిరుదాన్ ఊద్ది బూమిదు, పంట పండిసిని వన్నిజ్ పణిదిజ్ వానిలెకెండ్ బూమి పంట పండిసి సీనాద్. అయా బూమిదిజ్ దేవుణు దీవిస్సాన్.

8 గాని లటెజ్ సాప్పుజ్ పండిసిని బూమి పణిదిజ్ రెఎద్. దేవుణు దనిజ్ తప్ఎండ సాయిపు సీనాన్ కడెవేరిదు సిసుదాన్ నాసనం మనాద్.

9 గాని తంబెరిజాండె, మాపు యా లెకెండ్ వెప్టిజ్బా, మీరు అయాలెకెండ్ ఆఇదెర్, ఇజి మాపు పూర్తి నమ్మిజినాప్. క్రీస్తు ముస్సు, నమకం ఇడఃజి రక్కణదు వాతి లోకుర్ కిని నెగ్గి పణిజె, మీరుబా కిజినిదెర్ ఇజి మాపు పూర్తి నెసినాప్.

10 దేవుణు అనెయం కినికాన్ ఆఎన్. మీరు వన్ని వందిజ్ కితి పణిజ్, వన్ని లోకురిజ్ సాయం కిజి, మరి మరి సాయం కిజి వన్నిజ్ తోరిసిని ప్రేమ వాండ్రు పోస్ఎన్.

11 మీ లోఇ విజిదెరెబా, యా లెకెండ్ కడెవేరిదాక మండ్రెజ్ ఇజి మాపు ఆస ఆజినాప్. ఎందనిజ్ ఇహిజ, మీరు ఆస ఆజినికెజ్ విజు తప్ఎండ పూర్తి ఆదెజ్

12 మీరు బండెజ్ ఆదెజ్ ఇజి మాపు కోరిఎప్. గాని దేవుణు ముస్సు, మని నమ్మకమ్దాన్, కష్టమ్కు ఓరిసినిదనితాన్ దేవుణు సీన ఇజి ఒట్టు కితికెజ్ దోహాక్కి వరిలెకెండ్ మీరు ఆదెజ్ ఇజి కోరిజినాప్.

### దేవుణు అబ్రాహముజ్ కితి ఒట్టు

13 దేవుణు అబ్రాహముజ్ నెగ్గికెజ్ కిన ఇజి ఒట్టు కిత్తాన్. కితివలె వన్ని ముస్సు, ఎయెన్బా పెరికాన్ సిలితిజ్, వాండ్రు వన్నిజె, తోడుః ఇడ్డెః ఆజి అబ్రాహముజ్ ఒట్టు కిత్తాన్.

14 వాండ్రు వెప్టాన్, “నాను నిజి తపెఎండ దీవిసి, నిజి నండొ తెగ్గది వరిజ్ సీన”, ✱ ఇజి.

15 అబ్రాహము ఓరిసి కాప్ కిజి మహాన్. అందెజె దేవుణు సీన ఇజి ఒట్టు కితిక వన్నిజ్ దోహాక్తాద్.

16 లోకుర్ ఒట్టు కినివలె వరిజ్ ఇంక పెరి వరిజ్, వాండ్రె నజి తోడుః ఇజి వెప్పి ఒట్టు కినార్. వరి నడిఃమి మని గొడుఃబెజ్ విజు ఉండ్రీ ఒట్టుదాన్ సార్లి ఆనె.

17 దేవుణు, వాండ్రు ఒట్టు కితిక దోహాక్తెజ్ అక్కు, మని వరిజ్, వన్ని ఉదెసం వాండ్రు కండెక్బా మారిస్ఎన్, ఇజి వరిజ్ టెటాజ్ నెన్పిసిని వందిజ్, వాండ్రు వన్నిజె తోడుః ఇడ్డెః ఆజి ఒట్టు కిత్తాన్.

18 అందెజె దేవుణు మజి వన్ని ఒట్టు సిత మనాన్. వన్నిజె తోడుః ఇడ్డెః ఆజి సిత మనాన్. యా రుండి సజలిజ్ మార్ఉ. ఎందనిజ్ ఇహిజ, దేవుణు అబద్దం వర్గిదెజ్ అట్ఎన్. అందెజె, దేవుణునె నా గతి ఇజి నమకం ఇడ్డి మజి, మా ఎద్రు ఇడ్డి మని ఆసదిజ్ డిఃస్ఎండ అస్టెజ్ దయ్రం మంజినాద్.

19 మా పాణం ఇతల్ అతాల్ కద్దిఎండ, నెగెండ నిల్తెజ్ యా ఎద్రు సూణి ఆసనె ఉండ్రీ కన్నె లెకెండ్ మనాద్. తెర వెన్యా, మని దేవుణు వందిజ్ ఒదె కేట ఆతి గదిదు అయాక ఒనాద్.

20 యేసు మా వందిజ్ మజి ఇంక ముజాలె అబె సాహాన్. మెల్కిసెదెకు మహివజ, వాండ్రు ఎలాకాలం ఒరెన్ విజెరె పుజెరిజ ముస్సు, మని పెరి పుజెరి ఆత మనాన్.

✱ 6:14 6:14 ఆది 22:17.

# 7

## పుజెరి ఆతి మెల్కిసెదెకు

1 యా మెల్కిసెదెక్ సాలెం పట్టుమ్ది రాజు. విజు దని ముస్కు ఆతికారం మని దేవుణు పుజెరి. నండొ రాజురి ముస్కు విదెం కిజి గెలసి, అబ్రాహము వన్ని ఇండ్రొ మరజి వాజి మహివలె, మెల్కిసెదెక్ వన్నిజ్ దసూల్ ఆతండ్రె, దీవిస్తాన్.

2 అయావలె అబ్రాహము, వాండ్రు ఉద్దం కిజి గెలసి దొహ్కొక్కి విజు వన్యాజ్ లొఇ మెల్కిసెదెకుజ్ దసంబాగం సితాన్. వన్ని పేరు తొలిత అర్దం ఇనిక ఇహిజ, నీతి నిజాయితిదాన్ ఏలుబడిః కిని రాజు. మరి ఉండ్రొ అర్దం ఇనిక ఇహిజ సమాదనమ్దాన్ ఏలుబడిః కిని రాజు ఇజి. ఎందనిజ్ ఇహిజ, వాండ్రు సాలెం పట్టుమ్ది రాజు. సాలెం ఇహిజ సమాదనం.

3 వన్ని అయ్సి అప్పొసి వందిజ్నో, వన్ని అనిగొగొర్ వందెజ్నో గుర్తు ఇనికెజ్ సిలు. వన్ని పుడుగు వందిజ్నో, పాపు వందిజ్నో తెలివద్. వాండ్రు దేవుణు మరిసి లెకెండ్ ఎల్లకాలం ఒరెన్ పుజెరి.

4 యా మెల్కిసెదెకు ఎసొ పెరికాన్ ఇజి ఎత్తు కిదు. దేవుణు ఏర్పాటు కితి లోకుర్ లొఇ గొప్ప పెరి అనిగొగొ ఆతి అబ్రాహము, విదెమ్దు గెలసి వన్నిజ్ దొహ్కొక్కి విజు వన్యాజ్ లొఇ వన్నిజ్ దసంబాగం సితాన్.

5 మోసె సీతి రూలు వజ, లేవి తెగ్గదు పుట్టి పుజెరిజు ఆతికార్, ఇస్తాయేలు లోకుర్ బాణిజ్ దసంబాగం లొసినార్. ఇహిజ వారు వరి సొంత లోకుర్ బాణిజ్ లొసినార్. యా పుజెరిజుబా, అబ్రాహము తెగ్గదు పుట్టికార్ ఆతిజ్బా వరి సొంత లోకుర్ బాణిజ్ దసంబాగం లొసినార్.

6 మెల్కిసెదెకు లేవి తెగ్గదు పుట్టికాన్ ఆఎన్. గాని వాండ్రు అబ్రాహము బాణిజ్ దసంబాగం లొస్తాండ్రె, దేవుణు సీతి ఒట్టుజ్ మని అబ్రాహముజ్, దీవిస్తాన్.

7 దీవిస్సికాండ్రె, దీవన లొసె ఆని వన్నిజ్ ఇంక పెరికాన్ ఇని మాట అనుమానం సిలికాదె.

8 యూదురి పుజెరిజు సుడఃతిజ, సాజిసానికారె దసంబాగం లొసినార్. గాని మెల్కిసెదెకుజ్ సుడఃతిజ, దసంబాగం లొసె ఆనికాన్ బత్కిజినాన్ ఇజినె దేవుణు మాట వెప్పినాద్.

9 అహిజ, దసంబాగం లొసిన లేవి తెగ్గదు పుట్టికార్, మెల్కిసెదెకుజ్ దసంబాగం సితార్. వరి అనిగొగొ ఆతి అబ్రాహము సిలిదనితాన్ వారు సితార్ ఇజి ఒరెన్ వన్నిజ్ వెహ్తాజ్బా ఆనాద్.

10 ఎందనిజ్ ఇహిజ, మెల్కిసెదెకు అబ్రాహముజ్ సుడఃతివలె, లేవి పుట్వెండ్రె. వాండ్రు అబ్రాహము పొటాద్నె నస్తవలె మహాన్.

## మెల్కిసెదెకు లెకెండ్ యేసు ఒరెన్ పుజెరి

11 దేవుణు మెసె వెట మజి రూలుజ్ సిత మనాన్. అయా రూలుజ్ వజ, లేవి తెగ్గదు పుట్టికార్ పుజెరిజు ఆదెజ్వలె. ఏలు, లేవి తెగ్గదు మని పుజెరిజు ఇహిజ ఆరోసు కుటుమ్దికార్ దేవుణు ఎత్తు కితి ఉపదేసమ్కు పూర్తి కిదెజ్ అట్టార్ ఇహిజ, మరి ఒరెన్ పుజెరి వాదెజ్ అవ్సరం సిలెతాద్ మరి. అహారోసు కుటుమ్దు మనికాన్ ఆవెండ, మెల్కిసెదెకు మహి లెకెండ్ ఒరెన్ వన్నిజ్ పొక్కెజ్ అవ్సరం సిలెద్.

12 పుజెరజు యా లెకెండ్ మారితిజ, మోసె సీతి రూలుజ్బా మారెదెజ్ వలె.

13 ఎయె వందిజ్ మాటు వెప్పినాటొ, వాండ్రు మరి ఉండ్రొ తెగ్గదు మనికాన్. అయా తెగ్గదు మనికార్ ఎయెర్బా పుజెరి వజ, మాలి పీటదు ముజాలె సేవ పణి కిఎర్. యా సజతిజ్, మా ప్రబు వందిజె వెహ్తా మన్నె.

14 వాండ్రు యూద తెగ్గదు పుట్టికాండ్రె ఇజి టెటాజ్ నెసినాట్. పుజెరిజు వందిజ్ మోసె వెహ్తావలె, యూద తెగ్గ వందిజ్ ఇనికబా వెహ్తాన్.

15 మెల్కిసెదెకు పుజెరి మహివజ, మరి ఒరెన్ పుజెరి వాత మనాన్. అందెజె, మాటు వెహ్తాక మరి ఒదె టెటాజ్ అర్దం ఆజినాద్.

16 లేవి తెగ్గదు మనికాండ్రె పుజెరి ఆదెజ్ ఇని రూలు వాండ్రు పూర్తి కిఎండ పుజెరి ఆతాన్. గాని నాసనం కిదెజ్ అట్ఇ, బత్కిజిని సత్తుదాన్నె పుజెరి ఆతాన్.

17 ఎందనిజ్ ఇహిజ “మెల్కిసెదెకు మని లెకెండ్, నీను ఎలాకాలం ఒరెన్ పుజెరి”,\* ఇజి దేవుణు మాటు క్రిస్తు వందిజ్ వెప్పినాద్.

18 అందెజె, పుజెరిజు వందిజ్ మని పడాఃయి రూలుదిజ్ విలువ సిలెద్. ఎందనిజ్ ఇహిజ దనిజ్ సత్తు సిలెతాద్. పణిదిజ్ రవెతాద్.

19 ఎందనిజ్ ఇహిజ, మోసె సీతి రూలుజ్, ఇని దనిజ్బా పూర్తి కిఉతె. ఏలు మాటు ఎద్రు సుడఃతిక మోసె సీతి రూలుజ్ కితి ఒటుదిజ్ ఇంక నెగెద్. అయా ఒట్టుదాన్ దేవుణు డగ్రు సొండ్రెజ్ అట్టాట్.

\* 7:17 7:17 కిర్న 110:4.

20 క్రీస్తు ఎలాకాలం మని ఒరెన్ పుజెరి ఇజి దేవుణు ఒట్టు కిత్తాన్. గాని మరి ఎమేణి పుజెరిజబా దేవుణు యా లెకెండ్ ఒట్టు కిఎత్తాన్.

21 దేవుణు యేసుజ్నె వెప్టాన్, “ప్రబు ఉండ్రీ ప్రమాణం కిత మనాన్. అయాక ఎసెజ్బా తవ్వెన్. ‘నీను ఎలాకాలం మని ఒరెన్ పుజెరి’”, ఇజి.

22 దేవుణు యా లెకెండ్ ఒట్టు కతాన్. అందెజె, యాక ఉండ్రీ నెగ్గి ఒపుమానం ఇజి తవ్వెండ నిజం కినికాన్ యేసునె.

23 పడాఃయి అలవాటు వజ నండొండొర్ పుజెరిజు మహార్. ఒరెన్ సాతిజ, మరి ఒరెన్ వన్ని పణి కినాన్.

24 గాని యేసు ఎలాకాలం మని ఒరెన్ పుజెరి. ఎందనిజ్ ఇహిజ, వాండ్రు ఎలాకాలం బత్తిజినాన్.

25 అందెజె వాండ్రు, ఏలు మరి ఎలాకాలం వన్ని వెట దేవుణు డగ్గు సొని వరిజ్ రక్సిస్తెజ్ వాండ్రు అట్టాన్. ఎందనిజ్ ఇహిజ, వరి వందిజ్ దేవుణుదిజ్ బతిమాల్దెజ్ వాండ్రు ఎల్లకాలం బత్తిజినాన్.

26 అందెజె, మా అవ్వసరమ్కు తిరిసిని విజు పుజెరిజ ముస్సు మని పెరి పుజెరి యేసునె. వాండ్రు ఇని పాపం సిలికాన్, నింద సిలికాన్, ఇని తపు సిలికాన్, పాపం కిని వరిబాణిజ్ కేట ఆతికాన్. వన్నిజె పరలోకమ్దు గొప్ప పెరి గవ్వరం సిత మనాన్.

27 మహి పెరి పుజెరిజు లెకెండ్, వాండ్రు రోజు పూజెజ్ సీదెజ్ అవ్వసరం సిల్లెద్. ముజాలె వన్ని పాపమ్క వందిజ్, వెనుక లోకురి పాపమ్క వందిజ్ పూజెజ్ సీదెజ్ అవ్వసరం సిల్లెద్. వన్నిజ్ వాండ్రె సిలువాదు ఒవజెప్పి వలె, వరి పాపమ్క వందిజ్, ఎలాకాలం వందిజ్ ఉండ్రీ సుటు పూజ సితాన్.

28 మోసె సిత రూలు వజ ఏర్పాటు ఆతి విజెరె పుజెరిజ ముస్సు మని పెరి పుజెరిజు పూర్తి ఆఇకార్. గాని మోసె సిత రూలుజ్ వెనుక, దేవుణు ఒట్టు కిత్తాన్. అయా ఒట్టు వజ మరిసి విజెరె పుజెరిజ ముస్సు మని పెరి పుజెరి ఇజి ఏర్పాటు ఆతాన్. దేవుణు వన్నిజ్ ఎలాకాలం పూర్తి ఆతికాన్ కిత్తాన్.

## 8

యేసునె పుజెరిజ ముస్సు మన్ని మా పెరి పుజెరి.

1 మాపు వెప్పిని సజతిజ లోఇ ముకెలమాతి మాట యాకదె. అయాక ఇనిక ఇవెహిజ పరలోకమ్దు గొప్ప పెరి దేవుణు బనిని సమాసనం ఉణెర్ పడఃకాదు, గొప్ప బస్తిమని ఒరెన్ విజెరె పుజెరిజ ముస్సు మని పెరి పుజెరి మజి మనాన్.

2 వాండ్రు దేవుణు వందిజ్ ఒదె కేట కితి గదిదు విజు పుజెరిజ ముస్సు మని పెరి పుజెరి వజ సేవ కిజినాన్. ఇహిజ, ప్రబునె తయార్ కిజి ఇడ్డి నిజమాతి గుడారమ్దు సేవ కిజినాన్. లోకుర్ తయార్ కితి గుడారమ్దు ఆవద్ సేవ కిజినిక.

3 విజెరె పుజెరిజ ముస్సు మని పెరి పుజెరిజుబా, నండొ రకమ్కాణి పూజెజ్ దేవుణుదిజ్ సీదెజ్ ఏర్పాటు ఆత మనార్. అందెజె, విజెరె పుజెరిజ ముస్సు మని యా పెరి పుజెరిబా ఇనికబా ఉండ్రీ పూజ సీదెజ్ వలె.

4 వాండ్రు యా లోకమ్దునె మంజినిక ఇహిజ వాండ్రు ఒరెన్ పుజెరిబా ఆతాన్మరి. ఎందనిజ్ ఇహిజ, మోసె సిత రూలుజ్ వజ పూజెజ్ సీని నండొ పుజెరిజు మనార్.

5 వారు సేవ కిజిని గుడారం, పరలోకమ్దు మని నిజమాతి గుడారమ్ది ఉండ్రీ రూపునె, నీడఃనె. నని బానె వారు సేవ కిజినార్. అందెజె, మోసె గుడారం తయార్ కిదెజ్ మొదొల్లిస్తెవలె దేవుణు డటం వెప్టాన్, “నిజి గొరొతు తొరిస్తె రూపు వజనె విజు తయార్ కిదెజ్ జాగ్రత సుడఃదెజ్వలె”, ఇజి.

6 గాని ఏలు, దేవుణుదిజ్ లోకుర్ నడిఃమి యేసు ఏర్పాటు కితి ఒపుమానమ్నె గొప్ప నెగ్గిక. అయాలెకెండె, మహి పుజెరిజ పణి ఇంక, యేసుజ్ దొహ్కొత్తి మని పుజెరి పణినె గొప్ప నెగ్గిక. ఎందనిజ్ ఇహిజ, నెగ్గి సజతిజ్ సీన ఇజి కితి ఒటుదిజ్ ఆదారం ఇడఃజినె యేసు అయా ఒపుమానం ఏర్పాటు కిత్తాన్.

7 మొదొహి ఒపుమానం, ఇని తపు సితక ఆనిక ఇహిజ, మరి ఉండ్రీ ఒపుమానమ్దిజ్ అవ్వసరం సిల్లెత్తాద్మరి.

8 గాని దేవుణు, లోకుర్ లోఇ తపు సుడఃతండ్రె, వరి తప్పుజ తొరిసి, వరిజ్ ఈహు వెప్టాన్, “ప్రబు వెప్పినాన్, ‘ఇస్త్రాయేలు లోకుర్ వెట, యూద తెగ్గాది వరి వెట నాను ఉండ్రీ కొత్త ఒపుమానం కిని కాలం వాజినాద్.

9 నాను వరి అనిసిరిజ్ అయ్గుప్ప దేసెమ్దాన్ వరి కియు అసి వెల్లి నడిఃపిస్తివలె వరివెట కితి ఒపుమానం లెకెండ్ ఆవద్ యా ఒపుమానం. నాను వరివెట కితి ఒపుమానం వారు తప్టార్. అందెజె, నాను వరిజ్ డిఃస్త సిత”, ఇజి ప్రబు వెప్పినాన్.

10 మరి ప్రబు వెప్పినాన్, ఇస్త్రాయేలు లోకుర్ వెట నాను కిని ఒపుమానం యాకదె. వాని దినమ్కాజ్ వెనుక, నాను నా రూలుజ్ వరి గబమ్దు ఇడ్డు. నాను వరి మన్సుదు అయాకెజ్ రాస్సు. నాను వరి దేవుణు ఆన. వారు నా లోకుర్ ఆనార్.

☆ 7:21 7:21 కీర్తన 110:4.

- 11 ఎయెర్బా వరి పడఃకది వరిజొ, వరి సొంత ఇండ్రొణి వరిజొ, 'మీరు ప్రబుజ్ నెస్తు, ఇజి నెన్పిన్ఎర్. ఎందనిజ్ ఇహిజ, వారు విజెరె నజి నెస్సార్. ఇజ్జివరి బాణిజ్ మొదొల్సీ, పెరివరిదాక నజి నెస్సార్.
- 12 నాను, వారు కితి సెఇకెజ్ సెమిస్తు. వరి పాపమ్కు నాను ఎసెజ్బా ఎత్తు కివ',\* ఇజి.
- 13 యా ఒప్పుమానమ్దిజ్, 'కొత్తక' ఇజి దేవుణు వెప్పి, మొదొహి ఒప్పుమానమ్దిజ్ పడాయ్క కిత్తాన్. పణిదిజ్ రఇ పడాయ్ ఒప్పుమానం బేగినె సిల్లెండ ఆనాద్.

## 9

### కొత్త ఒప్పుమానమ్ది విజేరె పుజేరిజ ముస్కు మన్ని పెరి పుజేరి

- 1 దేవుణుని వన్ని లోకుర్ నడిఃమి మహి మొదొహి ఒప్పుమానమ్దు, దేవుణుదిజ్ పొగ్డిఃజి మాడిఃసిని వందిజ్ రూలుజ్ మహె. యా బూమిదు దేవుణుదిజ్ పొగ్డిఃజి మాడిఃసైజ్ ఉండ్రీ గూడారమ్బా మహాద్.
- 2 ఉండ్రీ గుడారం తయార్ కిత మనాద్. దన్నిజ్ రుండి గదిజ్ మహె. మొదొహి గదిదు దీవ డండి ఉండ్రీ, బల్ల ఉండ్రీ, మరి దేవుణు ఎద్రు ఇడ్డి రొటెజ్ మహె. యా గదిదిజ్ దేవుణు వందిజ్ కేట ఆతి గది ఇనార్.
- 3 (యా రుండి గదిజ నడిఃమి అడ్డు వజ ఉండ్రీ తెర మనాద్) తెర వెనుక మన్ని గదిదిజ్ దేవుణు వందిజ్ ఒద్దె కేట ఆతి గది ఇనార్.
- 4 అబ్బె బజారమ్దాన్ తయార్ కితి దూపం సుర్ని మాలి పెటె, ఒప్పుమానం కితిక ఇడ్డిమని మందసం మన్నె. మందసమ్దిజ్, లొఇ వెల్లి సుటులం బజారం పూత రాస్త మనాద్. యా మందసం లొఇ బజారమ్దాన్ తయార్ కితి జగ్గుదు మన్ను, సిగిరితిమన్ని ఆహారోను డుడ్డుని దేవుణు మోసెజ్ సిత్తి పతి ఆడ్రెజ్ రాస్తి ఇడ్డి పల్కెజ్ మన్నె.
- 5 మందసం ముస్కు, దేవుణు మనాన్ ఇజి, తోరిసిని కెరూబుజ్ మన్నె. కెరూబుజ్ కరుణపీటం ముస్కు, ఇహిజ, మందసం మూత్త ముస్కు రెక్కెజ్ కోరిసయ్యె మన్నె. ఏలు యా సజతిజ్ లావు వెహైజ్ మాటు అట్ఎట్.
- 6 యాలెకెండ, విజు నెగ్రెండ ఇడ్డివెనుక, పుజేరిజు, మొదొహి గదిదు వరి సేవపణి కిదెజ్ ఎస్సిసన్పిలె డుఃగ్నార్.
- 7 గాని విజేరె పుజేరిజ ముస్కు మన్ని పెరి పుజేరి ఒరెండ్రె, లొఇమన్ని గదిదు డుఃగ్నాన్. అయాకబా వాండ్రు ఏంటుదు ఉండ్రీ సుటునె డుఃగ్నాన్. డుఃగ్నివలె నల సిల్లెండ డుఃగ్వన్. అయాక వాండ్రు వన్ని పాపమ్కాజ్ వందిజ్, నెన్ఎండ లోకుర్ కితి పాపమ్కాజ్ వందిజ్ దేవుణుదిజ్ పూజ సీనాన్.
- 8 యాలెకెండ కిజిని అలవాటుదాన్, దేవుణు ఆత్మ టెటాజ్ నెస్పిసిని సజతి ఇనిక ఇహిజ, మొదొహి గదిని అబ్బె కిని అలవాటుజ్ విజు నిల్ని మంజినివలె, లోకుర్ దేవుణు వందిజ్ ఒదె కేట ఆతి గదిదు సొండ్రెజ్ అట్ఎర్.
- 9 యాక యా కాలమ్దిజ్ ఉండ్రీ గుర్తు. ఇనిక ఇహిజ, దేవుణుదిజ్ పూజ సీని విజు రకమ్కాణి పూజెజ్, సీనివన్ని గర్బమ్దు సుబ్బరం కిదెజ్ అట్ఉ.
- 10 యా పడాయ్ ఆసారం, తిండి వందిజ్, ఉణి దన్ని వందిజ్, రకమ్రకం సమయమ్దు నొర్బాని దన్ని వందిజె వెప్పిని రూలుజ్. యా రూలుజ్ ముస్కు కిజినికెజ్. కొత్త రూలుజ్ వాని కాలమ్దాక యా రూలుజ్ మంజినె.
- 11 గాని, ఇబ్బె ఏలె మన్ని నెగ్గి సజతిజ్ కల్లిసిని విజేరె పుజేరిజ ముస్కు మన్ని పెరి పుజేరి ఇజి క్రీస్తు వాత మనాన్. వాండ్రు సేవ కిని గుడారం ఇహిజ పరలోకం. గొప్పు ముకెలమతిక. నండొ పూర్తియాతిక. అయాక లోకుర్ తయార్ కితిక ఆవద్. తయారాతి లోకమ్దు మనిక ఆవద్.
- 12 క్రీస్తు గుడారమ్దు డుఃగ్జి, ఎలాకాలం వందిజ్ ఉండ్రీ సుటు, దేవుణు వందిజ్ ఒదె కేట ఆతి గదిదు సొహివలె, పూజ సీదెజ్ ఇజి గొరెజు, దూడెఃజు నల వాండ్రు ఒవన్. గాని, వాండ్రు వన్ని సొంత నలనె ఒతాండ్రె మజి పాపమ్కాణిజ్ సావుదాన్ ఎలాకాలం డిఃన్పిస్తాన్.
- 13 మోని సిత్తి రూలుజు వజ, గొరెజు, కొడ్డిఃజు నలని దూడెజ్ సుప్తి నీరు, మయిల\* ఆతి లోకురి ఒడెఃల్దు వాక్సార్. ఎందనిజ్ ఇహిజ, వరి ఒడెఃల్ సుబ్బరం ఆజి దేవుణు వందిజ్ ఒపజెపె ఆజి కేట ఆదెజ్.
- 14 అహిజ, క్రీస్తు నల ఎసొ నెగ్రెండ సుబ్బరం కినాద్ ఇజి ఎత్తు కిదు. ఎలాకాలం మన్ని ఆత్మసత్తుదాన్, క్రీస్తు మా పాపమ్కాజ్ వందిజ్ వన్నిజ్ వాండ్రె దేవుణుదిజ్ ఒపజెపె ఆతాన్. ఇని పాపం సిల్లి పూజ లెకెండ, వన్నిజ్ వాండ్రె ఒపజెపె ఆతాన్. సావు తపిన్ని సెఇ పణిజాణిజ్ వన్ని నల మా గర్బం మజి గదిన్ఎండలెకెండ సుబ్బరం కినాద్. ఎందనిజ్ ఇహిజ బత్రిజిని దేవుణుదిజ్ మాటు పొగ్డిఃజి మాడిఃసైజ్.

\* 8:12 8:12 యిర్మీయా 31:31-34. \* 9:13 9:13 ఇబ్బె మయిల ఇజి వెప్పినిక దేవుణుదిజ్ డగ్రు కిదెజ్ అట్ఇ సజతిజ్, సిల్లిజు దేవుణు ఎద్రు కల్లి ఆతికెజ్

15 అందెజె క్రీస్తునె అయా కొత్త బపుమానం నడిపిస్సికాన్. ఎందనిజ్ ఇహిజ, దేవుణు కూక్తి లోకురిజ్ దేవుణు సీన ఇజి ఒట్టు కితి ఎలాకాలం మంజిని దీవెనమ్కు దోహ్కైజ్. మొదోల్ కితి బపుమానమ్దిజ్ అడిఃగి మహివలె, వారు కితి తప్పుజాణిజ్ వాజిని సిక్చదాన్ వరిజ్ డిఃసిపిస్తెజె, క్రీస్తు సాతాన్.

16 ఉండ్రి తీర్చన పత్రం రాస్తి ఇడ్డిమహిజ, అయా తీర్చన పత్రం తయార్ కితికాన్ సాత మనాన్ ఇజి రుజుప్ ఆదెజ్.

17 అయాక రాస్తిమన్నికాన్ బత్తిజి మహిజ, అయా తీర్చన పత్రమ్దిజ్ విలువ సిల్లెద్. వాండ్రు సాతివెనుకానె అయా తీర్చన పత్రం పణిదిజ్ వానాద్.

18 అందెజె, మొదోల్ సిత్తి బపుమానమ్దిజ్బా నల సిల్లెండ సత్తు మన్వద్.

19 దేవుణు వెహ్తి రూలుజ్ విజు, లోకురిజ్ విజేరిజ్ సిత్తివెనుక, మోసె దూడెజు నల, ఏరువెట కలప్తాండ్రె, ఇసాపు మొక్కాది కొముదాన్, నండో ఎరాని బులుస్కుదాన్ లోకుర్ విజేరె ముస్కు, దేవుణు రూలుజ్ రాస్తి ఇడ్డి పుస్తకం ముస్కు సిల్కరిస్తాన్.

20 వాండ్రు వెహ్తాన్, “మీరు కిదెజ్ ఇజి దేవుణు ఆడ్ర సిత్తి బపుమానమ్దిజ్ ముద్రనె యా నల”<sup>☆</sup>, ఇజి.

21 అయాలెకెండె, గుడారం ముస్కుని అబ్బె మన్ని విజు వనకాజ్ ముస్కు నల సిల్కరిస్తాన్.

22 మోసె సిత్తి రూలుదు వెహ్సిని వజ విజు నలదాన్ సుబ్బరం ఆనాద్ ఇజి వెహ్తాజ్ ఆనాద్. నల వాక్విండ, పాపమ్కు సోన్ఉ.

23 అందెజె, పరలోకమ్దు మన్ని వనకాజ్ రూపు లెకెండె మన్ని లోకమ్ది గూడారమ్ని దన్ని లోఇ మనికెజ్, జంతుజు నలదాన్ సుబ్బరం ఆదెజ్ వలె. గాని పరలోకమ్దు మనికెజ్ జంతుజు నలదాన్ ఆవిండ, దన్నిజ్ ఇంక నెగ్గి పూజెజాణిజ్ సుబ్బరం ఆదెజ్ వలె.

24 ఎందనిజ్ ఇహిజ, క్రీస్తు పరలోకమ్దు సాహాన్. ఏలు మా వందిజ్ దేవుణు ఎద్రు జామ్లి నిల్సిని వన్నిలెకెండె నిల్దెజ్ సాహాన్. వాండ్రు లోకుర్ కీదాన్ తయారాతి గుడారమ్దు డుఃగ్వితాన్. అయాక నిజమాతి గుడారమ్ది ఉండ్రి మూర్తినె.

25 యూదురిజు పెరి పుజేరి, ఏంటు ఏంటు జంతుజు నలదాన్ దేవుణు వందిజ్ ఒదె కేట ఆతి గదిదు డుఃగ్నాన్. గాని, యేసు వన్నిజె ఒవజెపె ఆదెజ్ మరి మరి పరలోకమ్దు సోన్వన్.

26 ఆహె సాండ్రెజ్ ఇహిజ, లోకం పుటిస్తి బాణిజ్ అసి, వాండ్రు మరిమరి సాదెజ్ మహాద్ మరి. గాని కాలమ్ది ఆకార్దు, వాండ్రు పూజ ఆతి దన్నిదటాన్, పాపం సిల్లెండ కిదెజ్, వాండ్రు ఎలాకాలం వందిజ్ ఉండ్రి సుటు తోరె ఆతాన్.

27 లోకుర్ విజేరె ఉండ్రి సుటు సాదెజ్ వలె. వెనుక దేవుణు బాణిజ్ తీర్పు జర్గిదెజ్ వలె, ఇజి ఏర్పాటు మనాద్.

28 అయాలెకెండె, నండొండారి పాపమ్కు సోన్పిస్తెజ్, క్రీస్తు పూజ ఆతాన్. వాండ్రు మరి మర్జి వానాన్, పాపమ్కు సోన్పిస్తెజ్ ఆవిద్; గాని వన్నిజ్ ఆనదాన్ ఎద్రుసుడెఃజి మంజిని వరిజ్ రక్సిస్తెజె వానాన్.

## 10

### క్రీస్తు ఎలాకాలం వందిజ్ ఉండ్రి సుటు పూజ ఆతాన్

1 మోసె సితి గూలుజ్దు మని పడాఃయి ఆసారమ్కు, వాని కాలమ్దు వాజిని నెగ్గి సజతిజు ఉండ్రి నీడఃనె. అయాకెజ్ నిజమాతి సజతిజ్ ఆఉ. అందెజె పడాఃయి ఆసారం వజ కిని పూజెజ్, డిఃన్ఎండ ఏంటు ఏంటు కిజి మహార్. గాని దేవుణుదిజ్ పొగిడిఃజి మాడిఃస్తెజ్ వాని వరిజ్ పూర్తి సుబ్రం కిదెజ్ అట్ఉ.

2 దేవుణుదిజ్ పొగిడిఃజి మాడిఃస్తెజ్ వాతి లోకుర్, వరి పాపమ్దాన్ పూర్తి సుబ్రం ఆతార్ ఇహిజ, వారు మరి మరి పాపమ్క వందిజ్ ఎత్తు కిజి బాద ఆవెతార్ మరి. విజు పూజెజ్బా ఆప్ ఆతె మరి.

3 గాని యా పూజెజ్, ఏంటు ఏంటు, లోకురిజ్ వరి పాపమ్కు ఎత్తు కిబిస్సె.

4 ఎందనిజ్ ఇహిజ, కొడ్డిఃజు, గొరెజు నల పాపమ్కు సోన్పిస్తెజ్ అట్ఉ.

5 అందెజె, క్రీస్తు యా లోకుమ్దు వాతివలె వాండ్రు దేవుణుదిజ్ వెహ్తాన్, “పూజెజ్ని నందెజ్, నీను కోరిజ. గాని నీను నా వందిజ్ ఉండ్రి ఒడొల్ తయార్ కితి”.

6 మాలి పీట ముస్కు సుహ్తి జంతుజాణిజ్ నీను సర్ద ఆఇ. పాపమ్కు సోన్పిస్తెజ్ సీజిని పూజెజాణిజ్ సర్ద ఆఇ, ఇజి.

7 నస్తివలె నాను వెహ్తా, “ఓ దేవుణు, ఇదిలో నాను దేవుణు మాటదు నా వందిజ్ రాస్తి మని వజ, నాను కిదెజ్ ఇజి నీను కోరిజినికెజ్ కిదెజ్ నాను వాత మన్న”,<sup>☆</sup> ఇజి.

☆ 9:20 9:20 నిర్గమ 24:8. ☆ 10:7 10:7 క్రిస్తన 40:6-8.



8 ముజాలె వాండ్రు వెహ్లాన్, “పూజెజ్ ని సందెజ్ పూజ సీని పెటె ముస్కు సురుజిని జంతుజుని పాపమ్ కు సొన్ పిస్తెజ్ సీని పూజెజ్ నీను కోరిణ. వన్కాణిజ్ నీను సర్ ద ఆణ”, ఇజి. (మోసె సితి రూలుజు వజు యా పూజెజ్ కిదెజ్ మనికాదె. గాని వాండ్రు అయాలెకెండె వెహ్లాన్)

9 వెనుక వాండ్రు వెహ్లాన్. “ఇదిలో నీను కోరిజినికెజ్ కిదెజ్ నాను వాత మన”, ఇజి. అందెజె, దేవుణు పడాఱి పూజెజ్ విజు సిల్లెండె కిజి, క్రీస్తు పూజ ఆతి దనిజ్ పడాఱి పూజెజు ముస్కు ఇడ్డినాన్

10 దేవుణు కోరితికెజ్ వాండ్రు కిత్తాన్. అందెజె యేసు క్రీస్తు ఒడోల్ దాన్ ఎలాకాలం వందిజ్ ఉండ్రీ సుటు పూజ ఆతి దనిదాన్, మాటు పాపమ్ కాణిజ్ సుబ్రం ఆత మనాట్.

11 యూదురి పుజెరిజు విజెరి, మాలి పీట ముజాలె నిల్సి, రోజు రోజు వరి పుజెరి పణి కిజినార్. మరి మరి ఉండ్రె నని పూజెజె కిజినార్. అయా పూజెజ్ ఎసెజ్ బా పాపమ్ కు సొన్ పిన్ ఉ.

12 గాని క్రీస్తు ఎలాకాలం వందిజ్ దేవుణుదిజ్ ఉండ్రీ పూజ ఆతాన్. వాండ్రె అయా పూజ ఆతాన్. ఎలాకాలం వందిజ్ పూజ ఆతాన్. వెనుక వాండ్రు దేవుణు ఉణెర్ పడాఱి, గొప్ప మర్యాద్ దు బసె ఆతాన్.

13 అబ్బె, ఏలు క్రీస్తు పడిఱి వరిజ్, వన్ని పాపమ్ కు అడిఱిగి దేవుణు ఇడ్డిదాక వాండ్రు కాప్ కిజినాన్.

14 ఎందనిజ్ ఇహిజు, అయా ఉండ్రీ పూజదాన్ పాపమ్ కాణిజ్ సుబ్రం ఆతి వరిజ్, వాండ్రు ఎలాకాలం పూర్తి ఆతికార్, కిత మనాన్.

15 దేవుణు ఆత్మబా యాక నిజం ఇజి నెసి వెహ్లానాన్. తొలిత వెహ్లానాన్.

16 “వాని దినమ్ కాజ్ వెనుక, నాను వరివెటె కిని కొత్త ఒప్పుమానం యాకదె. నాను వరి గర్బమ్ దు నా రూలుజ్ ఇడ్డు. వరి మన్నుదు అయాలెకెజ్ రాస్సు, ఇజి ప్రబు వెహ్లానాన్”, ✱ ఇజి.

17 వెనుక వాండ్రు వెహ్లానాన్, “నాను వరి పాపమ్ కు, వరి సెణ పణిజ్ ఎసెజ్ బా ఎత్తు కిఎ”, ✱ ఇజి.

18 దేవుణు పాపమ్ కు నెమిసి మహివలె, పాపం నెమిస్తెజ్ మరి పూజ అవుసరం సిల్లెద్.

**నమ్మిజినె మండ్రెజ్.**

19 అందెజె, తంబెరిజాండె, యేసు నల వాక్సి సాతి సావుదాన్ దేవుణు వందిజ్ ఒద్దె కేట ఆతి గదిదు, మాటు దయ్ రమ్ దాన్ డుఱిగెదెజ్ ఆనాద్.

20 వాండ్రు మా వందిజ్, బత్కుదు నడిఱిపిసిని ఉండ్రీ కొత్త సరి రేతాన్. అయాక తెరదాన్, ఇహిజు వన్ని సొంత ఒడోల్ దాన్ రేతాన్.

21 దేవుణు లోకుర్ ముస్కు అతికారం మని ఒరెన్ పెరి పుజెరినె మజి మనాన్.

22 అందెజె, మాటు వన్నిజ్ పూర్తి నమ్మిజి నెగ్గి మన్నుదాన్ దేవుణు ఎద్రు సొనాట్. మజి సుబ్రం కిదెజ్, మా సెణ పణిజ్ నెసిని మన్ను, క్రీస్తు నలదాన్ సిల్ కరెనె ఆత మనాద్. మా ఒడోల్, నెగ్గి ఏరుదాన్ నొరె ఆత మనాద్. ఆహా మాటు దేవుణు ఎద్రు సొనాట్.

23 ఇతల్ ఆతల్ కద్దిఎండ, మటు మనాట్ ఇజి మాటు వెహె ఆజిని ఎద్రు సూణి ఆసదిజ్ డటం అన్నాట్. ఎందనిజ్ ఇహిజు, మా వెట ఒట్టు కితికాన్ నమ్మిదెజ్ తగ్గికాన్.

24 మహికార్ ప్రేమ తొరిస్తెజ్, నెగ్గి పణిజ్ కిదెజ్ వరిజ్ ఉసార్ కిబిస్సిక ఎలాగ ఇజి ఎత్తుకిజినాట్.

25 నెగొండార్ డిఱిసి సీజిని లెకెండె, కూడఱిజి వాజిని అలవాటు మాటు డిఱిస్తెజ్ ఆవెద్. గాని మాటు ఒరెన్ మరి ఒరెన్ వన్నిజ్ మరి ఒదె దయ్ రం కిబిసి మంజినాట్. ఎందనిజ్ ఇహిజు, ప్రబు వాని దినం డగ్గు ఆజినాద్ ఇజి మీరు సుడఱిజినిదెర్.

26 నిజం నెస్తి వెనుక మరి మరి పాపమ్ కు కిజినాట్ ఇహిజు, అయా పాపమ్ కు సొన్ పిస్తెజ్ మరి పూజ సిల్లెద్.

27 గాని మరి మనిక ఇనిక ఇహిజు, దేవుణు సీని తీర్పుదిజ్, వన్నిజ్ పడాఱి వరిజ్ నాసనం కిని గొప్ప పెరి సిసుదిజ్ ఎద్రు సుడఱిజినికాదె.

28 మోసె సితి రూలుజ్ లోజిఇతి ఎయె వన్నిజ్ బా, రిఎరో, ముఎరో సాక్సిరు వాండ్రు తపు కిత్తాన్ ఇజి వెహ్లాజు, కనికారం తొండె సప్పార్.

29 అహిజు, దేవుణు మరిసిజ్ దూసిస్తి వరిజ్ ఎసొ పెరి సిక్కు మనాద్. వరిజ్ దేవుణు వందిజ్ కేట కిత్తి నలదిజ్ పణిదిజ్ రెణ లెకెండె సుడఱితి వరిజ్ ఎసొ పెరి సిక్కు మనాద్. అయా నలనె ఒప్పుమానం తపిస్తాద్. కనికారం తొరోసిని దేవుణు ఆత్మదిజ్ దూసిస్తి వరిజ్ ఎసొ పెరి సిక్కు మనాద్ ఇజి ఎత్తు కిదు.

30 ఎందనిజ్ ఇహిజు, “సిక్కు నానె సీన. సిక్కుదిజ్ తగితి వరిజ్, నాను మర్జి సీన”, ఇజి వెహ్లా వన్నిజ్ మాటు నెసినాట్. మరిబా వెహ్లానాన్, “ప్రబునె వన్ని లోకురిజ్ తీర్పు సీనాన్”, ✱ ఇజి.

✱ 10:16 10:16 యిర్మీయా 31:33. ✱ 10:17 10:17 యిర్మీయా 31:34. ✱ 10:30 10:30 ద్విత్తి 32:35.

- 31 బత్కిజిని దేవుణు కీదు అర్నిక గొప్ప తియెల్ కల్గిన్ని సజతిసె.
- 32 మీరు క్రీస్తు వందిజ్ తొలిత నెస్తి రోస్కు ఎనజ్బా పోస్మాట్. నండో బాదెజ్ వాతిజ్బా, నమ్మకమ్దాన్ ఎలాగ నిహి మహిదెర్ ఇజి ఎత్తు కిదు.
- 33 సెగం కాలమ్దు, మిజి విజెరె ఎద్దు దూసిస్తార్. మిజి డెయ్తార్. మరి సెగం కాలమ్దు, మీరు, అయాలెకెండ్ బాదెజ్ ఆతి పరివెట కూడజి నిహిదెర్.
- 34 జెలిదు ఆతి పరిజ్ సుడజి మీ పాణం నోతాద్. మిజి కల్గిజి మనికెజ్ విజు లాగ్గి ఒతివలెబా సర్దదాన్ ఓరిస్తిదెర్. ఎందనిజ్ ఇహిజ, ఎలాకాలం మనికెజ్, మిజి మన్నె ఇజి సెసినిదెర్. అయాక కల్గితి మహిదని ఇంక మరి ఒదె నెగ్గిక.
- 35 అందెజె, దయ్ రమ్దాన్ మండ్రు. ఎందనిజ్ ఇహిజ నండో పలితం దోహ్కాద్.
- 36 మీరు ఓరిసి మండ్రెజ్ వలె. ఎందనిజ్ ఇహిజ, మీరు దేవుణుదిజ్ ఇన్సం ఆతికెజ్ కితి వెనుక, వాండ్రు సీన ఇజి ఒట్టు కితికెజ్ దోహ్కాద్.
- 37 ఎందనిజ్ ఇహిజ, దేవుణు మాటదు వెహిని లెకెండ్, “సణెం కాలం లోఇ, వాదెజ్ మనికాన్ బేగినె వానాన్. ఆల్సెం ఆఎన్.
- 38 నీతి నిజాయితి మని నా వారు, నమ్మకమ్దాన్ బత్కినార్. వారు మర్జి వెనుక సాహిజ, నాను పరివెట సర్ద ఆఎ”, ✨ ఇజి.
- 39 మాటు, మర్జి వెనుక సాన్ని నాసనం ఆని లోకు ఆఎట్. గాని మజి దేవుణు మున్ను నమకం మనాద్. వాండ్రు మజి రక్కిస్తాన్.

## 11

- 1 నమకం ఇహిజ, మాటు ఆస ఆనిక తవ్ఎండ జర్గినాద్ ఇజి పూర్తి నమ్మిజినిక. కణకదాన్ సుడజికెజ్ నిజం మన్నె ఇజి పూర్తి నమ్మిజినిక.
- 2 దేవుణు మున్ను నమకం ఇడ్డి లోకుర్ పూర్బమ్మదు మహార్. అందెజె దేవుణు బాణిజ్ అనుపె ఆతార్.
- 3 దేవుణు మాటదానె యా బూలోకం తయార్ ఆత మనాద్ ఇజి నమకమ్దానె మాటు నెసినాట్. ఎందనిజ్ ఇహిజ, మాటు ఏలు సూణికెజ్, సుడజి వన్నా బాణిజ్ తయార్ కితికెజె.
- 4 నమకమ్దానె, కయిను సీతి దని మున్ను ఏబలు దేవుణుదిజ్ నెగ్గి పూజ సితాన్. వన్ని నమకమ్దానె, నీతి నిజాయితి మనికాన్ ఇజి దేవుణు బాణిజ్ మెపు దోహ్కాద్. ఎందనిజ్ ఇహిజ, వాండ్రు సీతి సందదు దేవుణు సర్ద ఆతాన్. వాండ్రు సేనదిసమ్కాజ్ ముజాలె సాత సాహాన్. అహిజ్బా, వన్ని నమ్మకమ్దాన్ ఏలు బా మజి వర్గిజనాన్.
- 5 నమకమ్దానె, హానోకు సాఎండ దేవుణు మంజిన బాడ్డిదు దేవుణు ఒత మనాన్. ఎయెర్బా వన్నిజ్ సుడజెదెజ్ అట్వెతార్. ఎందనిజ్ ఇహిజ, దేవుణునె వన్నిజ్ ఒత మహాన్. వన్నిజ్ ఒజ ముజాలె, దేవుణుదిజ్ సర్ద కితికాన్ ఇజి అనుపె ఆతాన్.
- 6 నమకం సిల్లెండ, దేవుణుదిజ్ సర్ద కిబిసెజ్ అట్వెట్. ఎందనిజ్ ఇహిజ, వన్ని డగ్రు వానికాన్ ఎయెన్బా దేవుణు మనాన్ ఇజి నమ్మిదెజ్వలె. వన్నిజ్ నిజం రెబాని పరిజ్ వాండ్రు నెగ్గికెజ్ కినాన్ ఇజి నమ్మిదెజ్వలె.
- 7 నమకందానె, నోవ పవి ఇండ్రెణి పరిజ్ పెరి గడదాన్ రక్కిస్తెజ్ ఉండ్రె ఓడః తయార్ కిత్తాన్. జర్గిదెజ్ మని సజతిజ వందెజ్ దేవుణు డటం వెహివలె వాండ్రు లోజెతాన్. వన్ని నమకమ్దానె, లోకమ్దు మహి, మహి లోకురిజ్ దేవుణు మున్ను నమకం సిల్లెద్ ఇజి వాండ్రు తోరిస్తాన్. అందెజె వారు తపు కిత్తార్ ఇజి దేవుణు తీర్పు కిత్తాండ్రె, నోవెజ్ నీతి నిజాయితి మనికాన్ ఇ ఇట్టాన్. నోవ నమకమ్దానె నీతి నిజాయితి మనికాన్ ఇజి ఇట్టాన్.
- 8 నమకమ్దానె, అబ్రాహము, ‘నీను నీ ఇల్లు డిసి, నీది ఇజి వెనుక దోహ్కాద్ బాడిదు సాన్అ’, ఇజి దేవుణు వెహివలె, లోజెతాండ్రె సాహాన్. ఎంబె సాన్సినాన్ ఇజి తెలిఎండ వాండ్రు సాహాన్.
- 9 నమకమ్దానె, పయువాండ్రు లెకెండ్ దేవుణు సీన ఇజి ఒట్టు కితి దేనమ్దు బత్కితాన్. వాండ్రు గుడారమ్దు బత్కితాన్. అయాలెకెండ్, ఇసాకు ని యాకోబు బా. పరిజ్బా వెనుక అయా ఒట్టునె దేవుణు సితాన్.
- 10 అబ్రాహము పయువాండ్రు లెకెండ్ అబె బత్కితాన్. ఎందనిజ్ ఇహిజ, వాండ్రు ఎలాకాలం నిల్పిని నిజమాతి పునాది మని పట్టం వందిజ్ ఎద్దు సుడజి మహాన్. అయా పట్టం రూపు సీజ తోహ్కాన్ దేవుణు.
- 11 నమకమ్దానె, అబ్రాహము నండో డొక్ర ఆతిజ్బా, సార గొడ్డు బోదెలి ఆతిజ్బా అప్పొసి ఆతాన్. ఎందనిజ్ ఇహిజ, సీన ఇజి ఒట్టు కితికాన్ నమ్మిదెజ్ తగ్గికాన్ ఇజి ఒడిబితార్.

✨ 10:38 10:38 అబ్దుకు 2:3,4.

12 అందెజె, సాతిలెకెండ్ మని యా ఒరెన్ వన్ని బాణిజ్, నండొ నండొ లోకుర్ ఆతార్. ఆగాసమ్దు మని సుకెజె లెకెండ్, నమ్దరమ్ది ఒడ్డుదు మని లెక కిదెజ్ అట్త ఇన్కు లెకెండ్, లోకుర్ ఆతార్.

13 యా లోకుర్ విజెరె, సానిదాక వారు నమకమ్దానె బత్తిజి మహార్. దేవుణు సీన ఇజి ఒట్టు కితికెజ్ దొహ్కుతె. వారు నండొ ముజాలె వన్కా వందిజ్ ఆసదాన్ ఎద్దు సుడఃజి వన్కాజ్ సర్ద ఆతార్. యా బూమిదు వారు పయువారు ఇజి ఒప్పుకోటార్.

14 యా లెకెండ్ వెప్పి లోకుర్, వరిజ్ సొంత ఉండ్రీ దేసెం వందిజ్ ఎద్దు సుడఃజినార్ ఇజి టటాజ్ తోరిసినాద్.

15 వారు డిఃసి వాతి దేసెం వందిజ్ ఎత్తు కిఎర్. ఎత్తు కిత్తార్ ఇహిజ, మర్జి సొండ్రెజ్ అవ్సరం మహద్మరి.

16 గాని వారు, ఇంక నెగ్గి ఉండ్రీ దేసెం వందిజ్ కోరితార్. ఇహిజ పరలోకమ్ది దేసెం వందిజ్ కోరితార్. అందెజె, దేవుణు, పరి దేవుణు ఇజి వెహె ఆదెజ్ సిగు ఆఎన్. ఎందనిజ్ ఇహిజ, వాండ్రు పరి వందిజ్ పరలోకమ్దు ఉండ్రీ పట్టుం తయార్ కిత మనాన్.

17 నమకమ్దానె, దేవుణు అబ్రాహముజ్ పరిస కితివలె, వన్ని మరిసి ఇస్సాకుజ్, పూజ లెకెండ్ సితాన్. దేవుణు అబ్రాహముజ్నె ఒట్టు సితాన్. గాని వన్ని ఒరెండ్రె ఒరెన్ మరిసిజ్ పూజ లెకెండ్ సీదెజ్ వాండ్రు తయార్ ఆతాన్.

18 దేవుణు అబ్రాహముజ్ వెహ్లాన్, “ఇస్సాకు వెటనె నీ తెగ్గదికార్ పుట్వార్”,\* ఇజి

19 సాతి వరిజ్ మర్జి బత్తిస్తాజ్ దేవుణు అట్వూన్ ఇజి అబ్రాహము ఒడఃబితాన్. యాక సుడఃతిజ, అబ్రాహముజ్ సావుదాన్ ఇస్సాకుజ్ మర్జి దొహ్కొ లెకెండ్ మనాద్.

20 నమకమ్దానె, ఇస్సాకు, యాకోబుజ్ని యాసాపుజ్, వరిజ్ వానికాలం వందిజ్ దీవిస్తాన్.

21 నమకమ్దానె, యాకోబు వాండ్రు సాని ముజాలె యోసేపు మరిసిర్ రిఎరిజ్ దీవిస్తాన్. వన్ని డుడుదు ఒర్గితాండ్రె దేవుణుదిజ్ పొగిడఃజి మాడిస్తాన్.

22 నమకమ్దానె, యోసేపు సాదెజ్ డగ్గు ఆతివలె ఇస్సాయేలు లోకురిజ్ అయిగుప్పు దేసెమ్దాన్ దేవుణు నడిఃపిసి తనిదని వందిజ్ వెహ్లాన్. వన్ని డుముక వందిజ్ ఇనిక కిదెజ్ ఇజి ఆడ్ర సితాన్.

23 నమకమ్దానె, మోసె అయిసి అప్పొసిర్, వాండ్రు పుట్టి మూండ్రీ నెలెజ్ డాప్పి ఇట్టార్. ఎందనిజ్ ఇహిజ, వాండ్రు నెగ్గి ఒరెన్ కొడః ఇజి వారు నెస్తార్. రాజు సీతి ఆడ్రదిజ్ తప్పెజ్ వారు తియెల్ ఆవెతార్.

24 నమకమ్దానె, మోసె, వాండ్రు పిరితి వలె పరో గాల్చి మరిసి ఇజి కూకె ఆదెజ్ కెవెతాన్.

25 వాండ్రు, పాపం తప్పిసి నెంః మంజిని సర్దదు మంజిని దని ముస్కు దేవుణు లోకుర్ వెట బాద ఆదెజ్ కోరితాన్.

26 అయ్గుప్పు దేసెమ్ది ఆస్తి ముస్కు, క్రిస్తు వందిజ్ బాదెజ్ ఆనికాదె విలువ మనిక ఇజి వాండ్రు ఒడఃబితాన్. ఎందనిజ్ ఇహిజ, వాని కాలమ్దు దేవుణు వన్నిజ్ కిని నెగ్గి దని వందిజ్ వాండ్రు ఎద్దు సుడఃతాన్.

27 నమకమ్దానె, మోసె, రాజు కోపమ్దిజ్ తియెల్ ఆవిండ, అయ్గుప్పు దేసెం డిఃస్తాన్. వాండ్రు మర్జి వాదెజ్ కెవెతాన్. ఎందనిజ్ ఇహిజ, వాండ్రు తోరె ఇ దేవుణుదిజ్ సుడఃతి లెకెండ్ మనాద్.

28 నమకమ్దానె, మోసె, ఇస్సాయేలు లోకురిజ్ పులాజ్ ఆఇ రొటెజ్ తయార్ కిని పండొయి కిదెజ్ ఇజి ఆడ్ర సితాన్. పరి తొలిత పుట్టి కొడఃరిజ్, సప్పి దూత సవ్వెండ్ర మండ్రెజ్, పరి దార్బందరమ్దు సల సిల్కరిస్తెజ్ ఇజి ఆడ్ర సితాన్.

29 నమకమ్దానె, ఇస్సాయేలు లోకుర్ ఎర్రజ్ సమ్దరమ్దాన్ వహ్తి బూమిదు నడిఃని లెకెండ్ నడిఃసి సాహార్. అయ్గుప్పు దేసెమ్దికార్ అయాలెకెండ్ కిదెజ్ సుడఃతి వలె వారు ముడుఃగితార్.

30 నమకమ్దానె, ఇస్సాయేలు లోకుర్ ఏడు రోస్కు యెరికొ పట్టుం సుటులం బూలాతివలె, పట్టుమ్ది గోడెజ్ అర్తె.

31 నమకమ్దానె, సాని బూలాని రాహబు, దేవుణుదిజ్ లోజిఇ దని పట్టుమ్ది పరివెట సావెతాద్. ఎందనిజ్ ఇహిజ, దేసెమ్దిజ్ గుటు లాగ్దెజ్ వాతి వరిజ్ అది డగ్గు కితాద్.

32 నాను మరిబా వెహ్లాజా? గిదియెను, బరాకు, సంసాను, యెప్ప, దావీదు, సముయెలు, ప్రవక్తరు నిని పరి వందిజ్ వెహ్లాజ్ నజి సమయం సాల్ఎద్.

33 నమకమ్దానె, వారు దేసెమ్కాజ్ ముస్కు విద్దెం కిజి గెలస్తార్. వారు నీతి నిజాయితికెజ్ కితారె, దేవుణు ఒట్టు కితికెజ్ దొహ్కొ. వారు నొరెస్కు వెయ్యు మూక్తార్.

34 నండొ కన్సి సిసుదిజ్ నస్తార్. కూర్దెజాణిజ్ సాఎండ్ర తప్పె ఆతార్. వారు సత్తుసిలికార్ గాని సత్తు మనికార్ ఆతార్. వారు విదెమ్దు సత్తు మనికార్ ఆతార్ పయి సయ్నమ్ది వరిజ్ ఉలుస్తార్.

35 సెగిండెక్ బోదెకాజ్, పరి సొంతది వరిజ్ సావుదాన్ మర్జి దొహ్కొ. మహికార్ నండొ బాదెజ్ ఆతిజ్బా, వారు దేవుణు ముస్కు మని నమకం డిఃసి, డిఃబె ఆని దని ముస్కు సానిక నెగెద్ ఇజి సుడఃతాన్. ఎందనిజ్ ఇహిజ, వారు మర్జి నిజిని

\* 11:18 11:18 ఆది 21:12.

వలె నెగ్గి బత్తు దొహ్కైజ్.

36 సెగొండార్ దూసె ఆతార్. కొరడెజాణిజ్ డెయ్ఎ ఆతార్. మరి సెగొండార్ తొహె ఆతారె, జెలిదు ఇడ్డె ఆతార్.

37 వారు పణకాణిజ్ డెయ్ఎ ఆతార్. రంపమ్కాణిజ్ రుండి ముకెజ్ కొయె ఆతార్. కుర్దెజాణిజ్ సపె ఆతార్. సెగొండార్ మెండ గొరెదినొ, ఏలెటు గొరెదినొ తోలు పొరపె ఆజి, బజ ఆజి, బాదెజ్ ఆజి, దూసె ఆజి బూలాతార్.

38 యా నెగ్గి లోకుర్ మండ్రెజ్, యా లోకం తగ్గెదె. వారు బీడిమ్ బూమిజు, గొరొకాజ్ బూలాతార్. సాలమ్క లొఇ, బూమిదు మని బొరోజు డాజెతార్.

39 వారు నమకం ఇట్టార్. అందెజె, నెగ్గికార్ ఇజి దేవుణు బాణిజ్ మెపు దొహ్కైజ్. గాని వరి లొఇ ఎయెరిజ్బా, దేవుణు సీన ఇజి ఒట్టు కితికెజ్ దొహ్కైజ్.

40 ఎందనిజ్ ఇహిజు, దేవుణు మా వందిజ్ ఇంక నెగ్గిక వీర్పాటు కిత మనాన్. మా వెటనె, వరిజ్ పూర్తి కిదెజ్ ఇజి వన్ని ఉదెసం.

## 12

దేవుణు వన్ని కొడొరిజ్ దిదిజి సిక్స సీజినాన్

1 అందెజె, మా సుటులం సేన సాక్సిరు మనార్. అందెజె, అడు కిజిని సజతిజు డిసి, మజి సిక్కుజు అర్వసిని పాపం డిసి, దేవుణు మా ఎద్రు ఇడ్డి బత్తు ఇని ఉహ్కై పొటిదు ఓరిసినె ఉహ్కైట్.

2 మా గురి యేసు దరోట్నె ఇడొజి ఉహ్కైట్. వాండ్రె మా నమకం మొదొల్స్తికాన్. పూర్తి కినికాన్. వాండ్రు సిలువాదు సిగు మని సావు సాదెజ్ తయార్ ఆతాన్. ఎందనిజ్ ఇహిజు, వెనుక వన్నిజ్ మంజిని సర్ద వాండ్రు నెస్సాన్. ఏలు పరలోకమ్దు దేవుణు సిమసనం ఉణెర్ పడకాదు గొప్ప మర్యాద్దాన్ బస్త మనాన్.

3 పాపం కినికార్ కితి నండొ బాదెజ్ వాండ్రు ఓరిస్తికెజ్ ఎత్తు కిదు. అందెజె, మీరు మన్ను విస్కిఎండ, డిసిసిఎండ మండ్రెజ్, వన్నిజ్ ఎత్తు కిదు.

4 పాపం వెట కాట్లాడొజినిక నల సీని నసా ఏలుదాక మీరు ఎద్రిన్ఇతిదెర్.

5 దేవుణు వన్ని కొడొర్ లెకెండ మిజి ఉసార్ కిబిస్సి మాట మీరు పొస్తిదెరా?. “నా కొడొ, ప్రబు నిజి దిదిని వలె మన్ను బాద కిమాట్. వాండ్రు డటం వెహ్పి వలె మీ మన్ను విస్కిమాట్.

6 ఎందనిజ్ ఇహిజు, ప్రబు వాండ్రు ప్రేమిసిని వరిజ్ దిదినాన్. వన్ని మరిన్ ఇజి డగ్రు కిని వన్నిజ్ దిదినాన్\*”, ఇజి వెహ్పినాన్.

7 ఒరెన్ అప్పొసి దిదిని వజు, మీ సైమెజ్ ఒరిస్తు. ఎందనిజ్ ఇహిజు, మీ సైమెజ్, దేవుణు మిజి వన్ని కొడొర్ లెకెండ సుడొజినాన్ ఇజి తోరిస్సి. అప్పొసి దిదిని మరిసి ఎయెన్బా మనాండ్రా?

8 వన్ని మరిసిర్ విజెరిజ్ దిజినిలెకెండ, మిజి దిదిఎండ మహిజు, మీరు వన్ని నిజమాతి కొడొర్ ఆవెర్. గాని ఆఇ కొడొర్ ఇజినె అర్దం.

9 మజి విజెరిజ్ కాస్తి అప్పొసిర్ మహార్. వారు మజి దిదిజి మహార్. మాటు వరిజ్ గవరం సీజి మహార్. అహిజు, మా అయా లోకమ్ది బుబ్బు ఆతికాన్దిదినివలె, ఎసా లావు వన్నిజ్లోజిజి మాటు ఎలాకాలం బత్తిదెజ్?

10 మా బుబ్బుర్, సెగం కాలం మజి దిదితార్. ఎందనిజ్ ఇహిజు అయాక నెగెద్ ఇజి వారు ఒడొబితార్. గాని, మా నెగ్గిదనివందిజ్ దేవుణు మజి దిదిజినాన్. ఎందనిజ్ఇహిజు, మాటు వన్నిలెకెండ పరిసుదమ్క మండ్రెజ్.

11 మజి దిదినివలె, అయాక సర్ద కిబిన్ఎదె, దుకం కిబిస్సాద్. గాని అయాలెకెండ దిదిజి సిక్స లాగె ఆజి నెగ్గి సరిదు వాతికార్, వెనుక నీతి నిజాయితిదాన్ కిజి, సమాదనందాన్ మంజినార్.

12 అందెజె, డిస్టి\* మీ కికు పెర్దు. వణక్కిని ముణుకుజ్ సత్తు కిబిస్సు†.

13 “మీ కాల్యాజ్ తినాజ్ సరి తయార్ కిదు”\*. సొట కాల్యు బెణ్ఎండ, సత్తు ఆని వందిజ్ తినాజ్ సరి తయార్ కిదు.

దేవుణుదిజ్ నెక్కి పొక్మాట్

14 విజెర్ వెట సమాదనమ్దాన్ కూడొజి పాడొజి మండ్రెజ్ సుడొదు. పాపం కిఇ, దేవుణు వందిజ్ కేట ఆతి బత్తు బత్తిదెజ్ సుడొదు. ఎందనిజ్ ఇహిజు, అయాలెకెండ బత్తిఇకాన్, ప్రబుజ్ సుడొఎన్.

15 ఎయెన్బా దేవుణు బాణిజ్ వాజిని వన్ని దయా దర్మం తప్పి సొన్ఎండ జాగర్త సుడొదెజ్. ఉండ్రె సేందు మొక్కు పిరిసి దని సేందు నండొడొరిజ్ బాద కినిలెకెండ, ఎయెన్బా ఆవండ జాగర్త సుడొదెజ్.

\* 12:6 12:6 సామెత 3:11-12. \* 12:12 12:12 దిని అర్దం ఇనిక ఇహిజు, కస్టమ్కు వాని వలె మీరు మనుసు విస్కిఎండ దయరమ్దాన్ నిల్దు ఇజినె.

† 12:12 12:12 ప్రమెజ్ వాని వలె, మన్ను విస్కిఎండ దయరమ్దాన్ నిల్ని మండ్రు ఇజినె అర్దం. \* 12:13 12:13 సామెత 4:26.

16 సావు లెకెండ సాని బూలాజినో, దేవుణు వందిజ్ బక్తి సిల్లెండనో, ఎయెన్బా మన్ఎండ జాగర్త సుడెడెజ్. వాండ్రు ఉండ్రీ పుటా తిండి వందిజ్, వన్ని పెరి మరిసి ఇని అక్కు పొర్తాన్.

17 మీరు నెసిని లెకెండ, వెనుక వన్ని అప్పొసి. సీని దీవెనమ్కు వాండ్రు కోరితివలె, వాండ్రు నెక్కి పొకె ఆతాన్‡. ఎందనిజ్ ఇహిజ, వాండ్రు కితిక మారిస్తెజ్ వాండ్రు అట్ఎతాన్. వాండ్రు నండో అడెబాజి దీవెనమ్కు లొస్తెజ్బా దోహకుతె.

18 మీరు, ఇస్తాయేలు లోకుర్ సీనాయి గొరోణ్ డగ్రు వాతి లెకెండ రెఇతిదెర్. ముట్టి నెస్తెజ్ ఆని, సిసు కసిసి, గొప్ప సికట్మని, తుపాన్ మని గొరోన్ డగ్రు రెఇతిదెర్.

19 వారు, జోడుబాంకెజ్ ఊహాక్కి పెరి జాటు, వర్గిని జాటు వెహర్. అయాక వెహివలె, మరి పరివెట వర్గిమా ఇజి దేవుణుదిజ్ బతిమాలతార్.

20 ఎందనిజ్ ఇహిజ, “ఉండ్రీ జంతు ఆతిజ్బా, గొరోతు మట్టిజ, దనిజ్ పణకాణిజ్ డెయిజి సప్తెజ్”✧, ఇజి దేవుణు వెప్తి ఆడ్ర ఓరిస్తెజ్ అట్ఎతార్.

21 అబ్బె తోరె ఆతిక, గొప్ప తియెల్ కల్గిస్తిక. అందెజె మోసె వెప్తాన్, “నాను గొప్ప తియెల్ ఆజి వణకీసిన”, ఇజి. నని గొరోన్ డగ్రు ఆవద్ మీరు వాతిదెర్.

22 గాని మీరు, సియెను గొరోతనె వాతి మనిదెర్. బత్తిజిని దేవుణు మంజిని పట్టుమ్దునె వాతి మనిదెర్. ఇహిజ, పరలోకమ్ది యెరూసలెమ్దునె వాతి మనిదెర్. సేన దూతార్ సర్దదాన్ కూడితి మని బానె, వాతి మనిదెర్.

23 దేవుణు తొలిత కొణోర్, కూడితి మని బానె వాతి మనిదెర్. వరి పేర్కు పరలోకమ్దు రాస్తె ఇడ్తె మన్నె. మీరు దేవుణు డగ్రునె వాతి మనిదెర్. వాండ్రె విజెరిజ్ తీర్పు సీనికాన్. పరలోకమ్దు మని నీతి నిజాయితి మని వరి పాణమ్క, డగ్రునె వాతిమనిదెర్. వారు పూర్తి కిబె ఆతికార్.

24 మీరు యేసు డగ్రునె వాతి మనిదెర్. వాండ్రె, అయా కొత్త ఒపుమానం నడిపిస్సికాన్. మీరు, సిల్కరెసె ఆతి నల డగ్రు వాతి మనిదెర్. ఏబేలు నల వెప్పొని దన్నిమున్ను నెగ్గి మాట వెప్పొని నల డగ్రు వాతి మనిదెర్.

25 అందెజె, మీ వెట వర్గిని దేవుణుదిజ్ జాగర్త వెండ్రు. యా లోకమ్దు, దేవుణు డటం వెప్తివలె వెండ్రెజ్ కెఇతి ఇస్తాయేలు లోకుర్, దేవుణు సీని తీర్పుదాన్ తప్పె అదెజ్ అట్ఎతార్ ఇహిజ, పరలోకమ్దాన్ డటం వర్గిని వన్నిజ్ నెక్కి పొక్తిజ, మాటు సిక్కుదాన్ తప్పె అదెజ్ అట్టూట?.

26 దేవుణు, సీనాయి గొరోతదాన్ వర్గితివలె, బూమి కద్దితాద్. గాని ఏలు వాండ్రు ఒట్టు కిత మనాన్. “మరి ఉండ్రీ సుటుబా, నాను బూమిదిజ్నె ఆవండ, ఆగాసమ్దిజ్బా కద్లిన్నలె”✧ ఇజి.

27 ‘మరి ఉండ్రీ సుటుబా’, ఇని మాటదిజ్, కద్లినికెజ్ మారిస్సె ఇజినె అర్దం. ఇహిజ, తయార్ కితికెజ్ కద్లిజి మారి ఆనె ఇజి. ఎందనిజ్ ఇహిజ, కద్లిఇకెజ్ ఎలాకాలం మండ్రెజ్.

28 అందెజె దేవుణు ఏలుబడిః ఎసెజ్బా కద్లిఎద్. అందెజె✧ దేవుణుదిజ్ వందనం వెప్పొ తియెల్దాన్ గవ్ఠమ్దాన్, వాండ్రు సర్ద ఆని వజ మాడిఃస్నాట్.

29 ఎందనిజ్ ఇహిజ, “మా దేవుణు సుర్పి సిసు ననికాండ్రె.

## 13

### దేవుణుదిజ్ ఎలాగ సర్ద కిబిస్తెజ్

1 క్రీస్తు వెట కూడితి మని తంబెరిబు ఇజి, ఒరెన్ మరి ఒరెన్ వన్నిజ్ ప్రేమిసినె మండ్రు.

2 నెన్ఇ వరిజ్ డగ్రు కిదెజ్ పోస్మాట్. యా లెకెండ డగ్రు కిజి, నెగొండార్, నెన్ఎండనె దూతారిజ్ డగ్రు కిత్తార్.

3 జెలిదు మని వరిజ్ ఎత్తు కిదు. మీరు వరి వెట బాన్ మహివజ ఎత్తుకిదు. బాద ఆని వరిజ్ ఎత్తు కిదు. మీరు వరి లెకెండ బాద ఆజి మహివజ వరిజ్ ఎత్తు కిదు.

4 పెండ్రెదిజ్ విజెరె గవ్ఠం సీదెజ్వలె. అల్పి మాసిర్ రిఎర్బా, ఒరెన్ మరి ఒరెన్ వన్నిజ్ నమ్మిదెజ్ తగ్గి వరిలెకెండ మండ్రెజ్ వలె, సాని బూలాని వరిజ్, రంకు బూలాని వరిజ్ దేవుణు తవ్వెండ సిక్కు సీనాన్.

5 డబ్బుదిజ్ ఆస అమాట్. మిజి కల్గితి మనిదనితాన్ సర్ద ఆదు. ఎందనిజ్ ఇహిజ, దేవుణు వెప్తా మనాన్, “నాను ఎసెజ్బా మిజి డిఃనె, నాను ఎసెజ్బా మిజి నెక్కి పొక్ఎ”,✧ ఇజి.

6 అందెజె దయ్ఠమ్దాన్ వెప్తాజ్ అట్టూట్, “ప్రబునె నజి తోడుః. నాను తియెల్ ఆఎ. లోకు నజి ఇని కిదెజ్ అట్ఎర్”✧.

‡ 12:17 12:17 మరి ఉండ్రీ రకం వెప్తిజ, వాండ్రు కిత్తి తప్పె ఒప్పుకొండెజ్ వన్నిజ్ అట్ఎండ ఆతాద్ ఇజి. ✧ 12:20 12:20 నిర్గమ 19:12,13.  
 ✧ 12:26 12:26 అగ్గయ 2:6. ✧ 12:28 12:28 ద్వితీ 4:24. ✧ 13:5 13:5 ద్వితీ 31:6. ✧ 13:6 13:6 క్రీస్తన 118:6-7.

7 దేవుణు మాట మిజీ వెప్పి, మిజీ నడిపిసిని వరిజ్ ఎత్తు కిదు. వరి బత్కుదాన్ వాతి విజు నెగ్గి దని వందిజ్ ఎత్తు కిదు. వారు నమ్మిత్తి లెకెండ్ నమ్మిదు.

8 యేసు క్రీస్తు ఇవన్, నేండ్లు, ఎలాకాలం ఉండ్రె లెకెండ్ మంజినాన్.

9 విజు రకమ్కాణి నెన్ఇ బోదెజ వెట సొన్నాట్. దేవుణు దయా దర్మదాన్ మా మన్ను సత్తు ఆనికాదె నెగెద్. తిండి వందెజ్ మని రూలుజ లోజీజి ఆవెద్. అయాకెజ్ లోజీతి వరిజ్ ఇని లాబమ్బా రెవెద్.

10 మజీ ఉండ్రె పూజ సీని మాలి పీట మనాద్. దని బాణిజ్, గుడారమ్దు సేవ కిజిని పుజెరిజ తిండ్రెజ్ అక్కు సిల్లెద్.

11 యూదురి రూలు వజ, విజు పుజెరిజ మున్ను మని పెరి పుజెరి పాపం వందిజ్ పూజ లెకిండ్ జంతుజ నల దేవుణు వందిజ్ ఒద్దె కేట ఆతి గదిదు తనాన్. గాని కండ పట్టు వెల్లి సుర్నార్.

12 అందెజె, యేసుబా పట్టుమది వెల్గు వెల్లి బాద ఆతండ్రె సాతాన్. వన్ని సొంత నల వాక్కి వన్ని లోకురిజ్ పాపం సిలివరి లెకెండ్ కిదెజ్ వాండ్రు పట్టుమది వెల్గు వెల్లి బాద ఆతండ్రె సాతాన్.

13 అందెజె మాటు పట్టు వెల్గు వెల్లి వన్ని డగ్రు సొన్ని వాండ్రు లాగె ఆతి సిగుదు వన్నివెట కూడ్నాట్.

14 ఎందనిజ్ ఇహిజ యా బూమిదు మజీ ఎలాకాలం మని ఉండ్రె పట్టుం సిల్లెద్. వాదెజ్ మని పట్టుం వందిజ్ మాటు ఎద్దు సుడేజినాట్.

15 అందెజె, యేసు పేరుదాన్, పూజ లెకెండ్ దేవుణుదిజ్ ఎస్తివలెబా పొగిడిజినాట్. ఇహిజ, వాండ్రు ప్రబు ఇజి మా వెయ్దాన్ ఒప్పుకొడిజిని పూజ సీనాట్.

16 మహి వరి వందెజ్ నెగ్గికెజ్ కిదెజ్, వరిజ్ సాయం కిదెజ్ పోస్నాట్. ఎందనిజ్ ఇహిజ, నిని పూజెజ దేవుణు సర్దద ఆనాన్.

17 మీ అతికారిజ మాటెజ్ వెండ్రు. వరి అతికారమ్దిజ్ లోజీదు, వారు మిజీ జాగర్త సూణార్. ఎందనిజ్ ఇహిజ వరి పణిదిజ్ దేవుణుదిజ్ లెక్క ఒపజెప్తెజ్ ఇజి వారు నెస్నార్. మీరు వరిజ్ లోజీతిజ, వారు సర్దదాన్ వరి పణిజ్ కినార్. సిలిజ వారు దుకమ్దాన్ కినార్. అయాకెజ్ మిజీ నెగికెజ్, సిఉ.

18 మా వందిజ్ పార్దనం కిదు. మా గర్బం మజీ గదిన్ఎండ మన ఇజి మాపు పూర్తి నమ్మిజినాప్. మాపు కిజిని దని లోఇ నెగ్రెండ విజు కిదెజ్ కోరిజినాప్.

19 దేవుణు బేగినె నజి మీ డగ్రు మర్జ తలెజ్ మీరు మరి లాపు పార్దనం కిదెజ్ ఇజి నాను ముకెలం బతిమాల్జిన.

20-21 దేవుణు మా ప్రబు ఆతి యేసుజ్ సావుదాన్ నిక్తాన్. వాండ్రె గొరెజ పెరి గవుడువన్. ఎందనిజ్ ఇహిజ, వాండ్రు వన్ని నల వాక్తాండ్రె సాతాన్. వన్ని నలదాన్ వాండ్రు ఎలాకాలం వందిజ్ ఒప్పుమానం ముద్ద కిత్తాన్. లోకురిజ్ సమాదనం సీని దేవుణు, వన్నిజ్ ఇస్టం ఆతికెజ్ కిదెజ్, మిజీ నెగికెజ్ వాదెజ్ సాయం కిపిన్. యేసు క్రీస్తు సత్తుదాన్, వన్నిజ్ ఇస్టం ఆతికెజ్ విజు మా లోఇ కిపిన్. వన్నిజ్ ఎల్లకాలం గవరం మనిద్. ఆమెన్.

22 తంబెరిజాండె, నాను మిజీ ఉండ్రె ఇజి ఉత్తమ్నె రాస్త మన. అందెజె, నాను పణిజి మాటెజ్ జాగర్త వెండ్రు ఇజి ఉసార్ కిబిన్.

23 మా తంబెరి ఆతి తిమోతి జెలిదాన్ డిబె ఆతాన్ ఇజి మీరు నెస్సెజ్ ఇజి నాను కోరిజిన. వాండ్రు ఇబ్బె బేగి వాతిజ, మిజీ సుడేదెజ్ వన్నిజ్బా నా వెట తన.

24 మిజీ నడిపిసిని విజెరిజ్, దేవుణు లోకుర్ విజెరిజ్ నాను వెన్బాతి లెకెండ్ వెప్తు. ఇటలిదు మని నమ్మిత్తికార్ మిజీ వెన్బాతి లెకెండ్ వెప్పినార్.

25 దేవుణు దయా దర్మం మీ విజెరె వెట మనీద్.

## యాకోబు రాస్తా ఉత్త్రం

నెల్లకబిసినిక

యా ఉత్త్రం రాస్తా యాకోబు ప్రబుఆతి యేసుజ్ తంబెరసి ఆతికాన్. యాకోబు యెరుసలేమ్దు మన్ని సజమ్ది పెద్దెలిజ లోణ ఒరెన్. యాక రాస్తా కాలం రమారమి క్రీస్తు సకం 45 దాన్ 50 నడిమి కాలమ్దు రాస్త మనాన్. యా ఉత్త్రమ్దు ముకెలమాతిక నమకమ్దిజ్ రుజుప్ కినికాదె. నమకం నిజమాతికదొ ఆవదో ఇజి ఎలాగ నెస్తెజ్ ఇజి రాస్త మనాన్.

1 దేవుణుదిజ్ని, ప్రబు ఆతి యేసు క్రీస్తుజ్, సేవకినికానాతి యాకోబు, ఆణ దేసెమ్కాజ్ సెద్రితి మని దేవుణు లోకాజ్ విజేరిజ్ రాసిని ఉత్త్రం. మిజి విజేరిజ్ వందనమ్కు.

మాలెజ్ వానివలె అక్కెజ్ ఓరిస్తెజ్వలె

2-3 నాను ప్రేమిసిని తంబెరిజండె, నండొ మాలెజ్ వానివలె మీరు సర్దదాన్ మండ్రు. ఎందనిజ్ ఇహిజ, మాలెజ్ వానివలె యేసుప్రబు ముస్సు. మన్ని నమకం డిన్ఎండ మహిజ, మాలెజ్ బిరిస్తెజ్ మిజి సత్తు మనాద్ ఇజి దినివలెహాన్ రుజుప్ వానాద్.

4 మీరు కిజిని పణిదు డిన్ఎండ ఓరిసి మండ్రు. అయాలెకెండ కితిజ మీరు కన్టం బరిస్సిదన్ని లోణ పూర్తి ఆతికిదెర్ అనిదెర్. అయాలెవెలె మీ గుణమ్దు ఇనికబా తక్కు సిల్లెండ మంజినిదెర్.

5 మీ లోణ ఎయెజ్బా గెణం తక్కు మహిజ, వాండ్రు దేవుణుదిజ్ లొస్తెజ్. దేవుణు వన్నిజ్ సీనాన్. ఎందానిజ్ లొసినార్ ఇజి కోపం ఆవిండ దేవుణు విజేరిజ్ తక్కు సిల్లెండ సీనాన్.

6 గాని, వాండ్రు కండెక్బా అనుమానం సిల్లెండ నమకమ్దాన్ దేవుణుదిజ్ లొస్తెజ్. ఎందానిజ్ ఇహిజ అనుమానం అనికాన్ గాలిదాన్ ఎగ్రిని సమ్దరమ్ది ఉల్కెలెకెండ తూల్లి అర్ని జోజ్జివజ ఆనాన్.

7-8 అనుమానం అనికాన్ దేవుణు బాణిజ్ ఇనికబా దొహ్కాద్ను ఇజి ఒడెబినిక ఆవిద్. అనుమానం అనికాన్ రుండి మన్సుజ్ ఆజి ఇనిదన్ని లోణబా స్తిరం సిల్లికాన్.

9 దేవుణుదిజ్ నమ్మితి బీదవాండ్రు, దేవుణు వన్నిజ్ పెరికాన్ కిత్తిజ్ సర్ద ఆజి మండ్రెజ్.

10 అయావజనె ఆస్తి మనికాన్, వన్నిజ్ కల్గెతిక తక్కు ఆజి ఇజిరికానాతిజ్బా సర్ద ఆజి మండ్రెజ్. ఎందానిజ్ ఇహిజ ఉండ్రి గడ్డి పూజు వెటనె రాల్పవజ, ఆస్తి మనికాన్ ఆహ ఆన సొనాన్ ఇజి వాండ్రు నెస్సాన్.

11 పొద్దు సోసి నండొ ఎండ కిత్తిజ్ గడ్డి వహ్నా సొనాద్, పూజు రాల్ప సొనాద్. అయ పూజు సోకు విజు పాడాన సొనాద్. అయావజనె గణస్తెజ్ కిని పణిలోణ ఆస్తి మన్నికాన్ సిల్లెండ ఆనాన్.

12 మాలెజ్ వానివలె దేవుణు ముస్సు. నమకం డిన్ఎండ అక్కెజ్ బరిస్సికాన్ సర్ద ఆనాన్. మాలెజ్ విజు బిరిస్తి వెనుక దేవుణుజ్ ప్రేమిస్తెవరిజ్ సీనా ఇజి ఒట్టు కిత్తి ఎలాకాలం బత్కిని బత్కు ఇని ఇనాయం దేవుణు సీనాన్.

13 తప్పుపణి కిదెజ్ మన్సుద్ వాతివెలె, అక్క దేవుణు సిత్తిక ఇజి ఎయెన్బా వెహ్పాక ఆవిద్. ఎందానిజ్ ఇహిజ సెణ దన్నిదటాన్ దేవుణు తప్పుపణి కిబిస్తెజ్ అట్వన్. తప్పుపణి కిబిస్తెజ్ దేవుణు ఎయెరి మన్సుదుబా ఆన పుటిన్ఎన్.

14 గాని ఒరెన్ ఒరెన్ వన్ని సొంత మన్సుదాన్ మన్ని ఆసదాన్ మర్జి లాగె ఆజి సెణ పణి కిజినాన్.

15 తప్పుకిదెజ్ మన్ని ఆన ఎలాగ ఇహిజ అయ్లికొడొః పొటాద్ పిండెం ఆతిలెకెండె అయాక పిరితివలె ఏరు ఈబాజినాద్. అయాలెకెండ ఒరెన్ మన్సుదు సెణ ఆన నండొ ఆజి పాపం పుట్టాద్. పాపం ముద్రితిజ వన్నిజ్ సొపు వాజినాద్.

16 నాను ప్రేణిని తంబెరిజండె, ఎయెర్బా మిజి మోసం కివిండ సుడెదు.

17 నెగ్గెజ్ విజు, కల్లిసిల్లికెజ్ విజు దేవుణు సీని ఇనాయమ్కునె. ఆగసమ్దు మన్ని జాయ్ విజు వుటిస్తి దేవుణుబాణిజ్ నెగ్గెజ్ విజు వాజినె. జాయ్ సొన్ని నీడః వానాద్. గాని దేవుణు మార్ఇకాన్.

18 నిజమాతి వన్ని మాటదాన్ వాండ్రు తీర్మనం కిత్తిలెండె దేవుణు మజి కొత్త బత్కు సిత్తాన్. ఎందానిజ్ ఇహిజ పుటిస్తి విజు వనకముస్సు. దేవుణు మజి వన్ని వందిజ్ ఎర్లిసి ఇట్టాన్.

దేవుణు మాట వెంజి అయ మాటవజ నడిదెజ్వలె

19 నాను ప్రేమిసిని తంబెరుజాండె, యాక నెగ్రిండ వెండ్రు. ఒరెన్ ఒరెన్ బాగ వెంజి, వెహి వెటనె వర్గివిండ, వెహి వెటనె కోపం ఆవిండ మండ్రెజ్.

20 ఒరెన్ కోపం ఆతిజ దేవుణుదిజ్ ఇస్టమాతివజ నీతినిజయ్దాన్ పణి కిదెజ్ అట్వన్.

21 అందెజె మన్సుద్ నిండ్రితీ సెకకెజ్ విజు డిసిసీజి, పిరిజివాని సెక అలవాటుజ్ విజు డిసిసీజి, మిజినె తగిసి దేవుణు మీ మన్సుదు ఇట్టి మాటెజ్ లోజెదు. దేవుణు మీ మన్సుదు ఇట్టి ఆ మాటెజ్ లోక, మిజి గెల్పిస్తెజ్ సత్తు మన్నె.

22 మీరు దేవుణు మాటెజ్ వెండ్రెజె ఆవెద్. దేవుణు మాట వెంజి అయ మాట వజ నడిదెజ్ బావలె. దేవుణు మాటెజ్ వెంజి అయవజనె నడివండ మహిజ మిజి మీరె మొసెం కిజినిదెర్.

23 దేవుణు మాట వెంజి అయావజ నడికకాన్ అద్దమదు వన్ని మొకొం సుడెతి వన్నిలెకెండ్ మనాన్.

24 వాండ్రు అద్దమదు సుడెజి మర్జి సొహి వెటనె వన్ని మొకొం, ఎలాగ మర్తికదొ ఇజి పొసినాన్.

25 దేవుణు వెహ్తా పూర్తి ఆతి రూలుజ్ లోకాజ్ పావమదాన్ డిసిస్సాద్లె. ఒరెన్ లోకు దేవుణు వెహ్తా అయ మాటెజ్ విజు నెగ్రెండ నద్వీజి బాన్ మనికెజ్ పొన్వండ అయావజనె వన్ని బత్కుదు నడితిజ, వాండ్రు కిని విజు పణిజలొక దేవుణు వన్నిజ్ దీవిస్సాన్.

26 ఎయెన్బా, నజి దేవుణు మున్సు నండొ బక్తి మనాద్ ఇజి వెహ్సి వెనుక, వన్ని నాలిక అడ్డు సిల్లెండ వర్గితిజ వన్నిజ్ మన్నిబక్తి విలువ సిల్లికాద్. వన్నిజ్ వాండ్రె మొసెం కిబె ఆజినాన్.

27 మా బుబ్బాతి దేవుణు సుడెతిజ నిజమాతి బక్తి ఇనిక ఇహిజ, యాయ బుబ్బార్ సిల్లి కొడెరిజ్, ముండ మణిసి ఆతి అయ్లొకొడెకాజ్ వరి కస్టమదు సాయం కిదెజ్, దేవుణుదిజ్ పడిక వనకలొక కూడెవండ మండ్రెజ్ ఇకాదె నిజమాతి బక్తి.

## 2

### విజెరిజ్ ఉండ్రెలెకెండ్ సుడెదెజ్ వలె

1 నాను ప్రేమిసిని తంబెరిజండె, గొప్పు జాయదాన్ నిండ్రితీ సోకు మన్ని ప్రబువాతి యేసుక్రీస్తుజ్ నమ్మిత్తి మీరు, లోకాజ్ నడిమి తేడ తోరిస్సాట్.

2-4 ఎలాగ ఇహిజ బజారం బొందు ఇట్కిజి, నండొ దరది సొక్కెజ్ పొర్పాజి ఒరెన్, మరి ఒరెన్ బీదవాండ్రు, మీరు పార్లనం కినిబాన్ యా రిఎర్ వాతార్ ఇహిజ, నెగ్గి సొక్క పొర్పాజి వాతివన్నిజ్ మర్యాద సీజి అయ బీదవన్నివెట, “నీను అబ్బె నిల్త, సిల్లిజ నా కాల్కు డగ్రు ఇబ్బె అడిగి బన్అ”, ఇజి వెహ్తాజ, మీరు బీదవన్నిజ్ ఆస్తిమన్ని వన్నిజ్ ఎర్లిస్తిలెకెండ్ మంజినాద్. ఈహు మీరు మీ మన్సుదు మన్ని సెక ఉదెనమదాన్ లోకాజ్ తీర్పు కిజినిదెర్.

5 నాను ప్రేమిసిని తంబెరిజండె, మీరు నెగ్రెండ వెండ్రు. యా లోకమది బీదవారు దేవుణు మున్సు ఇడ్డి నమకం వందిజ్ ఆస్తి మన్నికారాదెజ్ దేవుణు వరిజ్ ఏర్పాటు కితాన్. దేవుణుదిజ్ ప్రేమిసిని వరిజ్ సీనా ఇజి ఒట్టు కిత్తి దేవుణు రాజ్యం దేవుణు వరిజ్ సీనాన్.

6 గాని మీరు బీదవరిజ్ సిగు కిజినిదెర్. మిజి మాలెజ్ కినికార్ ఆస్తిమన్నికారె గదె. మిజి కోర్టుదు లాగ్జి ఒనికార్ వారె గదె.

7 మీరు అసిని యేసుక్రీస్తు నెగ్గి పేరు, వీరె దూసిసినార్ గదె.

8 దేవుణు మాటదు మన్ని ముకెలమాతి రూలు ఇనిక ఇహిజ, నీను నిజి ప్రేమిసిని లెకెండ్ మహివరిజ్ బా ప్రేమిన్అ\* ఇజి ఆహు కిత్తిజ మీరు బాగ నడిసినిదెర్.

9 గాని మీరు విజెరిజ్ ఉండ్రె లెకెండ్ సుడెవండ మహిజ పాపం కిజినిదెర్. దేవుణు సిత్తి రూలు మీరు తప్పిదెర్ ఇజి తీర్పు వాజినాద్.

10 ఎయెరుబా దేవుణు రూలుజ విజు వన్కాజ్ లోజెజి ఉండ్రీ రూలు తప్పిజ విజు రూలుజ్ తప్పిలెకెండ్.

11 మీరు రంకు బూలానిక ఆవద్ ఇజి రూలు మనాద్. లోకాజ్ సప్పిక ఆవద్ ఇజిబా రూలు మనాద్. మీరు రంకు బూలాఇదెర్ గాని లోకాజ్ సప్పిజ విజు రూలుజ్ తప్పిలెకెండ్.

12 లోకాజ్ విడుదల సీని రూలుదాన్ దేవుణు మిజి తీర్పు కినిన్లె. అందెజె సరి ఆతి మాట వర్గిదు, ఆహె నడిదు.

13 ఎందానిజ్ ఇహిజ, కనికారం తోరిన్ ఇ వన్నిజ్ కనికారం సిల్లి తీర్పు వానాద్. గాని దేవుణు తీర్పుకినివలె కనికారం తోరిస్తి వన్ని మున్సు దేవుణు కనికారమనె గెలిస్సాద్దె. వన్నిజ్ తీర్పు రెవద్. ఎందానిజ్ ఇహిజ దేవుణు తీర్పు కిదెజ్ తయార్ ఆతిజ్ బా వన్ని కనికారం తీర్పుదిజ్ ఇంక పెరిక.

### నెగ్గి పణిని నమకం

14 నా తంబెరిజండె, ఒరెన్ దేవుణు మున్సు నమకం మనాద్ ఇజి వెహ్సి నమ్మకమదిజ్ తగ్గివజ పణి కివండ మహిజ వన్నిజ్ లాబం సిల్లెద్. నన్ని నమకం వన్నిజ్ గెల్పిన్వద్.

\* 2:8 2:8 తేవి 19:18.



15-16 ఉండ్రీ వేల ఒరెన్ తంబెరి గాని తజిసి గాని సరి ఆతి సొక్కపాతెజ్ సిల్లెండ, తిండి సిల్లెండ మహివలె వరిజ్ కావాలిస్తే వనకాజ్ వందిజ్ ఇని సాయం కివిండ, “ఏలు సొన్అ, సిను కాయ్జి నెగ్రెండ ఉణిజి మన్అ”, ఇజి వెహ్తాజి ఇని లాబంబా సిల్లెద్.

17 అయావజనె నమకమ్దిజ్ తగితి పణి కివిండ, నమకం ఉండ్రె మహిజ అయ నమకమ్దాన్ ఇని లాబం సిల్లెద్.

18 గాని మీరు ఒప్పుకొడెడెర్ను. ఒరెన్ వన్నిజ్ దేవుణు మున్ను నమకం మనాద్ ఇజి వెహ్సానిదెర్ను, మరి ఒరెన్ వన్నిజ్ నెగ్గి పణిజ్ మన్నె. గాని నెగ్గి పణిజ్ కివిండ మిజి నమకం మనాద్ ఇజి ఎలాగ మీరు తోరిస్సిదెర్ ఇజి నాను వెన్బాజిన. నాను నా నెగ్గి పణిజాణ్ నా నమకం తోరిస్సు.

19 దేవుణు ఒరెండ్రె ఇజి నీను నమ్మిజిని. ఆహె నమ్మిదెజ్ నెగ్గెదె. దెయమ్కుబా ఆహె నమ్మిజి తియెలాజి వణక్సిని.

20 బుద్ది సిల్లికి, నిజి నమకం మనాద్ ఇజి తోరిసిని నెగ్గి పణిజ్ సిల్లు ఇహిజ అయ నమకం పణిదిజ్ రెఇక ఇజి నీను నెన్ఇదా?

21 మా అనిగొగొ ఆతి అబ్రహాం, వన్ని మరిసి ఆతి ఇస్సాకుజ్ పూజి కిదెజ్ పూజి బసాదు ఒత్తివలె, వాండ్రు కిత్తి పణిదాన్ నీతి నిజయ్లు మన్నికాన్ ఇజి దేవుణు వన్నిజ్ ఇడ్తాన్.

22 సుడెడు, వన్ని నమకమ్ని, వాండ్రు కిత్తి పణి రుండిబా కూడజి వన్ని నమకం పూర్తి ఆతాద్.

23 “అబ్రహాం దేవుణుదిజ్ నమ్మిత్తాన్. అందెజె దేవుణు వన్నిజ్ నీతినిజయ్లు మన్నికాన్ ఇజి ఒప్పుకొటాన్”, ఇజి దేవుణు మాటదు రాస్తి మాట ఆహె జర్గితాద్. మరి దేవుణు కూలాయెన్ ఇజి పేరు వన్నిజ్ వాతాద్.

24 ఎయెన్బా దేవుణు మున్ను మన్ని నమకం ఉండ్రెదానె ఆవిద్, నెగ్గి పణిజాణ్బా నీతినిజయ్లుకాన్ ఇజి దేవుణు ఇడ్తాన్ ఇజి మీరు నెసినిదెర్.

25 అయావజనె సాని బూలానికాద్ ఆతి రాహాబుబా పట్టుమ్దిజ్ నడిః సిల్లెండ సుడెదెజ్ వాతి వరిజ్ దన్ని ఇండ్రో బాడ్డి సీజి ఆఇ సరి దాన్ పొక్తాద్. అది కిత్తి నెగ్గి పణిదాన్ నీతినిజయ్లుకాద్ ఇజి దేవుణు ఇడ్తాన్.

26 పాణం సిల్లి ఒడెఃల్ సాతికదె. అయావజనె నెగ్గి పణి సిల్లి నమకం సాతి వజనె.

### 3

#### నాలికదిజ్ అడ్డు కిదెజ్

1 నాను ప్రేమిసిని తంబెరిజండె, మీ లొఇ నండెండార్ బోద వెహ్సికిదెర్ ఆమాట్. ఎందానిజ్ ఇహిజ, బోదిసినికార్ ఆతి మిజి దేవుణు గటిజ్ ఆతి తీర్పు సీనాన్ ఇజి మీరు నెసినిదెర్.

2 మాటు విజేట నండె పణిలొఇ తప్పి సొన్నినాట్. గాని ఎయెన్బా వాండ్రు వెహ్సి మాటెజి లొఇ ఎనెజ్బా తవ్వెండాతిజి వాండ్రు పూర్తి ఆతికాన్, ఇని తపు సిలికాన్. వాండ్రు వన్ని ఒడెఃల్ మన్ను విజు అణసె ఆజి మండ్రెజ్ అట్నాన్.

3 గుర్రమ్ది వెయ్దు కలెం\* ఇట్టిజి అక్క లొజిజినాద్. అయ ఇజిరి కలెమ్దానె మజి ఇష్టమాతి బాడ్డిదు దన్నిజ్ మవైజ్ ఆనాద్.

4 సిల్లిజి ఉండ్రీ ఓడెఃదిజ్ సుడెడు. అక్క ఎసా పెరిక ఆతిజ్బా, పెరి గాలిదాన్ సొనికెజ్ ఆతిజ్బా, ఓడెడు మన్ని సుకాని ఇని ఇజిరి మరదాన్ ఓడెః నడిఃపిసినికాన్, వన్నిజ్ ఇష్టమాతి బాడ్డిదు ఒసినాన్.

5 అయాలెకెండె నాలికబా ఇజిరిక ఆతిజ్బా అక్క గొప్ప వనక వందిజ్ పొజిజి వర్గిజినాద్ ఎస్సా ఇజిరి సిను ఆతిజ్బా పెరి గొరొన్ది మరెకాజ్ విజు సుర్నపొక్కాద్.

6 నాలికబా ఉండ్రీ సిను లెకెండె. ఒడెఃల్దు మన్ని వనకలొఇ అక్క పూర్తి సెఇక. అక్క ఒరెన్ వన్నిజ్ పూర్తి సెఎణ్ కిజినాద్. నరకమ్దానె వాతి సిను నాలికాదు కసి వన్ని బత్తు విజు నాసనం కిజినాద్.

7 విజు రకమ్కాణి జంతుజ, ఆగసమ్దు మన్ని పొటిజ, సరాన్కాజ్, ఏరు లొఇ మన్ని విజు మొయెజ, లొజిస్తెజ్ లొకు అట్నాన్.

8 గాని ఎయెర్బా నాలికదిజ్ లొజిస్తెజ్ అట్ఎర్. అది పూర్తి సెఇక. దనిజ్ అడ్డు కిదెజ్ ఎయెర్ అట్ఎర్. సావుదిజ్ తగితి వినం తసినాద్.

9 యా నాలికదానె బుబ్బాతి దేవుణుదిజ్ స్తుతి కిజినాట్. యా నాలికదానె దేవుణు మూర్తి లెకెండె పుటిస్తి లొకాజ్ సయివ్ సీజినాట్.

10 ఉండ్రె వెయుదానె నెగ్గి మాటజ్, సయివ్ సీని మాటెజ్ వాజినాద్. నా తంబెరిజాండె, మీరు ఆహె మంజినిక ఆవిద్.

11 ఉండ్రె ఊటదానె నెగ్గి ఏరుని సెఇ ఏరు రెఉ.†

\* 3:3 3:3 గుర్రం వెయ్దు ఇడ్డి ఇజిరి సెక్క ముక్క అక్క గుర్రం వెయ్దు మహిజానె దన్నిజ్ నడిఃపిస్తెజ్ ఆనాద్. † 3:11 3:11 బూమిలొఇహాన్ నెగ్గి ఏరుని సెఇ ఏరు వానె. బానె సెఇ ఏరునె వానె. తియాజ్ ఆఉ. సోరు మన్నికాదె.

12 బోడె మరాతు ఒలివ పట్టు అన్ఉ. ద్రాక్స తివాద్ బోడె పట్టు రెఉ. అయావజనె సోరు ఏరు సోని ఉటదాన్ నెగ్గి ఏరు రెఉ.

### రుండి రకమ్కాణి గెణమ్కు

13 మీ లోఇ గెణం తెలివి మన్నికాన్ మహిజ, అక్క వన్ని నెగ్గి బత్తుదాన్ రుజువ్ కిదెజ్. గెణమ్దాన్, లోజిజి మంజిని గుణం వానాద్. నజీ గెణం తెలివి మనాద్ ఇజి లోజిజి మంజిని గుణమ్దాన్ వాండ్రు కిని పణి లోఇ తోరిసిన్.

14 గాని మీ మన్నుదు నండో పగ, గోస, మీ వందిజ్ మన్ని మన్ను ఇడఃతిజ మీ గెణం వందిజ్ పొజిదెజ్ ఆవిద్. మీ గెణం వందిజ్ వెప్పొక నిజం ఆవిద్.

15 నన్ని బుద్ది దేవుణు సిత్తిక ఆవిద్. అక యా లోకమ్దాన్, లోకు బుద్దిదాన్, సయ్తానుబాణిజ్ వాతి గెణమె.

16 ఎంబె గోస, మీ వందిజె మని మన్ను మనాదో, అబ్బె టంటెజ్, విజు రకమ్కాణి పాపమ్కు మంజినె.

17 గాని దేవుణుబాణిజ్ వాని గెణం కల్తి సిల్లిక. అయ గెణం మన్నికార్ సమదనమ్దాన్, సార్లిదాన్, విజేరెవెట కూడఃజి, లోజిజి మంజిని బుద్దిదాన్, కనికారమ్దాన్, నెగ్గి పణిజాణ్, విజేరిజ్ ఉండ్రెలెకెండ సుడఃజి, నిజమ్దాన్ పణి కినార్.

18 సమదనం కినికార్ సమదనం విత్తి, నీతి నిజయ్తి ఇని పంట కొయ్నార్.

## 4

### దేవుణుదిజ్ లోజిదు

1 మీ లోఇ జటిజ్ ఆదెజ్, పోట్లాడఃదెజ్ బుద్ది మనాద్. సుకం మున్ను మండ్రెజ్ ఇజి మీ మన్నుదు మన్ని ఆసదానె నన్ని బుద్ది వాజినాద్.

2 మీరు ఇనికెజో దోహ్కూద్ ఇజి ఆస ఆజినిదెర్ గాని అకెజ్ మిజి దోహ్కాంండ ఆజినె. అయావలె మీరు సప్పిదెర్. ఇతాహా వరిది ఆస ఆనిదెర్ గాని దోహ్కెన్జెజ్ అభిఇదెర్. మీరు టంటెజ్ ఆజి పోట్లాడఃజినిదెర్. మిజి కావాలస్తిక ఎందానిజ్ దోహ్కెవద్ ఇహిజ, మీరు దేవుణుదిజ్ లోన్ఇదెర్.

3 మీరు లోస్సివలె మిజి దోహ్కెవద్. ఎందానిజ్ ఇహిజ మీరు సెఇ ఉదెసమ్దాన్ లోస్సిదెర్. సుకం మున్ను మండ్రెజ్ ఇజి మీరు లోస్సిదెర్.

4 మీరు దేవుణుదిజ్ డిసి సాహికిదెర్. యా లోకమ్దిజ్ ప్రేమిస్తికాన్ దేవుణుదిజ్ విరోదమాతికాన్ ఇజి మీరు నెన్ఇదెరా? యా లోకమ్దిజ్ కుల తోహ్తికాన్ దేవుణుదిజ్ పడిఃఇకాన్ ఆనాన్.

5 దేవుణు మా లోఇ ఇత్తి ఆత్మ, మా వందిజ్ నండో ఆస ఆజినాన్ ఇజి దేవుణు మాటదు మనాద్. అయ మాట నిజం ఇజి మీరు నెసినిదెర్.

6 గాని దేవుణు సత్తుదాన్ కూడిఃతి దయాదర్మం మీరు ఆస ఆని దన్నిజ్ ఇంక నండో సీజినాన్. అందెజె “గర్త్ర ఆని వరిజ్ దేవుణు ఎద్రిసినాన్. గాని తగి ఆతి మన్ని వరిజ్ దయాదర్మం సీజినాన్”, ఇజి దేవుణు మాటదు వెప్పొనాద్.

7 అందెజె మీరు దేవుణుదిజ్ లోజిదు. సయ్తానిదిజ్ ఎద్రిస్తు. అయావలె సయ్తాన్ మీబాణిజ్ ఉహ్కూ సానాన్.

8 మీరు దేవుణు డగ్గు రద్దు. అయావలె మీ డగ్గు రద్దు. అయావలె దేవుణు మీ డగ్గు వానాన్. మీరు కిని పణిజి లోఇ ఇని తప్పుబా మన్విండ మండ్రెజ్, పాపం పణిజ్ విజు డిసిసీదు. దేవుణుదిజ్, లోకమ్దిజ్, ప్రేమిసిని రుండి మన్ను డిసిసీజి, దేవుణుదిజ్ ప్రేమిసిని ఉండ్రె మన్ను ఆజి మండ్రు.

9 మీ పాపం వందిజ్ ఒడఃబిజి దుకం ఆజి నండో అడఃబాదు. మీరు సిక్కిక డిసి, అడఃబాదు. మీరు సర్ద డిసి, దుకం ఆదు.

10 దేవుణు ముజాల మీరు తగిజి మండ్రు. అయావలె దేవుణు మిజి గవ్తం సీనాన్.

11 నాను ప్రేమిసిని తంబెరిజాండె, ఒరెన్ మున్ను ఒరెన్ విరోదం వర్గిమాట్. మరి ఒరెన్ వన్నిజ్ పడిఃఇక వెప్పొకాన్, మరి ఒరెన్ వన్నిజ్ తీర్పు కినికాన్. దేవుణు వెప్తి రూలుదిజ్ విరోదం ఆజినాండ్రె దేవుణు సిత్తి రూలుదిజ్ వాండ్రు నెక్కిపొక్కినాన్. మీరు దేవుణు రూలుజ్ నెక్కిపొక్కిజ మీరు దేవుణు రూలుదిజ్ లోబడఃఇదెర్. గాని దేవుణు రూలుజ్ సరిఆతికెజో, ఆవిదో ఇజి మీరు తీర్పు తీరిసినికార్ ఆనిదెర్.

12 విజు రూలుజ్ సీనికాన్ దేవుణునె. విజేరిజ్ తీర్పు సీనికాన్ దేవుణునె. ఒరెన్ వన్నిజ్ గెల్పిస్తెజ్ వాండ్రు అట్వాన్. ఒరెన్ వన్నిజ్ నాసనం కిదెజ్ వాండ్రు అట్వాన్. పడఃకాతి వన్నిజ్ తీర్పు సిదెజ్ నీను ఎయి?

### మర్స రోజు వందిజ్ పొజిదెజ్ ఆవిద్

13 నాను వెప్పొక నెగ్గెండ వెండ్రు. మీ లోఇ సెగొండార్ ఈహు వెహ్సార్, “నేండ్రు సిల్లె, విగెహిజ్ ఎంబె ఎంబె ఉండ్రె పట్టుం సొన్ని, అబ్బె ఉండ్రె ఏంటు మంజి బేరం కిజి నండో డబ్బు గణన్ను”.

14 అహిజ, విగెహిజ్ నీ బత్కుదు ఇనిక వానాదో నిజి తెలివద్. నీ బత్కు సణెం తోరె ఆజి సణెమ్దిజె మాయ ఆని ఆవిరి నన్నిక.

15 అందెజె మీరు ఈహు వెహైజ్, “దేవుణుదిజ్ ఇన్ఱం మహిజ మాపు బత్కినాప్, అక్క కినాప్, ఇక్క కినాప్”.

16 గాని మీరు గర్ర ఆజినిదెర్. మీరు మీ వందిజె పొజిజినిదెర్. ఇక్క విజు తప్పు.

17 ఎయెర్బా సరిఆతి పణి ఎమేణిక ఇజి నెసి, అయాలెకెండ్ కివండ మహిజ వాండ్రు పాపం కిజినాన్.

## 5

### ఆస్తి మన్నికార్ జాగర్త మండ్రు

1 ఆస్తి మన్నికార్ నాను వెహిజ్ వెండ్రు. మిజి వాని గొప కన్ఱమ్క వందిజ్ దుకమ్దాన్ నండో అడఃబాదు.

2 మీ ఆస్తి విజు పాడాఃన సొనాద్లె. మీ పాతెజ్ విజు సెద తినెలె.

3 మీ బజారం, వెండిదిజ్ కరి తినాద్లె. దేవుణు తీర్పు కినివలె ఆ కరి నీ ముస్కు రుజుప్ మంజి సినువజ మిజి నాసనం కినాద్లె. మీరు గణస్తి ఆస్తి విజు, దేవుణు తీర్పు కిని రోజు వందిజ్ కుంబ కిజినిదెర్.

4 సుడఃదు, మీ బూమిదు పణి కిత్తివరిజ్ కూలి డబ్బు సిఇతిదెర్. అయా కూలిడబ్బు మీ ఎద్రు మొరొ ఆజినె. మీ పంట కొయ్యివరి మొరొ గొప్ప సత్తు మన్ని దేవుణుబాన్ సొహాద్.

5 మీరు యా లోకమ్దు మహివలె సుకం ముస్కు మంజి సర్దదాన్ బత్కితిదెర్. కొయ్దెజ్ బలస్తి మన్ని కోడ్డిలెకెండ్ కడఃవెరి దినమ్కాజ్ వాని మీ నాసనమ్ వందిజ్ మీ మన్సు బలిసి వాతాద్.

6 తప్పు కిఇ వరిజ్ తప్పు కిత్తికార్ ఇజి నేరం మొప్పి, వరిముస్కు తీర్పు తపిసి సప్తిదెర్. మిజి ఎద్రెస్సెజ్ వారు అట్ఎతార్.

### కన్ఱమ్దు ఓరిసి మండ్రు

7 అందెజె, నా తంబెరిజాండె, ప్రబు ఆతి యేసు క్రిస్తు వాని దాక వన్నివందిజ్ ఓరిసి మండ్రు. సుడఃదు, ఒరెన్ రెయ్యు వాండ్రు గొప్ప విలువాతి వన్ని బూమి పంట బూమిపంట వానేండ ఎస్సాకాలం కాన మంజినాన్. ముజుల్ పిరుదిజ్, కడఃవేరి పిరుదిజ్ వాండ్రు కాన మంజినాన్.

8 అయావజనె మీరుబా ఓరిసి మండ్రు. మీ మన్సు కద్దివండ ఇడఃదు. ప్రబు ఆతి యేసు క్రిస్తు వాని రోజు డగ్రు ఆతాద్.

9 నాను ప్రేమిసిని తంబెరిజాండె, దేవుణు మిజి తీర్పు కివండ మండ్రెజ్ ఇహిజ ఒరెన్ ముస్కు ఒరెన్ మొరొ ఆమాట్. ఎందానిజ్ ఇహిజ దేవుణు మిజి తీర్పు సినాన్లె. తీర్పు కినికాన్ డగ్రునె మనాన్.

10 దేవుణు మాట వెహిజ్ ప్రవక్తరు ఎలాగ మహార్ ఇజి సుడఃదు. వరిజ్ నండో మాలెజ్ కిత్తిజ్బా వారు అక్కెజ్ బరిస్తార్.

11 నమకం డిఃన్వండ బరిసి మహికార్ సర్ద ఆనికార్ ఇజి మాప్ వెహిజ్నాప్ ఇజి మీరు నెసినిదెర్. యోబు, కన్ఱమ్కు వాతివలె ఓరిస్తిజ్ దేవుణు ఎలాగ వన్ని ఉదెసమ్కు పూర్తి కిత్తాన్ ఇజి మీరు వెహిదెర్. ఎందానిజ్ ఇహిజ దేవుణు నండో కనికారం, దయ మన్నికాన్.

12 ముకెలమాతి ఉండ్రీ మాట ఇనిక ఇహిజ మీరు ఆగసం తోడు గాని, బూమి తోడు గాని, మరి ఇనిదన్ని తోడుబా గాని అసి ప్రమాణం కినిక ఆవద్. మీ మాట ఒఱి ఇహిజ ఒఱి ఇజి, ఆవద్ ఇహిజ ఆవద్ ఇజి మండ్రెజ్. ఆహె మహిజ దేవుణు తీర్పు సినివెలె మిజి సిక్కు రెవద్.

### నమకమ్దాన్ కూడితి పార్దనం

13 మీ లొఇ ఎయెజ్బా మాలెజ్ వాతిజ వాండ్రు దేవుణుదిజ్ పార్దనం కిదెజ్. మీ లొఇ ఎయెజ్బా సర్దదాన్ మహిజ దేవుణు వందిజ్ పాటెజ్ పార్దెజ్.

14 మీ లొఇ ఎయెజ్బా జబ్బు మహిజ వాండ్రు సజం పెద్దెల్జ్ కూక్తెజ్. వారు ప్రబు పేరుదాన్ నూనె రాసి వన్ని వందిజ్ పార్దనం కిదెజ్.

15 నమకమాతి పార్దనం ఆ జబ్బుది వన్నిజ్ నెగెండ్ కినాద్. దేవుణు వన్నిజ్ నిక్వాన్. వన్ని పాపమ్కు దేవుణు సెమిస్సాన్.

16 అందెజె మీరు నెగెండ్ ఆనివందిజ్ ఒరెన్, పాపమ్కు మరి ఒరెన్ వన్నిజ్ ఒప్పుకోడిజి, ఒరెన్, మరి ఒరెన్ వందిజ్ పార్దనం కిదు. నీతి నిజయ్యి వాండ్రు కిని పార్దననమ్దిజ్ గొప్ప సత్తు మనాద్.

17 ఏలియ ప్రవక్త మానన్ని లోకునె. వాండ్రు బూమి ముస్కు పిరు రమ ఇజి గటిజి పార్దనం కితిజ్, మూండ్రీ పంటెజ్ ఆరు నెలెజ్ దాక బూమి ముస్కు పిరు రెవెతాద్.

18 ఏలియ మరి పార్దనం కితిజ్ ఆగసం పిరు సిత్తాద్. పిరు సిత్తిజ్ బూమి పంట సిత్తాద్.

19 నా తంబెరిజాండె, మీరు యాక నెస్తు. మీ లొణ ఎయెన్బా నిజమాతి సరి తప్తిజ, వన్నిజ్ మరి ఒరెన్ నిజమాతి సరిదు త్తైజె.

20 అహు కితిజ పాపం కిత్తిజ్ వాతి సావుదాన్, వన్ని ఆత్మదిజ్ తప్తిస్సాన్. దేవుణు వన్ని పాపమ్కాజ్ విజు సెమిస్సాన్.

## పేతురు రాస్తి మొదోహి ఉత్తం

నెల్ల కిబిసినిక

యా ఉత్తం రాస్తికాన్ యేసుప్రబుజ్ అపొస్తుడు ఆతి పేతురు. రమారమి క్రీస్తు సెకం 60 దు యా ఉత్తం రాస్తికాన్. అయా కాలమ్దు ఆసియాదు బానె బత్తిజి మహి క్రీస్తు లోకాజ్ మాలెజ్ వాజి మహా. ఏలుబడిః కిని రాజుర్ క్రీస్తు లోకాజ్ వరి నమకం వందిజ్ హిమ్స కిత్తార్. వరిజ్ దయరం కిబిస్తెజ్ యా ఉత్తం రాస్తికాన్. ముకెలమాతి మాటెజ్ ఇహొజ, కస్టమ్కు వానివలె ఓరిసి మండ్రెజ్, అతికారి లోకాజ్ లొజిజి మండ్రెజ్, దేవుణు వందిజ్ బత్తిదెజ్ ఇహొజ ఎలాగ నినికెజె.

1 యేసు క్రీస్తుజ్ అపొస్తుడు ఆతి పేతురు రాసిని ఉత్తం. పొంతు, గలతీయ, కపదొకియ, ఆసియ, బితునియ ఇని దేసమ్కాణ్ సెద్రితి మని ఆఇ దేసెమ్ది వరి లెకెండ మనివరిజ్, ఎయెర్ ఇహొజ దేవుణు వన్ని వందిజ్ ఏర్పాటు కితి వరిజ్ రాసిన్.

2 బుబ్బాతి దేవుణు మిజి ఎర్లిస్తెజె ఇజి ఒడఃబితాండ్రె వన్ని వందిజ్ మిజి ఎర్లిస్తాన్. యేసు క్రీస్తుజ్ లొజిజి వన్ని నలదాన్ నొరె ఆజి సుబరం ఆజి మండ్రెజ్ దేవుణు ఆత్మ మిజి కేట కిత మనాన్. మిజి దేవుణు దయా దర్మం, నిపాతి నిండ్రెజి మనీద్.

ఎలాకాలం ఎద్దు సుడఃజి మండ్రెజ్.

3-4 మాటు దేవుణుదిజ్ నండొ పొగిడిఃనాట్. వాండ్రె, మా ప్రబు ఆతి యేసుక్రీస్తుజ్ బుబ్బ. దేవుణు గొప్ప కనికారమ్దాన్ మజి కొత్త బత్తు సితాన్. ఎలాగ ఇహొజ, యేసు ప్రబుజ్ సాతి వరి లొఇహాన్ నిక్తాన్. నిక్తిజ్ ఎల్లకాలం ఎద్దు సుడఃజి మండ్రెజ్ కొత్త బత్తు మజి సితాన్. అక్కడె ఆవండ మజి ఉండ్రె అక్క సితాన్. అక్క పాడాఃజి సొన్ఇక, పూర్తి నెగ్గిక. ఎల్లకాలం మంజినిక. అక్క పరలోకమ్దు మీ వందిజ్ ఇట్టా మనాన్.

5 మీరు దేవుణుదిజ్ నమ్మితిజ్ దేవుణు వన్ని గొప్ప సత్తుదాన్ మిజి కాప్కిజి ఇడ్నాన్. కడఃవెరి రోస్కాణ్ మజి వాని సిక్కుదాన్ ఎలాగ గెల్పిస్తాన్ ఇజి తోరిస్తాన్.

6 దిన్ని వందిజ్ మీరు నండొ సర్ద ఆదు. గాని ఏలు సెగం రోస్కు మిజి కల్లితి అనెకమాతి విజు రకమ్కాణి కస్టమ్క వందిజ్ దుకం ఆదెజ్ వలె.

7 ఎందనిజ్ ఇహొజ, పడాఃజి సొని బజారం సిసుదు ఇడ్డి సుబ్రం కినార్ గదె. అయ లెకెండ బజారం ముస్కు విలువ మన్ని మీ నమకమ్బా కల్లి సెలిక ఇజి రుజుప్ కిదెజ్ వలె. ఆహె రుజుప్ కితిజ యేసు క్రీస్తు తోరె ఆనివలె నని నమకమ్ వందిజ్ మిజి పొగిడిఃనాన్. మిజి, గొప్ప గనం దోహ్కాద్.

8-9 మీరు వన్నిజ్ సుడఃజినిదెర్ గాని వన్నిజ్ ప్రేమిసినిదెర్. ఏలు సుడఃవండ మహిజ్బా వన్నిజ్ నమ్మిజినిదెర్. మరి, వెహైజ్ ఆట్ఇ నని గొప్ప సర్దదాన్ సర్ద ఆజినిదెర్. ఎందనిజ్ ఇహొజ మిజి యేసు క్రీస్తు ముస్కు మన్ని నమకమ్దానె, మీ పాణం ఎలాకాలం మంజిని సిక్కుదాన్ గెల్పిస్తెజ్ అట్నాద్.

10 మిజి వాని రక్కుణ వందిజ్ దేవుణు మాటెజ్ వెహై ప్రవక్తరు రెబాతరె బాగ నెస్తెజ్ సుడుఃతార్. దేవుణు మిజి సీదెజ్ ఇడ్డి యా దయా దర్మం వందిజ్ వారు వర్గితార్.

11 క్రీస్తు కస్టమ్కు ఓరిస్తి వెనుక గొప్ప గనం కల్లినాద్ ఇజి ప్రవక్తరు లొఇ మన్ని క్రీస్తు ఆత్మ అక్క జర్గివిండ మహి నండొ ముందాల్నె వరిజ్ వెహై మహార్. వెహైజ్ దన్ని అర్దం ఇనిక ఇజి వారు రెబాతార్. అక్కెజ్ ఎసెజ్ జర్గినెలె, ఎలాగ జర్గినెలె ఇజి రెబాతార్.

12 ఆహు రెబాతిజ్, వారు వరి వందిజ్నె ఆఎద్, మీ వందిజె వెహ్పినార్ ఇజి దేవుణు ఆత్మ వరిజ్ నెస్పిస్తాన్. పరలోకమ్దాన్ దేవుణు పొక్తి వన్ని ఆత్మ సత్తుదాన్ మిజి సువార్త వెహైకార్ యాక్కెజ్ మిజి నెస్పిస్తార్. పరలోకమ్దు మని దూతెజ్బా దిన్ని వందిజ్ నెస్తెజ్ ఇజి ఆస ఆజినార్.

దేవుణు వందిజ్ కేట ఆజి మండ్రు.

13 అందెజి మీ మన్నుదిజ్ తయార్ కిజి మండ్రు. మన్నుదు అణసె ఆజి మండ్రు. యేసుక్రీస్తు తోరె ఆనివలె మిజి దోహ్కొక్కి దేవుణి దయా దర్మం వందిజ్ పూర్తి ఆసదాన్ ఎద్దు సుడఃజి మండ్రు.

14 దేవుణుదిజ్ లొజిజి వన్ని కొడొఃర్ లకెండ మండ్రు. ముజల్నె మీరు దేవుణుదిజ్ నెన్ఎండ మహివలె సెఇ ఆసెజ వందిజ్ లెకెండ ఆహాట్.

15 గాని మీరు కిని విజు దని లోనుబా దేవుణు వందిజ్ కేట ఆజి మండ్రు. ఎందనిజ్ ఇహిజ వన్ని సొంతం ఇజి మిజి ఇడ్డికాన్ పరిసుదం ఆతికాన్.

16 ఎందనిజ్ ఇహిజ దేవుణు పరిసుదం ఆతికాన్. అయ లెకెండ్ మీరుబా పరిసుదం ఆజి మండ్రెజ్ ఇజి దేవుణు మాటదు రాస్త మనాద్.

17 బుబ్బు ఇజి కూక్కి మీరు పార్దనం కిజిని దేవుణు విజెరిజ్ వరి పణిజ నుడఃజి ఇని తేడః సిల్లెండ తీర్పు కిజినాన్. అందెజె మీరు యా లోకమ్దు కూడః వాతి వరిలెకెండ్ బత్కిని వలె దేవుణుదిజ్ తియెల్ ఆజి మండ్రు.

18 మీ అనిగొగొర్ బత్కితి లెకెండ్ దేవుణుదిజ్ నెన్ఎండ బత్కిని మీ బత్కు పణిదిజ్ రెజక. నన్ని బత్కుదాన్ యేసు ప్రబునె మిజి డిబిస్తాన్. సిల్లెండ ఆజి సొని వెండి బజారం మిజి డిబిన్ఎతాద్ ఇజి నెస్సిదెర్ గదె.

19 గాని ఇని తపు సిలి గొరె పిల్ల నని యేసుక్రీస్తు విలువాతి నలదాన్ నె మీరు డిఃబె ఆతిదెర్.

20 యా లోకెమ్దిజ్ పుటి సెలెండ మహివలెనె దేవుణు యేసుక్రీస్తుజ్ యా పణి వందిజ్ ఎర్లిస్తాన్. గాని యా కడెఃవెరి రోస్కాజ్ నె వన్నిజ్ పోక్తాన్. మీ వందిజె పోక్తాన్.

21 సాతి వరిబాణిజ్ దేవుణు నిక్తి యేసు క్రీస్తు వెటనె మిజి దేవుణు ముస్కు నమకమ్ మనాద్. నిక్తిజ్ వన్నిజ్ గొప్ప పెరికాన్ ఇజి ఇట్టాన్. అందెజె మీ నమకం దేవుణు ముస్కు ఇడ్డిదెర్. అందెజె దేవుణు ఒట్టు కితి దనిజ్ ఎర్దు సుడఃజి మంజినిదెర్.

22 నిజమాతి మాటదిజ్ మీరు లోజితిజ్ మీరు టేటజ్ ఆతిదెర్. అందెజె నమ్మితి వరిజ్ కల్తి సిల్లెండ ప్రేమిసినిదెర్. అహిజ నిజమాతి ప్రేమదాన్ మీ మన్సు పూర్తి సెమిస్తెజ్ వలె.

23 ఎందనిజ్ ఇహిజ సాజి సొని లోకాజ్ ఆవద్. గాని ఎల్లకాలం బత్కిని దేవుణుదునె మీరు పుట్టిదెర్. ఎల్లకాలం బత్కిని దేవుణు మాటదాన్ నె మీరు మరి పుట్టిదెర్.

24-25 ఎందనిజ్ ఇహిజ, “విజెరి లోకుర్ గడ్డి లకెండె వరి పేరు గడ్డి పుజు లెకెండె మనాద్. గడి వహ్వాద్. పుజు రాల్పు అర్వాద్. గాని ప్రబు ఆతి దేవుణు మాట ఎల్లకాలం మంజినాద్”, అయా మాట ఇనిక ఇహిజ మిజి సువార్త వెప్తా మని మాటనె.

## 2

1-3 యేసు క్రీస్తు ఎసొ నెగ్గికాన్ ఇజి మీరు నెసి సుడఃజి మహిదెర్. అందెజె ఆఇ వన్ని ముస్కు కుట్ట కినికెజ్, విజు మొసెం పణిజ్, మీ మన్సుదు మనికెజ్, డాఃప్పి మరి ఉండ్రె వెప్పికెజ్, కినికెజ్, గోస, మరిఒరెన్ వన్నిజ్ దూసిస్సిక యాకెజ్ విజు డిఃస్తు. ఏలు పుట్టి ఇజి కొడోఃర్ లెకెండ్ దేవుణు మాట ఇని కల్తి సిలి పాలు ఉండెజ్ నండె ఆస ఆదు. దని సత్తుదాన్ పిరిజి మీ బత్కు రక్కిస్తు.

**పాణం మన్ని పణుకు, దేవుణుదిజ్ ఎర్లిసి మన్ని లోకుర్.**

4 మీరు బత్కిజి మని క్రీస్తుబాన్ వాతిదెర్. ఇల్లు తొప్పికార్ పణిదిజ్ రెజక ఇజి నెక్కి పొక్తి పణుకు లెకెండె క్రీస్తు. లోకుర్ వన్నిజ్ నెక్కపొక్తార్ గాని దేవుణు వన్నిజ్ గొప్ప విలువాతికాన్ ఇజి ఎర్లిస్తాన్.

5 మీరుబా పణుకుజ్ లెకెండె దేవుణు మండ్రెజ్ ఇజి తొహా ఆని గుడిదిజ్ మీరు పణుకుజ్ లకెండె. గాని క్రీస్తు లెకెండె మీరుబా పాణం మని పణుకుజె. దేవుణుదిజ్ కేట ఆతి పుజెరి లోకుర్ లెకెండె మండ్రు. దేవుణుదిజ్ పొగ్డిజి, వందనమ్కు వెప్పి, వన్నిజ్ లోజిజి మంజి యేసు క్రీస్తు వలెహాన్ వన్నిజ్ తగితి పూజెజ్ సిదు.

6 దేవుణు మాటదు ఈహు రాస్త మనాద్ ఇనిక ఇహిజ ఇదిలో నాను సియెనుదు ఉండ్రె పణుకుదిజ్ ఎర్లిసిన. అయా మూల పణుకు గొప్ప విలువాతిక. వన్ని ముస్కు నమకం ఇడ్డికాన్ ఎయెన్బా సిగు ఆవన్.

7 అందెజె, యేసు క్రీస్తుజ్ నమ్మిత్తి మిజి, యా పణుకు గొప్ప విలువాతి పణుకు. గాని నమ్మితి వరిజ్ ఇనిక ఆనాద్ ఇహిజ, “ఇల్లు తొప్పికార్ నెక్కి పొక్తి పణుకునె మూలదిజ్ మూల పణుకు ఆతాద్”.

8 మరి రాస్త మనాద్ ఇనిక ఇహిజ “అయ పణుకునె లోకాజ్ ఆడ్డు కినాద్. అయ పణుకుదిజ్ తొరోడిజి అర్వార్. ఎలాగ్ అర్వార్ ఇహిజ దేవుణు మాటదిజ్ లోజిఎర్. దేవుణు మాటదిజ్ లోజిఇకార్ అర్వార్ ఇజి దేవుణు ముందాల్పె నెస్తాండ్రె వెప్తా మహాన్.

9 గాని మీరు దేవుణు ఎర్లిస్తి జాతి. రాజుజ్ పుజెరి లోకుర్. దేవుణుదిజ్ కేట ఆతి వన్ని సొంత లోకుర్. ఆహా పాపం ఇని సికటిదాన్ వాని గొప్ప బమ్మాతి జాయ్దు మిజి కూక్త తతాన్. వన్ని గొప్ప బమ్మాతి పణిజ వందిజ్ సాటిస్తెజె ఇట్టాన్.

10 ముందాల మీరు దేవుణు లోకుర్ ఆఇకిదెర్. ఏలు దేవుణు లోకుర్ ఆతిదెర్. ముందాల దేవుణు కనికారం మిజి దొహ్కాఎతాద్. ఏలు కనికారం దొహ్కాద్.

11 నాను ప్రేమినిని తంబెరిజాండె, నాను మిజి బతిమాల్లి వెప్పిన, మీరు యా లోకమది వరి లెకెండ అఇదెర్, ఆఇ దేసెమ్ది వరి ననికిదెర్. దేవుణు వందిజ్ మని ఆసెజ అడ్డు వాజిని ఒడొల్ది ఆసెజ్ డిఃస్తు.

12 దేవుణుదిజ్ నెన్ ఇ లోకుర్ నడిఃమి మీరు నెగ్రెండ మండ్రెజ్. ఎందనిజ్ ఇహిజ ఇని దని లోఇబా మిజి సెఇకార్ ఇజి వారు వెప్టాజ, మీ నెగ్గి బత్తుదిజ్ సుడఃజి దేవుణు తీర్పు కిదెజ్ వాని రోజుదు వారు దేవుణుదిజ్ పొగిడిఃదెజ్.

**అతికారమ్దు మన్ని వరిజ్ లోజిజి మండ్రు.**

13-14 ఏలుబడిః కినివరి లోఇ పెరికాన్ ఆతి రాజుజ్ గాని, అతికారమ్దు మని వరిజ్ గాని క్రీస్తు వెప్టా లెకెండ లోజిజి మండ్రు. తపు కితి వరిజ్ సిక్కు సిదెజ్, నెగ్గెజ్ కితి వరిజ్ పొగిడిఃదెజ్ విరిజ్ పొక్తాన్ గదె.

15 ఎందనిజ్ లోజిదెజ్ ఇహిజ, మీ నెగ్గి పణిజ తోరిసి మీరు బుద్ది సిల్లెండ వరిని వరి వెయు మూక్తెజ్ ఇజి దేవుణు కోరిజినాన్.

16 మీరు డిఃబె ఆతి లోకుర్. అహిజ, మీరు ఎయెర్ నెసెఎండ సెఇ పణిజ్ కిదెజ్ ఆఎద్. దేవుణు అడ్డి పణి కినివరి లెకెండ మండ్రు.

17 విజెరిజ్ మర్యాద సిదు. నమ్మిత్తి వరిజ్ ప్రేమిస్తు. దేవుణుదిజ్ తియెల్ ఆజి మండ్రు. రాజుజ్ మర్యాద సిదు.

18 పణి మణిసిర్ వరి ఎజుమానిరిజ్ నండొ మర్యాద సీజి లోజిజి మండ్రెజ్. మీ మున్సు, కనికారమ్దాన్ సార్లిదాన్ మని వరిజె ఆఎద్. మీ మున్సు కనికరం సిలి వరిజ్బా లోజిజి మండ్రు.

19 ఎందనిజ్ ఇహిజ, నాయం సిల్లెండ ఎయెన్బా మిజి బాద కితిజ అక్క మీరు దేవుణు వందిజ్ ఓరిస్తు. ఆక నెగ్గికదె. దేవుణుదిజ్ ఇస్తుమాతి పణినె.

20 మీరు తపు కితి వందిజ్ ఉండ్రె దెబ తిహిజ అక ఓరిస్సిదెర్. గాని మిజి ఇని లాబం? గాని దేవుణు ఎద్రు సరి ఆతికెజ్ కితి దనిజ్ సిక్కు వానివలె అక ఓరిస్తిజ ఆక నెగ్గికదె. దిని వందిజె దేవుణు మిజి ఏర్పాటు కిత్తాన్.

21 ఎందనిజ్ ఇహిజ క్రీస్తుబా మీ వందిజ్ కస్తుం ఓరిస్తాండ్రె మీరుబా వాండ్రు నడిఃతి లెకెండ నడిఃదెజ్ ఉండ్రె గుర్తు తోరిస్తు సితాన్.

22 "క్రీస్తు ఇని తపుబా కివెతాన్. వన్ని మాటెజ్ లోఇ ఇని అబద్దమ్బ సిల్లెతాద్.

23 వన్నిజ్ దూసిస్తి వలె మర్జి దూసిస్ఎతాన్. వన్నిజ్ మల్లెజ్ కితివలె వరిజ్ బెద్రిన్ఎతాన్. నాయమ్దాన్ తీర్పు కిని దేవుణుదిజ్ వానిజ్ వాండ్రె ఒపజెపె ఆతాన్.

24 యేసుక్రీస్తు సిలువాదు సాతివలె మా పాపమ్కు పిండితాన్. ఎందనిజ్ ఇహిజ మాటు పాపమ్కు పూర్తి డిఃసిసిదెజ్ ఇజి, దేవుణు ఎద్రు సరి ఆతి బత్తు బత్తిదెజ్ ఇజి. వన్ని ఒడొల్ది దెబ్బెజాణిజ్ మాటు నెగెణ్ ఆతాట్.

25 ఎందనిజ్ ఇహిజ మీరు గొరెజ్ లెకెండ తప్తి సాహిదెర్. గాని ఏలు గవుడఃఎన్ ఆతి వన్ని డగ్రు, మీ పాణం కాప్కిని వన్ని డగ్రు మర్జి వాతిదెర్.

### 3

**ఆల్నిమాసిర్**

1-2 అయావజనె, ఆల్నిక్ ఆతికెజ్ వన్కా సొంత మాసిరిజ్ లోజిజి మండ్రెజ్. ఎందనిజ్ ఇహిజ, మాసిర్ దేవుణు మాట నమ్మిఇకార్ ఆతిజ్బా వన్కా నెగ్గి బత్తుదాన్ దేవుణుబాన్ వరిజ్ తతెజ్ అట్టె. ఎలాగ ఇహిజ వన్కా కల్లిసిల్లి బత్తుని, దేవుణు మున్సు మన్ని తియెల్ నూణారె దేవుణుదిజ్ నమ్మినార్.

3-4 నెగ్రెండ తోరె ఆదెజ్ ఇజి బుర్ల డూసి మండ్రెజ్, బజారం గొలున్సు ఇట్టిదెజ్, నెగ్గి పాతెజ్ పొర్పాదెజ్, గాని వనక వందిజె మన్సు ఇడఃదెజ్ ఆఎద్. మీ మన్సుదు ఇని ఇనికెజ్ ఇడఃజినిదెర్ ఇజి సుడఃదు. ఇనికెజ్ ఇహిజ సార్లిదాన్, నిపాతి మన్సుదాన్, పాడాఃజి సొన్ఇ నన్ని నెగ్గి గుణమ్కు మన్సుదు ఇడఃదు. నన్నికదె దేవుణుదిజ్ గొప్ప విలువాతికాద్.

5-6 అయావజనె, పూర్బమ్దు దేవుణు మున్సు నమకం ఇడ్డి బోదెక్, దేవుణు ఒట్టు కితి దన్నిజ్ ఎద్రుసుడఃజి మహెనె, వన్కా సొంత మాసిరిజ్ లోజిజి వన్కా నెగ్గి గుణమ్కు అయాలెకెండ తోరిస్తె. అబ్రాహం ఆల్ని ఆతి సార నన్నికదె. అది అబ్రాహముజ్ లోజిత్తాదె, వాండ్రు నా మున్సు అతికారం మన్నికాన్ ఇజి మర్యాద సిత్తాద్. మీరుబా అయావజనె సరి ఆతికెజ్ కిజి ఇనిదన్నిజ్బా తియెల్ సిల్లెండ మహిజ సార పొటది గాల్నిక్ ఆనిదెర్.

7 అయావజనె, మాసిర్ వరి బోదెకాజ్, మజి ఇంక సత్తు తక్కు. మనికెజ్ ఇజి నెసి, వన్కాజ్ గవ్రం సీజి, నెగ్రెండ సుడఃజి మండ్రెజ్ వలె. దేవుణు కనికారమ్దాన్ సిత్తి ఎలాకాలం బత్తి బత్తు ఉండ్రె లెకెండ మీ వెట వనకాజ్బా సీనాన్. అందెజె వన్కాజ్ మీరు మర్యాద సిదెజ్. అయాలెకెండ కితిజ మీ పార్దనమ్దిజ్ ఇని అడ్డుబా మన్ఎద్.

సరి ఆతికెజ్ కితి వందిజ్ వాజిని బాద

8 ఆక్కర్దు నాను విజేరిజ్ వెస్సాన, ఉండ్రె మన్ను ఆజి మండ్రు. ఒరెన్ మరి ఒరెన్ వెట వన్నిజ్ సర్ల మహివలె గాని దుకం మహివలె గాని కూడఃజి పాడఃజి మండ్రు. తంబెరిజు లెకెండ ఒరెన్ మరిఒరెన్ వన్నిజ్ ప్రేమకిజి మండ్రు. ఒరెన్ మరిఒరెన్ వందిజ్ పాణం నొత్తెజ్. నాను పెరిక ఇజి గర్త్ర ఆవిండ విజెరె వెట ఉండ్రె మన్ను ఆజి మండ్రు.

9 ఎయెన్బా మిజి కిడు కితిజ మర్జి వన్నిజ్ కిడు కిమాట్. దూసిస్తిజ మర్జి దూసిస్మాట్. ఆహా కివిండ వరిజ్ నెగ్గికెజ్ రప్పిద్ ఇజి దేవుణుదిజ్ వెప్టు. ఎందనిజ్ ఇహిజ మిజి దేవుణు బాణిజ్ నెగ్గికెజ్ దొహ్కెజె, దేవుణు మిజి దీవిస్సెజె, వన్ని వందిజ్ ఎర్లిసి ఇట్టా మనాన్.

10 అందెజె “నెగ్గి బత్తు బత్తిదెజ్ సుడఃజినాన్, నెగ్గి రోస్సు గడఃపైజ్ సుడఃజినాన్ ఎయెన్బా సెఇ మాటెజ్ వర్లివిండ, అబద్దం మాటెజ్ వర్లివిండ మండ్రెజ్ వలె.

11 వాండ్రు సెఇకెజ్ డిఃసి మండ్రెజ్, నెగ్గికెజ్ కిజి మండ్రెజ్. సమదనమ్ వందిజ్ సుడఃజి అక్కాదె దొహ్కెజ్ ఇజి దన్ని వందిజ్ రెబాదెజ్.

12 ఎందనిజ్ ఇహిజ, దేవుణు ఎర్దు సరి ఆతికెజ్ కిని వరిజ్ దేవుణు కాప్కిజినాన్. వరి పార్దనమ్కు వెనాన్. గాని సెఇ పణిజ్ కిని వరివెట దేవుణు వన్ని మొకొం కోపం దాన్ ఇడ్వాన్”.

13 మీరు నెగ్గి పణిజ్ కెదెజ్ ఇజి నండొ ఆస ఆజి మహిజ, ఎయెర్బా బాద కివిర్గదె.

14 గాని దేవుణు ఎర్దు సరి ఆతికెజ్ కితి వందిజ్ ఉండ్రె వేలా బాద వాతిజ్బా సర్ల ఆదు. వరిజ్ తియెల్ ఆమాట్. వరిజ్ బెద్రిమాట్.

15-16 మీ మన్నుదు క్రీస్తుజ్ మీ ప్రబు ఇజి బసె కిదు. మరి, మీ నమకమ్ వందిజ్ మిజి వెన్బాని వరిజ్ నెగ్గెండ వెప్టెజ్ ఎస్తివలెబా తయార్ ఆజి మండ్రు. గాని సార్లిదాన్, దేవుణుదిజ్ తియెల్దాన్ వెప్టెజ్. ఎందనిజ్ ఇహిజ మిజి బెద్రిసినికార్ మిజి దూసిసిని వలె మీ మన్ను దేవుణు ఎర్దు నిపాతి మండ్రెజ్. మీరు క్రీస్తు లోకుర్ ఇజి, నెగ్గి గుణమ్కు కల్లిజి మనికార్ ఇజి సుడఃజి వారు సిగు ఆదెజ్.

17 సరి ఆతికెజ్ కితి వందిజ్ కస్టం బరిస్సెజ్ ఇజి దేవుణు ఇస్టం ఆతిజ అక్క నెగ్గికాద్. సెఇకెజ్ కితి వందిజ్ కస్టం బరిసిని మున్ను అక్కాదె నెగ్గికాద్.

18 ఎందనిజ్ ఇహిజ క్రీస్తుబా ఉండ్రె సుటునె పాపమ్కు లాగ్దెజ్ సాతాన్. మజి దేవుణుబాన్ తతెజ్ ఇజి దేవుణు ఎర్దు నీతిమనికాన్ ఆతికాన్ దేవుణు ఎర్దు నీతి సిల్లెండ మహి వరి వందిజ్ సాతాన్. వన్ని ఒడొల్ సప్టార్. గాని దేవుణు ఆత్మ వన్నిజ్ నిక్లాన్.

19 క్రీస్తు ఆత్మ అయా లోకమ్దు తొహా ఆతిమని వరి నడిఃమి సాహండ్రె సువార్త సాటిస్తాన్.

20 మీరు నోవపు కాలమ్దు దేవుణుదిజ్ లొజివిండ మహికార్. నోవపు ఒడః తయార్ కిజిమహివలె దేవుణు విరివందిజ్ ఒరిస్స మహాన్. గాని ఒడః తయార్ ఆతిజ్ నెగ్గెండారె, ఇహిజ ఎనిమిది మణిసిరె పెరి గడ్డదాన్ తప్తె ఆతార్.

21 యాక బాప్తినమ్దిజ్ పొలిత మనాద్. యా బాప్తినమ్దానె దేవుణు మిజి రక్కిసినాన్. యా బాప్తినం ఒడొల్ సుబ్బరం ఆదెజ్ ఆవిద్. గాని ఏలు దేవుణు ఎర్దు పాపం సిల్లెండ మండ్రెజ్ ఒప్పుకోడఃజినాప్ ఇజి తోరిస్సెజె యా బాప్తినం. యేసు క్రీస్తు సావుదాన్ నిజిత్తిజ్ మీరు సావుదాన్ తప్తె ఆతిదెర్ ఇజి తోరిస్సెజె.

22 యేసు క్రీస్తు సావుదాన్ నిజితండ్రె పరలోకమ్దు ఎక్కి సాహండ్రె, దూతారిజ, అతికారిజ, సత్తు మన్నివరిజి వన్ని అడ్డి ఇట్టాండ్రె, దేవుణు ఉణెర్ పడఃకాద్ బస్తాన్.

## 4

పేతురు రాస్తి మొదొహి ఉత్తం

1 అందెజె క్రీస్తు, వన్ని ఒడొల్దు కస్టం ఒరిస్తి లెకెండ కస్టం ఒరిస్సెజ్. మీరుబా మన్ను తయార్ కిజి మండ్రు. ఎందనిజ్ ఇహిజ ఒడొల్దు కస్టం ఒరిస్సికాన్ పాపమ్దు నడిఃవన్.

2 అహిజ ఏలుహాన్ అసి సావుదాక, మాములుక లోకుర్ ఆస అని వజి ఆవిద్, దేవుణుదిజ్ ఇస్టం ఆతి లెకెండ బత్తిదెజ్.

3 గడిసి సాహి కాలమ్దు దేవుణుదిజ్ నెసిఇకార్ బత్తిని లెకెండ మీరు బత్తిజి మహిదెర్. ఎలాగ ఇహిజ, రంకు బూలాజి, ఒడొల్ వందిజ్ ఆసెజ్ ఆజి, కల్లు ఉణిజి సోసి, సిగు సిల్లెండ డాట్టి కర్లిజిజి, కల్లు విందుజ్ నడిఃపిసి, దెయమ్కాజ్ పూజి కిజి మహిదెర్.

4 ఏలు మీరు వరివెట కూడఃఎండ, వారు కిని వెరి పణిజ్ లొఇ సాన్ఎండ ఆజినిజ్ వారు బమ్మ ఆజి మిజి దూసిసినార్.



5 గాని బత్రిని వరిజ్ సాతి వరిజ్ తీర్పు తీరిస్తే తయార్ ఆజి మని దేవుణుబాన్ వారు బత్రితి బత్కు వందిజ్ ఎందనిజ్ నన్ని సెకెజ్ కిజి బత్రిత్తార్ ఇజి వెహైజ్ వలె.

6 అందెజె సాతిసాహి నమ్మిత్తి వరిజ్ సువార్త సాటి ఆజి మహాద్. ఎందనిజ్ ఇహిజి యా బత్కుదు మహివలె లోకాజ్ తీర్పు లెకెండ్ సాపు వానాద్. గాని సాతి వెసుక దేవుణు బత్రిజిని లెకెండ్ బత్రిదెజె.

7 అహిజి విజు దన్నిజ్ అక్కరి రోస్కు వాజినాద్. అందెజె నెగ్గి బుది కల్లిజి మండ్రు. మన్నుదు అణసె ఆజి మండ్రు. నస్తివలె మీరు ప్రార్థనం కిదెజ్ అట్టిదెర్.

8 అక్కదె ఆవెద్. విజు దని ముస్కు మని సజతి ఇనిక ఇహిజి, ఒరెన్ మరి ఒరెన్ వన్నిజ్ నెగ్గెండ ప్రేమ కిజి మండ్రు. ఎందనిజ్ ఇ హిజి మహికార్ కితి విజు తపుజ్ మాటు ప్రేమదాన్ సెమిస్తేజ్ అట్టాట్.

9 మొరొ ఆవెండ ఒరెన్ మరి ఒరెన్ వన్నిజ్ డగ్గు కిజి సీనికార్ ఆజి మండ్రు.

10 ఒరెన్ మరి ఒరెన్ వన్నిజ్ దేవుణు సీతి వరమ్దాన్ తోడు: కిజి మండ్రెజ్. దేవుణు సీతి విజు రకమ్ది వరమ్కు నెగ్గెండ వాడు కొండెజ్.

11 ఎయెన్బా దేవుణు మాట బోదిస్సాన్ ఇహిజి వాండ్రు దేవుణు మాట బోదిస్తేజ్ వలె. ఎయెన్బా మహి వరిజ్ తోడు: కిదెజ్ ఇహిజి దేవుణు సీతి సత్తుదాన్ కిదెజ్ వలె. యేసు క్రీస్తు పేరుదాన్ దేవుణుదిజ్ పొగ్డు: కల్లిదెజ్ ఇజి యాకెజ్ విజు కిదు. వన్నిజ్నె అంతు సిల్లెండ ఎల్లకాలం గనమ్ని, సత్తు మనీద్. ఆమెన్.

12 నాను ప్రేమిసిని తంబెరిజాండె, మీ నమకం ఎలాగ్మహ్తాకద్ ఇజి రుజుప్ కిదెజ్ సిసు నని పెరి కస్టమ్కు వానివలె ఇనిక జగ్గినాదొ ఇజి బమ్మ ఆమాట్.

13 క్రీస్తు మహిమదాన్ యా లోకమ్దు వానివలె మీరుబా గొప్ప సర్ద ఆజి మండ్రెజ్ ఇజి క్రీస్తు ఓరిస్తి కస్టమ్కు లొఇ మీరుబా కూడ్డి ఓరిసి సర్ద ఆదు.

14 క్రీస్తు వందిజ్ ఎయెన్బా మిజి దూసలాడి:తిజి సర్ద ఆదు. ఎందనిజ్ ఇహిజి గొప్ప పెరికాన్ ఆతి ఆత్మ, ఇహిజి దేవుణు ఆత్మ మీ ముస్కు మనాద్.

15 మీ లొఇ ఎయెన్బా ఓరిస్తేజ్ ఇహిజి అక్క ఒరెన్ వన్నిజ్ సప్తి వందిజ్ ఆవెద్. డోజి కితి వందిజ్ ఆవెద్. సెన పణి కితి వందిజ్ ఆవెద్. ఆఇ వరి వెట బడె: ఆదెజ్ ఆవెద్.

16 గాని మీ లొఇ ఎయెన్బా క్రీస్తు లోకు ఆతిదని వందిజ్ ఓరిస్తిజి సిగు ఆమాట్. గాని క్రీస్తు పేరు అస్సిదని వందిజ్ దేవుణుదిజ్ స్తుతి కిదెజ్.

17 ఎందనిజ్ ఇహిజి దేవుణు తీర్పు వన్ని లోకుర్ లొఇ మొదొల్నిని కాలం వాత మనాద్. దేవుణుదిజ్ నమ్మిత్తి వరి లొఇనె తీర్పు మొదొల్స్తిజి సువార్తదిజ్ లొజిఇతివరి గతి ఇనిక ఆనాదొ.

18 “దేవుణు ఎద్రు నితి నిజాయితిదాన్ మన్ని వరిజ్ నిస్సా కస్టం వాతిజి దేవుణుదిజ్ నెసిఇకార్ ఎలాకాలం మన్ని సిక్కదాన్ తప్పె ఆదెజ్ ఒద్దె అట్వెర్లె”,

19 అందెజె దేవుణుదిజ్ ఇస్టం ఆతి వజి కస్టమ్కు ఓరిస్తికార్ వరి బత్కు, పుటిస్తి దేవుణుబాన్ ఒపజెప్తెజ్జులె. వాండ్రు నమ్మిదెజ్ తగ్గికాన్. వారు నెగ్గి పణిజ్ కిజి బత్రిజి మండ్రెజ్.

## 5

పెద్దెలుజి వందిజ్ వెహ్ని మాటెజ్.

1 క్రీస్తు కస్టమ్కు ఓరిస్తికి నాను సుడె:త. క్రీస్తు ఎసా గొప్ప పెరికాన్ ఇజి తోరిసి గొప్ప జాయ్దాన్ మర్జి వానివలె నానుబా వన్ని జాయ్దు మంజినాలె. అందెజె, మీ లెకెండ్ ఒరెన్ పెద్దెలి ఆతి నాను పెద్దెలుజు ఆతి మిజి దటిసి వెహ్నిన.

2 గొరెజ్ అడినికాన్ గొరెజి నెగ్గెండ సూణి వజి మీ అడిగి మన్ని దేవుణు లోకాజ్ నెగ్గెండ నడి:పు. బల్మి కిత్తిజ్ ఆవెద్. పూర్తి మన్నుదాన్ కిదు. దేవుణు ఇస్టమ్దు కూడి:తి లెకెండ్ సుడె:దు. ఇనికదొ లాబం వానాద్ ఇజి ఆస ఆజి సుడె:మాట్. గాని నెగ్గి మన్నుదాన్ సుడె:దు.

3 మీ అడ్డి మని లోకాజ్ ముస్కు గర్రదాన్ ఏలుబడి: కినిక ఆవెద్. మీ నెగ్గి గుణమ్కు సుడె:జి వారుబా అయాలెకెండ్ నడి:ని వజి మండ్రు.

4 అహిజి గొరెజ్ అడిని వరి లొఇ పెరి గవుడుయెన్ ఆతికాన్ తోరె ఆనివలె ఎసెజ్బా పాడా:జి సాన్ఇ మెరిసిని టోపి మిజి దొహ్కాద్.

5 అయ వజనె ఇజిరికిదెరా, మీరుబా పెద్దెల్జ లోజిజి మండ్రు. ఒరెన్ మరి ఒరెన్ వెట తగిజి మండ్రు. ఎందనిజ్ ఇహిజ “గర్త ఆని వరిజ్ దేవుణు ఎద్రిసినాన్. గాని తగె ఆతి మని వరిజ్ వన్ని దయా దర్మం సీజినాన్”,

6 అందెజి దేవుణు, సరియాతి టయ్ముదు మిజి పెరికాన్ కిదెజ్ ఇజి వన్ని గొప్ప సత్తుమని అతికారమ్దిజ్ తగె ఆజి మండ్రు.

7 మీ విసారమ్కు విజు దేవుణు ముస్కు షాక్తు. ఎందనిజ్ ఇహిజ దేవుణు మిజి విజు సీదెజ్ సుడఃజినాన్.

8 మీ మన్నుదు అణసె ఆజి మండ్రు. నెగ్గి బుద్ది కల్లిజి తెలిదాన్ మండ్రు. ఆక్కర్నిని ఉండ్రి పెరి నొరెన్ లెకెండ్ మిజి విరోదమాతి సయ్యాన్ ఎయెరిజ్ డిఃజ్దెజి ఇజి రెబాజి బూలాజినాన్.

9 మీ నమకమ్దిజ్ గటిజి అసి సయ్యానుజ్ ఎద్రిసి మండ్రు. విజు లోకమ్దు మని నమ్మిత్తికార్ నిన్ని కస్టమ్కాణ్ బాద ఆజినార్ ఇజి నెసి మండ్రు.

10 గొప్ప దయా దర్మం మన్ని దేవుణు, క్రీస్తు వెట ఎలాకాలం మంజిని జాయ్దు మంజిని వందిజ్ మిజి కూక్తాన్. మాటు క్రీస్తు వెట కూడితిజ్ యాక జర్గిజినాద్. సెగం కాలం మీరు కస్టమ్కు ఓరిస్తి వెనిక దేవుణు మిజి విజు దన్ని లోఇ పూర్తి ఆతికార్ కద్దివండ, సత్తుదాన్ నిల్పాన్.

11 వన్నిజె అంతు సిల్లెండ ఎలాకాలం గొప్ప సత్తు మనీద్. ఆమెన్.

12 దేవుణు గొప్ప ప్రేమ కిజి తోరిస్తి నిజమాతి దయాదర్మమ్దు గటిజి నిల్సి మండ్రు, ఇజి నాను రాసిన. వెహ్సిన. అయ క్రుపాదు గటిజి నిల్సి మండ్రు ఇజి నాను బతిమాల్జిన. యాక నాను బాగ నమకమ్ ఇడ్డి సిల్వాను దిన్ని వందిజ్ నాను సాసి వెహ్సిన. యాక నాను బాగ నమకం ఇడ్డి సిల్వాను ఇని వన్ని కియుదాన్ రాస్పిసిన.

13 మీ లెకెండ్ బబులోను పట్టుమ్దు దేవుణు ఏర్పాటు కిత్తి సజమ్దికార్ మిజి వందనమ్కు వెహ్సినార్. సజి మరిన్ లెకెండ్ మని మార్కు మిజి వందనమ్కు వెహ్సినాన్.

14 క్రీస్తు ప్రేమదాన్ ఒరెన్ మరిఒరెన్ వన్నిజ్ ముదు కిజి వందనమ్కు వెహ్సె. క్రీస్తుబాన్ కూడితి మిజి విజెరిజ్ సమదనం మనీద్.

## పేతురు రాస్తి రుండి ఉత్తం

నెల్ల కిబిసినిక

యేసుప్రబుజ్ అపొస్తుడు ఆతి పేతురు యా ఉత్తం రాస్తాన్. పేతురు వన్ని బత్తు అందిదెజ్ డగు ఆతివలె యాక రాస్తాన్ ఇజి బయ్బిల్ వందిజ్ నెస్తికార్ వెహ్సినార్. క్రీస్తు సకం 68 దు క్రీస్తు లోకాజ్ మాలెజ్ కిత్తి నీరో ఇని రోమ వరి పెరి రాజు పేతురుజ్ సపిస్తాన్ ఇజిబా బయ్బిల్ వందిజ్ నెస్తికార్ వెహ్సినార్. యా ఉత్తమ్దు ఇనికెజ్ రాస్తాన్ ఇహిజ, అయ కాలమ్దు సోత్తిమహి తప్పు బోద నెస్సినని వరి వందిజ్ జాగర్త మండ్రు ఇజి వెహ్సినాన్. యేసుక్రీస్తు మర్జి రెవన్ ఇజిబా వారు వెహ్సినని వందిజ్ జాగర్త మండ్రు ఇజినాన్. దేవుణు కనికారమ్దాన్, గెణమ్దాన్ నెగ్రిండ పిరిదు ఇజి రాసినాన్.

1 యేసుక్రీస్తుజ్ పణి కినికాన్ ఆతి, అపొస్తుడు ఆతి సిమెను పేతురు రాసిన ఉత్తం. దేవుణు దయా దర్మమ్దాన్, రక్సిన్నికానాతి యేసు క్రీస్తుజ్ దయా దర్మమ్దాన్ గొ పువిలవాతి నమకం మజి దొహ్తాద్. మజి దొహ్కొత్తి లెకెండ అయ గొప్ప విలువాతి నమ్మకం దొహ్కొత్తి మన్ని వరిజ్ యాక రాసిన.

2 మిజి దేవుణు దయాదర్మం, నిపాతి, నండో వంతుజ్ ఆజి మనీద్. ఎలాగ ఇహిజ దేవుణుదిజ్ నెసిన దన్నితాన్ వాని గెణమ్దాన్, ప్రబువాతి క్రీస్తుజ్ నెసిన దన్నితాన్ వాని గెణమ్దు పిరిదు.

దేవుణు ఎర్లిస్తి లోకుర్ ఇజి రుజుప్ కిదెజ్.

3 దేవుణు వన్ని గొప్ప జాయ్దాన్ నెగ్రి గుణమ్దాన్ మజి వన్ని వందిజ్ ఏర్పాటు కిత్తాన్. దేవుణు వన్ని గొప్ప సత్తుదాన్ మా బత్తుదిజ్ కావల్స్తికెజ్ విజు సితాన్. దేవుణుదిజ్ బక్తి మన్ని మన్ను సితాన్. యాకెజ్ విజు దేవుణుదిజ్ నెసిన దన్నితాన్ మణి తోహ్కె.

4 యా గొప్ప జాయ్దాన్ నెగ్రి గుణమ్దాన్ దేవుణు వన్ని ఒద్దె విలువాతి ఒట్టుజ్ సిత మనాన్. ఎందనిజ్ ఇహిజ అయ ఒట్టుజుణిజ్ దేవుణు గుణం కల్లిజి మండ్రెజ్ అట్నాట్. యా లోకమ్దు సెన ఆసదాన్ మజి సెఎన్ కిని విజు వన్కా బాణిజ్ తప్తె ఆదెజ్ అట్నాట్.

5-7 అందెజె మీరు నిని వన్కా వందిజ్ అక్కెజ్ దొహ్కొత్తి లెకెండ కస్టబాడిజి మండ్రు. ఇనికెజ్ ఇహిజ మీ నమకం వెట నెగ్రి గుణమ్కు కూడెప్పు. నెగ్రి గుణమ్కు వెట గెణం కూడెప్పు. గెణం వెట మన్ను అణసె ఆజి మంజిని గుణం కూడెప్పు. దన్ని వెట విజు దనిజ్ ఓరిస్తిజ్ మని బుద్ధి కూడెప్పు. ఓరిసినదని వెట దేవుణు వందిజ్ బక్తిమని మన్ను కూడెప్పు. దేవుణు వందిజ్ బక్తి మన్ని మన్ను వెట మహి నమ్మితి వరిజ్ ప్రేమిసిన దన్ని వెట విజెరిజ్ ప్రేమిసిన మన్ను కూడెప్పు.

8 యా గుణమ్కు మీ బత్తుదు పిరిజి ఒద్దె నిండ్రెజి వాతిజి యేసు క్రీస్తుజ్ పుర్తి నెస్సి దనిజ్ అక్కెజ్ పణి కిసె. బండెజ్ ఆని వరి లెకెండ ఆఇదెల్లె. పణిదిజ్ రెఇ వరి లెకెండ మన్ఇదెల్లె.

9 యా గుణమ్కు కల్లిజి నిండ్రెజి మనికార్ గుడ్డి వరి లెకెండె, దూరమ్దు మనికెజ్ తోరెండ ఆనె. ముందాల్ కితి పాపమ్కాణిజ్ నొరె ఆతాప్ ఇజి పోసినార్.

10 అందెజె నా తంబెరుజాండె, దేవుణు మిజి ఎర్లిసి, వన్ని లోకుర్ ఇజి కూక్సి ఎర్లిస్తాన్. మీరు అక్క ఒదె నెగ్రిండ రుజుప్ కిదెజ్. నిన్ని పణిజ్ కినికిదెజ్ ఇహిజ ఎస్తవలెబా జార్జి అర్ఎండ నిల్లిదెర్.

11 యా లెకెండ మా ప్రబుని, మజి రక్సిన్నికాన్ ఆతి యేసుక్రీస్తు ఎల్లకాలం మంజిని రాజెమ్దు మజి గొప్ప మర్యాద సీజి కూడెప్పి వలె, మజి సీని అవకాసం తక్కు ఆవద్.

ప్రవక్తరు దేవుణు మాటెజ్ వెహ్తార్.

12 అహిజ, ఏలు మీరు అస్తిమని దేవుణు వందిజ్ నిజమాతి యా సజతిజ్ మీరు బాగ నెసి కద్దిఎడ నిల్లి నిదెర్ గాని, మిజి నాను యా సజతిజి వందిజ్ ఎస్తివలెబ ఎత్తు కిబిస్తిజ్ తయార్ ఆజి మంజిన.

13 నాను సాని దాక యా సజతిజి వందిజ్ మిజి మరి మరి ఎత్తు కిబిస్తిజ్ నా బాజిత ఇజి నాను ఒడెబిజిన.

14 ఎందనిజ్ ఇహిజ, మా ప్రబు ఆతి యేసుక్రీస్తు నజి వెహ్సె లకెండ నాను యా బత్తు బెగినె డిసి సొండ్రెజ్ వలె ఇజి నెన్ను.

15 మరి నాను సాతి సాహి వెనుక మీరు ఎస్తివలెబా యా సజతిజి ఎత్తుకిజి మంజిని వందిజ్ నాను నండో పణికిన.

16 ఎలాగ ఇహిజ, మా ప్రబువాతి యేసు క్రీస్తుజ్ మని గొప్పు సత్తు వందిజ్, వాండ్రు మర్జి వాని వందిజ్ మిజి నెస్పిస్తీ వలె, అక్క ఉండ్రీ కత సాన్తరం వలె అక్క ఉండ్రీ కత సాన్తరం వెప్తి లెకెండ్ర్ ఆవద్. గాని వాండ్రు ఎస్సా గొప్పు పెరికాన్ ఇజి మాపు కణకాణిజ్ సుడఃతాపె, అక్కాదె మిజి వెప్తాప్.

17 ఎలాగ ఇహిజ, గొప్పు మెరిస్తి జాయ్ కల్లితి మహిమ నిండ్రీతి మహి బాణిజ్ ఉండ్రీ జాటు వాతాద్. ఇనిక ఇహిజ, “పీండ్రు నాను నా నండో ప్రేమిసిని మరిన్. విన్ని ముస్సు నాను సర్ద ఆజిన. అయా మాటెజ్ బుబ్బాతి దేవుణు బాణిజ్ వాతివలె మరిసి ఆతి యేసుజ్ గొప్పు పేరు, మహిమ కల్లితాద్.

18 మాపు వన్ని వెట అయా పరిసుదం ఆతి గొరోణ్ ముస్సు మహివలె ఆగాసమ్దాన్ వాతి యా జాటు మాపె విహాప్.

19 మరి, ఒద్దె నిజమాతి మాటెజ్, ఇహిజ ప్రవక్తరు వెప్తి మాటెజ్ మజి మన్నె. అక్కెజ్ మీరు జాగర్త విండ్రెజ్. ఉండ్రీ కస్తిమని దీమ జాయిదాన్ సీకటిదు మనికెజ్ సుడఃదెజ్ అట్వాట్. అయాలెకండ్రె ప్రవక్తరు వెప్తి మాటెజ్ జాయ్ వానిదాక మీ గర్బమ్దు ఇడఃదు. కోడిజామ్దు తోరె ఆని జాయ్ ఆని సుక్క మీ గర్బమ్దు సోనాద్.

20 విజు వన్యాజ్ ఇంక ముకెలం మీరు నెస్పిక్ ఇనిక ఇహిజ, ప్రవక్తరు రాస్తి మని మాటదు ఉండ్రీ మాటబా వరి సొంత ఆలోసనమ్దాన్ వెప్తి లెకెండ్ర్ వెహ్ఎతార్.

21 దేవుణు మాటెజ్ లోకు వన్నిజ్ ఇస్టం ఆతి వజ వెప్తికెజ్ ఆఉ. గాని దేవుణు ఆత్మ సత్తుదానె దేవుణు మాటెజ్ లోకుర్ వెప్తార్.

## 2

**తప్పు బోద నెస్పిసిని వరిజ్ వాని నాసనం.**

1 గాని అయ కాలమ్దు లోకు నడిఃమి తప్పు బోద నెస్పిసినికార్బా మహార్. అయ వజనె మీ నడిఃమి తప్పు బోద నెస్పిసినికార్ వానార్. వారు ఇనిక కినార్ ఇహిజ వన్ని సొంత పాణం సీజి కొటి ప్రబుజ్ నెక్త పొక్కారె గొప్పు నాసనమ్దు ఒని ఆఇ బోదెజ్ డాప్పి నెస్పిసినార్. అయావజనె వరిజ్ వారె వెటనె వాని నాసనం తపె ఆజినార్.

2 నండొండ్ర్ వీరు నెస్పితి సిగు ఆని పణిజ్ వెంజి ఆహె నడిఃనారలె. వరి సెన పణిజ్ సుడఃజి క్రీస్తుజ్ని వాండ్రు నెస్పిస్తీ నిజమతి దన్ని వందిజ్ లోకుర్ దూసిస్సార్లె.

3 యా తప్పు బోద వెప్తికార్ డబ్బుదిజ్ గొప్పు ఆస ఆజి నిజం ఆఇ మాటెజాణిజ్ మిజి మొసెం కినార్. వరిజ్ ముందాల్నె తీర్పు సీదెజ్ తయార్ ఆత మనాద్. వరిజ్ నాసనం తపెఎండ వానాద్.

4 ఎలాగ ఇహిజ, పాపం కితి దూతారిజ్ డిన్ఎండ తీర్పు వాని దాక ఇడఃదెజ్ దేవుణు వరిజ్ ఎలాకాలం సిసు మంజిని బాడిదు పొక్తాన్. సీకటి మని సాలం లోఇ తోహిస్త ఇట్టాన్.

5 మరి, పూర్బకాలమ్దు పాపం కిజి మహి లోకాజి సిక్స దాన్ తప్రిన్ఎండ, దేవుణు వరి ముస్సు పెరి గడ్డ తపిస్తాన్. గాని నీతినిజాయితి వందిజ్ వెప్తి మహి నోవాహుజ్ని, వన్ని వెట మహి ఏడుగురుదిజ్ గడ్డదాన్ తపిస్తాన్.

6 మరి సొదొమ, గొమొర్ర ఇని పట్టుమ్కాన్ మహికార్ పాపం కిజి మహిజ్ దేవుణు వరిజ్ తీర్పు సితండ్రె సిసుదాన్ అయ పట్టుమ్కాజ్ సుప్తాన్ దేవుణుదిజ్ ఇస్టం ఆఇ లెకెండ్ర్ సెఇ పణి కిని వరిజ్ వాండ్రు ఇనిక కినాన్ ఇజి ఉండ్రీ గుర్తు లెకెండ్ర్ వరిజ్ ఇడ్తాన్.

7 నీతి నిజాయితిదాన్ పణి కితి లోతు వన్ని సురుల జర్గిజి మహి గొప్పు సిగ్గు ఆతి పాపం పణిజ్ సుడఃజి గొప్పు బాద ఆజి మహిజ్ దేవుణు వన్నిజ్ గెల్పిస్తాన్.

8 ఎందనిజ్ ఇహిజ అయ నీతి మనికాన్ వరి గొప్పు సెఇ పణిజ్ సుడఃజి అక్కెజ్ వెంజి రోజు వన్ని నెగ్గి మన్నుదాన్ గొప్పు బాద ఆజి మహాన్.

9 దేవుణు ముస్సు బక్తి మన్ని వరిజ్ వాని పరిసెజాణిజ్, వరిజ్ గెల్పిస్తెజ్ దేవుణు నెసినాన్. దేవుణు ఎద్దు నీతి నీజాయితి సిల్లెండ్ర్ నడిఃని వరిజ్ సిక్స సీజి తీర్పు దినమ్దాక ఇడ్డెజ్బా నెసినాన్.

10 సెఇ ఆలోసనమ్దాన్ పుట్టి ఒడెఃల్ వందిజ్ మన్ని సెఇ ఆసెజ్ వందిజ్ బత్తిజి దేవుణు అతికారమ్దిజ్ లోజిఎండ దన్నిజ్ నెక్సిపొక్తి వరిజ్ సిక్స సీదెజ్ దేవుణు ఇడ్డ మనాన్. యా తప్పు బోద నెస్పిసినికార్ గొప్పు గర్త ఆజి ఇనిక కిదెజ్బా తయార్ ఆనికార్. వరి సొంత ఇస్టమ్దాన్ విజు కినార్. గొప్పు బమ్మ ఆతి వనక వందిజ్ సెఇకెజ్ వెప్తాజ్బా తియెల్ ఆఇకార్ వీరు.

11 దేవుణు దూతార్ గొప్పు సత్తు మనికారె ఇహిజ్బా దేవుణు ముందాల్ వినక వందిజ్ వరిజ్ దూసిన్ఎర్.

12 గాని యీ తప్పు బోధ నెస్తిసినికార్, వారు నెన్ ఇ వన్కా వందిజ్ బా దూసలాడ్నార్. వారు బుద్ధి కిదెజ్ ఆల్ ఇ మూర్కతం మన్ని జంతుజ్ లెకెండె ఆలోసనం కిదెజ్ ఆల్ ఏర్. వేట కినికార్ వనకాజ్ అసి సప్పి లెకెండె వీరుబా ముర్కతం మన్ని అడవి జంతుజ్ లెకెండె పాడాన సొనార్.

13 వారు కిజిని నాసనమ్ దిజ్ వరిజ్ మర్జి నాసనం వాజినాద్. ఒడోల్ ఆన వందిజ్ సిగు ఆని ఇని పణిబా కిదెజ్ సర్ల ఆజి వేడెకానె అయా సెఇ ఆసెజ్ సొన్నిసినార్. మీరు కిజిని ప్రేమ విందుజు లోఇ వారుబా కూడ్డి మజినార్. వారు మన్ను రుజ్ ని లెకెండె ఉణిజి తింజి ఒడోల్ దిజ్ సుకం కిబిసినార్. తెలాని పాతాదు మని మస సిగు తప్పిసి లెకెండె వీరుబా సిగు తప్పిసినార్.

14 బోదెకాజ్ సుడోజి వనక వెట పాపం కిదెజ్ ఇజి ఆన ఆజి మంజినార్. పాపం కిదెజ్ మని ఆన ఎసెజ్ బా డిస్ ఎర్. ఇతాల్ అతాల్ మన్ను మన్ని వరిజ్ వారు ఆసెజ్ తోరిసి ఆఇసరి నడిపిసినార్. వరి వందిజె లాబం తప్పి ఆదెజ్ సుడోజి మంజినార్. దేవుణు వరిజ్ సిక్స సినాన్.

15 వారు సరిఆతి బత్తు బత్తి ఎండ, బెయెరి ఇని వన్ని పొటదికాన్ బిలాము ఇని వన్ని లెకెండె ఆత మనార్. ఎలాగ ఇహిజ తప్పు కిత్తి వందిజ్ దోహ్ కి డబ్బు వందిజ్ ఆజి బిలాము సరి తప్ప సొహాన్.

16 గాని అయ బిలాము కితి సెఇ పణిదిజ్ వాని గాడోదె అడ్డు కితాద్. మాటెజ్ నెసి అయ గాడోదె లోకు లెకెండె వర్గిజి బిలాము ఇని ప్రవక్త ఒడిబితి వెరి పణిదిజ్ అడ్డు కితాద్.

17 నిని బోద కినికార్ ఏరు సిలి ఉట లెకెండె, సుర గాలి ఎగ్రిసి ఒని మొసాప్ లెకెండె విరి వందిజ్ గొప్ప సికటి మని బాడ్డి దేవుణు తయార్ కిత మనాన్.

18 ఎందనిజ్ ఇహిజ యీ తప్పు బోధ నెస్తిసినికార్ పణిదిజ్ రెఇ బడాయ్ మాటెజ్ వర్గిజి అయ మాటెజాణిజ్ వరి ఒడోల్ ఆసెజ్ సొన్నిసైజ్ సుడోజినార్. తప్ప సరి నడిని వరి లోఇహాన్ ఏలె తప్పె ఆతి లోకాజ్, వీరు మరి తప్పు సరి నడిపిసినార్.

19 ఇని దని అడ్డిబా మన్ ఎండ పూర్తి విడుదల మన్నిబాన్ ఒనాప్ ఇజి వీరు వెప్పి మంజినార్. గాని వీరె నాసనం తప్పిసిని పాపమ్ దిజ్ తోహె ఆత మనార్. ఎందనిజ్ ఇహిజ ఒరెన్ ఇని దనిజ్ గెల్ సైజ్ అట్ ఎండ మంజినాండ్రె, దనిజె వెటిపణి మణిసి వజ అడిగి మంజినాన్.

20 మా ప్రబుని, రక్సిన్సికాన్ ఆతి యేసు క్రీస్తుజ్ బాగ నెస్తి వెనుక, యీ లోకమ్ ది సెఇ వన్కాణిజ్ తప్పె ఆతి వెనుక, మరి అర్దిజ అకెజ్ వన్నిజ్ అడిగి ఇట్టిజ వారు ముందాల ఆతిమహి దన్నిజ్ ఇంక ఒద్దె సెఇకార్ ఆనార్.

21 దేవుణు బాణిజ్ వాతి ఆడ్ర వరిజ్ ఒపజెపె ఆతి వెనుక అక్క తప్పి సొహార్. ఆహె తప్పిసొని దన్నిజ్ ఇంక అయ నీతి నిజాయితి మన్ని సరి వందిజ్ నెన్ ఎండ మంజనిక ఇహిజానె వరిజ్ నెగైత మహాద్ మరి

22 “నుకుడి: అది కక్తిక మరి మర్జి తింజినాద్”, “ఏరుదాన్ నొరె ఆతి పంత్రి మరి బుర్లదు నూడ్బాదెజ్ సొన్నినాద్”, ఇజి వెప్పి మని మాటెజ్ తప్ప సరిదు మప్పి సొహి విరి వందిజ్ నిజం ఆజినాద్.

### 3

#### ప్రబు మర్జి వాని దినం.

1 నాను ప్రేమిసినికిదెరా, తొలిత ఉండ్రె ఉత్తం రాస్త. మీరు ముందల్ నెస్తిమన్ని వనకాజ్ ఎత్తు కిబిసైజ్ ఏలు నాను మిజి మరి ఉత్తం రాసిన. కల్లిసిల్లి మీ మన్నుదిజ్ ఉసార్ కిబిసైజ్ ఇజి యీ రుండి ఉత్తమ్ కు రాసిన.

2 దేవుణు ప్రవక్తరు పూర్బకాలమ్ దు వెప్పి మాటెజ్, మరి మా ప్రబుని రక్సిన్సికానాతి యేసుక్రీస్తు మీ అపొస్తుడుర్ సిత్తి ఆడ్రెజ్ మిజి ఎత్తు కిబిసైజ్ ఇజి నాను ఆస ఆజిన.

3 ముకెలమాతి ఉండ్రె సజతి మీరు అర్లం కిజి మండ్రు. ఇనిక ఇహిజ, కడెవెరి రోస్కాజ్ సెగొండార్ వెక్రిసికార్ వానార్. వారు వరి ఒడోల్లి సెఇ ఆసెజ్ సొన్నిసి మంజినార్. వారు మిజి లివాల కినార్.

4 వారు ఇనిక వెహూర్ ఇహిజ, “వాండ్రు వానన్ ఇజి ఒట్టు కితిత్తాన్ గదె. ఎసెజ్ వానన్ లె? మా అనిగొగొర్ సాత సొహార్. గాని ఏలుదాక వాండ్రు వాదెజ్ సిల్లె. యీ లోకం పుట్టిబాణిజ్ అసి విజు యీ లెకెండె మనాద్, ఇని తేడ సిల్లెద్”, ఇజి వెహూర్.

5 గాని పూర్బకాలమ్ దు దేవుణు వన్ని మాటదాన్ ఆగాసమ్ దిజ్ బూమిదిజ్ తయార్ కిత్తాన్. యీ బూమి ఏరుబాణిజ్ తయార్ ఆతాద్. ఏరు వెట తయార్ ఆతాద్ ఇజి నెస్తిమహికెజ్ వారు పొస్టెజె ఇజి సుడోజినార్.

6 వన్ని మాటదాన్ నె పెరిగడ్డ వాజి అయ ఏరుదాన్ అయావలె మహి లోకం విజు ముడుగితాదె పాడాతా సొహాద్.

7 దేవుణు అయా మాటదానె ఏలు మని ఆగాసమ్ దిజ్ బూమిదిజ్ సిసుదాన్ నాసనం కిదెజ్ తీర్పు కిని రోజుదాక ఇట్టా మనాన్. దేవుణు వందిజ్ బక్తిసిల్లి లోకుర్ అయావలె పాడాజి సొనార్.

8 నాను ప్రేమిసిని తంబెరుజాండె, దిని వందిజ్ పోస్మాట్. ప్రబు ఎద్రు ఉండ్రీ రోజు వెయి పంటజ్ లెకెండ మనాద్. వెయి పంటజ్ ఉండ్రీ రోజు లెకెండ మన్నె.

9 ప్రబు ఒట్టు కితి లెకెండ మర్జి వాదెజ్ ఆలస్యం ఆజినాద్ ఇజి సెగొండార్ ఒడెబిజినార్. గాని ఎయెర్బా పాడాజి సొన్ఎండ, విజేరె పాపమ్కు డిసి మన్ను మారిస్తెజ్ ఇజి మీ వందిజ్ ఓరిస్త మనాన్.

10 గాని ప్రబు మర్జి వాని దినం తవ్వెండ వానాద్. ఒరెన్ డొజారి ఎస్తివలె వానండ్రొ ఇజి నెన్ఎండ వాని లెకెండ వానాద్. నస్తివలె ఆగాసమ్దు దిడిజిని వలె సిల్లెండ ఆనె. ఆగాసమ్దు మని విజు, సిసుదాన్ వేనె సొనె. బూమి ముస్కు మనికెజ్ విజు వేనె సొనె.

11 విజు యా లెకెండ పాడానె సొనె. అందెజె మీరు దేవుణు వందిజ్ కేట ఆతి లోకుర్ ఆజి దేవుణు వందిజ్ బక్తిమన్ని లోకుర్ ఆజి బత్తిదు.

12 దేవుణు వాని రోజు వాదెజ్ ఇజి మీరు ఎద్రు సుడెజినిదెర్. అయా దినం బేగినె వాదెజ్ ఇజి మీరు గటిజ పణి కిదు. అయ దినమ్దు ఆగాసమ్కు దని లొఇ మనికెజ్ విజి సిసుదాన్ వేనె సొనె. అయ సిసు వేడిడిజ్ విజు కర్జిజి సొనె.

13 గాని దేవుణు ఒట్టు కితి నని కొత్త ఆగాసమ్దిజ్, కొత్త బూమిదిజ్ మాటు ఎద్రు సుడెజినాట్. బానె విజు నీతి నజాయితి పూర్తి మంజినాద్లె.

14 అందెజె నాను ప్రేమిసినికిదెరా, మీరు ఇని తపు సిల్లెండ, ఇని పాపమ్బా సిల్లెండ దేవుణు ఎద్రు నండొ కస్టబాడిజి మండ్రు. దేవుణు వెట నిపాతిదాన్ మండ్రు. ఎందనిజ్ దేవుణు ఒట్టు కితి మన్ని దన్నిజ్ మీరు ఏద్రు సుడెజినిదెర్.

15 యాక నెస్సు. దేవుణు మా వందిజ్ ఎందనిజ్ ఓరిస్త మనాన్. ఇహిజ మాటు పాపం డిసి మన్ను మారిస్తెజె ఇజి. మాటు ప్రేమిసిని అన్న వవులుబా దేవుణు సీతి గెణమ్దాన్ వినుక వందిజ్ రాస్త మనాన్.

16 పవులు రాస్తి విజు ఉతరమ్క లొఇ యా లెకెండె రాస్త మనాన్. వన్నా లొఇ సెగం అర్దం కిదెజ్ కస్టం ఆతికెజ్. వనక వందిజ్ నెన్ఇకార్, దేవుణు ముస్కు మన్ని నమకమ్దు ఇత్తాల్ ఆత్తాల్ దుజ్నికార్ అయ మాటెజ అర్దం మారిసినార్. మహి దేవుణు మాటెజ లొఇ మన్ని సెగమ్కుబా మారిసినార్. దిన్ని వందిజ్ వారు నాసనం ఆన సొనార్.

17 నాను ప్రేమిసినికిదెరా, మీరు యా సజతిజ్ ముజాలె నెస్తి మనిదెర్. అందెజె జాగర్త మండ్రు. దేవుణు రూలుజ లొజిఇకార్ వెహ్నిని తపు బోదెజాణిజ్ మొసెం కిబె ఆమాట్. ఎందనిజ్ ఇహిజ వరి బోదెజ్ మీ స్తిరం ఆతి మన్నిజ కద్దిస్సాద్.

18 గాని మీరు మా ప్రబు రక్సిస్సికాన్ ఆతి యేసు క్రీస్తు సిత్తి వన్ని దయా దర్మమ్దాన్, గెణమ్దాన్ నెగ్రెండ పిరిజి మండ్రు. వన్నిజ్ ఏలుని, మరి ఎల్లకాలం గవ్వరం కల్లిపిద్. ఆమెన్.

## యోహాను రాస్తి మొదోహి ఉత్రం

నెల్ల కిబిసినిక

యేసు క్రీస్తు అపొస్తలుడు ఆతి యోహాను యా ఉత్రం రాస్తాన్. వాండ్రు యా ఉత్రం యేసుప్రబుజ్ నమ్మితి వరిజ్ రాస్తాన్. యేసుప్రబు సాజి నిజితి వెనుక అరువయ్ వంటెజ్ డాట్టాద్. యోహాను డొక్ర ఆత మహాన్. మహి సిసూర్ విజేరె సాత సాహార్. అయావలె బానె మహి సంగమ్కాజ్ యోహాను నడిపిసిని వన్ని లెకెండ మహాన్.

బత్తు ఆతి మాట

1 దేవుణు మాట ఆతి వన్ని వందిజ్, నాను మిజి రాసిన. వాండ్రు దేవుణు వెట అతు సిల్లి బత్తుకు సినికాన్. వాండ్రు యా లోకం పుట్టెండ ముజుల్ మహాన్. గాని వాండ్రు యా లోకమ్దు వాతిజ్ మాపు వన్నిజ్ వెహాప్. మాపు వన్నిజ్ సుడతాప్. మాపు వన్నిజ్ బెస్తామహాప్. మా కికాణిజ్ వన్నిజ్ ముట్టమహాప్. అయాక మిజి నెన్పిసినాప్.

2 బత్తు సీని వినిజ్ దేవుణు మా నడిమి పోక్తాన్. మాపు వన్నిజ్ సుడతాప్. మాపు సుడతాజ్ వన్నివందిజ్ మిజి నిజం వెహినాప్. బత్తు సీని వాండ్రు ఎల్లకాలం మంజి బత్తు ఇజి మిజి నెస్సిస్సాప్. వాండ్రు ముందాహాన్ అసి బుబ ఆతి దేవుణుబాన్ మహాన్. ఏలు వన్నిజ్ దేవుణు మజి తోరిస్తాన్.

3 మాపు సుడతాజ్ వన్ని వందిజ్, వెహివన్ని వందిజ్ మిజిబా వెహినాప్. ఎందనిజ్ ఇహిజ మీరు వన్నిజ్ నమ్మిదెజ్. ఆహె మా బాన్ కూడ్డి మండ్రెజ్ ఇజి. మాపు బుబ్బ ఆతి దేవుణు వెట, మరిన్ ఆతి యేసు క్రీస్తు వెట కూడిత మనాప్.

4 మీరుబా ఆహె కూడితిజ మా సర్ద పూర్తి ఆనాద్లె. అందెజె మాపు ఇకెజ్ రాసినాప్.

జాయ్దు నడిసినిక

5 అహిజ యేసు క్రీస్తు మజి వెహి మాటెజ్ ఏలు మిజి వెహినాప్. యాకదె మాట. అక ఇనిక ఇహిజ దేవుణు జాయి లెకెండ మనాన్. పూర్తి నెగ్గికాన్. వన్ని లో సికాటి అన్ల సిల్లెద్. ఇని కల్తిబ సిల్లెద్.

6 అందెజె మాటు దేవుణు వెట కూడిత మనాల్ ఇజి వెహి మా లోఇ సీకాటి మని లెకెండ బత్తితిజ మాటు అబద్దం వర్గిజినికాల్. దేవుణు నెన్పిస్తి నిజమాతి సరిదు నడినికాల్ ఆవల్.

7 గాని దేవుణు విజు దన్ని లోఇ జాయ్ తోరిసిని లెకెండ మాటు విజు పణిజ లోఇ జాయ్ తోరిస్తిజ, మాటు నమ్మితి వరి వెట కూడ్డి మంజినాల్. మరి దేవుణు మరిసి ఆతి యేసుప్రబు నల్ల, మాటు కిజిని విజు పాపమ్కాణిజ్ మజి సుబరం కిజినాద్.

8 మాటు ఇని తపుబా కినికాల్ ఆవల్ ఇజి వెహిజ మజి మాటె మోసం కెబె ఆజినాల్. ఎందనిజ్ ఇహిజ దేవుణు నెన్పిస్తి వన్ని నిజమాతి మాట వజ మాటు కిదెజ్ సిల్లె.

9 గాని మాటు తపు కిత్తాల్ ఇజి దేవుణుబాన్ ఒప్పుకొటిజ దేవుణు మా లోఇ మని సెఇకెజ్ విజు లాగ్గి పొక్కాండ్రె సుబరం కినాన్. ఎందనిజ్ ఇహిజ నెమిస్సు ఇజి దేవుణు మాట వెహ్తా మనాన్. వాండ్రు నమ్మిదెజ్ తగ్గికాన్. నాయం మనికాన్. వెహి వజ కినికాన్.

10 మాటు తప్పు కిఇకాల్ ఇజి వెహిజ దేవుణు అబద్దం వెహిక్వాన్ ఇజి మాటు వెహినాల్. మాటు ఆహె వెహిజ దేవుణు వెహి మాట అస్సికాల్ ఆవల్. ఎందనిజ్ ఇహిజ విజెరె లోకుర్ పాపం కిత్తార్ ఇజి దేవుణు వెహ్తా మనాన్గదె.

## 2

1 నజి కొణ్డెర్ లెకెండ మీరు, అందెజె మిజి రాసిన. మీరు పాపం కిదెజ్ ఆవద్ ఇజి యా సజతిజ్ మిజి రాసిన. గాని ఎయెన్బా పాపం కిత్తాన్ ఇహిజ దేవుణు ఆతి దేవుణుబాన్ మా వందిజ్ వెహిక్వాన్ ఒరెన్ ఒపిసినికాన్ మనాన్. విరి పాపమ్కు సెమిన్అ ఇజి వాండ్రు వెహ్సాన్. వాండ్రు నీతి నిజాతి మనికాన్ ఆతి యేసు క్రీస్తునె.

2 వాండ్రు మా పాపమ్కు సాన్పిస్తిజ్ పూజ ఆతికాన్. వాండ్రు పూజ ఆతిజ్ దేవుణు మా పాపమ్కు సెమిస్తిజ్ అట్నాన్. మా పాపమ్కాజ్ వందిజ్ ఉండ్రె ఆవద్. యా లోకమ్దు విజెరె పాపమ్క వందిజ్ పూజ ఆతికాన్.

3 మాటు దేవుణుజ్ నెస్తికాల్ ఇజి మజి ఎలాగ తెలిజినాద్. దేవుణు మజి సీతి ఆడ్రెజ లోజితిజనె తెలినాద్.

4 నాను దేవుణుదిజ్ నెస్సు ఇజి వెహి, దేవుణు సీతి ఆడ్రెజ లోజిఇకాన్ అబదం వెహిక్వాన్. దేవుణు నెన్పిస్తి నిజం ఆతి మాటిజ వాండ్రు లోజిఎన్.

5-6 దేవుణు వెహ్తా మాటదిజ్ ఎయెన్బా లోజీతిజ, దేవుణు మున్కు వన్నిజ్ పూర్తి ప్రేమ మనాద్ ఇజి తోరిస్సాన్. దేవుణు వెట కూల తొప్తామన ఇజి వెహ్పికాన్, యేసు ప్రబు నడిఃతి లెకెండ్ దేవుణుదిజ్ లోజీజి నడిఃదెజ్. ఆహె దేవుణు వెట కూడఃజి మంజినాట్ ఇజి మాటు నెస్సాట్.

7 నాను ప్రేమిసినికిదెరా, నాను ఉండ్తి కొత్త ఆడ్ర మిజి రాన్ఎ. గాని ముజాల నెన్పిస్తి ఉండ్తి పడాయ్ ఆడ్రనె రాసిన. అయా ఆడ్ర మీరు క్రిస్తు లోకు ఆతి బాణిజ్ అసి నెస్తికదె. అయ ఆడ్ర మీరు వెహిమని దేవుణు మాటనె.

8 గాని నాను ఏలు రాసిని మాట కొత్త ఆడ్రనె. ఎలాగ ఇహిజ యేసుప్రబు వన్ని బత్కుదు యా ఆడ్ర తోరిస్సాన్. మీ బత్కుదుబా మీరు తోరిస్సిదెర్. ఎందనిజ్ ఇహిజ మీ లోఇ సీకటి లెకెండ్ మని పాపం ఏలు సొన్నినాద్. జాయ్ లెకెండ్ మని నిజమాతికెజ్ మీ లోఇ వాజినె.

9 జాయ్దు నడిఃజిన ఇజి వెహ్పి ఒరెన్, క్రిస్తుజ్ నమ్మిత్తి వన్నిజ్ దూసిస్సికాన్ ఇహిజ వాండ్రు ఏలుబ సీకటిదునె నడిఃజినాన్.

10 మరి ఒరెన్ క్రిస్తుజ్ నమ్మిత్తి వన్నిజ్ ప్రేమిస్సికాన్ ఇహిజ వాండ్రు జాయ్దు నడిఃజినాన్. వన్ని బత్కుదు పాపం కిబిస్సిక ఇనికబ సిల్లెద్.

11 మహివరిజ్ పగ ఆతికాన్ సీకటిదు మంజి సీకటిదు నడిఃజినాన్. ఎంబె సొన్సినాండ్రొ ఇజి వాండ్రు నెన్ఎన్. ఎందనిజ్ ఇహిజ సీకటిదు వన్నిజ్ గుడ్డి వన్ని లెకెండ్ కితాద్.

12 నాను ప్రేమిసిని బయిరాండె, క్రిస్తు మీ వందిజ్ సాతిజ్ దేవుణు మీ పాపమ్కు నెమ్మిస్సాన్. అందెజె నాను యాకెజ్ మిజి రాసిన.

13 బుబ్బరాండె, దేవుణు ఇనికబా పుటిన్ఎండ ముజాల మహి యేసుక్రిస్తుజ్ మీరు నెస్తిదెర్. అందెజె నాను మిజి రాసిన. దజ్డారండె, మీరు నెఇ బుద్ది కల్లితి సయ్తానుజ్ గెలిస్తిదెర్. అందెజె నాను మిజి రాసిన. నాను ప్రేమిసిని బయిరాండె, బుబ్బ ఆతి దేవుణుదిజ్ మీరు నెస్తిమనిదెర్. అందెజె నాను మిజి రాసిన.

14 అందెజె నాను మిజి రాసిన. దజ్డారండె, దేవుణు మాట మీ లోఇ మనిజ్ మీరు సత్తుమనికిదెర్ ఇజి తోరిస్సిదెర్. మీరు సయ్తనుజ్ గెల్స్తి మనిదెర్ అందెజె మిజి రాసిన.

### లోకమ్దు మని వనకాజ్ ప్రేమ కిమాట్

15 యా లోకమ్దు మని వనక మున్కు మన్ను ఇడ్కాట్. యా లోకమ్ది బత్కుదిజ్ ప్రేమిన్మాట్. ఎందనిజ్ ఇహిజ యా లోకమ్దిజ్ ప్రేమిస్సి వన్నిజ్ దేవుణు మున్కు ప్రేమ సిల్లెద్.

16 ఎందనిజ్ ఇహిజ, యా లోకమ్దికెజ్ విజు దేవుణు బాణిజ్ వానికెజ్ ఆఉ. అక్కెజ్ ఇనికెజ్ ఇహిజ ఇనికెజ్ ఇనికెజ్ కిదెజ్ ఇజి ఆస ఆనాదొ, అక్కెజ్ విజు కిదెజ్ ఇజి ఒడఃబినిక, మరి, కణకెజిణిజ్ సుడఃజినికెజ్ విజు కావాలి ఇజి ఆస ఆనిక, మరి, ఆస్తి కల్గితిమని వందిజ్ గర్ర ఆనిక, నినికెజ్ యా లోకమ్దిజ్ ప్రేమ కినివలె వానె.

17 యా లోకమ్ది లోకుర్ ఆస ఆనికెజ్ విజు సిల్లెండ ఆనెలె. గాని దేవుణుజ్ ఇన్ఠం ఆతివజ నడిఃనికాన్ ఎలా కాలం బత్కినాన్లె.

### క్రిస్తుజ్ ఎద్రిస్సికార్ వానార్

18 నాను ప్రేమిసిని బయిరాండె, లోకం అందిని కడిఃవేరి దినమ్కు ఆజినె. కడిఃవేరి దినమ్కాజ్ క్రిస్తుజ్ ఎద్రిస్సికాన్ వానార్ ఇజి మీరు నెస్సిదెర్ గదె. అహిజ ఏలు క్రిస్తుజ్ ఎద్రిస్సికార్ నండెండార్ సోత మనార్. అందెజె కడిఃవేరి దినమ్కు ఆతె ఇజి మాటు నెస్సాట్.

19 వారు మా బాన్కూడిఃత మహార్. గాని డిఃస్త సాహార్. ఎలాగ ఇహిజ వారు మా లోకాజ్ నెందితికార్ ఆవర్. వారు మా బాన్ మంజినికార్ ఇహిజ మా వెటనె కూడిఃజి పాడ్డి మహార్మరి. గాని మజి డిఃస్త సాహారె, మజి నెందితికార్ ఆవర్ ఇజి వారు తోరిస్సాన్.

20 గాని క్రిస్తు పొక్తి దేవుణు ఆత్మ మిజి మనాన్. అందెజె మీరు విజిదెరె నిజమాతికెజ్ నెసినిదెర్.

21 మీరు నిజం నెన్ఇదెర్ ఇజి నాను యాక రాస్సిక ఆవద్. నిజమాతికెజ్ మీరు నెసినిదెర్. అందెజె నాను రాసిన. నిజమాతి దని లోఇ అబద్ధం ఆతి బోద సిల్లెద్ ఇజి మీరు నెస్సిదెర్. అందెజె నాను రాసిన.

22 యేసు, దేవుణు పొక్తి క్రిస్తు ఆవెన్ ఇజి వెహ్పికాండ్రె అబద్ధం వెహ్పికాన్. అహు వెహ్పినికాన్ క్రిస్తుజ్ ఎద్రిసినికాజ్. వాండ్రు బుబ్బ ఆతి దేవుణుదిజ్, మరిసి ఆతి క్రిస్తుజ్ నెక్కి పొక్సినికాన్.

23 దేవుణు మరిసి ఆతి యేసుక్రిస్తుజ్ నెక్కిపొక్కినికాన్ ఎయెన్బా బుబ్బ ఆతి దేవుణుదిజ్బ నెక్కిపొక్కినాన్. మరిసి ఆతి యేసుక్రిస్తుజ్ డగ్రు కినికాన్ బుబ్బ ఆతి దేవుణుజ్బా డగ్రు కిజినాన్.



24 యేసు క్రీస్తుజ్ఞ నమ్మితి బాణిజ్ఞ అసి మీరు వెహి మనికెజ్ విజు మీ మన్నుదు నెగ్రిండ అసి మండ్రెజ్. ఆహె నెగ్రిండ మీ మన్నుదు మహిజ, మీరుబా మరిసి ఆతి యేసు క్రీస్తుబాన్, బుబ్బు ఆతి దేవుణుబాన్ కూడజి మంజినిదెర్.

25 మాటు ఆహె వన్నిబాన్ కూడతి మహిజ, మజి సిన్ ఇజి యేసు ఒట్టు కితి ఎలా కాలం బత్కిని బత్కు మజి దోహొక్కాద్.

26 మిజి మోసెం కిదెజ్ సూణి వరి వందిజ్ ఇకెజ్ నాను రాసిన్.

27 క్రీస్తు పొక్తి దేవుణు ఆత్మ మీ లొఇ మనాద్. అందెజె మరి ఎయెన్బా మిజి నేర్పిస్తెజ్ అవ్సరం సిల్లెద్. ఎందనిజ్ ఇహిజ దేవుణు ఆత్మ పూర్తి నిజమె. ఇని అబద్దం సిల్లెద్. దేవుణు ఆత్మనె మీరు నెస్తెజ్ మని విజు వన్నా వందిజ్ నేర్పిస్తాన్. అందెజె దేవుణు ఆత్మ నెన్పిస్తి లెకెండెనె మీరు క్రీస్తు బాన్ నిల్చి మండ్రు.

### మాటు దేవుణు కొడొఱ్

28 అందెజె నాను ప్రేమిసిని నా బయిరండె, క్రీస్తుబాన్ నిల్చి మండ్రెజ్. ఎందనిజ్ ఇహిజ వన్ని వెట నిల్సి మహిజ క్రీస్తు మర్జి వానివలె వన్ని ఎద్దు సిగు ఆవండ దయ్ రమ్దాన్ నిల్దెజ్ ఆనాద్.

29 దేవుణు నీతి నిజాయితీ మనికాన్ ఇజి మీరు నెస్తిదెర్. అహిజ దేవుణు వెప్తి వజ కిని ఎయెన్బ దేవుణు కొడొఱ్ ఇజి మీరు నెస్తిదెర్.

## 3

1 బుబ్బు ఆతి దేవుణు మజి నండొ ప్రేమిస్తిజ్ మాటు దేవుణు కొడొఱ్ ఇజి కూకె ఆజినాట్. నసా దేవుణు ప్రేమ మా మున్ను మంజినాద్. మాటు దేవుణు కొడొఱ్నె. గాని దేవుణుదిజ్ నమ్మిఇకార్, బుబ్బు ఆతి దేవుణుదిజ్ నెన్ఎర్. అందెజె మాటు దేవుణు కొడొఱ్ ఇజి వారు అర్దం కిఎర్.

2 నాను ప్రేమిసినికిదెరా, ఏలు మాటు దేవుణు కొడొఱ్ ఆత మనాట్. మాటు ఇనిక అనాట్లె ఇజి దేవుణు ఇంక మజి తొరిన్వతాన్. గాని యేసు క్రీస్తు తొరె అనివలె వాండ్రు మని లెకెండె మాటుబ అనాట్లె ఇజి నెన్నాట్. ఎందనిజ్ ఇహిజ వాండ్రు మనిలెకెండె మాటు వన్నిజ్ సుణాట్లె.

3 యేసు క్రీస్తు తొరె అని వందిజ్ ఎద్దు సుడొజిని ఎయెన్బా వని వజ ఆస ఆజి పాపం డిసి బత్కిజినాన్. ఎందనిజ్ ఇహిజ క్రీస్తు పాపం సిలికాన్.

4 పాపమ్కు కిజినె మంజినికాన్ ఎయెన్బా దేవుణు ఆడ్రెజ్ నెక్కిపొక్కినికాజ్. పాపం ఇనిక ఇహిజ, దేవుణు ఆడ్రెజ్ నెక్కి పొక్కిక.

5 మా పాపమ్కు విజు లాగ్రి పొక్కెజె క్రీస్తు యా లొకమ్దు వాతాన్ ఇజి మీరు నెసినిదెర్. అకదె ఆఎద్, వన్ని లొఇ పాపం ఇనికబా సిల్లెద్ ఇజిబా మీరు నెసినిదెర్.

6 అందెజె యేసు క్రీస్తు వెట కూల తొహ్నికాన్ పాపం కిజినె మన్ఎన్. పాపం కిజినె మనికాన్ ఎయెన్బా క్రీస్తు ఎయెన్ ఇజి అర్దం కిఎన్.

7 నాను ప్రేమిసిని బయిరండె, ఎయెర్బా మిజి మోసెం కిఎండె సుడొడు. యేసు క్రీస్తు నీతిమనికాన్. క్రీస్తు వెప్తి మాటెజ్ వజ నడినికాన్, దేవుణు ఎద్దు నీతి నిజాయితీ మనికాన్.

8 పాపం కిజినె మంజినికాన్ సయ్తాను జటుదికాన్. ఎందనిజ్ ఇహిజ యా లొకం పుట్ఎండ మహి బాణిజ్ అసి సయ్తాన్ పాపం కిజినె మంజినాన్. దేవుణు మరిసి ఆతి యేసుక్రీస్తు యా లొకమ్దు ఎందనిజ్ వాతాన్ ఇహిజ సయ్తాన్ కిని విజు పణిజ పూర్తి నాసనం కిదెజె వాతాన్.

9 దేవుణు కొడొఱ్ అతికాన్ ఎయెన్బా పాపం కిజినె మన్ఎన్. ఎందనిజ్ ఇహిజ దేవుణు గుణం వన్ని లొఇ మనాద్. వాండ్రు దేవుణు పొటాదికాన్. అందెజె పాపం కిజి మండ్రెజ్ అట్ఎన్.

10 దేవుణు కొడొఱ్ ఎయెర్, సయ్తాన్ కొడొఱ్ ఎయెర్ ఇజి మాటు ఎలాగ నెస్పాట్ ఇహిజ దేవుణు ఎద్దు సరియాతికెజ్ కిఇకాన్ దేవుణు కొడొఱ్ ఆఎన్. మహి వరిజ్ ప్రేమ కిఇకాన్బా దేవుణు కొడొఱ్ ఆఎన్.

### ఒరెన్ మరి ఒరెన్ వన్నిజ్ ప్రేమిస్తెజ్

11 అందెజె మీరు నమ్మితి బాణిజ్ అసి వెహిక యాకదె. ఇనిక ఇహిజ మాటు, ఒరెన్ మరి ఒరెన్ వన్నిజ్ ప్రేమిస్తెజ్ ఇజి,

12 మాటు కయును లెకెండె మండ్రెజ్ ఆఎద్. వాండ్రు సయ్తాను జటుదికాన్ అతండ్రె వన్ని తంబెర్సిజ్ సప్తాన్. ఎందనిజ్ సప్తాన్ ఇహిజ వన్ని పణిజ్ సెఇ బుద్ధి కలగితికెజ్. వన్ని తంబెర్చి పణిజ్ దేవుణు ఎద్దు సరిఅతికెజ్ఎన్ ఆతెమహె.

13 అహిజ నా తంబెరుజాండె, దేవుణుదిజ్ నమ్మిఇకార్ మీ మున్ను పగ ఆతిజ బమ్మ ఆమాట్.

14 మాటు మహి వరిజ్ ప్రేమ కిజి మహిజ మాటు సాతి వరి లెకెండె ఆఎట్. ఎలా కాలం బత్కిని బత్కుదు బత్కిజినాట్ ఇజి నెసినాట్. మహి వన్నిజ్ ప్రేమ కిఇకాన్ సాతి వన్ని లెకెండె మనాన్.

15 మాటు ఒరెన్ వన్ని మున్ను పగ అస్తిజ, వన్నిజ్ సప్తిలెకెండె. లోకాజ్ సప్పి వన్నిజ్ ఎలా కాలం బత్కిని బత్కు సిల్లెద్ ఇజి మీరు నెసినిదెర్.

16 ప్రేమ ఇహిజ ఇనిక ఇజి మాటు ఎలాగ నెస్నాట్ ఇహిజ, యేసు క్రీస్తు, వాండ్రె వన్ని పాణం మా వందిజ్ సితాన్. అకదె ప్రేమ. అయవజనె మాటుబా మా తంబెరిజ వందిజ్ మా పాణం సీదెజ్వలె.

17 విజు కల్గితి మనికాన్ ఒరెన్, అవ్సరమ్దు మని ఒరెన్ వన్నిజ్ కనికారం తోరిన్ఎండ మహిజ అయ విజు కలగితి మనికాన్ దేవుణుదిజ్ నెగ్రెండ ప్రేమిన్ఎన్ ఇజి తోరిస్నాన్.

18 నాను ప్రేమిసిని బయిరండె, మాటు మాట ఉండ్రె దానె ఆఎద్. మా పణిబ మా ప్రేమ నిజమె ఇజి తోరిస్నాట్.

19 మాటు మా పణిజాణిజ్ మహి వరిజ్ నిజం కిజి ప్రేమిస్తిజ మాటు నిజమాతిదాన్ లోజిజినాప్ ఇజి నెస్నాట్లె. మరి దేవుణు ఎద్రు మా మన్ను నిపాతి మంజినాద్లె.

20 ఎండనిజ్ ఇహిజ మాటు తప్తాట్ ఇజి మా మన్ను ఉండ్రె వేలా వెహ్నాద్ను గాని, దేవుణు మా మన్నుదిజ్ ఇంక పెరికాన్. దేవుణు నెన్ఇకెజ్ ఇనికెజ్ సిలు.

21 నాను ప్రేమిసినికిదెరా, మాటు తపు కిఎట్ ఇజి మా మన్నుదు నెస్తిజ మాటు దేవుణు వెట కూడేజి దయ్సం కల్గిజి మంజినాట్.

22 మాటు ఇనిక లోస్తిజబా దేవుణు బాణిజ్ దోహ్కీనాద్. ఎండనిజ్ ఇహిజ దేవుణు వెహ్కెజ్ మాటు కిజినాట్. దేవుణుదిజ్ ఇస్టం ఆతి వజ బత్కిజినాట్.

23 యాకదె దేవుణు మజి వెహ్కె రూలు. ఇహిక ఇహిజ యేసు క్రీస్తు దేవుణు మరిసి ఇజి మాటు నమ్మిదెజ్ వలె. క్రీస్తు వెహ్కె లెకెండ ఒరెన్ మరి ఒరెన్ వన్నిజ్ ప్రేమిస్తిజ్.

24 దేవుణు సిత రూలుజ్ వజ నడినికాన్ దేవుణు వెట మంజినాన్. దేవుణు వన్ని వెట మంజినాన్. దేవుణు మా వెట మనాన్ ఇజి ఎలాగ నెస్నాట్ ఇహిజ, దేవుణు ఆత్మ మా లోఇ మనిజ్ మాటు నెస్నాట్.

## 4

### విజు ఆత్మెజ నమ్మిదెజ్ ఆవద్

1 నాను ప్రేమిసినికిదెరా, దేవుణు ఆత్మదాన్ వర్గిజిన ఇజి వర్గిని విజు వన్నాజ్ నమ్మిమాట్. విజు దేవుణు బాణిజ్, వాతికదో ఆవదో ఇజి నెగ్రెండ నెసి నుడేదు. ఎండనిజ్ ఇహిజ అబద్ధం వెహ్కె ప్రవక్తరు నండొండొర్ యా లోకమ్దు సొతారె తప్పు మాటెజ్ బోదిసినార్.

2 దేవుణు ఆత్మ మనికార్ ఎయెర్ ఇజి ఎలగ నెస్నాట్ ఇహిజ లోకు వజ దేవుణు బాణిజ్ వాతి యేసు క్రీస్తుజ్ నాను సెందితికాన్ ఇజి ఒప్పకొణికాన్ ఎయెన్బా దేవుణు ఆత్మ మనికాన్ ఇజి నెస్తిజ్.

3 గాని ఎయెన్బా, యేసు ప్రబు నా ప్రబు ఆఎన్ ఇజి వెహ్కెజి వాండ్రు దేవుణు బోద వెహ్కెకాన్ ఆఎన్. వాండ్రు క్రీస్తుజ్ పడికాన్ క్రీస్తుజ్ పడిఎండ వెహ్కెకార్ వానార్ ఇజి మీరు వెహ్కెకెజ్ యాకదె. అయ గుంపుదికార్ ఏలు మా నడిమి మనార్.

4 ఇజిరి బయిరండె, మీరు దేవుణుదిజ్ సెందితికెదెర్. మీరు వరి బోద కెజతిదెరె, వరిజ్ గెల్స్తిదెర్. మీ లోఇ మని దేవుణు ఆత్మ సత్తు లోకమ్దు మని సయ్తాన్ సత్తు మున్ను పెరికదె. అందెజె మీరు వరిజ్ గెల్స్తిదెర్.

5 తప్పు మాటెజ్ బోదిస్సికార్ యా లోకమ్దికార్. అందెజె వరి బోద యా లోలమ్ది వరి ఆలోసం లెకెండ మన్నె. అందెజె యా లోకమ్దికార్ వరి బోద వెనార్.

6 మాటు ఇహిజ దేవుణుదిజ్ సెందితికాట్. దేవుణుదిజ్ నెస్తికాన్ మా మాటెజ్ వినాన్. ఆఇకాన్ వినెన్. నిజం వెహ్కెకార్ ఎయెరో, తప్పు వెహ్కెకార్ ఎయెరో ఇజి మాటు ఈహు నెస్నాట్.

### దేవుణు ప్రేమని, లోకు ప్రేమ

7 నా తంబెరిజడె, మాటు ఒరెన్, మరి ఒరెన్ వన్నిజ్ ప్రేమిస్తిజ్వలె. ఎండనిజ్ ఇహిజ దేవుణు బాణిజె ప్రేమ వాజినాద్. మరి ఒరెన్ వన్నిజ్ ప్రేమిస్సికాన్ దేవుణు బాణిజ్ పుట్టికాన్. వాండ్రు దేవుణుదిజ్ బాగ నెస్తికాన్.

8 మహి వరిజ్ ప్రేమిన్ఇకాన్ దేవుణుదిజ్ నెన్ఇకాన్. ఎండనిజ్ ఇహిజ దేవుణు ప్రేమ మనికాన్.

9 దేవుణు మజి ప్రేమిస్నాన్ ఇజి ఈహు తోరిస్నాన్. ఎలాగ ఇహిజ వన్ని ఒరెండ్రె మరిసిజ్ యా లోకమ్దు పొక్తాన్. మజి ఎలా కాలం బత్కిని బత్కు దోహ్కెజ్ ఇజి దేవుణు వన్నిజ్ పొక్తాన్.

10 నిజమాతి ప్రేమ ఇహిజ మాటు దేవుణుదిజ్ ప్రేమిస్తిజ్ ఇజి ఆవద్. నిజమాతి ప్రేమ ఇహిజ యాకదె. ఎలాగ ఇహిజ దేవుణు మజి ప్రేమిస్తిజ్ మా పాపమ్కు సొస్పిస్సి వందిజ్ వన్ని మరిసిజ్ పొక్తాన్. మా పాపమ్క వందిజ్ పూజ ఆదెజ్ పొక్తాన్. అకదె ప్రేమ.

11 నాను ప్రేమినినికిదెరా, దేవుణు మజి నిసా ప్రేమిస్తాన్. అందెజె మాటుబా ఒరెన్ మరి ఒరెన్ వన్నిజ్ ప్రేమిస్తాజ్ వలె.

12 ఎయెర్బా ఎనెజ్బా దేవుణుదిజ్ సుడెదెజ్ సిల్లె. గాని మాటు ఒరెన్ మరి ఒరెన్ వన్నిజ్ ప్రేమిస్తాజ దేవుణు మా లొఇ బత్తిజినాన్. అయావలె దేవుణు ప్రేమినిని లెకెండ మా ప్రేమబ పూర్తి ఆనాదలె.

13 దేవుణు వన్ని ఆత్మ మజి సిత మనాన్. అందెజె మాటు దేవుణు వెట కూడిత మనాట్ ఇజి, మరి దేవుణు మా లొఇ మంజినాన్ ఇజి నెసినాట్.

14 మరి బుబ్బు ఆతి దేవుణు, మరిసి ఆతి యేసుక్రీస్తుజ్ పోక్తాన్. లోకాజ్ వరి పాపమ్కాణిజ్ వాని సిక్పదాన్ తప్రిస్తాజ్ ఇజి పోక్తాన్. యాక మాపు సుడెతాపె విజేరిజ్ వెప్పినాప్. యాక నిజమె ఇజి సాక్సి వెప్పినాప్.

15 యేసు దేవుణు మరిసి ఇజి ఎయెన్బా ఒప్పుకొటిజ, దేవుణు వన్ని వెట మంజినాన్. వాండ్రు దేవుణు వెట కూడిజి మంజినాన్.

16 దేవుణు మా ముస్కు తోరిస్తి ప్రేమ మాటు నెస్త మనాట్, నమ్మిత మనాట్. దేవుణు ప్రేమ మనికాన్. అందెజె మహి వరిజ్ ప్రేమినినికాన్ దేవుణుబాన్ కూడిజి మంజినాన్. దేవుణు వన్నిబాన్ కూడిజి మంజినాన్.

17 దేవుణు ప్రేమినిని లెకెండ మా నడిమి మని ప్రేమ పూర్తి ఆనాదలె. అందెజె దేవుణు తీర్పు సిని వలె తియెల్ ఆవిండ మంజినాట్. ఎండనిజ్ ఇహిజ యేసుప్రబు యా లోకమ్దు ఎలాగ బత్కితాండ్రొ మాటుబ అయాలెకెండె బత్కిదెట్.

18 ప్రేమ లొఇ తియెల్ సిల్లెద్. అక్కాదె ఆవిద్. పూర్తి ఆతి ప్రేమ మహిజ అక్క తియెల్ సాన్పిస్తాద్. ఎండనిజ్ ఇహిజ సిక్ప వానాద్ ఇజిని తియెల్ వానాద్. తియెల్ ఆని వన్నిజ్ పూర్తి ప్రేమ సిల్లెద్.

19 దేవుణునె మజి ముజాల ప్రేమిస్తాజ్, మాటు వన్నిజ్ ప్రేమిస్తాజ్ అట్సినాట్.

20 ఎయెన్బా, 'నాను దేవుణుదిజ్ ప్రేమిస్తు' ఇజి వెప్పినా, మరి ఒరేన్ నమ్మిత్తి వన్నిజ్ ప్రేమ కిఎండ మహిజ వాండ్రు అబద్దం వెప్పినాన్. ఎండనిజ్ ఇహిజ తోరిజిని వన్నిజ్ ప్రేమిన్ఇకాన్ తోరెద దేవుణుదిజ్ ప్రేమిస్తాజ్ ఆట్ఎన్.

21 యేసు క్రీస్తు మజి ఇని రూలు సిత మనాన్ ఇహిజ, దేవుణుదిజ్ ప్రేమిస్తాజ్ మహి క్రీస్తు లోకాజ్బా ప్రేమిస్తాజ్ వలె.

## 5

### దేవుణు మరిసి ముస్కు నమ్మకం

1 యేసునె క్రీస్తు ఇజి నమ్మినికాన్ ఎయెన్బా దేవుణు బాణిజ్ పుట్టాన్. బుబ్బెజ్ ప్రేమిస్తాజ్ ఎయెన్బా వన్ని బాణిజ్ పుట్టి విజేరిజ్ ప్రేమిస్తాన్.

2 దేవుణుదిజ్ ప్రేమిసి, వాండ్రు వెప్తి రూలుజ వజ కితిజ, మాటు దేవుణు కొడెరిజ్ ప్రేమిస్తాజ్ ఇజి నెస్తాట్.

3 దేవుణుదిజ్ ప్రేమిస్తాజ్ ఇహిజ వన్ని రూలుజ వజ కిదెజె. వన్ని రూలుజ్ కస్తం ఆతికెజ్ ఆడ. సుల్కాణికెజె.

4 దేవుణుబాణిజ్ పుట్టికార్ విజేరె యా లోకమ్దు దేవుణుదిజ్ పడిఱ విజు వన్కాజ్ జయిస్తాజ్ అట్పార్. దేవుణుదిజ్ పడిఱ విజు వన్కాజ్ జయిస్తాజ్ ఎలాగ అట్పాట్ ఇహిజ, మాటు యేసుప్రబుజ్ నమకం ఇట్టివలెదాన్ అట్పాట్.

5 దేవుణుదిజ్ పడిఱ వన్కాజ్ జయిస్తాజ్ ఎయెన్? యేసు, దేవుణు మరిసి ఇజి నమ్మినికాండ్రె.

6 క్రీస్తు ఆతి యేసు యా లోకమ్దు వాతండ్రె. ఏరుదు బాప్తిసం లాగెతాన్. సిల్వాదు నల వాక్సి సాతాన్. బాప్తిసం ఉండ్రె ఆవిద్. సిలువాదు నల వాక్సి సాదెజె వాతాన్. యాక నిజమె ఇజి దేవుణు ఆత్మ సాక్సి వెప్పినాన్. అందెజె యాక నిజమె. ఎండనిజ్ ఇహిజ దేవుణు ఆత్మ నిజమెనె వెప్పినాన్.

7 క్రీస్తు వందిజ్ సాక్సి వెప్తికెజ్ మూండ్రె మన్నె.

8 దేవుణు ఆత్మ, బాప్తిసం లాగె ఆతి ఏరు, సిలువాదు వాక్తి నల. యా మూండ్రె ఒప్పు కొడిజి క్రీస్తు వందిజ్ సాక్సి వెప్పినె.

9 మాటు, లోకుర్ సాక్సి అస్తాట్ గదె. అహిజ దేవుణు సిని సాక్సి ఒదె సత్తు మనికగదె. ఎండనిజ్ సత్తు మనిక ఇహిజ, దేవుణు వన్ని సాంత మరిసి ఆతి యేసు వందిజ్ వెప్తి సాక్సి నె.

10 దేవుణు మరిసి ముస్కు నమం ఇట్టి వన్ని లొఇ యా సాక్సి మనాద్. గాని దేవుణు ముస్కు నమ్మకం ఇడెఇకాన్ దేవుణు మని మరిసి వందిజ్ వెప్తి సాక్సి నమ్మిఎన్. అందెజె వాండ్రు దేవుణు అబద్దం వెప్పినికాన్ ఇజి వెప్పినాన్.

11 దేవుణు వెప్తి సాక్సి యాకదె. ఇనిక ఇహిజ దేవుణు వెట ఎలా కాలం బత్తిని బత్తు దేవుణు మజి సితాన్. యా బత్తు మజి ఎలాగ వాతాద్ ఇహిజ యేసు క్రీస్తు ముస్కు నమకం ఇడెజి వన్ని వెట కూడితి మహిజ్ వాతాద్.

12 దేవుణు మరిసి ఆతి యేసు క్రీస్తు వెట కూడిజి మంజిని వన్నిజ్ యా బత్తు మనాద్. దేవుణు మరిసి వెట కూడిజి మన్ఇ వన్నిజ్ దేవుణు వెట ఎలా కాలం బత్తిని బత్తు సిల్లెద్.

13 దేవుణు మరిసి ముస్కు నమ్మకం ఇడెఇతి వరిజ్ నాను ఇక్కెజ్ రాసిన. ఎండనిజ్ రాసిన ఇహిజ మిజి దేవుణు వెట ఎలా కాలం బత్తిని బత్తు మనాద్ ఇజి నెస్తెజె రాసిన.

14 అహిజ మజి దేవుణు ముస్కు మని దయరం ఇనిక ఇహిజ, మాటు దేవుణు ఇస్టమ్దిజ్ కూడితి మని ఇనికబా లొస్తిజ, వాండ్లు అక కినాన్.

15 మాటు ఇనిక లొస్తిజ్బా దేవుణు వెంజినాన్ ఇజి మాటు నెస్తిజ, మాటు దేవుణుబాణిజ్ లొస్తికెజ్ విజు దొహ్క్తి లెకెండ్ నెసినాట్.

16 ఒరెన్ నమ్మిత్తికాన్ సావు తెఇ పాపం కిజి మహిజ ఎయెన్బా అక సుడిఃతిజ, వన్ని వందిజ్ పార్దనం కిదెజ్. దేవుణు వన్నిజ్ బత్కు సీనాన్. సావు తెఇ పాపం కినివరి వందిజె వెహ్సిన. గాని సావు తపిన్ని పాపం మనాద్. నని పాపం కిని వరి వందిజ్ పార్దనం కిఅ ఇజి నాను వెహ్ఎ.

17 ఇని తపు కితిజ్బా పాపమ్నె. గాని లోకాజ్ సావు తపిన్ఇ పాపమ్కు మన్నె.

18 దేవుణు బాణిజ్ పుట్టికాన్ ఎయెన్బా పాపం కిజినె మన్ఎన్ ఇజి మాటు నెసినాట్. ఎందనిజ్ ఇహిజ దేవుణు మరిసి వన్నిజ్ కావ్కిజినాన్. అహిజ సయ్తాను వన్నిజ్ ముట్టి నాసనం కిదెజ్ అట్ఎన్.

19 మాటు దేవుణు కొడొర్ ఇజి నెసినాట్. దేవుణుదిజ్ సెందితికార్ ఆఇకార్ సయ్తాను అడిఃగి మంజినార్ ఇజి నెసినాట్.

20 మరి దేవుణు మరిసి వాతండ్రె, నిజమాతి దేవుణుదిజ్ మాటు నెస్తిజ్ మజి తెలివి సితాన్. మాటు వన్ని వెట కూడిఃతిజ్ నిజమాతి దేవుణు వెట కూడిఃత మనాట్. వీండ్రె నిజమాతి దేవుణు. వీండ్రె దేవుణు వెట ఎలా కాలం బత్కిని బత్కు లోకాజ్ సీనికాన్.

21 నాను ప్రేమినిని బయిరండ్రె, బోమ్మెజ మాడిఃస్తిజ్ ఆవద్.

## యోహాను రాస్తి రుండి ఉత్తం

నెల్ల కిబిసినిక

యేసు క్రీస్తు అపొస్తుడు ఆతి యోహాను రాస్తి ఉత్తమనె యాక. నండొ ముజాలె సువార్త వెప్పికార్ బూలాజి బూలాజినె సువార్త సాటిసి మహార్. అయావలె యేసుజ్ నమ్మిత్తికారె, యాలెకెండ సువార్త వెప్పి వరిజ్ వరి ఇండ్రొ డగ్రు కిజి, వరిజ్ కావాలిస్తికెజ్ సీజి పొక్కి మహార్. తప్పు బోద వెప్పికార్బా మహార్. వారుబా యాలెకెండ బూలాజి బూలాజినె కిజి మహార్. అందెజె నన్ని వరివందిజ్ జాగర్త మండ్రెజ్ ఇజి యా ఉత్తమదు రాసి వెప్పినాన్. నిజమాతికెజ్ నమ్మిజి అయాలెకెండ బత్తిదెజ్ వలె ఇజిబా వెప్పినాన్.

1-2 పెదెలి ఆతి నాను, దేవుణు ఏర్పాటు కితి అమ్మెజ్, దన్ని కొణ్ణెరిజ్ రాసిన. నాను మిజి నిజమనె ఎత్తు కిజిన. నాను ఒరెనె ఆవిండ, దేవుణు తోరిస్తి నిజమాతి సజతిజ్ నెస్తికార్ విజెరెబా మిజి ఎత్తు కిజినార్. ఎందనిజ్ ఇహిజ, దేవుణు తోరిస్తి నిజమత్తికెజ్ మజి తెలిజి మంజినె. అయాకెజ్ మాటు ఎలాకాలం తెలిజి మంజినె.

3 దేవుణు తోరిస్తి నిజమాతికెజ్ మాటు నమ్మిజినాట్. వాండ్రు మజి ప్రేమిస్సాన్. అందెజె బుబ్బు ఆతి దేవుణుని మరిసి ఆతి యేసు క్రీస్తు, దయా దర్మమదాన్, మా మున్కు కనికారం తోరిసి మాటు నిపాతిదాన్ మండ్రెజ్ సాయం కిపిర్.

ప్రేమదాన్ నడినివందిజ్ వెప్పినిక.

4 మీ కొణ్ణెర్ లొజ నెగొండార్, దేవుణు తోరిస్తి నిజమాతి సజతిజు వజ నడిజినార్ ఇజి నాను నెస్త. అందెజె నాను నండొ సర్ద ఆజిన. బుబ్బు మజి ఆడ్ర సిత్తివజనె వారు నడిజినార్.

5 అహిజ ఒ అమ్మ, నాను కొత్త ఆడ్ర మిజి రాన్. గాని క్రీస్తుజ్ నమ్మిత్తిబాణిజ్ అసి, మాటు నెస్తి మన్ని ఆడ్రనె రాసిన. మాటు ఒరెన్ వన్నివెట ఒరెన్ ప్రేమిస్టెజ్ ఇని ఆడ్రనె వెప్పిన.

6 మాటు వన్ని ఆడ్రెజు లొజిజి, అయావజ నడితిజనె దేవుణుదిజ్ ప్రేమిస్సాట్. మీరు క్రీస్తుజ్ నమ్మితి బాణిజ్ అసి వెహిలెకెండ, మాటు ఒరెన్ వన్ని వెట ఒరెన్ ప్రేమిసి అయాలెకెండ నడిదెజ్ ఇజినె వన్ని ఆడ్ర.

మొసెం కినివరివందిజ్ జాగర్త మండ్రు.

7 యేసుక్రీస్తు, యాయపాటలొహాన్ వాతికాన్ ఇజి ఒప్పుకొణ్ణెన నండొండార్ మొసెం కినికార్ లోకమదు సొత్త మనార్. ననికాండ్రె మొసెం కినికాన్, క్రీస్తుజ్ ఎద్రిస్సికాన్.

8 అపొస్తురు ఆతి మాపు, మీ వెట మీ నడిమి కితి పణిజు పలితం, పాడు ఆవిండ మంజిని వందిజ్, మొసెం కినివరి మున్కు జాగర్త మండ్రు. మరి, దేవుణు వెట ఎలాకాలం బత్తిని బత్తు. దొహ్క్కివందిజ్, మొసెం కినివరి మున్కు జాగర్త మండ్రు.

9 ఎయెన్బా, క్రీస్తు నెన్పిస్తి మాట నమ్మిజి మన్విండ, వన్ని సొంత మాటెజ్, క్రీస్తు నెన్పిస్తి మాటవెట కలప్తిజు, వాండ్రు దేవుణుదిజ్ సెందికాన్. క్రీస్తు నెన్పిస్తి మాట నమ్మిజి మంజినికాన్ బుబ్బెజ్ని మరిసిజ్ సెందికాన్.

10 ఎయెన్బా క్రీస్తు నెన్పిస్తి మాట వెహ్విండ, మీ డగ్రు వాతిజు, మీరు వన్నిజ్ ఇండ్రొ కూక్మాట్. వన్నిజ్ డగ్రు కిమాట్.

11 ఎందనిజ్ ఇహిజ, వన్నిజ్ డగ్రు కితికాన్ ఎయెన్బా వన్ని సెఇపణిజువెట కూడిత మనాన్.

12 నండొ సజతిజ్ మిజి రాస్తిజ్ మనాద్. గాని ఉత్తమదాన్ వెహ్జెజ్ నజి మన్కు సిల్లెద్. మా సర్ద పూర్తి ఆదెజ్ మీ డగ్రు వాజి, మిజి సుడెజి వర్గిదెజ్ నాను ఆస ఆజిన.

13 దేవుణు ఏర్పాటు కితి నీ తజి కొణ్ణెర్, మిజి వెన్బాతి లెకెండ వెప్పినార్.

## యోహాను రాస్తి మూండ్రి ఉత్తం.

నెల్ల కిబిసినిక

యేసు క్రీస్తు అపొస్తుడు ఆతి యోహాను రాస్తి ఉత్తమనె యాక. వన్ని కూలాయెనాతి గాయుజ్ రాసినాన్. యా గాయు ఇనికాన్, యోహాను అతికారం అడిగి మన్ని దేవుణు సజం ఉండ్రి సుడఃజి నడిపిస్సాన్. బూలాజి బూలాజి సువార్త వెప్పి వాజిని వరిజ్ వాండ్రు డగ్రు కిజి నెగ్రెండ మర్జి పోక్కిని దన్ని వందిజ్ యోహాను వన్నిజ్ వందనమ్కు వెప్పినాన్. మరి, దియొత్తెపె ఇనికాన్ బూలాజి బూలాజి సువార్త కిని వరిజ్ డగ్రు కివిండ మర్జి పోక్కాన్. వాండ్రు యోహాను అతికారం అడిగి మండ్రిజ్ కెపి ఇజినాన్. వన్నిజ్ డటిసి వెప్పిదన్ని వందిజ్బా యా ఉత్తమదు రాసినాన్.

1 పెదెలి ఆతి నాను నిజం ఎత్తు కిజిని నా సొంత కూలాయెన్ ఆతి గాయుజ్ రాసిన.

2 ఓ, నాను ప్రేమిసిని కూలాయెన్, దేవుణు వెట నిజి మన్ని సమందం పిరిసిని వజ, నీను విజు వన్నా లొఇ పిరిదెజ్ ఇజి నాను పార్దనం కిజిన. నీను నోబు నోప్పి సిల్లెండ నెగెండ నెగెండ మండ్రిజ్ ఇజిబా నాను పార్దనం కిజిన.

3 సెగెండార్ నమ్మితికార్ నా డగ్రు వాతార్. వారు, దేవుణు తోరిస్తి నిజమాతి సజతిజ్ నీను లొజిజిని ఇజి, అయావజి నీను నెగ్రెండ నడిజిని ఇజి వెహ్తార్. అయాలెకెండ వెహ్తారె నజి నండో సర్ద కిబిస్తార్.

4 నా కొడోర్ దేవుణు తోరిస్తి నిజమాతి సజతిజ్ లొజిజినార్. వారు అయావజి నడిజినార్ ఇజి వెంజినికాదె నజి నండో సర్ద. దన్నిజ్ మిస్తి సర్ద సిల్లెద్.

5 ఓ, నాను ప్రేమిసిని కూలాయెన్, బూలాజి బూలాజి సువార్త వెప్పి వాజిని వరిజ్ నీను డగ్రు కిజిని. వారు నిజి తెలికార్ ఆతిజ్బా నీను వరి వందిజ్ కిజిని ఇనికబా నమ్మకమ్దానె కిజిని.

6-7 వారు నీ ప్రేమ వందిజ్ ఇబ్బె దేవుణు సజం ఎద్రు సాసి వెహ్తార్. నీను, దేవుణుదిజ్ ఇస్టం ఆతి వజి వరి పయ్నమ్దు అవ్సరం ఆతికెజ్ సీజి పోక్అ. ఎందనిజ్ ఇహిజ, వారు క్రీస్తుజ్ నమ్మిఇ వరిబాణిజ్ ఇనికబా లొన్విండ, క్రీస్తుజ్ వెహ్తాజ్ సోత్తార్.

8 అందెజె వారు వెప్పివలె, మాటు వరివెట జత కూడఃజి, దేవుణు వందిజ్ నిజమాతికెజ్ నెన్పిస్సివందిజ్, నన్నివరిజ్ మాటు డగ్రు కిదెజ్వలె.

దియొత్తెపెని దెమెత్రియు.

9 నాను దేవుణు సజమ్దిజ్ ఉండ్రి సజతి రాస్త. గాని దియొత్తెపె నా అతికారమ్దిజ్ లొజివన్. ఎందనిజ్ ఇహిజ, వాండ్రు దేవుణు సజమ్దు పెరికాన్ ఆదెజ్ కోరిజినాన్.

10 వాండ్రు మా ముస్కు సెఇ మాటెజ్ వర్గిజినాన్. యాకాదె ఆవిండ బూలాజి బూలాజి దేవుణు మాట వెప్పి వరిజ్ డగ్రు కివన్. వరిజ్ డగ్రు కిదెజ్ మన్ను మన్ని వరిజ్ అడ్డు కిజి దేవుణు సజమ్దాన్ వరిజ్ వెల్లి పోక్కినాన్. అందెజె నాను వాతిజ, వాండ్రు కిజిని సెఇ పణిజి దేవుణు సజం ఎద్రు వెహ్తా.

11 ఓ, నాను ప్రేమిసిని కూలాయెన్, సెఇ పణిజ్ కిజిని వరిజ్ సుడఃజి నడిపిండ, నెగ్గి పణిజ్ కిజిని వరిజ్ సుడఃజి నడిపి. నెగ్గి పణిజ్ కినికాన్ ఎయెన్బా దేవుణుదిజ్ సెందితికాన్. సెఇ పణిజ్ కినికాన్ ఎయెన్బా దేవుణుదిజ్ నెన్వన్.

12 దెమెత్రియు వందిజ్ లోకుర్ విజేరె నెగ్గికెజ్ పొగ్డిజినార్. దేవుణు తోరిస్తి నిజమాతి సజతిజ్ లొజిజి వాండ్రు నడిజినాన్. అయాక వాండ్రు నెగ్గి లోకు ఇజి రుజుప్ కిజినాద్. మాపుబా వన్ని వందిజ్ నెగ్గికెజ్ వెప్పినాప్. మా సాసి నిజమాతికెజ్ ఇజి నీను నెస్సి.

13 నండో సజతిజ్ నిజి రాస్తెజ్ మనాద్. గాని ఉత్తమ్దాన్ వెహ్తాజ్ నజి మన్ను సిల్లెద్.

14 నిజి బేగి సుడఃదెజ్ ఆనాద్ ఇజి నాను కోరిజిన. అయావలె మాటు కూడఃజి వర్గినాట్.

15 నిజి సమాదనం రపిద్. ఇబ్బెణి దేవుణు సజమ్దికార్ నిజి వెన్బాతి లెకెండ వెప్పినార్. అబ్బె మన్ని వరిజ్ విజేరిజ్ వెన్బాతి లెకెండ వెహ్తా.

## యూద రాస్తి ఉత్త్రం

నెల్ల్య కిబిసినిక

మా ప్రబు ఆతి యేసుక్రీస్తుజ్ తంబెరిజ్ ఇజి వెహె ఆతి వరి లోఇ మన్ని యూద ఇనికాన్ యా ఉత్త్రం రాస్తాన్. వాండ్రు యాకోబుజ్ తంబెర్ని. క్రీస్తు సకం 68-80 నడిమి కాలమ్దు యా ఉత్త్రం రాస్త మనాద్దు. క్రీస్తుజ్ నమ్మిత్తివరి సజమ్కలోఇ నిజతిమాతి బోద నెక్కిపోక్కి తప్పుజ్ నెస్సినిని వరి వందిజ్ రాస్తాన్. వరి బోదవందిజ్ వరి బత్తువందిజ్ డటిసి రాస్తాన్. నమ్మితి వరిజ్ దేవుణు సిత్తి రక్కణ వందిజ్, నిజం వందిజ్ కాట్లాడెజ్ ఇజి రాస్త మనాన్.

1 యేసు క్రీస్తుజ్ పణి కినికానాతి యూద (వాండ్రు యాకోబుజ్ తంబెరి) రాసిని ఉత్త్రం. దేవుణు కూక్కి వరిజ్ నాను రాసిని. బుబాతి దేవుణు నండో ప్రేమిసి యేసు క్రీస్తు మర్జి వానిదాక కాప్ కిజి ఇడ్డిని మిజినె రాసిని

2 మిజి కనికారం, నిపాతి, దేవుణు - బాణిజ్ వాని ప్రేమ ఒదె నిండ్రిజి మనిద్.

దేవుణు వందిజ్ మన్ను సిల్లి వరిజ్ వాని సిక్కు.

3 నాను నండో ప్రేమిసినికి దెరా, మజి విజెరిజ్ దోహ్క్తి రక్కణ వందిజ్ మిజి రాస్తెజ్ ఇజి నండో ఆస ఆత మహ. గాని దేవుణుదిజ్ కేట ఆతి వరిజ్ ఉండ్రె సుటునె ఒపజెప్తి నిజతిమాతి నమకం కాపాడిజి ఇడ్దెజ్ మీరు కాట్లాడెజి మండ్రెజ్ వలె ఇజి మిజి బతి మాల్లి రాస్తెజె ఎలు ఒడ్డిబిజిన.

4 సెగొండార్ లోకుర్ మిజి తెలివండ మీలోఇ డుఃగిత మనార్. దేవుణుబాణిజ్ వరిజ్ వాని తీర్పు వందిజ్ పూర్బకాలమ్దు దేవుణు - మాటదు రాస్త మనాద్. వారు దేవుణు - వందిజ్ బక్తిసిల్లి లోకుర్. వారు ఒడ్డిల్వందిజ్ మని, వరి సెఇ ఆసెజి వజి కిజి సర్ద ఆనివందిజ్ దేవుణుబాణిజ్ వాతి, వన్ని దయదర్మమ్దిజ్ మారిస్తార్. అహు కితిజ్ మాటు సేవకిని ఒరెండ్రె ఎజుమాని ఆతి మా ప్రబు ఆతి యేసు క్రీస్తుజ్ నెక్కి పోక్కార్.

5 నాను వెస్సిని యా సజతిజ్ విజు మీరు ముజాలె నెస్తి మన్నిదెర్ గాని నాను మిజి మరి ఎత్తు కిబిస్తిజ్ ఆస ఆజిన. అక్క ఇనిక ఇహిజి పుర్బం అయ్గుప్తు దేసమ్దాన్ ఇస్తాయేలు లోకురిజ్ ఉండ్రె సుటునె గెల్పిస్తాన్. గాని వెనుక వరి లోఇ నమ్మిఎండాతి వరిజ్ దేవుణు నాసనం కిత్తాన్.

6 దేవుణు సిత్తి అతికారమ్దు మండ్రెజ్ ఇస్టం ఆవండ, వరిజ్ మహి అతికారం డిస్తిసిత్తి దేవుణు దూతార్ వందిజ్ ఎత్తు కిదు. తీర్పు సీజి సిక్కు సీని పెరిదినమ్ దాక, ఎల్లకాలం మంజిని గొలు గొలుస్కాణిజ్ తొప్పి - స్తాండ్రె సీకటి మన్ని బాడ్డిదు దేవుణు వరిజ్ ఇట్ట మనాన్.

7 అయలెకెండెన్ సాదోమ గొమొర్త పట్టుమ్క లోకాజ్, వనక సుటులం మన్ని నాహ్కాణి లోకాజ్ ఇనిక జర్గితాద్ ఇజి ఎత్తు కిదు. వారు దేవుణు దూతార్ కితిలెకెండెన్, ఒడ్డిల్ది సెఇ ఆసెజ్ వజి కిజి సర్ద ఆని కిని పణిజ్ కిత్తార్. ఆఇ బోదెకవెట ఉండ్రె ఆవద్, మొగవరివెట మొగవారు కూడిజి పాపం కితార్ ఎలాకాలం నంబిఇ సిసుదాన్ సురె ఆతార్. నిన్నివరిజ్ ఇని సిక్కు వానాద్ ఇని దన్నిజ్ అక్క విజెరిజ్ ఉండ్రె గుర్తులెకెండె మనాద్.

8 అయలెకెండెన్ వీరు కలెజ్ గాసి ఒడ్డిల్ది సెఇ ఆసెజ్ వజి కిజి సర్ద ఆని పణిజ్ కిజినార్. మరి, ఎలుబడిః కినివరిజ్ లోజివర్. వారు దేవుణు దూతారిజ్ దూసిస్తార్.

9 అహిజి దేవుణు దూతార్ మున్ను పెరి దూత ఆతి మికావలుబా, మోసె పీనుగు వందిజ్, నయ్తాను మికాయెలుజ్ ఓదిస్తివలె ఇనిక కిత్తాన్ ఇహిజి, వన్నిజ్ దూసిసిని మాటెజాణ్ నేరం మొవ్వన్. గాని “ప్రబునె నిజి గదిసిన్”, ఇజి వెహ్తాన్.

10 గాని వీరు ఇహిజి వరిజ్ అర్దం ఆఇవనకవందిజ్ దూసిసినార్. బుద్దిసిల్లి జంతుజ్ లెకెండె, మన్నుదు బాగ ఒడిబిదెజ్ అట్వర్. జంతుజలెకెండె ఒడ్డిల్ ఆసెజ్ వజి కిజి సర్ద ఆదెజ్ సుడ్డిజినార్. వరి సెఇ పణిజాణ్ వారె పాడాజి సొన్నినార్.

11 అబయ! వరిజ్ కస్టమ్కు తప్ఉ. ఎందనిజ్ ఇహిజి, వారు సెఇ పణి కితి కయిను లెకెండెబా మనార్.\* వారు బిలాము ఇని ప్రవక్త లెకెండెబా ఇనాయం దొహ్కాద్ ఇజి, వరి బత్తు తప్పుదిజ్ పూర్తి ఒపజెప్తి మనార్.† వారు కోర ఇనివన్ని - లెకెండెబా మనార్. మోసె వెహ్తాదన్నిజ్ మర్జి వెహ్తండ్రె డటం ఎద్రిస్తాన్‡. వీరుబా వన్నిలెకెండె నాసనం ఆన సొనార్.

12 మీరు కిజిని ప్రేమవిందుజ్లోఇ వారు తెల్లాని పాతాదు మన్ని మన లెకెండె సిగు తపిసినార్. ఇని తియెల్ సిల్లెండ పొటవంజు ఉణిజి వరిజ్ వారె పోన కిబె ఆజినార్. వారు గాలి డెయ్జి ఒసిని పిరు సిల్లి మొసాప్ ననికార్. వారు కాయెజ్

\* 1:11 1:11 కయిను వందిజ్ నద్విదు, ఆదికాండం 4:1-16 † 1:11 1:11 బిలాము వందిజ్ నద్విదు, సంకియా పుస్తకం 22 - 24. అద్యాయమ్క లోఇ మనద్ ‡ 1:11 1:11 కోర వందిజ్ నద్విదు, సంకియా పుస్తకం 16:1-35

అన్ని కాలమ్ దు కాయెజ్ అన్ ఇ మరెక్ లకెండె. అక్కాదె ఆవద్. వారు వలెబాణిజ్ తెరె ఆతి మరెకలెకెండె. పాణం సిల్లికార్, పూర్తి సాతికార్ వారు.

13 వారు సమ్ దరమ్ ది పెరి ఉల్కెజ్ లెకెండె మనార్. వరి సిగుపణిజ్ ఉల్కెజ్ డెయ్ జి తసిని పొజు లెకెండె మన్నె. మరి సరి తప్పి బూలాని సుక్కెజ్ లెకెండె మనార్, వారు. అందెజె దేవుణు వరివందిజ్ ఎలాకాలం మండ్రెజ్ గొప్ప సీకటి మన్ని బాడ్డి\* తయార్ కిజి ఇడ్డమనాన్.

14 ఆదముదాన్ మొదొల్ని ఏడవ తరమ్ దికాన్ ఆతి హానోకు పూర్బకాలమ్ దు దేవుణుబాణిజ్ వాతి మాటెజ్ వెప్తాన్. విరివందిజ్ వెప్తా అయ మాటెజ్ వాని కాలమ్ దు జర్గిని వందిజె. ఇనిక ఇహిజ “ఇదిలో ప్రబు వన్ని వెయు వెయిజ్ దూతార్ వెట వాజినాన్.

15 విజెరిజ్ తీర్పు కిదెజ్ ప్రబు వాజినాన్. దేవుణు వందిజ్ బక్తి సిల్లి వరిజ్ తీర్పు సీజి సిక్స సిదెజ్ వాండ్రు వాజినాన్. ఎందనిజ్ ఇహిజ దేవుణు వందిజ్ బక్తి సిల్లికార్, దేవుణుబాణిజ్ మన్ను దూరం ఇడ్డి సెఇ పణిజ్ కిత్తార్. దేవుణు వందిజ్ బక్తి సిల్లికార్ తియెల్ సిల్లెండ దేవుణు ఎద్దు వన్నిజ్ వడిఃఇ కటిసమతి మాటెజ్ వర్గితార్”.

16 వారు దేవుణు ఎద్దు సణిజిజినార్. ఆఇవరి మున్ను నింద మోప్పినికార్. వారు వరి ఒడొల్ది సెఇ ఆసెజ్ వజ కిజి సర్ద ఆదెజ్ ఇజినె సుడఃజినార్. వారు వరి వందిజ్ నె పణిదిజ్ రెఇ బడాయ్ మాటెజ్ వర్గిజినార్. ఆఇ వరిబాణిజ్ ఇనికబా దొప్పిద్ ఇజి వరిజ్ పొగ్డిఃజినార్.

ఓరిసి మండ్రెజ్ ఇజి వెప్పినాన్.

17 అహిజ నాను నండొ ప్రేమిసినికిదెరా, మా ప్రబు ఆతి యేసు క్రీస్తుజ్ అపొస్తురు ఆతికార్ మిజి ముజాల వెప్తామని సజతిజ్ మీరు ఎత్తు కిదు.

18 వారు ఇనిక వెప్తార్ ఇహిజ, కడెవెరి రోస్కాణ్ వెక్రిసినికార్ వానార్. వారు దేవుణు వందిజ్ బక్తి సిల్లెండ, వరి ఒడొల్లి సెఇ ఆసెజ్ వజ కిజి సర్ద ఆజినె మంజినార్.

19 లోకాజ్ కేటెజ్ కేటెజ్ కిబిస్సికార్ వీరె. పాపం ఏలుబడిః కిని మన్ను మన్నికార్, దేవుణు ఆత్మ సిల్లికార్ వీరు.

20 గాని మీరు, ఇహిజ నాను నండొ ప్రేమిసినికిదెరా, దేవుణుబాణిజ్ మిజి దొహ్కాక్తి నమకమ్ దు పిరిజి వాదెజ్ ఒరెన్ మరి ఒరెన్ వన్నిజ్ తోడుః కిదెజ్. దేవుణు ఆత్మ నడిఃపిసిని వజ పార్దనం కిజి మండ్రు.

21 దేవుణు మీ మున్ను తోరిస్తి మన్ని ప్రేమదు మండ్రు. ప్రబు ఆతి యేసు క్రీస్తు మీ మున్ను కనికారం మాజి, దేవుణు వెట ఎల్లకాలం బత్కిని బత్కు సీదెజ్ ఇజి ఎద్దు సుడఃజి మండ్రు.

22 దేవుణు మున్ను మన్ని నమకం వందిజ్ అనుమానం మని వరి మున్ను కనికారం తోరిస్తు.

23 నమకమ్ దాన్ తప్పిసాహి సెగొండారిజ్, సిసు నడిఃమిహాన్ వెల్లి లాగితిలెకెండె రక్కిస్తు. తప్పి సాహి మరి సెగొండారిజ్ కనికారం తోరిస్తు. గాని తియెల్ దాన్ మండ్రు. వరి పణిజ్ మజి పడిఃవిద్. వారు కిని సెఇ పణిజాజ్ మాటు సెఎణ్ ఆదెజ్ ఆవద్.

24 మీరు పాపమ్ దు తొరొ ఒడిఃజి అర్ ఏండ మిజి కాప్ కిదెజ్, దేవుణు గొప్ప పెరి జాయ్ ఎద్దు, గొప్ప సర్దదాన్, ఇని తప్పుబా సిల్లెండ మిజి నిల్వెజ్, మజి రక్కిస్సికాన్ ఆతి ఒరెండె దేవుణు అట్టాన్.

25 మజి రక్కిస్సికాన్ ఆతి దేవుణు, ఒరెండె దేవుణు. మా ప్రబు ఆతి యేసు క్రీస్తు - వలెహానె వన్నిజ్ పొగ్డిఃనాట్. ఎందనిజ్ ఇహిజ వాండ్రె జాయ్ దాన్ నిండ్రెతి సోకు మన్నికాన్, వాండ్రె గొప్ప పెరికాన్, వాండ్రె గొప్ప సత్తు మన్నికాన్, వాండ్రె విజాదన్ని - మున్ను యా అతికారం మన్నికాన్. వాండ్రు విజి వనకాజ్ ముజాల యావజ మహాన్, వాండ్రు ఏలు యావజ మనాన్, వాండ్రు వాని కాలమ్ దు యావజ మంజినాన్. ఆమెన్.

§ 1:13 1:13 యా సుక్కెజ్ బూమి నన్నికెజ్ గాని ఎసెజ్ ఎసెజ్ సాని సరి తప్పి సానె \* 1:13 1:13 ఒదె సీకటి మని బాడ్డి. యా బాడ్డి నరకమ్ నె



## ప్రకటన పుస్తకం డాజీతిమన్నికెజ్ దేవుణు యోహానుజ్ తోరిస్తికెజ్

నెల్వ కిబిసినిక

ఇక్క బయ్బిల్దు మన్ని కడెవెరి పుస్తకం. తెలుగు బయ్బిలుదు యా పుస్తకం, ప్రకటన ఇజి మనాద్. ప్రకటన ఇని మాటదిజ్ అర్థం డాజీతిమన్నికెజ్ వెలి తోరిసినిక, టుకుర్ ఇడ్తిమన్నిక టుకుర్ లాగ్గి తోరిసినిక ఇజి అర్థం మనాద్. ఇక్కెజ్ ఎయెర్బా ముజాల నెస్తిమన్ని మాటెజ్ ఆఉ. యేసుప్రబు వందిజ్ని దేవుణుమాటదిజ్ సాస్యం వెప్పి వందిజ్, యేసుప్రబు సిసుర్లోఇ ఒరెన్ ఆతి యోహాను ఇనివన్నిజ్ రోమప్రబుత్వం ఆతికారిజు, నారు డిఃబిస్తి పోక్టార్. ఈజియన్ సమ్దరం నడిమిమన్ని పత్తోన్ ఇని లోకు సిల్లి ఇజిరి దేసమ్దు పోక్టార్ (ప్రకటన 1:9).

వాండ్రు అయ ద్విపుదు మహివలె, దేవుణు వన్ని దూతవెట యోహానుజ్ తోరిస్తికెజ్ వాండ్రు యా పుస్తకమ్దు రాస్త మనాన్. యేసు క్రీస్తు సిలువాదు సాజి, మర్జి నిజిత్తి వెనుక, ఇంజుముంజు 60 పంటెజ్ డాట్టివెనుక యా పుస్తకం రసి ఆత మనాద్ ఇజి నమ్మిజినార్.

యా పుస్తకం, ఆసియాదు మన్ని ఏడు సజమ్కాజ్ రాస్తి ఉండ్రి ఉత్తమ్లెకెండ్ మనాద్ (ప్రకటన 1:10-11). వాని కలమ్దు ఇనికెజ్ జర్గినెలె ఇని వందిజ్ యా పుస్తకమ్దు రాస్త మనాద్. యేసుప్రబు మర్జి వానివందిజ్, మరి యా లోకమ్దు జర్గిదెజ్ మన్నికెజ్వందిజ్, మరి యా లోకమ్ది ఆక్కర్వందిజ్ యా పుస్తకమ్దు రాస్త మనాద్. డొమిసియన్ ఇనికాన్ రోమ రాజు మహివలె యా పుస్తకం రాసె ఆత మనాద్ ఇజి నంఠెండార్ నమ్మిజినార్.

మొదొల్

1 యాక డాజీతిమహి సజతిజ్ దేవుణు, యేసుక్రీస్తుజ్ సెందితివరిజ్ తోరిస్తికెజ్ ఇజి వన్నిజ్ తోరిస్తికెజ్. వెటనె ఇనికెజ్ జర్గినెలె ఇజి యేసు క్రీస్తు, వన్ని దూతెజ్ వెప్తా పోక్టాండ్రె, అయ సజతిజ్ వన్ని పణిమణిసి ఆతి యోహానుజ్ తోరిస్తికెజ్.

2 దేవుణు మాటెజ్ వందిజ్ని, యేసు క్రీస్తు వన్నిజ్ తోరిస్తి విజు వనకాజ్ సుడెఃజి నిజమాతికెజ్ ఇజి యోహాన్ సాస్యం వెప్పినాన్.

3 దేవుణుబాణిజ్ వాతి యా ప్రవక్త మాటెజ్, డటం సదివీజి మహివరిజ్ వెన్పిసినికాన్ని, సద్వినికెజ్ వెంజి అయాకెజ్ మన్నుదు ఇడ్తి నమ్మిజి మంజినికాన్ దేవుణు సిజిని దీవెనమ్కు మంజినికాన్ ఆనాన్. ఎందానిజ్ ఇహిజ, అయాకెజ్ అయాలెకెండ్ జర్గిదెజ్ సమయం డగ్గు ఆత మనాద్.

దేవుణుదిజ్ పొగ్డిఃజి వెప్పిని మాటెజ్.

4 అసియాదు మన్ని ఏడు, దేవుణు సజమ్కాజ్ యోహాను రాసికాన్. ముజాల మహికాన్, ఏలు మన్నికాన్, వాని కాలమ్దు మంజినికాన్ ఆతికాన్, మరి వాండ్రు బస్తిమన్ని వన్ని సింహాసనం ఎద్దుమన్ని ఏడు ఆత్మెజ్, వన్ని దయదార్మం మీ ముస్కు మంజి, మీరు నిపాతిదాన్ మండ్రెజ్ సాయం కిపిన్.

5-6 నమ్మకమాతికాన్ ఆతి సాసి, సాతి వరిబాణిజ్ తొలిత నిజిత్తికాన్, బూమి ముస్కు ఏలుబడిః కిజిని విజు రాజురిజ్ ముస్కు రాజు ఆతి యేసుక్రీస్తుబా వన్ని దయదార్మమ్దాన్ మీరు నిపాతిదాన్ మండ్రెజ్ సాయం కిపిన్. మజి ప్రేమిస్తాండ్రె వన్ని నలదాన్, మా పాపమ్కాజ్ మజి విడుదల కిజి, వన్ని బుబ్బాతి దేవుణుదిజ్ ఉండ్రి రాజ్యం లెకెండ్ని, వన్నిజ్ పణి కిని పుజేరిజ్ లెకెండ్ కిత్తిమన్ని యేసుక్రీస్తుజ్ గొప్ప గవ్దెమ్ని అతికారం అంతు సిల్లెండ్ ఎలాకాలం మనీద్. ఆమెన్.

7 ఇదిలో, వాండ్రు మొసాపుదాన్ వాజినాన్! విజేరి కణకెజ్ వన్నిజ్ సూణెలె. వన్నిజ్ బల్లెమ్దాన్ గుత్తికార్బా సూణారలె. బూమి ముస్కు మనికార్ విజేరి, వన్నిజ్ సుడెఃజి గుండె కొత్తె ఆజి అడఃబనారలె. అయాలెకెండ్నె ఆనాద్లె. ఆమెన్.

8 “అల్పాని ఒమెగ\* నానె”, ఇహిజ మొదొల్ని కొస నానె. “ముజాల మహికాన్, ఏలు మన్నికాన్, వాని కాలమ్దు మంజినికాన్ ఆతి విజు దన్నిజ్ సత్తు మన్నికాన్” ఆతిమన్ని ప్రబు ఆతి దేవుణు వెప్పినాన్.

లోకుమరిసి లెకెండ్ ఒరెన్

\* 1:8 1:8 అల్ప గ్రీకుబాసది మొదొహి అక్కరం. ఒమెగ కడెవెరి అక్కరం

9 యేసువందిజ్ వాజిని స్రమెజ లొఇ, వాండ్రు కిని ఏలుబడిఁదుని, వన్ని వందిజ్ కస్టమ్కు ఓరిస్తెజ్, మీవెట కూడఁజి మన్నికాన్ ఆతి, మీ తంబెరి ఆతి యోహాను ఇని నాను, దేవుణు మాట వందిజ్ని యేసువందిజ్ సాస్యం వెప్పి వందిజ్, సమ్దరం నడిఁమి మన్ని పత్మోసు ఇని ద్వీపుదు† ఒరెనె మహా.

10-11 వారమదిజ్ మొదొహి రోజు ఆతి ప్రబు దినమదు, నాను దేవుణు ఆత్మదాన్ నిండ్రీతి మహివలె, జోడు బాంగ ఊక్కిలెకెండ్ ఉండ్రీ కంటం నా వెనుకహాన్ వెహా. నీను సుడఁజినికెజ్ విజు ఉండ్రీ పుస్తకమ్దు రాసి, ఎపెను, స్మూర్న, పెర్గాము, తుయతయ్, సర్దిను, పిలదెల్పియ, లవొదికియ ఇని ఏడు, దేవుణు సజమ్కాజ్ పోక్త ఇజి, అయా కంటం నజీ వెప్పిమన్నిక, నా వెనుకహాన్ నాను వెహా.

12 యాక వెహానె, నావెట వర్గిజిని కంటం ఇనికాదొ ఇజి సుడఁదెజ్, నాను వెనుక మహ్తా. నాను వెనుక మహ్తాజ్, బజారమ్దాన్ తయార్ కిత్తి ఏడు దీవ డండిజ్ సుడఁత.

13 అయ దీవ డండిజ నడిఁమి, లోకు మరిసి ఆతి వన్నిజ్ పొలితి ఒరెన్ వన్నిజ్ సుడఁత. వాండ్రు వన్ని పాదమ్ దాక అందితి మన్ని ఉండ్రీ నీరి సొక్క పొర్పాజి గుండెదు బజారమ్దాన్ మన్ని కంటువ తొహా ఆత మహాన్.

14 వన్ని బురాని వన్ని బుర్రది కొప్పు తెల్లాని దూతిదిజ్ పొలిసి, గాండులెకెండ్ తెలాజ్ మహాద్. వన్ని కణుకెజ్, సిసు కొనెజ్లెకెండ్ మహా.

15 వన్ని పాదమ్కు కంసు సొల్లుదు కాప్తి, కంజు మెర్సినిలెకెండ్ మహా. వన్ని కంటం గొప్ప పెరి గడ్డ జాటు లెకెండ్ మహాద్.

16 వాండ్రు వన్ని ఉణెర్ కియుదు ఏడు సుక్కెజ్ అస్త మహాన్. రుండి దరిజ్బా తెవుగు మన్ని కుర్ల లెకెండ్ మన్ని మాటెజ్ వన్ని వెయుదాన్ వెల్లి వాతె. వన్ని మొకొం పూర్తి జాయ్దాన్ మెర్సిని పొద్దుది జాజ్ లెకెండ్ మహాద్.

17 వన్నిజ్ సుడఁతానె, నాను సాతివన్నిలెకెండ్ వన్ని పాదమ్కాజ్ అర్త. అయావలె వాండ్రు వన్ని ఉణెర్ కియు మా ముస్సు ఇడఁజి ఈహు వెహాన్. “తియెల్ అమా. నాను మొదొహికాన్. నాను కడఁవెరిదికాన్.

18 నాను బత్తిజి మంజినికాన్. నాను సాతిమహికాన్ గాని ఇదిలో ఎలాకాలం బత్తిజిన. మరి సావుదిని సాతికార్ మంజిని అయా లోకమ్ది తాలంకియు నా కీదు మనాద్.

19 అందెజె, ఏలు మన్ని వనకాజ్ వందిజ్, మరి వాని కాలమ్దు జర్గిదెజ్ మనికెజ్, నీను సుడఁతి మనికెజ్ నీను రాస్అ.

20 నా ఉణెర్ కియుదు నీను సుడఁతి మన్ని ఏడు సుక్కెజ్, ఏడు దేవుణు సజమ్క దూతార్. మరి బజారమ్దాన్ తయార్ కితి మన్ని ఏడు దీవ డండిజ్, ఏడు దేవుణు సజమ్కు.

## 2

ఎపెను పట్టుమ్దు మన్ని దేవుణు సజమ్దిజ్ రాసిని ఉత్తం

1 “ఎపెను పట్టుమ్దు మన్ని దేవుణు సజమ్ది దూతెజ్ రాస్అ, వన్ని ఉణెర్ కియుదు ఏడు సుక్కెజ్ అసి, ఏడు దీవడండిజ నడిఁమి బూలాజినికాన్ వెప్పిని మాటెజ్ ఇక్కెజ్.

2 నీను కిజిని పణిజ్ని, నీను కస్టబాడఁతికెజ్ నాను నెసిన. నీను ఎస్సానొ హిమ్మెజ్ ఒరిస్తీమన్ని ఇజిబా నాను నెసిన. సెఇకెజ్ కినివరిజ్ నీను ఒరిసి మండ్రెజ్ అట్ఇ ఇజి నాను నెసిన. అపొస్తురు ఇజి వెహా ఆజి అపొస్తురు ఆఇ వరిజ్ నీను పరిస కిజి, వారు అబద్దం వెప్పికార్, ఇజి నీను నెస్తి ఇజి నాను నెసిన.

3 నీను నా పేరు వందిజ్ హిమ్మెజ్ డిన్ఏండ ఒరిస్తీ మన్ని మరి కస్టమ్కు బరిస్తీమన్ని గాని నీను దన్ని వందిజ్ ఎసెజ్బా వందితిఇ ఇజిబా నాను నెసిన.

4 అహిజ్బా, మొదొహాన్ నా వందిజ్ నిజీ మహి మొదొహి ప్రేమ, నీను డిస్టిసిత్తి ఇజి ఉండ్రీ తప్పు నీ ముస్సు. సుడఁత.

5 నా ముస్సు మన్ని ప్రేమ డిసిసిజి, నీను ఎస్సా వెనుక సొన్ని మహి ఇజి నీను ఒడిఁబిఅ. దన్ని వందిజ్ నీ మన్ను మరిసి, తప్పుజ్ ఒప్పుకొడఁజి డిసిసిజి, ముజాల కిజి మహికెజ్ కిజి మన్అ. నీను మన్ను మారిసి, పాపమ్కు ఒప్పుకొడఁజి డిసి - సిఏండ మహిజ, నాను నీడగ్రు వాజి, నీ దీవడండిదిజ్ దన్ని బాడ్డిదాన్ లాగ్గు విసీర్న.

6 గాని, నీవందిజ్ ఉండ్రీ నెగ్గి సజతి మనాద్. నాను ఇస్తం కిఇకార్ ఆతి నికొల జటుదివరి పణిజ్ నీనుబా ఇస్తం కిఇతి.

7 దేవుణు ఆత్మ దేవుణు సజమ్కాజ్ వెప్పికెజ్ ఇనికెజ్ ఇజి గిబ్బిజ్ ఒడఁజి వెంజి అయావజ నడిఁజి మండ్రు. సెఇకెజ్ ముస్సు గెలిస్సి వన్నిజ్ పరలోకం ఆతి పరదీనుదు మన్ని పాణం సీని మరాతి పట్టు. తిండ్రెజ్ అక్కు సీనా.

స్మూర్న పట్టుమ్దు మన్ని దేవుణు సజమ్దిజ్ రాసిని ఉత్తం

8 “స్మూర్న పట్టుమ్దు మన్ని దేవుణు సజమ్ది దూతెజ్ రాస్అ. మొదొహికాన్ని కడఁవెరిదికాన్ ఆతి, సాతి వెనుక మర్జి నిజితికాన్ వెప్పిని మాటెజ్ ఇక్కెజ్.

† 1:9 1:9 ద్వీపుసురుల సమ్దరం మన్ని ఇజిరి దేసెం

9 నీ కష్టమకు, నీ కరు బత్తు నాను నెసిన. గాని దేవుణుడిజ్ సెందితి సజతిజలోణ నీను ఆస్తి మన్నికెలెకెండెనె. మాపు యూదురు ఇజి వెస్సెని దేవుణు లోకుర్ ఆఇకార్ ఆతి, సయ్తానుజ్ సెందితికార్ ఆతి యూదురు, నీవందిజ్ వెహ్తా దూసణ మాటెజ్ నాను నెసిన.

10 నీ ముస్సు వాదెజ్ మన్ని కష్టమకాజ్ వందిజ్ నీను తియెల్ ఆమా. నిజి పరిస కిదెజ్, నీ లోకురిజ్ సెగొండారిజ్ సయ్తాను అస్సిసి జెలిదు ఇడిస్సాన్లె. పది దినమ్కు నీను హిమ్మెజ్ ఓరిసి మండ్రెజ్ వలె. గాని నా ముస్సు మన్ని నమకమ్వందిజ్ సాపు వాతిజ్బా నమకమాతికి ఆజి మన్త. ఎలాకాలం మంజిని బత్తు ఇని ఇనాయం నాను నిజి సీనాలె.

11 దేవుణు ఆత్మ దేవుణు సజమ్కాజ్ వెహ్పికెజ్ ఇనికెజ్ ఇజి గిబ్బిజ్ ఒడజి వెంజి, అయావజ నడిసి మండ్రు. సెఇకెజి ముస్సు గెలిస్సి వన్నిజ్ రుండి సాపు ఇని దెబ తగ్గివద్.

**పెర్గాము పట్టమదు మన్ని దేవుణు సజమ్దిజ్ రాసిని ఉత్తం**

12 పెర్గాము పట్టమదు మన్ని దేవుణు సజమ్ది దూతెజ్ రాస్అ.

“రుండి దరిజ్ తెవుగు మన్ని కుర్లలెకెండె మన్ని మాటెజ్ మన్నికాన్ వెహ్పినికెజ్ ఇక్కెజ్.

13 సయ్తాను ఏలుబడి: కిజిని పట్టమదు నీను బత్తిజిని ఇజి నాను నెసిన. సయ్తాను ఏలుబడి: కిజిని అయ పట్టమదు నా ముస్సు నమకం ఇడ్డి నమకమాతి సాసి ఆతి అందిపాయెజ్ సప్తి కాలమ్దుబా నా ముస్సు ఇడ్డి నమకం డిసిసివిండ, నా పేరు వందిజ్ నీను నిజం నిహిమహి ఇజి నాను నెసిన.

14 గాని నజి పడికెజ్ సెగం సజతిజ్ నీబాన్ మన్నె. బొమ్మెజి పూజ సిత్తికెజ్ తింజి, రంకు బూలాజి పాపం కిదెజ్ ఇస్సాయేలు లోకురిజ్ రేప్పి మన్నికాన్ ఆతి బాలాకుజ్ \*అక్కెజ్ నెస్సిసి మన్నికానాతి బిలాము† బోద లోజిజి నడిసినికార్ నీ లోణ మనార్.

15 నికొల బోద లోజిజి మన్నికార్బా నీ లోణ మనార్.

16 అందెజె నీను మన్ను మారిసి పాపమ్కు ఒప్పుకొడెజి డిసిసిఅ. సిలిజ నాను బేగి నీడగు వాజి నా వెయుదాన్ వాజిని కుర్ల లెకెండె మన్ని మాటెజాణిజ్ వరివెట విదెం కినా.

17 దేవుణు ఆత్మ, దేవుణు సజమ్కాజ్ వెహ్పికెజ్ ఇనికెజ్ ఇజి గిబ్బిజ్ ఒడజి వెంజి అయావజ నడిజి మండ్రు. సెఇవనకాజ్ ముస్సు గెలిసినివన్నిజ్ నాను పరలోకమ్దు డాజితి మన్ని మన్న ఇని తిండి సెగం ఉండెజ్ సీనా. మరి, దొహ్క్కికాండ్రె ఆవిండ, మరి ఎయెన్ వన్నిజ్బా నెన్ఇ ఉండ్రె కొత్త పేరు రాస్తి మన్ని ఉండ్రె తెల్లని పణకుబా సీనా.

**తుయతయిర పట్టమదుమన్ని దేవుణు సజమ్దిజ్ రాసిని ఉత్తం**

18 “తుయతయిర పట్టమదు మన్ని దేవుణు సజమ్ది దూతెజ్ రాస్అ కణుకెజ్ సిసుకొనెజ్ లెకెండె మన్ని, మెర్సిని కంజుదిజ్ పోలితి పాదమ్కు మన్ని దేవుణు - మరిసి ఆతి వన్ని మాటెజ్ ఇక్కెజ్.

19 నీను కిజిని పణిజ్ ఎలాగ మర్తికెజ్, నీ ప్రేమ ఎలాగ మర్తిక, నీ నమకం ఎలాగ మర్తిక ఇజి నాను నెసిన. నీను మహిపరి వందిజ్ కిజిని పణిజ్ని నీను హిమ్మెజ్ డిసిసివిండ ఓరిసి మంజినిక విజి నాను నెసిన. నిజమె ముజాల కిజి మహి దన్నిజ్ బద్దె నెగెండె నీను ఏలు కిజిని.

20 గాని నజి సపెఇ ఉండ్రె సజతి నీబాన్ మనాద్. దన్నిజ్ అది నె దేవుణు ప్రవక్త ఇజి వెహ్పిని యెజెబెలు ఇని బోదెలిదిజ్, నీబాన్ మండ్రెజ్ ఒప్పుకొటి ఇజి ఉండ్రె తప్పు నీ ముస్సు వెహ్తాజ్ మనాద్. అది దన్ని బోదదాన్ రంకు బూలాదెజ్ మరి బొమ్మెజి మాడిసి, బొమ్మెజి పూజెజ్ సిత్తికెజ్ తిండ్రెజ్ ఆనాద్ ఇజి నా ముస్సు నమకం ఇడ్డిమన్ని, నా పణికిని వరిజ్ మొసెం కిజి తప్పు సరిదు నడిపెసినాద్.

21 అది రంకు బూలానిక డిసిసిజి, దన్ని మన్ను మారిసి పాపమ్కు ఒప్పుకొడెజి డిసిసిదెజ్ సమయం సిత్త, గాని అది ఒవ్విత్తాద్.

22 ఇదిలో నాను దన్నిజ్ నిజ్దెజ్ అట్ఇ పెరి కష్టమకాజ్ మంసమ్దు తెర్ప్పాలె. దన్నివెట కూడెజి రంకు బూలాతికార్, వారు దన్ని వెట కూడెజి కిత్తిమహి పణిజవందిజ్ ఒడిబిజి, వనకాజ్ ఒప్పుకొడెజి డిసిసివిండ మహిజ, వరిజ్ నాను నండొ కష్టమదు అర్ప్పాలె.

23 దన్ని కొడెరిజ్ నాను సప్ప. అయావలె నాను లోకురి మన్నుజ మన్ని ఆలోసనమ్కుని ఆసెజ్ ఇనికెజ్ ఇజి సుడెజి నెసినికాన్ ఇజి విజు దేవుణుసజమ్కు నెసినె. నీ లోణ ఒరెన్ ఒరెన్ వన్నిజ్ వన్నివన్ని పణిదిజ్ తగితి లెకెండె నాను సూణా.

\* **2:14 2:14** ఇస్సాయేలు లోకురి ముస్సు సయెప్ సీదెజ్ ఇజి బిలాము ఇని ఒరెన్ గురు నన్ని ప్రవక్తెజ్ కూక్తి మన్ని మోయాబు దెసెమ్ది రాజు. బుద్ది సిల్లెండ దేవుణుడిజ్ వెత్తికమాతి పణి కితి వందిజ్ వన్ని వందిజ్ దేవుణు మాటుదు రాస్త మనాద్. సంకియా 22-24, యెహొసువ 24:9, నాయాది 11:25. † **2:14 2:14** ఇస్సాయేలు లోకురి ముస్సు సయెప్ సీదెజ్ ఇజి మోయాబు దెసెమ్ది రాజు బాలాక్ కూక్తి మని ఒరెన్ గురు నన్ని ప్రవక్త. సంకియా 22-24.

24 దన్ని బోదదిజ్ లోజిఇవరిజ్ని మరి సయ్తానులోఇ డాజితి మన్ని వనకాజ్ నెస్తెజ్ వరి మన్ను ఇడేవిండ మంజిని వరిజ్, నాను వెహ్నినిక ఇనిక ఇహిజ, మీరు మరి ఇనికబా కిదెజ్ ఇజి వెహ్ని, మీ మున్ను మరి ఇని బరు నాను మొవ్వి.

25 గాని నాను వానిదాక మీరు నెస్తిమన్ని వనకాజ్ నెగెండ అసి మండ్రు.

26 ఆక్కర్దాక నజి ఇస్టమాతి వజ కిజి మంజి, సెఇ వనకాజ్ మున్ను గెలిసినివన్నిజ్, దేసమ్క లోకురి \*మున్ను ఏలుబడి: కిదెజ్ అతికారం సీనా.

27 నా బుబ్బాతి దేవుణుబాణిజ్ నజి అతికారం దొహ్క్తిమన్నిలెకెండ, వన్నిజ్ లోకురి మున్ను అతికారం సీనా. దేవుణు మాటదు రాస్తిమన్నిలెకెండ, “వాండ్రు ఇనుము డుడ్డుదాన్ వరిజ్ ఏలుబడి: కినాన్. కుంబెరి వన్ని కుండెజ్లెకెండ వరిజ్ పెడెల్ కొత్తాన్”

28 సెఇ వనకాజ్ మున్ను గెలిస్తి వన్నిజ్, నాను కోడిజామ్దు సోని సుక సీనా.

29 దేవుణు ఆత్మ దేవుణు సజమ్కాజ్ వెహ్నినికెజ్ ఇనికెజ్ ఇజి గిబ్బిజ్ ఒడేజి వెంజి అయావజ నడిజి మండ్రు.

### 3

సర్దిసు పట్టుమ్దు మన్ని దేవుణు సజమ్దిజ్ రాసిని ఉత్తం.

1 “సర్దిసు పట్టుమ్ది దేవుణు సజమ్ది దూతెజి రాస్అ. ఏడు సుక్కెజ్ని దేవుణు ఏడు ఆత్మ మన్నికాన్ వెహ్నిని మాటెజ్ ఇక్కెజ్. నీను కిజిని పణిజ్ నాను నెసిన. బత్తిజినికాన్ ఇజి నిజి పేరు మనాద్. గాని నీను సాతికినె.

2 నా దేవుణు ఎద్రు నీ పణిజ్ పూర్తి ఆతికెజ్ ఇజి తోరఉతె. అందెజె నీను, నిజ్జి తెలి ఆజి, సాదెజ్ డగ్రు ఆతి మన్ని మిగిలిత్తి వనకాజ్ సత్తు కిబిన్అ.

3 అందెజె నీను ముజాల ఇనిక నెస్తి మన్నిదొ, ఎలాగ వెహి మన్నిదొ ఇజి ఎత్తు కిఅ. వనకాజ్ లోజిజి పాపమ్కు ఒప్పుకోడేజి డిసిసీజి, మారు మన్ను పొందిఅ. నీను నిజ్జి తెలి ఆజి మన్ఏండ మహిజ, ఒరెన్ డొజారి వానిలెకెండ నాను వానా. ఇనిక ఇహిజ ఎమేణి గడియారు నాను, నీ డగ్రు వానానొ ఇజి నిజి తెలిఏద్.

4 గాని వరి సొక్కెజ్ మొహ్కి ఆఎండ, సుబరం మన్నికార్ సెగిండార్ సర్దిన పట్టుమ్దు నీబాన్ మనార్. అందెజె వారు మొహ్కి సిల్లి తెల్లాని సొక్కెజ్ తోడిగిజి, నావెట బూలాదెజ్ తగ్గికార్.

5 సెఇ వనకాజ్ గెలిసినికాన్, వరిలెకెండ తెల్లాని సొక్కెజ్ తోడిగిజి మంజినాన్. దేవుణు వెట ఎలాకాలం బత్తినివరి పేరుకు రాసి ఇడేజిని పుస్తకమ్దాన్ నాను వన్ని పేరు ఎసెజ్బా డెయ్జి పోక్వి. గాని నా బుబ్బ ఎద్రుని వన్ని దూతార్ ఎద్రు వాండ్రు నజి సెందితికాన్ ఇజి వన్ని పేరు ఒప్పుకొణా.

6 దేవుణు ఆత్మ దేవుణు సజమ్కాజ్ వెహ్నినికెజ్ ఇనికెజ్ ఇజి గిబ్బిజ్ ఒడేజి వెంజి అయావజ నడిజి మండ్రు.

పిలదెల్లియ పట్టుమ్దు మన్ని దేవుణు సజమ్దిజ్ రాసిని ఉత్తం.

7 “పిలదెల్లియ పట్టుమ్దు మన్ని దేవుణు సజమ్ది దూతెజి రాస్అ. పరిసుద్దమాతికాన్\* నిజామాతికాన్ ఆతి, దావీదు పట్టుమ్దిజ్ ఏలుబడి: కిదెజ్ అతికారం మన్నివన్నిలెకెండ దన్ని తాలమ్కియు మన్నికాన్ వెహ్నిని మాటెజ్ ఇక్కెజ్. వాండ్రు రేతిజి ఎయెన్బా కెహ్తెజ్ అట్ఎన్. వాండ్రు కెహ్తెజి ఎయెన్బా రేదెజ్ అట్ఎన్.

8 నీను కిజిని పణిజ్ నాను నెసిన. నిజి మన్ని సత్తు కండెక్ ఆతిజ్బా నీను నా మాటెజ్ లోజిజి నా పేరు నెన్ఏ ఇజి వెహ్ఇతి. ఇదిలో నీ ఎద్రు నాను సేహ్లా రేత మన్ను. దన్నిజ్ ఎయెన్బా కెహ్తెజ్ అట్ఎన్.

9 యూదురు ఆవిండ, మాపు యూదురుజు, మాపు దేవుణు లోకుర్ ఇజి అబద్దం వెహ్నిని సయ్తాను సజమ్దివరిజ్, నీ డగ్రు వాజి నీ పాదమ్కాజ్ అర్పి మాడిస్సిలెకెండ నాను కినా. నాను నిజి ప్రేమిస్త మన్న ఇజి అయావలె వారు నెస్సార్లె.

10 స్రమెజ్ డిస్ఏండ ఓరిసినివందిజ్ నాను సిత్తి ఆత్తెజ్ నీను లోజిత్తి మహి. అందెజె బూమి మున్ను బత్తిని వరిజ్ విజేరిజ్ వాజిని పెరి కస్టమ్కాజ్ కూడితి పరిస కాలమ్దు నాను మిజి కాపాడ్నా.

11 ఇదిలో, నాను బేగినె వాజిన. నీను గెలిస్తివందిజ్ నిజి దొహ్క్తిని ఇనాయం మరి ఎయెన్బా ఒవిండ, నీను నెస్తిమన్ని వనకాజ్ డిస్ఏండ గటిజి అసి మన్అ.

12 సెఇ వనకాజ్ మున్ను గెలిస్తి వన్నిజ్ నా దేవుణు గుడిదు ఉండ్రె తంపం లెకెండ కిన. వాండ్రు ఎసెజ్బా దన్ని బాణిజ్ డిసి సాన్ఏన్. నా దేవుణు పేరుని, పరలోకమ్దాన్ దేవుణుబాణిజ్ డిగ్గి వాజిని కొత్త యెరూసలేం ఇని నా దేవుణు పట్టుం పేరుని, నా కొత్త పేరుబా నాను వన్ని మున్ను రాస్నా.

13 దేవుణు ఆత్మ దేవుణు సజమ్కాజ్ వెహ్నినికెజ్ ఇనికెజ్ ఇజి గిబ్బిజ్ ఒడేజి వెంజి అయావజ నడిజి మండ్రు.

\* 2:26 2:26 కిర్తన 2:9. \* 3:7 3:7 గొప్ప నెగ్గికాన్, ఇని తప్పుబా సిలికాన్

లవోదికియ పట్టుమీదు మన్ని దేవుణు సజమ్దిజ్ రాసిని ఉత్తం.

14 “లవోదికియ పట్టుమీదు మన్ని దేవుణు సజమ్ది దూతెజ రాస్అ. నమ్మకమాతికాన్ని నిజమాతి సాసి ఆతికాన్, దేవుణు తయార్ కితి విజు వనకాజ్ ముస్సు అతికారం ఆతి ఆమెన్ ఇనికాన్ వెప్పిని మాటెజ్ ఇక్కెజ్.

15 నీ పణిజ్ ఎలాగ మర్తికెజ్ ఇజి నాను నెసిన. నీను సలాజ్ మనికి ఆఇ. వేసాజ్ మన్నికిబా ఆఇ. నీను ఎమేణికబా ఉండ్రీ రకం ఆజి మంజినిక ఇహిజ బాగ మహాద్, ఇజి నాను కోరిజన†

16 నీను పణిదిజ్ రెఇకి. నీను సలాజ్ సిల్లెద్. వేసాజ్బా ఆఇ. నీను గోరువేసాజ్ నన్నికి. అందెజె నా వెయుదాన్ నాను నిజి పూస్సు విసీర్పు.

17 నీను గత్ర నన్నికి, దిక్కు గతి సిల్లికి, బీదాదికి, గుడ్డిదికి, డుమ్డ మన్నికి. గాని యాకెజ్ నిజం నెన్ఏండ, నజి ఆస్తి మనాద్, నాను డబ్బుజ్ గణస్త మనా, నజి ఇనిక తక్కు సిల్లెద్ ఇజి నీను వెహా ఆజిని.

18 గాని నాను నిజి బుద్ధి వెప్పినిక ఇనిక ఇహిజ, నీను ఆస్తి మనికి ఆదెజ్ ఇజి సినుదు సుర్జు సుబరం ఆతి బజారం నా బాణిజ్ కొల్అ. మరి నీ సిగు డాఃజినిలెకెండ్ పోర్పాదెజ్ తెల్లాని సొక్కెజ్ నా బాణిజ్ కొల్అ. నీ కణుకెజ్ టెటాజ్ తోర్లెజ్ కణుకెజ్ రాస్టెజ్ కాటికబా నా బాణిజ్ కొల్అ.

19 నాను ప్రేమిసిని విజేరిజ్ బుద్ధి వెప్పి, సిక్కదాన్ దిదిజినా. అందెజె నీను మన్సుదు నిజం ఆస ఆజి మన్అ. మరి మారు మన్సు పొందిజి నీ పాపమ్కు ఒప్పుకోడెఃజి డిసి సిఅ.

20 ఇదిలో, నాను సేప్లా డగ్రు నిల్లి, సేప్లా రేఅ ఇజి కొత్తినా. ఎయెన్బా నా కంటం వెంజి సేప్లా రేతిజ, నాను లొఇ సొన్ని వన్నివెట బోజనం కినా. వాండ్రుబా నావెట బోజనం కినాన్.

21 నాను ఎలాగ సెఇ వనకాజ్ ముస్సు గెలిసి, నా బుబ్బువెట వన్ని సింహాసనమ్దు బస్త మనానొ, అయాలెకెండ్నె, సెఇ వనకాజ్ ముస్సు గెలిస్సి వన్నిజ్ నావెట నా సింహాసనమ్దు బస్తెజ్బా అక్కు సీనా.

22 దేవుణు ఆత్మ దేవుణు సజమ్కాజ్ వెప్పినికెజ్ ఇనికెజ్ ఇజి గిబ్బిజ్ ఒడెఃజి వెంజి అయావజ నడిఃజి మండ్రు”.

## 4

పరలోకమ్దుమన్ని సింహాసనం.

1 యా సజతిజ్ జర్గితి వెనుక నాను సుడెఃతిజ్ ఇదిలో పరలోకమ్దు ఉండ్రీ సేప్లా రే ఆతి మహిక సుడెఃత. జోడఃబాంక పలక్కినన్ని జాటులెకెండ్, నావెట ముజాల వర్గితి మన్ని కంటం మన్నికాన్, “ఇబ్బె ఎక్కి రఅ. దిన్ని వెనుక ఇనికెజ్ జర్గిలె ఇజి నాను నిజి తోరిస్సాలె”, ఇజి వెప్తాన్.

2 వెటనె నాను దేవుణు ఆత్మ వెట నిండ్రిత. నస్తివలె పరలోకమ్దు ఉండ్రీ సింహాసనమ్దు ఒరెన్ బస్తిమన్నిలెకెండ్, నా ఎద్దు తోరె ఆతాద్.

3 అయ సింహాసనమ్దు బస్తి మన్నికాన్ పొద్దులెకెండ్ గొప్ప జాయ్ మన్ని ఎరాని రంగు పణుకుదిజ్ పోలిసి తోరితాన్. సింహాసనమ్దిజ్ సుటులం గొప్ప జాయ్ మన్ని ఆకు రంగుది కొడెఃవేలి మహాద్.

4 అయ సింహాసనమ్దిజ్ సుట్టులం ఇరువయ్ నాల్లి సింహాసనమ్కు మహా. అయ ఇరువయ్ నాల్లి సింహాసనమ్కాజ్, తెల్లాని సొక్కెజ్ తోడిఃగిజ, రాజురి టోపిజ్ నన్ని బజారం టోపిజ్ బురాదు తోడిఃగిజి ఇరువయ్ నాల్ఎర్ పెద్దెబుజు బస్త మహార్.

5 అయ సింహాసనమ్దాన్ గొప్ప మెర్పిని జాయ్, దీడెఃజినికెజ్, పిడఃగుజ్ వెల్లి వాజి మహా. అయ సింహాసనం ఎద్దు ఏడు దీవెజ్ జాయ్ సీజి మహా. అక్కెజ్ దేవుణు ఏడు ఆత్మెజ్.

6 అయ సింహాసనం ఎద్దు గటి మన్ని గాజుదిజ్ పోలితి సమ్దరమ్లెకెండ్ మహాద్. అక్క ఇని రంగు సిల్లి గటి మన్ని అద్దం లెకెండ్ మహాద్. నడిఃమిని, అయ సింహాసనమ్దిజ్ సుటులం, ఒడెఃల్ ముస్సు, వెనుక ముందాల విజు, కణుకెజాణిజ్ నిండ్రీతి మన్ని పాణం మన్ని నాల్లి జంతుజ్ మహా.

7 పాణం మన్ని, మొదొహి జంతు మొకొం సింహం లెకెండ్ మహాద్. రుండి జంతు మొకొం దూడెఃలెకెండ్ మహాద్. మూండ్రీ జంతు లోకు మొకొం నన్ని మొకొం మహికాద్. నాల్లి జంతు ఎర్గిని డేగలెకెండ్ మహాద్.

† 3:15 3:15 లవోదికియ పట్టుమీదిజ్ డగ్రు గొప్ప పేరు మన్ని రుండి పట్టుమీకు మహా. హయెరపోలిన్ ఇని పట్టుమీదు వేసాజ్ ఏరు సొని ఉండ్రీ గడ్డ మహాద్. లోకుర్ వరి జబ్బుజ్ సొండ్రెజ్ ఇజి, బాన్ సొన్ని అయ గడ్డాదు ఏరుకాబాజి మహార్. కొలోసాన్ ఇని పట్టుమీదు ఉండ్రెజ్ గొప్ప రుసి మన్ని ఏరు సొని ఉండ్రీ గడ్డ మహాద్. గాని లవోదికియ పట్టుమీది ఏరు సపాజ్ మహాద్. అందెజె లవోదికియ పట్టుమీది దేవుణు సజమ్దిజ్ ఇని పణిదిజ్బా రెఇ సపాజ్ ఏరుదిజ్ పోలిసి యెసు క్రీస్తు వెప్పినిక ఇజి సెగెండార్ వెప్పినార్.

8 యా నాల్గి జంతుజు, ఉండ్రి ఉండ్రి దన్నిజ్ ఆరెసిజ్ రెక్కెజ్ మహె. అయ రెకెజ ముస్కుని అడిగి విజు నిండ్రు కణుకెజ్ మహె. అయ నాల్గి జంతుజ్.

“ముజాల మహికాన్, ఏలు మన్నికాన్, వాని కాలమ్దు మంజునికానాతి విజు వనకాజ్ అతికారం మన్ని దేవుణు పరిసుద్దమతికాన్, పరిసుద్దమాతికాన్, \*పరిసుద్దమతికాన్”, ఇజ రెయు పొగల్ డిన్వండ పార్లి మహె.

9 ఎస్తివలెబా అయ పాణం మన్ని నాల్గి జంతుజ్, అయ సింహాసనమ్దు బస్తి మన్ని ఎలాకాలం బత్తిజునికాన్ ఆతి వన్నిజ్, పొగిడిజి గవరం సీజి వందనమ్కు వెప్పి పొగిడిజి మహారె,

10 నస్తివలె అయ ఇరువయ్ నాల్వెర్ పెద్దెలుజు అయ సింహాసనమ్దు బస్తి మన్నివన్నిజ్ ఎద్రు పడగ్జి అర్తారె, ఎలాకాలం బత్తిజుని వన్నిజ్ మాడిసి యా లెకెండ్ పొగిడిజి వెప్పి మహారె.

11 “మా ప్రబు ఆతి దేవుణు, విజు వనకాజ్ తయార్ కిత్తికి నీనె. నీను ఇస్టమాతి వజ అక్కెజ్ విజు తయార్ ఆతె. అయాలెకెండ్నె అక్కెజ్ మన్నె. అందెజె నీ గొప్పు గవరం వందిజ్, నీ గొప్పు సత్తు వందిజ్ లోకుర్ విజేరె నిజి గవరం సీజి పొగిడిజి మంజునార్”, ఇజి వెప్పి బజారమ్దాన్ తయార్ కిత్తి రాజురి టోపిలెకెండ్ మన్ని వరి టోపిజ్, సింహాసనం ఎద్రు ఇడ్నార్.

## 5

దేవుణు కియుదు మన్ని పుస్తాకమ్ని గొరెపిల్ల.

1 నస్తివలె, లొఇని వెల్లి రానె ఆతిమని, ఏడు సీలుజ్ పొక్తిమన్ని ఉండ్రి పుస్తకం అయ సింహాసనమ్దు బస్తి మన్నివన్ని ఉణెర్ కియుదు అస్తి మన్నిక సుడెత.

2 “అయ సీలుజ్ లాగ్లి పుస్తకం రెక్కెజ్ తగ్నికాన్ ఎయెన్ మనాన్”, ఇజి గొప్పు సత్తుమన్ని ఒరెన్ దేవుణు దూత డటం డేల్లి వెప్పిక సుడెత.

3 గాని, పరలోకమ్దు మన్ని వరి లొఇ గాని, బూమి ముస్కు మన్ని వరి లొఇ గాని, అయా లోకమ్దు మన్ని వరి లొఇ గాని అయ పుస్తకం రెక్కెజ్నొ లొఇ సుడెదెజ్నొ అట్టి ఎంబె వన్నిజ్బా తోర్వితాద్.

4 అయ పుస్తకం రెక్కెజ్నొ, లొఇ సుడెదెజ్నొ తగ్ని ఎయెన్ వన్నిజ్బా తోరిఇతిజ్ నాను నండొ అడెబాజి మహ.

5 నస్తివలె, అయ పెద్దెలుజులొఇ ఒరెన్, “నీను అడెబామా. ఇదిలో, దావీదు మొదొల్దాన్ సిగ్రిస్తి, యూద కుటుమ్దికాన్ ఆతి సింహం ఇజి పేరు మన్నికాన్, అయ ఏడు సీలుజ్ లాగ్లి పుస్తకం రెక్కెజ్ అట్టి వన్ని లెకెండ్ గెలస్త మనాన్”, ఇజి నజీ వెప్టాన్.

6 నస్తివలె, అయ పెద్దెలుజు నడిమిని పాణం మన్ని నాల్గి జంతుజు నడిమి మన్ని అయ సింహాసనం నడిమి, ముజాల కత్తె ఆతిమనిక, గాని ఏలు నిల్లి మంజుని ఉండ్రి గొరె పిల్లదిజ్ సుడెత. అయ గొరె పిల్లదిజ్ ఏడు కొముకుని ఏడు కణుకెజ్ మహె. అయ కణుకు బూమి ముస్కు విజు బాడ్డిజు పొక్తిమన్ని దేవుణు ఏడు ఆత్మెజ్.

7 వాండ్రు వాతాండ్రె అయ సింహాసనమ్దు బస్తిమన్ని వన్ని ఉణెర్ కియుదు మన్ని పుస్తకం లొస్తాన్.

8 వాండ్రు అయ పుస్తకం లొస్తివలె, పాణం మన్ని అయ నాల్గి జంతుజ్ని, అయ ఇరువయ్ నాల్వెర్ పెద్దెలుజు విజేరె, టోయ్లెజ్ని, నమ్మితి వరి పార్దనమ్కు ఆతి నెగ్గి వాసనం సీజిని దుపమ్కు ఇడ్తి మన్ని బజారమ్ది గిన్నెజ్ ఒరెన్ ఒరెన్ వరి కియుదు అస్తారె గొరె పిల్ల ఎద్రు పడగ్జి అర్తారె.

9 అయావలె, “నీను అయ పుస్తకం లొసి, దన్ని సీలుజ్ లాగ్దెజ్ తగ్నికి. ఎందానిజ్ ఇహిజు నీనె కత్తె ఆతి, నీ నలదాన్ విజు జాతిజుణిజ్, విజు బాసెజాణిజ్, విజు లోకుర్ బాణిజ్, విజు దేసమ్కాణిజ్ లోకురిజ్ దేవుణు వందిజ్ కొటి.

10 మరి వరిజ్ దేవుణుదిజ్ ఉండ్రి రాజ్యం లెకెండ్ని వన్నిజ్ పణి కిని పుజేరిజులెకెండ్ కిత్తి. వారు బూమి ముస్కు ఏలుబడి కినార్”, ఇజి అయ పాణం మన్ని నాల్గి జంతుజ్ని ఇరువయ్ నాల్వెర్ పెద్దెలుజు ఉండ్రి కొత్త పాట పార్తారె.

11 నస్తివలె నాను సుడెతిజ్ నండొ దూతారి కంటం వెహ. వరి లెక్క కొటి కొటిదిజ్ ఇంక లావ్ మహె. వారు అయ సింహాసనమ్దిజ్ని అయ పాణం మన్ని నాల్గి జంతుజ్ని అయ ఇరువయ్ నాల్వెర్ పెద్దెల్జు సుటులం మంజి,

12 “కత్తె ఆతి గొరె పిల్ల పొగ్డె ఆదెజ్ తగ్నికాన్. అతికారం మన్నికాన్ ఆదెజ్, ఆస్తి మన్నికాన్ ఆదెజ్, గెణం మన్నికాన్ ఆదెజ్, సత్తుమన్నికాన్ ఆదెజ్, మర్యాద లొసె ఆదెజ్, గవరం లొసె ఆదెజ్, పొగ్డె ఆదెజ్ తగ్నికాన్”, ఇజి గొప్పు పేరి కంటమ్దాన్ పార్లి మహారె.

\* 4:8 4:8 ఇని కత్తి సిల్లెండ గొప్పు నెగ్గికాన్

13 నస్తివలె పరలోకమేదు మన్ని, బూమి ముస్కు మన్ని, బూమి అడిగి మన్ని, సమ్దరమేదు మన్ని, పాణం మనికెజ్ విజు కూడేజి.

“సింహాసనమేదు బస్తి మన్నివన్నిజ్ని, గొర్రెపిల్లదిజ్, పొగ్గడి: ఆజి మంజినిక, మర్యాద, గవరం, సత్తు అంతు సిల్లెండ ఎలాకాలం మనీద్”, ఇజి వనక కంటమ్కాణిజ్ పార్జనిక, పొగ్గడి:జి మంజినిక నాను వెహ.

14 పాణం మన్ని అయ జంతుజ్ “ఆమెన్”, ఇజి వెహ్జిజ్ అయ ఇరువయ్ నాల్ఎర్ పెద్దెలుజు పడగ్జి అర్చి, గొర్రెపిల్లదిజ్ పొగిడి:జి మాడి:స్తార్.

## 6

### సీలుజ్

1 నస్తివలె, గొర్రెపిల్ల అయ ఏడు సీలుజు లోఇ, మొదోహి దన్నిజ్ లాగితిక నాను సుడేత. అయావలె అయ పాణం మన్ని నాల్లి జంతుజులోఇ, ఉండ్రీ జంతు పిడుగు జాటు నన్ని కంటమ్దాన్ “రఅ!”, ఇజి వెహ్జిజ్ వెహ.

2 నాను సుడేతిజ్, ఉండ్రీ తెల్లాని గుర్రం తోరితాద్. దన్ని ముస్కు ఒరెన్ దోను అసి బస్త మహాన్. వన్నిజ్ బజారమేదాన్ తయార్ కిత్తి, రాజురి టోపి నన్ని ఉండ్రీ టోపి దోహ్క్వాద్. వాండ్రు గెలిస్తికాన్ ఆజి మరి గెలిస్తిజ్ ఇజి సోత్తాన్.

3 గొర్రెపిల్ల రుండి సీలు లాగితివలె పాణం మన్ని రుండి జంతు “రఅ!”, ఇజి వెహ్జిజ్ నాను వెహ.

4 నస్తివలె సిను నన్ని ఎరాని రంగు మన్ని ఉండ్రీ గుర్రం వెల్లి వాతాద్. బూమి ముస్కు మన్ని లోకుర్, ఒరెన్ మరిఒరెన్ వన్నిజ్ సప్తెజ్ ఇజి, బూమి ముస్కు సమదనం సిల్లెండ కిదెజ్ అయ గుర్రం ముస్కు బస్తిమన్నివన్నిజ్ అతికారం దోహ్క్వాద్. వన్నిజ్ ఉండ్రీ పెరి కుర్ద దోహ్క్వాద్.

5 గొర్రెపిల్ల మూండ్రీ సీలు లాగితివలె పాణం మన్ని మూండ్రీ జంతు “రఅ!”, ఇజి వెహ్జిజ్ నాను వెహ. నాను సుడేతిజ్, ఇదిలో, ఉండ్రీ కర్ని గుర్రం తోరితాద్. దన్ని ముస్కు బస్తి మన్నికాన్ తూస్నిక వన్ని కియుదు అస్త మహాన్.

6 “ఉండ్రీ రోజుదిజ్ కూలి ఉండ్రీ డొక్కు గొదుము ఇజి, మరి, ఉండ్రీ రోజుదిజ్ కూలి మూండ్రీ డొక్కుజ్ సామ ఇజి వెహ్జిజ్. మరి నూనెదిజ్ బలివ మరెక్ని, ద్రాసపట్టురసమ్వందిజ్ ద్రాక్స టోటదిజ్ పాడే: కిదెజ్ ఆఎద్”, ఇజి అయ పాణం మన్ని నాల్లి జంతుజు నడిమిహాన్ వెహ్జిజ్ ఉండ్రీ కంటం నాను వెహ.

7 గొర్రెపిల్ల నాల్లి సీలు లాగితివలె, పాణం మన్ని నాల్లి జంతు “రఅ!”, ఇజి వెహ్జిజ్ నాను వెహ.

8 నాను సుడేతిజ్ నస్తివలె, నీరు నన్ని రంగు మన్ని ఉండ్రీ గుర్రం తోరితాద్. దన్ని ముస్కు బస్తిమన్ని వన్ని పేరు, సావు. అయా లోకం వన్ని వెనుక నడి:జి మహాద్. కుర్దెజాణిజ్, కరుదాన్, జబ్బుజాణిజ్, బూమిదు మన్ని అడి:వి జంతుజు వెట, బూమి ముస్కు బత్తిజిని వరిజ్ నాల్లి బాటేజ్లోఇహాన్ ఉండ్రీ బాటది వరిజ్ సప్తెజ్ ఇజి వన్నిజ్ అతికారం దోహ్క్వ మనాద్.

9 గొర్రెపిల్ల అయేదు సీలు లాగితివలె, దేవుణు మాట లోజిత్తివందిజ్, మరి దేవుణుమాటవందిజ్ మన్ని నెగ్గి సాస్యం వందిజ్ కత్తె అతిమన్ని వరి అత్తెజు, పూజ సీని మాలిపీట అడి:గి నాను సుడేత.

10 వారు గొప్ప పెరి కంటమ్దాన్, “పరిసుద్దమాతికాన్ అతి విజు దన్నిజ్ అతికారం మన్ని నిజమాతి దేవుణు, నీను, మజి సప్తి వరిజ్ దన్నిజ్ తగితి సిక్స సివండ, బూమి ముస్కు బత్తిని వరిజ్ తీర్పు తీరిసి, సిక్స సివండ ఎస్నా కాలం మంజినిలె?”, ఇజి డెల్ని వెహ్జిజ్ మహార్.

11 నస్తివలె వరిజ్ ఒరెన్ ఒరెన్ వన్నిజ్ తెల్లాని సొక్కెజ్ దోహ్క్వె. వెనుక వారు సప్పె అతిలెకెండెనె సప్పె ఆదెజ్ మన్ని తంబెరిజు లెక్క, మరి వరివెట కూడే:జి పణికితివరి లెక్కబా పూర్తి ఆనిదాక మరి కండెక్ కాలం కావ్ కిజి మండ్రెజ్, ఇజి వరిజ్ వెహ్ ఆతాద్.

12 గొర్రెపిల్ల ఆరు సీలు లాగితిక నాను సుడేత. నస్తివలె గొప్ప గటిజు బూమి కద్దితాద్. పొద్దు, కర్ని రంగులెకెండె ఆతాద్. నెల పూర్తి, నలరంగు లెకెండె ఎర్రజ్ ఆతాద్.

13 పెరి గాలిదిజ్ దూకె ఆజి బోడె: మరాతి ఆక్కరి కాయెజ్ రాలితిలెకెండెనె ఆగనమేదాన్ సుక్కెజ్ రాల్తె.

14 ఉండ్రీ కాకితం సుటిసి లెకెండెనె ఆగనం సుటి ఆజి తోవిండ ఆతాద్. విజు గొరొక్, సమ్దరం నడి:మి మన్ని ఇజిరి దేసెమేకు విజు వనక వనక బాడ్డిదాన్ డి:స్తి సాహ.

15 నస్తివలె, బూమి ముస్కు మన్ని రాజుర్, ఏలుబడి: కినికార్, సయ్నమేది నెయ్యిర్, ఆస్తి మనికార్, గొప్ప అతికారం మన్నికార్, వెట్టిపణి కినికార్ని వెట్టిపణిమణసిర్ ఆఇకార్ విజేరె తియెల్ ఆతారె, గొరొక సాలమ్కాజ్ లోఇ, సట్టు పొరొజు డా:జిత్తార్.

16 వారు గొరొకాజ్ని సట్టుజు యాలెకెండె వెహ్జిజ్ మహార్, “మీరు మా ముస్కు అర్చి, సింహాసనమేదు బస్తిమన్ని వన్ని మొకొమేదాన్ని గొర్రెపిల్ల కోపమేదాన్ మజి డా:పు”.

17 “ఎందానిజ్ ఇహిజ దేవుణుని గొర్రెపిల్ల బూమి ముస్సు మన్నివరి ముస్సు తీర్పు తీరిన్ని రోజు వాతాద్. వరి ఎద్రు ఎయెన్ నిల్దెజ్ అట్టూన్?”.

## 7

సీలు షొకె ఆతి 144,000 లోకుర్.

1 దిన్ని వెనుక బూమి ముస్సుబా సమ్దరం ముస్సుబా మరెక ముస్సుబా గాలి కివీండ, నాల్లి దిక్కుజ గాలి అస్తారె బూమిది నాల్లి దిక్కుజ, నాల్ఎర్ దూతార్ నిల్ని మంజినిక నాను సుడేత.

2 బత్కిజిని దేవుణుది సీలు అస్తిమన్ని, మరి ఉండ్రీ దూత పొద్దు సోని దరోటాన్ వాతిక నాను సుడేత. బూమిదిజ్ని సమ్దారమ్దిజ్ పాడే: కిదెజ్ అతికారం దొహ్కతిమన్ని దూతార్వెట ఈహు వెహ్హాన్.

3 “మాపు దేవుణు పణి కినివరి నొద్దుజ సీలు షొక్కిదాక బూమిదిజ్బా, సమ్దరమ్దిజ్బా, మరెకాజ్బా పాడే: కిమాట్”, ఇజి వాండ్రు డటం వెహ్హాన్.

4 నస్తివలె, సీలు షొకె ఆతివరి లెక్క వెహ్హిక నాను వెహ. ఇస్తాయేలుది విజు తెగెజాణిజ్ లక్క నలపయ్నాల్లి వెయిజ్ లోకుర్ మహార్.

5 సీలు షొకె ఆతికార్ యూదా తెగదాన్ పన్నెండు వెయిజ్ లోకుర్ మహార్. రూబెను తెగదాన్ పన్నెండు వెయిజ్ లోకుర్ మహార్. గాదు తెగదాన్ పన్నెండు వెయిజ్ లోకుర్ మహార్.

6 ఆసేరు తెగదాన్ పన్నెండు వెయిజ్ లోకుర్ మహార్. నష్టాలి తెగదాన్ పన్నెండు వెయిజ్ లోకుర్ మహార్. మనసె తెగదాన్ పన్నెండు వెయిజ్ లోకుర్ మహార్.

7 సీమొను తెగదాన్ పన్నెండు వెయిజ్ లోకుర్ మహార్. లేవి తెగదాన్ పన్నెండు వెయిజ్ లోకుర్ మహార్. ఇసాకారు తెగదాన్ పన్నెండు వెయిజ్ లోకుర్ మహార్.

8 జెబులూను తెగదాన్ పన్నెండు వెయిజ్ లోకుర్ మహార్. యోసేపు తెగదాన్ పన్నెండు వెయిజ్ లోకుర్ మహార్. బెన్యామిను తెగదాన్ పన్నెండు వెయిజ్ లోకుర్ మహార్.

తెల్లాని సొక్కెజ్ తొడుఃగితిమన్ని గొప్ప మంద లోకుర్

9 దన్ని వెనుక నాను సుడేతిజ్, విజు దేసమ్కాణిజ్, విజు జాతిజణిజ్, విజేరె లోకుర్ బాణిజ్, విజు బాసెజ్ వర్గిని వరిబాణిజ్ వాతి ఎయెన్బా లెక్క కిదెజ్ అట్ఇనన్ని గొప్ప మంద లోకుర్ అయ సింహాసనం ఎద్రుని గొర్రెపిల్ల ఎద్రు నిల్ని మంజినిక సుడేత. వారు తెల్లాని సొక్కెజ్ తొడిఃగిజి ఈత మరాతి మటేజ్ కికాజ్ అస్త మహార్.

10 “సింహాసనమ్దు బస్తి మన్నికాన్ ఆతి మా దేవుణుని గొర్రెపిల్ల మజి రక్కిస్త మనార్”, ఇజి వారు గొప్ప పెరి కంటమ్దాన్ వెహ్హి మహార్.

11 అయ సింహాసనమ్దిజ్ని అయ పాణం మన్ని నాల్లి జంతుజ్ని ఇరువయ్ నాల్ఎర్ పెద్దెల్జ సుటులం దేవుణు దూతార్ విజేరె నిహ మహార్. వారు సింహాసనం ఎద్రు పడగ్జి అర్ని దేవుణుదిజ్ పొగ్డిఃజి మాడిఃస్తార్.

12 “ఆమెన్, వన్ని గొప్ప పేరు వందిజ్, వన్ని గెణమ్వందిజ్, వన్ని అతికారమ్ వందిజ్, వన్ని సత్తువందిజ్ మాటు మా దేవుణుదిజ్ అంతుసిల్లెండ ఎలాకాలం పొగిడిఃజి మంజినాట్. మాటు విజెటె వన్నిజ్ గవ్దరం సీజి వందనమ్కు వెహ్హి మంజినాట్. ఆమెన్”, ఇజి వారు వెహ్హి మహార్.

13 నస్తివలె అయ పెద్దెలుజలోఇ ఒరెన్, “యా తెల్లాని సొక్కెజ్ తొడుఃగితి మనికార్ ఎయెర్? వారు ఎమేణిజ్ వాత మనార్”, ఇజి నజి వెన్బాతాన్.

14 “బాబు నీనె నెస్సి”, ఇజి నాను వన్నిజ్ వెహ్హా. వాండ్రు నావెట ఈహు వెహ్హాన్. “వీరు గొప్ప పెరి కస్టమ్కాణిజ్ వాతికార్. వారు గొర్రెపిల్ల నలదాన్ వరి సొక్కెజ్ నొర్బజి వనకాజ్ తెల్లాజ్ కిత్తికార్.

15 అందెజె, “వారు దేవుణు సింహాసనం ఎద్రు మంజి రెయుపొగొల్ వన్ని గుడిఃదు వన్నిజ్ పణి కిజి మంజినార్. సింహాసనమ్దు బస్తి మన్నికాన్, వాండ్రె ఆజి వన్ని టంబు వరి ముస్సు వ్డిక్కి వరిజ్ కాపాడ్హాన్.

16 మరి ఎనెజ్బా వరిజ్ బజ కట్విద్. మరి ఎనెజ్బా వారు ఏహ్కా సావర్. పొద్దుది గొప్ప ఏండ వరి ముస్సు తగ్గివిద్. మరి సుర్నిలెకెండ మన్ని వేడిఃబా వరిజ్ తగ్గివిద్.

17 ఎందానిజ్ ఇహిజ, సింహాసనం నడిఃమి మన్ని గొర్రెపిల్ల వరిజ్ గవుడుఃయెన్ ఆత మనాన్. పాణం సీని ఏరు వాని ఊట డగ్రు వాండ్రు వరిజ్ నడిఃపిస్సాన్. దేవుణు వరి కణుకేజాణిజ్ కణెర్ విజు తేల్నాన్”.



## 8

ఏడు సీలుని బజరమ్ది దూపమ్సుర్ని గిన్న

1 గొర్రెపిల్ల ఏడు సీలు లాగితివలె పరలోకమ్దు అరగంట జమ్నె మహాద్.

2 నస్తివలె, దేవుణు ఎద్రు ఏడు దేవుణు దూతార్ నిల్ని మంజినిక నాను సుడఃత. వరిజ్ ఏడు జోడు బాంగెజ్ దోహ్కై మహె.

3 మరి ఒరెన్ దేవుణు దూత బజరమ్దాన్ తయార్ కిత్తిమన్ని దూపం సుర్ని గిన్న కియుదు అస్తాండ్రె దూపం సుర్ని మాలి పెటె ఎద్రు వాతాండ్రె నిహాన్. సింహాసనం ఎద్రు బజరమ్దాన్ తయార్ కిత్తి దూపం సుర్ని మాలి పెటెదు, దేవుణు వందిజ్ కేట ఆతివరి పార్దనమ్కువెట సుర్ని పూజ సీదెజ్ అయ దూతెజ్ నెగ్గి వాసనం సీని దూపం నండో దోహ్కై.

4 నస్తివలె నెగ్గి వాసనం సీని దూపమ్ది గోయి దేవుణు వందిజ్ కేట ఆతివరి పార్దనమ్కువెట కూడఃజి దేవుణు దూత కియుదాన్ ముస్సు దేవుణు దరోట్ సాహె.

5 వెనుక అయ దేవుణు దూత దూపం సుర్ని గిన్న అస్తాండ్రె, దూపం సుర్ని మాలి పెటెదాన్ డీప్పు లాగ్గి అయ గిన్నాదు నిండ్రెస్తాండ్రె, అయ డీప్పుజ్ బూమి ముస్సు విసీర్తాన్. నస్తివలె గొప్ప దీడఃనికెజ్, పిడఃగుజ్, మెర్నినికెజ్ విజు వాతె. బూమి కద్దితాద్.

ఏడు జోడుబాంకెజ్.

6 నస్తివలె ఏడు జోడుబాంకెజ్ అస్తిమన్ని ఏడు దూతార్ వనకాజ్ ఊకైజ్ తయార్ ఆతార్.

7 మొదొహి దేవుణు దూత వన్ని జోడుబాంక ఉహ్కైజ్, వడఃజాని సిసు నలదాన్ కూడఃజి బూమి ముస్సు సెదరె ఆజి అర్తె. అందెజె బూమిదు మూండ్రె వంతుజ లొణ ఉండ్రె వంతు వెతాద్. మరెక్బా మూండ్రె వంతుజ లొణ ఉండ్రె వంతు వెతాద్. పసి గడ్డి విజు వెతాద్.

8 రుండి దేవుణు దూత వన్ని జోడుబాంక ఉహ్కైజ్, కసి మంజిని ఉండ్రె పెరి గొరెన్ నన్నిక సమ్దరమ్దు అర్తాద్. సమ్దరం మూండ్రె వంతుజ లొణ ఉండ్రె వంతు నల ఆతాద్.

9 సమ్దరమ్దు మన్ని పాణం మన్ని జంతుజ్, మూండ్రె వంతుజ లొణ ఉండ్రె వంతు సాతె. ఓడఃజ్బా మూండ్రె వంతుజ లొణ ఉండ్రె వంతు నాసనం ఆతె.

10 మూండ్రె దేవుణు దూత వన్ని జోడుబాంక ఉహ్కైజ్ కగెడలెకెండే కసిమంజిని ఉండ్రె పెరి సుక్క ఆగసమ్దాన్ రాల్లి పెరి గడ్డిజ ముస్సుని ఏరు సొని ఊటెజ మూండ్రె వంతుజ లొణ ఉండ్రె వంతు ముస్సు అర్తాద్.

11 అయ సుక్క పేరు సేందు. అందెజె మూండ్రె వంతుజ ఉండ్రె వంతు సేందు ఆతాద్. ఏరు సేందు ఆతిజ్ లోకుర్ నండొండార్ సాతార్.

12 నాల్లి దేవుణు దూత వన్ని జోడుబాంక ఉక్కిజ్, పొద్దు మూండ్రె వంతుజ లొణ ఉండ్రె వంతు సెఎణ్ ఆతాద్. నెల మూండ్రె వంతుజ లొణ ఉండ్రె వంతు సీకటి ఆతాద్. సుక్కెజ దెబ్బ తగ్గితిజ్ మూండ్రె వంతుజ లొణ ఉండ్రె వంతు సీకటి ఆతాద్. అందెజె వేడఃక మూండ్రె వంతుజ లొణ ఉండ్రె వంతు జాయ్ మన్వితాద్. రెయ్దు మూండ్రె వంతుజ లొణ ఉండ్రె వంతు నెల సుక్కెజ జాయ్ మన్వితాద్.

13 నాను సుడఃజి మహిజ్ నండో ముస్సు ఎగ్రిజి మంజిని ఉండ్రె డేగ, “మరి ఊకైజ్ మన్ని మూండ్రె జోడుబాంకెజి జాటుదాన్ బూమి ముస్సు బత్తిని వరిజ్, అబాయా కస్టం, కస్టం, కస్టం”, ఇజి గొప్ప పెరి జాటుదాన్ వెస్తామన్నిక వెహో.

## 9

1 అయ్దు దేవుణు దూత వన్ని జోడు బాంక ఉహ్కైజ్ ఆగసమ్దాన్ బూమి ముస్సు రాల్లి మహి ఉండ్రె సుక్క సుడఃత. దర్లిది తాలం కిక్కు అయ సుక్కదిజ్ దోహ్కై.

2 వాండ్రు అయ మటుసిల్లి దాస్తిమన్ని దర్లిదిజ్ రెతిజ్, గొప్ప పెరి సొల్లుదాన్ సిసుదాన్ గోయ్ వాతి లెకెండే గోయ్ వాతాద్. అయ దర్లిదాన్ వాతి గోయ్దాన్ పొద్దుని, ఆగసం సీకటి ఆతాద్.

3 అయ గోయ్దాన్ మేపిలెక్ బూమి ముస్సు వాతె. బూమి ముస్సు మన్ని కిపిడారొదిజ్ మన్నిలెకెండే వనకాజ్ సత్తు దోహ్కై.

4 నొద్దుజ దేవుణుగుర్దు సిల్లి లోకురిజ్ బాదకిదెజ్నె ఆఎండ, బూమి ముస్సు మన్ని గడ్డిదిజ్బా, ఇని మొక్కదిజ్బా, ఇని మరాతిజ్బా పాడః కిదెజ్ ఆవద్ ఇజి వనకాజ్ ఆడ్ర దోహ్కై.

5 వరిజ్ సపైజ్ వనకాజ్ అతికారం సిల్లెతాద్. గాని అయ్దు నెలెజ్ దాక వరిజ్ హిమ్మెజ్ కిజి మండ్రెజ్ వన్నాజ్ అతికారం దోహ్కై మనాద్. అవిక్ హిమ్మెజ్ కితిజ్ వరిజ్ వాతి కస్టం, కుపిడారొ లోకురిజ్ కట్టిజి వాని నొప్పిలెకెండే మహాద్.

6 అయ దినమ్కాజ్ లోకుర్ సావుదిజ్ రెబానార్ గాని సావు వరిజ్ తప్రె ఆనాద్లె. వారు సావువందిజ్ ఆస ఆనార్లె గాని సావు వరిజ్ డిసి సానాద్లె.

7 అయ మేపిలెక్ విదెమిదిజ్ సాండ్రెజ్ తయార్ కితిమన్ని గుర్మకాజ్ పొలితె మన్నె. బజారమ్దాన్ తయార్ కిత్తి బోపి నన్నిక ఉండ్రె, వనక బురెక ముస్సు మహె. వనక మొకొమ్కు లోకు మొకొ లెకెండ్ మహె.

8 వనక కొప్పు బోదెక బురాతి కొప్పులెకెండ్ మహాద్. వనక పల్కు సింహం పల్కు లెకెండ్ మహె.

9 ఇనుముదాన్ తయార్ కితిమన్ని లెకెండ్ గుండెదిజ్ అడిసి సొక్కెజ్ వనకాజ్ మహె. వనక రెక్కెజాణి జాటు విదెమిదిజ్ ఉహ్కీని గుర్మకు లాగిని రదమ్క గొప్ప పెరి జాటులెకెండ్ మహాద్.

10 వనకాజ్ కిపిడారొ తోకెజ్ నన్ని సాప్పు మన్ని తోకెజ్ మహె. లోకురిజ్ అయ్దు నెలెజ్ గుత్తి బాదెజ్ కిదెజ్ అయ తోకెజ్ వనకాజ్ సత్తు మహాద్.

11 దర్దిదిజ్ అతికారం మన్ని దూత వరి ముస్సు రాజు లెకెండ్ మహాన్. ఏబ్రి బాసాదు వన్నిజ్ పేరు 'అబదోసు' ఇని పేరు. గ్రీకు బాసాదు వన్ని పేరు 'అపొలుయోను' ఇని పేరు.

12 మొదొహి కన్ఠం గడఃస్తాద్. ఇదిలో, మరి రుండి కన్ఠమ్కు వాదెజ్ మన్నె.

13 ఆరు దేవుణు దూత వన్ని జోడుబాంక ఉహ్కీజ్, దేవుణు ఎద్రు మన్ని బజారమ్దాన్ తయార్ కిత్తి పూజ సీని మాలిపీటది కొముజాణిజ్ ఉండ్రె జాటు వెహ.

14 “యూప్రటిసు ఇని గొప్ప పెరి గడ్డ జోరెదు తోహె ఆతిమన్ని నాల్ఎర్ దూతారిజ్ కుత్తి డిస్అ”, ఇజి వెహిక నాను వెహ.

15 బూమి ముస్సు మన్ని లోకురి మూండ్రె వంతుజ లొఇ ఉండ్రె వంతుది వరిజ్ సప్తెజ్ ఇజి యా పంటాది, యా నెలాది, యా రోజుది, యా గంటవందిజ్ తయార్ కిబె ఆజి ఇడ్డి మన్నికారె, అయ నాల్ఎర్ దూతార్.

16 గుర్మకు ముస్సు ఎక్తిమన్ని సయ్నమ్ది వరిలెక్క. రుండి వందెజ్ లెక్కెజ్. వరి లెక్క నిసాని ఇజి నాను వెహ.

17 గుర్మకాజ్ని వనక ముస్సు బస్తిమన్ని వరిజ్ నజి వాతి కలాదు నాను యాలెకెండ్ సుడఃత. వరిజ్ సిసు నన్ని ఎరాని రంగుది, మరి నీలి రంగుది, మరి పసిజ్ రంగుది గుండెదిజ్ అడిసి సొక్కెజ్ మహె. గుర్మక బురెక్ సింహం బురెక్లెకెండ్ మహె. వనక వెయుజాణిజ్ సిసు, గోయ్, రెంజికం వెల్లి వాజి మహె.

18 వనక వెయుజాణిజ్ వాతి సిసు, గోయ్, రెంజికం ఇని మూండ్రె దెబ్బెజాణిజ్ లోకురి మూండ్రె వంతుజ లొఇ ఉండ్రె వంతు లోకుర్ సప్తె ఆతార్.

19 అయ గుర్మక సత్తు వనక వెయుజలొఇని వనక తోకెజ్ మహె. లోకురిజ్ కట్టి గాయమ్కు కిదెజ్ బురెక్ మన్ని సరాన్లెకెండ్ మన్ని తోకెజ్ వనకాజ్ మహె.

20 యా మూండ్రె దెబ్బెజాణిజ్ సావండ మిగిలితి మన్ని లోకుర్ ఏలుబా వరి కిక్కాణిజ్ తయార్ కితిమన్ని దెయమ్కాజ్ని బొమ్మెజు మాడిసినిక డిసిసిజి పాపమ్కు ఒప్పుకోడఃజి మన్ను మారిన్ఎతార్. వారు వరి కిక్కాణిజ్ బజారమ్దాన్, వెండిదాన్, కంసుదాన్, పణుకుదాన్, సెక్కదాన్ తయార్ కితిమన్ని సుడఃదెజ్ అట్ఇ, వెండ్రెజ్ అట్ఇ, నడిదెజ్ అట్ఇ సత్తు సిల్లి వనకాజ్ మాడిసినిక డిసి సిఎతార్.

21 అక్కాదె ఆవండ, లోకురిజ్ సప్పిక, గురుజవెట నెట్టి కినిక, రంకు బూలానిక, డొజ కినిక యాలెకెండ్ వారు కిజి మహికెజ్ డిసిసిజి పాపమ్కు ఒప్పుకోడఃజి డిసిసిజి మన్ను మారిన్ఎతార్.

## 10

ఇజిరి పుస్తకం అస్తిమన్ని దేవుణు దూత.

1 నస్తివలె గొప్ప సత్తు మన్ని మరి ఒరెన్ దేవుణు దూత పరలోకమ్దాన్ డిగ్గి వాజినిక నాను సుడఃత. వాండ్రు మొసావ్ తోడుగిత మహాన్. వన్ని బుర్ర ముస్సు కొడెవేలి సుటె ఆత మహాద్. వన్ని మొకొ పొద్దులెకెండ్ని వన్ని పాదమ్కు తంపం లెకెండ్ మన్ని సిసు కొనెజ్లెకెండ్ మహె.

2 వన్ని కియుదు రెక్తిమన్ని ఉండ్రె పుస్తకం మహాద్. వాండ్రు వన్ని ఉణెర్ పాదం సమ్దరం ముస్సు మట్ట మహాన్. వన్ని డేబ్రి పాదం బూమి ముస్సు మట్ట మహాన్.

3 సింహం ఆక్కర్ని లెకెండ్ వాండ్రు ఉండ్రె గొప్ప పెరి జాటు సిత్తాన్. వాండ్రు జాటు సిత్తివలె ఏడు పిడుగుజ్ వనక వనక జాటుజాణిజ్ వర్గితె.

4 అయ ఏడు పిడుగుజ్ వర్గితివలె, నాను రాసైజ్ తయార్ ఆతిజ్, “అయ ఏడు పిడుగుజ్ వర్గితి సజతిజ్ సీలు పొక్అ. వనకాజ్ రాస్సు”, ఇజి పరలోకమ్దాన్ ఉండ్రె కంటం వెహిక వెహ.

5 నస్తవలె, సమ్దరం ముస్కుని బూమి ముస్కుని హిమన్ని దేవుణు దూత వన్ని ఉణెర్ కియు పరలోకం దరోట్ పెహ్లాంత్తె యాలెకెండ్ వెహ్లాన్.

6 పరలోకమ్ని అబ్బె మన్ని విజువనకాజ్ని, బూమిని బూమి ముస్కు మన్ని విజువనకాజ్ని, సమ్దరమ్ని సమ్దరమ్దు మన్ని విజు వనకాజ్ తయార్ కిత్తికానాతి ఎలాకాలం బత్తిజిని దేవుణు పేరు అసి యా లెకెండ్ ఒట్టు పొక్తాన్. “మరి ఆలస్యం మన్వద్”.

7 ఏడు దేవుణు దూత వన్ని జోడుబాంక ఉక్కి దినమ్కాజ్ దేవుణుది డాజితి మన్ని సజతిజ్, దేవుణు, వన్ని పణికిని వరివెటని వన్ని ప్రవక్తర్ వెట ముజాల వెహె ఆతిమహిలెకెండ్ పూర్తి ఆనాద్లె”.

8 నస్తవలె పరలోకమ్దాన్ నాను ముజాల వెహెమన్ని కంటం మరి నావెట, “నీను సొన్ని సమ్దరం ముస్కుని బూమి ముస్కుని హిమన్ని అయ దేవుణు దూత కియుదు మన్ని రెకె ఆతిమన్ని ఇజిరి పుస్తకం లోన్అ”, ఇజి వెహ్లాక నాను వెహె.

9 అందెజె నాను సొన్ని “అయ ఇజిరి పుస్తకం నజి సిదా”, ఇజి అయ దేవుణు దూతెజ్ లొస్త. వాండ్రు, “దన్నిజ్ లాగ్గి తిన్అ. అయాక నీ పొటాదు సేందు ఆనాద్ గాని నీ వెయ్దు తేనె లెకెండ్ తియాజ్ మంజినాద్”, ఇజి నావెట వెహ్లాన్.

10 అయావలె దేవుణు దూత కియుదాన్ అయ ఇజిరి పుస్తకం నాను లొస్తానె తిహా. అయాక నా వెయుదిజ్ తేనెలెకెండ్ తియాజ్ మహాద్. గాని అక తిహి వెనుక నా పొటాదు సేందు ఆతాద్.

11 అయావలె వాండ్రు, “నీను నండో లోకుర్ వందిజ్, నండో జాతిజాణివరివందిజ్, నండో బాసెజ్ వర్గినివరివందిజ్, నండో డార్ రాజుర్వందిజ్ దేవుణు ప్రవక్తలెకెండ్ మరి వెహ్లాజ్ వలె”, ఇజి నజి వెహ్లాన్.

## 11

**దేవుణు వందిజ్ వాతి రిఎర్ సాసిర్.**

1 మరి కొల్త కిని ఉండ్రి డుడ్డు నజి సితాండ్రె ఈహు వెహ్లాన్. “నీను నిజ్జి దేవుణు గుడిని, దేవుణుదిజ్ పూజ సీని మలిపీటదిజ్ కొల్త కిజి, దేవుణు గుడిఁదు పొగిడిఁజి మాడిఁసినివరిజ్ లెక్క కిఅ.

2 గుడిఁదిజ్ వెల్లి మన్ని డేవ కొల్త కివండ డిఁనెఅ. అయాక దేవుణుదిజ్ నమ్మిఇవరి వందిజ్ మన్నిక. వారు నల్వయరుండి నెలెజ్ పరిసుద్దమతి యెరూసలేం పట్టుమ్దిజ్ వరికాల్కాణిజ్ మట్నార్లె.

3 మరి నాను నా రిఎర్ సాసిరిజ్ అతికారం సీనాలె. వారు బస్త సొక్కెజ్ తోడిఁగిజి పన్నెండు వందెజ్ అరువయ్రోస్కు దేవుణు ప్రవక్తరు లెకెండ్ దేవుణు మాటెజ్ సాటిస్నార్.

4 బూమిదిజ్ ప్రబు ఆతి దేవుణు ఎద్రు నిల్పి మంజిని రుండి ఒలివ మరెక్ని రుండి దీవ డండిజ్ ఆతికారె యా రిఎర్ సాసిర్.

5 ఎయెర్బా వరిజ్ హిమ్సెజ్ కిదెజ్ సుడఁతిజ, వరి వెయుదాన్ సిసు వాజి వరిజ్ పగాతివరిజ్ సుర్న విసిర్నాద్. వరిజ్ హిమ్సెజ్ కిదెజ్ సూణికార్ యాలెకెండ్ సాదెజ్వలె.

6 వారు ప్రవక్తరులెకెండ్ దేవుణు మాటెజ్ వెహ్లా దినమ్దు ఆగసమ్దాన్ పిరు రెవండ అడ్డు కిదెజ్ వరిజ్ అతికారం మంజినాద్. మరి వరిజ్ ఇస్టమాతి వజి ఎస్తివలెబా బూమిదు మన్ని ఏరుదిజ్ నలలెకెండ్ కిదెజ్, మరి నండో రకమ్ది జబ్బుజాణిజ్ బూమి ముస్కు మన్ని వరిజ్ బాదెజ్ కిదెజ్ వరిజ్ అతికారం మంజినాద్.

7 వారు సొస్యం వెహ్లా మంజినిక పూర్తి ఆతిజసరి దర్లిదాన్ వాని క్రూరమతి జంతు వరివెట ఉద్దం కిజి వరిజ్ సప్పాద్.

8 వరి పీనుగుజ్ యెరూసలేం ఇని అయ పెరి పట్టుమ్ది సర్దు అర్నె మంజినె. అయ పట్టుమ్దిజ్ సొదొమ పట్టుమ్దిజ్, అయగుప్తు దేసెమ్దిజ్ పొలిసి వెహె ఆజినాద్. అబ్బె వరి ప్రబుబా సిలువ పొకె ఆత మహాన్.

9 వరి పీనుగుజ్ మూసైజ్ సరి సివిండ విజు దేసెమ్దికార్, విజు తెగెజాణికార్, విజు బాసెజాణికార్, విజు జాతిదికార్ విజేరె మూండ్రినర రోస్కు వరి పీనుగుజ్ సుడఁజి మంజినార్.

10 యా రిఎర్ ప్రవక్తరు బూమి ముస్కు మన్ని వరిజ్ బాదెజ్ కిత్తి వందిజ్, బూమి ముస్కు మనికార్ విజేరె వరిజ్ జర్గితిక సుడఁజి గొప్ప సర్ల ఆజి ఒరెన్ మరి ఒరెన్ వన్నిజ్ ఇనామ్కు సీజి వండోయ్ కినార్.

11 గాని అయ మూండ్రినర రోస్కు ఆతి వెనుక దేవుణుబాణిజ్ పాణం మన్ని ఆత్మ వాజి వరి లొఇ డుఁగితిజ్ వారు కిక్కు బూమిదు తిగ్జి నిజ్జి నిల్తార్. వరిజ్ సుడఁతికార్ విజేరె గొప్ప తియెల్ ఆతార్.

12 నస్తవలె, “ఇబ్బె ఎక్కి రదు”, ఇజి పరలోకమ్దాన్ గొప్ప పెరి కంటమ్దాన్ వరిజ్ వెహ్లాక వారు వెహెరె, వరిజ్ పగాతికార్ సుడఁజి మహివలెనె వారు మొసాపుదాన్ పరలోకమ్దు పెరె ఆజి సొహార్.

13 అయ గడియారునె గొప్ప గటిజ బూమి కద్దితిజ్, అయ పట్టుమది పది వంతుజ లోక ఉండ్రీ వంతు అర్తాద్. బూమి కద్దితిజ్ ఏడు వెయుజ్ లోకుర్ సాతార్. మిగిలిత్తికార్ గుండెజ్ వణక్కిలెకెండ్ తియెలాజి పరలోకమ్దు మన్ని దేవుణుదిజ్ పొగిడితార్.

14 రుండి కన్ఘం వీజితాద్. ఇదిలో, మూండ్రీ కన్ఘం బేగినె వానాద్.

**మిగిలిత్తిమన్ని ఏడు జోడుబాంక.**

15 ఏడు దేవుణు దూత వన్ని జోడుబాంక ఊక్తిజ్ పరలోకమ్దు గొప్ప పెరి కంటమ్దాన్ యాలెకెండ్ డేల్నిని జాటుజ్ వాతె. “యా లోకమ్దు ఏలుదాన్ ఏలుబడిః కినిక, మా ప్రబుజ్ని వన్ని క్రీస్తుజ్ ఆత మనాద్. వాండ్రు అంతుసిల్లెండ ఎలాకాలం ఏలుబడిః కిజి మంజినాన్లె”.

16 నస్తవలె, దేవుణు ఎద్రు సింహాసనమ్కాజ్ బన్తిమన్ని అయ ఇరువయ్ నాల్ఎర్ పెద్దెలుబు పడగిజి అర్ని దేవుణుదిజ్ యా లెకెండ్ వెప్పి పొగిడిజి మాడిసి మహార్.

17 “ఏలు మన్నికి, ముజాల మహికి ఆతి, విజుదన్నిజ్ అతికారం మన్ని మా ప్రబు ఆతి దేవుణు, నీను నీ గొప్ప పెరి సత్తుదాన్ ఏలుబడిః కిదెజ్ మొదొలిన్తివందిజ్ మాపు మిజి వందనమ్కు వెప్పినాప్.

18 దేవుణుదిజ్ నమ్మిఇకార్ ఆతి యా లోకమ్ది లోకుర్ కోపమ్దాన్ నిండ్రీతార్. ఎందానిజ్ ఇహిజి నీను కోపం ఆదెజ్ సమయం వాతాద్. సాతి వరిజ్ విజెరిజ్ నీను తీర్పు తీరిన్తెజ్ గడియ వాతాద్. నీ వణిమణిసిరిజ్, ప్రవక్తరిజ్, నిజి నమ్మిత్తి వరిజ్, నీ పేరు వందిజ్ గవరం సీజి బత్తితి ఇజిరివరిజ్ని పెరివరిజ్ విజేరిజ్ తగితి ఇనాయం సీదెజ్ గడియ వాతాద్. బూమిదిజ్ నాసనం కినివరిజ్, నాసనం కిదెజ్ గడియ వాతాద్”.

19 నస్తవలె, పరలోకమ్దు మన్ని దేవుణుగుడిః రే ఆతిజ్, దేవుణు లోకుర్ వెట కిత్తి ఒట్టు రాస్తి ఇడ్డి మన్ని మందసం తోరె ఆతాద్. నస్తవలె, మెర్సిని జాయ్, పిడుఃగుజ్, దీడ్ఃజినికెజ్, వాతె. బూమి కద్దితాద్. గొప్ప వడఃజెజ్ అర్తె.

## 12

**ఉండ్రీ బోదెలిని ఉండ్రీ గొప్ప పెరి సరాన్.**

1 నస్తవలె పరలోకమ్దు ఉండ్రీ బమ్మాతి గుర్తు తోరితాద్. పొద్దుదిజ్ పొర్పాతి మన్ని ఉండ్రీ బోదెలి తోరె ఆతాద్. దన్ని పాదమ్క అడిఃగి నెల మహాద్. బురాదు పనెండు సుక్కెజ్ మన్ని రాజురి టోపిలెకెండ్ ఉండ్రీ బజారం టోపి మహాద్.

2 అది పాత డిఃస్ట మహాద్. అది ఏరు ఈబాదెజ్ నొప్పిదాన్ గొప్ప డేల్ని అడఃబాజి మహాద్.

3 నస్తవలె, మరి ఉండ్రీ గుర్తు పరలోకమ్దు తోరితాద్. ఇదిలో, ఉండ్రీ గొప్ప పెరి ఎరాని సరాన్ తోరితాద్. దన్నిజ్ ఏడు బుర్రెకిని పది కొమ్ము మహె. దన్ని బుర్ర ముస్కు రాజురి టోపిలెకెండ్ బజరమ్ది ఏడు టోపిజ్ మహె.

4 ఆగసమ్ది సుక్కెజి మూండ్రీ వంతుజ్లోక ఉండ్రీ వంతు సుక్కెజ్ దన్ని తోక డెయ్జి బూమి ముస్కు అర్ప్తాద్. ఏరు ఈబాదెజ్ తయార్ ఆతి మన్ని అయ బోదెలి, ఏరుఈబాతిజ్ సరి, అయ బయిజ్ డిఃజ్దెజ్ ఇజి అయ సరాన్ అయ బోదెలి ఎద్రు నిహ మహాద్.

5 అది ఒరెన్ మరినిజ్ కాస్తాద్. లోకమ్ది లోకురిజ్ విజేరిజ్ ఇనుము డుడ్డుదాన్ ఏలుబడిః కిదెజ్ ఇజి ఒరెన్ కొడొడిదిజ్ ఇట్టాద్. అది కాస్తి బయి దేవుణు డగ్రుని వన్ని సింహాసనం డగ్రు వెటనె లాగ్జి పెరె ఆతాన్.

6 అది పన్నెండు వందెజ్ అరువయ్ రోస్కు, దేవుణు దన్నిజ్ పొస కిదెజ్ ఇజి బిడిఃమ్బూమిదు దన్ని వందిజ్ తయార్ కితిమన్ని బాడ్డిదు ఉహ్కీ సాహాద్.

7 నస్తవలె పరలోకమ్దు ఉద్దం ఆతాద్. మికాయెలు ఇని దేవుణుదూతని వన్ని జటుది దూతార్ కూడఃజి అయ గొప్ప పెరి సరాన్వెట ఉద్దం కితార్. అయ గొప్ప పెరి సరాన్ని వన్ని దూతార్ మర్జి ఉద్దం కితార్.

8 గాని వారు దేవుణు దూతార్ ముస్కు గెలిస్తెజ్ అట్ఎతార్. అందెజె పరలోకమ్దు మరి ఎసెజ్బా వరిజ్ మండ్రెజ్ బాడ్డి మన్వితాద్.

9 లోకమ్దు మన్ని లోకురిజ్ విజేరిజ్ మొసెం కిజి నడిఃపిస్తికాన్ ఆతి సెఇకాన్ ఆతి సయ్తాన్ ఇజి పేరు ఇడ్డెః ఆతి మొదొహి సరాన్ ఇని అయ గొప్ప పెరి సరాన్ పరలోకమ్దాన్ బూమి ముస్కు అర్పె ఆతాన్. వాండ్రుని వన్ని దూతార్ బూమి ముస్కు అర్పె ఆతార్.

10 నస్తవలె పరలోకమ్దు యాలెకెండ్ వెప్పిని ఉండ్రీ పెరి కంటం నాను వెహ. “రెయుపొగోల్ మా దేవుణు ఎద్రు, మా తంబెరిజి ముస్కు తప్పు మొప్పి మహికాన్ ఆతి సయ్తాన్ అర్పె ఆత మనాన్. అందెజె వన్ని గొప్ప సత్తుదాన్ మజి రక్కిన్తి దేవుణు ఎలాకాలం ఏలుబడిః కిజి మంజినాన్. మరి అతికారం వన్ని క్రీస్తుజ్ ఆతాద్.

11 మా తంబెర్సిర్ గొర్రెపిల్ల నలదాన్, వారు వహ్తామన్ని సాస్యమ్దాన్ సయ్తాన్ ముస్కు గెలస్త మనార్. వారు వరి సొంత పాణమ్కాజ్ గొప్ప పెరిక ఇజి ఒడిబివిండ సాదెజ్బా తయార్ ఆత మహార్.

12 అందెజె పరలోకమ్దికిదెరా మీరు సర్ల ఆదు. బూమిదుని సమ్దరమ్దు మన్ని విజేరిజ్ కస్టమ్కునె. ఎందానిజ్ ఇహిజ సయ్తాను మీ డగ్రు వాత మనాన్. వన్నిజ్ సమయం తక్కునె మనాద్ ఇజి నెసి వాండ్రు నండో కోపమ్దాన్ నీ డగ్రు వాత మనాన్”.

13 బూమి ముస్కు అరై ఆతాన్ ఇజి నెస్తాండ్రె, అయ గొప్ప పెరి సరాన్, అయ మొగకొడోదిజ్ కాస్తి బోదెలిదిజ్ అసి మాలెజ్ కిదెజ్ ఇజి వెటపెర్లి రెబాదెజ్ మొదొల్స్తాన్.

14 అందెజె, అయ గొప్ప పెరి సరన్బాణిజ్ తప్రె ఆజి దేవుణు దన్ని వందిజ్ బిడిజ్బూమిదు తయార్ కితి మన్ని బాడ్డిదు ఎగ్రిజి సొండ్రెజ్ ఇజి రుండి పెరి డేగ రెక్కెజ్ దన్నిజ్ దొహ్కె. అబ్బె అయ గొప్ప పెరి సరాన్ దన్నిజ్ తొవిండ ఉండ్రె కాలం, కాలమ్కు, సెగం కాలం పోస కిబె ఆతాద్.

15 నస్తవలె, అయ బోదెలిదిజ్ గడ్డ పెర్లి ఒతెజ్ ఇజి అయ గొప్ప పెరి సరాన్ దన్ని వెయ్దాన్ పెరి గడ్డలెకెండ, అయ బోదెలి వెనుకహాన్ ఏరు క్కాన్.

16 గాని బూమి బదెజ్ ఆజి రే ఆతాదె, అయ గొప్ప పెరి సరాన్ వెయ్దాన్ కక్తి ఏరుదిజ్ డిజ్జి అయ బోదెలిదిజ్ తోడు: కితాద్.

17-18 అందెజె అయ గొప్ప పెరి సరాన్ అయ బోదెలి ముస్కు కోపం ఆతాదె, దేవుణు ఆడ్రెజ్ లోజిజి యేసువందిజ్ సాసెం వెహ్నిమన్నికార్ ఆతి దన్ని పొటాదు పుట్టిమహివరివెట ఉద్దం కిదెజ్ ఇజి తయార్ ఆతాద్. వరివెట ఉద్దం కిదెజ్ ఇజి అయ గొప్ప పెరి సరాన్ సొత్తాదె సమ్దరం ఒడ్డుదు నిహాద్.

## 13

సమ్దారమ్దాన్ ఎక్కి వాతి జంతు.

1 మరి, పది కొముకుని ఏడు బురెక్ మన్ని ఉండ్రె క్రూరమతి జంతు సమ్దారమ్దాన్ వెల్లి వాతిక నాను సుడేత. దన్ని కొముకాజ్ పది టోపిజ్ మహె. ఉండ్రె ఉండ్రె బుర ముస్కు దేవుణుదిజ్ దుసలాడిజిని ఉండ్రె ఉండ్రె పేరుకు మహె.

2 నాను సుడేతిమన్ని అయ జంతు సిటాడ: నొరెన్ లెకెండ మహాద్. గాని దన్ని పాదమ్కు ఒడుజు పాదమ్కు లెకెండ మహె. దన్ని వెయు పెరి నొరెన్ వెయులెకెండ మహాద్. అయ గొప్ప పెరి సరాన్ దన్ని సత్తుని వన్ని సింహాసనమ్ని దన్ని గొప్ప అతికారం విజు అయ జంతుదిజ్ సితాన్.

3 అయ జంతుది ఏడు బురెకలోణ ఉండ్రె బురాదు సాదెజ్ సరియాతి పెరి గాయం తగ్గిత మహాద్. గాని సాదెజ్ సరియాతి అయ పెరి గాయం మాందితాద్. అందెజె బూమి ముస్కు మన్ని లోకుర్ విజేరె బమ్మ ఆజి అయ జంతువెట కూడితార్.

4 అయ జంతుదిజ్ అతికారం సిత్తివందిజ్ వారు అయ గొప్ప పెరి సరాన్దిజ్ పొగ్డిజి మాడిసి మహార్. మరి వారు అయ జంతుదిజ్ పొగ్డిజి మాడిసి, “యా జంతులెకెండ మన్నికాన్ ఎయెన్బా సెలెన్. మరి దన్ని వెట ఉద్దం కిదెజ్ అట్టికాన్ ఎయెన్బా సెలెన్”, ఇజి గొప్ప వెహ్ని మహార్.

5 పొజె అని మాటెజ్ ఆహ వెహె ఆజి దేవుణుదిజ్ దుసలాడిజి వర్దిదెజ్ దన్నిజ్ వెయు వాతాద్. నలపయరుండి నెలెజ్ దన్ని పణిజ్ కిదెజ్ దన్నిజ్ అతికారం దొహ్కె.

6 అందెజె దేవుణుదిజ్ దుసలాడిజి, వన్ని పేరుదిజ్ అబద్దం మాటెజ్ వెహ్ని, పరలోకమ్దిజ్, పరలోకమ్దు బత్తిని వరివందిజ్ దుసలాడిజి అయ జంతు దన్ని వెయుదాన్ వర్దిజి మహాద్.

7 దేవుణు వందిజ్ కేట ఆతి వరివెట విదెం కిజి, వరిజ్ గెలిస్తెజ్ దన్నిజ్ అతికారం దొహ్కె. విజు తెగెజాణివరి ముస్కు, విజు జాతిజాణి వరి ముస్కు, విజు బాసెజ్ వర్దిని వరి ముస్కు, విజు దేసెమ్దివరి ముస్కు దన్నిజ్ అతికారం దొహ్కె.

8 బూమి ముస్కు బత్తినికార్ విజేరె అయ జంతుజ్ పొగ్డిజి మాడిస్తార్. బూమి పుట్విండ ముందాల్పై కత్తె ఆతిమని గొర్రెపిల్లదిజ్ నెందితి మన్ని, దేవుణు వెట ఎలాకాలం బత్తిని వరి పేరుకు రాసి ఇడ్డిని పుస్తకమ్దు పేరు సిల్లికార్ విజేరె జంతుదిజ్ పొగ్డిజి మాడిస్తార్లె. వరి పేరుకు అయ పుస్తకమ్దు సిల్లెద్.

9 వెండ్రెజ్ మన్ను మన్నికాన్ గిబ్బిజ్ ఒడేజి వెంజి అయావజ నడిజి మండ్రు.

10 ఎయెన్బా ఆఇ దేసెమ్ది వరివెట అస్సె ఆజి, ఆఇ దేసెం సొనికాన్ అయాలెకెండ సొనాన్లె. ఎయెన్బా కుర్దాన్ సప్పె ఆదెజ్ మన్నికాన్, కుర్దాన్ సప్పె ఆనాన్లె. దేవుణు వందిజ్ కేట ఆతివరి ఓర్పు, మరి దేవుణు ముస్కు వరిజ్ మన్ని నమకం దన్నిదటాన్ తోరె ఆనాద్.

బూమిదాన్ వెల్లి వాతి జంతు

11 మరి బూమిదాన్ మరి ఉండ్రీ క్రూరమతి జంతు వెల్లి వాతిక నాను సుడఃత. గొర్రెపిల్ల కొము నన్ని రుండి కొముకు దన్నిజ్ మహా. గాని గొప్ప పెరి సరాన్లెకెండ వర్ణిజి మహాద్.

12 అయ జంతుజ్, మొదొహి జంతుజ్ మహి విజు అతికారం దన్ని బాణిజ్ దొహ్కాద్. అయ అతికారమ్దాన్ బూమి ముస్కు బత్కినికార్ విజేరె సాదెజ్ సరియాతి గాయం తగ్గిజి నెగెండ ఆతి మన్ని మొదొహి జంతుజ్ పొగిడిఃజి మాడిఃస్తెజ్ ఇజి బలవంతం కిజి మహాద్.

13 అయ జంతు లోకుర్ విజేరె సూణిలెకెండ ఆగసమ్దాన్ సిసు డిగ్గి వాని నన్ని గొప్ప పెరి బమ్మాతి పణిజ్ గుర్తు లెకెండ కిజి తోరిసి మహాద్.

14 మొదొహి జంతు దన్ని పేరుదాన్ బమ్మాతిపణిజ్ గుర్తు లెకెండ కిజి తోరిస్తెజ్ అతికారం దొహ్కాద్ అయ జంతు బూమి ముస్కు బత్కిని వరిజ్ మొసెం కితాద్. కుర్దదాన్ గాయం ఆతిజ్బా సావీండ బత్కితి మొదొహి జంతుది బొమ్మ ఉండ్రీ తయార్ కిదెజ్ ఇజి ఆడ్ర సితాద్.

15 అయ మొదొహి జంతుది బొమ్మదిజ్ వర్ణిదెజ్ అట్టిలెకెండ పాణం సీదెజ్ దన్నిజ్ అతికారం దొహ్కాద్. అందెజె బొమ్మదిజ్ మాడిఃన్విండ మంజిని వరిజ్ సప్తెజ్బా అతికారం దొహ్కాద్ మనాద్.

16 అయ జంతు విజేరిజ్, అహిజ ఇజిరికారాతిజ్బా పెరికారాతిజ్బా, ఆస్తి మన్నికారాతిజ్బా బిదాదికారాతిజ్బా, వెట్టిపణిమణిసిర్ ఆఇకార్ ఆతిజ్బా వెట్టిపణి కినికారాతిజ్బా విజేరె వరి ఉణెర్ కిక్కాజ్నో, సిల్లిజి నొద్దుదునో మొదొహి జంతుది గుర్తు పోకె ఆదెజ్ ఇజి బలవంతం కితాద్.

17 ఎందానిజ్ ఇహిజ, అయ జంతు పేరునో, దన్ని పేరుది అంకి ఆతి గుర్తునో పోకె ఆతివరిజ్నె ఆఎండ మరి ఎయెరిజ్బా ఇనికబా కొండెజ్నో, పొర్తెజ్నో అతికారం సిల్లెద్.

18 ఏలు బుద్దిమన్నికాన్ ఎయెన్బా వన్ని బుద్దిదాన్ జంతు అంకి ఎసా ఇజి లెకిస్తెజ్ అట్టిజి లెక్కిసిన్. అక ఉండ్రీ లోకుది అంకి. ఆరువందెజ్ అరువయ్ఆరు. యాక లెకిస్తెజ్ బుద్ది అవ్సరం.

## 14

గొర్రెపిల్లని లక్కనాల్పయ్నాల్లి వెయ్ లోకుర్.

1 నస్తెవలె, నాను సుడఃతిజ్ అయ గొర్రెపిల్ల యెరూసలేమ్దు మన్ని సియెను గొర్రెన్ ముస్కు నిహ మనాన్. అయ గొర్రెపిల్ల పేరుని, వన్ని బుబ్బాతి దేవుణు పేరు వరి నొద్దుదు రాసె ఆతిమని లక్క నాల్పయ్నాల్లి వెయ్ లోకుర్ వన్నివెట మహాద్.

2 గొప్ప పెరి గడ్డాది జాటు లెకెండని గొప్ప పిడుగు జాటు లెకెండ ఉండ్రీ కంటం పరలోకమ్దాన్ వాతిక నాను వెహ. నాను వెహిమన్ని కంటం టోయ్ల పలక్తివలె వాతి జాటు లెకెండ మహాద్.

3 అయ లక్క నాల్పయ్ నాల్లి వెయిజ్ లోకుర్ అయ సింహాసనం ఎద్దుని అయ పాణం మన్ని నాల్లి జంతుజి ఎద్దుని ఇరువయ్ నాల్వెర్ పెద్దెల్జి ఎద్దు, ఉండ్రీ కొత్త పాట పార్తార్. యా లోకమ్దాన్ కొలె ఆతి, వారె ఆఎండ మరి ఎయెర్బా అయ పాట నెన్వితార్.

4 వీరు బోదెకవెట కూడఃజి, వరిజ్ వారె సెఇకార్ కిబె ఆఎండ నెగెండ మన్నికార్. గొర్రెపిల్ల ఎంబె సొహిజ్బా వీరుబా వన్నివెట సొన్ని మహాద్. వీరు తొలిత పంటితి పంటలెకెండ దేవుణు వందిజ్, మరి గొర్రెపిల్లవందిజ్ బూమి ముస్కు మన్ని విజు లోకుర్ బాణిజ్ ఎర్లె ఆజి కేట ఆతికార్.

5 వీరు వెయ్దుదాన్ ఇని అబద్దం మాటబా వర్గివితార్. వీరు ఇని కల్లి సిల్లి నెగ్గికార్.

మూండ్రీ దేవుణు దూతార్

6 నస్తెవలె బూమి ముస్కు మన్నివరిజ్ విజేరిజ్, అహిజ విజు జాతిజిణి వరిజ్, విజు తెగాతివరిజ్, విజు బాసెజి వర్ణిని వరిజ్, విజు దేసెమ్ది లోకురిజ్, వెహైజ్ దేవుణు వెట ఎలాకాలం మంజిని బత్కు సీని నువార్త అసి మరి ఉండ్రీ దేవుణు దూత ఆగసమ్దు ఎగ్గిజి మంజినిక నాను సుడఃత.

7 వాండ్రు, “మీరు దేవుణుదిజ్ లోజిజి, వన్నిజ్ గవ్సరం సీదు. ఎందానిజ్ ఇహిజి వాండ్రు తీర్పు తీరిసిని గడిఃయ వాత మనాద్. అందెజె ఆగసమ్దిజ్, బూమిదిజ్, సమ్దారమ్దిజ్, ఏరు వాని ఊటెజి పుట్టిస్తె వన్నిజె పొగిడిఃజి మాడిఃస్తు”, ఇజి గొప్ప పెరి కంటమ్దాన్ వెహ్హాన్.

8 మరి ఉండ్రీ దూత వన్ని వెసుక వాజి, “ఉత్పుత్ కిబిన్సి, రంకు బూలాజిని దన్ని పణిజాణిజ్ విజు లోకురిజ్ మత్తు కిబిన్సిలెకెండ ఉటపిన్సికాద్ ఆతి గొప్ప పెరి పట్నం ఆతి బబులోను అర్తాద్, అర్తాద్”, ఇజి వెహ్హాన్.

9-10 అయి రుండి దేవుణు దూతార్ వెనుక, మరి ఒరెన్ దూత వన్ని వెనుక వాజి గొప్ప పెరి కంటమ్దాన్ ఈహు వెహ్లాన్. “ఎయెన్బా అయి జంతుజ్ మాడిసి, దన్ని బొమ్మదిజ్ మొకిజి, దన్ని గుర్తు వన్ని నొద్దుదునొ, కియుదునొ పొకె ఆతికాన్, ఇనికబా కలవ్విండ పూర్తి సత్తుదాన్ వాకె ఆజిని దేవుణు గొప్ప కోపం ఇని మత్తు కిబిన్ని కల్లు ఉణాన్లె. గొరెపిల్ల ఎద్దుని, దేవుణు వందిజ్ కేట ఆతికార్ ఆతి దేవుణు దూతార్ ఎద్దు, నెగడిసిని సిసుదాన్, వెయ్విని గందకమ్దాన్ ఇమ్సెజ్ కిబె ఆనాన్.

11 వారు హిమ్సెజ్ కిబె ఆజిని దన్ని గోయ్ ఎలాకాలం డిస్విండ ముస్సు సొన్ని మంజినాద్. అయి క్రూరమతి జంతుదిజ్ గాని, దన్ని బొమ్మదిజ్ గాని పొగిడిజి మాడిస్సికార్, దన్ని పేరుమన్ని గుర్తు ఎయెన్బా పొకె ఆతిజ అబ్బె రెయుపొగోల్ కాళి సిల్లెండ హిమ్సెజ్ కిబె ఆజి మంజినాన్.

12 అందెజె దేవుణు ఆడ్రెజ్ లొజిజి మంజి, యేసువందిజ్ మన్ని నమకమ్దు నమకమాతివరిలెకెండ మంజినికార్, హిమ్సెజ్ విజు డిస్విండ ఓరిసి మంజినార్. వారు దేవుణుదిజ్ సెందితికార్ ఇజి తోరె ఆజినార్.

13 నస్తివలె, “ప్రబు ముస్సు నమకం ఇడెజి ఏలుదాన్ సొనికాన్ దేవుణు సీని దీవెనమ్కు మంజినికార్ ఇజి రాన్అ”, ఇజి పరలోకమ్దాన్ ఉండ్రీ కంటం వెహ్లాక వెహ. “నిజమె, వారు కష్టబాడెజినిక డిసి రోమ్నార్. వారు కితిమన్ని పణిదిజ్ తగితి లెకెండ వరిజ్ ఇనాయం దొహ్కాద్”, ఇజి దేవుణు ఆత్మ వెహ్లానాన్.

### బూమిది పంట కొయ్నిక.

14 మరి నాను సుడెతిజ్, ఇదిలో, తెల్లాని మొసాప్ తోరితాద్. “లోకు మరిసి” ఆతి వన్నిజ్ పొలితి ఒరెన్ మొసాప్ ముస్సు బస్త మహాన్. వన్ని బుర ముస్సు బజారం టోపి మహాద్. వన్ని కీదు తెవుగు మన్ని కొడెవేలి అస్త మహాన్.

15 నస్తివలె మరి ఉండ్రీ దేవుణు దూత, దేవుణుగుడిదాన్ వెల్లి వాజి, “బూమిది పంట పండిత మనాద్. కొయ్దెజ్ కాలం వాతాద్. అందెజె నీ కొడెవేలి అసి కొయ్అ”, ఇజి మొసాపు ముస్సు బస్తిమన్ని వన్నిజ్ పెరి కంటమ్దాన్ వెహ్లాన్.

16 మొసాపు ముస్సు బస్తి మన్నికాన్ వన్ని కొడెవేలి బూమి ముస్సు సెల్ఫ్తాన్. బూమిదు పంటితి మన్ని పంట కొయె ఆతాద్.

17 నస్తివలె మరి ఉండ్రీ దేవుణు దూత పరలోకమ్దు మన్ని దేవుణుగుడిదాన్ వెల్లి వాతాన్. వన్నిజ్బా తెవుగుమన్ని ఉండ్రీ కొడెవేలి మహాద్.

18 మరి ఉండ్రీ దేవుణు దూత దేవుణుదిజ్ పూజ సీని మాలిపీటదాన్ వెల్లి వాతాన్. వాండ్రు సిసు ముస్సు అతికారం మన్నికాన్. “బూమి ముస్సు మన్ని ద్రాక్ పట్టు కొయ్దెజ్ పాకం వాతె. అందెజె తెవుగు మన్ని నీ కొడెవేలిదాన్ దన్ని గెలెజ్ కొయ్అ”, ఇజి గొప్ప పెరి కంటమ్దాన్ వాండ్రు కొడెవేలి అస్తిమన్ని దూతెజ్ వెహ్లాన్.

19 అందెజె అయి దేవుణు దూత వన్ని కొడెవేలి బూమి ముస్సు సెల్ఫ్తాండ్రె, ద్రాక్ పట్టు కొయ్జి, ద్రాక్ పట్టు మట్టి రసం లాగిజిని గనుగుదు ఇడ్తాన్. యా గనుగు దేవుణుబాణిజ్ వాజిని సిసునన్ని కోపమ్దిజ్ గుర్తు.

20 ద్రాక్ పట్టు మట్టిని గనుగుదు పట్టుమ్దిజ్ వెల్లి వారు మట్టార్. రుండి వందెజ్ మయిలుజ్ దూరం, గుర్తం వెయిది కలెమ్దిజ్ సమానం ఆతిలెకెండ, అయిదు అడుగుజ్ లోతు మన్ని గడ్డ లెకెండ, అయి గనుగుదాన్ నల సోత్తాద్.

## 15

### ఏడు దేవుణుదూతార్ని ఏడు జబ్బుజ్.

1 మరి ఉండ్రీ గొప్ప బమ్మాతి గుర్తు పరలోకమ్దు నాను సుడెత. దేవుణు కోపం పూర్తి ఆనిలెకెండ కిడిజ్ ఇజి, కడెవెరిది ఏడు జబ్బుజ్ అస్తి మన్ని ఏడు దూతార్జ్ సుడెత.

2 మరి సిసుదాన్ కూడితి మన్ని గాజుదిజ్ పొలితి సమ్దరం లెకెండ మన్నిక నాను సుడెత. అయి క్రూరమతి జంతుజ్ని దన్ని బొమ్మదిజ్, దన్ని పేరుది అంకిదిజ్ లొజివిండ దన్నిజ్ గెలిస్తికార్, దేవుణు వరిజ్ సిత్తి టోయ్లెజ్ అసి అయి గాజు నన్ని సమ్దరం పడెకాదు నిల్పి మంజినిక సుడెత.

3 వారు, “ప్రబు ఆతి దేవుణు, విజు దన్నిజ్ అతికారం మన్నికి నీ పణిజ్ గొప్ప పెరికెజ్ని బమ్మాతికెజ్. బూమి ముస్సు మన్ని లోకుర్ ముస్సు ఎలాకాలం రాజు ఆతికి, నీ సరిజ్ నాయం ఆతికెజ్ని నిజమాతికెజ్ మన్నె.

4 ప్రబువా, నీను ఒరిదె గొప్ప నెగ్గికి, నీ నన్నికాన్ మరి ఎయెన్బా సిల్లెన్. లోకుర్ విజెరె నిజి లొజిజి మంజినార్. బూమి ముస్సు మన్ని లోకుర్ విజెరె నీపేరుదిజ్ గవరం సీనార్లె. తోరె ఆతిమని నీతినిజయ్తి మన్ని పణిజి వందిజ్ లోకుర్ విజెరె వాజి నీ ఎద్దు నిజి పొగిడిజి మాడిస్సార్లె”, ఇజి దేవుణు పణికినికాన్ ఆతి మోసె పాటని గొరెపిల్ల పాట పార్తార్.

5 దన్నివెనుక, నాను సుడెతిజ్ సాస్యమదిజ్ గుడారం ఇని దేవుణు గుడి పరలోకమ్దు రే ఆతాద్.

6 అయ ఏడు జబ్బుజ్ అస్తి మన్ని ఏడు దూతార్, కల్తీసిల్లి మెర్సిని తెల్లని సొక్కెజ్ తోడిగిజి, దన్ని ముస్సు గుండెదు బజారమ్దాన్ తయార్ కితి జమిదం తోహ ఆజి అయ దేవుణు - గుడిదాన్ వెల్లి వాతార్.

7 నస్తవలె, అయ పాణం మన్ని నాల్లి జంతుజ లోణ ఉండ్రీ జంతు ఎలాకాలం బత్తిజిని దేవుణు కోపమ్దాన్ నిండ్రీతి మన్ని, బజారమ్దాన్ తయార్ కితి ఏడు కుడుకెజ్ అయ ఏడు దేవుణుదూతారిజ్ సిత్తాన్.

8 అయావలె దేవుణు జాయ్దాన్ని వన్ని సత్తుదాన్ వాతి గోయ్దాన్ దేవుణు గుడిః నిండ్రీతాద్. అయ ఏడు దేవుణుదూతార్వెట వాదెజ్ మన్ని జబ్బుజ్ వాజి పూర్తి ఆనిదాక ఎయెన్బా దేవుణు గుడిఃదు డుగ్దెజ్ అట్వితాన్.

## 16

### దేవుణు కోపం నిండ్రీతి మన్ని ఏడు కుడుకెజ్

1 నస్తవలె, “మీరు సొన్ని దేవుణు కోపమ్దాన్ నిండ్రీతి మన్ని అయ ఏడు కుడుకెజ్ బూమి ముస్సు వాక్తు”, ఇజి దేవుణు గుడిదాన్ అయ ఏడు దేవుణుదూతారిజ్ గొప్ప పెరి కంటమ్దాన్ వెష్టాక వెహ.

2 మొదోహి దెవుణుదూత సొహండ్రే వన్ని కుడుకాదు మన్నిక బూమి ముస్సు వాక్తిజ్, అయ క్రూరమతి జంతుది గుర్తు పొకె ఆతి వరిజ్ని దన్ని బొమ్మదిజ్ మాడిఃస్సివరిజ్ డటం నొప్పి కిజిని సెణ పుట్టు పుట్టె.

3 దన్ని వెనుక రుండి దేవుణు దూత సొన్ని వన్ని కుడుకాదు మన్నిక సమ్దరమ్దు వాక్తిజ్, సమ్దరమ్ది ఏరు పీనుగుది నల లెకెండ్ ఆతాద్. అందెజె సమ్దరమ్దు మన్ని పాణం మనికెజ్ విజు సాతె.

4 అయ రుండి దేవుణు దూత వెనుక మూండ్రీ దేవుణు దూత సొన్ని వన్ని కుడుకాదు మన్నిక పెరి గడ్డెజిని ఏరు సొని ఊటెజి వాక్తిజ్, వనక ఏరు విజు నల ఆతె.

5 నస్తవలె, “ఏలు మన్నికి, ముజాల మహికి ఆతి నీను ఒరిదె పరిసుద్దమాతికాన్ ఆతికి. నీ నన్నికాన్ మరి ఎయెన్బా సిల్లెన్.

6 వారు దేవుణు వందిజ్ కేట ఆతి వరిజ్ని దేవుణు ప్రవక్తరుజ్ సప్తార్. అందెజె వరిజ్ తగ్గిలెకెండ్ తీర్పు తీరిసి, వరిజ్ ఉండెజ్ నల సిత్తిజ్, నీను నీతినిజాయ్దాన్ తీర్పు తీరిసినికి ఆజిని”, ఇజి ఏరుదిజ్ అతికారం మన్ని దేవుణు దూత వెష్టానిక వెహ.

7 అందెజె “నిజమె, ప్రబు ఆతి దేవుణు, విజు దన్నిజ్ అతికారం మన్నికి, నీను తీరిన్ని తీర్పుజ్ నిజమాతికెజ్, నాయమాతికెజ్”, ఇజి పూజ సీని మాలిపీటదాన్ వెష్టాక వెహ.

8 అయ మూండ్రీ దేవుణు దూత వెనుక నాల్లి దేవుణు దూత సొన్ని వన్ని కుడుకాదు మన్నిక, పొద్దుముస్సు వాక్తిజ్ లోకురిజ్ సిసుదాన్ సురదెజ్ పొద్దుదిజ్ అతికారం దొహ్కాద్.

9 అందెజె లోకుర్ నండో వేడిఃదాన్ వెయ్జి, పుట్కాజ్ని నొప్పి కిబిన్ని జబ్బుజ్ లోకుర్ ముస్సు పొక్తిమన్ని దేవుణు పేరుదిజ్ దుసలాడిఃతార్. గాని వారు, వరి పాపమ్కు ఒప్పుకొడఃజి డిఃసిసీజి మన్ను మారిస్తెజ్ ఒవ్వెతార్. వారు దేవుణుదిజ్ పొగిడిఃదెజ్బా ఒవ్వెతార్.

10 అయ నాల్లి దేవుణు దూత వెనుక అయ్దు దేవుణు దూత సొన్ని వన్ని కుడుకాదు మన్నిక అయ క్రూరమతి జంతు బన్ని సింహాసనం ముస్సు వాక్తిజ్, అది ఏలుబడిః కిని దేసెం విజు సీకటి ఆతాద్. లోకుర్ వరిజ్ వాజిని నొప్పిజ్ బరిస్తెజ్ అట్వెండ వరి నాలికెజ్ అడ్డం కొప్పా ఆతార్.

11 వరి పుట్టుజవందిజ్, నొప్పిజవందిజ్ పరలోకమ్దు మన్ని దేవుణుదిజ్ దుసలాడిఃతార్. గాని వారు కిత్తి మహి సెణ పణిజ వందిజ్ ఒడిఃబిజి మన్ను మరిసి పాపమ్కు ఒప్పుకొడఃజి డిఃసిసీదెజ్ ఒవ్వెతార్.

12 అయ అయ్దు దేవుణు దూత వెనుక ఆరు దేవుణు దూత సొన్ని వన్ని కుడుకాదు మన్నిక యూప్రటిసు ఇని గొప్ప పెరి గడ్డ ముస్సు వాక్తిజ్, తూర్పు దరొటాన్ వాని రాజురిజ్ వాదెజ్ సరి తయార్ ఆతిలెకెండ్ గడ్డ వస్తూ సొహాద్.

13 నస్తవలె, అయ గొప్ప పెరి సరాసు వెయ్దుదాన్, మరి అయ క్రూరమతి జంతు వెయ్దుదాన్ని అబద్దం వెష్టా ప్రవక్త వెయ్దుదాన్ కపొకిజ్ నన్ని మూండ్రీ దెయమ్కు వెల్లి వాతిక సుడఃత.

14 అయ దెయమ్కు బమ్మాని గుర్తుజ్ కిజి తోరిసె. అవి విజు దన్నిజ్ అతికారం ఆతిమన్ని దేవుణు తీర్పు తీరిన్ని, గొప్ప తియెల్ ఆని రోజుదు, దేవుణు వెట ఉద్దం కిదెజ్ ఇజి లోకమ్దు మన్ని విజు రాజురిజ్ కుడుఃప్పి తత్తెజ్ ఇజి వరి డగ్రు సొహె.

15 “ఇదిలో, ఎయెన్బా ఒడిఃబివెండ మహివలె, డొఃజారి డొఃజి కిదెజ్ వానిలెకెండ్ నాను వాజిన. నాను వానివలె సిగు ఆనిలెకెండ్ డుమ్డ నడిఃవెండ మండ్రేజ్ ఇజి తెలి ఆజిమంజి వన్ని సొక్కెజ్ కాపేకిజి మంజినికాన్ దేవుణు సిజిని దీవనమ్కు మంజినికాన్ ఆనాన్”.



16 నస్తవలె, అయ దేవుడుకు ఏబ్రి బాసదు 'అర్మెగెదొను' ఇజి కూకె ఆజిని బాడ్డిదు లోకమది రాజురిజ్ విజేరిజ్ కుడుప్పి తత్తె.

17 అయ ఆరు దేవుణు దూత వెనుక ఏడు దేవుణు దూత సొన్ని వన్ని కుడుకాదు మన్నిక ఆగసమ్దిజ్ని బూమిదిజ్ నడిమి మన్ని బాడ్డిదు వాక్తిజ్, "పూర్తి ఆతాద్", ఇజి దేవుణుగుడిలో ఇ మన్ని సింహాసనమ్దాన్ వెప్పిని ఉండ్రీ పెరి కంటం వాతాద్.

18 నస్తవలె మెర్సిని జాయ్, దీడ్జినికెజ్, పిడుగుజ్, విజు వాతె. బూమి గొప్పజ కద్దితాద్. బూమి ముస్సు లోకుర్ పుట్టిబాణిజ్ అసి ఎసెజ్ బా జర్గిలెకెండ్ నస్సా గొప్ప గటిజ బూమి కద్దితాద్.

19 గొప్ప పేరు పొందితిమన్ని బబులోను పట్టుం బదెజ్ ఆజి మూండ్రీ ముకెజ్ ఆతె. దేవుణుదిజ్ నమ్మిఇవరి పట్టుమ్కు అరై సొహె. బబులోను పట్టుమ్దిజ్, దన్ని పాపమ్క వందిజ్, సిను లెకెండ్మన్ని, వన్ని గొప్ప పెరి కోపం మన్ని గిన్న ఉండెజ్ సీదెజ్ దేవుణు ఎత్తు కిత్తాన్.

20 సమ్దరం నడిమి మన్ని ఇజిరి దేసెమ్కు (ద్విపుజ్) విజు ముడుగుతె సొహె. గొరొక్ అణసె ఆజి సద్దుజ్ ఆతె.

21 డగ్రు యబాయ్ కేజిజ్ బరు మంజిని వడజెజ్ ఆగసమ్దాన్ లోకురి ముస్సు అరై. అయ వడజెజ్ బాణిజ్ తగ్గితి గాయమ్కు గొప్ప పెరికెజాతిజ్, లోకుర్ అయ గాయమ్క వందిజ్ దేవుణుదిజ్ దుసలాడితార్.

## 17

### బోదెలిని జంతు

1 ఏడు కుడుకెజ్ అస్తిమన్ని ఏడు దూతారలో ఇ ఒరెన్ దూత వాతాండ్ర నావెట, "నీను ఇబ్బె రఅ. గొప్ప రంకు బూలాని బోదెలిలెకెండ్ మన్ని, నండొ గడ్డెజ పడకాదుమన్ని పెరి పట్టుమ్దిజ్ తీర్పు కిజి, సీజిని సిక్కి నిజి తోరిస్సాలె", ఇజి వెహ్హాన్.

2 బూమి ముస్సు మన్ని రాజుర్ దన్ని వెట కూడ్జి గూర్తార్. బూమి ముస్సు బత్కినికార్ దన్ని రంకు బూలాని పణిజాణిజ్ మత్తు ఆజి సొస్తార్.

3 నస్తవలె, దేవుణు ఆత్మదాన్ నిండ్రీతి మన్ని నజి, అయ దేవుణు దూత బిడిమ్బూమిదు లాగ్గి ఒత్తాన్. అబ్బె దేవుణు పేరుదిజ్ దుసలాడిజిని పేరుదాన్ నిండ్రీతి మన్ని ఏడు బురెక్కిని పది కొమ్ము మన్ని, ఉండ్రీ ఎరాని జంతు ముస్సు బస్తిమన్ని ఉండ్రీ బోదెలిదిజ్ సుడత.

4 అయ బోదెలి నీలి రంగు కూడితి మన్ని ఎరాని రంగుది గొప్ప విలువాతి పాత పొర్పాజి, మెర్సిని బజారం, విలువాతి రంగుపణకుది విలువాతి పూసెజ్ ఇట్టిజి మహాద్. అది కిజి మంజిని సెఇ పణిజాణిజ్. మరి అది కిజిని రంకు బూలాని పణిది సెఇ గుణమ్కు విజు నిండ్రీతి మన్ని ఉండ్రీ బజరమ్ది గిన్న కియుదు అస్త మహాద్.

5 అర్దం కిదెజ్ అట్ ఇ లెకెండ్ దన్ని పేరు దన్ని నొద్దుదు యాలెకెండ్ రాసె ఆత మహాద్.

"బూమి ముస్సు మన్ని రంకు బూలాని బోదెకాజ్ని విజు సెఇ పణిజ అయ్సి ఆతిమన్ని గొప్ప పెరి బబులోను".

6 అయ బోదెలి దేవుణు వందిజ్ కేట ఆతిమన్ని వరి నలని యేసువందిజ్ సాస్యం వెహ్హాజ్ సప్పె ఆతివరి నల ఉణిజి మత్తు ఆజి సొస్త మహాద్. నాను దన్నిజ్ సుడజి నండొ బమ్మ ఆత.

7 నస్తవలె, అయ దేవుణు దూత నావెట ఈహు వెహ్హాన్. "నీను ఎందానిజ్ బమ్మ ఆజిని అయ బోదెలివందిజ్ని మరి ఏడు బురెక్కిని పది కొమ్ముకుమన్ని అది బస్తిమన్ని జంతువందిజ్ డాజితి మన్ని సజతిజ్ నాను నిజి తెలియ కినా".

8 నీను సుడతి అయ జంతు ముజాల్ మహాద్ గాని ఏలు సిల్లెద్. గాని వెటనె దర్లిదాన్ వెల్లి వాజి, దన్ని వందిజ్ తయార్ ఆతిమని లెకెండ్ నాసనం ఆజి సొనాద్. బూమి పుట్టివండ ముజాల్పె, దేవుణు వెట ఎలాకాలం బత్కిని వరి పేరుకు రాసి ఇడ్జిని పున్కమ్దు పేర్కు సిల్లి, బూమి ముస్సు బత్కినికార్ అయ జంతుజ్ సుడజి, ఇక్క ముజాల మహాద్, ఏలు సిల్లెద్. గాని మరి వానాద్లె, ఇజి బమ్మ ఆనార్.

9 ఇక్క నెస్టెజ్ గెణం మన్ని ముస్సు మండ్రెజ్ వలె. అయ జంతుది ఏడు బురెక్ ఇహిజ, అయ బోదెలి బస్తిమన్ని ఏడు గొరొక్.

10 అయ ఏడు బురెక్, ఏడుగురు రాజురిజ్ బా పొలిత మనార్. అయ్దుగురుది కాలం గడజ్సాద్. ఒరెన్ ఏలుబడి కిజి మంజినాన్. కడెవెరిదికాన్ ఇంక రెవిండ్రె. గాని వాండ్రు వానివలె, కండెక్ కాలం వాండ్రు ఏలుబడి కిజి మండ్రెజ్ వలె.

11 అయ క్రూరమతి జంతు ముజాల మహికాండ్రె గాని ఏలు సిల్లికాన్ ఆతి ఎనిమిది రాజు. వాండ్రు, వన్ని ముజాల మహి ఏడు రాజుజ్ సెందితికాన్. వాండ్రు వన్ని వందిజ్ మన్ని ఎలాకాలం మంజిని నాసనమ్దిజ్ సొన్నినాన్.

12 నీను సుడతి మన్ని పది కొమ్ముకు, పది మణిని రాజురిజ్ పొలిత మనార్. వరిజ్ ఏలుబడి కిదెజ్ ఏలుదాక అతికారం దొహ్కావిదె. గాని ఉండ్రీ గడియ అయ క్రూరమతి జంతు వెట రాజుర్ లెకెండ్ వరిజ్ అతికారం దొహ్కాద్లె.

13 వారు ఉండ్రె ఉదెసమ్దాన్ వరి సత్తుని అతికారం విజు అయ జంతుదిజ్ ఒవజెప్పార్లె.

14 వారు గొర్రెపిల్లవెట విదెం కినార్ గాని రాజురిజ్ రాజు, ప్రబురిజ్ ప్రబు ఆతిమన్ని గొర్రెపిల్ల వరి ముస్సు గెలిస్సాన్లె. వాండ్రు కూకె ఆతిమన్నికార్, మరి వన్ని వందిజ్ ఎర్రె ఆతిమన్నికార్ని వన్నిజ్ లోజిజి మంజిని నమ్మకమాతికార్ వన్నివెట మంజినార్లె.

15 నస్తివలె, అయ దేవుణు దూత నజి ఈహు వెహ్సాన్. “నీను సుడేతిమన్ని, అయ గొప్ప రంకు బూలాని బోదెలి బస్తిమన్ని నండో పెరి గడ్డెజ్ ఇనిక ఇహిజ, యా లోకమ్దు మన్ని విజు జాతిజాణికార్, విజు దేసమ్క లోకుర్, విజు తెగాదికార్, విజు బాసెజ్ వర్నికార్.

16 నీను సుడేతి మన్ని అయ క్రూరమతి జంతుని అయ పది కొముకు, అయ రంకు బూలాని బోదెలిదిజ్ ఇస్టం ఆవర్. వారు దన్నిజ్ కల్గితి మన్నికెజ్ విజు లాగ్గి విసీర్జి, నగడి కిజి, దన్ని కండ కొయజి తింజి, మిగిలిత్తిక సిసుదాన్ సుర్పు విసీర్పార్.

17 దేవుణు మాటదు మన్నిలెకెండ పూర్తి ఆనిదాక ఏలుబడి: కిదెజ్ ఇజి అయ క్రూరమతి జంతుజ్, వరి అతికారమ్కు విజు సీదెజ్ ఇజి దేవుణు వన్ని ఉదెసం పూర్తి కిదెజ్ ఇజి వరి మన్సుజ బుద్ది సిత్రాన్

18 మరి నీను సుడేతి అయ బోదెలి బూమి ముస్సు మన్ని రాజురిజ్ ముస్సు ఏలుబడి: కిని అయ గొప్ప పెరి పట్టుమ్నె”.

## 18

### బబులోసు పట్నం అర్పినిక

1 దిన్ని వెనుక మరి ఒరెన్ దేవుణు దూత పరలోకమ్దాన్ డి:గ్జి వానిక నాను సుడేత. వన్నిజ్ గొప్ప పెరి అతికారం మహాద్. వన్నిబాణిజ్ వాతిమన్ని గొప్ప జాయ్దాన్ బూమి విజు జాయ్ ఆతాద్.

2 వాండ్రు గొప్ప పెరి కంటమ్దాన్ ఈహు డేల్వి వెహ్సాన్. “గొప్ప పెరి పట్నం ఆతి బబులోసు అరె ఆతాద్, అరె ఆతాద్. అక్క దెయమ్కాజ్ మండ్రెజ్ ఇల్లు ఆత మనాద్. విజు సెఇ ఆత్మెజ్ బత్తిజిని బాడ్డి ఆత మనాద్. విజు సెఇకెజ్ని ఇస్టం కిదెజ్ అబ్ఇ పొటిజ్ బత్తిజిని బాడ్డి ఆతాద్.

3 ఎందానిజ్ ఇహిజ మత్తు కబిస్సి కల్లు నన్ని, ఉత్పుత్ కిబిస్సి, దన్ని రంకు బూలాని పణిజాణిజ్, ఉణిజి సోస్తిలెకెండ, విజు దేసమ్కాణి లోకుర్ సోస్తార్. బూమి ముస్సు మన్ని రాజుర్ దన్ని వెట గూర్తార్. దన్నిజ్ మహి నండో లావ్ ఆతిమన్ని, ఒడోల్ది ఆసెజ సర్ల కిబిస్సి పణిజాణిజ్ బూమి ముస్సు మన్ని సవుకారిబు గొప్ప ఆస్తి మనికార్ ఆతార్.

4 నస్తివలె, యాలెకెండ మరి ఉండ్రె కంటం పరలోకమ్దాన్ వెహ్సాక వెహ. “నజి ఇస్టమాతికిదెరా, మీరు దన్ని పాపమ్క లోఇ కూడేజి మన్వండ, దన్ని జబ్బుజ్ ఇనికబా మిజి అన్వండ, మీరు దన్ని బాణిజ్ వెల్లి రదు.

5 అది కితి పాపమ్కు ఆగసమ్దు అందితిలెకెండ కొట్టు ఆతె మన్నె. అది కిత్తి తప్పజ్ విజు దేవుణు ఎత్తు కిత మనాన్.

6 అది సిత్తిమన్ని లెకెండె దన్నిజ్ సీదు. అది కిత్తి మన్ని పణిజ రుండి వంతుజ్ దన్నిజ్ కిదు. అది కలప్తిమన్ని దన్ని గిన్నదాన్ ఉండ్రెజ్ రుండి వంతుజ్ కలప్పి దన్నిజ్ సీదు.

7 నాను రాణిలెకెండ బస్త మన్ను. నాను రాండి బోదెలి ఆవెద్. నాను ఎసెజ్బా దుకమ్దాన్ అడేబావ్”, ఇజి దన్ని మన్సుదు అది పొజిజినాద్. అందెజె దన్నిజ్ అదినె ఎస్సానో పొజిజి ఒడోల్ది ఆసెజ సర్ల కిబిస్సి కిత్తిమన్ని పణిజ సమానం ఆతి ససా దుకమ్ని హిమ్సెజ్ దన్నిజ్ మర్జి సీదు.

8 అందెజె, ఉండ్రె రోజుదునె, జబ్బుజ్, దుకం, కరు ఇని బాదెజ్ దన్నిజ్ వానె. దన్నిజ్ తీర్పు తీరిసి సిక్స సీని ప్రబు ఆతి దేవుణు గొప్ప సత్తు మన్నికాన్, అందెజె దన్నిజ్ సిసుదాన్ సుర్పు విసీర్పాన్.

9 అది సురె ఆని సిసుదాన్ వాని గోయ్ సుడేజి, దన్ని వెట గూర్తి మహికార్, దన్ని ఒడోల్ది ఆసెజ సర్ల కిబిస్సి పణిజ వందిజ్ కూడితికారాతి బూమి ముస్సు మన్ని రాజుర్ గుండె కొత్తె ఆజి దన్ని వందిజ్ అడేబానార్.

10 వారు, దన్నిజ్ వాతి సిక్సదిజ్ సుడేజి తియెలాజి దూరం నిల్లి మంజి, అడేబాజి, “అబాయా, అబాయా, గొప్ప పెరి పట్టుమాతి బబులోసు, సత్తుమన్ని పట్టుమా, ఉండ్రె గడియూదునె నాసనం వాతాద్”, ఇజి వెహె ఆజి మంజినార్.

11 అయ పట్నం నాసనం ఆతిక సుడేజి, వరి వస్తుజ్ కొణికార్ మరి ఎయెర్బా సిల్లెర్ ఇజి బూమి ముస్సు మన్ని బేరం కినికార్ దన్నిజ్ సుడేజి గుండె కొత్తె ఆజి అడేబానార్.

12 వారు పూర్తి మహి వస్తుజ్ ఇహిజ, బజారం, వెండి, విలువాతి రంగు పణకుజ్ని పూసెజ్, విలువాతి నూలు పాతెజ్, మరి నీలి రంగు కూడితి ఎరాని పాతెజ్, సిల్కు పాతెజ్, విలువాతి నల రంగునన్ని ఎరాని పాతెజ్, రకరకమ్ది గందం మరాతి ఒస్తుజ్, ఏనుగు కొముకాణిజ్ తయార్ కిత్తి రకరకమ్ది ఒస్తుజ్, నండో విలువ మన్ని మరెకాణి ఒస్తుజ్, కంసు,

ఇనుము, నునాజ్ మన్ని పణకు సెక్కెజ్, దాసిని మరాతి తోలు, వాసనం మన్ని కాయెజ్, దూపం సుర్ని ఒస్తుజ్, వాసనం మన్ని నూనె, కల్లు,

13 బలివ నూనె, మెత్తాని దూరు, గొదము, కోడ్డిజ్, గొర్రెజ్, గుర్రమ్కు, గుర్రమ్కు లాగ్నిని బండిజ్, వెట్టిపణి కిని లోకురిజ్ బా వారు పొర్ని మహార్. ఏలుదాన్ ఇక్కెజ్ కొణికార్ సిల్లెర్ ఇజి వారు అడఃబానార్.

14 “నీను కోరిత్తిమన్ని విలువతి గొప్ప నెగ్గి వస్తుజ్ విజు నీ బాణిజ్ లాగె ఆతాద్. మరి ఎసెజ్ బా మర్జి దోహ్కొఇలెకెండ్, నీ విలువతి వస్తుజ్ ని ఆస్తి విజు సిల్లెండాతాద్ ఇజి సవ్కారిబు దన్నిజ్ వెహ్పార్.

15 అయ పట్టుమ్దు సొన్ని వరి వస్తుజ్ పొర్ని దన్ని బాణిజ్ ఆస్తి గణస్తికార్ ఆతి బేరం కినికార్, దన్నిజ్ వాతిమన్ని బాదెజ్ సుడఃజి తియెలాజి గుండె కొత్తె ఆజి అడఃబాజి యాలెకెండ్ వెహ్పార్.

16 “అబాయా, అబాయా, విలువతి నూలు పాతెజ్, నీలిరంగు కూడితి మన్ని ఎరాని పాతెజ్ ని నలరంగు నన్ని విలువతి ఎరాని పాతెజ్ పొర్నాజి, మెర్నిని బజారమ్ని విలువతి రంగు పణకుజ్ ని పూసెజ్ అయ పట్టుమ్దు దోహ్కొ మహాద్.

17 నిస్సా గొప్ప పెరి ఆస్తి ఉండ్రీ గడియూదునె పాడాత సొహదా ఇజి ఓడఃజు నడిపిసిని విజు నెయ్కొర్, ఓడఃజు పయనం కినికార్, ఓడఃజు పణి కినికార్, సమ్దరమ్దు పణి కిజి బత్కినికార్ విజేరె దూరం నిల్పిమంజినార్.

18 అది సురె ఆజిని సిసుది గోయి సుడఃజి, “యా గొప్ప పెరి పట్టుమ్దిజ్ సమానం ఆతి మరి ఉండ్రీ పట్టుం ఎంబెబా మనాదా”, ఇజి గొప్ప డేల్ని వెహ్పార్.

19 వారు వరి బురెకాజ్ ముస్కు దుల్లి వాకె ఆజి గుండె కొత్తె ఆజి అడఃబాజి.

“అబాయ, అబాయ, సమ్దరం ముస్కు ఓడఃజ్ మనికార్ విజేరె బేరం కిజి ఆస్తి గణస్తి మన్ని యా గొప్ప పెరి పట్టుమ్ది ఆస్తి ఉండ్రీ గడియూదునె నాసనం ఆత సొహాద్”, ఇజి డటం డేల్ని మంజినార్.

20 పరలోకమ్దు మన్నికిదెరా, అయ పట్టుం నాసనం ఆతివందిజ్ మీరు సర్ల ఆదు. దేవుణుదిజ్ నమ్మిత్తికిదెరా, అపొస్తురు ఆతికిదెరా, దేవుణు ప్రవక్తరు ఆతికిదెరా మీరు సర్ల ఆదు, ఎందానిజ్ ఇహిజ అది ఎలాగ మిజి తీర్పు సిత్త మనాదో, అయాలెకెండ్ నె దేవుణు అయ పట్టుం ముస్కు తీర్పు తీరిస్త మనాన్.

21 సస్తివలె, సత్తుమన్ని ఒరెన్ దేవుణు దూత, ఉండ్రీ గొప్ప పెరి జత్త పణకు నన్ని ఉండ్రీ పెరి పణకు పేర్జి సమ్దరమ్దు విసీర్తాండ్రె, “మరి ఎసెజ్ బా తొర్వండాతిలెకెండ్ గొప్ప పెరి పట్టుమాతి బబులోను గొప్ప పెరి టండెజాణిజ్ యాలెకెండ్ అడ్డిగి అరె ఆనాద్లె.

22 టోయ్లెజ్ పలక్కి జాటుజ్, పాటెజ్ పొర్నివరి జాటుజ్, పిరుడిః ఊక్కి జాటుజ్, జోడుఃబాంక ఊక్కి జాటుజ్ మరి ఎసెజ్ బా మీబాణిజ్ వెన్పె ఆఉ. ఎమేణి రకమ్ది పణి కినికాన్ ఎయెన్ బా, మరి ఎసెజ్ బా మీబాన్ తొర్వన్. జత్తపణకుదు సూర్ని జాటు మరి ఎసెజ్ బా మీ లోఇహాన్ విన్సె ఆవి

23 ఉండ్రీ దీవ మరి ఎసెజ్ బా మీలోఇ జాయ్ సీజి మన్ ఏద్. పెండ్లి దజ్డః జాటు గాని పెండ్లి బోదెలి జాటు గాని మరి ఎసెజ్ బా మీలోఇ వెన్పె ఆఉ. నీ బేరం కినికార్, బూమి ముస్కు మన్ని గొప్ప పెరికార్ ఆత మహార్. విజు దేసెమ్కాణి లోకుర్ విజేరె నీ మాయ పణిజాణిజ్, మొసెం కిజి, తప్పు సరిదు నీను నడిపిస్త.

24 మరి దేవుణు ప్రవక్తరిజ్ సస్తివందిజ్, దేవుణుదిజ్ నమ్మితి వరిజ్ సస్తి వందిజ్, బూమి ముస్కు నప్పె ఆతి విజేరె వందిజ్ బబులోను పట్టుమ్దిజ్ యా సిక్స వాతాద్”, ఇజి అయ దేవుణు దూత వెహ్పాన్.

## 19

### దేవుణుదిజ్ పొగిడిదు (హల్లెలుయ)

1-2 దన్ని వెనుక పరలోకమ్దు గొప్ప పెరి మంద లోకురి గొప్ప పెరి కంటం యాలెకెండ్ వెహ.

“దేవుణుదిజ్ పొగిడిదు. మజి రక్కిస్తివన్నిజ్ పొగిడిదు. వాండ్రు ఒరెండ్రె పూర్తి జాయ్ ని సత్తు మన్నికాన్. ఎందానిజ్ ఇహిజ, ఎస్తివలెబా వాండ్రు నిజమాతి, నాయమాతి తీర్పుజ్ సీజినాన్. దన్ని రంకు బూలాని పణిజాణిజ్ బూమి ముస్కు మన్ని వరిజ్ అది పాడః కిత్తాద్. అయ గొప్ప రంకు బూలాని బోదెలిదిజ్ వాండ్రు తీర్పు తీరిసి సిక్సెత్తాన్. వన్ని పణికినివరి నలవందిజ్ వాండ్రు దన్నిజ్ అయాలెకెండ్ నె మర్జి సిక్సెత్తాన్.

3 వెనుక వారు మరి ఈహు డేల్ని వెహ్పార్. “హల్లెలుయ. అది సిసుదు సురె ఆజిని గోయ్ డిన్ ఏండ ఎలాకాలం ముస్కు సొన్ని మంజినాద్.

4 నస్తవలె, అయ ఇరువయ్ నాల్వర్ పెద్దెలుజ్ని, పాణం మన్ని నాల్లి జంతుజ్ పడగ్జి అర్చి “ఆమెన్, దేవుణుదిజ్ పొగిడిడు”, ఇజి వెప్పిని సింహాసనమ్దు బస్తిమన్ని దేవుణుదిజ్ మాడిస్తార్.

5 “మా దేవుణుదిజ్ సెందితికిదెరా, వన్నిజ్ లోజిజి మంజిని ఇజిరికార్ని పెరికార్ ఆతికిదెరా, మీరు విజిదెరె దేవుణుదిజ్ పొగిడిడు”, ఇజి వెప్పిని ఉండ్రీ కంటం అయ సింహాసనమ్దాన్ వాతాద్.

6 నస్తవలె, గొప్ప పెరి గడ్డ సొని జాటులెకెండని పిడుఃగుజి గొప్ప పెరి జాటుదిజ్ పొలితి గొప్ప పెరి మంద లోకురి కంటమ్లెకెండ్రీ ఉండ్రీ జాటు యాలెకెండ్రీ వెప్పినిక నాను వెహ. “హల్లెలుయ! మా ప్రబు ఆతి దేవుణు, విజు దన్నిజ్ అతికారం మన్నికాన్ ఏలుబడిః కిజినాన్.

7 అందెజె మాటు సర్ల ఆజి డాట్వాట్. వన్నిజ్ గవరం సినాట్. ఎందానిజ్ ఇహిజ గొర్రెపిల్ల పెండ్రీ సమయం వాతాద్. వన్నిజ్, పెండ్రీ దజ్డిః దన్నిజ్ అదిసె తయార్ కిజినాద్”.

8 “దన్నిజ్ పొర్పాదెజ్ ఇజి నమ్మితి వరి నీతి నిజాయితి మన్ని పణిజాతి సుబ్బరం ఆతి గొప్ప జాయ్ మన్ని, మెర్నిని పాతెజ్ దన్నిజ్ దోహ్కె.

9 మరి “గొర్రెపిల్ల పెండ్రీ విందుదు కూకె అతికార్ దీవనమ్కు పొందితికార్ ఇజి రాన్అ”, ఇజి అయ దేవుణు దూత నజీ వెప్టాన్. “యా మాటెజ్ దేవుణు వెప్టా నిజమాతి మాటెజ్”, ఇజిబా అయ దేవుణు దూత నజీ వెప్టాన్.

10 అయావలె, నాను వన్నిజ్ పొగిడిఃజి మాడిస్తెజ్ ఇజి వన్ని పాదమ్కాజ్ పడగ్జి అర్తిజ్ వాండ్రు, “నీను అయాలెకెండ్రీ కిమా. నానుబా, యేసువందిజ్ సాస్యం వెప్పిని మీ తంబెరిజవెటని, నీ వెట కూడఃజి పణికినికాండ్రె. దేవుణుదిజ్నె పొగిడిఃజి మాడిన్అ. దేవుణుబాణిజ్ వాతి మాటెజ్, దేవుణు ఆత్మదాన్ వెప్టా దేవుణు పణిమణిసిర్ యేసు తోరిస్తిమన్ని నిజమాతికెజ్నె వెప్పినార్”, ఇజి నజీ వెప్టాన్.

### తెల్లాని గుర్రమ్మున్ను బస్తి మన్నికాన్.

11 మరి పరలోకం రే ఆతిమనిక నాను సుడఃత. ఇదిలో, తెల్లాని గుర్రం ఉండ్రీ తోరితాద్. దన్ని మున్ను బస్తి మన్నికాన్, నమ్మకమాతికాన్, నిజామాతికాన్ ఇని పేరు మన్నికాన్. వాండ్రు నాయమ్దాన్ తీర్పు తీరిసి లోకురిజ్ సిక్కి సీజి, నాయమ్దాన్ వన్ని విదెం కిజి మంజినాన్.

12 వన్ని కణుకు సిసుకొనెజ్లెకెండ్రీ మన్నె. వన్ని బుర మున్ను బజారమ్దాన్ తయార్ కిత్తి రాజురి టోపిజ్ నన్ని, నండో టోపిజ్ మన్నె. వన్నిజె ఆఎండ మరి ఎయెర్బా నెన్ఇ ఉండ్రీ పేరు వన్ని మున్ను రాసె ఆతిక, వన్నిజ్ మనాద్.

13 నలాదు ముడుఃక్తిమన్ని సొక్క వాండ్రు తోడుఃగిత్త మనాన్. దేవుణు మాట ఇని పేరు వన్నిజ్ మనాద్.

14 పరలోకమ్దు మన్ని సయ్నమ్దికార్, కల్లిసిల్లి తెల్లాని నూలు పాతెజ్ తోడిఃగిజి తెల్లాని గుర్రమ్క మున్ను ఎక్కి వన్నివెట సొన్ని మహార్

15 దేసెమ్కాణి లోకురిజ్ డెయ్దెజ్, వన్ని వెయ్దాన్ తెవుగు మన్ని ఉండ్రీ కుర్ల వెల్లి వాజి మహాద్. వాండ్రు ఇనుము డుడ్డుదాన్ వరిజ్ ఏలుబడిః కినాన్. విజు దన్నిజ్ అతికారం మన్ని దేవుణుది సిసు నన్ని కోపం, గనుగుదు ద్రాక్కు పట్టు మటిసి ద్రాసపట్టురసం లాగ్గిలెకెండ్రీ, వాండ్రు మటిసినాన్.

16 రాజురిజ్ రాజుని ప్రబురిజ్ ప్రబు ఇని పేరు వన్ని సొక్క మున్నుని వన్ని కుర్గుదు రాసె ఆత మనాద్.

17-18 మరి ఉండ్రీ దేవుణు దూత పొద్దుదు నిహి మనిక నాను సుడఃత. వాండ్రు గొప్ప పెరి కంటమ్దాన్ డేల్లి వెప్టాన్. “దేవుణు నండో కండ సీని గొప్ప పెరి విందుదిజ్ రదు. రాజురి కండ, మరి సయ్నమ్దిజ్ నడిఃపిసినివరి కండ, మరి గొప్ప సత్తుమన్నివరి కండ, గుర్రమ్క కండ, మరి వన్కా మున్ను బస్తిమన్నివరి కండ, మరి వెట్టిపణిమణిసిర్ ఆఇవరి కండ, వెట్టిపణి కినివరి కండ, ఇజిరి వరి కండ, పెరివరి కండ, యాలెకెండ్రీ లోకుర్ విజేరి కండ తిండ్రెజ్ మీరు రదు”, ఇజి ఆగసం అడిఃగి ఎగ్గిజిని విజు పొటిజ వెప్టాన్.

19 నస్తవలె, అయ గుర్రం మున్ను బస్తిమన్నివన్నివెటని వన్ని సయ్నమ్ది వరివెట విదెం కిదెజ్ ఇజి, అయ క్రూరమతి జంతుని బూమి మున్ను మన్ని రాజుర్ని వరి సయ్నమ్కు విజు కూడఃజి వాతిక నాను సుడఃత.

20 నస్తవలె, అయ క్రూరమతి జంతుని దన్ని పేరుదాన్ బమ్మాని పణిజ్ గుర్తు లెకెండ్రీ కిజి తోరిస్తి మన్ని అబద్దం వెప్పిని ప్రవక్తబా అస్సె ఆతార్. అయ క్రూరమతి జంతుది గుర్తు పోకె ఆతి వరిజ్ని దన్ని బొమ్మదిజ్ పొగిడిఃజి మాడిస్తె మహివరిజ్ వాండ్రు బమ్మాతి పణిజాణిజ్ మొసెం కిజి మహాన్. వారు రిఎర్ గందకం వెయ్జిని సిసు మన్ని బాడ్డిదు పాణం డసానె అర్చె ఆతార్.

21 మిగిలితై మహికార్, గుర్రం మున్ను బస్తిమన్ని వన్ని వెయుదాన్ వాతి కుర్దదాన్ సప్పె ఆతార్. పొటిజ్ విజు వనక పొట పంజు వరి కండ తివో.

## 20

### వెయిజ్ పంటెజ్ మన్ని ఏలుబడి:

1 మరి దర్లిది తాలమ్కియుని ఉండ్రీ గొప్ప పెరి గొలుసు కీదు అస్తిమన్ని మరి ఒరెన్ దేవుణు దూత, పరలోకమ్దాన్ డిగ్జి వాతిక నాను సుడత.

2 వాండ్రు, అయ మొదొహి సరాన్దిజ్, అహిజ అయ గొప్ప పెరి సరాన్ ఇని, నయ్తాను ఇని సెఇ వన్నిజ్ అస్తాండ్రె వెయు పంటెజ్ దాక తొవ్తా డి:స్తాన్.

3 అయ వెయు పంటెజ్ గడ:స్సిదాక ఎమేణి దేసెమ్కాణి లోకురిజ్బా మొసెం కివండ మండ్రెజ్ ఇజి అయ గొప్ప పెరి సరాన్దిజ్, దర్లిదు అర్ప్పి మూక్సి దన్ని మున్ను సీలు పొక్తాన్. వెయిజ్ పంటెజ్ వెనుక వాండ్రు సెగం కాలం వన్నిజ్ కుత్తి డి:స్తాన్.

4 నస్తివలె, నాను సింహాసనమ్కాజ్ సుడత. అయ సింహాసనమ్క మున్ను బస్తిమన్నివరిజ్, తీర్పు తీరిస్తెజ్ అతికారం దొహ్కై. దేవుణు మాట వందిజ్ని యేసువందిజ్ వారు వెప్తి సాస్యం వందిజ్ బురెక్ కత్తె ఆతివరి ఆత్మ సుడత. వారు అయ క్రూరమతి జంతుదిజ్నో, దన్ని బొమ్మదిజ్నో పొగిడి:జి మాడి:న్విండ మహికార్. వరి నొద్దుజ గాని వరి కికాజ్ గాని దన్ని గుర్తు పొకె ఆఎండ మనికార్. వారు బత్తిత్తారె వెయు పంటెజ్ క్రిస్తు వెట కూడ:జి ఏలుబడి: కితార్.

5 (మిగిలితై మన్ని సాతికార్ అయ వెయిజ్ పంటెజ్ వీజినిదాక బత్తివ్తార్) యాకాదె సాతి వరిబాణిజ్ తొలిత మర్జి నిజె ఆనిక.

6 తొలిత మర్జి నిజ్నిదన్నిలోఇ కూడ:జి మంజినికార్ దేవుణు సీని దీవనమ్కు మన్నికార్. వారు దేవుణు వందిజ్ పూర్తి కేట ఆతికార్. నిన్నివరిమున్ను రుండి సావుదిజ్ అతికారం సిల్లెద్. గాని వారు దేవుణుదిజ్ని క్రిస్తుజ్ పూజేరిజులెకెండ మంజి క్రిస్తు వెట కూడ:జి వెయిజ్ పంటెజ్ ఏలుబడి: కినార్.

### సయ్తాను నాసనం ఆజినిక

7 వెయిజ్ పంటెజ్ పూర్తి ఆతి వెనుక సయ్తాను తొహి ఆతిబాణిజ్ డి:స్సి ఆనాన్.

8 వాండ్రు బూమి మున్ను నాల్లి దిక్కుజాణి విజు దేసెమ్కాణి లోకురిజ్ మొసెం కిజి, విదెం కిదెజ్ ఇజి గొప్ప పెరి సయ్తామ్దిజ్ గోగ్ని మాగోగ్ ఇనిబాన్ కూడు:ప్పి తనాన్లె. వరి లెక్క సమ్దరం పడ:కాది ఇస్కలెకెండ మంజినాద్.

9 వారు బూమి మున్ను మన్ని విజు దేసెమ్కాజ్ సాహార్. దేవుణు లోకుర్ మంద కూడ:జిమంజిని, దేవుణు గొప్పజి ఇస్టం కిజిని పట్టుమ్దిజ్ సుటులం ఆతార్, గాని పరలోకమ్దాన్ సిసు డిగ్జి వాజి వరిజ్ సుర్తాద్.

10 వరిజ్ మొసెం కిత్తికానాతి సయ్తాన్ గందకమ్దాన్ కసిని సిసు మంజిని బాడ్డిదు అర్పె ఆతాన్. అబ్బె అయ క్రూరమతి జంతుని అబద్దం వెప్పి వన్ని ప్రవక్త మనార్. అబ్బె వారు రెయుపొగోల్ డి:న్విండ ఎలాకాలం హిమ్సెజ్ కిబె ఆజి మంజినార్.

### సాతికార్ తీర్పు పొందిజినార్.

11 నస్తివలె, గొప్ప తెల్లాజ్ మన్ని ఉండ్రీ పెరి సింహాసనమ్ని దన్ని మున్ను ఒరెన్ బస్తిమన్నికబా నాను సుడత. బూమిని ఆగసం వన్ని ఎద్దుహాన్ ఉహ్కై సాహి లెకెండ సిల్లెండ ఆతె. అక్కెజ్ తొవిండతె.

12-13 మరి సాతికార్ విజేరె, అహిజ పెరికార్ని ఇజిరికార్ విజేరె అయ గొప్పపెరి సింహాసనం ఎద్దు నిహిమన్నిక సుడత. సమ్దరమ్దు సాతికార్ విజేరె సమ్దరమ్దాన్ డి:స్సి ఆతార్. సాతికార్ మంజిని అయా లోకమ్దు మహికార్బా డి:స్సి ఆతార్. నస్తివలె, పుస్తకమ్కు రెకె ఆతె. దేవుణు వెట ఎలాకాలం బత్తిని వరి పేరుకు రాసి ఇడ:జిని మరి ఉండ్రీ పుస్తకమ్బా రెకె ఆతాద్. అయ పుస్తకమ్కాజ్ రాస్తి ఇడ్డిమన్నిలెకెండ, ఒరెన్ ఒరెన్ కితిమన్ని పణిజ తగితి లెకెండ సాతికార్ తీర్పు పొందితార్.

14 సావుని అయా లోకం గందకమ్దాన్ సిసు కసి మంజిని సెరు నన్ని బాడ్డిదు అర్పె ఆతె. యా సిసు మంజిని బాడ్డి రుండి సావు.

15 దేవుణు వెట ఎలాకాలం బత్తిని వరి పేరుకు రాసి ఇడ:జిని పుస్తకమ్దు పేరు తోర్విండతిజి ఎయెన్బా అయ సిసు మంజిని బాడ్డిదు అర్పె ఆనాన్లె.

## 21

## కొత్త యెరూసలేం

1 నస్తవలె, నాను ఉండ్లి కొత్త ఆగాసమ్ని ఉండ్లి కొత్త బూమి సుడత. మొదోహి ఆగసమ్ని మొదోహి బూమి సిల్లెండ ఆతె మహె. నమ్దరమ్బా సిల్లెండ ఆత మహాద్.

2 మరి కొత్త యెరూసలేము ఇని దేవుణు పట్టుం, మాసి సొండ్రెజ్ ఇజి విజు ఇట్కిజి గొప్ప నెగండ్ తయారాతిమన్ని పెండ్లి దజ్డిలెకెండ్, పరలోకమ్దాన్ డిగ్జి వాతిక నాను సుడత.

3 నస్తవలె, “ఇదిలో, దేవుణు లోకుర్ వెట బత్కిని ఇల్లు మనాద్. వాండ్రు, వరి వెటనె బత్కినాన్. వారు వన్ని లోకుర్ ఆన మంజినార్. దేవుణు వన్నిజ్ వాండ్రె ఆజి వరివెట మంజి వరి దేవుణు ఆన మంజినాన్.

4 వాండ్రు వరి కణుకెజాణ్ కణిర్ తేల్పాన్. మరి సావు, దుకం, అడఃబానిక, నొప్పిజ్ ఎసెజ్బా మన్ఉ. ఎందానిజ్ ఇహిజ మొదోహి సజతిజ్ విజు గడఃసై సాహె”, ఇజి అయ సింహాసనమ్దాన్ ఉండ్లి పెరి కంటం వెహ్పిక వెహ.

5 అయ సిమసనమ్దు బస్తి మన్నికాన్, “ఇదిలో నాను విజు కొత్తాకెజ్ కిజిన”, ఇజి వెహ్హాన్. మరి “యా మాటెజ్ నమ్మిదెజ్ అట్టికెజ్ని నిజమాతికెజ్. అందెజి ఇక్కెజ్ రాసి ఇడఃఅ”, ఇజి వాండ్రు నజి వెహ్హాన్.

6 మరి నావెట వాండ్రు ఈహు వెహ్హాన్. “విజు పూర్తి ఆతె. అల్పాని ఒమెగ నానె. మొదోల్ని ఆక్కర్ నానె. ఏహ్పి కట్టివన్నిజ్, పాణం సిని ఏరు వాని ఊటదాన్, వన్నిజ్ ఉండెజ్ ఏరు, నాను సెడ్డినె సిని.

7 సెఇవనకాజ్ ముస్సు గెలిస్సికాన్ వినకాజ్ విజు అక్కు మన్నికాన్ ఆనాన్. నాను వన్నిజ్ దేవుణు ఆన మంజినాన్. వాండ్రు నజి మరిన్ ఆన మంజినాన్.

8 గాని పహ్పిడికార్, దేవుణు ముస్సు. నమకం సిల్లికార్, సెఇ పణిజ్ కినికార్, లోకురిజ్ సప్పికార్, రంకు బూలానికార్, గార్తి కినికార్, బొమ్మెజ మాడిఃస్సికార్, విజు రకమ్ది అబద్దం వర్గినికార్, నిన్నికార్ విజేరె గందకమ్దాన్ సిను కసిని సెరు నన్ని బాడ్డిదు అర్పె ఆనార్. అక్క వరి వంతు. యాకదె రుండి సావు.

9 నస్తవలె, కడఃవెరిది జబ్బుజాణిజ్ నిండ్రతి మన్ని ఏడు కుడుకెజ్ అస్తిమన్ని ఏడు దేవుణుదూతార్లోఇ ఒరెన్ వాజి, “ఇబ్బె రఅ. గొరెప్పిల్ల ఆల్పి ఆతి పెండ్లి దజ్డిడిజ్ నిజి తోరిన్పు”, ఇజి నజి వెహ్హాన్.

10 దేవుణుఆత్మదాన్ నిండ్రతి మన్ని నజి, వాండ్రు గొప్ప ఎత్తు మన్ని ఉండ్లి పెరి గొరొన్ ముస్సు ఒతాండ్రె, యెరూసలేము ఇని దేవుణు పట్టుం, పరలోకమ్దాన్ దేవుణుబాణిజ్ డిగిజి వాజినిక తోరిస్తాన్.

11 అయ పట్టుం, దేవుణు జాయ్దాన్, దగదగ మెరిసిమంజిని జాయ్ మన్ని సూర్య కాంతం ఇని పేరు మన్ని ఎరాని జాయ్ మంజిని గొప్ప విలువాతి రంగు పణకుది జాయ్లెకెండ్ని, గటిమన్ని గాజు లెకెండ్ మహాద్.

12 అయ పట్టుమ్దిజ్ గొప్ప ఎత్తు మన్ని గోడఃని, మరి అయ గోడఃదిజ్ పన్నెండు దారబంద్రమ్కు మహె. అయ దారబంద్రమ్కాజ్ పన్నెండు దేవుణు దూతార్ మహార్. దారబంద్రమ్కాజ్ ఇస్రాయేలుది పన్నెండు తెగెజి పేరుకు రాసె ఆతె మహె.

13 తూర్పు దరిజ్ మూండ్రి దారబంద్రమ్కుని ఉత్తరదరిజ్ మూండ్రి దారబంద్రమ్కుని దసిణదరిజ్ మూండ్రి దారబంద్రమ్కుని పడమాట దరిజ్ మూండ్రి దారబంద్రమ్కు మహె.

14 అయ పట్టుమ్ది గోడఃదిజ్ పన్నెండు పునాదిజ్ మహె. అయ పన్నెండు పునాదిజి ముస్సు గొరెప్పిల్ల అపొస్తురు ఆతి పన్నెండు మణిసిరి పేరుకు తోరిజి మహె.

15 అయ పట్టుమ్దిజ్ని, దన్ని గోడఃజ్ని దారబంద్రమ్కు కొలిదెజ్, నావెట వర్గిని దేవుణు దూత కియుదు బజారమ్దాన్ తయార్ కితిమన్ని ఉండ్లి కొలిని డుడ్డు మహాద్.

16 అయ పట్టుం నాల్గి దరిజ్ ఉండ్రె లెకెండ్ కొల్త మన్నిక. దన్ని నిరిండ్, దన్ని వెడల్పు సమానం మహె. వాండ్రు అయ కొలిని డుడ్డుదాన్ అయ పట్టుమ్దిజ్ కొలిత్తిజ్, దన్ని కొల్త రుండి వెయుజ్ నాల్గి వందెజ్ కిలోమీటరుజ్ ఆతె. దన్ని నిరిండ్, ఎత్తు, వెడల్పు విజు సమానం మహె.

17 వాండ్రు దన్ని గోడఃజి కొలిత్తిజ్, అది లోకురి కొల్తదిజ్ వంద నాల్పయ్ నాల్గి మూరెజ్ దలం మనాద్. అయ కొల్తదానె దేవుణు దూత కొలిత్తాన్.

18 దన్ని గోడః, సూర్య కాంతం ఇని పేరు మన్ని ఎరాని జాయ్ మన్ని విలువాతి రంగు పణకుజాణిజ్ తొహ్తా మనాద్. మరి అయ పట్టుం గాజు లెకెండ్ మన్ని మెర్పిని బజారమ్దాన్ తయార్ ఆతె మనాద్.

19 అయ పట్నమ్మది గోడెజు పునాది రకరకమ్మది గొప్ప విలువతి రంగు పణుకుజాణిజ్ సోకుదాన్ తయార్ ఆత మనాద్. మొదోహి పునాది సూర్య కాంతం ఇని ఎరాని రంగు పణకు, రుండి పునాది నీలి రంగు పణకు, మూండ్రి పునాది జమున రంగు పణకు, నాల్లి పునాది ఆకు రంగు పణకు.

20 అయ్దు పునాది వయ్డుర్యం ఇని రంగు పణకు, ఆరు పునాది కెంపు ఇని రంగు పణకు, ఏడు పునాది బజారం రంగు పణకు, ఎనిమిది పునాది గోమెదికం ఇని రంగు పణకు, తొమ్మిది పునాది పుస్యరాగం ఇని రంగు పణకు, పది పునాది సొర్లసూనియం ఇని రంగు పణకు, పదకొండు పునాది పద్మరాగం ఇని రంగుపణకు, పన్నెండు పునాది సుగందం ఇని రంగు పణకాణిజ్ కిత్త మనాద్

21 దన్ని పన్నెండు దారబంద్రమ్మకు పన్నెండు ముజెలుజాణిజ్ కిత్త మనాద్. ఉండ్రి ఉండ్రి దారబంద్రం ఉండ్రె పూసదానె కిత్త మనాద్. పట్నమ్మది రోడుజ్ అడ్డి మన్నికెజ్ తోరిజిని గాజుదిజ్ పోలితి బజారమ్దాన్ తయార్ ఆత మనాద్.

22 విజు దన్నిజ్ అతికారం మన్ని ప్రబు ఆతి దేవుణుని గొరెప్పిల్ల దన్ని దేవుణు గుడిః ఆతిమన్నిజ్ అయ పట్నమ్ లొఇ దేవుణు గుడిః ఉండ్రెబా తోర్వితాద్.

23 అయ పట్నమ్మదిజ్ జాయ్ సీదెజ్ ఇజి పొద్దుబా నెలబా అక్కర్ సిల్లెద్. ఎందానిజ్ ఇహిజ, దేవుణు గొప్ప జాయ్నె పట్నం విజు జాయ్ సీజి మహాద్. గొరెప్పిల్ల దన్నిజ్ దీవలెకెండ్ మహాద్.

24 విజు దేసెమ్కాణి లోకుర్ అయ జాయ్దు నడిఃనార్. బూమి ముస్కు మన్ని రాజుర్, వరిజ్ కల్గితిమన్ని విజు గవ్దరమ్మని ఆస్తి అయ పట్నమ్ లొఇ తనార్.

25 అబ్బె రెయు సిల్లెండ, జాయ్నె మన్నిజ్ ఎసెజ్బా అయ పట్నమ్మది దారబంద్రమ్మకు కెహ్విద్.

26 విజు దేసెమ్కాణికార్ వరి ఆస్తిజ్ని వరిజ్ గవ్దరం తప్పికిజ్ విజు అయ పట్నమ్ లొఇ తనార్.

27 దేవుణు వెట ఎలాకాలం బత్తిని వరి పేరుకు రాసి ఇడఃజిని గొరెప్పిల్లాది పుస్తకమ్మదు పేరుకు మన్నికారె, దన్ని లొఇ సొనార్. గాని సెఇ పణిజ్ కినికార్, మొసెం కినికార్, సిగు ఆనికెజ్ కినికార్ ఎయెర్బా దన్ని లొఇ సొండ్రెజ్ అట్వర్.

## 22

### పాణం సీని గడ్డ

1 నస్తివలె, కల్లిసిల్లి అద్దం నన్ని, పాణం సీని ఏరు మన్ని గడ్డ, దేవుణుని గొరెప్పిల్లది సింహాసనమ్దాన్ సొన్ని మంజినిక అయ దేవుణు దూత నజీ తోరిస్తాన్.

2 అయ గడ్డ పట్నమ్మది రోడు నడిఃమిహాన్ సొన్ని మహాద్. అయ పెరి గడ్డాది రుండి ఒడ్డుజ పన్నెండు నెలెజ, పన్నెండు సుట్టు కాయెజ్ కాసి పట్టు సీని పాణం సీని మరాన్ మనాద్. అయ పాణం సీని మరాతి ఆకుజ్ విజు జాతిజుణి వరిజ్ జబ్బుజాణిజ్ నెగెండ్ ఆదెజ్ పణి కినాద్.

3 దేవుణు సయిప్ సిత్తి మహికెజ్ ఇనికబా అయ పట్నమ్మదు మన్విద్. దేవుణుని గొరెప్పిల్లది సింహాసనం అబ్బె మంజినాద్. వన్ని పణికినికార్ వన్నిజ్ పొగడిఃజి మాడిఃసి మంజినార్.

4 వారు దేవుణు ఎద్దు మంజి. మొకొం నిండ్రు వన్నిజ్ సుడఃజి మంజినార్. వన్ని పేరు వరి నొద్దుజ రాసి ఆనాద్లె.

5 అబ్బె ఎసెజ్బా రెయు మన్విద్. దీవ జాయ్ గాని పొద్దు జాయ్ గాని వరిజ్ అక్కర్ సిల్లెద్. ఎందానిజ్ ఇహిజ, ప్రబు ఆతి దేవుణునె వరిజ్ జాయ్ సీజి మంజినాన్. వారు అంతుసిల్లెండ ఎలాకాలం ఏలుబడిః కిజి మంజినార్.

6 మరి అయ దేవుణు దూత, నజీ యాలెకెండ్ వెహ్హాన్. “యా మాటెజ్ నమ్మిదెజ్ తగ్గికెజ్ని నిజమాతికెజ్. ఎందానిజ్ ఇహిజ ఇనికెజ్ వెహ్హెజ్ ఇజి వన్ని ప్రవక్తరిజ్ వెహ్హిని దేవుణు, బేగి జర్గిదెజ్ మన్ని వనకాజ్ వన్నిజ్ సెందితివరిజ్ తోరిస్తెజ్ ఇజి వన్ని దూతెజ్ పోక్తాన్.

### యేసు మర్జి వాజినాన్.

7 “ఇదిలో నాను బేగినె వాజిన. యా పుస్తకమ్మదు మన్ని, దేవుణుబాణిజ్ వాతి మాటెజ్, వెంజి, లొజిజి, నడిఃనికాన్ దేవుణు సీని దీవెనమ్మకు మంజినికాన్ ఆనాన్”.

8 యోహాను ఇని నాను, యా సజతిజ్ వెహ మన్ను, సుడఃత మన్ను. నాను యాకెజ్ వెంజి వెనుక, యాకెజ్ నజీ తోరిసిని వన్నిజ్ పొగడిఃజి మాడిఃసైజ్ ఇజి అయ దూత పాదమ్కాజ్ పడఃగ్జి అర్ద.

9 గాని వాండ్రు, “పోని, నీను యాలెకెండ్ కిమా. నాను, నీవెటని, ప్రవక్తరు ఆతి నీ తంబెరిజువెటని, యా పుస్తకమ్మదు మన్ని మాటెజ్ లొజిజి నడిఃనివరివెట కూడఃజి పణికినికానె. దేవుణుదిజె పొగడిఃజి మాడిఃసైఅ”, ఇజి నజీ వెహ్హాన్.

10 మరి నావెట ఈహు వెహ్తాన్. “యా పుస్తకమ్దు మన్ని మాటెజ్ దేవుణు వెహ్తాకెజ్, అందెజె దిన్నిజ్ మూక్కి సీలు కిదెజ్ ఆవెద్. ఎందానిజ్ ఇహిజ యాకెజ్ విజు జర్గిదెజ్ కాలం డగ్గు ఆత మనాద్.

11 తప్పు పణిజ్ కినికాన్ మరి ఒదె తప్పు పణిజ్ కిపిన్. ఎయెన్బా కెలార్ బూలానికాన్ మరి కెలార్ బూలాజి మనీన్. నీతి మన్నికెజ్ కినికాన్ మరి ఒద్దె నీతి మనికెజ్ కిపిన్. దేవుణు వందిజ్ కేట ఆతికాన్, మరి అయాలెకెండ్ దేవుణు వందిజ్ కేట ఆజి మనీన్”.

12 “ఇదిలో, నాను బేగినె వాజిన. నాను వానివలె ఒరెన్ ఒరెన్ వన్నిజ్, వాండ్రు కితి పణిదిజ్ తగితి లెకెండ్ సీదెజ్ ఇనాయం తనా.

13 అల్పాని ఒమెగ నానె. మొదొహి - కాన్ని కడెవెరిదికాన్ నానె. మొదొల్ని ఆకార్ నానె.

14 పాణం సీని మరాతి పట్టు తిండ్రెజ్ అక్కు మన్నికారాజి దారబంద్రమ్కాణిజ్ అయ పట్టుమ్ లొఇ సాండ్రెజ్ వరి సొక్కెజ్ నొర్బానికార్ దేవుణు సీని దీవెనమ్కు మంజినికార్ ఆనార్.

15 నుకుడిజ్ని మత్రిసినికార్, రంకు బూలానికార్, లోకురిజ్ సప్పికార్, బొమ్మెజు మాడిసినికార్, అబద్దమ్దిజ్ ప్రేమిసి అయాలెకెండ్ కిజి మంజినికార్ విజేరె వెల్లి మంజినార్.

16 దేవుణు సజమ్కాజ్ మన్నివరివందిజ్, యా సజతిజు వందిజ్ సాస్యం వెహ్తాజ్ యేసు ఇని నాను, నా దూతెజ్ పొక్త మన్న. నాను దావీదువెలెదాన్ సోత్తి సిగ్గుని వన్ని తెగాదు పుట్టికాన్. కోడిజామ్దు సోని గొప్ప జాయ్ మన్ని నుక ఆత మన్న”.

17 మరి దేవుణు ఆత్మని పెండ్లి దజ్డిజి, “రఅ”, ఇజి వెహ్సినార్. యాక వినికాన్బా “రఅ’ ఇజి వెహ్తాజ్వలె. ఎయెన్బా ఏహ్కా కట్టిజు వాండ్రు రపిన్. ఎయెన్బా వాండ్రు కోరిత్తిలెకెండ్, పాణం సీని ఏరు ఇని ఇనాయం సెడ్డిజె లొసిన్.

18 యా పుస్తకమ్దు మన్ని దేవుణు ప్రవక్త వెహ్తా మాటెజ్ వెనివరిజ్ విజేరిజ్, వారు జాగర్త మండ్రెజ్ ఇజి నాను వెహ్సినిక ఇనిక ఇహిజ, ఎయెన్బా దిన్నివెట మరి ఇనికబా కూడుఃప్తిజు యా పుస్తకమ్దు రాస్తిమని జబ్బుజ్ విజు, దేవుణు వన్ని మున్ను తపిస్సాన్.

19 ఎయెన్బా యా పుస్తకమ్దు మన్ని దేవుణు ప్రవక్త వెహ్తా మాటెజు, ఇనికబా లాగితిజు, వన్నిజ్ దేవుణు యా పుస్తకమ్దు వెహ్తామని పాణం సీని మరాతి పట్టు తిండ్రెజ్ అక్కు సిల్లికాన్ లెకెండ్ కినాన్. నెగ్గి పట్టుమ్దు వంతు మన్ఇకాన్ లెకెండ్ కినాన్.

20 యా సజతిజు వందిజ్ సాస్యం వెహ్సాకాన్, “నిజమె నాను బేగినె వాజిన”, ఇజి వెహ్సినాన్. ఆమెన్. ప్రబు ఆతి యేసు రఅ.

21 ప్రబు ఆతి యేసు దయాదర్మం దేవుణులోకుర్ విజెరె వెట మనీద్. ఆమెన్.